



Compromisu xi majo xi casahmi nina cojo xuta

Chiquihuitlán Mazatec New Testament

Contents

San Mateo	1
San Marcos	63
San Lucas	103
San Juan	178
Hacutjin Casahmi Apóstol	231
Romanos	295
1 Corintios	322
2 Corintios	347
Gálatas	364
Efesios	373
Filipenses	382
Colosenses	389
1 Tesalonicenses	396
2 Tesalonicenses	401
1 Timoteo	404
2 Timoteo	412
Tito	417
Filemón	420
Hebreos	422
Santiago	443
1 Pedru	450
2 Pedru	458
1 Juan	463
2 Juan	470
3 Juan	471
San Judas	473
Apocalipsis	475



**Compromisu xi majo xi casahmi nina cojo xuta (El
Nuevo Testamento en el mazateco
de Chiquihuitlán de Juárez ... y en español)**

New Testament in Mazatec, Chiquihuitlán (MX:maq:Mazatec, Chiquihuitlán)

Language: Mazatec, Chiquihuitlán

Provided by: Wycliffe Bible Translators, Inc.

This print-on-demand edition of Scripture is produced and provided at cost by the Digital Bible Society in partnership with the Bible League of Canada, Open Doors International, and other missions and translation agencies. To order additional copies of this or other Bibles, please visit www.dbs.org (USA), www.bibleleague.ca (Canada), and www.opendoors.org (Europe).

Copyright and Permission to Copy

Copyright © 1991 Wycliffe Bible Translators, Inc.

Copyright © 1991 Wycliffe Bible Translators, Inc. Scripture text used by permission.

© 1991, Wycliffe Bible Translators, Inc.

PDF, ePub, and MOBI Bible covers and design are copyrighted 2017 by the Digital Bible Society (www.dbs.org).

PDF generated on 2017-08-24 from source files dated 2017-08-24.

3ee7eab4-2659-54e8-8e90-b0a016392daf

ISBN: 978-1-5313-0388-4

Cjuandajyihî xî catsihindu San Mateo Tsêhê Jesucristu

Xutachanga rê Jesucristu

1 Xujun vihi ne, setaha xujun ñihî rê xutachanga rê Jesucristu, me xî tjê rê David, hacuaha tjê rê Abraham.

² Abraham ne, me vêhê xî xutachanga xî má nahmî rê Isaac. Isaac ne, me vêhê xî xutachanga xî má nahmî rê Jacob. Jacob ne, me vêhê xî xutachanga xî má nahmî rê Judá cojo hntšê cha. ³ Judá ne, nahmî má me tsêhê Fares cojo Zara; naa rê me ne, Tamar hmî rê. Fares ne, me vêhê xî xutachanga xî má nahmî rê Esrom. Esrom ne, me vêhê xî xutachanga xî má nahmî rê Aram. ⁴ Aram ne, me vêhê xî xutachanga xî má nahmî rê Aminadab me xî xutachanga xî má nahmî rê Naasón, me vêhê xî xutachanga xî má nahmî rê Salmón. ⁵ Salmón ne, nahmî rê Booz me; hane Rahab ne, naa rê me. Booz ne, nahmî má me tsêhê Obed. Naa rê me vê; má Rut. Obed ne, me vêhê xî xutachanga xî má nahmî rê Isaí. ⁶ Isaí ne, me vêhê xî xutachanga xî má nahmî rê David. David jan ne, me vêhê xî cavitexa nangui rê Israel. Hane David ne, me vêhê xî xutachanga xî má nahmî rê Salomón. Naa rê Salomón ne, titjun chjuun rê Urías camá me.

⁷ Salomón ne, me vêhê xî xutachanga xî má nahmî rê Roboam. Roboam ne, me vêhê xî xutachanga xî má nahmî rê Abías. Abías ne, me vêhê xî xutachanga xî má nahmî rê Asa. ⁸ Asa ne, me vêhê xî xutachanga xî má nahmî rê Josafat. Josafat ne, me vêhê xî xutachanga xî má nahmî rê Joram. Hane Joram ne, me vêhê xî xutachanga xî má nahmî rê Uzías. ⁹ Uzías ne, me vêhê xî xutachanga xî má nahmî rê Jotam. Jotam ne, me vêhê xî xutachanga xî má nahmî rê Acáz. Acáz ne, me vêhê xî xutachanga

xî má nahmî rê Ezequías. ¹⁰ Ezequías ne, me vêhê xî xutachanga xî má nahmî rê Manasés. Manasés ne, me vêhê xî xutachanga xî má nahmî rê Amón. Amón ne, me vêhê xî xutachanga xî má nahmî rê Josías. ¹¹ Josías ne, me vêhê xî xutachanga xî má nahmî rê Jeconías cojo hntšê cha. Nixtin hya ne, xutaxín ne, cafaxaxin me xuta nangui rê Israel, quijicojo me xuta jan nangui Babilonia.

¹² Hane xî cama quiji me Babilonia, Jeconías vê ne, camá me vêhê xutachanga xî má nahmî rê Salatiel. Salatiel ne, me vêhê xî xutachanga xî má nahmî rê Zorobabel. ¹³ Zorobabel ne, me vêhê xî xutachanga xî má nahmî rê Abiud. Abiud ne, me vêhê xî xutachanga xî má nahmî rê Eliaquim. Eliaquim ne, me vêhê xî xutachanga xî má nahmî rê Azor. ¹⁴ Azor ne, me vêhê xî xutachanga xî má nahmî rê Sadoc. Sadoc ne, me vêhê xî xutachanga xî má nahmî rê Aquim. Aquim ne, me vêhê xî xutachanga xî má nahmî rê Eliud. ¹⁵ Eliud ne, me vêhê xî xutachanga xî má nahmî rê Eleazar. Eleazar ne, me vêhê xî xutachanga xî má nahmî rê Matán. Matán ne, me vêhê xî xutachanga xî má nahmî rê Jacob. ¹⁶ Jacob ne, má me nahmî rê José, xihin rê María naa rê Jesús me xî hacuaha yaha ñihî rê Mesías.

¹⁷ Cuatjin camá xî cavatju teñuju ndiya xî cavatju xî cjín xuta tisetin me nixtin rê Abraham hisca nixtin rê David. Hacuaha cama teñuju ndiya xî cjín xuta tisetin me nixtin rê David hisca hya xî xutaxín jan ne, cafaxaxin me xuta nangui rê Israel, quijicojo me xuta nangui Babilonia. Hane hacuaha camá teñuju ndiya tsêhê nixtin hya hisca nixtin xî catsin Mesías.

Hya xî catsin Jesucristu

¹⁸ Cuitjin camá nixtin xî catsin Jesucristu: María, naa rê Jesús ne, tacun vasen cjuavixan rê na cojo José. Peru

chaja sa xi cjuaha xicjin na cojo me ne, casacu rë na quihndi ngatsë rë Hasen rë Nina. ¹⁹ José, me xi cuixan cojo na jan ne, tyjahi me cojo cjuatacun rë me xcun Nina. Hane xi mijí scandi me cjuasava rë na, catsingatahacacun me xi taha hma ni ne tsismicacun me na. ²⁰ Cuatjin catsingatahacacun me xi sahmi me peru hora hya ne, cafehetejen ngu ángel rë Nina ngajni chini rë me, hane cuitjin cachja ángel:

—José, ngaye quihndi tjë rë David, ximacjintacuín xi chjehentse María cuma chjuun riji na ta, sacuaha quihndi xi yaha na ne, ngatsë rë Hasen rë Nina, camá xi casacu rë na. ²¹ Tsin rë na ngu quihndi xihin. Quihndi vë ne, tehe ñihi rë Jesús. Cuatjin cjuaha ñihi ta, tsëhë xi cuaxëtje rë xuta rë tsëhë jyë rë me.

²² Yëjë xcusun vihi ne cuatjin cama, cojo sa xi cuetjucaa jain cjua xi cachja profeta nixtin hatsëë cuitjin:

²³ Ngayujun ni nutsujun ta ngu chjuun xungun ne, sacu rë na ngu quihndi xihin.

Quihndi jan ne, suañihi me Emanuel. Emanuel ne, vëhë cjua xi vijne: Nina ne, jiya me ngajni naja.

²⁴ Ngajan xi hya xi cavasca rë José ne, casahmi me tutjin cachja ángel cojo me. Cafahatsja me María ne xi camá chjuun rë me na. ²⁵ Peru hisca xi cavatju catsin quihndi ne, sehe caviyuju cojo xicjin me. Hane casuañihi rë me quihndi jan, Jesús.

Ngu jo cha xi vechu cjuatacun rë ne, cavëë cha niñú tsëhë Jesucristu

2 Nixtin xi catsin Jesús nangui Belén, distritu Judea, nixtin hya ne, Herodes vitexa me xuta nangui vë. Hacuaha nixtin hya ne, ngu jo cha xi vechutaha cjuatacun rë ne, cavetjun cha ladu vetjucaa tsuhi cafehe cha nandya Jerusalén. ² Hane cuitjin cachja cha:

—¿Jani sacu niji quihndi xi cuitexa nangui Israel? ta cahyin xi cavetjucaa

niñú rë me ngajan ladu vetjucaa tsuhi. Hane nduvintjenguín me xi chjihinrcuín me.

³ Hya xi cama ne, jemu cama xti rë Herodes xi tu cahndë me cjua jan; cojo xuta nangui Jerusalén ne, cama xti rë me. ⁴ Hya xi cama ne, Herodes ne, cajin-dayavaha me yëjë ni nahmi xi matitjun cojo yëjë cha vicuya cjuachacun rë xuta nangui Israel. Sehe cavinenguise me ¿jani xi tsin xu me xi má Cristu? ⁵ Hane cuitjin cafayangui me:

—Ngajan nandya Belén, distritu Judea tsin ta cuatjin catsihindu profeta tsëhë nandya jan xi ngajan tsin quihndi:

⁶ Ngaye, nandya Belén, ngaye nandya tsëhë xuta tjë rë Judá, hacuaha vengui chji ri xcun xuta matitjun nangui Judá.

Ta ngajni rë xuta riji ne cuetjutsejen ngu me xi cuitexa rë xuta naha, xuta nangui Israel.

⁷ Hya xi camá ne, Herodes ne, cajin-dayahma me cha xi vechu cjuatacun rë jan. Cafahataha rë me cha. ¿Mé hora cjuaquixi tsëhë mé nixtin camatsejen niñú jan? ⁸ Ngaxtun vëhë ne, sehe cavitexa me cha xi cjue cha Belén. Hacuaha cuitjin cachja me cojo cha:

—Tangun ngajan Belén. Chjinengunsunndujun yëjë tsëhë quihndi. Hane xi sacu nuju cjuaquixi ne, ningatjun ná cjua sehe cojo ngahan ne hacuaha cjué cjuahárcun quihndi.

⁹ Xi cavihndë cha xi cuicun vi cjua jan, cavetju cha quiji cha. Hane niñú xi cavetjucaa ngajan ladu vetjucaa tsuhi jan ne, hacuaha quiji titjun hisca xi cavechu cahndë hiscan xi jiña quihndi, hane ngajan cavasén. ¹⁰ Hane xi cavëë cha niñú xi ngajan cava sen ne, jercu tu ndama camaha ni rë cha. ¹¹ Hane xi cavisehen cha ndihya hiscan siu me ne, cavëë cha quihndi jan. Hacuaha cavëë cha naa rë me, xi hmi rë María. Sehe quiji cavixcuhnchi cha cafaharcun cha

quihndi jan. Hane sehe cavuxaha cha hiscan hinchá rë cha cuatjo, hane casua cha oro cojo tyjungunsa cojo tyjungunje xi hmí rë mira. ¹² Hya xi cavatju vëhë ne, tsëhë xi cachja chini cojo rë cha xi cuyaa in cha taha ladu hiscan tacun Herodes ne, tahaxin cavuya cha nangui rë cha.

Quiji me hiscan nangui Egipto

¹³ Hya xi quiji cha xi vechu cjuatacun rë jan ne, cafehetsejen ngu ángel rë Nina ngajñi chini rë José, hane cachja cuitjin:

—Tisatjinhngue, tihincueje quihndi cojo naa rë. Tiyun hiscan nangui Egipto. Hane ngajan cuinechun hisca xi tsingátju cjuá xi cuyun. Cuatjin nihñu ta tsëhë xi Herodes ne, cuanguise me quihndi xi tsiquehen me.

¹⁴ Hane cavisatjenhnga me nixten quijicojo me quihndi jan cojo naa rë, café me Egipto. ¹⁵ Hane xi caféhe me ngajan Egipto ne, ngajan caviyujutaha me hisca nixtin xi cahme Herodes. Cuatjin cama sehe hatuxa camachihin cjuá xi catsingátju Nina cojo profeta rë me hatsëë nixtin. Cuitjin chja cjuá jan: “Cajindáya rë quihndi naha xi nduvaniji tsëhë nangui Egipto.”

¹⁶ Hya xi camachaya rë Herodes xi camá cavindacha cha xi vechu cjuatacun rë jan ne, jercu cama cjan rë me. Hane cavitexa me yo xi tsiquehen rë yëjë ni quihndi xihin xi cjëë cjuë jyan nu, yëjë ni quihndi nandya Belén cojo distritu rë. ¹⁷ Vëhë cjuá xi cachja Nina xi catsihindu profeta Jeremías:

¹⁸ Vinuhya rë cjuava ngajan nandya Ramá.

Jemu tjin cjuandusin.

Na Raquel ne, jihndava na ngatsë rë quihndi rë na.

Hane tsajin cjuetacun xi cuma rë na ta tsëhë xi ha café quihndi.

¹⁹ Hane xi cavatju cahme Herodes ne, cavuya cafehetsejen ngu ángel rë Nina

ngajñi chini rë José ngajan Egipto ne, ²⁰ cuitjin cachja:

—Tisatjinhngue tihincueje quihndi cojo naa rë. Tihinniji nandya Israel. Tihin ta tsëhë xi ha cahme cha xi meje tsiquehen rë quihndi. Cuatjin cachja.

²¹ Hya xi camá ne, cavisatjenhnga José ne, sehe cavetju me quijicojo me quihndi cojo naa rë, hane sehe cavisehen nga me nangui Israel. ²² Peru xi cahndë José xi Archelaus vitexa me distritu Judea ta me vëhë vitexa me ngojo rë nahmi rë me, Herodes, vëhë xi camacjincacun José mijí cjue me ngajan. Hane xi cachja chini cojo rë me ne, sehe cavisehen me distritu Galilea. ²³ Caviyujutaha me ngajan ngu nandya xi hmí rë Nasaret. Cuatjin cama sehe cuetjucaa cjuá xi catsihindu profeta tsëhë me xi xuta ne, cuichja me xi Jesús ne, xuta Nasaret me.

Cachja Juan Vitenda rë Xuta ngajan ngu xín tsëhë nandya

3 Nixtin hya ne, cavetjucaa tsejen Juan Vitenda rë Xuta ngajan nguijña tsëhë distritu Judea. ² Cuitjin catsiquihndë me xuta:

—Nindeyun cjuatacun nuju ta, camatiña nixtin xi Nina ne, cuitexa me ngasunhndë.

³ Cuatjin tsëhë cha Juan vihi, cha vihi xi camahindu tsëhë cha xcun xujun xi chja cjuá rë profeta Isaías xi chja cuitjin: Cuitjin jercu hñu tsiquihndë ngu xuta ngajan hiscan jemu xín tsëhë nandya:

“Tuhun chjinu ndiya xi cuinduva Nina; hacuaha ninguixun cjuatacun nuju tsëhë me.” Cuatjin cachja me.

⁴ Tsjian rë Juan jan ne, tsja rë chu camellu camá hacuaha cojo ngu cinturón chuxin tsihñu me cahntsua me. Hane xi jinë me ne, chu nchahva cojo tsjen rë chu tusen. ⁵ Hane jemu cjín xuta quijitjengui me Juan, xuta nandya Jerusalén, xuta distritu Judea cojo xuta

xi siutahandee rë ndajyë Jordán. ⁶ Xuta jan, xi caviyacun me jyë rë me cojo Nina camá cavitenda Juan me ngajan ndajyë Jordán.

⁷ Peru xi cavutsejen Juan xi cjín xuta tifehe tixtenda me; cha tsëhë partidu fariseo cojo cha tsëhë partidu saduceo ne cachja me cojo cha cuitjin:

—¡Ngayujun ni ngayun quihndi rë chu tsehu matsejen ne!, ¿yo cavinchangui nuju xi nihñu ngahñu xi cjuetjuntjun tsëhë castigu xi hatuxa tsingatju Nina?

⁸ Sá xi meje jain cjuetjuntjun matsejen ne, nihñu suvá cjuandaja sacuatjin sahmi xuta xi catsindeya jain me cjuat-acun rë me. ⁹ Xicanujuun cahntsua xahasen nuju cjua vihi: “Ngayaan ne, tsajin mé cuma naja ta, tsëhë xi tjë rë Abraham ngayaan.” Xicanujuun cuatjin matsejen ta, nguehe cuichjá cojo nuju ta Nina ne, hisca cojo ndyojo xi cuicun vi ne, cuma sahmi me xi cumá tjë rë Abraham. ¹⁰ Chutsujun ta ngayun matsejen ne, tangun ngayun cojo yatjë xi ha quitahachjine quicharcu tyjama rë xi cuetsihin xti rë. Yëjë ni yatjë xi suaain tu xi ndaja matsejen ne, xti rë, sehe cueti.

¹¹ Ngahan matsejen ne, cojo nandá ni tiviténda nuju, peru sehe cuinduva me xi hitsë sa jyë ngahñu tjin rë cjuatacun rë xi cuma ná ngahan, me xi hitsë sa jyë hnga cojo cjuatacun rë xi cuma ná ngahan. Hane me vëhë cueya me Hasen rë Nina cahntsua xahasen nuju, hacuaha tangun me sacuaha ngu ndihi xi tsityjahi rë cjuatacun nuju. ¹² Me vëhë matsejen ne, sacuaha xi ha yahatsja me quicha xi tsicaha rë xtë rë trigu cojo sa xi cuma tyjahi ndaja trigu xi casechun rë tsëhë me, hacuaha cjuaya me trigu tyjahi xi cuinchandaja me, hane xtë rë jan matsejen ne, cuaca me xcun ndihi xi tsajin nixtin coho. —Cuatjin cachja Juan.

Caxtenda Jesús

¹³ Nixtin hya ne, hacuaha cavetju Jesús tsëhë distritu Galilea hane cafehe me ndajyë Jordán xi xtenda me. ¹⁴ Peru mijí sua Juan cahndé ta cachja me:

—Hitsë sa ndaja xi ngayun cuitendun ná. Hacuuiin xi ngahan cuitenda nuju.

¹⁵ Ngajan xi cafayangui Jesús cuitjin:

—Jéya, cuatjin ndatjin xi cuma quihndë ta mameje rë xi cumachihin yëjë xcusun xi cavitexa Nina.

Hane catsingatihin Juan ne, cavitenda me Jesús. ¹⁶ Xi cama caxtenda Jesús ne, xi tu tivetju me tsëhë nandá jan ne, ngajan cavëë me xi ngahnga ne, catuxaha. Hane Hasen rë Nina ne, canduvajnetsejen casesun rcu me. Hane sacuaijihi xcusun rë ngu paloma jyihi. ¹⁷ Hacuaha canuhya rë ngu cjua ngajan ngahnga xi cachja cuitjin:

—Cha vihi xi quihndi naha xi hmú cá-cun. Jemu ndama ná ngatsë rë cha.

Cafahachuva Satanás Jesús xi choho sahmi me

4 Hya xi camá ne, Hasen rë Nina ne, quijiniji xu cojo Jesús ngajan ngu xín tsëhë nandya ta ngajan cjuahachuva xitsehen me.

² Hya xi cama ne, Jesús ne, yachan nixtin cojo yachan nixten cajinii me niñu. Hya xi cavatju vëhë ne, jercu camavojo rë me. ³ Sehe camatiñataha xu xitsehen xi cjuahachuva rë me. Cachja cojo rë me cuitjin:

—Sá xi ngaye jain xi Quihndi rë Nina ngaye ne, tinoje cojo ndyojo vihi ne, catama niñu. —Cuatjin xu cachja xitsehen cojo rë me.

⁴ Peru cuitjin cafayangui me tsëhë xitsehen jan:

—Xcun xujun rë Nina ne, cuitjin camahindu: “Hacuuiin suvá ngatsë rë niñu xi siu xuta cjuahñu ta hacuaha

mameje rë me tsëhë yějë ni cjuar xi catsingatju Nina.”

⁵Sehe xitsehen jan quijicojo xu rë me nandya Jerusalén, nandya ximinchacun, quijisun xu me rcu cjin yungun xi matitjun ⁶sehe ngajan xi cachja xu xitsehen:

—Sá xi ngaye jain xi Quihndi rë Nina ngaye ne, ningatjin yojo riji tsëhë ndyá ne hisca nangui. Ndaja hye ta tsajin mé cuma ri ta xcun xujun rë Nina ne, cuitjin chja:

Nina ne cuitexa me ángel rë me xi sahmi ri cuidadu.

Cjuahántsa ri,

cojo sa xi ntsacui ne, sacuinhmuaain rë cojo hisca ngu ndyojo.

⁷Ngajan xi cafayangui xu Jesús tsëhë xitsehen cuitjin:

—Hacuaha cuitjin chja xcun xujun rë Nina: “Mijí rë xi chjuhunchuvun Nina nuju.” —Cuatjin xu cachja Jesús.

⁸Hane ngu ndiya nga quijicojo xitsehen Jesús, quijicojo rë me ngu ndetjún hnga ne, sehe catsingacun xitsehen jan me jinguyjé ni nandya tsëhë ngasunhndë cojo yějë ni cjuanchina xi tjin rë. ⁹Ngajan xi cachja xitsehen cojo rë me cuitjin:

—Suá ri yějë nandya xi cuacún vë cojo cjuanchina rë. Hatuxa suá ri sa xi cuindove cuiticjexcuin nguehe xi chjehercuin ná.

¹⁰Sehe cafayangui Jesús tsëhë xitsehen cuitjin:

—Tihinxin Satanás, ta tsëhë xi xcun xujun rë Nina ne, cuitjin camahindu: “Meje rë xi chjuhuncun Nina naja, hacuaha ngu ni me vëhë xi meje rë xi nihñuchuhun hacutjin xi meje rë me.”

¹¹Xi cuatjin xu cachja Jesús cojo xitsehen jan ne, cavetjuxin tsëhë me. Hane cafehe tjengui ángel me xi cjuahacuenda rë me.

Jesús ne, vetsihin sahmi me xa ngajan distritu Galilea

¹²Xi camachaya rë Jesús xi jiya Juan Vitenda rë Xuta ndavaya ne, quiji me distritu Galilea. ¹³Hane cavetjuxin me tsëhë nandya Nasaret, quiji cavejña me nandya Capernaum. Nandya jan ne, tacun tjeheh rë ndajyë. Hane nandya jan ne tsëhë xuta tjë rë Zabulón cojo Neftalí. ¹⁴Cuatjin cama sehe camachihin cjuar xi camahindu xcun xujun xi chja cjuar rë profeta Isaías xi chja cuitjin:

¹⁵Xuta xi viyuju me nangui rë Zabulón cojo Neftalí, nangui ngajan ngunda ndajyë Jordán, ngajan tjeheh rë ndachacun, tsëhë distritu Galilea, nangui rë xutaxín.

¹⁶Xuta jan xi jñu cjuatacun rë me, cavëë me ngu me xi sacuaha ngu ndihi seti xi sua rë me cjuahasen.

Xuta xi jemu tsavi siu me tsëhë cjuaveya, ndihi jan ne casua rë me hasen rë.

¹⁷Nixtin hya ne, Jesús ne, cavetsihin catsujiyihiya me cachja me cojo xuta cjuar rë Nina. Cuitjin cachja me:

—Nindeyun cjuatacun nuju ta tsëhë xi camatiña nixtin xi Nina ne cuitexa me ngasunhndë.

Jesús ne, jindaya me cha xi tjun cumá xuta ladu rë me

¹⁸Cama ngu nixtin xi tsujiyihiya me ngajan tjeheh laguna tsëhë Galilea ne, cavëë me jo me xi hntsé, ngu me xi hmí rë Simón cojo ngu me xi hmí rë Andrés. Titsingatjenya me changa ngajñi ndachacun, tsëhë xi hatuxa xá rë me xi faha me chu ti. ¹⁹Hane Jesús ne, cachja me cojo me cuitjin:

—Nduvun cuanguen cojo ná. Hane cuicuyá nuju xi cuangun nuvun xuta xi cuisehen me ladu naha ngojo rë xi nuvun chu ti. —Cuatjin cachja me.

²⁰Hane hora vëhë ni caviyuju me changa jan, hane cavetju me quiji me cojo Jesús.

²¹Hitsë sa nguvan ne, cavëë Jesús jo cha xi hacuaha hntsë: Jacobo cojo Juan, cha quihndi rë Zebedeo. Hinchä cha cahntsua barcu cojo nahmi rë cha, ngajan tifuyataha cha changa rë cha. Hacuaha cajindaya Jesús cha xi cjucojo me cha. ²²Sehe caviyuju cha barcu jan, hane cavejña cha nahmi rë cha quiji cha cojo Jesús.

²³Hane Jesús ne, catsujihiya me yëjë ni ladu tsëhë distritu Galilea. Xi cavisehen me yungun ne, cavicuya me xuta, cachja me cojo xuta cjuandajyihi tsëhë gubiernu xi sahmi Nina. Hacuaha catsirqui me xuta hmu rë; camandaja xuta tsëhë yëjë ni chihin cojo tsëhë yëjë ni cjuahmu rë me. ²⁴Hane cavitsojo cjuä tsëhë cjuarcun xi casahmi Jesús. Cavitsojo cjuä jan hisca yëjë nangui xi hmí rë Siria. Hane xuta ne, cafehetjengui me Jesús yaha me xuta hmu rë tsëhë yëjë xcusun chihin hane catsirqui me. Hacuaha catsirqui me xuta xi hinchä xitsehen cahntsua xahasen rë me cojo xuta xi má rë me chajan cojo xuta xi cahme yojo rë. ²⁵Hane quijitjengui xutacjín jan Jesús ne, xuta tsëhë cahndé xi cuicun vi: tsëhë të nandya xi tsëhë Decápolis, cojo nandya Jerusalén, cojo yahnga sa xuta tsëhë distritu Judea, cojo xuta tsëhë nangui ngunda tsëhë ndajyë Jordán.

Xuta xi ndaja tsëhë cojo xuta xi hmu tsëhë

5 Hya xi cavutsejen Jesús xi camatangun xutacjín jan ne, quijini me ngu ndetjun, hane xi cavéjña Jesús ne, casahmitiña xuta tsëhë Jesús. ²Sehe cavetsihin cavicuya me xuta jan cuitjin:

³—Jemu ndaja tsëhë me xi machaya rë me xi tsichaja sa rë cjuatacun rë me xcun Nina matsejen ta satë rë me gubiernu xi sahmi Nina.

⁴Jemu ndaja tsëhë me xi jihndava me tsëhë cjuachoho matsejen ta Nina sua rë me cjuetacun.

⁵Jemu ndaja tsëhë xuta jeya, xuta xi hacuiin xta me matsejen ta, cjuahatsja me nangui xi sua Nina.

⁶Jemu ndaja tsëhë me xi sacuaha sahmi yahnga xuta xi vojo rë xi fi tjengui rë comida, cuanitjin tjengui me xcusun xi cuma tyjahi cjuatacun rë me xcun Nina matsejen ta, cuechu nixtin xi cuiyujuchihin cjuatacun rë me.

⁷Jemu ndaja tsëhë me xi tjin rë cjuayumatacun cojo xuta, ta hacuaha cjuahatsja me cjuayumatacun tsëhë Nina.

⁸Jemu ndaja tsëhë me xi tjin ngu cjuatacun tyjahi cahntsua xahasen rë me matsejen ta, scuëë me Nina.

⁹Jemu ndaja tsëhë me xi tsinguejyu rë xuta xi chohovëë xicjin me matsejen ta, me vëhë jan ne, cuichja Nina xi quihndi rë me.

¹⁰Jemu ndaja tsëhë me hya xi tsujihiya tjengui xuta me cojo cjuahngatacun ngatsë rë xi tjin rë me ngu cjuatacun cojo Nina matsejen, ta satë rë me gubiernu xi sahmi Nina.

¹¹Jemu ndaja tsujun ngayun ne sá xi ngatsë naha choho cuichja xuta tsujun o sá xi tsujihiya tjengui nuju xuta cojo cjuahngatacun o sá xi cojo cjuandesu tsi-canijiyë me ngayun. ¹²Nixtin hya ne, jemu catama sua rë xahasen nuju ngatsë rë cjuañihi vë ta jemu jyë ngu cjuandaja xi tacunya nuju ngajan ngahnga. Cuanitjin ni choho casahmi xutachanga naja cojo profeta rë Nina xi caviyuju hatsëë nixtin.

Xuta ne, meje rë xi sahmi me sacuaha naxa

¹³Ngayun, tjin hacutjin machji rëhë ngayun ngajñi rë xuta sacuaha sahmi naxa xi sahmi xtya rë ngu xichine. Ta sá xi naxa cjuë xtya rë ne, tsajin sa ngu

xcusun xi cuma sahmi xtya rë. Hane sá xi cjuë xtya rë ne, tsajin me machji rëhë ta, scandi ni xuta, ngajan ni sune me.

Má naja ndihi rë ngasunhndë

¹⁴ Cuanitjin ne, tjin hacutjin machji rëhë ngayun ngajni rë xuta sacuaha machji rëhë ngu ndihi xi sua hasen rë. Ta sá xi ndetjun tacun nandya matsejen ne, hatuxa tsejen; tsajin me xi cuatsa rë. ¹⁵ Cuanitjin ne, hacuaha tsajin ngu xuta xi ha xcun xi ha cavetaha rë me ngu ndihi ne, sehe cjuaha me cueyahma me ngahma rë ngu caxa. Hatuxa cjuaha me cuejñatsejen me cahndë rë cojo sa xi xuta xi siu me hiscan xi seti ndihi jan ne, cuechu hasen rë. ¹⁶ Hacuanitjin chuva vëhë, meje rë xi nihñu cjuandaja xi scuëë xuta xcusun xi nihñu hane ngatsë rë xcusun jan ne, sahmi jyë me sahmi hnga me Nahmi nuju xi tacun me ngahnga.

Cjua xi cachja Jesús tsëhë ley rë xuta tjë rë Israel

¹⁷ Xi caningatuuntacuun matsejen xi nduvá tsinguétsun ngahñu rë ley xi cat-sihindu xutachanga naja Moisés o cjua xi cachja profeta. Cahndë rë xi tsinguétsun ne, sahmechihin cjua jan. ¹⁸ Hatuxa cuichjá cojo nuju cjuaquixi ta hya xi tacun cuaha ngahnga ne tacun cuaha ngasunhndë ne, cumaji chjahanxin rë cjua rë ley jan cojo yëjë ni letra rë ta, cuejña cuaha hiscan cumachihin cjua rë. ¹⁹ Vëhë xi tu yo ni xi sahmicuendaain tsëhë hisca ngu rquí cjua rë, hane sá cuinchangui me yahnga xuta xi cuanitjin sahmi me, chuva cuengui chji rë me hya xi sahmi Nina gobiernu. Peru tu yo ni me xi cjuahacuenda me hacuaha tsingacun me xuta xi cjuahacuenda me ley jan, me vëhë cuma titjun me hya xi sahmi Nina gobiernu. ²⁰ Nguehe cuichjá cojo nuju ngayun ta meje rë xi hitsë sa tyjahi cjuatacun nuju xi cumá rë cjuatacun rë xuta xi vicuya me ley o sá xi xuta par-

tidu fariseo, ta sá tsajin ne, satiin nuju gobiernu xi sahmi Nina.

Cjua xi cavicuya Jesús tsëhë xuta xi hngacacun

²¹ Ha hyun cjua xi cafaha xuta hatsëë nixtin xi chja xi canicuun xingun hacuaha chja xi yo xi tsiquehen xicjin matsejen ne, cjue me xcun juez xi tsichuva me jyë rë me. ²² Peru cuichjá cojo nuju xi hisca yo xi macjan rë cojo xicjin ne, satë rë xi tsichuva me. Hane yo xi chjataha xicjin ne, cjue xcun juez xi matitjun. Cuanitjin yo me xi cuichja tsëhë xuta: “Ngarca ngayun”, cuechji me tsëhë jyë rë me ngajan xcun ndihi xi tsajin nixtin coho.

²³ Ngatsë rë vihi, sá xi hora xi vejñu chjë nuju ngasunscun ne, sá xi tu ñahñu ni vitsjen nuju xi choho canihñu cojo xingun ²⁴ ngajan catejñavasen chjë nuju, titjun cuangun tjengun xingun, hane chjayun rë me cjuaninchataha hane xi camandaja yun cojo me, sehe cuyun cuejñu chjë nuju jan.

²⁵ Sá ndiya tivangun cojo xuta xi meje cuinchajyë nuju xcun xutaxa rë ne, meje rë xi cuisiajmuchuhun cojo me, cojo sa xi ngajni nuju cuma chihin ta sá tsajin ne, cjucojo nuju me xcun juez. Hane juez matsejen ne, squindaya me mayu sehe sahmi nuju me entregadu, hane cjue cueya nuju me ndavaya. ²⁶ Ta cuichjá cojo nuju cjuaquixi ta hatuxa tsajin nixtin xi cuetjun tsëhë ngajan jinguyëjë rë xi cjëë cuechjun yëjë ni tujún xi quitjun.

Cjua xi cavicuya Jesús tsëhë xuta xi sahmi cjuatsehen cojo rë ngu xi hacuiin tsëhë me

²⁷ Ha hyun cjua xi cafaha xuta hatsëë nixtin xi chja cuitjin: “Xicanihñuu cjuatsehen cojo rë ngu chjuun o cojo rë ngu xihin xi hacuiin tsujun.” ²⁸ Peru cuichjá cojo nuju xi hisca xi ngu xihin xi vutsejen me ngu chjuun xi macacun me cojo na,

ngajñi cjuatacun rë me ne, ha casahmi me cjuatsehen cojo ran.

²⁹ 'Hindë sá xi cjuatacun nuju meje rë xi nihñu ngu jyé tsëhë xcusun xi chut-sujun cojo tuxcuun ladu quixi, hitsë sa ndaja tsujun sá xi chjuhunxun tuxcuun jan chandunxun cojo sa xi hacuiin tsitsehen nuju, ta hitsë sa vengui chji rëhë xi ma chaja nuju ngu rquí yojo nuju hane hacuiin xi cuangun jingu hiscan xi má hasen rë nima castigu. ³⁰ Cuanitjin ne, sá xi cjuatacun nuju meje rë xi nihñu ngu jyé cojo ntsun quixi ne, hitsë sa venguichji rëhë xi chandunxun ntsun jan ta hitsë sa ndaja tsujun xi machaja ngu rquí yojo nuju tsëhë xi cuangun jingu hiscan xi má hasen rë nima castigu.

Jyé rë xuta xi tsismi xicjin me sehe cuixan cojo jingu sa

³¹ 'Hacuaha cafaha xuta hatsëë nixtin cjua xi chja cuitjin: "Ngu cha xi tsismi chjuun rë ne catejña cha ngu xujun tsja chjuun jan xi ha quihndë mijí rë cha na."

³² Peru nguehe cuichjá cojo nuju ta yo xi tsismi chjuun rë handasa ndastu mé cjuatsehen casahmi chjuun jan cojo ngu xihin xi hacjahi, hacuaha tjin rë me jyé ta sehe ngatsë rë xi catsismi me na ne sahmi chjuun jan cjuatsehen. Hacuaha yo xi cuixan cojo chjuun jan ne, tangun jyé rë cojo ngu xi sahmi cjuatsehen cojo ngu chjuun xi hacuiin chjuun rë.

Hacutjin meje rë xi sua cjuaquixi naja

³³ 'Hacuaha hyun cjua xi cafaha xuta hatsëë nixtin xi chja cuitjin: Hya xi cuinújun: "Vëë Nina", hatuxa sahmi ngu-jyë xi nihñuchuhun cjua xi canújun.

³⁴ Peru nguehe cuichjá cojo nuju ta hora xi cuisiajmu cojo xingun ne, hacuiin cuinújun xi vëë Nina, hacuiin cuinújun xi vëë sa jingu sa quihndi ngasunhndë. Cuinujuun xi vëë ngahnga ta ngahnga ne, tacun Nina xi vitexa me. ³⁵ Hacuaha cuinujuun xi vëë ngasunhndë ta nga-

sunhndë ne, tangun sacuaha ngu yatë hiscan xi tine ntsacu Nina. Cuinujuun xi vëë Jerusalén ta Jerusalén ne, nandya xi tsëhë Nina, Me xi Matitjun. ³⁶ Cuinujuun cuitjin: "Sá xi quixiin jain cjua naha ne, catinduva ngu cjuacjintacun xi cuatjun", ta tsëhë xi ngayun ne, hisca hitsë cumaji cuitexun sá xi cuma jma tsjarcun o sá xi cuma tyjava. ³⁷ Hya xi cuisiajmu, sá xi "joho" nújun ne, cuanitjin ni cuitejña; o sá xi "jéya" nújun, hacuaha cuanitjin ni ndatjin ta, sá xi vetjutë visiajmu cjua cjín jan ne, cjua cjín jan ne, nduva tsëhë cjuatsehen.

Meje rë xi nihmutacun xuta xi chohovëë naja

³⁸ 'Hyun cjua xi cafaha xuta hatsëë xi chja cuitjin: Cha xi cuahaxin tuxcun xicjin ne, hacuaha chjahaxin rë tsëhë cha. Cuanitjin cha xi cuahaxin nehñu xicjin ne, hacuaha cuanitjin ni chjahaxin rë nehñu cha. ³⁹ Peru nguehe cuichjá cojo nuju ta, canicuyuun cjuatsehen. Sá xi tjin yo xi vanguihmu nuju, yo xi vajaya ngu ladu tsa nuju matsejen ne, nicuyun sa ngu ladu catajaya. ⁴⁰ Cuanitjin ne, sá xi tjin yo xi cjuecojo nuju xcun juez xi fahataha chingá nuju matsejen ne, hacuaha tuhun rë me cojo yëjë ni tsjian hasu nuju. ⁴¹ Cuanitjin ne sá xi ngu xuta ne, sahmi nuju me ngu jyë xi chanuju chaha rë me ngu kilómetro, cahndë rë ngu ni, tanguncujun jo kilómetro. ⁴² Yëjë ni xuta xi fehya nuju me mé xi machaja rë me matsejen ne, tuhun rë me. Hane sá xi scuxetaha nuju me, tuhun rë me.

⁴³ 'Hyun cjua xi cafaha xuta hatsëë nixtin xi chja cuitjin: "Nihmutacún xuta xi siutahndee nuju; choho hyun xuta xi má condra nuju." ⁴⁴ Peru cuichjá cojo nuju ta, hacuaha nihmutacún xuta xi má condra nuju; ndaja nihñu cojo xuta xi choho vëë nuju me. Nújunyumuntuhun rë xuta xi tsuyihiya tjengui nuju me cojo cjuahngatacun. ⁴⁵ Sá xi cuatjin nihñu

ne, cumatsejen xi chjayunngun sacuaha sahmi Nahmi nuju xi tacun ngahnga ta, Nina ne, sahmi me xi ngu chihin ni vetju-caa tsuhi xi casahmi me hane vechu hasen rē hiscan siu xuta tsehen hacuaha hiscan siu xuta ndaja. Hacuaha sahmi me xi vaha tsi xcun jnu rē xuta xi tjin xi cun rē me, hane hacuaha xcun jnu rē xuta xi tsajin xi cun rē me xcun Nina. ⁴⁶ Tsajin yo xi sua chjǐ nuju tsēhē xi hmutacún xuta xi hmucacun nuju me matsejen, tsēhē xi hacuaha hisca cha faha tujúnsa (xi jemu vaxē cha tujún) matsejen ne, hmucacun cha xuta xi hmucacun rē cha. ⁴⁷ Hacuanitjin ne, sá xi suvun cuinújun nina cojo xuta nuju ne, ¿há hitsē sa ndaja yun xi cuma rē yahnga xuta? ¡Jéya! Hisca xuta xi macjaain rē me Nina ne, tjin rē me xcusun ndaja vē. ⁴⁸ Vēhē xi mameje rē xi tangun cojo ngasunhndē nuju cojo ngu xcusun xi tyjahi chichihin ni, cumatangun xcusun nuju cojo xcusun rē Nina xi tyjahi chichihin cjuatacun rē me.

**Jesús ne, vicuya me tsēhē
cjuandaja xi meje rē sahmi xuta**

6 ¹ Hya xi nihñu ngu cjuandaja ne, nihñu nguñajatacun, hacuiin nihñu tsēhē xi scuēē nuju xuta; ta sá tsajin ne, ndastu me chji sacu tsēhē Nahmi nuju xi tacun ngahnga. ² Cuanitjin ni sacuaha cjua vē, hya xi tuhun ngu caridad matsejen ne, xi canijanu ngu tyjo xi tuhun cumachaya rē xuta cjuandaja jan. Hacuaha cuatjin sahmi xuta xi jo xcun jo hntsua me hya xi sua me caridad ngajan yungun o ndiya ngatsē rē xi vaxēndaja xuta me. Tichjá cojo nuju ta ha vēhē ni chji sacu rē me. ³ Vēhē xi ngayun ne, hya xi tuhun caridad ne, catuun cumachaya rē ntsun ladu xcun mé xi tuhun cojo ntsun ladu quixi. ⁴ Cuatjin hya xi tuhun caridad ne, tuhunhmu matsejen ne, hane xi cuatjin nihñu ne, Nahmi nuju xi tacun ngahnga ne xi cavēē

me cjuandaja xi canihñu ne, sua me chji nuju.

**Jesús ne, vicuya me
hacutjin nihña oración**

⁵ ¹ Hacuaha hya xi nihñu oración, xi canihñuu sacuaha xuta xi jo xcun jo hntsua me ta me vēhē ne, jemu meje sahmi me oración cahntsua yungun cojo sa hiscan sahmi cru ndiya tē hiscan xi scuēē xuta me. Nguehe cuichjá cojo nuju ta ha vēhē ni chji sacu rē me. ⁶ Vēhē xi ngayun ne, hya xi nihñu oración ne, techjun tingotjo ndya nuju hane tangun cahnchun, ngajan hma nihñu oración cojo Nahmi nuju xi tacun ngahnga ta ngu ni me vēhē xi tacun me cojo nuju. Hane Nahmi nuju jan xi vēē me yējē xcusun xi hincha hma ne, sua me chji nuju.

⁷ ¹ Hacuaha hya xi nihñu oración, caveyunnanguun ngu cjua xi hisca suvun vijniircun sacuaha xcusun xi sahmi xuta xi hvíin me cjua rē Nina, ta xi má rē me vē ne, xi hitsē cjín cjua cuichja me ne, hacuaha hitsē sa cuahacuenda Nina tsēhē me. ⁸ Mijí rē xi nihñu xcusun vēhē, ta hisca chaja sa xi chjahyun rē Nahmi nuju xi tacun ngahnga ne, ha vēē me mé xcusun xi mameje nuju. ⁹ Cuanitjin nújun hya xi nihñu oración: Ngayun Nahmi niji xi nechun ngahnga ne,

meje rē xi ngayijin ni xuta ngasunhndē chjihinrcuin nuju.

¹⁰ Nduvun nihñu niji gobiernu.

Catamachihin cjuatacun nuju nguehe ngasunhndē sacuaha ngahnga xi ha camachihin.

¹¹ Nchunchujun ni ne, tuhun niñu xi xini.

¹² Ninchatuhun niji tsēhē yējē ni jyé niji ta hacuaha ngayin suvin ni tininchatihin rē xuta xi choho sahmi me cojo niji.

¹³ Caningatjuun xi chjaháchuva niji cojo cjuatacun niji ta, tuhun niji ngahñu xi cuma cuetjinxin tsēhē cjuatsehen.

Tsujun suvun gobiernu cojo ngahñu, hacuaha tsujun ni hasen rē ngahñu cjuu nuju. Tsujun yējē vë, yējē nu, yējē nixtin.

¹⁴ Hya xi cajnetaha oración jan, cachja sa Jesús cuitjin: sá xi ninchatuhun xuta xi choho casahmi me cojo nuju ne, hacuaha Nahmi nuju xi tacun ngahnga ne, tsinchataha me jyé nuju, ¹⁵ peru sá xi ninchatuun xuta xi choho casahmi me cojo nuju ne, hacuaha Nahmi nuju jan ne, tsinchataain me jyé nuju.

Jesús vicuya me tséhë hya xi nechan xun rē Nina

¹⁶ Ngayun ne, nixtin xi nechun xun rē Nina ne, nihñuu va xcusun nuju sacuaha sahmi xuta xi jo xcun jo hntsua me ta sahmi va me xcusun rē me, ta me vëhë ne, hisca catsindeya me xcusun rē me sehe cumatsejen xi tacun me xun rē Nina. Cuichjá quixi cojo nuju ta ha vëhë chji xi sacu rē me. ¹⁷ Vëhë xi ngayun ne, hya xi nechun xun rē Nina ne, tinchacun, nihñu tyjahi yojo nuju. ¹⁸ Cuatjin nihñu cojo sa xi tsajin yo vëë rē xi nechun xun rē Nina, ta suva Nina, Nahmi nuju vëë me. Hane me vëhë ne cuechji me yun.

Cjuanchina xi tacunya ngahnga

¹⁹ Cavetjuun cjuanchina nuju nguehe ngasunhndë, ta nguehe ne, sahmi dañu chu xavi cojo xutsë. Nguehe ne cuma scuxahaya cha chëjë, hane sehe tsichëjë cha. ²⁰ Hitsë sa ndaja ne, tetjún cjuanchina ngajan ngahnga ta ngajan ne tsajin dañu xi sahmi chu xavi cojo sa xutsë. Ngajan ne scuxaain cha sehe xi tsichëjë cha. ²¹ Cuatjin meje rē xi ngajan cuetjun tsujun ta, tséhë xi hiscan tetjo cjuanchina nuju ne, hacuaha ngajan quitaha cjuatacun nuju cojo.

Ndihi rē yojo naja

²² Tuxcuun matsejen ne, vëhë xi sacuaha ndihi rē yojo naja. Vëhë xi hya xi tuxcuun ndacun ne, hatuxa seya cjuu hasen cahntsua yojo naja. ²³ Peru sá xi tuxcuun hmu matsejen ne, hacuaha ma jñu cahntsua yojo naja. Sacuaha hasen xi jiya cahntsua yojo naja ne, sá xi hacuiin hasen xi cjuaquixi jain ta, suva jñú ne, ijercu tu jñú camahani cuma sa!

Tsajin yo xi ma fahacuenda xa tséhë Nina cojo tséhë cjuanchina

²⁴ Tsajin yo xi ma fahacuenda xa tséhë jo patrón ta, tséhë xi choho scuëë rē patrón xi tjun hane tsihmu cacun rē patrón xi majo jan. O sá tsajin ne, jemu cuetaha yojo rē cojo patrón xi tjun hane patrón xi majo jan ne, hisca sahmicuendaain rē. Vëhë xi xi ngu tangun ni ne, cumaji nihñu hacutjin xi meje rē Nina cojo hacutjin meje rē cjuanchina tsehe xi tséhë ngasunhndë.

Sahmi cuidadu Nina xuta ladu rē me

²⁵ Vëhë xi cuichjá cojo nuju ta hacuiin cuityjanguntacun sá sacu o sá sacuiin mé xcusun xi xinu xi sua nuju ngahñu. Hacuaha hacuiin cuityjanguntacun sá sacu o sá sacuiin tsjian xi chujun. Hitsë sa vengui chji rē cjuahñu nuju xi cumá rē xi chinu, hacuaha hitsë sa vengui chji rē yojo nuju xi cumá rē tsjian xi chujun. ²⁶ Chutsujun chu nisë xi vitjen chu ngahnga ta hacuiin tsitjë chu, hacuiin fanchi chu, hacuaha tsajin rē chu ndyanga hiscan cuinchandaja chu xi sinë chu, peru Nahmi nuju xi tacun me ngahnga ne, tsicjen me chu. Ngayun ne, hitsë sa vengui chji nuju xi cumá rē chu nisë vë. ²⁷ Hacuaha tsajin hisca xi ngu xuta xi cuma cuesuntaha me cjuahñu rē me hisca ngu hora ta hacuiin cavatsë chji me cjuahñu rē me. Tu mahya ne xi tjercu vityanguicacun me.

²⁸ 'Cuanitjin ne, ¿mé má chji rēhē xi cuityjanguntacun tsēhē tsjian xi chujun? Chutsujun naxu liri xi vetju nguijña ta tsihyaain nachjun hacuaha fahyaain tsjian rē. ²⁹ Peru ngahan cuichjá cojo nuju ta tsjian rē xutachanga naja Salomón ne, handasa jercu ndacun camahani, peru hitsē sa ndajyihi tsejen ngu naxu vēhē xi cuma rē tsjian jan. ³⁰ Sá xi cuatjin tsicaja Nina xca nguijña xi ngu nixtin ne siutaha nguijña, hane xi tu cuma nchujun nga ne, cueti ne, hitsē guan sa ngayun xi hatuxa tsicaja nuju me. Peru ngayun ne, cjēē cumangutacunndujun cojo me. ³¹ Vēhē xi hacuiin cumacjintacún hane cuinen-gunsuun cuitjin: “¿Mé comida xini? o sá ¿jani sacú niji xi sihin? o sá ¿mé tsjian chijin?” ³² Hacuiin ta, tsēhē xi xcusun vēhē ne, xuta xi hvíin me cjua rē Nina ne, me vēhē xi vityanguicacun me xcusun vēhē. Peru ngayun ne, Nina Nahmi naja ne, ha vēē me xi machaja nuju xcusun vēhē. ³³ Tityjanguntacun hacuaha nechunyun rē gu-biernu xi sahmi Nina, hacuaha catama tangun cjuatacun nuju cojo cjuatacun rē me ne, hane yējē ni xcusun vēhē ne, quitahacoo sa sacú nuju. ³⁴ Cuanitjin ne, hacuiin cumacjintacún tsēhē mé xi cuma cuatju nchujuni, ta xi cumá rē nchujuni matsejen ne, hya yaha cjuacjintacun rē. Ngu nixtin ngu nixtin ne, chjuhun cuendun cjuacjintacun rē ta jima ngu nixtin cojo tsēhē.

Mijí rē xi nichuvan jingu sa xuta cojo cjuatacun rē me

7 ¹ Hacuiin nichuvun jingu sa xuta cojo cjuatacun rē me, sehe hacuiin tsichuva Nina ngayun. ² Canichuvuun ta sá tsajin ne, chuva xi quixi yun cojo xuta ne, hacuaha cuanitjin quixi Nina cojo nuju; hacuaha chuva xi nichuvunyun matsejen ne, vēhē ni tsichuva Nina yun. ³ ¿Hacutjin má xi matsejen nuju

xtē xi jiya tuxcun xingun? ta ngayun ne hitsē sa jyē xi jiya túxcun. ⁴ ¿Hacutjin má xi cuma cuinújun cojo xingun xi meje naxun xtē xi jiya tuxcun me jinguyējē rē xi suvun matsejen ne, machayiin nuju xi hitsē sa jyē xta xi jiya túxcun vē ni? ⁵ Ngayun xuta xi jo xcun jo hntsua ne, naxun titjun xtē jyē xi jiya túxcun vē, sehe cumatsejenndaja nuju xtē xi jiya tuxcun xingun cojo sa xi cuma naxun.

⁶ Sá xi tjin nuju mé xi venguichji rēhē sacuaha tjin rē cjuandaja xi casua Nina yun, tetjuhunnudjun hacuiin tu yo ni tuhun rē ta sá tsajin ne, xuta jan ne, tsitjungui me xi ngayun jemu ximinchacun xi cuma nuju. Hacuaha cuichjataha nuju me.

Chjahyun rē Nina mé xi machaja nuju

⁷ 'Chjahyun rē Nina, hane sua nuju me. Tinchunsun, hane sacú nuju. Tinújun hacuaha chjahyun cahndé, hane Nina sua me cahndé xi cuisuhun cuinújun cjuacjintacun nuju. ⁸ Cuatjin nihñu ta, yējē ni xuta xi fehya rē me ne, cuahatsja me, hane yo xi vanguise ne, sacú rē me, hane yo xi chja hacuaha fehya cahndé me ne, sacú cahndé cuisehen me.

⁹ ¿Há tjin ngu nahmi xi, hya xi quihndi rē me cjuehya ngu niñu ne, cahndé rē xi vēhē ne, sua me ngu ndyojo, ¹⁰ o sá xi cjuehya quihndi yojo rē chu ti ne, cahndé rē vēhē ne, sua me ngu yē? ¹¹ Sá xi ngayun xi xuta jyē yun ma tuhun rē quihndi nuju xcusun xi ndaja. Hitsē guan sa Nina Nahmi naja xi tacun me ngahnga xi jyē hnga me cojo cjuandaja rē me ne, me vēhē vēē me mé cuatjo ndaja xi cuma sua me xuta xi cjuehya rē me.

¹² 'Sacuatjin xi meje nuju xi sahmi xuta cojo nuju matsejen ne, hacuaha cuanitjin ni nihñu cojo rē me: cuatjin nihñu ta cojo ngu xcusun ni xi tinihñu vēhē ne, ngayun tinihñuchuhun yējē ni cjua rē ley cojo yējē ni cjua xi catsihindu profeta.

Ejemplu tsêhê tingotjo xcu

¹³ Cuisuhun hiscan sahmi Nina gu-
biernu sá xi cuisuhun tingotjo xcu ta,
tsêhê xi sá xi cuisuhun táha tingotjo të
o ndiya xi cjín me vatjun me ne; vêhê
ni cjucojo nuju cjuaveya hiscan xi jemu
cjín xuta cjue me. ¹⁴ Ta tingotjo xcu o
ndiya hndê ne, vêhê xi cjue cojo nuju
hisca xi sacu nuju cjuahñu. Jemu chuva
xuta xi sacu rê me tingotjo xcu jan.

Tsejen mé xcusun xuta me ngatsê rê mé xi sahmi me

¹⁵ Cuidadu tsêhê profeta ndacha ta
xi tjengui nuju me, jeya tsejen xcusun
rê me sacuaha xcusun rê chu tsánga,
peru quixiin vêhê ta suva cjuandacha
ta xahasen rê me ne, quitsê rê cju-
atsehen sacuaha cahntsua xahasen rê
chu lobo. ¹⁶ Tsejen mé xcusun xuta me
ngatsê rê xcusun xi sahmi me. Sacuaha
ngu ya ne, tsejen mé xcusun rê ngatsê
rê tu xi sua. Sacuiin rê xuta uva tsêhê
ya nahyálatu, hacuaha sacuiin rê xuta
tuhaxi xi hmí higo tsêhê nahyánde-
hya. ¹⁷ Quixi jain ta ngu yatjê xi ndaja ne, sua
tú xi ndaja, hacuaha ngu ya xi machjiriin
ne, hacuaha machjiriin tu rê. ¹⁸ Vêhê xi
ngu yatjê ndaja ne, cumaji sua tú xi
machjiriin, hacuaha ngu ya xi machjiriin
ne, cumaji sua tú xi ndaja. ¹⁹ Hane yatjê
xi machjiriin tú rê ne, xtfjñi rê tsêhê xi
ndaja sehe cueti. ²⁰ Cuanitjin xuta ne,
tutjin rê yatê vê ne, cuatjin rê me ta, tse-
jen xcusun rê xahasen rê me ngatsê rê
xcusun xi sahmi me.

Cachja Jesús xi hacuiin yêjê ni xuta cuisehen me gobiernu xi sahmi Nina

²¹ Tjin yo me xi cuichjacojo ná ta
nai rê me ngahan, peru cuiisiin me gu-
biernu xi sahmi Nina nahmi naha; ta
ngajan cuisehen suva xuta xi sahmichi-
hin me cjuatacun xi vitexa Nahmi naha
xi tacun me ngahnga. ²² Vêhê xi handasa

xi jemu cjín me cuichja me nixtin hya
jan cuitjin ta: “Nai naha, ngatsê rê xi
hñu ngayun, vêhê xi caveyinnangui ñihi
nuju ne canújin cjua rê Nina, hacuaha
xi canújin ñihi nuju ne, canaxinxin xit-
sehen, hane cojo ngahñu rê ñihi nuju
cama canihñi cjuarcun.” Cuatjin cuichja
me nixtin hya. ²³ Ngajan xi ngahan ne,
cuitjin cjuayanguê tsêhê me nixtin hya:
“Tángunxun tsahan ta hveen yo ngayun,
ngayun xi nihñu cjuatsehen.”

Ejemplu tsêhê jo ndihya

²⁴ Yahnga xuta xi visiñuju me cjua
naha hacuaha sahmi me sacuatjin chjá
cojo rê me matsejen ne, tangun me cojo
ngu cha quicun xi hya xi casahmi cha
ngu ndihya matsejen ne, hiscan xcun
nanguihñu casahmi cha. ²⁵ Hane hya xi
cavaha tsi, camajyê ndajyê hacuaha cas-
esuntê nandá, hacuaha cavanga tjo hñu
ne, jercu hñu catsivaha rê ndihya jan,
peru caticjaainjnii tsêhê xi xcun nangui-
hñu secun. ²⁶ Peru yahnga nga xuta xi
visiñujuu me cjua naha hacuaha sahmii
me sacuatjin chjá cojo rê me matsejen
ne, tangun me cojo ngu cha ngarca xi
hya xi casahmi cha ngu ndihya matsejen
ne, hiscan xcun nangui tsumi casahmi
cha. ²⁷ Hane hya xi cavaha tsi, cama-
jyê ndajyê hacuaha casesuntê nandá,
hacuaha cavanga tjo hñu ne, jercu hñu
catsivaha rê ndihya jan, hane tu ngu
ñahñu ne caticja ndihya jan, ngu café
cavetsunya.

²⁸ Xi cajnetaha cachja Jesús ne, xu-
tacjín ne jercu quijircun rê me tsêhê
cjua xi cavicuya Jesús ta, ²⁹ tsêhê xi cjua
xi vicuya me ne, jercu tjin rê ngahñu,
hacuiin sacuatjin cjua xi vicuya maestru
xi vicuya ley.

Casahmi Jesús xi camandaja ngu cha xi yaha chuxin rê cha chíhin vitaha

8 Hya ha cavijne me tsêhê ndetjun jan,
jemu cjín xuta tjengui rê me. ² Hya

xi camá ne, cafehe ngu cha xi jingu-jyë ni chuxin rë yaha rë ngu chíhin xi vitaha, caticjaxcun cha cafaharcun cha Jesús hane cachja cha cuitjin cojo rë me:

—Tatá. Sá xi meje nuju ne, cuma chjuhunxun chíhin xi yaha ná vi. —Cu-atjin cachja cha.

³Hane xi catsixinga Jesús tsja me ne cavetahatsja me cha ne, sehe cachja me cuitjin:

—Meje ná. Catamandaja ngaye. —Cu-atjin cachja me.

Hane chíhin jan ne, ngutjen ni cafëya.

⁴Sehe cavitexa me cha cuitjin:

—Hisca xi ngu ni canujiin cojo. Ti-hin ningacuin yojo riji xcun nahmi sehe catutsejen me xi camandaja ye. Sehe ti-hinchjehe cjuatjo riji xi tehe rë Nina ngatsë rë xi camandaja ngaye tsëhë chíhin jan, sacuaaha cavitexa Moisés xutachanga naja. Cuatjin nihni cojo sa xi cumatsejen xi camandaja jain ngaye.

Casahmi Jesucristu xi camandaja cha mosu xi cavatsë capitán

⁵Xi cavatju vihi ne, sehe rë cavisehen me nandya Capernaum, hane ngajan cafehe tjengui rë me ngu capitán cafehya cha me favor ⁶cuitjin cachja cha:

—Tatá. Tjin ná ngu cha mosu xi jiñahmu ndya naha. Cahme yojo rë cha hane jemu jiñañihi cha.

⁷Ngajan cafayangui Jesús:

—Cjuë ngahan, tsírquë rë cha.

⁸Ngajan xi cafayangui capitán jan cuitjin:

—Hisca hacuiin sahmi ngu jyë xi ngayun cuinduvun ndya naha ta tsëhë xi hitsë sa hñu cjua yun xi cuma ná ngahan. Quihndë ne, ndastu tinújun xi cumandaja mosu naha hane cuma ndaja cha. ⁹Hacuaha ngahan ne, tjin ná xuta xi matitjun tsahan, hane hacuaaha tjin ná ngu cientu sindadu xi siu ngahma gu-biernu naha xi sahmi hacutjin xi meje ná. Hya xi chjá cojo ngu xi cjue ne, fi;

hacuaha xi chjá cojo ngu nga xi cuinduva ne, nduva, hane mosu naha ne, xi chjá cojo xi sahmi mé xi meje ná ne, sahmi. —Cuatjin cafayangui capitán.

¹⁰Hane xi cahndë Jesús cjua vëhë ne, jemu quijircun rë me tsëhë capitán jan, hane cachja me cojo xuta xi tjengui rë me cuitjin:

—Cuichjá cojo nuju ngu cjua ta, ngajñi naja ngayejen ni ngayaan xuta tjë rë Israel ne, cjëë scuëë ngu xuta xi cuatjin ndaja mangucacun me cojo ná sacuaaha capitán vihi xi hacuiin xuta tjë naja me.

¹¹Hacuaha cuichjá cojo nuju ta cuinduva xutaxín tsëhë táha ladu vetjucaa tsuhi cojo táha ladu vetje tsuhi cuiyuju me sinësuhi me cojo Abraham cojo Isaac cojo Jacob ngajan hiscan sahmi Nina gu-biernu, ¹²Peru xuta tjë rë Abraham xi quihndi cjuaquixi ne, cuma tsingatju me hiscan jñu ngajan candatsen. Ngajan ne, jemu squihnda me hacuaaha tsijanerii me nehñu me.

¹³Hya xi camá cachja Jesús cuatjin cojo xuta ne, sehe cachja Jesús cojo capitán jan cuitjin:

—Cuma cuangun ta tsëhë xi xcusun xi vetjutacun xi má sahme, camachihin.

Hane hora xi cachja me cuatjin ne, camandaja cha.

Jesucristu casahmi me xi camandaja nahya rë Simón Pedru

¹⁴Hya xi cama ne, cavisehen Jesús ndava Pedru ne, hane cavëë me xi jiñahmu nahya rë Pedru cojo chíhin suë.

¹⁵Ngajan xi cavetahatsja Jesús tsja na, hane ngutjen cavetjuxin chíhin jan tsëhë na. Hane hora vëhë ni ne, cavisatjenhnga na hisca cama cafahacuenda na me.

¹⁶Hane hora xi tivetje tsuhi ne, xuta ne, quijicojo me cjín xuta xi hinchja rë xitsehen hane quiji me hiscan tacun Jesús. Hane Jesús ne, cavaxëxin me xitsehen jan cojo cjua ni, hacuaaha catsirqui me yëjë xuta hmu rë. ¹⁷Cuatjin casahmi

me sehe cumachihin cju a xi cachja profeta Isaías xi cachja me cuitjin: “Cafaha suva me yějě chíhin hinda xi tjin rě yojo naja, hane suva me cavaha me chíhin naja.”

Xuta xi meje cjue cojo Jesucristu

¹⁸ Xi cavěě Jesús xi jemu tsě xuta hiscan tacun me ne, casua me cju a cojo xicjin me xi cjuexin cojo rě me ngunda laguna. ¹⁹ Ngajan cafehe tjengui rě me ngu cha maestru rě ley sehe cachja cha cuitjin:

—Maestro. Tu yani ni xi cuangun ne, cjué cojo nuju. —Cuatjin cachja cha.

²⁰ Sehe Jesús ne, cafayangui me cuitjin:

—Chu ninda ne, tjin nguijo hiscan viyuju chu, hane nisě xi vitjen chu ngahnga ne, tjin ndava chu, peru ngahan xi hatuxa Quihndi rě Xuta ngahan ne, hisca ndya naha tsajin. —Cuatjin cachja me.

²¹ Ngu nga xuta xi tjengui rě me cachja cojo rě me cuitjin:

—Tatá. Cuanguen cojo nuju peru hya xi cuatju seyaniji nahmi naha.

²² Peru cafayangui Jesús cuitjin:

—Hanguen. Tehe vėhě catisahmi xuta xi cahme cjuatacun rě me, me vėhě catinchaniji me nima.

Jesucristu casahmi me xi cuasen tjo cojo tsindyu rě nandan

²³ Hya xi camá ne, cavisehen Jesús cahntsua ngu barcu hane ngajan quiji tjengui rě me xuta ladu rě me. ²⁴ Hora xi cju i barcu jan ne, canduva ngu tjo-hñu xi cavanga xcun laguna jan, hane hisca meje tsa rě barcu jan cojo tsindyu rě nandan xi satě rě jan. Peru hora vėhě Jesús ne, jiñafě me. ²⁵ Sehe xuta ladu rě me ne, catsingasca rě me, hane cuitjin cachja me:

—¡Tatá, tatá! ¡Naxuntjun naja! ¡Nguehe cjuéyan! —Cuatjin cachja me cojo Jesús.

²⁶ Hane cachja Jesús cuitjin:

—¿Mé má cuatjin jemu rcun ngayun, ngayun xi cjěě cumangutacún cojo ná?

Hya xi cachja me cuatjin ne, cavisat-jenhnga me cavatěcja me ngahñu rě tjo jan cojo tsindyu rě nandan jan, hane jin-gujyě ni jan ne, cavejñajyuu. ²⁷ Hya xi camá ne, xuta jan ne, jercu quijircun rě me hane cachja me cuitjin:

—¿Yo xuta me vihi xi hisca tjo hisca tsindyu rě nandan vihndě tsěhě me?

Cha Gadara xi hinchaxitsehen xahasen rě

²⁸ Hya xi camá ne, cafehe Jesús cojo cha ladu rě me ngunda vėhě, hisca ladu rě xuta nandya Gadara ne, ngajan jo me xi hinchaxitsehen xahasen rě quiji tiña me tsěhě Jesús. Catsijo me xi cuacun jan ne, siu cahndě me ngojo naxi hisca xi sacua tsjun. Hacuaha jemu cjan rě me hisca tsajin yo xi tsujyihya taha vė jan. ²⁹ Hya xi cavechu me hiscan tacun Jesús, cojo ngahñu rě xitsehen jan, cavetsihin cachja me cuitjin:

—Mé má cuatjin ninguisuhunjñu cojo niji ngayun Jesús, Quihndi rě Nina. ¿Há tuhun niji cjuañihi handasa chaja sa nixtin rě?

³⁰ Nixtin hya ne, ngajan tiñataha ne, tacun ngu cahndě hiscan jemu cjin chu chinga hinchataha chu tijine chu. ³¹ Hane xitsehen jan ne, ña yuma chja cojo Jesús cachja cuitjin:

—Sá xi hatuxa naxunxun niji tsěhě xahasen rě cha xi cuicun vi, ningatjun niji hiscan siutaha chinga, hacua hatingatuhun niji xi cuisihin cahntsua xahasen rě chu.

³² Hane cachja Jesús ta:

—Joho, tangun.

Hya xi camá ne, cavetjuxin xitsehen tsěhě cahntsua xahasen rě cha jan, hane cavisehen cahntsua xahasen rě chu chinga jan. Hya xi camá ne, yějě ni chu chinga jan ne, cavanga chu quijijne chu

taha rcu ndetjún, hane ngajan cavixuya chu ngajni nandá tsêhê laguna, hane ngajan cafê chu, cahme chu.

³³ Hane ngatsê rê chircun jan ne, cha xi sahmi cuidadu rê chu chinga jan, cavanga cha quiji cha nandya. Hane xi cavisehen cha nandya, casua cha camachaya rê xuta tsêhê xcusun xi camá rê chu chinga jan cojo xcusun xi cavatju jo cha xi hincha rê xitsehen jan. ³⁴ Hya xi camá ne, yêjê xuta tsêhê ladu tsêhê nandya Gadara ne, quijitjengui me Jesús hiscan tacun me, hane xi cavechutaha xuta me ne, cafehya me Jesús xi catje me tsêhê ladu rê me jan.

Casahmi Jesús xi camandaja ngu xuta xi cahme yojo rê

9 Hya xi camá ne, cavisehen nga Jesús barcu, cafê me nangui rê me ta tacun ngunda laguna. ² Hya xi camá ne, ngutjen ni quijitjengui xuta me hane xuta jan ne, yahahnga me ngu cha xi cahme yojo rê cha, jiña cha xcun nijña rê cha. Hane xi cavêê Jesús xi cuatjin mangu cacun xuta xi cuacun jan cojo rê me ne, sehe cachja xu me cojo cha hmu rê jan cuitjin:

—Tuhun cjuasua xahasen nuju ta jyê nuju, tsan ne, ha camanchataha. —Cuatjin cachja me.

³ Ngajan xi ngu jo maestro xi vicuya cjuachacun ne, cavetsihin catsingataha cacun me cuitjin: “Nina tsixcuehyu cha.” ⁴ Hane tsêhê xi vêê Jesús cjua xi tsingatahacacun maestro jan ne, cuitjin cavinenguise me cha:

—¿Mé má cuatjin chojyihingatanguntacun? ⁵ Xi má nuju, ¿jarê cjua xi hitsê sa tsaviin fi xi cuichjá: há xi “Jyê nuju ne, ha camanchataha” o há tsajin ne; há “Tisatjunhngun ne, tujyuhunyun?” ⁶ Peru nguehe suá cumachaya nuju ta ngahan xi Quihndi rê Xuta Jain ngahan ne, yahá xá xi tsinchátaha jyê rê xuta nguehe ngasunhndê.

Sehe ngajan cachja xu Jesús cojo cha hmu rê jan:

—Quihndê ne, ngayun tsan ne, tisatjunhngun chjuhun nijña nuju vê, sehe tjangun ndya nuju.

⁷ Hya xi camá ne, cavisatjenhnga cha quiji cha ndava cha. ⁸ Xi cavêê xuta xcusun xi camá ne, quijircun rê me, sehe casahmi hnga me Nina ta Nina ne, casua me cahndê Jesús xi cuatjin casahmi me.

Cavaxijin Jesucristu Mateo

⁹ Xi quiji sa xu Jesús ne, cavechu me hiscan cavêê me ngu xihin xi tacun cahndê hiscan xi faha tujúnsa. Mateo hmi rê me. Ngajan xi cachja Jesús cojo me cuitjin:

—Nduvun, cuanguen cona.

Hane Mateo jan ne, cavetju me quiji me cojo Jesús.

¹⁰ Ha nixtin vêhê ne, tijine Jesús niñu ndava Mateo. Hane jemu cjín sa cha xi faha tujúnsa cojo yahnga cha xi tsitjengui xuta nangui vê ne, hacuaha tijine cha niñu ngajan. ¹¹ Peru xi cavêê cha partidu fariseo xcusun jan, sehe cavinenguise cha cojo cha ladu rê Jesús cuitjin:

—¿Mé má jinê hvi maestro nuju cojo cha xi faha tujúnsa cojo ngujo sa cha xi hacuaha cha tsehen cha? —Cuatjin cachja cha.

¹² Peru cavihndê Jesús cjua xi cachja cha, hane cafayangui me cuitjin:

—Xuta xi hacuiin hmu rê me ne, mamijí rê me xi cjuahacuenda rê me doctor ta suvá ni xuta xi hmu rê me ne, me vêhê meje rê xi cjuahacuenda rê me doctor. ¹³ ¿Há vijni rcun mé vigne cjua rê Nina vihi?: “Hitsê sa ndama ná xi mayuma nuju xingun xi cuma rê xi nicuhun chu sacuaha cjuatjo xi tuhun ná.” Hacuanitjin ná ngahan ta ngahan ne, hacuiin canduvá xi squindáyavaha rê xuta xi tsajin xi cun rê me xcun Nina, ta xa xi canduvá ne, xi squindáyavaha rê xuta tsehen, hane cuichjá cojo me xi

tsindeya me cjuatacun rë me. —Cuitjin cachja Jesús.

**Mé tsëhë xi casahmii Jesucristu
cojo xuta rë me xun rë Nina.**

¹⁴Ngajan xi xuta ladu rë Juan ne, cafehe me cavinenguise me Jesús cuitjin:

—Ngayijin ni, vinechin xun rë Nina hacuaha cha partidu fariseo hacuaha viyuju cha xun rë Nina. ¿Mé tsëhë xi xuta ladu nuju ne, sahmii me cuatjin ne?

¹⁵Ngajan xi Jesús ne, cuitjin cachja me cojo cha:

—Cumaji xi xuta rë cha xi tivixan ne, sahmi me xun rë Nina jinguyëjë rë xi cha xi tivixan ne, tacun cha cojo rë me. Peru cuechú nixtin xi cha xi tivixan jan ne, chjaháxin rë cha tsëhë xuta rë cha, hane hya cuma sahmi me xun rë Nina. —Cuatjin cachja Jesús.

¹⁶Hacuaha cachja sa me ta: —Tsajin yo xi cueyacoo ngu tsjian changa cojo ngu rquí tsjian xi cjëë cjueyu ta sá xi cuatjin sahmi me, xi cjueyu tsjian xatsë jan ne, cuicheya rë tsjian changá jan hane sahmi jyë sa rë hiscan xi ntsun.

¹⁷Cuanitjin ne, tsajin yo xi vincha xan xatsë cahntsua chuxin changá ta, sá xi cuatjin sahmi me ne, tsitsingá rë chuxin jan. Hane cjuë cuixu xan jan, hacuaha cuetsun chuxin jan. Xi meje rë ne, xan xatsë ne, xincha cahntsua chuxin xatsë ta cuatjin ne, catsijo ni ne tsajin mé cuma rë.

**Catsicuya Jesucristu cjuahñu rë
quihndi rë Jairo; hacuaha
camandaja ngu na xi casatëtsja
tsjian rë Jesucristu**

¹⁸Hora xi tivisiajmi me cuatjin ne, canduva ngu me xi xutaxa rë yungun. Hane quiji caticjaxcun me xcun Jesús cachja me cuitjin:

—Ndicumaha ni cahme na lihndi naha. Peru sa xi cuanguen ne, cuisanu ntsun na ne, cuya nga na cjuahñu.

¹⁹Hya xi camá ne, cavetju Jesús quiji me cojo nahmi rë na lihndi jan hacuaha quiji xuta ladu rë Jesús. ²⁰Hane ngajñi cjui me ne, ngu na xi tjin rë tejó nu xi yaha rë na chíhin xahmajni quiji tiña na táha ngaxtun Jesús ne, quiji cavetahatsja na ntsacu tsjian rë me ta, ²¹catsingata-hacacun na cuitjin: “Sá xi cuetahantsa ndastu tsjian rë me ne, cumandaja ngahan.” ²²Peru cavuya Jesús taha ngaxtun me ne, sehe cavutsejen me na hane cachja me cojo na cuitjin:

—Tuhun cjuasua xahasen nuju, tsan, camandaja ngayun ta camacjain nuju.

Hane ngutjen ni ne, camandaja na.

²³Hya xi camá ne, cafehe Jesús ndava xutaxa rë jan. Ngajan cavëë me xi ha siu cha chjinyetyo cojo xutacjín xi jihnda me ngatsë rë cjuandusin. ²⁴Sehe cachja me cojo xuta cuitjin:

—Tjangunxun. Na lihndi vë ne, hacuiin cahme na ta jiñafë ni na. —Cuatjin cachja me.

Ngajan xi xuta jan ne, tu cavejnucëë me Jesús. ²⁵Peru xi casahmi me xi cavetju xin xuta jan, sehe cavisehen Jesús hiscan jiña nima lihndi jan ne, cafaha me tsja na hane catsisatjenhnga me na. ²⁶Hya xi camá ne, cavitsojo cjua rë xcusun jan jinguijyë nangui vë.

**Casahmi Jesús xi
camatsejen rë jo cha rcá**

²⁷Xi cavetju Jesús quiji me tsëhë ngajan ne, canduva tjengui rë me jo cha rcá hane cajindaya cha cachja cha cuitjin:

—¡Ngayun Jesús, tjë rë David! Cata-mayuma nuju ngayin. —Cuitjin cachja cha.

²⁸Xi cavisehen Jesús ndihya ne, sehe cavechutaha cha rcá me, hane cavinenguise Jesús cha cjua vi:

—Xi má nuju, ¿há cuma sahme xcusun xi chjayun?

Cafayangui cha cuitjin:

—Macjain niji, Tatá, cuma nihñu.

²⁹ Hya xi camá ne, cavetahatsja me tuxcun cha hane cachja me cojo cha cuitjin:

—Cuatjin catama cojo nuju xcusun sacua ha xi macjain nuju.

³⁰ Hane ha hora vëhë ni ne, catuxaha tuxcun cha hane camatsejen rë cha. Ngajan xi Jesús ne, cavitexa me cha cuitjin:

—Tsajin yo cuinújun cojo tsëhë xcusun vihi.

³¹ Peru cavatju xi quiji cha jan ne, cavitsojo cjua tsëhë me jingujyë nandya jan.

Cavaxëxin Jesús ngu xitsehen xi casahmi lihmi rë ngu cha

³² Hora xi ha quiji jo cha jan ne, cafehe xuta xi canduva me cojo ngu cha xi hinchja rë xitsehen; hane xitsehen jan ne, casahmi lihmi rë cha. ³³ Hane hya xi cavetju xitsehen tsëhë cha lihmi jan, cavetsihin cachja cha. Hane xutacjín xi cavutsejen me ne, jemu quijircun rë me ne cachja me cuitjin:

—Nguehe nangui naja Israel ne, tsajin ngu nixtin xi tsejen cjuarcun sacua ha timá quihndë.

³⁴ Peru cha partidu fariseo ne, cachja cha cuitjin:

—Xitsehen xi matitjun ne, vëhë casua rë cha xa xi vaxëxin cha xitsehen.

Jemu cjín xuta xi meje rë xi cuisinúju me cjua rë Nina

³⁵ Jesús ne, catsujihiya me jemu cjín nandya cojo ranchun ne, ngajan cavicuya me xuta cahntsua yungun rë me. Casua me camachaya rë me cjuandajyihí xi chja tsëhë gobiernu xi sahmi Nina. Hacuaha catsirqui me xuta tsëhë yëjë ni chihín cojo yëjë ni xcusun xi cjuahmu.

³⁶ Peru xi cavëë Jesús xutacjín ne, camayuma rë me xuta jan ta tsëhë xi jemu va tjin rë xahasen rë me, jemu camachohocacun me sacua ha chu tsánga xi tsajin yo xi cjuahacuenda rë chu. ³⁷ Vëhë xi cuitjin cachja me cojo cha ladu rë me:

—Xutacjín vi ne siu me sacua ha siu niji ngajan nguijña xi jemu ndaja camá peru tsajin cha mosu xi cuanga rë. ³⁸ Vëhë xi meje rë xi chjahyun rë Nai naja xi tsingatju me xuta xi cuanga me.

Cavaxijin Jesús tejó xuta ladu rë me

10 Cavechú ngu nixtin xi casahmitangun Jesús xuta ladu rë me xi tejó jan ne, sehe casua rë me ngahñu hacua ha casua rë me xá xi me xi cuacún vë, cuitexa me yëjë xitsehen hane cuaxëxin me xitsehen tsëhë xuta; hacua ha sahmi me xi xuta xi hmu rë me ne cuma ndaja me tsëhë tu me ni chihín xi yaha rë me.

² Cha xi tejó jan ne, cuitjin hmí rë cha: titjun ne, Simón, me xi hacua ha yaha ñihi rë Pedru, cojo Andrés hntsë Simón, Jacobo quihndi rë Zebedeo cojo Juan hntsë Jacobo, ³ Felipe cojo Bartolomé, Tomás cojo Mateo, cha xi faha tujúnsa, Jacobo quihndi rë Alfeo cojo Tadeo, ⁴ Simón xi tsëhë partidu cananayu cojo Judas Iscariote, me xi sahmi entregadu rë Jesús.

Catsingatju Jesucristu tejó xuta ladu rë me xi cuichja cjuandajyihí rë Nina

⁵ Tejó xuta jan ne, catsingatju Jesús me ne, cavitexa me cuitjin:

—Tanguun ngajan ndiya xi fi xuta xi hvín me cjua rë Nina, hacua ha cuisuun nandya rë distritu Samaria ta; ⁶ tángun hiscan siu xuta nandya rë Israel, xuta jan ne tangun me cojo ngu chu tsánga rë Nina xi cachaja chu. ⁷ Tuhun cumachaya rë xuta cjuandajyihí rë Nina xi jima tiña gobiernu xi sahmi me. ⁸ Nihñu xi cuma ndaja xuta hmu rë, nicuyun cjuahñu rë nima, nihñu xi cuma ndaja xuta xi yaha chuxin rë me chihin vitaha, hacua ha naxunxun xitsehen. Ngahñu xi meje nuju xi cuatjin nihñu ne, tu cuatjo ni sacu nuju, vëhë xi hacua ha tu cuatjo ni tuhun ngahñu jan.

⁹Xicachjuun oro o sá quicha tyava o tu mé ni tujún xi cuinchunndujun cahntua tsá tujún nuju xi tsêhê gastu nuju.

¹⁰Xicachjuun changa, xicachjuun ngu xúta tsjian, hacuaha xicachjuun ngu xúta chuxinxte o sá ngu bastón ta, xuta xi sahmi me xá ne, tsêhê xá jan sacu rê me gastu rê me.

¹¹Cuanitjin ne, tu mé ni nandya o sá tu mé ni ranchun xi cuisuhun ne, ngajan cuinchunsun ngu xuta xi ndaja xahasen rê me, ngajan ndava me ne, nechunchahndun hisca xi cuetjuxun tsêhê nangui jan. ¹²Hane hya xi cuisuhun ngu ndihya ne, tinújun ngu nina cuitjin: “Nina sua nuju me cjuandaja cjuajeya.” ¹³Hane sá xi nai rê ndihya jan ndaja vêe me yun ne, catísatê rê ndava me jan cjuajeya; peru sá xi hacuiin ndaja vêe me yun ne, satiin rê me cjuajeya jan. ¹⁴Hane hiscan xi tjin xuta xi cjuahatsjaain nuju me, xi chjuhun ndiya xi cuetjuxun tsêhê nandya vêhê ne, titsunu chojo rê ntsacu.

¹⁵Cuichjá cojo nuju ngu cjuaquixi ta hya xi cuechú nixtin xi tsichuva Nina xuta tsêhê jyé rê me ne, hitsê sa jyé castigu cuatju xuta tsêhê nandya xi cafahatsjaain nuju jan, xi cumá rê xuta tsêhê nandya Sodoma cojo xuta nandya Gomorra.

Cjuañihi xi cuatjun cuma

¹⁶Ngahan titsingátju nuju ngayun xuta jeya xi cuangun ngajñi rê xuta hnga cacun sacuaha cjue ngu chu tsánga ngajñi rê chu cjan rê. Vêhê xi meje rê xi ndaja quicuntacun sacuaha quicuncacun chu yê, peru hacuiin tsavi yun sacuaha tsajin tsavi chu paloma. ¹⁷Peru nechun cuidadu ta, cjuaha nuju xuta cjuecojo nuju me xcun xutaxa rê ndihyavasen, hacuaha cuaja nuju me ngajan yungun rê me, ¹⁸hisca cjuecojo nuju me xcun gobernador, hacuaha cjuecojo nuju me xcun me xi vitexa me jingujyê ni nandya. Cuatjin cuangun ngatsê rê xi ladu naha má ngayun. Ngatsê rê vêhê sacu nuju

cahndê xi ninguxun cjua xi cavicuyá nuju xcun xuta jan cojo xuta xi hvíin me cjua rê Nina. ¹⁹Hya xi cuatjin cjuecojo nuju me ne, hacuiin cuityjanguntacun tsêhê hacutjin xi ninguxun ta, tsêhê xi hora vêhê ne, Nina sua me ngayun cjua xi nicuyun. ²⁰Ta tsêhê xi hacuiin cjua nuju xi cuinújun ta tsêhê Hasen rê Nina cuinduva cjua xi cuinújun.

²¹Hacuaha xuta ladu naha ne, hntsê me, cuinchajyê rê me, xutacha rê me, cuinchajyê rê me, quihndi rê me cuinchajyê rê me cojo sa xi xutaxa rê ne, cjuaha rê me me ne, tsiquehen rê me. ²²Yêjê ni xuta ne, choho scuêe nuju me, tsêhê xi ladu naha ngayun. Peru jarê ngayun xi scaa nuju cojo cjuacjintacun vêhê hisca xi cueyun ne, cuechun xcun Nina. ²³Hya xi tsujyihyatjengui nuju me ngu nandya ne, tangun ngu nandya tiñataha ta, cuichjá quixê cojo nuju ta xi chaja sa cuatjun jingujyê ni nandya tsêhê nangui rê Israel ne, cúa ngahan Quihndi rê Xuta.

²⁴Ngu cha xi sehe tivutaya matsejen ne, hacuiin hitsê sa matitjun cha xi cumá rê maestru rê cha, cuanitjin ne, ngu cha hndixahan ne, chuva venguichji rê cha xi cumá rê nai rê cha. ²⁵Catamanguacunc cha tsêhê xi cuechú nixtin xi tangun cuenguichji rê cha cojo maestru rê cha o tangun cuenguichji rê hndixahan cojo nai rê. Ha chuva vêhê ni cuatjun ta sá xi choho cuichja xuta nai rê ndihya ne, ngu xitsehen me, hitsê sa choho cuichja me tsêhê xuta rê nai rê ndihya jan.

Xicarcuun xuta

²⁶Xicarcuun xuta condra nuju. Yêjê ni xcusun xi casetsangui ne, cuechú nixtin xi chjaháxin rê xi titsangui rê. Vêhê xi yêjê ni xcusun xi hma ne, handasa sah-mangui ne, peru cuechú nixtin xi cuetju-caa tsejen. ²⁷Yêjê ni cjua xi cuichjá cojo nuju hiscan jñu ne, cuinújunsun hiscan hasen. Yêjê ni cjua xi cuichjáhma

ne, cuechú nixtin xi cuinuhya rë jin-guyëjë ni nandya. ²⁸ Xicarcuun xuta xi cuma tsiquehen yojo nuju, peru ngaxtun vëhë ne, tsajin me dañu ma sahmi me cojo hasen nuju. Hitsë sa ndaja ne, rcun Nina, me xi tjin rë chuva rë xi tsiquehen me yojo nuju hane hacuaha tsingatjenya nuju me hiscan xi má hasen nuju castigu.

²⁹ 'Chutsujun ta jo chu nisë langa ne, ngu ni tujún chji rë chu, peru handasa cuatjin ne, hiscan ngu chu cumaji cueya chu sá xi suaain Nina cahndë. ³⁰ Hane ngayun ne, hisca jimangu tsjarcun ne xqui tjin rë Nina. ³¹ Vëhë xi xicarcuun ta, tsëhë xi jimangu ngayun ne, hitsë sa jercu vengui chji nuju xi cumá rë chu nisë vë, handasa jemu cjin chu.

³² 'Yëjë xuta xi tsinguixi me xcun yahnga xuta xi xuta ladu naha má me ne, hacuaha ngahan tsinguixë xcun Nahmi naha xi tacun ngahnga xi xuta ladu naha má me. ³³ Peru yëjë xuta xi tsinguixiin me xcun yahnga xuta xi hacuiin xuta ladu naha má me ne, hacuaha hacuanitjin ni tsinguixë ngahan xcun Nahmi naha xi tacun ngahnga.

Ngatsë rë cjua rë Jesucristu xi sahmi condra xutacjin xicjin me

³⁴ 'Xi má nuju ngayun ne, ¿há cjua-jeya canduvácojo xi cumá rë xuta ngasunhndë? Hacuuiin cuatjin. Ngahan ne, si canduvá cojo. ³⁵ Canduvá tsinguetsuntaha xicjin xuta. Cha quihndi ne, sahmi condra cha nahmi rë cha, hane na quihndi ne, sahmi condra na naa rë na, hane jahnda ne, sahmi condra na nahya rë na. ³⁶ Cuatjin xuta condra rë me ne, cuma ni xuta rë me.

³⁷ 'Sá xi ngu me ne hitsë sa tsihmu cacun me nahmi rë o sá xi naa rë me xi cumá ná ngahan ne, vechiin chuva rë xi tsahan cuma me. Hacuaha sá xi ngu me ne hitsë sa tsihmu cacun me quihndi rë me sá xihin sá chjuun xi cuma rë xi tsihmu cacun me ngahan

ne, vechiin chuva rë xi tsahan cuma me. ³⁸ Ha cuanitjin ne, sá xi ngu me ne mijí cjuejñahñu xahasen rë me xi cjuecojo me ndiya naha handasa cueya me xcun cru ne, cumaji cuechu me chuva rë xi tsahan cuma me. ³⁹ Xuta xi nguehe ni ngasunhndë meje cjuenduju me cojo cjuahñu rë me ne, titsichajá me cjuahñu xatsë xi sua Nina me. Peru xuta xi titsichajá me cjuahñu rë me nguehe ngasunhndë ne ngatsë naha ne, hatuxa sacú rë me cjuahñu xatsë xi sua Nina me.

Cjuatjo xi sua Nina

⁴⁰ 'Xuta xi cjuahatsja me yun, tangun sacuaha xi cjuahatsja ná me ngahan suva, hane xuta xi cjuahatsja ná me ne, tangun sacuaha xi cjuahatsja me Nahmi naha, me xi catsingatju ná. ⁴¹ Xuta xi cjuahatsja me ngu me xi chja me cjua rë Nina ne ngatsë xi chja me jan cjua rë Nina ne, tangun chji sacú rë me cojo me jan. Hacuaha xuta xi cjuahatsja me ngu xihin xi tyjahi cjuatacun rë me xcun Nina ngatsë rë ndaja xihin jan ne, tangun chji sacú rë me cojo xihin jan. ⁴² Cuanitjin ne, xuta xi sua me ndastu ngu vasu nandá cjuahatsja tu yo ni xi xuta ladu naha ne handasa jemu yuma jyihi me ne, sacú chji rë me ngatsë rë xi cuatjin sahmi me cojo xuta xi tjengui ná.

Cha xi catsingatju Juan Vitenda rë Xuta

11 Hya xi camá ne, xi cajnetaha cjua xi cavitexa Jesús cha xi tejó má jan, sehe cavetjuxin me quiji me nandya xi siutahndee, ngajan cavicuaya me xuta cachja me cojo tsëhë cjuandajyihi rë Nina.

² Nixtin hya ne, ha jiya Juan Vitenda rë Xuta ndavaya, hane ngajan camachaya rë me tsëhë xcusun xi sahmi Jesús. Vëhë xi catsingatju me ngujo cha ladu rë me xi quiji cha ³ cavinenguise cha Jesús cuitjin:

—¿Há ngayun xi tsingatju nuju Nina, o há tsajin ne, há cuinechinyin xi cuinduva nga ngu? —Cuatjin cavinenguise xuta xi catsingatju Juan jan.

⁴ Hya xi camá ne, catsicuya Jesús cja cojo cha xi cuacun jan hane cuitjin cachja me:

—Tjangun ne, sehe tinújun cojo Juan yějě cja xi canuhyun cojo yějě xcusun xi cahyun. ⁵ Tinújun ta xuta rcá ne, camá camatsejen rě me; xuta rengun ne, camá quijindaja me; xuta xi yaha rě chíhin vitaha xi setaha yojo naja ne, camandaja me; nima ne, cavuya nga cjuahñu; xuta yuma ne, casacu camachaya rě me cjuandajyihi rě Nina. ⁶ Hacuaha jemu ndaja tsěhě tu yo ni xuta xi hacuiin tsismicacun me xi mangu cacun me cojo ná. —Cuatjin cachja Jesús.

⁷ Hane hya xi cavetju quiji xuta ladu rě Juan jan ne, sehe cavetsihin cachja Jesús cojo xutacín jan cuitjin tsěhě Juan:

—Hya xi cavetjun catsangun ngajan ngu xín tsěhě nandya catsangun tjengun Juan matsejen ne, ¿há caningatuhuntacún xi cuechuntuhun ngu xihin xi hacuiin ngu ni cjuatacun rě me, sacuatjin rě ngu ndeje xi fi nguehe fi ngajan rcu sacuatjin cjui tjo? ⁸ O há tsajin ne, ¿há caningatuhuntacún xi cuechuntuhun ngu xihin xi yaja ngu tsjian xi jemu tu ndajyihi camahani? Hacuiin cuatjin. Ha hyaan matsejen ta xuta xi jercu tu ndacun camahani tsjian vaja me ne, sacuiin naja ngajan xin jan, ta sacu naja ndava ngu xuta nchina. ⁹ Peru ngayun matsejen ne, catsangun cachutsujun ngu profeta. Hacuaha cjuaquixi xi vėhě cachutsujun. Peru profeta Juan vė matsejen ne, hitsě sa vengui chji rě me xi cumá rě yějě sa profeta xi yahnga. ¹⁰ Hacuaha me vėhě xi cachja Nina tsěhě me xcun xujun rě me cuitjin:

Ngahan ne, tsingátju titjun ngu cha

xi scuxaha cjuatacun rě xuta tsěhě xi cjehe ngaye.

¹¹ Cuichjá cojo nuju matsejen ta ngajñi rě yějě xuta xi catsin me tsěhě naa rě me matsejen ne, tsajin ngu xi hitsě sa vengui chji rě xi cumá rě Juan. Peru hya xi cuetsihin Nina sahmi me gobiernu nguehe ngasunhdě matsejen ne, xuta xi chuva cuengui chji rě me nixtin hya matsejen ne, hitsě sa cuengui chji rě me nixtin hya, xi cuma rě xi vengui chji rě Juan quihndě.

¹² Hisca nixtin xi caxtenda Juan hisca nixtin quihndě ne, má cjuasüe xi satě rě gobiernu xi sahmi Nina; xuta ne, meje cuisehen me ngajan, handasa cojo cjuachan. ¹³ Xi chaja sa nduva Juan ne, yějě ni xujun xi catsihindu profeta cojo xujun rě ley ne, suva casua camachaya rě xuta tsěhě gobiernu xi sahmi Nina. ¹⁴ Sá xi meje nuhyun cjuaquixi ne: Juan ne, hacui Elías, xi sehe nduva xu. ¹⁵ Yo ngayun xi tjin nuju cjuasua xi cuinuhyun cja vihi matsejen ne, ndaja tetuhunrcun.

¹⁶ 'Ngayun xuta tsěhě nixtin vihi matsejen ne, ¿mé xi tangun ngayun cojo? Tangun ngayun cojo langa xi siu ngajan ndetsin, xi jindaya xicjin ¹⁷ cojo cja vihi: “Canijani tsujun ne, mijí xtun; casin va ne, mijí chjihndun.” Cuatjin jindaya langa. ¹⁸ Cuatjin chjá cojo nuju matsejen ta, Juan xi vitenda nuju ne jinii me niñu hacuaha hviin me xan, hane nújun ta jiya xitsehen xahasen rě me. ¹⁹ Hane ngahan xi Quihndi rě Xuta Jain matsejen ne, jině hacuaha hvě, hane nújun ta ngu cha cahntsuanini ngahan, ngu cha cahntsuxan ngahan, hacuaha ngu cha amigu rě cha xi faha tujúnsa cojo jingu sa xuta tsehen ngahan. Tsejen xi ndaja ngu cjuatacun xi casacu rě ngatsě rě xi ndaja tivetjucaa tsujun xi tinihñuchuhun.

Chojyihi tsëhë xuta nandya xi vindeyaain cjuatacun rë me

²⁰ Hya xi cama ne, cavetsihin Jesús chjataha me xuta nandya jani hitsë sa jemu casahmi me cjuarcun camá, ta catsindeyaain me cjuatacun rë me. Cuitjin cachja me:

²¹ —¡Jemu chojyihi tsujun xuta nandya Corazín! ¡Hacuaha jemu chojyihi tsujun xuta nandya Betsaida! Jemu chojyihi tsujun ta, tsëhë xi sá xi xutaxín tsëhë Tiro cojo xutaxín tsëhë Sidón cavëë me cjuarcun xi cahyun ne, ha catsindeya me cjuatacun rë me, hacuaha ha cavajá me tsjian xi sacuaha tsánaxá hacuaha caviyuju me ngajñi ndesu, sacuaha xcusun naja hya xi choho má naja. ²² Vëhë xi hya xi tsichuva Nina yëjë xuta tsëhë jyë rë me ne, xuta nandya Tiro cojo xuta nandya Sidón ne, hitsë sa chuva castigu cuatju me cumá xi cumá nuju ngayun xuta nandya Corazín cojo ngayun xuta nandya Betsaida. ²³ Hane ngayun xuta nandya Capernaum ne, ¿há cuangun hisca ngahnga hiscan tacun Nina? ¡Hacuiin! Hatuxa cuangun nduchin, cahndé hiscan fi hasen rë nima ta, tsëhë xi sá xi xuta tsehen tsëhë Sodoma cavëë me cjuarcun xi cahyun ne, ha catsindeya me cjuatacun rë me, hane tacun cuaha nandya jan hisca quihndë. ²⁴ Vëhë xi hya xi tsichuva Nina xuta ne, hitsë sa chuva castigu cuatju xuta Sodoma xi cumá nuju ngayun xuta nandya Capernaum.

Casahmi jyë casahmi hnga Jesucristu Nina

²⁵ Nixtin hya ne, cachja Jesús cojo Nina cuitjin:

—Ngayun nahmi naha ne, sahme jyë sahme hnga nuju, ngayun xi Nai rë ngahnga cojo nangui, ngayun, tsëhë xi ngayun caveyúnhmu cjuatacun vëhë xi

cuma rë xuta xi jemu vechú cjuatacun rë, hane catuhun camachaya rë xuta xi jñu tsëhë me. ²⁶ Ngayun nahmi naha, cuatjin canihñu ta, tsëhë xi cuatjin xi cachuya nuju. —Cuatjin cachja Jesús cojo Nina.

²⁷ Cachja me cojo xuta:

—Yëjë ngarca matsejen ne, Nina Nahmi naha casua ná me. Tsajin hisca ngu xi vëë yo xi Quihndi rë Nina matsejen ta suvá ni Nina Nahmi naha xi vëë me. Hacuaha tsajin yo xi vëë Nahmi naha matsejen ne ta, suva ni ngahan xi Quihndi rë me ngahan xi hvë, cojo tu yo ni xi ngahan meje suá cumachaya rë. ²⁸ Ngayun xi fenda rë xahasen nuju, ngayun xi hai tjín tacun tsëhë jyë nuju ne, nduvun tjengun ná, hane cjuaháxen vëhë xi sahmi hai nuju. ²⁹ Ningatuhun xi chjuhun yugu naha sacuaha má cojo ndyaja hya xi cjuaha chu xa sahmi chu, hacuaha chjayunngun tsahan. Ta ngahan ne, tjín ná cjuandaja cjuajeya, hane sacu hñu rë xahasen nuju. ³⁰ Ta yugu xi suá nuju vihi ne, hacuiin hai, tanguaain cojo tsëhë chu ndyaja, hane xa xi suá nuju ne, hacuaha hacuiin hai.

Cavotohosun xuta ladu rë Jesucristu trigu nixtin xi chjahájenda rë

12 Nixtin hya ne, cuatjin camá ngu nixtin xi chjahájenda rë. Hora xi tivatju Jesús cojo xuta ladu rë me hiscan tjín tjë trigu ne, cama vojo rë xuta ladu rë me, cavetsihin cavotohosun xuta jan tsë tsë trigu jan ne, catsufëtsja me cajine me. ² Hane cha tsëhë partidu fariseo xi cavëë cha xi cuatjin casahmi me, cachja cha cojo Jesús cuitjin:

—Chutsujun ni, xuta ladu nuju ne, ti-sahmi me xa quihndë nixtin xi chjahájenda rë, handasa chja ley naja xi cumaji xi cuatjin nihña.

³ Hane cafayangui Jesús cuitjin:

—Ngayun, ha cachutayun xcusun xi casahmi xutachanga naja David hatsëë nixtin hya xi jercu camá vojo rë me

cojo xuta xi siu cojo me. ⁴Cavisehen me ndava Nina, hane cafaha me pan xi viyuju xcun Nina xi tsajin cahndé xi tu yo ni siné ta suvá ni nahmi xi cuma siné me. Peru David ne, cajiné me hacuaha casua me cajiné xuta xi siu cojo me. ⁵Cuanitjin ne, ha cachutayun xi chja cjua rê ley naja xi nahmi xi sahmi xa ndava Nina ne, ngajan tjin xa xi satê rê me nixtin xi chjahájenda rê peru tsajin jyé xi cuma rê me handasa tisahmi me xa nixtin hya. ⁶Cuichjá quixê cojo nuju ta nguehe tacun ngu xi hitsê sa meje rê xi chjahanrcun rê xi cumá rê yungun xi matitjun. ⁷Cjêê cuijnercun cjua xi chja: “Hitsê sa ndama ná xi cumayuma nuju xingun tsêhê xi cumá rê xi nicuhun chu sacua ha cjuatjo xi tuhun ná.” ⁸Hacuaha cachja sa Jesús cuitjin: Ngahan xi Quihndi rê Xuta Jain ngahan ne, ngahan xi vitéxa mé xi cuma nixtin xi chjahájenda rê.

Casahmi Jesucristu xi camandaja cha xi quixíhñu ngu tsja

⁹Hya xi camá ne, xi quiji sa Jesús ne, cavisehen me yungun ngajan. ¹⁰Hane tacun ngu cha cahntsua yungun jan xi quixíhñu tsja quixi cha. Hane cha xi vicuya cjuachacun cojo cha fariseo ne, cavinenguise cha Jesús cuitjin:

—¿Mé xi tsingatihi ley xi nihña nixtin xi chjahájenda rê? ¿Há sua cahndé xi nirquen rê xuta hmu rê? —Cuatjin cavinenguise cha me xi sehe cuma cuinchajyê cha me.

¹¹Hane cuitjin cafayangui Jesús tsêhê cha:

—¿Há cuma xi ngu ngayun handasa hya xi nixtin xi chjahájenda rê ne, cuanguun naxun chu tsánga nuju sá xi cjuinenguia chu ngu ngojo xi jemu nungun? ¹²Sá cuatjin vengui chji rê ngu chu tsánga ne, hitsê sa cjín vengui chji rê ngu xihin. Vêhê xi tsingatihi ley xi nixtin xi chjahájenda rê ne nihña cjuandaja.

¹³Sehe cachja Jesús cojo cha hmu rê cuitjin:

—Nixingun ntsun. —Cuatjin cachja me.

Hane cuatjin casahmi cha. Hane tsja cha xi quixi ne, ha camandaja sacuatjin jyihi tsja cha xingu. ¹⁴Hya xi camá ne, cha partidu fariseo jan ne, cavetju cha quiji cha, cachja cha ngajñi rê cha cojo xicjin cha xi meje rê xi sacuya ra xcusun hacutjin cuma tsiquehen cha Jesús.

Cjua xi catsihindu profeta tsêhê Jesús

¹⁵Peru Jesús ne, machaya rê me cjuatacun jan, hane cavetju me quiji me tsêhê ngajan. Hacuaha cjín xuta quiji tjengui cojo rê me, hane catsindaja me yêjê ni xuta tsêhê chíhin xi má rê me, ¹⁶sehe cachja me cojo me xi cuichjaain tê me yo me jan. ¹⁷Cuatjin casahmi Jesús xi cuetjucaa cjua xi catsihindu profeta Isaías xi chja cuitjin:

¹⁸Cha vihi ne, cha mosu naha, cha xi cavitéxa ngahan, cha xi tsihmúcacun, cha xi ndama ná tsêhê.

Suá cha Hasen naha, cuichja cha cojo xutaxín tsêhê hacutjin quixi Nina hya xi tsichuva me xuta.

¹⁹Cha vihi ne, hacuiin cjin cuisiajmi cha cojo xuta; hacuiin jindaya tê cha xi chja cha.

Cuichjaain hñu cha cojo sa xi jemu catjaha cuenda rê cha xuta xi tsujyihya me ndiya tê.

²⁰Xcotaain cha cjuatacun rê hisca ngu xuta yuma xi tangun me cojo ngu ndeje xi caxtane, hacuaha sahmi chuvaain cha cjuatacun rê xuta yuma xi tangun me cojo ngu candil xi ha ndiya coho.

Yêjê xcusun vihi ne, sahmi cha hisca xi cumatsejen cjuaquixi rê gobiernu rê cha.

²¹Hane xuta ngasunhndê ne, cuetahacacun me cha.

Cachja xuta xi Satanás casuaxa rë Jesús

²² Cavechú ngu nixtin xi cafehe tjen-gui xuta Jesús hane yaha me ngu cha xi jiya xitsehen xahasen rë cha. Rcá cha jan hacuaha lihmi cha. Hya xi camá ne, Jesús ne casahmi me xi camandaja cha jan hisca cama cachja cha hisca cavutsejen ndaja cha. ²³ Hane xutacjin ne, jemu quijircun rë me cachja me cuitjin:

—¿Há cumacacun xi cha vihi hacui quihndi tjë rë David xi tsingatju Nina?

²⁴ Peru cha partidu fariseo xi camachaya rë cha cjua jan ne, cachja cha cuitjin:

—Hacuiin suvá cha vaxëxin cha xitsehen ta Beelzebú, xitsehen xi matitjun ne, vëhë casuaxá rë cha xi vaxëxin cha xitsehen.

²⁵ Peru Jesús ne, tsëhë xi ha vëë me mé xi tsingataha cacun xuta xi cuacún jan ne, cuitjin cachja me cojo cha:

—Hya xi xuta tsëhë ngu nandya ticjan me ngajni rë me cojo xicjin me, cjuë ngahnu cjua rë, hane cjuincanii rë me. Hacuaha sá xi xuta tsëhë ngu ndihya ne, scaan me ngajni rë me ne, ngajan chajá ngahnu cjua rë ndihya jan. ²⁶ Ha cuanitjin rë Satanás ta, sá xi Satanás ne vaxëxin xitsehen xi yahnga ne, cavatëcja ngahnu cjua rë, hane cumaji cuitexa xicjin. ²⁷ Vëhë xi sá xi Beelzebú casua ná xa xi vaxëxen xitsehen ne, hacuaha ha Beelzebú vëhë casua rë ngu ngu xuta ladu nuju xa xi hacuaha vaxëxin me xitsehen. Vëhë xi me vëhë ni cuma cuichja me xi cuaintjin cjua xi nújun xi Beelzebú casua ná xa. ²⁸ Peru sá xi hacuiin Beelzebú casua ná xa ta Nina casua me ne, ngajan matsejen xi gobiernu xi sahmi Nina ne, ha tivetsihin.

²⁹ Hisca ngu cha chëjë cumaji tu cuisehen ni cha ndava ngu xuta xi hnu cjua rë sá xi tacun me. Titjun tsihnu cha

xuta xi ndava ta cuatjin xi cuma tsichëjë cha tsëhë me.

³⁰ Xuta xi fiin me favor naha ne, condra naha má me. Hane xuta xi visecuaain ná me xi nihni tangun cjuatacun rë xuta cojo Nina ne, tsinguetsun me cjuatacun rë xuta.

³¹ 'Hacuaha cuichjá cojo nuju cjuaquixi ta tu mé ni jyé xi sahmi xuta hacuaha tu mé ni cjua xi choho cuichja me tsëhë xuta ne, sacú rë me cjuaninchataha sa xi cuijacun me jyé jan. Peru tu yo ni xi choho cuichja tsëhë Hasen rë Nina ne, tsajin cjuaninchataha xi cuma rë. ³² Cuanitjin ne, tu mé ni cjua xi choho cuichja xuta tsëhë Quihndi rë Xuta Jain ne, cuma sacú rë me cjuaninchataha. Peru tu yo ni xi choho cuichja tsëhë Hasen rë Nina ne, tsajin cjuaninchataha nguehe nixtin vi, hacuaha tsajin cjuaninchataha nixtin xi nduva.

Ngatsë ni rë xcusun xi sahmi me ne, tsejen mé xcusun xuta me

³³ '¿Jarë xi meje nuju?, ¿há xi ndaja ya hacuaha ndaja tu rë? o há tsajin ne, ¿há xi ndajin ya hane ndajin tu rë? Jima ngu ya ne, cuma tsejen sá xi ndaja o sá xi ndajin ngatsë rë tu xi sua. ³⁴ Ngayun quihndi rë chu tsehen, maji nújun cjua xi ndaja. Maji ta tsëhë xi cjua xi quitsë rë xahasen nuju ne, vëhë cjua xi vetju nújun.

³⁵ Vëhë xi xuta ndaja ne, tsëhë cjuandaja xi tetjo rë me cahntsua xahasen rë me cojo cahntsua cjuatacun rë me ne, tsëhë ngajan vetju cjuandaja. Cuanitjin ne xuta tsehen ne, tsëhë cjuatsehen xi tetjo rë me ne, ngajan vetju cjuatsehen. ³⁶ Cuichjá cojo nuju ta tu mé ni cjua xi cuinújun, handasa tu visiajmu ni ne, tuhuncuenda rë Nina cjua jan nixtin xi tsichuva me yaan. ³⁷ Cuatjin ta cojo cjua xi canújun ne, cjua jan cuma testigu xi cuetjunixun tsëhë castigu, o sá tsajin ne,

cjua xi canújun vëhë cuma testigu tsëhë castigu xi cueyun.

Cafehya xuta tsehen ngu seña xi sua Nina

³⁸Ngajan xi ngujo cha xi vicuya cjuachacun cojo ngujo cha partidu fariseo catsicuya cha tsëhë me, cuitjin cachja cha:

—Maestro, ningacun niji ngu cjuarcun xi sua seña yo ngayun.

³⁹Ngajan cafayangui Jesús cuitjin:

—Ngayun xuta tjë rë Israel xi nechun nixtin vihi matsejen ne, tsehen cjuat-acun nuju, hacuaha majotacun xcun Nina. Vëhë xi chjahyun ná ngu seña xi sua Nina. Peru seña vëhë ne, sacuiin nuju ta ngu ni seña xi sacú nuju matsejen ne, vëhë seña xi casua profeta Jonás hatsëë nixtin. ⁴⁰Sacuatjin rë profeta Jonás ne, jyan nixtin cojo jyan nixten caseya me cahntsua chu ti jyë, hane ha cuanitjin ni ne cumá rë Quihndi rë Xuta Jain, ta jyan nixtin cojo jyan nixten seya me ngahma nangui. ⁴¹Hya xi cuechú nixtin xi tsichuva Nina jyë nuju, ngayun xi nechun nixtin vihi ne, yëjë ni xuta nandya Nínive matsejen ne, cjue cuinchajyë nuju me; ta me vëhë ne catsindeya me cjuatacun rë me hya xi casua profeta Jonás camachaya rë me cjua rë Nina. Peru nguehe ne ha tejña ngahan sacuaha ngu seña xi hitsë sa vengui chji rë xi cuma rë profeta Jonás. ⁴²Hacuaha nixtin hya ne, na xi cavitexa ngajan nangui Sabá ne, cjue cuinchajyë nuju ta, tsëhë xi jemu cjuañihi cavatju na tsëhë xi jercu cjin hiscan canduva na xi cuihndë na cjuatacun ndacun rë Salomón, me xi cavitexa xuta naja nixtin hatsëë. Peru nguehe tejña ngahan xi hitsë sa vengui chji rë cjuatacun naha xi cumá rë cjuat-acun rë Salomón.

Xitsehen xi vuya

⁴³Hya xi vetjuxin xitsehen tsëhë xahasen rë ngu xuta hiscan xi camá sacuaha ndava xitsehen jan ne, fi táha hiscan jemu nangui quixí camahani, vanguise cahndë hiscan xi cuejñajenda.

⁴⁴Hane xi sacuiin rë cahndë hiscan cuejñajenda ne, cuitjin tsingatahacacun: “Cúya rë cjuë ndya naha hiscan xi cavétjuxen.” Cuatjin tsingataha cacun xitsehen jan. Hane hya xi vuya fehe xitsehen jan cahntsua xahasen jan ne, vutsejen xitsehen jan cahntsua xahasen jan sacuaha ngu ndihya tiya, ngu xi caxtecha tyjahi tyjahi, hacuaha siundaja chichihin ngu tsé ngu xti. ⁴⁵Xi vutsejen xitsehen xi cuatjin jyihi jan ne, sehe fi jaha sa rë yatu sa xitsehen xi hitsë sa tsehen xi cumá rë vëhë ne, sehe visehen nga viyujucahndë jan. Peru xi má ngascan ne, hitsë sa chojyihhi tsëhë xuta vëhë xi cumá rë titjun. Cuitjin cumá tsëhë xuta xi siu nixtin vihi. —Cuatjin cachja Jesús.

Naa rë Jesucristu cojo xicjin me

⁴⁶Hya xi tichja me cojo xutacjín ne, naa rë me cojo xicjin me ne, cafehetjengui me Jesús, hane maji vechútahacjin me xi cuichja me cojo ta tsëhë xi jemu quitsë xuta. ⁴⁷Ngajan xi cachja ngu xi cachja cuitjin:

—Nutsujun ni. Ná nuju cojo nixti xingun ne, hinchacun me ngajan candatsen, xi meje nduvatjengui nuju me cuichja me cojo nuju. —Cuatjin casacu camachaya rë me.

⁴⁸Hya xi camá ne, cavuya me catsicuya me cjua cuitjin:

—¿Yo xi má nuju xi ná naha cojo xingueen?

⁴⁹Hya xi cuatjin cachja me ne, catsingacun tsja me xuta ladu rë me sehe cachja me cuitjin:

—Ngayun xi nechun nguehe ne, ngayun xi sacuaha ná naha cojo

sacuaha xingueen ngayun ta, ⁵⁰tu yo ni me xi sahmi me sacuaha meje rë Nahmi naha xi tacun me ngahnga ne, me vëhë tangun ni cojo xingueen, cojo ná naha.

Ejemplu tsëhë cha xi catsitjë trigu

13 Nixtin hya ne, cavetjuxin Jesús tsëhë ndiha ne, quiji me tjehe laguna ngajan cavejña me. ²Hane ngajan camatangun xutacjín. Vëhë xi cavisehen me ngu barcu ngajan cavejña me. Hane xutacjín jan ne, caviyuju me nangui quixí tjehe nandan jan. ³Sehe cavicuya Jesús me jemu cjín cjua sacuaha xcusun rë ejemplu. Cuitjin cachja me:

—Cuejña ne xi ngu cha xi tsitjë cha trigu matsejen ne, cavetju cha quiji cha xi tsitjë cha trigu. ⁴Hane jinguyëjë rë xi titsitjë cha matsejen ne, ngujo matsejen ne, cavixu ndiya. Hane canduva chu nisë, catsicjë chu cajine chu. ⁵Hane ngujo nga matsejen ne, cavixu hiscan xi jemu naxindya, hacuaha jemu chuva nihndë quisun. Ngajan jemu xati cavetju ta tsëhë xi hacuiin tjain nihndë quisun. ⁶Hane xi cavetjucaa tsuhi ne, cavaca rë cojo ndavá jan. Hane tsëhë xi tsajin tyjama rë xi nungun matsejen ne, caxintsen. ⁷Ngujo nga ne, cavixu ngajñi nahyá. Hane xi camacha tangun matsejen ne, nahyá jan ne, vëhë casahmi hndë rë catsixi rë. ⁸Hane xi yahnga matsejen ne, cavixu hiscan nihndë ndaja. Hane camayehe ne, ngujo ne casua tutjë rë ngu cientu sa cuatjin sacuatjin xi camatjé, ngujo nga ne, yachantë sa, hane ngujo nga ne, cantë sa sacuatjin xi camatjé. ⁹Yo ngayun xi tjin nuju cjuasua xi cuinuhyun cjua naha ne, ndaja tetuhuncun. —Cuatjin cachja me.

Mé má ejemplu cachja Jesucristu cojo xuta

¹⁰Hya xi camá ne, cafehetiña xuta ladu rë me cavinenguise me Jesús tsëhë ejemplu xi chja me ta, ¿mé tsëhë xi ejem-

plu ni vicuya me cojo? ¹¹Hane cafayangui me tsëhë xuta jan cuitjin:

—Nina ne casua me cahndé xi ngayun ne, cuijne rcu cjuatacun tsëhë gobiernu xi sahmi Nina, cjuatahahma xi titjun ne tsajin yo machaya rë. Peru yëjë sa me xi yahnga ne, casuaain me cahndé xi cuijnercu me. ¹²Me xi ha tjin rë cjuatacun jan ne, sua sa Nina me, ndaja cuijne rcu me. Hane me xi tsajin cjín rë cjuatacun jan ne, cjuahataha Nina hitsë xi tjin rë me. ¹³Vëhë xi suvá ejemplu tichjá cojo rë me ta, handasa vutsejen me, peru sahmicuendaain me; visiñuju me ne, peru sahmi me sacuaha xi vihindiin me hacuaha vijnii rcu me. ¹⁴Xi cuatjin sahmi me ne, sahmicihini me cjua xi catsihindu profeta Isaías xi catsihindu cjua vihi:

Handasa cuisiniñuju ngayun ne, peru ha tuxa cuijnii rcun;

Handasa chutsujun ne, peru cumatsijiinu ju.

¹⁵Xuta xi cuacun vë ne, tichjá cjuatacun rë me,

tyjavañuju me cojo tuxcun me ne, cavechja me,

ta sá tu scuëë me cojo tuxcun me, hane sá cuihndë me cojo tyjavañuju me, hacuaha cuijne rcu me cojo cjuatacun rë me, sehe cuya me ladu naha xi cuaxëtjë me.

¹⁶Peru ngayun ne, jemu ndaja tsujun ngayujun ni tsëhë xi hatuxa tichutsujun cojo tuxcun; hacuaha visiñuju cojo tyjavañuju. ¹⁷Nguehe cuichjá quixë cojo nuju ta jemu ndaja tsujun ta, tsëhë xi hacuaha jemu cjín profeta hacuaha jemu cjín xuta xi matitjun xi caviyuju titjun ne, jemu meje scuëë me xcusun xi ngayun tichutsujun, peru casacuiin cavëë me. Hacuaha jemu meje cuisiniñuju me cjua xi tivisiñuju ngayun, peru casacuiin cavisiniñuju me ta, tsëhë xi cjëë cuechu nixtin.

Cachja Jesús mé vijne ejemplu tséhë cha xi catsitjê trigu

¹⁸ 'Cuatjin hindë ne, nuhyun mé meje cuichja ejemplu tséhë cha xi catsitjê trigu. ¹⁹ Hya xi visiñuju ngu xuta cjuua tséhë gobiernu xi sahmi Nina ne, peru vijnircu me cjuua jan, sehe vinduva Satanás ne, fahataha cjuua jan tséhë xahasen rë me. Cjuua vi ne, hacui sacuahha trigu xi cavixu ndiya. ²⁰ Hane tséhë trigu xi cavixu hiscan jemu naxindya ne, hacui sacuahha hya xi vihindë xuta cjuua rë Nina, hane fahatsja me cojo cjuuasua. ²¹ Peru trigu xi cuacun vë ne, jemu chúva tyjama rë vetju. Hacuaitjin ni vatju ngujo xuta má. Macjain rë me ngujo nixtin peru hya xi vechú ngu nixtin xi satë rë me cjuañihi o cjuandya xi sua xuta me ngatsë rë cjuua rë Nina ne, fëcacun me cojo cjuua jan. ²² Hane tséhë trigu xi cavixu ngajñi nahyá ne, hacui sacuahha hya xi vihindë xuta cjuua rë Nina, peru ha xcun xi cjuinduju me cojo nixtin rë me ne, tsingataha cacun me tséhë cjuatacun xi satë naja nguehe ngasunhindë, hacuahha meje rë me cjuanchina xi cjuicani rë, hane vëhë suaain cahndé xi cumajyë cjuua rë Nina cahntsua xahasen rë me, hacuahha sahmi me ngu cjuandaja xi tsingacun xi xuta rë Nina má me. ²³ Hane hya xi vixu yahnga trigu hiscan nihndë ndaja ne, hacuahha hacui sacuahha hya xi vihindë xuta cjuua rë Nina hane vijne rcu me mé vitexa Nina, hane sahmi me cjuandaja. Tjin me xi jercu quisun cjuandaja sahmi, hane tjin nga me ne, chuva cjuandaja sahmi me, hane yahnga me, hitsë sa chuva cjuandaja sahmi me.

Ejemplu tséhë xi jiyahma cojo tutjê rë trigu

²⁴ Sehe cachja nga me ngu ejemplu cojo me, hane cuitjin cachja me:

—Gobiernu xi sahmi Nina ne, cumá sacuahha camá hya xi catsitjê ngu xuta

tutjê rë trigu ndaja xcun nangui rë. ²⁵ Peru nixten ne, hya xi jiñafë xuta ne, cafehe ngu xi condra rë me catsitjê cha ngu ndiji xi meje tanguncun cojo trigu. Ngajan ngajñi rë trigu jan catsitjê hma cha sehe quiji cha. ²⁶ Hya xi camá ne, hisca xi cavetju xca rë, cavetju tú rë, sehe camachaya rë me tséhë ndiji jan. ²⁷ Hya xi camachaya rë me ne, cafehe mosu rë me xi tséhë nangui jan, cavinenguise mosu me: “Nai, tutjê ndaja xi camá canitjun, ¿há cutjin cavetjun xi casecjan cojo ndiji ne?” ²⁸ Ngajan cafayangui me tséhë mosu jan: “Ngu me xi condra naha casahmi me.” Hane cafayangui mosu jan cuitjin: “¿Há hanguin chjanijñi ndiji jan?” ²⁹ Peru cafayangui me cuitjin: “¡Jéya! Caveni chjanujñu ndiji jan ta sá tsajin ne, hacuahha chjanu trigu xi ndaja. ³⁰ Catamacha catsijo, sehe cuichja hya xi tjune rë xi tjun ni cjuanejñi cha ndiji, sahmi cha xtë rë xi cuaca cha. Sehe cjuaya cha trigu, cuinchandaja cha cahndé rë.” Cuatjin fi ejemplu xi cachja Jesús.

Ejemplu tséhë tutjê lihndi

³¹ Jesús ne, cachja nga me ngu ejemplu cuitjin:

—Gobiernu xi sahmi Nina ne, hacuahha cumajyë tangun cojo ngu tutjê ya mostasa ta jemu lihndi camahani ne. Tutjê jan ne, cafaha ngu cha catsitjê cha xcun nangui rë cha; ³² Tutjê rë ya mostasa ne, handasa hitsë sa lihndi má xi cumá rë yëjê ni tutjê xi yahnga ne, hya xi camá cha ni, hitsë sa jyë camá xi cumá rë yëjê ni ya xi yahnga. Cuma ngu ya xi hiscan nisë xi vitjen chu ngahnga ne, cuma sahmi chu ndava chu rcu ya jan.

Ejemplu tséhë san rë pan

³³ Cavuya cachja nga Jesús cuitjin:

—Gobiernu xi sahmi Nina ne, hacuahha tangun sahmi sacuahha san rë pan xi visecjan ngu chjuun ngajñi rë jyan chuva

rë nahyu rê pan cojo sa xi sahmixa nga-jñi rê yějë ni nahyu cjin jan.

**Me tsëhë xi Jesús ne,
sahmixa me cojo ejemplu**

³⁴ Cuatjin cachja Jesús cojo xutacjin, ta ejemplu ni cachja me cojo xuta ne, cachjaain me chichihin ta, suvá cojo ejemplu. ³⁵ Cuatjin cavicuya me sehe cuetjucaa cjua xi catsihindu profeta ta: Cjua xi vetju ntsuva ne, suva ejemplu ni; Cuichjá cjua xi hinchahma hisca ntsacu cavetsihin ngasunhndë.

**Cachja Jesús mé vijne
ejemplu tsëhë ndiji jan**

³⁶ Hya xi cavatju cachja me, sehe cat-sicjë Jesús cjua cojo xutacjin jan, cavise-hen me cahntsua ndihya hane ngajan cafehe tjengui rê me cha ladu rê me, cavinenguisse cha me ¿mé vijne ejemplu tsëhë ndiji nguiña jan?

³⁷ Sehe cafayangui Jesús cuitjin:

—Cha xi catsitjë trigu ne, hacui Qui-hndi rê Xuta Jain. ³⁸ Hane nguiña ne, hacui ngasunhndë. Tutjë ndaja ne, vëhë xuta xi vihndë me tsëhë Nina, hane ndiji jan ne, hacui xuta xi vihndë tsëhë xitse-hen. ³⁹ Cha condra xi catsitjë cha ndiji jan ne, hacui xitsehen xi matitjun cha. Hacuaha nixtin xi cjuanga ne, hya xi cjuë ngasunhndë. Hane cha xi cjuanga ne, hacui ángel. ⁴⁰ Cuanitjin sacua ha ndiji xi casahmi cha xtë rê xi cueti, cuatjin cumá cojo xuta xi hndiin tsëhë Nina hya xi cjuë ngasunhndë. ⁴¹ Hya ne Quihndi rê Xuta Jain ne, tsingatju me ángel rê me xi cuahaxin me yějë ni xuta xi candiya xi-cjin me ngajñi rê cjuatsehen cojo xuta xi sahmi me cjuatsehen, cuaxëxin me tsëhë gobiernu xi sahmi Nina. ⁴² Hya xi camá cavaxëxin me ne, scandiya me xuta his-can cuaca me ngu ndihi jyë, ngajan jemu squihnda me hacuaha jemu cuanerii ne-hñu me. ⁴³ Peru xuta xi tyjahi cjuatacun

rë me xcun Nina ne, cumá me sacua ha tsuhi xi seti xi sua hasen rê camá ngajan gobiernu xi sahmi Nina nahmi rê me. Yo ngayun xi tjin nuju cjuasua xi cuinuhyun cjua naha ne, ndaja tetuhunrcun. —Cu-atjin cachja me.

Ejemplu tsëhë tujún xi caseyanijihma

⁴⁴ 'Xuta xi meje cuisehen gobiernu xi sahmi Nina ne, hacuaha tangun me sacua ha ngu cha xi casacu rê cha ngu cahndé hiscan xi caseyanijihma tujún cjin. Hane hya xi camá ne, cavetsa nga cha tujún jan, sehe quiji cha cojo cjuasua ne, caviteña cha yějë xi tjin rê cha sehe cavechutaha cha chji rê xáhva jan.

Ejemplu tsëhë tuseti xi hnga chji rê

⁴⁵ 'Hacuaha xuta xi meje cuisehen me gobiernu xi sahmi Nina ne, tangun me sacua ha ngu cha viteña xi vanguisse cha ngu tuseti xi hitsë sa ndaja seti. ⁴⁶ Hane xi sacu rê cha ngu xi jercu tu vengui chji rê ne, quiji cha caviteña cha yějë xi tjin rê cha sehe cavechutaha cha chji rê tuseti jan.

Ejemplu tsëhë changa rê chu ti

⁴⁷ 'Hacuaha gobiernu xi sahmi Nina ne, cumá sacua ha ngu changa jyë xi catsingatjeya xuta ndachacun. Hane hya xi camá ne, ngajan cahntsua changa jan camá tangun yějë xcusun chu ti. ⁴⁸ Vëhë xi hora xi catsë rê ne, cajuvé nga xuta changa jan ne cavejña me tjehe rê ndachacun ngajan cavaxijin me chu. Chu xi chine ne, cavinchanndaja me, peru ca-candi me chu xi yahnga. ⁴⁹ Cuanitjin ne cumá hya xi cjuë ngasunhndë, ta cuin-duva ángel ne, cuatëcja me xuta xi tse-hen cjuatacun rê me tsëhë xuta xi ty-jahi cjuatacun rê me, ⁵⁰ sehe scandi me xuta tsehen hiscan cuaca me ngu ndihi jyë. Hane ngajan ne, jemu squihnda me hacuaha jemu cuanerii nehñu me.

Cjuanchina xatsë cojo cjuanchina changa

⁵¹ Hya xi camá ne, Jesús ne, cavinen-guise me xicjin me:

—¿Há cavijne rcu cjuá vi?

Ngajan cafayangui me:

—Juun, cavijnircuin.

⁵² Sehe ngajan cachja Jesús cuitjin:

—Hya xi ngu maestru xi vicuya me ley ne, sá xi scutaya me xi meje cuisehen me ladu tsëhë gubiernu xi sahmi Nina ne, sahmi me sacuaha nai rë ngu ndihya jyë. Xuta jan ne, vaxë me xcusun xatsë ne, hacuaha vaxë me xcusun changá tsëhë cahndé xi cavinchandaja me.

Jesús ne, cavuya me nangui rë me

⁵³ Hya xi camá cajnetaha cachja Jesús ejemplu vihi ne, sehe cavatju quijixin me. ⁵⁴ Hane xi quiji me ne, cafehe me nangui rë me, ngajan cavicuya me xuta cahntsua yungun rë. Hya xi camá ne, jercu cavëhërcun me Jesús, hane cachja me cuitjin:

—¿Jani cavutaya cha vihi ta jemu tjin rë cha cjuatacun? ¿Jani casacu rë cha cahndé xi sahmi cha cjuarcun? ⁵⁵ Cha vihi ne, quihndi rë cha chjineya jan. Naa ra ne, María hmí na. Hacuaha xicjin cha ne, hacui Jacobo, José, Simón cojo Judas. ⁵⁶ Hacuaha tichjá cha ne, xuta nandya naja. Ha hyun ta cuatjin peru, ¿jani casacu rë cha cjuá xi tichja cha?

⁵⁷ Cuatjin ne mijí cjuaha cuenda me cjuá rë Jesús tsëhë xi tangun nangui rë me. Sehe cachja Jesús cuitjin:

—Ngu profeta ne, macjain rë xuta me, peru hatuxa xuta nangui rë me macjaain rë me tsëhë me. Hacuaha xuta ndava me ne, macjaain rë me tsëhë me.

⁵⁸ Cuatjin camá ta tsëhë xi ngatsë rë xi macjaain rë xuta me ne, ndastu cjin cjuarcun casahmi me ngajan.

Xi má rë Herodes ne, Jesús ne, hacui Juan Vitenda Xuta

14 Nixtin hya ne, camachaya rë me xi matitjun xi hmí rë Herodes cjuá xi tichja xuta tsëhë Jesús. ² Ngajan xi cachja me cojo xuta xi faha cuenda rë me ta:

—Cha vëhë ne, hacui nima Juan Vitenda Xuta. Handasa cahme nima, peru ha cavascaya rë, vëhë xi tjin rë cha ngahñu xi má sahmi cha cjuarcun.

³ Ta Herodes jan ne, ha catsingatju me cachjaha rë Juan ne, catsihñu me cha xi quiji cha ndavaya. Cuatjin casahmi Herodes ta tsëhë xi cuatjin cachuya rë na Herodía, chjuun rë hntsë Herodes. ⁴ Tsëhë na vë cachja Juan cojo Herodes cuitjin:

—Chja ley ta ndajintjin camahani xi chjahan chjuun rë xingueen.

⁵ Herodes ne, meje tsiquehen me Juan jan, peru camaji ta tsëhë xi xi má rë xuta ne, cha Juan ne, hacui profeta má cha. Hane Herodes ne, tsacjun me xuta.

⁶ Cuatjin camá xi hya xi cavechu nixtin rë suhi tsëhë Herodes, na quihndi rë na Herodía ne, catë na ngajñi xuta xi siu suhi jan. Hane jemu cachuya rë Herodes xi cuatjin catë na. ⁷ Sehe ngajan xi Herodes casua na me cjuá quixi rë me xi sua me na tu mé ni xi meje cjuehya na. ⁸ Ngajan xi na vë ne, hya xi ha cavinchangui na naa rë na ne, cachja na cuitjin:

—Meje ná xi cahntsua ngu tyuva ne, tuhun ná rcu Juan Vitenda Xuta.

⁹ Hya xi camá ne, jercu choho cama rë Herodes. Peru tsëhë xi hisca Nina caveyanangui me hane tsëhë xi xcun cjin xuta jan casua me cjuá ne, catsingatju me cjuá xi cuatjin cumá. ¹⁰ Hane cavitexa me sindadu cavatësun cha rcu Juan ngajan ndavaya. ¹¹ Hya xi camá ne, cafehe cha cojo rcu jan xcun ngu tyuva hane casua me na. Sehe quijitjengui na

naa rë na, casua na naa rë na. ¹²Hya xi camá ne, xuta ladu rë Juan jan, cafehya me nima caveyaniji me. Sehe quiji me casua me camachaya rë Jesús.

Catsicjen Jesucristu hñú mil xihin

¹³Hane xi camachaya rë Jesús ne, cavetju me ngajan cavisehen me ngu barcu quiji me ngu cahndé xín. Peru xi camachaya rë xuta ne, cavetju me tsêhë nandya ne, quiji ntsacu me tjeheh laguna quiji tjengui me Jesús. ¹⁴Xi tu cavetju Jesús tsêhë barcu ngunda ne, cavutsejen me xutacjín jan, hane camayuma rë me xuta jan. Hane catsindaja me xuta hmu rë. ¹⁵Hane hya xi jimá nguixun ne, cafehe xuta ladu rë me cachja cojo me cuitjin:

—Jemu xín camahani cahndé vi, hane ha quiji hora. Ninguijnutuhun cjua cojo xutacjín vë ne, sehe catji me nandya xi siu tiñataha catatsë me comida xi sinë me.

¹⁶Peru Jesús ne, cuitjin cachja me cojo cha xi tejó jan:

—Sahmii ngujoyë xi cjuexin me ne, ngayun tuhun xi sinë me.

¹⁷Sehe ngajan xi cachja cha ladu rë me cuitjin:

—Hñu pan ne cojo jo ti tjin naja. —Cuatjin cachja cha.

¹⁸Sehe cachja Jesús cuitjin:

—Nduvuncujun.

¹⁹Hya xi camá ne, casahmi Jesús xi catiyuju xutacjín jan xcun ndiji; sehe cafahatsja me hñu rquí pan jan cojo jo ti jan. Hane tivutsejenniji me ngahnga ne, casua me nacuechji rë Nina, sehe cavotoho langa me pan casua me pan jan cha ladu rë me xi cjue sua cha sinë xuta. ²⁰Hane xuta ne, yëjë ni me cajinë me hatjin cachuya rë xahasen rë me. Hane xi cachjaya rë xi cavangui cajinë xuta jan ne, catsë tejó chajne. ²¹Me xi cajinë pan jan ne, hñú mil má me xi xihin. Ha

xin yachjin cojo langa xi hacuiin cojo camaxqui.

Quiji ntsacu Jesucristu xcun nandá

²²Hya xi camá ne, Jesús ne, casahmi rë me ngujoyë xuta ladu rë me xi cuisehen me barcu hane cjue titjun ni me ngunda vëhë, jinguyëjë rë xi tsinguijnetaha me cjua cojo xutacjín jan. ²³Hane hya xi camá quiji xutacjín ne, sehe camijixin Jesús rcu ndetjún xi cuisiajmi me cojo Nina. Hane hora xi camá nguixun ne, tacun suvá me. ²⁴Peru barcu jan ne, vasantjin laguna cjui, hane jemu chja cjui ngatsë rë tsindyu rë nandá xi tsivaha rë barcu ta, tsêhë xi tjo ne, taha hiscan cjui ne, ngajan nduva.

²⁵Hane hya xi tiña sahasen ne, quiji ntsacu Jesús xcun nandan ne quiji tjengui me me tsêhë me. ²⁶Hya xi cavëë xuta ladu rë me xi nduva ntsacu me xcun nandan ne, jemu camá xti rë me cachja me ta nima xi meje cuincharcun rë me, hane cajindayatë me. ²⁷Ngajan xi cachja Jesús cojo me ta:

—¡Xi carcuun! ¡Tuhun cjuetacun xahasen nuju ta ngahan vi!

²⁸Hya xi camá ne, cafayangui Pedru tsêhë Jesús cuitjin:

—Nai, sá xi quixi xi ngayun ne, tuhun ná cahndé nduvá tjenguë nuju.

²⁹Sehe cachja Jesús cuitjin:

—Nduvun.

Hane cavitjujne Pedru tsêhë barcu jan, quiji ntsacu me quiji tjengui me Jesús. ³⁰Peru xi camachaya rë me tjoxtin ne, catsacju me camá, sehe cavetsihin cavisehen ngahma me ngajni nandan. Hya xi camá ne cajindayatë me Jesús cachja me cuitjin:

—¡Nai, naxuntjun ná!

³¹Hya xi camá ne, ngutjen cafahatsja Jesús me, cavaniji me me ne, cachja me cojo me cuitjin:

—Ngayun ne, cjëë cumangutacunndujun cojo ná, ¿mé má macjaain nuju?

³²Hya xi camá ne, cavisehen catsijo me cahntsua barcu jan, hane hora vëhë ne casejyu tjo jan. ³³Ngajan xi xuta xi hinchá barcu jan ne, cavixcuhnchi me cakaharcun me Jesús cachja me cuitjin:

—Ngayun ne, quixi jain xi Quihndi rë Nina yun.

Casahmi Jesús xi camandaja xuta nandya Genesaret

³⁴Xi quiji sa me cojo barcu ne, cafehe me tjeheh laguna hiscan nandya xi hmí Genesaret. ³⁵Hane xi camachaya rë xuta xi Jesús xi cafehe me, catsingatju me cjua rë yëjë ni nandya xi siutahndee, hane xuta ne quijicojo me xuta hmu rë me hiscan tacun Jesús. ³⁶Sehe cafehya me cojo Jesús xi ndastu satëtaha xuta hmu rë jan ntsacu tsjian rë Jesús. Hane yëjë ni xuta hmu rë xi casatëtaha ntsacu tsjian rë Jesús ne, camandaja me.

Cha partidu fariseo ne, fahataha cha Jesús

15 Ngu ndiya ne, ngujo cha tsëhë partidu fariseo cojo ngujo cha maestru rë ley ne, canduva cha tsëhë nandya Jerusalén, quiji cha hiscan tacun Jesús, cachja cha cojo me cuitjin:

²—¿Hacutjin cumá xi cha ladu nuju ne, sahmi cha sacuaaha yaha xcusun rë xutachanga naja? Ta cuatjin vanii cha tsja cha hora xi jinë cha niñu.

³Ngajan xi Jesús cafayangui me tsëhë cha cuitjin:

—Hane ngayun ne, ¿hacutjin cumá xi vejñuxun cjua xi cavitexa Nina ngatsë rë xi nihñu xu xcusun rë xutachanga naja?

⁴Cachja Nina ta: “Chjuhuncun na nuju, chjuhuncun nahmi nuju”, hacuaaha chja ta: “Yo xi choho chja tsëhë xutacha rë ne, xuta ne tsiquehen rë.” ⁵Peru ngayun tuhun cahndé xi cuichja xuta cojo xutacha rë ta: “Ha quihndë cumaji cuisé-coo nuju ta yëjë ni xcusun xi tjín ná ne, ha cavejñá tsja Nina.” ⁶¿Mé má cuatjin

tuhun cahndé xi faharcuiin cha nahmi rë cha? Cuitjin ne, ngatsë rë xcusun nuju sacuaaha xi venguichjiin rë cjua rë Nina xi cuma rë xuta. ⁷Ngayun ne, xuta jo xcun jo hntsua ngayun. Cachja quixi profeta Isaías xi cuitjin catsihindu me tsujun:

⁸Xuta xi cuacun vi ne, ndaja chja me tsahan

peru xi cojo xahasen rë me ne, hisca tsin-guitsjiin me ngahan.

⁹Tu mahya xi faharcun ná me ta, Xi vicuya xicjin me ne, hacuiin cjua naha ta tu cjua rë xuta.

¹⁰Hya xi camá cachja me cuatjin ne, cajindaya Jesús xutacjín cachja me cojo cuitjin:

—Ngayujun ngarca ni ne, nuhyun ndaja cjua vi: ¹¹Xcusun xi tsitseheh rë xuta ne, hacuiin xcusun xi chine xi visehen hntsua me, ta xcusun xi tsitseheh rë xuta ne, xcusun xi vetjun tsëhë hntsua me.

¹²Sehe cafehe xuta ladu rë Jesús ne, cavinenguise me cuitjin:

—¿Há hyun xi canicjun rë cha partidu fariseo ne xi cuatjin canújun?

¹³Peru cafayangui Jesús cuitjin:

—Tu mé ni tutjë xi catsitjiin nahmi naha xi tacun ngahnga ne, tjune rë hisca cojo tyjama rë. ¹⁴¡Caveni! ¡Nihñuu cuendun me! Me vëhë tangun me cojo xuta rcá xi cjuecani xicjin me. Hane sá xi cuatjin ne, cuixuya catsijo me xanga.

¹⁵Sehe cachja Pedru cuitjin:

—Ningacun niji mé vijne ejemplu jan.

¹⁶Ngajan xi Jesús cachja cojo me ta:

—¿Há hiscan ngayun cajni rcun cjua xi cachjá ni? ¹⁷¿Há hyuun xi xcusun xi jinë xuta ne visehen cahntsua me? Fë ne, vetjutaha ndatsen. ¹⁸Peru xcusun xi vetju chja me ne, nduva tsëhë xahasen rë me, hane vëhë tsitseheh rë me, ¹⁹ta tsëhë xi tsëhë xahasen rë xuta ne, nduva cjuatacun tsehen sacuaaha jyé xi tsiquehen xicjin xuta, sacuaaha jyé xi sahmi chjuunnahñu rë me jingu sa

chjuun, sacuaha yachjin xi viteña yojo rë, sacuaha cjuachëjë, sacuaha testigu xi vindacha me, sacuaha cjuachjataha. ²⁰Yëjë cjuatsehen xi cuacun vëhë ne, nduva tsëhë xahasen rë xuta, hane vëhë tsitsehen rë me; peru sá jinë me niñu cojo tsja me xi cjëë cuane me ne, tsitsiin rë me.

**Jesús ne, visecoo me ngu
chjuun xutaxín, na xi hacuiin
na ladu tsëhë Israel**

²¹Hane Jesús ne, cavetju me ngajan, quiji me ngu nanguixin táha distritu nandya Tiro cojo nandya Sidón. ²²Hya xi camá ne, cafehetjengui rë me ngu chjuun cananea xi tsëhë ngajan. Cajin-daya na cachja na cojo Jesús cuitjin:

—¡Nai! Ngayun, quihndindaicjin rë David, ¡catamayuma nuju ngahan! ta na quihndi naha ne, jiya xitsehen xi jemu suandya rë na cahntsua xahasen rë na.

²³Peru Jesús ne, ndastu me cjuat cat-sicuya me. Hane xuta ladu rë me ne, cafehya me Jesús cuitjin:

—Ningatjunxun na, ta jemu si nduvat-jengui na yaan fehyataha na yun. —Cu-atjin cachja me.

²⁴Ngajan xi cafayangui Jesús cuitjin:

—Nina ne, catsingatju me ngahan ngatsë rë xuta rë nangui Israel, ta me vëhë sacuaha tsánga xi cachaja má me.

²⁵Hya xi camá ne, cafehetiña na tsëhë Jesús cavixcuhnchi na xcun Jesús xi cafaharcun na me. Cachja nga na cuitjin:

—Tatá, nihñu favor tisecon ná.

²⁶Ngajan xi cachja Jesús ejemplu vi:

—Sechiye ne catijnetaha catjine nixti ta, hacuiin ndatjin xi chjahantahan niñu tsëhë nixti hane sehe tahan rë naña.

²⁷Hane cafayangui na cuitjin:

—Quixi jain xi nújun, peru naña xi siu ngahma maxë ne, sacu xi rë pan xi vix-uhndu ngahma maxë rë nai rë chu hane jinë chu.

²⁸Sehe cafayangui Jesús cachja me cojo na cuitjin:

—Ngaye chjuun, jemu ndaja mangutacuin cojo ná. Catamandaja quihndi riji sacuaha xi meje ri.

Hya xi camá ne, hora hya ne, caman-daja quihndi rë na.

**Casahmi Jesús xi camandaja
xuta tjeheh rë laguna Galilea**

²⁹Hya xi camá ne, cavetju Jesús taha vëhë quiji me tahndee rë laguna Galilea sehe ngajan camiji me ngu ndetjún, ngajan cavejña me. ³⁰Hane jemu quijitjen-gui rë me xutacjín, yaha me xuta rengun, xuta rcá, xuta lihmi, xuta yoho cojo xuta xi má rë hacjahi chíhin ne caviyujutë me xuta jan xcun Jesús hane Jesús ne, casahmi me xi camandaja me. ³¹Xi cavëë xutacjín xi cuatjin camá ta, cama cachja xuta lihmi, camajingu xuta yoho, findaja xuta rengun hacuaha tsejen rë xuta rcá ne, sehe jercu quijircun rë me, hane casahmi hnga me, casahmi jyë me Nina, Nina jan xi faharcun xuta nangui Israel.

**Cjuarcun xi catsicjen
Jesús ñuju mil xihin**

³²Ngajan cajindaya Jesús xuta ladu rë me, cafehe me cachja Jesús cojo rë me cuitjin:

—Jemu yuma má ná xutacjín vi ta ha quihndë jyë nixtin hinchataha me cojo naja, hane ha quihndë tsajin camahani mé xi sinë me. Tsajin mangucacun xi tsingátju me cjue me xi cjëë sinë me niñu ta, sá tsajin ne, cjuaha rë me hinda ndiya.

³³Sehe ngajan xi xuta ladu rë me ne cafayangui me tsëhë me cuitjin:

—Peru nguehe nangui xín ne ¿jani cuma sacú niji pan xi sinë xutacjín vi?

³⁴Ngajan xi cavinenguise Jesús cojo xuta cuitjin:

—¿Há cjín pan tjín nuju?

Ngajan xi cachja me ta:

—Yatu má pan hacuaha siu ngujo ti langa.

³⁵Ngajan xi Jesús ne cavitexa me xutacjín xi cuiyujutë me nangui. ³⁶Hya xi camá casahmi xuta ne, sehe cafaha Jesús yatu pan cojo ti jan ne sehe casua me nacuechji rë Nina. Hane cavotoho langa me pan cojo ti jan, casua me xuta ladu rë me xi cavatëcja me ne cafaha xutacjín. ³⁷Cuatjin camá cajine xuta jan, hane jemu ndaja cama rë xahasen rë me. Hane xi cafaya xuta xi cavangui cajinë xuta jan ne catsë yatu nisinya. ³⁸Xuta xi cajinë ne, sacuaha ñuju mil má me xi xihin me, hacjahi má xuta chjuun cojo quihndi. ³⁹Hya xi cajnetaha vëhë ne, catsingatju Jesús xuta cafe me, hane suvá ni me, cavisehen me ngu barcu quiji me taha nandya Magadán.

Cha partidu fariseo cojo cha partidu saduceo ne fehya cha xi tsingacun Jesús ngu seña

16 Xi cafehe me ngajan ne, hacuaha cafehe cha tsëhë partidu fariseo cojo cha partidu saduceo hane ta tsëhë xi meje cjuahachuva cha me, cafehya cha me ngu cjuarcun xi nduva ngahnga, cojo sa xi scuëë cha xi Nina catsingatju rë Jesús. ²Peru Jesús ne, cafayangui me cojo ejemplu vi cuitjin:

—Nguehe ne, hya xi chutsujun xi má haní ngahnga ne, nújun jain, ta: “Tyjahi nchujun ni, ndajyihí nixtin.” ³Cuanitjin hya xi sahasen ne, sá xi má haní ngahnga hane hinchá yuffi jma ne, nújun ta: “Va cumá nixtin.” Jo má tacun. ¿Hacutjin cuma xi jemu hyun mé vijne xcusun xi cún ngahnga, peru vijniircun mé vijne xcusun xi tijima nguehe nixtin vihi ni? ⁴Xuta tsëhë nixtin vihi ne, xuta xi tsehen cjuatacun rë me, xi tjenguiin me Nina cojo ngu ni cjuatacun, xuta vë xi fehya me ngu seña. Peru sacuiin rë me seña ta

seña xi sacu rë me ne, sacuaha seña xi ha catsingacun profeta Jonás hatsëë nixtin.

Sehe xi cajnetaha cachja Jesús cjua vëhë ne, caviyuju me xuta jan ne, quiji me.

Ejemplu tsëhë san rë pan

⁵Hya xi cafehe xuta ladu rë me ngunda laguna ne, hacuaha cachaya rë me cjuaha me pan. ⁶Sehe Jesús cachja cojo me:

—Nechun cuidadu tsëhë san rë pan tsëhë cha partidu fariseo cojo xi tsëhë cha partidu saduceo.

⁷Sehe cha ladu rë me ne, cavisiajmi cha cojo xicjin cha cuitjin:

—Tsëhë xi cachaya naja pan ne, vëhë xi cuatjin chja me.

⁸Peru xi camachaya rë Jesús xi veyanangui cha xi tsajin rë cha pan ne, cachja me cojo cha cuitjin:

—Ngayun ne, cjëë cumangutacun nduju cojo ná. ¿Mé má cuatjin nújun xi chjá ta tsëhë xi tsajin nuju pan? ⁹¿Há nuhyuun? ¿Há vitsjiin nuju? Hya xi cajinë hñu mil xuta hñu pan ne, ¿há cjín chajne cachjayun tsëhë pan xi cavangui jan? ¹⁰Hacuaha hya xi cajinë ñuju mil xuta yatu pan ne, hya ne ¿há cjín chajne cachjayun? ¹¹¿Hacutjin cuma xi nuhyuun xi hacuiin tsëhë pan xi cachjá cjua jan? Xi chjá ne, nechun cuidadu tsëhë san rë pan tsëhë cha partidu fariseo cojo xi tsëhë cha partidu saduceo.

¹²Hya xi camá ne, camachaya rë me xi cachjaain me xi meje cuidadu cojo san xi sahmixa pan ta cachjá me tsëhë xi meje cuidadu cojo cjuachacun xi sahmixa cha partidu fariseo cojo cha partidu saduceo.

Catsinguixi Pedru yo Jesucristu

¹³Ngu ndiya xi ha cavisehen Jesús dis- tritu tsëhë nandya Cesarea tsëhë Filipo ne, cavinenguise me xuta ladu rë me cuitjin:

—Mé chja xuta tsahan, ¿yo ngahan, Quihndi rë Nina Jain? —Cuatjin cavinenguisse me cha.

¹⁴ Sehe ngajan xi cachja cha cojo Jesús cuitjin:

—Yahnga me ne, chja me ta nima Juan Vitenda rë Xuta ngayun, hane yahnga nga me ne, chja me ta Elías, hane yahnga nga me ne, chja me ta nima Jeremías, hane me xi yahnga nga ne, chja me ta ngayun ne, ngu profeta xi hacjahi.

¹⁵ —Hane ngayun ne, ¿mé nújun ni, yo ngahan? —Cuatjin cavinenguisse Jesús.

¹⁶ Ngajan xi cafayangui Símón Pedru cuitjin:

—Ngayun ne, Mesías xi catsingatju nuju Nina; ngayun, Quihndi rë Nina, Nina quicun jain.

¹⁷ Sehe cachja Jesús cuitjin:

—Ndatjin tsujun, Símón, quihndi rë Jonás. Tsajin ngu xuta xi casua camachaya nuju cjua jan, ta Nahmi naha xi tacun me ngahnga ne, me vëhë xi casua me xi camachaya nuju tsëhë.

¹⁸ Hane ngahan ne, suá cumachaya nuju xi ngayun ne, ngayun xi hmí nuju Pedru. Hane ñihi nuju ne, vijne ndyojo. Hane xcun ndyojo vihi sahme yungun naha; yungun jan ne, hisca cjuaveya ne tsajin ngahñu xi tsicjëya rë. ¹⁹ Suá nuju quicha tsëhë gobiernu xi sahmi Nina, ngajan xi xcusun xi nihñucjun nguehe ngasunhndë ne, hacuaha cumahñucjan ngajan ngahnga, hacuaha xcusun xi chundecjun nguehe ngasunhndë ne, hacuaha tundecjan ngajan ngahnga.

²⁰ Sehe Jesús ne, cavitexa me xuta jan xi tsajin camahani yo xi cuichja me cojo tsëhë xi Mesías má me.

Cachja Jesús xi tsiquehen xuta me

²¹ Hya xi camá ne, sehe cavetsihin vicuya Jesús xuta ladu rë me tsëhë xi sahmi ngu jyë xi cjue me nandya Jerusalén, hane ngajan ne, jemu cjín cjuañihi cuátju me cuma xi sahmi xuta

changá cojo nahmi xi matitjun tsëhë nahmi cojo cha xi vicuya cjuachacun ne. Tsitjungui cha me, tsiquehen cha me; peru xi cumá jyan nixtin ne, tsicuya Nina me cjuahñu. ²² Ngajan xi Pedru ne, quijixin me cojo Jesús. Sehe cavetsihin cachjataha me Jesús cuitjin:

—Tatá, ¡catamamiji rë Nina! ¡Hatuxa cumaji cuatjun cuatjin!

²³ Hane xi cavuya Jesús cavutsejen me Pedru, ngajan cachja cojo me cuitjin:

—Tihinxin ngaye Satanás, ngaye ne, sacuaha ngu ndyojo xi meje xtenguiya ná ngajni cjuatsehen tsëhë xi ningati-intacuin ngaye sacuaha tsingatahacacun Nina ta ningatehetacuin sacuaha ngu xuta ngasunhndë ni.

²⁴ Sehe cachja Jesús cojo cha ladu rë me cuitjin:

—Sá xi tjin yo xi meje rë xi cuma cuisehen me ladu naha ne, ha quihndë mijí rë xi sahmi me hacutjin xi meje rë suvá me ta nchunchujun ni meje rë xi catejñahñu xahasen rë me xi cjuenduju me cojo ndiya naha, handasa hisca cueya me xcun cru. ²⁵ Yo xi mijii cuisehen ladu naha tsëhë xi tsacjun me xi cueya me ne, cahndë xi vetjo me cjuahñu rë me ne, tsichaja me cjuahñu xatsë xi sacu rë me. Peru yo xi ngatsë rë xi cavisehen ladu naha cueya ne, sacu rë cjuahñu jan. ²⁶ ¿Mé machji rëhë rë yo xi sacú rë yëjë cjuanchina rë ngasunhndë peru sehe cueya ne cumá castigu? Tsajin mé xi cuma tsindeya xicjin me cojo cjuahñu xatsë. ²⁷ Ta ngahan, quihndi rë Xuta Jain, cuinduvá cojo hasen ndajy-ihi tsëhë Nahmi naha hacuaha cojo ángel naha cuinduvá; hane hya ne, cuechji me jimangu me, ¿há ndaja há ndajin casahmi me? ²⁸ Cuichjá quixë cojo nuju ta tjin yahnga ngayun xi sechun nguehe xi cueyuun jinguyëjë rë xi cjëë chun xi cuitexa Quihndi rë Xuta Jain gobiernu xi sahmi Nina.

Cavindeya xcusun rë Jesucristu

17 Hya xi camá cavatju jyun nixtin ne, quijixin Jesús quijicojo me Pedru cojo Jacobo cojo Juan, hntsë Jacobo, quijiniji me ngu naxi hnga. ²Ngajan camá xi cavëë me xi cavindeya xcusun rë Jesús: Xcun me ne, camaseti sacua ha seti tsuhi, hacua ha tsjian rë me ne, jemu tu tyava camahani camá sacua ha hasen rë ndihi. ³Hacua ha ngajan cavëë me xi cafehetsejen nima profeta Moisés cojo profeta Elías, me xi caviyuju hatsëë nixtin ne, tivisiajmi me cojo Jesús.

⁴Sehe cachja Pedru cojo Jesús cuitjin:

—Nai, tu ma rë xi nguehe nechin ne, sá xi meje nuju ne, sahme jyan puestu; ngu cuma tsujun ne, ngu cuma tsëhë Moisés, hane cojo ngu cuma tsëhë Elías. —Cuatjin cachja me.

⁵Hane hora xi tichja Pedru ne, canduva ngu yufi xi seti tsejen casahmi tjahnguen rë tsëhë me, hane canuhya rë ngujo cjua xi cavetju ngajni yufi jan xi cachja cuitjin:

—Cha vihi xi Quihndi naha cha xi jemu hmu cacún. Jemu ndama ná ngatsë rë cha. Tinuhyun cjua xi chja cha.

⁶Hya xi cahndë xuta rë me cjua jan ne, caticaxcun me. Hane jemu catsacjun camahani me camá. ⁷Ngajan xi cafehe Jesús cavetahatsja me me, hane cuitjin cachja me:

—Tisatjunhngun. Xicarcuun.

—Cuatjin cachja me.

⁸Hane xi cavutsejenniji me ngajan ne, ndastu yo siu ta suva ni Jesús tacun me.

⁹Xi tu tivijne me tsëhë rcu naxi jan cojo xuta ladu rë me xi quijicojo me jan ne, ngajan xi cachja me cojo me ta tsajin yo xi cuichja me cojo xcusun xi cavëë me. Xi cuatju cueya Quihndi rë Xuta Jain, sehe cuya nga me cjuahñu ne, hya cuichja me.

¹⁰Ngajan xi cavinenguisse me cojo Jesús cuitjin:

—¿Mé má cuatjin chja maestru tsëhë ley xi titjun Elías cuinduva me, sehe cuinduva Mesías?

¹¹Ngajan cafayangui Jesús cuitjin:

—Quixi xi Elías cuinduva me titjun ta me vëhë cuiyujuchihin me yëjë ni xcusun. ¹²Peru cuichjá cojo nuju ta ha canduva me, peru xuta ne, hvín me xi hacui me, hane choho casahmi xuta cojo me hacutjin meje rë xahasen rë me. Hane hacuanitjin sahmi me xi cuátju cjuañihi Quihndi rë Xuta Jain.

¹³Ngajan xi camachaya rë xuta rë me ta tichja me tsëhë Juan Vitenda xuta hya xi chja me Elías.

Jesucristu ne, casahmi me xi camandaja cha xi faha rë chajan

¹⁴Hane xi quiji me ne cavechutaha me xutacjín ne, ngajan cafehetjengui rë me ngu xihin, cavixcuhnchitaha cha Jesús cachja cha cuitjin:

¹⁵—Nai. ¡Catamayuma nuju cha lihndi naha ta, jemu faha rë cha chajan hane jemu choho sahmi cojo cha. Jiya hora ne, finenguiya cha ngajni ndacahi, hane jiya hora nga ne, viticjaya cha ngajni nandan. ¹⁶Cëjëcojo cha xcun xuta ladu nuju xi tsirqui me cha peru camaji casahmi me.

¹⁷Sehe ngajan xi Jesús ne, cuitjin cafayangui me:

—Ngayujun ni ne, xuta xi macjaain rë ngayun hacua ha xuta xi cavetjuxin tsëhë ndiya ndajyihi ngayun. ¿Há jyë sa xi cuitejña cojo nuju? ¿Há jyë sa nixtin xi scaa ná cojo nuju? Nduvuncujun cha nguehe. —Cuatjin cachja me.

¹⁸Hya xi camá ne, cachjataha Jesús xitsehen xi hincha xahasen rë cha, hane cavetjuxin xitsehen jan, hane hora hya ne, camandaja cha.

¹⁹Hya xi camá ne, xi cafehe xuta ladu rë Jesús cavinenguisse me me cuitjin:

—¿Mé má ngayin ne xi camaji canax-inxin xitsehen jan tséhë xahasen rë cha vë?

²⁰ Ngajan xi cachja Jesús cojo me ta:

—Camaji ta hacuiin ndaja macjain nuju. Ta cuichjá quixë cojo nuju ta sá xi mangutacún cojo ná ndastu hitsë ne, hacuaha cuma cuinújun cojo naxi vihi: “Catjixin, catjin catisecon ngajan tavéhë.” Hane cuihndë tsujun. Hisca sá xi mangutacún cojo ná ndastu hitsë ne, tsajin me xi camaji nihñu. ²¹ Peru sacuaha xitsehen xi cuacun vë ne, meje rë xi titjun chjahyan rë Nina hacuaha cuinechan xun rë me, cojo sa xi cuma naxexeen.

Cachja nga Jesús xi tsiquehen xuta me

²² Nixtin xi caviyuju Jesús cojo xuta ladu rë me ngajan distritu Galilea ne, cachja Jesús cojo me ngu nixtin cuitjin:

—Ngahan xi Quihndi rë Xuta Jain ngahan ne, hatuxa tjin xi cuma ngahan entregadu tsja xuta ²³ xi tsiquehen ná me. Peru xi cjuë xi jyan nixtin ne, cuya nga cjuahñu.

Hane xi cahndë me cjuja jan ne, jemu cafaha me cjuachoho.

Jesucristu ne, cavechjitje me tujúnsa tséhë yungun

²⁴ Hya xi cafehe me nandya Capernaum, cafehe xuta xi faha me tujúnsa rë yungun, camatiña me tséhë Pedru cachja me cojo me cuitjin:

—Maestru nuju ne, ¿há vechjitje me tujúnsa rë yungun?

²⁵ Ngajan cafayangui Pedru cuitjin:

—Juun, vechjitje me.

Hya xi camá ne, xi cavisehen Pedru ndihya ne, peru chajasa xi cuichja me ne, ngajan xi cachja Jesús cojo me cuitjin:

—Simón, ¿mé nújun? Sacuaha me xi matitjun tséhë nandya ngasunhndë ne,

¿yo vitexa me xi satë rë xi cuechjitje tujúnsa? ¿Há quihndi rë me? ¿Há xutaxín?

²⁶ Ngajan xi cachja Pedru cuitjin:

—Xutaxín cuechji me.

Cachja nga Jesús cuitjin:

—Sá xi cuatjin ne, quihndi rë me xi matitjun jan ne, ha cavatjuhnga tséhë.

²⁷ Quixi vë, peru cojo sa hacuiin ngatsë rë vëhë cumacjan rë me o maxti rë me cojo naja ne, tangun laguna ne, chandunyun tsitin ngajni nandan ne, hane hya xi faha tsitin ngu ti ne, chu xi tjun faha rë ne, chjuhun chu nuxuhun hntsua chu hane ngajan cahntsua hntsua chu jan ne, sacú tujún xi stetaha cuechjun tujúnsa xi satë ná cojo xi satë nuju.

Yo xi matitjun

18 Hya ne, xuta ladu rë Jesús cafehe tjengui me me, cavinenguise me cuitjin:

—¿Yo xi hitsë sa cumatitjun hya xi sahmi Nina gobiernu?

² Hya xi camá ne, cajindaya Jesús ngu lihndi, cavejña me cavasencja. ³ Sehe cachja me cuitjin:

—Hisca ngu ngayun cumaji cuisuhun gobiernu xi sahmi Nina ne, sá xi hacuiin nindeyun cjuatacun nuju hisca cuma yun sacuaha ngu quihndi. ⁴ Vëhë xi yo xi tsinguijne suvá me yojo rë me xi cuihndë me sacuaha vihndë ngu quihndi ne, me vëhë xi hitsë sa cumatitjun me hya xi sahmi Nina gobiernu. ⁵ Hane tu yo ni xi cjuahatsja rë ngu quihndi xi cuacun vë ngatsë rë xi ladu naha má ne; vëhë cuma sacuaha xi cafahatsja me ngahan.

Xuta xi nduvacojo me xcusun xi tsitsehen rë xicjin

⁶ Peru yo xi nduvacojo xcusun xi sahmi xi tsismicacun ngu quihndi ndiya naha ne, hitsë sa ndaja tséhë xuta vëhë xi xtyangui ngu ndyojo natsi nguisin me sehe ningatjeya rë me ngajni ndachacun. ⁷ Jemu choho vatju xuta ngasunhndë

ngatsë rë xcusun xi tsitsehen rë me xi sahmi me cjuatsehen. Hatuxa cuinduva xcusun xi meje sahmi xi tsismicacun xuta ndiya rë Nina, peru jemu chojyihî tsëhë xuta xi nduvacojo me xcusun vëhë.

⁸Hane sá xi cjuatacun nuju meje rë xi nihñu ngu jyé cojo ntsun o sá xi cojo ntsacu ne, vengui sa chji rë xi chandunxun, ta hitsë sa ndaja tsujun xi cuma yoho yun xi cuma rë xi cuechun jingu cojo catsijo ntsun o catsijo ntsacu xcun ndihî xi tsajin nixtin tsajin nixten xi coho. ⁹Hacuaha sá xi cjuatacun nuju meje rë xi nihñu ngu jyé cojo xcusun xi chutsujun cojo tuxcun ne, chjuhunxun tuxcun jan chandunxun, ta tsëhë xi hitsë sa ndaja tsujun xi sacu nuju cjuahñu xatsë handasa cojo ngu ni tuxcun xi cuma xi cojo catsijo tuxcun cuechun xcun ndihî xi sahmi castigu rë nima. ¹⁰Cojo yëjë ni ne, nihñu cuidadu xi nitjunguun ngu quihndi sacuaha quihndi vihi, ta tsëhë xi ángel xi sahmi cuenda me ne, yëjë nixtin yëjë hora ne, siu tangun me cojo Nahmi naha hane sahmiî ngu jyé xi cjuehya me cahndé xi cuichja me cojo.

Ejemplu tsëhë chu tsánga xi cachajá

¹¹Quihndi rë Xuta Jain ne, canduvá me xi cuaxëtje me xuta xi cachajá. ¹²¿Mé xi nújun? Cuejñaa ne xi ngu xihîn tjîn rë me ngu cientu chu tsánga. Hane sá xi chajá ngu chu rë me, ¿há hyuun xi cuiyujutaha me chu xi ñujuchan tyjuhun ñuju jan nguñña ne, sehe cjue me cuanguise me ngu chu xi cachajá jan? ¹³Hane hya xi sacú rë me chu ne, hitsë sa jyé cjuasua tjîn rë xahasen rë me ngatsë rë xi casacu rë me chu xi cachaja xi cuma rë cjuasua tsëhë ñujuchan tyjuhun ñuju chu xi tetjo. ¹⁴Cuanitjin xi cuma rë Nahmi nuju xi tacun ngahnga, ta mijí rë me xi chajá hisca ngu quihndi rë me cuatjin.

Hacutjin meje rë xi cuinújantahan xingueen

¹⁵Hane sá xi ngu xingun choho sahmi cojo nuju ne, tangun suvun tinújuntuhun rë, hane sá xi tsindeya cjuatacun rë ne, ndatjin, ta hacuiin cuetsuntaha cjuandaja xi tjîn nuju cojo me. ¹⁶Peru sá xi vihndiin me tsujun ne, tangun chjuhun ngujo xuta tanguncujun xi tinújuntuhun rë tsëhë xi hya xi cuma me testigu nuju tsëhë, sehe cumatsejen cjuaquixi. ¹⁷Sá xi hisca cojo me vë vihndiin me tsëhë me ne, tangun tinújun tsëhë xcun xuta yungun, hane sá xi hacuaha vihndiin me cjuatacun rë xuta yungun jan, cumá me xi cuma nuju sacuaha ngu xutaxín o sacuaha ngu xuta ndacha xi faha rë tujúnsa.

¹⁸Cuichjá quixë cojo nuju ta xcusun xi nihñucjun nguehe ngasunhndë ne, hacuaha mahñucjan ngajan ngahnga, hacuaha xcusun xi nihñu ndaya nguehe, hacuaha mandaya ngajan ngahnga. ¹⁹Hacuaha cuichjá cojo nuju ta sá nguehe ngasunhndë ne matangun cjuatacun rë jo ngayun tsëhë ngu xcusun xi chjahyun rë Nina ne, cuetjucaa jain tsujun ta sahmi chihîn Nahmi naha xi tacun me ngahnga. ²⁰Ta tu mé ni cahndé xi cuiyujuntangun ngu jo jyan xuta xi ngajan veyanangui ñihî naha, hacuaha ngajan ngajñi rë me tejña ngahan.

²¹Sehe cafehe Pedru cachja cojo me cuitjin:

—Nai, ¿há cjín ndiya sahmi ngu jyé xi tsinchátaha xingueen sá xi choho sahmi me cojo ná? ¿Há ndatjin xi yatu ndiya?

²²Ngajan cafayangui Jesús cuitjin:

—Hacuiin yatu ndiya ni, ta cuichjá cojo nuju ta mameje rë xi jyanchan të cuatjin xi yatu ndiya ninchatuhun rë me.

Ejemplu tsëhë cha xi mijí tsinchataha xicjin cha

²³Ngajan tsejen xi hya xi Nina sahmi me gobiernu ne, cumá sacuahha ngu me xi matitjun xi meje cuaxëchihin me cuenta xi tjin rë me cojo xuta rë me. ²⁴Hane hora xi tijima ne, cajindaya rë ngu cha xi cafehe cha hane cha jan ne, të mil tujún quitjen cha. ²⁵Hane ngatsë rë xi tsajin camahani cha rë tujún xi sahmingojo cha, cachja me xi matitjun jan xi xteña cha xi cuma cha ngu mosu, xteña suva cha, hacuaha cojo chjuun rë cha cojo quihndi rë cha cojo yëjë ni xi tjin rë cha, hane sehe cuatjin cuma cuechji cha tsëhë xi quitjen cha. ²⁶Hya xi camá ne, cavixcuhnchi cha xcun me cafarharcun cha me cafehya cha me cuitjin: “Nai, catijnehnchan cjuacjan nuju, tuhun ná hitsë cahndé hane cuechjë tsujun.” ²⁷Ngajan xi me xi matitjun jan ne, camayuma rë me cha, catsijyëcacun me tsëhë cha tsëhë cjuacjintacun jan, catsinchataha me cha.

²⁸Peru xi cavetju quiji cha jan, cavechutaha cha jan ngu cha xicjin cha xi quitjen tsëhë cha hitsë tujún, hane cafaha cha nguisin xicjin cha jan, cachja cha cuitjin: “Nihni ngojo yëjë xi quitjin tsahan.” ²⁹Hane xi cavixcuhnchi xicjin cha xcun cha ne, cachja xicjin cha jan cuitjin: “Catijnehnchan cjuacjan nuju, tuhun ná hitsë cahndé ta cuechjë tsujun.” ³⁰Peru mijí sua cha cahndé, hane quiji caveya cha xicjin cha ndavaya, ngajan seya xicjin hisca xi cuma sahmingojo tujún. ³¹Hya xi cavëë yahnga mosu xcusun xi camá cavatjun jan, jemu camá xti rë me quiji casuacuenda me tsëhë cojo me xi matitjun tsëhë me. ³²Ngajan xi cajindayavaha me xi matitjun cha jan, cachja me cuitjin: “Ngaye, jemu choho xcusun riji. Catsinchátaha yëjë ni xi quitjin tsahan, tsëhë xi jemu cachjahye. ³³Hane ngaye, çhacutjin cumá xi

tsajin ri cjuayuma cojo xinguin? ta ngahan ne, cama yuma ná ngaye.” ³⁴Cuatjin camá xi jemu camacjan rë me xi matitjun cojo cha jan, catsingatju me cha cjuanihi ngajan ndavaya jñu hisca nixtin xi cjuë cuechji cha xi quitjen cha.

³⁵Hane cuatjin sahmi Nahmi naha xi tacun ngahnga cojo nuju, sá xi ninchatuun xingun cojo yëjë xahasen nuju.

Cjuachacun tsëhë xuta xi tsismi xicjin

19 Hya xi cajnetaha cachja Jesús cjuua vi, sehe cavetju me distritu Galilea ne, cavisehen me distritu Judea ngajan tahndee ndajyë Jordán ladu vetjucaa tsuhi. ²Hacuaha quiji tjen-gui rë me xutacjín hane casahmi me xi camandaja xuta hmu rë.

³Hya xi camá ne, ngajan cafehe cha tsëhë partidu fariseo ne, quiji cha hiscan tacun Jesús hane tsëhë xi meje cjuahachuva cha me cojo cjuua rë me ne, cachja cha cuitjin:

—¿Há tsingatihi ley xi ngu xihin ne, tsismi chjuun rë ngatsë rë tu mé ni xcusun xi chuyiin rë me tsëhë?

⁴Ngajan xi cafayangui me cuitjin:

—Ngayun ne, ¿há cachutayuun ta tsëhë xi hisca ntsacu cavetsihin casahmi Nina ngasunhndë ne, casahmi me xi chjuun xi xihin xuta? ⁵Cachja Nina ta ngatsë rë xi cuatjin casahmi me xuta ne: “Vëhë xi ngu xihin ne, cuejña cha nahmi rë cha, hacuaha cuejña cha naa rë cha, hane cumatangun cha cojo chjuun rë cha sacuahha ngu ni xahasen.” ⁶Ha quihndë hacuiin jo ta sacuahha xi ngu ni xahasen. Hane tsëhë xi ha Nina cachja me xi cuatjin cuma ngu xahasen me ne, ndajintjin xi xuta ne, tsinguetsuntaha me tsëhë xicjin me. —Cuatjin cachja Jesús.

⁷Ngajan cavinenguise cha cuitjin:

—Sá xi cuatjin ne, ¿mé má casua Moisés cahndé xi ngu xihin cuma cuejña cha ngu xujun tsja chjuun rë cha xi ha

quihndë mijí rë cha na? Hane xi cuatjin ne, cuma tsismi cha na.

⁸ Sehe ngajan xi Jesús ne, cachja me cojo cha ta:

—Ngatsë rë cjuataja rë xahasen nuju ne, vëhë xi Moisés ne casua me cahndë xi nismu chjuun nuju, peru hacuiin cuatjin cavitexa Nina ntsacu cavetsihin. ⁹ Cuichjá cojo nuju ta yo xi tsismi chjuun rë handasa ndastu mé cjuatsehen casahmi chjuun jan cojo ngu xihin hacjahi, hane cuixan cojo ngu nga chjuun ne, tjin jyé rë me ta tsëhë xi ngatsë rë cjua rë me sahmi chjuun jan cjuatsehen.

¹⁰ Ngajan xi cachja xuta ladu rë Jesús cuitjin:

—Sá xi cuatjin sacua ha xi nújun, ndajintjin tsajan xi cuixan.

¹¹ Cachja nga Jesús cuitjin:

—Hacuiin yëjë ni xuta ma vijnercu me cjua vi, suva xuta xi Nina casua cahndë xi vijnercu me ne, me vëhë vihndë me. ¹² Tjin xuta xi cumaji cuixan me, sacua ha xihin xi hisca chaja sa catsin me ne, maji matangun me cojo ngu chjuun. Hacuaha tjin yahnga me xi catsixindë xuta me, hacua ha tjin yahnga me xi faain me ngu chjuun ngatsë rë xi sahmixa rë gubiernu xi sahmi Nina. Catjahatsja cjua vi tu yo ni xi cuma cjuahatsja rë.

Catsinchacun Jesucristu nixti

¹³ Hacuaha quijicojo xuta nixti rë me hiscan tacun Jesús xi cuisanetsja me nixti jan hacua ha cjuehya me cjuandaja rë Nina ngatsë rë me. Peru hya xi cavëë xuta ladu rë Jesús xi cuatjin tijima ne, cavatëcja me cjuatacun rë xuta jan.

¹⁴ Peru Jesús ne, cachja me cojo xuta ladu rë me cuitjin:

—Tuhun rë nixti cahndë catinduva tjengui ná. Xicanichuun rë cahndë ta, tsëhë xi gubiernu xi sahmi Nina ne, má tsëhë nixti xi cuacun vë.

¹⁵ Hane ngajan cavisanetsja me nixti jan sehe cavetju me tsëhë cahndë jan.

Jemu chja cuisehen xuta nchina ladu rë Nina

¹⁶ Hya xi camá ne, cafehe ngu cha nixti xi cavinenguise cha Jesús cuitjin:

—Ngayun Maestro, ¿mé cjuandaja meje rë xi sahme cojo sa xi sacú ná cjuahñu xatsë xcun Nina? —Cuatjin cachja cha.

Ngajan xi cachja Jesús cuitjin:

¹⁷ —¿Mé má noje tsahan xi ndaja ngahan? Ngu ni Nina xi ndaja me. Peru sá xi meje sacú ri cjuahñu xatsë jan, nohye cjua rë ley xi cavitexa Nina.

¹⁸ Ngajan cafayangui cha cuitjin:

—¿Jarë cjua jan?

Hane cachja Jesús ta:

—Xicanicuun xuta, xicanihñuu cjuatsehen cojo rë ngu chjuun o cojo rë ngu xihin xi hacuiin tsujun, xicanihñuu cjuachëjë, xicanujuun cjuandesu tsëhë xuta, ¹⁹ chjuhuncun nahmi nuju hacua ha chjuhuncun na nuju. Hacuaha nihñu hmutacun xingun sacua ha hmutacun suva yojo nuju.

²⁰ Ngajan cachja cha nixti jan ta:

—Yëjë ni cjua vëhë ne, ha cáhndë tsëhë hisca cjualihndi naha. ¿Mé sa meje rë xi sahme? —Cuatjin cachja cha.

²¹ Ngajan cafayangui Jesús cuitjin:

—Tjin sa ngu cjua sehe cuma chihin yëjë ni: yëjë ni xcusun xi tjin ri ne, titeñi, hane sehe tichecje tujún rë ngajni rë xuta yuma. Hane xi cuatjin nihni ne, jemu jyë cjuanchina sacú ri ngajan ngahnga. Hane xi cjuë cuichecje tujún vëhë ne, sehe ndove tise cue ná.

²² Peru xi cahndë cha nixti cjua xi cachja Jesús ne, jemu va camá cacun cha hane quiji cha, tsëhë xi jemu nchina camahani cha.

²³ Hya xi camá quiji cha ne, cachja Jesús cojo xuta ladu rë me cuitjin:

—Cuichjá quixë cojo nuju ta jemu chja xi ngu xuta xi tjin rë me cjuanchina cuisehen me hiscan sahmi Nina gu-

biernu. ²⁴Hisca cuichjá nga xi hitsë sa chjaain cuatju ngu chu camellu ngojo rë ngu níndu xi cuma rë xi cuisehen ngu xuta nchina hiscan sahmi Nina gobiernu.

²⁵Ngajan xi xuta ladu rë me ne jemu quijircun rë me cjua rë me tsëhë xi cachja me tsëhë xuta nchina hane cavi-nenguisse me Jesús cuitjin:

—Sá cuatjin ne, ¿yo xi cuma cuetjutje ni?

²⁶Ngajan xi Jesús ne, cavutsejen me hiscan siu xuta jan ne, cachja me cojo me cuitjin:

—Xuta ne, maji sahmi me; peru yëjë ni xi maji sahmi xuta ne, Nina ne, hatuxa ma sahmi me.

²⁷Sehe cachja Pedru cojo me cuitjin:

—Chutsujun ni. Ngayin ne, ha canis-mitacuín yëjë ni xcusun xi tjín niji, hane tiviseucin nuju. Hindë ne, ¿mé sacú niji?

²⁸Sehe cachja Jesús cuitjin:

—Cuichjá cojo nuju cjuaquixi ta hya xi cuechu nixtin xi cumá xatsë yëjë ni ne, nixtin xi cuejña Quihndi rë Xuta Jain xcun silla xi sahmi me gobiernu ne, ngayun xi tejó ne, ngayun xi cavisuhun ladu naha hacuaha cuinechun xcun silla nichuvun cjuatacun rë yëjë tejó tjë naja, ngayaan xi tjë rë xutachanga naja Israel ngayaan. ²⁹Hacuaha yëjë xuta xi tsismicacun me ndava me, tsismicacun me xicjin me, tsismicacun me xutacha rë me, tsismicacun me quihndi rë me, tsismicacun me nangui rë xitjë rë me, ngatsë naha; sacú rë me ngu cientu sa quisun tsëhë hane hacuaha sacú rë me cjuahñu xatsë. ³⁰Peru xuta xi matitjun quihndë ne, jemu cjín me xi cumachjiriin me hya, hane xuta xi hacuiin matitjun quihndë ne, hya ne cumachji rëhë me xi cumatitjun me.

Ejemplu tsëhë chji rë mosu

20 ¹Sua Nina cahndé xi cuisehen xuta gobiernu xi sahmi me ne, sacuaha casahmi ngu me xi nai rë ngu

ranchun. Xati nguitajñu quiji me cavan-guise me mosu xi sahmi xá hiscan cat-sitjë me uva. ²Hya xi casacu rë me ngujo cha, casahmi me compromisu hane cave-jña chji rë cha xi ngu tujún xi hmí rë denario xi ngu nixtin. Hane hora hya casua me cha xá quiji cha ngui-jña xitjë. ³Hya xi camá ne, sacuaha fane ñaja ne, cavuya nai jan ndetsin hane ngajan cavëë me cha xi hacjahi hane mahya rë cha. ⁴Sehe cachja me cojo cha cuitjin: “Hacuaha tangun xitjë naha, sehe sua nuju hacutjin satë nuju.” Hane quiji cha jan. ⁵Hane jo ndiya nga ne, sacuaha nchisen hane sacuaha fane jyan ne, quiji nai jan ndetsin, tangun casahmi me tangun cachja me. ⁶Hane xi cavechu sacuaha fane hñu nguixun ne, quiji nga me ndetsin, ngajan casacu rë me yahnga cha xi mahya rë, sehe cachja me cojo cha cuitjin: “¿Mé má tu nechun ni nguehe cuahanixtin?” ⁷Hane cafayangui cha cuitjin: “Tsëhë xi tsajin yo xi casua niji xa.” Sehe cachja me cuitjin: “Hacuaha tangun nihñu xa xitjë naha.” ⁸Hane hya xi ha camá nguixun, nai rë xitjë ne, cachja me cojo cha xi fahacuenda rë xitjë jan cuitjin: “Chjin-dayun rë mosu ne, tuhun rë me chji rë yëjë ni me, titjun ne tuhun chji rë cha xi cafehe ngascan hane cuatjin ne hisca xi cuijnetaha ne, sehe tuhun rë cha xi tjun cafehe.” ⁹Hane xi cafehe cha xi casacu rë xa sacuaha fane hñu nguixun ne, cafa-hatsja cha chji ra xi ngu denario. ¹⁰Hane xi camachaya rë cha xi tjun casacu rë xá ne, xi má rë cha ne, hitsë sa hnga cumá chji rë cha, peru hacuaha cafahat-sja cha ngu denario ni. ¹¹Hane xi cafa-hatsja cha chji rë cha ne, cachjataha cha nai jan cuitjin: ¹²“Cha vë ne, ngascan cafehe cha, ngu ni hora casahmi cha xa, hane tangun catuhun chji rë cha cojo niji. Ngayin ne, canihñi xa cuaha nix-tin hacuaha caca niji ndavá.” ¹³Peru nai rë xitjë jan ne, cafayangui me tsëhë

cha jan cuitjin: “Tai, tsajin me cjuachan, ¿há quixi, há quixiin xi cavisiajme xi chji nuju ne, ngu denario?” ¹⁴ Chjuhun tujún xi satē nuju hane cuangun; ta ngahan ne, cachuya ná ngahan xi ngu chichihin suá rē cha hacuaha suá nuju. ¹⁵ Ngahan xi tsahan ne, ngahan cuitexa. ¿O há tsajin ne, há machinitacun tsēhē xi casahme cuatjin?” ¹⁶ Hacuaha chuva vēhē ni, xuta xi matitjun quihndē ne, cumachjiriin hya, hane xuta xi hacuiin matitjun me quihndē ne, cumachji rēhē me xi cumatitjun me. Jemu cjin má me xi cachjindaya rē xi canduva me, peru tsēhē yējē me jan ne, chuva má me xi catuxijin rē.

Camá jyan ndiya cachja Jesucristu xi cueya me

¹⁷ Hya xi camá ne, hora xi jiya ndiya Jesús xi cjuí me nandya Jerusalén, quixin me cojo xuta ladu rē me xi tejó ni cachja me cojo me cuitjin:

¹⁸ —Chutsujun ni, tivanguen Jerusalén, hane ngajan ne, ngahan xi Quihndi rē Xuta jain ne, cuma ngahan entregadu tsja nahmi xi matitjun cojo maestru tsēhē ley; hane cuichja me jyé naha ne, vechu chuva rē xi cueya ngahan. ¹⁹ Sehe sahmi entregar me ngahan xutaxín, cuejnucēē ná xuta, cuēhēnatya ná me, cuaja ná me ne, sehe cuetaha ná me xcun cru. Peru xi má jyan nixtin ne, cúya nga cjuahñu.

Meje scaaya xuta ladu rē Jesús tsēhē yo me xi cumatitjun

²⁰ Hya xi camá ne, naa rē quihndi rē Zebedeo quijitjengui na Jesús cojo cha quihndi rē na. Cavixcuhnchi na xcun Jesús tsēhē xi fehya na ngu favor. ²¹ Sehe cavinenguise Jesús na cuitjin:

—¿Mé xi meje rē xahasen nuju?
Hane cuitjin cafayangui na:

—Tuhun cahndē xi cuiyujutaha cha quihndi naha ngu ngu ladu tjehe nuju, hya xi nihñu gobiernu nuju.

²² Ngajan cachja Jesús cojo cha cuitjin:

—Ngayun ne, hyuun mé xi chjayun. ¿Há scaa nuju cuatjun cjuañihi xi cuátju ngahan ni?

Sehe cafayangui catsijo cha:

—Juun, scaa niji.

²³ Ngajan xi cachja nga Jesús cojo cha cuitjin:

—Cjuañihi xi cuátju ngahan cuma ne, hatuxa hacuaha cojo ngayun cuatjun cuma. Peru xi cuinechuntuhun ngu ngu ladu tjehe naha ne, hacuiin ngahan cuichjá ta Nina cuichja me yo xuta xi sua rē me cahndē xi cuiyujutaha me.

²⁴ Xi cahndē yahnga xuta xi tē jan cjua xi cachja Jesús ne, cavetsihin camacjan rē me cojo jo me xicjin me jan. ²⁵ Ngajan xi cajindaya Jesús yējē ni me, cachja cojo me cuitjin:

—Ngayun ne ha hyun ta yējē ni xuta xi matitjun nguehe ngasunhndē ne, jemu sahmi yehe me yojo rē me sacuaha xi me vēhē xi nai rē xuta, hacuaha jercu meje cuitexa me. ²⁶ Peru hacuiin cojo ngayun cuatjin nihñu ta xi meje rē ne, ngu ngayun xi meje nihñi yehe yojo nuju ne; ninguijnu yojo nuju tisecun xingun.

²⁷ Hane ngu ngayun xi meje cumatitjun ngayun, nihñu xi cuma yun sacuaha ngu mosu rē xingun. ²⁸ Ta cuanitjin ne, casahme ngahan Quihndi rē Xuta Jain, ta canduvá ne, peru hacuiin canduvá xi xuta cuisecoo ná me ta ngahan cuisécoo rē xuta, hacuaha tsingatehen xi tsiquehen ná xuta, cojo sa xi ngatsē rē vēhē cjin xuta cuaxētje Nina me. —Cuatjin cachja Jesús.

Casahmi Jesucristu xi camatsejen nga rē jo cha rcá ngajan Jericó

²⁹ Hya xi cavetju me nandya Jericó ne, jemu xutacjin quijitjengui rē me.

³⁰ Hane ngajan hiscan cavatju me siu jo

cha rcá xi viyuju cha tjeheh ndiya, hane xi canuhya rê xi Jesús tivatju me, cajindaya cha cachja cha cuitjin:

—¡Nai, ngayun tjë rê David! Cata-mayuma nuju ngayin. —Cuatjin cachja cha.

³¹ Hane xuta xi siu ne, cavisiajmicjan me cojo cha xi seju cha, peru cha vëhë ne, hitsë sa jercu cajindaya cha chja cha ta:

—¡Nai, ngayun tjë rê David! Cata-mayuma nuju ngayin.

³² Hya xi camá ne, ngajan casecunhñu Jesús, cajindaya me cha xi nduva cha. Sehe cavinenguise me cha cuitjin:

—¿Mé xi meje nuju xi sahme cojo nuju ni?

³³ Ngajan xi cachja cha rcá jan ta:

—Tatá, xi meje niji ne, xi cuma tsejen niji.

³⁴ Hane Jesús ne, camayuma rê me cha; cavisansetja me tuxcun cha. Hane ngutjen ni, camatsejen nga rê cha, sehe quiji cha cojo Jesús.

Cafehe Jesús nandya Jerusalén

21 Hane hya xi ha jima tiña Jesús xi cjehe me Jerusalén, cavechu me nandya Betfajé, ngajan ndetjún xi hmí rê Ndetjún Olivu ne, sehe catsingatju me jo xuta ladu rê me xi cjue tixa rê me, ² hane cuitjin cachja me cojo me:

—Tángun nandya xi tsejen tacun vë. Hane ngutjen xi cjuhun tjeheh rê ne, sacú nuju ngu burru xi tjihñu chu cojo quihndi rê chu. Hane chundecjun chu, nduvuncujun chu. ³ Hane sá xi tjin yo xi cuichja cojo nuju tsëhë chu, sehe tinújun ta: “Maestru niji ne, meje rê me chu.” Hane sehe sua me cahndé.

⁴ Cuatjin camá cojo sa xi cuetjucaa jain cjua xi cachja profeta cuitjin:

⁵ Tinújun cojo xuta nangui Sion:

“Chutsujun ne, nduva me xi matitjun tsujun hiscan nechun. Hacuini xta

me ne, nduva me quisun me chu burru,

quisun me quihndi rê chu xi vaniji chaha.”

⁶ Sehe xuta ladu rê me jan, cavetju quiji me hane casahmi me hacutjin cachja Jesús, ⁷ canduvacojo me chu burru cojo quihndi rê chu hiscan tacun Jesús. Hane caviyujusun me tsjian rê me ngaxtun chu, sehe camiji Jesús burru jan. ⁸ Hane xi quiji Jesús ne, quisun me burru jan, hane xutacjín ne, táha cacandi me tsjian rê me ndiya hiscan cjui Jesús. Hane yahnga me ne, quiji cavotohosun me xca xcuen hane hacuaha cacandi me ndiya hacutjin cjui Jesús. ⁹ Hane yëjë ni me xi cjui tjun cojo yëjë me xi tjengui jan ne, cavetsihin jercu cajindaya me cachja me:

—¡Hosana! ¡Nacuechji rê Nina xi cafehe me xi cuitexa naja sacuaha cavitexa David hatsëë! ¡Jemu catsinchacun Nina me xi nduva vi tsëhë xi Nina catsingatju rê me! ¡Hisca ngahnga ne, cuechu cjua rê cjuandaja rê Nina!

¹⁰ Hya xi camá ne, xi cavisehen me nandya Jerusalén jercu jyë cjuandya camá hane cavinenguise xuta nandya cuitjin:

—¿Yo me vihi?

¹¹ Ngajan cafayangui xutacjín jan cuitjin:

—Me vihi, hacui profeta Jesús, xuta Nasaret tsëhë distritu Galilea.

Cavaxë Jesucristu xuta xi sahmi ndetsin ndatsen yungun

¹² Hya xi camá ne, quiji me yungun xi matitjun. Hane hya xi cavisehen me ndatsen yungun jan; cavaxë me xuta xi sahmi me ndetsin. Hacuaha catsindefa me maxë xi xinchasun tujún xi tsindeya cha cojo tujún rê xuta ngu nangui cojo puestu rê cha xi viteña nisëtyava. ¹³ Sehe cachja me cojo cha jan cuitjin:

—Chja cjua rë Nina ta: “Ndya naha ne, tacunxa xi cjue xuta sahmi me oración rë me. Peru ngayun ne, tinihñuxun cojo sacuahha ngu cahndé xi matangun xuta xi sahmi cjuamaña.”

¹⁴Hya xi ha cavatju vëhë ne, ngajan yungun xi matitjun ne, cavechutaha me xuta rcá cojo xuta rengun; hane casahmi me xi camandaja me. ¹⁵Ngajan xi cavëë nahmi xi matitjun cojo cha xi vicuya cjuachacun ne cjuarcun xi casahmi Jesús, hacuaha cahndë me xi jindaya nixti ta: “¡Hosana! ¡Nacuechji rë Nina xi cafehe me xi cuitexa naja sacuahha cavitexa David hatsëë!”; hane jemu cama xti rë me. ¹⁶Cachja me cojo Jesús cuitjin:

—¿Há nuhyun cjua xi tichja me?

Ngajan xi cafayangui Jesús cuitjin:

—Juun, vihndë. Hane ngayun ne, ¿há cjëë chutahanyun cjua rë Nina xi chja tsëhë? Chja cjua ta:

Hisca cjua rë nixti hisca cjua rë qui-hndinda ne canihñu xi cuetju xi sahmi hnga nuju.

¹⁷Hya xi camá cachja me ne, cavetju Jesús tsëhë Jerusalén quiji me nandya Betania cavejña me nguixun.

Jesús ne, cachja xi quihndë cuaquiin tu rë ngu yaxujun xi cavangui me tú rë hya xi vojo rë me

¹⁸Xi camanchujun jan ne, xi cavuya nga Jesús Jerusalén ne, cama vojo rë me. ¹⁹Hya xi camá ne, tjeheh ndiya ne, cavëë me ngu yaxujun xi chine tú rë, peru xi cavechu me ngajan ne, ndastu me tú yaja rë, ta suva xca ni yaja rë. Ngajan xi cachja Jesús tsëhë:

—Quihndë tsajin nixtin xi cuaquí tú riji.

Hane ngutjen ne, caxintsen ya jan. ²⁰Hya xi cavëë xuta ladu rë me xi cuatjin camá ne, cafaharcun me Jesús cachja me cuitjin:

—¿Hacutjin cumá xi jemu xati caxintsen yaxujun jan?

²¹Ngajan cafayangui Jesús tsëhë me cuitjin:

—Cuichjá quixë jain cojo nuju ta sá xi macjain nuju Nina hane hacuiin jo cjuatacun nuju ne, cumá nihñu sacuahha casahme cojo yaxujun vi. Hacuaha hisca sá xi cuinújun cojo ndetjún vihi ta: “Tihinxin tsëhë nguehe. Tihin tisihiin ngajñi ndachacun.” Hane cuatjin cumá. ²²Yëjë ni xcusun ne, tu mé ni xi chjahyun cojo Nina hane sá xi macjain nuju xi sacú nuju ne, cuetjucaa quixi.

Cavinenguise xuta cojo Jesús yo cavitexa rë me

²³Hane xi vicuya Jesús ngajan ndatsen yungun xi matitjun ne, camatangun nahmi xi matitjun cojo xuta changá, hane cuitjin cavinenguise me Jesús:

—¿Yo cavitexa nuju xi nihñu xa vi? ¿Yo casuaxa nuju?

²⁴Hane xi cafayangui Jesús ne, cuitjin cachja me:

—Hacuaha cuinenguësë nuju ngu cjua, hane sá xi chjayunngun tsahan ne, sehe cuichjá cojo nuju yo cavitexa ná xi sahme xcusun vihi. ²⁵¿Yo cavitexa rë Juan xi cuitenda me xuta? ¿Há Nina ne, o há tsajin ne, há xuta? —Cuatjin cachja me.

Sehe ngajan xi xuta xi cuacun jan ne, cavisiajmicjín me ngajñi rë me, cachja me cuitjin:

—Sá xi cuinújan xi Nina cavitexa me cha Juan vë ne, cjuinenguise naja me: “Sá cuatjin ne, ¿mé má camacjaain nuju cha?” ²⁶Hane sá xi cuinújan xi xuta cavitexa rë cha ne, tsajin yo hvë mé sahmi xuta cojo naja ta, tsëhë xi yëjë ni xuta ne, ha macjain rë me xi cha vëhë ne, profeta cha.

²⁷Hane xi cafayangui xuta jan tsëhë Jesús ne chja me ta:

—Hyiin.

Ngajan xi hacuaha Jesús ne, cachja me ta:

—Hacuaha cuichjaan cojo nuju yo cavitexa ná xi sahme xá vihi.

Ejemplu tsëhë jo cha quihndi

²⁸ Peru ¿mé nújun tsëhë cuentu vi? Ngu xihin ne, jo má cha quihndi rë me. Hya xi camá ne, cafehe cachja me cojo ngu cha cuitjin: “Tsan, tihin nihni xá ngajan hiscan camatjê xca rë uva.” ²⁹ Peru cha quihndi jan ne, cafayangui cha cuitjin: “¡Jéya! ¡Mijí! cjué!” Peru hya xi camá ne, cavindeya cjuatacun rë cha hane quiji cha xcun xá jan. ³⁰ Sehe hacuanitjin cachja nahmi jan cojo quihndi xi má jo, hane cuitjin cafayangui cha jan cachja cha: “Tatá, ngahan ne, cjué.” Peru quijiin cha. ³¹ Hindë ne, ¿jarë cha xi casahmi chihin cha xcusun xi meje rë nahmi rë cha?

Ngajan cafayangui me ta:

—Cha xi tjun cachja.

Sehe cachja Jesús cojo me cuitjin:

—Cuichjá quixë cojo nuju ta xuta xi cojo cjuamaña faha tujúnsa cojo chjuun xi viteña na yojo ran hitsë sa tjun cuisehen me gobiernu xi sahmi Nina xi cuma nuju ngayun, ³² ta cafehe Juan cavicuya me ngayun hacutjin nihni xcun Nina hane camacjaain nuju cjuarë me. Peru xuta xi faha tujúnsa cojo chjuun xi viteña yojo rë na, me vëhë camacjain rë me. Ngayun ne, handasa cahyun yëjë xcusun vëhë ne, canindeyuun cjuatacun nuju; camacjaain nuju.

Ejemplu tsëhë cha xi sahmixa xi jemu tsehen cha

³³ Nuhyun sa ngu ejemplu xi cuitjin fi: Ngu nai rë ngu ranchun matsejen ne, catsitjê me xcun nangui rë me xca rë uva. Hacuaha casahmi me hnhua xondyojo tahndee rë xitjê jan, hane ngajan ni ne, cafahnguiya me ngu ndy-

ojotë hiscan cuaxë nandá rë uva jan. Hacuaha casahmi me ngu cahndé hiscan xi cavesun me ngu nachan ngahnga xi sesun xuta xi sahmi cuidadu xitjê rë me. Sehe casua me ngujo cha sahmixa xi cjuahacuenda cha. Sehe cjuaha tsë tsë me cojo cha. Hane hya xi camá ne, cavetju me quiji me ngu nangui xin. ³⁴ Xi cavechú nixtin rë tütjê jan matsejen ne, sehe catsingatju me mosu rë me xi quiji cachja cha cojo cha xi fahacuenda xitjê jan xi sua cha hitsë tütjê xi satë rë me. ³⁵ Peru cha xi sahmixa jan ne, cafaha cha mosu jan tu cavaja cha ngu mosu, catsiquehen cha ngu nga, hane cavetaha cha ndyojo xcun ngu nga. ³⁶ Sehe catsingatju nga me mosu hacjahi xi hitsë sa cjín má cha tsëhë mosu xi tjun catsingatju me, peru cha xi sahmixa jan ne, ha chuya vëhë ni casahmi cha cojo yëjë ni.

³⁷ Hya xi camá ne, hisca catsingatju me suva quihndi rë me ta catsingatahacacun me cuitjin: “Tuxa cjuaharcun rë cha, xi quihndi naha.” ³⁸ Peru xi cavëë cha xi hatuxa quihndi rë me xi nduva ne, cavisiajmicjín cha cojo xicjin cha cuitjin: “Cha vihi ne, quihndi xi cjuahatsja xitjê vi cha. Niquen cha, cojo sa xi tsajan cuma nangui vi.” Cuatjin cavisiajmicjín cha. ³⁹ Hya xi camá ne, cafaha cha cha quihndi jan quijicojo cha ndatsen cahndé jan, sehe catsiquehen cha cha.

⁴⁰ Hindë ne, xi má nuju ne, ¿mé sahmi nai rë xitjê jan cojo cha xi cuacun fahacuenda jan?

⁴¹ Ngajan cafayangui me tsëhë Jesús cuitjin:

—Cjue tsiquehen me cha xi tsehen cjuatacun rë jan, sehe sua me xitjê jan cjuahacuenda jingu sa cha sahmixa, cha xi sua cha xitjê xi satë rë me hya xi cuechú nixtin rë. —Cuatjin cafayangui me.

⁴² Sehe cachja Jesús cojo me cuitjin:

—¿Há cachutayuun xujun rë Nina xi chja cuitjin?:

Ndyojo xi catsitjungui chjinevexo ne, vëhë ndyojo xi cavéjña tjun tjun yuju rë xihndënaña.

Cuatjin casahmi Nina xi cuma. Hane xi chutsejen ngayaan ne, jemu chja-hanrcun xahasen naja.

⁴³ Vëhë xi cuichjá cojo nuju ta, chja-hataha nuju cahndé xi cuisuhun gubiernu xi sahmi Nina, hane sua Nina xuta nanguixin cahndé jan, xuta xi sua me xi saté rë me. ⁴⁴ Hane ndyojo jan ne, hya xi ngu xuta cjuinenguisun me xcun ndyojo vëhë matsejen ne, cuatëlanga rë me. Hane hya xi ndyojo vëhë cuinenguisun rë ngu xuta matsejen ne, ña cumá tē me.

⁴⁵ Hane xi cahndé nahmi xi matitjun cojo cha partidu fariseo ejemplu xi cachja Jesús tsëhë xuta vë ne, camachaya rë me xi condra rë me tichja Jesús. ⁴⁶ Vëhë xi cavangui me chuva rë hacutjin cuma xi cjuaha me Jesús peru camaji ta tsacjun me xuta, ta xi má rë xuta ne, ngu profeta má Jesús.

Ejemplu tsëhë ngu suhi cjuavixan

22 Sehe quijinduju sa cachja Jesús ejemplu cojo rë me cuitjin:

²—Nina ne sahmi me cojo xuta xi cuisehen me gobiernu xi sahmi me sacuaaha casahmi ngu xihin xi matitjun tsëhë ngu nangui hya xi casahmi me suhi xi cuixan quihndi rë me. ³ Hya xi casune hora rë, catsingatju me mosu hndixahan rë me quiji cha ndava xuta xi ha casua me camachaya rë xi nduva me cjuavixan, peru canduvaain me suhi. ⁴ Sehe catsingatju me hndixahan xi hacjahi ne, cuitjin cavitexa me: “Tinoje cojo xuta xi nduva cuitjin: Chutsujun ni tai, ha tjin chihin comida, ha cahme chu xi tetjo ná tsëhë suhi vi, hane cachjan yojo. Tjin chihin yëjē ni: nduvun ne, xinëë-suhi.” ⁵ Peru casahmi cuendaain me cjua jan, hane quijixin me cafachacua me cjuacjintacun rë me. Ngu me quiji me xcun xitjē rë me, ngu nga me hiscan

sahmi me negocio. ⁶ Hane yahnga nga me ne, cafaha me mosu hndixahan jan, choho casahmi me cojo cha hisca catsiquehen me cha. ⁷ Hya xi camá ne, me xi matitjun jan ne, cama cjan rë me. Catsingatju me sindadu rë me. Catsiquehen sindadu cha tsiquehen jan hane cavaca me nandya rë cha. ⁸ Hya xi camá ne, cachja nga me cojo hndixahan rë me cuitjin: “Ha tjin ndaja xcusun rë cjuavixan. Peru xuta xi cuinduva ne, hacuiin ndaja cjuatacun rë me ndajintjin xi nduva me. ⁹ Vëhë xi tihin hisca cruci ndiyatē ne, hane tu hacutjin cjín má xuta xi sacu ri, noje cojo yëjē ni me xi catinduva me catjinesuhi me.” ¹⁰ Ngajan xi quiji hndixahan jan hiscan ndiyatē rë nandya ne, hane yëjē ni xuta xi cavechutaha cha, sá xuta tsehen, o sá xuta ndaja ne, casahmi cha xi camatan-gun me quiji me suhi. Hane ña catsëxtin xuta ndava suhi.

¹¹ Hya xi tijima suhi ne, xi cavisehen me xi matitjun jan xi scutsejen me xuta xi cafehe me, cavutsejen me ngu cha xi yuma jyih cojo tsjian rë. ¹² Ngajan xi cachja me cojo cha cuitjin: “Tai, ¿hacutjin cama xi cavisuhun nguehe handasa jemu yuma jyih tsjian nuju?” Peru cavejñajyuu cha vë cachjaain cha. ¹³ Sehe cachja me xi matitjun jan cojo hndixahan rë me cuitjin: “Tetuhunhñu tsja cha cojo ntsacu cha sehe naxun cha ndatsen hiscan jñu. Ngajan hiscan hincha xuta xi tijihnda me, hacuaha titsijanerii me nehñu me.” ¹⁴ Cjín má me xi cachjinda rë xi nduva me, peru chuva má me xi tuxijijñi rë.

Cjuacjintacun tsëhë tujúnsa

¹⁵ Hya xi camá ne, cha partidu fariseo ne, cavisiajmichihin cha casacuse rë cha ngu cjuacjintacun xi tsavi fi xi cjuayan-gui Jesús tsëhë. ¹⁶ Hya xi camá ne, catsingatju cha ngujo cha ladu jan, cojo

cha ladu rë Herodes ne, cachja cha cojo Jesús cuitjin:

—Maestro, ngayin ne, hyin ta ngayun ne xuta ndaja ngayun. Vicuyun ndiya rë Nina cojo cjuaquixi. Ha tuxa cjuaquixinda ja xi nújun, ha ndasa cojo xuta nchina visiajmu o sá cojo xuta yuma. ¹⁷Xi má nuju ne, mé xi ndaja cuinújan. Sacuaha ley rë Moisés ne, ¿há tsingatihi xi cuechjen tujúnsa naja cojo César, me xi matitjun, o há tsingatiin?

¹⁸Peru Jesús ne, tsêhë xi ha vacun rë me xi jemu choho xcusun rë cha ne, cachja me cojo cha cuitjin:

—¿Mé má cuatjin meje chjuhunchu-vun ná? Xuta ndacha ngayun. ¹⁹Ningacun ná ngu tujún jan scutsejen.

Hane canduvacojo cha ngu tujún tyava.

²⁰Sehe cavinenguisse me cha cuitjin:

—¿Yo xcusun rë hacuaha yo ñihi rë xi quitaha xcun tujún vë? —Cuatjin cavinenguisse Jesús.

²¹Hane cha xi cuacun vë ne, cuitjin cafayangui cha:

—Tsêhë César.

Sehen ngajan xi Jesús ne, cuitjin cachja me cojo cha:

—Cuatjin ne, tuhun rë César xi tsêhë me, hane tuhun rë Nina xi tsêhë me.

²²Hya xi cahndë cha cjua xi cachja Jesús ne, quijircun rë cha, sehe cavetju cha qui ji cha tsêhë cahndë xi tacun me.

Cjuachjinenguisse tsêhë xi cuya nima cjuahñu

²³Sehe nixtin hya ne, cafehe tjengui Jesús cha partido saduceo, cha xi vicuya cjuachacun xi chja xi xuta xi cahme ne, cuyaa in nga me cjuahñu. Sehe cavinenguisse cha Jesús cuitjin:

²⁴—Maestro, Moisés ne cachja me ta: “Sá xi ngu xihin cueya, hane tsajin rë chjuun rë hisca ngu quihndi ne, hntsë nima vëhë ne, meje rë xi cjuaha rë chjuun cahan vëhë, cojo sa xi sacú rë

na quihndi xi cuma sacuaha quihndi rë nima vëhë.” ²⁵Quihndë ne, siu yatu cha cojo hntsë cha. Hane cha tjun ne, cafaha cha chjuun. Peru cahme cha, hane tsêhë xi tsajin quihndi rë cha, hntsë nima vë ne, cafaha cha chjuun jan. ²⁶Hane cuanitjin cavatju cha xi majo cojo cha xi majyan hisca chuva ngu chuva ngu cha hisca cojo cha xi má yatu. ²⁷Hane xi cajnetaha ne, sehe cahme chjuun jan. ²⁸Quihndë ne, hya xi cuya yëjë nima cjuahñu ne, ¿jarë cha xi cuacún vë xi chjuun rë cha na xi cjuaquixi ta, tsêhë xi yëjë ni xi yatu cha ne, camá chjuun rë cha na? —Cuatjin cachja cha.

²⁹Ngajan xi cachja Jesús cojo cha ta:

—Ngayun ne, cuaaintjin xi nújun, tsêhë xi vijinii rcun cjua xi chja xujun tsêhë Nina, hacuaha hyuun xi Nina ne, jemu hñu cjuatacun rë me. ³⁰Ta hya ne, cumaji cjuavixan hacuaha tsinguixaain xicjin me hya ta, sacuaha ángel xi siu ngahnga ne, cuatjin cuiyuju me. ³¹Quihndë xi tinújun tsêhë nima xi cuya cjuahñu ne, cuinenguësë nuju ne, ¿há cjëë chutayun cjua xi cachja Nina cojo nuju xcun xujun rë me tsêhë nima xutachanga nuju xi cuicun vi? ³²“Ngahan xi Nina rë Abraham ngahan, Nina rë Isaac hacuaha cojo Nina rë Jacob.” Cuatjin cachja Nina. Peru ndaja hyun ta Nina ne, hacuiin Nina rë nima ta Nina rë xuta xi quicun me.

³³Hya xi cahndë xutacjín cjua jan, jercu tu quijircun rë me cjua xi catsicuya Jesús.

Cjuachjinenguisse tsêhë jarë artículo tsêhë ley xi hitsë sa matitjun

³⁴Peru cha partido fariseo xi camachaya rë cha xi catsinguejyu Jesús cjua rë cha partido saduceo ne, camatangun cha cojo xicjin cha, ³⁵hane sehe cavitexa cha ngu maestro rë ley xi cavinenguisse cha me cjua vi cojo sa

xi cuma cjuahachuva cha me. Cuitjin cachja maestru jan:

³⁶—Maestro, tsêhê yêjê ni cjua xi cavitexa Nina naja xcun xujun ley ne, ¿jarê artículo xi hitsê sa matitjun?

³⁷Ngajan xi cafayangui Jesús cuitjin:

—“Meje rê xi nihmutacún Nina naja cojo nguñajatacún, cojo yêjê ni xahasen nuju, cojo yêjê ni ngahñu nuju, cojo yêjê ni cjuatacun nuju.” ³⁸Cjua vê xi hitsê sa venguichji rê ne, hitsê sa matitjun xi cumá rê yêjê ni cjua rê ley. ³⁹Hane xi má jo ni: “Meje rê xi nihmutacún xingun sacuatjin hmutacún suvun yojo nuju.” ⁴⁰Tsêhê jo artículo vi ne vetjun sa yêjê cjua rê ley xi catsihindu Moisés cojo yêjê cjua xi catsihindu profeta. —Cuatjin cachja Jesús cojo cha.

¿Yo tjê rê má me xi catsingatju Nina?

⁴¹Hya xi ha camá tangun cha partidu fariseo ne, sehe cavinenguise Jesús cha cuitjin:

⁴²—¿Mé nújun? Mesías o sa Cristu ne, ¿yo tjê rê má me?

Cafayangui me ta:

—Tjê rê David má me.

⁴³Sehe cachja Jesús cuitjin:

—Sá xi quixi xi cuatjin ne, ¿hacutjin cavátju xi suva David ne, hya xi catsihindu me cjua xi cachja Hasen tsêhê Nina cojo rê me, “Nai” cachja me tsêhê Mesias? ta cuitjin catsihindu me:

⁴⁴Nina ne, cachja me cojo Nai naha cuitjin:

“Tinechin nguehe ladu quixi naha, hisca hya xi yêjê ni xi sahmi ri condra ne, cuiyúju ngahan ngahma gubiernu riji.”

⁴⁵Quihndê ne, sá xi suvá David chja me xi Nai rê me má me xi tsingatju Nina ne, ¿hacutjin má ne xi hacuaha tjê rê me má me vêhê?

⁴⁶Ngajan camá xi ndastu mé cafayangui cha, hacuaha hisca hya ne, tsacjun cha cjuinenguise sa cha me.

Cachjajyê Jesucristu cojo xutacjín tsêhê cha xi vicuya cjuachacun

23 Hya xi camá ne, cachja Jesús cojo xutacjín hacuaha cojo xuta ladu rê me cuitjin:

²—Cha xi vicuya cjuachacun cojo cha partidu fariseo ne, casatê rê cha xá rê ley xi casatê rê Moisés hatsêê. ³Vêhê xi meje rê xi nuhyun cjua rê cha hacuaha nihñuchuhun yêjê ni xi vicuya cha; peru nihñuu sacuaha sahmi cha ta, ndaja chja cha jan peru hacjahi sahmi cha. ⁴Cjua xi vicuya cha jemu chja sahmi chihin xuta ta tangun sacuaha ngu chaha xi hai vaniji tyja rê me, peru suva ni cha ne, visecuaain cha me hisca hitsê. ⁵Yêjê ni xi sahmi cha ne, sahmi cha ngatsê rê xi scuêê xuta cha, sahmi nga xuta cha. Vatjutaha cha chuva rê xujun xi chja ley xi setaha xten xuta, cojo tsjahya xi tsingagui cha ntsacu tsjian rê cha. ⁶Hacuaha jemu chuya rê cha hya xi satê rê cha cahndê xi matitjun tsêhê ngu ndava suhi o tsêhê yungun. ⁷Hacuaha hora xi fi tsujy-ihya cha, jemu chuya rê cha xi cuatjin fi xuta chja me nina cojo cha ngajan ngajñi ndetsin, maestro chja xuta tsêhê cha.

⁸Peru ngayun ne, xi cuichjaain xuta tsujun Maestro ta ngu ni me xi Maestru nuju, hane ngajñi nuju ngayun ne, xingun má yun. ⁹Hacuaha xuta ngasunhndê ne, canujuun tsêhê me xi Nahmi ta ngu ni me xi tacun me ngahnga ne, hacui Nahmi nuju. ¹⁰Cuanitjin ne, xi cuichjaain xuta tsujun Nai ta ngu ni me xi Nai nuju, me vêhê ne, Cristu. ¹¹Hane ngu ngayun xi meje cumatitjun ngayun ne, sahmi me sacuaha ngu mosu rê xi-cjin. ¹²Tsêhê xi yêjê xuta xi sahmi yehe suvá me yojo rê me ne, cuechu nixtin xi Nina ne, tsinguijne me cjuatacun rê. Hane xuta xi tsinguijne suvá me cjuatacun rê me, hya ne, Nina ne, sahmi yehe rê me.

¹³ 'Jemu chojyihí tsujun, ngayun cha xi vicuya cjuachacun cojo ngayun cha partidu fariseo. ¡Xuta ndacha yun!, ta vechjun tingotjo hisca visehen gobiernu xi sahmi Nina cojo sa xi cumaji cuisehen xuta. Tivisuun suvun, hacuaha tituun cahndé xi cuisehen xuta xi meje cuisehen me.

¹⁴ 'Jemu chojyihí tsujun, ngayun cha xi vicuya cjuachacun cojo ngayun cha partidu fariseo. Jemu cjin tujún naxun yachjin cahan xi hisca ndava na tsajin. Hane hya xi nújunyumun ne jemu nduju hora nihñu, peru hacuini nguñaja tacun nújun ta, vindachun ni. Vêhê xi hitsê sa jyê cuma castigu xi cumá nuju.

¹⁵ 'Jemu chojyihí tsujun, ngayun cha xi vicuya cjuachacun cojo ngayun cha partidu fariseo. ¡Xuta ndacha yun! ta cuangun jinguyê ni ngasunhndê xi sacungu ni me xi cuisehen ladu nuju. Peru hya xi cavicyun rê me, hitsê sa jyê castigu satê rê me xi cuma nuju.

¹⁶ 'Jemu chojyihí tsujun, ¡xuta rcá yun xi meje ningacun ndiya! Nújun ta: "Sá xi tuhun cjua nuju hane cuinújun ta: Quixi, vêê yungun xi matitjun ne, sahmi ngu-jyê xi nihñu chihin cjua nuju, peru sá xi tuhun cjua nuju cojo oro xi jiya yungun xi matitjun ne, vêhê sahmi ngu-jyê xi tuhun xi canújun."

¹⁷ '¡Ngarca ni ngayun! ¡Rcá yun! ¿Jarê xi meje rê xi chjaanrcun? ¿Há oro jan? o sá tsajin ne, ¿há yungun xi matitjun? ta, ngatsê rê yungun ne, vêhê xi camanchacun oro xi hincha cahntsua. ¹⁸ Hacuaha nújun ta: "Sá xi tuhun cjua nuju hane cuinújun xi ngasunscun yungun cuma testigu ne, sahmi ngu-jyê xi nihñu chihin cjua nuju, peru sá xi nújun ta cuatjo xcun ngasunscun jan cuma testigu ne, sehe sahmi ngu-jyê xi tuhun xi canújun."

¹⁹ ¡Rcá yun! ¿Jarê xi meje rê xi chjaanrcun? ¿Há cuatjo jan? o sá tsajin ne, ¿há ngasunscun ta, tsêhê xi xcun vêhê ngajan camachacun cuatjo? ²⁰ Vêhê xi yo xi

cuisiajmi hane cuichja me xi vêê ngasunscun ne, hacuaha tichja me xi vêê yêjê xi hinchasun xcun; ²¹ hacuaha yo xi cuisiajmi hane cuichja me xi vêê yungun xi matitjun ne, hacuaha tichja me xi vêê Nina xi tacun me ngajan. ²² Hane yo xi cuisiajmi hane cuichja me xi vêê ngahnga ne, hacuaha tichja me xi vêê cahndê hiscan sahmi Nina gobiernu hane hacuaha xi vêê Nina xi sahmi me.

²³ 'Jemu chojyihí tsujun, ngayun cha xi vicuya cjuachacun cojo ngayun cha partidu fariseo. ¡Xuta ndacha yun! Ngayun ne, handasa tuhun diezmu nuju hisca cojo nchurca cojo ruda cojo yêjê sa xcusun ndeya ne, peru nihñucuenduun xi nihñuchihin artículo rê ley xi hitsê sa meje rê Nina xi nihñuchuhun sacuaha xi chja cuitjin: nihñu hacutjin xi cjuaquixi cojo xingun, sacuaha xi mayuma nuju xingun, hane sacuaha xi ngu ni má cjua nuju; hitsê sa ndaja sa canihñu yêjê xcusun vihi, hane canihñucuendun tsêhê xcusun xi canihñu. ²⁴ ¡Ngayun ne xuta rcá yun xi meje ningacun ndiya! Nihñu sacuaha sahmi ngu xuta xi tsicaha me vinu rê me, sehe cuetjuxin ngu chu xihi xi jiya ngajni rê. Peru cuma tsinguijne jingu me ngu chu camellu.

²⁵ 'Jemu chojyihí tsujun, ngayun cha xi vicuya cjuachacun cojo ngayun cha partidu fariseo. ¡Jo xcun jo ntsuvun yun! Nihñu tyjahi táha ngaxtun ngu vasu cojo ngu tyuva, peru cahntsua ne, quitsê camahani rê cjuachêjê cojo cjuatacun xi nimuju yêjê ni xcusun. ²⁶ Fariseo rcá, titjun nihñu tyjahi cahntsua vasu cojo tyuva jan ta tsêhê xi cuatjin ne, hacuaha cuma tyjahi táha ngaxtun.

²⁷ 'Jemu chojyihí tsujun, ngayun cha xi vicuya cjuachacun cojo ngayun cha partidu fariseo. ¡Jemu ndacha yun! Ngayun ne, tangun cun cojo ngu tsjun xi cahvi rê xujñu, ta ndaja tsejen tsjun jan, peru cahntsua ne, quitsê rê cojo ninda rê nima cojo yêjê ni xi jehndu. ²⁸ Cuanitjin

cun ngayun ta xi vutsejen xuta yun, tsejen sacuahua xuta ndaja tyjahi yun, peru cahntsua xahasen nuju ne, quitsë rë cojo cjuandacha cojo cjuatsehen.

²⁹ Jemu chojyihî tsujun, ngayun cha xi vicuya cjuachacun cojo ngayun cha partidu fariseo. Ngayun ne, nindujun tsjun ndacun tsëhë yëjë ni nima profeta, hacuaha nihñu ndacun tsjun tsëhë nima xi tsajin xi cun rë me xcun Nina. ³⁰ Hacuaha ngayun nújun ta: “Sá xi ngayin cavinechin nixtin hatsëë xi quicun xutachanga niji ne, cavisecuiin rë me xi tsiquehen me profeta xi cuacun vë ta cumacjain niji.” ³¹ Quihndë ne, cahyun ta cojo cjuu nuju vë, tuhun testigu condra nuju ta tsëhë xi ngayun ne hatuxa quihndi rë xutachanga nuju ngayun, hane me vëhë ne xi catsiquehen me profeta jan. ³² Quihndë ngayun ne, itangun cuéchun chuva rë cjuatsehen xi casahmi xutachanga nuju!

³³ Sacuahua cun yë chacun cuatjin cun ngayun, ¡quihndi rë yë yun! ¿Hacutjin cumá cuetjuntjun tsëhë castigu xi má hasen rë nima? ³⁴ Vëhë xi tsingátju sa nuju profeta cojo xuta xi quicun cjuatacun rë me cojo maestru ne, hane ngujo me ne, ngayun ne nicuhun me hacuaha cuetuhun me xcun cru. Ngujo nga me cujun rë me ngayun ngajan ndatsen yungun hacuaha tuhun rë me cjuañihî xi cuatju me sehe cuanga me ngu nandya ngu nandya. ³⁵ Cojo chuva vëhë ne, chanujujyun cjuaveya rë yëjë ni xuta xi tyjahi cjuatacun rë me xi cahme nguehe ngasunhndë. Chanujujyun cjuaveya rë xutachanga naja Abel cojo hisca cjuaveya rë xutachanga naja Zacarías quihndi rë Berequías, me xi canicuhun tiña ngasunscun hiscan ndatsen rë ndava Nina. ³⁶ Cuichjá quixë cojo nuju ta tsëhë cjuaveya rë yëjë ni me vë chanujujyun ngayujun ni xi nechun quihndë.

Jemu choho camá rë Jesucristu ngatsë rë xuta Jerusalén

³⁷ ¡Ngayun xuta Jerusalén, ngayun xi cojo ndyojo nicuhun profeta xi tsingátju Nina ngajñi nuju! ¡Jemu choho má ná tsujun! ¡Mé hitsë ndiya xi meje scávëvaha nuju sacuahua javëvaha ngu nisë quihndi rë chu xi cuincha chu ngahma tyjunga rë chu! Peru ngayun ne, mijí nuju. ³⁸ Chutsujun ni, Nina ne, catsismicacun me ngayun. ³⁹ Cuichjá cojo nuju ta chuun camahani ná hisca hya xi cuechú nixtin xi cuinújun cuitjin: “¡Catsinchacun Nina me xi titsingátju me ngajñi naja!” —Cuatjin cachja Jesús.

Cachja Jesús xi cuetsun yungun

24 Hora xi tivetju Jesús tsëhë ndatsen yungun xi matitjun jan xi cjui xin me ne, ngajan cafehe xuta ladu rë me caveyanangui me hane catsingacun tsja me xi yungun jan ne, jemu ndajyihî. ² Hya xi camá ne, cuitjin cachja Jesús tsëhë yungun jan:

—Sacuahua yëjë ni ndihya vihi xi chutsujun tsëhë yungun ne, cuichjá cojo nuju ta cuechú nixtin xi hisca ngu ndyojo ndacun xi cuicun vi ne, tsajin xinchasuncoo xicjin ta cjuë yëjë cuixujne. —Cuitjin cachja Jesús.

Hacutjin sacú cumachaya naja xi ha meje cuijnetaha nixtin vihi

³ Xi cafë cachja Jesús cuitjin ne, sehe cafehe me tiña rcu Ndetjún Olivu. Hane xi tacun suvá me, ngajan cafehe xuta ladu rë me, cavinenguise rë me cuitjin:

—¿Mé nújun? ¿Janihya cuetjucaa xcusun vëhë ni? ¿Hane hacutjin cuma sacú niji cjuaquixi xi ha tivechú nixtin xi nduvun ngayun tivechú hora xi cjuë nixtin rë ngasunhndë vi?

⁴ Ngajan xi cachja Jesús cojo rë me cuitjin:

—Nechun cuidadu, cojo sa xi hacuiin cuma ndacha ngayun ta, ⁵ tsêhê xi jemu cjin xuta cuetjucaa me xi cuichja me xi hacui me xi catsingatju Nina me. “Nga-han Cristu”, cuichja me. Hane cuatjin jemu cjin xuta cumacjain rê me cjuandacha rê me xi cuacun vê. ⁶ Hacuaha hya xi cumachaya nuju cja xi jemu yehe si tijima ngu nación o sá xi tjin cjuacjintacun xi jemu yehe si nduva ne, xicar-cuun ta, hatuxa tjin xi titjun xcusun vêhê cuma. Peru hacuiin ha hya cuijnetaha nixtin vihi. ⁷ Hacuiin hya cuma ta, titjun ne, scaan xuta ngu nación cojo jingu sa nación. Hacuaha scaan xuta ngu nandya cojo ngu nga nandya. Hacuaha jemu cjin cahndê xi cuma cuechu jindya. Jemu cjin cahndê xi cjuani nangui. ⁸ Peru xi cuatjin cumá yêjê ni xcusun vihi ne, sehe ntsacu tivetsihin cjuanihi xi cuatju xuta.

⁹ Sehe cjuaha nuju xuta, cjucojo nuju me xi cuatjun cjuanihi, xi tsiquehen me ngayun. Hacuaha jemu chohovêê xuta rê yêjê nangui yun ngatsê naha. ¹⁰ Hyá xi cumá ne, cjin xuta tsismicacun me ladu naha, hane tsindeya me cjuatacun rê me. Sehe cojo cja ni cuiteña xicjin me. ¹¹ Hacuaha jemu cjin profeta xi vindacha me xuta cuetjucaa me. Hane cuatjin jemu cjin xuta cumacjain rê me cjuandacha rê me. ¹² Hacuaha cjuatsehen ne, jemu cumayehetaha. Vêhê xi hya ne, cumachuva cjuahmutacun xi tjin rê xuta. ¹³ Peru jarê ngayun xi scaa nuju cojo cjuacjintacun vêhê hisca xi cueyun ne, cuechun xcun Nina. ¹⁴ Hane xuta ne, cjue me jingujyê ni ngasunhndê cuichja me cjuandajyihi vihi tsêhê gobiernu xi sahmi Nina, xi cumachaya rê xuta ngasunhndê. Hane hisca xi cuma chihin yêjê xcusun vêhê cuijnetaha nixtin vihi.

¹⁵ Profeta Daniel ne, catsihindu me xcun xujun rê Nina tsêhê ngu xcusun tsehen xi tsinguetsun. Cuechún nixtin xi cuejña vêhê xu cahndê ximinchacun —xuta xi vutaya cja vi, catja-

hacuenda me cja—. Hyá xi cuatjin tsejen ne, ¹⁶ hya ne, xuta xi siu yêjê nandya tsêhê distritu Judea ne, catanga me hane catangahma me hiscan ndetjún. ¹⁷ Hacuaha jarê me xi hinchasun me rcu ndava me ne, mé tsêhê me xi siu cahntsua ndihya ne, mijí rê xi cjuejaha me. ¹⁸ Hacuaha ha chuva vêhê ni ne, xuta xi siutaha me nguijña ne, mijí rê xi cuya cjuejaha me tsjanga rê me ndava me. ¹⁹ Jemu chojyihí tsêhê yêjê yachjin xi hinchahma quihndi rê cojo yêjê me xi tjin rê quihndi vaqui xi cojo me cuanga me nixtin hya! ²⁰ Chjahyun rê Nina xi cjuanihi vêhê ne, hacuiin cuinduva nixtin chan hnchan o sá nixtin xi chjahá-jenda rê ta, ²¹ tsêhê xi cjuanihi jyê xi cuma ne, ngu cjuandya jyê xi cjêê camahani camá hisca ntsacu cavetsihin ngasunhndê. Hacuaha cyaain cuma nga. ²² Jemu jyê cjuanihi jan, sá tsajin xi ha camachuva nixtin rê cjuanihi vêhê ne, hisca ngu xuta ne, cuetjintjiin me. Peru ngatsê rê cjuahmutacun xi tjin rê Nina cojo xuta xi cavaxijin me xi cuma ladu rê me ne, casahmichuva me nixtin vêhê.

²³ Hyá ne, sá xi cuichja yahnga me cojo nuju ta: “Cuajyihí Cristu nguehe”, o sá “Cuajyihí me ngajan.” Xi camacjaain nuju cja jan ta, ²⁴ tsêhê xi nixtin hya ne, jemu cjin xuta cuetjucaa me xi cuichja me cuindacha me ta Cristu me o sá profeta me. Hacuaha jemu sahmi me cjuarcun tsêhê xi meje cuindacha me xuta, hisca cojo xuta xi cavaxijin Nina. ²⁵ Quihndê ne cojo chaja sa xi cuechu nixtin vêhê ne, ngahan ne, ha cachjá cojo nuju. ²⁶ Vêhê xi sá xi cuichja yahnga me cojo nuju ta: “Jemu xín tsêhê nandya tacun me”, hacuiin cuangun cojo me. O sá xi cuichja me ta: “Ndiha cahnchun tacun me”, camacjain nuju tsêhê me ta, ²⁷ sacuaha sahmi hasen ndihichuhún xi ha tu ñahño sahmi hasen rê jingujyê ni ngahnga, hiscan ladu vetjucaa tsuhi hiscan ladu vetje tsuhi ne, cuatjin ha tu

ñahñu scutsejen ná yějē ni xuta hya xi cuinduvá nga ngahan xi Quihndi rē Xuta jain. ²⁸ Cuatjin cuma nixtin hya sacuaha chja cjua ta hiscan jiña chu xi cahme ne, hacuaha ngajan matangun chu lote.

Hya xi cuya nduva Quihndi rē Xuta Jain

²⁹ Ngutjen xi camá cavatju cjuañihi jan ne, cuinduva nixtin xi cjuē ndavá rē tsuhi. Hacuaha sá ne, ha quihndē suaain ndavá rē. Hane niñú ne, cuixu tsēhē ngahnga. Hisca ngahñu xi tjin ngahnga ne, cjuiniyaya. ³⁰ Hya xi camá ne, ngajan cuma tsejen seña tsēhē Quihndi rē Xuta Jain. Hane yějē xuta xi siu ngasunhndē ne, jindayava me. Sehe hya scuēē xuta ngahan, xi Quihndi rē Xuta Jain ngahan, xi cuinduvá ngajñi rē yuff cojo jemu jyē ngahñu, hisca seti hisca vatē jyihi ngahan xi cuinduva. ³¹ Hya ne, tsingátju ángel naha, hane xi ndaja hñu cuinuhya rē xi fane ngu tyjo, sehe cjuejaha rē yějē ni xuta naha xi cavaxejen, sahmitangun rē me tsēhē jinguyējē ni ladu ngasunhndē.

³² Quihndē ne, ningatuhuntacún tsēhē ejemplu xi sua yaxujún: Hya xi cuetsihin cumá xcuen tsja rē tsēhē xi ha jemu camatiña cuetsihin cuetjusehen ne, ngayun ne, ha hyun ta ha jemu camatiña chan tsin. ³³ Hacuaha chuva vēhē ni ne, hya xi chun xi cuetsihin cumá yějē xcusun xi cachjá cojo nuju vē ne, vēhē sua cumachaya nuju xi ha camatiña nixtin rē, hisca meje cumá. ³⁴ Cuichjá cjuaquixi cojo nuju ta xuta xi siu nixtin vihi ne siu cuaha me hya xi cuetjucaa xcusun xi cachjá cojo nuju jan. ³⁵ Ngahnga cojo nguehe ngasunhndē ne, hatuxa cjuē. Peru hisca ngu cjua naha ne, tsajin xi cuetjincaain.

³⁶ Sacuaha nixtin xi cuetjucaa cjuatacun vēhē ne, tsajin yo vēē rē. Hisca vñin ángel xi siu ngahnga. Hisca hveen ngahan xi Quihndi rē Xuta Jain. Suva tutu

ni Nina nahmi naja ne, me vēhē xi vēē me.

³⁷ Sacuaha casahmi xuta hya xi cavējña xutachanga naja Noé ne, hacuanitjin ni sahmi xuta hya xi cuinduva Quihndi rē Xuta Jain. ³⁸ Tsēhē xi hya ne, xi chaja sa casesuntē nandan ngasunhndē ne, jine tjihvi xuta, vixan me, tsinguixan me quihndi rē me. Cuatjin casahmi cuaha me hisca nixtin xi cavisehen Noé cahntsua barcu. ³⁹ Hacuaha camachayiin rē me hisca xi casesuntē nandá quijicojo rē yějē ni me jan. Hacuaha cuanitjin ni sahmi xuta hya xi cuinduvá ngahan xi Quihndi rē Xuta Jain ngahan. ⁴⁰ Jo cha ne, cuiyujutaha cha nguijña. Ngu cha ne, chjaháxin rē cha, hane cha xingu jan ne, cuejña cha. ⁴¹ Hacuaha jo nga yachjin ne, cuiyujutaha na coho na. Ngu na ne, chjaháxin rē na, hane na xingu jan ne, cuejña na.

⁴² Vēhē xi nechun cuidadu. Hacuaha ningascun rē cjuatacun nuju ta ngayun ne, hyúun janihya cjuehe Nai nuju. ⁴³ Hacuaha meje rē xi cumachaya nuju cjuatacun vihi: sá xi nai rē ngu ndihya ha machaya rē me hora xi cuinduva cha chējē ndava me ne, suaain me cahndē xi scuxaha cha ndava me ne, sehe tsichējē cha. ⁴⁴ Hacuanitjin ni meje rē xi ngayujun ni ngayun ne, tuhun chjinu yojo nuju ta, tsēhē xi hora xi ningatuuntacún xi cjuēhē ngahan xi Quihndi rē Xuta jain ngahan ne, hora vēhē cjuēhē.

Xuta xi vihndē cojo xi vihndiin tsēhē Nina

⁴⁵ ¿Yo ngayun xi nihñu sacuaha sahmi ngu mosu hndixahan xi jemu quicun cacun xi sahmicihin yějē ni hacutjin xi meje rē nai rē? Ngu hndixahan xi cjuahaxa xi cjuahacuenda rē yějē sa hndixahan xi hora tjin sua xi sinē. ⁴⁶ Jemu ndaja tsēhē ngu hndixahan jan xi tisahmi tutjin xi casuaxa rē nai rē. ⁴⁷ Cuichjá cojo

nuju cjuaquixi ta, nai rë hndixahan vëhë ne, suaxa me hndixahan vëhë xi hacuaha cjuahacuenda yëjë sa xcusun xi tjin rë me. ⁴⁸ Peru cuejña ne xi hndixahan vëhë ne, jemu choho xcusun rë me, tsingataha cacun cojo cjuatacun rë cuitjin: “Nai naha ne, tijima tafi sa xi cjuehe me.” Cuatjin tsingataha cacun. ⁴⁹ Sehe cuetsihin cuaja rë hndixahan xi yahnga jan, hacuaha cuatjutaha sinë cuihi hisca cuma chihi. ⁵⁰ Peru cuechú ngu nixtin xi tsajin tacunya hndixahan vëhë, ngu hora xi hisca hvíin ne, hya cjuehe nai rë. ⁵¹ Hane jemu jyë castigu sahmi me, sehe tsingatju me cuatju tangun cjuañihi cojo xuta xi jo xcun jo hntsua me. Ngajan ne, jemu squihnda me, hacuaha tsi-janerii me nehñu me.

Ejemplu tsëhë të na nixti xi quiji na cjuavixan

25 ¹Hya xi cuechú nixtin xi sahmi Nina gobiernu ne, cumá sacuaha cavatju të na nixti xi cafaha na ndihi tsëhë aceite, sehe quiji na xi cuejñaya na cha xi cuixan hora xi nduva cha. ²Hya xi camá ne, hñu na jan ne, rcu taja na, hacuñin ndaja tsingatahacacun na. Peru hñu nga na jan ne, ndaja quicun na. ³Cavejña xi na rcu taja ne, hora xi cafaha na ndihi ne, cafaain na aceite xi cuya cuincha na tsëhë. ⁴Peru sacuaha na quicun jan ne, cafaha na ndihi ne, hacuaha xin cafaha na aceite. ⁵Hane xi ma tafi xi nduva cha xi cuixan jan ne, cafaha rë na nijña ne, caviyujufë na. ⁶Hya xi camá ne, sacuaha vasen nixten ne, canuhya rë xi jindaya xuta ta: “¡Nduva cha xi cuixan! Tangun tjengun cha xi cuangun-cujun.” ⁷Xi cuatjin canuhya rë ne, cavisatjenhnga na nixti jan ne, cavëhëchjine na ndihi jan. ⁸Hya xi camá ne, cachja na xi taja rcu cojo na quicun cuitjin: “Tuhun niji hitsë aceite nuju ta meje cjuë xi tsijin ne, coho ndihi niji.” ⁹Peru cafayangui na quicun cuitjin: “Cumaji tihin nuju ta

sá cuatjin ne, cuechutaain tsëhë xi cuma meje nuju hacuaha tsëhë xi cuma meje niji. Hitsë sa ndaja ne, tangun hiscan xi xteña ne, hiscan ngajan chuhun.” ¹⁰Cuatjin camá xi hora xi quiji cavatsë na jan aceite ne, cafehe cha xi cuixan. Hane na xi siuya ne, cojo na cavisehen na ndava suhi. Sehe casechjahñu tingotjo ndihya. ¹¹Hya xi camá ne, cafehe na nixti xi quiji jan, hane cajindaya na tingotjo ndihya cuitjin: “Tatá, chuxuhun tingotjo tsijin.” ¹²Peru me vëhë jan ne, cafayangui me cuitjin: “Hveen jani nduvun ngayun.”

¹³Vëhë xi nechun cuidadu, hacuaha ningascun rë cjuatacun nuju ta ngayun ne, hyúun mé hora, hyúun mé nixtin xi cumá.

Ejemplu tsëhë tujún xi casua nai rë hndixahan

¹⁴Cuejña ne xi ngu xuta jan ne, quiji me ngu nangui cjin. Hane chaja sa xi cjue me ne, cajindaya me mosu hndixahan rë me casua me xi cuejñatsja cha xi tsëhë me. ¹⁵Hora xi casua me ne, ngu cha, casua me cha hñu mil tujún, hane ngu nga cha ne jo mil, hane ngu nga cha ne ngu mil. Cuatjin casua me cha hatucutjin tsejen xi chutaha cha. Hya xi camá ne, cavetju me quiji me. ¹⁶Ngajan camá xi cha xi cafahatsja cha hñu mil tujún ne, casahmi cha ngu negocio. Hane ngajan cavesun rë cha hñu cuatjin sa. ¹⁷Hacuaha cha xi cafahatsja cha jo mil tujún ne, cuanitjin ne cavesun rë cha jo cuatjin sa. ¹⁸Peru cha xi cafahatsja cha ngu mil tujún tsëhë nai rë cha ne, quiji cha cafahangui cha ngu ngojo nangui. Hane ngajan caveyanijihma cha tujún jan.

¹⁹Hya xi jercu cavatju nixtin xi quiji nai jan, cavuya cafehe me, cajindaya me cha xi sua cuenda cha tsëhë tujún jan. ²⁰Ngajan xi cha xi cafahatsja cha hñu mil tujún ne, yaha cha hñu mil sa. Hane cachja cha cojo me ta: “Tatá,

hñu mil catuhun ná, hindë ne, cavesun ná hñu cuatjin sa.” ²¹ Ngajan xi nai rë hndixahan jan ne, cuitjin cachja me cojo: “Ndatjin ri. Ngaye ne, ngu hndixahan ndaja ngaye. Ngatsë rë xi jemu ndaja canihñi xa lihndi vëhë ne, hitsë sa quisun xa xi sua ri. Quihndë ne, tehe cjuasua xahasen riji cojo ná.” ²² Sehe cafehe cha xi cafahatsja cha jo mil tujún. Hane cachja cha cuitjin: “Tatá, jo mil catuhun ná, hindë nguehe tacun tsujun jo cuatjin sa xi cavesun ná.” ²³ Ngajan cachja nai jan cuitjin: “Ndatjin. Ngaye ne, ngu hndixahan ndaja ngaye. Ngatsë rë xi jemu ndaja canihñi xa lihndi vëhë ne, hitsë sa quisun xa xi sua ri. Quihndë ne, tehe cjuasua xahasen riji cojo ná.”

²⁴ Hacuaha cafehe cha xi cafahatsja cha ngu mil tujún. Hane cuitjin cachja cha: “Tatá, ha machaya ná xi ngayun ne, jemu hñu cjuu nuju. Nangun xitjë handasa hacuiin ngayun xi canitjun. Ngayun ne, hacjahi sahmi xa ne, ngayun chjuhunnstun chji rë.” ²⁵ Vëhë xi tsácjun ngahan. Hane cëjë caveyaneje hma tujún nuju. Cuajyihí tujún nuju nguehe.” ²⁶ Ngajan xi nai rë cha ne, catsicuya me tsëhë cha cuitjin: “Ngaye ne, machjiriin ngaye. Ngaye ne, mosu hndixahan tsehen. Sá xi hye xi fanga handasa hacuiin ngahan xi catsitjë, hye xi hacjahi sahmi xa ne, peru ngahan fahántsa chji rë, ²⁷ hitsë sa ndaja xi xcun bancun cahmi chani tujún xi casuá ri, cojo sa xi hya xi cjuëhë ne, cúya cjuahántsa tujún naha, peru cojo quihndi rë.” ²⁸ Sehe cachja me cojo me xi hinchacun jan cuitjin: “Chjuhuntuhan tujún xi yaha cha vë. Sehe tuhan rë cha xi tjin rë tē mil tujún ta, ²⁹ me xi ha tjin rë ne, sua sa Nina me, hisca vesun tsëhë. Hane me xi tsajin cjín jan ne, cjuahataha Nina hitsë xi tjin rë me. ³⁰ Hacuaha chandunxin hndixahan xi machjiriin hiscan jñu ngajan candatsen. Ngajan ne, jemu squihnda me hacuaha tsijanerii me nehñu me.”

Ejemplu tsëhë chu tsánga cojo chu tentsun

³¹ Hya xi cuya Quihndi rë Xuta Jain cuinduva me cojo hasen ndajyihí tsëhë Nina hacuaha cojo ángel rë Nina cuinduva me, cuejña me cahndë hñu hiscan tsichuva me xuta. ³² Hane ngajan xcun me ne, cumatangun xuta rë jinguyëjë ni ngasunhndë ne, sehe scuxijin me xuta sacuaha sahmi ngu cha xi faha cuenda rë chu hora xi vaxijin cha chu tsanga tsëhë ngajñi rë chu tentsun. ³³ Vinchaxin cha chu tsánga taha quixi rë cha, hane vinchaxin cha chu tentsun taha xcun. ³⁴ Hya xi cumá ne, me xi matitjun jan, cuichja me cojo xuta taha quixi ta: “Nduvun nechun, ngayun xi catsinchacun Nina Nahmi naha. Ngayun xi satë nuju cuisuhun gobiernu xi Nina cavëhëchjini me tsujun hisca ntsacu cavetsihin ngasunhndë. ³⁵ Cuatjin satë nuju ta tsëhë xi hya xi vojo ná, canicjun ná. Hya xi xinda ná, catuhun ná nandá; xutaxín ngahan, peru catuhun cahndë cavitejñajenda ndya nuju. ³⁶ Tsajin ná tsjian, peru catuhun ná tsjian xi mameje; hmu ná hane cafuhun cachusuhunyun ná; tejñaya ndavaya hane cafuhun cachutsujun ná.” ³⁷ Sehe xuta tyjahi jan, tsicuya me cjuu cuitjin: “Tatá, ¿janihya camachaya niji xi vojo nuju, hane canicjin nuju? ¿O sá xi xinda nuju, hane catihin nuju nandá? ³⁸ ¿O janihya cachutsijin nuju nujuhunyun sacuaha xutaxín hane catihin cahndë nechunjendun ndya niji? ¿Janihya cahyin xi tsajin nuju tsjian hane catihin? ³⁹ Hacuaha ¿janihya cahyin xi hmu nuju o nechunyun ndavaya xi canduvintjenguin nuju?” ⁴⁰ Sehe cuichja me xi matitjun jan ta: “Cuichjá quixi cojo nuju ta hya xi canihñu cjuandaja vë xi cavisekun rë tuyoni xuta yuma ladu naha ne, cavisekun ná ngahan.”

⁴¹ Hya xi camá ne, cachja me xi matitjun jan cojo xuta xi siu ladu scun rë me cuitjin: “Tangunxun ngayun xi cuatjun castigu rë Nina ne, tangun cuechún xcun ndihi xi catsindaja Nina xi cuisehen xitsehen xi matitjun cojo ángel rë. Ndihi jan ne, tsajin nixtin tsajin nixten xi coho.” ⁴² Cuatjin satë nuju ta tsëhë xi hya xi vojo ná, ha canicjuun ná; hya xi xinda ná, catuun ná nandá; xutaxín ngahan, peru catuun cahndë cavitejñajenda ndya nuju; ⁴³ Tsajin ná tsjian, peru catuun ná tsjian xi mameje; hmu ná hane cafuun cachusuunyuun ná; tejñaya ndavaya hane cafuun chut-suun ná.” ⁴⁴ Sehe cuinenguise me cuitjin: “Tatá, ¿janihya camachaya niji xi vojo nuju, o sá xi xinda nuju? ¿O janihya canutsijin nuju nujuyhunyun sacuaha xutaxín, o xi tsajin nuju tsjian? Hacuaha ¿janihya cahyin xi hmu nuju o nechunyun ndavaya? ¿Janihya cahyin vë xi cavisecuiin nuju?” ⁴⁵ Sehe cuichja me xi matitjun jan ta: “Cuichjá quixë cojo nuju ta tsëhë xi mijí nihñu cjuandaja vë xi cuisecun rë tuyoni xuta yuma ladu naha ne, mijí cuisecun ná ngahan.” ⁴⁶ Sehe xuta jan ne, cuisehen me castigu xi nixtin nixten cumá, peru xuta xi tyjahi cjuatacun rë me ne, satë rë me cjuahñu xatsë xcun Nina.

Camachihin cjua hacutjin xi chjahá rë Jesucristu

26 Hya xi camá ne, xi cajnetaha cachja Jesús yëjë cjua cuatjin ne, sehe cachja me cojo xuta ladu rë me cuitjin:

²—Ha hyun xi chaja sa jo nixtin xi cuechú suhi tsëhë pascua ne hane ngahan xi Quihndi rë Xuta Jain ngahan ne, hatuxa hya cumá ngahan entregadu tsja xuta xi cuetaha ná xcun cru. —Cuatjin cachja me.

³ Nixtin hya ne, yëjë nahmi xi matitjun cojo xuta changá rë xuta tjë rë Israel

ne, casahmi me ngu junta ngajan ndihya jyë rë Caifás, me xi vitexa yëjë nahmi xi matitjun. ⁴ Ngajan xi caviyuju me cjuatacun rë me hacutjin xi cuma cuindacha me Jesús cojo sa xi cuma cjuahahma me me xi tsiquehen me me. ⁵ Peru cachja me ta:

—Ndatjin xi cuinechanyan ne cuatju suhi, sehe chjahanhma cha, sá tu cumacjan rë xutacjín, hane cumá ngu suë jyë.

Cavitejnu ngu chjuun aceite rcu Jesucristu

⁶ Hya ne, Jesús ne, nandya Betania quitaha me. Tacun me ndava cha Simú, cha xi camandaja tsëhë chíhin vitaha xi casatë chuxin rë cha. ⁷ Hane ngajan camá xi cafehetjengui rë me ngu chjuun xi yaha na ngu frascu xi ndyojo camá, hinchá ngu aceite ndaja xi jercu hnga chji rë. Hya xi camá ne, cavitejnu na aceite jan rcu Jesús hora xi tijinë me niñu. ⁸ Peru xi cavutsejen cha ladu rë me xi cuatjin casahmi na jan ne, camacjan rë cha cachja cha cuitjin:

—¿Mé má tu mahya ni catsichaja na aceite vë? ⁹ Sá xi xteña ne ndaja sacú tujún rë. Hane tujún vëhë ne cuma cuisecoo rë xuta yuma. —Cuatjin cachjataha cha na.

¹⁰ Peru xi camachaya rë Jesús xi cuatjin chja cha ne, catsicuya me cjua cuitjin:

—¿Mé má cuatjin tivichuncjun tsëhë na ta jemu vengui chjí rë xcusun xi casahmi na cojo ná? ¹¹ Xuta yuma ne, yëjë nu yëjë nixtin ne, siu me cojo nuju. Peru ngahan ne, hacuiin yëjë nu yëjë nixtin tejña cojo nuju. ¹² Tsëhë xi xi cavitejnu ná na aceite jan ne cojo tjun ni ne cuëhëchjine na yojo naha xi seyaniji ngahan. ¹³ Cuichjáquixë cojo nuju ta tuyani ni tsëhë jingujyë ni ngasunhndë xi cuichja xuta cjua tsëhë Nina ne, hacuaha cueyanangui me na vihi, cojo sa xi xuta xi yahnga ne, cumachaya

rë me xcusun xi casahmi na cojo ná.
—Cuatjin cachja Jesús.

Judas casahmi cha compromisu xi cuiteña cha Jesús

¹⁴ Hya xi camá ne, ngu cha tsêhë ngajni rê me xi tejó xi má ladu rê Jesús, cha xi hmi rê Judas Iscariote ne, quiji cavisajmi cha cojo nahmi xi matitjun ¹⁵ cavi-nenguise cha me cuitjin:

—¿Há cjin tujún tuhun ná sá xi sahme entregadu nuju Jesús?

Ngajan xi cavexqui me hane casua me cha cantë tujún tyava. ¹⁶ Hane ngajan cavejñaya cha ngu hora xi ndaja xi cuma sahmi cha entregadu Jesús cojo xuta xi cuacun jan.

Hacutjin cajnë Jesús tsêhë suhi rê Pascua

¹⁷ Hya xi camá ne, nixtin xi tjun tjun tsêhë suhi xi chinë pan xi tsajin san rê, cafehe xuta ladu rê Jesús xi tejo jan, cachja cha cojo me cuitjin:

—¿Jani meje nuju xi cuinhinchjini xi xine nguixun tsêhë suhi?

¹⁸ Sehe cafayangui Jesús cuitjin:

—Tangun nandya Jerusalén. Hane xi cuechú ndava ngu cha xi cuacun jan ne, tinújun cojo rê cha cuitjin: “Chja maestru naja cuitjin: Meje cuechú hora naha, hindë ne, ndya nuju ne sínë niñu tsêhë pascua cojo xuta ladu naha.”

¹⁹ Sehe quiji xuta ladu rê me ne, casahmi cha sacua ha xi cavitexa Jesús cha, hane cavêhëndaja cha xi sinënguixun me tsêhë pascua.

²⁰ Hya xi quiji hora jan ne, tijinë me niñu cojo xuta ladu rê me xi tejó jan, ²¹ hane ngajni hora xi tijinë me ne, cachja Jesús cuitjin:

—Cuichjá cojo nuju cjuaquixi ta ngu ngayun ne, nihñu ná entregadu. —Cu-atjin cachja me.

²² Ngajan xi jemu choho camá rê cha, cavetsihin cha cachja chuva ngu chuva ngu cha cojo rê me cuitjin:

—Nai, ¿há cumácacun xi ngahan sahme?

²³ Hya xi camá ne, cafayangui Jesús cuitjin:

—Ngu cha xi ngu ni tyuva tsinguíse-henquinda niñu naha cojo ne, cha vêhë xi sahmi ná entregadu. ²⁴ Ngahan xi Quihndi rê Xuta Jain ngahan ne, hatuxa tjin ná xi cueya sacuatjin ha camá camahindu xcun xujun tsahan, peru jemu chojyihî tsêhë cha xi sahmi ná entregadu. Vengui sa chji rê xi catsiin cha.

²⁵ Sehe Judas, cha xi sahmi rê me entregadu cachja cha ta:

—Maestro, ¿há cumácacun xi ngahan sahme?

Ngajan xi cafayangui Jesús tsêhë cha cuitjin:

—Juun, quixi.

²⁶ Hora xi tijinë me comida ne, cafaha me ngu niñutsju hacua ha casua me nacuechji rê Nina ne, sehe cavotohocja me niñutsju jan, casua rê me xi tejó jan ne, sehe cachja me cuitjin:

—Chjuhun xinu. Vihi ne, yojo naha vi.

²⁷ Hya xi camá ne, cafaha me ngu vasu ne, sehe casua me nacuechji rê Nina, sehe cachja me cuitjin:

—Juhun vihi sehe siuhun ngajni ngayujun ni, ²⁸ ta xan rê uva vihi ne, vihi jni naha xi cuetju ngatsë rê xuta sehe cuma chihin compromisu xi cuaxëtje rê xuta tsêhë jyé rê me. ²⁹ Hacuaha cuichjá cojo nuju ta quihndë cojo nixtin xi cjuiniji sa ne, ha quihndë cyaan cuêhë xan rê uva. Cuêhë, peru hisca hya xi cuêhë nga cojo nuju ngajan hiscan sahmi Nina gobiernu.

**Casua Jesucristu camachaya
rë Pedru xi cuichja me xi
hviin me yo Jesucristu**

³⁰ Xi cajnetaha cajinë me ne, casë me ngu tsëhë Nina. Sehe cavetju me quiji me Naxi Olivu. ³¹ Hane sehe ngajan cachja Jesús cojo xuta ladu rë me cuitjin:

—Ngayujun ni ngayun ne, nismutacun ná hacuaha cuma ndaya cjuatacun nuju quihndë nguixun vi ne, hane cuejñu ná suva ta cumá sacuaha camahindu xcun xujun rë Nina xi chja xi: “Nina ne, tsiquehen me cha xi sahmi cuidadu rë chu tsánga, hane chu tsánga vë ne cuitsojo chu.” ³² Cuatjin cumá, peru hya xi cúya nga cjuahñu naha ne cjué titjun tsujun hisca distritu Galilea.

³³ Pedru ne, cafayangui cha cuitjin:

—Ha ndasa ngayëjë cha xi cuicun vi cuejña suva cha ngayun, hatuxa tsajin nixtin xi cojo ngahan sahme cuatjin.

³⁴ Hya xi camá ne, cuitjin cachja Jesús cojo cha:

—Cuichjáquixë cojo ri ta tajñu ni xi chaja squihnda xahnda ne, ha jyan ndiya cuinoje xi hyiin yo ngahan. —Cuatjin cachja Jesús.

³⁵ Cachja Pedru cuitjin:

—Ha ndasa hisca cueya cojo nuju ne, peru cuichjaan xi hveen yo ngayun.

Hacuaha cuanitjin ni cachja cha xi yahnga.

**Casahmi Jesucristu oración rë
me ngajan Getsemaní**

³⁶ Sehe quiji Jesús cojo cha xi tejó jan ne, cafehe me ngu cahndé xi hmí rë Getsemaní. Ngajan cachja Jesús cuitjin:

—Nechun ni nguehe. Cjué nguvan hitsë ni cuisiajme cojo Nina. —Cuatjin cachja me.

³⁷ Hya xi camá ne, cavaxë me Pedru cojo jo cha quihndi rë Zebedeo xi quiji cojo me cha. Hane xi cjuí me ne, cavet-sihin jemu camá va rë me, hacuaha jemu

macjincacun me. ³⁸ Sehe cachja me cojo cha cuitjin:

—Jercu choho camahani má rë xahasen naha, sacuaha xi vëhë ni tsiquehen ná. Nguehe nechuncun ngayun cojo ná.

³⁹ Sehe ngajan xi Jesús ne, quiji me hitsë nguvan. Hane ngajan cafañatsacjan me, cafehya rë me Nina cuitjin:

—Ngayun Nahmi naha, sá tjin sa ngu chuva rë ne, catisatiin ná cjuañihi xi cuátju cuma vi. Peru catama sacuatjin xi meje nuju ngayun, hacuiin sacuatjin xi meje ná ngahan.

⁴⁰ Hya xi camá ne, cavuya cafehe me hiscan siu jyan xuta ladu rë me xi quijicojo me jan ne, casacutsja me xi siufë me. Ngajan xi cachja Jesús cojo Pedru cuitjin:

—Cahyun ni, ¿há camaji cavacun ngayun cojo ná hisca ngu hora ni?

⁴¹ Nechuncun ngayun, nihñu oración nuju, sátu chjaháchuva nuju cojo cjuatacun nuju. Xahasen nuju ne, ndaja meje rë xi nihñu, peru yojo nuju ne, chuvacacun.

⁴² Hya xi camá ne, camá jo ndiya xi quiji me nguvan cafehya me Nina cuitjin:

—Nahmi naha, sá xi cumaji cuatju chuva rë xi satiin ná cjuañihi ne, catama sacuatjin xi meje nuju ngayun.

⁴³ Hya xi camá ne, cavuya nga cafehe me hiscan siu jyan xuta jan casacutsja me xi siufë me ta jemu hai nijña rë me.

⁴⁴ Hya xi camá ne, camá jyan ndiya xi quiji me nguvan ne hacuaha cojo vëhë nga ne, cafehya me Nina. ⁴⁵ Sehe cavuya nga me cafehe me hiscan siu xuta jan ne, cachja Jesús cuitjin:

—¿Há tsjuñufun cuhun? Chutsujun ne, ha cavechú hora xi ngahan Quihndi rë Xuta Jain ne, cjuaha ná xuta xi sahmi ná entregadu cojo xuta tsehen. ⁴⁶ Tisatjunhngun, cuanguen chutsejen ta ha nduva cha xi sahmi ná entregadu.

Cafaha xuta Jesucristu

⁴⁷ Jinguyējē rē xi tichja cuaha Jesús ne, cafehe Judas, cha xi cojo jiyajñi ngajñi rē cha xi tejó xi catsuyihiya cojo me. Hacuaha jemu cjin xuta tivisecoo rē cha, xuta xi cavitexa nahmi xi matitjun cojo xuta changá xi quijijaha me Jesús. Hane yaha me quicha, yaha me ya. ⁴⁸ Chaja sa xi cjuehe cha jan xi sahmi cha entre-gadu Jesús ne, cachja cha cojo xutacjin jan cuitjin:

—Cha xi cjué cuitatsuha xi suá rē nina ne, cha vëhë xi hacui cha.

⁴⁹ Xi tu cavechu cha hiscan nduva Jesús ne, ngutjen quiji casahmitiña cha tsëhë me hacuaha casua cha me nina cachja cha cuitjin:

—Cuhndanu, maestro —chja cha.

Hane quiji cavitatsuha cha me. ⁵⁰ Ngajan xi cachja Jesús cojo cha cuitjin:

—Tai, Nihñichihin xa vëhë xi candove.

Hya xi camá ne, quiji xuta jan ne, cafaha me Jesús. ⁵¹ Ngajan xi ngu cha xi secun cha cojo Jesús ne, cavaxë cha quichanduju rē cha, hane cavaja rē cha ngu cha mosu rē nahmi xi matitjun, hane cavatësun cha ngu ladu tyjavañuju.

⁵² Ngajan xi cachja Jesús cojo cha cuitjin:

—Teyendeje quicha riji vë. Xuta xi tsi-cojo me quicha ne, hacuaha cojo quicha cueya me.

⁵³ ¿Há hyuun ta sá xi cjuehya rē Nahmi naha ne, jemu cjin mil ángel tsingatju me cuisecoo ná? ⁵⁴ Peru sá xi cuatjin sahme ne, ¿hacutjin cumachihin cjua rē xujun rē Nina? ta cuitjin meje rē xi cumá.

⁵⁵ Hya xi cajnetaha cachja Jesús cojo xuta ladu rē me ne, sehe cachja me cojo xutacjin cuitjin:

—¿Há nduvun chjuhun ná sacuaha ngu xuta xi chëjë me, xi cuatjin nduvun cojo ya cojo quicha vë ni? Xi cavite-jñaya cojo nuju nchunchujun ni ndat-sen yungun jan ne, cavetuhunntsun ná

cachjuun ná. ⁵⁶ Peru cuitjin tijima cojo sa xi cuetjucaa jain hacutjin camahindu xcun xujun rē Nina xi catsihindu profeta.

Quiji me cojo Jesús ndava nahmi xi matitjun

⁵⁷ Hya xi camá ne, xi cafaha xuta jan Jesús ne, quijicojo me me ndava Caifás, nahmi xi matitjun tsëhë yëjë ni nahmi ta tsëhë xi ngajan ha camá tangun yëjë ni cha xi vicuya cjuachacun cojo yëjë ni xuta changá. ⁵⁸ Pedru ne, hacuaha tjen-gui cha cjuí cha tu cjin tu cjin ni hacutjin cjuí xuta jan cojo Jesús hisca xi cavisehen cha ndatsen rē ndava nahmi xi matitjun jan. Hane ngajan cavëjña cha cojo cha nísë rē yungun cojo sa xi cumachaya rē cha mé cumá.

⁵⁹ Hane nahmi xi matitjun jan cojo yëjë sa xuta xi matitjun ne, cavangui me xuta ndacha xi tsinguixi jyé rē Jesús, cojo sa xi cuma tsiquehen me me. ⁶⁰ Peru tsajin mé jyé rē Jesús xi casacu rē me handasa jemu cjin má xuta ndacha xi cachja me. Hisca xi ha tisacuiyiin rē me hacutjin cuma, sehe cafehe jo cha ndacha xi cachja cha ⁶¹ cuitjin:

—Cha vi cuitjin cachja cha ta: “Ngahan ne, cuma tsinguétsun yungun xi matitjun vi xi casahmi xuta tsëhë Nina, hane cahntsua xi jyan nixtin ne, sahme nga ngu.”

⁶² Ngajan xi nahmi xi matitjun tsëhë nahmi xi yahnga jan ne casecunvasen me, cavinenguise me Jesús cuitjin:

—¿Há chjayinnguini hisca ngu cjua? ¿Mé noje tsëhë jyé xi vincha xuta jan?

⁶³ Hane Jesús ne, tu jyuu ni casecun me. Sehe cachja nahmi xi matitjun jan cojo Jesús cuitjin:

—Cuitexa ri ngatsë rē xi macjain ri tsëhë ngu ni Nina quicun xi hora xi cjuahataha ri ne cuinoje cjuaquixi. ¿Há ngaye xi Quihndi rē Nina? ¿Há ngaye xi Cristu?

⁶⁴Ngajan cafayangui Jesús tsêhê me ta:

—Sacuatjin nújun vê ne, cuatjin jain. Hacuaha cjuehe nixtin xi chutsujun ná xi tejña ladu quixi tsêhê ngahñu rê Nina. Hacuaha chutsujun ná xi cuinduvajne ngajñi rê yufi tsêhê ngahnga.

⁶⁵Hane ngajan xi nahmi xi matitjun tsêhê nahmi xi yahnga jan ne xi jemu camacjan rê me ne, hisca tsjian rê me cavicheya me. Hacuaha cuitjin cachja me:

—Tsixcuehyu cha Nina. Tsajin sa cjua testigu xi mameje. Ngayun ne, ha canuhyun hacutjin tsixcuehyu cha Nina.

⁶⁶¿Mé nújun quihndê?

Ngajan cafayangui me cuitjin:

—¡Meje rê xi cueya cha!

⁶⁷Hya xi camá ne, ngu jo me cavetsihin me cavêhênatya me Jesús hacuaha cavajaya me xcun. Yahnga nga me ne, cojo cahntsua tsja me cavaja me xcun Jesús. ⁶⁸Cachja me cuitjin:

—Tinoje, ngaye Cristu, ¿yo xi cavaja ri?

Cachja Pedru xi hvíin me yo Jesucristu

⁶⁹Jinguyêjê rê xi cuatjin tijima ne, Pedru ne, tacun me ndatsen ndihya. Hya xi camá ne canduva ngu na mosu hndixahan tsêhê nahmi jan, cafehe cachja na cojo Pedru cuitjin:

—Ngaye ne, ladu rê Jesús tsêhê distritu Galilea má ye.

⁷⁰Peru xcun yêjê me xi siu me ne, caphahma me cachja me cuitjin:

—Hisca hveen mé xi noje.

⁷¹Hya xi camá ne, sehe cavetju me quiji me casecun me hiscan tu cuiseen ni tsêhê ndatsen ndihya. Hane ngajan xi ngu nga na cachja na cojo xuta xi siu ta:

—Cha vihi ne, ladu rê Jesús nandya Nasarét má cha.

⁷²Hya xi camá ne, ngu ndiya nga ne cafahahma me cuitjin:

—Vêê Nina xi hveen xuta jan.

⁷³Hya xi cavatju ngu hora ne, sehe camatiña xuta xi hinchacun cojo Pedru jan cachja me cuitjin:

—Ha cjuaquixindaja ta ngaye ne, cojo ngaye nechin cojo cha xi cuajyihi vê, ta tsêhê xi cjua riji tsingacun xi xuta distritu vê ngaye.

⁷⁴Ngajan xi cavetsihin nga Pedru caphahma me cjuaquixi hisca cachja me xi catinduva ngu cjuacjintacun xi cuatju me sá xi tichja me ngu ndesu. Cuitjin cachja me:

—Vêê Nina jain xi hveen yo me xi nújun vê.

Hane hora vêhê ne, cajihnda ngu xahnda. ⁷⁵Hane Pedru ne, catsinguitsjen me cjua xi cachja Jesús cojo rê me xi cachja me cuitjin: “Chaja sa xi squihnda ngu xahnda ne, hacuaha camá jyan ndiya nújun xi hyúun yo ngahan.” Hane xi cavetju me candatsen ne, cajihnda susu me.

Casahmi entregadu me Jesucristu xcun Pilatu

27 Hya xi camá nchujun ni ne, yêjê ni nahmi xi matitjun cojo yêjê xuta changá ne camatangun nga me xi sacuya rê me xcusun hacutjin cuma tsiquehen me Jesús. ²Sehe catsihñu me Jesús ne, quijicani me xcun gobernador xi hmí rê Pilatu.

Cahme Judas

³Hya xi camá ne, Judas ne, cha xi casahmi rê me entregadu, camachaya rê cha xi cueya Jesús. Ngajan xi choho camá rê cha hane catsindeya cha cjuatacun rê cha. Quiji cha catsicuya cha catê tujún tyava jan cojo nahmi xi matitjun cojo xuta changá. ⁴Cuitjin cachja cha:

—Jemu tjin jyé naha ta tsêhê xi casahme entregadu ngu me xi tsajin xi cun rê.

Peru cafayangui me cuitjin:

—¡Mé tsijin vë! Cjuacjintacun vë hatuxa tsiji sove.

⁵ Hya xi camá ne, ngajan yungun xi matitjun ne, cacandi cha tujún tyava jan sehe cavatju cha quiji cha hiscan ngu cahndé xi cavityanguí cha yojo rë cha hisca xi camá cahme cha.

⁶ Nahmi xi matitjun jan cafaha me tujún tyava jan peru cachja me cuitjin:

—Cumaji cuinchan tujún vi cahntsua caxa tujún rë yungun ta tsëhë xi tujún vi ne, cavengui chji rë jni rë cha.

⁷ Hya xi camá ne, cachuya rë me xi catusë me ngu xáhva xi chja xuta Nanguí rë Cha Chjinetiji. Xáhva jan ne cumachji rëhë xi xinchaniji xutaxín xi cueya me nangui vë. ⁸ Ngatsë rë xi cuatjin casacu xahva jan ne, hisca nixtin quihndë ne cahndé vëhë ne yaha ñihi xi Cahndé Tsëhë Jni. ⁹ Xi cuatjin camá ne, camachihin cjua xi catsihindu profeta Jeremías xi cuitjin chja: “Cafaha me catë tujún tyava, xi cavejña chji rë cha xi cafehya xuta nangui Israel, ¹⁰ sehe casua me tujún jan xi cjuaha me nangui rë cha chjinetiji. Cuatjin casahmi me sacuahha cavitexa Nina.”

Xcusun xi cavatju Jesús xcun Pilatu

¹¹ Hya xi camá ne, Jesús ne secun me xcun gobernador. Ngajan cavinenguise me Jesús cuitjin:

—¿Há ngaye xu matitjun ngaye tsëhë xuta tjë rë Israel? —Cuatjin cavinenguise me.

Hane Jesús ne, cuitjin cafayangui me:

—Cuatjin sacuatjin nújun vë. —Cuatjin cafayangui me.

¹² Peru hora xi nahmi xi matitjun cojo xuta changá jan cavincha jyé me Jesús ne, ndastu mé cafayangui Jesús. ¹³ Ngajan xi cachja Pilatu cojo me cuitjin:

—¿Há nuhyiin cjua xi chja me? Jercu cjín jyé riji cavincha me.

¹⁴ Peru Jesús ne ha quihndë cafayanguiin me hisca ngu cjua. Hane Pilatu ne, jemu quijircun camahani rë me.

Camá entregadu Jesús xi cjue cueya me

¹⁵ Tjin ngu xcusun xi nu nu ni, hya xi cumá nixtin rë suhi jan ne, tsismi gobernador ngu presu xi xuta vaxijin me.

¹⁶ Nixtin hya ne, jiya ngu presu xi jemu tjin cjua tsëhë, Barrabás hmí rë cha.

¹⁷ Ngajan xi camá xi hya xi camatangun xutacjín ne, ngajan cavinenguise Pilatu xuta cuitjin:

—¿Jarë cha xi meje nuju xi tsisme? ¿Há Barrabás ne? ¿Há Jesús xi Mesías xu?

¹⁸ Cuatjin cachja me cojo xuta ta tsëhë xi ha vëë me xi ngatsë ni rë cjuaxin sahmi nahmi xi matitjun jan cojo Jesús, vëhë xi casahmi me entregadu xi meje rë me xi cueya.

¹⁹ Hora xi tijimá vë, tacun Pilatu xcun silla hiscan vejña me hora xi vitexa me, ngajan xi chjuun rë me ne, catsingatju na cjua xi cuitjin chja: “Caninguisuunjñuu cjuacjintacun tsëhë cha vë xi tyahi cjuatacun rë cha, ta nguchjin ne ngajñi nijña naha jemu cjín xcusun xi chocun camá ná chini ngatsë rë cha.” Cuatjin fi cjua xi catsingatju na.

²⁰ Hya xi camá ne, nahmi xi matitjun cojo xuta changá jan jemu cachja me cojo sa xi cama cuinchahaxi me xuta xi cjuehya xuta Pilatu jan xi tsismi me Barrabás ne, tsiquehen me Jesús. ²¹ Ngajan cachja nga gobernador cuitjin:

—Tsëhë jo cha vë ne, ¿jarë cha xi meje nuju xi tsisme?

Ngajan cafayangui xutacjín jan cuitjin: —Nismu Barrabás.

²² Sehe cachja nga Pilatu cuitjin:

—Sá cuatjin ne, ¿mé xi sahme cojo Jesús xi Cristu xu?

Ngajan xi cafayangui yëjë xutacjín jan cuitjin:

—¡Tetuhun cha xcun cru!

²³Ngajan xi cachja Pilatu cojo rë me ta:

—Peru ¿mé xi rcu jyé casahmi cha?

Peru xutacjín ne hitsë sa hñu cajindaya me cachja me cuitjin:

—¡Tetuhun cha xcun cru!

²⁴Hya xi camachaya rë Pilatu xi sahmi cuendaain xuta xi chja me ta tu hitsë sa tijima ngu suë jyë ne, cafehya me nandá sehe cavane me tsja me xcun xutacjín jan. Sehe cachja me cuitjin:

—Quitteen jyé tsëhë cjuaveya rë cha vihi ta, tsajin jyé rë cha. Vëhë ne, ha chaha nuju vëhë.

²⁵Hya xi camá ne, yëjë xutacjin jan ne, ngu tangun ni cafayangui me cuitjin:

—Tsëhë cjuaveya rë cha vëhë ne, chaniijyín cojo quihndi niji. —Cuatjin cachja me.

²⁶Hya xi camá ne, catsismi me Barrabás, peru casahmi me xi Jesús ne casehen rë me sehe casua Pilatu me xi cjue cueya me xcun cru.

²⁷Hya xi camá ne cha sindadu xi v-texta gobernador ne, quiji cojo cha Jesús taha cahntsua ndava gobernador jan. Hane sehe casahmitangun sa cha yëjë sindadu cjín. ²⁸Hya xi camá ne, cavaxë cha tsjian rë Jesús, hane sehe catsicaja cha me ngu tsjian hani. ²⁹Hacuaha catsihya cha ngu corona nahyá sehe cavesun cha rcu Jesús hane cavisengui cha ngu bastón tsja me. Hya xi camá ne, cavix-cuhnchi cha xcun me, catsixcuehyu cha me, cuitjin cachja cha:

—¡Viva! Me xi matitjun tsëhë xuta tjë rë Israel.

³⁰Hacuaha cavëhënatya cha me, hacuaha cafaha cha bastón jan xi yaha tsja me hane cavaja cha rcu me. ³¹Hya xi camá xi cuatjin catsixcuehyu cha me ne, cafaxin cha tsjian hani jan, catsicaja nga cha me tsjian rë me. Hya xi camá ne, sehe quijicojo cha me xi cuetaha cha me xcun cru.

Casetaha Jesucristu xcun cru

³²Hya xi cavetjun cjuicojo sindadu Jesús ne, cavechutaha cha ngu me xi hmí rë Simón tsëhë nandya Cirene. Sehe sindadu jan ne, casahmi cha ngu jyë xi cuaniji me cru jan.

³³Hane xi cafehe cha cojo Jesús hiscan xi hmí rë Gólgota, cjua xi meje cuichja Naxi Nínda Rcuun. ³⁴Hya xi camá ne, casua cha me xan rë uva xi tecjan rë nandá rë tyjungunsa xi cuihi Jesús. Peru xi cavutaha me hitsë ne, cahviin me.

³⁵Ngajan xi sindadu jan ne, xi cavatju casetaha me xcun cru ne, sehe cafaha cha tsjian rë me hane cavaxë cha suerte tsëhë ne, jarë cha xi satë rë cha jima ngu tsjian. ³⁶Sehe ngajan ne cavejñataha cha cavutsejensun cha Jesús xcun cru. ³⁷Hacuaha camahindu ngujo cjua xi casetaha xcun cru ngatihin rcu Jesús sacua ha xcusun rë me xi setaha xujun jyé rë xuta, hane cuitjin chja cjua jan: “Jesús, me xi Matitjun Tsëhë Xuta Israel.”

³⁸Hacuaha cavityanguí cha ngu chëjë ngu ngu ladu tjehe rë me, jima ngu cojo cru rë. ³⁹Hya xi camá ne, xuta xi cavatju jan ne, catsixcuehyu me Jesús ne, catsitjiya rcu me, hacuaha cuitjin cachja me:

⁴⁰—Ngaye xi ha canoje xi cuma ninguetsín yungun xi matitjun, hane cahntsua xi jyan nixtin ne; cama nga canindeje ngu. Quihndë ne, sá cuatjin cuma nihñi ne, naxetje sove yojo riji. Sá xi Quihndi Jain rë Nina ngaye, titujni tsëhë cru vë.

⁴¹Ha chuva vëhë ni ne, nahmi xi matitjun ne cojo cha vicuya cjuachacun rë ley cojo xuta changá ne cachja me cuitjin:

⁴²—Cavaxëtje xu cha xuta, peru quihndë ne, cumaji cuaxëtje suva cha yojo rë cha. Sá xi hacui jain cha xi Matitjun Tsëhë Xuta Israel ne, catitujne cha tsëhë

cru chutsejen, cojo sa xi cumacjain naja tsêhê cha. ⁴³ Macjain xu rê cha tsêhê Nina, quihndê ne cataxêtje Nina cha sá xi Nina meje rê me cha; ta cachja cha ta: “Quihndi rê Nina, ngahan.”

⁴⁴ Hacuaha cha chêjê xi cojo caxtyan-gui taha cru jan ne, cojo cha choho cachja cha tsêhê Jesús.

Xcusun xi camá hya xi cahme Jesucristu

⁴⁵ Hane hora vêhê ne, camajñu jingu-jyê ni. Cavetsihin xi camanchisen ne, quiji cani rê hisca fane jyan. ⁴⁶ Hya xi camá ne, jercu hñu camahani cachja Jesús cuitjin:

—Elí, Elí, ¿lama sabactani? -cjua vêhê meje cuichja ta: Ngayun Nina naha, mé má canismutacun ná.

⁴⁷ Hane ngujo xuta xi hinchacun jan ne, xi cajni rcu me hne jan hane cachja me cuitjin:

—Tijindaya me profeta Elías.

⁴⁸ Hya xi camá ne, ngutjen ni, cavanga ngu me, quiji catsicahnchi me ngu tsjian hinda cojo xan rê uva xi ha sán, sehe cavetaha me rcu ngu ya nduju, sehe cavetaha me hntsua Jesús xi cuihingui me. ⁴⁹ Ngajan xi yahnga xuta ne, cachja me cuitjin:

—Caveni tuhun. Cuinechanyan hitsê ne, ¿há cuinduva jain Elías cuaxêtje me cha?

⁵⁰ Hane Jesús ne, hora vêhê ne, jercu cajindaya nga me hane cahme me. ⁵¹ Hacuaha hora vêhê ni ne, tsjian nduju xi tyjanguí cahntsua yungun xi matitjun jan ne, hisca rcu hisca ntsacu canduva catiyavasen. Hacuaha cafani nangui. Hacuaha cavacjan ndyojo. ⁵² Hacuaha hora vêhê ni ne, catuxaha tsjun rê nima, hane jemu cjín xuta xi tyjahi cjuatacun rê me xcun Nina ne, cavuya cjuahñu rê me. ⁵³ Cavetjun xuta jan tsêhê tsjun. Hane hya xi ha cavuya cjuahñu rê Jesús ne, sehe cavisehen me nandya Jerusalén

hane ngajan ne, cjín xuta ne, cavêê rê me.

⁵⁴ Hora xi cahme Jesús ne, cha capitán tsêhê cha sindadu cojo yahnga sindadu xi hinchacun me ngajan vutsejensun me Jesús ne, camachaya rê cha xi fani nangui cojo cjín xcusun sa xi cavatju camá. Hane jercu quijircun camaha ni rê cha. Hacuaha cachja cha cuitjin:

—Hacui jain me vihi xi Quihndi Jain rê Nina, me.

⁵⁵ Hacuaha ngajan ne, tsêhê cjín ne hinchacun cuaha cjín yachjin xi tivutsejen me. Yachjin jan ne quijitjengui me Jesús xi cuisecoo me Jesús, sahmi cuenda me. ⁵⁶ Ngajñi yachjin jan ne, hinchajñi na xi cuicun vi: na María na Mág-dala, hacuaha na María naa rê Jacobo cojo José, hacuaha cojo naa rê cha quihndi rê Zebedeo.

Caseya nima Jesucristu cahntsua tsjun

⁵⁷ Hya xi cajne hora ne, ngu cha nchina xi hmí rê José, ngu xuta Arimatea cha xi hacuaha xuta ladu rê Jesús cha. ⁵⁸ Cha vêhê quiji cha xcun Pilatu, cafehya cha cahndê sá xi cuma cjua-haxin cha nima Jesús. Hane Pilatu ne, casua me cha cahndê. ⁵⁹ Ngajan xi caphatsja cha nima jan ne, sehe catsitjengui rê cha tsjian tyjahi, sacuaha xcusun rê me. ⁶⁰ Sehe caveya cha nima cahntsua ngu tsjun xatsê rê suva cha xi ha casahmi cha xi camá catjuhngui rê taha naxi. Sehe catsindefajne cha ngu ndyojo jyê xi cuechja rê tingotjo rê tsjun jan. Hya xi camá casahmi cha ne, quiji cha cojo xuta ra. ⁶¹ Peru na María na Mág-dala cojo na María xi hacjahi ne, caviyujutaha na xcun tsjun.

Cha sindadu siu cuidadu cha tsjun

⁶² Hya xi cumá nchujun ni ne, hya nixtin xi cjuahajenda rê me ne, hya camatangun nahmi xi matitjun cojo cha

partidu fariseo sehe cachja cha cojo Pilatu. ⁶³ Cuitjin cachja cha tsêhê Jesús:

—Nai, ngayin ne vitsjen niji xi hya xi chaja sa cueya cha cachja cha ndacha vê cuitjin: “Cahntsua jyan nixtin ne, cuya cjuahñu naha.” ⁶⁴ Ngatsê rê vêhê ne, meje rê xi nihñu cuendun xi sehñu ndaja tsjun rê cha hisca xi ha cavatju jyan nixtin jan, cojo sa xi cumaji nduva cha ladu rê nima vê ne, cjuahaxin cha nima tsêhê tsjun jan, sehe cuichja cha xi cavuya cjuahñu rê nima. Cuatjin nihñu ta tsêhê xi sá xi cuatjin sahmi cha, hisca hitsê sa choho cuatjuun cumá.

⁶⁵ Ngajan xi cachja Pilatu cojo rê me cuitjin:

—Sacu nuju sindadu jan xi sahmi cuidadu rê tsjun, sehe tanguncujun ne, hacuaha ndaja techjunhñu tsjun vê ha-cutjin cuma xi nihñu.

⁶⁶ Sehe quiji me cojo sindadu jan, cavechjahñu me tsjun, cojo sa xi cumat-sejen sa xi cuaxê cha nima, hacuaha caviyuju cha sindadu xi sahmi cuidadu rê.

Cavuya Jesucristu cjuahñu

28 Xi cavatju nixtin xi chjahájenda rê jan ne, xi tu casahasen ni tsêhê nixtin ngu tsêhê totje ne, na María na Mágdala jan cojo na María xi hacjahi ne, cavetju na quiji vutsejen na xcun tsjun rê nima Jesús. ² Hya xi camá ne, jercu cafani nangui ta tsêhê xi candu-vajne ngu ángel rê Nina tsêhê ngahnga. Hane ángel jan ne, quiji catsivahaxin ndyojo xi cavechja rê tingotjo rê tsjun jan, sehe cavejña xcun. ³ Ángel jan ne, sacuaha ndihi chuhun ne, cuatjin jy-ihí ángel. Hacuaha tsjian rê ne, jemu tu tyava camahani jyihí, sacuaha jyihí hnchan xi hmí rê nieve. ⁴ Xi camachaya rê me tsêhê ángel jan ne, jemu catsacjun sindadu xi siu cuidadu ngajan, hisca cafatsê hnchan cha hisca sacuaha cahme yojo ra cojo chircun. ⁵ Ngajan xi

cachja ángel cojo yachjin xi siutaha jan cuitjin:

—Xicarcuun. Ha hvê xi Jesús vinchun-sun me, me xi cavetaha xuta xcun cru. ⁶ Me vêhê ne, tsajin me nguehe ta cavuya me cjuahñu sacuaha cachja me. Nduvun chutsujun cahndê hiscan cafaña me. ⁷ Quihndê ne tangun sanii ne, tuhuncuendun rê xuta ladu rê me cuitjin: “Ha cavuya cjuahñu rê me; hane cjue titjun me tsujun Galilea. Hane ngajan sacu xinguen.” Hindê ne, vêhê cjua xi cuichjá cojo nuju.

⁸ Hya xi camá ne, cavetju quiji yachjin jan. Jercu quijircun rê na peru hacuaha jercu ndama rê na. Cuatjin quiji na xi suacuenda na xuta ladu rê Jesús tsêhê cjua xi cachja ángel. ⁹ Hane hora xi tifi na ndiya ne, Jesús ne cavechutaha me na jan, casua me na nina. Sehe chjuun jan ne, cafehetiña na tsêhê Jesús, caticjaxcun na cafaha na ntsacu Jesús hane capharcun na me. ¹⁰ Hya xi camá ne, Jesús ne, cachja me cojo na cuitjin:

—Xicarcuun. Tangun tuhuncuendun rê hermano naja, tinújun cojo me xi cjue me distritu Galilea. Hane ngajan sacu xinguen.

Cjua xi casua sindadu

¹¹ Jinguyêjê rê xi quiji yachjin jan ne, ngujo cha sindadu jan cavisehen cha nandya Jerusalén, casuacuenda cha nahmi xi matitjun tsêhê xcusun xi camá. ¹² Sehe nahmi jan ne, hya xi ha camátangun me cojo xuta changá hane cavisiajmi cjin me tsêhê mé xi sahmi me. Hane xi cama chihin cjua ne, jemu cjin camahani tujún casua me cha sindadu jan, ¹³ hacuaha cachja me cojo sindadu cuitjin:

—Vihi cjua xi cuinújun ni. Cuinújun ta xuta ladu rê me ne, nguixun ne, hora xi catsuñufun ne, cafehe me. Hane tahahma ne catsichêjê me nima. ¹⁴ Hane sá xi cumachaya rê gobernador

tsëhë cjuja jan ne, ngayin ne, cuanguin cuinújin cojo rë me cojo sa xi cuijnecacun me tsajin mé sahmi me cojo nuju.

¹⁵ Cuatjin camá xi cafhatsja cha tujún jan, hane cachja cha sacuaaha cavitexa nahmi jan. Cjua vëhë ne, cavitsojo ngajñi rë xuta nangui Israel. Hane cuatjin chja cjuja hisca nixtin quihndë.

Jesús ne, casuaxa me xuta ladu rë me xi cjue cuichja me cjuja rë Nina

¹⁶ Hya xi camá ne, xuta ladu rë Jesús xi má tengu me ne, quiji me distritu Galilea, hisca naxi xi cachja Jesús.

¹⁷ Hya xi camá ne, ngajan cavëë me Jesús ne, cafharcun me me. Peru ngujo ni me macjaain rë me. ¹⁸ Ngajan xi ca-

matña Jesús tsëhë me, cachja me cojo me cuitjin:

—Ha cafhantsa ngahñu xi cumá sahme tu mé ni xcusun sá xi tsëhë ngahnga o sá xi tsëhë ngasunhndë. ¹⁹ Ngatsë rë ngahñu vëhë ne, tsingátju nuju ne, tangun jinguyëjë rë nandya ngasunhndë, cuinújun cojo xuta jan cojo sa xi cuisehen me ladu naha. Catiseyanangui ñihi rë Nina Nahmi, cojo ñihi naha, Quihndi rë Nina, cojo ñihi rë Hasen rë Nina hora xi xtenda me. ²⁰ Hacuaha ticuyun rë me xi cuihndë me ne, sahmicihin me yëjë xcusun xi cavitëxa nuju ngahan. Hane xi cuatjin ne, hacuaha cuitejñacuaha cojo nuju yëjë ni hora hisca cuijnetaha nixtin rë ngasunhndë.

Cjuandajyihi xi catsihindu San Marcos Tsëhë Jesucristu

Juan ne, vitenda rë xuta ngajan ngu xín tsëhë nandya

1 Cuitjin cavetsihin cjua tsëhë Jesu-cristu, me xi Quihndi rë Nina Jain.

² Isaías ne, ngu xutachanga xi cama cafaha cjua rë Nina hacuaha cachja me cojo xuta hatsëë nixtin. Cuitjin catsihindu me, hacutjin cachja Nina cojo me: Tsingátju titjun ngu cha xi cjuaha cjua naha, cojo sa xi scuxaha cha cjuatacun rë xuta, tsëhë xi cjuehe ngaye.

³ Hane hiscan jemu xín tsëhë nandya ne, ngajan cuejña cha. Hane cuitjin cuichja cha:

“Sacuatjin matyjahi ndiya hya xi nduva ngu xuta rcun ne, cuatjin nihñu tyjahi cjuatacun nuju tsëhë xi cuinduva me xi matitjun tsajan.” Cuatjin cuichja cha.

⁴ Sacuatjin jain catsihindu Isaías ne, cuatjin jain camá ta cafehe cha xi catsingatju Nina, cha xi hmí rë Juan, ngajan hiscan jemu xín tsëhë nandya. Casua cha camachaya rë xuta ta meje rë xi tsindeya me cjuatacun rë me hacuaha xtenda me, cojo sa xi tsinchataha Nina me tsëhë jyë rë me. ⁵ Hane jercu cjin xuta quijitjengui me cha, xuta tsëhë distritu Judea cojo nandya Jerusalén. Hane cavitenda cha me xi cavijacun jyë rë cojo Nina ngajan ndajyë Jordán.

⁶ Tsjian rë cha Juan jan ne, tsja rë chu camellu camá. Cojo ngu cinturón chuxin quitaha cahntsua cha. Xi camá niñu rë cha ne, chu nchahva. Cojo tsjen rë chu tusen cahvi cha. ⁷ Cuitjin cachja cha:

—Canduvá ngahan titjun. Peru sehe cuinduva ngu me xi hitsë sa vechu cjuatacun rë xi cumá ná ngahan, xi hisca

chuxinxhtë rë me cumaji tsinguissehercu sahme tyjahi. ⁸ Ngahan ne, tu cavitenda ni nuju. Peru me vëhë ne, cueya me Hasen rë Nina cahntsua xahasen nuju.

Jesús ne, caxtenda me

⁹ Sacuaha nixtin vëhë ne, cavetju Jesús tsëhë nandya Nasaret, distritu Galilea. Quijitjengui me cha Juan xi cuitenda cha me. Hane cavitenda cha me ngajan ndajyë Jordán. ¹⁰ Xi camá caxtenda me ne, xi tu tivetju me tsëhë nandan jan ne, cavëë me xi ngahnga ne tituxaha, hacuaha Hasen rë Nina ne, nduvajne sacuaha tsejen ngu paloma, quiji cavisehen cahntsua xahasen rë me. ¹¹ Hacuaha canuhya rë ngu cjua ngajan ngahnga xi chja cuitjin:

—Ngaye ne, quihndi naha ngaye. Jercu hmucacun ri. Jercu ndama ná ngatsë riji.

Jesús ne, cafahachuva xitsehen me

¹² Ngajan xi Jesús ne, ngutjen ni quiji me ngajan ngu xín ta tsëhë xi Hasen rë Nina ne, cavaxëxin rë me. ¹³ Casetaha me ngajan xín yachan nixtin. Hacuatjin cojo Satanás quijitjengui rë me. Hane handasa jercu cavangui Satanás chuva rë xi choho sahmi Jesús ne, peru casahmii me. Hacuaha quiji ángel caviyujutaha xi cjuahacuenda rë me.

Jesús ne, vetsihin me cojo xa rë me

¹⁴ Hacuaha camá nga ngu xcusun xi xuta xi matitjun ne, caveya me cha Juan ndavaya. Cavatju vëhë ne, sehe cavuya cafe nga Jesús distritu Galilea, cachja me cojo xuta cjua rë Nina. ¹⁵ Cuitjin cachja me:

—Camatiña nixtin xi Nina ne, cuitexa me ngasunhndë. Vëhë xi meje rë xi nindeyun cjuatacun nuju hacuaha cata-macjain nuju cjua xi tichjá cojo nuju.

Jesús ne, cajindaya me ñuju cha xi tsuva rê chu ti xi cuma cha ladu rê me

¹⁶Nixtin xi catsuyihiya me hya ne, cavatju me tjehe laguna tsêhê Galilea. Hora hya ne, cavêê me cha Simón cojo cha Andrés hntsê cha. Titsingatjenya cha nahya ngajni laguna jan, tsêhê xi ha tuxa xa vêhê sahmi cha. ¹⁷Hane ngajan xi cachja me cojo cha ta:

—Nduvun cuanguen cojo ná. Hane cuicuyá nuju xi nuvun xuta xi cuisehen me ladu naja ngojo rê xi chu ti nuvun. —Cuatjin cachja me.

¹⁸Hane hora vêhê ni caviyuju cha nahya jan ne, quiji cha cojo me. ¹⁹Ha xcun xi ha cjuí Jesús cojo cha xi cuacun jan hitsê ni nguvan ne, cavêê me cha Jacobo cojo cha Juan hntsê cha, quihndi rê Zebedeo. Hinch cha cahntsua barcu, tifuyataha cha nahya. ²⁰Hane hacuaha cajindaya me cha. Sehe caviyuju cha nahmi rê cha xi hmí Zebedeo cojo mosu rê me ngajan cahntsua barcu. Sehe quiji cha cojo Jesús.

Ngu cha xi jiya rê ngu xitsehen

²¹Hya xi camá ne, cafehe me cojo cat-siñuju cha xi cuacun vêhê nandya Capernaum. Hane hya xi cavechu nixtin xi chjahájenda rê ne, quiji me yungun, caviyuya me xuta. ²²Hane xuta jan ne, quijircun rê me hacutjin vicuya Jesús ta, tsêhê xi tivicya me sacuaha ngu xi matitjun jain, hacuiin sacuatjin maestru xi vicuya ley rê xuta tsêhê nangui Israel. ²³Hacuaha ha tu ñahñu canduva ngu cha xi jiya xitsehen cahntsua xahasen rê cha ngajan cahntsua yungun jan. ²⁴Hane cuitjin cajindaya cha:

—Ngayun ne, ¿mé cuenda nuju tsi-jin? ¿Há nduvun nicjun niji? Ngayun ne, Jesús tsêhê nandya Nasaret ngayun. Hacuaha hvê xi ngayun xi tsajin jyê nuju ngayun xi catsingatju nuju Nina.

²⁵Hane Jesús ne, cachja cjan me cojo xitsehen xi jiya xahasen rê cha jan. Cuitjin cachja me:

—Jyuu nechin. Hacuaha tetjixin tsêhê cha vi.

²⁶Xi tu cahmexcuen cha xi casahmi xitsehen ne, hisca cajindaya, hane cavetjuxin tsêhê cha. ²⁷Yêjê ni xuta jan ne, jemu quijircun rê me, hisca cavisiajmi me cojo xicjin me cuitjin:

—¿Mé nga xcusun vihi ni? Ngu cjua xatsê xi vicuya me vihi, ta hisca xitsehen, hacuaha hndê tsêhê me.

²⁸Hacuaha marcu macjain canuhya rê tsêhê me jinguyêjê ni ladu tsêhê distritu Galilea.

Jesús ne, sahmi me xi mandaja nahya rê Simón Pedru

²⁹Hya xi camá ne, cavetju me yungun jan, quiji me ndava cha Simón. Quiji me cojo cha Jacobo cojo cha Juan, hacuaha cojo cha Andrés hntsê cha Simón. ³⁰Hane nahya rê cha Simón ne, jiña na xi hmu rê na cojo chihinsuê. Hane ngutjen cachja cha cojo Jesús xi hmu rê na. ³¹Ngajan xi quiji tiña Jesús hiscan jiña na, cafaha me tsja na, cat-sisatjen me na. Hane hora vêhê ni, casejyu suê xi má rê na. Hisca cafaha cuenda na xi sinê me cojo xicjin me.

Jesús ne, sahmi me xi mandaja xutacjín xi hmu rê

³²Hane xi cavetje tsuhi ne, jemu cjín xuta quijicojo me xuta hmu rê hiscan tacun Jesús, hacuaha cojo me xi hinch xitsehen xahasen rê, ³³camatangun me cojo xuta nandya ngajan tingotjo ndihya. ³⁴Hane jemu cjín xuta hmu rê camandaja me xi casahmi Jesús, xuta xi má rê me tu mé ni chílin xi má rê xuta. Hacuaha jemu cjín xitsehen cavaxëxin me tsêhê xahasen rê xuta. Hane casuaain me cahndê xi cachja xitsehen ta tsêhê xi

ha vëë rë me. Hane ngutjen cuichja ta me vëhë xi catsingatju Nina me.

**Jesús ne, sua machaya rë xuta
cjua rë Nina ngajan yungun**

³⁵ Xi camá nchujuni, jñu sa nguitajñu cavisatjenhnga me. Hane cavetju me ndihya quiji me ngu cahndé hiscan xin. Hane ngajan cavisiajmi me cojo Nina. ³⁶ Ngajan xi cha Simón cojo cha xi yahnga jan ne, cavanguise cha Jesús. ³⁷ Hane xi casacu rë cha me ne, sehe cachja cha cojo me ta:

—Jemu cjin xuta cafehetjengui nuju me. —Cuatjin chja cha.

³⁸ Ngajan xi cachja me cojo cha ta:

—Cuanguen sa nandya xi siu tahndee, cojo sa xi hacuaha cuichjá cojo xuta vëhë cjua rë Nina ta tsëhë xi xa vëhë canduvá. —Cuatjin cachja me.

³⁹ Hane sehe quiji sa me yungun xi siu yëjë ni nandya tsëhë Galilea. Cachja me cojo xuta cjua rë Nina, hacuaha cavaxëxin me xitsehen xi hinchá xahasen rë ngujo xuta xi siu nandya jan.

**Jesús ne, sahmi xi mandaja ngu cha
xi ma rë chíhin xi vitaha rë yojo naja**

⁴⁰ Hya xi catsujyihya me nandya xi cuacun vëhë, hya cachja ngu cha xi yaha rë ngu chíhin vitaha xi setaha chuxin naja. Hane cachjajyë cha cojo Jesús, hisca cavixcuhnchi cha xcun me, sehe cachja cha cuitjin:

—Sá xi nihñu favor ne, cuma nax-unxun chíhin xi yaha ná.

⁴¹ Jesús ne, camayuma rë me cha. Hane cavetahatsja me cha. Sehe cachja me cojo cha cuitjin:

—Joho. Ha camandaja ngaye. —Cuatjin cachja me.

⁴² Hane ngutjen ni cavetjuxin chíhin jan ne, camandaja cha. ⁴³ Hane sehe casua me cha cuidadu. Hane ngutjen ni catsingatju me cha, quiji cha. ⁴⁴ Cuitjin cachja me:

—Ndaja cuidadu xi canujiin camahani xcusun vi cojo hisca ngu. Peru tihin ningacuin yojo riji cojo nahmi ngajan yungun. Hane tejñi ngu cjuatjo sacuatjin chja ley tsëhë Moisés ta camandaja ngaye, cojo sa xi xuta ne, cumacjain rë me. —Cuatjin cachja me cojo cha.

⁴⁵ Peru xi cavetju cha quiji cha ne, cavetsihin casua cha camachaya rë xuta. Jercu cachjaté cha tsëhë xcusun vëhë. Vëhë xi Jesús ne, ha quihndé caviisiin me nandya ta tsëhë xi ha ngutjen jercu tsë xuta. Hane ngajan ni nguijná casetaha me. Peru xuta ne, yëjë ni ladu cavetju me, quijitjengui me Jesús.

**Jesús ne, sahmi me xi mandaja
ngu cha xi cahme yojo rë**

2 Hane cahntsua xi ngujo nixtin ne, cavuya quiji nga Jesús cojo cha ladu rë me ngajan nandya Capernaum. ² Hane xi casacu cjua xi tacun ndihya me ne, jercu camatangun xuta, hisca tingotjo ndihya quitsë me. Hane sehe cachja Jesús cjua rë Nina. ³ Ngajan xi canduva ñuju cha hiscan tacun Jesús, yahahnga cha ngu cha xi cahme yojo rë. ⁴ Hane xi maji ficojo cha cha hisca hiscan tacun Jesús, tsëhë xi jemu quitsë xuta ne, cavuxaha cha rcu ndihya quixi rë hiscan tacun me. Sehe ngajan catsinguisehen cha cha hmu rë jan cojo ni nachan xi quisun cha. ⁵ Hya xi cavëë Jesús hacutjin xi macjain rë cha me ne, sehe cachja me cojo cha hmu rë jan ta:

—Jyë riji tsan ne, ha camanchataha. —Cuatjin cachja me.

⁶ Hora vëhë ne, hacuaha tivisiñuju ngujo cha maestru tsëhë ley, hacuaha taha titsingatahacacun cha cuitjin: ⁷ “¿Mé má cuitjin chja cha xi cuijyivi vi?, ta Nina tsixcuehyu cha. Tsajin yo xi cuma tsinchataha jyë rë ngu xuta ta suva ni Nina má sahmi me.” ⁸ Jesús ne, ha hisca vëë me cojo cjuatacun rë me xi

cuatjin tsingatahacacun cha xi cuacún vë, hane sehe cavinenguisse me cuitjin:

—¿Mé má cuatjin ningatuhuntacun cjuatacun vëhë? ⁹ ¿Jarë xi hitsë sa tsavi xi cuichjá cojo cha hmu rë vi? ¿Há xi: “Jyë riji ne, ha camanchataha?” O há tsajin ne, ¿há xi: “Tisatjinhngue ne, ch-jaye nijña riji, hane tjihin?” ¹⁰ Hindë cojo sa xi cumachaya nuju xi Nina cavitexa me ngahan xi tsinchátaha jyë rë xuta nguehe ngasunhndë ne, nguehe chutsujun hacutjin cuichjá cojo cha hmu rë vi.

Sehe cachja me cojo cha hmu rë cuitjin:

¹¹—Tisatjinhngue tsan. Chjaye nijña riji ne, tjihin ndya riji. —Cuatjin cachja me.

¹²Ngajan xi cha hmu rë jan ne, ngut-jen ni cavisatjenhnga cha, cafaya cha nijña rë cha, sehe cafe cha xcun ni ngayëjë xuta. Vëhë xi ngayëjë ni xuta jan ne, jemu quijircun rë me. Hacuaha cachja me ta:

—Jemu cjuarcun jain Nina. Vëhë xi cuatjin camá casahmi me. Cjëë camahani chaan xcusun sacuahha vëhë. —Cuatjin cachja xuta.

Jesús ne, jindaya me Leví xi má me xuta ladu rë Jesús

¹³Ngu nixtin nga ne, cavatju Jesús tje-hen laguna. Hane jemu cjín xuta quijit-jengui rë me. Hane cavicuya me xuta jan.

¹⁴Hane hya xi cjui cjui me ne, cavechu me hisca tacun cha Leví, quihndi rë cha Alfeo. Tacun cha ndihya hiscan faha cha xi machjitje tsëhë xi xteña. Sehe cachja Jesús cojo cha cuitjin:

—Cuanguen cojo ná.

Hya xi camá ne, cavetju cha, quiji cha cojo me.

¹⁵Cuitjin camá nga ngu nixtin jan, tijinë Jesús niñu ndava cha Leví. Hacuaha jemu cjín sa cha xi faha tujúnsa cojo jingu sa cha tsehen tijinë cha cojo Jesús

cojo cha ladu rë me, ta hacuahha jemu cjín xuta xi cuacún vë xi tjengui rë me. ¹⁶Peru cha maestru tsëhë ley cojo cha tsëhë partidu fariseo ne xi tu cavëë cha xi tijinë Jesús cojo cha xi cuacún jan ne, sehe cavinenguisse cha cojo cha ladu rë me cuitjin:

—¿Mé má cuatjin tijinë Jesús cojo cha xi choho xcusun rë vë ni?

¹⁷Xi tu cahndë Jesús cjuar rë cha ne, sehe ngajan xi cachja me cojo cha ngu ejemplu cuitjin:

—Xuta xi hacuiin hmu rë me ne, miji rë me doctor. Me xi hmu ni rë me ne, me vëhë xi mameje rë me. Hacuaha ha chuva vëhë ni canduvá ngahan. Canduvá cuanguë xuta xi choho cjuatacun rë, cuichjá cojo rë me cjuar rë Nina. Peru hacuiin cojo me xi ha tyjahi cjuatacun rë. —Cuatjin cachja me.

Vinenguisse xuta tsëhë xun rë Nina

¹⁸Camá xi cha ladu rë cha Juan cojo cha tsëhë partidu fariseo ne, nixtin hya ne siu cha xun tsëhë Nina. Hane cafehe ngujo cha xi cavinenguisse rë Jesús cuitjin:

—¿Mé má cha ladu rë cha Juan cojo cha tsëhë partidu fariseo ne, tijinii cha quihndë ta, siu cha xun rë Nina, hane cha ladu nuju ne, faharcuiin cha cuatjin ni?

¹⁹Sehe catsicuya Jesús cjuar cojo ngujo ejemplu cuitjin:

—Jinguyëjë rë xi cha xi cuixan ne, tacun cha cojo xuta rë cha ne, cumaji cuiyuju me xun rë Nina. ²⁰Peru cuinduva nixtin hya xi cha xi vixan ne, cojo cjuachan cjuccojo condra rë cha cha. Hane hya cuiyuju xuta rë me xun rë Nina.

Ejemplu tsëhë tsjian cojo chuxin xi xinchaxan

²¹Hacuaha cachja me cojo cha cuitjin: —Tsajin yo xi fuyataha tsjian changá cojo ngu rquí tsjian xatsë ta tsëhë xi cjëë

cjueyu. Cuatjin ta, sá xi cuatjin sahmi me ne, xi cjueyu tsjian xatsë jan ne, cuicheya rë tsjian xi changá jan hane sahmi jyë sa rë hiscan xi ntsun. ²² Hacuaha tsajin yo xi vincha xan xatsë cahntsua chuxin changá ta, sá xi cuatjin sahmi me ne xan jan ne, tsitsinga rë chuxin jan. Hane xan jan ne, chajan. Hacuaha cuetsun chuxin jan. Vëhë xi xan xatsë ne meje rë chuxin xi xatsë. Maji secjan jo xcusun.

Cha ladu rë Jesús ne, fane cha trigu nixtin xi chjahájenda rë

²³ Cuitjin camá nga ngu nixtin xi chjahájenda rë. Hora xi tivatju Jesús cojo cha ladu rë me hiscan tjin tjë trigu ne, cavetsihin cavotohosun cha tsë tsë trigu jan. ²⁴ Sehe cha tsëhë partidu fariseo cavinenguise cha me cuitjin:

—¿Mé má cuatjin quihndë nixtin xi chjahájenda rë ne, sahmi cha ladu nuju xa xi chja ley xi cumaji nihña?

²⁵ Sehe Jesús ne, cafayangui me tsëhë cha cuitjin:

—¿Há cjëë camahani chutayun xujun hiscan chja tsëhë xcusun xi casahmi David hya xi tjin rë me cjuandya xi jemu vojo rë me cojo cha xi siutaha cojo me? ²⁶ Hya xi Abiatar má me nahmi xi matitjun jan ne, hya cavisehen me ndava Nina. Hane David ne, cajiñë me pan xi viyuju xcun Nina. Hacuaha casua me cajiñë cha xi siu cojo me. Cuatjin casahmi me handasa xi chja ley ta suva ni nahmi tjin cahndë xi cuma sinë me pan xi cuacún vë. —Cuatjin cachja Jesús.

²⁷ Ngajan xi cachja me cojo cha ta:

—Xi má nuju ngayun ne, ¿há titjun cavejña Nina nixtin xi chjahájenda rë, sehe catsindaja me xuta xi cjuaharcun rë nixtin vëhë? ¡Hacuiin cuatjin camá! Nina ne, titjun catsindaja me xuta, hane xi camá ngascan ne, cavajña me nixtin xi cjuahajenda xuta. ²⁸ Cuatjin ne, ngahan xi tsëhë Nina canduvá ne, hacuaha satë ná ngahan sacuaha nai rë xi cuichjá mé

xi ndatjin xi cuma nixtin xi chjahájenda rë. —Cuatjin cachja Jesús.

Jesús ne, sahmi me xi cama ndaja ngu cha xi quixinhñu ngu ladu tsja cha nixtin sabadu

3 Ngu nixtin nga xi quiji Jesús ngu yungun ne, ngajan tacun ngu xihin xi quixihñu ngu ladu tsja cha. ² Hane cha tsëhë partidu fariseo ne, cojo sa xi cuma cuinchajyë cha Jesús ne, siu cha cuidadu, ¿há tsindaja Jesús hiscan hmu rë xihin jan nixtin xi chjahájenda rë? ³ Hane ngajan xi cachja Jesús cojo cha xi quixihñu tsja jan cuitjin:

—Xcun ni yëjë xuta vi ne, tisechin.

⁴ Sehe cavinenguise me xuta xi siu me cuitjin:

—¿Mé xi sacu cahndë nixtin xi chjahájenda rë? ¿Há xi ndaja ne, o há xi ndajin, há xi naxentjen xuta o há xi niquen me?

Peru cafayinnguini me hisca hitsë.

⁵ Vëhë xi Jesús ne, cama cjan rë me. Hacuaha cama vacacun me ta, tsëhë xi sahmi yumahasen xuta. Xi tu cavutsejen Jesús yëjë ni xuta ne, sehe cachja me cojo xihin hmu rë jan cuitjin:

—Nixingun ntsun.

Xi tu catsixinga cha tsja cha ne, ha camandaja. ⁶ Ngajan xi cha tsëhë partidu fariseo ne, cavetju cha yungun. Quiji casahmitangun cha cjua cojo cha tsëhë partidu Herodes xi tsiquehen cha Jesús.

Xutacjín xi camandaja me

⁷ Ngajan xi Jesús cojo cha ladu rë me ne, quiji nga me laguna. Hacuaha jemu cjín xuta tsëhë distritu Galilea quijitjengui me Jesús. ⁸ Hane xi camachaya rë xuta xcusun xi casahmi Jesús ne, canduva camaha sa xuta tsëhë cahndë xi cuicun vi: nandya Jerusalén cojo yëjë sa nandya tsëhë distritu Judea, cojo distritu Idumea, cojo ngunda vëhë tsëhë ndajyë Jordán cojo hisca tahndee rë nandya Tiro cojo nandya Sidón. ⁹ Sehe ngajan xi

cachja me cojo cha ladu rë me ta meje rë xi cuejña cha ngu barcu tiña hiscan tacun me, ta jemu cuehnnchun xuta me.

¹⁰ Hane tsëhë xi jemu cjin xuta camandaja me xi casahmi Jesús ne, vëhë xi yëjë ni me xi hmu rë catsëxti me ne, cojo sa xi ndastu satë tsja me Jesús. ¹¹ Hane xi cavëë xitsehen xi hinchaxahasen rë xuta jan Jesús ne, quiji caticja xuta jan hisca tacun Jesús. Sehe ña jindayatë xuta jan, ta xitsehen casahmi xi cachja me cuitjin:

—Ngayun xi Quihndi rë Nina ngayun. —Cuatjin cajindaya me.

¹² Ngajan xi Jesús ne, cavitexa me xitsehen xi tsajin yo cuichja cojo yo me.

Jesús ne, vuxijin me tejó me xi cumá apóstol

¹³ Hya xi camá ne, camiji Jesús ngu naxi. Sehe catsingatju me cjua rë cha xi meje rë me. Hane quijitjengui cha me. ¹⁴ Hane cavaxijin me tejó cha xi cuisecoo rë me, hane hacuaha tsingatju me cha cjue cuicuya cha xuta cjua rë Nina, ¹⁵ hacuaha cuaxëxin cha xitsehen xi hinchaxahasen rë xuta. ¹⁶ Cha xi tejó tsëhë cha ladu rë me cuitjin hmí ra: cha Simón ne, hacui cha xi cachja Jesús xi hmí rë Pedru, ¹⁷ cha Jacobo cojo cha Juan hntsë cha ne, xi quihndi rë Zebedeo, cha xi casuañilhi me Boanerges, ngu ñihi xcuehyu xi meje cuichja Jemu Xti Naja, ¹⁸ cha Andrés, cha Felipe, cha Bartolomé, cha Mateo, cha Tomás, cha Jacobo, quihndi rë Alfeo, cha Tadeo, cha Simón xi tsëhë partidu cananayu, ¹⁹ hane cha Judas tsëhë nandya Querrote, cha xi cuiteña rë Jesús cojo condra rë me.

Jyé xi cumajin cumanchataha

²⁰ Hya xi camá ne, cavuya quiji nga Jesús ndihya hiscan véjña me. Hacuanitjin nga camatangun xuta cjin. Hisca xi sinë Jesús niñu cojo cha ladu rë me maji. ²¹ Hya xi camachaya rë xuta rë

me cjua vëhë ne, quiji me xi cuaxëxin rë me, tsëhë xi há sa má rë me, sca rë Jesús.

²² Hane cha maestru tsëhë ley ne, canduva cha tsëhë Jerusalén. Sehe cavisiajmi cha cojo xicjin cha cuitjin:

—Jiya Satanás xahasen rë me. Hane ngatsë rë xitsehen xi matitjun vë ne, vëhë xi ma vaxëxin Jesús xitsehen. —Cuatjin cachja cha.

²³ Ngajan xi casahmi tangun Jesús cha xi cuacun vëhë ne, sehe cojo ngujo ejemplu cachja me cojo cha cuitjin:

—Jemu yuma hasen rë Satanás sá xi suva ni cuaxëxin xicjin. ²⁴ Ha hyan ta sá xi xutaxa rë tsëhë ngu nandya scaan me ngajni rë me ne, cjuicanii rë me. ²⁵ Hacuaha sá xi xuta xi ngu ndava me ne, scaan me ngajni rë me ne, ngajan chaja. ²⁶ Ha cuanitjin rë Satanás ta sá xi scaan cojo xicjin ne, ha quihndë cumachjiriin xi matitjun ta, tsëhë xi ha quihndë cuihndiin xicjin tsëhë.

²⁷ Hacuanitjin ne, hisca ngu cha chëjë cumaji tu cuisehen ni cha ndava ngu xuta xi hñu ngahñu rë me xi tsichëjë cha tsëhë me. Cumaji sa xi hacuiin titjun tsihñu cha me ta cuatjin xi cuma tsichëjë cha tsëhë me.

²⁸ Cuichjá cojo nuju cjuaquixi ta tu mé ni jyé xi sahmi xuta hacuaha tu mé ni cjua xi choho cuichja me ne, sacu rë me cjuaninchataha, sá xi cuijacun me jyé rë me cojo Nina. ²⁹ Peru tu yo ni xi choho cuichja tsëhë Hasen rë Nina ne, tsajin ngu nixtin xi sacu rë cjuaninchataha ta jemu jyé jyé rë.

³⁰ Cuatjin cachja Jesús ta tsëhë xi cachja cha jan xi jiya xitsehen xahasen rë me.

Naa rë Jesús cojo xicjin me

³¹ Hane cafehe naa rë me cojo hntsë me ne, ngajan ni ndatsen hinchacun me ne, catsingatju me cjua xi meje cuisajmi me cojo Jesús. ³² Vëhë ta jemu cjin xuta

siundee me Jesús ne, sehe cachja xuta cojo rë me cuitjin:

—Nutsujun ni. Ná nuju cojo tshun cojo tichjun ne, jindaya nuju me ngajan candatsen.

³³Sehe cafayangui Jesús cuitjin:

—¿Yo xi má nuju xi ná naha cojo xingueen?

³⁴Cavutsejen me xuta xi siundee rë me, sehe cachja me cuitjin:

—Ngayun xi nechun nguehe, ngayun xi sacuahá ná naha cojo xingueen ³⁵ta, tu yo ni xi sahmi sacuatjin chja Nina ne, vëhë xi sacuahá ná naha sacuahá xingueen.

Ejemplu tsëhë cha xi tsitjë

4 Ngu ndiya nga ne, cavetsihin cav-icuya Jesús xuta tjeheh laguna. Hane ngu cuatjin nga jercu tu catsë camahani xuta hiscan tacun me. Vëhë xi cavisehen me ngu barcu cavéjña me. Hane quijicojo rë me hitsë xcun nandá, ngajan cavéjña. Hane yëjë ni xutacjín jan ne, caviyuju me nangui quixí tjeheh nandan. ²Sehe cavicuya Jesús me jemu cjín cjua. Cuitjin cachja me ngu ejemplu:

³—Cuejña ni xi ngu xihin ne, quiji cat-sitjë cha trigu. ⁴Hane hora xi ticandi cha tjë rë ne, ngujo ne, cavixu ndiya. Hane canduva nisë ne, cajnë chu. ⁵Ngujo nga ne, cavixu hiscan xi jemu ndyojotë, hacuahá jemu chuva nihndë quisun. Hane jemu xati cavetju ta tsëhë xi hacuiin tjain nihndë quisun. ⁶Hane xi jemu suë camá ne, caxiya tsëhë xi jemu chuva tyjama rë. ⁷Ngujo nga ne, cavixu ngajñi rë nahyá. Xi tu camayehe nahyá ne, casahmihndë rë xitjë, hane camayiin. ⁸Hane ngujo nga ne, cavixu hiscan ndajjihi nangui. Vëhë ne, jemu ndaja camá, hisca yehe hnga camá ya rë. Ngujo ne jemu ndaja camá. Ngujo nga jan ne, hitsë sa ndaja camá. Hane xi yahnga jan ne, jercu vatjutaha ndaja camá. Cuatjin fi ejemplu tsëhë cha xi tsitjë trigu.

⁹Jarë ngayun xi meje nuju cuma nuju ne, ningatuhuntacun nduju mé vijne cjua vë.

¹⁰Hya xi café xutacjín jan ne, ngajan xi me xi siundee cuaha jan cojo cha xi tejó jan ne, cavinenguise me tsëhë cuentu jan. ¹¹Sehe cafayangui Jesús cuitjin:

—Ngayun ne casua nuju Nina cahndë xi vijne rcun cjuatahahma tsëhë gubiernu xi sahmi me. Peru me xi hacuiin ladu naja ne, cojo suva ejemplu tichjá cojo rë me, ¹²cojo sa xi handasa cuihndë me ne, peru cuijnii rcu me ta, sá tu tsindeya me cjuatacun rë me ne, hacuahá cumanchataha me. —Cuatjin cachja Jesús.

Jesús ne, chja me mé vijne ejemplu tsëhë cha xi tsitjë

¹³Sehe ngajan xi cachja Jesús cojo cha ladu rë me ta:

—Sá xi ha canuhyuun ejemplu vëhë ne, hacutjin cuinuhyun sa xi yahnga ni. Nguehe cuichjá cojo nuju mé vijne ejemplu xi cachjá cojo nuju vë. ¹⁴Cha xi tsitjë trigu ne, sacuahá ngu cha xi chja cjua rë Nina cojo xuta. ¹⁵Ngujo me xi vihindë cjua vëhë ne, sacuahá tjë rë trigu xi cavixu ndiya ta cjua ndajjihi xi vihindë me ne, ngutjen ni nduva Satanás ne, fahataha cjua xi caseya cahntsua xahasen rë me. ¹⁶Yahnga nga me xi vihindë cjua vëhë ne, sacuahá tjë xi cavixu hiscan jemu ndyojotë ta hya xi vihindë me cjua ndajjihi ne, ngutjen ni jemu cojo cjuasua macjain rë me cjua. ¹⁷Peru tsëhë xi hacuiin nguñaja cacun me macjain rë me ne, vëhë xi seyaain cahntsua xahasen rë me hya xi má cjuandya, sacuahá cumá rë tjë xi jemu chuva tyjama rë ne ta, cain rë xi jyë nixtin. ¹⁸Hane ngujo nga me xi vihindë cjua vëhë ne, sacuahá tjë xi cavixu ngajñi nahyá. Vihndë me cjua. ¹⁹Peru tsëhë xi jemu tjín rë me cjuandya hacuahá jercu meje rë me xi

cuma nchina me, vëhë xi chuva cuenda sahmi me cjuua ndajyihi xi cavisinuju me. Fë ne, tsajin mé vetjucaa. ²⁰ Ngujo nga me xi vihndë cjuua ndajyihi vëhë ne sacuaha tjë xi camatjë hiscan ndajyihi nangui ta xi tu vihndë me cjuua vëhë ne, faha nguñajacacun me. Vëhë xi ngujo me ne, ndaja cuiyujuchihin cjuatacun rë me. Ngujo nga me ne, hitsë sa ndaja cuiyujuchihin cjuatacun rë me. Hane me xi yahnga jan ne, jercu tu ndaja camahani cuiyujuchihin cjuatacun rë.

Ejemplu tsëhë lámpara

²¹ Hacuaha cachja me cojo rë me cuitjin:

—Hya xi setaha rë candil ne, ¿jani cuejña? ¿Há ngahma caxa ne? o ¿há ngahma nachan? Hacuini cuatjin nihñu ta, cuejña cahndë rë. ²² Sacuaha ndaja tsejen ndihi jan ne, hatuxa cuechu nixtin xi cuijne rcu xuta cjuua naha xi hacuini ndaja vijne rcun me quihndë. ²³ Jarë ngayun xi meje nuju cumá nuju ne, ningatuhuntacundujun mé vijne cjuua vë. ²⁴ Hacuaha cachja sa me cojo xutacjín cuitjin:

—Ndaja tetuhunrcun xi tivisiñuju. Chuva xi tuhun ne, ha chuva vëhë sua nuju Nina. Hisca quisun sa sua nuju me. ²⁵ Me xi ha tjin rë ne, sua sa Nina me, hane me xi tsajin cjín rë ne, cjuahataha Nina xi tjin rë me.

Ejemplu tsëhë tutjë xi majyë

²⁶ Sehe cachja Jesús cojo xutacjín jan ngu ejemplu cuitjin:

—Xuta xi cuisehen me ladu rë Nina ne, ha tuxa cumá cjín me sacuaha tjë tsëhë trigu xi tsitjë ngu xihin xcun nangui rë me. ²⁷ Fañafë cha nguixun ne, visatjenhnga cha nguítajñu. Hane tjë ne, vetju, hacuaha mayehe xitjë. Peru xihin jan ne, hvín hacutjin camá xi camayehe xitjë jan. ²⁸ Nangui ne, ha tuxa má xitjë. Titjun ne, cuetju xca rë. Xi cuijin sa ne, cuetju tú chihndë rë. Hiscan xi cuijne-

taha ne, jemu cjín tutjë rë cuetju. ²⁹ Hane hya xi camacha tutjë rë ne, sehe tsingatju xihin jan mosu xi cjue cuatë ta tsëhë xi ha cavechu nixtin xi xtí rë.

Ejemplu tsëhë tutjë rë mostasa

³⁰ Sehe cachja Jesús cuitjin:

—Nguehe cuichjá cojo nuju ngu nga ejemplu tsëhë gobiernu xi sahmi Nina. ³¹ Xuta xi cuisehen ladu rë Nina ne, cumacjín me sacuaha majyë ngu ya mostasa. Tutjë rë ya vëhë ne, hitsë sa langa xi cumá rë yëjë ni tutjë xi tjin ngasunhndë. ³² Peru hya xi matjë ngu ne, sehe cuetju xca rë hacuaha hitsë sa jyë má xi cuma rë yëjë ni xca xi chine. Hane tsja rë ne, hacuaha yehe, hisca nisë ma sahmi chu ndava chu xcun tsja rë hiscan tjahnguen.

Mé tsëhë xi Jesús ne, sahmixa me cojo ejemplu

³³ Jemu cjín ejemplu sacuaha vëhë cachja Jesús hya xi tivicuya me xuta cjuua rë Nina, hatucutjin hora xi cama cavetaharcu xuta. Hane cojo xuta ne, cachja me suva ejemplu. ³⁴ Peru hya xi suva siu cha ladu rë me ne, casua cuenda me cha mé vijne yëjë ejemplu jan.

Jesús ne, tsisejyu me tjo cojo tsindyu rë laguna

³⁵ Xi quiji hora tsëhë nixtin vëhë ne, Jesús ne, cachja me cojo cha ladu rë me cuitjin:

—Cuanguen ngunda vëhë. —Cuitjin cachja me.

³⁶ Ngajan xi caviyuju ni me xutacjín jan ne, sehe cha ladu rë me ne, quiji cha cojo me tu cuanitjin ni. Hacuaha cojo sa barcu xi yahnga jan ne, quiji tangun cojo rë me. ³⁷ Hora xi cjuí barcu ne, canduva ngu tjo xi jercu tu hñu camahani. Hane tsindyu rë laguna jan ne, vixuya cahntsua barcu, hisca meje tsë rë barcu cojo nandá. ³⁸ Hane Jesús ne, hisca cahncun

barcu jan jiñafë me, tijiña me xcun tsjian sanercu me. Hya xi camá ne, catsingasca cha me, sehe cachja cha cojo me cuitjin:

—Maestro. Xati nihñutacun catasca nuju. ¿Há tsajin mé cuenda nuju ta, meje xtyusehen barcu cojo naja?

³⁹Hane cavaasca rë me ne, cachja me cojo tjo cojo laguna cuitjin:

—Jyuu nechun.

Xi tu cachja me cuatjin ne, casejyu yëjë ni. ⁴⁰Ngajan xi cachja me cojo rë cha cuitjin:

—¿Mé má cuatjin jemu rcun? ¿Hacujyihni ni xi hisca cjëë cumacjain ndaja nuju ngahan?

⁴¹Hya xi camá ne, jercu catsacjun camahani cha ladu rë me jan. Hane sehe ngajñi rë cha jan ne, cavisiajmi cha cuitjin:

—¿Yo me xi cuijyihni vi? ta, hisca tjo hisca laguna hndë tsëhë me.

Cha tsëhë nandya Gadara xi jiya ra xitsehen

5 Hya xi camá ne, cafehe Jesús cojo cha ladu rë me ngunda vëhë tsëhë laguna, hiscan ladu rë xuta nandya Gadara.

²Hane xi cavetju me barcu jan, canduva tiña ngu xihin xi hinchaxitsehen xahasen rë, canduva cha tsëhë ngajñi rë tsjun ngajan tahndë. ³Hacuaha ha ngajan tacun cahndë cha tahndë. Hacuaha tjiñu cha xi sejyu cha hisca cojo cadena.

⁴Jemu cjan rë cha, cjín ndiya camahñu tsja camahñu ntsacu cha cojo cadena, peru tu cavicheya ni cha. Vëhë xi tsajin yo xi cama casahmi cojo cha. ⁵Catsujyihni cha nixtin nixten ngajan tahndë cojo ngajñi nguijña cha. Hane cajindayatëcjin ni cha, hacuaha cavanguihmucjin ni cha yojo rë cha cojo ndyojo.

⁶Hane hora xi cavëë cha Jesús ne, cjín sa nduva cha ne, vanga cha quiji cavixuhnci cha xcun Jesús xi cjuaharcun

cha me. ⁷Ña cajindayatë cha cachja cha cuitjin:

—¿Mé cuenda nuju tsahan, Jesús, Quihndi rë Nina xi matitjun? Catamaniji rë Nina xi tuhundyun ná.

⁸Cuatjin cachja cha ta tsëhë xi hatichja Jesús xi cuetjuxin xitsehen jan tsëhë xahasen rë cha. ⁹Sehe cavenguise me ñihi rë cha. Hane cafayangui cha tsëhë me cuitjin:

—Ñihi naha ne, Sindadu Cjín, tsëhë xi jemu cjín ngayin.

¹⁰Sehe jercu cafehya cha cojo Jesús xi hacuiin cjín camaha tsingatju me xitsehen jan tsëhë cahndë vëhë. ¹¹Jinguyëjë rë xi cuatjin tijima ne, ngajan tiñataha ne, tacun ngu cahndë hiscan chu chinga hinchataha chu tijinë chu. ¹²Hane xitsehen jan ne, ña yuma chja cojo Jesús cachja cuitjin:

—Ningatjun niji hiscan siutaha chinga, xi cuisihin cahntsua xahasen rë chu.

¹³Hane Jesús ne, johu cachja me. Hane hora xi cavetju xitsehen xahasen rë xihin jan ne, quiji cavisehen cahntsua xahasen rë chinga jan. Sehe yëjë ni chinga jan, xi meje jo mil jan ne, cavanga chu quiji cavetje chu ngu ndetjun tsëhë rcu naxi hane ngajan cavixuya chu ngajñi laguna. Ngajan camiji rë chu, hane cahme chu.

¹⁴Hane cha xi titsicjén rë chinga jan ne, cavanga cha quiji cha. Casua cha camachaya rë xuta xi siutaha nguijña, cavechu hisca nandya cachja cha. Ngajan xi xuta xi cahndë cjua jan ne, quiji cavutsejen me mé xi camá jan. ¹⁵Cafehe me hisca tacun Jesús, hane cavëë me cha xi jemu cjín xitsehen caxincha xahasen rë, tacun cha, yaja cha tsjian rë cha, hacuaha ha quihndë tsajin mé má rë cjuatacun rë cha. Hane xuta jan ne, jemu catsacjun me camá. ¹⁶Hacuaha xuta xi cavëë hacutjin cavatju cha camá hacuaha hacutjin cavatju chinga camá

ne, cachja me cojo xuta xi yahnga. ¹⁷Sehe cavetsihin cachja me cojo Jesús xi catje me tsêhê ladu rê me xi cuicun vi.

¹⁸Hya xi camá ne, hora xi tivisehen Jesús barcu ne, jercu cafehya cha xi cax-incha xitsehen xahasen rê jan xi cjue cha cojo me. ¹⁹Peru Jesús ne casuaain me cahndê xi cjue cha. Hane cuitjin cachja me cojo cha:

—Tjihin ndya riji. Tjihin tjengui xuta riji, hane tinoje cojo rê me xi Nina ne, camayuma rê me ngaye. Hacuaha tinoje tsêhê cjuandaja xi casahmi me cojo ri.

²⁰Ha xcun xi cafê cahndê cha cjua xi cachja Jesús ne, sehe cavetju cha quiji cha ladu hiscan xi hmí rê Tê Nandya. Hane cavetsihin cha casuacuenda cha cjuandaja xi casahmi Jesús cojo cha. Sehe xuta xi siu cahndê jan ne, jemu qui-jircun rê me.

**Jesús ne, sahmi me xi mandaja
na chjuun xi ma rê
xahmajni ndiya ndava Jairo**

²¹Xi tu cavuya nga Jesús cojo barcu ladu vihi tsêhê laguna ne, jercu catsê nga xuta hiscan cafehe me tjeheh laguna.

²²Hacuaha cafehe ngu xutaxa rê yungun rê ngu nandya. Cha vêhê ne, Jairo hmí rê cha. Hya xi cavêê cha Jesús ne, quiji cavixcuhnchi cha xcun me. ²³Sehe jercu cafehya cha favor cojo me. Cuatjin cachja cha:

—Quihndi naha ne, ha tu hora sa xi cueya na. Cuanguen ne, cuisanu ntsun na ne, cojo sa xi cumandaja na, hane cuejña sa na cjuahñu.

²⁴Xi tu cahndê Jesús cjua rê cha ne, sehe quiji me cojo cha. Hacuaha jemu cjín camahani xuta quiji me hacutjin quiji Jesús. Quiji hinchun hinchun me cojo me.

²⁵Hane ngajñi rê xuta jan ne, jiyajñi ngu chjuun xi ha nduva tejó nu xi hmu rê na tsêhê chíhin xahmajni. ²⁶Hane

jemu jyê cjuañihi cavatju na camá ta ha ndasa jemu cjín doctor catsirqui me na, tu mahya catsicjê na tujún rê na ta tsajin mé cavetjucaa. Tu hitsê sa jyê camá chíhin rê na. ²⁷Xi tu cahndê na cjua tsêhê xcusun xi casahmi Jesús ne, quiji tiña na taha ngaxtun me, caveta-hatsja na tsjian rê me. ²⁸Cuatjin casahmi na ta catsingatahacacun na cuitjin: “Sá xi cuetaha ntsa ndastu tsjian rê me ne, cumandaja ngahan.” ²⁹Hane ngutjen ni caxiya jni xi vixu rê na. Hane hacuaha camachaya rê na ta camandaja na tsêhê chíhin xi má rê na. ³⁰Jesús ne, camachaya rê me xi tjín xa xi casahmi ngahñu rê me. Cavuya me taha ngaxtun me ne, cavutsejen me xuta jan ne, sehe cavinenguise me cuitjin:

—¿Yo xi casatêtsja tsjian naha?

³¹Sehe ngajan xi cha ladu rê me jan ne, cachja cha cojo me cuitjin:

—¿Hacutjin meje nuju xi cuinújin yo xi casahmi? ta ha chutsujun xutacjín xi ña tisetêtaha me ngayun ndya jan.

³²Sehe cavutsejen nga me xuta tahndee rê me ne, ¿yo xi cuatjin casahmi?

³³Sehe chjuun xi casahmi jan ne ta ha vêê na hacutjin cavatju na camá ne, ña fatsê na xi catsacjun na camá. Sehe quiji cavixcuhnchi na xcun Jesús, hane cachja na yêjê ni hacutjin xi cjuaquixi. ³⁴Sehe ngajan xi Jesús ne, cachja me cojo na cuitjin:

—Ha camandaja ngayun ta camacjain nuju. Tjangun cojo cjuasua ta chíhin vê ne, ha quihndê cuyaaain suaxti nuju.

³⁵Jinguyêjê rê xi Jesús tichja cuaha me ne, canduva ngujo me tsêhê ndava xutaxa rê yungun jan. Hane cuitjin cachja me:

—Ha cahme quihndi nuju. Tahan-ndyaan sa rê maestru.

³⁶Peru Jesús ne, handasa cahndê me cjua xi cachja me xi cafehe jan ne, sehe cachja me cojo xutaxa rê yungun jan ta:

—Xi camacjiintacun. Ningatuhuntacun ni xi cumandaja na. —Cuatjin cachja Jesús.

³⁷ Sehe casuaain me cahndé xi cjue yějē xuta jan. Suva ni cha Pedru, cha Jacobo cojo cha Juan hntsē cha Jacobo, cha vĕhē quiji cha cojo me. ³⁸ Xi cafehe me ndava xutaxa rē yungun jan ne, ngajan siu xutacjín xi jihnda me jindaya me ngatsē rē cjuandusin. ³⁹ Hane xi cavisehen Jesús ndihya ne, sehe cachja me cojo xuta jan cuitjin:

—¿Mé má cuatjin va má ngayun chjihndun? Na lihndi vĕ ne, hacuiin cahme na ta jiñafē na. —Cuatjin cachja me.

⁴⁰ Sehe ngajan xi xuta xi siu jan ne, tu vejnucjĕē me tsĕhĕ cjua xi cachja Jesús. Sehe ngajan xi Jesús ne, catsitĕē me xuta xi siu jan candatsen. Hane suva ni nahmi rē nima quihndi cojo naa rē cojo cha xi ticojo me cavisehen me cojo hiscan jiña.

⁴¹ Sehe cafaha me tsja nima quihndi jan ne, sehe cachja me cojo cuitjin:

—Talita cumi —cjua xi meje cuichja: Tichjá cojo ri, tsan, tisatjinhngue.

⁴² Xi cafē cachja Jesús cuatjin ne, cavuya cjuahñu rē na lihndi jan hacuaha ngutjen ni cavisatjenhnga na catsujyihya na. Na lihndi jan ne, tejó nu tjin rē na. Hane me xi siu jan ne, jercu quijircun camahani rē me. ⁴³ Hya xi camá ne, jemu cachja camahani Jesús cojo xuta rē na xi tsajin yo cuichja me cojo xcusun jan. Hacuaha cachja me cojo xuta rē na xi sua me xi sinē na.

Jesús ne, fi nga me Nazaret

6 Hya xi cavetju Jesús tsĕhĕ Capernaum ne, cavuya cafe me cojo cha ladu rē me nandya Nasaret, hiscan xi camacha me. ² Hya xi cavechu nixtin xi chjahájenda rē ne, cavetsihin cavicuya me xuta ngajan yungun. Hane xutacjín xi tivisiñuju cjua rē Jesús jan ne, jemu quijircun rē me. Sehe cachja me ngajñi rē me cuitjin:

—¿Jani cavutaya cha xi cuijyihi vi cjua xi tichja cha? Jemu tjin rē cha cjuatacun. Hacuaha jemu yehe cjuarcun sahmi cha. ³ Há hyan ngayaan xi cha vihi xi chjineya jan ni, cha xi quihndi rē na María. Hntsē cha ne, hacui cha Jacobo, cha José, cha Judas cojo cha Simón. Hacuaha nandya naja tacun ndava tichja cha.

Hane jemu xti rē xuta jan, tsĕhĕ xi ha vĕē me Jesús. ⁴ Vĕhĕ xi Jesús ne, cachja me cojo xuta jan cuitjin:

—Xuta ne, ha tuxa faharcun me ngu xihin xi suacuenda cjua rē Nina. Suva ni xuta rē xihin jan cojo xuta xi tangun nangui rē cojo, me vĕhĕ xi faharcuaain me xihin jan.

⁵ Ngajan ne, hacuiin cjín cjuarcun casahmi me, tsĕhĕ xi macjaain rē xuta me. Tu cavisanetsja ni me ngujo xuta hmu rē, hane camandaja xuta hmu rē jan. ⁶ Hane Jesús ne quijircun rē me ta, tsĕhĕ xi xuta jan ne, cuatjin camacaain rē me. Hane sehe quiji catsujyihya Jesús nandya tahndee rē jan, cavicuya me xuta.

Jesús ne, tsingatju me cha ladu rē me xi sua cha machaya rē xuta tsĕhĕ gobiernu rē Nina

⁷ Sehe casahmitangun me cha xi tejó jan hane cavetsihin catsingatju me jo jo cha jima ngu ladu. Hacuaha casua me cha ngahñu xi cuma cuaxĕxin cha xitsehen. ⁸ Hacuaha cachja me cojo yějē ni cha xi tsajin mé xi cjuaha cha xi cjue cha. Suva ni ngu ya xi cuisecoo rē cha. Hacuiin niñu ne, hacuiin morra, hacuiin xi tujún. ⁹ Chuxinxte ni catincha ntsacu cha. Hacuaha cuaain cha chingá. ¹⁰ Ngajan xi cachja me cojo yějē ni cha cuitjin:

—Hya xi cjuhun ngu ndihya ne, xi cuisuhun ne, ha ngajan ni tinechun nguixun nguixun ni hisca xi cuetjun tsĕhĕ nandya hiscan xi casatē nuju. ¹¹ Tuyani ni xi tsingatiin nuju me

hacuaha hisca cuisinijii me tsujun ne, tetjun tsêhê ngajan ne, titsunu chojo rê ntsacu. Vêhê cuma ngu seña tsêhê jyê rê me.

¹² Xi cajnetaha cachja Jesús cuatjin ne, sehe cavetju cha quiji cha hiscan xi casatê rê cha. Cachja cha cojo xuta xi tsindeya me cjuatacun rê me. ¹³ Hacuaha jemu cjin xitsehen cavaxêxin cha. Hane xuta hmu rê ne, aceite tsêhê tuxine xi hmí olivu catsufê cha xten me hane camandaja me jan.

Cjuaveya rê Juan Vitenda rê Xuta

¹⁴ Me xi matitjun xi hmí rê Herodes ne, cahndê me cjuat tsêhê Jesús, tsêhê xi xuta ne, jercu cachja me tsêhê Jesús. Hane ngujo me ne, cuitjin cachja me:

—Nima Juan, cha xi cavitenda rê xuta ne, ha ndasa cahme cha, peru cavascaya rê cha. Vêhê xi ma sahmi cha cjuarcun.

¹⁵ Hane ngujo nga me ne, cachja me ta Jesús ne, hacui rê Elías, ngu xutachanga xi casuacuenda cjuat rê Nina hatsêê. Hane cachja sa yahnga me ta Jesús ne, hacui rê ngu profeta, sacuahame xi casuacuenda xutachanga xi caviyuju titjun. ¹⁶ Peru Herodes ne, hya xi cahndê me cjuat vêhê ne, sehe cachja me ta:

—Nima Juan má me. Catsingátju catisun rê rcu cha, hane cavuya rê cjuahñu rê cha. —Cuatjin cachja Herodes.

¹⁷ Herodes ne, ha catsingátju me cachjaha rê cha Juan xi cjue cha ndavaya. Cuatjin casahmi me ngatsê rê na Herodía. Na vêhê cafaha Herodes, camá chjuun rê me ha ndasa xi ha chjuun rê cha Felipe hntsêjñu me má na. ¹⁸ Hane ngatsê rê vêhê, cuitjin cachja cha Juan cojo rê me:

—Chja ley ta ndajintjin camahani xi chjahan chjuun rê xingueen. Vêhê xi ngayun ne, ndajintjin xi cuatjin canihñu. —Cuatjin cachja cha Juan.

¹⁹ Ngajan xi na Herodía ne, caveyacacun na cavutsejen na cha Juan. Hane meje rê na xi cueya cha. Peru camaji ta tsêhê xi ²⁰ Herodes ne, cafaharcun me cha, tsêhê xi vêê me ta Juan ne, ngu xihin xi tyjahi cjuatacun rê cha, hane cavêjña cha tsêhê Nina. Hane vêhê xi casahmi me cha cuidadu. Hacuaha hya xi Herodes cavisinuju me cjuat rê cha Juan ne, jercu cachuya rê me ha ndasa casecjan cjuatacun rê me. ²¹ Peru casacu rê na Herodía cahndê tsêhê xi meje rê na hya xi cavechu nixtin tsêhê suhi rê Herodes. Hya cachja Herodes cojo ngujo xutaxa rê ndihyavasen cojo me xi matitjun tsêhê sindadu, cojo sa ngujo xuta changá xi matitjun tsêhê distritu Galilea, xi cjue me ta casehenchjine ngu comida tsêhê suhi rê me. ²² Hane hora xi tijinê me ne, cavisehen na quihndi rê na Herodía, catê na. Hane jercu cachuya rê Herodes cojo me xi yahnga jan hacutjin catê na. Sehe ngajan xi Herodes, me xi matitjun jan ne, cachja me cojo na cuitjin:

—Tu mé ni xi meje ri ne, chjahye ná, hane suá ri. ²³ Vêê Nina jain ta suá ri hisca vasentjin nandya xi siu ntsa. —Cuatjin cachja me.

²⁴ Xi tu cavetju na quiji na hiscan tacun naa rê na ne, cavinenguise na cuitjin:

—¿Mé xi ndatjin cjuéhya rê me?

Sehe ngajan xi chja naa rê na ta:

—Chjaye rcu cha Juan, cha xi vitenda rê xuta. —Cuatjin cavinchangui naa rê na na.

²⁵ Xi tu cavuya cavisehen na hiscan tacun Herodes ne, ngajan xi cachja na cuitjin:

—Meje ná xi ngutjen ni ne, cahntsua ngu tyuva ne tuhun ná rcu cha Juan. —Cuatjin cachja na quihndi jan.

²⁶ Ngajan xi Herodes ne, jemu choho camá rê me peru tsêhê xi hisca Nina caveyanangui me xi casua me cjuat rê

me, hacuaha tsëhë xi yëjë ni amigu rë me cahndë me cjuja jan, vëhë sahmi xi má sava rë me tsindeya me cjuja rë me cojo na. ²⁷ Ngajan xi Herodes ne, ngutjen catsingatju me ngu sindadu hiscan jiya cha Juan. Hacuaha cavitexa me xi cuinduva cojo cha rcu cha Juan. Sehe ngajan xi cha sindadu jan ne, quiji cha ndavaya, cavatësun cha rcu cha Juan. ²⁸ Sehe caveya cha cahntsua tyuva, quijicojo cha. Xi cafehe cha cojo ne, casua cha na quihndi rë na Herodía. Hane sehe casua na naa rë na. ²⁹ Sehe hya xi cahndë cha ladu rë cha Juan tsëhë mé xi cavatju cha cama ne, sehe quiji cha cafaha cha nima caveyaniji cha.

Jesús ne, tsicjen me hñu mil xihin

³⁰ Hya xi cajnetaha catsujyihya cha apóstol xi catsingatju Jesús jan ne, cavuya camatangun nga cha cojo me. Sehe cachja cha hacutjin casahmi cha hacuaha hacutjin cavicuya cha. ³¹ Sehe ngajan xi Jesús ne, cachja me cojo cha cuitjin:

—Nduvun suvun ni ne, cuanguen hiscan xín, chjahanjeyan hitsë.

Cuatjin meje cjue cjuahajeya me ta tsëhë xi jemu cjín xuta xi cjuí nduva me hiscan tacun Jesús. Hisca maxatiin jinë me niñu. ³² Sehe quiji me cojo cha ladu rë me cojo barcu ngajan hiscan xín. ³³ Hane xuta jan ne, cavëë me xi cjuí me cojo cha ladu rë me. Hacuaha vëë me xi hacui Jesús. Sehe xuta tsëhë nandya tahn-dee jan ne, cavanga me quiji me taha vëhë. Hisca tjun sa me cafehe me, sehe cafehe Jesús cojo cha ladu rë me. ³⁴ Xi tu cavetju Jesús tsëhë barcu jan ne, cavëë me xi jemu cjín xuta siu me. Hane camayuma rë me xuta jan ta tsëhë xi siu me sacuaha chu tsánga xi tsajin yo xi cjuahacuenda rë chu. Sehe cavetsihin cavicuya me xuta jan, jemu cjín cjuja cav-

icuya me. ³⁵ Hya xi ha quiji hora jan ne, ngajan xi cachja cha ladu rë me cojo me ta:

—Nguehe ne jemu xín camahani. Hacuaha jemu quiji hora. ³⁶ Ninguijnu-tuhun cjuja cojo xutacjín vi cojo sa xi catji me nandya xi siu tiñataha, hane catatsë me xi sinë me. —Cuatjin cachja cha.

³⁷ Hane cuitjin cafayangui Jesús:

—Tuhun ngayun xi sinë me.

Sehe ngajan xi cachja cha ladu rë me cuitjin:

—¿Hacutjin sacú niji xi sinë me xi cuarcu cjín me? Xi cuatjin cjín pan chihin ne, meje miji chji rë jo cientu mosu. —Cuatjin cachja cha.

³⁸ Sehe cachja Jesús cuitjin:

—Tangun chutsujun ¿há cjín pan tjin ngajñi nuju ngayujun ni?

Xi tu cavëë cha há cjín pan tjin ra ne, sehe cachja cha cojo me cuitjin:

—Hñú pan, cojo jo ti má.

³⁹ Sehe ngajan xi cachja Jesús cojo cha ta catichja cha cojo xuta, catiyuju me xcun ndiji, ngujo ngujo me ngu ngu cahndé. ⁴⁰ Hane caviyuju me ngu cientu me ngu cahndé, o vassen cientu ngu cahndé hisca xi café yëjë me caviyujuchihin me. ⁴¹ Sehe Jesús ne, cafaha me xi hñu pan cojo jo ti jan, cavutsejenniji me ngahnga ne, casua me nacuechji rë Nina, sehe cavotoho langa me pan jan. Hane casua me cha ladu rë me xi sua cha sinë xuta. Hacuaha cojo catsijo ti jan cavatëcja Jesús xi sinë xuta. ⁴² Jercu caxuva pan cojo ti jan. Hane yëjë ni me cajinë me hacutjin xi cachuya rë xahasen rë me. ⁴³ Xi cavatju cajinë xuta jan ne, sehe cafaya cha pan cojo ti xi cafiin jan ne, hane catsinguitsë cha tejó chajne cojo. ⁴⁴ Me xi cajinë pan jan ne, hñu mil má me xi xihin. Hacuaha xin má yachjin cojo langa xi cajinë me.

Jesús ne, fi ntsacu me xcun ndachacun

⁴⁵ Ngajan xi Jesús ne, catsingatju me cha ladu rë me cojo barcu jan xi cjue titjun ni cha ngunda vëhë, hiscan nandya Betsaida, jinguyëjë rë xi tsinguijnetaha me cjua cojo xuta. ⁴⁶ Hya xi camá catsinguijnetaha me cjua jan, sehe camiji me ngu ndetjún xi cuisiajmi me cojo Nina. ⁴⁷ Hane hora xi camá nguixun ne, barcu jan ne, vasencja laguna cjuí. Hane Jesús ne, tacun suva cuaha me nangui quixí. ⁴⁸ Hacuaha cavutsejen me ta jemu chja tivatju cha xi cjui cha cojo barcu, tsëhë xi tjo ne, taha hiscan cjui cha ne, ngajan nduva. Hane xi tiña sahasen ne, camatiña Jesús tsëhë cha, cjui me xcun nandan. Hane cuatjin cjui me sacuaha xi meje cuatjutaha me cha. ⁴⁹ Xi tu cavëë cha xi cjui me xcun nandan ne, catsingatahacacun cha ta nima xi meje cuincharcun rë cha. Hane jercu cajindayatë cha, ⁵⁰ tsëhë xi catsacjun cha xi cavëë cha me. Hane ngutjen ni cachja Jesús cojo cha cuitjin:

—Xi carcuun.

⁵¹ Hane sehe cavisehen Jesús barcu hiscan siu cha. Hora vëhë ne, casejyu tjo. Ngajan xi jemu quijircun camahani rë cha ta, ⁵² ha ndasa cavëë cha cjuarcun xi casahmi Jesús cojo pan jan ne, peru cajnii rcu cha, tsëhë xi vechiin cjuatacun rë cha.

Jesús ne, sahmi me xi mandaja xuta xi hmu rë tsëhë nandya Genesaret

⁵³ Xi quiji sa me cojo barcu ne, cafehe me tjeheh laguna, tiña nandya xi hmí Genesaret. Hane ngajan catsihñu me barcu. ⁵⁴ Hya xi cavetju Jesús tsëhë barcu ne, cavëë xuta ta hacui Jesús. ⁵⁵ Hane xuta jan ne, marcu macjain quiji me yëjë ni ladu tsëhë nandya jan, xi quiji jaha me xuta hmu rë, caviyuju me xcun Jesús. ⁵⁶ Hane tuyani ni xi quiji Jesús, há

nandya langa ne, há nandya hñu, o há xi ranchun, caviyuju me xuta hmu rë hiscan ndetsin. Sehe cafehya me cojo Jesús xi ndastu satëtaha xuta hmu rë jan tsjian rë Jesús. Hane yëjë ni xuta hmu rë xi casatë tsjian rë Jesús ne, camandaja me.

Jesús ne, chjataha me cha fariseo

7 Ngujo cha tsëhë partidu fariseo cojo ngujo cha maestru tsëhë ley ne canduva cha tsëhë nandya Jerusalén quiji cha ngajan hiscan tacun Jesús, ngajan camatangun cha. ² Xi cafehe cha ngajan ne, cavëë cha xi ngujo cha ladu rë Jesús ne tjin sa jyë rë tsja cha ne, tijinë cha niñu ta cavanii cha tsja cha. ³ Hane cachuyiin rë cha ta tsëhë xi ngayëjë ni xuta nangui niji ne, sahmi ngujoyë xi cuane me tsja me sehe sinë me niñu. Yaha me xcusun rë xutachanga niji. ⁴ Hacuaha hisca sa xi fehe me xi fi me ndetsin ne, sá xi cjëë cuane me tsja me ne, sinii me niñu. Hacuaha jemu cjín sa xcusun rë xutachanga niji xi yaha me ta sacuaha xi ha tyjahi trasti ne, cuane nga me. Hacuaha cuanitjin sahmi me cojo nachan. ⁵ Ngajan xi cha tsëhë partidu fariseo cojo cha maestru tsëhë ley ne, cachja cha cojo Jesús cuitjin:

—¿Mé má cuatjin sahmiichiin cha ladu nuju ley rë xutachanga naja? ta, tsëhë xi vanii cha tsja cha xi jinë cha niñu.

⁶ Ngajan xi cafayangui Jesús cuitjin:

—Ngayun ne, jo xcun jo ntsuvun yun. Jemu quixi cjua xi catsihindu Isafas tsujun xcun xujun rë me sacuatjin cachja Nina xi xuta ne, jemu ndacha me. Cuitjin fi cjua jan:

Xuta xi cuicun vi ne, ndaja chja me tsahan,

peru xi cojo xahasen rë me ne, hisca tsinguitsjiin me ngahan.

⁷ Tu mahya xi faharcun ná me ta xi vicuya xicjin me ne, hacuiin cjua naha cuicuya me ta, tu cjua rë xuta.

⁸Cuanitjin ngayun ta nismutacun cjuarë Nina, hane hitsë sa tivetuhuncun xcusun rë xutachanga naja.

⁹Cachja sa me cuitjin:

—Xi má nuju ne, jemu ndatjin casacuse nuju hacutjin vejñuxun cjuarë Nina cojo sa xi nihñuchuhun xcusun rë xutachanga naja. ¹⁰Moisés ne, cuitjin catsihindu me hacutjin xi cachja Nina xi nihña ngayaan xuta rë me: “Chjuhuncun ná nuju, chjuhuncun nahmi nuju”, hacuaha: “Yo xi choho chja tsëhë xutacha rë ne, xuta ne tsiquehen rë.” ¹¹Peru ngayun ne, cjuatacun rë xutachanga naja vicuyun ta, nújun ta ngu cha ne cuma cuichja cha cojo xutacha rë cha cuitjin: “Ha quihndë cumaji cuisecoo nuju ta yëjë ni xcusun xi tjin ná ne, ha cavejñá tsja Nina.” ¹²Hane xi cuatjin cuichja cha ne, ha quihndë sahmi nguýë xu xi cuisecoo cha xutacha rë cha. ¹³Xi cuatjin ne, ha camachjiriin nuju cjuarë Nina ta, nihñu sacuaha xcusun rë xutachanga naja, hacuaha vicuyun rë jingu sa. Hacuaha cjín sa xcusun ndacha sacuaha vëhë nihñu. —Cuatjin cachja Jesús cojo maestru jan.

¹⁴Hacuaha cajindaya Jesús xuta xi cumatangun me. Hya xi camá ne cuitjin cachja me cojo:

—Ngayujun ngarcun ni ne, tinuhyun cjuarë xi cuichjá vi. ¹⁵Xcusun xi vixuya cahntsua xuta ne, hacuiin vëhë tsitsehen rë me ta, cjuatacun xi nduva rë me ne, vëhë tsitsehen rë me. ¹⁶Jarë ngayun xi meje nuju xi cumá nuju ne, tetuhuncun.

¹⁷Xi cavatju cachja me vëhë ne, caviyuju xuta ngajan ne, sehe cavisehen me cojo cha ladu rë me cahntsua ndihya. Ngajan xi cha ladu rë me ne, cavinenguise cha me tsëhë cjuarë vëhë. ¹⁸Ngajan xi cachja me cuitjin:

—¿Há hisca ngayun cajni rcun cjuarë cachjá ni? Nguehe cuichjá cojo nuju mé vijne cjuarë vëhë. Cuma xinë yëjë xcusun

comida ta tsajin ngu xcusun xi jinë xuta xi cuma tsitsehen rë me ¹⁹ta xi sinë me ne, hacuiin cahntsua xahasen rë me cjuarë ta cahntsua me. Fi ne vetjutaha ndatsen.

²⁰Hacuaha cachja sa Jesús cuitjin:

—Cjuatacun xi nduva tsëhë xahasen rë xuta ne, vëhë tsitsehen rë me ta, ²¹tsëhë xi xi nduva tsëhë xahasen rë me ne, cjuatacun tsehen, sacuaha yachjin xi viteña yojo rë, sacuaha jyë tsëhë xi sahmi me chjuunnahñu rë me jingu sa chjuun, cojo cjuachëjë, cojo xi tsiquehen xicjin, ²²cojo xi jercu meje rë me cjuanchina, cojo xi sahmi me cjuatsehen, sahmi me cjuandacha, choho sahmi me, tjin rë me cjuaxin, sahmi me cjuachjataha, tjin rë me cjuaxihin, sahmi me cjuangarca. ²³Yëjë cjuatsehen xi cuacun vëhë ne, nduva tsëhë xahasen rë xuta, hane vëhë tsitsehen rë me.

Nguchjuun xi xutaxin má na ne, camacjain ran Jesús

²⁴Xi cavetju me tsëhë distritu Galilea, cafe me ladu tsëhë nandya Tiro cojo nandya Sidón. Xi cafehe me ngajan ne, cavisehen me cahntsua ngu ndihya, tsëhë xi mijí rë me xi scuëë xuta xi cafehe me. Peru camaji cavejñahma me.

²⁵Xi cafehe Jesús ngajan ne, ngutjen camachaya rë naa rë ngu na xi jiya xitsehen cahntsua xahasen rë na. Hane quiji na cavixcuhnchi na xcun Jesús xi cjuaharcun na me. ²⁶Na vëhë jan ne, xutaxin na, na ladu tsëhë distritu Sirofenisia, hacuiin na xuta tjë rë Israel. Hane cafehya na cojo Jesús xi cuaxë me xitsehen xi jiya cahntsua xahasen rë na quihndi rë na. ²⁷Hane xi cafayangui Jesús tsëhë na jan ne, cuitjin cachja me ngu ejemplu cojo rë na.

—Sechiye ni, catijnetaha catjinë nixti ta hacuiin ndatjin xi chjahatahan niñu tsëhë nixti hane sehe tahan rë naña.

²⁸Ngajan xi naa rë na hmu rë jan ne, cuitjin cajnercu na xi tichja me tsëhë

xuta tjë rë Israel cojo xutaxin. Hane cafayangui na cuitjin:

—Nai. Quixi xi nújun, peru naña xi siu ngahma maxë ne, sacu xi vixuhya hntsua nixti, sehe jinë chu.

²⁹ Hane sehe cachja Jesús cojo rë na cuitjin:

—Ndatjin xi canoje. Quihndë ta cu-atjin ne, cuma cjuihin ta xitseken xi caseya cahntsua xahasen rë na quihndi riji ne, ha cavetjuxin.

³⁰ Xi cavuya cafe na ndava na ne, quihndi rë na ne, ha jyuu jiña na hacuaha xitseken xi caseya cahntsua xahasen rë na ne, ha cavetjuxin.

Jesús ne, sahmi me xi mandaja ngu cha xi loho hacuaha lihmi cha

³¹ Sehe cavetju Jesús ladu tsëhë nandya Tiro, cavatju me nandya Sidón cojo ladu xi hmí Të Nandya, vëhë cafehe me laguna tsëhë Galilea. ³² Hane cafehecojo nga xuta ngu cha xi loho hacuaha lihmi cha. Hane cafehya xuta jan cojo Jesús xi cuetahatsja me cha, sehe cumandaja cha. ³³ Ngajan xi Jesús ne cavaxëxin me cha tsëhë ngajni rë xuta ne, sehe caviyujutaha me rcu tsja me ngu ngu ladu ngojo tyjavañuju cha. Hane hacuaha cavëhënatya me rcu tsja me sehe cavetaha me neje cha. ³⁴ Hya xi camá ne, cavutsejenniji me ngahnga hane cafëcacun me. Sehe cachja me cuitjin:

—¡Efata! —cjua xi meje cuichja: ¡Nuxuhunyun!

³⁵ Hane xi tu cachja me cuatjin ne, catuxaha tyjavañuju cha xi loho. Hacuaha hora vëhë ni ne, camá ndandaja cachja cha. ³⁶ Sehe ngajan xi cachja Jesús cojo xuta xi tsajin yo cuichja cojo me xcusun vëhë. Peru xuta jan ne, hitsë sa jercu cachjatë me tsëhë xcusun xi casahmi Jesús. ³⁷ Jercu quijircun camahani rë xuta. Cuitjin cachja me:

—Tu mé xcusun ni jercu ndaja sahmi Jesús. Xuta xi loho ne, vihndë sahmi me, hacuaha xuta xi lihmi ne, sahmi me xi ma chja.

Jesús ne, tsicjen me ñuju mil xihin

8 Nixtin hya ne, hacuaha jercu cjín xuta siu me hisca tacun Jesús. Hane tsëhë xi tsajin camahani mé xi sinë me ngajan ne, vëhë xi Jesús ne, cajindaya me cha ladu rë me, sehe cachja me cojo cha cuitjin:

² —Jemu yuma má ná xutacjín vi ta ha quihndë jyan nixtin hinchataha me cojo naja, hane ha quihndë tsajin camahani mé xi sinë me. ³ Sá xi tsingátju me cjue me xi cjëë sinë me niñu ne, cjuaha rë me hinda ndiya. Ngujo xuta xi cuicun vi ne, jemu cjín canduva me. —Cuatjin cachja me.

⁴ Sehe ngajan xi cha ladu rë me ne, cafayangui cha tsëhë me cuitjin:

—¿Jani cuma sacú naja xi sinë xuta vi ta nguehe ne, jemu xín camahani tsëhë nandya?

⁵ Ngajan xi cavinenguise Jesús cojo cha cuitjin:

—¿Há cjín pan tjin nuju?

Ngajan xi chja cha ta:

—Yatu má.

⁶ Ngajan xi Jesús ne, cavitexa me xutacjín jan xi cuiyuju me nangui. Xi cafë xuta caviyuju me nangui ne, sehe cafaha Jesús pan jan sehe casua me nacuechji rë Nina. Hane cavotoho langa me pan jan, casua me cha ladu rë me xi cuiyuju cha sinë xutacjín jan. Hane cuatjin casahmi cha. ⁷ Hacuaha tjin ra ngujo ti. Hane Jesús ne casua me nacuechji rë Nina tsëhë ti jan, hane sehe cachja me cojo cha ladu rë me xi sua cojo ti jan sinë xuta. ⁸ Xi camá cajinë xuta jan ne, jemu ndaja camá rë xahasen rë me. Hane xi cafaya cha ladu rë Jesús xi cavangui cajinë xuta jan ne, catsë yatu nisinya. ⁹ Xuta jan ne, sacuaha chuva rë ñuju mil

má me. ¹⁰Hane hisca xi cajnetaha cjuan-daja vëhë ne, sehe catsingatju Jesús xuta, cafe xuta ndava me. Hya xi camá ne, cavisehen me barcu cojo cha ladu rë me, hane cavuya me ngunda vihi taha ladu rë hiscan xi hmí rë Dalmanuta.

Cha fariseo ne, fehya cha seña

¹¹Xi cafehe me ngajan ne, hacuaha cafehe cha tsëhë partidu fariseo. Hane cavetsihin cha cavisiajmi cha cojo Jesús ta meje cjuahachuva cha me. Cafehya cha cojo rë me xi tsingacun me ngu cjuarcun xi nduva ngahnga, cojo sa xi scuëë cha xi Nina catsingatju jain rë me. ¹²Ngajan xi Jesús ne, cojo cjuachohotacun ne, cachja me cojo cha cuitjin:

—¿Mé má cuatjin chjahyun xi sahme ngu cjuarcun xi nduva ngahnga? Cuichjá quixë cojo nuju ta hisca ngu xcusun vëhë ne, sahmeë xi xcun cojo xcun.

¹³Ngajan xi caviyuju me cha xi cuacun jan ne, cavisehen me barcu cojo cha ladu rë me. Hane sehe cavuya quiji me ngunda vëhë tsëhë laguna.

Xcusun rë cha fariseo ne, visehetë cjuatacun rë xuta sacuaha sahmi san rë pan

¹⁴Peru cha ladu rë me ne, cachaya rë cha xi cjuaha cha pan, hane cahntsua barcu ne, ngu tutu sa pan jiya ndaja.

¹⁵Sehe ngajan xi chja Jesús cojo cha cuitjin:

—Nechun cuidadu cojo san rë pan tsëhë cha tsëhë partidu fariseo cojo cha ladu rë Herodes.

¹⁶Sehe ngajan xi cavisiajmicjín cha ngajni rë cha cuitjin:

—¿Há tsëhë xi tsajin naja pan ne, há tsëhë vëhë xi cuatjin chja me?

¹⁷Xi camachaya rë Jesús xi veyanan-gui cha xi tsajin rë cha pan ne, cachja me cojo cha cuitjin:

—¿Mé má cuatjin nújun xi tsajin pan? ¿Há nuhyuun? ¿Há vijni rcun? ¿Há

jemu taja rcun? ¹⁸Tjin nuju túxcun hacuaha tjin tyjavañuju. ¿Mé má mat-sijin nuju? hacuaha ¿mé má nuhyuun? ¿Há vitsjiin nuju? ¹⁹Hya xi cavótoho langa hñú pan ngajni rë xi hñú mil xuta, ¿há cjín chajne sa quitsë cachjayun tsëhë pan xi cavangui jan? —Cuatjin cavinenguise me.

Ngajan xi cafayangui cha ladu rë me ta:

—Tejóf.

²⁰—Hane hya xi cavótoho langa yatu pan jan xi cajiñë ñuju mil xuta, ¿há cjín nisinya sa cavangui?

Ngajan xi cha ladu rë me ne, cuitjin cachja nga cha:

—Yatu.

²¹Ngajan xi cavinenguise Jesús cojo cha cuitjin:

—¿Há cjëë camahani cuijne rcun cjuaxi cachjá tsëhë san rë pan?

Jesús ne, sahmi xi cumatsejen rë ngu cha rcá ngajan nandya Betsaida

²²Hya xi camá ne, cavechu barcu tje-hen laguna. Hane xi cavitujne me barcu ne, cafehe me nandya xi hmí Betsaida. Xi cafehe me ngajan ne, cafehe nga xuta cojo ngu cha xi rcá. Hane jercu cachja xuta jan cojo Jesús xi cuetahatsja me cha, hane sehe cumatsejen rë cha. ²³Hya xi camá ne, cafaha me tsja cha hane quijicojo me cha ngajan tjeheh nandya. Xi cafehe me cojo cha ngajan ne, cavëhë natya me tuxcun cha hacuaha cavetahatsja me tuxcun cha, sehe cavinenguise me cha cuitjin:

—¿Há tsejen ri hitsë quihndë?

²⁴Xi catsiquijin cha xcun cha cavutsejen cha ne, chja cha ta:

—Vutsejen xuta. Peru sacuaha tsejen ya, cuatjin tsejen me xi cjui me.

²⁵Ngajan xi Jesús ne, cavetahatsja nga me tuxcun cha. Sehe casahmi cha ngujoyë cavutsejen ndaja cha, hane camandaja cha, camatsejen ndaja rë cha. Hane sehe

catsingatju me cha cafe cha ndava cha.

²⁶ Hacuaha cachja me cojo cha cuitjin:

—Xi cavisin ngajni nandya xi cuinoje cojo xuta jan xcusun xi casahme cojo ri.

**Pedru ne, tsinguixi me xi Jesús
ne, me vëhë xi Mesías me**

²⁷ Hya xi camá ne, cavetju nga Jesús tsëhë ngajan cojo cha ladu rë me ne, quiji me ngujo nandya xi siu tahndee rë nandya xi hmi Cesarea Felipe. Hane ndiya jiya me cojo cha ne, cavinenguise me cha cuitjin:

—¿Mé chja xuta, yo ngahan? —Cuatjin cachja me.

²⁸ Ngajan xi cafayangui cha ladu rë me cuitjin:

—Ngujo me ne, chja me ta ngayun xi cha Juan ngayun, cha xi cavitenda rë xuta. Ngujo nga me ne, chja me ta Elías. Hane ngujo nga me ne, chja me ta ngu profeta xi suacuenda cjua rë Nina. —Cuatjin cafayangui cha.

²⁹ Ngajan xi cachja nga Jesús cojo cha ta:

—Hane ngayun ne, ¿mé nújun? ¿Yo ngahan?

Ngajan xi cha Pedru ne, cuitjin cafayangui cha:

—Ngayun xi tjin cjua xi tsingatju nuju Nina. Ngayun xi Cristu.

³⁰ Ngajan xi Jesús ne, cavitexa me cha ta tsajin yo xi cuichja cha cojo tsëhë.

Chja Jesucristu xi cueya me

³¹ Hya xi camá ne, cavetsihin cavicuya me cha tsëhë xi ha ndasa xi Cristu, Quihndi rë Xuta Jain má me ne, peru jemu cjin cjuanihi cuatju me cumá ta tsingatiin xuta changá me, hacuaha tsiquehen xuta changá jan me, peru xi cjuë jyan nixtin ne, cuya nga me cjuahñu.

³² Cjua vëhë ne cachja quixi camahani me cojo cha. Ngajan xi cha Pedru ne, quijixin cha cojo Jesús. Sehe cavetsi-

hin cachja cha cojo me xi ¿mé má cuatjin chja me? ³³ Ngajan xi cavuya Jesús cavutsejen me hiscan siu cha ladu rë me. Sehe cachja me cojo cha Pedru cuitjin:

—Tihinxin ngaye Satanás, tsëhë xi ningatiintacuin ngaye sacuaha tsingatahacacun Nina ta, ningatehetacuin sacuaha ngu xuta.

**Hacutjin xi meje rë xi nihña
xa cojo cjuahñu naja**

³⁴ Ngajan xi Jesús ne, cajindaya me xutacjin jan cojo cha ladu rë me xi cuinduva me hiscan tacun Jesús, sehe cachja me cuitjin:

—Sá xi tjin yo xi meje cuisehen ladu naha ne, meje rë xi nichuvun cjuatacun nuju, hane hacuaha tejñuhñu xahasen nuju xi cuanguncujun ndiya naha handasa xi cueyun xcun cru. ³⁵ Yo ngayun xi mijí cuisuhun ladu naha tsëhë xi rcun xi cueyun ne, cahndé xi ndaja ne, nichujun xahasen nuju. Peru yo ngayun xi ngatsë naha o sá xi ngatsë rë cjua rë Nina cueyun ne, hacuiin nichujun xahasen nuju ta Nina ne, cuaxëtje me.

³⁶ Mé ndaja cuma nuju xi sacu nuju yëjë xi tjin ngasunhndë, sá xi cueyun hane cuma nuju castigu, ³⁷ ta sá xi cuaxintiin Nina xahasen nuju hya xi cueyun ne, ha quihndë tsajin rqui rë. ³⁸ Yo ngayun xi ma sava nuju ngatsë naha o sá xi ngatsë rë cjua naha nguehe xcun xuta tsehen xi manguaaincacun cojo cjua rë Nina ne, hacuaha cojo ngahan xi canduvá tsëhë Nina ne, cuma sava ná ngahan ngatsë nuju ngayun, hya xi cuinduvá cojo cjuandajyihi tsëhë nahmi naha ne, hacuaha cojo ángel xi vejña tsëhë Nina cuinduvá cojo.

9 Hacuaha cachja sa Jesús cuitjin:

—Cuichjá quixë cojo nuju ta tecjan yahnga xuta nguehe xi hisca xi scuëë me xi cuitexa jain Nina ne, sehe cueya me.

Cavindeya xcusun rë Jesús

² Xi café jyun nixtin jan ne, quijixin Jesús ngu rcu naxi hnga cojo cha Pedru cojo cha Jacobo cojo cha Juan. Xi cafehe me cojo cha ngajan ne, cavëë cha xi cavindeya xcusun rë me. ³ Tsjian rë me ne, ña seti tsejen, tsëhë xi jercu tu tyava camahani, hisca xi ngu xuta cumaji cuane me xi cuatjin tyava. ⁴ Hya xi camá ne, ha tu ñahñu camatsejen hasen rë Elías cojo hasen rë nima Moisés, tivisiajmi cojo Jesús. ⁵ Ngajan xi cachja cha Pedru cojo Jesús ta:

—Maestro, tu ma rë xi nguehe nechin cojo nuju ne, nihñi jyan puestu: ngu tsujun ne, cojo ngu ngu tsëhë Moisés cojo Elías.

⁶ Cuatjin cachja cha Pedru ta, sacuniyiin rë cha mé sa cuichja cha ta tsëhë xi jercu catsacjun camahani cha camá. ⁷ Hora vëhë ne, canduva ngu yuffi casahmi tjahnguen rë. Hane ngajñi rë yuffi jan ne, canuhya rë ngujo cjua xi cachja cuitjin:

—Cha vihi xi quihndi naha cha. Jercu hmucacun cha. Tinuhyun xi chja cha.

⁸ Xi tu cahndë cha ladu rë Jesús cjua vëhë ne, vutsejen nguehe vutsejen ngajan cha, hane suva sa Jesús tacun me xi cavëë cha.

⁹ Xi tu titvitujne me tsëhë rcu naxi jan cojo cha ladu rë me xi quijicojo me jan ne, ngajan xi chja xu me cojo cha ta tsajin yo xi cuichja cha cojo xcusun xi cavëë cha. Xi cuatju cueya Quihndi rë Xuta Jain ne, cuya nga me cjuahñu, sehe hya cuichja cha. ¹⁰ Vëhë xi cavaha cha cjua jan cahntsua xahasen rë cha. Ngajñi rë ni cha cojo xicjin cha cavisiajmicjín cha ¿mé vijne cjua xi cuya nga me cjuahñu?

¹¹ Ngajan xi cavinenguise cha cojo Jesús cuitjin:

—¿Mé má cuatjin chja maestru tsëhë ley xi titjun Elías cuinduva me, sehe cuinduva me xi cuaxëtje naja?

¹²⁻¹³ Ngajan xi cafayangui Jesús cuitjin:

—Quixi xi Elías cuinduva me titjun ta, me vëhë cuiyujuchihin me yëjë ni xcusun. Peru ha canduva me, handasa hacuiin cojo ñihi rë me ta cojo ñihi rë cha Juan. Hane choho casahmi xuta cojo me sacuatjin chja xujun rë Nina. Hacuaha chja xujun xi cuacun vëhë ta handasa xi Quihndi rë Xuta Jain ngahan ne, hacuanitjin ne jemu jyë cjuañihi cuátju hacuaha tsitjungui xuta ngahan.

Jesús ne, sahmi xi mandaja ngu cha nixti xi jiya ra xitsehen

¹⁴ Xi tu cavuya cafehe Jesús cojo cha xi quijicojo me hiscan siu yahnga cha ladu rë me xi tejó jan ne, cavëë me xi tjercu siu xuta jan cojo ngujo cha maestru tsëhë ley siu me visiajmi me cojo cha. ¹⁵ Xi tu cavëë xuta jan xi cafehe Jesús ne, jemu quijircun rë me, vanga sanii me quiji cachja me nina cojo Jesús. ¹⁶ Ngajan xi Jesús ne, cavinenguise me cojo cha ladu rë me cuitjin:

—¿Mé xi visiajmu cojo xuta xi cuacun vë?

¹⁷ Hane ngajan ngajñi rë xutacjín xi siu jan ne, cavetjuiñi ngu me xi cachja me cuitjin:

—Maestro, canduvá cojo quihndi naha, tsëhë xi jiya xitsehen cahntsua xahasen rë cha. Hane tsëhë vëhë xi sahmi lihmi rë cha. ¹⁸ Hora xi faha xitsehen jan cha ne, ngutjen tsiticjahñu rë cha, hacuaha vaxë natyaxu hntsua cha, hisca tsijanerii nehñu cha jiña cha. Hane ngatsë rë vëhë ne, jemu jima ndaya cha. Hacuaha cachjá cojo cha ladu nuju xi cuaxëxin cha xitsehen tsëhë quihndi naha. Peru camaji cavaxëxin cha. —Cuatjin cachja me.

¹⁹Ngajan xi Jesús ne, cachja me cojo xuta xi siu jan cuitjin:

—¿Mé camá nuju ngayun xi macjaain camahani nuju? ¿Há jyë sa nixtin meje rë xi cuitejña cojo nuju? Nduvun cojo cha nguehe. —Cuatjin cachja me.

²⁰Hya xi camá ne, cafehe xuta cojo cha hiscan tacun Jesús. Xi tu cavëë xitsehen jan Jesús ne, marcu macjain catiticja rë cha nixti jan. Hane xi caticja cha ne, cavuya cavindefa cha cafaña cha. Hacuaha cavetju natyaxu hntsua cha.

²¹Ngajan xi Jesús ne, cavinenguisse me cojo nahmi rë cha cuitjin:

—¿Há tsëë xi cuitjin má rë cha?

Ngajan xi chja nahmi rë cha ta:

—Hisca cjuaquihndi rë cha, cuatjin má rë cha. ²²Jiya hora xi faha xitsehen jan cha ne, tsingatjeya rë cha xcun ndacahi. Tjin nga ne, tsingatjenya rë cha ngajñi nandan, ta meje tsiquehen rë cha. Vëhë xi sá xi tsejen xi ha hyun mé nihñu cojo cha ne, catamayuma nuju ngahan cojo quihndi naha, hane tisecon niji.

²³Ngajan xi cachja Jesús cojo nahmi rë cha ta:

—Há xa vë xi hvë. Sá xi macjain nuju ne, yëjë ni ne, cuma.

²⁴Ngajan xi nahmi rë cha ne, ngutjen cachja me cuitjin:

—Tatá. Macjain ná. Peru tisecon ná cojo sa xi cumacjain sa ná.

²⁵Xi vutsejen Jesús xi jercu tijima tangun xuta ne, cacjan me cojo xitsehen jan. Cuitjin cachja me:

—Ngaye xitsehen loho lihmi, tetjixin tsëhë cha vi. Hacuaha ha quihndë cuyiin cuisihin cahntsua xahasen rë cha.

²⁶Ngajan xi xitsehen jan ne, hisca cajindaya xi catsicuya catsindefa rë cha. Sehe cavetju quiji. Hane cha vëhë ne, jiña cahme cha. ²⁷Peru Jesús ne, cafaha me tsja cha catsisatjenhnga me cha, hane casecon cha.

²⁸Hya xi camá ne, quiji Jesús cojo cha ladu rë me, hane cavisehen me cahntsua

ndihya. Xi cavisehen me jan ne, sehe ngajan xi chja cha cojo rë me cuitjin:

—¿Mé má ngayin xi camaji canaxinxin xitsehen jan tsëhë cahntsua xahasen rë cha vë?

²⁹Ngajan xi cachja Jesús cojo cha cuitjin:

—Cuatjin camá nuju ta tsëhë xi xitsehen xi cuacun vë ne, meje rë xi titjun chjahyan rë Nina hacuaha cuinechan xun rë me, cojo sa xi cuma naxenxen.

Jesús ne, cachja me ta cueya me peru cuya me cjuahñu

³⁰Hya xi camá ne, sehe cavetju me quiji me taha distritu Galilea. Hacuaha mijí rë me xi cumachaya rë xuta jani taha tsujyihya me ta, ³¹tsëhë xi tivicuya me cha ladu rë me hacutjin cuatju me cumá. Cuitjin cavicuya me:

—Ha ndasa tsëhë Nina canduva Quihndi rë Xuta Jain ne, peru cjuaha xuta me ne, tsiquehen me me. Peru xi cjuë xi jyan nixtin ne, cuya nga me cjuahñu.

³²Peru cha ladu rë me ne, vijnii rcu cha tsëhë xi cueya Jesús, hacuaha cuya me cjuahñu. Hacuaha tsacjun cha cuinenguisse cha me cjuja jan.

¿Yo xi hitsë sa matitjun?

³³Hya xi camá ne, cafehe me nandya Capernaum. Hya xi cafehe me jan ne, cavisehen me cahntsua ndihya hisca cuiyuju me. Sehe ngajan xi cavinenguisse me cojo cha ladu rë me mé xi cavisiajmi cha cojo xicjin cha ngajan ndiya. ³⁴Hane tu jyu ni caviyuju cha ta xi cavisiajmi cha ndiya jan ne, cuitjin cachja cha:

—¿Jarë ngayaan xi hitsë sa venguichji naja?

³⁵Hya xi camá ne, quiji Jesús cavëjña me. Sehe ngajan xi cajindaya me yëjë tejó cha ladu rë me jan ne, sehe ngajan xi cachja me cojo cha cuitjin:

—Sá xi tjin ngu yun xi meje nuju xi cumatitjun ngayun ne, meje rë xi hacuiin

jemu jyë nihñu yojo nuju hacuaha cuise-cun xingun.

³⁶ Hya xi camá ne, cafaha me ngu lihndi, cavejña me cavasencja, hane sehe cavataha me. Hane ngajan xi cachja me cojo cha cuitjin:

³⁷ —Jarë ngayun xi ndaja nihñu cojo ngu lihndi sacuaha vihi xi ngatsë naha ne, sacuaha xi ngahan ndaja nihñu cojo ná. Hacuaha jarë ngayun xi ndaja nihñu cojo ná ne, hacuiin ngahan ni ta, hacuaha cojo Nahmi naha xi catsingatju ná me, cojo me vëhë ndaja nihñu cojo rë me.

Me xi hacuiin condra naja ne, ladu naja má me

³⁸ Ngajan xi cachja cha Juan cojo Jesús cuitjin:

—Maestro, cahyin ngu cha xi tijima tivaxëxin xitsehen tsëhë xahasen rë xuta, hane xi sahmi cha ne, cojo ñihi nuju veyanangui cha. Peru tsëhë xi hacuiin cha ladu naja cha ne, canújin cojo cha ta ha quihndë sahmi cha cuitjin.

³⁹ Ngajan xi Jesús ne, cachja me cuitjin:

—Xi cavichecjin tsëhë cha ta xuta xi cuma sahmi me cjuandaja vëhë, sacuaha xi ngahan jain cavitëxa rë me ne, cumaji xi ngutjen choho cuichja me tsahan. ⁴⁰ Xuta xi hacuiin choho vëë naja me ne, chuya rë me tsajan. ⁴¹ Cuichjá quixë cojo nuju ta yo me xi sua ngu vasu nandá siuhun, tsëhë xi vëë me xi xuta ladu naha ngayun, hacuaha vëë me xi ngahan xi catsingatju ná Nina ne, me vëhë ne, sacu rë me ngu cjuandaja xi sua Nina.

Cjuatsavi xi ticojo rë xi cuixuya गयाan xcun ngu jyë

⁴² Peru yo xi nduvacojo xcusun xi sahmi xi tsismicacun ngu quihndi ndiya naha ne, hitsë sa ndaja tsëhë xuta vëhë xi xtyangui ngu ndyojo natsi nguisin me sehe ningatjeya rë me ngajñi ndacha-

cun. ⁴³ Hane sá xi cjuatacun nuju meje rë xi nihñu ngu jyë cojo ntsun ne, vengui sa chji rë xi chandunxun ntsun ta, jemu sa ndaja tsujun xi cuma yoho yun xcun Nina, xi cumá rë xi cuechun xcun xitsehen cojo ntsun ngajñi rë ndihi jyë xi tsajin nixtin hvo. ⁴⁴ Ngajan cuinechun, hiscan xi cjuin nuju cjuañihi ta ndihi ne, tsajin nixtin xi hvo. ⁴⁵ Sá xi cjuatacun nuju meje rë xi nihñu ngu jyë jani xi cuangun ne, vengui sa chji rë xi chandunxun ntsacun ta, jemu sa ndaja cuechun xcun Nina xi yoho yun xi cuma rë xi cuechun xcun xitsehen cojo ntsacun. ⁴⁶ Ngajan xcun xitsehen vëhë ne, cjuin nuju cjuañihi ta ndihi ne, tsajin nixtin hvo. ⁴⁷ Hacuaha sá xi cjuatacun nuju meje rë xi chutsujun xcusun xi ndajintjin xi chutsujun ne, chuhunxun tuxcun jan chandunxun, ta tsëhë xi hitsë sa ndaja tsujun xi sacu nuju cahndë ngajan hiscan sahmi Nina gobiernu handasa cojo ngu ni tuxcun xi cuma rë xi cojo castijo tuxcun cuechun xcun ndihi xi sahmi castigu rë nima. ⁴⁸ Ngajan xcun xitsehen ne, ngajan cjuin nuju cjuañihi ta ndihi ne, tsajin nixtin hvo.

⁴⁹ Hya xi tsichuva Nina ngayëjë ni xuta há ndaja há ndajin casahmi me ne, me xi tsajin mé casahmi ne, Nina ne, jemu chuya rë me. Hya xi Nina cjuahatsja me ngu cjuatjo xi tahan rë me ne, sá xi cojo naxa sehen ndaja ne, jemu chuya rë me.

⁵⁰ Naxa ne, jemu ndaja. Peru sá xi cjuë xtya rë ne, machjiriin. Cjuandaja rë Nina ne, hacuaha jemu ndaja. Vëhë xi chjuhun cjuandaja rë Nina, teyun cahntsua xahasen nuju, hacuaha ndaja tinechun cojo xingun.

Jesús ne, fi nga me nandya Nasaret

10 Hya xi camá ne, cavetju Jesús tsëhë nandya Capernaum quiji me distritu Judea cojo ngunda ndajyë Jordán. Hacuaha jercu cjin nga xuta qui-

jitjengui rë me. Hane sacuaha xcusun xi ha sahmi Jesús ne, cavetsihin cavicuya nga me xuta jan. ²Hya xi camá ne, ngujo cha tsëhë partidu fariseo ne, quiji cha hiscan tacun Jesús. Vinenguise cha me tsëhë xi ngu xihin, ¿há ndatjin xi tsismi chjuun rë? Cuatjin cachja cha ta tsëhë xi meje cjuahachuva cha me cojo cjua rë me. ³Ngajan xi cafayangui me tsëhë cha cuitjin:

—Moisés ne, xutachanga naja ne, ¿mé cavitexa naja me?

⁴Ngajan xi cafayangui cha tsëhë me cuitjin:

—Moisés ne, casua me cahndé xi ngu xihin ne, cuma cuejña cha ngu xujun tsja chjuun rë cha xi ha quihndé mijí rë cha na. Hane xi cuatjin ne, cuma tsismi cha na.

⁵Sehe ngajan xi Jesús ne, cachja me cojo cha cuitjin:

—Ngatsë rë cjuataja rë xahasen nuju ne, vëhë xi Moisés ne, casua me cahndé xi cuatjin nihñu. ⁶Peru hya xi casahmi Nina ngasunhndë ne: “Casahmi me xi chjuun xi xihin xuta.” ⁷“Vëhë xi ngu xihin ne, cuejña cha nahmi rë cha, hacuaha cuejña cha naa rë cha, ⁸hane cumatangun cha cojo chjuun rë cha sacuaha ngu ni xahasen.” ⁹Ha quihndë hacuiin jo ta sacuaha xi ngu ni xahasen. Hane tsëhë xi ha Nina cachja me xi cuatjin cuma ngu xahasen me ne, ndajintjin xi xuta ne, tsinguetsuntaha me tsëhë xicjin me. —Cuatjin cachja Jesús.

¹⁰Ngajan xi hya xi Jesús tacun ndihya me cojo cha ladu rë me ne, cavinenguise nga cha me ngu ndiya tsëhë cjuavisiajmi vëhë. ¹¹Ngajan xi cachja me cojo cha cuitjin:

—Yo xi tsismi chjuun rë hane cuixan cojo ngu sa chjuun ne, jemu jyë jyë rë xi cuatjin sahmi. ¹²Hacuaha sá xi ngu chjuun tsismi na xihin rë na hane cuixan na cojo ngu sa xihin ne, hacuaha jemu jyë jyë rë na.

Jesús ne, tsinchacun me langa

¹³Jinguyëjë rë xi tivisiajmi Jesús cojo cha ladu rë me ne, cavetsihin tjemu canduva xuta cojo quihndi rë me, xi cuisanetsja Jesús nixti jan cojo sa xi sacú rë cjuandaja rë me. Peru cha ladu rë Jesús jan ne, cacjan cha cojo xuta jan ta, xi má rë cha ladu rë me ne, mahyiin rë Jesús. ¹⁴Hya xi cavëë Jesús xi cuatjin sahmi cha ladu rë me ne, camacjan rë me cojo cha. Ngajan xi cachja me cuitjin:

—Tuhun cahndé catinduva tjengui suva ná nixti. Xi canichuun cahndé xi cuma rë ta, xuta xi sahmi me yojo rë me sacuaha ngu quihndi ne, xuta vëhë xi sahmi me sacuatjin vitexa Nina. ¹⁵Cuichjá cojo nuju cjuaquixi ta yo xi meje cuisehen gobiernu rë Nina ne, cuma cuisehen peru sacuaha ngu quihndi. Sá sahmii cuatjin ne, cumaji cuisehen.

¹⁶Ngajan xi Jesús ne, cavataha me nixti jan. Hane hora xi cavisanetsja me ne, cachja me cjuandaja rë me cojo.

Ngu cha nchina ne, chja cha cojo Jesús

¹⁷Hya xi camá ne, cavetju me quiji me jingu sa cahndé. Hane ndiya cjuí me ne, vanga ngu cha cafehe cha cavixcuhnchi cha xcun me xi faharcun cha me. Sehe chja cha cojo me cuitjin:

—Ngayun maestro. Jemu ndaja ngayun. Nújun, ¿mé xi sahme xi cuma sacú ná cjuahñu xatsë? —Cuatjin cachja cha.

¹⁸Ngajan xi Jesús ne, cafayangui me tsëhë cha cuitjin:

—¿Mé má cuatjin noje xi ndaja ngahan? Tsajin xuta xi ndaja suva ni Nina xi ndaja me. ¹⁹Ha hye cjua xi cavitexa Nina: “Xi caniquiin xuta. Xi canihñii chjuun nahñu riji jingu sa chjuun. Hacuiin mé chjehehmi tsëhë xuta. Xi canujiin cjuandesu tsëhë xuta. Xi cavin-

dachiin rē xuta. Chjehercuin nahmi riji hacuaha chjehercuin ná riji.” Vēhē cjua xi cavitexa Nina.

²⁰ Ngajan xi cachaja cha cojo Jesús ta:

—Maestro, yējē cjua vēhē ne, hisca cjuanixti naha ne, ha cahndē.

²¹ Xi cahndē Jesús cjua rē cha ne, jemu cachuya rē me tsēhē cha. Ngajan xi chja me cojo cha ta:

—Machaja sa ri ngu xcusun. Tjihin ne, titeñi yējē xi tjin ri hane tujún xi sacu ri ne, tehe rē xuta yuma. Hane sehe ndovetjengui ná. Sá xi nihñi cuatjin ne, xi cjuehe xcun Nina ne, ngajan sacú ri cjuanchina xi ndajyihi.

²² Xi cahndē cha cjua vēhē ne, jemu choho camá rē cha. Va va má cacun cha, cavetju cha cafe cha ta, tsēhē xi jemu nchina cha.

Jesús ne, chja me tsēhē cjuanchina

²³ Ngajan xi Jesús ne, vutsejen me yējē ni ladu hiscan siu cha ladu rē me ne, sehe cachja me cojo cha cuitjin:

—Jemu chja tsēhē ngu xuta nchina xi cuisehen me ladu rē Nina.

²⁴ Ngajan xi cha ladu rē me ne, jemu quijircun rē cha xi cuatjin cachja me. Ngajan xi cachja nga Jesús cojo cha cuitjin:

—Compañeru, jercu chja tsēhē xuta xi cuisehen me ladu rē Nina. ²⁵ Sacuatjin rē naxin xi cumaji cuatju chu ngojo rē nindu ne, cuatjin rē xuta xi jemu meje rē me cjuanchina ta, cumaji cuisehen me ladu rē Nina.

²⁶ Xi cahndē cha ladu rē me cjua vēhē ne, jemu quijircun camahani rē cha. Ngajan xi cachja cha ngajñi rē cha cojo xicjin cha:

—¿Peru yo ni xi cuma cuetjutje ni?

²⁷ Xi cavuya me vutsejen me hiscan siu cha ne, ngajan xi cachja me cuitjin:

—Yējē ni xi maji sahmi xuta ne, Nina ne, hatuxa ma sahmi me.

²⁸ Ngajan xi cavetsihin cachja cha Pedru cojo Jesús cuitjin:

—Chutsujun ni. Ngayin ne, canismitacuin yējē ni xcusun, hane cavisihin ladu nuju.

²⁹ Ngajan xi cachja Jesús ta:

—Cuichjá quixē cojo nuju ta, tu yo ni xi tsismicacun ndava, tsismicacun hntsē, tsismicacun tichja, tsismicacun naa rē o sá nahmi rē o sá quihndi rē, hacuaha tsismicacun nangui rē xitjē rē ngatsē naha cojo ngatsē rē cjua rē Nina ne, jinguyējē rē xi ngasunhndē vihi tacun me ne, ³⁰ sacú rē me ngu cientu sa quisun tsēhē ngu ngu xcusun xi catsismicacun me. Cjín ndava me sacu rē me. Cjín hntsē me sacu rē me. Cjín tichja me sacu rē me. Cjín naa rē me sacú rē me. Cjín quihndi rē me sacú rē me. Hacuaha cjín nangui rē xitjē rē me sacu rē me. Handasa cojo cjuañihi, peru sacú rē me. Hane hya xi cueya me ne, cuechú me cjuahñu xatsē xcun Nina. ³¹ Tsēhē xuta xi matitjun quihndē ne, jemu cjín me xi cumachjiriin hya xi cuinduva Nina ngasunhndē. Hane xuta xi hacuiin matitjun quihndē ne, hya ne, cumachji rē me xi cuma titjun me. —Cuatjin cachja me.

Jesús ne, camá jyan ndiya xi chja me xi cueya me

³² Hya xi camá ne, hora xi jiya ndiya Jesús cjuí me cojo cha ladu rē me nandya Jerusalén ne, titjun Jesús cjuí me. Hane cha ladu rē me ne, jercu fircun ra, tsēhē xi tsacjuiin Jesús xi cjuí me. Hane xuta xi tjengui cjuí cojo me jan ne, hacuaha jemu tsacjun me má. Ngajan xi Jesús ne, cajindaya nga me cha ladu rē me xi tejó ni jan, sehe cavetsihin cachja me cojo cha xcusun xi ha tacun xati xi cuatju me cuma. ³³ Cuitjin cachja me:

—Tinuhyun ni, tivanguen nandya Jerusalén. Hane ngajan ne, tjin yo me xi cuiteña ná ngajan cojo nahmi xi matitjun cojo cha maestru tsēhē ley. Cu-

atjin sahmi me ha ndasa xi ngahan xi Quihndi rë Xuta Jain. Hane xuta xi cuacun vë cuichja me xi cueya ngahan, hacuaha sua nga me ngahan cojo xuta rë jingu sa nandya. ³⁴ Sehe tsixcuehyu me ngahan. Cuëhënatya me ngahan, cuaja me ngahan, hisca tsiquehen me ngahan. Peru xi cjuë jyan nixtin ne, cúa nga cjuahñu.

Santiago cojo Juan ne, fehya me Jesús ngu cjuandaja

³⁵ Xi cajnetaha cachja Jesús cuatjin ne, sehe quiji cha Jacobo cojo cha Juan, quihndi rë Zebedeo, quiji tjengui tiña cha Jesús. Ngajan xi chja cha cojo rë me cuitjin:

—Maestro. Nihñu favor ne, cjua xi chjahyinu nuju ne, ningatuhun niji.

³⁶ Ngajan xi cachja me cojo cha cuitjin:

—¿Mé xi meje nuju xi sahme ni?

³⁷ Ngajan xi chja cha cojo rë me cuitjin:

—Tuhun cahndé xi ngu ngu ngayin ne, cuinechintihin ngu ngu ladu tjehe nuju, hya xi nihñu gobiernu nuju.

³⁸ Ngajan xi cachja Jesús cojo cha cuitjin:

—Ngayun ne, hyuun mé xi chahyun. ¿Há scaa nuju cuatju cjuañihi xi cuátju ngahan ni?

³⁹ Ngajan xi cachja cha ta:

—Scaa niji.

Ngajan xi cachja nga Jesús cojo cha cuitjin:

—Cjuañihi xi cuatju ngahan cumá ne, hacuaha cojo ngayun cuatjun cumá.

⁴⁰ Peru xi cuinechuntuhun ngu ngu ladu tjehe naha ne, hacuiin ngahan cuichjá ta xcusun vëhë ne, sacu rë xuta xi cuichja Nina xi sacu rë me cahndé.

⁴¹ Xi cahndé cha xi tã jan cjua xi cachja Jesús ne, cavetsihin camacjan rë cha cojo cha Jacobo cojo cha Juan. ⁴² Hya

xi camá ne, cajindaya Jesús cha xi tã jan ne, cachja me cojo cha cuitjin:

—Ngayun ne, ha hyun ta xuta matitjun nguehe ngasunhdë jemu sahmi yehe me yojo rë me, ta jercu meje cuitexa me. ⁴³ Peru hacuiin cojo ngayun cuatjin nihñu ngajñi nuju ta xi meje rë ne, jarë ngayun xi meje nuju xi cumatitjun ngayun ne, nihñu xa rë xingun sacuaha mosu. ⁴⁴ Hane jarë ngayun xi meje nuju xi xingun ne, cjuaharcun me yun ne, nihñu xa rë xingun sacuaha mosu xi caxteña. ⁴⁵ Hisca ngahan ne, Quihndi rë Xuta Jain má ngahan, peru hacuiin canduvá xi xuta cuisecoo ná me ta ngahan cuisecoo rë xuta. Hisca tsingatehen xi tsiquehen ná xuta, cojo sa xi cjín xuta cuaxëtje Nina me. —Cuatjin cachja Jesús.

Jesús ne, sahmi me xi cuma scutsejen cha rcá xi hmí rë Bartimeo

⁴⁶ Hya xi camá ne, cjuí cjuí me cojo cha ladu rë me ne, cavechu me nandya Jericó. Xi cavatju me tsëhë nandya vëhë cojo xutacjín xi ticojo me ne, cavechutaha me cha quihndi rë Timeu, cha xi hmí rë Bartimeo, ngu cha rcá, hane tifehya cha caridad tjehe ndiya. ⁴⁷ Xi cahndé cha rcá jan xi Jesús tsëhë nandya Nasaret hacui me xi nduva me, jercu cachja cha:

—Jesús, quihndindaicjin rë David, catamayuma nuju ngahan.

⁴⁸ Hane cavisiajmicjan xuta jan cojo cha ta, catisejyu cha. Peru hitsë sa hñu chja cha cuitjin:

—Quihndindaicjin rë David, catamayuma nuju ngahan.

⁴⁹ Ngajan xi casecunhñu Jesús. Sehe ngajan xi chja me cojo cha ladu rë me cuitjin:

—Chjindayun rë cha.

Hya xi camá ne, cha ladu rë me jan ne, cajindaya cha cha rcá jan, sehe cachja cha cojo cha cuitjin:

—Tehe cjuetacun xahasen riji quen. Tisatjinhngue ta, jindaya me ngaye.

⁵⁰ Cuatjin camá xi cafaha cha tsjanga rë cha catsingatjenxin cha. Sehe marcu macjain casecun cha. Sehe quijitjengui cha Jesús. ⁵¹ Hane xi cavechutaha cha me ne, ngajan xi cachja me cojo cha cuitjin:

—¿Mé xi meje ri xi sahmi cojo ri?

Ngajan xi cachja cha rcá jan ta:

—Maestro, xi meje ná ne, xi cuma tse-jen ná.

⁵² Ngajan xi cachja Jesús cojo cha cuitjin:

—Ndatjin. Cuma cjuihin ta, caman-daja ye, tsëhë xi camacjain ri ngahan.

Hane ha hora vëhë ni ne, camatsejen rë cha. Hane quiji cha cojo rë me hacutjin cjuí me.

Tivisehen Jesús nandya Jerusalén

11 Hane xi camatiña me Jerusalén xi ha cjuaha me nandya Betfajé cojo Betania, quiji me ndetjun xi hmí rë Ndetjun Olivu, ngu ndetjún xi tiña tacun cojo nandya xi cuacun vëhë ne, catsingatju me jo cha ladu rë me quiji cha tixa.

² Cuatjin cachja me cojo cha:

—Tangun nandya xi tsejen vë. Hane xi tu cjuhun tjeheh nandya ne, sacú nuju ngu burru xatsë xi hisca ngu cjëë cui-jin rë chu, quitahahñu chu ngajan. Hane chundecjun chu, sehe nduvuncujun chu.

³ Sá xi yo xi cuichja cojo nuju ta: “¿Mé má cuatjin chundecjun chu ne?”, cuitjin tinújun: “Me xi matitjun tsijin meje rë me chu. Peru sehe tsicuya nga me chu.”

—Cuatjin cachja Jesús cojo cha.

⁴ Hya xi camá ne, quiji cha tixa xi cachja Jesús cojo cha. Xi tu cafehe cha ngajan ne, casacu rë cha ngu chu burru xatsë quitahahñu chu ngajan ndiya tiña tingotjo ndihya. Hane cavundecja cha chu.

⁵ Hane ngujo cha xi hinchacun jan ne, cachja cha cojo cha ladu rë Jesús cuitjin:

—¿Mé má cuatjin cachundecjun chu burru vë?

⁶ Ngajan xi cachja cha ladu rë Jesús hacutjin cachja me cojo cha. Sehe cha xi cuacun jan ne, casua cha cahndé quijicojo cha cha ladu rë Jesús chu burru jan. ⁷ Hane sehe quijicojo cha chu hiscan tacun Jesús. Hacuaha casua cha tsjian rë cha casesun ngaxtun chu sehe camiji me chu. ⁸ Hya xi camá ne, jemu cjín xuta xi cacandi me tsjian xcun rë me ndiya hacutjin cjuí Jesús. Hane ngujo nga me ne quiji cavotohosun me xca xcuen ngajan nguijná, hane hacuaha cacandi me ndiya hacutjin cjuí Jesús cojo sa xi tifaharcun me me.

⁹ Hane yëjë me xi cjuí titjun cojo yëjë me xi tjengui jan ne, cavetsihin jercu cajindaya me cachja me:

—Nacuechji rë Nina ta cafehe me xi catsingatju Nina. ¹⁰ Catsinchacun me me xi cuitexa naja sacuaha cavitexa David xutachanga naja. Jemu catsincha-cun Nina me xi nduva tsëhë xi Nina catsingatju rë me. —Cuatjin cajindaya xuta.

¹¹ Xi tu cavisehen me nandya Jerusalén ne, quiji me yungun xi matitjun. Xi tu cavutsejen nguehe cavutsejen ngajan me ne, mé ta quiji hora ne, cavetju nga me cojo cha ladu rë me xi tejó jan ne, cavuya cafehe nga me nandya Betania.

¹² Xi camá nchujun jan ne, cavuya cavetju nga Jesús tsëhë nandya Betania. Hane ha jemu vojo rë me hora xi cavetju me. ¹³ Hya xi camá ne, tsëhë cjin ni cavëë me ngu yaxujun xi chine tú rë xi jemu ndaja tsejen yaha xca rë. Hane quiji me hiscan secun, sá sacu sinë me. Peru xi cafehe me ngajan ne, tsajin camahani mé xi casacu rë me, tsëhë xi hacuiin nixtin rë tuhaxi jan. ¹⁴ Ngajan xi cachja me cojo ya jan cuitjin:

—Quihndë tsajin nixtin xi cuaqui tú riji xi sinë xuta.

Hane cha ladu rë me ne, cahndë cha cjua rë me.

Cavaxë Jesús xuta xi sahmi ndatsin ngajan yungun xi matitjun

¹⁵ Hya xi camá ne, cafehe me nandya Jerusalén. Xi cafehe me ngajan ne, quiji me ndatsen yungun xi matitjun jan. Hane cavetsihin cavaxë me xuta xi sahmi ndatsin ngajan. Catsindefa me maxë rë xuta xi tsindeya tujún. Hacuaha cacandi me siya rë xuta xi viteña nisë tyava. ¹⁶ Hane casuaain me cahndë xi tjin mé xi cjuaha xuta xi cuatjuvasen me ndatsen yungun jan.

¹⁷ Sehe cavetsihin cavicuya me xuta jan cuitjin:

—Ngayujun ni ne, ha hyun xi cuitjin cachja Nina xcun xujun rë me: “Ndya naha ne, ngu ndihya xi vinduva xuta tsëhë yëjë ni nandya cuisiajmi me cojo ná.” Peru ngayun ne, tinihñu ndava Nina vi sacuaha ndava chëjë. —Cuatjin cachja Jesús.

¹⁸ Hya xi camá ne, xi cahndë nahmi xi matitjun cojo maestru tsëhë ley cjua jan ne, cavetsihin cavangui me chuva rë xi cuma tsiquehen me Jesús. Cuatjin meje rë me tsëhë cjuaxin xi tjin rë me, tsëhë xi yëjë xuta ne, jemu quijircun rë hacutjin cavicuya Jesús. ¹⁹ Xi quiji hora ne, cavetju nga Jesús tsëhë nandya jan cojo cha ladu rë me.

Caxi ya xujun xi cama cjan rë Jesús cojo

²⁰ Hane xi camá nchujun jan ne, cavuya cafe nga me nandya Jerusalén. Hane xi cavatju nga me hiscan secun ya xujun jan ne, cavëë me xi ya xujun jan ne, cafë caxi hisca rcu hisca ntsacu. ²¹ Ngajan xi cha Pedru ne, catsinguitsjen cha cjua xi cachja Jesús cojo ya jan ngu-jña ne, sehe ngajan xi cachja cha cojo Jesús cuitjin:

—Maestro. Chutsujun ta ya xujun xi canújuncun cojo jan ne, cafë caxi.

²² Ngajan xi cafayangui Jesús tsëhë cha cuitjin:

—Catamacjain nuju tsëhë Nina. ²³ Cuichjá cojo nuju ngu cjuaquixi ta tu yo ni xi cuichja cojo naxi vëhë cuitjin: “Tihinxin tsëhë nguehe, tihin tisihin ngajñi ndachacun”, sá xi hacuiin majo cacun, sá xi macjain jain rë hacutjin xi cachja ne, cuatjin jain cuma. ²⁴ Vëhë xi chjá cojo nuju ta yëjë ni xi chjahyun cojo Nina ne, ningatuhuntacun sacuaha xi ha casacu nuju ta xi cuatjin ne, sacu jain nuju. ²⁵ Hora xi chjahyun rë Nina ne, sá xi tjin yo xi choho cachja tsujun, o sá xi choho casahmi tsujun ne, ninchatuhun rë, cojo sa xi Nahmi naja xi tacun ngahnga ne, hacuaha tsinchataha nuju me tsëhë jyë nuju ta, ²⁶ sá xi ninchatuun rë me ne, Nahmi naja xi tacun ngahnga ne, hacuaha tsinchataain nuju me. —Cuatjin cachja me.

Finenguisen xuta ¿yo casuaxa rë Jesús?

²⁷ Cjui cjui me ne, cafehe me nandya Jerusalén. Hane xi cafehe me jan ne, quiji me yungun xi matitjun. Hora xi tsujyihya me ndatsen yungun jan ne, nahmi xi matitjun cojo maestru tsëhë ley cojo sa xuta changá xi yahnga jan ne, cafehe tjengui me Jesús. ²⁸ Hane cuitjin cavinenguise me:

—¿Yo cavitexa ri xi cuatjin nihñi xcusun vë? ¿Yo casuaxa ri?

²⁹ Ngajan xi Jesús ne, cachja me cojo xuta jan cuitjin:

—Cjuinenguësë nuju ngu cjua. Hane sá xi nicuyun tsahan ne, sehe cuichjá cojo nuju yo cavitexa ná xi sahme xcusun vëhë. ³⁰ Ngayun mé nújun, ¿Yo xi cavitexa rë cha Juan xi cavitenda cha xuta? ¿Há Nina cavitexa me cha ne, há xuta cavitexa me cha? Tinújun cojo ná.

³¹Ngajan xi vetsihin visiajmi xuta jan ngajni rē me cojo xicjin me cuitjin:

—Sá xi cuinújan xi Nina cavitexa me ne, cuichja me vihi cojo naja cuitjin: “Sá xi cuatjin ne, ¿mé má camacjaain nuju xi cachja cha ni?” ³²Peru ¿há cuma cuinújan xi xuta cavitexa me cha?

Cuatjin casacuinyiin rē xuta xi cuacun vē mé cja xi tsicuya me tsēhē Jesús ta, tsēhē xi tsacjun me xutacjin, tsēhē xi yējē ni xuta jan ne, macjain rē me xi cha Juan ne, Nina cavitexa jain me cha xi suacuenda cha cja rē Nina. ³³Vēhē xi hya xi cafayangui me tsēhē Jesús ne, cachja me cuitjin:

—Hyiin.

Ngajan xi hacuaha Jesús ne, cachja me ta:

—Sá xi cuatjin ne, ta mijí nicuyun cja tsahan ne, hacuaha cuichjaain cojo nuju yo cavitexa ná xi sahme xcusun vihi.

Ejemplu tsēhē cha mosu xi choho cjuatacun rē

12 Sehe cavetsihin cavicuya Jesús xuta jan ngujo cja, peru cojo suva ejemplu cachja me. Cuitjin cavetsihin me cja:

—Cuejña xi ngu xihin ne, catsitjē me nahnu rē uva ngu rquí nangui. Hacuaha casahmi me hnhua xondyojo rē tahn-dee rē xitjē jan. Ha ngajan ne ne, caphanguiya me ngu ndyojotē hiscan cuaxē nandá rē tuhaxi jan. Hacuaha casahmi me ngu cahndé hiscan xi cavesun me ngu nachan ngahnga xi sesun xuta xi sahmi cuidadu xitjē rē me.

Hya xi camá ne, casuatsja me cojo jingu sa xuta xi sahmi cha cuidadu rē, hane cjuaha me tsē tsē cojo rē cha. Sehe cavetju me quiji me ngu nanguicjin. ²Xi cavechú nixtin tsēhē tutjē jan ne, catsingatju me xi tsēhē jan ngu mosu hiscan xi quitaha xitjē rē me, xi cjuahatsja cha tsēhē xi satē rē me. ³Hya xi camá ne, xi cavechu cha mosu jan ne, cavaja

xuta xi tacun tsja xitjē jan cha mosu jan. Hane catsicuya cha cha cafe cha.

⁴Ngajan xi me xi tsēhē jan ne, cavuya catsingatju nga me ngu mosu quiji. Hane xi cavechu mosu vēhē ngajan ne, me xi siutaha jan ne, cavanguihmu me rcu cha, hacuaha choho cachja me cojo cha.

⁵Cafē ne, me xi tsēhē jan ne, cavuya catsingatju nga me ngu mosu. Peru mosu jan ne, catsiquehen me xi cuacun jan cha. Cafē vēhē ne, catsingatju camaha sa cha mosu. Hane ngujo mosu jan ne, tu cavaja ni cha. Hane ngujo nga ne, catsiquehen camahani cha.

⁶Quihndē me xi tsēhē cahndé jan ne, ngu ni quihndi tjin rē me ne, vēhē sa tacun. Handasa jemu hmucacun me cha ne, peru catsingatju me cha, tsēhē xi cuitjin catsingatahacacun me: “Quihndi naha vi ne, cjuaharcun me cha.” ⁷Peru xi cafehe cha quihndi rē me ngajan ne, ngajan xi chja xuta xi sahmi cuidadu xitjē jan cojo xicjin me ta: “Cha vihi quihndi xi cjuahatsja cha cahndé vihi. Quihndē ne, niquen cha, cojo sa xi cumá tsajan nangui.” ⁸Hya xi camá ne, cafaha me cha catsiquehen me cha, sehe catsingajexin me cha tsēhē cahndé jan. Cuatjin casahmi me xi cuacun vē.

⁹Hindē ne, me xi tsēhē nangui jan ne, ¿mé sahmi me cojo xuta xi siutaha cuidadu rē xitjē jan? Hatuxa cjue me ne, tsiquehen me me, hane sua me cahndé jan cojo jingu sa xuta.

¹⁰Quihndē, ngayun ne, ha chutayuun cja tsēhē xujun rē Nina xi chja cuitjin: Ndyojo xi chja cha chjinevexo xi machjiriin ne,

ndyojo vēhē xi cachja Nina xi cuejña tjun tjun yuju rē xihndēnaña.

¹¹Cuatjin casahmi Nina xi cumá hacuaha jemu chuya rē xahasen naja xi cuatjin camá.

¹²Hya xi camá ne, xuta changá xi cafehe tjengui rē Jesús jan ne, meje cjuaha me me, tsēhē xi camachaya rē me

xi condra rë me xi cachja Jesús. Ha ndasa meje cjuaha xuta changá jan Jesús ne, peru xi tsacjun me tsëhë xutacjín jan ne, ha quihndë tsajin mé casahmi me, hane cafe me.

Cjuacjintacun tsëhë tujúnsa

¹³ Hya xi camá ne, xuta changá xi cuacun jan ne, catsingatju me ngujo cha tsëhë partidu fariseo cojo ngujo cha ladu rë Herodes xi cjuahangahma cha Jesús, cojo sa xi xuta changá jan ne, cuma cuinchajyë me me. Xi tu cafehe cha ne, ngajan xi cachja cha cojo rë me ta:

¹⁴ —Maestro. Ngayin ne, hyin ta ngayun ne, quixi cjuu tsujun. Ha tuxa cjuaquixi xi nújun ha ndasa xi cojo xuta nchina visiajmu o sá cojo xuta yuma. Tu yo ni ne tangun ni visiajmu cojo ta tsëhë xi ngayun ne, vicuyun ndiya rë Nina cojo cjuaquixi camahani. Quihndë ne, sacuahale rë Moisés ne, ¿há sua cahndë xi cuechjen tujúnsa naja cojo César, me xi matitjun, o há suaain cahndë? —Cuatjin cavinenguise cha.

¹⁵ Peru Jesús ne, tsëhë xi ha vacun rë me xi jemu ndacha cha ne, cuitjin xu cachja me cojo cha:

—¿Mé má cuatjin meje chuhunchuvun ná? Nduvuncujun ngu tujún scutséjen.

¹⁶ Hya xi camá ne, cha xi cuacun jan ne, canduvacojo cha ngu tujún tyava. Ngajan xi cachja me cojo cha cuitjin:

—¿Yo xcusun rë hacuaha yo ñihi rë xi quitahá xcun tujún vë? —Cuatjin cavinenguise Jesús.

Ngajan xi chja cha cojo rë me cuitjin:

—Tsëhë César. —Chja xu cha.

¹⁷ Sehe ngajan xi Jesús ne, cuitjin xu cachja me cojo cha:

—Sá xi cuatjin ne, tuhun rë César xi tsëhë me; hane tuhun rë Nina xi tsëhë me. —Cuatjin cachja Jesús.

Hya xi camá ne, jemu quijircun rë cha xi cuatjin ndaja cachja Jesús.

Cjuu chjinenguise hacutjin cumá xi cuya cjuahñu

¹⁸ Hacuaha canduva tjengui rë me ngujo cha tsëhë partidu saduceo, cha xi vicuya ngu cjuachacun xi chja xi hya xi cueyan ne, ha quihndë cuyaaín cjuahñu naja. Hane cuitjin cachja cha ngujo cjuacojo Jesús:

¹⁹ —Maestro. Moisés ne, catsihindu me xcun xujun rë Nina xi sá xi ngu xihin cueya, hane tsajin rë chjuun rë hisca ngu quihndi ne, hntsë nima vëhë ne, meje rë xi cjuaha rë chjuun cahan vëhë, cojo sa xi sacú rë na quihndi xi cuma sacuahale quihndi rë nima vëhë. ²⁰ Quihndë ne, cuejña xi ngu ndihya ne, siu yatu cha cojo hntsë cha. Hane cha tjun ne, cafaha cha chjuun. Peru cahme cha, hane chjuun rë cha vëhë ne, casacuiin rë na hisca ngu quihndi cojo cha. ²¹ Hya xi camá ne, hntsë nima vëhë, cha xi majo ne, cafaha cha na cahan vëhë camá chjuun rë cha na, peru hacuaha cahme cha hane casacuiin rë na quihndi. Hacuanitjin ni cafaha cha xi majyan jan na, ²² hisca xi cafë yëjë xi yatu cha cafaha cha na. Peru yëjë cha xi cuacun vëhë ne, cafë cha cahme cha chuva ngu chuva ngu cha. Hane na vëhë ne, casacuiin rë na hisca ngu quihndi cojo cha xi cuacun vëhë. Hiscan xi cajneta ne, hacuaha cahme na. ²³ Quihndë ne, ¿mé nújun? Hya xi cuya yëjë nima cjuahñu ne, ¿jarë jain cha xi chjuun rë cha na xi cjuaquixi? ta yëjë xi yatu cha ne, cavixan cha cojo rë na. —Cuatjin cavinenguise cha.

²⁴ Ngajan xi cachja Jesús cojo cha cuitjin:

—Ngayun ne, cuaaintjin xi nújun, tsëhë xi vijni rcun cjuu xi chja xujun rë Nina, hacuaha hyuun xi Nina ne, jemu hñu cjuatacun rë me. ²⁵ Hya xi cuya cjuahñu rë nima ne, ha quihndë hacuiin cuixan me hacuaha hacuiin tsin-

guixan me, ta tangun cumá sacuahá xi siu ángel ngahnga ne, cuatjin cuiyuju me. ²⁶ Hacuaha quihndë xi tinújan tsêhë nima xi cuya cjuahñu rë ne, ngayun ne, sacuahá xi cjêë chutayun xujun xi catsihindu Moisés hacutjin cahndë me cjua rë Nina xi cavetju tsêhë cahntsua ngu ya lihndi xi seti. Cuitjin cachja Nina cojo me hya: “Ngahan xi Nina rë Abraham ngahan. Nina rë Isaac, hacuahá cojo Nina rë Jacobo má ngahan.” Cuatjin cachja Nina tsêhë xuta xi ha cahme me. ²⁷ Peru Nina ne, hacuiin nina rë nima ta nina rë xuta xi quicun me. Hane sá xi quicun nima jan, ngajan tsejen xi cjuachacun xi nújun ne, quixiin.

Artículo tsêhë ley xi hitsë sa venguichji rë

²⁸ Hacuaha cafehe ngu cha maestru tsêhë ley hiscan tacun Jesús. Hane xi cahndë cha cjuavisiajmi rë me ne, xi ndaja cama catsicuya Jesús, ngajan xi cavinenguise cha me cuitjin:

—Maestro, tsêhë yêjê ni cjua xi cavitexa Nina naja xcun xujun ley ne, ¿jarë artículo xi hitsë sa matitjun?

²⁹ Ngajan xi cafayangui Jesús cuitjin:

—Xi matitjun ne, cuitjin chja: “Ngayujun ni ngayun xuta ladu rë nangui Israel, Nina naja ne, ngu tu tu ni me. ³⁰ Meje rë xi nihña hmutacun Nina, me xi matitjun tsajan, cojo ngayêjê ni cjuatacun naja, cojo ngayêjê ni xahasen naja, hacuahá cojo ngayêjê ni ngahñu naja.” ³¹ Hane xi má jo ne hacui vihi: “Meje rë xi nihña hmutacun xingueen sacuatjin hmutacun suvaan yojo naja.” Tsêhë yêjê ni artículo xi cavitexa Nina ne, jo ni cjuatacun vêhë xi matitjun. —Cuatjin cachja Jesús.

³² Ngajan xi cachja cha maestru tsêhë ley cojo rë me cuitjin:

—Ndatjin canújun, maestro. Canújun cjuaquixi ta Nina naja ne, ngu tu tu ni me. ³³ Hacuaha ndatjin canújun xi meje rë xi nihña hmutacun Nina cojo

ngayêjê ni cjuatacun naja, cojo ngayêjê ni ngahñu naja, hacuahá meje rë xi nihña hmutacun xingueen sacuahá nihña hmutacun yojo naja suvaan. Cjua vêhë ne, tjercu venguichji rë. Hisca vengui sa chji rë xi cuma rë yêjê ni cjuandaja cojo yêjê cjuatjo xi cjue xcun Nina.

³⁴ Xi tu cahndë Jesús ta ndatjin cafayangui cha maestru jan ne, ngajan xi cachja me cojo cha cuitjin:

—Ha jemu hitsë sa chaja xi cuisuhun ladu rë Nina.

Ha quihndë tsajin yo xi macacun sa cjuinenguise rë me ngu cjua.

¿Yo tjê rë má me xi hmí rë Mesías?

³⁵ Ngajan xi Jesús ne, hora xi tivicuya me xuta ngajan yungun xi matitjun ne, cachja me cojo xuta cuitjin:

—Maestru tsêhë ley ne, chja cha ta Cristu, me xi tsingatju Nina xi cumatitjun tsajan ne, tjê rë David má me. ³⁶ Peru suva David ne, catsihindu me cjua xi cachja Hasen rë Nina cojo rë me cuitjin:

Nina ne, cachja me cojo Nai naha cuitjin: “Tinechin ladu quixi naha

hiscan hya xi yêjê xi sahmi condra ne, cuiyuju ngahan ngahma gobiernu riji.”

³⁷ Ndatjin, sá xi cuatjin cachja David tsêhë me ne, ¿há cuma xi hisca tjê rë David má me ni, hacuahá matitjun nga me tsêhë David ni? —Cuatjin cachja Jesús.

Hane xutacjín ne, jemu cojo cjuasua cavisinuju me cjua rë Jesús.

³⁸ Hacuaha cuatjin cachja nga me ngu ndiya xi tivicuya me xuta:

—Tjin nuju cuidadu. Hacuuiin cojo ngayun nihñu sacuatjin sahmi cha maestru tsêhë ley. Cha xi cuacun vêhë ne, jemu meje tsujyihya chacun cha hacuahá meje rë cha xi cuichja xuta nina cojo cha ngajñi ndetsin.

³⁹ Hacuaha hora xi fi cha yungun ne,

cjue cha cuiyuju cha ngu cahndé ndatjin hiscan viyuju xuta xi matitjun. Ha cuanitjin ni hiscan xi cjue siné cha ngu ndava suhi ne, fi cha viyuju cha cahndé ndatjin hiscan viyuju xuta xi matitjun.⁴⁰ Hacuaha yachjin cahan ne, jemu cjín tujún vaxë cha na. Hisca ndava na tsajin. Hane hisca xi chjayuma cha ne, jemu nduju hora chja cha, peru hacuiin nguñaja cacun cha chja cha. Vëhë xi cha xi cuacun vë ne, hitsë sa jyë castigu cuatjun cha, xi cuma rë jingu sa xuta.

Tujún chjë rë na cahan

⁴¹ Sehe quiqi cavéjña me tiña hiscan xi tacun caxa xi xinha tujún chjë rë Nina, vutsejen me hacutjin vincha xuta tujún. Hane jemu cjín xuta nchina quiqi cavincha me chjë rë, jercu cjín tujún cavincha me.⁴² Hya xi camá ne, cojo ngu na cahan xi jemu yuma camahani quiqi cavincha na jo tujún siné xi jemu chuva chji rë cahntsua caxa jan.⁴³ Ngajan xi Jesús ne, casahmitangun me cha ladu rë me, sehe cachja me cojo cha cuitjin:

—Cuichjá cojo nuju cjuaquixi ta xuma chjuun cahan vihi ne, hitsë sa vengui chji rë tujún xi cavincha na, xi cumá rë tujún xi jemu cjín cavincha cha nchina jan ta,⁴⁴ tsëhë xi cha xi cuacun vëhë ne, xi vangui rë cha ne, vëhë xi cavincha cha. Hane ha ndaja na vëhë ne, cojo cjuayuma xi tacun na ne, tujún xi cavincha na jan ne, ha vëhë yëjë ni xi tjin rë na. —Cuatjin cachja Jesús.

Jesús ne, chja me ta yungun xi matitjun ne, cuetsunya

13 Hya xi camá ne, hora xi tivetju Jesús tsëhë ndatsen yungun xi matitjun jan cojo cha ladu rë me ne, ngajan xi chja nga cha ladu rë me jan cojo rë me cuitjin:

—Maestro, chutsujun ndyojo xi texo yungun vihi ta tjercu tu ndacun cama-

hani. Hacuaha ndihya tsëhë ne, jercu tu cun camahani.

² Ngajan xi chja Jesús cojo cha cuitjin:

—Sacuaha ndihya ndacun xi chutsujun ne, cuechu nixtin xi hisca xi ngu ndyojo vi ne, tsajin hinchasuncoo xicjin ta, cjuë yëjë cuixujne.

Hacutjin cumá hya xi cjuë ngasunhndë

³ Cafë cachja me cuitjin ne, sehe cavetju me quiqi me cojo cha ladu rë me, cafehe me tiña rcu Naxi Olivu, quixi rë tingotjo yungun xi matitjun jan. Hane xi quijixin me cojo cha Pedru cojo cha Jacobo cojo cha Juan cojo cha Andrés, sehe cavinenguise cha me cuitjin:

⁴ —¿Janihya cuetjucaa xcusun vëhë xi canújun?

⁵ Ngajan xi cachja Jesús cojo cha cuitjin:

—Nechun cuidadu cojo sa xi hacuiin cuma ndacha ngayun ta,⁶ tsëhë xi jemu cjín xuta cjuehe me xi cuichja me cueyanangui me ñihi naha cuichja me xi hacui me xi Cristu me. Hane cuatjin jemu cjín xuta cumacjain rë me cjuandacha rë me xi cuacun vë.

⁷ Hacuaha hya xi cumachaya nuju cjuaxi jemu yehe si tijima ne o sá xi tjin cjuacjintacun ta jemu yehe si nduva ne, hacuiin cumacjintacun ta ha tuxa cuatjin cuma. Peru hacuiin ha hya cjuë nixtin rë ngasunhndë vihi.⁸ Xuta nandya scaan cojo xuta xi hacjahi. Ngu nación cojo ngu nga ne, scaan. Hacuaha cjín cahndé xi cjuani nangui. Hacuaha cjín cahndé ne, cuma jindya. Cuatjin cumá xi cuet-sihin cjuañihi xi cuatju xuta.

⁹ Nechun cuidadu ta, cuechu nixtin xi xuta nandya ne, cjue cani nuju me xcun xutaxa rë yungun ne, hacuaha cuaja nuju me. Hacuaha tjin nuju xi cuangun xcun xutaxa rë ndihyavasen cojo xcun gobernador ngatsë rë xi macjain nuju ngahan. Hane ngajan ninguxun yëjë cjuaxi

hacutjin cavicuyá nuju. ¹⁰Peru chaja sa xi cjuë ngasunhndë ne, meje rë xi cuichja xuta ladu naha cjuä rë Nina jingujyë ni nandya tsëhë ngasunhndë. ¹¹Hora xi cjuï chani nuju xcun xutaxa rë ne, hacuiin cumacjintacun tsëhë cjuä xi cuinújun jan ta, Hasen rë Nina ne, scuxaha cjuatacun nuju hora vëhë hacutjin cuinújun. Hacuaha vëhë ni cuinújun ta tsëhë xi hacuiin cjuatacun nuju xi cuinújun ta cjuatacun rë Nina xi sua nuju Hasen rë Nina. ¹²Xuta nandya ne, cuinchajyë me hntse me, cuinchajyë me xutacha rë me, hacuaha cuinchajyë me quihndi rë me, cojo sa xi xutaxa rë ne, cjuaha me xuta xi cuacun vë ne, tsiquehen me. ¹³Hane yëjë xuta ne, choho scuëë nuju me ngatsë naha. Peru jarë ngayun xi scaa nuju cojo cjuacjintacun vëhë hisca xi cueyun ne, cuechun xcun Nina. —Cuatjin cachja Jesús.

Cjuacjintacun jyë xi cuma

¹⁴Yo xi scutaya cjuä xi sehe nduva vi ne, meje rë xi ndaja catetaharcun. Tjin xcusun xi tsinguetsun rë cahntsua yungun xi matitjun. Hane hya xi cjuehe ngu xcusun xi cuacun vë hiscan xi ndajintjin xi cjuehe ne, yëjë ni xuta xi siu ladu tsëhë distritu Judea nixtin hya ne, ngutjen ni catangahma me hiscan ndetjun. ¹⁵Hacuaha jarë me xi hinchasun rcu ndava xi cuitujne me, hacuiin cuijne me xi cuisehen me cahntsua ndihya cjuaha me mé tsëhë me xi cjuaha me. ¹⁶Hacuaha yo xi hinchataha me nguijña ne, mijí rë xi cuya cjue me ndava me xi cjuejaha ndastu tsjanga rë. ¹⁷Jemu chojyih tsëhë yëjë ni yachjin xi hinchahma quihndi rë cojo yëjë me xi tjin rë quihndi vaqui ne nixtin hya. ¹⁸Chjahyun rë Nina xi cjuañihi vëhë ne, hacuiin cuinduva nixtin chan hnchan ta, ¹⁹cjuañihi xi cuma ne, ngu cjuañihi jyë xi cjëë camahani cumá hisca ntsacu cavetsihin ngasunhndë hacuaha cuyaain

cuatjin cuma. ²⁰Sá xi jemu cjín nixtin cjuecani rë cjuañihi vëhë ne, hisca ngu xuta ne, cuetjintjin me. Peru ngatsë rë cjuahmutacun xi tjin rë Nina cojo xuta xi cavaxijin me xi cumá me ladu rë me ne, sahmichuva me nixtin vëhë.

²¹Nixtin vëhë ne, sá xi yo xi cuichja cojo nuju xi ngajan o sá xi nguehe tacun me xi má Cristu, xi camacjaain nuju ta quixiin xi chja me. ²²Ngujo xuta vindacha ne, cuichja me ta: “Ngahan xi Cristu xi cumatitjun ngahan tsujun.” Ngujo nga me ne, cuichja me ta: “Ngahan xi chjá cjuä rë Nina.” Peru vindacha ni me, quixiin cjuä xi cuichja me. Hacuaha sahmi me xcusun sacuaha cjuarcun, tsëhë xi hisca cojo xuta xi cavaxijin Nina meje cuindacha me. ²³Nechun cuidadu ta cojo chaja sa xi cuechu nixtin vëhë ne, ngahan ne, ha casua camachaya nuju xi cuatju vë.

Xi cuya nga Jesús ne, cumatsejen hasen rë ngahñu rë me

²⁴Xi cuatjun nixtin tsëhë cjuañihi jan ne, cuinduva nixtin xi cjuë ndavá rë tsuhi. Sá ne, hacuaha ha quihndë suaain ndavá rë. ²⁵Hane niñu ne, cuixu tsëhë ngahnga. Hisca ngahñu xi yaha ngahnga ne, cjuiniyaya. ²⁶Xcun cjuacjintacun vëhë ne, scuëë xuta xi ngahan, Quihndi rë Xuta Jain, cuinduvá ngajñi rë yuffi cojo jemu jyë ngahñu hisca seti tsejen ngahan xi nduvá. ²⁷Hya ne, tsingátju ángel naha yëjë ni ladu tsëhë ngasunhndë, cjuejaha rë yëjë xuta naha xi cavaxejen, sahmi tangun rë hiscan tejña.

²⁸Quihndë ne, cuetaharcun ngujo cjuä tsëhë yaxujun xi chine tú rë. Hya xi cuetsihin cumá xcuen tsja rë yaxujun jan tsëhë xi cuetsihin cuetjusehen ne, ngayun ne ha hyun ta ha jemu camatiña chan tsi. ²⁹Hacuaha xi cjuehe cjuañihi xi cachjá cojo nuju ne, vëhë sua cumachaya nuju ta ha tiña tacun xi cjuë ngasunhndë, hisca meje cumá. ³⁰Cuichjá cjuaquixi

cojo nuju ta xuta xi siu quihndë ne, siu cuaha me hya xi cuetjucaa xcusun xi cachjá cojo nuju. ³¹ Cuechu nixtin xi cjuë nangui, cjuë ngahnga. Peru cjua naha ne, tsajin nixtin xi cjuë.

³² Sacuaha nixtin xi cuetjucaa cjuat-acun vëhë ne, tsajin yo vëë rë janihya cuetjucaa. Hisca hvíin ángel xi siu ngahnga. Hisca hveen ngahan xi Quihndi rë Nina. Suva ni Nina ngu tutu nahmi naja ne, me vëhë xi vëë me janihya cumá.

³³ Vëhë xi nechun cuidadu, hacuaha ningascun rë hitsë cjuatacun nuju ta, ngayun ne, hyuun janihya xi cjuehe Nai nuju. Vëhë xi chjá cojo nuju ta ningascun rë hitsë cjuatacun nuju ta ngayun ne, hyuun janihya cúya, ¿há jñu ne?, ¿há ñahñu cjuëhë? ³⁴ Ngahan ne, sacuaha ngu xuta xi cuetju cjue ngu nangui cjin. Chaja sa xi cuetjun me tsëhë ndava me, cuichja me cojo mosu rë me mé xa sahmi jimangu mosu. Hacuaha cuiteza ngu mosu xi cuahacuenda tingotjo ndava me. Cuatjin sahme. ³⁵ Vëhë xi chjá cojo nuju ta ningascun rë hitsë cjuat-acun nuju ta ngayun ne, hyuun janihya cúya, ¿há jñu ne, há nixten ne, há tiña sahasen, o sa sahasen camahani cúya? Sa xi ñahñu cjuëhë hane tsajin tjin chjine ngayun. ³⁶ Cuidadu sá xi ngu ñahñu nduvá hane ngayun ne, tsajin tjin chine ngayun. ³⁷ Xi chjá cojo nuju ne, ha cuanitjin ni chjá cojo yëjë ni xuta: Meje rë xi catitsingasca me hitsë cjuatacun rë me. —Cuatjin cachja Jesús.

Me xi matitjun ne visiajmicjin me hacutjin cuma xi cjue Jesús ndavaya

14 Hya xi camá ne, casahmi chaja sa jo nixtin xi cuechu suhi tsëhë pas-cua ne, sacuaha xcusun niji ne, hya chini pan xi tsajin san rë. Ngajan xi nahmi xi matitjun jan cojo cha maestru tsëhë ley ne, jemu tivangui me chuva rë xi cuindacha me Jesús, cojo sa xi cuma cjuaha

me me tsiquehen me me. ² Peru cachja me cojo xicjin me cuitjin:

—Ndatjin xi cuinechanyan ne, cuatju suhi sehe chjahanhma cha, ta sá xi tsajin ne, tu cumacjan rë xutacjín hane cumá ngu suë jyë.

Cavitejnu ngu chjuun aceite xi jemu ndaja jne rcu Jesús

³ Hya ne, Jesús ne, nandya Betania quitaha me. Tacun me ndava cha Simón, cha xi camandaja tsëhë chíhin cjan rë xi cafaha rë chuxin yojo rë. Hora xi tacun me tijinë me niñu ne, cafehe ngu na xi yaha na ngu frascu ndyojo, hinchaceite tsëhë nardo xi jercu hnga chjí rë. Hane xi cavotohosun na rcu frascu hiscan hinchaceite jan ne, sehe quiji cavitejnu na aceite jan rcun Jesús. ⁴ Ngujo me xi siu jan ne, camacjan rë me xi cuatjin casahmi na. Hane sehe cachja me ngajñi rë me cojo xicjin me cuitjin:

—¿Mé má cuatjin tu catsinguetsun na aceite vë? ⁵ Sá xi xteña vë, sacú tujún sacuaha tujún xi sacu rë ngu mosu xi casahmi xa ngu nu, hane tujún vëhë ne, cuma cuisecoo rë xuta yuma. —Cuatjin cachjataha me na.

⁶ Ngajan xi cachja Jesús cuitjin:

—Xi canujuun tsëhë na. ¿Mé má cuatjin tivichuncjun tsëhë na? ta, jemu venguichji rë xcusun xi casahmi na cojo ná. ⁷ Xuta yuma ne, yëjë nu yëjë nixtin siu me ngajñi nuju. Peru ha ndaja ngahan ne, hacuiin jyë nixtin tejña cojo nuju. ⁸ Na vihi ne, casahmi na hacutjin xi chutaha na. Hane cojo chaja sa xi cueya ngahan ne, cavitejnu ná na aceite xi cuëhëchjine ni na yojo naha xi seyaniji ngahan. ⁹ Cuichjá quixë cojo nuju ta tuyani tsëhë jingu jyë ngasunhndë xi cuichja xuta cjua tsëhë Nina ne, hacuaha cueyanangui me na vihi cojo sa xi xuta xi yahnga ne, cumachaya rë me xcusun xi casahmi na cojo ná. —Cuatjin cachja Jesús.

Judas ne, viteña me Jesús

¹⁰ Hya xi camá ne, cha Judas tsêhê nandya Queriote, cha ladu rê Jesús tsêhê cha xi tejó jan ne, quiji cha xcun nahmi xi matitjun ne, cavêhê chihin cha cjua cojo rê me xi sahmi me entregadu cha Jesús cojo rê nahmi jan. ¹¹ Hya xi cahndê nahmi xi matitjun jan cjua rê Judas ne, jercu ndama camahani rê me. Hacuaha ngutjen ni cachja me ta, sua me cha tujún. Hane ngajan xi cha Judas jan ne, cavetsihin cavangui cha chuva rê hacutjin xi cuma sahmi entregadu cha Jesús.

Tisehen chjinê xi sinê me tsêhê pascua

¹² Hya xi camá ne, nixtin tjun tjun tsêhê suhi xi chini pan xi tsajin san rê, nixtin xi hacuaha niquihin chu tsánga tsêhê suhi tsêhê pascua ne, hya ne, cha ladu rê Jesús ne, cavinenguise cha cojo rê me cuitjin:

—¿Jani hiscan xi meje nuju xi cuanguin cuihinchjini xi xinê nguixun tsêhê suhi vi?

¹³ Ngajan xi catsingatju me jo cha ladu rê me quiji cha tixa. Hane cuitjin cachja me cojo cha:

—Tangun nandya Jerusalén. Hane ngajan cuechuntuhun ngu cha xi nduva ne, quisun rcu cha ngu nisa nandá. Tangun cojo cha hacutjin cjuí cha. ¹⁴ Hane ndihya xi cuisehen cha ne, tinújun cojo me xi nai rê ndihya jan cjua vihi: “Cuitjin chja maestru ta, ¿jarê cuarto hiscan xi sinê nguixun me cojo niji tsêhê pascua?” Cuatjin tinújun cojo me. ¹⁵ Hane me vêhê ne, cjue tsingacun nuju me ngu cuarto jyê ngajan ndihya ngahnga hiscan xi ha tjin chjine. Hane ngajan tuhundujun xi xinê.

¹⁶ Hane ngajan xi cavetju cha xi cuacun jan quiji cha. Xi cafehe cha nandya Jerusalén ne, cuatjin camá tu tjin cachja

Jesús cojo cha. Hane cavêhê ndaja cha xi sinê nguixun me cojo rê cha.

Pascua xi vijnetaha cajnê Jesús

¹⁷ Xi quiji hora jan ne, cafehe Jesús cojo yêjê tejó cha ladu rê me. Hane quiji me caviyuju me. ¹⁸ Sehe cavetsihin cajnê me. Hora xi tijinê me jan ne, ngajan xi cachja Jesús cuitjin:

—Nguehe cuichjá cojo nuju cjuaquixi ta ngu ngayun xi nechan tichine cojo nuju guehe ne, nihñu ná entregadu. —Cuatjin cachja me.

¹⁹ Ngajan xi jemu choho camá rê cha, cavetsihin cha cachja cha chuva ngu chuva ngu cha, cuitjin cachja cha:

—Hacuiin ngahan.

²⁰ Ngajan xi cachja Jesús cuitjin:

—Ngajñi nuju xi tejó ngayun, ngajan jiyajñi ngu xi sahmi cuitjin. Ngu me xi ngu ni tyuva tsinguísehe quinda niñu naha cojo ne, me vêhê xi sahmi ná me entregadu. ²¹ Ngahan xi Quihndi rê Xuta Jain ne, hatuxa tjin xi cueyá ta, xujun rê Nina ne, cuatjin chja. Peru xuma cha xi cuiteña ná. Vengui sa chji rê sá xi catsiin camahani cha.

Jesús ne, vindeya me xcusun rê pascua, cumá cena tsêhê Nai naja

²² Hora xi ha camatiña xi cuijnetaha sinê me niñu ne, cafaha Jesús ngu niñutsju, hane casua me nacuechji rê Nina, sehe cavotohocja me niñutsju jan. Hane sehe casua me ngu rquí ngu rquí niñu jan cha ladu rê me, hane cuitjin cachja me cojo cha:

—Juhun vihi ta, vihi ne, yojo naha. —Cuatjin cachja me.

²³ Hacuaha cafaha nga me ngu vasu xi hincha xan rê uva, hane casua nga me nacuechji rê Nina. Hane sehe casua me tsê tsê cahvi cha jima ngu cha ladu rê me. ²⁴ Hacuaha cachja me cojo cha cjua vihi:

—Vihi jni naha xi cuetju ná ngatsë rë xuta. Xcusun vihi ne, ngu compromisu xatsë xi sehe tivëhëchihin Nina cojo xuta cojo sa xi jni naha ne, vëhë cuaxëtje rë xuta. ²⁵ Cuichjá quixë cojo nuju ta ha quihndë cueen xan rë uva nguehe ngasunhndë. Cuëhë, peru hisca hya xi nduva Nina cuitexa me ngasunhndë, hya cuëhë, peru hacuiin tangun cumá. —Cuatjin cachja Jesús cojo cha ladu rë me.

Jesús ne, chja me ta Pedru cuichja me xi viin me yo xi Jesús

²⁶ Xi cajnetaha cajnë me ne, casë me ngu tsëhë Nina. Sehe cavetju me quiji me Naxi Olivu. ²⁷ Hane sehe ngajan xi chja me cojo cha ladu rë me cuitjin:

—Ngayujun ni ngayun cumanguaintacuun cojo ná ta cuma sacuahha camahindu xcun xujun rë Nina xi chja cuitjin: “Nina ne, tsiquehen me cha xi sahmi cuidadu rë chu tsánga. Hane chu tsánga ne, cuitsojo chu.” ²⁸ Cuatjin cumá, peru hya xi cúa nga cjuahñu naha ne, cjué titjun tsujun hiscan distritu Galilea.

²⁹ Ngajan xi cachja cha Pedru cojo Jesús cuitjin:

—Ha ndasa ngayëjë cha xi cuicun vi cuejña suva cha ngayun ne, peru ngahan ne, cuejña nuju suvun.

³⁰ Ngajan xi cachja Jesús cojo cha cuitjin:

—Cuichjá quixë cojo ri ta tajñu ni xi chaja sa squindaya xahnda ne, ha jyan ndiya cuinoje xi hyiin yo ngahan. —Cuatjin cachja me.

³¹ Peru cha Pedru ne, cavuya cachja nga cha cjua vihi:

—Ha ndasa hisca cueya cojo nuju ne, peru cuichjaain xi hveen yo ngayun. —Cuatjin cachja cha.

Hacuaha cuantijin ni cachja cha xi yahnga.

Jemu chja vatju Jesús ngajan Getsemaní

³² Hya xi camá ne, cavetju me quiji me ngu cahndë xi hmí rë Getsemaní. Ngajan xi cachja me cojo cha ladu rë me cuitjin:

—Nechun ni nguehe ne, cjué cuisiajme cojo Nina. —Cuatjin cachja me.

³³ Hya xi camá ne, cavaxë me cha Pedru cojo cha Jacobo cojo cha Juan, quiji me cojo cha. Ha xcun xi ha cjui cjui me jan ne, cavetsihin jemu casercun rë me, hacuaha macjincacun me. ³⁴ Ngajan xi cachja me cojo cha cuitjin:

—Jercu choho má camahani rë xahasen naha. Xi má ná ne, cueya tsëhë. Nechun ni nguehe cuacun ngayun cojo ná. —Cuatjin cachja me.

Oración xi tjun

³⁵ Sehe ngajan xi Jesús ne, quiji me hitsë ni nguvan. Hane ngajan cafañat-sacjan me, cafehya rë me Nina sá xi tjun tu mé ni xi cumá cojo sa xi cuatjiin me cjuacjintacun xi cuatju me jan. ³⁶ Hane cuitjin cafehya rë me Nina:

—Papá. Xi cumá nuju ngayun ne, yëjë ni xcusun ne, hacuiin chja cuma. Vëhë xi tifëhya nuju xi naxuntjun ná tsëhë cjuacjintacun xi cuátju cumá. Cuatjin meje ná, peru cjua xi cuinújun ne, cuatjin catama. —Cuatjin cafehya rë me Nina.

³⁷ Hya xi camá ne, cavuya cafehe nga me hiscan siu cha ladu rë me xi quijicojo me jan. Hane xi vutsejen me ne, siufë cha. Ngajan xi chja me cojo cha Pedru cuitjin:

—Simón, ¿mé má tsjuñife? ¿Há camaji cavacun ngayun cojo ná hisca ngu hora?

³⁸ Nechun quicun, hacuaha chjahyun rë Nina cjuandaja rë me, cojo sa xi hacuiin chjaha chuva nuju cojo cjuatacun nuju. Xahasen nuju ne, ndaja meje rë xi nihñu, peru yojo nuju ne, chuva caa rë. —Cuatjin cachja me cojo cha.

Oración xi majo

³⁹ Hya xi camá ne, quiji nga me ngu ndiya hitsë ni nguvan. Hane ha cjua vëhë nga ni cavuya cafehya rë me Nina. ⁴⁰ Hya xi cavuya nga me ne, siufë nga cha ladu rë me xi jyan jan, tsëhë xi ha quihndë ticaain rë cha xi jemu ni-jña rë cha. Xi catsingasca Jesús cha ne, sacuniyiin rë cha mé cuichja cha cojo me.

Oración xi má jyan

⁴¹ Xi cavuya me xi quiji me má jyan ndiya ne, cachja me cojo cha ladu rë me jan cuitjin:

—Ha tsjuñufun cuaha. Juun, peru ha camá. Ha cavechu hora xi ngahan, Quihndi rë Xuta Jain, cjuaha ná xuta tsehen ta, ha caxteña ngahan. ⁴² Tisatjunhngun, cuanguen chutsejen ta, ha nduva cha xi sahmi ná entregadu. —Cuatjin cachja me.

Cjuicojo cha Jesús ndavaya

⁴³ Ha tu tichja cuaha Jesús cojo cha ladu rë me ne, cafehe cha Judas, cha xi cojo jiyajñi ngajñi rë cha xi tejó jan. Hacuaha jercu cjín xuta tivisecoo rë cha hora xi nduva cha. Yaha me quicha. Yaha me ya. Nahmi xi matitjun cojo cha maestru tsëhë ley cojo xuta changá jan ne, me vëhë cavitexa me xutacjín jan xi quiji jaha me Jesús. ⁴⁴ Chaja sa xi cjuehe cha Judas cojo xutacjín jan hiscan tacun Jesús ne, ha cachja cha cojo xuta jan cjua vihi:

—Cha xi cjué cuitátsuha xi suá rë nina ne, cha vëhë xi hacui cha. Chjuhun cha, hacuaha nihñu cha, sehe tangun cojo cha. —Cuatjin cachja cha.

⁴⁵ Xi tu cavechu cha hiscan nduva Jesús cojo cha ladu rë me xi yahnga jan ne, ngutjen quiji casahmi tiña cha tsëhë me, hacuaha casua cha me nina cuitjin:

—Cuhndanu, Maestro. —Cuatjin cachja cha.

Cafë cachja cha cuitjin ne, sehe cavitatsuha cha Jesús. ⁴⁶ Hya xi camá ne, quiji xuta jan ne, cafaha me Jesús.

⁴⁷ Ngajan xi ngu cha xi secun jan ne, cavaxë cha quicha nduju rë cha, hane cavaja rë cha ngu cha mosu rë nahmi xi matitjun ne, cavatësun cha ngu ladu tyjavañuju. ⁴⁸ Ngajan xi cachja Jesús cuitjin:

—¿Mé má sacuaha vangun chjuhun xuta chëjë ne, cuatjin nduvun chjuhun ná? ta, quichuhun quicha quichuhun ya. ⁴⁹ Ngahan ne, nchunchujun ni cavitejñaya yungun xi matitjun, cavicuyá rë xuta, hane ¿mé má cachjuun ná ngajan? Juun, peru cuatjin tijima cojo sa xi cuetjucaa jain hacutjin camahindu xcun xujun rë Nina.

⁵⁰ Hya xi camá ne, cha ladu rë Jesús ne, cavejña suva cha me, hane cafë yëjë cha cavanga cha.

Cha nixti xi cavanga hya xi cachjahá rë Jesús

⁵¹ Ngu sa cha jan yaja cha ngu tsjian tu të ni. Hane xi tu meje cjuaha xuta cha jan ne, tsjian ni rë cha cama cafaha me.

⁵² Peru cha vëhë ne, cama cavanga cha tu quixti ni.

Ficojo cha Jesús xcun nahmi xi matitjun

⁵³ Hya xi camá ne, quijicojo xuta jan Jesús xcun nahmi xi matitjun. Hane xi cafehe cha cojo Jesús jan ne, sehe camatangun yëjë ni nahmi xi matitjun cojo xuta changá cojo cha maestru tsëhë ley.

⁵⁴ Ngajan xi cha Pedru ne, quijitjengui cha Jesús tu cjin tu cjin ni. Cafehe cha hiscan ndatsen ndava nahmi xi matitjun jan. Hane ngajan cavëjña cha cojo cha nísë tjehe ndava ndihí, tsihasu rë cha yojo rë cha cojo cha nísë jan.

⁵⁵ Hane nahmi xi matitjun jan cojo yějě sa xuta xi matitjun ne, cavangui me xuta xi tsinguixi jyě rě Jesús, cojo sa xi cuma tsiquehen me me. Peru tsajin mé jyě rě Jesús casacu rě me. ⁵⁶ Ha ndasa jemu cjín xuta xi cavinchajyě me Jesús ne, peru suva cjuandesu yějě ni cjua xi cachja me ta, hacjahi chja ngu ne, hacjahi chja ngu. Hacuini tangun má cjua rě me. ⁵⁷ Ngujo me ne, chja me ta cahndě me xi cuitjin cachja Jesús: ⁵⁸ “Ngahan ne, tsinguétsun yungun xi matitjun xi casahmi xuta vė, hane cahntsua xi jyan nixtin ne, sahme nga ngu. Peru hacuiin cojo tsja xuta xi cuma hya.” Cuahaxutjin cahndě me xi cachja Jesús. ⁵⁹ Hisca me xi cuacun jan ne, hacuaha hacuiin tangun camá cjua rě me.

⁶⁰ Ngajan xi nahmi xi matitjun tsěhě nahmi xi yahnga jan ne, casecunvasen me, hane sehe cavinenguise me Jesús cuitjin:

—¿Há chjayinnguini hisca xi ngu cjua tsěhě jyě riji xi vincha xuta xi cuicun vi? —Cuatjin cachja me.

⁶¹ Hane Jesús ne, tu jyu ni casecun me. Hisca ngu cjua cafayanguiin me. Hya xi camá ne, cavinenguise nga nahmi xi matitjun jan ngu ndiya cojo Jesús cuitjin:

—¿Há ngaye xi Quihndi rě Nina naja? ¿Há ngaye xi catsingatju me xi cumá titjun tsijin?

⁶² Ngajan xi cafayangui Jesús cuitjin:

—Juun, ngahan. Hacuaha cjuehe nixtin xi chutsujun ná xi tejña ladu quixi tsěhě Nina. Hacuaha chutsujun ná xi cuinduva ngajñi rě yuff, xi cúa nga tsěhě Nina.

⁶³ Hane ngajan xi nahmi xi matitjun jan ne, jemu camacjan rě me ne, hisca tsjian rě me cavicheya me. Hane cuitjin cachja me:

—¿Mé sa cjua xi mameje? ⁶⁴ Ngayun ne, ha canuhyun hacutjin xi tsixcuehyu cha Nina. ¿Mé xi nújun quihndě?

Ngajan xi yějě xuta jan ne, cachja me ta meje rě xi cueya Jesús.

⁶⁵ Hane cavetsihin ngujo me cavěhě natya me Jesús. Hane hacuaha cavatsa me xcun Jesús, sehe cavetsihin cavaja me. Sehe ngajan xi cachja me cuitjin:

—Tinoje yo xi cavaja ri.

Hya xi camá ne, cavetsihin xi cha nísě jan ne, jemu cavaja cha me.

Pedru ne, fahma me Nai naja

⁶⁶ Jinguyějě rě xi cuatjin tijima ne, cha Pedru ne, tacun cha ndatsen ndihya. Hya xi camá ne, hora vėhě canduva ngu na xi sahmi xa ndava nahmi xi matitjun jan. ⁶⁷ Hane cavěě na xi tacun cha Pedru tsihasu rě cha yojo rě cha hiscan tacun ndava ndihi. Hane casecun na cafachacuenda na cha. Sehe ngajan xi cachja na cojo cha cuitjin:

—Ngayun ne, ladu rě Jesús tsěhě nandya Nasaret ngayun.

⁶⁸ Ngajan xi cachja cha Pedru cuitjin:

—Hisca hveen mé xi noje.

Hya xi camá ne, sehe cavetju cha quiji cha casecun cha hiscan tu cuiseen ni tsěhě ndatsen ndihya. ⁶⁹ Hane ngajan xi na xi sahmi xa tsěhě nahmi jan ne, cafachacuenda nga na cha hiscan quiseacun cha. Hacuaha cavetsihin nga na cachja na cojo xuta xi hinchacun jan cuitjin:

—Cha vėhě ne, ladu rě Jesús má cha.

⁷⁰ Xi tu cahndě cha Pedru xi cuatjin cachja na jan ne, ngutjen cafayangui cha xi quixiin xi chja na. Xi cafě ngu hora lihndi ne, hacuaha cachja xuta xi hinchacun jan cojo cha cuitjin:

—Quixi jain xi ladu rě Jesús má ngaye ta distritu Galilea ne, ngajan nangui riji.

⁷¹ Sehe ngajan xi hisca Nina caveyanangui cha Pedru ne, cachja cha xi hvín cha me, cuitjin cachja cha:

—Věě Nina jain xi hveen yo me xi nújun vė.

⁷² Hane hora vėhě ne, cajihnda xahnda. Hya xi camá ne, catsinguitsjen cha

Pedru cjua xi cachja Jesús cojo cha xi cachja me cuitjin: “Chaja sa xi squihn-dajo xahnda ne, ngaye ne, ha jyan ndiya cuinoje xi hyiin yo ngahan.” Hora xi catsinguitsjen cha cjua vëhë ne, cajihnda cha.

Ficojo cha Jesús xcun Pilatu

15 Hya xi casahasen xi camá nchujun jan ne, camatangun nga nahmi xi matitjun cojo xuta changá cojo cha maestru tsëhë ley cojo yahnga sa xutaxa rë xi hinchajni me. Sehe catsihñu me Jesús ne, sehe quijicani me xcun gobernador xi hmí rë Pilatu. ² Xi cafehe me cojo Jesús xcun Pilatu ne, sehe cavinenguise Pilatu cojo Jesús cuitjin:

—¿Há ngaye xi matitjun ngaye tsëhë xuta nangui Israel?

Ngajan xi cafayangui Jesús cuitjin:

—Cuatjin sacuaha canújun vë.

³ Hane ngajan xi nahmi xi matitjun jan ne, jemu cjín xcusun jyé xi cavincha me tsëhë Jesús. ⁴ Ngajan xi Pilatu ne, cavuya cavinenguise nga me Jesús cuitjin:

—¿Há chjayinnguini camahani? Jercu cjín jyé riji cavincha me.

⁵ Peru Jesús ne, ha quihndë cafayinnguini camahani me. Hane Pilatu ne, jemu quijircun camahani rë me.

Hacuiin Jesús ta Barrabás mandaya

⁶ Suhi vëhë ne, Pilatu ne, ha tuxa xcusun rë me xi nu nu ni vëhëndaya me ngu presu xi meje rë xuta xi cumandaya. ⁷ Ndavaya ne, jiya ngu presu xi hmí rë Barrabás cojo ngujo sa presu xi catsiquehen rë xuta tsëhë ngu si. ⁸ Hya xi camá ne, canduva xutacjín ne, cafehya me cojo Pilatu xi sahmi me vëhë sacuatjin xi ha xcusun rë me. ⁹ Ngajan xi cachja Pilatu cojo rë xuta jan cuitjin:

—¿Há meje nuju xi cuáxë cha xi matitjun tsujun?

¹⁰ Cuatjin cachja Pilatu ta tsëhë xi ha vëë me xi ngatsë rë cjuaxin sahmi nahmi

xi matitjun jan cojo Jesús, vëhë xi quijicani me Jesús ngajan. ¹¹ Peru nahmi xi matitjun jan ne, quiji cavinchangui me xutacjín jan xi meje rë me xi cuichja xuta jan xi catëhëndaya Pilatu Barrabás. ¹² Ngajan xi cavinenguise nga Pilatu cojo xutacjín jan cuitjin:

—¿Mé sahme cojo cha xi nújun xi matitjun tsujun ni?

¹³ Ngajan xi xuta jan ne, cuitjin jercu cachja me:

—Tetuhun cha xcun cru.

¹⁴ Ngajan xi cachja Pilatu cojo rë me cuitjin:

—Peru ¿mé xi choho casahmi cha?

Peru xuta jan ne, hitsë sa rcu cachja me cuitjin:

—Tetuhun cha xcun cru.

¹⁵ Hya xi camá ne, ta meje rë Pilatu xi cumangucacun xuta ne, cavëhëndaya me Barrabás. Hane xi cavatju catsingatju me Jesús casehen rë ne, sehe cavuya casua nga me cojo cha sindadu xi cjue cuetaha cha me xcun cru.

Jesús ne, quisun ngu corona tsëhë nahya rcu me

¹⁶ Hya xi camá ne, quijicojo cha Jesús taha cahntsua hinchua hiscan ndatsen ndava Pilatu. Hane sehe casahmi tangun sa cha yëjë sindadu cjín. ¹⁷ Hya xi camá ne, cavaxë cha tsjian rë Jesús, hane sehe catsicaja cha me ngu tsjian hani. Hacuaha catsihya cha ngu corona nahyá xi cavesun cha rcu me. ¹⁸ Sehe cavetsihin cavincha cha viva rë me xi tsixcuehyu cha me, sacuaha xi macjain rë me xi me vëhë matitjun me tsëhë xuta tsëhë nangui Israel.

¹⁹ Hya xi camá ne, sehe cavaja cha ngu rquí ya rcu me. Cavëhë natya cha me. Hacuaha cavixcuhnchi cha xcun me, sacuaha xi faharcun cha me. ²⁰ Hya xi cajnetaha catsixcuehyu cha me cuatjin ne, sehe cavaxë cha tsjian hani xi catsicaja cha me, hane sehe cavuya catsicaja nga

cha me tsjian rë me xi tsëhë jain me. Hya xi camá ne, sehe quijicojo cha me xi cue-taha cha me xcun cru.

Cavetaha cha Jesús xcun cru

²¹Ndiya cjui cha cojo me ne, cavechutaha cha ngu xuta changá xi hmí rë Simón tsëhë nandya Cirene, nahmi rë cha Alejandro cojo cha Rufu. Nduva me xi quiji me nguijnã. Hane xi cavechutaha cha me, casahmi cha me ngujoyë xi cuesuntyja me cru rë Jesús. Hya xi camá ne, cavesuntyja me, sehe quiji me cojo.

²²Sehe cavechu yëjë xuta jan hiscan xi hmí rë Gólgota, cjua xi meje cuichja Naxi Nínda Rcuun. ²³Sehe xuta jan ne, tisua me xan rë uva xi tecjan rë nandá rë tyjungunsa xi cuihi Jesús, peru cahviin me. ²⁴Hya xi camá ne, cavetaha cha me xcun cru. Hane tsjian rë me ne, cavin-cha rë cha ngu suerte ne, sehe cumat-sejen mé xcusun tsjian rë me xi satë rë xingu xingu cha.

²⁵Hya ne, chuva rë fane ñaja tsëhë nguitajñu. ²⁶Hane camahindu ngu le-treru cojo jyë rë me xi chja cuitjin: “Me xi Matitjun tsëhë Xuta nangui Israel.” Sehe quiji casetaharcu cru. ²⁷Hacuaha cav-ityangui cha ngu chëjë ngu ngu ladu rë tjeheh rë me, jimangu cojo cru rë. ²⁸Cu-atjin cavetjucaa cjua xi camahindu xcun xujun rë Nina xi chja cuitjin: “Cuichja xuta ta me vihi ne, ngu xuta tseheh me.”

²⁹Hya xi camá ne, xuta xi cavatju jan ne, xi catsixcuehyu me Jesús ne, catsiniya me rcu me, hacuaha cuitjin cachja me:

—Canoje xi cuma ninguetsin yungun xi matitjun, hane cahntsua xi jyan nix-tin ne, cama nga canindeje sove. ³⁰Qui-hndë ne, sá cuatjin cuma nihñi ne, nax-etje sove yojo riji, titujni tsëhë cru vë. —Cuatjin cachja xuta.

³¹Ha chuva vëhë ni, cavisiajmi nahmi xi matitjun cojo cha maestru tsëhë ley

ne, ngajñi rë me cojo xicjin me xi tsix-cuehyu me Jesús. Cuitjin chja me:

—Cavaxëtje cha xuta, peru quihndë ne, maji vaxëtje cha yojo rë cha. ³²Sá xi hacui jain cha xi catsingatju Nina xi cumatitjun tsajan ne, catitujne cha tsëhë cru chutsejen, cojo sa xi cumacjain naja tsëhë cha. —Cuatjin cachja me tsëhë Jesús.

Hacuaha cha chëjë xi cojo xtyangui taha cru jan ne, cojo cha choho cachja cha tsëhë me.

³³Xi camanchisen tsëhë nixtin vëhë ne, jingujoyë ni ladu vëhë ne, camajñu. Jyan hora quijicani rë. ³⁴Xi cafë jyan hora vëhë ne, jercu cajindaya Jesús, cachja me hne rë me cuitjin:

—Eloí. Eloí, ¿lama sabactani? —cjua xi meje cuichja cuitjin: Ngayun, Nina naha, ¿mé má canismutacun ná?

³⁵Hane ngujo xuta xi hinchacun jan ne, xi cavijniinrcu me hne rë Jesús ne, xi má rë xuta jan ne, nima Elías, ngu profeta tsëhë nixtin hatsëë, jindaya Jesús me.

³⁶Hane sehe cavanga ngu me quiji cat-sicahnchi me ngu tsjian hinda cojo xan rë uva xi ha san. Sehe cavetaha me rcu ngu ya nduju, sehe cavetaha me hntsua Jesús xi cuihingui me. Hacuaha chja me cojo xicjin me cuitjin:

—Cuinechanyan hitsë ne, ¿há cuin-duva jain Elías tsitujne me Jesús tsëhë cru?

³⁷Peru Jesús ne, hora vëhë jercu ca-jindaya me, hane cahme me. ³⁸Hacuaha hora vëhë ni ne, tsjian nduju xi tyjangui cahntsua yungun xi matitjun ne, hisca rcu hiscan ntsacu canduva catiyavasen. ³⁹Hya xi camá ne, ngu cha capitán tsëhë sindadu xi secun tiña cru hisca tyjan-gui Jesús jan ne, xi cavëë cha hacutjin xi cahme Jesús ne, ngajan xi chja cha cuitjin:

—Cjuaquixindaja xi me vihi xi Quih-ndi rë Nina me.

⁴⁰Hacuaha hinchacun sa ngujo yachjin, vutsejen na tsêhê cjin ni. Ngajñi rê na xi cuacun vêhê ne, quiseacun na Salomé cojo na María tsêhê nandya Mágdala cojo na María naa rê cha Jacobo lihndi cojo cha José. ⁴¹Na yachjin xi cuacun vê ne, cojo na cavisecoo na catsindaja na xi cajnê Jesús cojo cha ladu rê me, hya xi catsuyihiya me ngajan ladu tsêhê distritu Galilea. Hacuaha jercu cjin sa yachjin hinchacun na jan xi hacuaha cojo na quiji na ngajan nandya Jerusalén cojo Jesús.

Jesús ne, caseya me tsjun rê me

⁴²Nixtin xi cahme Jesús ne, hacuaha hya vispra tsêhê nixtin xi chjahájenda rê. Hane xi quiji hora jan ne, ⁴³ngu xutaxa rê xi tjemu chjahanrcun rê, xi hmí rê José tsêhê nandya Arimatea, me xi hacuaha tacunya nixtin xi cjuehe Nina cuma titjun me tsêhê yêjê Israel, cavejñahñu me cjuatacun rê me sehe quiji me ndava Pilatu. Hane cafehya me cahndê cojo Pilatu xi cjuahaxin me nima Jesús. ⁴⁴Hya xi camá ne, Pilatu ne, quijircun rê me xi cuatjin cachja José xi ha cahme nima ta, tsêhê xi cjêê jyê hora xi case-taha Jesús xcun cru. Hane vêhê xi catsingatju me quiji chjaha rê cha capitán. Hane sehe cavinenguise me cha sá xi quixi xi ha cahme jain Jesús. ⁴⁵Xi tu camachaya rê me cjua tsêhê cha capitán jan xi ha cahme jain Jesús ne, sehe ngajan xi cachja me cojo José ta cuma cjue tsitujne me nima. ⁴⁶Ngajan xi José ne, vêhê ta cavatsê me ngu tsjiantê xatsê ne, sehe quiji catsitujne me nima Jesús tsêhê cru, sehe cavaxtê rê me tsjian jan. Hane sehe cavaha me nima quijicojo me hiscan tacun rê me ngu tsjun xi cafanguitaha me cahntsua ngu naxi. Hane ngajan caveya me nima. Sehe catsindefajne me ngu ndoyojo jyê xi cavechja rê tingotjo tsjun jan. ⁴⁷Hane na María tsêhê nandya

Mágdala cojo na María naa rê cha José ne, cavêê na hiscan caseya nima.

Vuya nga Jesús cjuahñu

16 Xi camá nguixun tsêhê nixtin xi chjahájenda rê jan ne, na Salomé cojo na María tsêhê nandya Mágdala cojo na María naa rê cha Jacobo ne, cavatsê na rqui xi ndaja jne xi cuitejnu na nima. ²Xi casahasen domingu ne, hora xi tivetjucaa tsuhi ne, cavatju na yachjin jan quiji na hiscan tacun tsjun rê nima. ³Hane ngajñi cjuí na jan ne, ngajan xi chja na cojo xicjin na cuitjin:

—¿Yo cuisecoo naja xi nindefajne ndoyojo xi quitaha tingotjo rê tsjun jan?

⁴Peru xi tu cafehe na jan ne, ndoyojo jyê xi quitaha tingotjo rê tsjun jan ne, ha quihndê tsajin quitaha cahndê rê ta ha xin jiña. ⁵Xi cavisehen na cahntsua tsjun jan ne, cavêê na ngu cha xi tacun cha taha ladu quixi, yaja cha ngu tsjian tyava nduju. Hya xi camá ne, jemu catsacjun camahani na. ⁶Ngajan xi cachja cha cojo rê na cuitjin:

—Xicarcuun. Ngahan ne, ha hvê xi Jesús tsêhê nandya Nasaret vinchunsun me, me xi cavetaha xuta xcun cru. Peru me vêhê ne, tsajin me nguehe ta cavuya cjuahñu rê me. Chutsujun cahndê hiscan xi cafaña xuta me. ⁷Quihndê ne, tjangun sanii ne, tinújun cojo cha ladu rê me, cha Pedru ne cojo cha xi yahnga ta, Jesús ne, hisca tjun cuechutaha me yun ngajan distritu Galilea sacuahatjin xi ha cachja me cojo nuju.

⁸Xi tu cavetju na tsêhê tsjun jan ne, ña fatsê na xi jemu catsacjun na camá. Hane vanga sanii na cafe na. Hane hisca xi ngu cachjaain na cojo, tsêhê xi jemu catsacjun na camá.

Jesús ne, ñahñu ni camatsejen me na María Magdalena

⁹Jesús ne, xati camaha sa tsêhê nixtin domingu ne, hya cavuya cjuahñu rê

me. Hya xi camá ne, tjun sa na María tséhë nandya Mágdala cavëë na me, na xi cavaxë me yatu xitsehen xahasen rë hatsëë. ¹⁰ Hane na vëhë quiji quicun na xuta ladu rë me xi jemu jihnda tséhë cjuachoho. ¹¹ Hane xi cahndë me cjua ta Jesús tacun nga me cjuahñu hane na vëhë ne, cavëë na me, camacjaain rë xuta jan.

Hya xi cavuya Jesús cjuahñu ne, jo cha ladu rë me cavëë cha me

¹² Hya xi cavatju vëhë ne, jo cha ladu rë Jesús ne cjuí cha nguiña. Hane cojo Jesús cjuí me cojo cha, peru ha ngu xcusun jyíhi me. ¹³ Hane cha xi cuacun jan ne, xi tu cavëë cha xi hacui me ne, cavuya cha ne, quiji cachja cha cojo cha xi yahnga xi cavëë cha me. Peru hacuaha camacjaain rë cha xi yahnga jan.

Jesús ne, casuaxa me cha apóstol

¹⁴ Ngu ndiya nga ne, cafehe nga me hiscan siu cha ladu rë me xi tengu jan, tjinë cha niñu. Hane cachjataha me yëjë ni cha ngatsë rë xi jemu taja rcu cha, tséhë xi camacjaain rë cha tséhë xuta xi cavëë rë me xi tacun nga me cjuahñu. ¹⁵ Cavatju cacjan me cojo cha ne, sehe

ngajan cavetsihin cachja me cojo cha cuitjin:

—Tangún jingujyë ni ngasunhndë ne, tinújun cojo yëjë ni xuta cjua rë Nina. ¹⁶ Yo xi cumacjain rë cjua vëhë hacuaha xtenda ne, cuechu xcun Nina. Yo xi cumacjaain rë ne, cuechu me castigu xi sahmi Nina xi cueyun. ¹⁷ Hane xuta xi cumacjain rë me ne, sahmi me xcusun vihi xi cueyanangui me ñihi naha ne: cuma cuaxë me xitsehen xi hincha xahasen rë xuta; cuma cuichja me ngu ngu xcusun hne; ¹⁸ yë ne, sá xi cjuahatsja me chu, o sá xi cuihi me ngu venenu ne, tsajin mé cumá rë me; hane tu cueta-hatsja ni me xuta hmu rë ne, cumandaja xuta hmu rë jan.

Jesús ne, cjuiniji me ngahnga

¹⁹ Xi cajnetaha cachja Jesús, me xi Nai naja, cojo cha ladu rë me cjua vëhë ne, quiji me ngahnga, cavéjña me ladu quixi tséhë Nina. ²⁰ Hane cha ladu rë me ne, cavetju cha quiji cha, cachja cha cjua rë Nina yëjë ni ladu. Hacuaha Nai naja ne, cavisecoo me cha. Hane ngatsë rë xcusun xi cavëë xuta xi casahmi cha jan ne, vëhë xi tsejen xi quixi cjua xi cachja cha.

Cjuandajyihi Xi Catsihindu San Lucas Tsëhë Jesucristu

1 Jemu cjin xuta xi ha catsihindu me cju a xi chja tsëhë yëjë xcusun xi sehe casahmi Nina ngajni naja ngayaan xuta ngasunhdë. ²Meje tsihindu me cju a vëhë sacuatjin camahani casua camachaya naja me xi cavëëndaja cojo tuxcun hisca ntsacu cavetsihin sehe caphaxa me xi tsinguitsojo me cju a jan. ³Hisca hatsëë ne, ngahan ne, hacuaha ha jemu ndaja cavinenguësë yëjë ni hacutjin camá. Vëhë xi xi má ná ne, hacuaha ndatjin xi tsihindu chichihin nuju cju a tsëhë yëjë hacutjin camá, ngayun tatá Teófilo, ⁴cojo sa xi sacúndaja nuju cjuaquixi tsëhë cju a xi ha camachaya nuju jan.

Cafehe cju a xi tsin Juan Vitenda rë Xuta

⁵Nixtin hya xi Herodes cavitexa me yëjë ni xuta tjë rë Israel ne, cavëjña xu ngu nahmi xi hmí rë Zacarías, me xi má ladu rë Abías. Hane chjuun rë Zacarías ne, Elisabet hmí rë me, hacuaha tjë rë Aarón xu má me. ⁶Hane Zacarías cojo Elisabet ne, tyjahi cjuatacun rë me xcun Nina ta, tsëhë xi tsajin xu jyë rë me xi tisahmichihin me yëjë ni sacuatjin cavitexa Nina. ⁷Hane tsajin rë me quihndi ta, tsëhë xi Elisabet ne, hatuxa maji xu sacu rë me quihndi, hacuaha catsijo ni me ne, ha jemu changá xu me.

⁸Hya xi camá ne, cavechú nixtin xi casatë rë Zacarías cojo yëjë sa nahmi xi má ladu rë Abías xi sahmi xu me xá xcun Nina xi má me nahmi. ⁹Hane sacuaha xcusun rë nahmi ne, catsintsavë xu me ngu suerte cojo sa xi cuma tsejen ne, jarë xu me xi satë rë xi cuisehen ndava Nina, cuaca tyjungunsa. Hya xi camá ne, casatë xu rë Zacarías. ¹⁰Hane yëjë xutacjin jan ne, caviyuju xu me candatsen

sahmi me oración rë me, hora xi tivaca xu Zacarías tyjungunsa cahntsua ndava Nina. ¹¹Hane hora xi tivaca me tyjungunsa jan ne, camatsejen xu ngu ángel secun taha ladu quixi tsëhë ngasuncun hiscan xi tí tyjungunsa. ¹²Hane xi cavëë Zacarías ángel jan ne, jemu quijircun rë me hacuaha jemu catsacjun xu me camá. ¹³Ngajan xi ángel jan ne, cuitjin xu cachja cojo rë me:

—Xicarciuin ngaye Zacarías ta, cju a xi cachjahye ne, cahndë Nina. Vëhë xi na Elisabet chjuun riji ne, sacú rë na ngu quihndi, hane quihndi vëhë ne, Juan tehe nihi rë. ¹⁴Hane jemu cju e ri cjuasua hacuaha jemu ndaja cuma ri, hacuaha jemu cjin xuta xi jercu tjin rë me cjuasua xi catsin quihndi vëhë ta, ¹⁵tsëhë xi jemu jyë hnga cuma cojo cjuatacun rë ngajan xcun Nina. Hacuaha cuiin camahani xan hacuaha cuiin camahani nandá machihi. Hacuaha hisca hya xi caseya quihndi vë cahntsua naa rë ne, Hasen rë Nina quitsë rë xahasen rë. ¹⁶Hacuaha quihndi vëhë sahmi xi jemu cjin xuta tjë rë Israel cuya nga me ndiya rë Nina rë me. ¹⁷Quihndi vë ne, vëhë cuinduva titjun, sehe cuinduva Nina. Hane sacuatjin jyë hnga profeta Elías cojo cjuatacun rë me hatsëë nixtin ne, hacuanitjin ni jyë hnga cuma quihndi vëhë cojo cjuatacun rë, cojo sa xi quihndi vëhë ne, sahmi xi cuya cuma ndaja cacun nga yëjë ni nahmi rë nixti cojo nixti rë me, hacuaha sahmi xi yëjë xuta xi vihndiin me tsëhë Nina ne, cuma tangun cjuatacun rë me cojo cjuatacun rë xuta xi tyjahi cjuatacun rë me. Hane cuatjin chuva vëhë ne, cuëhëchjine quihndi vëhë xuta xi cuihndë me tsëhë Nina. —Cuahaxutjin cachja ángel.

¹⁸Sehe ngajan xi Zacarías ne, cuitjin xu cavinenguise me ángel:

—¿Hacutjin sacú ná cjuaquixi xi cuatjin jain cuma ni? ta ngahan ne, ha jemu changá ngahan, hacuanitjin ni chjuun

naha ta jemu changá na. —Cuahaxutjin cachja me.

¹⁹Sehe ngajan xi ángel jan ne, cuihixutjin cafayangui nga:

—Ngahan xi Gabriel ngahan; ngahan xi tejña ngajan xcun Nina. Hacuaha ngahan xi catsingatju ná Nina xi cuisiajme cojo ri hacuaha suá cumachaya ri cjuandajyihi vëhë. ²⁰Chutsijin ni, quihndë ta camacjaa in ri tsëhë cjua xi cachjá cojo ri ne, cumaji cuinoje, tsëhë xi cuma lihmi ngaye hisca hya xi cuetjucaa cjua xi cachjá cojo ri. Cjua vëhë ne, hatuxa cuetjucaa hya xi cuechú nixtin rë. —Cuahaxutjin cafayangui ángel.

²¹Jinguyëjë rë ne, xutacjín jan ne, jercu siuya xu me Zacarías, hisca fircun rë me tsëhë xi cuatjin jercu vindeya rë Zacarías xi cavisehen xu me ndava Nina. ²²Hane hya xi cavetju me ne, maji xu chja me cojo xuta. Hane xuta jan ne, cavacun rë me ta Zacarías ne, tjin mé xi cavëë me. Hacuaha tu tisahmitsja ni me ta, tsëhë xi lihmi cuaha xu me. ²³Hya xi cavatju nixtin xi satë rë me xi sahmi me xá xi má me nahmi ne, cavuya cafe xu me ndava me.

²⁴Hya xi camá ne, xi cavatju sa nixtin ne, casacu xu rë chjuun rë me quihndi, hane cahntsua hñú sá xi jiya quihndi rë Elisabet jan ne, cuatjin caseyahma xu me ndava me. Hane cuitjin xu cachja suvá me: ²⁵“Cuitjin casahmi Nina cojo ná ngu cjuandaja, quihndë xi camayuma rë me ngahan hane cafaxin me cjuasava xi má ná ngajñi rë xuta tsëhë xi sacui in ná quihndi.” Cuahaxutjin cachja me.

Cafehe cjua xi tsin Jesucristu

²⁶Xi ma jyun sá xi jiya xu quihndi rë Elisabet ne, catsingatju Nina ángel xi hmí rë Gabriel ngu nandya xi hmí rë Nasaret, tsëhë distritu Galilea, ²⁷ndava ngu chjuun xungun xi hmí xu rë María. Hane María jan ne, tacunvasen cjuavixan rë me cojo ngu xihin xi hmí

rë José, ngu me xi tjë rë David, ngu xutachanga xi camatitjun xu tsëhë xuta tjë rë Israel. ²⁸Hane xi cavisehen ángel ndava María jan ne, sehe cachja xu cuitjin:

—Cuhndari, tsan. Nina ne, catsinchacun me ngaye, hacuaha tacun me cojo ri. Ngajñi rë yëjë ni yachjin ne, ngaye xi jercu catsinchacun ri Nina. —Cuatjin xu cachja ángel.

²⁹Xi cahndë xu María cjua xi cachja ángel jan ne, catsacjun me camá, sehe catsingataha cacun xu me mé xcusun nina xi casua ángel me. ³⁰Sehe ngajan xi ángel ne, cuitjin xu cachja cojo rë me:

—Xicarcui in María ta Nina ne, jemu tjin rë me cjuandaja cojo ri. ³¹Quihndë ne, sacú ri ngu quihndi, hane hacuaha cuechú nixtin xi tsin ri quihndi vëhë. Quihndi vëhë ne, tehe ñihi rë Jesús. ³²Hacuaha jemu jyë hnga cuma cojo cjuatacun rë, hacuaha Quihndi rë Nina xi Matitjun cjuahañihi. Hacuaha Nina sahmi me xi cuitexa quihndi vëhë sacuatjin cavitexa xutachanga rë, me xi hmí rë David. ³³Hane vëhë cuitexa rë xuta tjë rë Israel, hane gobiernu rë ne, tsajin nu tsajin nixtin cuijnetaha. —Cuatjin xu cachja ángel.

³⁴Sehe ngajan xi María ne, cavinenguise xu me ángel cuitjin:

—¿Hacutjin cuma xcusun vi? ta ngahan ne, cjëë sacú xihin naha. —Cuatjin xu cachja me.

³⁵Hane xi cafayangui ángel ne, cuitjin xu cachja:

—Hasen rë Nina xi Matitjun ne, cuin-duva cuaxtë ri sacuaha ngu tjahnguen. Vëhë xi quihndi xi tsin ri ne, hatuxa tyjahi cojo cjuatacun rë, hacuaha Quihndi rë Nina Jain. ³⁶Hacuaha na Elisabet xinguin ne, handasa ha jemu changá na ne, hacuaha casacu rë na ngu quihndi. Ha quihndë jyun sá yaha na quihndi, na xi chja cjua xi hatuxa maji sacú rë quihndi. ³⁷Cuatjin camá ta, xi cuma rë Nina

ne, tsajin camahani mé xi cumaji cuma. —Cuatjin xu cachja ángel.

³⁸ Ngajan xi María ne, cuitjin xu cafayangui me:

—Ngahan ne, sacuaha ngu hndixahan rë Nina ngahan. Catisahmi Nina cojo ná sacuatjin cjua xi canújun. —Cuatjin xu cachja me.

Ngaxtun vëhë ne, sehe cafe ángel.

Cavusehenya María Elisabet

³⁹ Nixtin hya ne, cavetju xu María, ngu quixi ni quiji me ngu nandya ngajan nangui ndetjún tsëhë distritu Judea. ⁴⁰ Hane xi cafehe me ngajan ne, cavisehen xu me ndava Zacarías, sehe cachja me nina cojo Elisabet. ⁴¹ Hane xi cahndë xu Elisabet xi cachja María nina ne, cafiniya xu quihndi xi jiya cahntsua Elisabet. Ngajan xi Elisabet ne, catsë rë xahasen rë me cojo Hasen rë Nina. ⁴² Hane sehe jercu hñu xu cachja me cjua vihi cojo María:

—Ngajni rë yëjë ni yachjin ne, ngaye xi jercu catsinchacun ri Nina, hacuaha catsinchacun me quihndi xi tsin ri.

⁴³ ¡Mé má ngahan xi tu ngaye xi naa rë nai naha ngaye, ndove tichusihinye ná!

⁴⁴ Xi tu cahndë xi canoje nina cojo ná ne, hora vëhë cafiniya quihndi xi jiya cahntsua xi ndama rë. ⁴⁵ Jemu ndaja tsiji xi macjain ri xi yëjë ni cjua xi cachja Nina cojo ri ne, cuetjucaa jain. —Cuatjin xu cachja Elisabet.

⁴⁶ Sehe ngajan xi María ne, cuitjin xu cachja me:

Ngahan ne, jercu sahme jyë sahme hnga Nina;

⁴⁷ hacuaha jercu ndama ná tsëhë Nina, me xi vaxëtje ná.

⁴⁸ Casahmicuenda Nina ngahan, ngahan xi sacuaha ngu hndixahan rë me ngahan ta,

quihndë cojo nixtin xi cjuí sa ne, cuichja yëjë xuta xi siu cojo xuta xi sehe tsin sa xi jemu ndaja tsahan;

⁴⁹ tsëhë xi Nina xi jemu jyë hnga me cojo ngahñu rë me ne, jemu vengui chji rë xcusun xi casahmi me cojo ná.

¡Jemu tyjahi me cojo cjuatacun rë me!

⁵⁰ Nina ne, hatuxa jemu tjin rë me cjuayumatacun cojo yëjë xuta xi faharcun rë me

ha tucutjin cjin xuta tiset sin me jima ngundiya jima ngundiya.

⁵¹ Nina ne, sahmi me hacutjin xi meje sahmi me cojo ngahñu jyë xi tjin rë me:

tsinguitsojo me yëjë xuta xi jemu tjin rë cjuaxta cahntsua xahasen rë;

⁵² tsinguijne me xuta xi matitjun tsëhë xcun xá rë,

hacuaha sahmi yehe sahmi hnga me xuta yuma.

⁵³ Xuta xi machaja rë me ne, jemu yehe cjuandaja sua Nina me,

peru xuta nchina ne, suvá tsja tiya me tsicuya Nina me cjue me.

⁵⁴ Nina ne, cuisecoo naja me ngayejen ni xuta tjë rë Israel, ngayaan xi tsëhë me ngayaan,

hacuaha tsinguitsjen me xi cumayuma rë me ngayaan.

⁵⁵ Xi cuatjin ne, cuetjucaa jain sacuatjin xi ha cachja me cojo xutachanga naja Abraham, cojo yëjë sa tjë rë me.

Cuatjin xu cachja María.

⁵⁶ Hya xi camá ne, María jan ne, cavëjña xu me jyan sá ndava Elisabet, sehe cavuya cafe me nangui rë me hiscan tjin ndava me.

Hacutjin camá hya xi catsin

Juan Vitenda rë Xuta

⁵⁷ Quihndë ne, cavechú nixtin xi tsin rë Elisabet quihndi, hane catsin rë me ngu quihndi xihin. ⁵⁸ Xi camachaya rë yëjë xuta xi siu tahndee ndava me cojo yëjë xicjin Elisabet xi jercu camayuma rë Nina Elisabet ne, jercu ndaja camá rë me xingu xingu me cojo Elisabet. ⁵⁹ Hya xi camá xu ne, xi cavetjucaa quihndi jan

jyin nixtin ne, cafehe nga me xi siu tahndee ndava me jan cojo xicjin Elisabet xi cuma suhi tsêhê xi xtî chuxin rê quihndi. Hane meje suañihi me quihndi jan Zacarías, tsêhê xi cuatjin hmí rê nahmi rê. ⁶⁰Ngajan xi cachja xu naa rê quihndi jan cuitjin:

—Hajín ta quihndi vi ne, Juan cjuahanihi. —Cuatjin xu cachja me.

⁶¹Hane xuta jan ne, cuitjin xu cachja me:

—Peru ngayun ne, tsajin hisca ngu xingun xi cuatjin hmí rê. —Cuatjin xu cachja xuta jan.

⁶²Ngajan xi xuta xi cuacun jan ne, tu casahmi tsjá xu ni me cojo nahmi rê quihndi xi cavinenguise me hacutjin meje rê nahmi rê quihndi xi cjuahanihi quihndi jan. ⁶³Ngajan xi Zacarías ne, cafehya xu me ngu pizarra, sehe ngajan catsihindu me cjua vihi: “Juan cjuahanihi.” Cuatjin xu catsihindu me. Hya xi camá ne, yêjê ni me ne, jemu quijircun xu rê me.

⁶⁴Hane hora vêhê ni ne, camá xu cachja Zacarías, hane jemu ndaja cavaxëndaja me Nina. ⁶⁵Ngajan xi xuta xi siu tahndee ndava me jan ne, jemu catsacjun xu me camá, hane jinguyê ni ladu nangui ndetjún tsêhê distritu Judea hiscan xi siu xuta ne, jercu cavisiajmi xu me tsêhê cjuacjintacun vêhê. ⁶⁶Hane yêjê xuta xi camachaya rê cjuacjintacun vêhê ne, jercu cjín catsingataha cacun me, hisca cachja xu me cuitjin:

—¡Cuechú nixtin xi quihndi vi ne, cuma ngu xihin xi jyê hnga cojo cjuatacun rê!

Cuatjin xu cachja xuta xi cuacun jan ta, tsêhê xi quihndi vêhê ne, Nina yahngui jain me.

Cjua rê Nina xi cachja Zacarías

⁶⁷Zacarías, nahmi rê quihndi jan ne, ña catsê rê me cojo Hasen rê Nina, hane cachja xu me cuitjin cjua xi cafahatsja me tsêhê Nina:

⁶⁸¡Tjemu ndaja Nina naja ngayaan xuta tjê rê Israel!

tsêhê xi cuinduva me cjuaha naja me xi cuma yaan xuta rê me.

⁶⁹Nina sahmi me xi ngajñi rê tjê rê David, ngu xuta rê Nina ne, cuetjuñi ngu xihin xi cuaxêtje naja,

⁷⁰sacuatjin xi ha cachja profeta xi cavejña me tsêhê Nina,

hya xi cachja me cojo xutachanga naja cjua rê Nina hatsêê nixtin.

⁷¹Hacuaha cachja Nina xi cuaxêtje naja me tsêhê condra naja,

hacuaha cuaxêtje naja me tsêhê yêjê xuta xi choho vêê naja,

⁷²hacuaha cumayuma rê me tsêhê xutachanga naja

hacuaha tsinguitsjen me compromisu ximinchacun xi casahmi me cojo xutachanga naja.

⁷³Nina ne, cachja me: “Ngahan suva hvê”, hya xi casahmi me compromisu jan cojo xutachanga naja Abraham.

⁷⁴Hya xi casahmi me compromisu vêhê ne, cachja me xi cuêhëndaya naja me tsêhê condra naja,

cojo sa xi ngayaan ne, hacuiin cojo chircun chjahanrcun me ta

⁷⁵chjahanrcun me cojo ngu cjuatacun tyjahi, xi tsajin jyê naja xcun me hacutjin nixtin xi nechan xcun cjuahñu naja.

⁷⁶Ngaye tsan ne, hacuaha cuma ngaye ngu profeta tsêhê Nina xi Matitjun ta,

tsêhê xi ngaye cuihintitjin, choxehe ndiya tsêhê Nina,

⁷⁷hacuaha tehe cumachaya rê xuta rê Nina xi cuaxêtje Nina me, cuma cuinújan ne, tsinchataha me tsêhê jyê rê

⁷⁸ngatsê rê ta tsêhê xi Nina ne, jemu tjin rê me cjuayumatacun cojo naja.

Hacuaha ngatsë rë cjuayumatacun vëhë ne, Nina tsingatju me tsëhë ngahnga ngu xi sacuaha tsuhi,

⁷⁹cojo sa xi sua hasen rë ngajñi naja xi nechan cojo ngu cjuacjintacun jyë xi hisca sacuiyiin naja hacutjin naxentjeen yojo naja,

ngayaan xi tjemu tsavi nechantahan tsëhë cjuaveya,

hacuaha cojo sa xi cjuecojo naja ndiya tsëhë cjuajeya.

Cuatjin cachja xu Zacarías.

⁸⁰Hya xi camá ne, quihndi jan ne, camajyë, hacuaha cavejñahñu xu cjuatacun rë. Hane xi camá ngu xihin jyë ne, quiji cavéjña xu ngajan ngu xín camahani tsëhë nandya, hisca hya xi cavechú nixtin xi cavetsihin cachja cjuarë Nina cojo xuta tjë rë Israel.

Hacutjin camá hya xi catsin Jesucristu

2 Cuitjin xu camá nga ngunixtin hya xi Herodes vitexa me xuta tjë rë Israel. Me xi matitjun camahani xi hmí rë César Augusto ne, cavitexa xu me xi yëjë ni xuta xi siu ngahma gubiernu rë me ne, cjue me cuiyujutahaxujun me xi cuechjitje me. ²Hacuaha hya xi cuatjin tjuntjun caviyujutaha xujun xuta ne, hya vitexa xuta Cirene ngajan distritu Siria. ³Ngajan xi yëjë ni xuta ne, quiji xu me caviyujutaha xujun me, jima ngu me hiscan nangui rë xutachanga rë me.

⁴Cuatjin camá xi José ne, cavetju xu me tsëhë nandya Nasaret, distritu Galilea, quiji me distritu Judea, nangui rë xutachanga rë me David, hiscan xi hmí rë Belén, tsëhë xi José ne, tjë rë David xu má me. ⁵Quiji casetahaxujun tangun me cojo María, me xi tacunvasen cjuavixan rë me cojo. Hane María ne, jiya xu quihndi rë me hya xi quiji me. ⁶Hya xi camá ne, jinguyëjë rë xi siutahá xu me ngajan ne, cavechú nixtin xi tsin xu quihndi rë me, ⁷hane catsin rë me

ngu quihndi xihin, xi quihndi tjun rë me. Hane xi cavatju catsin quihndi jan ne, sehe cafaha me cavaxtë me ngu tsjian, sehe cafaña xu me quihndi jan cahntsua hiscan jineyá chu ta, tsëhë xi casacuiin xu cahndé cahntsua ndihya xi cuiyuju me, tsëhë xi jemu quitsë camahani xuta.

Cachja ángel cojo cha xi sahmi cuidadu rë chu

⁸Ha taha ladu vëhë ni ne, siutahá ngujo cha nguixun ngajan nguñña, xi sahmi cuidadu xu cha chu tsánga rë cha.

⁹Hya xi camá ne, ha tu ñahñu camatsejen xu ngu ángel tsëhë Nina hiscan xi siutahá cha, hane hora vëhë ni ne, hasen ndajyihi rë Nina ne, jercu casahmi hasen xu rë jinguyjyë ni hiscan xi siutahá cha, hane jemu catsacjun camahani cha camá. ¹⁰Ngajan xi cachja xu ángel cojo cha cuitjin:

—Xicarcuun ta, nguehe nduva tisuá cumachaya nuju ngu cjuandajyihi xi hisca yëjë xuta tjë rë Israel jercu ndaja cuma rë me ¹¹ta nguehe Belén, nangui rë xutachanga nuju David ne, quihndë catsin ngu quihndi xi cuaxëtje nuju, quihndi xi Nina catsingatju rë xi cumatitjun tsujun. ¹²Hane cuitjin sacú nuju cjuaquixi tsëhë cjuarë cachjá cojo nuju vë: xi cjuhun jan ne, cuechun hiscan xi chun ngu quihndi tixtë rë tsjian, jiña cahntsua hiscan jineyá chu. —Cuatjin xu cachja ángel.

¹³Hane ha tu ñahñu camatsejen sa jercu cjín camahani ángel xi nduva xu ngahnga, cafehe hiscan xi secun ángel xi cafehe titjún, tivaxëndaja rë Nina cojo cjua vihi:

¹⁴¡Jemu jyë hnga Nina cojo Hasen rë me ngajan ngahnga!

¡Hane nguehe nangui ne, cuisehen cjuajeya rë Nina cahntsua xahasen rë xuta xi chuya rë Nina tsëhë!

Cuatjin xu cachja ángel cjín jan.

¹⁵ Hya xi camá ne, hya xi cavuya quiji nga ángel jan ngahnga ne, cha xi sahmi cuidadu chu tsánga rë jan ne, cuitjin cachja cha cojo xicjin cha:

—¡Cjuanguen ni! Cjuanguen hisca nandya, cuanguen chutsejen xcusun xi camá vi, sacuatjin casua Nina camachaya naja. —Cuatjin xu cachja cha cojo xicjin cha.

¹⁶ Hya xi camá ne, ngusun xu ni cafe cha, hane xi cafehe cha nandya ne, casacuse rë cha hiscan tacun María cojo José, cojo quihndi jan, jiña cahntsua hiscan jineyá chu. ¹⁷ Hya xi cavëë xu cha quihndi jan ne, sehe cavetsihin casuacuenda cha yëjë cjua xi cachja ángel cojo rë cha tsëhë quihndi vëhë. ¹⁸ Hane xi cahndë xuta cjua xi cachja cha xi cuacun jan cojo rë me ne, jemu quijircun xu rë me. ¹⁹ Peru María ne, cavetjo cavetjo ni me yëjë ni cjua vëhë cahntsua xahasen rë me, hacuaha jercu cjin xu catsingataha cacun me. ²⁰ Hane xi cavuya quiji nga cha xi sahmi cuidadu chu rë jan ngajan nguijña ne, taha tisahmi jyë tisahmi hnga xu cha Nina hacuaha taha tivaxëndaja cha me tsëhë yëjë cjua xi cahndë cha cojo xcusun xi cavëë cha, sacuatjin cachja ángel cojo rë cha.

Quiji caningacun rë Jesucristu cojo Nina ngajan Jerusalén

²¹ Xi cavechú xu jyin nixtin quihndi ne, hacuaha hatuxa hya cavechú nixtin xi xtí chuxin rë, hane cuatjin camá cojo quihndi. Hacuaha Jesús cafahañihi xu quihndi, ñihi xi ha cachja ángel hisca chaja sa xi seyahma quihndi cahntsua naa rë.

²²⁻²⁴ Hya xi camá ne, xi cavechú xu nixtin xi cjue naa rë quihndi yungun xi matitjun cojo quihndi xi cuma tyjahi me xcun Nina tutjin chja ley rë Moisés ne, quiji José cojo María Jerusalén, quiji cani me ngu cjuatjo ta, tsëhë xi chja ley rë Nina ta meje rë xi cjue jo chu tucjin, o

sá xi jo chu paloma chihndë. Hacuaha quijicojo xu me quihndi jan Jerusalén xi tsingacun me quihndi jan cojo Nina. Quitahá xujun xcun ley rë Nina xi yëjë ni quihndi tjun xi xihin ne, hatuxa tsëhë Nina cuma.

²⁵ Cavéjña xu ngu xihin xi hmí rë Simeón ngajan Jerusalén. Xihin vëhë ne, tyjahi xu me cojo cjuatacun rë me ngajan xcun Nina, hacuaha jemu meje xu rë me xi cjuehe xuta xi yaha cjuetacun jan xi cuma rë xuta tjë rë Israel. Hacuaha Hasen rë Nina ne, jiya cahntsua xahasen rë Simeón. ²⁶ Hane Hasen rë Nina jan ne, casua xu camachaya rë me xi jinguyëjë rë xi cjëë scuëë me xuta xi tsingatju Nina jan ne, hatuxa cueyaain xu me. ²⁷ Hane quiji me yungun xi matitjun, tsëhë xi cuatjin cachja Hasen rë Nina cojo rë me. Hacuaha xutacha rë quihndi xi hmí rë Jesús jan ne, quijicojo xu me quihndi jan yungun vëhë, xi sahmichihin me sacuahá xcusun xi vitexa ley rë Moisés hacutjin cuatju quihndi cuma. ²⁸ Hya xi camá ne, cafaha xu Simeón quihndi jan cavataha me, sehe hacuaha cavaxëndaja me Nina cojo cjua vihi:

²⁹ Ngayun Nina naha, ngayun ne, ha cuma tuhun cahndë xi ngahan hndixahan nuju ne, cueya cojo cjuandaja cojo cjuajeya

sacuatjin xi ha canújun.

³⁰ Cuma cueya ta, tsëhë xi quihndë ne, cahvë suva xuta xi caningatjun xi cuaxëtje niji,

³¹ me xi caningatjun xcun cojo xcun yëjë ni xuta,

³² me xi cuinduva sacuahá ngu ndihi xi sua me cjuahasen xi cuma rë xutaxín,

hacuaha cuinduva me xi sahmi yehe sahmi hnga niji me, ngayin xuta nuju, xuta tjë rë Israel.

Cuatjin xu cachja Simeón.

³³Hane xutacha rë quihndi jan ne, jemu quijircun xu rë me tsëhë xi cuatjin cachja Simeón tsëhë quihndi jan.

³⁴Hane Simeón ne, catsinchacun me me xi cuacun jan, sehe cachja xu me cojo María naa rë quihndi jan cuitjin:

—Quihndi vihi ne, hacuaha sahmi xi jemu cjin xuta tjë rë Israel chajá me, hacuaha sahmi xi jemu cjin xuta tjë rë Israel cuetjutje me. Hacuaha quihndi vihi ne, sua cumachaya rë xuta mé xi meje rë Nina, hacuaha jemu choho cuichja xuta tsëhë quihndi. ³⁵Cuatjin cuma cojo sa xi ngajan sesunhngatsejen yëjë hacutjin xi tsingataha cacun jemu cjin xuta cojo cjuatacun rë me. Hacuaha ngayun ne, jercu cuma rë xahasen nuju, sacuaha xi quicha casehen rë xahasen nuju. —Cuatjin xu cachja Simeón.

³⁶Hacuaha tacun xu ngu chjuun xi hmí rë Ana ngajan yungun, quihndi rë Fanuel, tjë rë xutachanga xi hmí rë Aser. Chjuun jan ne, profeta xu má me. Hacuaha jercu changá xu me. Xi cavixan me ne, cavéjña me cojo xihin rë me yatu nu. ³⁷Ngaxtun vëhë ne, cavéjña cahan me. Hane xi casacu xicjin xu me cojo xutacha rë Jesús ne, ñujuchan ñuju nu xu tjin rë me. Hacuaha jemu quiji camaha xu ni me yungun xi matitjun. Jemu cjin ndiya ne, cajinii xu me niñu xi faharcun me Nina. Hacuaha jercu sahmi xu me oración rë me. Nixtin nixten faharcun me Nina. ³⁸Hacuaha ha hora xi siu xu ni xutacha rë Jesús ngajan yungun jan ne, cafehe Ana. Hane xi cavëë me quihndi Jesús jan ne, casua xu me nacuechji rë Nina. Ngaxtun vëhë ne, sehe cavetsihin cachja xu me tsëhë Jesús cojo yëjë xuta xi jemu meje rë xi cuechú nixtin xi cuaxëtje Nina nandya Jerusalén.

Cavuya me cojo Jesucristu nandya Nasaret

³⁹Xutacha rë Jesús ne, hya xi ha café casahmichihin xu me yëjë xcusun xi vi-

texa ley rë Nina ne, cavuya café me nangui rë me, hiscan xi hmí Nasaret, distritu Galilea. ⁴⁰Quihndi jan ne, camajyë hacuaha casacuhñu rë, hacuaha jercu cavechútáha cjuatacun rë, hacuaha jercu cavisehen xu cjuandaja rë Nina cahntsua xahasen rë.

Casetaha suvá Jesucristu ngajan yungun xi matitjun

⁴¹Chuva nu chuva nu ne, xutacha rë Jesús ne, fi xu me suhi tsëhë Pascua ngajan Jerusalén. ⁴²Hane hya xi Jesús cavechú me tejó nu ne, sacuaha xcusun rë xuta cojo suhi vëhë ne, quiji xu Jesús cojo xutacha rë me ngajan Jerusalén. ⁴³Xi cavatju suhi jan ne, xutacha rë Jesús ne, cavetju xu me tsëhë Jerusalén xi cuya cjue me nangui rë me. Peru Jesús ne, hisca camachayiin rë xutacha rë me ne, casetaha suvá xu me Jerusalén. ⁴⁴Xi má rë xutacha rë me ne, jiyajñi me ngajñi rë xutacjin tife me. Hane xi café ngu nixtin tife xutacha rë me ndiya ne, cavetsihin cavanguise xu me Jesús jan ngajñi rë xuta rë me cojo ngajñi rë yëjë xuta xi vinga rë me. ⁴⁵Hane xi casacuiin rë me Jesús jan ngajñi rë xutacjin jan ne, cavuya quiji xu me hisca Jerusalén, xi tivanguise me me.

⁴⁶Hya xi camá ne, xi majyan nixtin jan ne, sehe casacu xu rë me Jesús ngajan yungun xi matitjun, tacun me ngajñi rë maestru xi vicuya cjuachacun, tivisiñuju me cjua rë maestru hacuaha tivinenguise xu rë me jingu sa cjuachacun. ⁴⁷Hane yëjë ni xuta xi tivisiñuju cjua rë Jesús jan ne, jercu fircun xu rë me, tsëhë xi cuarcu quicun cacun me hacuaha tsëhë xi jercu ndaja titsicuya me cjua tsëhë maestru jan. ⁴⁸Hane hya xi cavëë xu xutacha rë Jesús xi ngajan tacun me ne, tu quiji tsëhë me, sehe cachja naa rë me cuitjin:

—¿Mé má cuatjin canihñi cojo niji, tsan? Chutsijin ta cuajyihi ngahan cojo

nahmi riji ne, cojo cjin cjuacjintacun niji ne, catujjihinyin cavinchinsin ri. —Cuatjin xu cachja me.

⁴⁹Ngajan xi Jesús ne, cuitjin xu cachja me cojo xutacha rë me:

—¿Mé má cuatjin tu nguehe tu ngajan cavinchunsun ná ni? ¿Há hyúun ta hatuxa meje rë xi cuitejña ndava nahmi naha? —Cuatjin xu cachja Jesús.

⁵⁰Peru xutacha rë Jesús ne, cajni xurcu me cja xachja Jesús cojo rë me.

⁵¹Hya xi camá ne, cavuya café xu Jesús cojo xutacha rë me nangui rë me ngajan Nasaret. Hacuaha cahndë me tsëhë xutacha rë me hacutjin xi quiji sa nixtin rë me. Hane naa rë Jesús ne, cavetjo cavetjo xu ni me yëjë ni cja vëhë cahntsua xahasen rë me. ⁵²Sacuaha Jesús ne, jima jyë xu me cojo yojo rë me, hacuaha jima jyë jima hnga me cojo cjuatacun rë me. Hacuaha tichuya sa xu rë Nina tsëhë me, hacuaha tichuya sa rë xuta tsëhë me.

Cachja Juan Vitenda rë Xuta cjuandajyihî rë Nina

3 Cuitjin xu camá hya xi café tyjuhunu jiya me xi matitjun camaha ni xi hmí rë Tiberio César xcun xá rë me xi vitexa me jingu ni ladu. Poncio Pilatu ne, me vëhë vitexa xu me distritu Judea, hane Herodes ne, me vëhë x vitexa me distritu Galilea, hane hntsejñu me xi hmí rë Felipe ne, me vëhë x vitexa me distritu Iturea cojo distritu Tracónite, hacuaha Lisania ne, me vëhë x vitexa me distritu Abilinia. ²Hane sacuaaha nahmi xi matitjun xu ne, Anás cojo Caifás má me. Hane sacuaaha nixtin vëhë ne, Juan quihndi rë Zacarías ne, hya xi quitahá me ngajan ngu xín tsëhë nandya ne, cafahtsja me cja xi catsingatju xu Nina. ³Hane quiji catsujyihya me yëjë ni ladu tiña tsëhë ndajyë Jordán, tichja me xi meje rë xi tsindeya xu xuta cjuatacun rë me hacuaha xtenda me,

cojo sa xi tsinchataha Nina xuta tsëhë jyë rë me. ⁴Xi cuatjin xu casahmi Juan ne, casahmichihin me sacuatjin camahindu hatsëë nixtin xcun xujun xi chja cja rë profeta Isaías xi chja cuitjin:

Cuitjin jercu hñu cuichja ngu xuta ngajan hiscan jemu xín tsëhë nandya: “Tuhunchjinu ndiya tsëhë Nai naja; ninguxun ndiya tsëhë me.

⁵Yëjë ni hiscan nangui cahntsua ne, tsëya rë, yëjë ni ndetjün cojo yëjë ni naxi ne, cuijnenangu,

yëjë ni ndiya lahñi ne, cuma quixi, yëjë ni ndiya xi hacuini chihin ne, cuma chihin.

⁶Hane yëjë ni xuta ne, scuëë me hacutjin vaxëtje Nina xuta rë me.”

Cuatjin xu catsihindu Isaías cja xi jercu hñu cuichja xuta jan.

⁷Ngajan xi hya xi quiji xutacjin xi xtenda me ne, cuitjin xu cachja Juan cojo xuta:

—¡Ngayujun ni ngayun quihndi rë chu tsehen matsejen ne!, ¿yo cavinchangui nuju xi nihñu ngahñu xi cuetjuntjun tsëhë castigu xi hatuxa tsingatju Nina?

⁸Sá xi meje jain cuetjuntjun matsejen ne, nihñu súv cjuandaja sacuatjin sahmi xuta xi catsindeya jain me cjuatacun rë me. Xicanujuun cahntsua xahasen nuju cja vihi: “Ngayaan ne, tsajin mé cuma naja ta, tsëhë xi tjë rë Abraham ngayaan.” Xicanujuun cuatjin matsejen ta, nguehe cuichjá cojo nuju ta Nina ne, hisca ndoyojo xi cuicun vi ne, cuma sahmi me tjë rë Abraham. ⁹Chutsujun ta ngayun matsejen ne, tangun ngayun cojo yatjë xi ha quitaháchjine quicharcu tyjama rë xi cuetsihin xtf. Yëjë ni yatjë xi suaain tu xi ndaja matsejen ne, xtf rë, sehe cjue cueti. —Cuatjin xu cachja Juan.

¹⁰Ngajan xi xutacjin jan ne, cuitjin xu cavinenguise rë me Juan:

—¿Hacutjin ndatjin nihñi xi cuma nihñi cjuandaja xi nújun vē ni? —Cuatjin xu cavinenguise me.

¹¹ Hane xi cafayangui Juan ne, cuitjin xu cachja me:

—Jarē ngayun xi tjin nuju jo tsjian nuju ne, tuhun rē ngu yo xi tsajin rē. Jarē ngayun xi tjin xi chinu ne, ha chuva vēhē ni tuhun hitsē catjinē me xi tsajin xi sinē. —Cuatjin xu cachja me.

¹² Hacuaha canduva sa xu ngujo cha xi faha tujúnja xi meje rē cha xi xtenda cha, hane cuitjin xu cavinenguise cha:

—Tatá, ¿mé xi ndatjin nihñi ngayin? —Cuatjin xu cavinenguise cha.

¹³ Sehe ngajan xi Juan ne, cuitjin xu cachja me cojo cha:

—Hacuiin cjín sa tujún chjahyun rē xuta. Chjahyun rē me hacutjin xi casatēxa ni nuju. —Cuatjin xu cachja me.

¹⁴ Hacuaha cavinenguise nga ngujo sindadu me cuitjin:

—Hane ngayin ne, ¿mé xi ndatjin nihñi? —Cuatjin xu cavinenguise cha.

Sehe cachja xu me cojo cha cuitjin:

—Xicanaxuun rē xuta tujún cojo cjuachan, o sá xi cojo ngu cjuandacha. Catamangutacún ni cojo tujún xi ha ma chji nuju. —Cuatjin xu cachja me.

¹⁵ Xuta ne, jercu siuya camahani me mé xi cuma, hacuaha vinenguise xu me cahntsua xahasen rē me cuitjin: “Hyaan sa xi Juan rē vi Xihin xi Tsingatju Nina xi cuaxētje naja me.” Cuatjin xu cavinenguise me. ¹⁶ Sehe ngajan xi Juan ne, cuitjin xu cachja me cojo yējē xuta jan:

—Ngahan matsejen ne, cojo nandá ni tivitēnda nuju, peru sehe cuinduva me xi cueyá me Hasen rē Nina cahntsua xahasen nuju, hacuaha cuaha me sacuaha ngu ndihi xi tsityjahi rē cjuatacun nuju. Me vēhē ne, hitsē sa jyē hnga me cojo cjuatacun rē xi cumá ná ngahan, hisca cumaji tsinguissehercu sahme tyjahi chuxinxte rē me. ¹⁷ Me xi tsingatju

Nina jan matsejen ne, sacuaha xi ha yahatsja me quicha xi tsinguitjen rē xtē rē trigu cojo sa xi cuma tyjahi ndaja trigu xi casechun rē tsēhē me, hacuaha cjuaya me trigu tyjahi xi cuinchandaja me, hane xtē rē jan matsejen ne, cuaca me xcun ngu ndihi xi tsajin nixtin hvo. —Cuatjin xu cachja Juan.

¹⁸ Hacuaha hacuiin suvá xu ni cjua vēhē cachja Juan cojo xuta hya xi cachja me cjuandajyihi rē Nina ta cachja sa xu me jemu cjín cjua. ¹⁹ Herodes, me xi cavitexa ngajan distritu Galilea ne, hacuaha cachjataha xu Juan me ngatsē rē xi cafaha Herodes na Herodía, chjuun rē hntsējñu me, xi cumá chjuun rē me na. Hacuaha cachjataha sa xu Juan me tsēhē jingu sa xcusun tsehen xi casahmi me. ²⁰ Peru xcun yējē cjuatsehen vēhē ne, cavetahacoo sa Herodes xcusun vihi: caveya xu me Juan ndavaya.

Caxtenda Jesucristu

²¹ Hane hya xi chaja sa xu cjue Juan ndavaya ne, ngu nixtin xi caxtenda yējē ni xuta ne, hacuaha cojo xu Jesús caxtenda me. Hane xi cavatju caxtenda me ne, hora xi tisahmi xu me oración rē me ne, ngahnga ne, catuxaha, ²² hane Hasen rē Nina ne, canduvajnetsejen casusun rcu me. Sacuajyihi ngu paloma jy-ihi. Hacuaha hora vēhē ni ne, canuhya xu rē ngu cjua ngajan ngahnga xi cachja xu cuitjin: “Ngaye xi quihndi naha ngaye xi jemu hmú cáacun rí. Jemu ndama ná ngatsē riji.” Cuatjin xu cachja.

Xutachanga rē Jesucristu

²³ Quihndē ne, Jesús ne, tjin xu rē me sacuaha cantē nu hya xi cavetsihin me cojo xá rē me. Hacuaha xi má xu rē xuta ne, quihndi rē José má me. Hane José ne, quihndi rē Elí. ²⁴ Elí ne, quihndi rē Matat. Matat ne, quihndi rē Leví. Leví ne, quihndi rē Melqui. Melqui ne, quihndi rē Jana. Jana ne, quihndi rē José.

²⁵ José ne, quihndi rë Matatías. Matatías ne, quihndi rë Amós. Amós ne, quihndi rë Nahum. Nahum ne, quihndi rë Esli. Esli ne, quihndi rë Nagai. ²⁶ Nagai ne, quihndi rë Maat. Maat ne, quihndi rë Matatías. Matatías ne, quihndi rë Semei. Semei ne, quihndi rë José. José ne, quihndi rë Judá. ²⁷ Judá ne, quihndi rë Joana. Joana ne, quihndi rë Resa. Resa ne, quihndi rë Zorobabel. Zorobabel ne, quihndi rë Salatiel. Salatiel ne, quihndi rë Neri. ²⁸ Neri ne, quihndi rë Melqui. Melqui ne, quihndi rë Adi. Adi ne, quihndi rë Cosam. Cosam ne, quihndi rë Elmodam. Elmodam ne, quihndi rë Er. ²⁹ Er ne, quihndi rë Jesús. Jesús ne, quihndi rë Eliezer. Eliezer ne, quihndi rë Jorim. Jorim ne, quihndi rë Matat. ³⁰ Matat ne, quihndi rë Leví. Leví ne, quihndi rë Simeón. Simeón ne, quihndi rë Judá. Judá ne, quihndi rë José. José ne, quihndi rë Jonán. Jonán ne, quihndi rë Eliaquim. ³¹ Eliaquim ne, quihndi rë Melea. Melea ne, quihndi rë Mainán. Mainán ne, quihndi rë Matata. Matata ne, quihndi rë Natán. ³² Natán ne, quihndi rë David. David ne, quihndi rë Isaí. Isaí ne, quihndi rë Obed. Obed ne, quihndi rë Booz. Booz ne, quihndi rë Salmón. Salmón ne, quihndi rë Naasón. ³³ Naasón ne, quihndi rë Aminadab. Aminadab ne, quihndi rë Aram. Aram ne, quihndi rë Esrom. Esrom ne, quihndi rë Fares. Fares ne, quihndi rë Judá. ³⁴ Judá ne, quihndi rë Jacob. Jacob ne, quihndi rë Isaac. Isaac ne, quihndi rë Abraham. Abraham ne, quihndi rë Taré. Taré ne, quihndi rë Nacor. ³⁵ Nacor ne, quihndi rë Serug. Serug ne, quihndi rë Ragau. Ragau ne, quihndi rë Peleg. Peleg ne, quihndi rë Heber. Heber ne, quihndi rë Sala. ³⁶ Sala ne, quihndi rë Cainán. Cainán ne, quihndi rë Arfaxad. Arfaxad ne, quihndi rë Sem. Sem ne, quihndi rë Noé. Noé ne, quihndi rë Lamec. ³⁷ Lamec ne, quihndi rë Matusalén. Matusalén ne, quihndi rë

Enoc. Enoc ne, quihndi rë Jared. Jared ne, quihndi rë Mahalaleel. Mahalaleel ne, quihndi rë Cainán. ³⁸ Cainán ne, quihndi rë Enós. Enós ne, quihndi rë Set. Set ne, quihndi rë Adán. Adán ne, me vëhë xi Nina casahmi rë me.

Cafahachuva xitsehen Jesucristu

4 Hya xi camá ne, hya xi catsë rë Jesús cojo Hasen rë Nina hya xi caxtenda me ne, cavuya xu me tsëhë ndajyë Jordán xi cjue me ndava me, peru Hasen rë Nina ne, quiji nguehe quiji ngajan xu cojo rë me ngajan ngu xín tsëhë nandya ² cahntsua yachan nixtin. Hacuaha yasen ni tifahachuva xitsehen xi matitjun me. Hacuaha Jesús ne, tsajin camaha xu ni mé xi cajinë me cahntsua nixtin xi cuacun vëhë. Hane xi cavatju nixtin xi cuacun vë ne, jercu camavojo xu rë me. ³ Sehe ngajan xi xitsehen jan ne, cuitjin xu cachja cojo Jesús:

—Sá xi Quihndi jain rë Nina ngaye ne, tinoje cojo ndoyo vihi ne, catama niñu. —Cuatjin xu cachja xitsehen.

⁴ Hane Jesús ne, cuitjin xu cafayangui me tsëhë xitsehen jan:

—Xcun xujun rë Nina ne, cuitjin camahindu: “Hacuiin suvá ngatsë rë niñu xi siu xuta cjuahñu.” —Cuatjin xu cafayangui Jesús.

⁵ Hane xi quijicojo xitsehen me ngu ndetjún hnga ne, sehe nguhñusasa xu catsingacun ni xitsehen jan me jingujyë ni nandya tsëhë ngasunhndë. ⁶ Sehe cachja xu xitsehen cuitjin cojo rë me:

—Suá ri yëjë nandya xi cuacun vë cojo yëjë cjuanchina rë xi ngaye nihñi gubiernu. Cuma suá ri ta, tsëhë xi hatuxa ngahan cafahántsa, hane ha tu yo ni xi meje suá rë ne, suá rë. ⁷ Quihndë ne, sá xi cuindove cuiticjexcuin nguehe xi chjehercuin ná ne, cumá tsiji yëjë ni nandya vë. —Cuatjin xu cachja xitsehen.

⁸ Sehe ngajan xi cafayangui xu Jesús cuitjin:

—Xcun xujun rë Nina ne, cuitjin camahindu: “Meje rë xi chjuhuncun Nina naja, hacuaha suvá ni me vëhë meje rë xi nihñu hacutjin xi meje rë me.” —Cuatjin xu cachja Jesús cjuá vëhë.

⁹ Hya xi camá ne, xitsehen jan ne, quijicojo xu rë Jesús ngajan Jerusalén, hane quijicani rë me hisca rcu cjin yungun xi matitjun. Sehe cachja xu cojo rë me cuitjin:

—Sá xi Quihndi jain rë Nina ngaye ne, ningatjin yojo riji ndyá hisca nangui.

¹⁰ Ha hye ta tsajin mé cuma ri ta xcun xujun rë Nina ne, cuitjin chja:

Nina cuitexa me ángel rë me xi sahmi ri cuidadu.

¹¹ Cuahatsjá ri,

cojo sa xi hisca ntsacui ne, sacuinhmaain rë cojo ngu ndyoyo.

Cuatjin xu cachja xitsehen cjuá vëhë.

¹² Hane Jesús ne, cuitjin xu cafayangui me tsëhë xitsehen:

—Xujun rë Nina ne, cuitjin chja: “Mijí rë xi chjuhunchuvun Nina naja.”

¹³ Hya xi camá ne, xi cajnetaha cafaachuva xitsehen jan Jesús ne, cavetjuxin xu tsëhë me hisca janihya cuya nga.

Cavetsihin cavicuya Jesucristu xuta Galilea

¹⁴ Ngajan xi Jesús ne, cojo ngahñu rë Hasen rë Nina ne, quijinduju sa xu me xi cjue me ndava me ngajan distritu Galilea. Hane xi cafehe xu me jan ne, jercu cachja xuta tsëhë me ngajan Galilea cojo jinguyë ni nandya xi siu tahndee rë. ¹⁵ Hane quiji me yungun rë jimangu nandya tsëhë Galilea, cavicuya me xuta. Hane yëjë ni xuta jan ne, casahmi jyë casahmi hnga xu me Jesús.

Tacun Jesucristu nandya Nasaret

¹⁶ Cavechú ngu nixtin xi quiji xu Jesús ngajan nandya Nasaret hiscan xi camacha me. Hane sacuaa xcusun xi tjin

rë me ne, nixtin xi chjahájenda rë ne, quiji xu me yungun. Sehe quiji casecunvasen me xi cuichjasun xu me xujun rë Nina. ¹⁷ Hya xi camá ne, casengui tsja me xujun xi hinchá cjuá rë Nina xi cat-sihindu profeta Isaías. Hane xi titsixinga xu me xujun jan ne, táha tivanguise me cahndé xi quitahá cjuá xi meje rë me. Hane xi casacu rë me cahndé vëhë ne, sehe cavetsihin cachjasun xu me cjuá vihi xcun xuta:

¹⁸ Hasen rë Nina ne, jiya cahntsua xahasen naha,

vëhë xi casuaxa ná Nina xi suá cumachaya rë xuta yuma cjuandajyihi rë me:

catsingatju ná me xi suá cumachaya rë xuta xi hinchá ndavaya ta hatuxa cuma ndaya me,

suá cumachaya rë xuta xi rcá me ta hatuxa cuya cuma tsejen nga rë me; cuëhëndaya xuta xi jemu choho sahmi jingu sa xuta cojo rë me.

¹⁹ Hacuaha suá cumachaya rë xuta xi cavechú nu xi jercu sahmi Nina cjuandaja cojo xuta rë me.

Cuatjin chja cjuá rë xujun xi cachjasun Jesús.

²⁰ Hane xi cavuya catsijeyu nga Jesús xujun jan ne, sehe cavuya casua nga me me xi sahmi xá cahntsua yungun jan. Sehe cavéjña Jesús xi cuicuya rë me xuta. Hane yëjë ni xuta xi siu cahntsua yungun jan ne, jercu cavëhërcun me Jesús. ²¹ Sehe ngajan xi Jesús ne, cavetsihin cachja me cuitjin cojo xuta:

—Quihndé, jinguyëjë rë xi cavinuhyun cjuá xi camahindu xcun xujun rë Nina xi cavutaya jan ne, ngajan cavetjucaa cjuá vëhë. —Cuatjin xu cachja Jesús.

²² Yëjë ni xuta ne, jemu ndaja xu cachja me tsëhë Jesús, hacuaha hisca quijircun rë me tsëhë xi jemu ndaja camahani cjuá xi cachja Jesús. Sehe cachja xuta jan cuitjin:

—¡Peru cha vihi xi quihndi rë cha José jan! —Cuatjin xu cachja me.

²³ Hane Jesús ne, cuitjin xu cachja me cojo xuta jan:

—Ngahan matsejen ne, ha hvë ta ngayun ne, cuinújun cojo ná cjua vihi: “Doctor, nircun suvun rë yojo nuju.” Hacuaha cuinújun nga cuitjin: “Xcusun xi camachaya niji xi canihñu ngajan Capernaum matsejen ne, hacuaha nihñu xcusun vëhë nguehe xi nangui nuju.”

²⁴ Cuichjá cojo nuju cjuaquixi ta hisca xi ngu profeta matsejen ne, hatuxa macjaain rë xuta nangui rë me tsëhë me.

²⁵ Hacuaha ha cjuaquixi ta jemu cjín chjuun cahan xi caviyuju na nguehe Israel hya xi cavéjña profeta Elías hatsëë nixtin. Hacuaha nixtin vëhë matsejen ne, cavaain camahani tsi sacuaha jyan nu vasen, hane jercu jyë camahani jindya cavéjña jingujyë ni ladu.

²⁶ Peru catsingatjiin Nina profeta Elías xi cjue cuisecoo me hisca ngu na cahan xi cuacun vë matsejen ta ngu ni na cahan xi hisca hacuiin na tjë rë Israel na catsingatju Nina profeta xi cuisecoo me na ngajan nandya Sarepta, ladu tsëhë nandya Sidón. ²⁷ Hacuaha nguehe Israel matsejen ne, jemu cjín xuta xi yaha rë ngu chíhin vitaha xi setaha yojo naja caviyuju me hya xi cavéjña profeta Eliseo hatsëë nixtin. Peru hisca xi ngu me xi cuacun vë camandajin me matsejen ta ngu ni Naamán xi hisca hacuiin xuta tjë rë Israel ta xuta Siria me matsejen ne, me vëhë ni xi camandaja me. —Cuatjin xu cachja Jesús.

²⁸ Hane yëjë ni xuta xi siu xu cahntsua yungun jan ne, hya xi cahndë me cjua xi cachja Jesús jan ne, jemu camacjan rë me. ²⁹ Hya xi camá ne, xi caxinchacun xuta jan ne, cavaxëxin xu me Jesús, quijicojo me me hisca ngajan ngu xín tsëhë nandya, ngu rcu ndetjún hnga hiscan xi

cavéjña nandya rë me, xi meje tsingatjen me Jesús. ³⁰ Peru Jesús ne, cavatju xu me ngajñi rë xuta jan quijixin me.

Cha xi jiya xitsehen xahasen rë

³¹ Hya xi camá ne, quiji xu Jesús Capernaum, ngu nandya tsëhë distritu Galilea. Hane nixtin xi chjahájenda rë ne, quiji xu me yungun cavicuya me xuta. ³² Hane yëjë xuta xi siu jan ne, jercu quijircun xu rë me tsëhë cjua xi vicuya Jesús ta, tsëhë xi cjua xi vicuya me ne, sacuaha cjua xi chja ngu xi matitjun jain.

³³ Hacuaha cahntsua yungun jan ne, tacun xu ngu cha xi jiya xitsehen cahntsua xahasen rë cha. Hane xitsehen jan casahmi xi jercu cajindaya cha cachja cha cuitjin:

³⁴ —¡Ja! ¿Mé má cuatjin ninguisuhunjñu cojo niji ngayun Jesús, xuta Nasaret? ¿Há canduvun xi nicjun niji? Ngahan ne, ha hvë yo ngayun. Ngayun xi hatuxa vinechun tsëhë Nina ngayun. —Cuatjin xu casahmi xitsehen xi cachja cha.

³⁵ Hya xi camá ne, cuitjin xu cachja Jesús xi cavatëcja me cjua rë xitsehen xi jiya cahntsua xahasen rë cha:

—¡Jyuu nechín, hacuaha tetjixin tsëhë cha vë! —Cuatjin xu cachja Jesús.

Hya xi camá ne, catsiticia xu xitsehen jan cha ngajñi rë xuta, sehe cavetju quiji tsëhë xahasen rë cha, peru tsajin camahani mé cavanguihmu rë cha. ³⁶ Hya xi camá ne, yëjë xuta jan ne, jercu quijircun rë me, hisca cachja xu me ngajñi rë me cojo xicjin me cuitjin:

—¿Mé nga xcusun cjua vihi xi cojo yëjë ni ngahñu vitexa rë hisca xitsehen, hacuaha vetjuxin ni? —Cuatjin xu cachja xuta ngajñi rë me cojo xicjin me.

³⁷ Hya xi camá ne, jingujyë ni ladu tahndee rë cahndë jan ne, cavitsojo xu cjua xi cachja xuta tsëhë Jesús.

Camandaja nahya rë Simón Pedru xi casahmi Jesucristu

³⁸ Xi cavetju Jesús tsêhë yungun ne, quiji xu me ndava ngu me xi hmí rë Simón. Hane nahya rë Simón ne, jemu hmu xu rë me xi yaha rë me chîhin-suë. Hane yêjê xuta rë me ne, caféhya me cojo Jesús xi cuisecoo Jesús nahya rë Simón. ³⁹ Hane xi quiji cavutsejenya xu Jesús xcun nahya rë Simón ne, cavatêcja me chîhinsuë xi má rë xuta changá vêhë, hane cavetjuxin xu chîhin jan tsêhë me. Hane hora vêhë ni ne, cavisatjenhnga nahya rë Simón cavetsihin cafahacuenda me cjuandaja xi sahmi me cojo yêjê ni me xi cafehe jan.

Jemu cjin xutahmu rë camandaja me xi casahmi Jesús

⁴⁰ Hane hora xi tivetje tsuhi xu ne, yêjê ni xuta xi tjin rë me xutahmu rë tsêhë tu mé ni xcusun chîhin ne, quiji-cojo me xutahmu rë jan nixtin hya hiscan tacun Jesús. Hane xi cavisanetsja xu Jesús jima ngu xutahmu rë jan ne, camandaja me. ⁴¹ Hacuaha jemu cjin xu xuta xi siu jan cavetjuxin xitsehen xi hincha rë me. Hane xi cavetju xitsehen jan quiji ne, jercu cachja camahani cuitjin:

—¡Ngayun xi Quihndi jain rë Nina ngayun! —Cuatjin xu cachja xitsehen jan.

Peru cavatêcja xu Jesús cjua xi tichja xitsehen jan, casuaain me cahndé xi cuichja xitsehen ta, tsêhë xi ha vëë xu xitsehen xi me vêhë xi catsingatju Nina me.

Catsuyihiya Jesucristu cojo cjuandajiyihi rë Nina

⁴² Hane xi casahasen jan ne, cavetju xu Jesús quiji me ngajan ngu xín tsêhë nandya. Hane xutacjin jan ne, cuatjin quiji cavanguise xu me Jesús, hane xi cavechú me hiscan tacun Jesús ne, meje

tsinguijnehai me Jesús cojo sa xi hacuiin cuetjuxin me tsêhë xuta jan. ⁴³ Peru Jesús ne, cuitjin xu cachja me cojo xuta jan:

—Hacuaha sahmi ná ngujoyê xi cjué jingu sa cahndé, suá cumachaya rë xuta cjuandajiyihi tsêhë gobiernu xi sahmi Nina ta ngatsë rë vêhë xi catsingatju ná Nina. —Cuatjin xu cachja Jesús.

⁴⁴ Hane cuatjin xu catsuyihiya casua me camachaya rë xuta cjuandajiyihi vêhë yêjê ni yungun tsêhë ladu vêhë.

Cjuarcun xi casahmi Jesucristu tsêhë chu ti

5 Cuitjin xu camá nga ngu nixtin jan. Jercu cjin camahani xuta quijitjen-gui me Jesús xi cuihndé me cjua rë Nina. Na cavehncun xu me Jesús xi secun me tjeheh laguna Genesaret, xi hacuaha hmí rë laguna Galilea. ² Hya xi camá ne, cavëë Jesús jo barcu ngajan tjeheh rë laguna jan, hane cha xi tsêhë barcu jan ne, ha cavitujne xu cha tsêhë barcu, hane hincha vane cha nahya rë cha. ³ Hane Jesús ne, quiji cavisehen xu me ngu barcu xi cavëë me jan. Barcu jan ne, tsêhë Simón. Sehe cachja me cojo Simón xi cjuecojo me hitsë barcu ngajni nandá. Hya xi camá ne, quiji cavéjña me sehe cavicuya xu me xutacjin jan tsêhë ngajan ni cahntsua barcu. ⁴ Hane xi cajnetaha cavicuya me xuta jan ne, sehe ngajan xi cachja xu me cojo Simón cuitjin:

—Tángunvuhun sa cojo barcu vi hiscan nungun nandá, sehe ngajan ningatjunyun nahya xi chjuhun ti. —Cuatjin xu cachja me.

⁵ Sehe ngajan xi cafayangui xu Simón tsêhë Jesús cuitjin:

—Tatá, cuaha nixten tinihñí xá vêhë ne, ndastu mé sacu niji. Peru sá xi cuatjin nújun ne, cuichjá cojo compañeru naha ne, ningatjinyin nahya. —Cuatjin cafayangui xu Simón.

⁶ Hane xi casahmi me cuatjin ne, jercu tu cjín camaha xu ni ti cafaha me, ña meje xtiya nahya rë me. ⁷ Hya xi camá ne, casahmitsja xu me cojo xicjin me xi hinchu barcu xingu jan xi cjue cuisecoo xicjin me. Sehe quiji me xi cuacun jan. Hya xi camá ne, catsinguitsë me catsijo barcu cojo ti xi cafaha me jan. Hane xi jercu catsë barcu ne, ña meje xtyusehen. ⁸ Hane xi cavëë Simón Pedru xcusun xi camá jan ne, sehe quiji caticjexcun me xcun Jesús, sehe cachja xu me cuitjin:

—Tatá. Tángunxun hitsë tsahan ta, ngahan ne, ngu xuta tsehen ngahan. —Cuatjin xu cachja Simón Pedru.

⁹ Cuatjin cachja me ta, tsëhë xi jercu quijircun camahani rë me cojo compañeru rë me ngatsë rë ti xi jemu cjín camahani chu cafaha me. ¹⁰ Hacuaitjin xu ni quijircun rë yahnga compañeru rë Simón, me xi hmí rë Jacobo cojo Juan, me xi quihndi rë Zebedeo. Sehe ngajan xi Jesús ne, cuitjin xu cachja me cojo Simón:

—Xicarcuun ta quihndë cojo nixtin xi cjuiniji sa vi ne, ngayun cuangun nuvun xuta xi cuisehen me ladu naha ngojo rë xi nuvun chu ti. —Cuatjin xu cachja me.

¹¹ Hya xi camá ne, Simón cojo compañeru rë me ne, cavaxëxin xu me barcu jan tsëhë xcun nandá, caviyuju me nangui quixí. Sehe caviyuju me yëjë ni tsëhë me ne, sehe quiji me cojo Jesús.

Casahmi Jesucristu xi camandaja cha xi yaha rë chíhin xi setaha yojo naja

¹² Cuitjin camá nga xu hya xi case-taha Jesús ngu nandya jan. Cafehe xu ngu cha xi jinguyë ni yojo rë yaha rë ngu xcusun chíhin vitaha. Hane xi cavëë xu cha Jesús ne, quiji cha caticjexcun cha xcun Jesús cafehya cha cjuandaja xi sahmi me cojo rë cha, cuitjin xu cachja cha:

—Tatá. Sá xi meje nuju ne, cuma chjuhunxun chíhin xi yaha ná. —Cuatjin xu cachja cha.

¹³ Hane xi catsixinga xu Jesús tsja me cavetahatsja me cha ne, cachja me cuitjin:

—Meje ná. Catamandaja ngayun. —Cuatjin xu cachja me.

Hane chíhin jan ne, ngutjen xu ni cavetjuxin. ¹⁴ Sehe cavitexa me cha cuitjin:

—Tsajin camahani yo xi cuinújun cojo xcusun vihi. Nihñu sacuatjin cavitexa Moisés xutachanga naja hatsëë nixtin. Tángun ningacun yojo nuju cojo nahmi, sehe tángun chjuhun ngu cjuatjo xi tuhun rë Nina tsëhë xi camandaja ngayun. Cuatjin nihñu cojo sa xi cumatsejen xi camandaja jain ngayun. —Cuatjin xu cachja me.

¹⁵ Peru handasa cuatjin xu cachja Jesús cojo cha ne, hitsë sa jercu cavitsojo cjuat tsëhë xcusun xi casahmi me. Hya xi camá ne, jercu tu cjín camahani xuta quijitjengui xu me Jesús xi cuihndë me cjuat rë Jesús hacuaha cumandaja me tsëhë chíhin xi ma rë me. ¹⁶ Peru Jesús ne, yasen xu ni cavaxëxin me yojo rë me fi me ngajan ngu xín camahani, sahmi me oración rë me cojo Nina.

Casahmi Jesucristu xi camandaja cha xi cahme yojo rë

¹⁷ Cuitjin camá nga xu ngu nixtin hya xi tivicuya Jesús xuta. Hacuaha siu xu ngujo cha fariseo cojo ngujo cha xi vicuya cjuachacun xi canduva cha yëjë ni nandya tsëhë distritu Galilea cojo distritu Judea, cojo nandya Jerusalén. Hacuaha jercu yaha Jesús ngahñu rë Nina xi sahmi me xi cumandaja xuta hmu rë. ¹⁸ Hya xi camá xu ne, hora vëhë cafehe ngu cha xi cahme yojo rë, quichahahnga rë cha cojo nijña rë cha. Hane cha xi yahahnga rë cha ne, casahmi cha cjuandaja xi cuisehen cha cahntsua ndi-

hya xi cuejña cha cha hmu rë jan hiscan tacun Jesús. ¹⁹Peru xi casacuiin xu rë cha chuva rë hacutjin cuisehen cha ngatsë rë xuta xi jercu quitsë camahani me jan ne, camiji xu cha rcu ndihya, hane cafachaxin cha tyjavanitja, sehe catsitujne cha cha hmu rë jan taha rcu ndihya cojo ni nijña rë cha, xi camá cavejña cha cha ngajñi rë xuta hiscan tacun Jesús. ²⁰Hane xi cavëë Jesús xi cuatjin manguacacun cha xi cuacun jan cojo rë me ne, sehe cachja xu me cuitjin cojo cha hmu rë jan:

—Jyé nuju tsan ne, ha camanchataha. —Cuatjin xu cachja me.

²¹Hya xi camá xu ne, cha xi vicuya cjuachacun cojo cha fariseo xi cuacun jan ne, cavetsihin catsingataha cacun cha cachja xu cha cuitjin cojo xicjin cha:

—¿Yo cha xi cuijyihí vi xi tsixcuehyu cha Nina? ¡Hatuxa tsajin yo xi cuma tsinchataha jyë rë xuta ta suvá ni Nina xi cuma tsinchataha me! —Cuatjin xu cachja cha cojo xicjin cha.

²²Peru tsëhë xi Jesús ne, ha vëë me mé xi tisingataha cacun cha xi cuacun jan ne, cachja xu me cojo cha cuitjin:

—¿Mé xi tiningatuhuntacún cojo cjuatacun nuju? ²³¿Jarë cjuá xi hitsë sa tsaviin xi cuichjá? ¿Há xi: “Jyé nuju ne, ha camanchataha?”, o ¿há xi: “Tisatjunhngun ne, tujyuhunyun?” ²⁴Peru nguehe suá cumachaya nuju xi ngahan xi Quihndi rë Xuta Jain ngahan ne, yahá xá xi tsinchátaha jyë rë xuta nguehe ngasunhndë.

Sehe ngajan xi cachja xu Jesús cojo cha hmu rë jan:

—Quihndë ne, ngayun tsan ne, tisatjunhngun, chjuhun nijña nuju vë ne, sehe tjangun ndya nuju. —Cuatjin xu cachja Jesús.

²⁵Hya xi camá ne, ngutjen ni cavisatjenhnga xu cha ngajñi rë yëjë ni xuta, sehe cafaha cha nijña rë cha, cafe cha, taha sahmi jyë sahmi hnga cha Nina.

²⁶Hane yëjë ni xuta jan ne, jercu quijir-cun xu rë me, hacuaha cojo me casahmi jyë casahmi hnga xu me Nina, hisca catsacjun me camá. Hacuaha cachja xu me cuitjin:

—Quihndë cahyan xcusun xi tsajin nixtin xi hyan. —Cuatjin xu cachja me.

Cavaxijin Jesucristu Leví xi hacuaha hmí rë me Mateo

²⁷Hya xi camá xu ne, xi cavetju Jesús jan ne, cavechú me ngu cahndë hiscan xi tacun ngu me xi faha tujúnsa, me xi hmí rë Leví. Sehe cachja xu me cojo me cuitjin:

—Nduvun, cuanguen cona. —Cuatjin xu cachja me.

²⁸Hya xi camá ne, Leví jan ne, caviyuju yëjë mé xcusun xi sahmixa me cojo jan ne, sehe cavetju xu me quiji me cojo Jesús.

²⁹Hane xi cavatju vëhë ne, sehe casahmi xu me ngu suhi ngajan ndava me ngatsë rë Jesús. Hacuaha jercu cjín camaha xu ni cha xi faha tujúnsa cojo jingu sa xuta tijinë me niñu cojo Jesús cojo Leví. ³⁰Hane cha fariseo cojo cha xi vicuya cjuachacun cavetsihin cachjataha xu cha xuta ladu rë Jesús cuitjin:

—¿Mé má cuatjin chinu hyun tangun cojo cha xi faha tujúnsa cojo ngujo sa cha xi hacuaha cha tsehen cha? —Cuatjin xu cachjataha cha.

³¹Hane xi cafayangui Jesús tsëhë cha ne, cuitjin xu cachja me:

—Xuta xi hacuiin hmu rë me ne, mijí rë xi cjuahacuenda rë me doctor ta suvá ni xuta xi hmu rë me ne, me vëhë xi meje rë xi cjuahacuenda rë me doctor. ³²Hacuanitjin ná ngahan ta ngahan ne, hacuiin canduvá nguehe xi squindáyavaha rë xuta xi tsajin jyë rë me ta xi canduvá ne, xi squindáyavaha rë xuta tsehen. Cuichjá cojo rë me xi tsindeya me cjuatacun rë me. —Cuatjin xu cachja me.

Mé tséhë xi casahmii Jesucristu cojo xuta rë me xun rë me

³³Ngajan xi cha fariseo cojo cha xi vicuya cjuachacun ne, cachja xu cha cuitjin cojo Jesús:

—Yējë xuta ladu rë Juan ne, yasen ni sahmi me xun rë me hacuaha sahmi me oración rë me cojo Nina. Hacuanitjin ni yējë xuta ladu rë cha fariseo. Peru xuta ladu nuju ne, jinë jihvi me. —Cuatjin xu cachja cha.

³⁴Ngajan xi Jesús ne, cuitjin xu cachja me cojo cha:

—Cumaji xi xuta rë cha xi tivixan ne, sahmi me xun rë me jinguyējë rë xi cha xi tivixan ne, tacun cha cojo rë me. ³⁵Peru cuechú nixtin xi cha xi tivixan chjaháxin rë cha tséhë xuta rë cha ne, hya sahmi me xun rë me. —Cuatjin xu cachja Jesús.

³⁶Hacuaha cachja nga xu me ngu ejemplu vihi cojo cha xi cuacun jan:

—Tsajin yo xi cuicheya ngu rquí tsjian xatsë sehe cueyadoo cojo ngu tsjian changá ta sá xi cuatjin sahmi me ne, tsjian xatsë jan ne, tsinguetsun me. Hacuaha cumatanguaain ngu rquí tsjian xatsë cojo tsjian changá jan. ³⁷Hacuaha tsajin yo xi cuincha xan xatsë cahntsua chuxin changá ta sá xi cuatjin sahmi ne, xan xatsë jan ne, tsitsinga rë chuxin jan. Hane cjuë cuixu xan, hacuaha chuxin jan ne, cuetsun. ³⁸Xi meje rë ne, xan xatsë ne, xinha cahntsua chuxin xatsë. ³⁹Hacuaha ngu xuta xi ha cahvi me xan changá ne, ha quihndë mijí cuihi me xan xatsë, tséhë xi chja me ta xan changá ne, vëhë xi ndaja hyun. —Cuatjin xu cachja Jesús.

Cavotoho xuta ladu rë Jesucristu trigu nixtin xi chjahájenda rë

6 Hacuaha cuitjin camá nga xu ngu nixtin xi chjahájenda rë. Hya xi ti-vatju xu Jesús cojo xuta ladu rë me hiscan tjin tjë trigu ne, cavotohosun xuta

ladu rë me tsë tsë trigu jan, sehe cat-sufëtsja me, sehe cajinë me. ²Sehe ngajan xi ngujo cha fariseo xi cojo cjui jan ne, cachjataha xu cha me cuitjin:

—¿Mé má cuatjin tisahmi xuta ladu nuju xá, handasa chja ley naja xi tsajin cahndë xi nihña xá nixtin xi chjahájenda rë? —Cuatjin xu cachja cha.

³Ngajan xi Jesús ne, cuitjin xu cafayangui me tséhë cha:

—Ngayun ne, ha cachatayun xcusun xi casahmi xutachanga naja David hatsë nixtin. Hya xi jercu camavojo rë me cojo xuta xi siu cojo me ne, ⁴cavisehen me ndava Nina, hane cafaha me pan xi viyuju xcun Nina xi tsajin cahndë xi tu yo ni sinë ta suvá ni nahmi xi cuma sinë me. Peru me vëhë ne, cajinë me hacuaha casua me cajinë xuta xi siu cojo rë me.

⁵Hacuaha cachja sa Jesús cuitjin:

—Ngahan xi Quihndi rë Xuta Jain ngahan ne, ngahan xi vitéxa mé xi cuma nixtin xi chjahájenda rë. —Cuatjin xu cachja Jesús.

Casahmi Jesucristu xi camandaja cha xi quixihñu ngu tsja

⁶Cuitjin camá nga xu ngu nixtin xi chjahájenda rë. Quiji Jesús yungun ne, cavicuya me. Hane tacun xu ngu cha cahntsua yungun jan xi quixihñu tsja quixi cha. ⁷Hane cha xi vicuya cjuachacun cojo cha fariseo xu ne, siu tifahachuva xu ni cha Jesús, ¿há sahmi me xi cumandaja xuta nixtin xi chjahájenda rë?, cojo sa xi cuma cuinchajyë cha me tséhë xi sahmi me xá nixtin xi chjahájenda rë. ⁸Peru Jesús ne, ha vëë me mé xi tsingataha cacun cha xi cuacun jan. Sehe cachja xu me cojo cha xi quixihñu tsja jan cuitjin:

—Tisatjunhngun, hane tisechun nguehe cavasencja. —Cuatjin xu cachja Jesús.

Hane sehe cavisatjenhnga xu cha cavisecun cha. ⁹Sehe ngajan xi cachja xu Jesús cojo cha xi cuacun jan cuitjin:

—Sahme nuju ngu cjuachjinenguise vihi: Nixtin xi chjahájenda rë ne, ¿mé xi sua cahndé ley xi nihña?, ¿há xi cjuandaja ne?, o ¿há xi cjuatsehen? ¿Há xi naxentjeen cjuahñu rë xingueen ne?, o ¿há xi nicjeen? —Cuatjin xu cachja Jesús.

¹⁰ Xi cavutsejen Jesús xuta jingujuyë ni tahndee rë me ne, sehe cachja xu me cojo cha xi hmu tsja jan cuitjin:

—Nixingun ntsun. —Cuatjin xu cachja me.

Hane cuatjin casahmi cha. Hane tsja cha ne, ha camandaja xu sacuatjin xi jy-ihí titjún. ¹¹ Hya xi camá ne, cha xi cuacun jan ne, jemu camacjan camaha xu ni rë cha, hisca cachja cha ngajñi rë cha cojo xicjin cha mé xi ndatjin sahmi xu cha cojo Jesús.

Cavaxijin Jesucristu tejó me xi cuma apóstol

¹² Hacuaha cuitjin camá nga xu ngu nixtin nixtin xi cuacun vë. Cavetju Jesús quiji xu me ngu ndetjún xi sahmi me oración, hane ngajan cavéjña me cuaha nixten sahmi me oración rë me cojo Nina. ¹³ Hane xi casahasen ne, cajin-dayavaha xu me xuta ladu rë me, hane ngajñi rë xuta xi cuacun vë ne, cavaxijinñi xu me tejó xihin. Hane me xi tejó vëhë ne, me vëhë xu xi cachja Jesús tsëhë me apóstol. ¹⁴ Me xi cuicun vi xi tejó me xi cavaxijin Jesús: Simón, me xi hacuaha casuañihi me me Pedru, cojo Andrés hntsë Simón, Jacobo cojo Juan, Felipe cojo Bartolomé, ¹⁵ Mateo cojo Tomás, Jacobo quihndi rë Alfeo cojo Simón, me xi tsëhë partidu zelota, ¹⁶ Judas xuta rë Jacobo cojo Judas Iscariote, me xi sahmi entregadu rë Jesús.

Cafahacuenda Jesucristu jemu cjin xuta

¹⁷ Hane xi cavuya canduvajne xu Jesús tsëhë naxi jan cojo xuta ladu rë me jan

ne, xi cafehe xu me ngu ngasun ne, ngajan caxinchacunhñu xu me cojo xuta jan. Hacuaha jercu cjin sa xuta ladu rë me xi siuya jan, siuya tangun cojo jemu cjin camaha xu ni xuta tsëhë nandya Jerusalén cojo tsëhë yëjë sa nación Israel, hisca cojo xu xuta xi nduva tsëhë nandya Tiro cojo Sidón, xi siu ladu tsëhë tjehe ndachacun. ¹⁸ Yahnga xu xuta xi cuacun vë ne, canduva me xi meje cuisñuju me cjuar rë Jesús, hacuaha yahnga nga me ne, canduva me xi meje rë me xi cumandaja me tsëhë chfin xi yaha rë me. Hacuaha me xi jemu tivatju cjuañihi xi hinchaxitsehen cahntsua xahasen rë me ne, hacuaha camandaja xu me. ¹⁹ Yëjë ni xutacjin jan ne, cavanguise me chuva rë xi satëtsja me Jesús ta, tsëhë xi Jesús ne, jemu tjin rë me ngahñu rë Nina, hane ngahñu vëhë tisahmi xi mandaja xu yëjë xuta hmu rë.

Xuta xi ndaja tsëhë cojo xuta xi chojyihí tsëhë

²⁰ Ngajan xi ngaxtun vëhë xu ne, cavutsejen Jesús xuta ladu rë me, sehe cachja xu me cojo cuitjin:

—Jemu ndaja tsujun ngayun xi yumu matsejen ta, tsëhë xi ngayun matsejen ne, satë nuju gobiernu xi sahmi Nina.

²¹ Jemu ndaja tsujun ngayun xi vojo nuju quihndë matsejen ta, tsëhë xi cuechú nixtin xi jemu chuya rë xahasen nuju.

Jemu ndaja tsujun ngayun xi tichjihndun quihndë matsejen ta, tsëhë xi cuechú nixtin xi cuëjnu.

²² Hacuaha jemu ndaja tsujun ngayun hya xi choho scuëë nuju xuta, o hya xi cuaxëxin nuju me tsëhë ngajñi rë me, o hya xi choho cuichja me cojo nuju, o hya xi tsitjungui nuju me, ngatsë rë xi tjin tangun cjuatacun nuju cojo ná ngahan xi Quihndi rë Xuta Jain ngahan. ²³ Hisca chijihngun xi ndama nuju xi cuatjin tivatjun tijima nixtin hya mat-

sejen ta, tsêhê xi jemu jyê ngu cjuandaja xi tacunya nuju ngajan ngahnga. Jemu ndaja tsujun matsejen ta, tsêhê xi cuanitjin ni choho casahmi xutachanga naja cojo profeta hatsêê nixtin, hane jemu cachuya rê Nina tsêhê profeta xi cuacun vê.

²⁴ Peru jemu chojyihî tsujun ngayun xi nchina ngayun matsejen ta, tsêhê xi ha casacu nuju cjuetacun xi cuma nuju.

²⁵ Jemu chojyihî tsujun ngayun xi ha jemu chuya rê xahasen nuju quihndê matsejen ta, tsêhê xi cuechû nixtin xi cuma vojo nuju.

Jemu chojyihî tsujun ngayun xi tivêjnu quihndê matsejen ta, tsêhê xi cuechû nixtin xi jercu chjihndun xi cuma va rê xahasen nuju.

²⁶ Hacuaha jemu chojyihî tsujun ngayun hya xi ndaja cuichja yêjê xuta tsujun matsejen ta, tsêhê xi cuanitjin ni ndaja casahmi xutachanga naja cojo profeta ndacha hatsêê nixtin, hane profeta ndacha xi cuacun vê ne, cachuyiin rê Nina tsêhê me.

Meje rê xi nihmu tacun condra naja

²⁷ Peru ngayun xi tinuhyun xi chjá matsejen ne, cuichjá cojo nuju cuitjin: Nihmutacún xuta xi má condra nuju, ndaja nihñu cojo xuta xi choho vê nuju me, ²⁸ chjahyun rê Nina cjuandaja xi cuma rê xuta xi fehya rê me Nina cjuahngatacun xi cuatjun cuma. Ngajñi rê oración nuju matsejen ne, chjahyun rê Nina cjuandaja xi cuma rê xuta xi vangui nuju me si. ²⁹ Yo xi vajaya ngu ladu tsa nuju matsejen ne, nicuyun sa ngu ladu catajaya. Yo xi fahatahá chingá nuju matsejen ne, xicanichuun rê hisca chingá ngahma nuju. ³⁰ Yêjê ni xuta xi fehya nuju me mé xi fehya nuju me matsejen ne, tuhun rê me. Yo xi fahatahá mé xi fahatahá tsuhun matsejen ne, xicanujuun xi tsicuya nga me. ³¹ Sacuatjin xi meje nuju xi sahmi xuta cojo nuju matse-

jen ne, hacuaha cuanitjin ni nihñu cojo rê me.

³² Tsajin yo sua nacuechji nuju tsêhê xi hmutacún xuta xi hmucacun nuju me matsejen ta, tsêhê xi hacuaha hisca xuta tsehen matsejen ne, hmucacun me xuta xi hmucacun rê me. ³³ Hacuaha tsajin yo sua nacuechji nuju tsêhê xi ndaja nihñu cojo xuta xi ndaja sahmi me cojo nuju matsejen ta, tsêhê xi hacuaha hisca xuta tsehen matsejen ne, hacuanitjin ni sahmi me. ³⁴ Hacuaha tsajin yo sua nacuechji nuju tsêhê xi tuhun vuxetaha xuta xi vetuhun tacún xi ngascan matsejen ne, sua me nuxetuhun matsejen ta, tsêhê xi hacuaha hisca xuta tsehen matsejen ne, sua me vuxetaha xicjin me, cojo sa xi cuya cjuahatsja nga me chuva vêhê ni. ³⁵ Cúya cuichjá nga cojo nuju, nihmutacún xuta xi má condra nuju. Ndaja nihñu, hacuaha tuhun tuxetaha rê, peru xicavetuun tacún xi cuya chjuhunnstun nga. Sá xi cuatjin nihñu matsejen ne, jemu jyê cjuandaja xi sua nuju Nina ngascan, hane cjuandaja xi nihñu ngayun matsejen ne, tangun cojo cjuandaja xi sahmi Nina matsejen ta, tsêhê xi me vêhê matsejen ne, hatuxa jemu ndaja me cojo xuta tsehen xi hisca nacuechji rê Nina suaain me. ³⁶ Meje rê xi tjin nuju cjuayumatacun sacuatjin tjin rê Nina Nahmi naja cjuayumatacun.

Mijí rê xi nichuvan jingu sa xuta cojo cjuatacun rê me

³⁷ Hacuian nichuvun jingu sa xuta cojo cjuatacun rê me, sehe hacuiin tsichuva Nina ngayun. Hacuian ninguijuxun jyê rê jingu sa xuta, sehe hacuiin tsinguixi Nina jyê nuju. Ninchatuhun rê jingu sa xuta matsejen ne, sehe hacuaha tsinchataha nuju Nina. ³⁸ Tuhun rê jingu sa xuta matsejen ne, sehe hacuaha sua nuju Nina. Sua nuju me chuva xi cjuaquixi, hisca tsuquihine me, hisca tsiniyaya me chuva rê, hacuaha hisca xotje rê chuva xi sua

nuju me. Cuatjin nihñu matsejen ta, tsëhë xi chuva xi nichuvun matsejen ne, hacuaha chuva vëhë tsichuva Nina xi sua nuju me. —Cuatjin xu cachja Jesús cojo xuta ladu rë me.

³⁹ Hya xi camá ne, cachja sa xu me ngu ejemplu cuitjin:

—Ngu cha rcá matsejen ne, cumaji cjuemani cha ngu nga cha rcá matsejen ta, sá xi cuatjin matsejen ne, catsijo ni cha cuixuya cha xanga. ⁴⁰ Ngu cha xi sehe tivutaya matsejen ne, hacuiin hitsë sa vengui chjí rë cha xi cuma rë maestru rë cha matsejen ta hya xi ha ndaja cavutaya cha yëjë ni matsejen ne, sehe ngajan xi cuechútáha cjuatacun rë cha sacuaha cjuatacun rë maestru rë cha.

⁴¹ ¿Hacutjin má xi matsejen nuju xtë xi jiya tuxcun xingun, hane machayiin nuju tsëhë yasin xi jiya túxcun suvun ni?

⁴² ¿Hacutjin má xi cuma cuinújun cojo xingun xi meje naxun xtë xi jiya tuxcun me jinguyëjë rë xi suvun matsejen ne, matsijin nuju yasin xi jiya túxcun vë ni? Ngayun xuta ndacha, naxun titjun yasin xi jiya túxcun vë, sehe cumatsejenndaja nuju xtë xi jiya tuxcun xingun cojo sa xi cuma naxun.

Tsejen mé xcusun xuta me ngatsë ni rë cjua xi chja me

⁴³ Ha hyan matsejen ta tsajin hisca xi ngu yatjë xi ya ndaja xi sua tú xi ndajin, hacuaha tsajin hisca xi ngu ya xi ya machjiriin xi sua tú xi ndaja matsejen ta, ⁴⁴ jima ngu ya ne, cuma tsejen sá xi ndaja o sá xi ndajin ngatsë rë tú xi sua. Hatuxa sacuiin naja tú xi hmí higo rcu ngu yanahyálatu, hacuaha sacuiin naja uva rcu ngu yanahyátindu. ⁴⁵ Cuanitjin ni rë xuta matsejen ta sacuaha xuta ndaja matsejen ne, tsëhë cjuandaja xi tetjo rë me cahntsua xahasen rë me cojo cahntsua cjuatacun rë me matsejen ne, tsëhë ngajan vetju cjuandaja. Peru xuta tsehen matsejen ne, tsëhë cjuatsehen xi tetjo

rë me matsejen ne, tsëhë ngajan vetju cjuatsehen. Cuatjin matsejen ta, tsëhë xi yëjë ni xuta ne, cjua xi quitsë rë xahasen rë me cojo cjuatacun rë me matsejen ne, vëhë cjua xi vetju hntsua me.

Ejemplu tsëhë jo ndihya

⁴⁶ Yasen ni nújun xi nai nuju ngahan, peru ¿mé má nihñuu sacuatjin xi chjá cojo nuju ni? ⁴⁷ Yahnga ngayun xi nduvuntjengun ná hacuaha visiñuju cjua naha hacuaha nihñu sacuatjin chjá cojo nuju matsejen ne, nguehe cuichjá cojo nuju yo xi tangun ngayun cojo: ⁴⁸ tangun ngayun cojo ngu cha xi hya xi casahmi cha ngu ndihya matsejen ne, ndaja nungun cafangui cha, sehe ngajan caveña cha xihndëñaña rë hisca xcun ndyohñu. Hane hya xi camajyë ndajyë hacuaha casesuntë nandá matsejen ne, jercu hñu catsivaha rë ndihya jan, peru hisca catsiniyaain rë, tsëhë xi jemu ndatjin casecun. ⁴⁹ Peru yahnga nga ngayun xi visiñuju cjua naha peru nihñuu sacuatjin xi chjá matsejen ne, tangun ngayun cojo ngu cha xi casahmi ngu ndihya suvá xcun nangui ni, xi tsajin xihndëñaña rë. Hane hya xi camá ne, xi camajyë ndajyë matsejen ne, catsivaha rë ndihya jan, hane ngutjen ni caticja. Hane cavetsun camahani ndihya vëhë. Cuatjin xu cajnetaha cavicuya Jesús.

Casahmi Jesucristu xi camandaja hndixahan rë capitán xi vitexa me ngu cientu sindadu

7 Xi cajnetaha xu cachja Jesús yëjë ni cjua xi meje cuichja me cojo xuta ne, sehe cavuya quiji nga me nandya Capernaum. ² Hane nandya jan ne, ngajan xu tacun ngu capitán xi tjin rë me ngu hndixahan xi cavatsë me xi jiñahmú, ha ña meje cueya camaha xu ni. Capitán jan ne, jemu hmucacun xu me hndixahan jan. ³ Hane xi camachaya xu rë capitán jan xi tacun Jesús ne, catsingatju xu me

ngujo xuta changá rë xuta tjë rë Israel xi quiji cachja me cojo Jesús xi cjue sahmi me xi cumandaja hndixahan rë capitán jan. ⁴Hane xi cafehe xuta changá jan hiscan tacun Jesús ne, nguñaja camahani cacun me cafehya me xi cjue xu Jesús. Cachja me cuitjin:

—Nihñu favor ne, tisecon rë capitán hitsë ta, tsëhë xi jemu ndaja me. ⁵Handasa hisca hacuiin tjë rë xutachanga naja me ne, peru jemu hmucacun me ngayaan xuta tjë rë Israel, hacuaha casahmi me yungun niji cojo ngahñu rë suva me. —Cuatjin xu cachja xuta changá jan.

⁶Hya xi camá ne, quiji xu Jesús cojo rë me. Hane xi ha jima tiñataha me ne, sehe catsingatju xu capitán ngujo xuta ndaja rë me xi quijitjengui me Jesús. Hane xi cavechútáha xu me Jesús ngajan ndiya ne, cuitjin cachja me sacuatjin cachja capitán cojo rë me xi cuichja me cojo Jesús:

—Tatá. Xicatuhunndyuun yojo nuju. Ngahan ne, vechiin chuva rë xi ngayun cuinduvun ndya naha ta, tsëhë xi ngayun xi jemu jyë hnga ngayun cojo cjuatacun nuju. ⁷Vëhë xi hacuaha tsingátaha cá-cun xi jemu chúva ngahan cojo cjuatacun naha xi cjuë cuichjá cojo nuju. Quihndë ne, ndastu nihñu favor ne, tinújun xi cumandaja hndixahan naha. ⁸Ngahan ne, hvë xi cuma nihñu xcusun vëhë ta, ngahan ne, hacuaha tjin xuta xi matitjun tsahan, hane hacuaha tjin ná sindadu xi siu ngahma gobiernu naha xi sahmi hacutjin xi meje ná. Hya xi chjá cojo ngu xi cjue ne, fi. Hacuaha hya xi chjá cojo ngu nga xi cuinduva ne, nduva. Hane hndixahan naha ne, xi chjá cojo xi sahmi mé xi meje ná ne, sahmi. —Cuatjin xu cachja xuta ndaja rë capitán jan cjua rë capitán cojo Jesús.

⁹Hane xi cahndë xu Jesús cjua vëhë ne, jemu quijircun rë me tsëhë capitán jan. Hane xi cavuya me cavutsejen me

xutacjín xi tjengui rë me jan ne, cachja xu me cuitjin:

—Cuichjá cojo nuju ta, ngajñi naja ngayejen ni ngayaan xuta tjë rë Israel ne, cjëë scuëë ngu xuta xi cuatjin ndaja man-gucacun me cojo ná. —Cuatjin xu cachja Jesús.

¹⁰Hane xi cavuya xu me xi quiji tixa jan ne, cavëë me xi ha camandaja cha hndixahan jan.

Casahmi Jesucristu xi cavuya ngu nima cjuahñu

¹¹Xi cavatju vëhë ne, quiji nga xu Jesús ngu nandya xi hmí rë Naín. Cavisecoo xuta ladu rë me me quiji me, cojo jingu sa xutacjín xi cojo me quiji me. ¹²Hane xi tijima tiña xu me tsëhë tingotjo hnhua tsëhë nandya jan ne, cjui seyaniji xu ngu nima, ngu nima xi quihndi ngu tsëhë naa rë. Hacuaha naa rë nima jan ne, cahan xu me. Jercu cjín camahani xuta nandya visecoo me chjuun jan cjui me. ¹³Hane xi cavëë xu Nai naja chjuun jan ne, camayuma rë me me. Sehe cachja me cojo chjuun jan cuitjin:

—Ha quihndë xicachjihnduun. —Cuatjin xu cachja me.

¹⁴Hane xi quiji tiña xu Jesús hiscan xi cjui me cojo nima jan ne, sehe quiji cave-tahatsja xu me nachan xi quisun nima jan. Hane xuta xi yahahnga rë nima jan ne, caxinchacunhñu me. Sehe ngajan xi Jesús ne, cachja xu me cuitjin:

—Quihndë ne, ngayun tsan ne, ti-satjunhngun. —Cuatjin xu cachja me.

¹⁵Hane nima jan ne, cavisatjenhnga xu cha cavëjña cha. Sehe cavetsihin cachja cha. Sehe cachja Jesús cojo naa rë cha jan xi cjuahatsja nga me quihndi rë me. ¹⁶Hya xi camá xu ne, yëjë ni xuta jan ne, jemu catsacjun me camá. Hacuaha casahmi jyë casahmi hnga me Nina, cuitjin xu cachja me:

—Cavetjujñi ngajñi naja ngu profeta xi jercu vengui chji rë me, hacuaha casahmi Nina cjuandaja rë me cojo naja ngayaan xuta rë me. —Cuatjin xu casahmi jyë casahmi hnga me Nina.

¹⁷ Hya xi camá ne, cavitsojo xu cjua vëhë tsëhë Jesús jingujyë ni ladu vëhë cojo jingujyë ni naciön Israel.

Cavinenguise Juan Jesucristu, ¿há me vëhë xi catsingatju Nina me?

¹⁸ Cuitjin xu camá nixtin xi cuacun vë. Xuta ladu rë Juan ne, casua me camachaya rë me yëjë xcusun xi casahmi Jesús. Sehe ngajan xi Juan ne, cajindaya xu me jo xuta ladu rë me jan ne, ¹⁹ sehe catsingatju me me xi cjue cjuinenguise xu me Nai naja sá xi me vëhë xi chja xujun rë Nina xi tsingatju Nina me, o sá xi meje rë xi cuiyujuya rë xi cuinduva nga ngu. ²⁰ Hane xi cafehe xuta xi catsingatju Juan jan hiscan quitahá Jesús ne, cachja xu me cuitjin:

—Juan Vitenda rë Xuta ne, catsingatju niji me xi nduvin vinenguisin nuju ¿há ngayun xi tsingatju nuju Nina, o há tsajin ne, há cuinechinyin xi cuinduva nga ngu? —Cuatjin xu cavinenguise xuta xi catsingatju Juan jan.

²¹ Hane ha hora vëhë ni ne, Jesús ne, casahmi me xi jemu cjín xu xuta camandaja me tsëhë tu mé ni xcusun chíhin xi má rë me. Hacuaha jemu cjín sa xuta xi cavaxëxin Jesús xitsehen xi hinchahantsua xahasen rë. Hacuaha jemu cjín sa xu xuta rcá xi casahmi Jesús xi camá camatsejen rë me. ²² Hya xi camá ne, xi catsicuya me cjua cojo xuta ladu rë Juan ne, cuitjin xu cachja me:

—Tjangun ne, sehe tinújun cojo Juan yëjë xcusun xi cahyun cojo yëjë cjua xi canuhyun. Tinújun ta xuta rcá ne, camá camatsejen rë me; xuta rengun ne, camá quijindaja me; xuta xi yaha rë chíhin vitaha xi setaha yojo naja ne, camandaja me; xuta xi loho me ne, camá cahndë me;

nima ne, cavuya nga cjuahñu; xuta yuma ne, casacu camachaya rë me cjuandajyihí rë Nina. ²³ Hacuaha jemu ndaja tsëhë tu yo ni xuta xi hacuiin tsismicacun me xi mangu cacun me cojo ná. —Cuatjin xu cachja Jesús.

²⁴ Hane hya xi cavuya cafe xu xuta ladu rë Juan jan ne, sehe cachja Jesús cojo xutacjín jan cuitjin tsëhë Juan:

—Hya xi cavetjun catsangun ngajan ngu xín tsëhë nandya catsanguntjengun Juan matsejen ne, ¿há caningatuhuntacún xi cuechuntuhun ngu xihin xi hacuiin ngu ni cjuatacun rë me?, sacuatjin rë ngu ndeje xi fi nguehe fi ngajan rcu sacuatjin cjui tjo. ²⁵ O há tsajin ne, ¿há caningatuhuntacún xi cuechuntuhun ngu xihin xi yaja ngu tsjian xi jemu tu ndajyihi camahani? Hacuuiin cuatjin. Ha hyan matsejen ta xuta xi jercu tu ndacun camahani tsjian vaja me hacuaha hatuxa jemu cjuasua siu me matsejen ne, sacuiin naja me ngajan ngu xín camaha ni tsëhë nandya matsejen ta hiscan xi sacu naja me ne, ndava ngu xuta nchina. ²⁶ Peru ngayun matsejen ne, catsangun cachutsujun ngu profeta. Hacuaha cjuaquixi xi vëhë cachutsujun. Peru profeta Juan vë matsejen ne, hitsë sa vengui chji rë me xi cuma rë yëjë sa profeta xi yahnga. ²⁷ Hacuaha me vëhë xi cachja Nina tsëhë me xcun xujun rë me cuitjin:

Ngahan ne, tsingátju titjun ngu cha xi scuxaha cjuatacun rë xuta tsëhë xi cjuehé ngaye.

Cuatjin cachja Nina cojo Quihndi rë me.

²⁸ Cuichjá cojo nuju matsejen ta ngajñi rë yëjë xuta xi catsin me tsëhë naa rë me matsejen ne, tsajin ngu xi hitsë sa vengui chji rë xi cuma rë Juan. Peru hya xi cuet-sihin Nina sahmi me gobiernu nguehe ngasunhndë matsejen ne, xuta xi chuva cuengui chji rë me quihndë matsejen ne, hitsë sa cuengui chji rë me nixtin hya,

xi cuma rë xi ha vengui chji rë Juan quihndë.

²⁹ Hane hya xi yëjë ni xuta hisca cojo cha xi faha tujúnsa cahndë me cjua xi cachja Juan matsejen ne, catsingatihin me xi cuitenda Juan me. Hane chuva vëhë matsejen ne, catsingacun me xi macjain rë me xi Nina matsejen ne, yëjë xcusun xi sahmi me matsejen ne, hatuxa cjuaquixindaja jain. ³⁰ Peru jemu cjin cha fariseo cojo cha vicuya cjuachacun matsejen ne, catsingatiin cha xi cuitenda Juan cha. Hane chuva vëhë matsejen ne, catsitjungui cha xcusun xi meje sahmi Nina xi cuma tsëhë cha.

³¹ 'Ngayun xuta tjë rë Israel tsëhë nixtin vihi matsejen ne, ¿mé xi tangun ngayun cojo? ³² Tangun ngayun cojo langa xi siu ngajan ndetsin, xi jindaya xicjin cojo cjua vihi: "Canijani tsujun ne, mijí xtun; casin va ne, mijí chjihndun." Cuatjin jindaya langa. ³³ Cuatjin chjá cojo nuju matsejen ta, Juan xi vitenda nuju ngayun matsejen ne, jinii me niñu hacuaha hviin me xan, hane ngayun nújun ta jiya xitsehen xahasen rë me. ³⁴ Hane ngahan xi Quihndi rë Xuta Jain matsejen ne, jínë hacuaha hvë, hane nújun xi ngahan matsejen ne, ngu cha cahntsuaniñu ngahan, ngu cha cahntsuaxan ngahan, hacuaha ngu cha amigu rë cha xi faha tujúnsa cojo jingu sa xuta tsehen ngahan. ³⁵ Peru xuta xi fitjengui me cjuatacun rë Nina matsejen ne, xuta xi cuacun vëhë xi tsingacun naja me xi cjuatacun vëhë matsejen ne, ndaja jain. —Cuatjin xu catsinguijnetaha Jesús cjua rë me cojo xuta.

Catsinchataha Jesucristu ngu chjuun tsehen

³⁶ Ngu nixtin nga jan ne, cuitjin xu camá. Ngu cha fariseo ne, cachja xu cha cojo Jesús xi cjue sinë me cojo cha niñu ndava cha. Hane xi cavisehen me ndava cha fariseo jan ne, sehe quiji cafaha xu

me cahndë rë me xcun maxë xi sinë me niñu. ³⁷ Ngajan xi ngu chjuun tsehen tsëhë nandya vëhë ne, camachaya xu rë na xi Jesús ne, tacun me ndava ngu cha fariseo tijinë me niñu cojo cha ne, yaha xu na ngu frascu xi ndoyojo camá, hinchu ngu xcusun aceite ndaja xi jercu hnga chji rë. ³⁸ Quiji xu na se-cun na táha ntsacu me, jihnda na. Hane cojo ndatuxcun na ne, cavetsihin catsicahnnchi xu na ntsacu me. Hane cojo ts-jarcu na ne, cavujnu na, sehe cavitat-suha na. Hya xi camá xu ne, sehe cavitat-jnu na aceite. ³⁹ Peru xi cavëë xu cha fariseo xi quijicojo rë me jan xi cuatjin casahmi na ne, catsingataha cacun cha cuitjin: "Cha xi cuijiyih vihi ne, sá xi profeta jain cha ne, ha vëë cha mé xcusun chjuun na xi cuatjin satëtsja rë cha ta, tsëhë xi na vëhë ne, ngu chjuun tsehen na." Cuatjin catsingataha cacun xu cha. ⁴⁰ Sehe ngajan xi Jesús ne, catsicuya xu me cjua tsëhë cjuatacun xi catsingataha cacun cha fariseo jan, cuitjin xu cachja me:

—Simón, tjin ná ngujo cjua xi cuichjá cojo nuju. —Cuatjin xu cachja me.

Ngajan xi cha Simón jan ne, cuitjin xu cafayangui cha tsëhë me:

—Maestro, tinújun. —Cuatjin xu cachja cha.

⁴¹ Hya xi camá xu ne, cachja Jesús cuitjin cojo cha ngu ejemplu:

—Cuejña ne xi jo cha jan ne, quitjen cha tujún tsëhë ngu cha nchina. Ngu cha ne, quitjen cha tujún tsëhë hñu cientu nixtin xi sahmi ngu mosu xá. Hane ngu nga cha ne, quitjen cha tujún tsëhë yachan të nixtin. ⁴² Hane xi tsajin rë cha xi cuacun vë tujún xi sahmingojo cha ne, cha nchina jan ne, catsinchataha cha catsijo cha. ¿Jarë cha xi cuicun vi xi hitsë sa tsihmu cacun cha cha nchina jan, xi má nuju? —Cuatjin xu cachja me.

⁴³ Sehe ngajan xi cafayangui xu cha Simón cuitjin:

—Xi má ná ne, cha xi hitsë sa cjín quitjen. —Cuatjin xu cachja cha Simón.

Sehe ngajan xi cachja xu Jesús cojo cha cuitjin:

—Jemu ndaja canichuvun cjua xi canújun. —Cuatjin xu cachja Jesús.

⁴⁴Hane xi cavuya xu me cavutsejen me chjuun jan ne, sehe cachja nga me cojo cha Simón cuitjin:

—Chutsujun hacutjin casahmi chjuun vihi cojo ná. Ngayun ne, hora xi cavísehen ndya nuju ne, catuun nandá xi cjuengui ntsacú. Peru chjuun vihi ne, cojo ndatuxcun na catsicahnchi na ntsacú, hane cojo tsjarcu na ne, cavujnu na. ⁴⁵Hacuaha ngayun ne, cavitatsuun ná. Peru na vihi ne, hisca hora xi cavísehen ne, cjëë cuejñaxin na xi vitatsuha na ntsacú. ⁴⁶Ngayun ne, cavitejnuu aceite rcú. Peru chjuun vihi ne, cavitejnu na aceite ntsacú, aceite xi jemu ndaja jne camahani. ⁴⁷Vëhë xi cuichjá cojo nuju ta tsejen xi ha camanchataha na tsëhë jyë cjín xi tjin rë na ta, tsëhë xi jemu tjin rë na cjuahmutacun. Peru yo xi manchataha tsëhë hitsë jyë xi tjin rë ne, hacuaha chúva cjuahmutacun tjin rë. —Cuatjin xu cachja Jesús.

⁴⁸Ngajan xi cachja xu Jesús cojo chjuun jan cuitjin:

—Jyë nuju ne, ha camanchataha. —Cuatjin xu cachja me.

⁴⁹Hane xuta xi tijinë xu cojo rë me jan ne, cavetsihin cavinenguise me ngajñi rë me cojo xicjin me cuitjin:

—¿Yo rë cha xi cuijihi vi xi hisca jyë rë xuta tsinchataha cha? —Cuatjin xu cachja me.

⁵⁰Peru Jesús ne, cachja nga xu me cojo rë chjuun jan cuitjin:

—Ngayun ne, ha cavetjuntjun ta, tsëhë xi camangutacún cojo ná. Cuma cuangun cojo cjuasua. —Cuatjin xu cachja me.

Yachjin xi cafaahuenda rë Jesucristu

8 Cuitjin camá nga xu ngu nixtin. Jesús ne, titsujjihiya xu me jemu cjín nandya cojo ranchun tisua me tijimachaya rë xuta cjuandajjihi xi chja tsëhë gobiernu xi sahmi Nina. Hacuaha cojo tejó xuta ladu rë me jan cavisecoo xu rë me. ²Hacuaha cojo sa ngujo yachjin xi cavetju xitsehen xi hinchaxahasen rë me hacuaha camandaja me tsëhë chíhin xi má rë me ne, cojo xu me quiji me. María, na xi hacuaha hmi rë na Mágdala, ngu chjuun xi cavetju yatu xitsehen xahasen rë, ³cojo Juana, chjuun rë Chuza, ngu cha xi sahmixa ndava Herodes, me xi cavitexa ngajan distritu Galilea, cojo Susana cojo jemu cjín sa yachjin xi hacjahi. Yëjë ni yachjin xi cuacun vë ne, cojo xcusun xi tjin rë suvá me ne, cafaahuenda xu me Jesús cojo yëjë ni xuta xi ticojo me.

Ejemplu tsëhë cha xi catsitjë trigu

⁴Cuitjin camá xu ngu ndiya nga. Hya xi jemu cjín xuta camatangun me xi canduva nguehe canduva ngajan me jingu sa nandya xi nduva tjengui xu me Jesús ne, cachja Jesús cojo xuta jan ngu ejemplu vihi:

⁵—Cuejñaa ne xi ngu cha xi tsitjë trigu matsejen ne, cavetju cha quiji cha xi tsitjë cha trigu. Hane jinguyëjë rë xi titsitjë cha matsejen ne, ngujo matsejen ne, cavixu ndiya, hane canune rë. Hane xi canduva chu nisë matsejen ne, catsicjë chu cajnë chu. ⁶Hane ngujo nga matsejen ne, cavixu hiscan xi jemu naxindya. Hane xi cavetsihin tijima yehe ne, caxintsen matsejen ta, tsëhë xi tsajin mé xcuen rë. ⁷Hane ngujo nga matsejen ne, cavixu ngajñi nahyá. Hane xi camachatangun matsejen ne, nahyá jan matsejen ne, vëhë casahmi hndë rë catsixi rë. ⁸Hane xi yahnga nga matsejen ne, cavixu hiscan nihndë ndaja. Hane

xi camayehe matsejen ne, casua tutjé rë, ngu cientu sa cuatjin sacuatjin xi camatjé.

Xi cafë cachja me cjua vëhë ne, sehe jercu hñu xu cachja me cuitjin:

—Yo ngayun xi tjin nuju cjuasua xi cuinuhyun cjua naha ne, ndaja tinuhyun. —Cuatjin xu cachja me.

Mé má ejemplu cachja Jesucristu cojo xuta

⁹Ngajan xi xuta ladu rë me jan ne, cavinenguise xu me mé meje cuichja ejemplu xi cachja Jesús jan. ¹⁰Hane Jesús ne, cachja xu me cuitjin:

—Nina ne, casua me cahndé xi ngayun ne, cuijne rcun cjuatacun tsëhë gubiernu xi sahmi Nina, cjuatacun xi titjún ne, tsajin yo machaya rë. Peru yëjë sa me xi yahnga ne, tichjá cojo rë me cojo suvá ejemplu, cojo sa xi handasa cuihndë me cjua naha ne, peru cuijnii rcu me.

Cachja Jesús mé vijne ejemplu tsëhë cha xi catsitjé trigu

¹¹Quihndë ne, nguehe cuichjá cojo nuju mé meje cuichja ejemplu vëhë. Trigu xi tsitjé ngu cha jan ne, vëhë xi sacua ha cjua rë Nina. ¹²Hane hya xi vixu ngujo trigu ndiya ne, hacui sacua ha hya xi visiñuju xuta cjua rë Nina. Sehe vin-duva Satanás ne, fahatahá cjua rë Nina tsëhë xahasen rë me, cojo sa xi cuetjintjiin me ngatsë rë xi cumacjain rë me. ¹³Hane hya xi vixu ngujo trigu hiscan xi jemu naxindya ne, hacui sacua ha hya xi vihndë xuta cjua rë Nina, hane fahatsja me cojo cjuasua. Peru trigu xi cuacun vë ne, jemu chúva tyjama rë vetju. Hacuanitjin ni vatju ngujo xuta má. Macjain rë me ngujo nixtin ni, peru hya xi vechú ngunixin xi chjaháchuva rë me ne, fi ngaxtun me. ¹⁴Hane hya xi vixu ngujo trigu ngajñi nahyá ne, hacui sacua ha hya xi vihndë xuta cjua rë Nina, peru ha xcun xi ha cjuinduju me

cojo nixtin rë me ne, tsingataha cacun me tsëhë cjuacjintacun tsëhë cahntsua ndava me, tsingataha cacun me tsëhë cjuanchina, hacua ha tsingataha cacun me tsëhë cjuasua xi tjin ngasunhndë, hane vëhë suaain cahndé xi cumajyë cjua rë Nina cahntsua xahasen rë me, hacua ha sahmi me ngu cjuandaja xi tsingacun xi xuta rë Nina me. ¹⁵Hane hya xi vixu yahnga trigu hiscan nihndë ndaja ne, hacua ha hacui sacua ha hya xi vihndë xuta cjua rë Nina cojo ngu xahasen ndaja, ngu xahasen tyjahi, hacua ha tsismicacuaain me. Hane cuatjin cojo jeya ne, caa rë me sahmi me cjuandaja.

Ejemplu tsëhë ngu ndihi

¹⁶Hacuaha tsajin hisca xi ngu xuta xi ha xcun xi ha cavetaha rë me ngu ndihi ne, sehe faha me veyahma me ngahma rë ngu tyucu o sá xi faha me vejña me ngahma nachan ta, hatuxa faha me vejña me cahndé rë, cojo sa xi yëjë xuta xi visehen me hiscan setí ndihi jan ne, scuëë me hasen rë. ¹⁷Hacuanitjin ni chuva vëhë, yëjë cjua rë Nina xi tivicuyá nuju suvun ni ngayun xuta ladu naha ne, handasa hinchahma yëjë cjua vëhë quihndë ne, peru cuechú nixtin xi cuetjucaa tsejen, hacua ha cuicuyun rë yëjë xuta.

¹⁸Vëhë xi meje rë xi nihñu ngahñu xi ndaja cuisñuju cjua rë Nina ta, tsëhë xi tu yo ni xi tjin rë cjua vëhë ne, Nina ne, sua sa rë me. Hane tu yo ni xi tsajin rë cjua vëhë ne, hitsë cjua vëhë xi má rë xi tjin rë ne, chjahátahá rë. —Cuatjin xu cavicuya Jesús xuta ladu rë me.

Naa rë Jesucristu cojo xicjin me

¹⁹Ngajan xi naa rë Jesús cojo xicjin me ne, cafehetjengui xu me Jesús. Hane maji vechútahacjin rë me ta, tsëhë xi jercu quitsë camaha xu ni xuta. ²⁰Hane tjin xu yo casua camachaya rë Jesús cuitjin:

—Naa nuju cojo nixti xingun ne, hin-chacun me ngajan candatsen, xi nduvat-jengui nuju me. —Cuatjin xu casacu camachaya rë me.

²¹ Peru Jesús ne, cuitjin xu cafayangui me:

—Xuta xi vihdë me cjua rë Nina hacuaha sahmi me sacuatjin chja cjua vëhë ne, hacuaha tangun ni hmú cáacun me sacuatjin hmú cáacun naa naha cojo xingueen. —Cuatjin xu cafayangui me.

Cavatëcja Jesucristu ngahñu rë tjo cojo cjuasca rë nandá

²² Cuitjin camá nga xu ngu nixtin jan. Cavisehen Jesús cahntsua ngu barcu cojo xuta ladu rë me, sehe cachja xu me cojo xuta jan cuitjin:

—Cuanguen ngunda vëhë. —Cuatjin xu cachja me.

Sehe quiji me. ²³ Hane ngajñi cjui xu barcu cojo rë me ne, Jesús ne, cafañafë xu me. Hya xi camá ne, canduva ngu tjo hñu xi jercu tu cjuachan camahani vanga xcun laguna jan. Hane barcu jan ne, jercu tivisehen xu nandá cahntsua, hane me xi cuacun jan ne, jemu tsavi camahani xi cuma rë me. ²⁴ Hane xi quiji tiña xu me hiscan jiñafë Jesús ne, sehe catsingasca me me, cuitjin xu cachja me:

—¡Tatá, tatá! ¡Nguehe tifë ngayaan! —Cuatjin xu cachja xuta ladu rë Jesús jan.

Hane xi cavasca xu rë Jesús ne, cavatëcja me ngahñu rë tjo jan cojo cjuasca rë nandá jan. Sehe casejyu tjo casejyu nandá, jemu ndaja cavëjñajyu jingujyë ni. ²⁵ Sehe ngajan xi Jesús ne, cuitjin xu cachja me cojo xuta ladu rë me jan:

—¿Há manguaaintacún cojo ná ni? —Cuatjin xu cachja me.

Hane xi catsacjun xuta jan camá ne, jemu quijircun rë me. Sehe cachja xu me ngajñi rë me cojo xicjin me cuitjin:

—¡Mé xcusun xuta me vi xi hisca tjo hisca nandá vitexa me, hacuaha vihdë

tsëhë me ni! —Cuatjin xu cachja xuta ladu rë me jan.

Cha Gadarena xi hinchaxitsehen xahasen rë

²⁶ Hya xi camá xu ne, cafehe me nandya Gadara, ngu nandya xi tacun ngunda vëhë tsëhë laguna Galilea. ²⁷ Hane xi cafehe xu Jesús nangui quixí cojo xuta ladu rë me ne, cavechútáha me ngu cha tsëhë nandya vëhë xi hinchaxitsehen xahasen rë cha. Cha vëhë ne, ha jemu tsëë xu xi vajin cha tsjian, hacuaha hacuiin cahntsua ndihya véjña cha ta ngajan tahndë véjña cha. ²⁸ Xi cavëë xu cha Jesús ne, jercu cajindaya cha quiji caticjexcun cha xcun me, hacuaha jercu hñu cachja cha cuitjin:

—¿Mé má cuatjin ninguisuhunjñu cojo ná ngayun Jesús, Quihndi rë Nina xi hatuxa jyë hnga cojo Hasen rë? Nihñu favor ne, xicatuun ná cjuañihi. —Cuatjin xu cachja cha.

²⁹ Cuatjin cachja cha ta, tsëhë xi Jesús ne, ha cavitexa me xitsehen xi cuetjuxin tsëhë cha. Ha jemu tsëë xu nduva nixtin xi visehen xitsehen xahasen rë cha. Hane xuta ne, tsihñu tsja tsihñu ntsacu me cha cojo cadena cojo sa xi ha quihndë cuetjiin cha cjue cha. Peru xi vicheya cha cadena ne, xitsehen ne, ficojo cjuachan rë cha ngajan ngu xín camahani tsëhë nandya. Jemu cjín ndiya xu xi cavatju cha camá cuatjin. ³⁰ Ngajan xi Jesús ne, cuitjin xu cavinenguise me cha:

—¿Hacutjin hmí nuju? —Cuatjin xu cachja me.

Hane cha vëhë ne, cuitjin cafayangui cha:

—Sindadu Cjín. —Cuatjin xu cachja cha.

Cuatjin cachja cha ta, tsëhë xi jemu cjín xitsehen cavisehen xahasen rë cha.

³¹ Hane ngajan xi xitsehen xi cuacun jan ne, jemu cafehya xu favor cojo Jesús xi hacuiin cuitexa me xi cjue ngajan

nduchin. ³² Hane tiña ngajan ne, jemu cjín xu chinga hinchataha chu tijiné chu ngajan ngu ndetjún. Hane xitsehen jan ne, cafehya cojo Jesús xi sua me cahndé xi cuisehen xitsehen jan xahasen rë chinga. Hane casua xu me cahndé. ³³ Hane xi cavetju xu xitsehen jan tsêhë xahasen rë cha vëhë ne, quiji cavisehen xahasen rë chinga. Hya xi camá xu ne, chinga jan ne, cavanga chu quijijne chu tsêhë rcu ndetjún, hane ngajan cavixuya xu chu ngajni nandá tsêhë laguna, hane ngajan camiji rë chu nandá ne, ngajan cafë xu chu.

³⁴ Ngajan xi xi cavëë xu cha xi sahmi cuidadu rë chu chinga jan xcusun xi camá ne, cavanga cha quiji casua cha camachaya rë nandya cojo ranchun xcusun vëhë. ³⁵ Hya xi camá ne, xuta jan ne, cavetju xu me quiji cavutsejen me xcusun xi camá jan. Hane xi cavechútáha me Jesús ne, hacuaha cavëë me cha xi cavetju xitsehen xahasen rë jan, yaja xu cha ngu tsjian, hacuaha ha cavéjña chihin cjuatacun rë cha, tacun cha tiña ntsacu Jesús. Hane xuta jan ne, jemu catsacjun me camá. ³⁶ Hane xuta xi cavëë xu xcusun xi camá jan ne, casuacuenda me cojo xuta xi yahnga jan hacutjin camá xi camandaja cha xi caxincha xitsehen xahasen rë jan. ³⁷ Hya xi camá ne, yëjë xuta tsêhë ladu tsêhë nandya Gadara ne, cafehya xu me cojo Jesús xi cuetjuxin Jesús tsêhë xuta xi cuacun jan ta, tsêhë xi jemu catsacjun camaha ni yëjë me camá. Hane ngajan xi Jesús cojo xuta ladu rë me ne, cavisehen xu me barcu sehe cavuya nga me ngunda vihi. ³⁸ Hane chaja sa xi cjue Jesús ne, cha xi cavetju xitsehen xahasen rë jan ne, cafehya cha cojo rë me xi cjue cha cojo rë me. Peru Jesús ne, catsinguijnetaha xu me cjua cojo rë cha, cachja me cuitjin:

³⁹ —Tuyun tjangun ndya nuju ne, hacuaha tinújun cojo xuta tsêhë cjuan-

daja xi cuacun casahmi Nina cojo nuju. —Cuatjin xu cachja Jesús.

Ngajan xi xi cavuya cafehe xu cha nandya ne, sehe cavetsihin catsuyihiya casuacuenda cha xuta jinguýë ni ngajni nandya yëjë ni cjuandaja xi cuacun casahmi Jesús cojo cha.

Catsicuya Jesucristu cjuahñu rë quihndi rë Jairo hacuaha camandaja na xi casatëtsja tsjian rë Jesucristu

⁴⁰ Hya xi cavuya Jesús ngunda vihi ne, yëjë ni xutacjin jan ne, jemu ndaja caphatsja xu me Jesús ta, tsêhë xi hatuxa siuya me me. ⁴¹ Hane hora vëhë ne, canduva xu ngu me xi hmí rë Jairo, me xi má xutaxa rë yungun. Hane quiji caticjalcun xu me xcun Jesús. Hane cafehya me favor cojo Jesús xi cjue Jesús ndava me ta, ⁴² tsêhë xi me vëhë ne, tjin xu rë me ngu na lihndi xi quihndi ngu tsêhë me. Hane na lihndi vë ne, sacuaha tejó na nu. Hane meje cueya xu na.

Ngajan xi Jesús ne, quiji xu me. Hane ngajni cjuí me ne, jemu tivehñchun xu xuta me. ⁴³ Hane ngu na jan ne, tjin rë tejó nu xi yaha rë na chíhin xhamajni. Hane cafë tujún rë na cavechji na xcun doctor. Peru tsajin xu yo camá caphaxin chíhin xi má rë na. ⁴⁴ Hane xi quiji tiña na táha ngaxtun Jesús ne, quiji na casatëtsja na ntsacu tsjian rë me. Hya xi camá xu ne, ha tu ñahñu cavañen xi vanga rë na jni. ⁴⁵ Ngajan xi Jesús ne, cachja xu me cuitjin:

—¿Yo xi casatëtsja ná? —Cuatjin xu cachja me.

Hane xi cachja yëjë xuta xi hacuiin me casatëtsja me ne, sehe cachja xu Pedru cuitjin:

—Tatá, xutacjin ne, tivehñchun nuju me, hacuaha hisca titsivaha nuju me. —Cuatjin xu cachja Pedru.

⁴⁶ Peru Jesús ne, cachja nga xu me cuitjin:

—Peru tjin yo xi casatëtsja ná ta ngahan ne, camachaya ná xi cavetju ná hitsë ngahñu. —Cuatjin xu cachja Jesús.

⁴⁷ Hane xi vutsejen na xi cumaji seyahma na ngajñi rë xuta ne, ña fatsë xu na quiji caticjaxcun na xcun Jesús. Sehe catsinguixi na xcun yëjë ni xuta mé má cuatjin quiji na casatëtsja na Jesús, cojo tsëhë xi ngutjen ni camandaja na. ⁴⁸ Sehe ngajan xi Jesús ne, cuitjin cachja xu me cojo rë na:

—Ngayun tsan ne, camandaja ngayun ta, tsëhë xi camangutacún cojo ná. Cuma cuangun cojo cjuasua. —Cuatjin xu cachja Jesús.

⁴⁹ Tu tichja cuaha xu Jesús cojo na xi camandaja jan ne, cafehe nga ngu me xi canduva me tsëhë ndava xutaxa rë yungun jan, hane cuitjin xu cachja me cojo xutaxa rë jan:

—Quihndi nuju ne, ha cahme na. Ha quihndë xicatuñndyuun rë maestru. —Cuatjin xu cachja me.

⁵⁰ Hane hya xi cahndë Jesús cjuva vëhë ne, sehe cachja xu me cojo xutaxa rë jan cuitjin:

—Xicarcuun. Catamangutacún ni cojo ná ne, quihndi nuju ne, cumandaja na. —Cuatjin xu cachja me.

⁵¹ Hya xi camá xu ne, xi cafehe Jesús ndava xutaxa rë yungun jan ne, casuaain me cahndë xi cojo jingu sa xuta cuisehen me. Suvá ni Jesús cojo Pedru cojo Juan cojo Jacobo cojo naa cojo nahmi rë nima lihndi jan cuisehen me cahntsua ndihya. ⁵² Hane yëjë ni xuta ne, hisca chja hisca jihnda xu me tsëhë nima jan. Ngajan xi Jesús ne, cuitjin xu cachja me cojo xuta jan:

—Ha quihndë xicachjihnduun. Na lihndi vë ne, hacuiin cahme na ta jiñafë na. —Cuatjin xu cachja me.

⁵³ Peru xuta jan ne, tu cavejnucëe xu me Jesús ta, tsëhë xi vëndaja me xi cahme jain nima. ⁵⁴ Hane xi cavisehen Jesús hiscan jiña nima lihndi jan ne, sehe

quiji me cafaha me tsja, sehe ndaja hñu cachja xu me cuitjin:

—¡Tisatjinhngue, tsan! —Cuatjin xu cachja me.

⁵⁵ Hya xi camá xu ne, cavuya hasen rë nima, sehe ngutjen ni cavisatjenhnga na. Hane sehe cavitexa xu Jesús xi sua xuta rë na lihndi jan niñu sinë na. ⁵⁶ Hya xi camá xu ne, xutacha rë na lihndi jan ne, jemu quijircun rë me. Ngajan xi Jesús ne, cachja xu me cojo xutacha rë na lihndi jan xi tsajin camahani yo cuichja me cojo xcusun xi camá.

Catsingatju Jesucristu tejó xuta ladu rë me xi cuichja cjuandajyihi rë Nina

9 Cavechú ngu nixtin xi casahmitangun xu Jesús xuta ladu rë me xi tejó jan ne, sehe casua rë me ngahñu hacuaha casua rë me xá xi me xi cuacun vëhë cuitexa xu me yëjë xitsehen hacuaha sahmi me xi xuta hmu rë ne, cuma ndaja xu me. ² Hya xi camá xu ne, sehe catsingatju Jesús me xi sua me cumachaya rë xuta tsëhë gobiernu xi sahmi Nina hacuaha sahmi xuta xi cuacun vë xi xuta hmu rë ne, cuma ndaja xu me. ³ Hane cuitjin xu cachja Jesús cojo rë me:

—Xi cuetjun cuangun ne, tsajin camahani mé xi chuhun, hacuiin bastón ne, hacuiin changa, hacuiin niñu, hacuiin tujún, hacuaha hacuiin jo tsjian ngahma chuhun jima ngu ngayun. ⁴ Hacuaha xi cjuhun ngu ndihya ne, ha ngajan ni tinechun nguixun nguixun ni, hisca xi cuetjunxun tsëhë nandya vëhë. ⁵ Hya xi xuta tsëhë ngu nandya cjuahatsjaain nuju me ne, xi cuetjun tsëhë nandya vëhë ne, titsunu chojo rë ntsacun cojo sa xi cuma tsejen xi xuta jan cún rë me. —Cuatjin xu cachja Jesús.

⁶ Sehe ngajan xi cavetju xu xuta ladu rë Jesús jan, quiji catsujyihya me yëjë ni nandya tsëhë distritu Galilea, casua me camachaya rë xuta tsëhë cjuandajyihi xi chja tsëhë gobiernu xi sahmi Nina

hacuaha casahmi me xi xuta hmu rë ne, camandaja xu me jingujyë ni ladu vëhë.

Hviiin xuta yo xi Jesucristu

⁷Hane Herodes, me xi cavitexa ngajan distritu Galilea ne, camachaya xu rë me yëjë xá xi tisahmi Jesús cojo xuta ladu rë me. Hane ngu cachajá xu cjuatacun rë me ta, tsëhë xi ngujo xuta ne, chja me ta Jesús ne, hacui nima Juan Vitenda rë Xuta, hacuaha handasa cahme xu nima Juan vë ne, peru cavuya cjuahñu. ⁸Ngujo nga me ne, chja me ta profeta Elías xi cavuya, hane yahnga nga me ne, chja xu me ta ngu nima profeta xi hacjahi, xi cavéjña hatsëë nixtin ne, handasa cahme ne, peru cavuya cjuahñu. ⁹Peru Herodes ne, catsingataha cacun xu me cuitjin: “Nima Juan ne, ha cavitéxa xi catisun rcu. Peru quihndë ¿yo rë cha xi cuajyihi vë xi jemu cjín cjuanuhya rë tsëhë cha?” Cuatjin xu catsingataha cacun me. Jemu casahmi xu me ngujyë xi scuëë me Jesús.

Catsicjen Jesucristu hñú mil xihin

¹⁰Hane xi cavuya xu apóstol tsëhë hiscan xi quiji me jan ne, sehe casuacuenda xu me Jesús xcusun xi casahmi me. Ngajan xi Jesús ne, quijicojo xu me suvá ni apóstol jan ngu cahndë xín, tiña tsëhë ngu nandya xi hmí Betsaida. ¹¹Peru xi camachaya rë xutacjín jan ne, quijitjen-gui xu me Jesús. Hane Jesús ne, jemu ndaja cafhatsja me xuta jan, hane sehe cachja me cojo xuta jan tsëhë gobiernu xi sahmi Nina. Hane xuta xi meje rë xi cuma ndaja me ne, casahmi xu Jesús xi camandaja me.

¹²Hane xi quiji hora jan ne, xuta ladu rë Jesús xi tejó jan ne, quijivaha me xcun Jesús sehe cachja xu me cojo cuitjin:

—Tinújun cojo xutacjín vë ne, catji me nandya xi siu tiñataha o sá xi ranchun xi siu tiñataha, cojo sa xi cuanguise me cahndë xi cuiyuju me hacuaha cuanguise

me xi sinë me ta, tsëhë xi jemu xín tsëhë nandya hiscan xi nechantahan vi. —Cuatjin xu cachja apóstol.

¹³Ngajan xi Jesús ne, cuitjin xu cachja me cojo apóstol jan:

—Ngayun tuhun xi sinë me. —Cuatjin xu cachja me.

Ngajan xi apóstol ne, cafayangui xu me cuitjin:

—Hñú tutu pan cojo jo ti tjín naja. ¿Há cuanguin chíhin niñu xi sinë yëjë xuta xi cuicun vi ni? —Cuatjin xu cachja me.

¹⁴Cuatjin cachja me ta, tsëhë xi ngajñi rë yëjë xuta xi siutahá jan ne, sacuaha hñú mil má xuta xi xihin. Sehe ngajan xi cachja xu Jesús cojo xuta ladu rë me jan cuitjin:

—Tinújun cojo rë xuta vë ne, catiyuju me sacuaha yachantë me ngu ngu cahndë. —Cuatjin xu cachja me.

¹⁵Ngajan xi xuta ladu rë Jesús jan ne, cuatjin casahmi me, hane caviyuju xu yëjë xuta. ¹⁶Hya xi camá ne, cafaha xu Jesús hñú pan cojo jo ti jan ne, hane xi cavutsejenniji me ngahnga ne, casua me nacuechji rë Nina, sehe cavotoho langa me pan hacuaha cavatëlanga me ti jan, sehe casua xu me cojo xuta ladu rë me xi cjue sua rë me xutacjín jan. ¹⁷Hane xuta ne, yëjë ni me cajinë me hacutjin xi cachuya rë xahasen rë me. Hane xi cachjaya rë xi cavangui cajinë xuta jan ne, catsë xu tejó chajne.

Catsinguixi Pedru yo Jesucristu

¹⁸Cuitjin camá nga ngundiya. Hya xi tisahmi xu Jesús oración rë me ne, xuta ladu rë me ne, hacuaha cojo me siu me cojo rë me. Sehe ngajan xi cavinenguise xu Jesús me cuitjin:

—¿Mé chja xutacjín jan ne, yo ngahan? —Cuatjin xu cachja me.

¹⁹Sehe ngajan xi cachja xu me cojo Jesús cuitjin:

—Yahnga me ne, chja me ta Juan Vitenda rë Xuta ngayun. Hane yahnga nga

me ne, chja me ta profeta Elías ngayun. Hane me xi yahnga nga ne, chja me ta ngayun ne, ngu profeta xi hacjahi, xi cavéjña hatsëë nixtin, xi handasa cahme ne, peru cavuya cjuahñu. —Cuatjin xu cachja xuta ladu rë Jesús.

²⁰ Sehe Jesús ne, cuitjin xu cavinenguise nga me:

—Hane ngayun ne, ¿mé nújun ni, yo ngahan? —Cuatjin xu cavinenguise Jesús.

Ngajan xi Pedru ne, cuitjin xu cafayangui me:

—Ngayun xi catsingatju nuju Nina xi cumatitjun ngayun tsijin. —Cuatjin xu cafayangui Pedru.

Cachja Jesucristu xi tsiquehen xuta me

²¹ Peru Jesús ne, cavitexa xu me xuta jan xi tsajin camahani yo xi cuichja cojo me cjuatacun jan. ²² Cuitjin xu cachja me:

—Ngahan xi Quihndi rë Xuta Jain ngahan ne, hachu meje rë xi jemu cjín cjuañihi cuátju cuma; xuta changá cojo nahmi xi matitjun tsëhë nahmi cojo cha xi vicuya cjuachacun ne, tsitjungui me ngahan, tsiquehen me ngahan. Peru xi ma jyan nixtin ne, tsicuya Nina ngahan cjuahñu. —Cuatjin xu cachja Jesús cojo xuta ladu rë me.

²³ Hane sehe cavuya cachja nga me cojo yëjë ni xuta jan cuitjin:

—Sá xi tjin yo xi meje rë xi cuma xuta ladu naha matsejen ne, ha quihndë mijí rë xi sahmi hacutjin xi meje rë suvá matsejen ta nchunchujun ni matsejen ne, catejñahñu xahasen rë xi cjuecojo ndiya naha, handasa hisca cueya xcun cru. ²⁴ Cuatjin matsejen ta, tsëhë xi yo xi meje cjuenduju cojo ngasunhndë rë cojo cjuatacun rë suvá matsejen ne, cuechintaain cjuahñu xatsë. Peru yo xi cuatju cjuañihi o hisca cueya ngatsë naha matsejen ne, vëhë xi cuechútáha

cjuahñu xatsë. ²⁵ ¿Mé machjirëhë rë yo xi sacú rë yëjë cjuanchina rë ngasunhndë sá xi cueya hacuaha cuma castigu? ²⁶ Machjiriin matsejen ta, tsëhë xi yo xi ma sava rë ngatsë naha cojo ngatsë rë cjua naha matsejen ne, ngahan xi Quihndi rë Xuta Jain ngahan matsejen ne, hacuaha cuma sava ná tsëhë hya xi cuinduva cojo hasen ndajyihi naha hacuaha tsëhë Nahmi naha hacuaha tsëhë ángel xi vejña tsëhë me. ²⁷ Nguehe cuichjá cojo nuju cjuaquixi matsejen ta tjin yahnga ngayun xi sechun nguehe xi cueyuun jinguyëjë rë xi cjëë chun gobiernu xi sahmi Nina. —Cuatjin xu cachja Jesús.

Ñahñu camatsejen nima Moisés cojo xutachanga xi hmí rë Elías visiajmi cojo Jesucristu

²⁸ Cuitjin camá nga xu ngundiya hya xi cavatju sacuaha jyin nixtin xi cavicuya Jesús cjua vëhë. Quijicojo me Pedru cojo Juan cojo Jacobo quijiniiji xu me ngu ndetjún xi sahmi me oración rë me. ²⁹ Hora xi tisahmi xu Jesús oración rë me ne, xcun me ne, cavindeya xcusun rë. Hane tsjian rë me ne, jercu tu tyava camahani camá, ña setí jyihi. ³⁰ Hacuaha camatsejen xu jo xihin hinchacun visiajmi cojo rë me. Xihin jan ne, hacui xu nima profeta Moisés cojo profeta Elías. ³¹ Me xi cuacun vëhë ne, camatsejen me cojo ngu hasen ndajyihi, tivisiajmi xu me tsëhë cjuaveya xi hatuxa tjin rë xi cuechútáha Jesús ngajan Jerusalén. ³² Peru Pedru cojo jo sa me xi yahnga jan ne, ha siufë me, tsëhë xi jercu nijñá rë me. Peru xi cavascandaja xu rë me ne, cavëë me hacutjin jercu setí camahani tsejen hiscan secun Jesús, hacuaha cavëë xu me jo me jan hinchacuntangun me cojo Jesús. ³³ Hya xi camá ne, hora xi tivetjuxin me xi cuacun vë tsëhë Jesús ne, sehe cachja xu Pedru cojo Jesús cuitjin:

—Tatá. Tu ma rë xi nguehe nechin ne, nihñi jyan puestu; ngu cuma tsujun ne, ngu cuma tsëhë Moisés, hane cojo ngu cuma tsëhë Elías. —Cuatjin xu cachja Pedru, peru hisca hvíin me mé xi chja me.

³⁴ Hane hora xi tichja xu Pedru cuatjin ne, canduva ngu yufí casahmi tjahnguen rë tsëhë me. Hane jemu catsacjun me camá xi caxinchavasen me tsëhë yufí jan. ³⁵ Hya xi camá ne, canuhya xu rë ngujo cjua xi cavetju ngajñi yufí jan xi cachja cuitjin:

—Cha vihi xi Quihndi naha cha, cha xi ngahan cavejñá cákun xi tsingátju. Tinuhyun cjua xi chja cha. —Cuatjin xu cachja cjua jan.

³⁶ Hane xi cavatju cachja cjua jan ne, Jesús ne, camasuvá sa me secun me. Hya xi camá xu ne, jyan xuta ladu rë Jesús jan ne, tu caviyujuyuu ni me. Hane nixtin hya ne, cachjaain camaha xu ni me cojo hisca ngu tsëhë xcusun xi cavëë me.

Casahmi Jesucristu xi camandaja cha lihndi xi jiya xitsehen xahasen rë

³⁷ Cuitjin camá nga xu camá nchujun hya xi canduvajne Jesús tsëhë ndetjún cojo jyan xuta ladu rë me jan. Tjercu cjín camahani xuta canduvatjengui xu rë me ndiya. ³⁸ Hane ngajñi rë xutacjín jan ne, cavetjuiñi ngu xihin xi jercu cajindaya xu cachja cojo Jesús cuitjin:

—Maestro, nihñu favor ne, nduvun chutsujun cha lihndi naha ta ngu tutu má cha vi xi tacun ná cha. ³⁹ Hane cuitjin sahmi ngu xitsehen cojo rë cha: faha rë cha, hane tu ñahñu jindaya, sehe vit-suneya rë cha, ña vetju natyaxu hntsua cha, hane hisca hya xi ndiya cjuë cha ne, sehe vetjuxin tsëhë cha. ⁴⁰ Xuta ladu nuju, caféhya rë me favor xi cuaxëxin me, peru camaji cavaxëxin me. —Cu-atjin xu cachja xihin jan cojo Jesús.

⁴¹ Sehe ngajan xi Jesús ne, cuitjin xu cafayangui me:

—Ngayujun ni ne, xuta xi macjaain rë ngayun hacuaha xuta xi cavetjuxin tsëhë ndiya ndajyihi ngayun. ¿Jani hisca hya xi tjin ná xi cuitejña cojo nuju? ¿Jani hisca hya xi tjin ná xi scaa ná cojo nuju? Nduvuncujun quihndi nuju nguehe. —Cuatjin xu cafayangui me.

⁴² Hane hora xi tijima tiña xu cha lihndi jan tsëhë Jesús ne, xitsehen ne, cat-siticia rë cha, hacuaha vitsuneya rë cha. Hya xi camá ne, cavatëcja Jesús tsëhë xitsehen, hane casahmi me xi camandaja xu cha lihndi jan. Sehe casua me cha cojo nahmi rë cha. ⁴³ Hane yëjë ni xuta jan ne, jemu quijircun camaha xu ni rë me xi cuatjin jyë hnga Nina cojo Hasen rë me.

Cachja nga Jesucristu xi tsiquehen xuta me

Hane jinguyëjë rë xi cuatjin tifircun rë xutacjín jan tsëhë yëjë ni xcusun xi sahmi Jesús ne, cachja xu me cojo xuta ladu rë me cuitjin:

⁴⁴ —Ndaja tetuhunrcun cjua xi tichjá cojo nuju vi: Ngahan xi Quihndi rë Xuta Jain ngahan ne, hatuxa tjin xi cuma ngahan entregadu tsja xuta. —Cuatjin xu cachja me.

⁴⁵ Peru xuta ladu rë Jesús jan ne, cavi-jnii rcu me mé vijne cjua jan ta, tsëhë xi casetsa xu rë cjuatacun rë me, cojo sa xi cuijnii rcu me. Hacuaha tsacjun xu me xi cjuinenguise me Jesús mé vijne cjua vëhë.

Yo xi matitjun

⁴⁶ Ngu nixtin jan ne, cavetsihin sacuaha xi meje scaanya xu xuta ladu rë Jesús ngajñi rë me yo xi hitsë sa matitjun. ⁴⁷ Peru Jesús ne, xi ha vëë me hacutjin tsingataha cacun xuta ladu rë me jan ne, sehe cafaha me ngu lihndi cavisecun me ndaya rë me, ⁴⁸ sehe cachja xu me cojo xuta ladu rë me jan cuitjin:

—Tu yo ni xi cjuahatsja rë lihndi vihi tsëhë xi ladu naha má ne, hacuaha hora vëhë cjuahatsja ná ngahan. Hacuaha xi cuatjin cjuahatsja ná ngahan ne, hacuaha cjuahatsja rë Nina xi catsingatju ná. Hane tu yo ni xi má nuju xi matjengui tsëhë ngajñi nuju ngayujun ni ne, vëhë xi matitjin xi má rë Nina. —Cuatjin xu cachja Jesús.

Xuta xi hacuiin condra nuju má me ne, hatuxa favor nuju fi me

⁴⁹ Ngajan xi Juan ne, cachja xu me cojo Jesús cuitjin:

—Tatá, cahyin ngu me xi tivaxëxin xitsehen sacuaha xi suvun catuhun rë me xá. Hane canújin cojo rë me xi ha quihndë sahmi me cuatjin ta, tsëhë xi me vëhë ne, tsujyihintjenguiin me ngayun sacuatjin niji ngayin. —Cuatjin xu cachja me.

⁵⁰ Hane Jesús ne, cuitjin xu cafayangui me:

—Xicanujuun cojo rë me cuatjin ta, tsëhë xi xuta xi hacuiin condra naja má me ne, hatuxa favor naja fi me. —Cuatjin xu cachja Jesús.

Catsingatiin xuta distritu Samaria Jesucristu

⁵¹ Hya xi camá ne, xi tijima tiña xu nixtin xi cjueniji Jesús ngajan ngahnga ne, cavejñahñu me cjuatacun rë me xi cjue me ngajan Jerusalén. ⁵² Vëhë xi catsingatju titjun xu me jo xuta ladu rë me. Xi quiji me ne, cafehe me ngu nandya tsëhë xuta Samaria, xi cuanguise me cahndé xi cuejña Jesús cojo xuta ladu rë me. ⁵³ Peru xuta jan ne, cafahatsjaain xu me Jesús ta, tsëhë xi Jesús ne, hatuxa tjin cacun me xi cjue me hisca Jerusalén. ⁵⁴ Peru hya xi camachaya xu rë Jacobo cojo Juan, xuta ladu rë Jesús, cjuahatsja vëhë ne, cachja xu me cojo Jesús cuitjin:

—Tatá. ¿Há nihña sacuatjin casahmi profeta Elías hatsëë nixtin? ¿Há cuitexan

xi cuinduva ndihi tsëhë ngahnga, tsicjé rë xuta xi cuicun vi? —Cuatjin xu cachja me.

⁵⁵ Ngajan xi Jesús ne, cavuya vutsejen me xuta ladu rë me jan ne, sehe cavatëcja xu me cjuatacun xi tsingataha cacun me xi cuacun jan, cuitjin cachja me:

—Ngayun ne, hyúun mé xcusun Hasen xi tsëhë nuju. ⁵⁶ Ngahan xi Quihndi rë Xuta Jain ngahan ne, hacuiin canduvá xi tsicjé xuta ta xi canduvá ne, xi cuáxëtjé me. —Cuatjin xu cachja Jesús.

Sehe quiji xu me ngu nga nandya.

Xuta xi camameje cjue cojo Jesucristu

⁵⁷ Hane ndiya cjui Jesús cojo xuta ladu rë me ne, cachja xu ngu me jan cojo rë me cuitjin:

—Tatá. Tu yani ni xi cuangun ne, cjué cojo nuju. —Cuatjin xu cachja me.

⁵⁸ Sehe ngajan xi Jesús ne, cuitjin xu cachja me cojo xuta jan:

—Chu ninda ne, tjin nguijo hiscan viyuju chu, hane nisë xi vitjen chu ngahnga ne, tjin ndava chu, peru ngahan xi Quihndi rë Xuta Jain ngahan ne, hisca ndya naha tsajin. —Cuatjin xu cachja me.

⁵⁹ Cachja sa xu me cuitjin cojo ngu nga xuta jan:

—Nduvun, cuanguen cojo ná. —Cuatjin xu cachja me.

Peru xuta jan ne, cuitjin xu cachja me:

—Tatá. Tuhun ná cahndé, titjun cjué xi seyaniji nahmi naha. —Cuatjin xu cachja ngu nga xuta jan.

⁶⁰ Ngajan xi Jesús ne, cuitjin xu cachja me:

—Xuta xi sacuaha xi cahme cjuatacun rë me xi sahmicuendaain me Nina ne, me vëhë catinchaniji me nima rë me. Peru ngayun ne, tángun tuhun cumachaya rë xuta tsëhë gobiernu xi sahmi Nina. —Cuatjin xu cachja me.

⁶¹ Ngu nga xuta ne, cachja xu me cojo Jesús cuitjin:

—Tatá. Ngahan ne, hacuaha cjué cojo nuju. Peru tuhun ná cahndé, cjué tsingujnetaha cjuá cojo xuta naha. —Cuatjin xu cachja xuta jan.

⁶² Peru Jesús ne, cuitjin xu cachja me cojo xuta jan:

—Ngu xuta xi ha cavejña cacun me xi cjuetjengui me ndiya rê Nina sehe cumangu cumajo cacun me çhá cjue, há cjuin me ne?, tangun me cojo ngu cha xi ha cafaha cha ndetsihin latu xi cuetsihin cuacjan cha nangui peru tivutsejen sa cha taha ngaxtun cha. Sacuatjin machjiriin cha vihi xi cuacjan cha nangui ne, hacuanitjin ni machjiriin me vèhë xi cuisecoo me Nina hiscan xi sahmi Nina gobiernu. —Cuatjin xu cachja Jesús.

**Catsingatju Jesucristu jyanchan tejó
xuta ladu rê me xi cuichja
cjuandajyihî rê Nina**

10 Xi cavatju xu vèhë ne, sehe casuaxa Nai naja jyanchan tejó sa xuta ladu rê me, sehe catsingatju titjun me chuva jo chuva jo xuta jan yějë ni nandya cojo yějë ni cahndé xi catsingataha cacun Jesús xi sehe cjue me.

² Hane cuitjin xu cachja me cojo:

—Jemu tjin camahani xuta xi meje cuisinuju me cjuá rê Nina, peru me xi sua cumachaya rê xuta ne, jemu chuva má me. Vèhë xi meje rê xi chjahyun rê Nina favor xi tsingatju me me xi cjue sua cumachaya rê xuta cjuá rê Nina. ³ Tangun ni. Ngahan titsingátju nuju ngayun xuta jeya ngajñi rê xuta hnga cacun, sacuaha cjue ngu chu hnditsánga ngajñi rê chu cjan rê. ⁴ Xicachjuun tujún, xicachjuun changa, hacuaha xicachjuun chuxinxte. Xicavisajmuu cojo xuta hora xi sacu xingun cojo rê me ndiya. ⁵ Hane tu jarë ni ndihya xi cuisuhun ne, titjun tinújun ngu nina cuitjin: “Nina sua nuju me cjuandaja cjuajeya.” Cuatjin tinújun. ⁶ Hane sá xi ndihya vèhë tjin quih-

ndi tsèhë cjuajeya ne, hacuaha sacú rê me cjuajeya. Peru sá xi hacuiin quihndi tsèhë cjuajeya xi siu jan ne, sacuiin rê me. ⁷ Hane xi cuisuhun ngu ndihya ne, ha ngajan ni tinechun, xinu siuhun cojo rê me mé xi sua me. Cuatjin nihñu ta, tsèhë xi ngu xuta xi sahmi me xá ne, vechú chuva rê xi sacú chji rê me. Vèhë xi mijí rê xi cuangun nguehe cuangun ngajan cuinechun. ⁸ Hane tu jarë ni nandya xi cuisuhun hiscan xi cjuahatsja nuju xuta ne, xinu xcusun xi sua me xinu, ⁹ hacuaha nihñu xi xutahmu rê tsèhë nandya jan ne, cumandaja me, hacuaha cuitjin tinújun cojo yějë xuta: “Ha camatiña nixtin xi cuma nuju xi sahmi Nina gobiernu.” Cuatjin tinújun. ¹⁰ Hane tu jarë ni nandya xi cuisuhun hiscan xi cjuahatsjaain nuju xuta ne, xi chjuhun ndiya xi cuetjunxun tsèhë nandya vèhë ne, cuitjin tinújun cojo xuta: ¹¹ “Hisca chojo rê ngajñi nandya nuju xi cavaqui rê ntsacuin ne, cuitsuni cojo sa xi cuma tsejen xi ngayun cún nuju. Peru meje rê xi cuijne rcun xi ha camatiña nixtin xi sahmi Nina gobiernu.” Cuatjin tinújun. ¹² Cuichjá cojo nuju ta hya xi cuechú nixtin xi tsichuva Nina xuta tsèhë jyé rê me ne, hitsë sa jyé castigu cuatju xuta tsèhë nandya xi fahatsjaain nuju, xi cuma rê xuta tsèhë nandya Sodoma xi jercu tu casahmi camahani me cjuatsehen.

**Cjuachoho xi cuma rê ciudad xi
camacjaain rê cjuá rê Jesús**

¹³ ¡Jemu chojyihî tsèhë xuta nandya Corazín! ¡Hacuaha jemu chojyihî tsèhë xuta nandya Betsaida! Jemu chojyihî tsèhë me ta, tsèhë xi miji tsindeya me cjuatacun rê me, handasa cavëë me cjuarcun xi casahme ngajñi rê me. Xuta nandya Tiro cojo xuta nandya Sidón ne, hisca hacuiin xuta ladu rê Nina má me sacuatjin rê xuta Corazín cojo Betsaida. Peru sá xi xuta Tiro cojo Sidón cavëë me cjuarcun xi cuacun vë ne, ha

catsindeya me cjuatacun rë me, hacuaha ha cavajá me tsjian xi sacuaha tsá-naxá hacuaha caviyuju me ngajñi ndesu, sacuaha xcusun naja, cojo sa xi cuma tsejen xi jemu choho má jain rë me tsëhë jyë rë me. ¹⁴ Vëhë xi hya xi tsichuva Nina yëjë xuta tsëhë jyë rë me ne, xuta nandya Tiro cojo xuta nandya Sidón ne, hitsë sa chúva castigu cuatju me cuma xi cuma rë xuta Corazín cojo xuta Betsaida. ¹⁵ Hane xuta nandya Capernaum ne, ¿há cju me hisca ngahnga hiscan tacun Nina? ¡Hacuiin! Hatuxa cju me nduchin, cahndé hiscan ma hasen rë nima castigu.

¹⁶ Xuta xi cuihndë me tsujun ne, hacuaha tivihndë me tsahan. Hane xuta xi tsitjungui nuju me ne, hacuaha titsitjungui me ngahan. Hane xuta xi tsitjungui ná me ne, hacuaha titsitjungui me Nina xi catsingatju ná. Cuatjin xu cachja Jesús cojo xuta ladu rë me, sehe cavetju xuta ladu rë me jan quiji me.

Cavuya xuta ladu rë Jesucristu xi jyanchan tejó

¹⁷ Hya xi camá ne, xi cavuya xu xuta ladu rë Jesús xi jyanchan tejó jan ne, jercu sua rë xahasen rë me. Hane cuitjin xu cachja me cojo Jesús:

—¡Tatá! ¡Xi veyinnanguin ñihi nuju hora xi tinihñí xá xi cavitexun niji ne, hisca xitsehen vihndë tsijin! —Cuatjin xu cachja xuta xi cuacun jan.

¹⁸ Sehe ngajan xi Jesús ne, cuitjin xu cachja me cojo xuta jan:

—Jinguyëjë rë xi tivutsején ngahnga hiscan tacun Nina ne, cjanengui Satanás sacuaha camá ni ngu ndihichuhún. Hane cuatjin cahvë xi tichjahátáha rë gubiernu xi sahmi Satanás. ¹⁹ Chutsujun ni, ngahan casuá nuju chuva rë xi tsajin mé cuatjun cuma, handasa nunú chu yë o sá nunú chu naya o sá xi suvá camahani Satanás choho meje sahmi cojo nuju. ²⁰ Hacuiin ndaja cuma nuju tsëhë xi vihndë xitsehen tsujun ta xi meje rë ne,

ndaja catama nuju tsëhë xi ha quitaháxujun ñihi nuju ngajan ngahnga. —Cuatjin xu cachja Jesús cojo xuta ladu rë me jan.

Casahmi jyë casahmi hnga Jesucristu Nina

²¹ Hane ha hora vëhë ni ne, Hasen rë Nina casahmi xi jemu sua camahani camá rë xahasen rë Jesús, sehe cachja xu me cuitjin cojo Nina:

—Ngayun nahmi naha ne, sahmejyë sahme hnga nuju cojo Hasen nuju, ngayun xi Nai rë ngahnga cojo nangui ngayun, tsëhë xi ngayun caveyúnhmu cjuatacun vëhë xi cuma rë xuta xi jemu vechú cjuatacun rë, hane catuhun camachaya rë xuta xi hvíin camahani. Ngayun nahmi naha, cuatjin canihñu ta, tsëhë xi cuatjin xi cachuya nuju. —Cuatjin xu cachja Jesús cojo Nina.

²² Hane xi cojo yëjë ni xuta ne, cuitjin xu cachja me:

—Yëjë ngarca ni matsejen ne, Nina Nahmi naha casua ná me. Tsajin hisca ngu xi vëë yo xi Quihndi rë Nina matsejen ta suvá ni Nina Nahmi naha xi vëë me. Hacuaha tsajin hisca xi ngu xi vëë yo xi Nahmi naha matsejen ta suva ni ngahan xi Quihndi rë me ngahan xi hvë, cojo tu yo ni xi ngahan meje suá cumachaya rë. —Cuatjin xu cachja me cojo yëjë xuta.

²³ Cavuya vutsejen nga me hiscan siu xuta ladu rë me ne, sehe cachja xu me cojo suvá ni me xi cuacun vëhë cuitjin:

—Jemu ndaja tsujun ngayujun ni xi tichutsujun xcusun xi tijima nixtin vihi. ²⁴ Nguehe cuichjá cojo nuju ta jemu ndaja tsujun ta, tsëhë xi hacuaha jemu cjín profeta hacuaha jemu cjín xuta xi matitjun xi caviyuju titjún ne, jemu meje scuëë me xcusun xi ngayun tichutsujun, peru casacuiin cavëë me. Hacuaha jemu meje cuisñuju me cjua xi tivisiñuju ngayun, peru casacuiin cavisñuju me ta,

tsëhë xi cjëë cuma xcusun vëhë nixtin hya. —Cuatjin xu cachja Jesús cojo xuta ladu rë me.

Ejemplu tsëhë cha Samaria xi casahmi cjuandaja

²⁵ Ngundiya nga hya xi tacun xu Jesús cojo xuta ne, casecun ngu cha xi vicuya cjuachacun cavinenguise xu cha cuitjin xi cjuahachuva cha me:

—Maestro. ¿Mé ndatjin xi sahme cojo sa xi cuéchutáha cjuahñu xatsë xcun Nina? —Cuatjin xu cavinenguise cha me.

²⁶ Ngajan xi Jesús ne, cuitjin xu cachja me cojo cha:

—¿Hacutjin camahindu xcun ley rë Moisés? ¿Mé xi chutayun jan? —Cuatjin xu cachja me.

²⁷ Hane xi cafayangui cha ne, cuitjin xu cachja cha:

—“Meje rë xi nihmutacún Nina naja cojo nguñajatacún, cojo yëjë xahasen nuju, cojo yëjë ngahñu nuju, cojo yëjë cjuatacun nuju, hacuaha cuatjin nihmutacún xingun sacuatjin hmutacún suvun yojo nuju.” —Cuatjin xu cachjasun cha cjuarë ley.

²⁸ Hane cuitjin xu cachja Jesús cojo cha:

—Cjuaquixi cjuarë xi canújun. Cuatjin nihñu, sehe cuechuntuhun cjuahñu xatsë. —Cuatjin xu cachja Jesús.

²⁹ Ngajan xi cha xi vicuya cjuachacun jan ne, xi meje tsingacun cha xi jemu quixi cha cojo cjuatacun rë cha ne, cuitjin xu cavinenguise cha cojo Jesús:

—¿Yo xi xingueen ni? —Cuatjin xu cachja cha.

³⁰ Hane ngajan xi Jesús ne, cojo ngu ejemplu cafayangui xu me tsëhë cha cuitjin:

—Cuejña ne xi ngu xuta jan ne, cavetju me tsëhë nandya Jerusalén ne, cjuarë me nandya Jericó. Hane ndiya cjuarë me ne, cavechutáha ngujo cha chëjë me. Hane cafahatahá cha yëjë tsëhë me xi yaha

me, sehe cavaja cha me. Ña catsiquehenñaja cha me, hane sehe cavanga cha.

³¹ Hya xi camá ne, hora vëhë canduva ngu nahmi cavatju me ndiya vëhë, hane xi cavëë me xuma xuta xi casacuhmu rë jan ne, tjehe ndiya ladu xingu cavatju me quiji me. ³² Ha chuva vëhë ni ne, cafehe ngu sangrista cahndë vëhë. Hane xi cavëë cha xi jiña me xi casacuhmu rë jan ne, cavetahaxin cha hitsë ndiya rë cha sehe cavatju cha quiji cha. ³³ Peru ngu cha tsëhë distritu Samaria xi quiji cha ndiya vëhë ne, cafehe cha hiscan jiña xutahmu rë jan. Hane xi cavëë cha me ne, jemu camayuma rë cha me. ³⁴ Hane xi quijivaha cha xcun me ne, catsirqui cha me, cavitejnu cha aceite cojo xan hiscan casacuhmu rë me sehe catsitjinguia cha me tsjian. Hya xi camá ne, sehe catsiquijin cha me naxin rë cha, sehe quijicojo cha me ngu ndihya hiscan xi hatuxa ndihya viyuju xuta, hane ngajan casahmi cha me cuidadu. ³⁵ Hane xi camá nchujun jan ne, cavaxë cha jo denario, tujún xi faha ngu mosu xi sah-mixa jo nixtin, sehe casua cha me xi nai rë ndihya jan, sehe cachja cha cojo rë me cuitjin: “Nihñu cjuandaja ne, chjuhuncuendun xuma xutahmu rë vi. Hane xi quisun sa nicujun tsëhë xcun tujún xi suá nuju vi ne, xi cúa ne, sehe cuechjë tsujun.” Cuatjin cachja cha Samaria.

³⁶ Ngajan xi Jesús ne, xi cuatjin canjetaha ejemplu xi cachja me ne, sehe cachja xu me cojo cha xi vicuya cjuachacun jan cuitjin:

—¿Jarë tsëhë catsijyan xuta xi cuacun vë xi má nuju xi cjuaquixi xi camá xicjin me xi cavanguihmu chëjë jan? —Cuatjin xu cachja Jesús.

³⁷ Ngajan xi cha xi vicuya cjuachacun jan ne, cuitjin xu cafayangui cha tsëhë Jesús:

—Cha xi ngatsë rë cjuayuma ne, casahmi cjuandaja cojo me xi

casacuhmu rë jan. —Cuatjin xu cachja cha.

Hane Jesús ne, cuitjin cachja nga xu me cojo cha:

—Quihndë xi cuangun ne, hacuaha cuatjin nihñu. —Cuatjin xu cachja Jesús.

Quiji Jesucristu ndava na Marta

³⁸ Hane xi cjuí sa xu Jesús cojo xuta ladu rë me ne, xi cavisehen me ngu nandya jan ne, ngu na xi hmí rë Marta ne, caphahatsja na Jesús ndava na. ³⁹ Na Marta jan ne, tjin ngu tichja na xi hmí rë María. Hane na María jan ne, quiji xu na cavéjña na táha ntsacu Jesús, tivisiñuju na cjuá xi tivicuya me. ⁴⁰ Peru na Marta ne, jemu cjín xcunya xá xi tisahmi na. Hane xi cavatju na hiscan tacun Jesús ne, cuitjin xu cachja na:

—Tatá. ¿Há marcuaain nuju xi na tichja ne, cavejñasuva ná na cojo xá xi tacunvasen tisahme? Tinújun cojo rë na, catisecoo na ngahan. —Cuatjin xu cachja na.

⁴¹ Ngajan xi Jesús ne, cuitjin xu cafayangui me tséhë na:

—Marta, jercu marcun nuju tséhë jemu cjín xcusun. ⁴² Peru ngu xcusun ni xi sahmi nguyë. Na María ne, cavaxijin na xcusun xi ndaja vë, hane hacuiin chjahátahá rë tséhë na. —Cuatjin xu cachja me.

Cavicuya Jesucristu hacutjin meje rë xi nihña oración

11 Cuitjin camá xu ngundiya hya xi tisahmi Jesús oración rë me ngu cahndé jan. Hane xi cajnetaha casahmi me oración rë me ne, ngu xuta ladu rë me jan ne, cuitjin xu cachja me cojo Jesús:

—Tatá. Ticuyun niji hacutjin nihñi oración niji, sacuatjin cavicuya Juan xuta ladu rë me. —Cuatjin xu cachja me.

² Ngajan xi Jesús ne, cuitjin xu cafayangui me:

—Hya xi nihñu oración ne, cuitjin tinújun:

Ngayun Nahmi niji, meje niji xi ngayijin ni xuta ngasunhndë chjihincuin nuju.

Meje niji xi cuinduvun nihñu niji gobiernu.

³ Nchunchujun ni tuhun niñu xi xiní.

⁴ Ninchatuhun niji tséhë jyé xi jemu quitjin ta

ngayin suvin ne, hacuaha tininchatihin rë

yëjë ni xuta xi quitjen me jyé tsijin.

Xicatuun cahndé xi chjaháchuva niji cojo cjuatacun niji.

Cuatjin tinújun. —Cuatjin xu cachja Jesús cojo xuta ladu rë me.

⁵ Hya xi camá ne, cachja nga xu Jesús ngu ejemplu cojo xuta ladu rë me. Cuitjin xu cachja me:

—Cuejña ne xi ngayun tjin nuju ngu xuta xi vinga nuju, hane vasen nixten cuangun ndava me, cuinújun cojo rë me cuitjin: “Amigu, nihñu favor tuhun jyan niñu scuxétaha ta, ⁶ tséhë xi ngu amigu naha cafehe ndya naha xi cjuí me ngu nangui, hane tsajin ná mé xi suá sinë me.” Cuatjin cuinújun cojo rë me. ⁷ ¿Há cjuayangui me tsujun cuitjin tséhë hisca cahntsua ndihya?: “Xicatuunndyuu ná ta tingotjo ndihya ne, ha tichjá, hacuaha quihndi naha ne, guehe siufë cojo ná. Cumaji cuisátjenhnga suá nuju.” ¿Há cuatjin cjuayangui me tsujun? Hacuiin cuatjin. ⁸ Cuichjá cojo nuju ta handasa amigu nuju me, peru hacuiin ngatsë rë vëhë xi cuisátjenhnga me sua nuju me ta ngatsë rë xi ngajan cjuí ngajan nduva cuinújun ne, cuisátjenhnga me sua nuju me ha tucutjin xi chjahyun. ⁹ Hacuaha cuichjá cojo nuju cuitjin: Chjahyun rë Nina, hane sua nuju me. Tinchunsun, hane sacú nuju. Tinújun, hane Nina ne, sua me cahndé cuisuhun. ¹⁰ Cuatjin nihñu ta, yëjë ni xuta xi fehya me ne, fahatsja me,

hane yo xi vanguise ne, sacu rë, hane yo xi chja ne, sacu cahndé visehen.

¹¹ Tsajin ngu nahmi xi, hya xi quihndi rë me cjuehya ngu niñu ne, cahndé rë xi sua me ngu niñu ne, sua me ngu ndoyojo, o sá xi hya xi quihndi cjuehya ngu chu ti ne, cahndé rë xi sua me ngu chu ti ne, sua me ngu chu yë, ¹² o sá xi hya xi quihndi cjuehya ngu chjoo ne, sua me ngu chu naya. ¹³ Ngayun xi tsehn cjuatacun nuju ne, ma tuhun rë quihndi nuju xcusun xi ndaja. Hitsë guan Nahmi naja xi tacun me ngahnga ta hitsë sa jercu meje sua me Hasen rë me cojo xuta xi cjuehya rë me. —Cuatjin xu cachja Jesús.

Cachja xuta xi Satanás casuaxa rë Jesucristu

¹⁴ Cavechú xu ngu nixtin xi cavaxëxin Jesús ngu xitsehen xi casahmi lihmi rë ngu cha jan. Hane hya xi cavetju xitsehen jan ne, cha lihmi jan ne, cavetsihin cachja cha. Hane xutacjín jan ne, jemu quijircun rë me. ¹⁵ Hya xi camá ne, ngujo xuta jan ne, cuitjin xu cachja me:

—Beelzebú, xitsehen xi matitjun ne, vëhë casua rë cha xá xi vaxëxin cha xitsehen. —Cuatjin xu cachja xuta jan.

¹⁶ Hane ngujo nga xuta ne, xi meje cjuahachuva me Jesús ne, cafehya me me xi sahmi me ngu cjuarcun xi cuinduva ngajan ngahnga. ¹⁷ Peru Jesús ne, tsëhë xi ha vëë me mé xi tsingataha cacun xuta xi cuacun jan ne, cuitjin xu cachja me:

—Hya xi xuta tsëhë ngu nandya ticjan me ngajñi rë me cojo xicjin me ne, nandya vëhë ne, ha tivéjña xahva, hisca ndihya ne, tivixusun xcun xicjin. ¹⁸ Hacuanitjin ni sá xi Satanás scaan cojo xitsehen xi yahnga xi hacuaha Satanás má nai rë ne, tsichajá ngahñu rë xi vëhë matitjun. Cuatjin chjá ta, tsëhë xi nújun xi Beelzebú casua ná xá xi vaxëxin xitsehen. ¹⁹ Peru sá xi Beelzebú casua ná

xá xi vaxëxin xitsehen ne, hacuaha ha Beelzebú vëhë casua rë ngu ngu xuta ladu nuju xá xi hacuaha vaxëxin me xitsehen. Vëhë xi ha me vëhë ni cuichja me xi cuaaintjin xi nújun xi Beelzebú casua ná xá. ²⁰ Peru sá xi Nina casua ná me xá xi vaxëxin xitsehen ne, ngajan matsejen xi gobiernu xi sahmi Nina ne, ha tivetsihin.

²¹ 'Satanás ne, tangun cojo ngu cha xi jemu hñu ngahñu rë. Hya xi ha ndaja tjin chjine cha cojo quicha rë cha xi sahmi cuidadu cha ndava cha ne, yëjë xcusun xi tjin rë cha ne, hacuaha ha ndaja cuidadu tjin. ²² Peru ngahan ne, tangun ngahan cojo ngu me xi hitsë sa jemu hñu camahani ngahñu rë. Hya xi me xi hitsë sa hñu ngahñu rë scaan me cojo cha xi hñu ngahñu rë jan hacuaha tsinguijne me cha ne, cjuahatahá me quicha xi vetaha cacun cha xi cuaxëtje rë cha, hane sehe cuatëcja me yëjë xcusun xi tjin rë cha jan ngajñi rë me cojo xicjin me.

²³ 'Xuta xi fiin me favor naha ne, condra naha má me. Hane xuta xi visecuaain ná me xi nihñi tangun cjuatacun rë xuta cojo Nina ne, tsinguetsun me cjuatacun rë xuta. —Cuatjin xu cachja Jesús.

Xitsehen xi vuya

²⁴ Hya xi camá ne, Jesús ne, quijinduju sa xu cachja me cuitjin:

—Hya xi vetjuxin xitsehen tsëhë xahasen rë ngu xuta hiscan xi camá sacuaha ndava xitsehen jan ne, fi táha hiscan jemu nangui quixí camahani, vanguise cahndé hiscan xi cuejñajenda. Hane xi sacuiin rë cahndé hiscan cuejñajenda ne, cuitjin tsingataha cacun: “Cúya rë cjué ndya naha hiscan xi cavétjuxen.” Cuatjin tsingataha cacun xitsehen jan. ²⁵ Hane xi vuya fehe xitsehen jan cahntsua xahasen rë xuta jan ne, vutsejen xitsehen jan cahntsua xahasen jan sacuaha ngu ndihya xi caxtecha tyjahi tyjahi, hacuaha siundaja chichihin ngu

tsé ngu xtfí. ²⁶Xi vutsejen xitsehen jan xi cuatjin jyihi jan ne, sehe fi jaha sa rê yatu sa xitsehen xi hitsé sa tsehen xi cuma rê vèhè ne, sehe visehen nga viyujucandé jan. Peru xi ma ngascan ne, hitsé sa chojyihi tséhè xuta vèhè xi cuma rê titjún. —Cuatjin xu cachja Jesús.

Xuta xi ndaja jain tséhè me

²⁷Peru jinguyèjè rê xi tichja xu Jesús cja vèhè ne, ngu na xi jiyajni ngajni rê xutacjin jan ne, cajindaya na cachja xu na cuitjin:

—Jemu ndaja tséhè chjuun xi catsin rê ngayun, hacuaha jemu ndaja tséhè ndanisin xi cavacuntuhun. —Cuatjin xu cachja na.

²⁸Peru Jesús ne, cuitjin xu cafayangui me tséhè na:

—Quixi, peru hitsé sa ndaja tséhè xuta xi visiñuju me cja rê Nina hacuaha vihdé me tséhè. —Cuatjin xu cafayangui Jesús.

Cafehya xuta tsehen ngu seña xi sahmi Nina

²⁹Vèhè ta jima tangun camaha sa xutacjin jan ne, cavetsihin cachja xu Jesús cuitjin:

—Ngayujun ni ngayun xuta tjè rê Israel tséhè nixtin vihi matsejen ne, hatuxa tsehen cjuatacun nuju. Tichjahyun ngu seña xi sahmi Nina, peru sacuiin nuju matsejen ta ngu ni seña xi sacú nuju matsejen ne, sacuaha seña xi catsingacun profeta Jonás hatsèè nixtin. ³⁰Sacuatjin rê profeta Jonás xi me vèhè camá me ngu seña xi cuma rê xuta nandya Nínive hatsèè nixtin matsejen ne, ha cuanitjin ni ná ngahan xi Quihndi rê Xuta Jain ngahan matsejen ta ngahan cuma ngahan seña xi cuma nuju ngayujun ni xi nechun nixtin vihi. ³¹Hya xi cuechú nixtin xi tsichuva Nina xuta tséhè jyé rê me matsejen ne, na xi cavitexa ngajan nangui Sabá hatsèè nixtin matse-

jen ne, cjue cuinchajyè nuju na ngayujun ni ngayun xuta tjè rê Israel xi nechun nixtin vihi. Cuatjin sahmi na matsejen ta, tséhè xi jercu tu cjin camahani xi canduva na xi cuihdé na cjuatacun ndacun xi jercu tu ma camahani rê Salomón, me xi cavitexa rê xutachanga naja hatsèè nixtin. Peru ha tejña ngahan nguehe sacuaha ngu seña xi hitsé sa vengui chji rê xi cuma rê Salomón. ³²Hacuaha hya xi cuechú nixtin xi tsichuva Nina xuta tséhè jyé rê me matsejen ne, yèjè xuta nandya Nínive matsejen ne, cjue cuinchajyè nuju me ngayujun ni ngayun xuta tjè rê Israel xi nechun nixtin vihi. Cuatjin sahmi me matsejen ta, tséhè xi me xi cuacun vèhè matsejen ne, catsindeya me cjuatacun rê me hya xi casua profeta Jonás camachaya rê me cja rê Nina. Peru ha tejña ngahan nguehe sacuaha ngu seña xi hitsé sa vengui chji rê xi cuma rê profeta Jonás. —Cuatjin xu cachja Jesús.

Ndihi rê yojo naja

³³Hane xi quijinduju sa cachja me ne, cuitjin xu cachja me:

—Tsajin hisca xi ngu xuta xi ha xcun xi ha cavatju cavetaha rê me ngu ndihi matsejen ne, faha me veyahma me o sá xi faha me veyahma me ngahma ngu caxa matsejen ta faha me vejña me cahndé rê, cojo sa xi yèjè xuta xi visehen me hiscan setí ndihi jan matsejen ne, scuèè me hasen rê. ³⁴Tuxcuun matsejen ne, vèhè xi sacuaha ndihi rê yojo naja. Vèhè xi hya xi tuxcuun ndacun matsejen ne, hatuxa ma hasen cahntsua yojo naja. Peru sá xi tuxcuun chocun matsejen ne, hacuaha ma jñu cahntsua yojo naja. ³⁵Ndandaja ningatuhuntacún matsejen ne, sacuaha hasen xi jiya cahntsua yojo nuju matsejen ne, ¿há hasen xi cjaquixi jain?, o há tsajin ne, ¿há jñú? ³⁶Quihndé matsejen ne, sá xi jinguyè ni yojo nuju jiya hasen, hisca xi

hitsë jñú tsajin rë matsejen ne, jingu-
jyë ni yojo nuju matsejen ne, jiya hasen
sacuaha hya xi sahmi hasen tsajan hasen
rë ngu ndihi. —Cuatjin xu cachja Jesús.

Cacjan Jesucristu cojo cha fariseo cojo cha xi vicuya cjuachacun

³⁷ Hane xi cajnetaha xu cachja Jesús
ne, ngu cha fariseo ne, cachja cha cojo
Jesús xi cjue sinë me cojo cha niñu. Xi
cavisehen Jesús ndihya ne, quiji xu me
cafaha me cahndé rë me xcun maxë.
³⁸ Peru xi cavëë xu cha fariseo xcusun rë
Jesús ne, jemu quijircun rë cha tsëhë xi
hacuiin titjun cavane xu me tsja me sehe
sinë me niñu sacuaha vitexa xcusun rë
xutachanga rë me. ³⁹ Ngajan xi Nai naja
ne, cachja xu me cojo cha cuitjin:

—Ngayujun ni ngayun xuta fariseo ne,
xcusun nuju xi nihñu tyjahi táha ngaxtun
ni ngu vasu o sá xi ngu tyuva, peru cah-
ntsua xahasen nuju ne, quitsë camahani
rë cjuatsehen cojo cjuatacun xi nimuju
yëjë ni xcusun. ⁴⁰ Sca nuju ngayun. Cati-
jne rcun ta ha me xi casahmi ni táha
ngaxtun ne, hacuaha ha me vëhë ni
casahmi me táha cahntsua. ⁴¹ Peru xi
hincha cahntsua ne, vëhë tuhun sacuaha
caridad. Sá xi cuatjin nihñu ne, yëjë ni
xcusun ne, tyjahi xi cuma nuju.

⁴² Peru jemu chojyihí tsujun ngayun
xuta fariseo, tsëhë xi ngayun ne, han-
dasa nihñu cuidadu xi tuhun diezmu
nuju hisca cojo nchurca cojo ruda cojo
yëjë sa xcusun ndeya ne, peru nihñu-
cuenduun xi nihñu hacutjin xi cjuaquixi
cojo xingun, hacuaha nihñucuenduun xi
nihmutacún Nina. Ngayun ne, meje rë xi
ha canihñucuendun Nina, peru hacuaha
hacuiin nichayun diezmu nuju vë.

⁴³ Hacuaha jemu chojyihí tsujun
ngayun xuta fariseo, tsëhë xi ngayun
ne, jemu ndama nuju xi cuatjin satë
nuju cahndé xi matitjun tsëhë cahntsua
yungun. Hacuaha jemu ndama nuju

xi cuatjin fi chja xuta nina cojo nuju
ngajan ngajñi ndetsin.

⁴⁴ Hacuaha jemu chojyihí tsujun ta,
handasa matsijin ne, peru jemu chocun
xahasen nuju. Vëhë xi tangun ngayun
cojo tsjun xi hisca matsijin, hane xuta
ne, hisca machayiin rë me cjui nduva me
sune me xcun. —Cuatjin xu cachja Jesús.

⁴⁵ Ngajan xi ngu cha xi vicuya cjuacha-
cun ne, cachja xu cha cuitjin cojo Jesús:
—Maestro, hya xi nújun cjuu vëhë ne,
hacuaha cojo ngayin choho nújun tsijin.
—Cuatjin xu cachja cha.

⁴⁶ Hane Jesús ne, cuitjin xu cachja me:
—Hacuaha cojo ngayun cha xi vicuya
cjuachacun, jemu chojyihí tsujun, tsëhë
xi vicuyun rë xuta jemu cjín xcusun xi
jemu chja camahani cuma sahmichihin
me, hane suvun ne, visecuún rë me hisca
hitsë.

⁴⁷ Jemu chojyihí tsujun ngayun ta,
tsëhë xi ngayun ne, nindujun tsjun
ndacun tsëhë yëjë ni nima profeta xi
xutachanga nuju catsiquehen me hat-
sëë nixtin. ⁴⁸ Ngayun suvun ningacun
xi chuya nuju xcusun xi casahmi xu-
tachanga nuju ta, tsëhë xi ngu ladu ne,
me vëhë catsiquehen me profeta xi cua-
cun vë, hane ngu ladu nga ne, ngayun
nindujun tsjun rë.

⁴⁹ Vëhë xi Nina, me xi jemu vechú-
taha cjuatacun rë me ne, cachja me
cuitjin: “Tsingátju profeta cojo apóstol
ngajñi rë xuta xi siu nixtin vihi, hane
yahnga me xi cuacun vë ne, tsiquehen
xuta me, hane yahnga me ne, sua xuta
cjuañihi xi cuatju me xi cuacun vë.” Cu-
atjin cachja Nina. ⁵⁰ Hane cojo chuva
vëhë ne, xuta xi siu nixtin vihi ne, me
vëhë cháha rë me tsëhë cjuaveya rë yëjë
profeta xi cahme hisca ntsacu cavetsi-
hin ngasunhndë, ⁵¹ vetsihin cojo hisca
cjuaveya rë xutachanga naja Abel vijne-
taha cojo hisca cjuaveya rë xutachanga
naja Zacarías, me xi catsiquehen rë xuta
tiña ngasunscun hiscan ndatsen rë ndava

Nina. Cuichjá nga cojo nuju ta yějě cjuaveya xi cuacun vë ne, cháha rë xuta xi siu nixtin vihi.

⁵² Jemu chojyihí tsujun, ngayun cha vicuya cjuachacun ta, tsëhë xi cavejñuxun cjuatacun rë Nina. Canitjungun cjuatacun rë me, hacuaha hisca catuun cahndë xi sacú rë xuta xi meje rë me cjuatacun rë Nina jan. —Cuatjin xu cachja Jesús.

⁵³ Hane hya xi tivetju xu Jesús tsëhë cahndë hiscan cajnë me niñu jan ne, cha xi vicuya cjuachacun cojo cha fariseo jan ne, jemu cjan rë cha, jemu cjin cjuafahataha xu cha me, ⁵⁴ hacuaha jemu cavangui xu cha chuva rë hacutjin xi sacú rë cha ngu cjuarë me xi cuaintjin cuichja me.

Cjuandacha xi sahmi cha fariseo

12 Jinguyějě rë xi tichja sa xu Jesús cojo cha xi cuacun jan ne, jercu jima tangun camahani xuta, ña vehnchun xicjin me. Sehe ngajan xi Jesús ne, cavetsihin cachja xu me tjutjun cojo xuta ladu rë me cuitjin:

—Xicaninguisuhunñuu cojo cha fariseo xi cuacun vë ta, tsëhë xi cjuandacha xi sahmi cha ne, tangun cojo san rë pan xi hatuxa vitsojo ngajni rë yějě ni nahyu. ² Yějě ni xcusun xi casetsangui ne, cuechú nixtin xi chjaháxin rë xi titsangui rë. Vëhë xi yějě ni xcusun xi hma ne, handasa sehmangui ne, peru cuechú nixtin xi cuetjucaa tsejen. ³ Yějě ni cjuarë má hiscan jñu ne, cuechú nixtin xi cuinuhya rë hiscan hasen. Vëhë xi yějě ni cjuarë má táha hma ne, cuechú nixtin xi cuinuhya rë táha tsejen.

Yo xi meje rë xi rcún

⁴ Nguehe cuichjá cojo nuju, ngayun ni. Xicarcuun xuta xi tsiquehen nuju me, hane ngaxtun vëhë ne, ha quihndë

tsajin mé sa xi cuma sahmi me cojo nuju.

⁵ Peru nguehe cuichjá cojo nuju yo xi meje rë xi rcún. Meje rë xi Nina xi rcún me. Me xi ngaxtun xi ha catsiquehen nuju ne, tjin rë me cahndë xi tsingatjenya nuju me hiscan xi má hasen rë nima castigu. Cuichjá nga cojo nuju ta hatuxa me vëhë xi meje rë xi rcún me.

⁶ Chutsujun ta hñú chu nisë langa ne, jemu xtengui chji rë chu. Peru Nina ne, tsichayaain me hisca xi ngu chu. ⁷ Hacuaha ngayun ne, hisca tsjarcun xqui tjin rë Nina. Vëhë xi xicarcuun ta, tsëhë xi jima ngu ngayun ne, hitsë sa jercu vengui chji nuju xi cuma rë xi jemu cjin chu nisë vë.

Xuta xi tsinguixi me xi xuta ladu rë Jesucristu má me

⁸ Nguehe cuichjá cojo nuju ta yějě xuta xi tsinguixi me xcun xuta xi yahnga xi xuta ladu naha má me ne, hacuaha ngahan xi Quihndi rë Xuta jain ngahan ne, tsinguixë xcun yějě ni ángel rë Nina xi xuta ladu naha má xuta xi cuacun vë. ⁹ Peru yějě xuta xi tsinguixi me xcun xuta xi yahnga xi hacuiin xuta ladu naha má me ne, hacuaha hacuanitjin ni tsinguixë ngahan xcun ángel rë Nina.

¹⁰ Hacuaha yějě xuta xi choho chja me tsahan, ngahan xi Quihndi rë Xuta Jain ngahan ne, tsinchataha Nina me, sá xi cjuehya me cjuaninchataha. Peru yějě xuta xi choho chja me tsëhë Hasen rë Nina ne, tsajin cjuaninchataha xi cuma rë me.

¹¹ Hya xi xuta nandya cjuaha nuju me cjuecojo nuju me xcun xutaxa rë yungun o sá xi xcun xutaxa rë ndihyavasene, hacuiin cumacjintacún tsëhë chuva rë hacutjin xi chjayunngun o tsëhë xi cuinújun ta, ¹² tsëhë xi ha hora vëhë ni ne, Hasen rë Nina cuichja cojo nuju mé cjuarë meje rë xi cuinújun. —Cuatjin xu cachja Jesús.

Mijí rë xi jercu nimeje cjuanchina

¹³ Hya xi camá ne, ngu xuta tsêhë ngajîn rë xutacjín jan ne, cachja xu me cojo Jesús cuitjin:

—Maestro, tinújun cojo cha vêhë xingueen, catisua cha ngahan xcusun xi satë ná xi cavejña nahmi niji hya xi cahme me. —Cuatjin xu cachja me.

¹⁴ Sehe ngajan xi Jesús ne, cuitjin xu cachja me:

—Peru ngahan ne, hacuiin xá naha xi ngahan cuátécja xcusun xi satë nuju xingu xingu ngayun. —Cuatjin xu cachja Jesús cojo xuta jan.

¹⁵ Sehe cachja nga xu me cojo xutacjín jan cuitjin:

—Nechun cuidadu, hacuiin jercu nimuju cjuanchina matsejen ta, tsêhë xi hacuiin ngatsë rë cjuanchina xi tjin naja matsejen ne, vêhë xi ndacun cjuahñu naja. —Cuatjin xu cachja me.

¹⁶ Ngaxtun vêhë ne, sehe cachja xu Jesús ngu ejemplu cojo xuta cuitjin:

—Cuejña ne xi ngu cha nchina jan matsejen ne, jercu ndaja camá xitjê xcun nangui rë cha. ¹⁷ Hya xi camá ne, cuitjin catsingataha cacun cha: “¿Mé xi ndatjin sahme quihndê? Ha quihndê tsajin ná cahndê hiscan xinchandaja tutjê naha.

¹⁸ Ndatjin rë xi cuitjin sahme. Tsinguét-sun ndihya hiscan hinchandaja tutjê naha, hane tsindaja xi hitsë sa yehe. Hane ngajan cuínchandaja yêjê tutjê naha cojo ngu tsé ngu xtí sa xi tjin ná. ¹⁹ Hane sehe cuichjá cojo xahasen naha cuitjin: Jercu cjín camahani xcusun hinchandaja ná quihndê, hacuaha jemu cjín nu cjuecani rë. Cuitejñajenda quihndê. Sínë cuêhë tsahan. Suá cjuasua xahasen naha.” Cuatjin catsingataha cacun cha nchina jan. ²⁰ Ngajan xi Nina matsejen ne, cuitjin cachja me cojo cha: “Sca ri ngaye. Nguixun quihndê ne, cu-eye. Hane yêjê xcusun xi cavetje ne, tsajin mé sacú ri tsêhë.” Cuatjin cachja

Nina. ²¹ Cuatjin rë xuta xi jercu vetjo cjuanchina xi cuma rë suvá me, peru xcun Nina matsejen ne, tsajin mé xi tjin rë me. —Cuatjin xu cachja Jesús ejemplu vêhë.

Sahmi cuidadu Nina xuta ladu rë me

²² Ngajan xi Jesús ne, cuitjin cachja xu me cojo xuta ladu rë me:

—Vêhë xi cuichjá cojo nuju ta: Hacuiin cumacjintacún tsêhë xcusun xi xinu xi sua nuju ngahñu. Hacuaha hacuiin cumacjintacún tsêhë tsjian xi chujun. ²³ Hacuiin cumacjintacún ta, tsêhë xi hitsë sa vengui chji rë cjuahñu nuju xi cuma rë xi chinu. Hacuaha hitsë sa vengui chji rë yojo nuju xi cuma rë tsjian xi chujun. ²⁴ Chutsujun chu chenda ta hacuiin tsitjê chu, hacuiin fanga chu, hacuaha tsajin rë chu ndyah-nga hiscan cuinchandaja chu xi sinê chu. Peru Nina tsicjen me chu. Ngayun ne, hitsë sa jercu vengui chji nuju xi cuma rë chu nisë. ²⁵ Hacuaha tsajin hisca xi ngu xuta xi cuma cuesuntaha me cjuahñu rë me hisca ngu hora ngatsë rë xi ma cjín cacun me. ²⁶ Sá xi hitsë lihndi xcusun vêhë maji nihñu ne, ¿mé má jercu macjintacún tsêhë xcusun xi yahnga jan ni?

²⁷ Chutsujun naxu liriu ta tsihyaain nachjun hacuaha fahyaain tsjian. Peru ngahan cuichjá cojo nuju ta tsjian rë xutachanga naja Salomón ne, handasa jercu ndacun camahani, peru hitsë sa ndajyihi ngu naxu vêhë. ²⁸ Sá xi cuatjin tsicaja Nina xca nguijnã xi ngu nixtin ne siutahã nguijnã, hane xitu ngu nixtin ne cueti ne, hitsë sa ngayun ta hatuxa tsicaja nuju me, ngayun xi cjêë cumangutacúnndujun cojo me. ²⁹ Hacuiin jercu nijendun rë xahasen nuju xi vinchunsun xi xinu xi siuhun ta, ³⁰ tsêhë xi xcusun vêhë ne, yêjê xutaxín tsêhë jingujyë ni ngasunhndê ne, me vêhë xi vangui me xcusun vêhë. Peru

ngayun ne, Nina Nahmi naja ne, ha vëë me xi hatuxa sahmi ngujoyë xi sacú nuju xcusun vëhë. ³¹ Catamarcun nuju tsëhë gubiernu xi sahmi Nina, hane xcusun vëhë ne, quitahácoo sa sacú nuju.

Cjuanchina xi tacun ngahnga

³² Xicamacjiintacún ngayun xuta ladu naha xi jemu chúva má ngayun ta, tsëhë xi Nina Nahmi naja ne, ha cavejña cacun me xi cojo cjuandaja rë me ne, sua nuju me xá xi nihñu gubiernu hiscan xi sahmi me gubiernu. ³³ Titeñu xcusun xi tjin nuju, hane tujún xi sacú nuju ne, tuhun rë xuta xi tsajin rë me, sacuaha tuhun ngu caridad. Nihñu ngujoyë xi sacú nuju cjuanchina xi jercu cjuecani rë. Cuma cuinújan ne, ngu cjuanchina xi tsajin nixtin cjuë xi cuetjún ngajan ngahnga hiscan xi cha chëjë ne, maji ma tiña cha, hisca chu quixún ne, tsinguetsiin chu. ³⁴ Cuatjin meje rë xi nihñu ta, tsëhë xi hiscan tetjo cjuanchina nuju ne, hacuaha ngajan quitahá cjuatacun nuju.

Meje rë xi tjinchjine ngayaan tsëhë xi cjuehe Nai naja

³⁵ Tuhunchjinu yojo nuju, hacuaha catisetí ni ndihi nuju, tsëhë xi cjuehe Nai nuju. ³⁶ Nihñu sacuatjin sahmi hndixahan xi viyujuya me nai rë me, hya xi nai rë me quiji ngu ndava suhi. Siuchjine ni me cojo sa xi hora xi cjuehe nai rë me ne, xi tu cuichja ne, ngutjen cjue scuxaha me tingotjo xi cuisehen nai rë me. ³⁷ Jemu ndaja tsëhë yëjë hndixahan xi, hora xi cjuehe nai rë ne, sacútsja rë xi siu quicun. Nguehe cuichjá cojo nuju cjuaquixi ta, xi scuëë nai rë hndixahan jan xi cuatjin quicun hndixahan ne, cuëhëchjine me yojo rë me, sehe cjuecojo me hndixahan xcun maxë, sehe cuiyuju me xi sinë me. ³⁸ Jemu ndaja tsëhë hndixahan xi sacútsja rë nai rë xi siu quicun, handasa nixten cjuehe me o sá hisca tiña sahasen cjuehe me.

³⁹ Hacuaha meje rë xi cumachaya nuju cjuatacun vihi: sá xi nai rë ngu ndihya ha machaya rë me hora xi cuinduva cha chëjë ndava me ne, suaain me cahndé xi scuxaha cha ndava me, sehe tsichëjë cha. ⁴⁰ Hacuanitjin ni meje rë xi ngayujun ni ngayun ne, tuhunchjinu yojo nuju ta, tsëhë xi hora xi ningatuuntacún xi cjuëhë ngahan xi Quihndi rë Xuta Jain ngahan ne, hora vëhë rë cjuëhë. —Cuatjin xu cachja Jesús.

Xuta xi vihndë cojo xi vihndiin tsëhë Nina

⁴¹ Hya xi camá ne, Pedru ne, cuitjin xu cachja me cojo Nai naja:

—Tatá. Ejemplu xi canújun vë ne, ¿há suvin ni ngayin xuta ladu nuju meje rë xi cuetihinrcuin?, o há tsajin ne, ¿há cojo yëjë sa xuta xi yahnga cuetaharcu me? —Cuatjin xu cachja Pedru.

⁴² Ngajan xi Nai naja ne, cuitjin xu cafayangui me:

—Ngayujun ni ne, meje rë xi nihñu sacuaha sahmi ngu hndixahan xi jemu quicun cacun xi sahmicihhin yëjë ni hacutjin xi meje rë nai rë, ngu hndixahan xi cjuahaxa xi cjuahacuenda rë yëjë sa hndixahan xi hora tjin sua xi sinë. ⁴³ Jemu ndaja tsëhë ngu hndixahan xi, hora xi cjuehe nai rë ne, sacútsja me hndixahan jan xi tisahmi tutjin xi casuaxa rë nai rë. ⁴⁴ Cuichjá cojo nuju cjuaquixi ta, nai rë hndixahan vëhë ne, suaxa me hndixahan vëhë xi hacuaha cjuahacuenda yëjë sa xcusun xi tjin rë me. ⁴⁵ Peru cuejña ne xi hndixahan vëhë ne, tsingataha cacun cojo cjuatacun rë cuitjin: “Nai naha ne, tijima tafi sa xi cjuehe me.” Cuatjin tsingataha cacun. Sehe cuetsihin cuaja rë hndixahan xi yahnga jan, hacuaha cuetsihin cuatjutaha sinë cuihi hisca cuma chihi. ⁴⁶ Peru cuechú ngu nixtin xi tsajin tacunya hndixahan vëhë, ngu hora xi hisca hvíin ne, hya cjuehe nai rë, hane jemu jyë cas-

tigu sahmi me. Sehe tsingatju me cuatjutangun cjuañihi cojo hndixahan xi yahnga xi casahmichiin tutjin xi casatëxa rë.

⁴⁷ Hndixahan xi ha ndaja vëë hacutjin xi meje rë nai rë hane cavihinchjinii, hacuaha casahmii tutjin meje rë nai rë ne, jemu sehen camahani rë. ⁴⁸ Peru hndixahan xi hvíin hacutjin xi meje rë nai rë hane casahmi xcusun xi vechú chuva rë xi cuma castigu ne, chúva sehen rë. Hane yëjë ni hndixahan xi jemu cjín xcusun xá casua nai rë xi sahmi ne, hacuaha cuatjin jercu cjín cjuahjahya rë hya xi sahmi entregadu cuenta rë.

Sahmi Jesucristu xi sahmi condra xuta xicjin me

⁴⁹ Ngahan ne, canduvá ne xi cuétaha rë sacuaha ngu ndihi ngasunhndë, ngu ndihi xi tsingacun mé cún cjuatacun rë xuta. Hacuaha jemu meje ná xi ha hisca ha casetaha rë. ⁵⁰ Ngahan ne, tjin ná xi cuátju ngu cjuañihi sacuatjin rë ngu xuta xi tjin rë me xi satë rë me nandá hya xi xtenda me. Hacuaha jercu choho má ná hisca xi cuma chihin cjuacjintacun vëhë. ⁵¹ Xi má nuju ngayun ne, ¿há cjuajeya canduvácojo xi cuma rë xuta ngasunhndë? Hacuini cuatjin. Ngahan ne, canduvá ne xi sahme xi sahmi condra xuta xicjin me. Cuatjin sahmi condra xicjin me ta, tsëhë xi ngujo me ne, cumangu cacun me cojo ná, hane ngujo nga me ne, cumanguaain cacun me cojo ná. ⁵² Xi cuetsihin nixtin vihi ne, hisca cojo xi cjuiniji sa ne, cuejña ne xi ngu ndihya ne, siu hñú xuta cojo xicjin me. Hane jyan me ne, sahmi condra me me xi jo jan. Hane me xi jo jan ne, sahmi condra me me xi jyan jan. ⁵³ Nahmi ne, sahmi condra me cha quihndi rë me, hane cha quihndi rë me jan ne, sahmi condra cha nahmi rë cha. Naa ne, sahmi condra me na quihndi rë me, hane na quihndi rë me ne, sahmi condra na naa rë na. Nahya ne, sahmi condra me jah-

nda rë me, hane jahnda rë me ne, sahmi condra na nahya rë na. —Cuatjin xu cachja Jesús cojo xuta ladu rë me.

Camamiji cuijne rcu xuta xcusun xi casahmi Jesucristu

⁵⁴ Hya xi camá ne, cachja nga xu Jesús cojo xutacjin jan cuitjin:

—Nguehe nangui naja matsejen ne, hya xi chutsujun xi tivisecún ngu yuffi ngajan táha ladu vetje tsuhi matsejen ne, ngutjen nújun ta cuaha ngu tsi hñu, hane cuatjin jain má. ⁵⁵ Hane hya xi vanga ngu tjo xi cjui táha ladu ngatihin matsejen ne, ngayun matsejen ne, nújun ta cuma suë, hane cuatjin jain má. ⁵⁶ Jemu hyun mé vijne xcusun xi cún nangui cojo xcusun xi cún ngahnga. ¿Mé má nújun xi hyúun mé vijne xcusun xi tijima nixtin vihi ni? ¡Jemu ndacha ngayun!

Meje xati rë xi cuichancjan si xi tacun ngajñi naja cojo Nina

⁵⁷ Hane ngayun matsejen ne, ¿mé má nichuvuun suvun cojo cjuatacun nuju xcusun xi cjuaquixi ni? ⁵⁸ Ndiya tivan-gun cojo xuta xi meje cuinchajyë nuju ngajan xcun xutaxa rë matsejen ne, nihñu ngahñu xi cuisuhun cjuandaja cojo me, cojo sa xi xticja si xi tacun ngajñi nuju cojo rë me matsejen ta, sá tsajin ne, cjucojo nuju me xcun juez. Hane juez matsejen ne, squindaya me mayu sehe sahmi nuju me entregadu, hane mayu jan matsejen ne, cjuje cueyá nuju me ndavaya. ⁵⁹ Hane cuichjá cojo nuju cjuaquixi matsejen ta hatuxa cuetjuun tsëhë ngajan jinguyëjë rë xi cjëë cuechjun yëjë ni tujún xi quitjun. —Cuatjin xu cachja Jesús.

Sahmi ngujoyë xi nindeyan cjuatacun naja

13 Ha hora vëhë ni ne, cafehe xu ngujo xuta hiscan tacun Jesús. Hane cachja xu me cojo Jesús tsëhë

ngujo xuta tsêhê distritu Galilea xi cavitexa Pilatu xi cueya hya xi titsiquehen xuta xi cuacun vë chu rë me xi sua me cjuatjo cojo Nina.

²Ngajan xi Jesús ne, cuitjin xu cachja me cojo xuta xi cachja cojo rë me jan:

—Hane tsêhê xi cuatjin cahme ngujo xuta Galilea xi cuacun vë ne, ¿há vëhê xi má nuju xi hitsê sa tsehen me xi cuma rë yëjê sa me xi yahnga? ³Jéya, hacuiin cuatjin. Peru sá xi ngayun nindeyuun cjuatacun nuju ne, ngayujun ni ne, hacuaha cuatjin cueyun. ⁴O há tsajin ne, xuta xi tyjuhunjyan xi cahme hya xi caticjane rë torre tsêhê Siloé jan ne, ¿há má nuju xi hitsê sa tsehen me xi cuma rë yëjê sa xuta xi caviyuju ngajan Jerusalén?

⁵Jéya, hacuiin cuatjin. Peru sá xi ngayun nindeyuun cjuatacun nuju ne, ngayujun ni ne, hacuaha cuatjin cueyun. —Cuatjin xu cachja Jesús.

Ejemplu tsêhê ya xi cavaquiin tú rë

⁶Sehe ngajan xi Jesús ne, cachja sa xu me ngu ejemplu cojo xuta jan, cojo sa xi sua me cumachaya rë xuta xi jemu chúva camá nixtin xi cuma tsindeya xuta cjuatacun rë me. Cuitjin cachja me:

—Cuejña ne xi ngu ya túhaxi jan ne, secun xcun nangui rë ngu cha jan. Hane xi canduva cha xi tsêhê jan, vanguise cha tú rë ne, casacuiin rë cha. ⁷Sehe ngajan xi cachja cha cojo cha mosu rë cha cuitjin: “Ha tjin rë jyan nu xi vinduva vanguësê tú rë ya vi ne, sacuiin ná. Tiche. ¿Mé má tu cuenda cuisecun tsinguetsun rë nangui?” Cuatjin cachja cha xi tsêhê jan. ⁸Ngajan xi cha mosu jan ne, cuitjin cafayangui cha: “Tatá. Tuhun rë cahndé catisecon ndastu ngu nu sa, hane cuacján nangui rë, hacuaha cuíncha rë abono. ⁹Xi cuatjin ne, ¿há suaain tú rë nduva nga ngu nu? Hane sá xi hacuaha ni suaain tú rë ne, sehe cuichan.” Cuatjin cafayangui mosu jan. Cuatjin xu fi ejemplu xi cachja Jesús.

Casahmi Jesucristu xi camandaja ngu chjuun nixtin xi chjahájenda rë

¹⁰Ngu nixtin xi chjahájenda rë, hya xi tivicuya xu Jesús cahntsua ngu yungun jan ne, ¹¹ngajan tacun ngu chjuun xi ha cjuí tyjuhunjyan nu xi camaticua na hane ha quihndê maji xu ma quixi nínca ngaxtun na. ¹²Xi cavêê Jesús na ne, cajindaya xu me na, sehe cachja me cojo na cuitjin:

—Ngayun tsan ne, ha camandaya ngayun tsêhê xi cuatjin jyihî ngayun vë. —Cuatjin xu cachja Jesús.

¹³Hane ha hora vëhê ni cavisanetsja xu me na, hane ngutjen ni camaquixi nínca ngaxtun na. Hya xi camá ne, casahmi jyê casahmi hnga xu na Nina. ¹⁴Peru presidente rë yungun jan ne, jemu camacjan xu rë me tsêhê xi casahmi Jesús xi camandaja ngu chjuun nixtin xi chjahájenda rë. Vëhê xi cachja xu me cojo xutacjín jan cuitjin:

—Tjin naja jyun nixtin xi nihña xá. Vëhê xi meje rë xi ngajñi rë jyun nixtin vëhê matsejen ne, hya nduvun xi cuman-daja ngayun, hacuiin xi tu nixtin xi chjahájenda rë matsejen ne, hya cuinduvun. —Cuatjin xu cachja presidente rë yungun jan.

¹⁵Peru Nai naja ne, cuitjin xu cachja me:

—¡Jercu choho ningatuhuntacún! Jima ngu ngayun matsejen ne, hatuxa vuhunndayun ndyaja vuhunndayun burru nuju tsêhê cahndé rë chu xi cuangun nicuhun chu nandá, handasa nixtin xi chjahájenda rë. ¹⁶Hane na vihi xi xuta ladu rë Nina na hacuaha tjinhñu rë Satanás na cahntsua tyjuhunjyan nu matsejen ne, ¿há ndaintjin xi sehenndaya na nixtin xi chjahájenda rë ni? —Cuatjin xu cachja Nai naja.

¹⁷Hane xi cafê xu cachja Jesús cjuavëhê ne, yëjê ni xuta xi má condra rë me ne, jemu camasava xu rë me. Peru yëjê

sa xuta xi yahnga ne, jercu ndaja camá xu rë me tsëhë yějë ni xcusun ndaja xi casahmi Jesús.

Ejemplu tsëhë tutjé lihndi

¹⁸ Hacuaha cachja sa xu Jesús ejemplu vihi:

—Gubiernu xi sahmi Nina ne, ¿mé xi tangun cojo? ¹⁹ Tangun cojo ngu tutjé xi jemu lihndi camahani. Hya xi ngu xuta tsitjé me tutjé vëhë xcun nangui rë me ne, cuetju, cuma ngu ya, hisca nisë xi vitjen chu ngahnga ne, sahmi chu ndava chu rcu. —Cuatjin xu cachja Jesús.

Ejemplu tsëhë san rë pan

²⁰ Cavuya cachja nga xu Jesús cuitjin:

—Gubiernu xi sahmi Nina ne, ¿mé xi tangun cojo? ²¹ Tangun cojo san rë pan xi visecjan ngu chjuun ngajni rë nahyu rë pan cojo sa xi sahmixa ngajni rë yějë ni nahyucjin jan. —Cuatjin xu cachja Jesús.

Ejemplu tsëhë tingotjo xcu

²² Ndiya cjuí xu Jesús ngajan Jerusalén ne, cavatju xu me nandya cojo ranchun xi siu ndiya cjuí me jan, hane cachja me cojo xuta cjuá rë Nina. ²³ Hya xi camá ne, cavinenguise xu ngu me xi cavinenguise rë Jesús cuitjin:

—Tatá. ¿Há jemu chúva xuta xi tivetjutje me? —Cuatjin xu cavinenguise xuta jan.

Sehe ngajan xi Jesús ne, cachja xu me cojo xuta xi siu jan cuitjin:

²⁴ —Nihñu ngahñu xi cuma cuisuhun hiscan sahmi Nina gobiernu táha tingotjo xi xcu ta, tsëhë xi nguehe cuichjá cojo nuju ta cuechú nixtin xi jemu cjin xuta xi cuma meje cuisehen me jan, peru cumaji. ²⁵ Ta hya xi ngahan xi nai rë cahndé vëhë ngahan, cuinduva cuéchja tingotjo ne, ngayun ne, cuinechun candatsen, sehe cjunntsun tingotjo jan hacuaha cuitjin cuinújun: “Tatá. Chuxuhun tingotjo tsijin.” Cuatjin

cuinújun. Hane xi cjuayanguë tsujun ne, cuitjin cuichjá: “Hveen jani canduvun ngayun.” Cuatjin cuichjá cojo nuju. ²⁶ Hane ngayun ne, cuitjin cuinújun nga: “Cachini cahyin tangun cojo nuju, hacuaha nangui niji canujyuhunyun cavicyun cjuá rë Nina.” Cuatjin cuinújun. ²⁷ Hane cuitjin cuichjá nga cojo nuju: “Hveen jani nandya nuju. Tángunxun tsahan, ngayujun ni ngayun xuta sahmi cjuatsehen.” Cuatjin cuichjá. ²⁸ Ngajan ni ne, jemu chjihndun hacuaha nijanurii nehñu, hya xi chutsujun Abraham cojo Isaac cojo Jacob, cojo yějë profeta xi siu me ngajan hiscan xi sahmi Nina gobiernu, peru ngayun ne, caviyujú nuju candatsen. ²⁹ Hane cuinduva xuta tsëhë táha ladu vetjucaa tsuhi cojo táha ladu vetje tsuhi cojo yějë sa ladu, cuinduva me sinë tangun me hiscan xi sahmi Nina gobiernu. ³⁰ Nguehe cuichjá cojo nuju ta yahnga xuta xi tjengui me quihndë ne, me vëhë cuma titjun me, hane yahnga me xi titjun quihndë ne, me vëhë cuma tjengui me hya xi cuejña Nina gobiernu rë me jan. —Cuatjin xu cachja Jesús.

Jemu choho camá rë Jesucristu ngatsë rë xuta Jerusalén

³¹ Ha hora vëhë ni ne, cafehe xu ngujo cha fariseo, hane cuitjin xu cachja cha cojo Jesús:

—Ndatjin xi tetjunxun tsëhë nguehe ta, tsëhë xi Herodes ne, meje tsiquehen nuju me. —Cuatjin xu cachja cha xi cuacun jan.

³² Hane ngajan xi Jesús ne, cuitjin cafayangui xu me:

—Tángun ne tinújun cojo rë chu ninda vë cuitjin: “Chutsujun ni, quihndë cojo nchujun ni ne, cuáxëxen xitsehen hacuaha sahme xi cuma ndaja xuta hmu rë, hane nguini ne, tsinguíjnetaha xá xi tisahme.” Cuatjin tinújun. ³³ Peru hacuaha sahmi ná nguýë xi cjué sa quihndë nchujun ni cojo nguini hisca xi

cjuêhê hiscan xi tifê ta, tsêhê xi profeta ngahan, hane ngu profeta ne, cumaji xi cueya jingusa nandya xi hacuiin nandya Jerusalén.

³⁴¡Ngayun xuta Jerusalén, ngayun xi cojo ndoyojo nicuhun profeta xi tsingatju Nina ngajñi nuju! ¡Jemu choho má ná! ¡Mé hitsê ndiya xi meje scávêvaha nuju sacuaaha javêvaha ngu nisê quihndi rê chu xi cuincha chu ngahma tyjunga rê chu, peru ngayun ne, mijí nuju! ³⁵Chutsujun ni, Nina ne, catsismicacun me ngayun. Cuichjá cojo nuju ta chuun camahani ná hisca hya xi cuechú nixtin xi cuinújun cuitjin: “¡Catsinchacun Nina me xi titsingatju me ngajñi naja!” —Cuatjin xu cachja Jesús.

Casahmi Jesucristu xi camandaja cha xi yaha rê chfhinsquee

14 Cuitjin camá xu ngu nixtin xi chjahájenda rê hya xi quiji cajinë Jesús niñu ndava ngu cha xi matitjun ngajñi rê cha fariseo. Xi cafehe Jesús jan ne, cha xi siu jan ne, siu tifahachuva xu ni cha Jesús. ²Hacuaha hiscan tacun Jesús ne, ngajan xu tacun ngu cha xi yaha rê chfhinsquee. ³Ngajan xi Jesús ne, cavinenguise xu rê me cha xi vicuya cjuachacun cojo cha fariseo cuitjin:

—¿Há tjin cahndé nixtin xi chjahájenda rê xi nihña xi cumandaja xuta, o há tsajin cahndé? —Cuatjin xu cavinenguise Jesús.

⁴Hane cha xi cuacun jan ne, tu caviyujyuu xu ni cha. Hya xi camá ne, cafaha xu Jesús cha hmu rê jan, hane casahmi me xi camandaja cha, sehe catsingatju me cha cafe cha. ⁵Sehe cavinenguise xu me cha xi siu jan cuitjin:

—¿Há tjin ngu ngayun xi nixtin xi chjahájenda rê ne, cuanguun marcu macjain naxun quihndi nuju o sá ndyaja nuju sá xi cjuinenguia ngu ndava nandá xi jemu nungun? —Cuatjin xu cavinenguise me.

⁶Hane cha xi cuacun jan ne, camaji cafayangui xu cha hisca xi ngu cjuaja xi meje rê Jesús.

Meje rê xi ninguijne yojo naja

⁷Hya xi camá ne, tsêhê xi vutsejen xu Jesús xi xuta xi cachjindaya rê tsêhê suhi jan ne, tivaxijin me cahndé xi matitjun ngajan xcun maxê ne, vêhê xi cachja xu me cojo xuta jan cuitjin:

⁸—Hya xi chjindaya nuju cuangun xinu ngu comida ne, xicachjuun cahndé xi matitjun ngajan xcun maxê ta sá tu hacuaha cachjindaya rê ngu me xi hitsê sa meje rê xi chjahárcun rê xi cuma nuju ngayun. ⁹Hane cuinduva me xi cajindaya nuju catsijotjun ni ne, cuichja me cojo nuju cuitjin: “Tuhun rê me vihi cahndé nuju vê.” Cuatjin cuichja me cojo nuju. Ngajan xi ngayun ne, cojo jyê cjuasava ne, cuangun chjuhun cahndé xi ma tjengui. ¹⁰Xi meje rê ne, hya xi cuatjin chjindaya nuju ne, tángun chjuhun cahndé xi ma tjengui, cojo sa xi hya xi cuinduva me xi cajindaya nuju ne, cuichja me cojo nuju cuitjin: “Ngayun ne, nduvun chjuhun ngu cahndé xi hitsê sa matitjun.” Cuatjin cuichja me. Ngajan xi ngayun ne, jercu sahmi jyê sahmi hnga nuju me ngajñi rê yêjê xuta xi siu jan. ¹¹Cuatjin cuma ta, tsêhê xi yêjê xuta xi sahmi yehe suvá me yojo rê me ne, cuechú nixtin xi Nina ne, tsinguijne me cjuatacun rê. Hane xuta xi tsinguijne suvá me yojo rê me ne, Nina ne, sahmi yehe rê me.

¹²Hacuaha cachja nga xu Jesús cuitjin cojo me xi cajindaya rê me:

—Hya xi nihñu ngu suhi ne, xicachjindayuun rê amigu nuju, xicachjindayuun rê xingun, hacuaha xicachjindayuun rê xuta nchina xi siu tahndee ndya nuju, sá tu hacuaha squindaya nuju me xi cuangun ndava suhi rê me, hane cojo vêhê ni ne, ha camangojo cjuandaja nuju. ¹³Cahndé rê vêhê ne, hya xi nihñu ngu

suhi ne, chjindayun rë xuta yuma, chjindayun rë xuta xi yoho me, chjindayun rë xuta rengun, hacuaha chjindayun rë xuta rcá. ¹⁴ Sá xi cuatjin nihñu ne, jemu ndaja tsujun ta, tséhë xi xuta xi cuacun vë ne, tsajin rë me mé cojo sahmingojo me cjuandaja nuju. Peru Nina sahmingojo me tsujun hya xi tsicuya me cjuahñu xuta xi tsajin jyë rë. —Cuatjin xu cachja Jesús.

Ejemplu tséhë ngu suhi jyë

¹⁵ Hane xi cahndë xu ngu cha xi cojo tijinë jan cjua xi cachja Jesús ne, cuitjin xu cachja cha cojo rë me:

—¡Jemu ndaja tséhë xuta xi sinë me niñu hiscan xi sahmi Nina gobiernu! —Cuatjin xu cachja cha.

¹⁶ Ngajan xi Jesús ne, casuacuenda xu me cha ngu ejemplu vihi:

—Cuejña ne xi ngu cha jan ne, casahmi cha ngu suhi jyë, hacuaha jemu cjín xuta cajindaya rë cha me.

¹⁷ Xi casune hora xi sinë cha cojo xuta ne, sehe catsingatju cha hndixahan rë cha ndava xuta xi ha cachja cha cojo xi cuichja hndixahan jan cojo rë xuta cjua vihi: “¿Há cuangun xu ta, ha tjin chjine yëjë ni?” Cuatjin cachja hndixahan jan. ¹⁸ Hya xi camá ne, cavetsihin jima ngu me cachja me mé tséhë xi cumaji cjue me. Hane me xi tjutjun ne, cuitjin cachja me cojo hndixahan jan: “Ngu rquí nangui cavátsë ne, sahmi ná ngu jyë xi cjué scutséjen. Véhë xi cumaji cjué ndava suhi.” Cuatjin cachja me.

¹⁹ Hane ngu nga me ne, cuitjin cachja me: “Cavátsë hñú ninchin ndyaja, hane cjué cjuaháchuva chu. Véhë xi cumaji cjué ndava suhi.” Cuatjin cachja me.

²⁰ Hane ngu nga me ne, cuitjin cachja me: “Cumaji cjué ta, tséhë xi ngahan ne, ha cavíxan.” Cuatjin cachja me. ²¹ Hya xi camá ne, hndixahan jan ne, quiji cachja cojo nai rë cjua xi cachja xuta xi cuacun jan. Hane xi camacjan rë nai rë ndi-

hya jan ne, cuitjin cachja cha cojo hndixahan rë cha: “Tetji ne, tihin sanii ngajan ndiyatë cojo ndiyahndë tséhë ngajñi nandya ne, chjindaye rë xuta yuma cojo xuta yoho cojo xuta rcá cojo xuta rengun ne, ndovecueje me.” Cuatjin cachja cha. ²² Hane xi cavuya hndixahan jan ne, cuitjin cachja: “Tatá. Camá tutjin xi cavitexun ná, peru tjin sa cahndë.” Cuatjin cachja hndixahan jan. ²³ Ngajan xi cachja nga nai rë hndixahan jan cojo rë cuitjin: “Tihin nga hisca ndiya nguijña, hane nihñi rë xuta ngu jyë ndovecueje me, cojo sa xi catitsë rë ndya naha. ²⁴ Nguehe cuichjá cojo ri ta hisca xi ngu me xi cajindáya rë tjun tjun ne, satiin rë me sinë me tséhë suhi xi ti-sahme.” Cuatjin cachja nai rë hndixahan jan. —Véhë cajnetaha xu ejemplu xi casuacuenda Jesús.

Meje rë xi nihña cuenta há scaa naja cuiseen ladu rë Jesucristu

²⁵ Ngajan xi hya xi quiji sa xu Jesús ndiya rë me xi cjui me Jerusalén ne, jemu cjín camahani xuta cjui me cojo rë me. Hane xi cavuya me cavutsejen me xutacjín jan ne, cuitjin xu cachja me:

²⁶ —Sá xi tjin ngu ngayun xi meje cuinduvuntjengun ná matsejen ne, meje rë xi hitsë sa nihmutacún ná ngahan xi cuma rë xi nihmutacún nahmi nuju, naa nuju, chjuun nuju, quihndi nuju, xingun, hisca cojo yojo nuju suvun. Sá tsajin ne, cumaji cuma ngayun ngu xuta ladu naha. ²⁷ Jarë ngayun xi nduvuntjengun ná matsejen ne, sá xi cuejñuhñuun xahasen nuju xi cuanguncujun ndiya naha handasa hisca cueyun xcun cru matsejen ne, cumaji cuma ngayun ngu xuta ladu naha. ²⁸ Ha hyan matsejen ta hya xi ngu xuta meje sahmi me ngu ndihya jyë ne, titjun sahmi me cuenta rë me, há chutaha tujún rë me hisca xi tsinguijnetaha me sahmi me ndihya. ²⁹ Cuatjin sahmi me cuenta rë me matsejen ta sá

tsajin ne, sá xi ngutjen sahmi me xihndēnaña rē hane cumaji tsinguijnetaha me sahmi me ndihya matsejen ne, yějē ni xuta xi scuēē me matsejen ne, jemu cuejnucēē me me. ³⁰ Cuitjin cuichja me: “Cha xi cavetsihin casahmi ngu ndihya jyē vi ne, camaji catsinguijnetaha cha casahmi cha.” Cuatjin cuichja xuta. ³¹ Hacuaha ha hyan matsejen ta hya xi ngu me xi matitjun cjue sahmi me ngu si jyē cojo jingu sa me xi matitjun xi condra rē me matsejen ne, titjun tsingataha cacun ndaja me, ¿há scaa rē me cojo tē mil xuta rē me xi sahmi me si cojo condra rē me xi ticojo can mil xuta rē? ³² Sá xi vutsejen me ta scaain rē me matsejen ne, jinguyějē rē xi cjin sa nduva condra rē me matsejen ne, tsingatju me ngujo xuta xi tsinguijnehnchan cju. ³³ Vēhē xi ngayujun ni matsejen ne, meje rē xi cuatjin titjun ndaja ningatuhuntacún ¿há scaa nuju, há scaain nuju? matsejen ta, tsēhē xi yějē ni ngayun xi nismutacuun yějē ni xcusun xi tjin nuju matsejen ne, cumaji cuma ngayun xuta ladu naha. Cuatjin xu cachja Jesús.

Yo xi hacuini ndaja tjengui rē Jesús ne, tangun cojo naxa xi fē xtya rē

³⁴ Hacuaha cachja sa xu Jesús cojo xutacjin jan cuitjin:

—Ngayejen ni matsejen ne, ha hyan matsejen ta naxa matsejen ne, ndaja. Peru sá xi cjuē xtya rē matsejen ne, ¿hacutjin cuma xinha nga tutju rē ni? ³⁵ Ha quihndē tsajin mé cumachjirēhē. Cumaji nicojonxan sacuaha nihndē, hacuaha cumaji nicojonxan sacuaha abono. Chjahá rē cuixu candatsen. Yo ngayun xi tjin nuju cjuasua xi cuinuhyun cju naha matsejen ne, ndaja tinuhyun. —Cuatjin xu cachja Jesús.

Ejemplu tsēhē chu tsánga xi cachajá

15 Ngundiya jan ne, jemu cjin xu cha faha tujún sa cojo xuta tse-

hen xi yahnga jan quiji casahmi tiña me tsēhē Jesús, xi meje cuiñuju me cju xi cuichja Jesús. ² Hane cha fariseo cojo cha xi vicuya cjuachacun ne, cachjahma xu cha cojo xicjin cha cuitjin:

—Cha xi cuijiyihi vi ne, tsingatihin cha visiajmi cha cojo xuta tsehen hacuaha jinētangun cha cojo me. —Cuatjin xu cachjahma cha.

³ Sehe ngajan xi Jesús ne, cachja xu me ngu ejemplu cojo cha xi cuacun vē cuitjin:

⁴ —Cuejña ne xi ngu ngayun tjin nuju ngu cientu chu tsánga. Hane sá xi chajá ngu chu tsujun ne, hatuxa cuiyujuntuhun chu xi ñujuchan tyjuhunñuju jan nguijña ne, sehe cuangun cuinchunsun ngu chu xi cachajá jan hisca xi sacú nuju chu. ⁵ Hane xi sacú nuju chu ne, chjuhun chu cuesuntuhun chu xi jercu ndama nuju. ⁶ Hane xi cjuhun ndya nuju ne, nihñutangun yějē xuta xi vinga nuju cojo me xi siu tahndee ndya nuju, hane cuitjin cuinújun cojo rē me: “Cuinechan cojo ná cjuasua ta casacu ná chu tsánga naha xi cachajá.” Cuatjin cuinújun. ⁷ Nguehe cuichjá cojo nuju ta hacuaha hitsē sa jyē cjuasua cuejña ngajan ngahnga ngatsē rē ngu xuta tsehen xi tsindeya me cjuatacun rē me xi cuma rē ngatsē rē ñujuchan tyjuhunñuju xuta ndaja xi tsajin mé má tsindeya me cjuatacun rē me. Cuatjin xu cachja Jesús.

Ejemplu tsēhē tujún quicha xi cachajá

⁸ Hya xi camá ne, cuitjin cachja nga xu Jesús ngu ejemplu:

—Cuejña ne xi ngu chjuun jan ne, tjin rē me tē tujún quicha xi jercu hnga chji rē. Hane sá xi tsichajá me ngu ne, hatuxa cuetaha rē me ndihi, sehe cuitecha me ndihya sehe cuanguise chichihin me hisca xi sacú rē me. ⁹ Hane xi sacú rē me ne, sahmitangun me yějē xuta xi vinga rē me cojo me xi siu tahndee ndava me ne, hane cuitjin cuichja me cojo rē me:

“Cuinechan cojo ná cjuasua ta casacu ná tujún naha xi catsichajá.” Cuatjin cuichja me. ¹⁰ Nguehe cuichjá cojo nuju ta hacuaha jemu jyë cjuasua cuiyuju ángel tsëhë Nina ngatsë rë ngu xuta tsehen xi tsindeya me cjuatacun rë me. Cuatjin xu cachja Jesús.

Ejemplu tsëhë cha xi catsismi cacun ndava nahmi rë

¹¹ Hya xi camá ne, cuitjin cachja nga xu Jesús ngu ejemplu:

—Cuejña ne xi ngu me jan ne, tjin rë me jo quihndi. ¹² Hane cavechú ngunixtin xi cha quihndi ngascan tsëhë me vihi ne, cachja cha cojo rë me cuitjin: “Papá, tsëhë yëjë ni xcusun xi satë ná hya xi cueyun ne, meje ná xi tuhun ná quihndë.” Cuatjin cachja cha. Sehe ngajan xi nahmi rë cha jan ne, cavatëcja me hacutjin xi satë rë xingu xingu quihndi rë me. ¹³ Hane hacuiin tsëë ni jan ne, cha quihndi ngascan jan ne, xi casahmi tangun cha yëjë xcusun xi casatë rë cha jan ne, sehe cavetju cha quiji cha ngu nangui cjin. Hane xi cafehe cha jan ne, sehe cavetsihin cha tujyë catsicojo cha tujún rë cha, casahmi cha yëjë ni hacutjin xi ndama rë xahasen rë cha.

¹⁴ Hane xi cafë catsicojo cha tujún jan ne, hya canduva ngu jindya jyë jingujyë ni ladu vëhë. Hya cavetsihin camachaja rë cha. ¹⁵ Hya xi camá ne, cavetsihin casahmi cha xá sacuaha mosu rë ngu me tsëhë nandya jan. Hane me vëhë catsingatju me cha xi cjue sahmi cuidadu cha chu chinga rë me ngajan ranchun.

¹⁶ Hane tsëhë xi jemu vojo camahani rë cha ne, hisca meje sinë cha xi tijinë chu chinga jan, peru tsajin yo casua rë cha. ¹⁷ Hane hya xi catsingataha cacun ndaja cha ne, cuitjin catsingataha cacun cha: “Yëjë mosu rë nahmi naha ne, tsajin mé machaja rë xi sinë, hane ngahan ne, tivéya jindya nguehe xi vojo ná. ¹⁸ Jemu sa rë ndaja ne, cúa cjuë nga ndava

nahmi naha, hane cuitjin cuichjá cojo rë me: Cahndeen tsëhë Nina hacuaha cahndeen tsujun. ¹⁹ Ha quihndë vechiin chuva rë xi cuitejña cojo nuju sacuaha quihndi nuju. Nihñucundun sacuaha xi mosu nuju ngahan quihndë xi cavúya.” Cuatjin catsingataha cacun cha. ²⁰ Hya xi camá ne, sehe cavuya cafe cha nangui rë cha xi cjue cha ndava nahmi rë cha.

’Peru cjin sa cjui cha tsëhë ndava nahmi rë cha ne, cavëë nahmi rë cha xi nduva cha, hane jemu camayuma rë me cha. Sehe vanga me quijitjengui me cha, catsuvacja me cha hisca cavitatsuha me cha. ²¹ Sehe ngajan xi cavetsihin cachja cha cojo nahmi rë cha cuitjin: “Papá, cahndeen tsëhë Nina hacuaha cahndeen tsujun. Ha quihndë vechiin chuva rë xi cuitejña cojo nuju sacuaha quihndi nuju.” Cuatjin cavetsihin cachja cha. ²² Peru nahmi rë cha ne, cachja me cuitjin cojo ngujo hndixahan rë me: “Tángunsanii, tángun chjuhun ngu tsjian xi tsjian ndaja jan ne, sehe nduvun nicujún cha quihndi naha vi. Hacuaha nduvuncujun ngu xtungun sehe teyun rcutsja cha, hacuaha nduvuncujun chuxinxhtë xi cuinchun ntsacu cha. ²³ Xi camá vëhë ne, sehe tángun chjuhun ngu ndyaja xi ndaja hñu cacun chu cueya chu xinëë chu. Nihña ngu suhi, tahan cjuasua xahasen naja ta, ²⁴ tsëhë xi cha quihndi naha vi ne, sacuaha xi cahme cha hane sehe cavuya cha cjuahñu, sacuaha xi cachajá cha hane sehe casacu nga cha.” Cuatjin cachja nahmi rë cha. Hya xi camá ne, sehe cavetsihin casahmi me suhi.

²⁵ Peru cha quihndi tjun rë me vihi ne, tsajin cha ta nguijña quiji cha. Hane xi camatiña cha tsëhë ndava cha xi cavuya cha xi quiji cha nguijña ne, cahndë cha xi fane tyjó ndava cha hacuaha tité xuta. ²⁶ Hya xi camá ne, sehe cajindaya cha ngu cha hndixahan rë nahmi rë cha, sehe cavinenguisse cha mé jima jan. ²⁷ Hane

cha hndixahan jan ne, cuitjin cafayangui cha: “Cha tsuhun cavuya cha. Hane hacuaha cavitexa nahmi nuju xi cahme ngu ndyaja xi ndaja hñu cacun xi cuma suhi, tsêhê xi cavuya cafahatsja nga me xingun cojo ngu cjuahñu ndajyihi.” Cuatjin cafayangui hndixahan jan. ²⁸ Peru cha quihndi tjun jan ne, jemu camacjan rê cha, hisca ndihya mijí cuisehen cha. Hane xi cavetju nahmi rê cha ne, jercu cjin cachja me cojo cha xi cuisehen cha ndihya. ²⁹ Ngajan xi cha vêhê ne, cuitjin cafayangui cha tsêhê nahmi rê cha: “Chutsujun ni, ngahan ne, ha jemu tsêê nduva nixtin xi tivisécoo nuju, hacuaha tsajin ngu cjuja xi cahndeen tsujun xi canújun. Peru ngahan ne, hisca ngu tentsun catuun chu xi cueya chu xi sahme ngu suhi cojo amigu naha. ³⁰ Peru quihndê xi cafehe cha quihndi nuju vê xi tu ngajan quiji catsicjê cha cjuanchina nuju cojo yachjin tsehen jan ne, canicuhun ngu ndyaja hñu cacun xi xinu cojo cha.” Cuatjin cafayangui cha. ³¹ Hya xi camá ne, cuitjin cachja nga nahmi rê cha: “Ngaye tsan xi nchunchujun ni nechin cojo ná ne, yêjê ni xi tsahan ne, hacuaha tsiji. ³² Ndatjin xi nihña ngu suhi cuitjin, cuinechan cjuasua ta, cha tsajan vi ne, sacuaha xi cahme cha peru cavuya cha cjuahñu, sacuaha xi cachajá cha peru casacu nga cha.” Cuatjin cachja nahmi rê cha. Vêhê xu ejemplu xi cachja Jesús cojo cha fariseo cojo cha xi vicuya cjuachacun.

Ejemplu tsêhê cha xi matitjun tsêhê xa xi cuaintjin casahmi

16 Hacuaha cachja nga xu Jesús cojo xuta ladu rê me ngu ejemplu cuitjin:

—Cuejña ne xi cavêjña ngu xuta nchina xi hacuaha tjin rê me ngu cha xi matitjun tsêhê yêjê ni xa rê me. Hane cha xi matitjun tsêhê xa jan ne, cavinchajyê ngu xi cavinchajyê rê cha

cojo me xi tsêhê xa tsêhê xi jemu cat-sicojo cha tujún rê me xi matsijin mé casahmi cha cojo. ² Hane xi cajindaya me xi tsêhê xa jan cha ne, sehe cachja me cojo cha cuitjin: “Ngaye ne, cafahántsangu jyé riji. Quihndê ne, nihñi ná entregadu cuenta tsêhê xa xi tacun ntseta, ngaye ne, ha quihndê cumaji cuhinnduju cojo xa xi nechintehe.” Cuatjin cachja me. ³ Sehe ngajan xi cha xi matitjun tsêhê xa jan ne, cuitjin catsingataha cacun cha: “¿Mé xi ndatjin sahme quihndê xi tivaxêxin ná nai naha tsêhê xa xi tejñataha? Ngahan ne, maji sahme xa xi hai. Hacuaha sava ná cjué cjuéhya caridad. ⁴ Haan, ha hvê mé xi sahme cojo sa xi cjuahatsja ná xuta ndava me hya xi cuétjuxen tsêhê xa xi tejñataha.” Cuatjin catsingataha cacun cha. ⁵ Hya xi camá ne, cajindaya cha chuva ngu chuva ngu xuta xi quitjen tsêhê nai rê cha. Hane cuitjin cachja cha cojo ngu me: “Ngayun ne, ¿hacutjin quitjun tsêhê nai naha?” Cuatjin cachja cha. ⁶ Sehe ngajan xi me xi quitjen jan ne, cuitjin cafayangui me: “Ngu cientu tonel tsêhê aceite.” Cuatjin cafayangui me. Hane cha xi matitjun tsêhê xa jan ne, cuitjin cachja cha cojo rê me: “Juhun xujun tsêhê cuenta nuju vi ne, tinechun sanii, nihñu sa ngu, hane tetuhun yachantê ni.” Cuatjin cachja cha. ⁷ Hya xi camá ne, cachja nga cha cojo ngu nga me cuitjin: “Ngayun ne, ¿há cjin quitjun tsêhê nai naha?” Cuatjin cachja cha. Hane cuitjin cafayangui me xi quitjen jan: “Ngu cientu xutsu trigu.” Cuatjin cafayangui me. Hane cha xi matitjun tsêhê xa jan ne, cuitjin cachja cha: “Juhun xujun tsêhê cuenta nuju vi ne, nihñu sa ngu, hane tetuhun ñujuchan ni.” Cuatjin cachja cha. ⁸ Ngajan xi xuta nchina xi nai rê xa jan ne, cavaxêndaja me cha tsehen xi matitjun tsêhê xa ngatsê rê xi jemu quicun cacun cha xi cuatjin casahmi cha. Hitsê sa quicun cacun xuta tsehen cojo ngasunhndê rê me,

xi cuma rë xuta xi fitjengui me ndiya rë Nina.

⁹Nguehe cuichjá cojo nuju ngayun xuta ladu naha ta hacuaha meje rë xi chjuhun tujún nuju, handasa hatuxa tsehen ta tsëhë xi tsëhë ngasunhndë, hane nicujunxun, cojo sa xi cuinga rë xuta ngayun. Cuatjin nihñu cojo sa xi hya xi cuechú nixtin xi cueyun hacuaha ha quihndë cumachjiriin nuju tujún ne, cjuahatsja nuju Nina ngajan hiscan xi cuinechan cojo rë me yëjë nu yëjë nixtin.

¹⁰Yo xi tjin rë cjuaquixi xi ndaja sahmi ngu xa xi chúva ne, hacuaha hatuxa tjin rë cjuaquixi xi ndaja sahmi ngu xa xi jyë. Hacuaha yo xi vindacha hya xi sahmi ngu xa xi chúva ne, hacuaha hatuxa vindacha hya xi sahmi ngu xa xi jyë. ¹¹Vëhë xi ngayun ne, sá xi vindachun hya xi nicujunxun tujún tsehen xi tsëhë ngasunhndë ne, hatuxa cuejñaai Nina ntsun cjuanchina xi cjuaquixi, xi tsëhë me. ¹²Hacuaha sa xi vindachun hya xi nicujunxun cjuanchina tsëhë jingu sa ne, Nina ne, hatuxa suaain nuju me cjuanchina xi cuma tsujun suvun.

¹³Tsajin ngu hndixahan xi ma facuenda xa tsëhë jo nai rë xa ta, tsëhë xi choho scuëë rë ngu nai rë hane tsihmu cacun nai rë xi majo jan. O sá tsajin ne, jemu cuetaha yojo rë cojo ngu nai rë, hane nai rë xi majo jan ne, hisca sahmicuendaain rë. Vëhë xi xi ngu ñahñu ni ne, maji nihñu hacutjin xi meje rë Nina cojo hacutjin meje rë cjuanchina tsehen xi tsëhë ngasunhndë. Cuatjin xu cachja Jesús cojo xuta ladu rë me.

¹⁴Cha fariseo, xi hacuaha jemu chuya rë cha tsëhë tujún ne, cahndë xu cha yëjë cjuaxi cachja Jesús cojo xuta ladu rë me jan. Hane cavejnucëë cha Jesús. ¹⁵Ngajan xi Jesús ne, cachja xu me cojo cha cuitjin:

—Ngayun xi nújun cojo xuta xi jemu ndaja xuta ngayun, peru Nina ne, vëë me cjuatacun xi jiya cahntsua xahasen nuju.

Hane cjuatacun xi sahmi yehe sahmi hnga xuta ne, Nina ne, chuyiin camahani rë me tsëhë.

Cumaji chjaháxin rë hisca ngu cjuaxi tsëhë ley rë Nina

¹⁶Hya xi chaja sa tsujyihya Juan Vintenda Xuta ne, yëjë xuta ne, casacu camachaya rë me cjuaxi rë Nina ngatsë rë ley xi cavejña Nina tsja Moisés, cojo ngatsë rë profeta xi hacuaha cachja me cjuaxi rë Nina. Hisca nixtin rë Juan ne, hisca quihndë ne, tisuá ngahan tijimachaya rë xuta cjuandajyihi xi chja xi Nina ne, sahmi me gobiernu. Hane yëjë ni xuta ne, meje cuisehen me hiscan sahmi Nina gobiernu, handasa cojo cjuachan.

¹⁷Ngahnga cojo nangui ne, hitsë sa chjaain cjuë xi cuma rë xi chjaháxin rë ngu cjuaxi tsëhë ley rë Nina.

Jyë rë xuta xi tsismi chjuun rë sehe cuixan cojo jingu sa chjuun

¹⁸Ngu xuta xi tsismi me chjuun rë me sehe cuixan me cojo jingu sa chjuun ne, tangun me cojo ngu xi sahmi cjuatsehen cojo ngu chjuun xi hacuiin chjuun rë. Hacuaha yo xi cuixan cojo ngu chjuun xi xihin rë na ne, catsismi cha na ne, tangun cojo ngu xi sahmi cjuatsehen cojo ngu chjuun xi hacuiin chjuun rë.

Ejemplu tsëhë cha nchina cojo cha yuma xi hmí rë Lázaro

¹⁹Cuejña ne xi cavéjña ngu cha xi jemu nchina, xi jercu ndaja camahani tsjian vajá. Nchunchujun ni ne, jemu ndajyihi suhi sahmi cha. ²⁰Hacuaha cavéjña ngu xuma cha yuma xi hmí rë Lázaro, xi jingujyë ni yojo rë cha camatsë. Hane jiña cha ngajan tingotjo ndava cha nchina jan. ²¹Hane hacuaha cojo cha yuma jan jemu meje sinë cha hitsë xi vangui jinë cha nchina jan. Hatuxa jemu choho vatju cha má, hisca vinduva ñaña chimajnu chu tsë xi yaja rë

cha. ²²Hya xi camá ne, xi cahme xuma cha yuma jan ne, quijicojo ángel hasen rë cha ngajan cahndé ndajyihi, cavéjña tangun cojo hasen rë nima Abraham. Hane cha nchina jan ne, hacuaha cahme cha, hane caseyaniji cha.

²³Hane hya xi jiya hasen rë cha nchina jan cahndé hiscan xi fi hasen rë nima ne, jercu tivatju cjuanihi. Hane xi cavuya cavutsejenniji hasen rë cha ne, cavëë rë hasen rë nima Abraham tsëhë cjin ni, hacuaha cavëë rë hasen rë nima Lázaro, tacun tangun cojo hasen rë nima Abraham. ²⁴Hya xi camá ne, cajindaya hasen rë cha nchina jan tsëhë hasen rë nima Abraham, cuitjin cachja: “Tatá Abraham, catamayuma nuju ngahan ne, tinújun cojo cha Lázaro vë ne, catit-sicahnchi cha rcutsja cha cojo nandá, sehe ningatjun cha catinduva catitsin-guijnehnchan cha hitsë neje ta, tsëhë xi jercu má camahani ná cojo ndihi vi.” Cuatjin cachja hasen rë cha nchina jan. ²⁵Peru hasen rë nima Abraham ne, cuitjin cafayangui: “Ninguitsjin tsan ta xcun cjuahñu riji ne, jemu ndaja cavatji camá, hane xuma cha Lázaro vi ne, jemu choho cavatju cha camá. Peru quihndë ne, tisacu rë cha cjue-tacun nguehe, hane ngaye ne, tivatji cjuanihi. ²⁶Hacuaha tjin sa ngu cjua xi cuichjá cojo ri: Nina ne, cavejña me ngu xanga jyë xi jiyavasen tsëhë hiscan xi nechintihin ngayin cojo tsëhë hiscan xi nechintehe ngaye, cojo sa xi yo ngayin xi meje cuátjin xi cuinduvun ndyá ne, cumaji, hacuaha yo ngayun xi meje cuatjun cuinduvun nguehe ne, hacuaha cumaji.” Cuatjin cafayangui hasen rë nima Abraham. ²⁷Sehe ngajan xi hasen rë cha nchina jan ne, cuitjin cachja: “Tatá, nihñu favor ne, ningatjun cha Lázaro ngajan ndava nahmi naha, ²⁸cojo sa xi sua cha cumachaya rë catsihñú xingueen xi siu jan, cojo sa xi hacuiin cojo cha cuechú cha cahndé vihi his-

can xi tacun cjuanihi xi tivatjin tijima.” Cuatjin cachja hasen rë cha nchina. ²⁹Hane hasen rë nima Abraham ne, cuitjin cachja: “Peru cha xi cuacun vë ne, cuma cuisinuju cha cjua xi ha catsihindu Moisés cojo cjua xi ha catsihindu profeta hatsëë nixtin. Vëhë cate-taharcu cha.” Cuatjin cachja hasen rë nima Abraham. ³⁰Ngajan xi hasen rë cha nchina jan ne, cuitjin cafayangui: “Tatá Abraham, cumaji xi cojo cjua vëhë ni. Peru sá xi yo cuetju tsëhë ngajñi rë nima xi cjue cuichja cojo cha ne, ngajan xi tsindeya cha cjuatacun rë cha.” Cuatjin cafayangui hasen rë cha nchina jan. ³¹Peru hasen rë nima Abraham ne, cuitjin cachja: “Sá xi mijí cuihndë cha tsëhë cjua xi catsihindu Moisés cojo cjua xi catsihindu profeta ne, hacuanitjin ni cumacjaain rë cha, handasa ngu nima cuya cjuahñu, cjue cuichja cojo rë cha.” Cuatjin cachja hasen rë nima Abraham. Cuatjin xu fi cjua xi cachja Jesús cojo cha fariseo cojo xuta ladu rë me.

Miji rë xi nihña xi tsismicacun ngu xuta ndiya rë Nina

17 Ngu nixtin jan ne, hacuaha cachja xu Jesús cojo xuta ladu rë me cuitjin:

—Hatuxa cuinduva xcusun xi meje sahmi xi nismetacuun ndiya rë Nina, peru jemu chojyihi tsëhë xuta xi nduvalo cojo xcusun vëhë. ²Hitsë sa ndaja tsëhë xuta vëhë xi xtyangui ngu ndyojo natsi nguisin me sehe ningatjenya rë me ngajñi ndachacun, xi cuma rë xi sahmi me xi ngu xuta ladu naha tsismicacun me ndiya rë Nina.

³Nechun cuidadu tsëhë xcusun xi nihñu. Sá xi ngu xingun choho sahmi cojo nuju ne, tinújuntuhun rë. Hane sá xi tsindeya cjuatacun rë ne, ninchatuhun rë. ⁴Hane sá xi hisca yatu ndiya choho sahmi cojo nuju ngu nixtin, hane hacuaha jima ngu ndiya vëhë

cjue cuichja cojo nuju xi tsindeya cjuat-acun rë ne, ninchatuhun rë. —Cuatjin xu cachja Jesús.

Cuma cuinuhyan tsëhë Nai naja sá xi mangutacuun ndastu hitsë cojo rë me

⁵Ngajan xi apóstol ne, cuitjin xu cachja me cojo Nai naja:

—Nihñu xi hitsë sa ndaja cumangu tacuín cojo nuju. —Cuatjin xu cachja me.

⁶Sehe ngajan xi Nai naja ne, cuitjin xu cafayangui me:

—Sá xi mangutacún cojo ná ndastu hitsë ne, hacuaha cuma cuinújun cojo ya vihi catjixin tsëhë cahndé hiscan secun, hane catji catisecun ngajan ngajñi ndachacun, hane hacuaha cuihndë tsujun.

Hacutjin meje rë xi sahmi hndixahan cojo nai rë

⁷Cuejña ne xi ngu ngayun ne, tjin nuju ngu hndixahan xi vacjan nangui tsujun o sá xi sahmi cuidadu rë chu nuju. Hane xi cjuehe hndixahan vëhë xi quiji nguijña ne, ¿há cuinújun cojo cuitjin: “Ndove sanii ne, xini niñu”? ⁸Jéya, hacuiin ta cuitjin cuinújun cojo: “Tehe chjini xi sínë, hacuaha tehe chjini yojo riji xi cuindove chani xi sínë xi cuëhë, hane xi cuijnetaha sínë ne, sehe xini sihi ngaye.” Cuatjin cuinújun. ⁹Hacuaha tuun nacuechji rë hndixahan vëhë tsëhë xi casahmi yëjë ni hacutjin xi cavitexun rë. ¹⁰Hacuanitjin nuju ngayun ta hya xi ha cafë canihñu yëjë ni hacutjin cavitexa nuju Nina ne, cuitjin meje rë xi ningatuhuntacún: “Ngahan ne, ngu hndixahan tujyë ni ngahan ta xi casahme ne, hacutjin xi casatëxa ná ne, vëhë ni xi casahme. Cuatjin meje rë xi ningatuhuntacún.” Vëhë xu cjua xi cachja Jesús cojo xuta ladu rë me.

Casahmi Jesucristu xi camandaja të cha hmu rë

¹¹Hane hya xi tivatju xu Jesús vasencja tsëhë distritu Samaria cojo distritu Galilea xi cjui me ngajan Jerusalén ne, cuitjin camá. ¹²Hora xi ha cuisehen me ngu nandya jan ne, nduvatjengui xu të cha me, cha xi yaha rë ngu xcusun chíhin vitaha xi setaha yojo naja. Hane caxinchacunhñu xu cha hitsë jan, ¹³hane tsëhë cjin ni cajindaya xu cha cachja cha cuitjin:

—¡Tatá Jesús! ¡Catamayuma nuju ngayin! ¡Nihñu xi cumandaja ngayin! —Cuatjin xu cajindaya cha cachja cha.

¹⁴Hane xi cavëë Jesús cha ne, cuitjin xu cachja me:

—Tángun hiscan xi siu nahmi, ningacun rë me yojo nuju xi tsajin mé cún ngayun. —Cuatjin xu cachja me.

Hane ndiya cjui cha ne, camandaja xu cha. ¹⁵Hya xi camá ne, xi cavëë xu ngu cha xi camandaja cha ne, cavuya qui-jitjengui xu cha Jesús, jindaya cha chja cha xi tisahmi jyë tisahmi hnga xu cha Nina. ¹⁶Hane xi cafehe xu cha hiscan secun Jesús ne, quiji caticjaxcun cha xcun me, xi tisua cha nacuechji rë me. Cha xi cuajyihi jan ne, cha Samaria cha. ¹⁷Sehe ngajan xi Jesús ne, cuitjin xu cavinenguise me xuta ladu rë me:

—¿Hacuiin yëjë të cha xi cuicun vi xi camandaja cha ni? ¿Cha xi ñaja sa ne, jarë cha ne? ¹⁸¿Há suvá ni cha xi cuijyihi vi xi ngu xutaxín cha xi cavuya cha xi sahmi jyë sahmi hnga cha Nina ni?

¹⁹Sehe cachja xu me cojo cha xi camandaja jan cuitjin: —Tisatjunhngun, hane tjangun. Ngatsë rë xi camangutacún cojo ná ne, vëhë xi camandaja ngayun. —Cuatjin xu cachja Jesús.

Hacutjin cuma hya xi cuinduva Nina sahmi me gobiernu

²⁰ Cuitjin xu camá nga ngundiya. Cha fariseo ne, cavinenguise cha Jesús jani-hya cuinduva Nina sahmi me gobiernu. Sehe ngajan xi Jesús ne, cuitjin xu cafayangui me tséhë cha:

—Nina ne, hya xi cuinduva me sahmi me gobiernu ne, hacuiin titjun sua me cumachaya naja sehe cuinduva me.

²¹ Tsajin yo cuichja: “Cuajyihi Nina nguehe”, o sá: “Cuajyihi Nina ngajan”; ta Nina ne, ha tisahmi me gobiernu ngajñi nuju. —Cuatjin xu cachja me cojo cha fariseo.

²² Hya xi camá ne, cuitjin xu cachja me cojo xuta ladu rë me:

—Cuechú nixtin xi jemu cuma meje chutsujun ná ndastu ngu hora, ngahan xi Quihndi rë Xuta jain ngahan, peru cumaji. ²³ Yahnga me cuichja me cojo nuju: “Cuajyihi me nguehe”, o sá: “Cuajyihi me ngajan”; peru hacuiin cuangun cojo me, hacuiin cuanguntjengun me ta ²⁴ sacuahsa sahmi hasen ndihichuhún xi ha tu ñahñu sahmi hasen rë jingujiyë ni ngahnga, hisca nguehe hisca ngajan ne, cuatjin ha tu ñahñu scutsejen ná xuta tséhë yëjë ni ladu hya xi cuechú nixtin xi cuinduva nga ngahan xi Quihndi rë Xuta Jain ngahan. ²⁵ Peru chaja sa xi cuechú nixtin vëhë ne, hatuxa meje rë xi jemu cjín cjuanñihi cuátju cuma, hacuahsa xuta xi siu nixtin vihi ne, tsitjungui ná me. ²⁶ Sacuatjin casahmi xuta nixtin hya xi cavéjña xutachanga naja Noé ne, hacuanitjin ni sahmi xuta hya xi ngahan cuinduva. ²⁷ Nixtin rë Noé vë ne, jinë jihvi xuta, vixan me, tsinguixan me quihndi rë me. Cuatjin sahmi cuaha me hisca nixtin xi cavisehen Noé cahntsua barcu, hacuahsa casesuntë nandá, hane ngajan café yëjë xuta cahme me. ²⁸ Hacuanitjin ni xcusun vëhë casahmi xuta nixtin hya

xi cavéjña ngu xutachanga xi hmí rë Lot: jinë hvi me, vatsë me, viteña me, vincha me tjë, hacuahsa sahmi me ndihya. ²⁹ Peru nixtin xi cavetju Lot tséhë nandya Sodoma ne, cavixu ndihi tséhë ngahnga, hacuahsa cavixu ndyojo xi yaha rë ndihi, sacuahsa xi cavaha ngu tsihñu, hane ngajan café yëjë xuta cahme me. ³⁰ Hacuahsa cuanitjin ni sahmi xuta hya xi cuinduva ngahan xi Quihndi rë Xuta Jain ngahan.

³¹ Nixtin hya ne, xuta xi hinchasun me rcu ndava me ne, mé tséhë me xi siu cahntsua ndihya ne, miji rë xi cuitujne me cjue jaha me. Hacuahsa ha chuva vëhë ni ne, xuta xi siutahá me nguñña ne, miji rë xi cuya cjue me ndava me. ³² Ninguitsjun sacuahsa xcusun xi cavatju nima chjuun rë Lot. ³³ Yo xi meje cjuenduju cojo ngasunhndë rë cojo ngahñu rë suvá ne, cuechintaain cjuahñu xatsë; peru yo xi cuatju cjuanñihi o hisca cueya ngatsë naha ne, vëhë xi cuechútáha cjuahñu xatsë.

³⁴ Nguehe cuichjá cojo nuju ta nguixun nixtin hya ne, jo xuta cuiyujufë tangun me ngu nachan. Ngu me ne, chjaháxin rë me, hane me xingu jan ne, cuejña me. ³⁵ Hacuahsa jo nga yachjin ne, cuiyujutahá na coho na. Ngu na ne, chjaháxin rë na, hane na xingu jan ne, cuejña na. ³⁶ Hacuahsa jo nga cha ne, cuiyujutahá cha nguñña. Ngu cha ne, chjaháxin rë cha, hane cha xingu jan ne, cuejña cha. —Cuatjin xu cachja Jesús.

³⁷ Hane xuta ladu rë me ne, cuitjin xu cavinenguise rë me:

—¿Hane jani cuma xcusun vëhë ni, tatá? —Cuatjin xu cavinenguise me.

Sehe ngajan xi Jesús ne, cachja xu me ngu ejemplu cuitjin:

—Hiscan jiña chu xi cahme ne, hacuahsa ngajan matangun chu lote. —Cuatjin xu cachja Jesús.

**Ejemplu tsëhë chjuun
cahan cojo juez tsehen**

18 Hacuaha cachja sa xu Jesús ngu ejemplu cojo xuta ladu rë me xi sua me cumachaya rë xi meje rë xi yasen ni ne, sahmi me oración rë me, miji rë xi sahmi chúva cacun me. ²Cuitjin xu cachja me:

—Cuejña ne xi ngu nandya jan ne, tjin ngu juez xi tsacjuin rë Nina hacuaha faharcuaain rë xuta. ³Hacuaha nandya jan ne, tacun ngu chjuun cahan. Hane nchunchujun ni quiji na xcun juez jan ne, cachja na cuitjin: “Meje ná xi nihñucundun jyé xi vincha xuta tsahan.” Cuatjin cachja na. ⁴Peru juez jan ne, jemu jyé nixtin xi mijí sahmicuenda me tsëhë na. Peru xi camá ngascan ne, cuitjin catsingataha cacun me: “Handasa tsacjuun Nina hacuaha faharcuun xuta ne, ⁵peru ngatsë rë xi jemu tisuaxti na cahan vi ngahan ne, vëhë xi cjuahácuenda cjuacjintacun rë na, sá tsajin ne, jemu tsijenda na ngahan xi ngajan cjui ngajan nduva na.” Cuatjin xu catsingataha cacun me.

⁶Sehe ngajan xi Nai naja ne, cachja sa xu me cuitjin:

—Chutsujun hacutjin chja juez tsehen vë. ⁷Nina ne, ¿hacuiin hatuxa cjuahacuenda me cjuacjintacun rë xuta xi cavaxijin me, xi nguixun nguitajñu fehya rë me xi cjuahacuenda me tsëhë? ¿Há jemu cuindeya cjuahacuenda me? ⁸Nguehe cuichjá cojo nuju ta Nina ne, ngutjen ni cjuahacuenda me. Peru hya xi cuinduva nga ngahan xi Quihndi rë Xuta Jain ngahan ne, ¿há tjin xuta xi man-gucacun cojo ná guehe ngasunhndë? —Cuatjin xu cachja Nai naja.

**Ejemplu tsëhë oración rë cha fariseo
cojo oración rë cha faha tujúnsa**

⁹Hacuaha siu sa xu ngujo xuta xi tsingataha cacun suvá me xi tsajin jyé rë me

xcun Nina hacuaha sahmi xta me cojo xuta xi yahnga. Hane xuta xi cuacun vë ne, cuitjin xu cachja Jesús ngu ejemplu cojo rë me:

¹⁰—Cuejña ne xi jo cha jan ne, quiji cha yungun xi matitjun xi sahmi cha oración rë cha. Ngu cha ne, cha fariseo cha, hane cha xingu ne, cha faha tujúnsa cha. ¹¹Cha fariseo jan ne, cavisecon cha casahmi cha oración rë cha cahntsua xahasen ni rë cha, cachja cha cuitjin: “Ngayun Nina, suá nacuechji nuju ta ngahan ne, hacuiin tangun ngahan cojo jingu sa cha xi ndacha cha, tsehen cha, tsindesu cha cojo jingu sa chjuun, hacuaha hisca tanguaain ngahan cojo cha faha tujúnsa vi. ¹²Sahme xun naha jo ndiya xi ngu totje, hacuaha vátëcja të cahndé tsëhë yëjë ni xi sacu ná, hane suá nuju ngu cahndé.” Cuatjin casahmi cha fariseo oración rë cha. ¹³Peru cha faha tujúnsa ne, hitsë ni cjin secun cha, hacuaha hisca cavuyaain cavutsejen cha ngahnga ta tu cavisansetsja ni cha rcu cha, cachja cha cuitjin: “Ngayun Nina, catamayuma nuju ngahan xi jemu tjin jyé naha.” Cuatjin cachja cha. ¹⁴Cuichjá cojo nuju ta cha faha tujúnsa jan ne, xi tu cavuya cafe cha ndava cha ne, ha café jyé rë cha xcun Nina, peru cha fariseo jan ne, hacuiin cuatjin café jyé rë cha. Cuatjin camá ta, tsëhë xi yëjë xuta xi sahmi yehe suvá me yojo rë me ne, cuechú nixtin xi Nina ne, tsinguijne me cjuatacun rë. Hane xuta xi tsinguijne suvá me yojo rë me ne, Nina ne, sahmi jyé rë me. —Cuatjin xu cachja Jesús.

Catsinchacun Jesucristu nixti

¹⁵Hacuaha cjuicojo xu xuta nixti rë me hiscan tacun Jesús xi cuisansetsja me nixti jan. Peru hya xi cavëë xu xuta ladu rë Jesús xi cuatjin cjui xuta cojo nixti rë me ne, cavatëcja xu me cjuatacun rë xuta jan. ¹⁶Peru Jesús ne, cajindaya xu me nixti jan xi cjuetjengui rë me, sehe nga-

jan xi cachja xu me cojo xuta ladu rë me cuitjin:

—Tuhun rë nixti cahndé catinduva tjengui ná. Xicanichuun rë cahndé ta, tsêhë xi nixti xi cuacun ne, hatuxa visehen ngajan hiscan xi sahmi Nina gobiernu. ¹⁷ Cuichjá cojo nuju cjuaquixi ta suvá ni xuta xi tsingatihin me xi sahmi Nina me gobiernu sacuatjin tsingatihin nixti ne, me vëhë ni xi cuisehen me hiscan xi sahmi Nina gobiernu. —Cuatjin xu cachja Jesús.

Jemu chja cuisehen xuta nchina ladu rë Nina

¹⁸ Ngu xuta xi matitjun ne, cavinenguise xu me Jesús cuitjin:

—Ngayun Maestro, jemu ndaja ngayun. ¿Mé xi meje rë xi sahme cojo sa xi sacú ná cjuahñu xatsë? —Cuatjin xu cachja me.

¹⁹ Sehe ngajan xi Jesús ne, cuitjin xu cafayangui me:

—¿Mé má cuatjin nújun xi ndaja ngahan? Tsajin yo xi ndaja. Ngu ni Nina xi ndaja me. ²⁰ Ngayun ne, ha hyun hacutjin chja ley rë Nina xi chja cuitjin: “Xicanihñuu cjuatsehen cojo rë ngu chjuun o cojo rë ngu xihin xi hacuiin tsujun, xicanicuun xuta, xicanihñuu cjuachëjë, xicanujuun cjuandesu tsêhë xuta, chjuhuncun nahmi nuju hacuaha chjuhuncun na nuju.” —Cuatjin xu cachja Jesús cjuarë ley rë Nina.

²¹ Hane ngajan xi xuta xi matitjun jan ne, cuitjin xu cachja me cojo Jesús:

—Yëjë cjuarë vëhë ne, ha cahndé tsêhë hisca cjualihndi naha. —Cuatjin xu cachja me.

²² Hane xi cahndé xu Jesús cjuarë me ne, sehe cachja xu me cuitjin:

—Tjin sa ngu cjuarë xi machaja nuju: yëjë ni xcusun xi tjin nuju ne, titeñu, hane sehe tichuncun tujún rë ngajñi rë xuta yuma. Hane xi cuatjin nihñu ne, jemu jyë cjuanchina sacú nuju ngajan

ngahnga. Hane xi cjuë cuichuncun tujún vëhë ne, sehe nduvun tisecun ná. —Cuatjin xu cachja Jesús.

²³ Peru xi cahndé xu xuta xi matitjun jan cjuarë xi cachja Jesús ne, jemu va camá cacun me, tsêhë xi jercu nchina camahani me. ²⁴ Hane xi vutsejen xu Jesús xi jemu va camá cacun xuta xi matitjun jan ne, sehe cachja xu me cuitjin:

—Jemu chja xi ngu xuta xi tjin rë me cjuanchina cuisehen me hiscan sahmi Nina gobiernu. ²⁵ Ha hitsë sa chjaain cuatju ngu chu camellu ngojo rë ngu nindu xi cuma rë xi cuisehen ngu xuta nchina hiscan sahmi Nina gobiernu. —Cuatjin xu cachja Jesús.

²⁶ Ngajan xi xuta xi cahndé me cjuarë jan ne, cuitjin xu cachja me:

—Sá cuatjin ne, ¿yo xi cuma cuetjutje ni? —Cuatjin xu cachja me.

²⁷ Hane Jesús ne, cuitjin xu cafayangui me:

—Yëjë ni xi maji sahmi xuta ne, Nina ne, hatuxa ma sahmi me. —Cuatjin xu cafayangui Jesús.

²⁸ Ngajan xi Pedru ne, cuitjin xu cachja me cojo Jesús:

—Chutsujun ni. Ngayin ne, ha canismitacuñ yëjë ni xcusun xi tjin niji, hane tivisequin nuju. —Cuatjin xu cachja Pedru.

²⁹ Hane Jesús ne, cuitjin xu cachja me:

—Cuichjá cojo nuju cjuaquixi ta yëjë xuta xi tsismicacun me ndava me, tsismicacun me chjuun rë me, tsismicacun me xicjin me, tsismicacun me xutacha rë me, tsismicacun me quihndi rë me, xi cjuetjengui me ndiya rë Nina ne, ³⁰ hatuxa cjin sa cahndé sacú rë me xi cuma sacuaha ndava me, hacuaha hatuxa cjin sa xuta sacú rë me xi cuma sacuaha xuta rë me, quihndé xi siu me ngasunhndé vihi, hane hya xi cueya me ne, sacú rë me ngu cjuahñu xatsë. —Cuatjin xu cachja Jesús.

Camá jyan ndiya cachja Jesucristu xi cueya me

³¹Hya xi camá xu ne, quijicojoxin Jesús tejó xuta ladu rë me, sehe cachja xu me cojo cuitjin:

—Quihndë ne, tivanguen Jerusalén. Hane xi cjuehen jan ne, cuetjucaa yëjë sacuatjin catsihindu profeta tsahan, ngahan xi Quihndi rë Xuta Jain ngahan. ³²Ngahan ne, cuma ngahan entregadu tsja xutaxín, cuejnucëë ná xuta, choho cuichja me tsahan, cuëhënatya ná me. ³³Hane xi cjuë cuaja ná me ne, sehe tsiquehen ná me. Peru xi ma jyan nixtin ne, cúya nga cjuahñu. —Cuatjin xu cachja Jesús.

³⁴Peru xuta ladu rë me jan ne, hiscan ngu xu cjua vëhë cajni rcu me ta tjihma cjuatacun vëhë xi cuma rë me. Vëhë xi hvín xu me mé vijne cjua xi cachja Jesús jan.

Casahmi Jesucristu xi camatsejen nga rë ngu cha rcá ngajan Jericó

³⁵Hya xi camá ne, xi camatiña xu Jesús tsëhë nandya Jericó cojo xuta ladu rë me ne, ngajan tacun xu ngu cha rcá tjeheh ndiya, fehya cha caridad. ³⁶Hane xi cahndë cha xi jercu cjín xuta fane ntsacu me ne, sehe cavinenguise xu cha mé jima jan. ³⁷Hane tjin xu yo cachja cojo cha xi Jesús tsëhë nandya Nasaret tivatju me cojo xuta ladu rë me. ³⁸Hane cha rcá jan ne, cuitjin xu cajindaya cha cachja cha:

—¡Ngayun Jesús, tjë rë David! Catamayuma nuju ngahan. —Cuatjin xu cachja cha.

³⁹Hane xuta xi cjui titjun jan ne, cavisiajmi cjan xu me cojo cha xi sejyu cha. Peru cha vëhë ne, hitsë sa jercu cajindaya xu cha cachja cha, cuitjin cachja cha:

—¡Ngayun tjë rë David! Catamayuma nuju ngahan. —Cuatjin xu cachja cha.

⁴⁰Ngajan xi Jesús ne, xi casecunhñu xu me ne, sehe cavitexa me xi cuinduva cojo xuta cha rcá jan hiscan xi secun me. Hane xi camatiña cha tsëhë Jesús ne, sehe cavinenguise xu me cha cuitjin:

⁴¹—¿Mé xi meje nuju xi sahme cojo nuju ni? —Cuatjin xu cavinenguise me.

Sehe ngajan xi cha rcá jan ne, cuitjin xu cachja cha:

—Tatá. Meje ná xi cuma tsejen nga ná. —Cuatjin xu cachja cha.

⁴²Hane Jesús ne, cuitjin xu cachja me cojo cha:

—Catamatsejen nga nuju. Ngayun ne, camandaja túxcun ta, tsëhë xi camangutacún cojo ná. —Cuatjin xu cachja Jesús.

⁴³Hane ha hora vëhë ni ne, camatsejen nga xu rë cha. Sehe quiji xu cha cojo Jesús táha sahmi jyë sahmi hnga cha Nina. Hane xi cavëë yëjë xuta xcusun xi camá jan ne, jemu cavaxëndaja xu me Nina.

Jesucristu cojo cha Zaqueo

19 Hya xi camá ne, cavisehen xu Jesús nandya Jericó xi cuatju me vasencia nandya. ²Hane ngajan tacun xu ngu cha xi hmí rë Zaqueo, ngu cha xi matitjun tsëhë cha faha tujúnsa, hacuaha jemu nchina cha. ³Hane cha vëhë ne, jemu meje scuëë xu cha yo xi Jesús, peru camaji ta, tsëhë xi jercu cjín camahani xuta quitsë me, hacuaha cha vëhë ne, jemu patú xu cha. ⁴Hane xi cavangatitjun cha ne, quiji camiji xu cha ngu ya jyë, cojo sa xi cuma scuëë cha Jesús ta, tsëhë xi hatuxa ngajan cuatju me. ⁵Hane xi cafehe xu Jesús jan ne, sehe cavuya cavutsejenniji me rcu ya hiscan quisun cha ne, sehe cachja xu me cojo cha cuitjin:

—Zaqueo, nduvunju sání ta, tsëhë xi sahmi ná ngu jyë xi ndya nuju cuitejña quihndë. —Cuatjin xu cachja me.

⁶Ngajan xi cha Zaqueo ne, marcu mac-jain xu cavitujne cha, cafahatsja cha Jesús cojo yějě ni cjuasua, quijicojo cha me ndava cha. ⁷Hane xi cavěě yějě xuta xi cuatjin casahmi Jesús ne, sehe cachjahma xu me cojo xicjin me cuitjin:

—Quiji cavějña me cojo ngu cha tse-hen. —Cuatjin xu cachjahma me.

⁸Hya xi camá ne, xi ha tacun Jesús ndava cha Zaqueo ne, cavisatjenhnga xu cha, sehe cachja xu cha cojo Nai naja cuitjin:

—Chutsujun ni, tatá. Vasentjin tsěhě yějě ni xcusun xi tjin ná ne, suá rě xuta yuma. Hane sá xi tjin yo xi cavaxě rě tujún cojo cjuandacha ne, ñuju cuatjin sacuatjin xi cafahá ne, tsicúya tsěhě me. —Cuatjin xu cachja cha.

⁹Ngajan xi Jesús ne, cuitjin xu cachja me:

—Quihndě ta cuatjin ne, ngayujun ni tsěhě ndihya vihi ne, cavetjuntjun ta, me xi cuijyihi vi ne, hacuaha cojo me má me xuta ladu rě Nina. ¹⁰Hane ngahan xi Quihndi rě Xuta Jain ngahan ne, canduvá xi cuanguesě hacuaha cuaxětjě xuta ladu rě Nina xi cachajá me tsěhě ndiya rě Nina. —Cuatjin xu cachja Jesús.

Ejemplu tsěhě tujún xi casua nai rě hndixahan

¹¹Xi tu cajnetaha cavisinuju xuta cjua věhě ne, Jesús ne, cachja sa xu me ngu ejemplu cojo xuta jan ta, tsěhě xi tiña siutahá me cojo nandya Jerusalén, hane má xu rě xuta ta ha hisca tacun xati xi cuinduva Nina sahmi me gobiernu.

¹²Hane cuitjin xu cachja me:

—Cuejña ne xi ngu xuta chacun jan ne, quiji me ngu nangui cjin, xi cjua-haxa me xi cumatitjun me tsěhě estadu rě me, sehe cuya nga me. ¹³Hane chaja sa xi cjue me ne, cajindaya me tě hndixahan rě me, sehe casua rě me jima ngu hndixahan jan tujún. Sehe cachja me cojo cuitjin: “Nihñu xa cojo tujún vihi

jinguyějě rě xi cjuě sehe cúya.” Cuatjin cachja me. ¹⁴Peru xuta tsěhě estadu rě me ne, jemu choho věě rě me. Věhě xi hya xi ha quiji xuta chacun ja ne, catsin-gatju xuta estadu rě me jan ngujo cha xi cuichja cha cuitjin cojo xuta xi suaxa rě xuta chacun jan: “Mamijí niji xi me xi cuajyihi vě cumatitjun me tsijin.” Cuatjin cuichja cha. ¹⁵Hya xi camá ne, xi cavuya xuta chacun jan xi cafě cafahatsja me xa ne, cavitexa me xi chjindaya rě cha hndixahan rě me xi casua rě me tujún jan, cojo sa xi sua cha cumachaya rě me há cjin cavesun rě cha jima ngu cha xi casahmi cha xa cojo tujún xi casua me cha. ¹⁶Hane cha hndixahan xi canduva titjun ne, cuitjin cachja cha: “Tatá. Sacuatjin tujún xi catuhun ná ne, cavesun ná tě cuatjin sa.” Cuatjin cachja cha. ¹⁷Sehe ngajan xi nai rě hndixahan jan ne, cuitjin cachja me cojo: “Ndatjin ri. Ngaye ne, ngu hndixahan ndaja ngaye. Ngatsě rě xi jemu ndaja canihñi xa xi chúva vě ne, suá ri tě nandya xi cumatitjun ngaye tsěhě.” Cuatjin cachja me. ¹⁸Hane xi canduva cha xi majo ne, cuitjin cachja cha: “Tatá. Sacuatjin tujún xi catuhun ná ne, cavesun ná hñú cuatjin sa.” Cuatjin cachja cha. ¹⁹Hane nai rě hndixahan jan ne, cuitjin cachja me: “Ngaye ne, cumatitjun ngaye tsěhě hñú nandya.” Cuatjin cachja me. ²⁰Hya xi camá ne, xi canduva nga ngu cha ne, cuitjin cachja cha: “Tatá. Cuajyihi tujún xi catuhun ná nguehe. Tujún vi ne, cavinchándaja cahntsua ngu pañutu ta, ²¹tsěhě xi tsácjun nuju. Ta ngayun ne, jemu hñu cjua nuju. Tangun ngayun cojo ngu xuta xi fanga me handasa hacuiin me věhě catsitjě me ta, tsěhě xi ngayun ne, hacjahi sahmi xa ne, ngayun chjuhunnunsun chji rě.” Cuatjin cachja cha hndixahan věhě. ²²Ngajan xi xuta chacun jan ne, cuitjin cachja me cojo hndixahan věhě: “Ngaye, hndixahan tsehe ne, cojo cjua riji sove ni tsichúva ri. Ngaye xi noje xi hye xi jemu

hñu cjuá naha, hacuaha tangun ngahan cojo ngu xuta xi fanga me handasa hacuiin me catsitjê me, tsêhê xi ngahan ne, hacjahi sahmi xa ne, ngahan fahántsa chji rê. ²³ Sá xi hye xi cuatjin ne, ¿mé má hacuiin xcun bancun cahmi chani tujún xi casuá ri, cojo sa xi hya xi cjuêhê ne, cúya cjuahántsa tujún naha, peru cojo quihndi rê ni?" Cuatjin cachja xuta chacun jan cojo hndixahan rê me. ²⁴ Sehe cachja sa me cojo ngujo hndixahan rê me xi hinchacun jan cuitjin: "Chjuhuntuhun tujún xi yaha cha vê ne, sehe tuhun rê cha xi cavesun rê të cuatjin sa sacuatjin tujún xi casuá rê." Cuatjin cachja xuta chacun jan. ²⁵ Hane hndixahan jan ne, cuitjin cafayangui: "Tatá. ¡Peru cha vêhê ne, ha tjin rê cha të cuatjin sa!" Cuatjin cachja cha. ²⁶ Ngajan xi xuta chacun jan ne, cuitjin cachja me: "Nguehe cuichjá cojo nuju ta yêjê xuta xi cavesun rê me xcun xi ha tjin rê me ne, suá sa rê me. Hane xuta xi tsajin mé cavesun rê me ne, hisca xi tjin rê me ne, cjuahátahá. ²⁷ Hane sacuaha condra naha xi mijí rê xi ngahan cumatitjun ngahan tsêhê ne, tán-gun chjuhun, nduvuncujun guehe, sehe nicuhun guehe xcún." Cuatjin cachja xu xuta chacun xcun ejemplu xi cachja Jesús.

Cafehe Jesucristu nandya Jerusalén

²⁸ Hya xi camá xu ne, xi cavatju cachja Jesús cjuá vêhê ne, sehe cavetju me quiji sa xu me xi cjuehe me Jerusalén. ²⁹ Hane hya xi camatiña me tsêhê nandya Betfajé cojo nandya Betania, nandya xi siu tiña tsêhê ndetjún xi hmí rê Ndetjún Olivu ne, sehe catsingatju xu me jo xuta ladu rê me xi cjue tixa rê me, ³⁰ hane cuitjin xu cachja me:

—Tángun nandya xi tsejen tacun vê. Hane xi cjuhun jan ne, ngajan cuechuntuhun ngu chu burru xatsê, xi hisca ngu cjêê cuijin rê chu, tjihñu chu. Hane chundecjun chu, nduvuncu-

jun chu. ³¹ Hane sá xi yo cjuinenguise nuju mé má cuatjin chundecjun chu ne, sehe tinújun cuitjin: "Nai niji meje rê me chu." Cuatjin tinújun. —Cuatjin xu cachja Jesús.

³² Hane me xi casatêxa rê jan ne, quiji xu me, hane cavetjucaa jain sacuatjin cachja Jesús cojo rê me. ³³ Hane jinguyêjê rê xi tivundecja me burru jan ne, nai rê chu ne, cuitjin xu cachja me:

—¿Mé má cuatjin chundecjun burru vê? —Cuatjin xu cachja me.

³⁴ Hane xuta ladu rê Jesús jan ne, cuitjin xu cafayangui me:

—Nai niji meje rê me chu. —Cuatjin xu cachja me.

³⁵ Sehe quijicojo xu me chu hiscan tacun Jesús. Hane caviyujusun me tsjian rê me ngaxtun chu, sehe catsiquijin xu me Jesús burru jan. ³⁶ Hane xi cjuí Jesús quisun me burru jan ne, táha ticandi xu xuta tsjian rê me hiscan cjuí Jesús. ³⁷ Ngajan xi xi jima tiña xu Jesús cojo yêjê xutacjín jan nandya Jerusalén, hiscan xi cafaha rê xi ha cuitsingaxten ndiya tsêhê Ndetjún Olivu ne, yêjê ni xutacjín xi xuta ladu rê Jesús jan ne, jercu ndama xu rê me, hisca cavetsihin cajindaya me cachja me xi cavaxëndaja me Nina tsêhê yêjê ni cjuarcun xi cavêê me. ³⁸ Cuitjin xu cachja me:

—Jemu catsinchacun Nina me xi nduva vi xi cuma titjun tsajan, tsêhê xi Nina catsingatju rê me. Ngahnga ne, hatuxa jemu tjin cjuandaja cjuajeya, hacuaha Nina ne, hatuxa jyê hnga me cojo Hasen rê me. —Cuatjin xu cavaxëndaja xuta Nina.

³⁹ Hane ngujo cha fariseo xi hinchajñi ngajñi rê xutacjín jan ne, cachja xu cha cojo Jesús cuitjin:

—Maestro, tichuncjun cjuá xi tichja xuta ladu nuju vê. —Cuatjin xu cachja cha.

⁴⁰ Hane xi cafayangui Jesús ne, cuitjin xu cachja me:

—Nguehe cuichjá cojo nuju ta sá xi xuta xi cuicun vi sejyu me ne, ndyojo vi cuetsihin squindaya cuichja nga. —Cuitjin xu cafayangui me.

⁴¹ Hane xi camatiña sa xu Jesús tséhë Jerusalén ne, xi cavëë me nandya jan ne, cajiñda xu me ngatsë rë. ⁴² Sehe cachja xu me sacuaaha xi tichja me cojo xuta Jerusalén, cuitjin xu cachja me:

—¡Sá mé ni xi hacuaha cojo ngayun hyun cjuatacun xi yaha cjuandaja cjuajeya! Peru quihndë matsejen ne, cjuatacun vëhë matsejen ne, jiyahma xi cuma nuju. Vëhë xi hyúun. ⁴³ Peru cuechú nixtin xi yëjë ni condra nuju matsejen ne, sahmi me nguýë xi cuma cuisehen me nandya nuju, xinchandee nuju me yëjë ni ladu xi cuinchahñu nuju me. ⁴⁴ Tsixujne me yëjë ni ndihya tséhë nandya nuju, tsicanguin me hisca ngu ndyojo xi tinecoo, hacuaha tsiquehen nuju me ngayujun ni xi nechun nandya nuju. Cuatjin cuatjun cuma matsejen ta, tséhë xi ngayun matsejen ne, cajnii rcun hya xi cafehe Nina xi cuaxëtje nuju me. Cuatjin xu cachja Jesús.

Cavaxë Jesucristu xuta tsehen tséhë ndatsen yungun

⁴⁵ Hane xi cafehe me nandya Jerusalén ne, sehe quiji xu me yungun xi matitjun. Hane xi cavisehen me ndatsen yungun jan ne, cavetsihin cavaxë me xuta xi sahmi ndetsin jan. ⁴⁶ Cuitjin xu cachja me:

—Cuitjin camahindu xcun xujun rë Nina sacuatjin xi cachja me: “Ndya naha ne, vejña xa xi cjue xuta sahmi me oración rë me.” Cuatjin chja Nina. Peru ngayun ne, tiniñuxun cojo sacuaaha ngu cahndé hiscan xi matangun xuta chëjë. —Cuatjin xu cachja Jesús.

⁴⁷ Hya xi camá ne, nchunchujun xu ni quiji Jesús cavicuya me xuta ngajan ndatsen yungun xi matitjun. Hane

yëjë ni nahmi xi matitjun cojo yëjë cha xi vicuya cjuachacun cojo yëjë sa xuta xi matitjun ne, jemu cavangui xu me chuva rë xi tsiquehen me Jesús, ⁴⁸ peru casacuinyiin xu rë me mé sahmi me ta, tséhë xi yëjë ni xuta ne, tivisiñuju xu me cjua rë Jesús nguñaja cacun me.

Cavinenguise xuta cojo Jesucristu yo cavitexa rë me

20 Cuitjin camá xu ngu nixtin hya xi tivicuya Jesús xuta hacuaha tisua me jimachaya rë cjuandajyihi rë Nina ngajan ndatsen yungun xi matitjun. Hacuaha camatangun xu nahmi xi matitjun cojo cha xi vicuya cjuachacun cojo xuta changá, ² hane cuitjin xu cavinenguise me Jesús:

—Tinújun cojo niji ne, ¿yo cavitexa nuju xi cuatjin nihñu? ¿Yo casuaxa nuju? —Cuatjin xu cavinenguise me.

³ Hane xi cafayangui Jesús ne, cuitjin xu cachja me:

—Hacuaha cjuinenguësë nuju ngu cjua, hane chjayunnun tsahan: ⁴ ¿Yo cavitexa rë Juan xi cuitenda me xuta? ¿Há Nina ne, o há tsajin ne, há xuta? —Cuatjin xu cachja me.

⁵ Sehe ngajan xi xuta xi cuacun jan ne, cavisiajmicjín me ngajñi rë me, cachja xu me cuitjin:

—Sá xi cuinújan xi Nina cavitexa me cha Juan vë ne, cjuinenguise naja me: “¿Mé má camacjaain naja cha?” ⁶ Hane sá xi cuinújan xi xuta cavitexa rë cha ne, yëjë ni xuta ne, tsiquehen naja me cojo ndyojo ta, tséhë xi yëjë ni xuta ne, ha macjain rë me xi cha vëhë ne, profeta cha. —Cuatjin xu cavisiajmicjín me.

⁷ Ngajan xi xuta xi cuacun jan ne, cachja me xi hvíin me. ⁸ Sehe ngajan xi Jesús ne, cuitjin xu cachja me:

—Sá cuatjin ne, ngahan ne, hacuaha cuichjaan cojo nuju yo cavitexa ná xi cuitjin sahme. —Cuatjin xu cachja Jesús.

Ejemplu tsëhë cha sahmixa xi jemu tsehen cha

⁹ Hya xi camá ne, cavetsihin cachja xu Jesús cojo yějë ni xuta jan ejemplu vihi:

—Cuejña ne xi ngu me jan matsejen ne, catsitjë me xcun nangui rë me xca rë uva. Sehe casua me ngujo cha sahmixa xi cjuahacuenda cha sehe cjuaha tsë tsë me cojo cha. Hya xi camá ne, sehe cavetju me quiji me ngu nangui jemu tsëë camahani. ¹⁰ Hane xi cavechú nixtin rë tutjé jan matsejen ne, sehe catsingatju me ngu mosu hndixahan rë me xi quiji cachja cha cojo cha xi fahacuenda xitjé jan xi sua cha hitsë tutjé xi satë rë me xi casacu rë cha xcun nangui rë me jan. Peru cha xi fahacuenda xitjé jan matsejen ne, tu cavaja cha cha hndixahan jan, sehe catsingatju cha cafe, ndastu mé casua rë cha. ¹¹ Hya xi camá ne, cavuya catsingatju nga me ngu hndixahan rë me. Hndixahan vëhë matsejen ne, jemu cavaja rë cha, jemu choho cachja cha cojo, sehe catsingatju cha cafe, ndastu mé casua rë cha. ¹² Hya xi camá ne, cavuya catsingatju nga me ngu hndixahan xi majyan. Hndixahan vëhë matsejen ne, jemu cavanguihmu rë cha, sehe cavaxëxin cha tsëhë ngajan.

¹³ Ngajan xi nai rë xitjé jan matsejen ne, cuitjin catsingataha cacun me: “¿Mé xi ndatjin sahme quihndë? Ndatjin rë xi tsingátju quihndi naha xi jemu hmú cáacun. Cjuaharcun rë cha, xi quihndi naha.” Cuatjin catsingataha cacun me. ¹⁴ Peru xi cavëë cha xi fahacuenda xitjé jan cha vëhë matsejen ne, sehe cavisiajmicjín cha cojo xicjin cha cuitjin: “Cha vihi ne, quihndi rë me xi cuahatsja cha xitjé vi. Niquen cha, cojo sa xi tsajan cuma nangui vi.” Cuatjin cavisiajmicjín cha. ¹⁵ Hane xi cavaxëxin cha cha tsëhë nangui jan matsejen ne, sehe catsiquehen cha.

‘Xi má nuju matsejen ne, ¿mé sahmi nai rë xitjé jan cojo cha xi cuacun fahacuenda jan? ¹⁶ Cjue tsiquehen me cha, sehe sua me xitjé jan cjuahacuenda jingu sa cha sahmixa. —Cuatjin xu cachja Jesús.

Hane xi cahndë yějë xuta cjuava vëhë ne, cachja xu me cuitjin:

—¿Catamamiji cacun Nina xi cuatjin cuma! —Cuatjin xu cachja me.

¹⁷ Ngajan xi xi cavuya vutsejen Jesús xuta jan ne, cuitjin xu cachja me:

—¿Mé vijne xi cuitjin camahindu xcun xujun rë Nina?:

Ndyojo xi catsitjungui chjinevexo ne, vëhë ndyojo xi cavëjña tjun tjun yuju rë xihndënaña.

Cuatjin camahindu. ¹⁸ Hya xi ngu xuta cjuinenguisun me xcun ndyojo vëhë matsejen ne, cuatëlanga rë me. Hane hya xi ndyojo vëhë cjuinenguisun rë ngu xuta matsejen ne, ña cuma të me. —Cuatjin xu cachja Jesús.

¹⁹ Vëhë xi cha xi vicuya cjuachacun cojo nahmi xi matitjun ne, jemu cavan-gui xu me chuva rë hacutjin cuma xi cjuaha me Jesús hora vëhë ni, tsëhë xi vëë me xi ejemplu xi cachja Jesús ne, condra rë me chja. Peru tsëhë xi tsacjun xu me xuta ne, vëhë xi cafaain xu me Jesús ngutjen.

Cjuacjintacun tsëhë tujúnsa

²⁰ Tu siu xu ni me cuidadu tsëhë cjuava rë Jesús, hisca catsingatju xu me ngujo cha xi tsejen sacuaha xuta ndaja, xi cuanguí cha chuva rë xi cuaxë rë cha Jesús ngu cjuava xi cuaaintjin, cojo sa xi cuma chjahá rë me cjuechani rë me xcun xutaxa rë ndihyavasen. ²¹ Hane cha xi cuacun jan ne, cuitjin xu cachja cha cojo Jesús.

—Maestro, ngayin ne, hyin ta ngayun ne, vicuyun rë xuta cojo cjuaquixi. Hacuaha tangun ni nújun cojo yějë xuta ta, tsëhë xi ngayun ne, hatuxa vicuyun

ndiya rë Nina cojo cjuaquixi. ²² Quihndë ne, sacuahale rë Moisés ne, ¿há sua cahndé xi cuechjen tujún sa naja cojo César, me xi matitjun, o há suaain cahndé? —Cuatjin xu cachja cha.

²³ Peru Jesús ne, tsëhë xi ha vacun rë me xi jemu ndacha cha ne, cuitjin xu cachja me cojo cha:

²⁴ —Ningacun ná ngu tujún. Quihndë ne, ¿yo xcusun rë hacuaha yo ñihi rë xi quitahá xcun tujún vë? —Cuatjin xu cavinenguisse Jesús.

Hane cha xi cuacun vë ne, cuitjin xu cafayangui cha:

—Tsëhë César. —Chja xu cha.

²⁵ Sehe ngajan xi Jesús ne, cuitjin xu cachja me cojo cha:

—Sá xi cuatjin ne, tuhun rë César xi tsëhë me, hane tuhun rë Nina xi tsëhë me. —Cuatjin xu cachja me.

²⁶ Hane camaji cavaxë xu rë cha Jesús ngu cja xi cuaintjin xi cuihndë xuta. Hane xi quiircun xu rë cha tsëhë cja xi cafayangui Jesús ne, tu caviyujyuu xu ni cha.

Cjuachjinenguisse tsëhë xi cuya nima cjuahñu

²⁷ Hya xi camá ne, cafehe xu ngujo cha saduceo hiscan tacun Jesús. Cha xi cuicun vi ne, vicuya cha cjuachacun xi chja xi xuta xi cahme ne, cuyaain nga me cjuahñu. Ngajan xi cha xi cuacun cafehe jan ne, cachja xu cha cojo Jesús cuitjin:

²⁸ —Maestro, Moisés ne, catsihindu me xcun xujun rë Nina xi sá xi ngu xihin cueya, hane tsajin rë chjuun rë hisca ngu quihndi ne, hntsë nima vëhë ne, meje rë xi cjuaha rë chjuun cahah vëhë, cojo sa xi sacú rë na quihndi xi cuma sacuah quihndi rë nima vëhë. ²⁹ Quihndë ne, cuejña xi ngu ndihya ne, siu yatu cha cojo hntsë cha. Hane cha tjun ne, cafaha cha chjuun. Peru cahme cha, hane chjuun rë cha vëhë ne, casacuiin rë na hisca ngu quihndi cojo

cha. ³⁰ Hya xi camá ne, hntsë nima vëhë, cha xi majo ne, cafaha cha na cahan vëhë camá chjuun rë cha na, peru hacuaha cahme cha hane casacuiin rë na quihndi. ³¹ Hacuanitjin ni cafaha cha xi majyan jan na hisca xi caffè yëjë xi yatu cha cafaha cha na. Peru yëjë cha xi cuacun vë ne, caffè cha cahme cha chuva ngu chuva ngu cha. Hane na vëhë ne, casacuiin rë na hisca ngu quihndi cojo cha xi cuacun vë. ³² Hiscan xi cajnetaha ne, na vëhë ne, hacuaha cahme na. ³³ Quihndë ne, hya xi cuya yëjë nima cjuahñu ne, ¿jarë cha xi cuacun vë xi chjuun rë cha na xi cjuaquixi ta, tsëhë xi yëjë ni xi yatu cha ne, camá chjuun rë cha na? —Cuatjin xu cachja cha saduceo cojo Jesús.

³⁴ Sehe ngajan xi Jesús ne, cuitjin xu cachja me cojo cha:

—Xuta xi siu me ngasunhndë quihndë ne, tsinguixan me hacuaha vixan me. ³⁵ Peru xuta xi vechú chuva rë xi cuya me cjuahñu xi ha cuatju cueya me hacuaha sacú rë me cjuahñu xatsë ne, cuixaain me hacuaha tsinguixaain me hya ta, ³⁶ tsëhë xi ha quihndë cueyaain nga me, tsëhë xi tangun cuma me cojo ángel. Hacuaha cuma me quihndi rë Nina, tsëhë xi cuya me cjuahñu. ³⁷ Hacuaha hya xi chutayan cja xi cachja Moisés ngajan hiscan xi catí yanahyá xcuen ne, hya sacu machaya naja tsëhë xi nima ne, cuya cjuahñu ta, tsëhë xi cachja Moisés xi Nina naja ne, Nina rë Abraham, Nina rë Isaac, cojo Nina rë Jacob má me. ³⁸ Peru Nina ne, hacuiin nina rë nima ta nina rë xuta xi quicun me ta, tsëhë xi xi cuma rë Nina ne, yëjë ni xuta ne, quicun me, handasa cahme yahnga me. —Cuatjin xu cachja Jesús.

³⁹ Ngajan xi ngujo cha vicuya cjuachacun ne, cuitjin xu cachja cha:

—Maestro, ndatjin cja xi canújun.

⁴⁰ Cuatjin xu cachja cha ta, tsëhë xi tsacjun xu cha cjuinenguisse sa cha me.

¿Yo tjë rë má me xi catsingatju Nina?

⁴¹ Sehe ngajan xi Jesús ne, cachja nga xu me cuitjin:

—¿Hacutjin má xi cuatjin chja xuta xi me xi tsingatju Nina ne, tjë rë David má me? ⁴² Ta suvá David ne, cachja me cuitjin xcun xujun tsëhë Salmo:

Nina ne, cachja me cojo Nai naha cuitjin: “Tinechin nguehe ladu quixi naha,

⁴³ hisca hya xi yëjë ni xi sahmi ri condra ne, cuiyujú ngahan ngahma gubiernu riji.”

Cuatjin cachja David cjua xi cachja Nina.

⁴⁴ Quihndë ne, sá xi suvá David chja me xi Nai rë me má me xi tsingatju Nina ne, ¿hacutjin má ne xi hacuaha tjë rë me ni? —Cuatjin xu cachja Jesús.

Cachjajyë Jesucristu cojo xuta ladu rë me tsëhë cha vicuya cjuachacun

⁴⁵ Jinguyëjë rë xi tivisiñuju yëjë xuta jan ne, Jesús ne, cachja xu me cuitjin cojo xuta ladu rë me:

⁴⁶ —Xicaninguisuhunñuu cojo cha xi vicuya cjuachacun, xi jemu ndama rë cha xi cuatjin vajá cha tsjian nduju, hora xi fi tsujyihya cha, jemu chuya rë cha xi cuatjin fi chja xuta nina cojo cha ngajan ngajñi ndetsin, hacuaha jemu chuya rë cha xi cuatjin satë rë cha cahndé xi matitjun tsëhë cahntsua yungun, o hiscan ngu ndava suhi. ⁴⁷ Cha xi cuacun vë ne, hacuaha jemu cjín tujún vaxë cha yachjin cahan. Hisca xi chjayuma cha ne, hacuaha jemu nduju hora, peru hacuiin nguñaja cacun cha chja cha. Vëhë xi cha xi cuacun vë ne, hitsë sa jyë castigu cuatju cha xi cuma rë jingusa xuta. —Cuatjin xu cachja Jesús.

Tujún xi cavincha chjuun cahan cahntsua alcancia

21 Ngu nixtin jan ne, jinguyëjë rë xi tivutsejen xu Jesús xi tivincha xuta nchina tujún cahntsua al-

cancia tsëhë cjuandaja rë me cojo Nina ne; ² hacuaha cavëë xu me xi canduva ngu chjuun cahan xi jemu yuma, hane hacuaha cavincha na jo tujún langa cahntsua alcancia jan. ³ Sehe ngajan xi cachja xu Jesús cojo xuta ladu rë me cuitjin:

—Cuichjá cojo nuju cjuaquixi ta na cahan vë xi jemu yuma na ne, hitsë sa vengui chji rë tujún xi cavincha na xi cuma rë tujún xi jemu cjín cavincha yëjë xuta nchina xi cuacun vë ta, ⁴ tsëhë xi me xi cuacun vë ne, tsëhë cjuanchina xi tjin rë me ne, ngajan cavaxë me tujún xi cavincha me. Peru na vëhë ne, handasa jemu tjin rë na cjuachaja ne, hitsë lihndi tujún xi tjin rë na ne, cavincha na yëjë cahntsua alcancia. —Cuatjin xu cachja Jesús.

Cachja Jesucristu xi cuetsun yungun

⁵ Ngu ndiya, hya xi ngujo xuta jan cachja xu me xi yungun xi matitjun ne, jemu ndacun ndyojo camá cojo, hacuaha jercu camaxcuen cojo tu mé ni xcusun cjuatjo xi casua xuta ne, cachja xu Jesús cuitjin:

⁶ —Sacuaha xcusun xi chutsujun vi ne, cuechú nixtin xi hisca ngu ndyojo ndacun xi cuicun vi ne, tsajin hinchasuncoo xicjin ta cjuë yëjë cuixujne. —Cuatjin xu cachja Jesús.

Hacutjin sacú cumachaya naja xi ha meje cuijnetaha nixtin vihi

⁷ Ngajan xi xuta jan ne, cavinenguise xu me cojo Jesús cuitjin:

—Maestro, hane ¿janihya cuetjucaa xcusun vëhë ni? ¿Hacutjin cuma sacú niji cjuaquixi xi xcusun vëhë ne, ha tivechú nixtin xi cuetjucaa ni? —Cuatjin xu cavinenguise me.

⁸ Ngajan xi Jesús ne, cuitjin xu cachja me:

—Nechun cuidado, cojo sa xi hacuiin cuma ndacha ngayun ta, tsëhë xi jemu

cjín xuta cuetjucaa me xi cuichja me xi hacui me xi catsingatju Nina me, hacuaha cuichja me xi ha camatiña nixtin. Peru xicatsanguntjenguun me. ⁹Hacuaha hya xi cuma chaya nuju cjua xi jemu yehe si tijima ngu nación ne, o sá xi tjin cjuatacun xi jemu yehe si nduva ne, xicarcuun ta, hatuxa tjin xi titjun xcusun vëhë cuma. Peru hacuiin ngutjen hya cuijnetaha nixtin vihi.

¹⁰Hacuaha quijinduju sa xu cachja me cuitjin:

—Scaan xuta tsëhë ngu nación cojo jingu sa nación, hacuaha scaan xuta tsëhë ngu nandya cojo ngu nga nandya.

¹¹Hacuaha jemu cjín cahndé xi cjuani nangui, jemu cjín cahndé xi cuatju chñhin vitaha, jemu cjín cahndé xi cuma jindya, hacuaha jemu yehe chir-cun cuma tsejen ngajan ngahnga xi sua cumachaya nuju mé xi cuma.

¹²Peru chaja sa xi cuma yëjë xcusun vëhë ne, xuta ne, tsujyihyatjengui nuju me cojo cjuahngatacun. Cjuaha nuju me cjuecojo nuju me xcun xutaxa rë yungun, hisca cuincha nuju me ndavaya. Cjuecojo nuju me xcun xutaxa rë ndi-hyavasen, hisca xcun gobernador, ngatsë rë xi ladu naha má ngayun. ¹³Xi cuatjin cuatjun cuma ne, vëhë sua nuju cahndé xi ninguiuxun yëjë cjua hacutjin cavicuyá nuju. ¹⁴Tejñungutacún xi hacuiin titjun jemu cjín ningatuhuntacún hacutjin chjayunngun tsëhë xutaxa rë ta, ¹⁵tsëhë xi ngahan suá nuju cjuatacun xi cuinújun ngu cjua xi condra nuju ne, cumaji tsitjungui me hacuaha cumaji cuichja me xi quixiin. ¹⁶Hacuaha hisca xutacha nuju, o sá xi xingun, o sá xi xuta nuju, o sá xi amigu nuju ne, cuinchajyë nuju me. Hacuaha tjin yahnga ngayun ne, hisca tsiquehen nuju me. ¹⁷Yëjë ni xuta ne, choho scuëë nuju me, tsëhë xi ladu naha ngayun. ¹⁸Peru xicamacjiin-tacún ta tsajin camahani mé xi nichu-

jun. ¹⁹Caticaa nuju ta, tsëhë xi cuatjin xi cuetjuntjun.

²⁰Peru hya xi chun xi jemu cjín xuta nduvacjin cuetsihin xinchandee me nandya Jerusalén xi sahmi me ngu si jyë cojo nuju ne, vëhë sua machaya nuju xi camatiña nixtin xi nandya Jerusalén ne, cjuë tsinguetsun xuta nduvacjin vë. ²¹Nixtin hya ne, ngayujun ni xi nechun yëjë nandya tsëhë distritu Judea ne, tiyun tángun hiscan ndetjún. Hacuaha ngayujun ni xi nechun nguehe nandya Jerusalén ne, tetjunxun. Hacuaha ngayujun ni xi nechun ranchun rë Jerusalén ne, xicatsanguun nandya xi naxuntjun yojo nuju. ²²Cuatjin meje rë xi nihñu ta, tsëhë xi nixtin hya ne, sahmi Nina castigu nandya vihi, cojo sa xi xi cuatjin ne, cuetjucaa yëjë hacutjin camahindu xcun xujun rë Nina. ²³Jemu chojyih tsëhë yëjë yachjin xi hinchahma quihndi rë me cojo yëjë me xi tjin rë quihndi vaqui nixtin hya ta, tsëhë xi cuatju ngu cjuandya jyë nación vihi, hacuaha cuatju xuta nguehe ngu castigu. ²⁴Hacuaha jemu cjín xuta nguehe cueya me cojo quicha, hacuaha jemu cjín xuta nguehe tsihñu xuta tsëhë jingu sa nación me sehe tsingatju me me yëjë ni nación. Hane xi cuatju vëhë ne, suvá xutaxín cjue nduva me sunesun me xcun nangui tsëhë nandya Jerusalén, hisca xi cjuë nixtin xi xuta xi cuacun vë cuitexa me nandya Jerusalén vi.

Xcusun xi cuma hya xi cuinduva nga Jesucristu

²⁵Nixtin hya ne, hacuaha cuma tsejen cjuarcun xi cuma xcun tsuhi cojo sá cojo niñú. Hane nguehe ngasunhndé ne, jercu cjín tsingataha cacun xuta tsëhë yëjë ni nación, ña cuya sca me tsëhë xi jercu cjuane ndachacun, hacuaha jercu tsiqijin rë tsindyü rë. ²⁶Yëjë xuta ne, ña cuma ndaya cacun me xi tsacjun me, xi tsingataha cacun me tsëhë chircun xi cuma

nguehe ngasunhndë ta, tsëhë xi hisca ngahñu xi yaja ngahnga ne, cjuiniyaya. ²⁷Sehe hya scuëë xuta ngahan, xi Quihndi rë Xuta Jain ngahan, xi cuinduva ngajñi rë yuffi cojo jemu jyë ngahñu, hisca setí hisca vatë jyíhi ngahan xi cuinduva. ²⁸Hya xi xcusun xi cuacun vë cuetsihin cuma ne, tisechun chutsujun ngahnga ta camatiña nixtin xi cuetjuntjun.

²⁹Xi quijinduju sa cjuavisiajmi rë Jesús ne, cachja xu me ngu ejemplu vihi:

—Quihndë ne, ningatuhuntacún tsëhë yaxujún o sá yahnga sa ya xi vixu xca rë.

³⁰Xi tu chun xi cuetjusehen ya xi cuacun vë ne, ha hyun ta ha camatiña chan tsi. ³¹Hacuaha chuva vëhë ni ne, hya xi chun xi cuetsihin cuma yëjë xcusun xi cachjá cojo nuju vë ne, vëhë sua cumachaya nuju xi ha camatiña nixtin xi nduva Nina sahmi me gobiernu.

³²Cuichjá cojo nuju cjuaquixi ta ngayujun ni xi nechun nixtin vihi ne, hacuiin ngayujun caveyun chaja sa xi cuatju yëjë xcusun xi cachjá cojo nuju jan.

³³Ngahnga cojo guehe ngasunhndë ne, hatuxa cjuë. Peru hisca ngu cju naha ne, tsajin xi cuetjincaain.

³⁴Nechun cuidadu tsëhë xcusun xi nihñu. Xicatuun cahndë xi cjuatacun nuju ne, tsé rë cojo cjuatacun tsëhë cjuachihi, cojo cjuacjintacun tsëhë xcusun xi mameje nuju xcun ngasunhndë nuju, sá tu tsajin tjin chjine ngayun hya xi cuechú nixtin vëhë, ³⁵sacuatjin tsajin tjin chjine ngu chu hya xi finenguisun rë chu chen. Vëhë xi nechun cuidadu ta, tsëhë xi hatuxa cuechú nixtin vëhë, hya xi sahmi Nina gobiernu yëjë ni xuta jingujyë ni ngasunhndë. ³⁶Nechun cuidadu. Yasen ni chjahyun rë Nina xi cuechú chuva rë xi cuetjuntjun tsëhë yëjë ni cjuacjintacun xi ha tu hora sa xi cuinduva. Hacuaha chjahyun rë Nina xi cuma cuetjunndujun hora xi cuisechun xcún xi cjuaháchuva nuju

cojo cjuatacun nuju, ngahan xi Quihndi rë Xuta Jain ngahan. —Cuatjin xu cachja Jesús.

³⁷Nguinixtin ne, ndatsen yungun xi matitjun xu véjña Jesús vicuya me xuta. Hane nguixun ne, vetju xu me fi véjña me ndetjún xi hmí rë Ndetjún Olivu.

³⁸Hane yëjë ni xuta ne, tajñu tajñu xu ni fi me yungun jan xi cuisinuju me cju a xi vicuya Jesús.

Camachihin cju hacutjin xi chjahá rë Jesucristu

22 Hya xi camá xu ne, camatiña suhi tsëhë pan xi hacuiin cojo san rë pan má, suhi xi hmí rë Pascua. ²Hane nahmi xi matitjun cojo cha vicuya cjuachacun ne, jemu tivangui xu me chuva rë hacutjin xi tsiquehen me Jesús. Peru táhahma xu tisahmi me xcusun vëhë ta, tsëhë xi tsacjun xu me xuta.

³Hya xi camá xu ne, Satanás ne, cavisehen xu cahntsua xahasen rë Judas, cha xi hacuaha hmí rë Iscariote, ngu cha ngajñi rë me xi tejó xi má ladu rë Jesús. ⁴Ngajan xi Judas jan ne, quiji cavisiajmicjín xu cha cojo ngujo nahmi xi matitjun cojo ngujo cha mayu yungun hacutjin cuma xi cjuaha xuta xi cuacun vë Jesús. ⁵Hane nahmi xi matitjun cojo mayu jan ne, jemu ndaja camá xu rë me, hisca caviyuju cacun me xi sua me cha tujún. ⁶Hane Judas ne, cojo cjuatacun vëhë ne, camangu cacun cha, sehe ngajan xi cavangui xu cha ngu hora xi tsajin cjín xuta, xi sahmi cha entregadu Jesús cojo xuta xi cuacun jan.

Hacutjin cajnë Jesucristu tsëhë suhi rë Pascua

⁷Cavechú xu nixtin tsëhë suhi rë pan xi hacuiin cojo san rë pan má, nixtin hya xi meje rë xi cueya chu tsánga. ⁸Sehe ngajan xi Jesús ne, catsingatju xu me Pe-

dru cojo Juan ngu tixa, hane cuitjin xu cachja me:

—Tángun tuhunchjinu xi xinënguix-uun tsêhê suhi. —Cuatjin xu cachja me.

⁹Sehe ngajan xi me xi cuacun jan ne, cavinenguise xu me Jesús cuitjin:

—¿Hane jani meje nuju xi cuihinchjini ni? —Cuatjin xu cavinenguise me.

¹⁰Hane Jesús ne, cuitjin xu cachja me:

—Chutsujun ni, xi cjuhun tjehe nandya jan ne, ngajan cuechuntuhun ngu cha xi yaniji ngu nisa nandá, hane tánguntjengun cha hisca xi cjuhun ndihya hiscan cjui cha, ¹¹sehe tinújun cojo nai rê ndihya jan cuitjin: “Cuitjin cjua xi catsingatju maestru tsujun: ¿Jarê cuarto xi tuhun, sehe ngajan sínê niñu tsêhê suhi cojo xuta ladu naha?” Cuatjin tinújun cojo rê me. ¹²Hane me vêhê ne, tsingacun nuju me ngu cuarto jyê xi tacun ngahnga hiscan xi ha tjin chjine ndihya. Hane ngajan tuhunchjinu xi xinë. —Cuatjin xu cachja Jesús.

¹³Hane xi quiji me xi jo jan ne, cavetjucaa jain yêjê cjua xi cachja Jesús cojo rê me. Hane ngajan cavêhëndaja xu me xi sinê nguixun Jesús cojo rê me tsêhê suhi.

¹⁴Hane xi cavechú hora ne, cafaha xu Jesús cahndê rê me xcun maxê cojo xingu xingu apóstol. ¹⁵Hane sehe cachja xu me cojo apóstol jan cuitjin:

—Jemu meje sínê cojo nuju comida tsêhê suhi vihi chaja sa xi cjuehe cjuaveya naha ta, ¹⁶tsêhê xi nguehe cuichjá cojo nuju ta ha quihndê tsajin nixtin xi cúa sínê nga comida tsêhê suhi vihi. Sínê nga, peru hisca hya xi cuinduva Nina sahmi me gobiernu ta, tsêhê xi cjuatacun xi vicuya naja suhi vihi ne, hya cuetjucaa jain. —Cuatjin xu cachja Jesús.

¹⁷Hane xi cafahatsja xu me ngu vasu ne, sehe casua me nacuechji rê Nina, sehe cachja xu me cuitjin:

—Juhun vihi ne, sehe siuhun tsê tsê cojo xingun ta, ¹⁸hacuaha cuichjá nga cojo nuju ta quihndê cojo nixtin xi cjuiniji sa ne, ha quihndê cuya cuêhê xan rê uva. Cuêhê, peru hisca hya xi cuinduva Nina sahmi me gobiernu. —Cuatjin xu cachja Jesús.

¹⁹Hane xi cafaha me ngu niñutsju hacuaha casua me nacuechji rê Nina ne, sehe cavotohocja xu me niñutsju jan. Hane xi casua rê me apóstol jan ne, sehe cachja xu me cuitjin:

—Vihi ne, yojo naha vi, xi tisuá xi cueya ngatsê nuju. Cuitjin nihñu xcusun vihi yasen ni, cojo sa xi ninguitsjun ná. —Cuatjin xu cachja Jesús.

²⁰Hane xi cajnetaha cajnê nguixun me ne, hacuanitjin xu ni casahmi me cojo vasu. Hora xi casua rê me apóstol ne, cuitjin xu cachja me:

—Xan vihi ne, vihi jni naha xi cuetju ngatsê nuju. Cuatjin xi cuma chihin compromisu xatsê xi tisahmi Nina cojo xuta.

²¹Peru chutsujun ni, cha xi sahmi ná entregadu ne, nguehe tacun cha ngajñi naja. ²²Hane ngahan xi Quihndi rê Xuta Jain ngahan ne, hatuxa tjin ná xi cueya sacuatjin cavichaya Nina tsahan. Peru jemu chojyihî tsêhê cha xi sahmi ná entregadu. —Cuatjin xu cachja Jesús.

²³Ngajan xi yêjê xu apóstol jan ne, cavetsihin cavinenguise xicjin me jarê me xi sahmi xcusun vêhê.

Yo xi hitsê sa matitjun

²⁴Hya xi camá xu ne, cavetsihin sacua ha xi meje scaanya me ngajñi rê me yo xi chja xuta xi hitsê sa matitjun. ²⁵Ngajan xi Jesús ne, cuitjin xu cachja me:

—Yêjê ni xuta xi matitjun nguehe ngasunhndê ne, jercu sahmi yehe me yojo rê me sacua ha xi me vêhê má me nai rê xuta. Hacuaha jercu meje rê me xi yêjê xuta ne, cuichja me xi jemu ndaja me xi matitjun vê. ²⁶Peru ngayun ne,

mijí rē xi cuatjin nihñu ta xi meje rē ne, ngu xi matitjun tsēhē ngajñi nuju ne, catitsinguijne yojo rē sacuahā ngu xi chūva nu rē. Hane ngu xi vitexa tsēhē ngajñi nuju ne, hacuahā catitsinguijne yojo rē sacuahā ngu hndixahan. ²⁷ ¿Yo xi hitsē sa matitjun ni? ¿Há ngu xi tijinē ne, o há tsajin ne, há ngu hndixahan xi cjuí caní comida? Xi tijinē ne, hatuxa vēhē xi hitsē sa matitjun. Peru ngahan ne, tejña ngajñi nuju sacuahā ngu hndixahan nuju.

²⁸ 'Ngayun ne, ngayun xi cacaā nuju cojo yējē cjañiñi xi cavatjuun camá. ²⁹ Vēhē xi sacuahā casuaxa ná Nahmi naha xi ngahan sahme gobiernu ne, cuatjin suáxa nuju xi nihñu gobiernu, ³⁰ cojo sa xi ngayun ne, hacuahā xinu siuhun cojo ná ngajan hiscan sahme gobiernu. Hacuahā suáxa nuju xi nichuvun cjuatacun rē yējē tejó tjē naja, ngayaan xi tjē rē xutachanga naja Israel ngayaan. —Cuatjin xu cachja Jesús.

Casua Jesucristu camachaya rē Pedru xi cuichja me xi hvfiin me yo Jesucristu

³¹ Hacuahā cachja sa xu Jesús cuitjin cojo Pedru xi hacuahā hmí rē me Simón:

—Chutsujun ni Simón. Satanás ne, casacu rē cahndé xi tsichuva cjuatacun nuju ngayujun ni. ³² Peru ngayun Simón ne, caféhya rē Nina ngatsē nuju, cojo sa xi hacuiin cumandaya tacún sacuatjin xi mangutacún cojo ná. Hane hya xi ngayun cuyun nga ndiya naha ne, tuhun ngahñu xingun. —Cuatjin xu cachja Jesús.

³³ Ngajan xi Pedru ne, cachja xu me cojo Jesús cuitjin:

—Tatá. Ngahan ne, tsingatehen cjué ndavaya cojo nuju hisca tsingatehen cueya cojo nuju. —Cuatjin xu cachja Pedru.

³⁴ Ngajan xi Jesús ne, cuitjin xu cafayangui me tsēhē Pedru:

—Nguehe cuichjá cojo nuju, Pedru. Chaja sa xi squihnda ngu xahnda ne, ha jyan ndiya canújun xi hyúun yo ngahan. —Cuatjin xu cachja Jesús.

Camatiña hora xi chjahá rē Jesucristu

³⁵ Hacuahā cachja me cojo xuta ladu rē me cuitjin:

—Hya xi catsingátju nuju xi cachjá cojo nuju xi chuun tujún, chuun changa hacuahā chuun chuxixtē ne, ¿há quixi xi tsajin mé camachaja nuju? —Cuatjin xu cachja Jesús.

Hane xuta ladu rē me jan ne, cuitjin xu cachja me:

—Juun, tsajin mé. —Cuatjin xu cachja me.

³⁶ Hane Jesús ne, cachja nga xu me cuitjin:

—Peru quihndē ne, jarē ngayun xi tjin nuju tujún, tjin nuju changa ne, chuhun, tángun cojo. Hane yo xi tsajin rē ngu quichandujú ne, catiteña tsjanga rē ne, sehe catatsē ngu quichandujú. ³⁷ Cuatjin meje rē ta, tsēhē xi nguehe cuichjá cojo nuju ta hacutjin xi camahindu tshan xcun xujun rē Nina ne, hatuxa tjin rē xi cuetjucaa, cjuā xi chja cuitjin: “Cuichja xuta tsēhē me xi ngu xuta tsehen me.” Cuatjin camahindu. Hatuxa cuetjucaa sacuatjin camahindu. —Cuatjin xu cachja Jesús.

³⁸ Sehe ngajan xi xuta ladu rē Jesús jan ne, cuitjin xu cachja me:

—Chutsujun ni, tatá. Nguehe ne, ha siu jo quichandujú. —Cuatjin xu cachja me.

Sehe ngajan xi Jesús ne, cuitjin xu cafayangui me:

—Cojo vēhē ne, ha cuma. —Cuatjin xu cachja me.

Casahmi Jesucristu oración rē me ngajan Ndetjún Olivu

³⁹ Hya xi camá ne, xi cavetju xu me tsēhē nandya Jerusalén ne, sacuatjin xi

ha xcusun rë me ne, quiji xu me Ndetjún Olivu. Hacuaha cojo yějë xuta ladu rë me quiji xu me cojo rë me. ⁴⁰ Hane xi cafehe me jan ne, cachja xu me cojo xuta jan cuitjin:

—Chjahyun rë Nina xi hacuiin chjaháchuva nuju cojo cjuatacun nuju. —Cuatjin xu cachja me.

⁴¹ Hane xi quijixin me hitsë tsëhë xuta ladu rë me jan ne, sehe ngajan cavixcuh-nchi xu me xi sahmi me oración rë me, ⁴² cuitjin xu cachja me:

—Ngayun Nahmi naha, sá mé ni xi meje nuju ne, chjuhunxun cjuañihi xi cuátju cuma vi. Peru catama sacuatjin xi meje nuju ngayun, hacuiin sacuatjin xi meje ná ngahan. —Cuatjin xu cachja me.

⁴³ Hya xi camá ne, cavëë xu me ngu ángel xi canduva tsëhë ngahnga, casua rë me ngahñu. ⁴⁴ Hane xi jemu jima ndaya cacun xu me ne, hitsë sa jercu cafehya rë me Nina. Hacuaha ndasueya xi cavetju rë me ne, sacuaaha jni xu cún xi cavixu nangui.

⁴⁵ Hane xi cavisatjenhnga xu Jesús xi cajnetaha casahmi me oración rë me ne, xi cavuya quiji me hiscan siu xuta ladu rë me jan ne, casacutsja xu me xi siufë, ngatsë rë cjuachoho rë. ⁴⁶ Sehe ngajan xi Jesús ne, cuitjin xu cachja me cojo xuta jan:

—¿Mé má cuatjin tsjuñufun ni? Tisatjunhngun ne, nihñu oración nuju, sátu chjaháchuva nuju cojo cjuatacun nuju. —Cuatjin xu cachja Jesús.

Cafaha xuta Jesucristu

⁴⁷ Jinguyějë rë xi tichja cuaha xu Jesús ne, ha tu ñahñu jercu cjín xuta cafehe me. Hane cha xi hmí rë Judas, ngu cha ngajñi rë me xi tejó xi má ladu rë Jesús jan ne, titjun xu cha xcun xuta cjín jan cjuí cha. Hane xi cafehe cha jan ne, sehe quijitiña xu cha xi cuitatsuha cha Jesús xi sua cha me nina. ⁴⁸ Ngajan xi Jesús ne, cuitjin xu cachja me cojo cha:

—Judas, ¿há cuatjin cuitatsuhun ná xi nihñu ná entregadu, ngahan xi Quihndi rë Xuta Jain ngahan? —Cuatjin xu cachja me.

⁴⁹ Hane xi cajne rcu xuta xi siu cojo Jesús xcusun xi cuma jan ne, sehe cachja xu me cuitjin:

—Tatá. ¿Há cujín rë me quicha? —Cuatjin xu cachja me.

⁵⁰ Hya xi camá xu ne, ngutjen cavaja ngu me jan cha hndixahan rë nahmi xi matitjun tsëhë yějë ni nahmi, hane cavatësun xu me tyjavañuju quixi cha. ⁵¹ Hane ngajan xi Jesús ne, cuitjin xu cachja me:

—Camá ni. —Cuatjin xu cachja me.

Hane xi cavetahatsja xu me hiscan cati rë cha ne, camandaja xu cha casahmi Jesús. ⁵² Hane nahmi xi matitjun cojo cha mayu yungun xi matitjun cojo xutachanga, xi cafehe me xi cjuaha me Jesús ne, cachja xu Jesús cojo rë me cuitjin:

—¿Há nduvun chjuhun ná sacuaaha ngu xuta xi chëjë me, xi cuatjin nduvun cojo ya cojo quicha vë ni? ⁵³ Xi cavitejñaya cojo nuju nchunchujun ni ndatsen yungun jan ne, cavetuhunntsuan ná. Peru quihndë cavechú hora xi casua Nina cahndé xi nihñu cojo ná tu mé ni xi meje nuju, cavechú hora xi Satanás cuitexa. —Cuatjin xu cachja Jesús.

Cachja Pedru xi hvíin me yo Jesucristu

⁵⁴ Hya xi camá xu ne, xi cafaha xuta jan Jesús ne, quijicojo me me ndava nahmi xi matitjun tsëhë yějë ni nahmi. Pedru ne, hacuaaha tjengui xu me cjuí me tu cjín tu cjín ni hacutjin cjuí xuta jan cojo Jesús. ⁵⁵ Hane xi cafehe xu me jan ne, casahmi me ngu ndava ndihi ngajan ndatsen ndihya, sehe ngajan quiji me caviyuju tangun me. Hacuaha cojo xu Pedru quiji me cavéjña tangun me cojo xuta jan. ⁵⁶ Hane xi cavëë xu na hndixa-

han rë nahmi jan Pedru, tacun me xcun ndihi jan ne, xi cavutsejenndaja na me ne, sehe cachja xu na cuitjin:

—Me xi cuijiyihi vi ne, cojo me tacun me cojo me xi cuajiyihi vë hya. —Cuatjin xu cachja na.

⁵⁷ Hane Pedru ne, cavitijaya me cachja xu me cuitjin:

—Hveen yo vë. —Cuatjin xu cachja me.

⁵⁸ Xi cavatju nga ngu hora lihndi ne, xi cavëë nga ngu cha Pedru ne, cachja xu cha cuitjin:

—Ngayun ne, hacuaha ladu rë me xi cuacun vë má ngayun. —Cuatjin xu cachja cha.

Ngajan xi Pedru ne, cuitjin xu cachja me:

—¡Jéya, hacuiin! —Cuatjin xu cachja me.

⁵⁹ Xi cavatju sacuaha ngu hora nga xu ne, cachja nga ngu cha xi tacun jan cuitjin:

—Ha cjuaquixindaja ta cha xi cuijiyihi vi ne, cojo cha tacun cha cojo cha xi cuajiyihi vë, tsëhë xi hacuaha cha Galilea cha. —Cuatjin xu cachja cha.

⁶⁰ Ngajan xi Pedru ne, cuitjin xu cafayangui me:

—Hveen mé xi nújun vë. —Cuatjin xu cachja me.

Hane ha tu tichja cuaha xu Pedru ne, ha tu ñahñu cajindaya ngu xahnda jan.

⁶¹ Ngajan xi Nai naja ne, cavuya vutsejen xu me Pedru. Hane Pedru ne, catsinguitsjen xu me cjua xi cachja Nai naja cojo rë me, xi cachja me cuitjin: “Chaja sa xi squihnda ngu xahnda ne, hacuaha camá jyan ndiya nújun xi hyúun yo ngahan.” Cjua vëhë xi catsinguitsjen xu Pedru. ⁶² Hane xi cavetju xu me candatsen ne, cajihnda susu me.

Catsixcuehyu xuta Jesucristu

⁶³ Hane cha xi siutahá sahmi cuidadu rë Jesús jan ne, titsixcuehyu xu cha

me hacuaha tivaja cha me. ⁶⁴ Hane xi cavetsa xu cha tuxcun me ne, sehe cavaja sa cha me, sehe cachja xu cha cuitjin:

—¡Tinoje! ¿Yo xi tivaja ri? —Cuatjin xu cachja cha.

⁶⁵ Hacuaha jemu cjín sa xu cjua cachja cha xi choho chja cha tsëhë me.

Casahmicuenda xuta xi matitjun jyé rë Jesucristu

⁶⁶ Hane xi camá nchujun jan ne, camatangun xu xuta changá tsëhë nandya jan cojo nahmi xi matitjun cojo cha xi vicuya cjuachacun. Sehe quiji chani xu rë Jesús xcun xuta xi cuacun jan xi chjahácuenda rë jyé rë me. ⁶⁷ Hane xi cafehe Jesús jan ne, sehe cavinenguisse xu xuta jan cuitjin:

—Sá xi ngaye xi catsingatju Nina ngaye ne, tinoje cojo niji. —Cuatjin xu cavinenguisse xuta jan.

Sehe ngajan xi Jesús ne, cuitjin xu cafayangui me:

—Sá xi cuichjá cojo nuju ne, hatuxa cumacjaain nuju xi cuichjá. ⁶⁸ Hacuaha sá xi cjuinenguësë nuju ngu cjua ne, hatuxa chjayunnguun tsahan. ⁶⁹ Peru cuetsihin cojo quihndë ni ne, ngahan xi Quihndi rë Xuta Jain ngahan ne, cuitejña ladu quixi tsëhë Nina, me xi jemu hñu ngahñu rë. —Cuatjin xu cafayangui Jesús.

⁷⁰ Ngajan xi yëjë ni xuta jan ne, cavinenguisse xu me Jesús cuitjin:

—¿Há ngaye xi Quihndi rë Nina ngaye ni? —Cuatjin xu cavinenguisse me.

Hane Jesús jan ne, cuitjin xu cafayangui me:

—Sacuatjin nújun vë ne, cuatjin jain. —Cuatjin xu cafayangui Jesús.

⁷¹ Ngajan xi xuta xi cuacun jan ne, cuitjin xu cachja me cojo xicjin me:

—¿Mé sa nihña xuta xi tsinguixi me jyé rë cha? Ha canuhyaan suvaan xi hntsua cha cavetju xi cachja cha. —Cuatjin xu cachja xuta.

Cavisehen Jesucristu xcun Pilatu

23 Hya xi camá ne, cavisatjenhnga yějē xu xuta xi matitjun jan ne, sehe quijicojo me Jesús xcun Pilatu. ²Hane cavetsihin xu cavinchajyē me cuitjin:

—Casacuntsin cha xi cuijyihí vi tivisećjan cha cjuatacun rē xuta. Hacuaha mijí rē cha xi cuechjin tujúnsa niji cojo César, me xi matitjun. Hacuaha chja sa cha ta hacui cha xi catsingatju Nina cha, hacuaha matitjun xu cha. —Cuatjin xu cachja me xi cavinchajyē me Jesús.

³Sehe ngajan xi Pilatu ne, cavinenguise xu me Jesús cuitjin:

—¿Há ngaye xu matitjun ngaye tsēhē xuta tǵē rē Israel? —Cuatjin xu cavinenguise Pilatu.

Hane Jesús ne, cuitjin xu cafayangui me:

—Cuatjin sacuatjin nújun vē. —Cuatjin xu cafayangui me.

⁴Ngajan xi Pilatu ne, cuitjin xu cachja me cojo nahmi xi matitjun cojo yějē xutacǵin jan:

—Sacuiin ná hisca ngu jyé rē cha xi cuijyihí vi. —Cuatjin xu cachja Pilatu.

⁵Peru quijinduju sa xu cachja xuta xi matitjun jan cuitjin:

—Jemu tivisećjan cha cjuatacun rē xuta ngatsē rē cjuá xi tivicuya cha jingujyē ni distritu Judea vi. Cavetsihin cha hisca ngajan distritu Galilea, hisca nguehe cafehe cha. —Cuatjin xu cachja me.

Cavisehen Jesucristu xcun Herodes

⁶Hane xi cahndē Pilatu cjuá vēhē ne, sehe cavinenguise xu me xuta jan cuitjin:

—¿Há cha Galilea cha xi cuijyihí vi ni? —Cuatjin xu cavinenguise me.

⁷Hane xi casacu xu rē Pilatu cjuaquixi xi hiscan xi vitexa Herodes canduva Jesús ne, sehe catsingatju xu Pilatu

me xcun Herodes, tsēhē xi Herodes ne, hacuaha quitahá xu me ngajan Jerusalén nixtin hya. ⁸Hane hya xi cavēē Herodes Jesús ne, jemu ndaja camá xu rē me, tsēhē xi ha titjun sa ne, jemu meje scuēē me Jesús, tsēhē xi ha machaya rē me cjuá tsēhē Jesús, hacuaha meje scuēē xu me xi sahmi Jesús ngu cjuarcun. ⁹Hane jercu cǵin cjuachjinenguise casahmi xu me Jesús, peru Jesús ne, tsajin camahani mé xi cafayangui xu me. ¹⁰Hane nahmi xi matitjun cojo cha xi vicuya cjuachacun ne, jemu tvincha xu me jyé rē Jesús. ¹¹Ngajan xi Herodes cojo sindadu rē me ne, jemu casahmixta xu me cojo Jesús, hacuaha catsixcuehyu me me. Hane xi catsicaja xu me Jesús ngu tsjian xi jemu ndajyihí camahani ne, sehe cavuya catsingatju nga xu me Jesús xcun Pilatu. ¹²Hane nixtin hya ne, Herodes cojo Pilatu ne, jemu cavinga xu rē me xicjin me, handasa titjún xu ne, maji vēē xicjin me.

Camá entregadu Jesucristu xi cjue cueya me

¹³Hya xi camá ne, xi casahmitangun xu Pilatu nahmi xi matitjun cojo xutaxa rē cojo xuta nandya ne, ¹⁴sehe cachja xu me cojo cuitjin:

—Ngayujun ni matsejen ne, canduvuncujun cha xi cuijyihí vi nguehe matsejen, tsēhē xi xi má nuju matsejen ne, tivisećjan cha cjuatacun rē xuta. Peru quihndē matsejen ne, chutsujun ta, xcún ni matsejen ne, cafaátaha rē cha, peru casacuiin ná hisca xi ngu jyé rē cha sacuatjin jyé xi cavinchun. ¹⁵Hacuanitjin ni Herodes matsejen ta, casacuiin rē me jyé rē cha, vēhē xi catsicuya nga me cha. Chutsujun ta tsajin camahani mé casahmi cha xi vechú chuva rē xi niqen cha. ¹⁶Vēhē xi cuitéxa sehen ni rē cha matsejen ne, sehe tsisme cha. —Cuatjin xu cachja Pilatu.

¹⁷ Hatuxa xcusun xu rë Pilatu xi tsismi me ngu presu xi xuta vaxijin me nu nu ni nixtin rë suhi. ¹⁸ Peru yëjë ni xuta xi matitjun jan ne, ngu tangun ni camá xu me cajindaya me cachja me cuitjin:

—¡Nicuhun cha vi ne, Barrabás nismu cha! —Cuatjin xu cajindaya me.

¹⁹ Cha Barrabás ne, quiji cha ndavaya ngatsë rë xi casahmi xu cha ngu si cojo xutaxa rë, hacuaha catsiquehen xu cha. ²⁰ Peru ngu ndiya nga cachja xu Pilatu cojo xuta xi matitjun jan, tsëhë xi Pilatu ne, meje tsismi me Jesús. ²¹ Peru xuta xi matitjun jan ne, cavuya cajindaya nga me cachja xu me cuitjin:

—¡Tetuhun cha, tetuhun cha xcun cru! —Cuatjin xu cajindaya me.

²² Hane xi ma jyan ndiya ne, cavi-nenguise xu Pilatu xuta xi matitjun jan cuitjin:

—Peru ¿mé xi jemu choho casahmi cha ni? Tsajin camahani mé jyë rë cha casacu ná xi vechú chuva rë xi niquen cha. Vëhë xi cuitéxa sehen ni rë cha matsejen ne, sehe tsisme cha. —Cuatjin xu cachja Pilatu.

²³ Peru yëjë ni xuta xi matitjun jan ne, quijinduju sa xu cajindaya me cafehya me xi setaha Jesús xcun cru. Vëhë xi cajne cacun xu Pilatu, ²⁴ hacuaha cavejña cacun xu me xi sahmi me hacutjin xi fehya xuta jan. ²⁵ Hya xi camá ne, catsismi xu me cha xi cafehya xuta xi matitjun jan, ngu cha xi quiji ndavaya tsëhë xi casahmi xu si cojo xutaxa rë hacuaha catsiquehen xu cha. Peru Jesús ne, casua xu Pilatu me xi cjue cueya me, sacuatjin meje rë xuta xi matitjun jan.

Casetaha Jesucristu xcun cru

²⁶ Hane xi cjuicojo sindadu Jesús ne, ngajan ndiya jan cavechútáha xu cha ngu me xi hmí rë Simón tsëhë nandya Cirene, xi nduva xu me quiji me nguijña. Hane cafaha xu sindadu jan me, cat-

sicaniji xu cha me cru xi cjue me cojo hacutjin cjui Jesús.

²⁷ Hane jercu cjín camaha xu ni xuta quiji me cojo Jesús hacuaha jercu cjín xu yachjin xi hisca chja hisca jihnda na xi jemu choho má rë na ngatsë rë Jesús quiji xu na cojo me. ²⁸ Hane xi cavuya Jesús cavutsejen me na ne, sehe cachja xu me cuitjin:

—Ngayun na quihndi nandya Jerusalén, xicachjihnduun ngatsë naha. Chjihndun ngatsë nuju suvun cojo ngatsë rë quihndi nuju ta, ²⁹ cuechú nixtin xi cuichja xuta cuitjin: “Jemu ndaja tsëhë yachjin xi hatuxa maji sacu rë na quihndi; jemu ndaja tsëhë yachjin xi hisca ngu quihndi casacuiin rë na; hacuaha jemu ndaja tsëhë yachjin xi casacuiin quihndi catsicha na.” Cuatjin cuichja xuta. ³⁰ Nixtin hya ne, hacuaha cuichja xuta cojo ndetjún cuitjin: “Tjinengunsun niji.” Hane naxi ne, cuitjin cuichja me cojo: “Tatsun niji.” Cuatjin cuichja me ta, ³¹ sá xi cuitjin choho tsahmi xuta vi cojo ná quihndë, ngahan xi tangun ngahan sacuaha ngu ya xcuen ne, hatuxa hitsë sa choho sahmi me cojo nuju nchujun ni nguini, ngayun xi tangun ngayun sacuaha ngu ya quixí. —Cuatjin xu cachja Jesús.

³² Hacuaha cojo sa xu jo cha tsehen quijicojo sindadu jan cha, xi tsiquehen tangun cha cha cojo Jesús. ³³ Hane xi cafehe cha cojo Jesús hiscan xi hmí rë Nínda Rcuun ne, ngajan cavetaha xu cha Jesús xcun cru hacuaha caviyujutaha sa cha catsijo cha tsehen jan xcun cru rë cha. Ngu cru xi quitahá ngu cha ne, casecun xu táha xcun tsëhë Jesús, hane ngu nga ne, táha quixi. ³⁴ Ngajan xi Jesús ne, cachja xu me cuitjin:

—Ngayun Nahmi naha. Ninchatuhun rë xuta vi ta, hvíin me mé xi tsahmi me. —Cuatjin xu cachja Jesús.

Hane xi cuatëcja sindadu tsjian rë Jesús jan ne, cavaxë xu cha ngu suerte.

³⁵ Hane xutacjín jan ne, caxinchacun xu me cavutsejen me xcusun xi tijima jan. Hacuaha xutaxa rë jan ne, cavejnucëë me Jesús, cuitjin xu cachja me:

—Cavaxëtje cha jingu sa xuta. Quihndë ne, cataxëtje suvá cha yojo rë cha, sá xi hacui jain cha xi cavaxijin Nina hacuaha catsingatju me. —Cuatjin xu cachja xutaxa rë.

³⁶ Hacuaha sindadu jan ne, catsixcuehyu xu cha Jesús. Quijitiña cha hiscan tyjangui me xcun cru, hane meje sua xu cha xan yufa cuihi me, ³⁷ sehe cachja xu cha cuitjin cojo rë me:

—Sá xi ngaye jain matitjun ngaye tsëhë xuta tjë rë Israel ne, naxetje sove yojo riji. —Cuatjin xu cachja cha.

³⁸ Hacuaha camahindu xu ngujo cjua rcu cru rë Jesús xi chja cuitjin: “Matitjun cha vihi tsëhë xuta tjë rë Israel.” Cuatjin xu camahindu. Jyan hne camahindu cjua xi cuacun vë: hne griego cojo latín cojo hebreo.

³⁹ Hane ngu cha tsehen xi cojo case-taha xcun cru jan ne, cuitjin xu choho cachja cha tsëhë Jesús:

—¿Hacuiin ngaye xi catsingatju ri Nina ni? ¡Naxetje sove yojo riji ne, hacuaha naxetje niji! —Cuatjin xu cachja cha.

⁴⁰ Hane xi cavatëcja xu cha xingu jan cjua rë cha xi choho chja tsëhë Jesús ne, cuitjin xu cachja cha:

—¿Há rcuiin Nina, quihndë xi tivatjun castigu sacuatjin tivatju me vëhë tijima?

⁴¹ Ngayaan ne, cojo cjuaquixi xi tivatjun tijima ta, ngatsë rë xcusun xi canihña ne, vëhë xi vechú chuva rë xi cuitjin tivatjun castigu. Peru me vihi ne, tsajin mé xi jemu choho casahmi me. —Cuatjin xu cachja cha.

⁴² Sehe cachja xu cha cojo Jesús cuitjin:

—Jesús, ninguitsjun ná hya xi cuinduvun nihñu gobiernu. —Cuatjin xu cachja cha.

⁴³ Hane Jesús ne, cuitjin xu cafayangui me:

—Cuichjá cojo nuju cjuaquixi ta ha cojo quihndë ni ne, cuinechun cojo ná ngajan cahndë ndajiyihi hiscan xi hmí rë Paraíso. —Cuatjin xu cafayangui Jesús.

Xcusun xi camá hya xi cahme Jesucristu

⁴⁴ Hane hora vëhë ne, camajñu xu jinguyjë ni. Cavetsihin xi camanchisen ne, quiji cani rë hisca fane jyan, ⁴⁵ tsëhë xi tsuhi ne, ha quihndë casuaain xu ndavá rë. Hacuaha ngajan cahntsua yungun xi matitjun, tsjian xi vitechja rë tingotjo rë Ndava Nina ne, catiyavasen xu. ⁴⁶ Hya xi camá ne, jercu hñu camaha xu ni cachja Jesús cuitjin:

—Ngayun Nahmi naha. Ntsun cuejñá hasen naha. —Cuatjin xu cachja me.

Hane xi cavatju cachja me cuatjin ne, cahme xu me.

⁴⁷ Hane ngu capitán xi secun tiña xu jan ne, xi cavëë cha xcusun xi camá jan ne, casahmi jyë casahmi hnga cha Nina, cachja xu cha cuitjin:

—Quixi jain xi cha xi cuijyihí vi ne, tsajin jyë rë cha. —Cuatjin xu cachja cha.

⁴⁸ Hane yëjë ni xutacjín xi camatangun me xi scutsejen xu me xcusun jan ne, xi cavatju cavëë me yëjë xcusun xi camá jan ne, cavuya me cafe xu me, ña yaha xu me rcu me ngatsë rë cjuachoho rë me. ⁴⁹ Peru yëjë ni xuta xi cavinga xu rë Jesús cojo yëjë yachjin xi cavetju me tsëhë distritu Galilea cojo Jesús ne, tsëhë cjin ni hinchacun cuaha xu me tivutsejen me xcusun xi tivatju Jesús.

Caseya nima Jesucristu cahntsua tsjun

⁵⁰ Hane tacun ngu xu me xi hmí rë José, ngu xuta nandya Arimatea, ngu nandya rë xuta tjë rë Israel. Me vëhë ngu xihin ndaja me hacuaha tsajin xu mé jyë rë me tjín. ⁵¹ Hacuaha cachuyiin xu rë

me sacuatjin caviyuju xutaxa rë xi yahnga jan cjuatacun rë me cojo xcusun xi casahmi me. Hacuaha José jan ne, jemu meje xu rë me xi cuinduva Nina sahmi me gobiernu. ⁵²Ngajan xi me vëhë ne, quiji xu me xcun Pilatu, hane cafehya xu me nima Jesús. ⁵³Hane xi casacu cahndë ne, quiji catsitujne me, sehe cavaxtë xu me ngu tsjian. Hya xi camá ne, quiji caveya xu me cahntsua ngu tsjun xi catjuhngui rë taha naxi, hacuaha hiscangu xu nima cjëë seyaniji. ⁵⁴Nixtin hya ne, vispra xu. Ha hisca meje cuechú xu hora xi cuisehen nixtin xi chjahájenda rë.

⁵⁵Hane yachjin xi cojo xu me cavetjutangun me cojo Jesús ngajan Galilea ne, tjengui xu me quiji me cojo nima. Hane cavëë me tsjun hacuaha cavëë xu me hacutjin caseya nima. ⁵⁶Hane xi cavuya me ne, cavëhëchjine xu me rqui cojo aceite xi ndaja jne tsëhë nima.

Hane xi camá nchujun jan, xi cavechú xu nixtin xi chjahájenda rë ne, caviyujyuu xu me, sacuatjin vitexa ley rë Moisés.

Cavuya Jesucristu cjuahñu

24 Peru tu casahasen ni tsëhë nixtin ngu tsëhë totje ne, yachjin jan ne, cavuya quiji nga xu me xcun tsjun jan hacuaha cavaha xu me rqui xi ha cavëhëchjine me jan. ²Hane xi cafehe me jan ne, cavëë xu me xi ndyojo xi cavechja rë tingotjo rë tsjun jan ne, ha canivahaxin rë. ³Hane xi cavisehen me cahntsua tsjun jan ne, cavëë xu me xi tsajin nima Nai naja Jesús. ⁴Hane jinguyëjë rë xi sacuiyiniin rë me mé sahmi me ne, ha tu ñahñu camatsejen xu jo ángel jan, xi jercu tu setí camaha xu ni tsjian rë. ⁵Hane xi jemu catsacjun me camá ne, catsiquindi xu me xcun me. Sehe ngajan xi ángel jan ne, cuitjin xu cachja cojo rë me:

—¿Mé má ngajñi rë nima vinchunsun me xi quicun? ⁶Me vëhë ne, tsajin me nguehe ta cavuya me cjuahñu. Ninguitsjun hacutjin cachja me cojo nuju hya xi tacun cuaha me ngajan Galilea, ⁷hya xi cachja me xi me xi Quihndi rë Xuta Jain ne, hatuxa tjin xi cuma me entregadu tsja xuta tsehen, sehe cueya me xcun cru, hane xi cuma jyan nixtin ne, cuya nga me cjuahñu. —Cuatjin xu cachja ángel jan.

⁸Sehe ngajan xi yachjin jan ne, catsinguitsjen xu me cjua rë Jesús. ⁹Hane xi cavuya me xi quiji me xcun tsjun jan ne, quiji casua xu me camachaya rë xuta ladu rë Jesús xi tengu jan cojo yëjë sa me xi yahnga tsëhë yëjë ni hacutjin cavatju me camá. ¹⁰Quihndë ne, yachjin xi casua camachaya rë apóstol jan ne, hacui xu na María na Mágdala cojo na Juana cojo na María naa rë Jacobo cojo sa yachjin xi yahnga. ¹¹Peru apóstol jan ne, xi má xu rë me ne, suvá cjuangarca xi chja yachjin jan, vëhë xi camacjaain xu rë me.

¹²Peru Pedru ne, vangasanii xu me quiji me hiscan tacun tsjun jan. Hane xi cafehe me jan ne, catsiquindi xu me yojo rë me, sehe cavutsejenya xu me cahntsua tsjun jan ne, hane cavëë xu me suvá tsjian jan siu. Sehe cavuya cafe xu me. Jercu quijircun xu rë me tsëhë xcusun xi camá jan.

Ndiya Emaús

¹³Hya xi camá ne, ha nixtin hya xu ni ne, jo cha ladu rë Jesús jan ne, cavetju xu cha quiji cha ngu nandya xi hmí rë Emaús, xi tacun sacuaha chuva rë tengu kilómetro tsëhë Jerusalén. ¹⁴Hane ndiya cjui cha jan ne, cavisiajmi xu cha ngajñi rë cha tsëhë yëjë xcusun xi camá. ¹⁵Hane jinguyëjë rë xi tivisiajmi cha jan ne, cavechútáha xu Jesús cha, hane quijitangun xu me cojo cha. ¹⁶Peru handasa vutsejen cha me ne, casuaain xu Nina

cahndé xi scuëë cha xi hacui me. ¹⁷ Sehe ngajan xi Jesús ne, cavinenguise xu me cha cuitjin:

—¿Mé cjua xi tivisiajmu xi táha tivan-gun? —Cuatjin xu cavinenguise me.

Hane cha xi cuacun jan ne, caxincha-cunhñu xu cha, hacuaha jemu va tjin cacun cha. ¹⁸ Hane ngu cha xi cuacun jan xi hmí rë Cleofas ne, cachja xu cha cojo Jesús cuitjin:

—¿Há ngu tu tu ngayun xi nechuntuhun nguehe Jerusalén xi cuatjin hyúun mé xi sehe cavatju camá ni? —Cuatjin xu cachja cha cojo Jesús.

¹⁹ Sehe ngajan xi Jesús ne, cuitjin xu cachja me cojo cha:

—¿Mé xcusun jan? —Cuatjin xu cachja me.

Hane cha xi cuacun jan ne, cuitjin xu cachja cha:

—Xcusun xi cavatju ngu me xi hmí rë Jesús camá, ngu me xi canduva tsëhë nandya Nasaret. Me vëhë ne, xi camá rë Nina cojo xi camá rë yëjë ni xuta ne, ngu profeta me, xi jemu tjin rë me ngahñu xi casahmi me yëjë ni xcusun xi casahmi me, hacuaha xi cavicuya me yëjë ni cjua xi cavicuya me. ²⁰ Hacuaha nahmi xi matitjun cojo xutaxa rë yungun naja ne, casahmi me entregadu me vëhë cojo xutaxa rë Roma xi cueya me. Hane cuaha jain tjin cavetaha me xcun cru. ²¹ Ngayin ne, ha cavetihin tacuín xi me vëhë xi cuaxëtje naja me ngayejen ni ngayaan xuta tjë rë Israel. Cojo yëjë sa ne, quihndë ne, ha camá jyan nixtin cavatju xcusun xi cuacun vë. ²² Hacuaha ngujo yachjin tsëhë ladu niji ne, catsisca na cjuatacun niji, tsëhë xi xati sa nguitajñu ne, quiji xu na xcun tsjun, ²³ hane xi casacuiin rë na nima ne, cafehe cachja na cojo niji xi cavëë na sacuaha ángel ngajan, hane cachja cojo rë na xi me vëhë ne, tacun me cjuahñu. ²⁴ Hya xi camá ne, ngujo cha xi siu cojo niji ne, quiji cha xcun tsjun jan, cavëë cha xi

quixi jain cjua xi cachja na, peru me vëhë ne, cahviin cha me. —Cuatjin xu cachja cha cojo Jesús.

²⁵ Sehe ngajan xi Jesús ne, cuitjin xu cachja me cojo cha:

—Ngayun yuma hasen, ngayun xi jemu tafi sehe macjain nuju yëjë cjua xi cachja profeta. ²⁶ ¿Hacuiin hatuxa casahmi ngujoyë xi me xi catsingatju Nina ne, cuatjin cavatju me cjuañihi, sehe camajyë camahnga me cojo hasen ndajyihi rë me? —Cuatjin xu cachja Jesús.

²⁷ Hane sehe ngajan xi Jesús ne, casuacuenda xu me cha mé vijne yëjë ni cjua xi camahindu tsëhë me xcun yëjë ni xujun rë Nina, cavetsihin me cojo cjua xi catsihindu Moisés, hane cajnetaha me cojo hisca cjua xi catsihindu yëjë sa profeta.

²⁸ Hya xi camá ne, xi camatiña xu cha cojo Jesús nandya hiscan cjuí cha jan ne, Jesús ne, casahmi xu me sacuaha xi cjuenduju sa me. ²⁹ Peru cha xi cuacun jan ne, jercu cjín xu cachja cha cojo rë me cuitjin:

—Tinechun cojo niji ta quihndë ne, ha quiji hora hacuaha hisca meje cjuë nixtin. —Cuatjin xu cachja cha.

Ngajan xi Jesús ne, quiji xu me cojo cha, hane cavisehen me ndava cha xi cuejña me cojo cha. ³⁰ Hane xi ha cafaha me cahndé rë me xcun maxë xi sinë me niñu cojo cha ne, sehe cafaha xu me ngu niñu, hane casua me nacuechji rë Nina, sehe cavatëlanga me, casua xu me cha.

³¹ Hane hora vëhë xu casua Nina cahndé xi camá cavëë cha xi hacui Jesús. Hya xi camá ne, ha tu ñahñu cafëya xu me.

³² Hane sehe cachja xu cha ngajñi rë cha cojo xicjin cha cuitjin:

—¿Jercu ndaja camahani camá rë xahasen naja, hora xi tichja me cojo naja ngajan ndiya jan mé vijne cjua xi hinchaxcun xujun rë Nina! —Cuatjin xu cachja cha cojo xicjin cha.

³³Hane hora vëhë ni ne, cavisat-jenhnga xu cha tsëhë maxë jan, sehe cavuya quiji cha Jerusalén. Hane xi cafehe cha jan ne, casacutsja xu cha me xi tengu jan, tjintangun me cojo me xi yahnga sa. ³⁴Hane sehe cachja xu me cojo cha cuitjin:

—Quixi jain xi cavuya Nai naja cjuahñu, hacuaha cha Simón ne, cavëë cha me. —Cuatjin xu cachja me.

³⁵Ngajan xi cha xi cuacun jan ne, casuacuenda xu cha hacutjin cavatju cha camá ngajan ndiya, hacuaha hacutjin camá cavëë cha xi hacui Jesús hya xi cavatëlanga me niñu.

Cafehe Jesucristu hiscan tjin tangun xuta ladu rë me

³⁶Hane tu tichja cuaha xu cha xi cuacun jan cojo me vëhë cjua jan ne, ha tu ñahñu cavëë xu yëjë me Jesús, secun me ngajni rë me. Hane Jesús ne, cachja xu me nina cojo rë me cuitjin:

—Nina sua nuju me cjuandaja cjua-jeya. —Cuatjin xu cachja me.

³⁷Hane yëjë xuta ladu rë Jesús jan ne, jemu catsacjun camaha xu ni me camá tsëhë xi xi má rë me ne, tivutsejen me ngu hasen. ³⁸Ngajan xi Jesús ne, cachja xu me cuitjin:

—¿Mé má cuatjin jemu fircun nuju? Hacuaha ¿mé má cuatjin mangu majo tacún? ³⁹Chutsujun ntsa cojo ntsacú ta ngahan vi. Nduvun tetuhun ntsun ná, hacuaha chutsujun ná ta ngu hasen ne, tsajin yojo rë hacuaha tsajin nínda rë sacuatjin chutsujun ná ngahan cojo yojo cojo nínda naha. —Cuatjin xu cachja Jesús.

⁴⁰Hane xi cavatju cachja me cjua vëhë ne, sehe catsingacun xu me tsja me cojo ntsacu me. ⁴¹Hane xuta ladu rë Jesús jan ne, hisca maji xu macjain rë me ngatsë rë xi jercu tu ndaja má camahani rë me hacuaha hisca fircun rë me. Ngajan xi

Jesús ne, cavinenguise xu me xuta jan cuitjin:

—¿Há tjin nuju hitsë xi xinëë nguehe? —Cuatjin xu cavinenguise me.

⁴²Hane ngu me jan ne, casua xu me ngu rquí ti camatsju. ⁴³Hane xi cafaha me ne, cajiñë xu me xcun yëjë ni xuta. ⁴⁴Sehe cachja xu me cuitjin:

—Yëjë xcusun xi cavátju camá ne, tsëhë vëhë cjua xi cachjá cojo nuju hya xi tejña cuaha ngajni nuju. Cachjá cojo nuju ta hatuxa meje rë xi cuetjucaa yëjë hacutjin camahindu tsahan xcun xujun xi catsihindu Moisés cojo xcun xujun xi catsihindu profeta, cojo xcun xujun tsëhë Salmo. —Cuatjin xu cachja Jesús.

⁴⁵Sehe ngajan xi Jesús ne, cavuxaha xu me cjuatacun rë xuta jan, cojo sa xi cuijnercu me cjua xi camahindu xcun xujun rë Nina. ⁴⁶Hacuaha cachja xu me cuitjin:

—Cuitjin camahindu xi me xi catsingatju Nina ne, hatuxa cuatju me cjuañihi, hane xi cjuë jyan nixtin xi cueya me ne, cuya nga me cjuahñu, ⁴⁷hacuaha sacú cumachaya rë yëjë ni xuta tsëhë ngasunhndë xi sá xi mangucacun me cojo me vëhë hacuaha tsindeya me cjuatacun rë me ne, tsinchataha Nina me tsëhë jyë rë me. Jerusalén vi ne, nguehe cuetsihin cuitsojo cjua vëhë. ⁴⁸Ngayun cuinújun cojo xuta cjua vihi ta ngayun xi cahyun hacutjin camá. ⁴⁹Chutsujun ni, ngahan tsingátju nuju Hasen xi ha cachja Nahmi naha xi sua nuju me. Peru ha tinechun ni nguehe nandya vihi hisca xi chjuhunnstun Hasen vëhë, xi cuinduva hisca ngahnga. —Cuatjin xu cachja Jesús.

Quiji Jesucristu ngahnga

⁵⁰Hya xi camá ne, cavaxëxin xu Jesús xuta ladu rë me tsëhë nandya Jerusalén, quijicojo me me hisca nandya Betania. Hane xi cafehe me jan ne, catsiquijin xu

Jesús tsja me hane catsinchacun me xuta jan. ⁵¹ Hane ngajñi rë xi titsinchacun me xuta jan ne, cavetjuxin xu me quiji me ngahnga. ⁵² Hane xuta ladu rë Jesús jan ne, xi cavatju cafarehacun me Jesús ne,

sehe cavuya nga xu me Jerusalén cojo jemu jyë cjuasua. ⁵³ Hacuaha nchunchu-jun ni quiji xu me yungun xi matitjun, vaxëndaja me Nina.

Cjuandajyhi xi catsihindu San Juan Tsëhë Jesucristu

1 Ntsacu cavetsihin ngasunhndë ne, ha tacun ngu me xi hmí rë Cjua. Me vëhë ne, tacun me cojo Nina, hacuaha Nina me. ²Me vëhë ne, hisca ntsacu cavetsihin ne, ha cuatjin tacun me cojo Nina. ³Yëjë ni xi tjin ne, cojo me vëhë catsindaja Nina. Tsajin mé xi camandaja xi cuajin me vëhë camandaja. ⁴Me vëhë xi hatuxa tjin rë me cjuahñu, hane cjuahñu vëhë ne, vëhë sua cjuahasen xi cuma rë xuta. ⁵Hane cjuahasen vëhë ne, vitsojo ngajñi rë cjuatsehen sacuatjin sahmi hasen ngu ndihi ngajñi jñú, peru cjuatsehen ne, cacaain rë catsicjë rë cjuahasen jan.

⁶Cavéjña ngu me xi hmí rë Juan, xi Nina catsingatju rë. ⁷Me vëhë ne, cavetjuiñi me xi cuichja me cojo xuta hane tsinguixi me tsëhë cjuahasen jan, cojo sa xi ngatsë rë cjua xi cuichja me ne, cumacjain rë yëjë ni xuta. ⁸Hacuiin me vëhë xi cjuahasen jan me ta me vëhë ne, cavetjuiñi me cojo sa xi cuichja me tsëhë cjuahasen jan. ⁹Cjuahasen xi cjuaquixi jan ne, xi visehen ngajñi rë cjuatacun rë yëjë xuta ne, sehe canduva nguëhe ngasunhndë.

¹⁰Me xi hmí rë Cjua jan ne, cavéjña me ngasunhndë. Hacuaha handasa cojo me xi catsindaja Nina ngasunhndë ne, peru xuta ne, hvíin me yo. ¹¹Canduva me ngasunhndë rë suvá me, peru xuta nangui rë suvá me ne, cafhatsjaain rë me. ¹²Peru ngu jo xuta nangui rë me xi cafhatsja rë me hacuaha camangu cacun cojo rë me ne, me xi Cjua jan ne, casua me chuva rë xi cuma xuta xi cuacun jan quihndi rë Nina. ¹³Xuta xi cuacun jan ne, hacuiin camá me quihndi rë Nina chuva rë xi meje rë ngu xihin ngu quihndi ta suvá Nina casahmi me xi camá xuta xi cuacun jan quihndi rë me.

¹⁴Me xi Cjua jan ne, camá me ngu xuta, hacuaha cavéjñacahndë me ngajñi niji. Hatuxa quitsë rë xahasen rë me cjuandaja, quitsë rë xahasen rë me cjuaquixi. Ngayin ne, cahyin hacutjin xi jemu jyë hnga me cojo hasen rë me. Jyë hnga me sacuatjin casahmi rë me Nahmi rë me. ¹⁵Juan Vitenda rë Xuta ne, cachja me cojo xuta tsëhë me xi Cjua jan, cuitjin cachja me:

—Me vihi xi cachjá tsëhë, xi me xi sehe cuinduva ne, handasa ngahan canduvá titjun ne, peru me vëhë xi hitsë sa venguichji rë me xi cuma ná ngahan, tsëhë xi ha tacun me hya xi catsin ngahan.

¹⁶Tsëhë xi hatuxa jemu quitsë rë xahasen rë me cjuandaja ne, vëhë xi ngayejen ni ne, hacuaha jemu cachja hanntsan cjuandaja. ¹⁷Ley rë Nina ne, nima Moisés casua naja me, peru cjuandaja cojo cjuaquixi ne, Jesucristu casua naja me. ¹⁸Tsajin camahani yo xi cavëë rë Nina. Suvá ni Quihndi ngu rë Nina xi hacuaha nina me hacuaha tacun tangun me cojo Nina Nahmi naja ne, me vëhë casua me camachaya naja yo xi Nina.

Cjua xi cachja Juan Vitenda rë Xuta

¹⁹Cuitjin cachja Juan hya xi catsingatju xutaxa rë tsëhë nandya Jerusalén ngu jo nahmi cojo sacristán xi cjue cjuinenguise rë me Juan cuitjin:

—Ngayun ne, ¿yo ngayun? —Cuatjin cjuinenguise me. ²⁰Hane hora xi cuatjin cavinenguise me ne, Juan ne, catsinguixi me, hacuiin cavetsangui me, cuitjin catsinguixi me:

—Hacuiin ngahan Xihin xi Tsingatju Nina. —Cuatjin cachja me.

²¹Ngajan xi cavinenguise nga nahmi xi cuacun jan cuitjin:

—¿Mé ni ni? ¿Há xutachanga naja Elías ngayun? —Cuatjin cavinenguise me.

Ngajan xi Juan ne, cuitjin cafayangui me:

—Hacuiin ngahan. —Cuatjin cafayangui me.

Ngajan xi cavinenguise nga nahmi xi cuacun jan cuitjin:

—¿Há ngayun profeta xi jemu nechanyan rē? —Cuatjin cavinenguise me.

Hane Juan ne, cuitjin cafayangui nga me:

—Jéya. —Cuatjin cafayangui nga me.

²²Ngajan xi nahmi xi cuacun jan ne, cavinenguise nga me cuitjin:

—¿Yo ngayun ni? Tinújun cojo niji ne, cojo sa xi cuma nicuyin ngu cjua tsēhē me xi catsingatju niji. ¿Mé nújun tsujun suvun? —Cuatjin cachja me.

²³Ngajan xi Juan ne, cuitjin cafayangui me:

—Ngahan ne, xuta xi jercu hñu chjá nguehe hiscan jemu xín tsēhē nandya, xi catitsinguixi xuta ndiya tsēhē Nai naja, sacuatjin cachja profeta Isaías hatsēē nixtin. —Cuatjin cafayangui me.

²⁴Quihndē ne, xuta xi cuacun catsingatju cha partidu fariseo xi cuichja me cojo Juan ne, ²⁵cuitjin cavinenguise me:

—¿Mé má cuatjin vitendun xuta sa xi hacuiin ngayun xi Tsingatju Nina ngayun, hacuiin ngayun xi profeta Elías ngayun, hacuiin ngayun xi profeta xi jemu nechanyan rē ngayun ni? —Cuatjin cavinenguise me.

²⁶Ngajan xi Juan ne, cuitjin cafayangui me:

—Ngahan ne, cojo nandá tivitēnda nuju, peru ngajñi nuju secun ngu me xi hyúun yo. ²⁷Ngahan ne, canduvá titjun, sehe canduva me vēhē, peru hisca tsajin mé cumachjirēhē ngahan xi cuma rē me. —Cuatjin cafayangui Juan.

²⁸Xcusun vēhē ne, camá ngajan ngu cahndē hiscan xi hmí Betania, ngunda vēhē tsēhē ndajyē Jordán, hiscan tivitēnda Juan xuta.

Jesucristu sacuahá chu tsánga xi sua Nina

²⁹Xi camá nchujun jan ne, cavēē Juan xi nduva Jesús hiscan secun me. Hane cuitjin cachja Juan cojo xuta:

—¡Chutsujun ni! Cuajyihi me xi sacuahá chu tsánga xi sua Nina xi tsicjē jyē rē xuta. ³⁰Me vēhē xi cachjá cojo nuju xi me xi sehe cuinduva. Handasa ngahan canduvá titjun ne, peru me vēhē xi hitsē sa venguichji rē me xi cuma ná ngahan, tsēhē xi ha tacun me hya xi catsin ngahan. ³¹Ngahan suva ne, hveen yo me. Peru cojo sa xi ngayaan xuta tjē rē Israel cumachaya naja yo me ne, vēhē xi cuitjin tivitēnda xuta. —Cuatjin cachja Juan.

³²Hacuaha cachja Juan cuitjin tsēhē Jesús:

—Ngahan ne, cahvē Hasen rē Nina xi canduvajne tsēhē ngahnga sacuahá ngu paloma, quiji casesun rcu me. ³³Ngahan suva ne, hveen yo me, peru me xi cavitexa ná xi cuitēnda xuta cojo nandá ne, cuitjin cachja me cojo ná: “Me xi che xi cuinduvajne Hasen naha cjue sesun rcu ne, me vēhē xi cuitenda me xuta cojo Hasen naha.” Cuatjin cachja Nina cojo ná. ³⁴Ngahan ne cahvē hacuahá cachjá cojo xuta xi me vēhē xi Quihndi rē Nina me. —Cuatjin cachja Juan.

Me xi tjun tjun camá xuta ladu rē Jesucristu

³⁵Xi camá nchujun nga jan ne, secun Juan cojo jo xuta ladu rē me. ³⁶Hane xi cavēē Juan Jesús xi tivatju me jan ne, cachja me cuitjin:

—¡Chutsujun ni! Cuajyihi me xi sacuahá chu tsánga xi sua Nina. —Cuatjin cachja me.

³⁷Xi cahndē jo xuta ladu rē Juan cjua jan ne, quijitjengui me Jesús. ³⁸Xi cavuya Jesús cavutsejen me xi cjuitten-

gui xuta jan me ne, sehe cavinenguise Jesús me cuitjin:

—¿Mé meje nuju ngayun? —Cuatjin cavinenguise me.

Ngajan xi xuta jan ne, cuitjin cafayangui me:

—Maestro, ¿jani nechun? —Cuatjin cavinenguise me.

³⁹ Ngajan xi Jesús ne, cuitjin cachja me cojo jo xuta jan:

—Nduvun chutsujun. —Cuatjin cachja me.

Hane xi quiji vutsejen xuta jan ne, sehe cavëë me hiscan véjña Jesús. Sacuaha chuva rë fane ñuju hora vëhë. Hane caviyuju me ngajan cojo Jesús nixtin hya.

⁴⁰ Ngu xuta ladu rë Juan xi cahndë sacuatjin cachja me hacuaha quijitjengui rë Jesús ne, hacui Andrés, me xi hntsë Simón Pedru. ⁴¹ Me vëhë titjun quiji jaha me hntsë me Simón, hane xi casacu rë me ne, cuitjin cachja me cojo:

—¡Cahyin Mesías! —Cuatjin cachja me. (Mesías ne, hacui cjuá xi meje cuichja: Me xi Tsingatju Nina.)

⁴² Hya xi camá ne, Andrés ne, quijicojo me Simón xicjin me ngajan hiscan tacun Jesús. Hane xi cafehe me jan ne, cavutsejenya Jesús xcun Simón ne, sehe cachja me cuitjin cojo rë me:

—Ngayun ne, Simón hmí nuju, peru chjuhunñuhu Cefas. —Cuatjin cachja Jesús. (Ñihi xi Cefas ne, tangun vijne cojo ñihi xi Pedru ta catsijo ni ne, ndy-ojo, meje cuichja.)

Cavaxijin Jesucristu Felipe cojo Natanael

⁴³ Hane xi camá nchujun jan ne, cavejña cacun Jesús xi cjue me ngu nandya tsëhë distritu Galilea. Chaja sa xi cjue me ne, cavechútáha me Felipe, hane cachja me cojo cuitjin:

—Nduvun, cuanguen cojo ná. —Cuatjin cachja me.

⁴⁴ Felipe ne, Betsaida nangui rë me, hiscan nangui rë Andrés cojo Pedru.

⁴⁵ Hya xi camá ne, Felipe ne, quiji jaha me Natanael, hane xi casacu rë me ne, cachja me cuitjin:

—Cahyin ngu xuta Nasaret xi hmí rë Jesús, quihndi rë José. Me vëhë xi catsi-hindu Moisés cojo jingu sa profeta tsëhë, ngajan xcun xujun rë Nina. —Cuatjin cachja Felipe cojo Natanael.

⁴⁶ Ngajan xi Natanael ne, cavinenguise me cojo Felipe cuitjin:

—¡Ja! ¿Há cuma cuetjujñi ngajan Nasaret ngu xuta xi jemu venguichji rë ni? —Cuatjin cavinenguise Natanael.

Ngajan xi cafayangui Felipe cuitjin:

—Ndove chutsijin ni. —Cuatjin cafayangui me.

⁴⁷ Hane xi cavëë Jesús xi camatiña Natanael ne, sehe cachja me cuitjin tsëhë:

—Chutsujun ni, cuajyihi ngu me xi xuta tjë rë Israel xi cjuaquixi jain, ngu me xi tsajin cjuandacha cahntsua xahasen rë. —Cuatjin cachja Jesús tsëhë Natanael.

⁴⁸ Ngajan xi Natanael ne, cuitjin cavinenguise me Jesús:

—¿Hacutjin má xi cuatjin hyun yo ngahan ni? —Cuatjin cavinenguise Natanael.

Ngajan xi Jesús ne, cuitjin cafayangui me:

—Chaja sa xi cuichja Felipe cojo nuju ne, ngahan ne, ha cahvë nuju hya xi sechun ngahma yaxujun jan. —Cuatjin cafayangui Jesús.

⁴⁹ Hane Natanael ne, cuitjin cachja me:

—Maestro, Ngayun xi Quihndi rë Nina ngayun, ngayun xi matitjun ngayun tsa-jan ngayaan xuta tjë rë Israel. —Cuatjin cachja Natanael.

⁵⁰ Ngajan xi Jesús ne, cachja me cuitjin:

—Ngayun ne, camangu tacún cojo ná, tsêhê xi cachjá xi cahvê nuju hya xi nechun ngahma ya higo jan. Peru sehe chutsujun sa xcusun xi cuetjucaa xi hitsê sa venguichji rê.

⁵¹ Hacuaha cachja sa Jesús cjua vihi:

—Cuichjá cojo nuju cjuaquixi ta ngayujun ni ne, cuechú nixtin xi chutsujun xi ngahnga ne, sacuaaha xi tixaha, hacuaaha ángel rê Nina ne, sacuaaha xi cjujne cjuiniji hiscan tejña ngahan xi Quihndi rê Xuta Jain ngahan. —Cuatjin cachja Jesús.

Cjuavixan xi camá ngajan Caná

2 Hane xi cavatju jyan nixtin ne, camá ngu cjuavixan ngajan Caná, distritu Galilea. Naa rê Jesús ne, ngajan quitahá me ndava suhi. ² Hacuaha Jesús cojo xuta ladu rê me ne, hacuaaha camá me invitar xi cjue me ndava suhi, hane quiji me. ³ Hya xi camá ne, cafê xan xi tsêhê suhi jan. Sehe ngajan xi naa rê Jesús ne, cuitjin cachja me cojo Jesús:

—Ha quihndê tsajin rê me xan nguehe. —Cuatjin cachja me.

⁴ Ngajan xi Jesús ne, cuitjin cafayan-gui me:

—Hacuiin cuenda naha xi ngahan nújun cojo ná. Cjêê cuechú hora xi sahme mé xi sahme. —Cuatjin cafayan-gui Jesús.

⁵ Ngajan xi naa rê Jesús ne, cuitjin cachja me cojo cha xi vincha xan jan:

—Tu mé ni xi cuichja cha cojo nuju ne, cuatjin nihñu. —Cuatjin cachja naa rê Jesús.

⁶ Quihndê ne, siu ngajan jyun tiji xi ndyojo camá, xi xinchá nandá xi vitejnu xuta tjê rê Israel hitsê tu mé ni xcusun xi sahmixa me cojo, sacuatjin xi ha xcusun rê yungun rê me. Jima ngu tiji jan ne, xinchá sacuaaha yachantê o sa jyanchantê litru nandá. ⁷ Ngajan xi cachja Jesús cojo cha xi vincha xan cuitjin:

—Ninguitsun rê tiji xi cuacun vê cojo nandá. —Cuatjin cachja me.

Ngajan xi cha xi cuacun jan ne, catsinguitsê camahani rê cha tiji jan cojo nandá.

⁸ Hya xi camá ne, sehe cachja nga Jesús cuitjin cojo cha:

—Quihndê ne, chjuhun hitsê xi cavinchnun tiji vê ne, tángun chanu rê xutacha. —Cuatjin cachja me.

Hane cuatjin casahmi cha xi cuacun jan. ⁹ Hya xi camá ne, cavutaha xutacha jan nandá xi camá xan jan. Me vêhê ne, hisca hvíin me jani canduva xan jan, peru cha xi vincha xan xi cafaha quiji-cojo jan ne, vêê cha. Ngajan xi xutacha jan ne, cajindaya me cha xutavixan jan ne, ¹⁰ sehe cachja me cojo cha cuitjin:

—Xcusun naja ne, titjun xan xi ndajy-ihi taan hvi xuta, hane ha xcun xi ha cjín cahvi me ne, sehe taan rê me xan xi ha va jyihi. Peru ngaye ne, hisca ndicumaha ni titehe xan xi ndajyihí. —Cuatjin cachja xutacha jan.

¹¹ Cjuarcun xi tjun tjun casahmi Jesús vê ne, casahmi me ngajan Caná, distritu Galilea. Cuatjin catsingacun me xi jemu jyê hnga me cojo hasen rê me. Hane xuta ladu rê me ne, camangu cacun me cojo rê me.

¹² Xi cavatju vêhê ne, cavetju me quijine me nandya Capernaum. Quiji me cojo naa rê me cojo xicjin me cojo xuta ladu rê me. Hane ngajan caviyujutaha me ngujo nixtin.

Cavaxê Jesucristu xuta xi sahmi ndetsin ndatsen yungun

¹³ Cavechú nixtin xi camatiña suhi xi hmí rê Pascua, ngu suhi xi sahmi xuta tjê rê Israel. Ngajan xi Jesús ne, quijiniji me ngajan nandya Jerusalén. ¹⁴ Hane xi cafehe me jan ne, quiji me yungun xi matitjun. Ngajan cavêê me xuta xi tiviteña chu ndyaja cojo chu tsánga cojo chu nisêtyava, hacuaaha cavêê me xuta xi

siu titsindeya tujún tsêhê xuta cojo tujún rê yungun. ¹⁵ Hane xi cavêê Jesús xi cuatjin tisahmi xuta jan ne, cafaha me ngu nahñu xi jiña ne, casahmi me ngu cuarta, sehe catsicanga me yêjê ni chu xteña, sa ndyaja sa tsánga. Hacuaha cacandi me tujún rê xuta xi tsindeya tujún, hacuaha catsindefa me maxê xi xinchasun tujún jan. ¹⁶ Hane xuta xi tiviteña chu nisêtyava jan ne, cuitjin cachja Jesús cojo rê me:

—Tángunxun cojo chu xi cuicun vi. Xicanihñuu ndava Nahmi naha sacuaha ngu ndetsin. —Cuatjin cachja Jesús.

¹⁷ Ngajan xi xuta ladu rê Jesús jan ne, catsinguitsjen me xi camahindu xcun xujun rê Nina cuitjin: “Ngayun Nina naha, xi jemu hmú cákun camahani ndya nuju ne, ña sca má rê xahasen naha.” Cuatjin camáhindu.

¹⁸ Ngajan xi xutaxa rê yungun jan ne, cuitjin cachja me:

—Quihndê ne, jjarê ngu cjuarcun xi nihñu cojo sa xi cumachaya niji xi tjin jain nuju chuva rê xi cuatjin nihñu! —Cuatjin cachja me.

¹⁹ Ngajan xi Jesús ne, cuitjin cafayangui me:

—Ninguetsun yungun vihi ne, cahntsua xi jyan nixtin ne, ngahan sahme ndaja nga. —Cuatjin cafayangui Jesús.

²⁰ Hane xutaxa rê yungun xi matitjun ne, cuitjin cachja nga me:

—Yachan jyun nu quiji cani rê xi camandaja yungun naja vi. Hane sehe ngayun nujún ne, ¡cahntsua xi jyan nixtin ne, cuyun nindujun nga ni! —Cuatjin cachja xutaxa rê yungun jan.

²¹ Peru Jesús ne, hya xi cachja me tsêhê yungun jan ne, tsêhê yojo rê suvá me xi cachja me. ²² Vêhê xi hya xi cavuya Jesús cjuahñu ne, xuta ladu rê me ne, catsinguitsjen me xi cuatjin cachja Jesús, hane camacjain rê me cjua xi chja xujun rê Nina hacuaha camacjain rê me cjua xi cachja Jesús jan.

Vêê Jesucristu xahasen rê yêjê ni xuta

²³ Jinguyêjê rê xi cuatjin quitahá Jesús ngajan Jerusalén nixtin rê suhi tsêhê Pascua ne, jemu cjín xuta camangu cacun me cojo rê me, xi cavêê me cjuarcun xi Jesús tisahmi me. ²⁴ Peru suvá Jesús ne, camanguaain cacun me cojo xuta xi cuacun jan ta, tsêhê xi ha vêê me xahasen rê yêjê me xi cuacun vê. ²⁵ Hacuaha cuatjin camanguaain cacun me cojo xuta jan ta, tsêhê xi hacuiin sahmi nguýjê xi tjin yo xi cuichja cojo rê me tsêhê xuta ta, tsêhê xi ha vêê me mé cjua xi hincha cahntsua xahasen rê xuta.

Cjuavisiajmi rê Jesucristu cojo Nicodemo

3 Cavéjña ngu xuta fariseo xi hmí rê Nicodemo. Me vêhê ne, ngu xuta matitjun me tsêhê ngajni rê xuta tjê rê Israel. ² Ngundiya jan ne, nguixun quiji cavisiajmi me cojo Jesús, hane cuitjin cachja me:

—Maestro, ngayin ne, hyin ta ngayun ne, ngu maestru xi Nina catsingatju rê. Cuatjin hyin ta, tsêhê xi tsajin yo xi cuma sahmi cjuarcun xi nihñu ngayun sa xi hacuiin Nina visecoo rê. —Cuatjin cachja Nicodemo cojo Jesús.

³ Ngajan xi Jesús ne, cuitjin cafayangui me:

—Cuichjá cojo nuju cjuaquixi ta sa xi ngu xuta tsiin me ngu ndiya nga ne, cumaji cuisehen me hiscan sahmi Nina gobiernu. —Cuatjin cafayangui Jesús.

⁴ Hane Nicodemo ne, cavinenguise me Jesús cuitjin:

—¿Peru hacutjin cuma xi ngu xihin xi ha changá ne, cuya tsin nga ni? ¿Há cuma cuisehen nga cahntsua naa rê sehe tsin nga ngu ndiya? —Cuatjin cavinenguise Nicodemo.

⁵ Ngajan xi Jesús ne, cuitjin cafayangui me:

—Cuichjá cojo nuju cjuaquixi ta hatuxa sahmi ngujoyë xi cuisehen xuta ngu cjuahñu xatsë ngatsë rë nandá cojo ngatsë rë Hasen rë Nina ta, ha chuva rë vëhë ni xi cuma cuisehen me hiscan sahmi Nina gobiernu. ⁶Hya xi ngu xuta tsin me ngatsë rë xutacha rë me ne, sacú rë me cjuahñu xi tsëhë ngasunhndë. Peru hya xi tsin me ngatsë rë Hasen rë Nina ne, sacú rë me cjuahñu xatsë xi tsëhë Nina. ⁷Hacuiin cjuecun nuju xi cuatjin cachjá cojo nuju xi mameje rë xi tsin nga ngayun ngu ndiya. ⁸Tjo ne, hatuxa vanga hiscan meje rë, peru suva machaya naja xi vanga ta nuhya rë xi fane vanga, ta matsijin hiscan nduva o hiscan vechú. Hane xuta xi tsin me ngatsë rë Hasen rë Nina ne, tjin rë me sacuha tjo jan, ta tsin me ngu ndiya nga, peru matsijin hacutjin. —Cuatjin cafayangui Jesús.

⁹Ngajan xi Nicodemo ne, cuitjin cavi-nenguise me cojo Jesús:

—Peru ¿hacutjin cuma sacuatjin nújun vë ni?

¹⁰Hane Jesús ne, cuitjin cafayangui me:

—¿Hacutjin nga ne xi ngayun ne, maestru má ngayun tsëhë xuta tjë rë Israel, hane sehe hyúun mé vijne cjuá xi cachjá cojo nuju vë ni? ¹¹Cuichjá cojo nuju cjuaquixi ta ngayin ne, nújin cjuá xi hyin hacuha nújin tsëhë xcusun xi cachutsijín, peru cjuá xi nújin cojo nuju ne, mijí chjuhunnstun. ¹²Sa xi camacjaain nuju hya xi cachjá cojo nuju cjuá tsëhë xcusun tsëhë ngasunhndë ne, ¿hacutjin cumacjain nuju sa xi cuichjá cojo nuju cjuá tsëhë xcusun tsëhë ngahnga ni?

¹³Tsajin hisca ngu xuta xi quiji cavut-sejen me hacutjin jyihí ngahnga sehe cavuya me xi sua cuenda nuju me. Suvá ni me xi ha tsëhë ngajan canduva me ne, me vëhë xi cuma sua cuenda nuju

me, suvá ni me xi Quihndi rë Xuta Jain. ¹⁴Chuva rë xi casahmi Moisés hat-sëë nixtin xi cavunihnga me ngu quicha xcusun rë chu yë taha rë ngu ya ngajan ngu xín camahani jan ne, ha chuva vëhë ni ne, me xi Quihndi rë Xuta Jain ne, meje rë xi tjunihnga rë me taha rë ngu ya. ¹⁵Cuatjin meje rë, cojo sa xi yëjë ni xuta xi cumangu cacun me cojo rë me vëhë ne, sacú rë me cjuahñu xatsë. —Cu-atjin cafayangui Jesús tsëhë Nicodemo.

Cjuahmutacun rë Nina cojo xuta

¹⁶—Tsëhë xi jemu catsihmu cacun Nina xuta ne, hisca casua me Quihndi ngu rë me, cojo sa xi yëjë ni xuta xi cumangu cacun me cojo me vëhë ne, hacuiin cjue hasen rë me xcun cjuañihi ta sacú rë me cjuahñu xatsë xcun Nina. ¹⁷Nina ne, catsingatju me Quihndi rë me nguehe ngasunhndë, peru hacuiin xi cjuahachuva rë xuta ngasunhndë ta xi cuaxëtje rë xuta.

¹⁸Xuta xi mangucacun cojo Quihndi rë Nina ne, hacuiin chjaháchuva rë me. Peru me xi hacuiin mangucacun cojo Quihndi rë Nina ne, ha cachjaháchuva rë me ta, tsëhë xi hacuiin mangucacun me cojo me xi Quihndi ngu rë Nina.

¹⁹Hane cuitjin fahachuva Nina xuta ngasunhndë: Nina ne, ha catsingatju me Quihndi rë me ngasunhndë sacuha ngu ndihi xi sua hasen rë. Peru xuta ne, hitsë sa cachuya rë me tsëhë jñu xi cuma rë hasen ta, tsëhë xi xcusun xi casahmi me ne, suvá cjuatsehen. ²⁰Yëjë ni xuta xi sahmi xcusun tsehen ne, hatuxa chuyiin rë me tsëhë hasen, hisca sahmitiñaai me hiscan xi hasen, sa tu sesunhnga xcusun xi sahmi me. ²¹Peru xuta xi ndiya rë cjuaquixi xcusun xi sahmi me ne, sahmitiña me hiscan xi hasen, cojo sa xi sesunhnga xi xcusun xi sahmi me ne, vëhë xcusun xi meje rë Nina.

Chja Juan Vitenda rë Xuta tsëhë Jesús

²² Hya xi camá ne, quiji Jesús cojo xuta ladu rë me ngajan nguijña tsëhë distritu Judea. Hane ngajan caviyujutahá cojo me xuta xi cuacun vë. Hane cavitenda me xuta. ²³ Hacuaha ha nixtin hya ni ne, Juan Vitenda rë Xuta ne, tivitenda me xuta ngajan hiscan xi hmí rë Enón, tiña tsëhë Salim. Ngajan quitahá me ta, tsëhë xi ngajan ne, jemu yehe nandá tjin. Hane hacuaha quiji xuta caxtenda me. ²⁴ Nixtin hya ne, cjëë cjue Juan jan ndavaya.

²⁵ Quihndë ne, ngujo xuta ladu rë Juan ne, cavetsihin ticjanjo cjua rë me cojo ngu xutaxa rë yungun tsëhë xcusun changá rë me xi ma tyjahi me xcun Nina. ²⁶ Hya xi camá ne, quiji cachja me cojo Juan cuitjin:

—Maestro, ¿Há vitsjen nuju me xi casetaha cojo nuju ngunda vëhë tsëhë ndajyë Jordán, me xi canújun cojo niji tsëhë jan? ¡Chutsujun ta hacuaha cojo me vëhë tivitenda me, hane yëjë ni xuta cjujtjengui rë me! —Cuatjin cachja xuta xi cuacun jan.

²⁷ Ngajan xi Juan ne, cuitjin cafayan-gui me:

—Tsajin mé xi sacú cjuahatsja ngu xuta sa xi Nina suaaïn rë me. ²⁸ Ngayun suvun ne, ha canuhyun xi cachjá xi hacuiin ngahan Xihin xi Tsingatju Nina ta ngahan ne, cha xi catsingatju titjun Nina, sehe catsingatju Nina me vëhë. ²⁹ Chutsujun ta na xutavixan ne, tsëhë cha xutavixan na. Peru ngu cha amigu ndaja rë cha xutavixan xi secun tivisiñuju cjua rë cha xutavixan jan ne, jercu ndama rë cha tsëhë cjua rë cha vëhë. Vëhë xi ngahan xi sacuaha cha amigu rë cha xutavixan vë ne, jercu tu ndaja camahani má ná. ³⁰ Me vëhë ne, meje rë xi quihndë nga nchujun cuma jyë cuma hnga sa me cojo xa rë me, peru ngahan ne, hacuiin cuatjin

ta xi meje rë ne, cuijnetaha xa naha. —Cuatjin cafayangui Juan.

Me xi nduva tsëhë ngahnga

³¹ Me xi nduva tsëhë ngahnga ne, me vëhë xi hitsë sa jemu vengui chji rë me xi cuma rë yëjë xuta. Ngayaan xi tsëhë ngasunhndë ngayaan ne, ha xuta ngasunhndë ni ngayaan, hacuaha suvá cju-atacun rë ngasunhndë xi visiajme. Me xi nduva tsëhë ngahnga ne, me vëhë xi hitsë sa jemu vengui chji rë me xi cuma rë yëjë xuta. ³² Me vëhë ne, sua me machaya naja tsëhë xcusun xi cavëë me cojo tsëhë cjua xi cahndë me, peru xuta ne, fahatsjaaïn me cjua xi chja me vëhë. ³³ Peru ngujo xuta ne, fahatsja me cjua rë me vëhë, hane cuatjin maquixi xi Nina ne, quixi jain me cojo cjua rë me. ³⁴ Me xi Nina catsingatju rë ne, cjua rë Nina chja me ta, tsëhë xi Nina ne, hacuiin chuva hitsë sua me Hasen rë me. ³⁵ Nina Nahmi naja ne, jemu hmu cacun me Quihndi Ngu rë me, hacuaha yëjë ni xcusun ne, cavejña me tsja Quihndi rë me jan. ³⁶ Xuta xi mangucacun me cojo Quihndi rë Nina jan ne, tjin rë me cjuahñu xatsë. Peru xuta xi vihndiin me tsëhë Quihndi rë me jan ne, sacuiin rë me cjuahñu xatsë ta castigu rë Nina cuatju me cuma.

Cjuavisiajmi rë Jesús cojo na samaritana

4 Quihndë ne, cha fariseo ne, ca-machaya rë cha xi Jesús ne, hitsë sa cjín jima xuta ladu rë me xi cuma rë xuta ladu rë Juan, hacuaha hitsë sa cjín xuta tivitenda me xi cuma rë xuta xi tivitenda Juan. ² Peru suvá Jesús ne, cavitendaïn me ta xuta ladu rë me ne, me vëhë xi cavitenda me xuta. ³ Hane xi camachaya rë Jesús xi cuatjin camachaya rë cha fariseo xi cuacun vë ne, cavetjuxin me tsëhë distritu Judea. Hane cavuya quiji nga me ngu nandya tsëhë distritu Galilea.

⁴ Hane ndiya xi cjui me jan ne, tjin xi cuatju me ngujo nandya tséhë distritu Samaria.

⁵ Hya xi camá ne, cafehe me ngu nandya tséhë distritu Samaria xi hmí rë Sicar, ngu nandya xi tacun tiña tséhë nangui xi casua Jacob quihndi rë me José jemu hatsëë camahani. ⁶ Hane cahndé vëhë ne, tacun ngu ndava nandá xi casahmi Jacob. Hane tséhë xi jemu cafenda rë Jesús tséhë ndiya xi nduva me ne, quiji me cavéjña me hiscan ndava nandá jan. Sacuaha chuva rë nchisen xi cafehe me jan.

⁷ Hora vëhë ne, canduva ngu na samaritana, canduva jaha na nandá. Hane cuitjin cachja Jesús cojo rë na:

—Tuhun hitsë nandá cuëhë. —Cuatjin cachja me.

⁸ Hora vëhë ne, tsajin xuta ladu rë Jesús ta nandya quiji me xi cuatsë me xi sinë me cojo Jesús. ⁹ Ngajan xi na samaritana jan ne, cuitjin cachja na cojo Jesús:

—Ngayun xi xuta tjë rë Israel ngayun ne, ¿hacutjin má xi tichjahyun ná nandá, ngahan xi na samaritana ngahan ni? —(Cuatjin cachja na ta, tséhë xi xuta tjë rë Israel ne, hatuxa tsinguisihinjñii me cojo xuta samaritana.) ¹⁰ Ngajan xi Jesús ne, cuitjin cafayangui me tséhë na:

—Sa xi ngayun hyun cjuatjo xi Nina sua me hacuaha hyun yo ngahan xi tifehya nuju nandá ne, ngahan cachjahyun ná nandá, hane ngahan casuá nuju nandá xi sua cjuahñu. —Cuatjin cafayangui Jesús.

¹¹ Hane na vëhë ne, cuitjin cachja na:

—Tatá, peru ndava nandá vi ne, jemu nungun, hane tsajin quichuhun mé xi naxun cojo nandá. ¿Jani naxun nandá xi sua cjuahñu vë ni? ¹² Xutachanga naja Jacob casua niji me ndava nandá vi. Hacuaha cojo me cojo quihndi rë me cojo chu rë me cahvi me nandá tséhë ndava nandá vihi. ¡Ja! Peru ¿há hitsë sa

matitjun ngayun xi cuma rë me vëhë ni? —Cuatjin cachja na.

¹³ Hane xi cafayangui Jesús ne, cuitjin cachja me cojo rë na:

—Yëjë ni xuta xi hvi me nandá vihi ne, cuma xinda nga rë me. ¹⁴ Peru xuta xi cuihi me nandá xi suá ngahan ne, hatuxa ha quihndë tsajin nu tsajin nixtin xi cuya cumaxinda nga rë me ta nandá xi suá ngahan ne, cuma sacuaha ngu nandá xi ña vangatë xi sua rë me cjuahñu xatsë. —Cuatjin cachja me.

¹⁵ Ngajan xi na vëhë ne, cuitjin cachja na cojo Jesús:

—Tatá, tuhun ná hitsë nandá xi nújun vë, cojo sa xi cumaxindaain ná hacuaha ha quihndë cuinduvaan jaha nandá. —Cuatjin cachja na.

¹⁶ Hane Jesús ne, cuitjin cachja me cojo rë na:

—Tángun chjuhun xihin nuju, sehe nduvuncujun me nguehe. —Cuatjin cachja me.

¹⁷ Ngajan xi na vëhë ne, cuitjin cafayangui na:

—Tsajin xihin naha. —Cuatjin cafayangui na.

Hane cuitjin cachja Jesús cojo rë na:

—Ndaja nújun xi tsajin xihin nuju ta ¹⁸ hñú cha xi cavinechuncujun, hane cha xi nechuncujun quihndë ne, hacuiin xihin nuju cha. Canújun cjuaquixi. —Cuatjin cachja Jesús cojo rë na.

¹⁹ Ngajan xi na vëhë ne, cuitjin cafayangui na:

—Tatá. Xi má ná ne, ngayun ne, ngu profeta ngayun. ²⁰ Xutachanga niji ne, nguehe ndetjún vihi canduva cafaharcun me Nina. Hane ngayujun ni xuta nangui rë Israel ne, nújun ta Jerusalén ne, ngajan tacun cahndé xi meje rë xi cjue chjahárcun rë Nina. —Cuatjin cafayangui na.

²¹ Ngajan xi cachja Jesús cojo rë na cjua vihi:

—Ngayun chjuun, catamacjain nuju cja xi cuichjá vi: cuechú nixtin xi hacuiin ndetjún vihi hacuiin Jerusalén chjuhuncun Nina Nahmi naja. ²²Ngayun xuta samaritano ne, chjuhuncun Nina, peru hyúun me xi ndandaja. Ngayin ne, ha hyinndijin Nina ta, tsëhë xi me xi cuaxëtje rë xuta ne, cuetjujñi me ngajñi niji ngayin xuta nangui Israel. ²³Cuechú nixtin o ha hisca cavechú nixtin xi xuta xi cjuaquixi xi faharcun me Nina Nahmi naja ne, Hasen rë Nina cuisecoo rë me xi cjuaharcun me Nina cojo cjuaquixi. Ha cjuaquixi ta xuta xi cuatjin sahmi me ne, me vëhë xi meje rë Nina Nahmi naja xi cjuaharcun rë me. ²⁴Nina ne, Hasen me. Hane xuta xi faharcun rë me ne, hatuxa meje rë xi Hasen rë Nina cuisecoo rë me xi cjuaharcun me Nina cojo cjuaquixi. —Cuatjin cachja Jesús.

²⁵Hane chjuun jan ne, cuitjin cachja na cojo Jesús:

—Ngahan ne, ha hvë xi cuinduva Me xi Tsingatju Nina, me xi hmí rë Cristu. Hane hya xi cuinduva me vëhë ne, suacuenda naja me yëjë ni cjuatacun. —Cuatjin cachja na.

²⁶Ngajan xi Jesús ne, cuitjin cachja me cojo rë na:

—Ngahan xi tichjá cojo nuju vi ne, ha ngahan xi nújun vë. —Cuatjin cachja me.

²⁷Hane hora vëhë cavuya xuta ladu rë Jesús xi quiji jaha me comida. Hane jemu quijircun rë me xi cavëë me xi visiajmi Jesús cojo rë ngu chjuun. Peru hisca ngu me xi cuacun vë cavinenguisiin me cuitjin: “¿Mé xi meje nuju?” o “¿mé xi visiajmu cojo rë na?” Cuatjin camá. ²⁸Chjuun jan ne, cavejña na nisa rë na, sehe cavuya quiji na nandya, hane cuitjin cachja na cojo xuta:

²⁹—Nduvun cuanguen chutsejen ngu me xi cachja cojo ná yëjë xcusun xi casahme. ¿Hacuiin hacui me vëhë xi Tsingatju Nina? —Cuatjin cachja na.

³⁰Hya xi camá ne, cavetju xuta quiji me cojo rë na hiscan quitahá Jesús. ³¹Jinguyëjë rë ne, xuta ladu rë Jesús jan ne, cuitjin cachja me:

—Maestro, xinu niñu. —Cuatjin cachja me.

³²Peru Jesús ne, cuitjin cafayangui me:

—Ngahan ne, ha tjin xi sínë xi ngayun ne, hyúun mé jan. —Cuatjin cafayangui me.

³³Ngajan xi xuta ladu rë Jesús jan ne, cuitjin cavinenguisse xicjin me xingu xingu me:

—¿Há cuma cacun sa xi tjin yo xi cafehe cani xi cajnë me? —Cuatjin cavinenguisse xicjin me.

³⁴Hane Jesús ne, cuitjin cachja me cojo xuta ladu rë me jan:

—Jemu chuya rë xahasen naja xi chinë niñu. Peru ngahan ne, hitsë sa chuya rë xahasen naha xi sahme sacuatjin meje rë me xi catsingatju ná, hacuaha hitsë sa chuya rë xahasen naha xi tsingujñetaha xa xi casua ná me. ³⁵Chja ngu cja ta: “Chaja sa ñuju sá, sehe tjunihnga rë xitjë.” Peru ngahan cuichjá cojo nuju ta chutsujun xuta ta, tsëhë xi tangun me cojo xitjë xi ha camacha, ha cuma tjunihnga rë. ³⁶Me xi tivunihnga xitjë ne, ha tifaha me chji rë me, cuma cuinújan ne, tisahmi tangun me xuta xi sacú rë xuta xi cuacun vë cjuahñu xatsë. Cuatjin tijima cojo sa xi tangun cuiyujusua me xi vincha tjë cojo me xi vunihnga xitjë. ³⁷Quixi cja xi chja xi: “Hacjahi cha xi vincha tjë ne, hacjahi cha xi vunihnga xitjë.” ³⁸Ngahan catsingátju nuju chunihngun xitjë hiscan xi hacuiin ngayun canihñu xa. Jingusa me casahmi me xa, hane ngayun cavisuhunñu ngajñi rë xa rë me. —Cuatjin cachja Jesús cojo xuta ladu rë me.

³⁹Jemu cjín xuta samaritano tsëhë nandya jan camangu cacun me cojo Jesús, ngatsë rë cja xi cachja chjuun jan

cuitjin: “Cachja me cojo ná yějě xcusun xi casahme.” ⁴⁰ Ngajan xi hya xi cafehe xuta samaritano ngajan hiscan quitahá Jesús ne, cachja xuta jan cojo rě me xi cjue cuejña me cojo rě me. Hane Jesús ne, quiji cavějña me jo nixtin cojo xuta xi cuacun jan. ⁴¹ Hane jemu cjín sa xuta xi camangu cacun me ngatsě rě cjua rě suvá Jesús. ⁴² Hane chjuun jan ne, cuitjin cachja xuta jan cojo rě na:

—Ha quihndě hacuín ngatsě rě cjua riji xi mangutacufín ta, tsěhě xi suvin canuhyin cjua rě me, hane ngayin ne, hyin ta cjuaquixindaja xi me vihi xi cuaxětje me xuta. —Cuatjin cachja xuta jan.

Camandaja quihndi rě ngu xutaxa rě casahmi Jesús

⁴³ Xi cavatju jo nixtin jan ne, cavetju Jesús cojo xuta ladu rě me, quiji me ngu nandya tsěhě distritu Galilea. ⁴⁴ Ta suvá Jesús cachja me xi quixi xi xuta ne, faharcuaain me profeta xi tsěhě nangui rě me. ⁴⁵ Věhě xi hya xi tivatju Jesús ngujo nandya tsěhě distritu Galilea ne, ndaja cafahtsja xuta me ta, tsěhě xi hacuaha cojo xuta jan quiji me suhi ngajan Jerusalén, hane ngajan cavěě me yějě xcusun xi casahmi Jesús nixtin rě suhi jan.

⁴⁶ Hya xi camá ne, cavuya cafehe me Caná, ngu nandya tsěhě distritu Galilea, hiscan xi casahmi me xi nandá ne, cavuya camá xan rě uva. Hane ngajan nandya Capernaum ne, cavějña ngu xutaxa rě xi hmu rě cha quihndi rě me. ⁴⁷ Hane xi camachaya rě me xi cafehe Jesús ngajan Caná ne, cavetju me quijit-jengui me Jesús. Hane xi cafehe me jan ne, cafehya me favor cojo Jesús xi cjue Jesús cojo rě me nangui rě me xi sahmi Jesús xi cumandaja quihndi rě me ta ha tu hora sa xi cueya. ⁴⁸ Ngajan xi Jesús ne, cachja me cuitjin cojo xutaxa rě jan:

—¡Ngayujun ni ngayun ne, sa xi chuun cjuarcun ne, cumanguaain camahani tacún cojo ná! —Cuatjin cachja Jesús.

⁴⁹ Ngajan xi xutaxa rě jan ne, cuitjin cafayangui me:

—Tatá, cuanguen sanii, chaja sa xi cueya quihndi naha. —Cuatjin cafayangui me.

⁵⁰ Hane Jesús ne, cuitjin cachja me:

—Cuma cuangun ta, quihndi nuju ne, jimandaja cha. —Cuatjin cachja Jesús.

Hya xi camá ne, xutaxa rě jan ne, camacjain rě me cjua xi cachja Jesús, hane cavetju me quiji me. ⁵¹ Hane ndiya cjui me ne, cavechútáha me ngujo cha mosu hndixahan rě me, hane cachja cha cojo rě me xi cha quihndi rě me ne, tijimandaja cha. ⁵² Ngajan xi xutaxa rě jan ne, cavinenguise me cojo cha hndixahan rě me jan mé hora cavetsihin camandaja cha hmu rě jan. Hane cha hndixahan rě me jan ne, cuitjin cachja cha:

—Ngujña fane ngu cavetjuxin chíhin-suě xi sahmi cojo cha. —Cuatjin cachja cha.

⁵³ Hane nahmi rě quihndi jan ne, ha věě me ta hora věhě xi cachja Jesús cojo rě me xi quihndi rě me ne, tijimandaja cha. Cuatjin camá xi xutaxa rě jan cojo yějě xuta rě me ne, camangu cacun me cojo Jesús.

⁵⁴ Cuatjin camá xi, hya xi cavetju Jesús tsěhě ladu rě distritu Judea hane cafehe me Caná, distritu Galilea ne, casahmi me cjuarcun xi majo xi casahmi me ngajan.

Ndava nandá xi hmí rě Betesda

5 Xi cavatju nixtin xi cuacun vě ne, quiji Jesús ngajan Jerusalén xi cjue me suhi xi cuma ngajan yungun xi matitjun.

² Quihndě ne, ngajan Jerusalén ne, tiña tingotjo Chu Tsánga ne, ngajan tacun ngu ndava nandá xi tjin rě hñú cahndě ngahma ndihya. Hane ndava nandá věhě ne, xi hne hebreo ne,

Betesda hmí rë. ³Cahndé jan ne, jemu cjín xuta siuhmu me. Siu xuta rcá, siu xuta rengun, siu xuta xi quixíhñu yojo rë xi tacunya rë me xi cuiniya nandan ⁴ta jiya hora jiya hora ne, finiya nandan ta ngu ángel ne, vijne tsiniya nandan jan. Sehe cha xi tjun cuisehen ne, marqui rë tséhë chíhin xi má rë. ⁵Hane ngajñi rë xuta hmu rë xi cuacun jan ne, jiña ngu cha xi ha tjín rë can tyjuhunjyan nu xi hmu rë cha. ⁶Hane xi cavëë Jesús xi cuatjin jiña cha hacuaha ha vëë me xi ha jemu tsëë hmu rë cha ne, cavinenguise me cha cuitjin:

—¿Há meje nuju xi cuma ndaja ngayun? —Cuatjin cavinenguise Jesús.

⁷Hane cha hmu rë jan ne, cuitjin cafayangui cha:

—Tatá, tsajin yo xi tsinguisehen ná ndava nandá hora xi finiya nandá. Jinguýëjë rë xi tifé tiña ne, hacjahi me xi ha cavisehen. —Cuatjin cafayangui cha.

⁸Ngajan xi Jesús ne, cuitjin cachja me cojo cha:

—Tisatjunhngun, chjuhun nijña nuju, sehe tuyjuhunyun. —Cuatjin cachja Jesús.

⁹Cha vëhë ne, ha tu ñahñu camandaja cha, cafaha cha nijña rë cha, cavetsihin catsuyjihiya cha.

Nixtin vëhë ne, nixtin xi chjahájenda rë. ¹⁰Ngajan xi xutaxa rë yungun ne, cachja me cojo cha xi camandaja jan cuitjin:

—Quihndë ne, nixtin xi chjahájenda rë. Nda jintjin xi cuatjin quichehe nijña riji. —Cuatjin cachja me.

¹¹Hane cha xi camandaja jan ne, cuitjin cafayangui cha:

—Me xi casahmi xi camandaja ngahan ne, me vëhë cachja me cojo ná xi cjuahá nijña naha sehe tsuyjehëya. —Cuatjin cachja cha.

¹²Ngajan xi xutaxa rë jan ne, cavinenguise nga me cuitjin:

—¿Hane yo xi cachja cojo ri xi chjehe nijña riji ne, sehe tuyjihiye? —Cuatjin cavinenguise me.

¹³Peru cha xi camandaja jan ne, hvíin cha yo ta, tséhë xi Jesús ne, cavetjuxin me tséhë cahndé vëhë, tséhë xi jemu xutacjin quitsë me.

¹⁴Hane xi cavatju vëhë ne, cavechútáha Jesús cha ngajan yungun xi matitjun, hane cachja me cojo cha cuitjin:

—Chutsujun ni, camandaja ngayun. Quihndë ne, xicavinechunyuun sa ndiya rë cjuatsehen, sa tu choho sa cuatjun cuma. —Cuatjin cachja Jesús cojo cha.

¹⁵Sehe cavetju cha quiji cachja cha cojo xutaxa rë ta me xi casahmi xi camandaja cha ne, Jesús. ¹⁶Vëhë xi xutaxa rë jan ne, tsuyjihiyatjengui me Jesús cojo cjuahngatacun ta, tséhë xi casahmi Jesús xcusun vëhë nixtin xi chjahájenda rë. ¹⁷Ngajan xi Jesús ne, cuitjin cachja me cojo xutaxa rë jan:

—Nahmi naha ne, hisca quihndë ti-sahmi me xa, hacuaha ngahan ne, ti-sahme xa. —Cuatjin cachja Jesús.

¹⁸Ngatsë rë cjua vëhë ne, xutaxa rë jan ne, hitsë sa cavangui me chuva rë xi tsiquehen me Jesús. Cuatjin casahmi xutaxa rë ta, tséhë xi hacuiin suvá ni cafaharcuaain Jesús nixtin xi chjahájenda rë ta hacuaha cachja me xi Nahmi rë me ne, Nina. Hane xi cuatjin cachja Jesús ne, tsingacun me xi tangun me cojo Nina.

Xa xi tjín rë Quihndi rë Nina

¹⁹Ngajan xi Jesús ne, cuitjin cachja me cojo xutaxa rë xi cuacun jan:

—Cuichjá cojo nuju cjuaquixi ta ngahan xi Quihndi rë Nina ngahan ne, tsajin mé xi cuma sahme xi cojo cjuatacun naha suva ta xi vutsején xi sahmi Nahmi naha ne, vëhë xi sahme. Xcusun xi sahmi me vëhë ne, hacuaha xcusun vëhë sahme ngahan Quihndi rë me. ²⁰Nahmi naha ne, hmu cacun ná me, ngahan Quihndi

rë me, hacuaha tsingacun ná me yějë xcusun xi sahmi me. Hane xcusun xi sehe tsingacun ná me ne, hisca yehe sa xi cuma rë xcusun xi casahme xi camandaja cha hmu rë jan. Cuatjin cuma cojo sa xi ngayun ne, cjuercun nuju. ²¹ Sacuatjin faha Nahmi naha nima sehe sua nga rë me cjuahñu ne, hacuanitjin ni ngahan Quihndi rë me ta suá rë cjuahñu yo xi meje suá rë. ²² Nahmi naha ne, tsajin yo tsichuva me cojo cjuatacun rë ta ntsa ngahan cavejña me yějë xa vëhë, ²³ cojo sa xi yějë ni xuta ne, cjuaharcun me ngahan sacuatjin faharcun me Nahmi naha. Yo xi cjuaharcuaain ná ngahan ne, faharcuaain rë Nahmi naha, me xi catsingatju ná.

²⁴ Cuichjá cojo nuju cjuaquixi ta xuta xi vihndë me cjua xi chjá hacuaha mangucacun me cojo rë Nina, me xi catsingatju ná ne, tjin rë me cjuahñu xatsë. Hacuaha cumachuvaain me cojo cjuatacun rë me ta sacua ha xi ha cahme me hacuaha ha casacu rë me cjuahñu xatsë. ²⁵ Cuichjá cojo nuju cjuaquixi ta cuechú nixtin o ha hisca cavechú nixtin xi xuta xi hndiin tsëhë Nina sacua nima ne, cuihndë me xta naha, ngahan xi Quihndi rë Nina ngahan. Hane me xi cuihndë tsahan ne, sacú rë me cjuahñu xatsë. ²⁶ Cjuahñu xi tjin rë Nina ne, tsajin yo casua rë me, ta nduva tsëhë cjuandaja rë suva me. Hane hacuanitjin ná ngahan, ta casua ná cahndë xi hacuaha tjin ná cjuahñu tsëhë cjuandaja rë suvá. ²⁷ Hacuaha casua ná me xa xi tsichúva xuta cojo jyé rë me ta, tsëhë xi ngahan ne, Quihndi rë Xuta Jain ngahan. ²⁸ Hacuain cjuercun nuju tsëhë cjua naha. Cuechú nixtin xi yějë ni nima xi hinchahantsua tsjun rë ne, cuihndë xta naha, ²⁹ sehe cuetju tsëhë tsjun rë. Hane nima xi ndaja xcusun casahmi xcun cjuahñu rë ne, sacú rë cjuahñu xatsë. Hane nima xi choho xcusun casahmi ne, cuatju castigu. ³⁰ Ngahan ne, hatuxa

tsajin mé xi sahme xi cojo cjuatacun naha suva ta, sacuatjin cjua xi víhndë xi chja Nahmi naha ne, cuatjin tsichúva xuta cojo cjuatacun rë me. Hane hatuxa quixi ngahan cojo cjuatacun naha ta, tsëhë xi sahme hacutjin xi meje ná suva ta sacuatjin xi meje rë Nahmi naha, me xi catsingatju ná ne, cuatjin xi sahme. —Cuatjin cachja Jesús.

Hacutjin cumachaya naja yo xi Jesucristu

³¹ Cjuinduju sa tichja Jesús cojo xutaxa rë yungun cuitjin:

—Sa xi ngahan cuichjá favor naha suva ne, cuinújun ta quixiin cjua xi chjá. ³² Peru tjin sa ngu xi tichja favor naha, hane hvë ta cjua xi chja me vëhë tsahan ne, cjuaquixi. ³³ Ngayun ne, caningatjun xuta quiji cavinenguise rë me Juan ngu cjua, hane Juan ne, catsicuya me cjua xi cjuaquixi. ³⁴ Peru ngahan ne, me xi tichja me favor naha hacuiin xuta me, peru cjua xi tichjá vi ne, tichjá cojo sa xi ngayun ne, cuetjuntjun. ³⁵ Juan vë ne, sacua ngu ndihi xi setí xi sua hasen rë camá me. Hane ngayun ne, cachuya nuju tsëhë xi cavinechun sua ngujo nixtin ngajñi rë cjuahasen rë Juan. ³⁶ Peru ngahan ne, tjin xcusun xi hitsë sa ndaja tsingacun yo ngahan xi cuma rë cjua xi cachja Juan tsahan. Xa xi casua Nahmi naha ngahan xi sahmechehen ne, cuma cuinújan ne, xa xi ha tisahme ne, suvá xa vëhë tsingacun xi Nahmi naha catsingatju ná me. ³⁷ Hacuaha Nahmi naha, me xi catsingatju ná ne, chja me favor naha. Ngayun ne, hisca xta rë me cjëë cuinuhyun, hacuaha cjëë chun hacutjin jyihi me. ³⁸ Hisca cjua rë me ne, tsajin tetjo ngajñi rë cjuatacun nuju ta, tsëhë xi ngahan xi catsingatju ná me vëhë ne, manguaain tacún cojo ná. ³⁹ Ngayun ne, jemu chutayun xujun rë Nina ta, tsëhë xi ningatuhun tacún ta xi cuatjin chutayun ne, sacú nuju cjuahñu xatsë. Hane xujun

vêhë ne, vêhë xi chja favor naha. ⁴⁰ Hane ngayun ne, mijí cuisuhun ladu naha xi sacú nuju cjuahñu xatsë.

⁴¹ Ngahan ne, hacuiin sahmi ngujoyë xi xuta sahmi jyë sahmi hnga ná me.

⁴² Hacuaha ngahan ne, ha hvë xcusun nuju ta tsajin cjuahmutacun rê Nina jiya cahntsua xahasen nuju. ⁴³ Ngahan ne, canduvá ta, tsëhë xi Nahmi naha casuaxa ná me, peru ngayun ne, mijí chjuhun-

ntsun ná. Hane sa xi jingu sa xuta cuin-duva me cojo cjuatacun rê suvá me ne, ha hvë ta me vêhë ne, hatuxa chjuhun-

ntsun me. ⁴⁴ Tsajin nixtin xi cumangu tacún cojo ná ngahan jinguyëjë rê xi tivinchun chuva rê xi ngajñi nuju cojo xingun ni ne, sahmi yehe sahmi hnga nuju me hane vinchunsuun xi Nina xi ngu tu tu ni ne, me vêhë sahmi yehe sahmi hnga nuju me. ⁴⁵ Xicaningatuun

tacún xi ngahan cuíncha jyë nuju xcun Nahmi naha ta xutachanga naja Moisés, me xi jemu vetuhun tacun ne, me vêhë xi cuíncha jyë nuju me. ⁴⁶ Sa xi camac-

jain nuju cjua xi catsihindu Moisés ne, hacuaha camacjain nuju cjua naha ta Moisés vë catsihindu me tsahan. ⁴⁷ Peru sa xi macjaain nuju cjua xi catsihindu Moisés ne, ¿hacutjin cumacjain nuju cjua xi chjá ngahan ni?

Catsicjen Jesucristu hñú mil xihin

6 Xi cavatju yëjë xcusun vêhë ne, cavetju Jesús quiji me ngunda vêhë tsëhë laguna Galilea, xi hacuaha hmí rê laguna Tiberias. ² Hane jemu xutacjín camahani xi quijitjengui me Jesús ta, tsëhë xi cavëë me cjuarcun xi casahmi Jesús cojo xuta hmu rê. ³ Hane Jesús ne, quijiniji me ngu ndetjún, hane ngajan cavéjña me cojo xuta ladu rê me. ⁴ Hane Pascua, suhi xi sahmi xuta tjë rê Israel ne, hacuaha ha camatiña. ⁵ Hane xi vutsejen Jesús xi jemu xuta cjín nduvatjengui rê me ne, sehe cachja me cojo Felipe cuitjin:

—¿Jani cuanguen chaan niñu xi sinë xuta xi cuacun vë? —Cuatjin cachja Jesús.

⁶ Cuatjin cachja me xi cjuahachuva me Felipe ta, tsëhë xi Jesús ne, ha vëë me mé xi sahmi me. ⁷ Ngajan xi Felipe ne, cuitjin cafayangui me:

—Sa xi chaan niñu cojo tujún xi chji rê xuta jo cientu nixtin ne, hisca chutaain xi sacú tsë tsë sinë jima ngu xuta vë. —Cuatjin cafayangui Felipe.

⁸ Ngajan xi ngu xuta ladu rê Jesús, Andrés hntsë Simón Pedru ne, cuitjin cachja me cojo Jesús:

⁹ —Nguehe secun ngu cha lihndi xi yaha hñú niñu cojo jo chu ti. Peru ¿mé chutaha vë xi sinë xuta xi cuarcumu cjín me? —Cuatjin cachja Andrés.

¹⁰ Ngajan xi Jesús ne, cuitjin cachja me:

—Tinújun cojo xuta vë ne, catiyuju me. —Cuatjin cachja me.

Quihndë ne, ngajan cahndë vêhë ne, jemu jyë cahndë tjin ndiji. Hya xi camá ne, ngajan caviyuju sacuaha hñú mil xihin. ¹¹ Ngajan xi Jesús ne, cafaha me niñu jan, hane, xi caffè casua me nacuechji rê Nina ne, sehe cavatëcja me niñu jan ngajñi rê xuta xi siu jan. Hacuanitjin ni casahmi me cojo chu ti jan. Casua me ha tucutjin xi meje sinë xuta jan. ¹² Hane hya xi ha catsë rê xuta xi cajnë me ne, sehe cachja Jesús cojo xuta ladu rê me jan cuitjin:

—Quihndë ne, chjayun yëjë xi cavángui vë ne, cojo sa xi hacuiin chajá hisca hitsë. —Cuatjin cachja Jesús.

¹³ Hane xi cafaya xuta ladu rê Jesús yëjë ni xi cavángui tsëhë hñú niñu xi cajnë yëjë xutacjín jan ne, catsinguitsë me tejó chajne. ¹⁴ Hane xi cavëë xuta cjuarcun xi casahmi Jesús jan ne, cuitjin cachja me:

—Cjuaquixi xi me vihi profeta xi cuin-duva ngasunhndë. —Cuatjin cachja xuta jan.

¹⁵ Peru Jesús ne, ha vëë me xi ha tu hora sa xi cjuaha xuta me cojo ngujoyë camahani xi suaxa rë me xi cuma titjun me. Vëhë xi Jesús ne, cavetjuxin nga me, quiji suvá ni me hisca rcu ndetjún.

Quiji ntsacu Jesucristu xcun nandá

¹⁶ Quihndë ne, xi quiji hora jan ne, quijijne xuta ladu rë Jesús tjehe laguna. ¹⁷ Hane xi cavisehen me ngu barcu ne, cavuya canduva nga me ngunda vihi tsëhë laguna xi cjue me nandya Capernaum. Hya xi camá ne, camajñu, peru Jesús ne, cjëë cjuetjengui me xuta ladu rë me jan. ¹⁸ Hane hora vëhë ne, xi jercu tu hñu camahani tivanga tjo ne, sacuahá xi sexu nandá tsëhë laguna jan. ¹⁹ Haxcun xi ha quiji me xi cuacun jan cojo barcu sacuahá hñu o sa jyun kilómetro xcun nandá jan ne, cavëë me xi nduva ntsacu Jesús xcun nandá, tisahmitiña me tsëhë barcu. Hane xuta ladu rë me jan ne, catsacjun me camá. ²⁰ Peru Jesús ne, cachja me cuitjin cojo xuta ladu rë me jan:

—Ngahan vi. Xicarcuun. —Cuatjin cachja me.

²¹ Ngajan xi xuta ladu rë Jesús jan ne, cojo yëjë ni cjuasua ne, cafahtsja me Jesús cahntsua barcu. Hane ha tu ñahñu cafehe barcu cojo rë me nangui quixí, cahndë hiscan cjuí me.

Cavanguise xuta Jesús

²² Hane xi camá nchujun jan ne, xutacjin xi caviyuju ngunda vëhë tsëhë laguna jan ne, catsinguitsjen me xi nguñña ne, ngu tu tu barcu tacun jan. Hacuaha vëë me xi Jesús ne, quijiin me cojo xuta ladu rë me barcu vëhë ta suvá ni xuta ladu rë Jesús quiji me. ²³ Peru ngujo barcu xi canduva tsëhë nandya Tiberias ne, cafehe tiña hiscan xi cajinë xutacjin jan niñu hora xi cafë casua Nai naja nacuechji rë Nina. ²⁴ Hane xi cavëë xutacjin jan xi hacuiin Jesús hacuiin xuta

ladu rë me siu cuaha me jan ne, sehe cavisehen me barcu xi sehe cafehe jan, quiji me nandya Capernaum xi cuanguise me Jesús.

Jesucristu ne, sacuahá niñu xi sua cjuahñu me

²⁵ Hane xi casacu rë xuta xi cuacun jan Jesús ngunda vihi tsëhë laguna jan ne, cavinenguise me cuitjin:

—Maestro, ¿janihya canduvun nguehe ni? —Cuatjin cavinenguise xuta xi cuacun jan.

²⁶ Ngajan xi Jesús ne, cuitjin cafayangui me:

—Cuichjá cojo nuju cjuaquixi ta ngayujun ni ngayun ne, nduvuntjengun ná, peru hacuiin ngatsë rë xi cahyun cjuarcun xi casahme ta ngatsë rë xi cachinu niñu jan hisca xi catsë nuju. ²⁷ Nihñu ngatsë rë xichine, peru hacuiin xichine xi vetsun ta xichine xi hacuiin vetsun hacuaha hisca sua cjuahñu xatsë. Vëhë xichine xi suá nuju ngahan xi Quihndi rë Xuta Jain ngahan, ngahan xi sahme cjuarcun cojo sa xi cumatsejen xi cjuaquixi jain xi Nina Nahmi naha catsingatju ná me. —Cuatjin cafayangui Jesús.

²⁸ Ngajan xi xuta xi cuacun jan ne, cuitjin cavinenguise me cojo Jesús:

—¿Hacutjin ndatjin nihñi, cojo sa xi nihñi hacutjin xi chuya rë Nina? —Cuatjin cavinenguise xuta jan.

²⁹ Hane Jesús ne, cuitjin cafayangui me:

—Cuitjin meje rë Nina xi nihñu: cata-mangu tacún cojo ná, ngahan xi catsingatju ná me. —Cuatjin cafayangui Jesús.

³⁰ Ngajan xi xuta jan ne, cuitjin cavinenguise me Jesús:

—¿Mé cjuarcun nihñu xi sacú chutsijín, cojo sa xi cumangu tacún cojo nuju? ¿Mé xi nihñu? ³¹ Yëjë ni xutachanga naja ne, cajinë me niñu xi camá cojo scuan maná ngajan ngu xín camahani tsëhë

nandya, sacuatjin camahindu xcun xujun rē Nina xi chja cuitjin: “Nina ne, tsēhē ngahnga catsingatju me niñu xi cajiñē xuta.” Cuatjin camahindu. —Vēhē cja xi cavinenguise xuta xi cuacun jan Jesús.

³²Ngajan xi Jesús ne, cuitjin cachja me cojo xuta jan:

—Cuichjá cojo nuju cjuaquixi ta hacuiin Moisés xi casua me niñu xi nduva tsēhē ngahnga ta Nahmi naha xi sua nuju me niñu jain xi nduva tsēhē ngahnga. ³³Niñu xi sua Nina ne, vēhē niñu xi nduvajne tsēhē ngahnga hacuaha sua rē xuta cjuahñu. —Cuatjin cachja Jesús.

³⁴Hane xuta xi cuacun jan ne, cuitjin cafehya me cojo Jesús:

—Tatá, tuhun niji niñu vēhē nchunchujun ni. —Cuatjin cafehya xuta jan.

³⁵Ngajan xi Jesús ne, cuitjin cachja me:

—Ngahan xi sacuaha niñu jan xi sua cjuahñu ngahan. Xuta xi cuisehen me ladu naha xi mangucacun me cojo ná ne, ña tsē rē xahasen rē me cjuandaja, sacuaha xi ha quihndē cumavajin rē me cumaxindaain rē me ngundiya nga. ³⁶Ngahan ne, ha cachjá cojo nuju ta ha tichutsujun xcusun xi sahme peru manguaain tacún cojo ná. ³⁷Yējē ni xuta xi Nahmi naha casua ná me ne, cuinduvatjengui ná me. Hane me xi cuinduvatjengui ná ne, hatuxa tsitjungueen me ta, ³⁸tsēhē xi ngahan ne, xi canduvajne tsēhē ngahnga ne, hacuiin xi sahme sacuatjin xi meje ná ta sacuatjin xi meje rē me xi catsingatju ná. ³⁹Hane me xi catsingatju ná vē ne, meje rē me xi hisca ngu xuta tsēhē yējē ni me xi casua ná me ne, tsichajan me ta tsicúya me cjuahñu nixtin xi chjaháchuva rē sa nima sa xuta cojo cjuatacun rē. ⁴⁰Hacuaha Nahmi naha ne, meje rē me xi yējē ni xuta xi vijnercu me yo ngahan xi Qui-

hndi rē Nina ngahan hacuaha cumangu cacun me cojo ná ne, sacú rē me cjuahñu xatsē. Hane ngahan tsicúya me cjuahñu nixtin xi tsichuva Nina sa nima sa xuta. —Cuatjin cachja Jesús.

⁴¹Vēhē xi xutaxa rē yungun xi cuacun jan ne, cavetsihin cavisiajmihma me tsēhē Jesús ta, tsēhē xi cachja Jesús ta: “Ngahan sacuaha niñu xi nduvajne tsēhē ngahnga ngahan.” ⁴²Cuitjin cavisiajmihma me:

—¿Hacuiin cha Jesús vihi, xi quihndi rē José? ¿Hacuiin ha hyan nahmi rē cha hacuaha ha hyan naa rē cha? ¿Hacutjin má xi quihndē ne, chja cha xi tsēhē ngahnga canduvajne cha ni? —Cuatjin cavisiajmihma me.

⁴³Ngajan xi Jesús ne, cuitjin cachja me cojo xutaxa rē jan:

—Camá ni cuinújunhmu cojo xingun xingu xingu ngayun. ⁴⁴Xuta xi cuma cuisehen me ladu naha ne, suvá ni xuta xi cuisecoo Nahmi naha, me xi catsingatju ná. Me vēhē xi cuma cuisehen me, hane ngahan tsicúya me cjuahñu nixtin xi tsichuva Nina sa nima sa xuta. ⁴⁵Cuitjin camahindu xcun xujun rē Nina xi catsihindu profeta: “Suvá Nina scuxaha me cjuatacun rē yējē ni xuta.” Cuatjin camahindu. Hane xuta xi vetaharcu cja rē Nina hacuaha Nina vuxaha me cjuatacun rē ne, visehen me ladu naha.

⁴⁶Hacuiin xi ha tjin yo xi cavutsejen rē Nahmi naha ta suva ni ngahan xi tsēhē Nina canduva ne, ngahan xi cahvē Nahmi naha. ⁴⁷Cuichjá cojo nuju cjuaquixi ta yo xi mangucacun cojo ná ne, tjin rē cjuahñu xatsē. ⁴⁸Ngahan xi sacuaha niñu xi sua cjuahñu ngahan. ⁴⁹Yējē ni xutachanga nuju ne, cajiñē me niñu xi camá cojo scuan maná ngajan ngu xín camahani tsēhē nandya, peru cavechú nixtin xi cahme me. ⁵⁰Peru niñu xi nduvajne tsēhē ngahnga xi chjá ngahan tsēhē ne, sa xi yo sinē niñu vēhē ne, cueyaain. ⁵¹Ngahan xi quicun nga-

han ne, ngahan xi sacuaha niñu xi canduvajne tsëhë ngahnga jan ngahan. Sa xi ngu xuta sinë me niñu vëhë ne, handasa cueya me ne, peru hasen rë me ne, cjue xcun Nina. Niñu xi suá ngahan vë ne, hacui yojo naha xi suá cojo sa xi xuta ngasunhndë ne, sacú rë me cjuahñu xatsë. —Cuatjin cachja Jesús cojo xutaxa rë.

⁵² Hya xi camá ne, xutaxa rë jan ne, cavetsihin cavisiajmicjan me tsëhë Jesús ngajñi rë me cojo xicjin me, cuitjin cachja me:

—¿Hacutjin cuma sua cha xi cuajyihi vë yojo rë cha xi xinëë ni? —Cuatjin cachja xutaxa rë jan.

⁵³ Hane Jesús ne, cuitjin cachja me cojo xuta xi cuacun jan:

—Cuichjá cojo nuju cjuaquixi ta sa xi ngayun xinuu yojo naha ngahan xi Quihndi rë Xuta Jain ngahan hacuaha siuun jni naha ne, tsajin nuju cjuahñu xi cjuaquixi. ⁵⁴ Xuta xi jinë me yojo naha hacuaha hvi me jni naha ne, tjin rë me cjuahñu xatsë, hacuaha ngahan tsicúya me cjuahñu nixtin xi tsichuva Nina sa nima sa xuta. ⁵⁵ Cuatjin cuma ta, tsëhë xi yojo naha ne, vëhë comida xi cjuaquixi, hane jni naha ne, vëhë nandá xi cjuaquixi. ⁵⁶ Me xi jinë yojo naha hacuaha hvi me jni naha ne, visehen me yojo naja, hacuaha ngahan ne, visehen yojo rë. ⁵⁷ Nahmi naha, me xi hatuxa tjin rë cjuahñu ne, catsingatju ná me, hane ngatsë rë me vëhë xi tejña cjuahñu ngahan. Ha chuva vëhë ni ne, xuta xi jinë ná ne, cuejña me cjuahñu ngatsë naha. ⁵⁸ Cuatjin sahmi niñu xi canduvajne tsëhë ngahnga. Hacuian tangun cojo niñu xi cajinë xutachanga nuju ta cavechú nixtin xi cahme me. Ha ndaja xuta xi sinë me niñu xi chjá ngahan ne, handasa cueya me ne, peru hasen rë me ne, cjue xcun Nina. ⁵⁹ —Cuatjin cachja Jesús hya xi cavicuya me xuta ngu yungun ngajan nandya Capernaum.

Cjua xi sua machaya naja tsëhë cjuahñu xatsë

⁶⁰ Hya xi camá ne, jemu cjín xuta ladu rë Jesús xi cuitjin cachja me hya xi cahndë me cjua jan:

—¡Jemu choho visiajmi me! ¡Scaain naja cojo cjua vëhë! —Cuatjin cachja me.

⁶¹ Peru Jesús ne, ha vëë me cojo cjuatacun rë me xi cuatjin visiajmihma xuta ladu rë me xi cuacun jan. Vëhë xi cachja me cuitjin:

—Sa xi meje cuetjunxun tsëhë ndiya naha ngatsë rë cjua xi cachjá cojo nuju vë ne, ⁶² ¿mé ningatuhun tacún sa xi chutsujun xi cúya cjuéneje nga ngahnga hiscan xi cavitejña titjun, ngahan xi Quihndi rë Xuta Jain ngahan? ⁶³ Hasen rë Nina ne, vëhë xi sua cjuahñu. Peru ngu xuta ngasunhndë ne, hatuxa cumaji sahmi me cuatjin. Yëjë ni cjua xi ngahan cachjá cojo nuju ne, vëhë sua machaya nuju tsëhë Hasen rë Nina cojo tsëhë cjuahñu xi sua. ⁶⁴ Peru tjin yahnga ngayun xi manguaain tacún cojo ná. —Cuatjin cachja Jesús ta, tsëhë xi hisca ntsacu cavetsihin ne, ha vëë me yo xuta xi cumanguaain cacun cojo rë me hacuaha ha vëë me yo xi sahmi rë me entregadu.

⁶⁵ Hacuaha cachja sa me cuitjin:

—Vëhë xi cuatjin cachjá cojo nuju xi xuta xi cuma cuisehen me ladu naha ne, suvá ni xuta xi cuichja Nahmi naha xi cuisehen. —Cuatjin cachja Jesús.

⁶⁶ Ngatsë rë vëhë xi jemu cjín xuta ladu rë Jesús ne, quiji ngaxtun me, hacuaha ha quihndë catsujiin me cojo Jesús. ⁶⁷ Ngajan xi Jesús ne, cavinenguise me xuta ladu rë me xi tejó jan cuitjin:

—¿Hacuiin cojo ngayun meje cuangunxun? —Cuatjin cavinenguise me.

⁶⁸ Hane Simón Pedru ne, cuitjin cafayangui me:

—Ngayun nai naha, ¿yo cuanguintjen-guin?, ta ngayun ne, tjin nuju cja xisua machaya niji tsêhê cjuahñu xatsê.⁶⁹ Hacuaha ngayin ne, mangutacuín cojo nuju hacuaha hyin xi tsêhê jain Nina ngayun. —Cuatjin cafayangui Simón Pedru.

⁷⁰Ngajan xi Jesús ne, cuitjin cachja me:

—Handasa ngahan suva cavaxejen nuju ngayujun ni xi tejó ngayun, peru ngajñi nuju ne, jiyajñi ngu xi ha jiya xitsehen xahasen rê. —Cuatjin cachja Jesús.

⁷¹Jesús ne, tichja me tsêhê ngu cha tsêhê ngajñi rê xi tejó xuta ladu rê me, ngu cha xi hmí rê Judas, quihndi rê Simón Iscariote. Cuatjin cachja me ta, tsêhê xi cha vêhê sahmi cha me entre-gadu cojo condra rê me.

Jesucristu cojo xicjin me

7 Xi cavatju vêhê ne, catsujyihya Jesús ngujo nandya tsêhê distritu Galilea. Mijí tsujyihya me nandya xi siu ladu tsêhê distritu Judea ta, tsêhê xi xutaxa rê yungun ne, tivanguise me Jesús xi tsiquehen me. ²Quihndê ne, ha camatiña suhi tsêhê Ndiha Tsjian, suhi xi sahmi xuta tjê rê Israel. ³Ngajan xi me xi xicjin Jesús jan ne, cuitjin cachja me cojo Jesús:

—Tihin ngajan distritu Judea, cojo sa xi hacuaha cojo xuta ladu riji xi siu jan ne, scuêê me xcusun xi nihñi ta ⁴tsêhê xi ngu cha xi meje rê xi cumachaya rê xuta xcusun xi sahmi cha ne, hacuiin táha hma sahmi cha. Ngaye ta cuatjin jemu nihñi cjuandaja ne, ningacuin rê yêjê xuta cjuandaja vêhê. —Cuatjin cachja xicjin Jesús cojo rê me ta, ⁵tsêhê xi me xi cuacun vê ne, camanguaain cacun me cojo Jesús.

⁶Ngajan xi Jesús ne, cuitjin cafayangui me:

—Cjêê cuechú nixtin xi sahme mé xi sahme. Peru ngayun ne, tu mé ni nixtin ne, ndatjin xi cuma nuju. ⁷Ngayun ne, cumaji choho scuêê nuju xuta, peru ngahan ne, choho vêê ná me ta, tsêhê xi ngahan ne, chjá cjuaquixi xi xcusun xi sahmi me ne, hatuxa tsehen. ⁸Tángun ni ngayun ta ngahan ne, cjuéen suhi vêhê. Cjuéen ta cjêê cuetjucaa nixtin xi sahme mé xi sahme. —Cuatjin cafayangui Jesús.

⁹Xi cavatju cachja me cojo xicjin me cja vêhê ne, cavêjña ni me nangui rê me.

Quiji Jesucristu suhi tsêhê Ndiha Tsjian

¹⁰Hane xi cavatju quiji xicjin Jesús suhi jan ne, hacuaha cojo Jesús quiji me. Peru hacuiin táha tsejen ta sacuaha xi táha hma quiji me. ¹¹Hya xi camá ne, xutaxa rê yungun jan ne, cavanguise me Jesús hiscan jima suhi jan. Cuitjin cavinenguise me:

—¿Jani tacun cha vêhê? —Cuatjin cavinenguise me.

¹²Hane xutacjín jan ne, jercu visiajmihma me ngajñi rê me tsêhê Jesús. Ngujo me ne, cuitjin cachja me:

—Ngu xuta ndaja me. —Cuatjin cachja me.

Peru ngujo nga xuta ne, cuitjin cachja me:

—¡Jéya, vindacha cha xutacjín! —Cuatjin cachja me.

¹³Peru tsajin hisca ngu xuta xi cachjatê me tsêhê Jesús ta, tsêhê xi tsacjun me xutaxa rê yungun.

¹⁴Quihndê ne, hya xi camavasen tijima suhi jan ne, quiji Jesús yungun xi matitjun, sehe cavetsihin cavicuya me xuta cja rê Nina. ¹⁵Hane xutaxa rê yungun jan ne, quijircun rê me xi cuatjin jemu ndaja chja Jesús. Cuitjin cachja me ngajñi rê me cojo xicjin me:

—¿Hacutjin má xi cuarcu vechú cjuatacun rë cha vë xi hisca hacuiin cavutaya cha? —Cuatjin cachja me.

¹⁶Ngajan xi Jesús ne, cuitjin cachja me cojo xutaxa rë xi cuacun jan:

—Cjua xi vicuyá rë xuta ne, hacuiin cjua naha suva ta cjua rë me xi catsingatju ná. ¹⁷Sa xi ngu xuta meje sahmi me sacuatjin xi meje rë me xi catsingatju ná ne, ngajan sacú cumachaya rë me tsëhë cjua xi vicuyá, ¿há xi tsëhë Nina ne? o ¿há xi nduva tsëhë cjuatacun naha suva? ¹⁸Xuta xi chja me cjua xi nduva tsëhë cjuatacun rë suvá me ne, meje sahmi jyë sahmi hnga suvá me yojo rë me. Peru xuta xi meje sahmi jyë sahmi hnga me me xi catsingatju rë me ne, me vëhë ne, quixi me cojo cjua rë me hacuaha tsajin cjuatsehen cahntsua xahasen rë me.

¹⁹Moisés ne, casua nuju me ley rë Nina, peru hisca ngu ngayun nihñuchuun sacuatjin chja ley vëhë. ¡Tsëhë vëhë rë xi meje nicuhun ná! —Cuatjin cachja Jesús.

²⁰Ngajan xi xutacjín jan ne, cuitjin cafayangui me:

—¿Yo xitsehen xi cachja cojo nuju? ta nguehe ne, tsajin yo xi meje tsiquehen nuju. —Cuatjin cafayangui xutacjín jan.

²¹Hane xi cafayangui Jesús ne, cuitjin cachja me:

—Ngayujun ni ngayun ne, quijircun nuju ngatsë rë ngu xcusun xi casahme nixtin xi chjahájenda rë. ²²Peru suvá Moisés hacuaha cavejña me xcusun xi xtí chuxin rë quihndi xihin. (Xi cjuaquixi ne, hacuiin Moisés ta xutachanga nuju xi cavejña me xcusun vëhë.) Hane vëhë xi ngayun ne, vichun chuxin rë quihndi xihin handasa nixtin xi chjahájenda rë. ²³Sa xi vichun chuxin rë quihndi xihin nixtin xi chjahájenda rë cojo sa xi nihñuchuhun sacuatjin cjua xi chja ley rë Moisés ne, ¿mé má cuatjin ma cjan nuju cojo ná xi casahme xi camandaja cama-

hane ngu xuta nixtin xi chjahájenda rë ni? ²⁴Ha quihndë hacuiin tujyë nichuvun ná ta nichuvun ná cojo ngu cjuatacun xi cjuaquixi. —Cuatjin cachja Jesús.

¿Jani hiscan canduva Jesucristu?

²⁵Ngajan xi ngujo xuta nandya Jerusalén ne, cuitjin cachja me ngajñi rë me:

—¿Hacuiin me vihi xi vinchise rë xi cueya ni? ²⁶Peru chutsujun ta cuajyihi me secun me tichja tichja me cojo xuta, hane ndastu ngu cjua chja xutaxa rë cojo rë me. ¡Hyaan sa xi vëëndaja xutaxa rë xi me vihi xi catsingatju jain Nina me! ²⁷Me vihi ne, ha hyan jani canduva me, peru hya xi cuinduva me xi Nina tsingatju rë ne, tsajin yo vëë jani cuetju me cuinduva me. —Cuatjin cachja xuta xi cuacun jan.

²⁸Ngajan xi Jesús ne, xi quijinduju sa cavicuya me xuta ngajan yungun xi matitjun ne, jercu hñu cachja me cuitjin:

—¿Há quixi xi hyun ná hacuaha hyun jani canduva? Peru ngahan ne, hacuiin cjuatacun naha suva xi canduva. Me xi catsingatju ná ne, hatuxa quixi me cojo cjua rë me, peru ngayun ne, hyúun me. ²⁹Ngahan ne, hvë me ta, tsëhë xi hiscan tacun me ne, ngajan canduvá. Hacuaha me vëhë catsingatju ná me. —Cuatjin cachja Jesús.

³⁰Tsëhë xi cuatjin cachja Jesús cjua vëhë ne, vëhë xi meje cjuaha xuta xi cuacun jan me. Peru tsajin yo xi cavetahatsja rë me ta, tsëhë xi cjëë cuetjucaa nixtin xi cuatjin cuma. ³¹Hane jemu cjín xuta ngajñi rë xutacjín jan ne, camangu cacun me cojo Jesús. Cuitjin cachja me:

—Hya xi cuinduva me xi Nina tsingatju rë ne, ¿há hitsë sa cjín cjuarcun sahmi me xi cuma rë cjuarcun xi casahmi me vihi? —Cuatjin cachja xuta xi cuacun jan.

Catsingatju xutaxa rë yungun cha xi cjuaha rë Jesucristu

³² Hane ngujo cha fariseo ne, cahndë cha xi visiajmihma xutacjín jan ngajñi rë me cojo xicjin me cjuja vëhë. Ngajan xi yëjë ni nahmi xi matitjun cojo cha fariseo jan ne, catsingatju me mayu cojo nisë rë cha xi chjahá rë Jesús. ³³ Hane Jesús ne, cuitjin cachja me:

—Ngujo nixtin sa xi cuitejña cojo nuju, sehe cúa cjué nga hiscan tacun me xi catsingatju ná. ³⁴ Ngayun ne, cuinchun-sun ná, peru sacuiin nuju ngahan ta, tsëhë xi hiscan xi cuitejña ne, cumaji cuangun. —Cuatjin cachja Jesús.

³⁵ Ngajan xi xutaxa rë jan ne, cavinenguise xicjin me cuitjin:

—¿Jani cjue cha xi cuijyihí vi xi sacuiin naja cha? ¿Há cjue cha ngu nangui cjin, cjue tjengui cha xuta naja xi cavitsojo ngajñi rë xutaxín hane ngajan cuicuya cha xutaxín jan ni? ³⁶ ¿Mé vi-jne cjuja xi chja cha xi cuinchaseen cha ne, sacuiin naja cha, tsëhë xi hiscan cuejña cha ne, cumaji cuanguen? —Cuatjin cavinenguise xicjin xutaxa rë jan.

Nandá xi sua cjuahñu

³⁷ Quihndë ne, nixtin xi cajnetaha suhi jan ne, vëhë nixtin jyë tsëhë suhi jan. Hane casecun Jesús cachjahñu me cojo xuta cuitjin:

—Sa xi tjin yo xi xinda rë ne, catin-duva tjengui ná catihi. ³⁸ Xuta xi mangucacun me cojo ná ne, cuatju me sacuatjin chja xujun rë Nina xi chja cuitjin: “Cuetju tsëhë xahasen rë me sacuahha nandá xi ña vangatë xi sua rë me cjuahñu xatsë.” —Cuatjin cachjahñu Jesús.

³⁹ Xi cuatjin cachja Jesús ne, cachja me tsëhë Hasen rë Nina xi sehe sacú rë xuta xi mangucacun me cojo Jesús. Cuatjin cachja Jesús ta, tsëhë xi Nina ne, cjëë sua me Hasen rë me, tsëhë xi Jesús

ne, cjëë cuma jyë cuma hnga me cojo Hasen rë me.

Hacuiin ngu ni cjuatacun catsingataha cacun xutacjín

⁴⁰ Hane xi cahndë xutacjín jan cjuja vëhë ne, ngujo me ne, cuitjin cachja me: —Me vëhë ne, cjuaquixi xi me vëhë profeta xi jemu nechanyan rë. —Cuatjin cachja ngujo me.

⁴¹ Hane ngujo nga me ne, cuitjin cachja me:

—Me vëhë xi Tsingatju Nina. —Cuatjin cachja me.

Peru ngujo nga me ne, cachja me cuitjin:

—¿Peru Me xi Tsingatju Nina ne, hacuiin ngajñi rë xuta Galilea cuetjujñi me! ⁴² ¿Ha hyan xi xujun rë Nina ne, chja ta Me xi Tsingatju Nina ne, cuinduva me tsëhë tjë rë xutachanga naja David, ngajan Belén hiscan nangui rë David! —Cuatjin cachja me xi cuacun jan.

⁴³ Cuatjin camá xi ngatsë rë Jesús ne, hacuiin ngu ni cjuatacun catsingataha cacun xutacjín jan. ⁴⁴ Vëhë xi ngujo xuta jan ne, meje cjuaha me Jesús cjuecojo me ndavaya. Peru tsajin yo xi cavetahat-sja rë me.

Camanguaain cacun xutaxa rë cojo Jesucristu

⁴⁵ Hya xi camá ne, mayu cojo nisë rë cha ne, cavuya quiji nga cha xcun nahmi xi matitjun cojo xcun cha fariseo xi cuacun jan, hane xutaxa rë xi cuacun jan ne, cuitjin cachja me cojo mayu jan:

—¿Mé má canduvuun cojo cha? —Cuatjin cachja me.

⁴⁶ Ngajan xi cha mayu cojo nisë rë cha jan ne, cuitjin cafayangui cha:

—¿Cjëë camahani cuinuhyin xi chja ngu xuta sacuatjin chja me vëhë! —Cuatjin cafayangui cha.

⁴⁷ Hane cha fariseo jan ne, cuitjin cachja cha cojo cha xi cuacun jan:

—¡Tu ma rë sa xi cojo ngayun camandacha ngayun! ⁴⁸ ¡Ngayun ne, hyun ta hisca ngu xutaxa rë, hisca xi ngu xuta fariseo ne, cjëë cumangu cacun me cojo cha xi cuajyihi vë! ⁴⁹ Peru xutacjín xi cuacun hisca hvíin hacutjin chja ley rë Moisés ne, ¡mijí rë Nina me! —Cuatjin cachja cha fariseo jan.

⁵⁰ Ngajan xi ngu cha fariseo xi hmí rë Nicodemo, cha xi quiji tjengui rë Jesús hatsëë ne, cuitjin cachja cha cojo cha xi cuacun vëhë:

⁵¹ —Chja ley naja ta cumaji nihña castigu ngu xuta xi cjëë cuinuhyan mé cuichja me hacuaha sacú naja cjuaquixi mé casahmi me. —Cuatjin cachja cha Nicodemo.

⁵² Ngajan xi cha fariseo xi cuacun jan ne, cuitjin cafayangui cha:

—¿Hacuaha cojo ngayun má ngayun xuta rë distritu rë Galilea ni? Chutayun xujun rë Nina ne, sehe ngajan sacú cumachaya nuju ta ngajan Galilea ne, cuetjinjñi hisca ngu profeta. —Cuatjin cafayangui cha fariseo xi cuacun jan.

Chjuun xi cachjahá rë xcun cjuatsehen xi tisahmi

⁵³ Hya xi camá ne, jima ngu xuta jan cafe me ndava me.

8 Peru Jesús ne, cavetju me quiji me ndetjún Olivu. ² Hane xi casahasen camá nchujun jan ne, cavuya quiji nga Jesús ndatsen yungun xi matitjun. Hane yëjë xuta jan ne, casahmitiña me tsëhë Jesús. Hane xi quiji cavéjña Jesús ne, sehe cavetsihin cavicuya me xuta jan. ³ Ngajan xi ngujo cha vicuya cjuachacun cojo ngujo cha fariseo ne, cafehecojo cha ngu chjuun xi cachjahá rë na xcun cjuatsehen xi tisahmi na cojo ngu xihin xi hacuiin xihin rë na. Hane cha xi cuacun jan ne, quiji cavisecun cha na ngajñi rë xuta hiscan tacun Jesús, ⁴ sehe cachja cha cojo Jesús cuitjin:

—Maestro, chjuun vihi ne, cachjahá rë na xcun cjuatsehen xi tisahmi na cojo ngu xihin xi hacuiin xihin rë na. ⁵ Quihndë ne, xcun ley xi cavejña naja Moisés ne, cavitexa me xi tu yo ni xuta xi sahmi xcusun vëhë ne, cueya me cojo ndoyojo. Ngayun ne, ¿mé xi cuinújun? ⁶ —Cuatjin cavinenguise cha xi cuacun vëhë, xi tifahachuva cha Jesús, cojo sa xi sacú rë cha chuva rë xi cuinchajyë cha me.

Ngajan xi Jesús ne, catsiquindi me yojo rë me, sehe cavetsihin catsihindu me nangui cojo rcutsja me. ⁷ Hane tsëhë xi cjuinduju sa tivinenguise cha xi cuacun jan Jesús ne, catsinguixi me yojo rë me, sehe cachja me cojo cha cuitjin:

—Tu jarë ni ngayun xi tsajin jyë nuju ne, ngayun tjun tjun tetuhun rë na ndoyojo. —Cuatjin cachja Jesús.

⁸ Hane sehe catsiquindi nga me yojo rë me, hane catsihindu sa me nangui. ⁹ Hane xi cahndë cha xi cuacun jan xi cuatjin cachja Jesús ne, ta vëë me xi hacuiin tyjahi cjuatacun rë me, chuva ngu chuva ngu cha cavetju cha cafe cha. Cavetsihin cavetju tjun tjun cha xi hitsë sa changá. Hane camá suvá sa Jesús, cojo chjuun xi secun ngajñi rë xutacjín jan.

¹⁰ Hane xi catsinguixi me yojo rë me ne, cavinenguise me chjuun jan cuitjin:

—Ngayun chjuun, ¿jarë me ne? ¿Há tsajin yo xi casahmi nuju castigu? —Cuatjin cavinenguise Jesús.

¹¹ Ngajan xi chjuun jan ne, cuitjin cafayangui na:

—Tsajin yo, tatá. —Cuatjin cafayangui na.

Ngajan xi Jesús ne, cuitjin cachja me:

—Ngahan ne, hacuaha sahmeë nuju castigu. Cuma cuangun, peru ha quihndë xicanihñuu sa cjuatsehen. —Cuatjin cachja Jesús.

**Jesucristu ne, sacuahá
hasen xi cuma rê xuta**

¹²Hya xi camá ne, cachja nga Jesús cojo xutacjín jan cuitjin:

—Ngahan ne, sacuahá hasen xi cuma rê xuta ngasunhndë ngahan. Xuta xi cuisehen me ladu naha ne, hatuxa cuiy-ijin me ngajni jnú ta ngajni hasen xi sua cjuahñu xatsë cuiyuju me. —Cuatjin cachja Jesús.

¹³Ngajan xi cha fariseo xi cuacun jan ne, cuitjin cachja cha cojo Jesús:

—Ngayun ne, tinújun favor nuju su-
vun. Vêhë xi cjuá xi nújun ne, tsajin rê
cjuaquixi. —Cuatjin cachja cha.

¹⁴Hane xi cafayangui Jesús ne, cuitjin
cachja me:

—Handasa chjá favor naha suva ne,
cjuá xi chjá ne, cjuaquixi ta, tsêhë xi
ngahan ne, hvë jani canduva hacuahá
hvë jani cúya cjué nga. Peru ngayun ne,
hyúun jani canduva hacuahá hyúun jani
cúya cjué nga. ¹⁵Ngayun ne, xi nichu-
vun xuta cojo cjuatacun rê me ne, chuva
xi tsingatahacacun xuta ngasunhndë ne,
cuatjin ningatuhuntacún. Ngahan ne, tit-
sichuvaan hisca ngu xuta cojo cjuatacun
rê me. ¹⁶Peru sa xi tsichúva ngu xuta
ne, hatuxa cjuaquixi cjuá xi cuichjá ta,
tsêhë xi hacuiin suva sahme ta ngahan
cojo me xi catsingatju ná nihni tangun.
¹⁷Xcun ley xi vitexa nuju ne, hacuahá
camahindu xi hya xi jo xuta sua me
cjuaquixi rê me xcun xutaxa rê hane ngu
tangun ni cjuá chja me ne, cjuaquixi cjuá
xi chja me. ¹⁸Ngahan xi chjá favor naha
suva, hane Nahmi naha xi catsingatju ná
me ne, hacuahá cojo me chja me favor
naha. —Cuatjin cafayangui Jesús.

¹⁹Ngajan xi cha fariseo jan ne, cuitjin
cavinenguise cha Jesús:

—¿Jani tacun nahmi nuju ni? —Cu-
atjin cavinenguise cha.

Hane Jesús ne, cuitjin cafayangui me:

—Hacuiin ngahan hyun ná ne, hacuiin
Nahmi naha hyun me. Sa xi ngahan hyun
ná ne, hacuahá hyun Nahmi naha. —Cu-
atjin cafayangui Jesús.

²⁰Cjuá vêhë ne, cachja Jesús hya
xi tivicuya me xuta ngajan yungun xi
matitjun, ngu ndihya hiscan xi siu al-
cancía. Peru hisca ngu xuta cafaain rê
me, tsêhë xi cjêë cuetjucaa nixtin xi cu-
atjin cuma.

**“Cumaji cuangun hiscan xi
cjué”, chja Jesucristu**

²¹Hya xi camá ne, quijinduju sa cachja
Jesús cojo xuta cuitjin:

—Ngahan ne, cuétju cjué, hane
ngayun ne, cuinchunsun ná. Peru
ngatsë rê cjuatsehen xi cún ngayun ne,
cuechuun xcun Nina hya xi cueyun.
Hiscan xi cjué ne, ngayun ne, cumaji
cuangun. —Cuatjin cachja Jesús.

²²Ngajan xi xutaxa rê xi cuacun jan
ne, cuitjin cachja me ngajni rê me cojo
xicjin me:

—Tu ma rê sa xi cjue tsiquehen suvá
me yojo rê me xi cuatjin chja me xi his-
can cjue me ne, cumaji cuanguen. —Cu-
atjin cachja xutaxa rê xi cuacun jan.

²³Ngajan xi Jesús ne, cuitjin cachja
me cojo me xi cuacun vê:

—Ngayun ne, tsêhë nguehe nangui
ngayun. Ngahan ne, tsêhë ngahnga nga-
han. Ngayun ne, tsêhë ngasunhndë vihi
ngayun. Ngahan ne, hacuiin tsêhë nga-
sunhndë vihi ngahan. ²⁴Vêhë xi cuatjin
cachjá cojo nuju xi ngatsë rê cjuatsehen
xi cún ngayun ne, cuechuun xcun Nina
hya xi cueyun. Sa xi macjaain nuju xi
Ngahan Vi, hmí ná ne, ngatsë rê cjuat-
sehen xi cún ngayun ne, cuechuun xcun
Nina hya xi cueyun. —Cuatjin cachja
Jesús.

²⁵Ngajan xi xuta xi cuacun jan ne,
cavinenguise me Jesús cuitjin:

—¿Yo ngayun ni? —Cuatjin cavin-
enguise me.

Hane Jesús ne, cuitjin cachja me:

—¡Sacuatjin cachjá cojo nuju hisca ntsacu cavetsihin! ²⁶Jemu tjin ná cjua xi cuichjá tsujun, hacuaha jemu tjin xi cjuaháchuva tsujun. Peru me xi catsingatju ná ne, quixi jain me cojo cjua rë me, hane ngahan ne, cjua xi cáhndë xi cachja me ne, cjua vëhë xi chjá nguëhe ngasunhndë. —Cuatjin cachja Jesús.

²⁷Peru xutaxa rë xi cuacun jan ne, cajnii rcu me xi Jesús ne, tsëhë Nina Nahmi naja xi tichja me. ²⁸Vëhë xi Jesús ne, cuitjin cachja me:

—Hya xi ngayun chjunihngun ná ngahan xi Quihndi rë Xuta Jain ngahan ne, hya cuijne rcun xi Ngahan Vi hmí ná. Hane ngahan ne, hatuxa tsajin mé xi sahme xi cojo cjuatacun naha suva ta sacuaha cjua xi cachja Nahmi naha cojo ná ne, cjua vëhë xi chjá. ²⁹Hacuaha me xi catsingatju ná ne, tacun me cojo ná, cavejñaai ná me xi suva ta, tsëhë xi ngahan ne, hatuxa sahme tutjin xi chuya rë me. —Cuatjin cachja Jesús.

³⁰Hane xi cachja Jesús cjua vëhë ne, jemu cjín xuta camangu cacun me cojo rë me.

Cuëhëndaya naja cjuaquixi

³¹Ngajan xi Jesús ne, cachja me cuitjin cojo xutaxa rë yungun xi camacjain rë tsëhë cjua rë me:

—Sa xi ngayun cuangun nduju xi quitahá rcun cjua naha ne, quixi xi ha camá ngayun xuta ladu naha. ³²Hacuaha cuijne rcun xi hmí rë cjuaquixi, hane cjuaquixi jan ne, cuëhëndaya nuju. —Cuatjin cachja Jesús.

³³Ngajan xi xutaxa rë xi cuacun jan ne, cuitjin cafayangui me:

—Peru ngayaan ne, tjë rë xutachanga naja Abraham má ngayaan, hane cjëë camahani cuma ngayaan mosu hndixahan rë xuta. ¿Mé má nújun xi cumandaya ngayin? —Cuatjin cafayangui me.

³⁴Hane Jesús ne, cuitjin cafayangui me:

—Cuichjá cojo nuju cjuaquixi ta yëjë ni xuta xi hinchá me ndiya rë cjuatsehen ne, hatuxa tjinñu me cojo cjuatsehen sacuatjin tjinñu ngu mosu hndixahan cojo nai rë. ³⁵Ngu mosu hndixahan ne, hacuiin hatuxa cuiyujucandë ngajñi xuta xi ndava, peru ngu quihndi xi cjuaquixi ne, hatuxa tsëhë xuta xi ndava. ³⁶Vëhë xi sa xi Quihndi rë Nina cuëhëndaya nuju ne, cumandaya jain ngayun cojo cjuaquixi. ³⁷Ngahan ne, hacuaha hvë xi tjë rë Abraham má ngayun. Peru ngayun ne, tivinchun chuva rë xi nicuhun ná, tsëhë xi tuun cahndé xi cuisehen cjua naha cahntsua xahasen nuju. ³⁸Ngahan ne, xcusun xi cahvë hiscan tacun Nahmi naha ne, tsëhë vëhë xi tichjá. Peru ngayun ne, sacuatjin canuhyun xi cachja nahmi nuju ne, cuatjin tiniñu. —Cuatjin cafayangui Jesús.

³⁹Ngajan xi xutaxa rë xi cuacun jan ne, cuitjin cachja me:

—Nahmi niji ne, hacui xutachanga naja Abraham. —Cuatjin cachja me.

Ngajan xi Jesús ne, cuitjin cachja me:

—Sa xi quixi xi quihndi rë Abraham má ngayun ne, sacuatjin casahmi Abraham ne, hacuaha cuatjin nihñu. ⁴⁰Ngahan ne, cachjá cojo nuju cjuaquixi xi cáhndë xi cachja Nina, peru quihndë ne, tivinchun chuva rë xi nicuhun ná. Xutachanga naja Abraham ne, casahmii me cuatjin. ⁴¹Ngayun ne, sacuatjin casahmi nahmi nuju ne, hacuanitjin ni tiniñu. —Cuatjin cachja Jesús.

Ngajan xi xutaxa rë xi cuacun jan ne, cachja me cuitjin:

—Ngayin ne, hacuiin quihndi xca ngayin. Nina ne, ngu ni me vëhë xi Nahmi niji. —Cuatjin cachja xutaxa rë xi cuacun jan.

⁴²Hane Jesús ne, cuitjin cachja me:

—Sa xi quixi xi Nahmi nuju Nina ne, hacuaha canihñu hmu tacún ná ta, tsêhê xi ngahan ne, Nina catsingatju ná me, hane quihndê ne, nguehe tejña. Ngahan ne, hacuiin cjuatacun naha suva xi canduvá ta me vêhê catsingatju ná me.⁴³ ¿Mé má vijnii rcun cjua xi chjá? Cuatjin vijnii rcun ta, tsêhê xi caain nuju visiñuju cjua naha.⁴⁴ Ngayun ne, quihndi rê nahmi nuju Satanás ngayun, hane xcusun xi meje rê nahmi nuju ne, xcusun vêhê xi meje nihñu. Xitsehen xi matitjun vê ne, hisca ntsacu cavetsihin ne, hatuxa tsiquehen vê xuta. Hatuxa tsajin jiya vê ngajñi rê cjuaquixi ta, tsêhê xi tsajin cjuaquixi ngajñi rê cjuatacun rê. Hya xi chja xitsehen vê cjuandacha ne, chja sacuatjin xcusun rê suvá ta, tsêhê xi hatuxa ndacha, hacuaha nahmi rê yêjê ni cjuandacha.⁴⁵ Peru ngahan ne, tsêhê xi chjá cjuaquixi ne, vêhê xi macjaain nuju ngahan.⁴⁶ ¿Jarê ngayun xi cuma ninguixun xi ngahan ne, tjin jyê naha? Sa xi chjá xi cjuaquixi ne, ¿mé má macjaain nuju ngahan? ⁴⁷ Me xi tsêhê jain Nina ne, vetaharcu me cjua rê Nina. Ngayun ne, tsêhê xi hacuiin tsêhê Nina ngayun ne, vêhê xi mijí cuetuhunrcun cjua rê me. —Cuatjin cachja Jesús.

Ngahan Vi hmí rê Jesucristu hisca chaja sa xi tsin Abraham

⁴⁸ Hane xutaxa rê xi cuacun jan ne, cuitjin cachja me cojo Jesús:

—¡Hatuxa cjuaquixi xi nújin hya xi nújin xi ngayun ne, ngu xuta samaritano ngayun hacuaha jiya xitsehen xahasen nuju! —Cuatjin cachja xutaxa rê jan.

⁴⁹ Ngajan xi Jesús ne, cuitjin cafayangui me:

—Tsajin xitsehen xahasen naha. Ngahan ne, fahárcun Nahmi naha, hane ngayun ne, choho nújun tsahan.⁵⁰ Hacuaha mijí sahme jyê sahme hnga suva yojo naha. Tjin ngu me xi meje sahmi jyê sahmi hnga ná, hane me vêhê

ne, tsichuva naja me cojo cjuatacun naja.⁵¹ Cuichjá cojo nuju cjuaquixi ta xuta xi cuihndê me tsêhê cjua naha ne, hatuxa tsajin nu tsajin nixtin xi cueya me. —Cuatjin cafayangui Jesús.

⁵² Hane xutaxa rê xi cuacun jan ne, cuitjin cachja me cojo Jesús:

—Quihndê matsejenndaja xi jiya jain xitsehen xahasen nuju. Xutachanga naja Abraham ne, cahme me, hacuaha yêjê profeta ne, cahme me, hane sehe ngayun nújun xi xuta xi cuihndê me tsêhê cjua nuju ne, hatuxa tsajin nu tsajin nixtin xi cueya me.⁵³ ¡Ja!, peru ¿há hitsê sa matitjun ngayun xi cuma rê xutachanga naja Abraham, me xi cahme ni? ¡Hacuaha cahme yêjê profeta! ¡Ngayun tinihñu yojo nuju sacuaha xi jemu matitjun ngayun! —Cuatjin cachja xutaxa rê jan.

⁵⁴ Hane Jesús ne, cuitjin cafayangui me:

—Sa xi sahme jyê sahme hnga suva yojo naha ne, cjua xi cuichjá tsahan ne, cuenguiin camahani chji rê. Peru Nahmi naha, me xi nújun xi Nina nuju ne, me vêhê xi sahmi jyê sahmi hnga ná me.

⁵⁵ Ngayun ne, hyúun me, peru ngahan ne, hvê me. Sa xi ngahan cuichjá xi hveen me ne, tangun ndacha ngahan cojo nuju ngayun. Peru ngahan ne, hvê me, hacuaha víhndê tsêhê cjua rê me.

⁵⁶ Xutachanga naja Abraham ne, jemu ndaja camá rê me xi satê rê me xi scuêê me nixtin xi cuinduva ngahan. Hane cavêê jain me, hacuaha jemu sua camá rê me. —Cuatjin cafayangui Jesús.

⁵⁷ Ngajan xi xutaxa rê xi cuacun jan ne, cuitjin catsixcuehyu me Jesús:

—Hisca cjêê yachantê nu tjin nuju. ¿Há cahyun xutachanga naja Abraham ni? —Cuatjin cachja me.

⁵⁸ Hane Jesús ne, cuitjin cachja me:

—Cuichjá cojo nuju cjuaquixi ta hisca chaja sa xi tsin xutachanga naja Abra-

ham ne, ngahan ne, Ngahan Vi hmí ná. —Cuatjin cachja Jesús.

⁵⁹ Vêhë xi xutaxa rê yungun xi cuacun jan ne, cafaha me ndyojo xi cuetaha me Jesús xi meje tsiquehen me. Peru Jesús ne, cavetjuhmá me tsêhë yungun xi matitjun jan.

Camandaja ngu cha rcá casahmi Jesús

9 Hya xi camá ne, xi cavatju Jesús ngu cahndé jan ne, cavêë me ngu cha rcá xi ha cuatjin rcá cha hisca hya xi catsin cha. ² Hane xuta ladu rê me jan ne, cuitjin cavinenguisse me:

—Maestro, ¿yo casahmi cjuatsehen xi cuatjin rcá cha xi catsin cha? ¿Há suvá cha vihi ne?, o há tsajin ne, ¿há xutacha rê cha? —Cuatjin cavinenguisse me.

³ Ngajan xi Jesús ne, cuitjin cafayangui me:

—Hacuiin cha vihi ne, hacuiin xutacha rê cha casahmi me cjuatsehen ta cuatjin camá cojo sa xi ngatsë rê cjuandaja xi sahmi Nina cojo cha vihi ne, cumatsejen xa xi sahmi Nina. ⁴ Meje rê xi nihña xa rê me xi catsingatju ná jinguyëjë rê xi hasen sa ta cuechú hora xi cumajñu, hane tsajin yo xi cuma sahmi xa. ⁵ Jinguyëjë rê xi tejña nguehe ngasunhndë ne, sacuahá hasen xi cuma rê xuta ngasunhndë ngahan. —Cuatjin cafayangui Jesús.

⁶ Xi cavatju cachja Jesús cjua vêhë ne, sehe cacandi me natya rê me nangui, hane casahmi me hitsë ndasi, sehe catsufë me tuxcun cha rcá jan. ⁷ Sehe cachja me cojo cha cuitjin:

—Tángun tinchacjun ngajan nda Siloé. —Cuatjin cachja Jesús. (Siloé ne, meje cuichja Caningatjun rê.)

Hya xi camá ne, quiji cha cavinchacjan cha. Xi tu cavuya cafe cha ndava cha ne, ha tsejen rê cha. ⁸ Ngajan xi xuta xi siu tahndee ndava cha cojo me xi cavêë

rë cha xi casahmi cha caridad ne, cavinenguisse xicjin me cuitjin:

—¿Hacuiin cha vêhë xi vëjña sahmi caridad jan ni? —Cuatjin cavinenguisse me xi cuacun jan.

⁹ Ngujo me jan ne, cuitjin cachja me:

—Juun, hacui cha vë. —Cuatjin cachja me.

Hane ngujo nga me ne, cuitjin cachja me:

—Cuatjin tsejen, peru hacuiin cha.

—Cuatjin cachja me.

Hane suvá cha ne, cuitjin cachja cha:

—Ngahan vi. —Cuatjin cachja cha.

¹⁰ Ngajan xi xuta xi cuacun jan ne, cavinenguisse me cha cuitjin:

—¿Hacutjin camá xi camandaja túxcun ngayun? —Cuatjin cachja me.

¹¹ Ngajan xi cha vêhë ne, cuitjin cafayangui cha:

—Me xi hmí rê Jesús ne, casahmi me hitsë ndasi, sehe catsufë me túxcun, sehe cachja me cojo ná xi cjué cuínchacjan nda Siloé. Hane xi cëjë cavinchácjan jan ne, camatsejen ná. —Cuatjin cafayangui cha.

¹² Cavinenguisse nga me cha cuitjin:

—¿Jani tacun me ni? —Cuatjin cavinenguisse me.

Hane cha vêhë ne, cuitjin cachja cha:

—Hveen. —Cuatjin cachja cha.

Fahatáha cha fariseo cha xi camandaja tuxcun

¹³ Ngajan xi xuta xi cuacun jan ne, quijicojo me cha xi sehe camatsejen rê jan hiscan xi siu cha fariseo. ¹⁴ Quihndë ne, nixtin xi casahmi Jesús ndasi hane casahmi me xi camandaja tuxcun cha rcá jan ne, nixtin xi chjahájenda rê. ¹⁵ Ngajan xi cha fariseo xi cuacun jan ne, hacuahá cavinenguisse cha cha xi camandaja tuxcun jan hacutjin camá xi camatsejen rê cha. Hane cuitjin cafayangui cha:

—Ndasi catsufë me túxcun, sehe cëjë cavincháçjan, hane cama camatsejen ná. —Cuatjin cafayangui cha.

¹⁶ Hane ngujo cha fariseo xi cuacun jan ne, cuitjin cachja cha:

—Me vëhë ne, tsejen xi hacuiin Nina catsingatju rë me, tsëhë xi faharcuaain me nixtin xi chjahájenda rë. —Cuatjin cachja cha.

Peru ngujo nga cha ne, cuitjin cachja cha:

—Cumaji sahmi me cjuarcun xi cuacun vëhë sa xi ngu cha tsehen me. —Cuatjin cachja cha.

Hacuiin ngu tangun ni camá cjuarë cha. ¹⁷ Hane ngajan xi cavuya cachja nga cha cojo cha xi camandaja tuxcun jan cuitjin:

—Quihndë ta casahmi me xi camandaja tuxcuin ne, ¿mé noje tsëhë me? —Cuatjin cachja cha.

Hane cha xi camandaja tuxcun jan ne, cuitjin cafayangui cha:

—Ngu profeta me. —Cuatjin cafayangui cha.

¹⁸ Peru xutaxa rë yungun jan ne, macjaain rë me xi titjun ne, rcá cha hane quihndë ne, tsejen rë cha. Hisca xi cajindaya me xutacha rë cha xi camandaja tuxcun jan ne, ¹⁹ sehe cafahatáha rë me cuitjin:

—¿Há cha vihi xi quihndi nuju, cha xi nújun xi ha cuatjin rcá hisca hya xi catsin? ¿Hacutjin camá xi quihndë ne, tsejen rë cha? —Cuatjin cafahatáha me.

²⁰ Ngajan xi xutacha rë cha ne, cuitjin cafayangui me:

—Hyin xi cha vihi xi quihndi niji cha, hacuaha ha cuatjin rcá cha hisca hya xi catsin cha. ²¹ Peru hyín hacutjin camá xi quihndë ne, tsejen rë cha. Hacuaha hyín yo xi casahmi xi camandaja tuxcun cha. Chjinengunsun rë cha ta ha jiya nu rë cha. Suvá cha sua nuju cha cjuaquixi rë cha. —Cuatjin cafayangui me.

²² Cuatjin cachja xutacha rë cha ta, tsëhë xi tsacjun me xutaxa rë jan ta, xu-

taxa rë xi cuacun jan ne, ha casahmi tangun me cjuarë yo xi cuichja xi Nina catsingatju me Jesús ne, tsichohotje rë me yungun. ²³ Vëhë xi xutacha rë cha ne, cachja me: “Ha jiya nu rë cha ne, chjinengunsun rë cha.”

²⁴ Vëhë xi cajindaya nga xutaxa rë majo ndiya cha xi camandaja tuxcun jan, hane sehe cachja me cojo cha cuitjin:

—“Vëë Nina”, noje xi cuatjin camá. Ngayin ne, hyin xi me xi casahmi xi camandaja tuxcuin ne, ngu cha tsehen me. —Cuatjin cachja xutaxa rë jan.

²⁵ Ngajan xi cha vëhë ne, cuitjin cafayangui cha:

—Ngahan ne, hveen sa xi ngu cha tsehen me. Ngu xcusun ni xi hvë ne, titjun ne, rcá ngahan, peru quihndë ne, tsejen ná. —Cuatjin cafayangui cha.

²⁶ Hane xutaxa rë jan ne, cavinenguise me cha cuitjin:

—¿Mé casahmi me cojo ri? ¿Hacutjin casahmi me xi camandaja tuxcuin? —Cuatjin cavinenguise me.

²⁷ Hane cha vëhë ne, cuitjin cafayangui cha:

—Ha cachjá cojo nuju ne, mijí cuetuhuncun. ¿Mé má meje cuisinuju nga ngundiya? ¿Há cojo ngayun meje cuisuhun ladu rë me? —Cuatjin cafayangui cha.

²⁸ Hane xutaxa rë jan ne, cacjan me cojo cha, cuitjin cachja me:

—¡Ngaye xi ladu rë cha vëhë má ngaye! ¡Ngayin ne, ladu rë Moisés má ngayin! ²⁹ Ngayin ne, hyin xi Moisés ne, cachja me cjuarë casua Nina me, peru cha vëhë ne, hisca hyín jani cavetju cha canduva cha. —Cuatjin cachja me.

³⁰ Ngajan xi cha vëhë ne, cuitjin cafayangui cha:

—¡Jemu sihya xi ngayun ne, hyúun jani cavetju me canduva me, handasa casahmi me xi camandaja túxcun ngahan! ³¹ Ha hyan ta Nina ne, fahacuen daain me cjuarë chja xuta tsehen.

Peru sa xi ngu xuta faharcun me Nina hacuaha sahmi me hacutjin xi meje rë Nina ne, me vëhë ne, fahacuenda Nina cjua xi chja me. ³² Cjëë camahani cuinuhya rë xi ngu xuta sahmi me xi mandaja tuxcun ngu xuta xi rcá me hisca hya xi catsin me. ³³ Sa xi hacuiin Nina catsin-gatju rë me vëhë ne, tsajin camahani mé xi cuma sahmi me. —Cuatjin cafayangui cha.

³⁴ Ngajan xi xutaxa rë jan ne, cuitjin cachja me:

—¡Ngaye ne, ngajñi rë cjuatsehen camahani catsin ngaye! ¡Machjiriin camahani ngaye xi cuicoye niji! —Cuatjin cachja me.

Sehe cavaxë me cha candatsen.

Xuta xi jñu tsëhë me

³⁵ Hya xi camá ne, camachaya rë Jesús xi cavaxë xutaxa rë yungun cha xi camandaja tuxcun jan candatsen. Hane xi casacu xicjin Jesús cojo cha ne, cachja me cojo cha cuitjin:

—¿Há mangutacún ngayun cojo me xi Quihndi rë Xuta Jain? —Cuatjin cachja me.

³⁶ Hane cha vëhë ne, cuitjin cafayangui cha:

—Tatá, tinújun cojo ná yo me vë ne, cojo sa xi cumangu cákun cojo rë me. —Cuatjin cafayangui cha.

³⁷ Ngajan xi Jesús ne, cuitjin cachja me cojo cha:

—Ngayun ne, ha cahyun me ta, ngahan xi tichjá cojo nuju vi ne, ha ngahan xi Quihndi rë Xuta Jain ngahan. —Cuatjin cachja me.

³⁸ Hane cha vëhë ne, cuitjin cachja cha:

—Mangucácun, Tatá. —Cuatjin cachja cha, sehe cafaharcun cha me.

³⁹ Ngajan xi Jesús ne, cuitjin cachja me:

—Canduvá ngahan ngasunhndë vi ne, xi tsichúva xuta cojo cjuatacun rë me,

sehe ngajan xi xuta xi cjëë ndaja cuijne rcu me cjua rë Nina ne, cuijnercundaja me, hane xuta xi cuenda chja me xi jemu ndaja vijne rcu me cjua rë Nina ne, cumajñu tsëhë me. —Cuatjin cachja Jesús.

⁴⁰ Hane ngujo cha fariseo xi hinchacun tiña hiscan secun Jesús ne, cahndë cha cjua vëhë, hane cuitjin cachja cha:

—¿Peru hacuiin cojo ngayin jñu tsijin? —Cuatjin cachja cha.

⁴¹ Ngajan xi Jesús ne, cuitjin cachja me:

—Sa xi jñu tsujun ne, tsajin jyé nuju. Peru quihndë xi nújun xi hacuiin jñu tsujun ne, ngajan matsejen xi tjin jyé nuju. —Cuatjin cachja Jesús.

Ejemplu tsëhë paxtu rë chu tsánga

10 Ngajan xi Jesús ne, cachja sa me cuitjin:

—Cuichjá cojo nuju cjuaquixi ta xuta xi visiin me táha tingotjo hnhua rë chu tsánga ta tu táha xín mijisun me hnhua ne, me vëhë ne, chëjë me hacuaha fahatahá cjuachan me. ² Peru me xi visehen táha tingotjo hnhua ne, me vëhë xi paxtu rë chu tsánga. ³ Cha xi quitahá cuidadu rë tingotjo hnhua ne, vuxaha cha tingotjo tsëhë me vëhë. Chu tsánga ne, vihndë chu xta rë me, hane jindaya me chu xi tsëhë me, jimangu chu cojo ñihi rë chu, sehe vaxë me chu. ⁴ Hane hya xi ha cavaxë me yëjë chu xi tsëhë me ne, sehe cjuí titjun me, hane chu tsánga ne, fitjengui chu me, tsëhë xi vëë chu xta rë me. ⁵ Peru jingu sa xuta ne, hatuxa cjuuin tjenguiin chu me ta tu cuanga chu tsëhë me, tsëhë xi hvíin chu xta rë jingu sa xuta jan.

⁶ Cuatjin cachja Jesús ejemplu vëhë cojo xuta xi cuacun vë, peru cajni rcu me mé vijne cjua xi cachja Jesús.

Sacuaha paxtu rē chu xi ndaja sahmi cuidadu rē chu má Jesucristu

⁷ Jesús ne, cachja sa me cojo xutaxa rē xi cuacun jan cuitjin:

—Cuichjá cojo nuju cjuaquixi ta ngahan ne, sacuaha tingotjo xi vatju chu tsánga ngahan. ⁸ Yējē ni cha xi cavetju-jñi ngajñi rē xuta xi meje cumatitjun cha hya xi chaja sa cjuēhē ngahan ne, sacuaha cha chējē cha, cha fahatahá cjuachan cha. Peru xuta ladu rē Nina ne, casahmicuendaain me cha, sacuatjin rē chu tsánga xi fitjenguiin chu jingu sa xuta. ⁹ Ngahan ne, sacuaha tingotjo ngahan. Sa xi ngu xuta cuisehen me táha tingotjo jan ne, cuetjutje me. Hacuaha tsajin mé cumacjin cacun me cuetju cuisehen me jan, hane tsajin mé cuma chaja rē me. ¹⁰ Cha chējē ne, xi vinduva cha ne, suvá ni xi tsichējē cha, tsiquehen cha, hacuaha tsinguetsun cha. Peru ngahan ne, canduvá cojo sa xi sacú rē xuta cjuahñu xatsē, hacuaha jercu sacú camahani rē me cjuahñu vējē.

¹¹ Ngahan ne, sacuaha paxtu rē chu xi jemu ndaja fahácuenda chu tsánga. Paxtu ndaja jan ne, hisca sua me yojo rē me xi cueya me ngatsē rē chu tsánga. ¹² Ngu mosu xi hacuiin paxtu rē chu má cha, hacuiin tséhē cha chu tsánga ne, xi scuēē cha xi nduva tiña chu lobo ne, viyujutahá ni cha chu tsánga jan, hane vanga cha. Hane chu lobo jan ne, faha chu ngujo chu tsánga, sehe tsicangacojo chu chu xi yahnga jan tu nguehe tu ngajan. ¹³ Cuatjin sahmi cha ta, tséhē xi mosu ni má cha, hane marcuaain rē cha tséhē chu tsánga. ^{14–15} Ngahan ne, sacuaha paxtu ndaja jan ngahan. Sacuatjin vējē ná Nahmi naha hane ngahan ne, hvē Nahmi naha ne, ha chuva vējē ni ne, ngahan ne, hvē chu tsahan hane chu tsahan ne, vējē chu ngahan. Hacuaha suá yojo naha xi cueya ngatsē rē chu. ¹⁶ Tjin sa ná chu tsánga xi hacuiin tséhē hnchua

vihi chu. Chu xi cuacun vē ne, hacuaha meje rē xi sahme chu cuidadu. Xi cuihndē chu xta naha ne, cuinduvatjengui chu ngahan, hane cuma tangun chu cojo chu xi ha tisahme cuidadu, hacuaha ngu ni ngahan xi paxtu rē chu.

¹⁷ Ngahan ne, hmu cacun ná Nahmi naha, tséhē xi suá yojo naha xi cueya, hane sehe sahme xi cúa nga cjuahñu.

¹⁸ Tsajin yo xi cjuahatahá cjuahñu naha ta ngahan ne, cojo cjuatacun naha suva suá yojo naha xi cueya. Tjin ná chuva rē xi suá yojo naha, hacuaha tjin ná chuva rē xi sahme xi cúa nga cjuahñu. Cuatjin cavitexa ná Nahmi naha xi sahme. —Cuatjin cachja Jesús.

¹⁹ Hya xi camá ne, ngu ndiya nga hacuiin ngu tangun ni camá nga cjuva rē xutaxa rē jan ngatsē rē cjuva vējē.

²⁰ Hane jemu cjin me xi cuacun jan ne, cuitjin cachja me:

—¡Jiya xitsehen xahasen rē cha, vējē xi sca rē cha! ¡Venguiin chji rē xi cuatjin visiñuju cjuva rē cha! —Cuatjin cachja me.

²¹ Peru yahnga nga me ne, cuitjin cachja me:

—Cjuva vējē ne, hacuiin cjuva rē ngu xuta xi jiya xitsehen xahasen rē me. ¿Ngu xitsehen ne, cumaji sahmi xi cumandaja tuxcun ngu xuta xi rcá me? —Cuatjin cachja yahnga me jan.

Tsitjungui xutaxa rē yungun Jesucristu

²² Quihndē ne, hya xi cavechú nixtin rē chan hnchan ne, camá suhi rē yungun xi matitjun ngajan Jerusalén. ²³ Hane Jesús ne, tsujyihya me ndatsen yungun xi matitjun, ngajan Ngahma Ndihya tséhē Salomón. ²⁴ Hane xutaxa rē yungun jan ne, quiji caxinchacunndee me Jesús, sehe cachja me cojo me cuitjin:

—¿Jani hisca hya tuhun nijj cjuaquixi? Sa xi ngayun jain xi tsingatju

Nina ngayun ne, tinújunquixun cojo niji. —Cuatjin cachja xutaxa rë jan.

²⁵Ngajan xi Jesús ne, cuitjin cafayangui me:

—Ha cachjá cojo nuju, peru macjaain nuju. Xcusun xi tisahme sacuatjin tivitexa ná Nahmi naha ne, xcusun vëhë ni tsingacun yo ngahan. Peru ngayun ne, macjaain nuju, ²⁶tsëhë xi hacuiin xuta ladu naha má ngayun. ²⁷Xuta xi ladu naha má me ne, tangun me sacuaaha chu tsángá. Me xi cuacun vë ne, vëhë me xta naha, hacuaaha ngahan ne, hvë me, hane fitjengui ná me. ²⁸Ngahan ne, suá rë me cjuahñu xatsë, hane hatuxa tsajin nu tsajin nixtin xi cjue hasen rë me xcun cjuañihi, hacuaaha tsajin yo cuaxëxin rë me xi siu ntsa me. ²⁹Xuta xi cuacun casua ná Nahmi naha ne, hitsë sa venguichji rë me xi cuma rë yëjë sa xcusun. Hacuaaha tsajin yo cuma cuaxëxin rë me xi siu tsja Nahmi naja me. ³⁰Ngahan cojo Nahmi naja ne, ngu ni xahasen niji, ngu ni cjuatacun niji, ngu ni hasen niji. —Cuatjin cafayangui Jesús.

³¹Ngajan xi xutaxa rë xi cuacun jan ne, cafaha nga me ndoyojo xi cuetaha me Jesús xi tsiquehen me me. ³²Hane Jesús ne, cuitjin cachja me:

—Ngahan ne, jemu cjin xcusun ndaja casahme ngajni nuju sacuatjin cavitexa ná Nahmi naja. Hane çjarë xcusun vëhë tsëhë xi cuetuhun ná ndoyojo ni? —Cuatjin cachja Jesús.

³³Ngajan xi xutaxa rë jan ne, cuitjin cafayangui me:

—Hacuiin tsëhë ngu xcusun ndaja xi canihni xi cuetihin ri ndoyojo ta ngatsë rë xi nixcuehyi Nina, ngatsë rë xi handasa ngu xuta ni ngaye ne, peru noje xi tangun ngaye cojo Nina. —Cuatjin cafayangui me.

³⁴Ngajan xi Jesús ne, cuitjin cachja me:

—Ley rë Moisés xi vitexa nuju ne, ha ndaja hyun xi camahindu cjua

vihi xi cachja Nina: “Ngayujun ni ne, nina ngayun.” Cuatjin camahindu.

³⁵Ngayejen ni ne, ha hyan ta cjua xi chja xcun xujun rë Nina ne, hatuxa cjuaquixi jain. Hane Nina ne, cachja me nina tsëhë xuta xi cuacun cafahatsja cjua rë me. ³⁶Quihndë ta Nina cavaxijin ná me hacuaaha catsingatju ná me nguehe ngasunhndë ne, çhacutjin má xi nújun xi ngahan ne, choho chjá, tsëhë xi cachjá xi Quihndi rë Nina ngahan ni? ³⁷Sa xi ngahan tisahmee xcusun xi cavitexa Nahmi naha xi sahme ne, xicamacjaain nuju ngahan. ³⁸Peru sa xi tisahme ne, handasa cumacjaain nuju ngahan ne, ndastu tsëhë xcusun xi sahme ne, catamacjain nuju, cojo sa xi cuijne rcun ngundiyaxa ni xi Nahmi naja ne, jiya me xahasen naha, hane ngahan ne, tejñaya xahasen rë me. —Cuatjin cachja Jesús.

³⁹Ngajan xi casahmi nga xutaxa rë jan cjuandya xi cjuaha me Jesús, peru Jesús ne, cavetjutje me tsëhë xuta jan quiji me.

⁴⁰Hya xi camá ne, cavetju Jesús quiji nga me ngunda vëhë tsëhë Ndayë Jordán, ngajan hiscan xi casetaha Juan cavitenda me xuta ntsacu cavetsihin. Hane ngajan casetaha me. ⁴¹Hane jemu cjin xuta quijitjengui me Jesús. Hane cuitjin cachja xingu xingu me cojo xicjin me:

—Juan ne, handasa casahmii me cjuarcun, peru yëjë ni cjua xi cachja me tsëhë me vihi ne, cjuaquixi jain.

⁴²Hane jemu cjin xuta camangu cacun me cojo Jesús ngajan cahndë vëhë.

Cjuaveya rë Lázaro

11 Tacun ngu cha hmu rë xi hmi rë Lázaro, ngu cha Betania, nangui rë na María cojo na Marta tíchja na. ²Na María vëhë ne, na vëhë xi cavitejnu na ntsacu Nai naja ngu xcusun aceite xi jemu ndaja jne camahani hacuaaha jercu hnga chji rë, sehe catsixiya na cojo tsjarcu na. Na vëhë xi hmu rë cha Lázaro

hntsë na. ³Ngajan xi catsijo na vëhë ne, catsingatju na cjuua vihi tsëhë Jesús:

—Tatá, chutsujun ni, cha xi jemu vinga nuju jan ne, jemu hmu rë cha. —Vëhë cjuua xi catsingatju na.

⁴Hane xi cahndë Jesús cjuua vëhë ne, cuitjin cachja me:

—Chíhin vëhë ne, cuetjincaain cjuaveya rë cha Lázaro cojo ta xi cuetjucaa ne, cuma jyë cuma hnga Nina cojo Hasen rë me, cojo sa xi Quihndi rë Nina ne, hacuaha cuma jyë cuma hnga me cojo Hasen rë me ngatsë rë chíhin vëhë. —Cuatjin cachja Jesús.

⁵Quihndë ne, Jesús ne, jemu vinga rë me na Marta cojo tichja na cojo cha Lázaro. ⁶Peru xi camachaya rë Jesús xi hmu rë cha ne, casetaha me jo nixtin sa hiscan xi ha quitahá me jan. ⁷Xi cavatju vëhë ne, sehe cachja me cojo xuta ladu rë me jan cuitjin:

—Cuyan cuanguen nga ngu cahndë tsëhë distritu Judea. —Cuatjin cachja me.

⁸Ngajan xi xuta ladu rë me jan ne, cuitjin cachja me:

—Maestro, xutaxa rë yungun jan ne, ¡sehe tiña nixtin xi casahmi me cjuandya xi tsiquehen nuju me cojo ndoyojo! ¡Xi meje rë ne, cuanguun ngajan! —Cuatjin cachja me.

⁹Hane Jesús ne, cuitjin cafayangui me:

—¿Hacuiin tejó hora tjin rë xi ngu nixtin ni? Quihndë xi cjëë cuechú hora xi cuichja Nina xi cueya ngahan ne, tsajin mé cuma ná, sacuatjin xtenguiin naja xi nguinxtin tsëhë xi tsejen naja hasen rë tsuhi. ¹⁰Peru xi cuechú hora xi cuichja Nina xi cueya ngahan ne, cueya, sacuatjin xtengui naja xi nixten tsëhë xi tsajin hasen xi cuma naja.

¹¹Cuatjin cafayangui Jesús cjuua vëhë, hane sehe cachja sa me cuitjin:

—Cha amigu naja, cha Lázaro ne, cafañafë cha. Peru cjué ngahan tsingásca rë cha. —Cuatjin cachja Jesús.

¹²Ngajan xi xuta ladu rë me jan ne, cuitjin cachja me:

—Tatá, sa xi cafañafë jain cha ne, vëhë tsejen xi cumandaja cha. —Cuatjin cachja xuta ladu rë me jan.

¹³Quihndë ne, cjuua xi cachja Jesús vë ne, tsëhë cjuaveya rë cha Lázaro. Peru xi má rë xuta ladu rë me jan ne, tichja me tsëhë nijná ni rë cha. ¹⁴Ngajan xi Jesús ne, cachja quixi me cuitjin:

—Cha Lázaro ne, cahme cha. ¹⁵Hane ngahan ne, jemu ndama ná xi hacuiin ngajan tejña hora vëhë ta, xi chutsujun hacutjin cuma ne, cumangu tacún cojo ná. Peru cuanguen tjenguen nima. —Cuatjin cachja Jesús.

¹⁶Ngajan xi Tomás, me xi chja me tsëhë cha Lihma ne, cuitjin cachja me cojo xuta ladu rë Jesús xi yahnga jan:

—Hacuaha cuanguen ngayaan, cojo sa xi cueyan tangun cojo rë me. —Cuatjin cachja Tomás.

Sehe cavetju yëjë me quiji me cojo Jesús.

Sua Jesús cjuahñu hacuaha tsicuya me nima cjuahñu

¹⁷Hya xi camá ne, xi cafehe me ngajan Betania ne, camachaya rë Jesús xi ha tjin rë ñuju nixtin xi jiyaniji nima Lázaro.

¹⁸Betania jan ne, sacuaha chuva rë jyan kilómetro tacun tsëhë Jerusalén. ¹⁹Hane jemu cjín xuta quiji tjengui me na Marta cojo na María xi sua me na cjuetacun tsëhë cjuaveya rë hntsë na. ²⁰Hane xi camachaya rë na Marta xi nduva Jesús ne, cavetju na quiji cafahatsja na me. Peru na María ne, cavéjña ni na ndava na. ²¹Hya xi camá ne, xi casacu xicjin na Marta cojo Jesús ne, cuitjin cachja na cojo rë me:

—Tatá, sa ngayun nechun nguehe ne, cahmii nima xingueen. ²²Peru hvë ta

hisca quihndë ne, tu mé ni xi chjahyun rê Nina ne, sua nuju me. —Cuatjin cachja na.

²³Ngajan xi Jesús ne, cuitjin cachja me cojo rê na:

—Nima xingun ne, cuya cjuahñu. —Cuatjin cachja Jesús.

²⁴Hane na Marta ne, cuitjin cachja na:

—Hvë ta cuya nima xingueen cjuahñu hya xi hacuaha yëjë nima cuya cjuahñu, nixtin xi tsichuva Nina sa nima sa xuta. —Cuatjin cachja na.

²⁵Ngajan xi Jesús ne, cuitjin cachja me cojo rê na:

—Ngahan xi suá cjuahñu hacuaha tsicúya nima cjuahñu. Xuta xi mangu-cacun me cojo ná ne, ha ndasa cueya me ne, peru cuya me cjuahñu. ²⁶Hane yëjë xuta xi tjin rê me cjuahñu xatsë hacuaha mangucacun me cojo ná ne, hatuxa tsajin nu tsajin nixtin xi cjue hasen rê me xcun cjuañihi. ¿Há macjain nuju cjua vëhë? —Cuatjin cachja Jesús.

²⁷Ngajan xi na vëhë ne, cuitjin cafayangui na:

—Juun, macjain ná, Tatá. Macjain ná xi ngayun xi catsingatju nuju Nina, ngayun xi Quihndi rê Nina ngayun. Hacuaha ngayun xi jemu cavinechinyin nuju xi cuinduvun ngasunhdë. —Cuatjin cafayangui na Marta.

Jihnda Jesucristu xcun tsjun rê nima Lázaro

²⁸Xi cafë cachja na Marta cuatjin ne, sehe cavuya na quiji jaha na na María tíchja na. Hane xi cafehe na jan ne, sehe cajindayahma na na María, cuitjin cachja na:

—Cafehe maestru, hane jindaya me ngaye. —Cuatjin cachja na.

²⁹Xi tu cahndë na María cjua vëhë ne, marcu macjain cavisatjen na quiji tjengui na Jesús. ³⁰Quihndë ne, cjëë sa cuisehen Jesús nandya ta secun cuaha me cahndë hiscan cavechútaha na Marta

me. ³¹Hane xuta xi siu cojo na María ndava na xi tisua me na cjuetacun ne, xi cavëë me xi marcu macjain cavisatjen na quiji na ne, quiji tjengui me na. Xi má rê me ne, xcun tsjun cjui na, cojo sa xi ngajan squihnda na.

³²Hane xi cafehe na María hiscan secun Jesús ne, xi cavëë na me ne, quiji caticjaxcun na xcun me, sehe cachja na cuitjin:

—Tatá, sa xi ngayun nechun nguehe ne, cahmii nima xingueen. —Cuatjin cachja na.

³³Hane xi cavëë Jesús xi cuatjin jihnda na hacuaha jihnda yëjë xuta xi ticojo na jan ne, camandya cacun me, jemu choho camahani camá rê xahasen rê me.

³⁴Hane cuitjin cavinenguise me:

—¿Jani tacun tsjun xi caveyun nima? —Cuatjin cavinenguise me.

Hane xuta jan ne, cuitjin cafayangui me:

—Tatá, nduvun chutsujun. —Cuatjin cafayangui me.

³⁵Hane cajihnda Jesús. ³⁶Ngajan xi xuta jan ne, cuitjin cachja me ngajñi rê me:

—Chutsujun ni hacutjin catsihmu cacun me nima. —Cuatjin cachja me.

³⁷Peru ngujo me ne, cuitjin cachja me:

—Me vihi xi casahmi me xi camandaja tuxcun cha rcá jan ne, ¿há camaji casahmi me xi cahmii nima vëhë? —Cuatjin cachja ngujo xuta jan.

Cavuya nima Lázaro cjuahñu

³⁸Ngajan xi Jesús ne, ngu ndiya nga jemu camandya cacun me. Sehe quiji me xcun tsjun. Tsjun jan ne, ngu ngujo, hane tingotjo rê ne, titsa ngu ndyojo.

³⁹Ngajan xi Jesús ne, cuitjin cachja me:

—Chjuhunxun ndyojo vë. —Cuatjin cachja me.

Ngajan xi na Marta, tíchja nima ne, cuitjin cachja na:

—Tatá, ha choho jne vë ta, ha tjin rë ñuju nixtin. —Cuatjin cachja na.

⁴⁰ Hane Jesús ne, cuitjin cachja me cojo rë na:

—Ha cachjá cojo nuju ta sa xi cumacjain nuju cjuá naha ne, ngayun ne, chut-sujun hacutjin jyë hnga Nina cojo Hasen rë me. —Cuatjin cachja Jesús.

⁴¹ Hya xi camá ne, cachjaháxin rë ndy-ojo jan. Hane hora vëhë cavutsejenniji Jesús ngahnga, sehe cachja me cuitjin:

—Ngayun Nahmi naha, suá nacuechji nuju ta canihñucundun cjuá xi cachjá cojo nuju. ⁴² Hacuaha ha hvë ta ngayun ne, hatuxa nihñucundun cjuá naha. Vëhë xi hacuiin ngu jyë xi cuichjá cojo nuju cjuá vihi, peru ngatsë rë xuta xi hinchacunndee vi ne, vëhë xi cuitjin tichjá, cojo sa xi cumacjain rë me xi ngayun caningatjun ná. —Cuatjin cachja Jesús.

⁴³ Hane xi cajnetaha cachja me cuatjin ne, sehe ña cajindaya me cachja me cuitjin:

—¡Lázaro, tetjun! —Cuatjin cachja me.

⁴⁴ Hya xi camá ne, cavetju Lázaro tsëhë tsjun jan, tjinguiya tsjian ntsacu me, tjinguiya tsjian tsja me, hacuaha tji-hñu xcun me cojo ngu pañutu. Hane Jesús ne, cuitjin cachja me cojo xuta jan:

—Chundecjun tsjian vë sehe cuman-daya me. —Cuatjin cachja Jesús.

Meje cjuaha xutaxa rë yungun Jesucristu

⁴⁵ Quihndë ne, jemu cjín xuta quiji cavusehenya rë na María hacuaha cavëë me hacutjin casahmi Jesús. Hane xuta xi cuacun jan ne, camangu cacun me cojo Jesús. ⁴⁶ Peru ngujo xuta ne, quiji cachja me cojo cha fariseo hacutjin casahmi Jesús. ⁴⁷ Ngajan xi yëjë nahmi xi matitjun cojo cha fariseo xi cuacun jan ne, casahmi me ngu junta. Hane xcun junta jan ne, cuitjin cachja me:

—¿Mé ndatjin nihña? ta cha xi cuajyihi vë ne, jemu tisahmi cha cjuarcun.

⁴⁸ Sa xi tsajin mé xi nihña ne, yëjë xuta ne, cumangu cacun me cojo cha. Hane vëhë xi xutaxa rë Roma ne, cuma cjan rë me, hane cjuahatahá me yungun xi matitjun naja hacuaha cjuahatahá me gobiernu xi tinihña. —Cuatjin cachja me xi cuacun jan.

⁴⁹ Peru ngu me xi cuacun jan xi hmí rë Caifás, me xi hacuaha má nahmi xi matitjun tsëhë yëjë nahmi nu vëhë ne, cachja me cuitjin:

—Ngayun ne, hyúun camahani. ⁵⁰ Vijnii rcun xi ndaja tsujun xi ngu xihin ni cueya ngatsë rë yëjë ni xuta, hane hacuiin yëjë xuta cueya me. —Cuatjin cachja Caifás.

⁵¹ Peru me vëhë ne, hacuiin cachja me cojo cjuatacun rë suvá me ta, ngatsë rë xi má me nahmi xi matitjun nu vëhë ne, cachja me cjuá xi casua Nina me xi Jesús cueya me ngatsë rë xuta. ⁵² Peru hacuiin ngatsë rë suvá ni xuta tjë rë Israel ta hacuaha cueya me cojo sa xi sahmi tangun me yëjë quihndi rë Nina xi tinguitsojo, sehe cuma yëjë me sacuaha ngu ni xcusun xuta.

⁵³ Ngajan xi hisca nixtin xi cachja Caifás cuatjin ne, nahmi xi matitjun cojo cha fariseo xi cuacun jan ne, caviyuju me cjuatacun rë me xi tsiquehen me Jesús.

⁵⁴ Vëhë xi Jesús ne, catsujyihyaaintë me nandya xi siu ladu rë distritu Judea ta cavetjuxin me tsëhë ngajan, quiji me ngu nandya xi hmí rë Efraín, tiña hiscan xi faha rë xi ha jemu xín camahani tsëhë nandya. Hane ngajan casetaha me cojo xuta ladu rë me.

⁵⁵ Quihndë ne, ha camatiña suhi tsëhë Pascua. Hane jemu cjín xuta quiji me Jerusalén chaja sa nixtin rë suhi jan xi cuma tyjahi me sacuatjin xi ha xcusun rë xutachanga. ⁵⁶ Jemu siu me cuidadu há cjuehe Jesús suhi jan. Hane jinguyëjë rë xi hinchacun me yungun xi matitjun

jan ne, vinenguise xicjin me xingu xingu me cuitjin:

—¿Mé xi má nuju? ¿Há cuinduvaain me suhi? —Cuatjin cavinenguise xicjin me. ⁵⁷ Quihndë ne, nahmi xi matitjun cojo cha fariseo xi cuacun jan ne, ha cavitexa me xi yo xi vëë hiscan tacun Jesús ne, sua cumachaya rë me, cojo sa xi chjahá rë Jesús.

Xtejnu aceite ntsacu Jesucristu

12 Jyun nixtin chaja sa xi cuechú suhi tsëhë Pascua ne, cavuya quiji Jesús ngajan Betania, hiscan xi tacun cha Lázaro, cha xi catsicuya Jesús cjuahñu hya xi cahme cha. ² Hane ngajan casehenndaja ngu comida xi sinë me. Na Marta tinvina na comida, peru cha Lázaro ne, cojo cha tijinë cha cojo Jesús cojo me xi yahnga sa. ³ Hane na María ne, cafaha na ngu frascu xi hinja jo cuarto aceite nardo xi jemu ndaja jne hacuaha jemu hnga chji rë, quiji cavitejnu na ntsacu Jesús, sehe catsixiya na cojo tsjarcu na. Hane cahntsua ndihya jan ne, ña catsë rë cojo xta rë aceite jan. ⁴ Ngajan xi Judas Iscariote, ngu cha ladu rë Jesús, cha xi sahmi rë me entregadu ne, cuitjin cachja cha:

⁵ —¿Mé má cuatjin casahmi na? Aceite vë ne, cuma xteña hane sacú chji rë jyan cientu nixtin xa xi sahmi ngu xuta, hane tujún vëhë ne, tahan rë xuta yuma. —Cuatjin cachja cha.

⁶ Peru Judas ne, hacuiin tsëhë xi marcun rë cha tsëhë xuta yuma xi cuatjin cachja cha ta tsëhë xi chëjë cha, hacuaha cha vëhë tjin tsja cha tsá xi hinja yëjë tujún, hane jiya hora ne, tsichëjë cha tsë tsë. ⁷ Ngajan xi Jesús ne, cuitjin cachja me:

—Xicanújiin cojo rë na. Catetjo na xi tjin rë na hisca hya xi seyaniji ngahan. ⁸ Xuta yuma ne, yëjë nu yëjë nixtin ne, siu me cojo nuju, peru ngahan

ne, hacuiin yëjë nu yëjë nixtin tejña cojo nuju. —Cuatjin cachja Jesús.

Meje tsiquehen xutaxa rë yungun cha Lázaro

⁹ Hya xi camá ne, jemu xutacjín tsëhë nandya xi siu distritu Judea ne, camachaya rë me xi Jesús ne, Betania quitahá me. Ngajan xi quiji xuta ngajan, hacuiin tsëhë xi meje scuëë ni me Jesús ta hacuaha tsëhë xi meje scuëë me cha Lázaro, cha xi catsicuya Jesús cjuahñu. ¹⁰ Hane nahmi xi matitjun jan ne, caviyuju cacun me xi hacuaha cojo cha Lázaro tsiquehen me cha, ¹¹ tsëhë xi ngatsë rë cha vëhë ne, jemu cjín xuta titsitjungui me nahmi jan, hane tijimangu cacun me cojo Jesús.

Cafehe Jesucristu nandya Jerusalén

¹² Xi camá nchujun jan ne, xutacjín xi cafehe suhi jan ne, camachaya rë me xi Jesús ne, hacuaha nduva me Jerusalén. ¹³ Hane cafaha me xca jne, sehe cavetju me quijitjengui me Jesús hiscan nduva me. Hane hisca jindaya me cachja me cuitjin:

—¡Jemu ndaja Nina! ¡Jemu catsinchacun Nina me xi nduva vi tsëhë xi Nina catsingatju rë me, me xi cumatitjun tsajan ngayaan xuta tjë rë Israel! —Cuatjin cajindaya me cachja me.

¹⁴ Hane xi casacu rë Jesús ngu burru chihndë ne, sehe camiji me chu, sacuatjin camahindu tsëhë me xcun xujun rë Nina hiscan xi chja cuitjin:

¹⁵ ¡Xicarcuun ngayun xuta Jerusalén; chutsujun ni, me xi matitjun tsujun ne, nduva me

quisun me ngu burru chihndë!

¹⁶ Hya xi cuatjin camá ne, xuta ladu rë Jesús ne, cajonii rcu me. Peru hya xi Jesús cama jyë cama hnga me cojo Hasen rë me ne, hya xi cavuya cjuahñu rë me hya catsinguitsjen xuta xi cuacun jan xi cu-

atjin camahindu tséhë Jesús hane cuatjin jain cavatju me camá.

¹⁷ Xuta xi siu cojo Jesús hya xi cajin-daya me cha Lázaro xi cuetju cha tséhë tsjun hacuaha catsicuya me cha cjuahñu ne, casua me camachaya rë jingu sa xuta hacutjin camá. ¹⁸ Véhë xi xutacjin jan ne, cavetju me quijitjengui me Jesús, tséhë xi camachaya rë me xi casahmi Jesús cjuarcun véhë. ¹⁹ Véhë xi cha fariseo ne, cachja cha ngajñi rë cha cojo xicjin cha cuitjin:

—Cahyun ni ne, tsajin mé xi cuma ni-hña. Chutsujun ta yëjë ni xuta ne, tjengui rë cha. —Cuatjin cachja cha.

Meje scutsejen ngujo xutaxín Jesucristu

²⁰ Quihndë ne, ngajñi rë xuta xi quiji me suhi xi cjuaharcun me Nina ne, hinchajñi ngujo xutaxín. ²¹ Hane me xi cuacun véhë ne, quijitjengui me Felipe, xuta Betsaida, ngu nandya tséhë distritu Galilea, hane cuitjin cachja me:

—Tatá, ngayin ne, meje cuisiajmí cojo Jesús. —Cuatjin cachja me.

²² Ngajan xi Felipe ne, quiji cachja me cojo Andrés, sehe catsijo ni me quiji casua me camachaya rë Jesús. ²³ Ngajan xi Jesús ne, cuitjin cachja me cojo rë me:

—Cavechú hora xi ngahan xi Quihndi rë Xuta Jain ngahan ne, cuma jyë cuma hnga ngahan cojo hasen naha. ²⁴ Cuichjá cojo nuju cjuaquixi ta ngu tú rë trigu xi cjuinengui nangui ne, sa xi cueyaain ne, ha ngu tu tu ni má yëjë nu yëjë nixtin. Peru sa xi cueya ne, jemu cjin tjë sua.

²⁵ Xuta xi vangui me suvá ni xi ndaja cjuahñu rë me nguehe ngasunhndë ne, titsichajá me cjuandaja xi sua Nina me cjuahñu xatsë. Peru xuta xi marcuaain rë me tséhë suvá ni xi ndaja cjuahñu rë me nguehe ngasunhndë ne, hatuxa sacú rë me cjuandaja xi sua Nina me cjuahñu xatsë. ²⁶ Xuta xi meje cuisehen me ladu naha ne, catinduva tjengui ná me. Hane

hiscan xi cuitejña ngahan ne, hacuaha ngajan cuejña me xi má ladu naha. Xuta xi má me ladu naha ne, sahmi jyë sahmi hnga Nina Nahmi naja me. —Cuatjin cachja Jesús.

Chja Jesucristu tséhë cjuaveya rë me

²⁷ Cachja sa Jesús cuitjin:

—Quihndë ne, jemu macjin cákun. Peru ¿mé cuichjá ni? ¿Há cuichjá cuitjin: “Ngayun Nahmi naha, naxuntjun ná tséhë xcusun xi cuátju cuma quihndë?” Peru cuichjaan cuatjin ta, tséhë xi hatuxa canduvá xi cuatjin cuátju cuma. ²⁸ Ngayun Nahmi naha, tuhun cumachaya rë xuta hacutjin jyë hnga ngayun cojo Hasen nuju. —Cuatjin cachja Jesús.

Ngajan xi canuhya rë ngu xta xi canduva ngajan ngahnga xi cachja cuitjin:

—Ha casuá camachaya rë me, hacuaha cúya suá nga cumachaya rë me. —Cuatjin cachja xta jan.

²⁹ Hane ngujo xuta xi hinchacun jan xi cahndë me xta jan ne, cachja me ta chuhun xi catsingá. Hane ngujo nga me ne, cachja me xi ngu ángel cachja cojo Jesús. ³⁰ Ngajan xi Jesús ne, cuitjin cachja me cojo xuta jan:

—Hacuiin xi cuíhndë ngahan xi cachja xta véhë ta xi cuinuhyun ngayun.

³¹ Cavechú nixtin xi cuma chuva xuta cojo cjuatacun rë me. Cavechú nixtin xi cjuahatahá Nina gobiernu xi tisahmi Satanás. ³² Hane ngahan ne, hya xi tjuni-hnga ná tséhë nangui ne, sahme xi xuta ne, cuisehen me ladu naha. —Cuatjin cachja Jesús.

³³ Xi cuatjin cachja Jesús ne, casua me camachaya rë xuta mé chuva rë cueya me. ³⁴ Ngajan xi xuta jan ne, cuitjin cafayangui me tséhë Jesús:

—Ngayin ne, hyin xi chja ley ta me xi Nina tsingatju rë ne, tsajin nixtin xi cueya me. ¿Hacutjin má xi nújun ngayun xi me xi Quihndi rë Xuta Jain ne, tjuni-h-

nga rë me? ¿Yo me xi Quihndi rë Xuta Jain vë ni? —Cuatjin cafayangui xuta jan.

³⁵ Ngajan xi Jesús ne, cuitjin cachja me cojo xuta jan:

—Ha tu chúva sa nixtin xi ngahan xi sacua ha hasen ngahan ne, tejña ngajñi nuju. Tángun xcun sa cojo ndiya xi ha tivangun jinguyëjë rë xi tacun sa hasen ngajñi nuju, sa tu cuechútáha nuju jñú. Xuta xi cjuí me ngajñi jñú ne, hvín me jani cjuí me. ³⁶ Vëhë xi jinguyëjë rë xi tejña ngajñi nuju ne, catamangu tacún cojo ná, cojo sa xi tsë rë xahasen nuju cojo cjuahasen naha. —Cuatjin cachja Jesús.

Jemu cjin xuta xi camanguaain cacun me cojo Jesucristu

Hane xi cavatju cachja Jesús cjua vëhë ne, cavetju me quijihma me tsëhë xuta jan.

³⁷ Handasa cavëë xuta xi jemu cjin cjuarcun casahmi Jesús ne, peru camanguaain cacun me cojo rë me. ³⁸ Cuatjin camá xi cavetjucaa cjua rë profeta Isaías xi camahindu xcun xujun rë Nina hiscan xi chja cuitjin:

Ngayun Nina niji, tsajin yo camacjain rë cjua xi canújin;

Tsajin yo cajne rcu hacutjin xi hñu ngahñu rë Nina.

Cuatjin cachja profeta Isaías. ³⁹ Vëhë xi xuta jan ne, camaji camangu cacun me cojo Jesús ta, tsëhë xi hacua ha cachja nga profeta Isaías cuitjin:

⁴⁰ Sacua ha ngu xuta xi tsihñu me xcun ngu nga xuta cojo sa xi cumatsijin rë me ne,

cuatjin casahmi jñu Nina tsëhë cjuatacun rë xuta, cojo sa xi cuijnii rcu me hacua ha cyaain me ladu rë Nina xi sahmi Nina xi cumandaja me.

⁴¹ Cuatjin cachja Isaías cjua vëhë ta, tsëhë xi cavëë me hacutjin jyë hnga

Jesús cojo hasen rë me hane cuatjin cachja me tsëhë Jesús.

⁴² Handasa cuatjin casahmi Nina ne, jemu cjin xutaxa rë camangu cacun me cojo Jesús. Peru tsëhë xi tsacjun me cha fariseo ne, catsinguixiin me ngajñi rë xuta, sa tu cumachohotje rë me yungun.

⁴³ Xutaxa rë xi cuacun vë ne, hitsë sa meje rë me xi sahmi yehe sahmi hnga xuta me, xi cuma rë xi sahmi yehe sahmi hnga Nina me.

Cjua rë Jesucristu tsichuva rë xuta cojo cjuatacun rë me

⁴⁴ Ngu ndiya nga jan ne, jemu hñu cachja Jesús cuitjin:

—Xuta xi mangucacun me cojo ná ne, hacuiin suva ni mangucacun me cojo ná ta hacua ha mangucacun me cojo Nina Nahmi naja, me xi catsingatju ná.

⁴⁵ Hane xuta xi vijne rcu me yo ngahan ne, hacua ha vijne rcu me yo me xi catsingatju ná. ⁴⁶ Ngahan xi sacua ha hasen xi cuma rë xuta ngahan ne, canduvá nguehe ngasunhdë, cojo sa xi yëjë xuta xi mangucacun me cojo ná ne, cjuë xi jñu tsëhë cjuatacun rë me. ⁴⁷ Hane sa xi ngu xuta vetaha rcu me cjua xi chjá peru faharcuaain me ne, ngahan ne, tsichuvaan me cojo cjuatacun rë me ta, tsëhë xi ngahan ne, hacuiin canduvá xi tsichúva xuta cojo cjuatacun rë me ta canduvá xi cuáxëtje me. ⁴⁸ Xuta xi tsitjungui ná me hacua ha fahatsjaain me cjua naha ne, ha tjin yo xi tsichuva rë me. Cjua xi cachjá ne, cjua vëhë xi tsichuva rë me nixtin xi tsichuva Nina sa nima sa xuta. ⁴⁹ Ngahan ne, cjua xi cachjá ne, hacuiin cachjá cojo cjuatacun naha suva ta Nina Nahmi naja,

me xi catsingatju ná ne, suvá me cavitexa ná me hacutjin meje rë xi cuichjá. ⁵⁰ Hane hvë ta cjua xi vitexa me vëhë ne, sua naja cjuahñu xatsë. Vëhë xi cjua xi chjá ne, suvá cjua xi cavitexa Nina Nahmi naja.

**Vane Jesucristu ntsacu
xuta ladu rë me**

13 Quihndë ne, cavechú nixtin xi chaja sa ngu nixtin xi cuma suhi tsëhë Pascua. Hane Jesús ne, ha vëë me xi cavechú hora xi cuetju me tsëhë ngasunhndë vihi, cjue tjengui me Nina Nahmi naja. Hatuxa catsihmu cacun me xuta ladu rë me xi siu ngasunhndë vihi, hacuaha hacuanitjin ni catsihmu cacun me hisca xi cahme me.

² Jesús cojo xuta ladu rë me ne, tijinë nguixun me. Hane cha Judas, quihndi rë Simón Iscariote ne, ha casahmi Satanás xi cuejña cacun cha xi sahmi entregadu cha Jesús. ³ Peru Jesús ne, ha vëë me xi ha cavejña Nina yëjë xcusun tsja me. Hacuaha ha vëë me xi hiscan tacun Nina canduva me, hane hacuaha ngajan ni cuya cjue nga me. ⁴ Hya xi camá ne, cavejña Jesús xi tijinë me jan ne, cavisat-jenhnga me, sehe cavaxë me chingá rë me cavejñaxin me, hane cafaha me ngu toalla cavityanguitaha me. ⁵ Sehe cafaha me nandá cojo nisu, hane cavetsihin cavane me ntsacu xuta ladu rë me hacuaha catsixiya me cojo toalla xi tyjanguitaha rë me jan.

⁶ Hane xi cafehe me xcun Simón Pedru ne, cachja Pedru cuitjin:

—Tatá, ¿há xi ngayun cuanu ntsacú? —Cuatjin cachja Pedru.

⁷ Ngajan xi Jesús ne, cuitjin cafayangui me:

—Xcusun xi tisahme vi ne, vijinii rcun quihndë, peru ngascan ne, hya cuijne rcun. —Cuatjin cafayangui Jesús.

⁸ Hane Pedru ne, cuitjin cachja me:

—¡Hatuxa tsajin nu tsajin nixtin xi ngayun cuanu ntsacú! —Cuatjin cachja me.

Ngajan xi Jesús ne, cuitjin cafayangui me:

—Sa xi cuánee ntsacun ne, hacuiin xuta ladu naha ngayun. —Cuatjin cafayangui Jesús.

⁹ Ngajan xi Simón Pedru ne, cuitjin cachja me cojo Jesús:

—Tatá, sa cuatjin ne, ¡hacuiin suvá ni ntsacú ta hacuaha cojo ntsa cojo rcú tanu! —Cuatjin cachja me.

¹⁰ Ngajan xi Jesús ne, cuitjin cafayangui me tsëhë Pedru:

—Xuta xi ha cavinduya me ne, suvá ni ntsacu me meje rë xi cjuengui ta, tsëhë xi ha tyjahi me. Ngayujun ni ne, ha tyjahi ngayun. Peru ngu ngayun ne, hacuiin cuatjin. —Cuatjin cafayangui Jesús.

¹¹ Tsëhë xi ha vëë Jesús yo xi sahmi rë me entregadu, vëhë xi cachja me xi: “Hacuiin ngayujun xi tyjahi ngayun.”

¹² Hane xi cavatju cavane Jesús ntsacu xuta ladu rë me ne, sehe cavuya cavajá me chingá rë me, sehe quiji cafaha nga me cahndé rë me xcun maxë. Hane sehe cachja me cojo xuta ladu rë me cuitjin:

—¿Há vijne rcun xcusun xi casahme cojo nuju vë? ¹³ Ngayun ne, maestru niji hacuaha nai niji nújun tsahan. Hane ndatjin xi cuatjin nújun ta, tsëhë xi cuatjin jain. ¹⁴ Quihndë ne, quihndë ta ngahan xi nai nuju hacuaha maestru nuju ngahan cavane ntsacun ne, hacuaha meje rë xi cuatjin cuanu ntsacu xingun xingu xingu ngayun. ¹⁵ Ngahan ne, cavejñá nuju ngu ejemplu vë, cojo sa xi sacuaha xcusun xi casahme cojo nuju vë ne, hacuaha cuatjin nihñu. ¹⁶ Cuichjá cojo nuju cjaquixi ta ngu mosu hndixahan ne, hacuiin hitsë sa venguichji rë xi cuma rë nai rë, hacuaha ngu xi ningatjun rë ne, hacuiin hitsë sa matitjun xi cuma rë me xi catsingatju rë. ¹⁷ Quihndë ta ha vijne rcun cjua vëhë ne, jemu ndaja tsujun sa xi nihñu cuatjin.

¹⁸ Peru ngahan ne, hacuiin tichjá tsujun ngayujun ni ta ngahan ne, ha hvë yo xi cavaxejen. Peru meje rë xi cuetju-caa cjua xi camahindu xcun xujun rë

Nina xi chja cuitjin: “Cha xi cajinë tangun cojo ná ne, camá cha condra naha.” Cuatjin camahindu. ¹⁹Tichjá cojo nuju cjua vëhë quihndë chaja sa xi cuetjucaa, cojo sa xi hya xi cuetjucaa ne, ngayun ne, cumacjain nuju xi Ngahan Vi hmí ná. ²⁰Cuichjá cojo nuju cjuaquixi ta xuta xi cjuahatsja me tu yo ni xi tsingátju ne, tangun sacua ha xi cjuahatsja ná me ngahan suva. Hane xuta xi cjuahatsja ná me ne, tangun sacua ha xi cjuahatsja me Nahmi naha xi catsingátju ná me. —Cuatjin cachja Jesús cojo xuta ladu rë me.

Chja Jesucristu xi Judas sahmi rë me entregadu xcun xutaxa rë yungun

²¹Xi cavatju cachja Jesús cuatjin ne, jemu camandya cacun me, hane cuitjin cachja me:

—Cuichjá cojo nuju cjuaquixi ta ngu ngayun ne, nihñu ná entregadu. —Cuatjin cachja me.

²²Hane xuta ladu rë Jesús xi cuacun jan ne, cavutsejenya me xcun xicjin me xingu xingu me. Hviín camahani me yo tsëhë xi cuatjin cachja Jesús. ²³Hane ngu cha ladu rë Jesús xi jemu vinga rë me ne, tjehe rë Jesús ne, ngajan tijinë cha niñu. ²⁴Vëhë xi Simón Pedru ne, casahmi rcu me cojo cha vëhë, sehe cachja me cuitjin:

—Chjinengunsun rë me yo tsëhë xi chja me. —Cuatjin cachja Pedru.

²⁵Hane xi catsicuya cha vëhë xcun cha tiña xcun Jesús ne, sehe cavinenguise cha me cuitjin:

—Tatá, ¿yo xi nújun vë? —Cuatjin cavinenguise cha.

²⁶Ngajan xi Jesús ne, cuitjin cafayan-gui me:

—Cha xi suá rë ngu rquí niñu vi hora xi cjuë tsingúisehen quinda ne, cha vëhë xi hacui cha. —Cuatjin cafayangui me.

Hane hora xi camá catsinguissehen quinda me niñu jan ne, sehe casua me cha Judas, quihndi rë Simón Iscariote.

²⁷Hane xi cavatju cafaha Judas ngu rquí niñu jan ne, hora vëhë cavisehen Satanás xahasen rë cha. Ngajan xi Jesús ne, cuitjin cachja me cojo cha:

—Xcusun xi nihñu ne, nihñu ni ngu ndiya xa. —Cuatjin cachja Jesús cojo cha.

²⁸Peru hisca ngu me xi tijinë niñu jan hvíin me mé má cuatjin cachja Jesús cojo cha. ²⁹Yahnga me ne, catsingataha cacun me xi tsëhë xi Judas yaha cha tsá tujún ne, vëhë xi cachja Jesús cojo cha xi cjue cuatsë cha xi mameje tsëhë suhi o sa xi sua cha tsë tsë xuta yuma.

³⁰Hane xi cavatju cafaha cha ngu rquí niñu jan ne, ngutjen ni cavetju cha quiji cha. Hora vëhë ne, ha camajñu.

Cjua xatsë xi cavitexa Jesucristu

³¹Ngajan xi, xi cavetju Judas quiji cha ne, sehe cachja Jesús cuitjin:

—Ngahan xi Quihndi rë Xuta Jain Ngahan ne, quihndë cuetsihin cuma jyë cuma hnga ngahan cojo hasen naha, hacua ha ngahan tsingácun hacutjin jemu jyë hnga Nina cojo hasen rë me. ³²Hane sa xi ngahan tsingácun hacutjin jemu jyë hnga Nina cojo Hasen rë me ne, Nina ne, hacua ha tsingacun me hacutjin jemu jyë hnga ngahan cojo hasen naha. Hane ngutjen ni sahmi me cuatjin. ³³Jemu chúva sa nixtin xi cuitejña cojo nuju, tsan. Ngayun ne, cuinchunsun ná, peru quihndë cuichjá cojo nuju sacuatjin cachjá cojo xutaxa rë yungun xi hiscan xi cjuë ne, cumaji cuangun. ³⁴Nguehe cuitéxa nuju ngu cjua xatsë cuitjin: “Meje rë xi nihñu hmu tacún xingun xingu xingu ngayun. Sacuatjin casahme hmu cákun nuju ngahan, cuatjin meje rë xi nihñu hmu tacún xingun.” ³⁵Hane xi cuatjin tjin cjuahmutacun ngajñi nuju cojo xingun ne, ngajan cumachaya rë yëjë xuta ta ngayun ne, xuta ladu naha má ngayun. —Cuatjin cachja Jesús.

Chja Jesucristu xi cuichja Pedru xi hvíin me yo Jesucristu

³⁶Ngajan xi Simón Pedru ne, cuitjin cavinenguise me:

—Tatá, ¿jani cuangun ni? —Cuatjin cavinenguise me.

Ngajan xi Jesús ne, cuitjin cafayangui me:

—Hiscan xi cjué ne, quihndë ne, cumaji cuanguntjengun ná. Peru xi cuma ngascan ne, cuanguntjengun ná. —Cuatjin cafayangui Jesús.

³⁷Hane Pedru ne, cuitjin cachja me cojo Jesús:

—Tatá, tsajin mé má cumaji cjué tjënguë nuju quihndë. Hisca yojo naha suá ngatsë nuju. —Cuatjin cachja Pedru.

³⁸Ngajan xi Jesús ne, cuitjin cafayangui me:

—¿Há xi tuhun yojo nuju ngatsë naha? Cuichjá cojo nuju cjuaquixi ta chaja sa xi squihnda xahnda ne, ngayun ne, ha jyan ndiya cuinújun xi hyúun yo ngahan. —Cuatjin cafayangui Jesús.

Sacuaha ndiya xi cjui xcun Nina má Jesucristu

14 Quijinduju sa cachja Jesús cojo xuta ladu rë me cuitjin:

—Xicamandyaain tacún. Catamangu tacún sa cojo Nina, hacuaha catamangu tacún sa cojo ná. ²Ngajan ngahnga hiscan tacun Nahmi naha ne, jemu cjín cahndé tjín xi cuiyuju yëjë xuta ladu rë me. Sa xi hacuiin cuatjin ne, ngahan ne, ha cachjá cojo nuju. Peru xicamacjiin tacún ta cjué cuëhëndaja cahndé xi cuma nuju.

³Hane hya xi ha cëjë cavëhëndaja cahndé xi cuma nuju ne, sehe cúya nga, hane cjuécojo nuju, cojo sa xi hiscan xi cuitejña ne, hacuaha ngajan cuinechun.

⁴Hacuaha hiscan xi cjué ne, ngayun ne, ha hyun ndiya. —Cuatjin cachja Jesús.

⁵Hane Tomás ne, cuitjin cachja me cojo Jesús:

—Tatá, hyíin jani cuangun. ¿Hacutjin má xi nújun xi ha hyin ndiya ni? —Cuatjin cachja me.

⁶Hane Jesús ne, cuitjin cafayangui me tsëhë Tomás:

—Ngahan ne, sacuaha ndiya xi cjui xcun Nina ngahan. Ngahan ne, hatuxa tjín ná cjuaquixi rë Nina, hatuxa tjín ná cjuahñu. Suvá ni xuta xi visehen me ladu naha ne, me vëhë ni xi cuma cuechú me xcun Nina Nahmi naja. ⁷Ngatsë rë xi ha hyun ná ne, vëhë xi hatuxa chun Nahmi naha. Quihndë ne, hyun me, hacuaha ha cachutsujun me. —Cuatjin cafayangui Jesús.

⁸Ngajan xi Felipe ne, cuitjin cachja me cojo Jesús:

—Tatá, ningacun niji Nina Nahmi naja, hane cojo vëhë cumangu tacún. —Cuatjin cachja Felipe.

⁹Ngajan xi Jesús ne, cuitjin cachja me:

—Ngahan ne, ha jemu jyë nixtin tejña cojo nuju, hane ¿há hyúun ná ni, Felipe? Xuta xi ha cavëë ná me ne, ha cavëë me Nina Nahmi naja. ¿Hacutjin má xi nújun xi tsingácun nuju Nina Nahmi naja ni? ¹⁰¿Há macjaain nuju xi ngahan ne, tejñaya xahasen rë Nina Nahmi naja, hane me vëhë ne, jiya me xahasen naha? Cjua xi chjá cojo nuju ne, hacuiin chjá cojo cjuatacun naha suva. Nina Nahmi naja xi jiya me xahasen naha ne, me vëhë sahmi me xa rë me. ¹¹Catamacjain nuju xi ngahan ne, tejñaya xahasen rë Nina Nahmi naja hacuaha me vëhë ne, jiya me xahasen naha. O sa xi macjaain nuju cjua naha ne, catamacjain nuju ngahan ndastu ngatsë rë cjuarcun xi casahme.

¹²Cuichjá cojo nuju cjuaquixi ta xuta xi mangucacun me cojo ná ne, cjuarcun xi sahme ngahan ne, hacuaha cojo me sahmi me. Ha hisca yehe sa cjuarcun sahmi me ta, ngahan ne, cjué tjënguë Nina Nahmi naja. ¹³Hane tu mé ni xi chjahyun rë Nina ngatsë rë xi ladu naha ngayun ne, vëhë sahme, cojo sa xi cuma

jiyê cuma hnga Nina Nahmi naja cojo Hasen rê me ngatsê rê xcusun xi sahme, ngahan xi Quihndi rê me ngahan. ¹⁴ Sa xi chjahyun ná ngu cjuandaja ngatsê rê xi ladu naha ngayun ne, ngahan ne, sahme. —Cuatjin cachja Jesús cojo xuta ladu rê me.

Chja Jesucristu xi cuinduva Hasen rê Nina

¹⁵ Quijinduju sa cachja Jesús cuitjin:

—Sa xi ngayun nihnu hmu tacún ná ne, hacuaha cuinuhyun sacuatjin vitéxa nuju, ¹⁶ hane ngahan cuichjá cojo Nina Nahmi naja, hane tsingatju me ngu nga xi cuisecoo nuju, xi cuejña cahndé cojo nuju yêjê nu yêjê nixtin. ¹⁷ Hane vêhê ne, vêhê Hasen xi hatuxa tjin rê cjuaquixi rê Nina. Xuta xi marcuaain rê me tsêhê Nina ne, cumaji xi cuisehen Hasen vêhê xahasen rê me ta, tsêhê xi tsijin rê me Hasen vêhê hacuaha hvîin me Hasen vêhê. Peru ngayun ne, hyun Hasen vêhê ta, tsêhê xi tacun cahndé cojo nuju hacuaha cuisehen xahasen nuju.

¹⁸ Ngahan ne, hacuiin cuiyuju nuju suvun ta cúa nga cuitejñacahndé cojo nuju. ¹⁹ Ha tu hitsê sa ne, ha quihndê scuiin ná xuta. Peru ngayun ne, chun ná. Hane tsêhê xi ngahan ne, hatuxa tjin ná cjuahnu ne, vêhê xi ngayun ne, hatuxa sacú nuju cjuahnu xatsê. ²⁰ Nixtin hya ne, cuijne rcun xi ngahan ne, tejñaya xahasen rê Nahmi naha, hane ngayun ne, nechunyun xahasen naha, hane ngahan ne, tejñaya xahasen nuju.

²¹ Xuta xi tivihndê sacuatjin vitéxa ne, me vêhê xi hmu cacun ná me. Hane xuta xi cuatjin hmu cacun ná me ne, hacuaha sahmi hmu cacun Nahmi naha me. Ngahan ne, hacuaha sahme hmú cákun me, hacuaha suá cumachaya rê me yo ngahan. —Cuatjin cachja Jesús.

²² Judas, me xi hacuiin cha Judas Iscariote jan ne, cavinenguise me cuitjin:

—Tatá, ¿hacutjin má xi tuhun cumachaya niji yo ngayun, hane hacuiin cojo yêjê sa xuta ni? —Cuatjin cavinenguise me.

²³ Ngajan xi Jesús ne, cuitjin cafayan-gui me:

—Xuta xi hmu cacun ná me ne, hacuaha cuihndê me tsêhê cjua naha. Hane sahmi hmu cacun Nahmi naha me, hacuaha cuinduvín cuinechinyinc-ahndin xahasen rê me. ²⁴ Xuta xi hacuiin hmu cacun ná me ne, vihndiin me tsêhê cjua naha. Cjua xi tinuhyun vi ne, hacuiin cjua naha suva ta cjua rê Nina Nahmi naja, me xi catsingatju ná.

²⁵ Jemu cjín cjua tichjá cojo nuju jin-guyêjê rê xi tejña sa cojo nuju. ²⁶ Peru Hasen rê Nina xi tsingatju Nina Nahmi naja xi cuejña cahndé naha ne, vêhê cuisecoo nuju, tsinguixi cojo nuju yêjê sa cjua xi machaja, hacuaha tsinguitsjen nuju tsêhê yêjê cjua xi ha cachjá cojo nuju.

²⁷ Cjuandaja cjuajeya cuejñá nuju. Cjuandaja cjuajeya naha suá nuju. Peru hacuiin sacuatjin sua xuta ngasunhndê suá nuju. Xicamandyaain tacún, xicamacjiin tacún. ²⁸ Ha canuhyun xi cachjá cojo nuju ta cjué peru cúa nga cuinduva tjênguê nuju. Sa xi ndaja jain hmu tacún ná ne, hacuaha ndama nuju xi cjué tjênguê Nina Nahmi naja ta, Nina Nahmi naja ne, hitsê sa venguichji rê me xi cuma ná ngahan. ²⁹ Ha cachjá cojo nuju quihndê, chaja sa xi cuetjucaa cjua vêhê, cojo sa xi hya xi cuetjucaa ne, ngayun ne, cumacjain nuju. ³⁰ Ha quihndê cuichjaan sa cojo nuju cjín cjua ta, ha nduva Satanás, xi matitjun tsêhê ngasunhndê. Peru ngahan ne, tsajin mé xi cuma sahmi cojo ná. ³¹ Ngahan ne, sahme sacuatjin cavitexa Nina Nahmi naja, cojo sa xi yêjê xuta ne, cumachaya rê me xi hmú cákun Nina Nahmi naja.

'Nduvun ne, cuanguenxeen tsêhê nguehe. —Cuatjin cachja Jesús.

**Chja Jesucristu xi sacuahah nahñu
naa rë xca rë uva má me**

15 Hacuaha cachja sa Jesús cuitjin: —Ngahan ne, sacuahah nahñu naa cjuaquixi rë xca rë uva ngahan, hane Nahmi naha ne, sacuahah me xi tsicha xcatjê vëhë me. ²Jima ngu nahñu tsja rë xi vaquuin tú rë ne, vatë me. Hane jima ngu nahñu tsja rë xi vaquí tú rë ne, vatëjñi me tsja langa rë, cojo sa xi cjín sa tú rë cuaquí. ³Hacuanitjin ni nuju ngayun xi sacuahah nahñu tsja rë jan ngayun ta, cjua xi cachjá cojo nuju ne, ha catsityjahi rë cjuatacun nuju. ⁴Nihñutangun sa cjuatacun nuju cojo ná, hane ngahan ne, sahmetangun cjuatacun naha cojo nuju. Ha hyan ta nahñu tsja rë ne, cumaji sua tú rë sa xi tsajin quitahácoo cojo nahñu naa rë. Hacuanitjin ni nuju ngayun ta cumaji ninguitsujun cjuandaja rë Nina sa xi tsajin tjin tangun cjuatacun nuju cojo ná.

⁵Ngahan ne, sacuahah nahñu naa rë xca rë uva ngahan, hane ngayun ne, sacuahah nahñu tsja rë. Xuta xi tjin tangun cjuatacun rë me cojo ná hacuahah tjin tangun cjuatacun naha cojo rë me ne, me vëhë ne, jercu tsinguitsojo me cjuandaja rë Nina. Vëhë xi sa xi tsajin tjin tangun cjuatacun nuju cojo ná ne, cumaji camahani ninguitsujun cjuandaja rë Nina. ⁶Xuta xi tsajin tjin tangun cjuatacun rë me cojo ná ne, cuatju me cuma sacuatjin vatju nahñu tsja rë xca rë uva xi tijñi jan má: chandi rë, sehe xi; sehe chjaya rë cjue cueti. ⁷Sa xi nihñu tangun sa cjuatacun nuju cojo ná hacuahah cuiyujucahndë sa cjua naha ngajñi rë cjuatacun nuju ne, chjahyun tu mé ni xi meje nuju, hane sacú nuju. ⁸Nahmi naha ne, ma jyë ma hnga me cojo Hasen rë me hya xi ningacun xi xuta ladu naha jain má ngayun xi ninguitsujun cjuandaja rë me. ⁹Sacuatjin hmu cacun ná Nahmi naja ne, hacuahah cuanitjin hmú

cácun nuju. Xicanichayuun cjuahmutacun naha. ¹⁰Sa xi vinuhyun tsëhë cjua xi vitéxa nuju ne, ngayun ne, hatuxa nichayuun cjuahmutacun naha, sacuatjin ná ngahan xi cavíhndë tsëhë cjua xi cavitexa ná Nahmi naha hacuahah tsichayaan cjuahmutacun rë me.

¹¹'Cuatjin chjá cojo nuju, cojo sa xi cjuasua xi tjin ná ne, cuejña cahntsua xahasen nuju, sehe jercu tu ndaja camahani cuma nuju. ¹²Vihi cjua xi vitéxa nuju: nihñu hmu tacún xingun xingu xingu ngayun, sacuatjin sahme hmú cá-cun nuju ngahan. ¹³Tsajin yo xi hitsë sa jyë cjuahmutacun tjin rë xi cuma rë ngu xuta xi sua me yojo rë me ngatsë rë amigu rë me. ¹⁴Hane ngayun ne, amigu naha má ngayun, sa xi nihñu sacuatjin xi vitéxa nuju. ¹⁵Ha quihndë cuichjaan xi hndixahan naha ngayun ta, tsëhë xi ngu mosu hndixahan ne, hvíin mé xi sahmi nai rë. Ngayun ne, amigu naha chjá tsujun ta, tsëhë xi yëjë cjua xi cáhndë xi cachja Nahmi naha ne, casuá camachaya nuju. ¹⁶Hacuiin ngayun canaxujun ná ta ngahan cavaxejen nuju. Hacuaha casuáxa nuju xi cuangun ninguitsujun cjuandaja rë Nina. Hane cjuandaja vëhë ne, tsajin nu tsajin nixtin xi cjuë. Xi cuatjin nihñu ne, tu mé ni xi chjahyun rë Nina Nahmi naja ngatsë rë xi xuta ladu naha má ngayun ne, sua nuju me. ¹⁷Vihi cjua xi vitéxa nuju: nihñu hmu tacún xingun xingu xingu ngayun. —Cuatjin cachja Jesús.

**Choho vëë xuta Jesucristu
cojo xuta ladu rë me**

¹⁸Quijinduju sa cachja Jesús cuitjin: —Sa xi choho vëë nuju xuta xi marcuaain rë tsëhë Nina ne, suá cumachaya nuju ta chaja sa xi choho scuëë nuju me ne, ngahan ne, ha choho vëë ná me. ¹⁹Sa xi hacuahah xuta xi marcuaain rë tsëhë Nina má ngayun ne, xuta xi cuacun vë ne, sahmi hmu cacun nuju me

ta, ngayun ne, ladu rë me ngayun. Peru tsëhë xi ngayun ne, hacuiin xuta xi marcuaain rë tsëhë Nina má ngayun ta ngahan cavaxejen nuju xi cuetjunxun tsëhë xuta xi cuacun vë, vëhë xi choho vë nuju me. ²⁰ Ninguitsjun cjua xi cachjá cojo nuju hya xi cachjá cojo nuju cuitjin: “Ngu mosu hndixahan ne, hacuiin hitsë sa venguichji rë xi cuma rë nai rë.” Sa xi catsuyihiya tjengui ná xuta cojo cjuahngatacun ne, hacuaha tsuyihiyatjengui nuju me cojo cjuahngatacun. Sa xi cahndë me tsëhë cjua naha ne, hacuaha cuihndë me tsëhë cjua nuju ngayun. ²¹ Yëjë xcusun vëhë sahmi xuta xi cuacun vë cojo nuju ngatsë naha ta, tsëhë xi hvíin me Nina, me xi catsingatju ná. ²² Tsajin mé jyé quitjen xuta xi cuacun vë sa xi canduvaan cachjá cojo rë me. Peru quihndë ne, sacuiinyiin rë me mé xi cuichja me xi cuaxëtje me yojo rë me. ²³ Xuta xi choho vë ná ngahan ne, hacuaha cojo Nahmi naha choho vë me. ²⁴ Tsajin mé jyé quitjen xuta xi cuacun vë sa xi casahmee ngajñi rë me cjuarcun xi tsajin sa ngu xuta xi ha casahmi me. Peru quihndë ne, ha cavëë me cjuarcun xi casahme, hane choho vë ná me cojo Nahmi naha. ²⁵ Peru cuatjin camá cojo sa xi cuetjucaa cjua xi camahindu xcun xujun rë Nina xi chja xuta xi cuacun vë xi jemu vihndë me tsëhë, cjua xi chja cuitjin: “Choho cavëë ná me, handasa vechiin chuva rë.” Cuatjin chja cjua jan.

²⁶ Cuinduva Hasen rë Nina, xi hatuxa tjin rë cjuaquixi rë Nina, hane cuisecoo nuju. Ngahan tsingátju nuju Hasen vëhë xi cuetju hiscan tacun Nina Nahmi naja, hane xi cjuehe ne, cuichja tsahan. ²⁷ Hacuaha ngayun ne, cuinújun tsahan cojo xuta, tsëhë xi ngayun ne, ha nechun cojo ná hisca ntsacu cavetsihin.

16 Cuatjin tichjá cojo nuju, cojo sa xi hacuiin cuetjunxun tsëhë ndiya naha. ² Cuechú nixtin xi cuma-chohotje nuju yungun. Cuechú nixtin

xi xuta xi tsiquehen nuju me ne, tsingataha cacun me xi jemu ndaja faharcun me Nina xi cuatjin sahmi me. ³ Cuatjin sahmi me ta, tsëhë xi hvíin me Nina Nahmi naja, hacuaha vijnii rcu me yo ngahan. ⁴ Cachjá cojo nuju cjua vëhë, cojo sa xi hya xi cuechú hora xi cuetjucaa ne, ninguitsjun xi cuatjin cachjá cojo nuju. —Cuatjin cachja Jesús.

Hacutjin sahmi Hasen rë Nina

Quijinduju sa cachja Jesús cuitjin:

—Cachjaan cojo nuju cjua vëhë ntsacu cavetsihin ta, tsëhë xi ngahan ne, tejña cuaha cojo nuju. ⁵ Peru quihndë ne, cjuétjenguë me xi catsingatju ná, hane hisca ngu ngayun ne, chjinengunsuun ná jani cjué. ⁶ Hane tsëhë xi cuatjin cachjá cojo nuju cjua vëhë ne, ña catsë rë xahasen nuju cjuachoho. ⁷ Peru ngahan ne, cuichjá cojo nuju cjuaquixi ta tsujun ndaja xi cjué ta, sa xi cjueen ne, Hasen xi cuisecoo nuju jan ne, hatuxa cuinduvaain. Peru sa xi cjué ne, tsingátju nuju Hasen rë Nina vë. ⁸ Hane hya xi Hasen vëhë cuinduva ne, vëhë tsinguixi xi hacuiin cuatjin xi tsingataha cacun xuta tsëhë cjuatsehen, hacuiin cuatjin xi tsingataha cacun me tsëhë cjuandaja, hacuiin cuatjin xi tsingataha cacun me tsëhë chuva rë xi cjuahachuva Nina xuta cojo cjuatacun rë me. ⁹ Hacuiin cuatjin xi tsingataha cacun xuta tsëhë cjuatsehen ta, tsëhë xi manguaain cacun me cojo ná. ¹⁰ Hacuiin cuatjin xi tsingataha cacun xuta tsëhë cjuandaja ta, tsëhë xi ngahan ne, cjuétjenguë Nina Nahmi naja hane ngayun ne, ha quihndë chuun ná. ¹¹ Hacuiin cuatjin xi tsingataha cacun xuta tsëhë xi cjuahachuva Nina xuta cojo cjuatacun rë me ta, tsëhë xi Satanás, xi matitjun tsëhë ngasunhndë vihi ne, ha catsichuva Nina cojo cjuatacun rë.

¹² Jemu tjin sa ná cjua xi cuichjá cojo nuju, peru ngayun ne, scaain nuju cuinuhyun quihndë. ¹³ Peru hya xi cuinduva

Hasen xi hatuxa tjin rë cjuaquixi rë Nina ne, vëhë cuinchandiyandaja nuju ndiya rë cjuaquixi. Hacuini cojo cjuatacun rë suvá xi cuichja ta sacuatjin cjuá xi chja Nina cojo ne, cjuá vëhë cuichja. Hacuaha vëhë cuichja cojo nuju hacutjin cuma nixtin nduva. ¹⁴Hasen vëhë ne, vëhë sahmi jyë sahmi hnga ná cojo cjuatacun naha ta, tsëhë xi vëhë cjuaha xi tsahan sehe sua cumachaya nuju tsahan. ¹⁵Yëjë ni xi tsëhë Nina Nahmi naja ne, hacuaha tsahan. Vëhë xi cachjá xi Hasen jan ne, cjuaha xi tsahan sehe sua cumachaya nuju tsahan. —Cuatjin cachja Jesús.

Cuya cjuasua cjuachoho rë xuta ladu rë Jesús

¹⁶ Hacuaha cachja sa Jesús cuitjin:

—Ha tu hitsë sa ne, ha quihndë chuun ná, hane ha tu hitsë nga sa ne, chun ná. —Cuatjin cachja Jesús.

¹⁷ Ngajan xi ngujo xuta ladu rë Jesús jan ne, cuitjin cachja me cojo xicjin me:

—¿Mé vijne cjuá xi cuatjin chja me cojo naja? Chja me xi: “Ha tu hitsë sa ne, chuun ná, hane ha tu hitsë nga sa ne, chun ná”, hacuaha chja sa me xi: “Tsëhë xi cjué tjënguë Nina Nahmi naja”. ¹⁸ ¿Mé vijne cjuá xi “ha tu hitsë sa”? Vijnii rcuun mé xi chja me. —Cuatjin cachja me cojo xicjin me.

¹⁹ Jesús ne, ha vëë me xi meje cjuinen-guise xuta xi cuacun jan me tsëhë cjuá vëhë, vëhë xi Jesús ne, cachja me cojo rë xuta jan cuitjin:

—¿Há tichjinengunsun xingun tsëhë xi cachjá xi ha tu hitsë sa ne, chuun ná hane ha tu hitsë nga sa ne, chun ná? ²⁰ Cuichjá cojo nuju cjuaquixi ta ngayun ne, chjih-ndun hacuaha chjihndunsun, peru xuta xi marcuaain rë me tsëhë Nina ne, jercu ndaja cuma rë me. Ngayun ne, jemu choho cuma nuju, peru cjuachoho nuju ne, cuya sua. ²¹ Hya xi ngu chjuun tsin rë me quihndi ne, jemu tjin rë me cjuachoho ta, tsëhë xi cavechú hora xi cuatju

me cjuañihi. Peru hya xi cavatju catsin quihndi ne, ha quihndë vitsjiin rë me tsëhë cjuañihi jan, ngatsë rë cjuasua rë me xi catsin ngu quihndi. ²² Cuatjin nuju ngayun ta quihndë ne, tjin nuju cjuachoho. Peru ngahan ne, cúa scuëë nga nuju, hane ngayun ne, jemu ndaja cuma rë xahasen nuju, hane cjuasua nuju jan ne, tsajin yo cuma cjuahatahá. ²³ Hane nixtin hya ne, chjinengunsun ná hisca ngu cjuá.

‘Cuichjá cojo nuju cjuaquixi ta tu mé ni xi chjahyun rë Nina Nahmi naja ne, sua nuju me tsëhë xi ladu naha má ngayun. ²⁴ Hisca quihndë ne, cjëë chjahyun ná ngu cjuandaja tsëhë xi ladu naha má ngayun. Chjahyun ne, sehe sacú nuju, cojo sa xi xahasen nuju ne, tsë rë cjuasua. —Cuatjin cachja Jesús.

Cacaa rë Jesucristu catsinguijne me cjuatsehen rë ngasunhndë

²⁵ Quijinduju sa cachja Jesús cuitjin:

—Ngahan ne, cojo ejemplu cachjá cojo nuju. Peru cuechú nixtin xi ha quihndë hacuiin cojo ejemplu cuichjá cojo nuju ta cuichjáquixë cojo nuju tsëhë Nina Nahmi naja. ²⁶ Nixtin hya ne, hatuxa chjahyun cjuandaja tsëhë xi ladu naha má ngayun. Hane chjaan cojo nuju xi cuichjá ngatsë nuju cojo Nina Nahmi naja ta, ²⁷ suvá Nina Nahmi naja ne, jemu meje rë me ngayun, tsëhë xi ngayun ne, hacuaha jemu meje nuju ngahan hacuaha macjain nuju xi ngahan ne, Nina catsingatju ná me. ²⁸ Ngahan ne, hiscan tacun Nina cavétju canduvá nguehe ngasunhndë. Quihndë ne, cuétju tsëhë ngasunhndë, cúa cjuétjenguë Nina Nahmi naja. —Cuatjin cachja Jesús.

²⁹ Ngajan xi xuta ladu rë Jesús ne, cuitjin cachja me:

—Chutsujun ni. Quihndë ne, hacuiin cojo ejemplu tinújun ta tinújunquixun. ³⁰ Quihndë ne, hyin ta ngayun ne,

hyun yějē ni cjuatacun, hacuaha hacuiin sahmi nguŷyějē xi cjuinenguise nuju xuta ngu cjuaja cojo sa xi cumachaya nuju mé xi tsingataha cacun xuta jan. Ngatsējē rē vējē xi macjain niji xi Nina catsingatju nuju me. —Cuatjin cachaja xuta ladu rē Jesús.

³¹ Ngajan xi Jesús ne, cuitjin cafayan-gui me:

—¿Há macjain jain nuju quihndējē?

³² Chutsujun ni. Cuechú hora o ha hisca cavechú xi cuitsojo ngayun, jima ngu ngayun cojo ndya nuju, hane cuejñu ná suva. Peru ngahan ne, hacuiin suva tejña ta Nina Nahmi naja tacun me cojo ná.

³³ Cuatjin chjá cojo nuju cojo sa xi sacú nuju cjuandaja cjuajeya ngatsējē rē xi tjin tangun cjuatacun nuju cojo ná. Nguehe ngasunhndējē ne, vatjun cjuañihi. Peru tuhun cjuasua xahasen nuju ta, ngahan ne, hacuaha caca ná catsingujñe cjuat-sehen rē ngasunhndējē. —Cuatjin cachja Jesús cojo xuta ladu rē me jan.

Fehya Jesucristu cjuandaja xi cuma rē xuta ladu rē me

17 Xi cavatju cachja Jesús cuatjin ne, sehe cavutsejenniji me ngahnga, hane cachja me cuitjin:

—Ngayun Nahmi naha, ha cavechú hora. Nihñu jyějē nihñu hnga ná cojo Hasen naha ngahan xi Quihndi nuju ngahan, cojo sa xi ngahan ne, hacuaha sahme jyějē sahme hnga nuju cojo Hasen nuju. ² Ngayun catuhunxun ná xi matitjun ngahan tsējē yějē xuta, cojo sa xi yějē me xi catuhun ná ne, suá rē me cjuahñu xatsē. ³ Hane cuitjin xi sacú rē me cjuahñu xatsē, xi vējē me ngayun, ngayun xi ngu ni ngayun xi Nina xi cjuaquixi ngayun, hacuaha xi vējē ná me, ngahan xi Jesucristu ngahan, ngahan xi ngayun caningatjun ná. ⁴ Ngahan ne, casahme jyějē casahme hnga nuju nguehe ngasunhndējē ta, catsingujñetaha xa xi catuhun ná xi

sahme. ⁵ Quihndējē ne, nihñu jyějē nihñu hnga ná cojo Hasen naha ndyá hiscan nechun, ngayun Nahmi naha. Tuhun ná Hasen ndajyihi xi ha tjin ná hya xi nechun tangun cojo nuju hisca hya xi chaja sa cuejña ngasunhndējē.

⁶ Ngahan ne, casuá camachaya rē xuta xi catuhun ná nguehe ngasunhndējē yo ngayun. Me xi cuacun vē ne, tsujun me, peru catuhun ná me. Hane cahndējē me tsējē cjuaja nuju. ⁷ Ha vējē me quihndējē xi yějē ni xcusun xi catuhun ná ne, ngayun caningatjun. ⁸ Cuatjin vējē me ta, tsējē xi yějē ni cjuaja xi catuhun ná ne, hacuaha casuá rē me. Hane me xi cuacun vē ne, cafahatsja me cjuaja vējē, hacuaha vējēndaja me xi hiscan nechun cavétju canduvá nguehe, hacuaha macjain rē me xi ngayun caningatjun ná.

⁹ Ngahan ne, tichjá cojo nuju ngatsējē rē me xi cuacun vē. Tichjaan ngatsējē rē xuta xi marcuaain rē tsujun ta tichjá ngatsējē rē me xi catuhun ná, tsējē xi tsujun me. ¹⁰ Yějē ni xi tsahan ne, hacuaha tsujun, hane xi tsujun ne, hacuaha tsahan. Hane ngahan ne, cama jyějē cama hnga ngahan cojo Hasen naha ngatsējē rē xi tjin tangun cjuatacun rē me xi cuacun vē cojo ná. ¹¹ Ha quihndējē cuitejña sa nguehe ngasunhndējē. Me xi cuacun vē ne, siu me ngasunhndējē, peru ngahan ne, cuinduvatjēnguē nuju. Ngayun Nahmi naha, ngayun xi hatuxa tyjahi cjuatacun nuju ne, nihñu me cuidadu cojo ngahñu nuju, ngahñu xi catuhun ná, cojo sa xi tjin tangun cjuatacun rē me cojo xicjin me, sacuatjin naja ngayaan. ¹² Hya xi tejña cojo rē me ne, casahme cuidadu me cojo ngahñu nuju xi catuhun ná. Casahme cuidadu me, hane hisca ngu me cachajin me. Suvá ni cha xi hatuxa chájá ne, cha vējē xi cachájá cha, cojo sa xi cuetjucaa cjuaja xi camahindu xcun xujun nuju. ¹³ Peru quihndējē ne, cuinduvatjēnguē nuju. Hane tichjá cjuaja vihi nguehe ngasunhndējē, cojo sa xi xuta

ladu naha ne, tsê rê xahasen rê me cojo cjuasua xi quitsê rê xahasen naha suva. ¹⁴Ngahan ne, casuá camachaya rê me cjua nuju. Hane xuta ngasunhndê xi marcuaain rê tsujun ne, choho vëê rê me, tsêhê xi hacuiin tsêhê ngasunhndê má me, sacuatjin ná ngahan xi hacuiin tsêhê ngasunhndê má ngahan. ¹⁵Cjuehyaan nuju xi naxunxun me tsêhê ngasunhndê ta tifêhya nuju xi nihñu me cuidadu tsêhê Satanás. ¹⁶Xuta ladu naha jan ne, hacuiin tsêhê ngasunhndê má me, sacuatjin ná ngahan xi hacuiin tsêhê ngasunhndê má ngahan. ¹⁷Nihñu tsujun jain me cojo cjua xi hatuxa cjuaquixi. Cjua nuju ne, vëhê xi hmí rê cjuaquixi. ¹⁸Sacuatjin caningatjun ná ngahan ngajñi rê xuta xi marcuaain rê tsujun ne, hacuaha cuatjin catsingátju xuta ladu naha ngajñi rê xuta xi cuacun vë. ¹⁹Hane ngatsê rê xuta ladu naha ne, suá nuju yojo naha, cojo sa xi me xi cuacun vë ne, hacuaha tsujun jain cuma me cojo cjuaquixi.

²⁰Quihndê ne, hacuiin ngatsê rê suvá ni xuta ladu naha vi xi tichjá cojo nuju ta hacuaha cojo ngatsê rê me xi sehe cumangu cacun cojo ná xi cuihndê me cjua xi chja xuta ladu naha tsa-han. ²¹Ngahan ne, xi meje ná ne, xi yêjê ni me xi cuacun vë ne, cuma tangun cjuatacun rê me cojo xicjin me. Sacuatjin nuju ngayun, Nahmi naha, xi nechunyun xahasen naha hane ngahan ne, tejñaya xahasen nuju ne, meje ná xi me xi cuacun vë ne, hacuaha hinchha me xahasen naja, cojo sa xi xuta ngasunhndê ne, cumacjain rê me xi ngayun caningatjun ná. ²²Ngahan ne, casahme yehe casahme hnga me cojo cjuatacun rê me sacuatjin canihñu jyê canihñu hnga ná ngahan cojo cjuatacun naha, cojo sa xi cuma tangun cjuatacun rê me cojo xicjin me, sacuatjin tjin tangun cjuatacun naja ngayaan cojo xingueen. ²³Meje ná xi ngahan ne, cuitejñaya xahasen rê

me, sacuatjin nechunyun xahasen naha. Meje ná xi cuma tangun camahani cjuatacun rê me cojo xicjin me, cojo sa xi xuta ngasunhndê ne, cuijne rcu me xi ngayun caningatjun ná, hacuaha xi nihñu hmu tacún me sacuatjin nihñu hmu tacún ná ngahan.

²⁴Ngayun, Nahmi naha, xuta xi catuhun me xi cuma me ladu naha ne, meje ná xi hiscan xi cuitejña ne, hacuaha ngajan cuiyuj me cojo ná, cojo sa xi scutsejen me hacutjin jyê hnga ngahan cojo hasen ndajyihi naha xi ngayun catuhun ná, tsêhê xi canihñu hmu tacún ná hisca chaja sa xi cuejña ngasunhndê. ²⁵Ngayun Nahmi naha, ngayun xi quixi ngayun cojo cjuatacun nuju, xuta ngasunhndê ne, hvín nuju me, peru ngahan ne, hvê nuju, hane xuta ladu naha vi ne, vëê me xi ngayun caningatjun ná. ²⁶Ngahan casuá camachaya rê me yo ngayun, hane suá sa cumachaya rê me, cojo sa xi cjuahmutacun xi tjin nuju cojo ná ne, cuejña cahntsua xahasen rê me hacuaha ngahan ne, cuitejña cahntsua xahasen rê me. —Cuatjin cafehya Jesús cjuandaja cojo Nina.

Hacutjin camá xi cachjahá rê Jesucristu

18 Hya xi camá ne, xi cavatju cachja Jesús cjua vëhê ne, sehe cavetju me quiji me cojo xuta ladu rê me ngunda vëhê tsêhê caniña Cedrón. Hane ngajan cavisehen Jesús cojo xuta ladu rê me ngu ngajñi yatjê xi tjin jan. ²Quihndê ne, cha Judas, cha xi sahmi rê entregadu Jesús ne, hacuaha vëê cha cahndê vëhê ta, jemu quiji Jesús cahndê vëhê camatangun me cojo xuta ladu rê me. ³Ngajan xi cha Judas ne, quijicojo cha ngujo sindadu cojo cha mayu cojo cha nisê rê cha, cha xi catsingátju nahmi xi matitjun cojo cha fariseo. Quiji cha xi cuacun jan ngajan cojo ndihi cojo quicha. ⁴Hane Jesús ne, tsêhê xi ha vëê me yêjê xcusun xi cu-

atju me cuma ne, quijivaha me xcun cha xi cuacun jan, sehe cavinenguise me cha cuitjin:

—¿Yo xi meje nuju? —Cuatjin cavinenguise me.

⁵Ngajan xi cha xi cuacun jan ne, cuitjin cafayangui cha:

—Xuta Nasaret xi hmí rë Jesús. —Cuatjin cafayangui cha.

Hane Jesús ne, cuitjin cachja me:

—Ngahan xi nújun vë. —Cuatjin cachja me.

Quihndë ne, Judas, cha xi sahmi rë me entregadu ne, cojo cha secun cha cojo cha xi cuacun vë. ⁶Hane hya xi cachja Jesús xi: “Ngahan xi nújun vë” ne, quijingaxtun yëjë cha xi cuacun jan, hane caticja cha. ⁷Ngajan xi Jesús ne, cavinenguise nga me cha cuitjin:

—¿Yo xi meje nuju? —Cuatjin cavinenguise me.

Hane cha xi cuacun jan ne, cuitjin cachja nga cha:

—Xuta Nasaret xi hmí rë Jesús. —Cuatjin cachja cha.

⁸Hane Jesús ne, cuitjin cafayangui me:

—Ha cachjá cojo nuju ta ngahan xi nújun vë. Sa xi ngahan meje nuju ngahan ne, tuhun cahndé catje me xi cuicun vi. —Cuatjin cafayangui me.

⁹Cuatjin cachja Jesús cjuá vëhë cojo sa xi cuetjucaa cjuá xi ha cachja me cuitjin: “Xuta xi catuhun ná me ne, hisca ngu me catsichajan me.” ¹⁰Ngajan xi Simón Pedru ne, cavaxë me quichandujú xi yaha me, hane cavatësun me tyjavañuju quixi mosu hndixahan rë nahmi xi matitjun jan, cha xi hmí rë Malco. ¹¹Ngajan xi Jesús ne, cuitjin cachja me cojo Pedru:

—Teyunndujun quicha nuju vë. Hatuxa tsingatehen xi cuátju cjuañihi sacuatjin xi meje rë Nina Nahmi naja. —Cuatjin cachja Jesús.

Nahmi xi matitjun ne, sahmi cuenda me jyé rë Jesús

¹²Hya xi camá ne, cha sindadu cojo capitán rë cha, cojo mayu cojo cha nisë rë cha, cha xi catsingatju xutaxa rë yungun jan ne, cafaa cha Jesús, catsihñu cha me, ¹³sehe quiji cani cha me titjun xcun Anás. Anás vë ne, nahmichahya rë Caifás má me. Hane nu vëhë ne, nahmi xi matitjun tsëhë yëjë ni nahmi má Caifás. ¹⁴Quihndë ne, Caifás vë ne, me vëhë xi cavinchangui me xutaxa rë xi ndaja tsëhë xutaxa rë xi ngu xihin ni cueya ngatsë rë yëjë ni xuta.

Chja Pedru xi hacuiin ladu rë Jesucristu má me

¹⁵Quihndë ne, Simón Pedru cojo ngu sa cha ladu rë Jesús jan ne, tjengui me quiji me cojo Jesús. Hane cha ladu rë Jesús xingu jan ne, tsëhë xi vëë nahmi xi matitjun jan cha ne, cojo cha cavisehen cha cojo Jesús cahntsua hnhua ndatsen ndava nahmi xi matitjun jan. ¹⁶Peru Pedru ne, casecun ni me ngajan candatsen tingotjo hnhua jan. Ngajan xi cha ladu rë Jesús xi vëë nahmi jan ne, cavetju nga cha quiji cachja cha cojo na xi quitahá cuidadu rë tingotjo hnhua jan. Hane sehe catsinguissehen cha Pedru cahntsua hnhua. ¹⁷Hane na xi sahmi cuidadu tingotjo hnhua jan ne, cuitjin cavinenguise rë na Pedru:

—¿Hacuiin cojo ngayun má ngayun ladu rë me xi cuajyihi vë? —Cuatjin cavinenguise na.

Hane Pedru ne, cuitjin cafayangui me: —Jéya, hacuiin. —Cuatjin cafayangui me.

¹⁸Hane mosu rë nahmi jan cojo cha sindadu jan ne, cavejña cha ngu ndava ndihi, tsëhë xi jemu hnchan. Sehe hinchacun cha tijima hasu rë cha jan. Hacuaha cojo Pedru secun me jan, jima hasu rë me.

Fahatáha nahmi xi matitjun jan Jesucristu

¹⁹ Hane xi cafehe cha xi cuacun jan cojo Jesús jan ne, sehe cavetsihin caphatáha nahmi xi matitjun jan me tséhë xuta ladu rë me cojo tséhë cjuachacun rë me. ²⁰ Hane Jesús ne, cuitjin cafayangui me:

—Ngahan ne, xcun cojo xcun cachjá cojo yějë ni xuta, hacuaha cavicuyá rë me ngajan yungun langa o sa xi ngajan yungun xi matitjun, hiscan xi matangun ngayejen ni xuta tjë rë Israel. Tsajin mé xi cachjá xi táhahma.

²¹ Hane ¿mé má ngahan chjuhuntuhun ná ni? Chjuhuntuhun rë me xi cahndë cjua naha. Chjinengunsun rë me mé xi cachjá cojo rë me. Me xi cuacun vë ne, vëë me cjua xi cachjá. —Cuatjin cafayangui Jesús.

²² Hane xi cuatjin cachja Jesús cjua vëhë ne, ngu cha mayu xi secun tiña jan ne, cavajaya cha ngu xcun Jesús, sehe cachja cha cuitjin cojo rë me:

—¿Há cuatjin chjayengui tséhë nahmi xi matitjun? —Cuatjin cachja cha.

²³ Ngajan xi Jesús ne, cuitjin cafayangui me tséhë cha:

—Sa xi choho cachjá ne, tinújun cojo yějë xuta mé xi choho cachjá. Peru sa xi ndaja cachjá ne, ¿mé má cuatjin vujun ná ni? —Cuatjin cafayangui me.

²⁴ Ngajan xi Anás ne, hacuanitjin ni tjihñu cuaha Jesús ne, catsingatju me Jesús xcun nahmi xi matitjun tséhë yějë ni nahmi.

Chja nga Pedru xi hacuiin ladu rë Jesucristu má me

²⁵ Jinguyëjë rë xi tichjahátáha rë Jesús jan ne, Pedru ne, secun me xcun ndihi tijima hasu rë me. Hane cachjahátáha rë me cuitjin:

—¿Hacuiin cojo ngayun má ngayun ladu rë me vëhë? —Cuatjin cachjahátáha rë me.

Hane Pedru ne, cavetsangui me, cuitjin cachja me:

—Jéya, hacuiin. —Cuatjin cachja me.

²⁶ Ngajan xi ngu mosu rë nahmi xi matitjun jan, cha xi xicjin rë cha xi cavatësun Pedru tjjavañuju jan ne, cuitjin cachja cha cojo Pedru:

—¿Há cahveen nuju cojo rë me ngajñi yatjë jan ni? —Cuatjin cachja cha.

²⁷ Cavetsangui nga Pedru ngu ndiya. Hane ha hora vëhë ni ne, cajiñda xahnda.

Fahatáha Pilatu Jesucristu

²⁸ Ngajan xi xuta matitjun tséhë xuta tjë rë Israel jan ne, cavaxë me Jesús tséhë ndava Caifás, hane quijicojo me ndihya jyë hiscan tacun Pilatu, xutaxa rë xi matitjun. Nguitajñu xati hora vëhë. Hane xuta xi quijicojo rë Jesús jan ne, cavisiin me cahntsua ndihya jyë jan, ngatsë rë xcusun rë me xi ma chocun yojo rë me xcun Nina hya xi visehen me ndava xutaxín. Hane sa xi cuatjin cuma chocun yojo rë me ne, cumaji sinë nguixun me comida suhi tséhë Pascua. ²⁹ Vëhë xi cavetju Pilatu quijitjengui rë me candatsen. Hane cuitjin cavinenguisse me:

—¿Mé jyë vinchun tséhë cha xi cuijy-ihi vi? —Cuatjin cavinenguisse Pilatu.

³⁰ Hane xuta xi cuacun jan ne, cuitjin cafayangui me:

—Sa xi hacuiin choho tisahmi cha ne, canduvinchanii nuju cha. —Cuatjin cafayangui me.

³¹ Hane Pilatu ne, cuitjin cachja me:

—Chjuhun cha ne, chjuhunchuvun suvun cha cojo jyë rë cha sacuatjin chja ley nuju. —Cuatjin cachja Pilatu.

Ngajan xi xutaxa rë yungun xi cuacun jan ne, cuitjin cachja me:

—Ley nuju ngayun ne, chja ta ngayin ne, cumaji niquihin xuta. —Cuatjin cachja xuta xi cuacun jan.

³² Cuatjin camá cojo sa xi cuetjucaa cja xi cachja Jesús hya xi cachja me mé chuya rê cueya me.

³³ Ngajan xi Pilatu ne, cavuya cavisehen nga me ndihya. Hane cajindaya me Jesús, sehe cavinenguise me cuitjin:

—¿Há ngaye xu matitjun ngaye tsêhê xuta tjê rê Israel? —Cuatjin cavinenguise me.

³⁴ Hane Jesús ne, cuitjin cafayangui me:

—¿Há cojo cjuatacun nuju suvun chjingenngusun ná cja vêhê?, o há tsajin ne, ¿há tjin yo cachja cojo nuju tsahan? —Cuatjin cafayangui me.

³⁵ Ngajan xi Pilatu ne, cuitjin cafayangui me:

—¡Peru ngahan ne, hacuiin xuta Israel ngahan! Suvá xuta nangui riji cojo nahmi xi matitjun casahmi ri me entregadu cojo ná. ¿Mé canihñi? —Cuatjin cafayangui Pilatu.

³⁶ Ngajan xi Jesús ne, cuitjin cafayangui me:

—Xa naha xi sahme gobiernu ne, hacuiin ngasunhndê vihi cafahtëntsa. Sa xi ngasunhndê vihi cafahtëntsa xa xi sahme gobiernu ne, xuta ladu naha ne, scaan me cojo sa xi cumaji cuma ngahan entregadu tsja xutaxa rê yungun. Peru xa naha xi sahme gobiernu ne, hacuiin nguehe cafahtëntsa. —Cuatjin cafayangui Jesús.

³⁷ Hane Pilatu ne, cuitjin cachja me cojo Jesús:

—¿Ngajan xi ngaye xi matitjun ngaye ni? —Cuatjin cachja me.

Hane Jesús ne, cuitjin cafayangui me:

—Cuatjin sacuatjin nújun vê. Ngahan ne, canduvá nguehe ngasunhndê hacuaha catsin ngahan cojo sa xi cuichjá cojo xuta cja xi cjaquixi. Yêjê xuta xi marcun rê me tsêhê cjaquixi ne,

hatuxa vetaharcu me cja naha. —Cuatjin cafayangui Jesús.

³⁸ Hane Pilatu ne, cuitjin cachja me:

—¿Mé xi hmí rê cjaquixi ni? —Cuatjin cachja Pilatu.

Chja xutaxa rê yungun xi meje rê xi cueya Jesucristu.

Hane xi cafê cachja Pilatu cja vêhê ne, sehe cavetju nga me quiji cachja me cojo xutaxa rê yungun, cuitjin cachja me:

—Sacuiin ná hisca ngu jyê rê cha xi cuajiyi vê. ³⁹ Peru ngayun ne, tjin nuju ngu xcusun xi tsisme ngu presu nixtin rê suhi rê Pascua. ¿Há meje nuju xi tsisme me xi matitjun tsujun? —Cuatjin cachja me.

⁴⁰ Hane xuta xi cuacun jan ne, cajindaya me cachja me cuitjin:

—¡Hacuiin cha vêhê ta Barrabás nismu cha! —Cuatjin cajindaya me cachja me.

Quihndê ne, Barrabás jan ne, ngu cha fahataha cjuachan cha.

19 Ngajan xi Pilatu ne, catsingatju me Jesús casehen rê me. ² Hane cha sindadu xi cuacun jan ne, xi camá catsihya cha ngu corona nahyá ne, sehe cavesun cha rcu Jesús, hacuaha catsicaja cha me ngu tsjian moradu. ³ Hya xi camá ne, quijivaha cha jima ngu cha xcun me, sehe cavetsihin cavincha cha viva rê me xi tsixcuehyu cha me sacuaha xi me vêhê matitjun me tsêhê xuta tjê rê Israel. Hacuaha cavajaya cha xcun me.

⁴ Hya xi camá ne, Pilatu ne, cavetju nga me candatsen, hane cuitjin cachja me cojo xuta xi cuacun jan:

—Chutsujun ni, cuáxê cha nguehe, cojo sa xi cumachaya nuju ta sacuiin ná hisca ngu jyê rê cha. —Cuatjin cachja Pilatu.

⁵ Ngajan xi Jesús ne, cavetju me candatsen, quisun rcu me corona nahyá hacuaha yaja me tsjian moradu jan. Sehe cachja Pilatu cojo xuta cuitjin:

—Chutsujun ni, cuajyihi cha nguehe.
—Cuatjin cachja me.

⁶Hane hya xi cavëë nahmi xi cuacun matitjun jan cojo cha mayu cojo nisë rë cha Jesús ne, cajindaya cha cachja cha cuitjin:

—¡Tetuhun cha xcun cru! ¡Tetuhun cha xcun cru! —Cuatjin cajindaya cha cachja cha.

Ngajan xi Pilatu ne, cuitjin cachja me:

—¡Chjuhun suvun cha, tetuhun cha xcun cru ta, ngahan ne, sacuiin ná hisca ngu jyë rë cha! —Cuatjin cachja Pilatu.

⁷Ngajan xi xutaxa rë xi cuacun jan ne, cuitjin cachja me:

—Ngayin ne, tjin ngu ley xi vitexa niji, hane sacuatjin chja ley vëhë ne, vechú chuva rë xi cueya cha ta, tsëhë xi cachja suvá cha xi Quihndi rë Nina cha. —Cuatjin cachja xutaxa rë jan.

⁸Hane xi cahndë Pilatu cjua vëhë ne, hitsë sa catsacjun me camá. ⁹Sehe cavuya cavisehen nga me cahntsua ndihya, hane sehe cafahatáha me Jesús cuitjin:

—Ngayun ne, ¿jani canduvun? —Cuatjin cafahatáha me Jesús.

Peru Jesús ne, cafayanguiin me tsëhë Pilatu. ¹⁰Ngajan xi Pilatu ne, cuitjin cavinenguise me cojo Jesús:

—¿Há chayunnguun tsahan? ¿Há hyúun ta ngahan ne, cuma tsisme nuju hacuaha cuma cuitéxa xi setaha ngayun xcun cru? —Cuatjin cavinenguise Pilatu.

¹¹Hane Jesús ne, cuitjin cafayangui me:

—Ngayun ne, cuma nihñu cojo ná cuatjin, peru suvá ni ngatsë rë xi Nina casua nuju me cahndë. Vëhë xi me xi casahmi ná entregadu cojo nuju ne, hitsë sa jyë jyë rë me xi cuma nuju ngayun. —Cuatjin cafayangui Jesús.

¹²Xi cahndë Pilatu cjua vëhë ne, cavangui me chuva rë xi tsismi me Jesús.

Peru xutacjín jan ne, cajindaya me cachja me cuitjin:

—Sa xi nismu cha xi cuajyihi vë ne, hacuiin amigu rë César, me xi matitjun camahani, má ngayun. Ngu xuta xi chja suvá me xi matitjun me ne, hatuxa condra rë César má me. —Cuatjin cajindaya me cachja me.

¹³Hane xi cahndë Pilatu cjua vëhë ne, sehe cavaxë nga me Jesús candatsen, sehe quiji me cavéjña me hiscan sahmi cuenda me jyë rë xuta, cahndë hiscan hmí rë Texondaja rë, hane xi hne hebreo ne, Gabata hmí rë. ¹⁴Hora vëhë ne, sacuaha nchisen tsëhë nixtin vispra rë suhi tsëhë Pascua. Ngajan xi Pilatu ne, cuitjin cachja me cojo xuta:

—¡Chutsujun ni, cuajyihi me xi matitjun tsujun nguehe! —Cuatjin cachja me.

¹⁵Hane xuta jan ne, cuitjin cajindaya me cachja me:

—¡Naxunxun cha, naxunxun cha tsëhë nguehe! ¡Tetuhun cha xcun cru! —Cuatjin cajindaya me cachja me.

Ngajan xi Pilatu ne, cuitjin cavinenguise me:

—¿Há cuétaha me xi matitjun tsujun xcun cru ni? —Cuatjin cavinenguise me.

Ngajan xi nahmi xi cuacun matitjun jan ne, cuitjin cafayangui me:

—¡Ngu ni César, me vëhë xi matitjun me tsijin! —Cuatjin cafayangui me.

¹⁶Ngajan xi Pilatu ne, cajne cacun me. Hane casahmi me entregadu Jesús xi cjue setaha me xcun cru xi cueya me. Sehe cafahatsja xuta xi cuacun jan me.

Setaha Jesucristu xcun cru

¹⁷Hya xi camá ne, quisuntyja suvá Jesús cru, cavetju me quiji me cojo xuta cahndë hiscan xi hmí rë Nínda Rcuun, hane xi hne hebreo ne, Gólgota hmí rë. ¹⁸Hane ngajan casetaha me xcun cru. Hacuaha cojo sa jo cha caviyujutaha cha xcun cru rë cha, ngu ngu cha

ngu ngu ladu tjeheh rë me. Hane Jesús ne, cavasen caseya me. ¹⁹Hacuaha catsihindu Pilatu ngujo cjua xi casetaha rcu cru rë Jesús, cuitjin camahindu: “Jesús, Xuta Nasaret, Xi Matitjun Tsëhë Xuta Israel.” ²⁰Cjua vëhë ne, jemu cjin xuta cavutaya me, tsëhë xi cahndë hiscan casetaha Jesús xcun cru ne, tiña tacun nandya. Camahindu cjua vëhë cojo hne hebreo cojo latín cojo griego. ²¹Ngajan xi nahmi xi matitjun tsëhë xuta tjë rë Israel jan ne, cuitjin cachja me cojo Pilatu:

—Ndajintjin xi cuatjin canihindun “Xi Matitjun Tsëhë Xuta Israel” ta, xi ndatjin ne, “Cachja Cha: Ngahan Matitjun Ngahan Tsëhë Xuta Israel.” —Cuatjin cachja me.

²²Hane Pilatu ne, cuitjin cafayangui me:

—Ha catsihindu cjua xi meje tsihindu. —Cuatjin cafayangui me.

²³Ngajan xi sindadu jan ne, xi cavatju cavetaha cha Jesús xcun cru ne, sehe cafaha cha tsjian xcun rë me cojo yëjë sa xi tsë xi xti xi sahmixa cojo me, cavatëcja cha ngajni catsiñuju cha. Hacuaha cafaha cha tsjian ngahma rë me. Quihndë ne, tsjian vëhë ne, hacuiin casehencoo ta tsjian tu të ni. ²⁴Ngajan xi cha sindadu jan ne, cachja cha cojo xicjin cha cuitjin:

—Tsjian vëhë ne, hacuiin cuichan ta naxeen suerte tsëhë ne, jarë ngayaan xi satë naja. —Cuatjin cachja cha.

Cuatjin camá cojo sa xi cuetjucaa cjua xi camahindu xcun xujun rë Nina xi chja cuitjin:

Cavatëcja cha tsjian naha ngajni rë cha, hacuaha cavaxë cha suerte ngatsë rë tsjian naha.

Cuatjin casahmi cha sindadu jan.

²⁵Quihndë ne, tiña cru rë Jesús jan ne, secun naa rë me, cojo tíchja naa rë me, cojo na María chjuun rë Cleofas, cojo na María na Mágdala. ²⁶Hane xi cavëë Jesús naa rë me cojo cha ladu rë me xi

jemu vinga rë me jan xi secun tangun cha cojo naa rë me ne, sehe cachja me cuitjin cojo naa rë me:

—Ngayun chjuun, cuajyihi quihndi nuju ndyá.

²⁷Hane cha ladu rë me jan ne, cuitjin cachja me cojo rë cha: —Cuajyihi naa nuju ndyá. —Cuatjin cachja Jesús.

Ha nixtin hya ni ne, quijicojo cha ladu rë Jesús jan naa rë me ndava cha, ngajan cavëjñacahndë me.

Cjuaveya rë Jesucristu

²⁸Hane xi camá ngascan ne, Jesús ne, ha vëë me xi camachihin yëjë xa xi cachja Nina xi sahmi me. Hane cojo sa xi cuetjucaa cjua xi camahindu xcun xujun rë Nina ne, cuitjin cachja me:

—Jemu xinda ná. —Cuatjin cachja me.

²⁹Quihndë ne, tacun jan ngu hiscan jemu hinchaxan yufa. Ngajan xi sindadu jan ne, catsicahnchi cha ngu tsjian hinda cojo xan jan ne, sehe catsitjinguia cha rcu ngu ya nduju, sehe catsiquijin cha cavetaha cha hntsua Jesús. ³⁰Hane xi camá cahvi Jesús xan jan ne, sehe cachja me cuitjin:

—Camachihin quihndë. —Cuatjin cachja Jesús.

Hane xi catsiquindi me rcu me ne, hora vëhë cahme me.

Cavitengui cha sindadu quicha ngu ladu ntsacu ndanisin rë Jesucristu

³¹Hya xi camá ne, xutaxa rë yungun ne, cafehya me favor cojo Pilatu xi cuitexa me ne, xtotoho ntsacu me xi caviyujutaha xcun cru rë jan, sehe chjaháxin rë nima. Cuatjin cafehya me ta, tsëhë xi nixtin hya ne, vispra tsëhë suhi, hane mijí rë me xi cuiyujutaha nima xcun cru rë hisca cuma nchujun, tsëhë xi, xi cuma nchujun jan ne, nixtin chjahájenda rë hacuaha jemu nixtin jyë. ³²Ngajan xi sindadu jan ne, quiji cavotoho cha ntsacu catsijo ni cha xi

hacuaha cojo caviyujutaha xcun cru rë cojo Jesús. ³³ Peru xi cafehe cha xcun cru rë Jesús ne, xi cavëë cha xi ha cahme me ne, cavotaain cha ntsacu me. ³⁴ Peru ngu cha sindadu jan ne, quiji caviten-gui cha quicha ngu ladu ntsacu ndanisin rë Jesús, hane ngutjen ni cavetju jni cojo nandá. ³⁵ Cha xi cavëë ne, chja cha tsëhë xcusun vëhë, cojo sa xi ngayujun ni ngayun ne, cumacjain nuju. Cjua xi chja cha ne, cjuaquixi, hacuaha cha vëhë ne, vëë cha ta cjuaquixi cjua xi chja cha. ³⁶ Cuatjin camá xcusun vëhë, cojo sa xi cuetjucaa cjua xi chja xujun rë Nina xi chja cuitjin: “Hisca ngu nında rë me xto-taain.” ³⁷ Hacuaha chja nga ngu cahndé xujun rë Nina cuitjin: “Scuëë xuta me xi caxtengui rë quicha.” Cuatjin chja xujun rë Nina.

Seyaniji Jesucristu

³⁸ Xi cavatju xcusun vëhë ne, José, ngu xuta Arimatea ne, cafehya me cahndé cojo Pilatu xi cjuahaxin me nima Jesús. José jan ne, hacuaha xuta ladu rë Jesús má me, handasa catsingacuiin me xi xcun cojo xcun, tsëhë xi tsacjun me xutaxa rë yungun. Hane Pilatu ne, casua me cahndé. Hya xi camá ne, quiji cafahehin José nima. ³⁹ Nicodemo, me xi quiji cavisiajmi cojo Jesús ngu nguixun jan ne, hacuaha cojo me quiji me cojo José. Yaha me sacuahe cantë kilu aceite xi jemu ndaja jne xi cuëhëchjine me yojo rë nima jan. ⁴⁰ Ngajan xi, xi cafaha me nima jan ne, sehe cavitejnu rë me aceite hacuaha catsitjingui rë me tsjian, sacuatjin xcusun rë xuta tjë rë Israel hya xi vinchaniji me nima rë me. ⁴¹ Quihndé ne, tiña hiscan cavetaha xuta Jesús xcun cru xi catsiquehen me ne, tjín ngu ngajñi yatjë. Hane ngajñi yatjë jan ne, tacun ngu tsjun xatsë, xi hisca ngu nima cjëë seya. ⁴² Ngajan ni caveya me nima Jesús, tsëhë xi ngajan xi tiña, hacuaha ha vispra tsëhë suhi nixtin hya.

Tsjun tiya

20 Quihndé ne, nixtin xi tjun tjun tsëhë totje jan ne, na María na Mágdala jan ne, nguitajñu jñu sa ne, cavetju na quiji na xcun tsjun rë nima Jesús. Hane xi cafehe na jan ne, cavëë na xi ndyojo xi quitahá tingotjo rë tsjun jan ne, cachjaháxin rë. ² Ngajan xi van-gasanii na quiji na hiscan tacun Simón Pedru cojo cha ladu rë Jesús xingu jan, cha xi jemu vinga rë Jesús. Hane xi cafehe na jan ne, cuitjin cachja na:

—Cavaxë me nima Nai naja tsëhë tsjun rë, hane hyaan jani quiji chani rë. —Cuatjin cachja na.

³ Ngajan xi Pedru cojo cha xingu jan ne, cavetjusanii me, quiji me xcun tsjun jan. ⁴ Vanga me catsijo me quiji me, peru cha xingu jan ne, hitsë sa hñu cavanga cha xi cuma rë Pedru, hane tjun cha vëhë cafehe cha xcun tsjun. ⁵ Hane xi cafehe cha jan ne, catsiquindi cha yojo rë cha, hane cavëë cha tsjian xi cavitjingui rë nima Jesús, siu jan. Peru cavisiiin cha. ⁶ Hane xi cafehe Simón Pedru xi camá ngaskan ne, cavisehen me cahntsua tsjun jan. Hane cavëë me tsjian jan siu, ⁷ hane pañutu xi camahñu rcu nima jan ne, hacuiin tacun tangun cojo tsjian jan ta tjeju ne, xín tacun. ⁸ Ngajan xi cha ladu rë Jesús xi cafehe titjun xcun tsjun jan ne, hacuaha cavisehen cha. Hane cavëë cha hacuaha camacjain rë cha. ⁹ Nixtin hya ne, cjëë sa cuijne rcu cha xi chja xujun rë Nina xi nima Jesús ne, meje rë xi cuya me cjuahñu. ¹⁰ Hya xi camá ne, xuta ladu rë Jesús jan ne, cavuya cafe me.

Cavëë na María na Mágdala Jesucristu

¹¹ Hane na María ne, hacuaha cavuya quiji nga na xcun tsjun jan, hane ngajan casecun na tingotjo cajihnda na. Hane táha tijihnda na ne, catsiquindi na yojo

rë na, cavutsejenya na cahntsua tsjun jan. ¹²Hane cavëë na jo ángel xi tyava tsjian rë, siu hiscan cafaña nima; ngu ne, táha hiscan cafaña rcu nima hane xingu ne, táha hiscan caviyuju ntsacu. ¹³Ngajan xi ángel jan ne, cuitjin cavinenguise rë na:

—Ngaye chjuun, ¿mé má chjihnde? —Cuatjin cavinenguise ángel jan na.

Hane na vëhë ne, cuitjin cachja na:

—Cavaxë me maestru naha ne, hveen jani quiji chani rë. —Cuatjin cachja na.

¹⁴Hane xi cavatju cachja na cjua vëhë ne, sehe cavuya na táha ngaxtun na, hane cavëë na Jesús secun me jan. Peru hvín na xi hacui Jesús. ¹⁵Ngajan xi Jesús ne, cuitjin cachja me:

—Ngaye chjuun, ¿mé má cuatjin chjihnde? ¿Yo xi vinchise? —Cuatjin cachja me.

Hane xi má rë na vëhë ne, cha xi sahmi cuidadu yatjë jan xi cachja. Vëhë xi cachja na cuitjin:

—Tatá, sa xi ngayun canaxun nima ne, tinújun jani catsangun chanu, sehe cjué jaha. —Cuatjin cachja na.

¹⁶Ngajan xi Jesús ne, cuitjin cachja me cojo rë na:

—¡María! —Cuatjin cachja me.

Hane xi cavuya na ne, sehe cachja na hne hebreo cuitjin:

—¡Rabuni! —Cuatjin cachja na cjua xi meje cuichja Maestro.

¹⁷Ngajan xi Jesús ne, cuitjin cachja me cojo rë na:

—Ha quihndë xicachunhñuu sa ná ta cjëë cjuéneje cjuétjenguë Nina Nahmi naja. Peru tánguntjengun xuta ladu naha xi yahnga, hane cuitjin tinújun cojo rë me: “Cjuéneje, cjuétjenguë Nahmi naha, me xi hacuaha Nahmi nuju, me xi Nina naha hacuaha Nina nuju ngayujun ni.” Cuatjin tinújun. —Cuatjin cachja Jesús.

¹⁸Ngajan xi na María na Mágdala jan ne, quiji cachja na cojo xuta ladu rë Jesús cuitjin:

—¡Cahvë maestru naja! —Cuatjin cachja na.

Hacuaha cachja na cjua xi cachja Jesús cojo rë na.

Cavëë xuta ladu rë Jesucristu me

¹⁹Hane xi camajñu ndaja tsëhë nixtin tjun tjun tsëhë totje jan ne, tjin tangun xuta ladu rë Jesús jan. Hane tichjáñu tingotjo ndihya siu me, tsëhë xi tsacjun me xutaxa rë yungun jan. Hya xi camá ne, cafehetsejen Jesús casecun me ngajñi rë xuta ladu rë me, hane cuitjin cachja me:

—Cjuandaja cjuajeya catejña cojo nuju. —Cuatjin cachja me.

²⁰Hane xi cavatju cachja me cjua vëhë ne, sehe catsingacun me tsja me hacuaha catsingacun me ngu ladu ntsacu ndanisin rë me. Ngajan xi xuta ladu rë me jan ne, jemu ndaja camá rë me hora xi cavëë me maestru naja. ²¹Hane cachja nga Jesús cojo rë me xi cuacun jan cuitjin:

—Cjuandaja cjuajeya catejña cojo nuju. Sacuatjin catsingatju ná Nina Nahmi naja ne, hacuaha cuatjin tsingátju nuju ngayun. —Cuatjin cachja Jesús.

²²Hane xi cavatju cachja me cjua vëhë ne, sehe cachimatjo me xuta jan, sehe cachja me cuitjin:

—Chjuhunntsun Hasen rë Nina cahntsua xahasen nuju. ²³Xuta xi ninchatuhun jyé rë me ne, ha camanchataha. Hane xuta xi ninchatuun jyé rë ne, ha camanchataain. —Cuatjin cachja Jesús.

Cavëë Tomás Jesucristu

²⁴Tomás, me xi chja me tsëhë Cha Lihma, ngu xuta ladu rë Jesús ngajñi rë me xi tejó jan ne, cuajin me tacun me hya xi cafehe Jesús hiscan xi tjin tangun xuta ladu rë me xi yahnga jan. ²⁵Ngajan

xi xuta ladu rë Jesús xi yahnga jan ne, cuitjin cachja me cojo Tomás:

—Cahyin Nai naja. —Cuatjin cachja me.

Peru Tomás ne, cuitjin cachja me:

—Sa xi scueen hiscan cavanguihmu rë xin tsja me hacuaha tsinguseen rcuntsa hiscan cavisehen xin jan hacuaha cuetahanntsaan ngu ladu ntsacu ndanisin rë me ne, cumacjaain camahani ná. —Cuatjin cachja Tomás.

²⁶ Xi cavatju jyin nixtin jan ne, tjin tangun nga xuta ladu rë Jesús cahntsua ndihya, hacuaha cojo Tomás tacun me cojo me xi cuacun vë. Hane cafehe nga Jesús casecun me ngajni rë me xi cuacun vë, ha ndasa tichjá tingotjo ndihya. Hane sehe cachja Jesús cuitjin:

—Cjuandaja cjuajeya cateña cojo nuju.

²⁷ Sehe cachja me cojo Tomás cuitjin: —Jarë rcuntsun. Chutsujun ntsa ne. Hacuaha jarë ntsun. Ninguisuhun ngu ladu ntsacu ndanisin naha. Tejñuxun xi cuatjin macjaain nuju. Catamacjain nuju. —Cuatjin cachja Jesús.

²⁸ Ngajan xi Tomás ne, cuitjin cafayangui me tsëhë Jesús:

—¡Ngayun Nai naha! ¡Ngayun Nina naha! —Cuatjin cafayangui me.

²⁹ Hane Jesús ne, cuitjin cachja me:

—¿Há macjain nuju ngatsë rë xi tichutsujun ná? Ndatjin, peru jemu ndaja tsëhë me xi macjain rë, ha ndasa vutsijin ná me. —Cuatjin cachja Jesús.

Cuitjin titsihindu Juan cojo sa xi cumacjain rë xuta

³⁰ Quihndë ne, jemu cjín sa cjuarcun casahmi Jesús xcun xuta ladu rë me xi camahindiin xcun xujun vihi. ³¹ Peru cjuarcun vihi ne, camahindu cojo sa xi ngayujun ni ngayun ne, cumacjain nuju xi Jesús ne, hacui me xi Catsingatju Nina, hacuaha hacui Quihndi rë Nina me. Hacuaha camahindu cojo sa xi, xi

cuatjin cumacjain nuju ne, sacú nuju cjuahñu xatsë ngatsë rë xi ladu rë me má ngayun.

Cavëë yatu xuta ladu rë Jesucristu me

21 Xi camá ngascan ne, cavetju caatsejen nga Jesús ngajni rë xuta ladu rë me ngajan tjeheh laguna Tiberias, xi hacuaha hmí rë laguna Galilea. Hane cuitjin camá. ² Siu tangun me xi cuicun vi: Simón Pedru, cojo Tomás, me xi chja me tsëhë Cha Lihma, cojo Natanael, xuta Caná, ngu nandya tsëhë distritu Galilea, cojo quihndi rë Zebedeo, cojo jo sa xuta ladu rë Jesús jan. ³ Hane Simón Pedru ne, cuitjin cachja me cojo xicjin me:

—Ngahan ne, cjué cúaxë chu ti. —Cuatjin cachja me.

Hane me xi yahnga jan ne, cuitjin cachja me:

—Hacuaha cuanguin ngayin cojo nuju. —Cuatjin cachja me.

Sehe cavetju me quiji me cojo xicjin me, cafaha me barcu, quiji me xcun nandá. Peru nguixun hya ne, casacuiin camahani rë me chu ti. ⁴ Hane hora xi tisahasen jan ne, cavëë me Jesús secun me tjeheh laguna jan, peru hvín me xi hacui Jesús. ⁵ Ngajan xi Jesús ne, cuitjin cajindaya me cavinenguise rë me me xi cuacun jan:

—¿Há sacuiin nuju chu ti, tsan? —Cuatjin cavinenguise Jesús.

Hane me xi cuacun jan ne, cuitjin cajindaya me cafayangui me:

—¡Sacuiin niji chu! —Cuatjin cafayangui me.

⁶ Ngajan xi Jesús ne, cuitjin cajindaya me cachja nga me cojo rë me:

—¡Ningatjunyun nahya vë táha ladu quixi tsëhë barcu ne, sehe sacú nuju chu! —Cuatjin cachja me.

Hane xi catsingatjenya xuta ladu rë me jan nahya táha ladu quixi ne, caain rë me cavaxë me nahya jan, ngatsë rë ti xi jemu

cjín chu hinchu chu. ⁷Ngajan xi cha ladu rë Jesús xi jemu vinga rë Jesús jan ne, cuitjin cachja cha cojo Pedru:

—¡Nai naja vë! —Cuatjin cachja cha.

Ngajan xi Simón Pedru ne, xi cahndë me cjua xi hacui Nai naja ne, cavajásanii me tsjian rë me, tsëhë xi quixti me xi sahmi me xa jan. Hane sehe catsingat-jenya me yojo rë me ngajñi nandá xi cjuetjengui me Jesús tjeheh laguna jan. ⁸Peru xuta ladu rë Jesús xi yahnga jan ne, quijitjengui me Jesús cojo barcu jan, táha javë me nahya, ña quitsë rë cojo chu ti. Hacuini cjin hinchu me tsëhë tjeheh nandá ta sacuahá ngu cientu metru ni cjin. ⁹Hane xi cafehe me tjeheh nandá jan ne, sehe cavetju me barcu, hane ngajan cavëë me ngu ndava ndihi tacun, quisun ngu ti xcun ndixuhi, hacuahá cavëë me niñu. ¹⁰Ngajan xi Jesús ne, cuitjin cachja me cojo me xi cuacun vë:

—Tuhun ngujo chu ti xi sehe canaxun vë. —Cuatjin cachja Jesús.

¹¹Sehe quiji Simón Pedru cajavë me nahya jan cavaxë me nangui quixí, quitsë rë cojo suvá ti yehe, sacuahá ngu cientu cojo yachan tejyan má chu. Hane handasa cuatjin cjín chu ti hinchu chu nahya jan ne, catiyaain. ¹²Ngajan xi Jesús ne, cuitjin cachja me cojo xuta ladu rë me jan:

—Nduvun xinu tajñu. —Cuatjin cachja me.

Peru hisca ngu xuta ladu rë me cavetjiin cacun me cavinenguise me cuitjin: “Yo ngayun”, tsëhë xi ha vëë me xi hacui Nai naja. ¹³Ngajan xi Jesús ne, cafaha me niñu jan, casua me xuta ladu rë me. Hacuaha cuanijtjin ni casua me chu ti jan.

¹⁴Vihi majyan ndiya xi cavetjucaatse-jen Jesús ngajñi rë xuta ladu rë me, quihndë xi cavuya nga me cjuahñu.

Visiajmi Jesucristu cojo Simón Pedru

¹⁵Hane xi cajnetaha cajinë tajñu me ne, sehe cavinenguise Jesús Simón Pedru cuitjin:

—Ngayun Simón, quihndi rë Jonás, ¿há hitsë sa hmu tacún ná ngayun xi cuma rë me xi cuicun vi? —Cuatjin cavinenguise me.

Hane Pedru ne, cuitjin cafayangui me tsëhë Jesús:

—Juun. Tatá, ngayun ne, hyun ta hmú cáacun nuju. —Cuatjin cafayangui Pedru.

Hane Jesús ne, cuitjin cachja me cojo Pedru:

—Nihñu cuidadu xuta ladu naha sacuatjin ndaja cuidadu sahmi ngu paxtu rë chu hnditsánga rë me. —Cuatjin cachja Jesús.

¹⁶Cavinenguise nga Jesús Pedru majo ndiya cuitjin:

—Ngayun Simón, quihndi rë Jonás. ¿Há hmu tacún ná? —Cuatjin cavinenguise Jesús.

Hane Pedru ne, cuitjin cafayangui me:

—Juun. Tatá, ngayun ne, hyun ta hmú cáacun nuju. —Cuatjin cafayangui Pedru.

Hane Jesús ne, cuitjin cachja me cojo Pedru:

—Nihñu cuidadu xuta ladu naha sacuatjin ndaja cuidadu sahmi ngu paxtu rë chu hnditsánga rë me. —Cuatjin cachja Jesús.

¹⁷Cavinenguise nga Jesús xi majyan ndiya Simón Pedru cuitjin:

—Ngayun Simón, quihndi rë Jonás. ¿Há hmu tacún ná? —Cuatjin cavinenguise Jesús.

Ngajan xi Pedru ne, choho camá rë me xi cuatjin cavinenguise Jesús me xi majyan ndiya sa xi hmu cacun me Jesús, hane cuitjin cachja me:

—Tatá, ngayun ne, yëjë ni ne, hyun. Ngayun ne, hyun ta hmú cáacun nuju. —Cuatjin cachja Pedru.

Hane Jesús ne, cuitjin cachja me cojo Pedru:

—Nihñu cuidadu xuta ladu naha sacuatjin ndaja cuidadu sahmi ngu paxtu rë chu hnditsánga rë me. ¹⁸ Hacuaha cuichjá cojo nuju cjuaquixi ta hya xi chúva sa nixtin nuju ne, cachujun suvun tsjian nuju sehe catsangun hiscan xi meje cuangun. Peru hya xi cuma changá ngayun ne, nicujun tyja nuju, hane hacjahi xuta tsihñu me cahntsua nuju, sehe cjuecojo nuju me hiscan xi mijí cuangun. —Cuatjin cachja Jesús cojo Pedru.

¹⁹ Xi cuatjin cachja Jesús ne, casua me camachaya rë Pedru mé chuva rë cueya Pedru, hacuaha casua me camachaya rë me xi sahmi jyë sahmi hnga me Nina xi cuatjin cueya me. Xi cavatju cachja Jesús cjua vëhë ne, sehe cachja me cuitjin cojo Pedru:

—Nduvun cuanguen cojo ná. —Cuatjin cachja Jesús.

Xuta ladu rë Jesús xi jemu vinga rë me jan

²⁰ Xi cavuya cavutsejen Pedru táha ngaxtun me ne, cavëë me xi tjengui cha xi jemu vinga rë Jesús jan nduva cha, cha xi quijivaha tiña xcun Jesús hya xi tijinë me comida jan hacuaha cavinenguise cha me cjua vihi: “Tatá, ¿yo xi sahmi nuju entregadu ni?” ²¹ Hane xi cavëë Pedru cha vëhë ne, cavinenguise me cuitjin cojo Jesús:

—Tatá, hane me vëhë ne, ¿mé cuatju me cuma ni? —Cuatjin cavinenguise Pedru.

²² Ngajan xi Jesús ne, cuitjin cachja me cojo Pedru:

—Sa xi ngahan meje ná xi cuejña me hisca hya xi cúya nga ne, ¿mé cuenda nuju ngayun ni? Ngayun ne, nduvun cuanguen cojo ná. —Cuatjin cachja Jesús.

²³ Hane cavitsojo ngajñi rë xuta ladu rë Jesús cjua xi cha xi jemu vinga rë Jesús jan ne, cueyaain cha. Peru Jesús ne, hacuiin cachja me cojo Pedru xi cueyaain cha vëhë ta xi cachja me ne, cjua vihi: “Sa xi ngahan meje ná xi cuejña me hisca hya xi cúya nga ne, ¿mé cuenda nuju ngayun ni?” Vëhë cjua xi cachja me.

²⁴ Cha xi cuajyihi jemu vinga rë Jesús jan ne, cha vëhë xi cachja cha cjua vëhë hacuaha cha vëhë catsihindu cha. Hacuaha ngayin xi tinihindin ngujo cjua vihi ne, hyin ta cjuaquixi cjua xi cachja cha.

²⁵ Hacuaha jemu cjín sa xcusun xi casahmi Jesús. Peru sa xi cumahindu yëjë ni xcusun vëhë chuva ngu chuva ngu ne, xi má ná ne, chutaain cahndé setjo yëjë ni libro xi cumahindu, handasa jingujoyë ni ngasunhndë.

Hacutjin Casahmi Apóstol

1 Ngayun Teófilo, xcun xujun naha xi catsihindu nuju tjun tjun ne, cachjá cojo nuju yějē ni hacutjin cavetsihin casahmi xu Jesús cojo hacutjin cavetsihin cavicuya me. Cavétsehen hisca ntsacu cuetsihin ne, ²catsingufjnetaha hisca hya xi quiji me ngahnga. Hya xi chaja sa cjue me ngahnga ne, cachja xu me cojo apóstol xi ha cavaxijin me xi camá ladu rē me jan, hacutjin sahmi. Hacuaha cojo ngahñu rē Hasen rē Nina xi cachja xu me. ³Hya xi ha cavatju nixtin xi cahme me ne, cavuya cafehetjengui nga me apóstol jan, casua me camachaya xu rē ta quixi jain xi tacun quicun nga me. Hane ngajñi rē xi yachan nixtin ne, cavēē apóstol jan Jesús, hacuaha cachja sa Jesús cojo me ngujo cjua tsēhē hacutjin cuma hya xi cuinduva Nina sahmi me gobiernu.

⁴Hane xi tacun Jesús cojo apóstol jan ngajan Jerusalén ne, cavitexa xu me me cuitjin:

—Hacuiin cuetjunxun tsēhē nandya vi ta nechunyun rē cjuandaja xi sua nuju Nahmi naha, sacuatjin xi ha cachjá cojo nuju. ⁵Cuatjin nihñu ta, xuta ne, handasa cojo nandá cavitenda Juan me, peru ngayun ne, xtenda ngayun cojo Hasen rē Nina cahntsua xi ngujo sa nixtin. —Cuatjin cavitexa me.

Quiji Jesús ngahnga

⁶Hya xi camá ne, ngu nixtin xi siu tan-gun xu apóstol cojo Jesús ne, cavinenguise me Jesús cuitjin:

—Tatá, ¿há cavechú nixtin xi tuhun cahndé xi xutaxa rē nangui naja ne, cuya cuitexa nga me nguehe nangui naja cojo jingu sa nangui, sacuatjin xi cavitexa me hatsēē ni? —Cuatjin cavinenguise me.

⁷Ngajan xi cafayangui xu Jesús cuitjin:

—Satiin nuju ngayun xi cumachaya nuju jarē nixtin xi Nina cavejña cacun me cojo cjuatacun rē suvá me xi cuma yějē ni xcusun vēhē. ⁸Peru hya xi cuinduva Hasen rē Nina cuisehen cahntsua xahasen nuju ne, hya sacú sa nuju ngahñu, sehe cuinújun cjua naha cojo xuta nguehe nandya Jerusalén, cojo yějē ni nandya distritu Judea cojo Samaria, hisca cojo yějē sa nangui xi siu ngasunhndē. —Cuatjin xu cafayangui me.

⁹Xi cafē cachja xu Jesús cjua vēhē ne, tivutsejen ni apóstol ne, cavetsihin quiji me ngahnga. Sehe cavisehen me ngajñi rē yuff, ha quihndē camatsijin sa me. ¹⁰Ha tu tivutsejen cuaha xu apóstol ngahnga hacutjin cjui Jesús ne, xi tu camachaya rē me ne, hinchacun jo xihin xi tyava tsjian rē hiscan siu me. ¹¹Hane cuitjin cavinenguise xu xihin jan me:

—Ngayun, cha Galilea. ¿Mé má cuatjin chutsujun ngahnga? Jesús, me xi quiji ngahnga vē ne, cuatjin tutjin xi cahyun xi quiji me ne, tjín ngu nixtin ne, ha cuanitjin ni cuya nga me. —Cuatjin cachja xu xihin jan.

Catuxijin rē me xi cuisehen ngojo rē nima Judas

¹²Hya xi camá xu ne, apóstol jan ne, cavetjuxin me tsēhē ndetjún xi hmí ndetjún Ya Olivu, hane cavuya quiji nga me Jerusalén, xi tacun sacuaha ngu mil metru tsēhē ndetjún vēhē. ¹³Hya xi cafehe me ngajan ne, quiji me ndihya hiscan xi viyuju me, hane quijiniji me pisu ngahnga. Me xi cuicun xu vi xi viyuju me ngajan: Pedru, Jacobo, Juan, Andrés, Felipe, Tomás, Bartolomé, Mateo, Jacobo xi quihndi rē Alfeo, Simón xi tsēhē partidu zelota, cojo Judas xi xuta rē Jacobo. ¹⁴Yějē ni me xi cuacun jan, cojo yějē ni me xi xicjin Jesús, cojo María naa rē me, cojo yachjin xi yahnga ne, nchunchujun ni camatangun me xi sahmi me oración rē me.

¹⁵ Ngu ndiya hya xi camatangun xu sacuahá chuva rē ngu cientu cojo can xuta xi cuacun ladu rē Jesús ne, casecunvasen Pedru ne, sehe cachja me cojo xuta jan cjua vihi:

¹⁶ —Ngayujun ngarcun ni ngayun xuta ladu rē Jesús. Cavetjucaa jain cjua xi cat-sihindu xutachanga naja David xcun xujun rē Nina hatsëë. Hatuxa cuatjin camameje rē xi cuma ta, tsëhë xi chaja sa xi cuma matsejen ne, Hasen rē Nina ne, ha casua camachaya rē xutachanga naja jan hacutjin sahmi nima Judas, nima xi cavisecoo rē xuta xi cafaha rē Jesús, cat-sihñu rē me. ¹⁷ Nima Judas jan matsejen ne, hacuahá camá ladu rē Jesús sacuahá ngayaan matsejen ta, tsëhë xi cavaxijin Jesús nima xi cuisecoo rē me xcun xa rē Nina xi sahmi me. —Cuahaxutjin cachja Pedru.

¹⁸ Nima Judas jan ne, cavatsë xu ngu rquí nangui cojo tujún xi cafaha tsëhë xcun tsehen xi casahmi xi casahmi rē entregadu Jesús. Hane ha xcun nangui xi cavatsë xu nima jan ne, caticja xcun, hane catsingá xu cahntsua nima, hisca cavetju yëjë ni ntsehen rē. ¹⁹ Sacuatjin camá xu xi cahme nima ne, yëjë cjua vëhë ne, cavechútáha rē yëjë xuta ngajan Jerusalén. Vëhë xi xuta ngajan ne, casuañihi xu rē me cahndé jan Acéldama, ñihi xi meje cuichja xi hne rē me ne, Cahndé Tsëhë Jni.

²⁰ Hacuaha quijinduju sa cachja Pedru cuitjin:

—Hacuaha xcun xujun tsëhë Salmo matsejen ne, cuitjin camahindu: Catejña cuatjin ndava cha, hacuahá hisca ngu cuiyijin jan. Hacuaha camahindu sa cuitjin: Xa rē cha ne, catjaha jingu sa xuta. Cuatjin camahindu matsejen.

²¹ Vëhë xi meje rē xi cuinchise rē ngu cha xi cuma tangun cojo niji matsejen, ngu cha xi ha cuatjin cavisecoo niji yëjë ni nixtin xi canuyihinyin cojo Nai naja

Jesús, ²² hisca nixtin xi cavitenda Juan me cojo hisca nixtin xi quiji me ngahnga. Cha vëhë matsejen ne, cuma tangun cha cojo niji, xi tsinguixi cha hacutjin camá xi cavuya Jesús cjuahñu. —Cuatjin cachja Pedru.

²³ Hya xi cajnetaha cachja Pedru cuatjin ne, catuxijin xu rē jo xihin: José cojo Matías. José jan ne, hacuahá hacui me xi hmí rē Barsabás cojo Justo. ²⁴ Sehe cafehya rē me Nina cuitjin:

—Ngayun Nai niji, ngayun xi hyun cjuatacun rē ngayëjë ni xuta ne, tsëhë jo cha xi cuicun vihi ne, naxujun jarë cha xi chuya nuju ngayun ²⁵ xi cuisehen cha xa sacuahá apóstol cahndé rē nima Judas ta, tsëhë xi nima vëhë ne, cavëjña tiya cahndé rē xi quiji hiscan xi casatë rē. —Cuatjin cafehya rē me Nina.

²⁶ Xi cajnetaha cachja apóstol cuatjin ne, sehe cavaxë xu me ngu suerte, hane Matías casatë rē me. Ngajan xi Matías ne, camatangun me cojo tengu apóstol jan.

Hya xi canduva Hasen rē Nina

2 Hya xi camá ne, xi cavechú nixtin tsëhë suhi xi hmí Pentecostés ne, ngu cahndé ni camatangun xu yëjë ni xuta ladu rē Jesús. ² Xi siu tangun me jan ne, ha tu ñahñu cahndé xu me xi jercu cafane ngajan ngahnga, sacuahá nuhya rē xi fane vanga tjo xi jemu hñu camahani. Sehe yëjë ni xuta jan ne, cahndé xu me xi canduva cafane hisca cahntsua ndihya hiscan siu me. ³ Hacuaha cavëë xu me ndihi xi langa sacuahá neje xuta, hane cavitsojo quiji casatë xu rē jima ngu jima ngu me. ⁴ Hya xi camá ne, catsë xu rē Hasen rē Nina xahasen rē jima ngu me jan, hacuahá cavetsihin cachja xu me jima ngu me cjuandaja rē Nina ne, cachja xu me jingu sa hne xi maji rē me, tucutjin xi Hasen jan casahmi xi camá cachja me.

⁵ Ngajan Jerusalén ne, siu xuta tjë rē Israel xi faharcun jain me Nina, can-

duva me tsëhë yëjë ni nangui xi tjin ngasunhndë. ⁶Hane hya xi canuhya rë xi cuatjin jercu fane ne, jercu xutacjín camatangun xu me xi quiji cavutsejen me mé xi camá. Hane xutacjín jan ne, jemu quijircun xu rë me, tsëhë xi hora xi tichja xuta ladu rë Jesús ne, xuta jan ne, hne ni rë suva me cahndë me jima ngu me xi cuacun jan. ⁷Ngajan xi cachja xu me cojo xicjin me cuitjin:

—¿Mé nga vihi ni? ¡Yëjë ni me xi tichja vi ne, xuta distritu Galilea me! ⁸¿Hacutjin má xi jima ngu ngayaan ne, tinuhyan hne naja suvaan ta, ⁹tsëhë xi jemu cjín nangui canduvan? Ngujo ngayaan ne, xuta Partia ngayaan. Ngujo nga ngayaan ne, xuta Media ngayaan. Cojo sa xuta Elam, xuta Mesopotamia, xuta Judea, xuta Capadocia, xuta Ponto, xuta Asia, ¹⁰xuta Frigia, xuta Panfilia, xuta Egipto, xuta ladu Libia, tiñataha nandya xi hmí Cirene, xuta Roma, ¹¹xuta Creta, xuta Arabia. Ngayaan xuta ngu nangui xi macjain naja Nina rë xuta tjë rë Israel ne, jemu cjín ngayaan xi nechanyanjne nguehe ngajni rë xuta tjë rë Israel. Hacuaha ngayejen ngarca ni tinuhyan xi tichja me hne naja. Tichja me tsëhë cjuandaja xi jercu casahmi Nina. —Cuatjin xu cachja xuta xi cuacun jan.

¹²Hane tsëhë xi cuatjin camacjínca-cun me xi jemu quijircun camahani rë me ne, cavinenguise xicjin xu me cuitjin:

—¿Mé rë meje cuichja xcusun vi? —Cuatjin cavinenguise me.

¹³Peru yahnga me ne, catsixcuehyu me xuta ladu rë Jesús, hane cachja xu me ta chihi xuta jan.

Cjua xi cachja Pedru

¹⁴Hya xi camá ne, caxinchacun yëjë tengu apóstol jan ne, sehe cachja xu Pedru cojo xutacjín jan cuitjin:

—Ngayujun ngarcun ni ngayun xuta tjë rë Israel xi nechun nguehe

Jerusalén matsejen ne, tinuhyun ngujo cjua xi cuichjá cojo nuju vi, cojo sa xi cumachaya nuju. ¹⁵Ngayujun ni matsejen ne, nújun ta me xi cuicun vi ne, chihi me. Peru quixiin xi nújun ta ndicumaha ni ne, sehe fane ñaja tsëhë nguitajñu. ¹⁶Peru xcusun xi sehe cavatju camá nguehe matsejen ne, cavetjucaa cjua xi cachja xutachanga naja profeta Joel hatsëë nixtin, hya xi catsihindu me cjua xi casua Nina. Cuitjin catsihindu me:

¹⁷Cjua xi cuicun vi xi chja Nina cojo naja:

Hya xi cuma tiña nixtin xi cjuë ngasunhndë ne,

hya tsingátju Hasen naha xi cuisehen xahasen rë xuta jingujyë ni ngasunhndë;

hane quihndi nuju, sa chjuun sa xihin ne, suacuenda me cjua naha,

hacuaha cha nixti nuju cojo xuta changá nuju ne,

cuichja chini cojo rë me tsëhë cjuatacun naha.

¹⁸Hacuaha nixtin hya ne, tsingátju Hasen naha xi cuisehen xahasen rë me xi sahmi cjuatacun naha, sa chjuun, sa xihin,

hane me vëhë ne, suacuenda me cjua naha.

¹⁹Hya sahme xcusun cjuarcun vihi ngajan ngahnga, cojo nguehe nangui xi chutsujun:

cuáxëcaa jni, cojo ndihi, cojo nihndi cjín.

²⁰Tsuihi ne, cuma jma;

sá ne, cuma hani sacuaha jni.

Cuatjin cuma hya xi chaja sa xi cuechú nixtin xi ngahan xi Nina ngahan ne, tsichúva yëjë ni xuta cojo cjuatacun rë me;

ngu nixtin jyë ngu nixtin ndajyihi nixtin vëhë.

²¹Hane nixtin hya ne, yëjë ni xuta xi cjuehya ná me cjuandaja naha ngahan xi Nina ngahan ne,

cuetjutje me.

Cuatjin catsihindu profeta Joel cjuua xi cachja Nina.

²² Cjuinduju sa tichja Pedru cjuua vihi:

—Quihndë matsejen ne, tinuhyun cjuua xi cuichjá cojo nuju, ngayujun ngarcun ni xuta tjë rë Israel. Jesús, me Nasaret matsejen ne, camachaya naja xi Nina catsingatju rë me matsejen ta, tsëhë xi jemu cjin xcusun cjuarcun casahmi me ngajni naja sacuatjin xi ha ndaja hyun. Camá casahmi me cjuarcun jan matsejen ta, ngatsë rë xi Nina casua rë me cahndë xi cuatjin casahmi me. ²³ Nina matsejen ne, ha vëë me yëjë ni xcusun. Vëhë xi cojo tjun sa ne, ha catsingataha cacun me ta Jesús vë ne, cuma me entregadu cojo xuta tsehen. Cuatjin cavejna Nina cjuatacun rë me hisca chaja sa xi cuetju-caa xcusun vëhë. Sacuaha xi ngayun canicuhun Jesús ta, ngatsë nuju xi cave-taha xuta tsehen me xcun cru. ²⁴ Peru cavëhëndaya Nina me tsëhë cjuaveya, catsicuya me me cjuahnu ta, tsëhë xi hatuxa camaji xi cavëjna me ngahma gu-biernu rë cjuaveya. ²⁵ Xutachanga naja David matsejen ne, catsihindu me tsëhë Jesús cuitjin:

Cahvë Nina xi cjui titjun me tsahan yëjë ni nixtin;

ticojo ná me, cojo sa xi tsajin mé cuma ná.

²⁶ Vëhë xi xahasen naha ne, jemu sua rë, hacuaha ntsuva ne, suvá cjuandaja chjá.

Hacuaha vëhë xi ngahan ne, vetahá cá-cun Nina.

²⁷ Cuatjin sahme ta, tsëhë xi ngayun Nina ne, hacuiin nismutacun hasen naha xi cuejna ngajan Hades hiscan siu nima,

hacuaha hatuxa tuun cahndë xi cjuehndu yojo naha, ngahan xi hatuxa tjënguë nuju cojo yëjë xahasen naha.

²⁸ Ngayun ne, catuhun camachaya ná ndiya xi cuéchu hiscan sacú ná cjuahnu ndajyihi.

Hacuaha ninguitsun rë xahasen naha cjuasua xi cuéchutaha nuju hiscan nechun.

Cuatjin catsihindu David.

²⁹ Hacuaha cachja sa Pedru cuitjin:

—Ngayujun ngarcun ni matsejen ne, nguehe cuichjáquixë cojo nuju matsejen ta, xutachanga naja David ne, cahme me, hacuaha caseyaniji me hatsëë nixtin. Hane tsjun rë me ne, tacun cuaha hisca quihndë hiscan xi cavëjna. ³⁰ Peru xi chaja sa xi cueya David jan matsejen ne, ngu profeta me, hacuaha ha vëë me xi ha cachja Nina cojo rë me cuitjin: Ngahan suva hvë xi ngu xuta tjë riji ne, cuitexa rë xuta, sacuatjin tivitexe ngaye. Cuatjin cachja Nina cojo David.

³¹ Vëhë xi camachaya rë David xcusun xi sahmi Nina ngascan. Ha vëë me xi cuya nga cjuahnu me xi tsingatju Nina, hane vëhë xi cachja me ta hacuaha hacuiin cuejna me vëhë ngajan Hades ngajni rë nima, hacuaha hacuiin cjuehndu yojo rë me. ³² Hane ngayijin ni matsejen ne, cahyin suvin xi Jesús, me xi catsingatju Nina vë ne, catsicuya Nina me cjuahnu.

³³ Hane quihndë matsejen ne, ha catsiquijin Nina me xi cavechú me ngahnga hiscan vëjna suvá Nina. Hacuaha cafahatsja me Hasen rë Nina sacuatjin xi cachja Nina Nahmi rë me xi sua rë me. Vëhë xi Jesús matsejen ne, tisahmi me xcusun xi tijima nguehe ngajni niji. ³⁴ Xi tsejen ne, cachjaain David tsëhë suvá me ta, tsëhë xi hacuiin quiji me ngahnga sacuatjin quiji Jesús matsejen ta, catsihindu sa me cuitjin:

Nina ne, cachja me cojo Nai naha cuitjin: “Tinechin nguehe, ladu quixi naha,

³⁵ hisca hya xi yëjë ni xi sahmi ri condra ne, cuiyujú ngahan ngahma gu-biernu riji.”

Cuatjin catsihindu David hatsëë nixtin.

³⁶ Vêhë xi ngayujun ni xuta nangui Israel matsejen ne, ndaja catijne rcun cjua xi chjá cojo nuju vi: Jesús vë, me xi ngayun catuhun xi cahme xcun cru matsejen ne, Nina casahmi me xi me vëhë ne, camá me Nai naja hacuaha catsingatju Nina me xi cuaxëtje naja me. —Cuahaxutjin cachja Pedru cojo xutacjín jan.

³⁷ Xi cahndë xutacjín jan cjua vëhë ne, jemu choho camá rë me. Ngajan xi cavinenguise me Pedru cojo apóstol xi yahnga jan cuitjin:

—Xi má nuju ngayun ne, ¿mé xi ndatjin nihni? —Cuatjin cavinenguise xuta jan.

³⁸ Ngajan xi cachja xu Pedru cojo rë me cuitjin:

—Nindeyun cjuatacun nuju. Hacuaha jima ngu ngayun ne, catixtenda ngayun, ngatsë rë xi camangu tacún cojo Jesucristu, sehe ngajan xi tsinchataha nuju Nina tsëhë jyë nuju. Xi cuatjin ne, hacuaha sahmi me cjuandaja xi sua nuju me Hasen rë me. ³⁹ Cjuandaja vëhë ne, ha cachja Nina xi sua nuju me ngayun cojo quihndi nuju, hisca cojo yëjë xuta tjë nuju. Nina naja ne, sua me cjuandaja vëhë xi cuma rë yëjë ni xuta xi cuaxijin me. —Cuahaxutjin cachja Pedru.

⁴⁰ Hacuaha jemu cjín sa cjua cachja me cuitjin, hacutjin meje rë xi sahmi xuta jan:

—Naxunxun yojo nuju tsëhë xuta tsehen xi siu quihndë. —Cuatjin cachja xu me.

⁴¹ Ngajan xi xuta xi cachuya rë me cjua xi cachja Pedru ne, caxtenda me. Hane cuatjin xi nixtin vëhë xu ne, sacuaha jyan mil xuta xi cavisehen me ladu rë Jesús. ⁴² Casua me yojo rë me cojo cjua xi tivicuya apóstol jan, hacuaha nguñaja cacun xu me xi ma tangun me cojo yëjë sa xuta ladu rë Jesús. Nchunchujun ni ne, camatangun me cojo xicjin me xi

sahmi me oración, cojo xi sinë tangun me niñu.

Cjuandaja xi caviyuju xuta ladu rë Jesucristu cojo xicjin me

⁴³ Jemu cjín xcusun xu cjuarcun casahmi apóstol ngatsë rë ngahñu xi casua Nina me, hane vëhë xi yëjë ni xuta xi hacuiin ladu rë Jesús ne, jemu tsacjun me. ⁴⁴ Peru yëjë ni xuta ladu rë Jesús ne, camatangun xu cjuatacun rë me, hacuaha yëjë ni xcusun xi tsëhë jima ngu xu me ne, hacuaha camá tsëhë yëjë ni me xi yahnga jan. ⁴⁵ Caviteña xu me xcusun xi tjin rë me ne, sehe cavatëcja xu me tujún ngajni rë yëjë ni me xi casahmi chaja rë. ⁴⁶ Nchunchujun xu ni ne, camatangun me nguñaja cacun me ngajan yungun xi matitjun xi cjuaharcun me Nina. Hacuaha xi cajinë xu me niñu ndava me cojo xicjin me ne, jemu cojo cjuasua, cojo cjuandaja cojo cjuajeya. ⁴⁷ Hacuaha jemu cavaxëndaja me Nina. Hane yëjë xuta xi yahnga jan ne, xi cavëë xu me xcusun rë xuta ladu rë Jesús jan ne, cachja xu me ta xuta ndaja me xi cuacun vë. Hacuaha nchunchujun ni ne, tivaxëtje Nai naja ngujo ngujo sa xuta. Vëhë xi nchunchujun ni ne, jima cjín sa xuta yungun jan.

Casahmi Pedru cojo Juan xi camandaja ngu cha xi maji fi

3 Ngu nixtin jan ne, Pedru cojo Juan ne, quijini ji tangun xu me yungun xi matitjun chuva rë fane jyan, hora xi fi chjayuma xuta. ² Hane ngu cha xi maji fi, tsëhë xi tsehen ntsacu cha hisca hya xi catsin cha ne, hacuaha hora vëhë cjuicojo xuta rë cha cha yungun. Nchunchujun ni quiji chani rë cha ngajan tingotjo hnhua xondyojo rë yungun xi hmí Tingotjo Ndajyihi, xi sahmi cha caridad tsëhë xuta xi visehen ndatsen yungun jan. ³ Hane xi cavëë cha hmu rë

jan xi camatiña Pedru cojo Juan hiscan tacun cha xi cuisehen me ndatsen yungun jan ne, cafehya xu cha me cjuandaja rë me. ⁴Ngajan xi cavutsejenndaja me cha. Hane Pedru ne, cuitjin cachja me cojo cha:

—Chutsijin niji hitsë —Chja xu me.

⁵Hane cavutsejen cha me ta, xi má rë cha ne, tjin mé xi sua me cha. ⁶Ngajan xi cavuya cachja nga Pedru cojo rë cha cuitjin:

—Tsajin camahani ná tujún. Peru xi tjin ná, tsan ne, suá ri. Jesucristu, me Nasaret ne, casua ná me ngahñu, hane vëhë xi chjá cojo ri ta, tisechin, hane tujyihye. —Cuatjin cachja xu me cojo cha.

⁷Sehe cafaha me tsja quixi cha hmu rë jan hane catsisatjenhnga xu me cha. Hane ngutjen ni casacuhñu rë ntsacu cha cojo ndoyojo naxa rë cha. ⁸Xi tu cafaha Pedru tsja cha ne, cacaahnga cha, hacuaha casecun cha. Sehe cavetsihin catsujyihya cha. Hacuaha cavisehen cha yungun xi matitjun cojo me xi cuacun jan, cjui cha, hisca chijihnga cha, taha tivaxëndaja cha Nina. ⁹Yëjë ni xuta xi siu ndatsen yungun jan ne, cavëë me xi cjui cha, hacuaha cahndë me xi tivaxëndaja cha Nina. ¹⁰Hane jemu quijircun rë xuta jan tsëhë xcusun xi cavatju cha camá ta, tsëhë xi ha vëë me xi ha hacui cha vëhë xi véjña cha sahmi cha caridad ngajan tingotjo yungun xi hmí Tingotjo Ndajyihi.

Cjua xi cachja Pedru cojo xuta ngajan yungun xi matitjun

¹¹Cha xi camandaja xu jan ne, mijí cjuexin cha tsëhë Pedru cojo Juan. Hane tsëhë xi jemu quijircun rë xuta ne, cavanga me quiji me hiscan siu me xi cuacun jan, camatangun me ngajan ngu ngahma ndihya tsëhë yungun, cahndë xi hmí Tsëhë Salomón. ¹²Xi cavëë xu Pedru xi cuatjin camatangun xuta ne, cuitjin cachja me:

—Ngayujun ngarcun ni xuta tjë rë Israel matsejen ne, ¿mé má cuatjin fircun nuju tsëhë cha xi cuijyihi vi? ¿Mé má cuatjin jercu chutsujun niji sacuaha xi ngatsë rë cjuatacun niji suvin o ngatsë rë xi jemu ndaja chjihinrcuin Nina ne, vëhë xi camá canihñi xi camandaja cha? ¡Jéya! Hacuuiin cuatjin. ¹³Nina rë Abraham cojo Isaac cojo Jacob, Nina rë xutachanga naja matsejen ne, casahmi jyë casahmi hnga me Jesús, me xi casahmi xa rë Nina. Hane ngatsë rë me cama cjuarcun vi. Peru ngayun matsejen ne, catuhun Jesús cojo xutaxa rë. Hane ngajan xcun gobernador Pilatu matsejen ne, hora xi meje tsismi me Jesús ne, catuun cahndë. ¹⁴Jesús jan ne, hatuxa tjengui me Nina cojo yëjë xahasen rë me, hatuxa cjuaquixi xi sahmi me. Peru ngayun matsejen ne, canitjungun me. Hane cahndë rë xi chjahyun rë Pilatu xi tsismi me Jesús matsejen ne, cachjahyun rë me xi tsismi me ngu cha tsiquehen. ¹⁵Hane Jesús, me xi sua cjuahñu naja ne, ngayun catuhun me xi cahme me. Peru Nina matsejen ne, catsicuya me Jesús jan cjuahñu. Hane ngayin ne, hisca cahyin me quihndë xi tacun nga me cjuahñu. ¹⁶Cha xi cuijyihi tichutsujun vi ne, ha hyun yo cha. Casacu rë ntsacu cha ngahñu ta, tsëhë xi ngayin matsejen ne, mangutacuín cojo Jesús. Hacuaha ngatsë rë xi cuatjin mangutacuín cojo Jesús ne, vëhë casahmi xi camandaja cha sacuahatjin xi cahyun ngayujun ni.

¹⁷Quihndë ne, ha hvë ta ngayujun ni cojo yëjë xutaxa rë yungun naja matsejen ne, hya xi catuhun Jesús xi cahme me ne, hyúun yo xi canihñu cojo. ¹⁸Peru Nina matsejen ne, cuatjin casahmi me xi cavetjucaa cjua xi cachja yëjë ni profeta cojo xutachanga naja hatsëë nixtin hya xi cachja profeta jan, tsëhë cjuañihi xi cuatju ngu me xi tsingatju naja Nina nchujun ni nguini. ¹⁹Vëhë xi meje rë xi nindeyun cjuatacun nuju, tisuhun ndiya

rë Nina, cojo sa xi Nina matsejen ne, cjuahaxin me yějë ni jyé nuju. ²⁰ Xi cuatjin nihñu ne, Nina ne, sua me cahndé xi cjuahajenda hitsë xahasen naja. Hacuaha xi cuatjin ne, tsingatju nga naja me Jesús ta, tséhë xi ha me vëhë xi cachja Nina hisca hatsëë xi cjuaha me xa xi cuaxëtje naja me. ²¹ Peru Jesús jan ne, meje rë xi cuejña sa me ngajan ngahnga hisca xi Nina ne, cuya sahmi ndaja nga me yějë ni xcusun, sacuatjin xi ha cachja profeta rë me, hya xi cachja me cojo xutachanga naja cjuar rë Nina hatsëë nixtin. ²² Xutachanga naja Moisés matsejen ne, cuitjin cachja me ngu cjuar xi catsingatju Nina tséhë me hatsëë: “Nina ne, sahmi me xi cuetjuiñi ngajñi nuju ngu xi cuma profeta sacuahe ngahan. Tetuhuncun yějë cjuar xi cuichja me cojo nuju ta, ²³ sa xi yo xi cuetaharcuaain cjuar rë profeta jan ne, hatuxa cueya, ha quihndë cuejñaai ngajñi naja ngayaan xuta rë Nina.” Cuahaxutjin cachja Pedru cjuar rë Moisés.

²⁴ Sehe cachja sa Pedru cojo xuta cuitjin:

—Hacuahanitjin yějë profeta, xi cavet-sihin cojo xutachanga naja Samuel cojo xi canduvani sa ne, jemu cachja me tséhë xcusun xi camá nixtin xi nechan vi. ²⁵ Cjuandaja xi cachja Nina xi sua me xutachanga naja nhujun ni nguini ne, vëhë cjuandaja xi tisua naja me quihndë. Hacuaha compromisu xi casahmi me cojo xutachanga naja matsejen ne, ti-sahmichihin me cojo naja quihndë. Nina ne, casahmi me compromisu jan nixtin xi cachja me cojo xutachanga naja Abraham cuitjin: “Ngatsë rë ngu xuta tjë riji ne, ngahan ne, tsinchácun yějë ni xuta ngasunhndë.” Cuatjin cachja Nina cojo Abraham. ²⁶ Sehe ngajan xi Nina matsejen ne, hya xi cavaxijin me Jesús xi cjuaha xa rë me ne, tjun tjun ngayaan xuta tjë rë Israel catsingatju naja Nina me. Cuatjin xi tsinchácun naja me xi

cuetjunxeen jima ngu ngayaan tséhë ndiya tsehen xi tivanguen. —Cuahaxutjin cachja Pedru cojo xuta.

Casua Pedru cojo Juan cjuaquixi rë me

4 Hya xi camá ne, Pedru cojo Juan ne, tichja cuaha sa me cojo xutacjin jan, hora xi cafehe xu ngujo nahmi. Hacuaha cha mayu rë yungun xi matitjun cojo ngujo sa cha saduceo ne, cafehe xu cha cojo nahmi xi cuacun jan. ² Hane jemu xti má rë yějë me ta, tséhë xi tivicuya apóstol jan xuta, tichja me xi ngatsë rë xi catsicuya Nina Jesús cjuahñu ne, vëhë xi machaya naja xi cuechú nixtin ne, tsicuya nga Nina yějë ni nima cjuahñu. ³ Hya xi camá ne, cachjaha rë Pedru cojo Juan. Peru tséhë xi ha quiji xu hora ne, tu caxincha ni me ndavaya. ⁴ Peru jemu cjin xuta xi cahndë cjuar rë apóstol jan ne, camacjain xu rë me. Vëhë xi yějë xuta xihin xi macjain rë ne, sacuahe hñú mil xu camá me, cojo me xi hatsëë camacjain rë cojo me xi sehe camacjain rë.

⁵ Xi camá nhujun jan ne, ngujo xutaxa rë yungun cojo ngujo xuta changá cojo ngujo cha xi vicuya cjuachacun ne, camatangun xu me ngajan Jerusalén. ⁶ Camatangun me cojo Anás, me xi matitjun tséhë yějë ni nahmi, cojo Caifás, cojo Juan, cojo Alejandru, cojo yějë sa me xi xuta rë me xi matitjun tséhë nahmi jan. ⁷ Hya xi camá xu ne, catsingatju me quiji chjahá rë Pedru cojo Juan, caviyuju me me cavasencja jan ne, sehe cavinenguise me me cuitjin:

—¿Hacutjin canihñu xi camá camandaja cha hmu rë jan? ¿Yo casua nuju chuva rë xi cuatjin canihñu? —Cuatjin cavinenguise me.

⁸ Ngajan xi Pedru ne, cojo ngahñu rë Hasen rë Nina xi quitsë rë xahasen rë me ne, cuitjin cafayangui xu me:

—Ngayun xi má ngayun xutaxa rë tsa-jan, ngayun xi má ngayun xuta changá

naja matsejen ne, ⁹quihndë xi meje cumachaya nuju hacutjin canihñi ngu cjuandaja xi camandaja ngu cha hmu rë. ¹⁰Nguehe cuinújin cojo nuju cojo sa xi cumachaya rë yëjë ni xuta tjë rë Israel ta cha hmu rë vi ne, guehe secun cha xcun ngayujun ni matsejen ta, tsëhë xi camandaja cha ngatsë rë ngahñu rë Jesucristu, me xi tsëhë nandya Nasaret. Ngayun ne, catuhun me xi cahme me xcun cru, peru Nina matsejen ne, catsicuya rë me cjuahñu. ¹¹Me vëhë xi canitjungun ta, tsëhë xi xi má nuju matsejen ne, machjiriin camahani Jesucristu. Canitjungun me sacuaha tsitjungui chjinevexo ngu ndyojo xi chuyiin rë me tsëhë. Peru quihndë matsejen ne, camatitjun me tsajan ngayejen ni, sacuaha ndyojo ngahñu rë ndihya. ¹²Tsajin sa yo xi cuaxëtje naja. Tsajin sa ngu xuta guehe ngasunhndë xi catsingatju Nina xi cuma cuaxëtje naja. —Cuahaxutjin cachja Pedru.

¹³Hya xi camá xu ne, cavëë xuta xi cuacun jan xi Pedru cojo Juan ne, tsacjuiin camahani me xi sua me cjuaquixi rë me, hacuaha cavacun rë xuta jan xi Pedru cojo Juan ne, xuta yuma me, xi hisca cavutayaa in me cjuachacun. Ngajan xi xuta jan ne, jemu quijircun rë me. Hacuaha ha vëë me xi Pedru cojo Juan ne, hacui me xi catsujy-ihya cojo Jesús. ¹⁴Hane tsëhë xi cha xi camandaja jan ne, ngajan secun tangun xu cha cojo Pedru cojo Juan ne, vëhë xi sacuiinyiin rë xuta xi cuacun jan hacutjin cuma xi cuichja me condra tsëhë Pedru cojo Juan. ¹⁵Hya xi camá ne, cavaxë me Pedru cojo Juan cojo cha xi camandaja jan candatsen. Sehe cavisajmicjín sa me cojo xicjin me. ¹⁶Cuitjin cachja me:

—¿Mé xi ndatjin nihña cojo cha xi cuacun vë? Yëjë ni xuta nandya ne, ha camachaya rë me tsëhë cjuarcun jyë xi casahmi cha. Hane cumaji cuinújan xi quixiin. ¹⁷Peru cojo sa xi hacuiin cuit-

sojo sa cjuacjintacun vihi ngajñi rë xuta nandya ne, cuinchanrcun rë cha. Cuinújan cojo rë cha ta ha quihndë cuichjaain sa cha tsëhë nima vëhë cojo xuta. —Cuahaxutjin cavisajmicjín xuta xi cuacun jan cojo xicjin me.

¹⁸Hya xi camá ne, cajindaya nga xuta xi cuacun jan Pedru cojo Juan, sehe cachja xu me cojo me xi ha quihndë cuyaa in cuichja me tsëhë Jesús cojo xuta. ¹⁹Peru Pedru cojo Juan ne, cuitjin cafayangui me:

—Xi má nuju suvun ne, ¿jarë xi hitsë sa chuya rë Nina? ¿Há xi cuinuhyin tsujun ne?, o há tsajin ne, ¿há xi cuinuhyin tsëhë me? ²⁰Peru ngayin matsejen ne, hatuxa cumajin nisejyin xi cuinújin cjuandaja xi canuhyin cojo xcusun xi cahyin. —Cuatjin xu cafayangui me.

²¹Hya xi camá ne, xuta xi cuacun jan ne, cavincharcun sa xu me Pedru cojo Juan, sehe cavëhëndaya xu me. Casacuinyiin rë me hacutjin sahmi me castigu me ta, tsëhë xi yëjë ni xuta tichja me xi jemu jyë hnga Nina cojo Hasen rë me, ngatsë rë cjuarcun xi cuatjin camá jan. ²²Cha xi camandaja ngatsë rë cjuarcun jan ne, ha vatju yachan nu xu tjin rë cha.

Cafehya sa xuta ladu rë Jesús ngahñu cojo Nina

²³Hya xi camá ne, xi tu camandaya Pedru cojo Juan ne, quijitjengui sa xu me xuta xi yahnga xi hacuaha ladu rë Jesús, sehe casuacuenda me yëjë cjua xi cachja xuta xi cuacun jan cojo rë me. ²⁴Hya xi cahndë me xi yahnga jan cjua xi cachja Pedru cojo Juan ne, ngu tangun ni cachja me xi cafehya rë me Nina cuitjin:

—Ngayun Nai niji. Ngayun xi canihñu ngahnga, canihñu nangui, canihñu ndachacun, hacuaha canihñu yëjë ni xcusun xi siu jan ne, ²⁵cojo Hasen nuju ne, cachuxuhun cjuatacun rë xutachanga niji David, me xi casahmi xa

nuju. Hane me vëhë ne, cuitjin cachja me cjuja xi catuhun rë me:

¿Má rcu hngacacun xuta?

¿Mé má cuatjin tsingatahacacun me ngu cjuatacun tsehen xi tsajin mé machjirëhë?

²⁶ Me xi matitjun tsëhë jingu sa nangui, cojo xutaxa rë jingu sa nandya ne, matangun me xi sahmi me condra Nina hacuaha sahmi me condra me xi tsingatju Nina xi cuaxëtje naja.

Cuatjin cachja xutachanga niji David.

²⁷ Hacuaha cavetjucaa jain cjuja vëhë ta, tsëhë xi ha nguehe nandya vihi ne, cuatjin camatangun Herodes cojo Poncio Pilatu cojo xutaxín cojo xuta tjë rë Israel. Camatangun me xi cuacun vëhë xi sahmi condra me Jesús, me xi hatuxa sahmi xa nuju cojo yëjë xahasen rë, me xi ngayun caningatjun ngasunhndë. ²⁸ Cuatjin casahmi me yëjë hacutjin xi ha cavejñu cjuatacun nuju hatsëë xi cuma ta, tsëhë xi cuatjin meje nuju ngayun. ²⁹ Quihndë ne, ngayun xi Nai niji ngayun ne, chjuhuncuendun cjuja xi cachja xuta xi cuacun vë hacutjin xi choho sahmi me cojo niji. Hane ngayin xi má ngayin mosu hndixahan nuju ne, tuhun niji hitsë ngahñu xi rcuiin camahani xi cuinújin cjuja nuju cojo xuta. ³⁰ Hacuaha cojo ngahñu nuju ne, nihñu xi cuma ndaja xuta hmu rë, hacuaha nihñu hitsë cjuarcun xi cueyinnanguin ñihi rë Jesús, me xi hatuxa sahmi xa nuju cojo yëjë xahasen rë. —Cuatjin xu cafehya rë me Nina.

³¹ Hane xi cajnetaha casahmi xuta ladu rë Jesús jan oración ne, cafani nangui ngajan hiscan tjin tangun xu me. Hane cojo Hasen rë Nina ne, catsë rë xahasen rë yëjë ni me, sehe cavetsihin cachja me nguñaja cacun me cjuja rë Nina cojo xuta.

Casahmi tangun me yëjë xcusun xi tjin rë me

³² Quihndë ne, ngayëjë ni me xi cuatjin camangu cacun me cojo Jesús ne, ngu cjuatacun ni rë me, ngu xahasen xu ni rë me. Hacuaha hisca ngu me cachjaain me xi yëjë ni xi tjin rë me ne, tsëhë suvá me ta xi tsëhë me ne, hacuaha tsëhë xu yëjë xicjin me. ³³ Hane cojo ngahñu jyë xi casua Nina apóstol xi cuacun jan ne, cuatjin quijinduju me casua me camachaya rë xuta hacutjin catsicuya Nina Nai naja Jesús cjuahñu. Hane jercu casua Nina cjuandaja rë me cojo yëjë xuta ladu rë me. ³⁴ Hacuaha ngajñi rë me xi cuacun jan ne, tsajin xu hisca ngu me xi tjin rë cjuachaja ta, tsëhë xi yëjë me xi nai rë ngu rquí nangui o sa xi ngu ndihya ne, viteña me, sehe fi cani me chji rë jan ³⁵ tsja apóstol. Sehe ngajan xi apóstol xi cuacun jan ne, vatëcja xu me ngajñi rë yëjë xuta, ha tucutjin cjuachaja xi tjin rë xuta jan. ³⁶ Hacuaha cuatjin casahmi ngu cha xi hmí rë José, ngu cha xi casuañihi apóstol ngu ñihi xi ma jo xi hmí Bernabé, ñihi xi meje cuichja cuitjin: Ngu Cha Xi Sua Cjuetacun. Cha vëhë ne, tjë rë Leví má cha, peru catsin xu cha ngajan ngu nangui hiscan xi hmí rë Chipre. ³⁷ Hane cha vëhë ne, caviteña cha ngu rquí nangui xi tjin rë cha, sehe quiji cani cha chji rë, cafahatsja apóstol.

Cha Ananías cojo na Safira

5 Peru ngu nga cha xi hmí rë Ananías cojo na Safira chjuun rë cha ne, hacuaha caviteña xu cha ngu rquí nangui. ² Peru cafahaxin suvá cha hitsë tujún jan, sehe quiji cani cha hitsë tujún xi cavangui jan tsja apóstol, sacuaha xi ha vëhë yëjë ni chji rë nangui jan. Hane na chjuun rë cha jan ne, hacuaha vëë xu na xi cuatjin casahmi cha. ³ Ngajan xi cachjataha xu Pedru cha cuitjin:

—¿Mé má cuatjin caningatihin xi catsë Satanás xahasen riji, ngaye Ananías? ¡Xitsehen vëhë casahmi xi cachjehexin sove hitsë tujún tsëhë chji rë nangui xi caviteñi! ¡Xitsehen vëhë casahmi xi meje cuindache rë Hasen rë Nina! ⁴Xi chaja sa cuitëni nangui jan ne, ha hye ta tsiji. Hacuaha ngu ndiya xi ha caviteñi ne, hacuaha hye ta tujún rë ne, tsiji. ¿Mé má cuatjin caningatehetacuín xi nihni ngu cjuatacun tsehn vi ni? Hacuín ngayín ni xuta xi meje cuindache niji ta hisca cojo Nina meje cuindache rë me. —Cuatjin cachja Pedru.

⁵Xi tu cahndë cha Ananías cjuja jan ne, caticja cha, hane cahme xu cha. Hane yëjë xuta xi camachaya rë cjuacjintacun jan ne, jemu catsacjun camaha xu ni me camá. ⁶Ngajan xi ngujo cha ne, cavaxtë cha nima ngu tsjian ne, sehe cafaha cha quiji caveyaniji cha.

⁷Hya xi camá ne, xi cavatju sacuaha chuva rë jyan hora xi cahme nima jan ne, cafehe xu chjuun rë nima ngajan hiscan siu apóstol jan. Peru cjëë cumachaya rë na hacutjin xi cavatju nima xihin rë na camá. ⁸Ngajan xi cavinenguise xu Pedru na cuitjin:

—Tinoje cojo ná. ¿Há caviteñu nangui sacuatjin chji vihi?

—Juun. Chji vëhë caviteñi. —Cuahaxutjin cachja na.

⁹Sehe ngajan xi cavinenguise nga xu Pedru na cuitjin:

—¿Mé má cuatjin sacuaha catsingataha cacun nima xihin riji ne, cuatjin caningatehetacuín xi meje cuindachun Hasen rë Nina? Chutsijín ta cuacun cha xi quiji caveyaniji rë nima xihin riji nduva cha jan. Quihndë ne, hacuaha cojo ngaye cuatjin cuatji cuma. —Cuatjin cachja Pedru.

¹⁰Ha hora vëhë ni ne, caticja xu na hiscan secun Pedru, hane cahme na. Xi tu cavisehen nga cha xi cuacun jan ne, ha cahme xu na xi tu cavëë cha. Sehe ngajan

xi cafaha cha nima jan, quiji caveyaniji cha tjeheh rë hiscan caseyaniji nima xihin rë. ¹¹Hya xi camá ne, yëjë xuta rë yungun cojo yëjë sa xuta xi camachaya xu rë cjuacjintacun jan ne, jemu catsacjun camahani me camá.

Casahmi apóstol cjuarcun

¹²Hacuaha apóstol xi cuacun jan ne, jemu cjín cjuarcun xi casahmi xu me ngajni rë xuta nandya. Hane ngajan ndatsen yungun xi matitjun, hiscan ngahma Ndihya Tsëhë Salomón ne, ngajan xu ma tangun yëjë xuta ladu rë Jesús. ¹³Peru xuta xi hacuín ladu rë Jesús me ne, hisca vetjiin cacun me xi cuma tiña me ngajan, handasa yëjë xuta jemu ndaja chja me tsëhë xuta ladu rë Jesús jan. ¹⁴Peru hacuaha jemu cjín sa xuta sa chjuun sa xihin me ne, jimangu cacun xu me cojo Jesús, hacuaha jima tangun me cojo xuta ladu rë Jesús. ¹⁵Hacuaha jemu cjín xuta ne, vaxë me xuta hmu rë, viyuju me me xcun nijña ngajan ndiyatë, cojo sa xi hora xi cuatju xu Pedru ne, ndastu tjahnguen rë me satë rë xuta hmu rë xi cuacun jan, hane cumandaja me. ¹⁶Hacuaha jemu cjín camaha xu ni xuta nandya tahndee rë Jerusalén ne, ficojo me xuta hmu rë hacuaha cojo me xi hincha xitsehen xahasen rë, ngajan Jerusalén. Hane camandaja ngayëjë xu ni me.

Cavatju apóstol cjuanihi

¹⁷Hya xi camá ne, nahmi xi matitjun tsëhë yëjë ni nahmi, cojo yëjë sa xuta saduceo xi tjin tangun cojo rë me ne, jercu camaxín camaha xu ni rë me. ¹⁸Vëhë xi cachjaha rë apóstol, caxincha me ndavaya. ¹⁹Peru hya xi camanguixun ne, ngu ángel tsëhë Nina quiji cavuxaha xu tingotjo ndavaya, sehe cavaxë rë apóstol xi cuacun jan. Hya xi cavetju me ne, cachja ángel jan cojo rë me cuitjin:

²⁰—Tángun yungun xi matitjun ne, tuhuncuendun rë xuta yějě ni cjua tsěhě ndiya xatsě xi tisua nuju Nina. —Cuatjin cachja ángel jan.

²¹Ngajan xi apóstol jan ne, casahmi me sacuatjin cachja ángel. Věhě xi, xi casahasen xi camá nchujun ne, quiji xu me yungun xi matitjun. Hane xi cafehe me ndatsen yungun jan ne, cavetsihin casuacuenda me xuta cjua tsěhě ndiya xatsě jan.

Hacuaha sacuaha hora věhě ne, nahmi xi matitjun cojo xuta xi tjin tangun cojo rë me ne, casahmi tangun xu me yějě xuta changá tsěhě xuta tjě rë Israel xi cuma ngu junta jyě. Sehe catsingatju me ngujo cha nísě xi cjue cuaxě xu cha apóstol tsěhě ndavaya, cjucojo cha me hiscan tijima junta. ²²Peru xi cafehe cha ngajan ndavaya jan ne, casacuiin xu rë cha me. Ngajan xi cavuya quiji casuacuenda cha xuta changá jan cuitjin:

²³—Xi caphin tingotjo ndavaya jan ne, nda ndaja tichjáhñu, hacuaha cha xi sahmi cuidadu jan ne, hinchacun cha tingotjo jan. Peru xi catuxaha tingotjo ne, tsajin yo casacu niji xi hinchahantsua. —Cuatjin casuacuenda cha.

²⁴Ngajan xi cha mayu yungun cojo yějě nahmi xi matitjun ne, hya xi cahndě xu me cjua věhě ne, jemu cavinenguise xicjin me tsěhě xcusun xi camá jan. ²⁵Hane ha hora věhě ni ne, cafehe xu ngu cha xi cachja cojo rë me cuitjin:

—Nijyun tacún. Ngu xa xi nduva ngahan ne, cha xi cuacun cavinchun ndavaya jan ne, hinchatahá cha ndatsen yungun, tichja cha cojo xuta. —Cuatjin cachja cha xi cafehe jan.

²⁶Sehe ngajan xi cha mayu yungun jan ne, quiji cha cojo cha nísě, quijijaha xu cha apóstol xi cuacun jan. Hane xi cafaha cha me ne, quijicojo cha me hiscan tijima junta, peru hacuiin cojo cjuachan ta, tsěhě xi jemu tsacjun xu cha xuta nandya, sá tu cuetaha me cha ndy-

ojo. ²⁷Hya xi cafehecojo cha me jan ne, sehe caviyuju cha me xcun nahmi cojo xuta changá xi cuacun jan. Ngajan xi nahmi xi matitjun ne, cachja xu me cojo rë me cuitjin:

²⁸—Ha canújin cojo nuju ta ha quihndě cuyuun cuinújun tsěhě nima věhě cojo xuta. Peru quihndě ne, caninguitsujun sa cjuachacun nuju jingujyě nandya Jerusalén, hacuaha meje ningatjunsun jyě tsěhě cjuaveya rë nima věhě ngaxtin ngayin.

²⁹Ngajan xi Pedru cojo apóstol xi yahnga xu jan ne, cuitjin cafayangui me:

—Meje rë xi cuinuhyan tsěhě Nina cahndě rë xi cuinuhyan tsěhě xuta. ³⁰Ngayun matsejen ne, catuhun Jesús xi catyangui me xcun ngu cru, hane ngajan cahme me. Peru Nina rë xutachanga naja matsejen ne, catsicuya me Jesús cjuahñu. ³¹Hane Jesús vē matsejen ne, casahmi jyě casahmi hnga Nina me, hacuaha cavejña me Jesús ladu quixi tsěhě me, xi cumatitjun Jesús tsajan hacuaha cuaxětje naja me. Cuatjin casahmi Nina, cojo sa xi ngayaan xuta tjě rë Israel matsejen ne, nindeyan cjuatacun naja hacuaha tsinchataha naja me tsěhě jyě naja. ³²Ngayin matsejen ne, cahyin xcusun věhě, věhě xi titihín jimachaya rë xuta. Hacuaha Hasen rë Nina matsejen ne, cuatjin tisua jimachaya rë xuta tsěhě xcusun xi camá jan. Hane Nina ne, casua me Hasen rë me cojo xuta xi vihndě tsěhě me. —Cuatjin cafayangui apóstol jan.

³³Ngajan xi yějě me xi cuacun tisahmi xu junta jan ne, hya xi cahndě me cjua xi cachja apóstol jan ne, jercu camacjan camahani rë me. Hisca meje tsiquehen xu me apóstol jan. ³⁴Peru ngajñi rë xuta xi sahmi junta jan ne, jiyajñi ngu me xi vicuya cjuachacun xi hmí rë Gamaliel, ngu xuta fariseo. Hane yějě ni xuta ne, jemu faharcun xu me me. Gamaliel jan ne, casecunvasen me, sehe cavitexa me

xi cuetjuxin apóstol ngu hora lihndi candatsen. ³⁵ Sehe cachja xu me cojo xuta xi tisahmi junta jan cuitjin:

—Ngayujun ngarcun ni xuta tjë rë Israel matsejen ne, nechun cuidadu sa xi mé meje nihñu cojo cha xi cuacun vë. ³⁶ Ninguitsjun ta hatsëë nixtin matsejen ne, cavetjújñi nima cha Teudas ngajñi rë xuta. Jercu cachja nima xi jemu cha venguichji rë cha, hane sacuaaha ñuju cientu xihin cavisehen ladu rë nima. Hya xi camá ne, catsiquehen xuta nima, hane yëjë ni xuta ladu rë nima jan ne, cavitsojo me, hane ngajan caffè cjuandya xi casahmi me. ³⁷ Hane xi camá ngascan ne, sacuaaha nixtin xi camá censu matsejen ne, hacuaaha cavetjújñi nima Judas, cha Galilea. Cavindacha nima xuta, hane jemu cavisehen me ladu rë nima. Peru nima vëhë matsejen ne, hacuanitjin ni cahme. Hane yëjë ni xuta ladu rë nima jan ne, caffè me cavitsojo me. ³⁸ Vëhë xi nguehe cuichjá cojo nuju ta mijí rë xi nihñu cjuahngatacun cojo cha xi cuacun vë. Mijí rë xi chasen cha ta, sa xi suvá cjuatacun ni rë xuta xi tijima matsejen ne, cjuëya suvá vë. ³⁹ Peru sa xi cjuatacun rë Nina xi tijima ne, cumaji cuichancjan cjuatacun rë cha. Ndaja cuidadu, sá tu cuechú nixtin xi cumachaya naja ne, Nina tichicjaan cojo rë me. —Cuatjin cachja Gamaliel.

Hya xi cajnetaha cachja Gamaliel cuatjin ne, yëjë ni xuta xi tisahmi junta jan ne, cajne cacun me. ⁴⁰ Ngajan xi cajindaya nga me apóstol jan, sehe cavitexa me casehen rë. Hya xi camá ne, cachja xu me cojo rë apóstol xi ha quihndë cuyaain cuichja me tsëhë Jesús cojo xuta, sehe cavëhëndaya xuta jan me. ⁴¹ Ngajan xi apóstol jan ne, cavetjuxin xu me tsëhë hiscan jima junta jan. Hane jemu ndama camahani rë me xi cavechú chuva rë xi choho cavatju me camá ngatsë rë Jesús. ⁴² Peru nchunchujun ni ne, ngajan ndat-sen yungun cojo ndava xuta ne, casejiin

xu xi casua me camachaya rë xuta cjuandajyihi xi chja xi Jesús ne, hacui me xi catsingatju Nina.

Catuxijin rë yatu cha xi cuisecoo rë apóstol

6 Hya xi camá ne, xi quiji sa nixtin ne, camacjín sa xuta ladu rë Jesús. Hane ngajñi rë me xi cuacun vëhë ne, me xi visiajmi hne griego ne, cavetsihin cavinchajyë xu me me xi visiajmi hne rë xuta tjë rë Israel. Jyë xi cavincha xu me ne, yachjin cahan tsëhë ngajñi rë me ne, ndajin xu má cuenda me nchunchujun ni hora xi ticja xcusun xi satë rë me xingu xingu me xi tjin rë cjuachaja. ² Ngajan xi apóstol xi tejó jan ne, cajindayavaha me yëjë sa xuta ladu rë Jesús, sehe cachja xu ngu apóstol jan cuitjin:

—Ndajintjin xi tu fë tu vetsihin vejñixin cjua rë Nina ngatsë rë xi chjihincuendin cjuacjintacun xi ma cuenda nchunchujun ni. ³ Vëhë xi ngayujun ni ne, naxujun ngajñi nuju yatu xihin xi tsajin mé cún mé má hacuaaha quitsë rë xahasen rë cojo Hasen rë Nina hacuaaha vechútaha cjuatacun rë. Sehe tahan rë xa xi cjuahacuenda cjuacjintacun vëhë. ⁴ Xi cuatjin ne, ngayin ne, tihín yojo niji cojo xa xi nihñi oración hacuaaha tihín cumachaya rë xuta cjua rë Nina. —Cuatjin cachja apóstol jan.

⁵ Hane jemu cachuya xu rë yëjë xuta xi cuacun jan cjua xi cachja apóstol jan. Sehe ngajan xi cavaxijin xu me yatu xihin xi cuicun vi: Esteban, ngu xihin xi jemu mangucacun cojo Jesús hacuaaha quitsë rë xahasen rë cojo Hasen rë Nina; Felipe; Prócoro; Nicanor; Timón; Parmenas; cojo Nicolás, ngu xutaxín xi hacuiin xuta tjë rë Israel, peru camacjain rë me Nina rë xuta tjë rë Israel. Nicolás jan ne, canduva me ngu nandya xi hmí rë Antioquía. ⁶ Hya xi camá xu ne, quijicojo xuta jan xihin xi cavaxijin me jan xcun apóstol. Sehe apóstol jan ne, casahmi me

oración, sehe cavisantsja xu me xihin xi cuacun jan xi suaxa rë me.

⁷Xi quiji sa nixtin ne, xuta Jerusalén ne, jemu jima chaya sa xu rë me cjua rë Nina, hacuaha jercu jima cjín sa xuta ladu rë Jesús ngajan Jerusalén. Hisca nahmi ne, jemu cjín me xi jimangu cacun xu me cojo cjuandajyihi xi chja tséhë Jesús.

Caxinchajyë rë Esteban

⁸Nixtin hya ne, Esteban, ngu xihin xi hacuaha cojo cavaxijin xuta jan ne, quitsë rë xahasen rë me cjuandaja rë Nina, hacuaha quitsë rë me ngahñu rë Nina. Vëhë xi jemu tisahmi xu me cjuar-cun ngajñi rë xuta. ⁹Peru ngujo cha tséhë yungun xi hmí rë Yungun Rë Hndixahan Xi Ha Ndaya Tjin ne, cojo xu cha ma tangun cha cojo cha nandya Cirene, cha nandya Alejandría, cha estadu Cilicia, cojo cha estadu Asia, xi cuisajmi cha. Cavechú ngu nixtin xi camatangun xu cha xi cuacun vë cojo Esteban ne, cavetsihin cakahataha cha me. ¹⁰Peru ngatsë rë xi Hasen rë Nina jemu casua rë me cjuatacun xi cuisajmi me cojo cha ne, cacaain xu rë cha casahmi condra cha cjua rë me. ¹¹Hya xi camá ne, cavanguisehma xu cha ngujo cha xi cuichja cjuandesu cuitjin:

—Canuhyin xi choho cachja cha xi cuajyihi vë tséhë Moisés hacuaha choho cachja cha tséhë Nina. —Cuatjin cuichja cha.

¹²Hane xi cachja cha cjuandesu vëhë ne, casahmi cha xi yëjë xuta cojo xuta changá cojo cha xi vicuya cjuachacun ne, jemu camaxti xu rë me. Ngajan xi cachjahá rë Esteban, quiji chani rë me xcun yëjë xuta xi matitjun. Sehe casahmi me xi matitjun jan ngu junta. ¹³Ngajan xi cha xi cuacun jan ne, cuitjin cachja xu cha cjuandesu hora xi cavinchajyë cha Esteban:

—Cha xi cuijyihi vi ne, sejiin cha xi choho chja cha tséhë yungun rë Nina xi matitjun vi. Sejiin cha xi choho chja cha tséhë ley rë yungun naja. ¹⁴Hacuaha canuhyin xi cachja cha xi Jesús, cha Nasaret vë ne, tsinguetsun cha yungun naja vi hacuaha tsindeya cha xcusun xi cavejña xutachanga naja Moisés hatsëë hacutjin nihña. —Cuatjin cavinchajyë cha me.

¹⁵Ngajan xi yëjë xuta xi siu xu xcun junta jan ne, cavutsejennadaja me Esteban. Hane cavëë me xi xcun Esteban ne, tangun jyih xi cojo xcun ngu ángel.

Casua Esteban cjuaquixi rë me

7 Hya xi camá ne, nahmi xi matitjun xu jan ne, cavinenguise me Esteban cuitjin:

—¿Há quixi cjua xi chja cha xi cuacun vë? —Cuatjin xu cachja me.

²Hane Esteban ne, cuitjin xu cavetsihin casua me cjuaquixi rë me:

—Ngayujun ni quihndi nandya, ngayujun ni xuta changá matsejen ne, tisiñuju cjua xi cuichjá cojo nuju vi. Nina naja, xi jemu jyë hnga camahani me cojo hasen rë me matsejen ne, cajnetsejen me cachja me cojo xutachanga naja Abraham, hya xi tacun cuaha Abraham táha ladu tséhë nangui Mesopotamia, hya xi chaja sa cjue setaha cahndë me ngajan Harán. ³Hane cachja Nina cojo rë me cuitjin: “Nismitacuín nangui riji. Nismitacuín xuta riji. Hane tihin ngajan ngu nangui cjin, tuyani ni hiscan xi ngahan tsingácun ri.” Cuatjin cachja Nina. ⁴Ngajan xi Abraham matsejen ne, cavetju me tséhë nangui rë me, nangui xi hmí Mesopotamia, hiscan xi caviyuju xuta nangui rë me, xuta Caldea. Cavetju me quiji casetahacahndë me ngajan nandya Harán. Hane xi cavatju cahme nahmi rë me ne, Nina casahmi me xi cavetju nga Abraham tséhë Harán,

canduva casetahacahndë me nguehe nangui hiscan xi nechan quihndë. ⁵Peru xi ngutjen ni ne, casuaain Nina me hisca hitsë nangui vihi xi cuma tsëhë me ta xi cachja me ne, hisca xi cuma ngascan ne, sehe sua me nangui vihi xi cuma tsëhë Abraham, cojo yëjë sa xuta tjë rë me xi cuinduva ngascan. Hya xi cachja Nina cojo rë me cuatjin ne, cjëë sacú rë chjuun rë Abraham quihndi. ⁶Hacuaha cachja sa Nina cojo Abraham cuitjin: “Cuechú nixtin xi xuta tjë riji ne, cjue cuiyujutaha me ngu nangui cjin. Hane xuta xi nangui rë jan ne, sahmi me mosu hndixahan rë me xuta xi cuacun tjë riji vë, hacuaha jemu choho sahmi me cojo rë me. Ñuju cientu nu xi cuatjin sahmi me xcusun vëhë. ⁷Peru cuechú nixtin xi ngahan ne, sahme castigu xuta xi nangui rë jan. Hane xi cuatju xcusun vëhë ne, sehe cuetju xuta tjë riji ne, cuya cuinduva nga me nguehe cahndë vihi, hane nguehe cjuaharcun cjuahajeya ná me.” Cuatjin cachja Nina cojo Abraham. ⁸Hane cojo sa xi cuma tsejen xi camangu cacun Abraham cojo compromisu xi casahmi Nina cojo rë me matsejen ne, cavejña Nina ngu xcusun xi xtf chuxin naja ngayaan xi xihin ngayaan. Ngajan xi hya xi cavechú jyin nixtin xi catsin Isaac, quihndi rë Abraham ne, cavatë me chuxin rë quihndi jan sacuatjin xi cachja Nina. Hane hacuanitjin ni casahmi Isaac cojo quihndi rë me Jacob. Hacuaha Jacob ne, cuatjin casahmi me cojo yëjë tejó quihndi rë me xi xutachanga naja.

⁹Hane xi camá ngascan matsejen ne, cavechú ngu nixtin xi xutachanga naja xi quihndi rë Jacob jan ne, jemu casahmi xín cacun me cojo hntsë me xi hmí rë José. Vëhë xi caviteña me José. Hane quijicojo xuta xi cavatsë rë José jan me hisca nangui Egipto. Peru Nina ne, cavisecoo me José jan, ¹⁰hacuaha cavaxëtje Nina me tsëhë yëjë cjuacjin-

tacun xi cavatju me camá. Jemu casua Nina me cjuatacun, hacuaha jemu casua me me cjuandaja. Vëhë xi me xi matitjun tsëhë yëjë ni nación Egipto ne, jemu cachuya rë me tsëhë José jan. Vëhë xi me xi matitjun jan ne, casua me José xa xi cuitexa me jingujyë ni nación jan hacuaha cjuahacuenda me yëjë cjuacjintacun xi tjin ndava me xi matitjun jan.

¹¹Hya xi camá ne, jercu camajindya camahani jingujyë ni ladu tsëhë Egipto cojo Canaán. Jercu jyë camahani ngu cjuañihi xi cavatju xuma xutachanga naja camá. Casacuiin rë me mé xi sinë me. ¹²Peru hya xi camachaya rë xutachanga naja Jacob xi jemu tjin xichinë ngajan Egipto matsejen ne, ngajan catsingatju me quihndi rë me ngu ndiya titjun xi cjue cuatsë me xichinë. ¹³Hane hya xi ma jo ndiya quiji quihndi rë Jacob ngajan Egipto ne, cachja quixi José cojo hntsë me cuitjin: “Ngahan xi tsuhun ná.” Cuatjin cachja me. Hacuaha nixtin hya ne, me xi matitjun tsëhë Egipto matsejen ne, camachaya rë me yo tjë rë má José. ¹⁴Sehe ngajan xi José ne, catsingatju me hntsë me jan xi cjue jaha me Jacob, nahmi rë me, cojo yëjë sa xuta rë me. Xi yëjë xuta xi cuacun vëhë ne, jyanchan tyjuhun xuta má me. ¹⁵Ngajan xi Jacob cojo xuta rë me matsejen ne, quiji caviyujutaha cahndë me ngajan Egipto. Hane xi camachangá me ne, ngajan cahme me. Hacuaha yëjë sa xutachanga naja xi cuacun jan ne, hacuaha ngajan cahme me. ¹⁶Xi camá ngascan ne, quiji chani rë yojo rë nima Jacob ngajan nandya Siquem. Ngajan caseyaniji nima tsjun xi cavatsë Abraham hatsëë, hya xi caviteña xuta rë ngu cha xi hmí rë Hamor, ngajan Siquem.

¹⁷Hya xi camá ne, xi camatiña nixtin xi cuetjucaa sacuaha cjuaxi ha cachja Nina cojo Abraham matsejen ne, yëjë xutachanga naja xi siutaha cahndë ngajan nangui Egipto ne, ha jercu cjín cama-

hani camá me. ¹⁸Sehe cavisehen nga ngu me xi xatsé xi camatitjun me ngajan nangui Egipto jan. Hane me vèhè ne, hvíin me hacutjin casahmi nima José hatséè. ¹⁹Hacuaha me vèhè ne, jemu cavindacha me xutachanga naja. Jemu choho casahmi me cojo rê me ta casahmi me nguýjè xi xutachanga jan ne, cuaxè me quihndinda rê me, cuiyuju me candatsen cojo sa xi cueya. Hane cuatjin xi ha quihndè hacuiin cuma cjin sa me. ²⁰Ngajni rê cjuahngatacun vèhè matsejen ne, hya catsin Moisés, ngu quihndi xi jemu ndajyihi camahani. Hane quihndi jan ne, ndava nahmi rê camacha sacuaha chuva rê jyan sá. ²¹Peru hya xi cavaxè me quihndi jan xi cueya ne, na quihndi rê me xi matitjun jan ne, cafaha na quihndi jan, hane catsicha na sacuaha quihndi rê suvá na. ²²Hane xi quiji sa nixtin ne, cavetsihin cavutaya Moisés yèjè ni cjuahasen xi tjin rê xuta Egipto, sehe ngajan xi camá me ngu xihin xi jercu vengui chji rê xi chja me cojo xi sahmi me.

²³Hya xi cavechú Moisés yachan nu matsejen ne, catsingataha cacun me xi cjue scusehenya me xuta tjè rê Israel, xuta xi tangun xutachanga rê me cojo. ²⁴Hya xi camá ne, cavèè Moisés xi ngu cha Egipto ne, tisahmi cha cjuahngatacun cojo ngu cha tjè rê Israel. Ngajan xi Moisés ne, cavisecoo me cha xi choho tivatju tijima jan. Catsiquehen me cha Egipto jan, hane cuatjin casahmingojo me. ²⁵Xi má rê Moisés matsejen ne, cuijnercu yèjè xuta tjè rê Israel xi Nina tsingatju me Moisés xi cuaxètje me xuta jan. Peru cajni rcu me. ²⁶Xi camá nchujun jan ne, cavechútaha me jo cha tjè rê Israel xi ticjan cha cojo xicjin cha. Hane meje cuatècja me si xi tisahmi cha. Vèhè xi cachja me cojo cha cuitjin: “¿Mé má cuatjin nihnu cjuahngatacun cojo xingun? ta ngayun ne, tangun xutachanga nuju.” Cuatjin xu cachja Moisés. ²⁷Peru

cha xi tisahmi cjuahngatacun cojo cha xingu jan ne, catsivaha cha Moisés, sehe cachja cha cojo me cuitjin: “¿Yo casuaxa nuju xi nduvun vitexun niji hacuaha nduvun nichuvun jyé niji? ²⁸¿Há meje nicuhun ná ngahan sacuatjin canicuhun cha Egipto nguñña?” Cuatjin cachja cha. ²⁹Hane xi cuatjin cachja cha cojo Moisés ne, catsacjun me camá. Vèhè xi quiji cavanga me hiscan ngu nangui cjin xi hmi rê Madián, ngajan casetahacahndè me. Hane xi quiji nixtin matsejen ne, camá me nahmi rê jo quihndi xihin.

³⁰Hane hya xi cafè nga yachan nu xi casetaha Moisés ngajan ne, cavechú ngu nixtin xi cavèè me sacuaha ngu ángel ngajni rê ndihi tsèhè ngu ya lihndi xi seti ngajan ngu xín camahani tsèhè nandya, tiña Naxi Sinaí. ³¹Hane jemu quijircun rê Moisés xi cavèè me xcusun jan. Hane xi quijitiña sa me xi scutsejenndaja me matsejen ne, cahndè me cjua rê Nina xi cachja cuitjin: ³²“Ngahan xi Nina rê xutachanga riji ngahan, Nina rê Abraham cojo Isaac cojo Jacob.” Cuatjin cachja cjua rê Nina jan. Ngajan xi Moisés ne, cavetsihin ña cafatsè me xi catsacjun me camá; ha hisca quihndè cavetjiin cacun me xi scutsejen sa me. ³³Sehe cachja nga Nina cojo rê me cuitjin: “Naxe chuxinxte riji ta cahndè hiscan sechin ne, catsinchácun. ³⁴Hacuaha nguehe cuichjá cojo ri ta ngahan ne, ha cahvè hacutjin choho tisahmi xuta Egipto cojo xuta ladu naha, hacuaha ha cahndè hacutjin tifè cacun xuta ladu naha xi choho tivatju me tijima. Vèhè xi ngahan ne, canduvajne xi cuaxètje me. Quihndè ne, ndove ta tsingátju ri ngajan Egipto.” Cuatjin cachja Nina cojo Moisés.

³⁵Moisés vè ne, hacui me xi catsitjungui xuta hya xi cachja xuta cuitjin: “¿Yo casuaxa nuju xi nduvun vitexun niji, hacuaha nduvun nichuvun jyé niji?”, chja me. Hacuaha hacui me xi Nina

catsingatju rë xi cuma titjun hacuaha cuëhëndaya rë xuta. Hane sacuaha ángel xi camatsejen ngajñi ndihi rë ya lihndi jan ne, cavisecoo rë Moisés xi cuatjin casahmi me. ³⁶ Hacuaha hacui me xi cavaxë rë xutachanga naja tsëhë nangui Egipto. Jemu casahmi me cjuar-cun ngajan Egipto, cojo ngajan ndachacun Hani, cojo ngajan ngu xín camahani tsëhë nandya. Cahntsua yachan nu xi cuatjin casahmi me. ³⁷ Moisés vë ne, hacui me xi cachja cojo xutachanga naja cuitjin: “Nina ne, cuya tsingatju nga nuju me ngu profeta xi cuetjuñi ngajñi nuju. Tsingatju nuju Nina profeta vëhë sacuatjin catsingatju ná me ngahan.” Cuatjin cachja Moisés. ³⁸ Hacuaha ha hacui ni me xi casetaha cojo xutachanga naja, hya xi caviyujutaha me ngajan ngu xín camahani tsëhë nandya. Hacui me xi cachja ángel cojo rë ngajan Naxi Sinaí. Hacuaha hacui me xi cafahatsja cjua rë Nina xi sacú rë xutachanga naja hacuaha hisca cojo xi sacú naja ngayaan quihndë.

³⁹ Peru xutachanga naja xi cuacun jan ne, mijí cuihndë me tsëhë Moisés. Catsitjungui me Moisés, hisca cavuya catsinguitsjen nga me nangui Egipto cahntsua xahasen rë me. ⁴⁰ Ngajan xi cachja me cjua vihi cojo xutachanga naja Aarón, hntsë Moisés: “Nindujun sa nina xi scuxaha ndiya tsajan ta, cha Moisés vë, cha xi cavaxë naja tsëhë nación Egipto ne, hyaan mé camá rë cha xi vuyaain cha.” Cuatjin cachja xuta jan. ⁴¹ Ngajan xi nixtin hya ne, catsindaja xuta jan ngu nina rë me xi xcusun rë ngu hndindyaja. Hya xi camá ne, catsiquehen me ngujo chu, sehe quiji caviyuju me chu xcun nina jan. Hacuaha casahmi me suhi tsëhë nina xi catsindaja suvá me jan. ⁴² Vëhë xi Nina naja ne, catsismi cacun me xutachanga jan, cojo sa xi cjuaharcun xuta jan niñú xi siutaha ngahnga, sacuatjin catsihindu profeta xcun xujun

rë Nina cjua xi cachja Nina hya xi cachja me cuitjin:

Ngayujun ngarcun ni xuta tjë rë Israel matsejen ne,

hya xi canicuhun chu sacuaha cjuatjo xi tuhun ná ngahan cahntsua yachan nu xi cavinechuntuhun ngajan ngu xín camahani tsëhë nandya matsejen ne,

hacuiin ngahan xi cuatjin cachjuhuncun ná ta ngayun ne, ha canindujun suvun nina xi chjuhuncun.

⁴³ Ndava nina nuju xi hmí Moloc

cojo niñú rë nina nuju xi hmí Refán, jo vëhë xi cachuhunhngun catsanguncujun xi má nina nuju.

Vëhë xi ngahan sahme xi cjuecojo cjuachan nuju xuta cjin sa tsëhë hiscan xi hmí Babilonia.

Cuatjin catsihindu profeta cjua xi cachja Nina.

⁴⁴ Hya xi caviyujutaha xutachanga naja hatsëë ngajan ngu xín camahani tsëhë nandya matsejen ne, cavejña rë me ngu ndihya tsjian hiscan camá acuerdu cojo Nina. Hane vëhë xi vëë me xi cavejña Nina cojo rë me. Ndava Nina jan matsejen ne, camandaja tutjin xi cachja Nina cojo Moisés, camandaja sacuatjin xcusun xi catsingacun Nina Moisés. ⁴⁵ Hane hya xi cafahatsja xutachanga naja ndava Nina jan ne, hacuaha cuatjin quijicojo me ha tuyani ni xi quiji caviyujutaha nga me. Hane xi camá ngascan ne, cavechú nixtin xi cafehecojo Josué xutachanga naja nguehe nangui naja vi, nangui xi Nina cavisecoo rë xutachanga naja xi cavaxëxin me xuta xi nangui rë. Hacuaha nixtin hya xi camá cuatjin ne, hacuaha cafehecojo me ndava Nina jan. Cuatjin camá sa hisca hya xi cavechú nixtin rë xutachanga naja David. ⁴⁶ Hane David jan matsejen ne, jemu cachuya rë Nina tsëhë me. Ngajan xi cafehya David cahndé cojo Nina xi tsindaja me ngu ndihya hiscan cuejña Nina. ⁴⁷ Hane hisca xi

camá ngascan ne, xutachanga naja Salomón catsindaja me ndava Nina. ⁴⁸ Peru Nina xi matitjun matsejen ne, hacuiin vejñacahndë me ngu ndihya xi tsindaja xuta ta çhá vitsjiin nuju hacutjin cachja ngu profeta xi cachja me cjua rë Nina cuitjin?:

⁴⁹ Ngahnga ne, sacuaaha ngu silla ndajy-ihí hiscan xi vitejña,

hane nangui ne, sacuaaha ngu yatë hiscan xi visane ntsacu, chja Nina.

Tsajin yo cuma tsindaja ngu ndihya hiscan xi cuitejñacahndë,

Tsajin ngu cahndë xi cuacun vë xi cuma cjuahájenda.

⁵⁰ Ngahan catsindaja yëjë ni xcusun xi tjín ngasunhndë.

Cuatjin cachja profeta jan cjua rë Nina.

⁵¹ 'Ngayujun ni ne, jercu taja camahani rcun. Xahasen nuju cojo cjuatacun nuju ne, tangun cojo xutaxín xi hatuxa macjaain rë Nina. Hatuxa nihñu condra Hasen rë Nina. Tangun camahani ngayun cojo xutachanga naja.

⁵² Hacuaha xutachanga naja ne, jercu catsujyihya tjengui me yëjë profeta cojo cjuahngatacun. Hisca catsiquehen me profeta xi casua camachaya rë me xi sehe cuinduva ngu me xi hatuxa tyjahi jain cojo cjuatacun rë. Hane quihndë xi cafehe jain me ne, ngayun canihñu me entregadu, ngayun catuhun me xi catsiquehen xuta me. ⁵³ Ngayun xi casua ángel xutachanga nuju ley rë Nina ne, hisca nuhyuun tsëhë ley vëhë. —Cuatjin casua Esteban cjuaquixi rë me xcun yëjë xuta xi matitjun ngajan xcun junta.

Cojo ndyojo catsiquehen xuta Esteban

⁵⁴ Ngajan xi yëjë xuta xi matitjun xi cuacun tisahmi junta jan ne, hya xi cahndë me cjua xi cachja Esteban jan ne, hisca catsijanerii me nehñu me xi jercu tu camacjan camahani rë me. ⁵⁵ Peru Esteban ne, quitsë rë xahasen rë me cojo

Hasen rë Nina. Hane xi cavutsejenniji me ngahnga ne, cavëë me hasen ndajyihí rë Nina xi jercu seti camahani. Hacuaha cavëë me Jesús, secun me cojo Nina. ⁵⁶ Ngajan xi cachja Esteban cuitjin:

—Chutsujun ni. Ngahan ne, xi tivutsején ngahnga vë ne, tsejen xi tixaha sacuaaha tingotjo rë, hacuaaha tsejen xi me xi Quihndi rë Xuta Jain ne, secun me cojo Nina. —Cuatjin cachja Esteban.

⁵⁷ Peru me xi cuacun jan ne, cavetsihin cajindayatë me hacuaaha cavahahñu me tyjavañuju me, tsëhë xi mijí sa cuihndë me xi tichja Esteban. Sehe ngutjen ni ne, ngu tangun ni cavanga me quiji cavehnhun me Esteban xi cafaha me me. ⁵⁸ Sehe cavaxëxin me me ngajan tjeheh nandya, sehe cavitexa me ngujo cha xi cavetsihin cavetaha cha ndyojo Esteban. Cha xi cuacun casahmi jan ne, cavaxë cha tsjian xcun rë cha, caviyuju cha hiscan xi secun ngu cha xi hmí rë Saulo, xi casahmi cha cuidadu. ⁵⁹ Jinguyëjë rë xi tísatë rë Esteban ndyojo xi tivetaha cha xi cuacun jan ne, cafehya me cjuandaja cojo Jesús cuitjin:

—Jesús, ngayun Nai naha, chjuhun-ntsun hasen naha. —Cuatjin cachja me.

⁶⁰ Hya xi camá ne, cavixcuhnchi me, hane sehe jercu cajindaya me, cachja me cjua vihi:

—¡Ngayun Nai naha, ninchatuhun rë xuta xi cuicun vi tsëhë cjuatsehen xi tisahmi me cojo ná! —Cuatjin cajindaya me cachja me.

Xi café cachja me cjua vëhë ne, cahme me.

Catsujyihya tjengui Saulo xuta ladu rë Jesús cojo cjuahngatacun

8 Hane Saulo ne, hacuaaha cachuya rë me xi cuatjin catsiquehen cha xi cuacun jan Esteban.

Ha nixtin hya ni ne, cavetsihin catsujyihya tjengui xuta xi matitjun jan yëjë xuta ladu rë Jesús cojo cjuahngatacun

ngajan Jerusalén. Hya xi camá ne, yějë xuta ladu rë Jesús jan ne, cafë cavitsojo me táha ladu tséhë distritu Judea cojo distritu Samaria. Suvá sa apóstol xi tsajin cavitsojo xu me. ²Hane ngujo cha xi faharcun jain rë Nina ne, cavinchaniji cha nima Esteban, hacuaha jemu cajihnda xu cha tséhë nima. ³Peru Saulo ne, cavetsihin catsujiyihiya tjengui me xuta ladu rë Jesús cojo cjuahngatacun. Quiji cavisehen xu me ndava xuta xi cuacun jan, cajuvějne me cavaxë me sa chjuun sa xihin, quijicani me ndavaya. Véhë xi cuatjin cavitsojo xuta jan.

Sacu machaya rë xuta Samaria cjuandajyihi xi chja tséhë Jesucristu

⁴Quihndë ne, xuta xi cavitsojo tséhë Jerusalén jan ne, catsujiyihiya casua xu me camachaya rë xuta cjuandajyihi xi chja tséhë Jesucristu. ⁵Hane Felipe ne, quiji xu me ngu nandya táha distritu Samaria, hane ngajan casua me camachaya rë xuta ta ha cafehe me xi catsingatju Nina xi cuaxëtje naja. ⁶Hane xi cavisinuju xuta cjua xi cachja Felipe cojo xi cavutsejen me cjuarcun xi casahmi me ne, jemu ndaja cavetaharcu me cjua xi cachja Felipe jan. ⁷Jemu cjín xuta xi hincha xitsehen xahasen rë me ne, camandaja xu me. Hisca cajindaya xitsehen jan hora xi cavetjuxin. Hacuaha jemu cjín xuta xi cahme yojo rë me cojo cjín sa xuta xi rengun me ne, camandaja xu me. ⁸Véhë xi xuta nandya véhë ne, jercu ndaja camá xu rë me.

⁹Peru ngu cha xi hmí rë Simón ne, ha quitahá cha ngajan, tisahmi xu cha cjuasurqui. Hane yějë xuta distritu Samaria ne, jemu quijircun rë me xi casahmi cha. Hacuaha cachja xu suvá cha xi jemu jyë hnga cha cojo cjuatacun rë cha. ¹⁰Yějë xuta Samaria jan, sa quihndi sa changá me ne, jemu ndaja cavetaharcu xu me tséhë cha Simón jan. Hisca cachja xu me tséhë cha cuitjin:

—Cha vihi ne, hacui cha xi tjin rë ngahñu rë Nina, ngahñu xi hmí rë ngahñu jyë. —Cuatjin cachja xuta jan.

¹¹Véhë xi jemu ndaja cavetaharcu xu xuta tséhë cha ta, tséhë xi ha jemu jyë nixtin xi casahmi cha xi quijircun rë xuta tséhë cjuasurqui xi casahmi cha.

¹²Peru hya xi camacjain rë xuta tséhë Felipe, hya xi casua me camachaya rë xuta tséhë cjuandajyihi xi chja xi cuinduva Nina sahmi me gobiernu hacuaha cojo cjuandajyihi xi chja tséhë Jesucristu ne, caxtenda xu me, sa chjuun sa xihin me. ¹³Hacuaha hisca cha Simón jan ne, camacjain xu rë cha tséhë Felipe. Hane xi cavatju caxtenda cha ne, sehe catsihñu cha yojo rë cha cojo Felipe. Hane xi cavutsejen cha yějë cjuarcun yehe xi jima ne, jemu quijircun rë cha.

¹⁴Hya xi camachaya rë apóstol xi siu ngajan Jerusalén xi xuta Samaria ne, camacjain xu rë me cjua rë Nina ne, catsingatju me Pedru cojo Juan quijitjengui rë xuta jan. ¹⁵Hya xi cafehe jo apóstol jan ngajan ne, casahmi xu me oración tséhë xuta jan cojo sa xi sacú rë me Hasen rë Nina. ¹⁶Cuatjin casahmi me ta, tséhë xi hisca xi ngu xuta jan ne, cjëë cuinduva xu Hasen rë Nina cuisehen xahasen rë me. Suvá ni ñihi rë Nai naja Jesús caseyanangui hora xi caxtenda me. ¹⁷Ngajan xi Pedru cojo Juan ne, cavisanetsja me xuta Samaria jan, sehe cavisehen xu Hasen rë Nina cahntsua xahasen rë me.

¹⁸Xi cavëë cha Simón xi casacu rë xuta jan Hasen rë Nina ngatsë rë xi cavisanetsja apóstol jan me ne, meje sua xu cha me tujún, ¹⁹hacuaha cuitjin cachja xu cha cojo rë me:

—Tuhun ná cjuatacun véhë, cojo sa xi tu yo ni xi cuisanentsa ne, sacú rë Hasen rë Nina. —Cuatjin cachja cha.

²⁰Ngajan xi Pedru ne, cuitjin cafayangui xu me:

—¡Tujún riji ne, catjë tangun cojo ri! ta, tsëhë xi caningatehetacuín xi cjuandaja rë Nina ne, cuma chaha rë cojo tujún. ²¹Ngaye ne, satiín camahani ri xa vëhë ta, tsëhë xi hacuín tyjahi xahasen riji xcun Nina. ²²Nindeye cjuatacun riji. Tejñixin cjuatsehen riji vë. Hacuaha chjahye rë Nina cjuandaja rë me, há tsinchataín me ngaye tsëhë cjuatacun xi jiya ngajñi rë cjuatacun riji. ²³Ngahan ne, vacun ná xi ngaye ne, cuma ngaye ngu xuta xi ngundi yaxa ni tsihñu me yojo rë me cojo cjuatsehen. —Cuatjin cafayangui Pedru.

²⁴Ngajan xi cha Simón ne, cuitjin cafehya xu cha:

—Nihñu favor ne, chjahyun rë Nina ngatsë naha cojo sa xi hisca xi ngu cjua xi canújun vë ne, cuatjuun cuma. —Cuatjin cafehya cha.

²⁵Hya xi camá ne, Pedru cojo Juan ne, xi cavatju cachja xu me cojo xuta Samaria jan cjua xi chja tsëhë Nai naja ne, cavuya quiji nga me ngajan Jerusalén. Peru yëjë ni nandya xi vatju me hacutjin cjuí me jingunduju ni ndiya ngajan distritu Samaria ne, ha cuatjin cachja sa me cjuandajyihi jan cojo xuta.

Felipe cojo ngu xutaxa rë nación Etiópia

²⁶Camá nga ngu nixtin xi ngu ángel tsëhë Nina ne, cachja cojo Felipe ngajan Jerusalén cuitjin:

—Tihinjni ndiya Gaza. —Cuatjin cachja ángel.

Ndiya vëhë ne, vatju ngajan ngu xín camahani tsëhë nandya. ²⁷Ngajan xi cavetju xu Felipe, quiji me. Hane ndiya cjuí me ne, cavechútaha xu me ngu xutaxa rë nación Etiópia, ngu xihin xindë xi fahacuenda yëjë cjuanchina rë na xi matitjun tsëhë yëjë xuta Etiópia jan. Xihin jan ne, quiji me ngajan Jerusalén xi cjuaharcun me Nina. ²⁸Hane xi cavuya tife me nangui rë me ne, jiya me carreta

rë me cjue me, táha tivutaya me xujun rë Nina xi catsihindu profeta Isaías. ²⁹Ngajan xi cachja xu Hasen rë Nina cojo Felipe cuitjin:

—Tihinvehe hiscan cjuí carreta xi cuajyihi vë, nihñitanguín cojo. —Cuatjin cachja Hasen rë Nina.

³⁰Ngajan xi cuatjin casahmi Felipe. Xi tu camatiña me hiscan cjuí carreta jan ne, cahndë xu me xi cjua rë xujun xi catsihindu profeta Isaías ne, vëhë tivutaya me xi jiya carreta jan. Sehe cavinenguise Felipe me cuitjin:

—¿Há vijnercun cjua xi tichutayun vë? —Cuatjin cavinenguise Felipe.

³¹Ngajan xi cuitjin cafayangui xu me: —Ngahan ne, vijniircú ta, tsëhë xi tsajin yo cuicuya ná. —Cuatjin cafayangui me.

Sehe ngajan xi cachja xu me cojo Felipe xi cuisehen cueñatangun xu me cojo rë me. ³²Tivutaya me xujun rë Nina hiscan xi chja cuitjin:

Sacuaha ficojo xuta ngu chu tsánga xi tsiquehen me chu ne, cuatjin cjuecojo xuta me;

hacuaha sacuaha jindayaain ngu hndit-sánga hora xi secun chu xcun me xi cuejnu rë chu ne,

cuatjin tsajin camahani mé xi cuichja me hora xi secun me xcun me xi cjua-hataha rë me.

³³Sahmichuva xuta me, hacuaha tsi-choho xuta cjuandaja xi cuma rë me; Tsajin cuichja xuta tsëhë quihndi rë me ta, casacuiín rë me

tsëhë xi cjuahñu xi casacu rë me nguehe ngasunhndë ne, quijicanií rë me.

Vëhë cjua rë Nina xi tivutaya xihin jan.

³⁴Hya xi camá ne, sehe cafinenguise me cojo Felipe cuitjin:

—Xi má nuju ne, ¿yo tsëhë xi cuatjin chja profeta vë? ¿Há tsëhë suvá me ne?, o há tsajin ne, ¿há tsëhë jingu sa xuta? —Cuatjin cafinenguise me.

³⁵Ngajan xi Felipe ne, cavetsihin me cojo cjua rë Nina xi tivutaya xihin jan, hane casua xu me camachaya rë xihin jan yëjë ni cjuandajyihi xi chja tsëhë Jesús. ³⁶Xi cjuí me ndiya ne, cavechú xu me hiscan jiya ngu nandá. Ngajan xi chja xihin jan cojo Felipe cuitjin:

—Chutsujun ni. Nguehe jiya ngu nandá. ¿Há cumaji xtenda ngahan? —Cuatjin cachja xihin jan.

³⁷Ngajan xi cachja xu Felipe cojo rë me cuitjin:

—Sa xi nguñaja xahasen nuju xi macjain nuju ne, cuma. —Cuatjin cachja Felipe.

Hane xihin xi cuajyihi jan ne, cuitjin cafayangui me:

—Macjain ná xi Jesucristu ne, hacui jain me xi Quihndi rë Nina me. —Cuatjin cafayangui me.

³⁸Hya xi camá ne, cachja xu xihin jan cojo cha xi ficojo carreta xi secunhñu cha cojo, hane sehe cavitujne me cojo Felipe, sehe quiji catsijo me xcun nandá, hane caxtenda xu xihin jan. ³⁹Xi cavetju me tsëhë nandá ne, Hasen rë Nina ne, ngutjen quijicojo xu rë Felipe. Hane xihin jan ne, ha quihndë cavuyaain cavëë rë Felipe ta, cavuya cafaha me ndiya rë me cafe me cojo cjuasua. ⁴⁰Hya xi camá ne, cavechú Felipe nandya Azoto. Hane xi cavetju me ngajan ne, jima ngu nandya xi cavatju me ne, ha cuatjin casua me camachaya rë xuta cjuandajyihi xi chja tsëhë Jesucristu hisca xi cafehe me nandya Cesarea.

Hacutjin camá xi cavisehen Saulo ladu rë Jesús

9 Jinguyëjë rë xi cuatjin tijima ne, Saulo ne, hacuaha ni cjuinduju sa me vincharcun me xuta ladu rë Nai naja ta tsiquehen me. Quiji me xcun nahmi xi matitjun ne, ²cafehya me ngu carta cojo sa xi cumacjain rë tsëhë me xutaxa rë yungun ngajan nandya Damasco. Hane

cojo xujun jan sa xi sacú rë me xuta Damasco xi tjengui ndiya rë Jesús, sa chjuun sa xihin ne, tsihñu me cjuecojo me ngajan Jerusalén. ³Hya xi camá ne, cavetju me quiji me. Hane xi tijima tiña me Damasco ne, ha tu ñahñu canduva ngu ndihi tsëhë ngahnga casahmi hasen rë hiscan cjuí me. ⁴Hane xi caticja me ne, cahndë me ngu cjua xi cachja cojo rë me cuitjin:

—Saulo, Saulo, ¿mé má cuatjin nujihiye tjengui ná cojo cjuahngatacun? —Cuatjin cachja.

⁵Ngajan xi Saulo ne, cuitjin cafayangui me:

—¿Yo ngayun, Tatá? —Cuatjin cafayangui me.

Ngajan xi cjua jan ne, cuitjin cafayangui tsëhë me:

—Ngahan xi Jesús ngahan, xi tinujihiye tjengui ná cojo cjuahngatacun. ⁶Tisatjinhngue ne, tsihin nandya Damasco, hane ngajan sacú ri cjua mé xi meje rë xi nihñi. —Cuatjin cachja cjua jan.

⁷Ngajan xi xuta xi cjuicojo Saulo jan ne, caxinchacun lihmi ni me ngajan. Cahndë me cjua jan, peru tsajin yo xi cavëë me. ⁸Hya xi camá ne, cavisatjenhnga Saulo, hane xi cavuxaha me tuxcun me ne, matsijin camahani rë me. Sehe ngajan xi cavaha xuta jan tsja me ne, quijicojo me me hisca nandya Damasco. ⁹Jyan nixtin cavëjña me jan xi matsijin rë me, hacuaha tsajin mé cajiñë me, tsajin mé cahvi me.

¹⁰Hane ngajan Damasco ne, ngajan tacun ngu xuta ladu rë Jesús xi hmí rë Ananías. Ha tu ñahñu cavëë me Nai naja ne, cachja cojo rë me cuitjin:

—¿Há nechin, Ananías? —Cuatjin cachja Nai naja.

Ngajan xi Ananías ne, cuitjin cafayangui me:

—Juun, tejña, Nai naha. —Cuatjin cafayangui me.

¹¹Ngajan xi Nai naja ne, cuitjin cachja me cojo Ananías:

—Tihin ndiya xi hmí rë Taha Quixi. Hane ndava cha Judas ne, ngajan chji-nenguise ngu cha Tarso xi hmí rë Saulo. Cha vëhë ne, tisahmi cha oración rë cha, ¹² hane sacuahä xi ngajñi nijñá rë cha ne, cavëë cha ngu xihin xi hmí rë Ananías xi cavisehen hiscan tacun cha, hane cavisetsja rë cha xi cuma tsejen nga rë cha. —Cuatjin cachja Nai naja.

¹³ Ngajan xi Ananías ne, cuitjin cafayangui me:

—Ngayun Nai naha, jemu cjín xuta chja me hacutjin xi jemu choho casahmi cha xi cuajyihi vë cojo xuta ladu nuju ngajan Jerusalén. ¹⁴ Quihndë ne, hacuahä hisca nahmi xi matitjun catsingatju rë cha nguehe xi cjuaha cha xuta xi fehya nuju me cjuandaja nuju. —Cuatjin cafayangui me.

¹⁵ Peru Nai naja ne, cuitjin cachja nga me cojo rë me:

—Tihin ta, cha xi cuajyihi vë ne, ngahan cavaxejen cha xi cjue sua cha cumachaya rë xutaxín, cojo xuta xi vitexa, cojo xuta tjë rë Israel, cuichja cha yo ngahan. ¹⁶ Ngahan tsingácun rë cha há cjín cjuacjintacun xi meje rë xi cuatju cha cuma ngatsë naha. —Cuatjin cachja Nai naja.

¹⁷ Hya xi camá ne, cavetju Ananías quiji me ndava Judas. Hane xi cavisehen me ndava Judas ne, cavisetsja me Saulo, cuitjin cachja me:

—Ngayun Saulo, Nai naja Jesús, me xi cahyun ndiya nduvun jan ne, catsingatju ná me, cojo sa xi ngayun ne, cuma tsejen nga nuju hacuahä tsë nuju cojo Hasen rë Nina. —Cuatjin cachja me.

¹⁸ Hane ha hora vëhë ni ne, cavixu tsëhë tuxcun Saulo ngu xcusun sacuahä tujún rë ti, hane camatsejen nga rë me. Hya xi camá ne, caxtenda me. ¹⁹ Hane xi cajinë me niñu ne, casacuhñu rë me.

Sua Saulo machaya rë xuta tsëhë Jesús

Hya xi camá ne, cavéjña Saulo ngujo nixtin ngajan Damasco cojo xuta ladu rë Jesús. ²⁰ Quiji me yëjë ni yungun, casua me camachaya rë xuta xi Jesús ne, hacui me xi Quihndi rë Nina, xi Mesías. ²¹ Hane yëjë xuta xi cavisinuju cjua jan ne, jemu quijircun rë me, cuitjin cachja me cojo xicjin me:

—¡Peru me vihi xi jemu casahmi cjuahngatacun cojo xuta xi veyanangui ñihi vëhë ngajan Jerusalén! ¡Hacuaha ha xa vëhë canduva me nguehe, xi cjuaha me xuta xi cuacun vë, cjucojo me xcun nahmi xi matitjun! —Cuatjin cachja xuta jan.

²² Peru Saulo ne, hitsë sa casacuhñu rë me xi tichja me cojo xuta, hisca quijircun rë xuta tjë rë Israel casahmi me ta, tsëhë xi tsejen xi cjuaquixi xi chja me xi Jesús ne, me vëhë jain xi catsingatju Nina.

Vetjutje Saulo tsëhë xuta tjë rë Israel

²³ Hane xi ha jemu cavatju nixtin jan ne, casahmichihin xuta tjë rë Israel cjua xi tsiquehen me Saulo. ²⁴ Peru cjua vëhë ne, casacu camachaya rë Saulo. Xuta xi cuacun jan ne, nixtin nixten jemu casahmi me cuidadu tingotjo hnhua rë nandya jan cojo sa xi cuma tsiquehen me Saulo. ²⁵ Peru xuta ladu rë Saulo ne, nguixun quiji catsitujne me Saulo taha ngaxtun hnhua cojo nahñu jiya me cahntsua ngu nisinya. Cuatjin camá, sehe cavetjutje me.

Hacutjin cavatju Saulo ngajan Jerusalén

²⁶ Hya xi camá ne, xi cafehe Saulo ngajan Jerusalén ne, meje cjue sahmitangun me cojo xuta ladu rë Jesús. Peru yëjë ni xuta xi cuacun jan ne, jemu tsacjun me Saulo. Macjaain rë me xi hacuahä xuta ladu rë Jesús camá me. ²⁷ Ngajan

xi Bernabé ne, quijicojo me Saulo xcun apóstol, hane ngajan casuacuenda me hacutjin xi ngajan ndiya ne, cavëë Saulo Nai naja, hacuaha cachja Nai naja cojo rë me. Hacuaha casuacuenda Bernabé apóstol jan hacutjin tsacjuin Saulo xi cachja me tsëhë Jesús. ²⁸ Cuatjin camá xi cjuí nduva me catsujyihya tangun me ngajan Jerusalén cojo xuta ladu rë Jesús. Hatuxa tsacjuin me chja me tsëhë Jesús. ²⁹ Hacuaha jercu cavisiajmi me cojo xuta xi visiajmi hne griego. Peru xuta xi cuacun jan ne, casahmi me ngu-jyë xi tsiquehen me Saulo. ³⁰ Peru hya xi camachaya rë xuta ladu rë Jesús cjuá vëhë ne, quijicojo me Saulo nandya Cesarea, hane ngajan catsingatju me me quiji me nandya Tarso.

³¹ Cuatjin camá xi yëjë xuta ladu rë Jesús ngajan estadu Judea, cojo Galilea cojo Samaria ne, cafë rë me cjuacjintacun hacuaha camajyë sa cjuandaja rë Nina ngajni rë me. Hane xi cuatjin quijinduju me cafarharcun me Nai naja hacuaha xi cuatjin cavisecoo rë me Hasen rë Nina ne, camacjin sa xuta ladu rë Jesús.

Camandaja Eneas

³² Pedru ne, catsujyihya me jingu ni ladu. Hya xi camá ne, quiji cavusehenya me xuta ladu rë Nina xi siu ngajan Lida. ³³ Hane ngajan cavechútaha me ngu xihin xi hmí rë Eneas, xi ha tjin rë jyin nu xi jiña xi cahme yojo rë. ³⁴ Ngajan xi Pedru ne, cuitjin cachja me cojo xihin jan:

—Ngayun Eneas, Jesucristu tisahmi me xi cumandaja ngayun. Tisatjunhngun, chjayun nijña nuju vë. —Cuatjin cachja Pedru.

Hane ngutjen ni cavisatjenhnga xihin jan. ³⁵ Hane yëjë ni xuta xi siu ngajan Lida cojo xuta xi siu ngajan Sarón cavëë me Eneas hane hacuaha cavisehen me ladu rë Nai naja.

Cavuya Dorcas cjuahñu

³⁶ Ngajan nandya Jope ne, cavéjña ngu chjuun ladu rë Jesús xi hmí rë Tabita. Hane xi hne griego ne, Dorcas hmí rë me. Chjuun vëhë ne, jemu sahmi me cjuandaja, hacuaha jemu visecoo me xuta xi tjin rë cjuachaja. ³⁷ Hya xi camá ne, nixtin xi quitahá Pedru ngajan nandya Lida ne, chjuun vëhë ne, camahmu rë me, hane cahme me. Hane xuta jan ne, catsinduya me nima. Hane xi cafë catsinduya me ne, sehe quiji catsijaña me cahntsua ndihya ngahnga. ³⁸ Vëhë ta nandya Lida ne, tiña tacun tsëhë nandya Jope. Hane hya xi camachaya rë xuta ladu rë Jesús ngajan Jope xi Pedru ne, quitahá me ngajan Lida ne, catsingatju me jo xihin quijijaha rë Pedru, cuitjin cachja me:

—Nihñu cjuandaja ne, cuanguen cojo niji ngajan Jope marcu macjain.

³⁹ Ngajan xi Pedru ne, cavetju me quiji me cojo xihin jan. Xi tu cafehe me ngajan ndava nima ne, quijicojo me me ndihya ngahnga hiscan jiña nima. Hane jemu cjin yachjin cahan ne, quiji caxinchacun me xcun Pedru, hisca chja hisca jihnda me titsingacun me tsjian xi casahmi nima Dorcas hya xi tacun nima cjuahñu. ⁴⁰ Ngajan xi Pedru ne, cachja me cojo yëjë xuta xi cuetju xuta candatsen. Hane xi cafë xuta cavetju me candatsen ne, sehe cavixcuhnchi Pedru, casahmi me oración rë me. Hane xi cavuya cavutsejen me nima ne, sehe cachja me cuitjin:

—Tabita, tisatjunhngun. —Cuatjin cachja me. Hane chjuun jan ne, cavuxaha tuxcun. Hane xi cavëë rë Pedru ne, cavisatjenhnga cavéjña. ⁴¹ Hane xi casua Pedru ngu tsja me chjuun jan ne, catsisatjenhnga me. Xi tu cajindaya me xuta ladu rë Jesús cojo chjuun cahan jan ne, sehe catsingacun me chjuun jan xi tacun quicun nga.

⁴² Hane cjuá vëhë ne, casacu camachaya

rë xuta jinguyë ni Jope. Hane jemu cjín me xi camangu cacun me cojo Nai naja. ⁴³Ngajan xi Pedru ne, jemu cjín nixtin casetaha me ngajan Jope, cavéjña me ndava cha Simón, ngu cha vechjanchuxin.

Jindaya Cornelio Pedru

10 Ngajan nandya Cesarea ne, cavéjña ngu xihin xi hmí rë Cornelio. Capitán má me tsëhë sindadu tsëhë nangui Italia. ²Me vëhë ne, jemu ndaja faharcun me Nina cojo yëjë xuta xi siu ndava me, hacuaha jemu sua me cjuandaja cojo xuta tjë rë Israel, hacuaha yëjë ni hora fehya rë me Nina cjuandaja rë me. ³Ngu nixtin jan sacuaha chuva rë fane jyan tsëhë nguinxtin ne, cavëëndaja me xi cafehe ngu ángel rë Nina cachja cojo rë me cuitjin:

—Cornelio. —Cuatjin cachja.

⁴Hane xi cavutsejenndaja sa me ángel jan ne, jemu catsacjun me camá, sehe cachja me cuitjin:

—¿Mé jan, Tatá? —Cuatjin cachja me.

Ngajan xi ángel jan ne, cuitjin cafayangui:

—Ngatsë rë oración riji cojo ngatsë rë cjuandaja xi jemu tehe ne, Nina ne, hacuaha tsinguitsjen me ngaye. ⁵Quihndë ne, ningatji ngujo xihin ngajan Jope, chjindaye rë cha Simón, cha xi hacuaha hmí rë Pedru. ⁶Cha Simón vëhë ne, ngajan tacun cha ndava ngu cha vechjanchuxin, xi hacuaha hmí rë Simón, cha xi tacun ndava tiña ndachacun. —Cuatjin cafayangui ángel jan.

⁷Hane xi cavatju cafe ángel xi cachja cojo rë me jan ne, sehe cajindaya me jo mosu hndixahan rë me cojo ngu sindadu xi sahmixa ndava me hacuaha faharcun rë Nina. ⁸Hane xi cafë casuacuenda me yëjë ni cjuacjintacun rë me ne, sehe catsingatju me cjue ngajan Jope.

⁹Hane xi camá nchujun xi ha jima tiña cha xi cuacun jan nandya Jope ne, sacuaha chuva rë nchisen ne, sehe camiji Pedru ngajan xcun ndihya xi sahmi me oración. ¹⁰Hya xi camá ne, camavojo rë me, meje sinë me hitsë tu mé ni xi sinë me. Hane jinguyëjë rë xi tisehenchjine xi sinë me ne, sacuaha xi canduva cachja ngu chini cojo rë me. ¹¹Tivutsejen me xi ngahnga ne, catuxaha, hane nduvajne sacuaha ngu tsjian jyë, quichahahñu rë catsiñuju yuju rë xi nduvajne nangui. ¹²Cahntsua tsjian jan ne, ngajan hinchayëjë xcusun chu xi tsuyihiya nangui cojo chu xi vitjen ngahnga xi tsavi xi sinë xuta nangui Israel. ¹³Hya xi camá ne, Pedru ne, cahndë me ngu cjua xi cachja cojo rë me cuitjin:

—Pedru, tsatjinhngue. Niquihin ngu chu ne, sehe xini chu. —Cuatjin cachja cjua jan.

¹⁴Hane Pedru ne, cuitjin cachja me:

—Cumaji, Tatá, ta ngahan ne, cjëë camahani sínë ngu xcusun xi tsavi vë. —Cuatjin cachja me.

¹⁵Peru xi ma jo ndiya ne, cuitjin cachja nga cjua jan cojo rë me:

—Xi ha Nina cachja me xi hacuiin tsavi ne, xi canujiin ngaye xi tsavi. —Cuatjin cachja cjua jan.

¹⁶Jyan ndiya camá xcusun vëhë. Hya xi camá ne, ngutjen ni cavuya quiji nga tsjian jan ngahnga. ¹⁷Hane jinguyëjë rë xi titsingataha cacun Pedru mé vjne xcusun xi cavëë me jan ne, tivinenguise cha xi catsingatju Cornelio jan jani xi ndava Simón. Hane xi cafehe cha jan ne, caxinchacun ni cha tingotjo, ¹⁸sehe cafinenguise cha há ngajan tacun Simón xi hacuaha hmí rë Pedru. ¹⁹Hane jinguyëjë rë xi titsingataha cacun Pedru tsëhë xcusun xi cavëë me jan ne, cuitjin cachja Hasen rë Nina cojo rë me:

—Chutsijin ni. Hinchacun jo jyan cha xi tivanguise ri. ²⁰Tihinjni ne, tihin cojo cha. Xicamacjiin tacuin ta cha xi cuacun

vê ne, ngahan catsingátju cha. —Cuatjin cachja Hasen rê Nina. ²¹Hane xi quiji-jne Pedru hiscan hinchacun cha xi cuacun jan ne, cuitjin cachja me:

—Ngahan xi vinchunsun ná. ¿Mé xa canduvun? —Cuatjin cachja Pedru.

²²Ngajan xi cha xi cuacun jan ne, cuitjin cachja cha:

—Ngu capitán xi hmí Cornelio catsingátju niji me xi canduvin nguehe. Me vêhê ne, ngu xihin ndaja me, hacuaha jemu faharcun me Nina. Yêjê ni xuta tjê rê Israel ne, ndaja chja me tsêhê Cornelio. Ngu ángel rê Nina cachja cojo rê me xi squindaya me ngayun xi cuangun ndava me cojo sa xi cuisinuju me cjua xi cuinújun cojo rê me. —Cuatjin cachja cha xi cuacun jan.

²³Hya xi camá ne, cachja me cojo cha xi cuisehen cha cahntsua ndihya, hacuaha casua me cahndé xi cuiyuju cha ngajan. Hane xi camá nchujun jan ne, cavetju me quiji me cojo cha, hacuaha cojo sa ngujo xuta ladu rê Jesús xi siu ngajan Jope quiji me cojo rê me.

²⁴Hane xi camá nchujun nga jan ne, cafehe me nandya Cesarea. Cornelio ne, ha casahmitangun me xuta rê me cojo amigu ndaja rê me, siuya me Pedru. ²⁵Hane xi ha cuisehen Pedru jan ne, cavechútaha Cornelio me. Cornelio ne, quiji cafañatsacjan me xcun Pedru xi cafaharcun me. ²⁶Peru Pedru ne, catsisatjenhnga me Cornelio, hacuaha cachja me cojo cuitjin:

—Tisatjunhngun ta ngahan ne, hacuaha ngu xuta ni ngahan. —Cuatjin cachja me.

²⁷Hane taha visiajmi me cojo Cornelio ne, cavisehen me ndihya, ngajan cavêê me xi jemu cjin xuta tjín tangun me jan. ²⁸Sehe ngajan xi cachja Pedru cojo rê xuta jan cuitjin:

—Ngayun ne, ha ndaja hyun xi ngu xuta tjê rê Israel ne, sacuiin cahndé xi tsihñu me yojo rê me cojo xutaxín, hacuaha

sacuiin cahndé xi cuisehen me ndava. Peru ngahan ne, casua Nina camachaya ná xi mijí rê xi cuichjá xi tsavi cojo ngu xcusun xuta. ²⁹Vêhê xi xi tu quiji chjahá ná ne, ngutjen canduvá ni, hisca ngu cjua cachjaan. Quihndê ne, meje ná cumachaya ná mé nihñu ná xi cachjindayun ná. —Cuatjin cachja Pedru.

³⁰Ngajan xi Cornelio ne, cuitjin cachja me:

—Cuyatje fane jyan, sacuaha hora vihi ne, tisahme oración naha nguehe ndya naha. Hane ha tu ñahñu cahvê ngu xihin, secun xcun, yaja ngu tsjian xi jemu tu seti camahani, ³¹hane cuitjin cachja cojo ná: “Cornelio, Nina ne, cahndê me oración riji, hacuaha ngatsê rê cjuandaja xi jemu tehe ne, Nina ne, hacuaha tsinguitsjen me ngaye. ³²Quihndê ne, ningatji cjua ngajan Jope, hane chjindaye rê cha Simón, cha xi hacuaha hmí rê Pedru. Cha vêhê ne, tacun cha ndava cha Simón, ngu cha vechjanchuxin, xi tacun cha tiña ndachacun.” Cuatjin cachja xihin jan cojo ná. ³³Vêhê xi marcu macjain catsingátju cjua nuju, hane jemu ndatjin canihñu xi canduvun. Vêhê xi quihndê ne, ha tjín tangun ngayin ngayijin ni nguehe xcun Nina xi cuisiniji yêjê cjua xi casua nuju Nina xi cuinújun cojo niji. —Cuatjin cachja Cornelio.

Cjuandajyihí xi cachja Pedru ndava Cornelio

³⁴Ngajan xi Pedru ne, cuitjin cachja me:

—Ngahan vutsején ne, Nina ne, hatuxa quixi jain me cojo cjuatacun rê me xi tsichuva me yêjê ni xuta cojo cjuatacun rê ta ³⁵yêjê ni nación ne, tu jarê ni xuta xi faharcun me Nina hacuaha sahmi me cjuandaja ne, jemu chuya rê Nina tsêhê me. ³⁶Nina ne, catsingátju me cjuandajyihí rê me tsijin, ngayin xuta tjê rê Israel; casua me

camachaya niji xi ngatsë rë Jesucristu ne, sacú niji cjuandaja cjuajeya. Me vëhë xi Nai rë yëjë ni xuta. ³⁷Ngayun ne, ha machaya nuju tsëhë xcusun xi camá jingujyë ni nación Judea. Cavetsihin hisca distritu Galilea, hya xi cavatju cachja nima Juan xi meje rë xi xtenda xuta. ³⁸Hacuaha ha hyun xi Jesús, xuta Nasaret ne, Nina ne, catsinguitsë rë me cojo Hasen rë me hacuaha cojo ngahñu rë me. Jesús vë ne, catsujyihya casahmi me cjuandaja hacuaha casahmi me xi camandaja yëjë xuta xi jemu tisuaxti Satanás. Cuatjin casahmi me ta, tsëhë xi Nina ne, hacuaha tacun cojo rë me. ³⁹Ngayin tihín machaya rë xuta tsëhë yëjë xcusun xi cahyin xi casahmi me ngajan Jerusalén, cojo jingujyë ni nación Judea. Xi cavetaha xuta tjë rë Israel jan me xcun ngu cru ne, catsiquehen xuta jan me. ⁴⁰Me vëhë ne, Nina catsicuya rë me cjuahñu xi ma jyan nixtin, hacuaha casua Nina cahndë xi cavuya camatsejen nga me. ⁴¹Peru hacuiin ngajñi rë yëjë xuta camatsejen me ta suvá ni ngajñi rë me xi Nina cavaxijin rë cojo tjun sa, cuma cuinújan ne, ngajñi niji ngayin, xi cachini cahyin tangun cojo rë me hya xi cavatju cavuya me cjuahñu. ⁴²Hacuaha me vëhë cavitexa niji me xi tihín cumachaya rë xuta xi me vëhë xi casuaxa Nina me xi tsichuva me xuta cojo cjuatacun rë, sa siu quicun me o sa cahme me. ⁴³Yëjë ni profeta ne, cachja me ta yëjë ni xuta xi cumangu cacun cojo Jesús ne, sacú rë me cjuaninchataha tsëhë jyë rë me, xi cuatjin mangucacun me. —Cuatjin cachja Pedru.

Casacu rë xutaxín Hasen rë Nina

⁴⁴Hora xi tichja cuaha Pedru cjuja vëhë ne, canduva Hasen rë Nina cavisehen xahasen rë yëjë xuta xi tivisiñuju cjuja xi tichja Pedru jan. ⁴⁵Hane xuta

ladu rë Jesús xi tjë rë Israel xi cojo me canduva me cojo Pedru ne, jemu quijircun rë me xi cojo xutaxín casua Nina Hasen rë me xi cuma rë me. ⁴⁶Cuatjin quijircun rë me ta, tsëhë xi cahndë me xi xutaxín jan ne, tichja me ngujo hne xi hisca hvíin xutaxín vë xi tisahmi jyë tisahmi hnga me Nina. ⁴⁷Ngajan xi Pedru ne, cuitjin cachja me:

—Cumaji nichoon ngayaan nandá xi xtenda xuta, ta me xi cuicun vi ne, hacuaha casacu rë Hasen rë Nina sacuatjin casacu naja ngayaan. —Cuatjin cachja Pedru.

⁴⁸Sehe cavitexa me xi caxtenda xuta xi cuacun vë xi cavisehen me ladu rë Jesucristu. Ngajan xi xuta jan ne, cafehya sa rë me Pedru xi cuejña sa me ngujo nixtin cojo rë me.

Sua Pedru machaya rë xuta rë yungun Jerusalén hacutjin camá ndava Cornelio

11 Quihndë ne, apóstol cojo xuta ladu rë Jesús xi siu jingujyë ni Judea ne, camachaya rë me cjuja xi cojo xutaxín cakahatsja me cjuja rë Nina. ²Hane hya xi cavuya quiji Pedru ngajan Jerusalén ne, xuta ladu rë Jesús xi tjë rë Israel ne, cacjan me cojo, ³cuitjin cachja me:

—¿Mé má cuatjin catsangun ndava xuta xi hacuiin tjë rë Israel hacuaha hisca cachinu niñu cojo rë me? —Cuatjin cachja me.

⁴Ngajan xi Pedru ne, cavetsihin casuacuenda chichihin me cuitjin:

⁵—Ngahan ne, tisahme oración naha hya xi tejñataha Jope. Hane sacuaha xi cachja ni chini cojo ná xi cahvë ngu xcusun sacuaha ngu tsjian jyë, quichahañu rë catsiñuju yuju rë xi nduvajne nangui, camatiña tsahan. ⁶Hane xi cavutsejénnadaja cahntsua ne, cahvë chu xi tsujyihya nangui, chu xi cjaain rë cojo chu xi cjan rë, cojo chu xi vitjen ngahnga

hinja chu cahntsua. ⁷ Hacuaha cahndë ngu cjuja xi cachja cojo ná cuitjin: “Pedru, tisetjinhngue. Niquihin ngu chu ne, sehe xini chu.” Cuatjin cachja cjuja jan. ⁸ Ngajan xi ngahan ne, cuitjin cachjá: “Cumaji, Tatá, ta ngahan ne, cjëë camahani cuíncha ntsuva ngu xcusun xi tsavi vë.” ⁹ Ngajan xi cjuja xi nduva ngahnga jan ne, cachja nga cojo ná ma jo ndiya cuitjin: “Xi ha Nina cachja me xi hacuiin tsavi ne, xi canujiin ngaye xi tsavi.” Cuatjin cachja cjuja jan cojo ná. ¹⁰ Jyan ndiya camá xcusun vëhë. Hya xi camá ne, sehe cavuya cachjuvë nga rë tsjian jan, quiji yëjë hisca ngahnga. ¹¹ Hya xi camá ne, ha tu ñahñu cafehe jyan xihin ndihya hiscan xi tejña. Hisca nandya Cesarea casatëxa rë xihin jan xi canduvat-jengui ná. ¹² Hane Hasen rë Nina cachja cojo ná xi cumacjiin cákun xi cjué cojo xihin xi cuacun jan. Hya xi camá ne, cëjë cojo rë, hacuaha cavisecoo ná jyun xuta ladu naja xi cuicun vi xi catsanguin. Hane xi cafihin jan ne, cavisihin ndava Cornelio. ¹³ Hane me vëhë ne, casuacuenda niji me hacutjin xi cavëë me ngu ángel cahntsua ndava me, cuitjin cachja cojo rë me: “Ningatji cjuja ngajan Jope, chjindaye rë cha Simón, cha xi hacuaha hmí rë Pedru. ¹⁴ Hane cha vëhë cuichja cha cojo ri ngujo cjuja hacutjin cuma xi cuetjitje ngaye cojo yëjë ni xuta xi siu ndya riji.” Cuatjin cachja ángel jan. ¹⁵ Hane xi cavetsehen cachjá cjuja rë Nina cojo rë me ne, cavisehen Hasen rë Nina cahntsua xahasen rë me sacuatjin cavisehen cahntsua xahasen naja ntsacu cavetsihin, ngayaan xuta tjë rë Israel. ¹⁶ Ngajan xi ngahan ne, catsinguít-sjen cjuja rë Nai naja xi cachja me cuitjin: “Juan ne, cojo nandá cavitenda me, peru ngayun ne, cojo Hasen rë Nina xtenda ngayun.” Cuatjin cachja me. ¹⁷ Vëhë xi hya xi suvá Nina casua rë me cjuandaja xicjin xi casua naja me ngayaan hya xi camangu tacuun cojo Nai naja

Jesucristu ne, hatuxa camaji cavátëcja xcusun xi Nina casahmi me. —Cuatjin casuacuenda Pedru.

¹⁸ Xi cahndë me xi cuacun jan xi cuatjin cachja Pedru ne, cajnehnchan cjuatacun rë me, sehe cavetsihin casahmi jyë casahmi hnga me Nina, cuitjin cachja me:

—Xi matsejen ne, cojo xutaxín casua Nina cahndë xi tsindeya me cjuatacun rë me cuisehen me ndiya rë Nina cojo sa xi sacú rë me cjuahñu xatsë.

Xuta rë yungun Antioquía

¹⁹ Quihndë ne, xuta ladu rë Jesús xi cavitsojo me ngatsë rë cjuañihi xi camá hya xi cahme Esteban ne, cavechú me hiscan nangui xi hmí rë Fenicia. Ngujo nga me cavechú me nandya Chipre, ngu cahndë xi vetjucaa tsëhë ndachacun. Hane me xi yahnga ne, cavechú me nandya Antioquía xi cavanga me. Hane casuaain me camachaya rë xutaxín cjuandajyihi xi chja tsëhë Jesucristu ta suvá ni xuta tjë rë Israel casua me camachaya rë. ²⁰ Peru tjin yahnga xuta ladu rë Jesús xi canduva me tsëhë Chipre cojo Cirene. Xi cafehe me nandya Antioquía ne, cachja me cojo xuta xi chja hne Griego, casua me camachaya rë xuta cjuandajyihi xi chja tsëhë Nai naja Jesús. ²¹ Hane Nina ne, jemu casua rë me ngahñu. Hacuaha jemu cjín xuta camacjain rë me, hane cavisehen me ladu rë Nai naja.

²² Hane xuta ladu rë Jesús xi siu ngajan Jerusalén ne, hya xi camachaya rë me xcusun vëhë ne, catsingatju me Bernabé xi cjuetjengui me xuta ngajan Antioquía. ²³ Hane xi cafehe me jan ne, xi cavëë me hacutjin tisahmi Nina cjuandaja cojo xuta xi cuacun vë ne, jemu ndaja camá rë me. Sehe ngajan xi cachja me cojo yëjë xuta jan xi catjinduju me cojo yëjë xahasen rë me ndiya rë Nai naja. ²⁴ Cuatjin casahmi me ta, tsëhë xi

me vëhë ne, ngu xihin ndaja me, ña quitsë rë me Hasen rë Nina, hacuaha jercu manguacacun me cojo Nina. Nixtin hya ne, jemu camacjín sa xuta ladu rë Nai naja.

²⁵ Hya xi camá ne, cavetju Bernabé quiji me ngajan Tarso, cavanguise me Saulo. ²⁶ Hane xi casacu rë me Saulo ne, cavuya quijicojo me me ngajan Antioquía. Caviyuju catsijo me ngajan ngu nu jingu, casahmitangun me cojo xuta rë yungun jan. Jemu cjín xuta cavicuya rë me cjua rë Nina. Hacuaha ngajan Antioquía xi tjuntjun cachja xuta tsëhë yějë xuta ladu rë Jesús xi xuta rë Cristu xi meje cuichja cjua vë cristiano.

²⁷ Nixtin hya ne, cafehe ngujo profeta ngajan Antioquía xi canduva me tsëhë Jerusalén. ²⁸ Ngajan xi cavetjujñi ngu me ngajñi rë profeta xi cuacun vë, ngu me xi hmí rë Agabo, hane cachja me cjua xi Hasen rë Nina casua rë me xi ha tu hitsë sa ne, cuinduva ngu jindya jyë jingujyë ni ngasunhndë. Jindya vë ne, cavetjucaa jain hya xi Claudio matitjun camahani me. ²⁹ Ngajan xi xuta ladu rë Jesús ngajan Antioquía ne, caviyuju me cjuatacun rë me jima ngu me xi cuisecoo me ha tucutjin xi chutaha me hane tsingatju me tsëhë xuta ladu rë Jesús xi siu ngajan Judea. ³⁰ Hya xi camá ne, cuatjin casahmi me. Catsingatju me cjuandaja vëhë, cavaha Bernabé cojo Saulo xi sua me tsja xuta changá xi siu ngajan Judea.

Cjuañihi xi cavatju xuta rë yungun

12 Hane ngajñi rë nixtin xi cuacun vë ne, Herodes, me xi matitjun ne, cavitexa me cachjahá rë ngujo xuta rë yungun xi sahmi me cojo cjuahngatacun. ² Hacuaha cavitexa me xi cueya Jacobo, hntsë Juan, cojo quicha. ³ Xi vutsejen me xi cachuya rë xuta tjë rë Israel xcusun vëhë ne, hacuaha cavitexa me cachjahá rë Pedru, nixtin rë suhi rë pan xi tsajin san rë. ⁴ Sehe caveya me

ndavaya, hacuaha cavitexa me tyjuhun-
ngu sindadu xi cjue sahmi rë me cuidadu
nixtin nixten chuva ñuju chuva ñuju sin-
dadu jima ngu ndiya. Xi catsingataha ca-
cun me ne, xi cuatju suhi tsëhë Pascua
ne, sehe cuaxë me xcun yějë ni xuta.
⁵ Cuatjin camá xi Pedru ne, casetjo me
ndavaya. Peru xuta rë yungun ne, cafe-
hya me cojo nguñaja xahasen rë me
cjuandaja rë Nina xi cuma rë Pedru.

Cavaxëtje Nina Pedru tsëhë ndavaya

⁶ Ngu nguixun chaja sa xi cuitexa
Herodes xi cuetju Pedru xi cumacuenda
jyë rë me ne, Pedru ne, jiñafë me, tjinh-
ñu me cojo jo cadena ngajñi rë jo sin-
dadu. Hacuaha siu sa jo sindadu tin-
gotjo ndavaya xi sahmi cuidadu. ⁷ Hya
xi camá ne, cafehe ngu ángel tsëhë
Nina, hane jercu camahasen cahntsua
ndavaya. Hane xi quiji cavëhëtsja ángel
jan ndanisin rë Pedru ne, catsisatjenhnga
rë me, sehe cachja cojo rë me cuitjin:

—Tisatjinhngue sanii. —Cuatjin
cachja.

Hane hora vëhë ne, cavixuhndu ca-
dena xi tjinhñu tsja me. ⁸ Sehe ngajan xi
ángel ne, cachja nga cojo rë me cuitjin:

—Cheje tsjian riji, hacuaha tinche
chuxinxhtë riji. —Cuatjin cachja.

Hane Pedru ne, cuatjin casahmi me.
Cachja nga ángel cuitjin:

—Cheje tsjanga riji, hane ndove ha-
cutjin cjué. —Cuatjin cachja ángel jan.

⁹ Hane xi cavetju me ne, quiji me
hacutjin quiji ángel. Peru hvín me xi
xcusun xi tisahmi ángel jan ne, cjuaquixi
ta xi má rë me ne, chini tichja cojo rë me.

¹⁰ Hane xi cavatjutaha me ngu cavatju-
taha me jo sindadu ne, sehe cafehe me
tingotjo quicha xi cuëtjuun xi cuanguen
ngajñi nandya. Tingotjo vëhë ne, catux-
aha suvá. Xi cavetju me ne, sehe quiji
me. Hane xi cafehe me hiscan xi faha rë
ngu nga ndiya ne, ha tu ñahñu quijixin
ángel tsëhë me.

¹¹Sehe ngajan xi cajnercu Pedru xi cjuaquixi xcusun xi camá, hane cachja me cuitjin ngajñi rë suvá me:

—Quihndë ne, hvë jain xi Nina ne, catsingatju me ángel rë me, hane cavaxëtje ná me tsëhë Herodes, hacuaha cavaxëtje ná me tsëhë yëjë xcusun xi meje sahmi xuta tjë rë Israel cojo ná. —Cuatjin cachja me ngajñi rë suvá me.

¹²Hane xi tu catsingataha cacun me cuatjin ne, sehe quiji me ndava María naa rë Juan, me xi hacuaha hmí rë Marcos. Ngajan ne, jercu tjin tangun xuta xi tisahmi me oración. ¹³Hane xi cafehe me jan ne, catsijane me tingotjo. Hane sehe canduvavaha ngu na hndixahan xi hmí rë Rode xi cjuinenguise na yo xi titsijane. ¹⁴Hane xi camachaya rë na xi xta rë Pedru xi tichja ne, tsëhë xi jercu ndaja camá rë na ne, hisca cavuxaain na tingotjo ta marcu macjain cavuya na quiji cachja na cojo me xi yahnga jan xi Pedru ne, secun me tingotjo taha candat-sen. ¹⁵Peru me xi cuacun jan ne, cuitjin cachja me cojo rë na:

—Sca ri ngaye. —Cuatjin cachja me.

Peru na vëhë ne, cachja sa na xi hatuxa cjuaquixi xi hacui me. Hane me xi cuacun vë ne, cachja me cuitjin:

—¿Hacuiin ángel xi sahmi rë me cuidadu? —Cuatjin cachja me.

¹⁶Hane Pedru ne, quijinduju sa me titsijane me tingotjo jan. Hane xi cavuxaha me tingotjo jan ne, cavëë me xi hacui jain Pedru, hane jemu quijircun rë me. ¹⁷Ngajan xi Pedru ne, casahmitsja me cojo rë me xi cuiyujuyuu me, sehe cavetsihin casua cuenda me hacutjin camá xi Nai naja ne, cavaxë rë me ndavaya. Sehe ngajan xi cachja me cuitjin:

—Tuhun cumachaya rë Jacobo cojo sa xuta ladu rë Jesús xi yahnga tsëhë xcusun xi camá vi. —Cuatjin cachja me.

Hya xi camá ne, sehe cavetju me quiji me jingu sa cahndé.

¹⁸Hane xi casahasen jan ne, ngu cjuandya jyë casahmi sindadu jan, tsëhë xi hvíin cha mé hacutjin camá rë Pedru.

¹⁹Hane Herodes ne, cavitexa me quiji cavinchise rë Pedru, peru casacuiin me. Hane vëhë xi cafahataha rë me sindadu xi casahmi cuidadu jan, sehe cavitexa me cachjaha rë sehe cueya cha. Hya xi camá ne, cavetju Herodes cavuya quiji me ngajan Cesarea, cavejña me.

Cjuaveya rë Herodes

²⁰Quihndë ne, Herodes me xi matitjun ne, jemu cjan rë me cojo xuta nandya Tiro cojo nandya Sidón. Ngajan xi xuta xi cuacun vë ne, camatangun me, sehe quijitjengui me Herodes. Xi tjun tjun ne, camá casahmi me xi cavinga rë Blasto me. Blasto ne, me vëhë xi fahacuenda me ndava Herodes. Hya xi camá ne, xuta xi cuacun jan ne, cafehya rë me Herodes xi cuijnetaha si ngajñi rë me cojo me vëhë. Cuatjin cafehya me xi cuacun vë ta, tsëhë xi nangui rë Herodes ne, ngajan vinduva xichinë tsëhë nandya Tiro cojo Sidón. ²¹Cavechú nixtin xi cavejña Herodes xi cuichja me cojo xuta xi cuacun jan ne, sehe cavaja me tsjian tsëhë xi matitjun me, sehe quiji me cavéjña me cahndé rë me xi cuichja me cojo xuta. ²²Hane xi cajnetaha cachja Herodes ne, ngajan xi xuta ne, cuitjin cajindaya me cachja me:

—¡Cjua vëhë ne, cjua rë ngu nina, hacuiin cjua rë ngu xuta! —Cuatjin cajindaya me cachja me. ²³Ha hora vëhë ni ne, ngu ángel tsëhë Nina ne, casahmi xi cafaha rë Herodes ngu chíhin, tsëhë xi hacuiin casahmi jyë casahmi hnga me Nina. Hya xi camá ne, cajnë rë me chundu, hane cahme me.

²⁴Peru cjua rë Nina ne, quijinduju sa cavitsojo.

²⁵Ngajan xi Bernabé cojo Saulo ne, casahmichihin me cjuandaja rë xuta yuma sehe cavuya me tsëhë Jerusalén.

Hacuaha canduvacojo me Juan, xi hacuaha hmí rë me Marcos.

Casuaxa Nina Bernabé cojo Saulo

13 Quihndë ne, ngajni rë xuta rë yungun xi tacun ngajan Antioquía ne, hinchajni me xi má profeta hacuaha hinchajni me xi vicuya cjuachacun. Cuitjin hmí rë xuta xi cuacun vë: Bernabé, Simeón, me xi cachja xuta tsêhë Nchava Jma, Lucio, ngu xuta Cirene, Manaén, me xi camacha tangun cojo Herodes, me xi matitjun, hacuaha cojo Saulo. ²Hane jinguyëjë rë xi tisahmi me xi cuacun vë xa rë Nina hacuaha tisahmi me xun rë me ne, Hasen rë Nina ne, cuitjin cachja cojo rë me:

—Tuhunxun rë Bernabé cojo Saulo, cojo sa xi sahmi me xa xi ha casuáxa rë me.

³Ngajan xi casahmi me xi cuacun jan xun rë me, hacuaha casahmi me oración rë me ne, sehe cavisanejsja me Bernabé cojo Saulo hane chuva vëhë cafaha me xa rë Nina. Hya xi camá ne, sehe catsin-guijnetaha me cjua cojo xicjin me.

Quiji apóstol ngajan Chipre

⁴Ngajan xi Bernabé cojo Saulo ne, quiji me sacuatjin cachja Hasen rë Nina cojo rë me. Cavetju me quiji me nandya Seleucia. Hane xi cafehe me ngajan ne, cavisen me ngu barcu, sehe quiji me Chipre, ngu rquí nangui xi vetjucaa xcun ndachacun. ⁵Hane xi cafehe me Salamina, ngu nandya tsêhë Chipre ne, casua me camachaya rë xuta cjua rë Nina ngajan yungun rë xuta tjë rë Israel. Hacuaha cavisecoo Juan Marcos me xi quiji me jan.

⁶Hane xi quiji me jinguyë ni ladu vëhë ne, cavechú me hisca nandya Pafos. Hane ngajan cavechútaha me ngu cha surqui xi hmí rë Barjesús. Cha vëhë ne, ngu profeta ndacha cha, hacuaha tjë rë Israel cha. ⁷Hane tangun tsujihiya cha

cojo me xi matitjun xi hmí rë Sergio Paulo, ngu me xi jemu vechú cjuatacun rë. Me vëhë ne, cajindaya me Bernabé cojo Saulo tsêhë xi meje cuihndë me cjua rë Nina. ⁸Peru cha surqui jan ne, xi hacuaha hmí rë Elimas xi hne griego ne, casahmi condra cha me xi cuacun vë, tsêhë xi mijí rë cha xi me xi matitjun jan ne, cumangucacun me cojo Jesucristu. ⁹Peru Saulo, me xi hacuaha hmí rë Pablo ne, catsë rë me cojo Hasen rë Nina. Cavutsejenndaja me cha surqui jan ne, sehe cachja me cojo cha cuitjin:

¹⁰—¡Ngaye xindesu, ngaye cha ndacha, ngaye quihndi rë xitsehen, ngaye condra rë yëjë ni cjuandaja ne! ¿Hatuxa cuihinnduju sa ninguet sin ndiya ndajiyihi rë Nina? ¹¹Quihndë chutsijin ta Nina ne, sahmi ri me castigu. Cuma rcá ngaye, cumatsijin ri ndavá rë tsuhi ngujo nixtin. —Cuatjin cachja me.

Hane ngutjen ni camá rë cha sacuaha xi canduva ngu yuff xi cavetsa rë tuxcun cha, hane cama rcá cha. Hane cjuí nguehe cjuí ngajan cha vanguisetsja cha yo xi cuaha tsja cha. ¹²Ngajan xi me xi matitjun jan ne, xi cavëë me xcusun xi camá ne, camacjain rë me cjuachacun xi chja tsêhë Nina ta, tsêhë xi jemu quijircun rë me tsêhë cjuachacun vëhë.

Quiji apóstol ngajan Antioquía, distritu Pisidia

¹³Hya xi camá ne, xi cavetju Pablo cojo me xi siutaha cojo me ngajan Pafos ne, sehe cavisen me ngu barcu, quiji me nandya Perge, ngajan distritu Panfilia. Hane ngajan cavetjuxin Juan Marcos tsêhë me, hane cavuya nga me Jerusalén. ¹⁴Hane Pablo cojo Bernabé ne, cavetju me tsêhë Perge, hane cafehe me Antioquía, ngajan distritu Pisidia. Hane xi cavechú nixtin xi chjahájenda rë ne, quiji me cavisen me yungun ne, quiji me caviyuju me. ¹⁵Hane xi cavatju

cachutaya rë ngujo cjua xi catsihindu Moisés cojo ngujo cjua xi catsihindu profeta ne, xutaxa rë yungun jan ne, catsingatju me cjua tsêhê Pablo cojo Bernabé, hane cuitjin cachja me:

—Ngayun ne, sa xi tjin mé cjuandajyihi xi meje cuinújun cojo xuta ne, cuma cuinújun. —Cuatjin cachja me.

¹⁶ Hane xi casecun Pablo ne, casahmit-sja me cojo xuta sehe cachja me cuitjin:

—Ngayujun ngarcun ni xuta tjê rë Israel cojo sa ngayujun ni xi hacuaha chjuhunrcun Nina ne, tisiñuju cjua xi cuichjá cojo nuju. ¹⁷ Nina naja ngayaan tjê rë Israel ne, cavaxijin me xutachanga naja, hane tsêhê me vêhê casahmi cjin sa Nina xuta. Sehe tsêhê me casahmi me ngu nación xi hñu vetju cjua rë hya xi caviyujutaha me ngajan nación Egipto. Hane cojo ngahñu xi tjin rë Nina ne, cavaxê me xuta xi cuacun vë tsêhê ngajan. ¹⁸ Hane Nina ne, caca rë me cojo xuta xi cuacun vë, hya xi catsujy-ihya me ngajan ngu xín tsêhê nandya sacuaha yachan nu. ¹⁹ Hane xi cavatju catsinguetsun Nina yatu nación ngajan nangui Canaán ne, sehe casua me xutachanga naja jan xi cuma tsêhê me ²⁰ sacuaha ñuju cientu vasen nu. Hane xi cavatju vêhê ne, sehe cavaxijin me xuta xi camá me juez, hisca nixtin xi cavéjña profeta Samuel. ²¹ Hya xi cavatju vêhê ne, cafehya xutachanga naja jan ngu me xi cumatitjun tsêhê me. Cuatjin camá xi Nina ne, casuaxa me xutachanga naja Saúl, quihndi rë Cis, ngu xihin tjê rë Benjamín, xi cumatitjun me cahntsua yachan nu. ²² Hane xi caphaxin Nina me vêhê xi matitjun me ne, cavejña me xutachanga naja David xi cuma titjun me. Cuitjin cachja Nina tsêhê David: “Ngahan vutsején ne, cha David, quihndi rë cha Isaí ne, cha vêhê ngu cha xi jemu chuya ná tsêhê, ngu cha xi sahmi yêjê hacutjin xi meje ná.” Cuatjin cachja Nina. ²³ Ngu xuta tjê rë

xutachanga naja David, me vêhê ne, xi hacui Jesús, me xi catsingatju Nina xi cuaxêtje naja ngayaan xuta tjê rë Israel, sacuatjin xi ha cachja me. ²⁴ Hane xi chaja sa xi cjuehe Jesús ne, nima Juan ne, cachja me cojo yêjê xuta tjê rë Israel xi meje rë xi tsindeya me cjuatacun rë me, hacuaha xtenda me. ²⁵ Quihndê ne, hya xi ha camatiña nixtin xi cueya nima Juan ne, cuitjin cachja me: “Hacuiin ngahan xi tsingatju Nina, xi nechunyun rë ta ngaxtun ne, nduva ngu me xi hitsê sa vechu cjuatacun rë xi hisca cumajin tsinguissehercu sahme tyjahi chuxinxte rë.” Cuatjin cachja nima Juan.

²⁶ Ngayejen ngarca ni ngayaan xuta tjê rë xutachanga naja Abraham cojo sa ngayujun ni xi hacuaha chjuhuncun Nina ne, ngayaan catsingatju naja Nina cjuandajyihi vihi xi chja hacutjin cuetjuntjeen. ²⁷ Yêjê xuta xi siu ngajan Jerusalén cojo xutaxa rë jan ne, hvíin me xi Jesús ne, hacui me xi catsingatju Nina, hacuaha cajni rcu me cjua rë yêjê ni profeta xi chutaya rë yêjê ni nixtin xi nixtin chjahájenda rë. Vêhê xi hya xi catsicanijijyê xuta xi cuacun vë Jesús ne, casahmi me xi cavetjucaa cjua xi cachja profeta vë. ²⁸ Hane handasa casacuiin rë me jyê xi vechú chuva rë xi cueya Jesús ne, peru cafehya rë me Pilatu xi cuitexa me xi cueya Jesús. ²⁹ Hane xi cajnetaha casahmi me yêjê xcusun sacuatjin camahindu tsêhê Jesús ne, sehe catsitujne me tsêhê cru, sehe caseyaniji cahntsua ngu tsjun. ³⁰ Peru Nina catsicuya rë me cjuahñu. ³¹ Hya xi camá ne, jemu cjin nixtin xi camatsejen me ngajni rë xuta xi cavetju tangun me cojo ngajan Galilea hane hacuaha quiji tangun me cojo ngajan Jerusalén. Quihndê ne, xuta xi cuacun vë ne, tisua me jimachaya rë xuta tsêhê Jesús.

³² Hane ngayin ne, hacuaha titihín jimachaya nuju ta cjuandajyihi xi ha

cachja Nina cojo xutachanga naja ne,
³³ cjuua vëhë Nina casahmi me xi cavetju-
 caa ngajñi naja ngayaan tjë rë xu-
 tachanga naja hya xi catsicuya me Jesús
 cjuahñu. Hacuaha cuitjin camahindu
 xcun Salmo xi ma jo: “Ngaye xi qui-
 hndi naha ngaye; quihndë ngahan suá
 ri cjuahñu.” Cuatjin cachja Nina xcun
 Salmo vëhë. ³⁴ Hacuaha Nina ne, ha
 cachja me xi tsicuya me Jesús cjuahñu,
 hacuaha yojo rë Jesús ne, hacuiin
 cjuehndu, cuitjin cachja me xcun xu-
 jun rë me: “Hatuxa suá ri ximinch-
 cun naha, sacuatjin xi ha cachjá xi
 suá rë David.” Cuatjin cachja Nina.
³⁵ Hacuaha catsihindu sa David xcun
 ngu nga Salmo cuitjin: “Tuun cahndé xi
 cjuehndu yojo rë me, xi hatuxa tjengui
 nuju cojo yëjë xahasen rë me.” Cuatjin
 camahindu. ³⁶ Peru David ne, xcun xi
 ha cavatju casahmi me sacuatjin meje
 rë Nina ne, cahme me, caseyaniji tan-
 gun me cojo nima xutachanga rë me,
 hacuaha cafehndu yojo rë me. ³⁷ Peru
 Jesús, me xi Nina catsicuya rë cjuahñu
 ne, cafehndiin yojo rë me. ³⁸ Vëhë xi
 ngayujun ngarcun ni ne, meje rë xi cui-
 jnercun xi ngatsë rë me vëhë ne, tisacu
 jimachaya nuju xi tjin cjuaninchataha
 tsëhë jyë nuju, ³⁹ hacuaha ngatsë ni rë
 me vëhë ne, yëjë ni xuta xi manguca-
 cun cojo rë me ne, tsicjë Nina yëjë jyë
 rë me ta xcun ley rë Moisés ne, sacuiin
 rë cjuaninchataha. ⁴⁰ Vëhë xi meje rë xi
 cuinechun cuidadu, sá tu cuatjun cuma
 sacuatjin xi catsihindu profeta xcun xu-
 jun rë Nina hatsëë nixtin, cuitjin catsi-
 hindu me:

⁴¹ Chutsujun ni, ngayun xi macjaain nuju
 ne,

catjircun nuju, sehe tjangun ta
 jinguyëjë rë xi nechun ne, sahme ngu
 chircun

xi hisca cumacjaain nuju sa xi yo cuichja
 cojo nuju.

Cuatjin catsihindu profeta. Hacuaha
 cojo cjuua vëhë ne, catsinguijnetaha
 Pablo cachja me.

⁴² Hane hora xi tivetju Pablo cojo
 Bernabé tsëhë yungun jan ne, cachja
 xuta cojo me xi cuetjucaa totje nga ne,
 meje rë me xi cuya cuichja nga Pablo
 tsëhë cjuacjintacun vëhë. ⁴³ Hane hya xi
 cavetju xuta tsëhë yungun ne, jemu cjín
 xuta tjë rë Israel hacuaha jemu cjín xu-
 taxín xi hacuaha faharcun me Nina ne,
 quiji me cojo Pablo cojo Bernabé. Hane
 Pablo cojo Bernabé ne, cachja me cojo
 xuta xi cuacun jan xi catjinduju sa me
 cojo ndiya rë cjuandaja rë Nina.

⁴⁴ Hane xi cavetjucaa nga totje nix-
 tin xi chjahájenda rë ne, ha ña meje
 yëjë ni xuta nandya camatangun me xi
 cuisinuju me cjuua rë Nina. ⁴⁵ Peru hya xi
 cavëë yahnga xuta tjë rë Israel xutacjín
 jan ne, catsë rë xahasen rë me cojo cju-
 achini, hacuaha cachja me condra tsëhë
 cjuua xi cachja Pablo, hisca choho cachja
 me tsëhë me. ⁴⁶ Ngajan xi Pablo cojo
 Bernabé ne, cachja me cojo xuta tjë rë
 Israel jan cuitjin:

—Hatuxa ngayun titjun camameje rë
 xi canújin cojo nuju cjuua rë Nina.
 Peru quihndë ta nitjungun hacuaha xi
 má nuju ne, machjiriin ngayun xi cojo
 ngayun satë nuju cjuahñu xatsë ne,
 cuanguin tihín cumachaya rë xutaxín
 cjuandajyihi vëhë. ⁴⁷ Cuatjin nihñi ta,
 tsëhë xi cuitjin cavitexa niji Nina:

Ngahan tsingátju ri sacuaha ngu ndihi xi
 tehe cjuahasen xi cuma rë xutaxín,
 cojo sa xi ngatsë rë cjuandajyihi
 xi cuinoje ne, cuetjutje xuta
 jinguyë ni, hisca hiscan vijnetaha
 ngasunhndë.

Cuatjin cavitexa niji Nina. —Cuatjin cat-
 sacjuiin Pablo cojo Bernabé, cachja me.

⁴⁸ Hane xi cahndë xutaxín jan cjuua
 vëhë ne, jemu ndaja camá rë me,
 hacuaha casahmi jyë casahmi hnga me
 cjuua rë Nina. Hane yëjë ni xuta xi cavax-

ijin Nina xi sacú rë cjuahñu xatsë ne, camacjain rë me cjuandajiyihi vëhë.

⁴⁹ Hya xi camá ne, jercu cavitsojo cjuandajiyihi xi chja tsëhë Nai naja jingujyë ni ladu vëhë. ⁵⁰ Peru xuta tjë rë Israel jan ne, cavisiajmi me cojo ngujo yachjin nchina tsëhë yungun jan, cojo ngujo xuta xi matitjun tsëhë nandya jan, sehe cavetsihin casua me ngu cjuañihi xi cuma rë Pablo cojo Bernabé, sehe cavaxëxin me tsëhë nangui rë me. ⁵¹ Peru Pablo cojo Bernabé ne, cavitsune me chojo rë ntsacu me, xi sua me machaya rë xuta xi cuacun jan xi vutsejen me me sacuaha xutaxín xi hvíin cjua rë Nina. Sehe cavetju me quiji me nandya Iconio. ⁵² Hane xuta ladu rë Jesús ne, quitsë rë me cjuasua hacuaha quitsë rë me tsëhë Hasen rë Nina.

Quiji apóstol ngajan Iconio

14 Hya xi camá ne, Pablo cojo Bernabé ne, quiji tangun me yungun rë xuta tjë rë Israel ngajan nandya Iconio. Hane xi cachja me cojo xuta ne, jercu cjin camahani xuta tjë rë Israel cojo xutaxín camacjain rë me cjua jan. ² Peru xuta tjë rë Israel xi ha mijí cumacjain rë ne, cachja me cojo xutaxín, catsinguetsun me cjuatacun rë me xi cuacun vë condra tsëhë apóstol xi cuacun jan. ³ Peru jemu jyë nixtin caviyujutaha me hacuaha hacuiin catsacjun me xi cachja me tsëhë Nai naja. Hane Nai naja ne, casua me cahndé xi casahmi apóstol cjuarcun, cojo sa xi cumatsejen xi quixi cjua xi chja me tsëhë cjuandaja rë Nai naja. ⁴ Peru xuta nandya jan ne, hacuiin tangun camá cjuatacun rë me ta ngujo me ne, cachuya rë me tsëhë xuta tjë rë Israel, peru yahnga nga me ne, cachuya rë me tsëhë apóstol jan. ⁵ Hya xi camá ne, xutaxín cojo xuta tjë rë Israel cojo xutaxa rë jan ne, caviyujucun me xi choho sahmi me cojo apóstol xi cuacun jan hacuaha tsiquehen me

cojo ndyojo. ⁶ Peru apóstol jan ne, camachaya rë me cjua jan, hane cavanga me quiji me ngajan nandya Listra cojo nandya Derbe, ngajan distritu Licaonia, cojo ngujo sa cahndé tahndee jan. ⁷ Hane yëjë cahndé hacutjin catsujiyihi me ne, cachja me cojo xuta cjuandajiyihi xi chja tsëhë Jesucristu.

Meje tsiquehen xuta Pablo ngajan Listra

⁸ Cavéjña ngu cha ngajan nandya Listra, ngu cha xi tsajin rë ngahñu ntsacu, tsëhë xi tsehen hisca hya xi catsin cha. Maji camahani fi cha. ⁹ Tacun cha tivisiñuju cha cjua xi tichja Pablo. Ngajan xi xi cavutsejenndaja Pablo cha ne, cavacun rë me xi mangucacun cha xi hatuxa cumandaja cha, ¹⁰ sehe ngajan xi cachja me cojo cha cuitjin:

—Tisechunquixun. —Cuatjin cachja me.

Hya xi camá ne, hisca cacaahnga cha xi casecun cha, sehe cavetsihin quiji ntsacu cha.

¹¹ Ngajan xi xutacjín jan ne, xi cavëë me xcusun xi casahmi Pablo ne, cavetsihin cajindaya me cachja me hne rë me, xi hmí rë hne Licaonia, cuitjin cachja me:

—¡Me xi cuicun vi ne, nina me vi, xi canduva me tsëhë ngahnga, canduvatjengui naja me, tu xi tsejen me sacuaha xuta! —Cuatjin cachja me.

¹² Bernabé ne, xi má rë xuta jan ne, nina Zeus me, hane Pablo ne, nina Hermes me, tsëhë xi me vëhë xi hitsë sa jercu cachja me. ¹³ Ngajan xi nahmi tsëhë nina Zeus jan, me xi tacun yungun rë tjehehen nandya ni ne, canduvacojo me chu ndyaja hacuaha canduvacojo me naxu ngajan hiscan tingotjo tsëhë nandya. Hane nahmi cojo xutacjín jan ne, meje tsiquehen me ndyaja jan hacuaha sua me naxu jan xi cjuaharcun me Pablo cojo Bernabé. ¹⁴ Hya xi apóstol Bernabé cojo Pablo camachaya rë me hacutjin ti-

sahmi xuta jan ne, cajavë me tsjian rë me cavicheya me, ta cuatjin xcusun rë xuta tjë rë Israel hya xi cjan rë me. Sehe cavanga me quiji me ngajni rë xutacjin jan, cajindaya me cachja me cuitjin:

¹⁵—Ngayujun ni ne, ¿mé má cuitjin tiniñu? Ngayin ne, hacuaha xuta ni ngayin sacuatjin nuju ngayun. Canújin cojo nuju ngu cjuandajyihi xi quichihin, cojo sa xi cuejñuxun xcusun xi machjiriin vi, hacuaha cojo sa xi cuisuhun ndiya rë ngu Nina xi quicun, me xi casahmi ngahnga cojo nangui cojo ndachacun, cojo yëjë ni xi tjin jan.

¹⁶Nina ne, casua me cahndé xi, nixtin xi cavatju ne, xuta tsëhë yëjë ni nación ne, casahmi me hacutjin xi ha xcusun rë suvá me. ¹⁷Peru tsëhë xi casahmi me cjuandaja ne, casua me camachaya nuju xi me vëhë xi Nina me; catsingatju me tsi tsëhë ngahnga xi cuma nuju, hacuaha casua nuju me nixtin rë tutjë nuju, casua me xi chinu, hacuaha catsinguitsë me xahasen nuju cjuasua. —Cuatjin cajindaya me cachja me.

¹⁸Handasa cachja me cuatjin ne, peru ha tu hitsë sa ne, camaji cavatëcja me xi tsiquehen xutacjin jan chu xi sua me cjuatjo cojo apóstol jan sacuaha nina rë me.

¹⁹Hya xi camá ne, canduva ngujo xuta tjë rë Israel tsëhë nandya Antioquía cojo nandya Iconio. Hane catsinguetsun me cjuatacun rë xutacjin jan, sehe cavetaha me ndyojo Pablo hane cajavëjne me cavaxë me ngajan xín tsëhë nandya, tsëhë xi xi má rë me ne, ha cahme Pablo. ²⁰Peru xi tu catsëxtin xuta ladu rë Jesús jan hiscan jiña Pablo ne, cavisatjenhnga me quiji me cavisehen nga me nandya. Hane xi camá nchujun jan ne, cavetju me quiji me cojo Bernabé ngajan nandya Derbe.

Cavuya Pablo cojo Bernabé ngajan Antioquía, distritu Siria

²¹Hane xi cafehe me jan ne, casua me camachaya rë xuta cjuandajyihi xi chja tsëhë Jesucristu. Hane jemu cjin xuta xi cavisehen me ladu rë Jesús. Hya xi camá ne, cavuya nga me Lистра cojo Iconio cojo Antioquía, distritu Pisidia. ²²Caviyujuhñu me cjuatacun rë xuta ladu rë Jesús, hacuaha cachja me cojo rë me xi catjinduju me xi mangucacun me cojo Jesús. Hacuaha cachja sa me cojo rë me cuitjin:

—Meje rë xi jemu cjin cjuañihi cuatjuun cuma sehe cuiseen hiscan sahmi Nina gobiernu. —Cuatjin cachja me.

²³Hacuaha casuaxa rë me ngujo xuta changá jima ngu yungun jan, xi cjuahacuenda me xuta rë yungun. Hane xi cavatju casahmi me oración hacuaha casahmi me xun rë me ne, sehe caviyuju me xuta rë yëjë yungun jan tsja Nai naja, me xi camangucacun xuta jan cojo. ²⁴Hya xi camá ne, cavuya cavatju nga me distritu Pisidia, sehe cafehe me nandya Perge, distritu Panfilia. ²⁵Hane xi caffè cachja me cojo xuta jan cjuandajyihi ne, sehe cavetju me quiji me nandya Atalia. Hane xi cavetju me ngajan ne, sehe cavisehen me barcu cavuya quiji me Antioquía, ²⁶nandya hiscan xi caviyuju xuta me ngahma cjuandaja rë Nina xi sahmi me xa xi sehe cajnetaha casahmi me jan. ²⁷Hane xi cafehe Pablo cojo Bernabé jan ne, sehe casahmitangun me yëjë xuta rë yungun, casuacuenda me yëjë hacutjin xi casahmi Nina, nixtin xi quiji casahmi me xa rë Nina. Hacuaha casuacuenda me xi Nina ne, cavuxaha me ndiya xi cumangucacun xutaxín cojo Jesús. ²⁸Hane hacuiin hitsë nixtin caviyujutaha me jan cojo xuta ladu rë Jesús.

Junta xi camá ngajan Jerusalén

15 Hya xi camá ne, ngujo me xi xuta tjë rë Israel ne, cavetju tsëhë Judea hane cafehe me Antioquíá, cachja me cojo yahnga xuta ladu rë Jesús cuitjin:

—Sa xi xtiin rë chuxin nuju sacuaha xcusun xi cavejña Moisés ne, cumaji cuetjuntjun. —Cuatjin cachja me.

²Ngajan xi Pablo cojo Bernabé ne, hacuiin hitsë casecjan cjua rë me cojo xuta xi cachja cuatjin jan. Vëhë xi xuta rë yungun jan ne, casuaxa me Pablo cojo Bernabé cojo ngujo sa me xi cjue me xcun apóstol cojo xcun xuta changá rë Jerusalén, xi ha vëhë me cjua rë Nina xi cuinenguise me tsëhë cjuacjintacun xi casuandya rë me ngajan.

³Ngajan xi xuta xi cuacun cavitexa xuta rë yungun jan ne, cavatju me distritu Fenicia cojo distritu Samaria. Hane cuatjin tisuacuenda me hacutjin xi xutaxín ne, hacuaha cavisehen me ndiya rë Jesús. Hane yëjë xuta ladu rë Jesús xi cavisinuju cjua jan ne, jemu ndaja camá rë me.

⁴Hane xi cafehe me Jerusalén ne, jemu ndaja cafahatsja xuta rë yungun jan me. Hacuaha jemu ndaja cafahatsja apóstol cojo xuta changá jan me. Hya xi camá ne, sehe casuacuenda me yëjë hacutjin xi casahmi Nina, nixtin xi quiji casahmi me xa rë Nina. ⁵Peru ngujo xuta fariseo xi hacuaha camá me ladu rë Jesús ne, cavetjujñi me cachja me cuitjin:

—Xutaxín xi visehen ladu rë Jesús ne, meje rë xi xtí chuxin rë me hacuaha cuinújan cojo rë me xi sahmi me yëjë sacuatjin chja ley rë Moisés. —Cuatjin cachja me.

⁶Hya xi camá ne, camatangun apóstol cojo xuta changá xi cjuahacuenda me cjuacjintacun vëhë. ⁷Hane ha xcun xi ha jemu cavisiajmicjín me ngajñi rë me ne,

sehe ngajan xi cavetjujñi Pedru, cachja me cuitjin:

—Ngayujun ngarcun ni matsejen ne, ngayun ne, ha hyun ta hisca nixtin titjun ne, ngahan cavaxijin ná Nina ngajñi nuju cojo sa xi ngatsë naha ne, cumachaya rë xutaxín cjuandajyihi xi chja tsëhë Jesucristu hane cumacjain rë me. ⁸Hane Nina, me xi vëhë yëjë cjuat-acun rë xuta matsejen ne, catsingacun me xi cachuya rë me tsëhë xutaxín, hya xi casua me Hasen rë me xi cuma rë xuta xi cuacun vë, sacuatjin casua naja me ngayaan. ⁹Tangun ni casahmi Nina cojo rë me sacuatjin casahmi Nina cojo naja ngayaan, xi catsityjahi me cjuata-cun rë xuta xi cuacun vë ta, tsëhë xi camangucacun me cojo Nina. ¹⁰Quih-ndë ta cuatjin ne, ¿mé má cuatjin meje chjuhunchuvun rë Nina cojo chuva rë ley rë Moisés, xi cuatjin tivitexun rë xuta ladu rë Jesús xi cuacun jan xi sah-michihin me ngu xcusun xi hisca xutachanga naja cacaain rë me casahmichihin me hacuaha hisca ngayaan matsejen ne, cacaain naja canihñachehen? ¹¹Peru hacuiin cuatjin ta ngayaan ne, macjain naja xi cuetjuntjeen ngatsë rë cjuandaja rë Nai naja Jesús sacuatjin rë me xi cuacun vëhë. —Cuatjin cachja Pedru.

¹²Ngajan xi xutacjín jan ne, ngu caviyujuyuu me cavisinuju me cjua xi cachja Bernabé cojo Pablo hora xi casuacuenda me hacutjin casahmi Nina cjuarcun ngajñi rë xa xi casahmi me ngajan nangui rë xutaxín. ¹³Hane hora xi cajnetaha cachja Bernabé cojo Pablo cjua vëhë ne, sehe cachja Jacobo cuitjin:

—Ngayujun ngarcun ni matsejen ne, tinuhyun cjua xi cuichjá cojo nuju. ¹⁴Sehe cajnetaha casuacuenda Simón hacutjin camá xi tjuntjun catsingacun Nina xi hacuaha meje rë me xutaxín, hya xi cavaxijin me ngujo xutaxín jan xi cuma xuta ladu rë me. ¹⁵Cjua rë Nina xi catsihindu profeta hatsëë nixtin matse-

jen ne, tjin tangun cjuatacun rë cojo cjua xi cafë cachja Simón. Cuitjin camahindu:

¹⁶ Xi cuatju xcusun vëhë ne, cúa nga, hane sahme xatsë ndava David xi cavetsun;

cúa sahmendaja nga xi cavixujne, tsindaja nga ngundiya,

¹⁷ cojo sa xi xuta xi yahnga ne, sahmi me ngahñu xi cuisehen me ladu naha, cuma cuinújan ne, yëjë xutaxín xi ngahan cavaxejen xi cuma tsahan me.

¹⁸ Cuatjin chja Nina, me xi ha casua cjua vëhë hatsëë nixtin.

Cuatjin camahindu.

¹⁹ Vëhë xi xi má ná ngahan matsejen ne, mijí rë xi tahan xti rë xutaxín xi visehen ladu rë Nina. ²⁰ Xi meje rë xi nihña ne, xi nihinduun rë me xi sinii me xichinë xi caviyuju xcun nina ndyojo, sahmi me cjuatsehen xi sahmi xuta cojo ngu xi hacuiin chjuun rë hacuiin xihin rë me, sinii me yojo rë chu xi caxinchahndu rë xi cahme, hacuaha sinii me jni.

²¹ Cuatjin meje rë ta, tsëhë xi hisca jemu nu tsëë jan hisca quihndë ne, jima ngu nandya ngajñi xuta tjë rë Israel ne, tjin me xi sua machaya rë xuta cjua tsëhë ley rë Moisés. Ley vëhë ne, chutaya rë yëjë ni yungun jima ngu nixtin xi nixtin chjahájenda rë. —Cuatjin cachja Jacobo.

Xujun xi catsingatju apóstol tsëhë xutaxín

²² Ngajan xi apóstol cojo xuta changá cojo yëjë sa xuta rë yungun ne, caviyujucacun me xi tuxijin rë ngujo xihin ngajñi rë me xi tsingatju me ngajan Antioquía, cjue tangun cojo Pablo cojo Bernabé. Me xi cuicun vi xi catuxijin rë: Judas, me xi hacuaha hmí rë Bársabas, cojo Silas, jo xihin xi jemu chjaharcun rë ngajñi rë xuta ladu rë Jesús. ²³ Sehe ngajan xi catsihindu me ngu xujun catsingatju me cojo me xi jo xi cuacun vë. Cuitjin chja xujun jan:

“Ngayin xuta ladu rë Jesús, apóstol cojo xuta changá ne, ningatjin ngu nina niji tsujun ngayujun ni ngayun xuta ladu rë Jesús xi hacuiin xuta tjë rë Israel ngayun, xi nechun nandya Antioquía cojo distritu Siria cojo distritu Cilicia.

²⁴ Ngayin ne, camachaya niji xi cavetju ngujo xihin ngajñi niji xi cafehe ndya casuaxti nuju cojo cjua rë hacuaha caviseccan cjuatacun nuju. Me xi cuacun vë ne, ngayin ne, cavitexiin rë me xi quiji me.

²⁵ Vëhë xi ngu tangun ni camá cjua niji hane cavejñi tacuín xi tuxijin rë xihin xi ningatjin xi nduvatjengui nuju, cuinduvatangun cojo Bernabé cojo Pablo, me xi jemu vinga niji. ²⁶ Me xi cuacun vë ne, casua me yojo rë me xi caviyujutaha tsavi me xi sahmi me xa rë Nai naja Jesucristu. ²⁷ Cuatjin xi Judas cojo Silas ne, ningatjin nuju me. Hane me vëhë ne, cuichja me cojo nuju cjua hntsua me, cjua xi ningatjin nuju vi. ²⁸ Ngayin ne, ngu tangun ni camá cjua niji cojo Hasen rë Nina xi cuitexin nuju xi nihñu suvá ni xcusun xi hitsë sa sahmi ngujoyë vi: ²⁹ xicachinuu xichinë xi caviyuju xcun nina ndyojo, xicachinuu jni, xicachinuu yojo rë chu xi caxinchahndu rë xi cahme, xicanihñuu cjuatsehen xi sahmi xuta cojo ngu xi hacuiin chjuun rë hacuiin xihin rë. Sa xi nihñuu yëjë xcusun vëhë ne, ndatjin nihñu. Vëhë ni cjua xi nújin cojo nuju.” Cuatjin chja xujun jan.

³⁰ Hya xi camá ne, cavetju me xi cuacun jan quiji me Antioquía. Hane xi cafehe me jan ne, casahmitangun me yëjë ni xuta rë yungun, sehe casua me xujun xi yaha me. ³¹ Hane xi cavutaya xuta ladu rë Jesús xujun jan ne, jemu ndaja camá rë me tsëhë cjua jan. ³² Hane Judas cojo Silas jan ne, tsëhë xi tjin rë me chuva xi cuichja me cjua xi caphatsja me tsëhë Nina ne, jercu cachja me cojo xuta jan, hacuaha jemu casua rë me cjuetacun. ³³ Hane xi ha caviyujutaha me ngujo nixtin jan ne, xuta rë

yungun jan ne, catsingatju me cafe nga cojo yějě ni cjuandaja cjuajeya ngajan hiscan xi cavetju me. ³⁴Hane Silas, xi má rě me ne, hitsě sa ndaja xi ngaja caviyujutaha me. ³⁵Peru Pablo cojo Bernabé ne, caviyujutaha sa me ngajan Antioquía, cavicuya me cjuachacun rě cjua rě Nina, hacuaha casua me camachaya rě xuta cjuandajyihi xi chja tsěhě Nai naja. Hacuaha jemu cjin sa xuta xi cuatjin casahmi me.

Catsismi xicjin Pablo cojo Bernabé

³⁶Hya xi camá ne, xi cavatju ngujo nixtin ne, Pablo ne, cuitjin cachja me cojo Bernabé:

—Cuyan cuanguen tjenguen nga xuta ladu rě Jesús yějě ni nandya hiscan xi ha catahan camachaya rě me cjuandajyihi xi chja tsěhě Nai naja, cuanguen chutseen ne, hacutjin tivatju me tijima.

³⁷Hane Bernabé ne, meje cjuecojo me Juan, me xi hacuaha hmí rě Marcos. ³⁸Peru Pablo ne, mijí cjuecojo me, tsěhě xi Marcos ne, catsismicacun me xicjin me hane cavetjuxin me tsěhě Pablo cojo Bernabé ngajan Panfilia, quijiinndujain me cojo xa. ³⁹Hane cojo cjuatacun vėhě ne, cavetjucaa ngu si ngajni rě Pablo cojo Bernabé. Cuatjin camá xi cavetjuxin me tsěhě xicjin me. Hya xi camá ne, Bernabé ne, quijicojo me Marcos jan ne, cavisehen me ngu barcu, hane quiji me Chipre. ⁴⁰Peru Pablo ne, cavaxijin me Silas xi cjuecojo me. Hane xuta ladu rě Jesús ne, caviyuju me me xi cuacun jan ngahma cjuandaja rě Nai naja. Hya xi camá ne, cavetju Pablo cojo Silas, ⁴¹quiji me yějě ni nandya tsěhě distritu Siria cojo Cilicia, casua rě me ngahnu xuta rě yungun jan.

Cavetsihin catsujyihiya Timoteo cojo Pablo

16 Hane xi cavatju vėhě ne, cafehe me nandya Derbe cojo Listra.

Ngajan ne, tacun ngu xuta ladu rě Jesús xi hmí rě Timoteo, quihndi rě ngu chjuun xuta tjě rě Israel xi hacuaha cavisehen me ndiya rě Jesucristu. Nahmi rě Timoteo jan ne, xutaxin me. ²Xuta ladu rě Jesús ngajan nandya Listra cojo Iconio ne, jemu ndaja chja me tsěhě Timoteo vė. ³Pablo ne, meje rě me xi cjue Timoteo cojo rě me. Vėhě xi quijicojo me Timoteo hiscan xi ti chuxin rě xuta tjě rě Israel. Cuatjin casahmi me ngatsě rě xi nandya xi cuacun vėhě ne, siu xuta jan, hane yějě xuta xi cuacun jan ne, vėhě me xi nahmi rě Timoteo ne, ngu xutaxin me. ⁴Ngajan xi cavetju Pablo cojo Silas cojo Timoteo, quiji me. Hane jima ngu nandya xi tivatju me ne, casua me camachaya rě xuta tsěhě cjua xi caviyuju apóstol cojo xuta changá ngajan Jerusalén, cojo sa xi xuta ne, cuihndě me tsěhě cjua vėhě. ⁵Cuatjin camá xi xuta tsěhě yějě yungun jan ne, casacuhnu rě me xi mangucacun me cojo Jesús. Hane nchunchujun ni ne, cuatjin jima cjin sa me.

Cachja nijná cojo Pablo

⁶Hya xi camá ne, cavatju me distritu Frigia cojo distritu Galacia ta, tsěhě xi Hasen rě Nina ne, casuaain cahndě xi cuichja me cojo xuta cjua rě Nina ngajan distritu Asia. ⁷Hane xi cafehe me tiña distritu Misia ne, meje cjue me distritu Bitinia, peru Hasen rě Jesús ne, casuaain cahndě. ⁸Cuatjin camá xi cavatjutaha me Misia, hane quiji me nandya Troas. ⁹Hane ngu nguixun xi siutaha me ngajan ne, cachja ngu nijná cojo rě Pablo. Cavėh me ngu xihin tsěhě distritu Macedonia xi secun tichja cojo rě me cuitjin: “Nduvun nguehe Macedonia ne, cuiseacun niji.” Cuatjin cachja nijná jan. ¹⁰Cuatjin camá xi xi tu cachja nijná cojo Pablo cuatjin ne, ngutjen ni cavinchin chuva rě hacutjin cuma xi cuanguin Macedonia ta, tsěhě xi xi má niji ne, Nina cajindaya

niji me xi cuanguin cuinújin cojo xuta jan cjuandajyihi xi chja tsêhê Jesús.

Cavisehen na Lidia ladu tsêhê Jesucristu

¹¹ Hya xi camá ne, xi cavetjin nandya Troas ne, cachjihin ngu barcu sehe catsanguin ngu quixi rê nandya Samotracia. Hane xi camá nchujun jan ne, catsanguin nandya Neápolis. ¹² Hane tsêhê ngajan ne, catsanguin nandya Filipos, ngu nandya xi hitsê sa matitjun tsêhê ngu cahndê tsêhê distritu Macedonia. Jemu cjín xuta Roma siu me jan. Hane cavinechintihin nandya vêhê ngujo nixtin. ¹³ Hane xi cavechú nixtin xi nixtin chjahájenda rê ne, cavetjin tingotjo hnhua tsêhê nandya jan hiscan jiya ndajyê. Xi má niji ne, ngajan tjín ngu cahndê xi má oración. Hane cavinechin ngajan, canújin cjua rê Nina cojo yachjin xi camatangun me jan. ¹⁴ Hane ngu chjuun xi cahndê cjua xi cachja Pablo ne, Lidia hmí rê na, ngu na tsêhê nandya Tiatira, viteña na tsjian moradu. Na vêhê ne, hacuaha faharcun na Nina, hane Nai naja ne, cavuxaha me cjuatacun rê na xi ndaja cavetaharcu na cjua xi cachja Pablo. ¹⁵ Hane hya xi caxtenda na cojo yêjê xuta rê na ne, cachja na cojo niji cuitjin:

—Quihndê ta ha hyun xi ngahan ne, camangucácun cojo Nai naja ne, nduvun ndya naha, hane ngajan cuinechun. —Cuatjin jemu cjín cachja na cojo niji, vêhê xi catsangui.

Quiji Pablo cojo Silas ndavaya ngajan Filipos

¹⁶ Cavechú ngu nixtin hya xi tivanugin cahndê hiscan xi má oración ne, cavechútaha niji ngu na hndixahan rê xuta, xi jiya xitsehen xahasen rê. Hane nai rê na hndixahan jan ne, jemu cjín tujún sacu rê me, tsêhê xi chja na cojo xuta mé xi cuatju me cuma. ¹⁷ Na vêhê

ne, catsujyihya tjengui na ngayin cojo Pablo, jindaya na chja na cuitjin:

—Xuta xi cuicun vi ne, mosu rê Nina xi matitjun má me, hacuaha sua me machaya nuju cjua hacutjin cuetjuntjun. —Cuatjin cajindaya na cachja na.

¹⁸ Jemu cjín nixtin xi cuatjin casahmi na. Hya xi camá ne, tsêhê xi jemu camaxti rê Pablo ne, cavuya me cavutsejen me na, sehe cachja me cojo xitsehen jan cuitjin:

—Tsêhê xi Jesucristu casuaxa ná me ne, ¡tetjixin tsêhê na! ¡Vêhê xi chjá cojo ri! —Cuatjin cachja Pablo.

Hane hora vêhê ni ne, cavetjuxin xitsehen jan.

¹⁹ Hya xi camá ne, xi vutsejen nai rê na hndixahan jan xi ha quihndê tsajin cjue-tacun xi sacú sa rê me tujún ne, cafaha me Pablo cojo Silas, cajavêjne me quijjicani me ngajan hiscan ma tangun xutaxa rê ngajan hiscan má ndetsin. ²⁰ Hane xi cafehe me ngajan xcun xutaxa rê ne, cuitjin cavinchajyê me:

—Cha xi cuicun tjê rê Israel vi ne, jemu tivisecjan cha cjuatacun rê xuta nangui naja. ²¹ Meje rê cha xi nihña xcusun rê xutachanga rê cha, peru ngayaan xuta Roma ne, ndajintjin xi cuanguentjengueen xcusun xi cuacun vê.

²² Hane hacuaha cojo xutacjín jan, cavetsihin cavinchajyê me Pablo cojo Silas. Ngajan xi xutaxa rê ne, cavaxêhndu me tsjian rê me xi cuacun jan, sehe cavitexa me xi sehen rê. ²³ Hane ha xcun xi ha jercu cavaja rê me ne, sehe cavincha me ndavaya. Hacuaha cachja me cojo cha xi sahmi cuidadu ndavaya xi ndaja cuidadu cuma me xi cuacun jan. ²⁴ Hane hya xi cafahatsja mayu cjua vêhê ne, quiji cavinchahñu cha me cahntsua ndavayajñu, hacuaha cavinchanguihñu cha ntsacu me ngojo xi casehenchjine tsêhê jo ya xi sahmi rê me castigu hacuaha hitsê sa cjuaquixi jiya me.

²⁵ Hane sacua ha chuva rë vasen nixten ne, Pablo cojo Silas ne, tisahmi me oración hacua ha tisë me tsëhë Nina. Hane presu xi yahnga jan ne, tu tivisiñuju ni me. ²⁶ Hane ha tu ñahñu jercu cafani nangui, hisca xihndëñaña rë ndavaya jan vitsuneya rë. Hacuaha yëjë ni tingotjo ndavaya jan ne, ngutjen ni catuxaha, hane cadena xi tjinñu xingu xingu presu ne, cavixuhndu. ²⁷ Hya xi camá ne, cavasca rë cha xi sahmi cuidado ndavaya jan. Hane xi cavëë cha xi tixaha yëjë tingotjo tsëhë ndavaya jan ne, cavaxë cha quicha rë cha hane ha tu hitsë sa ne, catsiquehen cha yojo rë cha ta, tsëhë xi xi má rë cha ne, yëjë presu ne, cavanga. ²⁸ Peru Pablo ne, jercu cajindaya me cachja me cuitjin:

—Xicanihñuu cuatjin ta ngayijin ni nechinyin nguehe. —Cuatjin cachja Pablo.

²⁹ Ngajan xi cha xi sahmi cuidado jan ne, cafehya cha ngu ndihi, sehe vangasanii cha quiqi cha cahntsua ndavaya, ña fatsë cha xi tsacjun cha, quiqi cafañatsacjan cha xcun Pablo cojo Silas xi faharcun cha me. ³⁰ Hane xi cavaxë cha me tsëhë ndavayajñu jan ne, sehe cafinenguise cha cuitjin:

—Tatá, ¿mé xi meje rë xi sahme, cojo sa xi cuétjutjé? —Cuatjin cafinenguise cha.

³¹ Hane me xi cuacun jan ne, cuitjin cachja me:

—Catamangu tacún cojo Nai niji Jesús, sehe cuetjuntjun ngayun cojo yëjë xuta xi siu ndya nuju. —Cuatjin cachja me.

³² Sehe ngajan xi cha vëhë ne, cajindaya cha yëjë xuta xi siu ndava cha, hane Pablo cojo Silas ne, casua me camachaya rë cha cjua rë Nina cojo yëjë xuta xi cajindaya rë cha jan. ³³ Ha hora vëhë ni tsëhë nixten vëhë ne, cafaha cha me ne, cavane cha hiscan casacuhmu rë

me. Hya xi camá ne, ngutjen ni caxtenda cha cojo yëjë xuta rë cha jan. ³⁴ Sehe qui-jiniji cha cojo Pablo cojo Silas ndava cha, hane casua cha niñu cajinë me. Hacuaha jercu ndaja camá rë cha cojo yëjë xuta xi siu ndava cha, tsëhë xi camangucacun cha cojo Nina.

³⁵ Hya xi camá ne, xi casahasen jan ne, catsingatju xutaxa rë jan nisë, quiqi cachja cojo cha xi sahmi cuidado ndavaya jan cuitjin:

—Naxun xu cha xi caxincha ndavaya nguchjin jan. —Cuatjin cachja cha.

³⁶ Ngajan xi cha xi sahmi cuidado ndavaya jan ne, quiqi cachja cha cojo Pablo cjua vihi:

—Catsingatju xutaxa rë cjua xi cuáxë xu nuju. Vëhë xi cuma cuetjun ne, cuangun cojo cjuandaja cjuajeya. —Cuatjin cachja cha.

³⁷ Peru Pablo ne, cuitjin cachja me cojo cha xi cuacun jan:

—Xutaxa rë ne, cavitexa me casehen niji xcun yëjë ni xuta, handasa cjëë cjuahacuenda me jyë niji, ngayin xi xuta Roma ngayin. Sehe cavinchaniji me ndavaya. ¿Há taha hma meje cuaxë niji me quihndé? ¡Cumaji xi cuatjin! Catin-duva suvá me cataxë niji me. —Cuatjin cachja Pablo.

³⁸ Hane cha nisë jan ne, catsicuya cha cjua cojo xutaxa rë cuatjin. Hane xi camachaya rë xutaxa rë xi xuta Roma má me xi cuacun jan ne, catsacjun me camá.

³⁹ Ngajan xi xutaxa rë ne, quiqi cachja me cojo Pablo cojo Silas xi tsijyëcacun me xi cuatjin camá. Sehe cavaxë me me, sehe cafehya rë me xi sahmi me cjuandaja ne, cuetjuxin me tsëhë nandya jan.

⁴⁰ Hane xi cavetju Pablo cojo Silas tsëhë ndavaya ne, cavuya quiijtjengui me na Lidia. Hane xi cavëë me yëjë xuta ladu rë Jesús jan ne, sehe cachja me cojo xuta jan xi catjinduju me cojo ndiya rë Jesús, sehe cavetju Pablo cojo Silas quiqi me.

Cafehe Pablo ngajan nandya Tesalónica

17 Hya xi camá ne, Pablo cojo Silas jan ne, cavatju me nandya Anfípolis cojo nandya Apolonia, sehe cafehe me nandya Tesalónica, hiscan xi tacun ngu yungun rë xuta tjë rë Israel. ²Hane sacuatjin xi ha xcusun rë Pablo ne, ngajan quijitjengui me xuta tjë rë Israel jan nixtin xi chjahájenda rë. Hane jyan nixtin, tsëhë jyan totje ne, Pablo ne, cavicuya me xuta cjua rë Nina. ³Casua me camachaya rë xuta xi chja cjua rë Nina xi Me xi Tsingatju Nina ne, hatuxa tjin xi cueya me sehe cuya nga me cjuahñu. Hacuaha cachja Pablo cuitjin:

—Jesús, me xi tisuá jimachaya nuju tsëhë ne, me vëhë xi catsingatju Nina. —Cuatjin cachja me.

⁴Ngajan xi ngujo xuta xi cuacun jan ne, camacjain rë me, hane cavisehen me ladu rë Pablo cojo Silas. Hane ngajñi rë me xi cuacun camacjain rë vë ne, hacuaha jemu cjín xutaxín xi faharcun rë Nina hinchajñi me cojo hacuiin hitsë yachjin xi matitjun jan hinchajñi me. ⁵Ngajan xi ngujo xuta tjë rë Israel xi camacjaain rë jan ne, camachini me. Hane hora xi camá casahmitangun me ne, jemu cjín xuta tsehen xi tujyë tsujy-ihya jan ne, cavetsihin casahmi me ngu suë jyë ngajñi nandya xi cjue jaha me Pablo cojo Silas. Quiji me ndava Jasón xi vanguise me me xi cuacun vë xi cuaxë me xcun xutacjín jan. ⁶Hane xi casacuiin rë me Pablo cojo Silas ngajan ne, cajavëjne me Jasón cojo ngujo sa xuta ladu rë Jesús, quijicojo me xcun xutaxa rë, jindaya me cachja me, cavincha me jyë cuitjin:

—Cha xi cuacun jemu casuaxti jingujyë ni ngasunhndë ne, hacuaha cojo nguehe cafehe cha. ⁷Hane cha Jasón vi ne, cakahatsja cha cha xi cuacun jan nga-

jan ndava cha. Hane yëjë cha xi cuacun vë ne, tisahmi cha condra ley rë emperador Romano xi hmí rë César, me xi matitjun camahani, ha chja cha xi tjin sa ngu me xi matitjun xi hmí rë Jesús. —Cuatjin cavinchajyë xutacjín jan me xi cuacun jan xcun xutaxa rë.

⁸Ngajan xi xutacjín cojo xutaxa rë jan ne, xi cahndë me cjua jan ne, jemu camacjincacun me. ⁹Hane ha xcun xi cavechji Jasón cojo xuta xi yahnga jan tujún cojo xutaxa rë ne, sehe catsismi xutaxa rë jan me.

Cafehe Pablo cojo Silas ngajan nandya Berea

¹⁰Ngajan xi xuta ladu rë Jesús ne, xi tu camá nguixun jan ne, catsingatju me Pablo cojo Silas ngajan nandya Berea. Hane xi cafehe me ngajan ne, quiji me yungun rë xuta tjë rë Israel. ¹¹Hane xuta jan ne, hitsë sa tixaha cjuatacun rë me xi cuma rë xuta xi siu ngajan Tesalónica. Hane me xi cuacun jan ne, cakahatsja me cjua rë Nina cojo nguñaja xahasen rë me. Hacuaha nchunchujun ni ne, cavutaya me xujun rë Nina, cojo sa xi sacú rë me cjuaquixi tsëhë cjua xi cachja Pablo. ¹²Cuatjin camá xi jemu cjín xuta jan camacjain rë me. Ngajñi rë xuta jan ne, hacuaha hacuiin hitsë xutaxín nchina sa chjuun sa xihin me hinchajñi me jan. ¹³Peru hya xi camachaya rë xuta tjë rë Israel ngajan Tesalónica xi cojo nandya Berea tisua Pablo jimachaya rë xuta cjua rë Nina ne, hacuaha quiji xuta xi cuacun jan casua me cjuacjintacun xutacjín xi siu jan. ¹⁴Ngajan xi xuta ladu rë Jesús xi siu jan ne, catsingatju me Pablo hisca ndachacun. Peru Silas cojo Timoteo ne, caxinchataha ni me ngajan. ¹⁵Hane xuta xi quijicani rë Pablo jan ne, quijicojo me me hisca nandya Atenas. Xi tu cafehe me ngajan ne, cachja Pablo cojo xuta xi quijicani rë me jan ne, catji catichja me cojo Silas cojo Timoteo ne, marcu mac-

jain catjijengui me Pablo. Hya xi camá ne, sehe cafe xuta xi cuacun jan.

Cafehe Pablo ngajan nandya Atenas

¹⁶ Jinguyējē rē xi tacunya Pablo Silas cojo Timoteo ngajan Atenas ne, jemu camaxti rē xahasen rē me, tsēhē xi tivutsejen me nandya jan xi ña quitsē rē cojo nina ndoyojo. ¹⁷ Vēhē xi Pablo ne, cachja me cojo xuta tjē rē Israel cojo xutaxín xi faharcun rē Nina ngajan yungun. Hane ngajan ndetsin ne, nchunchujun ni cachja sa me cojo xuta xi fehe jan. ¹⁸ Hacuaha cojo maestru xi tjengui cjuatacun xi hmí epicúreo cojo ngujo sa maestru xi tjengui cjuatacun xi hmí estóico cavisiajmi me cojo Pablo. Hane ngujo me ne, cachja me cuitjin:

—Cha machjiriin xi cuajyihi vē ne, tsajin camahani mé vengui chji rē cjua xi chja cha! —Cuatjin cachja maestru xi cuacun jan.

Ngujo nga me ne, cuitjin cachja me:

—Cha xi cuajyihi vē ne, tisua cha jimachaya naja tsēhē nina rē jingu sa xuta.

Cuatjin cachja ngujo nga me ta, tsēhē xi Pablo ne, tisua me jimachaya rē xuta cjuandajyihi xi chja tsēhē Jesús cojo tsēhē hacutjin cavuya me cjuahñu. ¹⁹ Ngajan xi xuta jan ne, quijicojo me Pablo ngajan Areópago, cahndé hiscan matangun me xi sahmi me junta, sehe cachja me cojo me cuitjin:

—Tinújun cojo niji mé cjuachacun xatsē xi quichuhun ta ²⁰ jemu ha ngu xcusun cjua xi canuhyin xi canújun. Vēhē xi meje cumachaya niji mé vjne cjua vēhē.

Cuatjin cachja xuta Atenas jan ta, ²¹ tsēhē xi yējē xuta xi cuacun vē cojo xuta ngu nangui xi siu cahndé jan ne, hatuxa chuya rē me xi cuisñuju me ngu cjua xatsē hacuaha jemu nduju cuichja me cojo xicjin me.

²² Hya xi camá ne, sehe casecunvasen Pablo cahndé vēhē, sehe cachja me cuitjin:

—Ngayujun ngarcun ni xuta Atenas matsejen ne, vutsejen jinguyē ni ne, ngayun ne, hacuaha jemu chjuhuncun nina nuju. ²³ Ta jinguyējē rē xi catsujyēhēya ngajñi nandya nuju hacuaha tivutsejen yējē cahndé hiscan chjuhuncun nina nuju ne, cavéchutaha ngu yungun lihndi hiscan xi camahindu ngujo cjua xi chja cuitjin: “Tsēhē ngu nina xi hyaan me.” Cuatjin camahindu. Vēhē xi nina xi chjuhuncun xi hisca hyuun ne, me vēhē xi nduva tisuá jimachaya nuju tsēhē me. ²⁴ Nina xi casahmi ngasunhndé cojo yējē xi tjin xcun, me xi nai rē ngahnga cojo nangui ne, hacuiin véñnacahndé me yungun xi sahmi xuta. ²⁵ Hacuaha me vēhē ne, tsajin mé xi ma chaja rē me xi ngayaan xuta cuma tahan rē me ta, me vēhē xi sua naja me cjuahñu, sua me xta naja, hacuaha sua naja me yējē ni xi mameje naja.

²⁶ Hane tjē rē xi ngu ni xuta ne, casahmi Nina yējē xcusun xuta, xi cuiyuju me jinguyē ni ngasunhndé. Hacuaha Nina cachja me janihya xi cumatitjun jimangu xcusun xuta hacuaha jani hiscan xi cuiyuju me. ²⁷ Cuatjin casahmi Nina cojo sa xi ngayaan xuta ne, cuinchaseen me, hane xi cuatjin cuinchaseen me ne, hyaan sa xi sacú naja me, handasa hacuiin cjin tacun Nina xi cuma naja xingu xingu ngayaan. ²⁸ Sacuatjin chja ngu cjua xi chja cuitjin: “Nina ne, sua naja me cjuahñu, sahmi me xi ma finiya ngayaan, hacuaha sua naja me xi nechan cojo cjuahñu naja.” Cuatjin chja cjua. Hacuaha yahnga xuta tsēhē ngajñi nuju xi tsihindu me cjua xi jemu ndaja fi ne, cuitjin catsihindu me: “Ngayaan ne, tjē rē Nina ngayaan.” Cuatjin catsihindu me. ²⁹ Quihndé ta quihndi rē nina ngayaan ne, mijí rē xi

cuma tacuun xi Nina ne, tangun me cojo nina oro o sa xi nina quicha tyava, o sa xi nina ndyojo, xi xuta casahmi me cojo cjuatacun rë suvá me. ³⁰ Nina ne, catsingatjuhnga me nixtin xi xuta ne, hvíin me. Peru quihndë ne, Nina ne, tivitexa me xi yëjë ni xuta tsëhë jingujiyë ni ladu ne, tsindeya me cjuatacun rë me ta, ³¹ tsëhë xi Nina ne, ha cavejña me ngu nixtin xi tsichuva me xuta tsëhë ngasunhndë cojo cjuaquixi tu cutjin jyë rë ne, cuatjin sahmi me cojo. Hacuaha ha cavaxijin me ngu xuta xi sahmi xa vëhë. Hacuaha ha hyan xi cjuaquixi xi cuatjin cuma, tsëhë xi Nina catsicuya me cjuahñu xuta vëhë. —Cuatjin cachja Pablo.

³² Hane hya xi cahndë xuta jan cjua xi ngu nima ne, cavuya cjuahñu ne, ngujo me ne, catsixcuehyu me cjua jan, peru ngujo nga me ne, cuitjin cachja me:

—Cuisiniji xi cuinújun nga ngundiya cjua vëhë. —Cuatjin cachja ngujo me jan.

³³ Ngajan xi Pablo ne, cavetju me tsëhë ngajni rë xuta jan. ³⁴ Hane ngujo xuta ne, cavisehen me ladu rë Pablo sehe camacjain rë me cjua jan. Hane ngajni rë me xi cuacun vë ne, jiyajni me xi hmí rë Dionisio, ngu xutaxa rë tsëhë nandya, hacuaha cojo sa ngu chjuun xi hmí rë Dámaris jiyajni me jan, cojo ngujo sa me.

Cafehe Pablo ngajan nandya Corinto

18 Hya xi camá ne, hya xi cavatju xcusun vëhë ne, cavetju Pablo tsëhë nandya Atenas, hane quiji me nandya Corinto. ² Hane xi cafehe Pablo ngajan ne, cavechútaha me ngu xihin tjë rë Israel xi hmí rë Aquila. Aquila jan ne, tsëhë distritu Ponto má me, peru hacuaha sehe cafehe me Corinto cojo chjuun rë me xi hmí rë Priscila, xi quiji caviyujuchandë me ngajan nación Italia. Cavetjuxin me tsëhë Italia ta, tsëhë xi me xi matitjun jan, me xi hmí rë Claudio ne,

cavitexa me xi yëjë ni xuta tjë rë Israel ne, hatuxa cuetjuxin me tsëhë nandya Roma. Hane Pablo ne, quijitjengui me Aquila. ³ Hane tsëhë xi ha ngu xcusun ni xa xi sahmi catsijo ni me ne, cavejñatan-gun me cojo me xi cuacun vë, hacuaha tangun casahmi me xa. Xa xi sahmi me ne, xi tsindaja me ndihya tsjian. ⁴ Ngajan xi Pablo ne, cachja me cjua rë Nina ngajan yungun rë xuta tjë rë Israel jima ngu nixtin xi chjahájenda rë ta, tsëhë xi meje rë me xi sa xuta tjë rë Israel o sa xi xutaxín ne, cumacjain rë me cjua vëhë.

⁵ Hane xi cafehe Silas cojo Timoteo xi cavetju me tsëhë distritu Macedonia ne, Pablo ne, cavetsihin xi nchunchujun ni tichja me cojo xuta cjua rë Nina, tichja me cojo xuta tjë rë Israel xi Jesús ne, me vëhë xi catsingatju Nina. ⁶ Peru hya xi casahmi xuta xi cuacun jan condra Pablo hacuaha choho cachja me tsëhë me ne, cavitsune Pablo chojo rë tsjian rë me sacuaha xi tivaxë me xuta xi mijí cuihndë cjua rë Nina, sehe cachja me cojo xuta jan cuitjin:

—Ngayun suvun cún nuju tsëhë xcusun xi cuátju cuma. Hacuini ngahan cún ná. Quihndë cojo nixtin xi cjuí sa ne, cjué cuichjá cojo xutaxín cjua rë Nina. —Cuatjin cachja me.

⁷ Hane xi cavetjuxín me tsëhë xuta xi cuacun vë ne, quiji me ndava ngu me xi hmí rë Ticio Justo, ngu xutaxín xi hacuaha faharcun me Nina. Ndava me vëhë ne, ngu ndaya ni rë yungun rë xuta tjë rë Israel jan tacun. ⁸ Hane Crispo, me xi xutaxa rë yungun jan ne, camangucacun me cojo Nai naja Jesucristu, hacuaha cojo yëjë sa me xi siu ndava me camangucacun me. Hacuaha jemu cjín xuta Corinto ne, xi cahndë me cjua ndajyihi rë Nina jan ne, camacjain rë me sehe caxtenda me. ⁹ Hane ngu nguixun jan ne, ngajni niña rë Pablo ne, cachja Nai naja cojo rë me cuitjin:

—Xicarcuiin. Tinoje sa. Xicanisejyiin cjuja xi noje. ¹⁰ Cuatjin nihni ta, tsêhê xi ngahan ne, tejña cojo ri, hane tsajin yo xi cuma choho sahmi cojo ri ta ngahan ne, jemu tjin ná xuta ladu naha nguehe nandya vihi. —Cuatjin cachja Nai naja.

¹¹ Hane cavéjña Pablo ngajan ngu nu vassen, xi vicuya rê me xuta cjuja rê Nina.

¹² Peru hya xi Galión matitjun me tsêhê distritu Acaya ne, camatangun xuta tjê rê Israel jan ne, cafaha me Pablo, quijicani me xcun xutaxa rê, ¹³ cuitjin cachja me:

—Cha xi cuijyihî vi ne, tsujyihîya cha tichja cha cojo xuta xi hacjahi xcusun meje rê xi nihña xi chjahanrcun Nina. Peru xcusun vêhê ne, condra tsêhê ley naja. —Cuatjin cachja xuta jan.

¹⁴ Hane ha tu hora sa xi cuichja Pablo ne, cachja Galión cojo xuta xi cuacun jan cuitjin:

—Ngayun xuta tjê rê Israel, sa xi ngu cjuatsehen o sa xi ngu jyê jyê xi casahmi cha ne, tjin ná chuva rê xi scaa ná cojo nuju. ¹⁵ Peru xi tsêhê ngu cjuachacun cojo tsêhê ñihî rê ngu xuta cojo tsêhê ley nuju suvun ne, ndyá chutsujun suvun hacutjin cuma chihin ta, tsêhê xi ngahan ne, hatuxa sahmeцуendaan cjuacjintacun xi cuacun vê. —Cuatjin cachja Galión.

¹⁶ Ngajan xi Galión ne, catsicanga cojo me xuta tjê rê Israel jan tsêhê ndihyavassen. ¹⁷ Ngajan xi yêjê xuta jan ne, cafaha me Sóstenes, me xi matitjun tsêhê yungun rê xuta tjê rê Israel, cavaja rê me ngajan ndatsen ndihyavassen. Peru Galión ne, casahmicuendaan camahani me yêjê ni cjuacjintacun vêhê.

Cavuya nga Pablo nandya Antioquia

¹⁸ Peru hya xi ha jemu cavatju nixtin xi quitaha Pablo ngajan Corinto ne, catsinguijnetaha me cjuja cojo xuta ladu rê Jesús, sehe cafaha me ngu barcu xi cjue me ngajan distritu Siria. Priscila

cojo Aquila ne, hacuaha cojo me quiji me cojo Pablo. Hane xi cafehe me nandya Cencrea ne, ngajan casejnu rê rcu Pablo ta, tsêhê xi casahmichihin me ngu cjuja cojo Nina. ¹⁹ Hane xi cavatju vêhê ne, sehe quiji me nandya Efeso. Hane Pablo ne, ngajan caviyujutaha me Priscila cojo Aquila. Hya xi camá ne, Pablo ne, quiji me yungun, cachja me cojo xuta tjê rê Israel jan cjuja rê Nina. ²⁰ Hane xi cafehya xuta me xi setaha sa me ngujo nixtin ngajan ne, catsingatiin me. ²¹ Hya xi camá ne, catsinguijnetaha me cjuja cojo xuta jan, cuitjin cachja me:

—Sa xi Nina meje rê me ne, cúa nga, nduvatjênguê nuju. —Cuatjin cachja me.

Ngajan xi cafaha me ngu barcu xi cavetju me tsêhê Efeso.

Quiji nga Pablo cavusehenhya me xuta rê yungun

²² Hane xi cafehe me Cesarea ne, ngajan cavetju me quiji me Jerusalén xi sua me ngu nina xuta rê yungun ngajan. Hya xi camá ne, sehe cavuya cafehe me nandya Antioquia.

²³ Hane xi ha casetaha me ngujo nixtin jan ne, sehe cavetju nga me quiji me yêjê ni nandya tsêhê distritu Galacia cojo distritu Frigia, casua rê me ngahnu yêjê ni xuta ladu rê Jesús.

Quiji Apolos nandya Efeso cojo nandya Corinto

²⁴ Ngajan nandya Efeso ne, cafehe ngu xuta tjê rê Israel xi hmî rê Apolos. Nangui rê me ne, Alejandría. Jemu ndaja tsichihin me cjuja xi chja me, hacuaha jemu vê me tsêhê cjuja rê xujun rê Nina. ²⁵ Me vêhê ne, tjin yo xi casuacuenda rê me tsêhê ndiya rê Nai naja. Cojo nguñaja xahassen rê me ne, chichihin ni casua me camachaya rê xuta cjuandajyihî xi chja tsêhê Jesús. Peru hvîin me mé vijne xi xtenda xuta sacuatjin tixtenda xuta ladu rê Jesús ta xi vê me ne, suvá ni

mé vijne xi xtenda xuta sacuatjin cavitenda Juan Vitenda rë Xuta. ²⁶ Aposlos vë ne, hacuiin cojo chircun rë me cuetsihin cuichja me cojo xuta cjua rë Nina ngajan yungun rë xuta tjë rë Israel. Hane xi cahndë Priscila cojo Aquila sacuatjin cachja Aposlos ne, cavaxëxin me ne, sehe casuacuenda ndaja sa me tsëhë ndiya rë Nina. ²⁷ Hya xi camá ne, catsingatahacacun Aposlos xi cjue me ngajan distritu Acaya. Hane xuta ladu rë Jesús jan ne, cachuya rë me hacuaha catsihindu me ngu xujun tsëhë xuta ladu rë Jesús ngajan, cachja me cojo xuta jan xi ndaja cjuahatsja me Aposlos. Hane xi cafehe me jan ne, jemu cavisecoo me xuta xi cojo cjuandaja rë Nina ne, ha camangucacun me cojo Jesús. ²⁸ Hane xcun ni yëjë xuta ne, jercu catsitjungui me cjua rë xuta tjë rë Israel. Jemu cjin cahndë tsëhë xujun rë Nina xi cachja me cojo xuta, xi tsingacun me xuta xi Jesús ne, me vëhë xi catsingatju Nina me.

Cafehe Pablo nandya Efeso

19 Cuitjin camá jinguyëjë rë xi quitahá cuaha Aposlos ngajan Corinto. Xi cavatju catsujyihya Pablo taha ladu ngatihin ne, cafehe me nandya Efeso, hane ngajan cavechútaha me ngujo xuta ladu rë Jesús. ² Hane cuitjin cachja me cojo xuta jan:

—¿Há cavisehen Hasen rë Nina cahntsua xahasen nuju hya xi camangutacún cojo Jesús? —Cuatjin cachja me.

Hane xuta jan ne, cuitjin cafayangui me:

—Hisca camachayiin niji cjua xi tjin xi hmi rë Hasen rë Nina. —Cuatjin cafayangui me.

³ Ngajan xi Pablo ne, cuitjin cachja nga me:

—¿Hacutjin caxtenda ngayun ni? —Cuatjin cachja me.

Hane xuta jan ne, cuitjin cafayangui me:

—Caxtenda ngayin sacuatjin cavitenda nima Juan. —Cuatjin cafayangui me.

⁴ Ngajan xi Pablo ne, cuitjin cachja nga me:

—Juan vë ne, cavitenda me xuta hya xi xuta jan ne, catsindeya me cjuatacun rë me, hacuaha cachja me cojo xuta jan xi catamangucacun me cojo me xi sehe cjuehe, me xi hacui Jesús. —Cuatjin cachja nga Pablo.

⁵ Xi cahndë xuta jan cjua vëhë ne, caxtenda me xi cumatangun cjuatacun rë me cojo Nai naja Jesús. ⁶ Hane xi cavisanetsja Pablo xuta jan ne, canduva Hasen rë Nina, cavisehen cahntsua xahasen rë xuta, hane cachja me hne xi hisca hviiin me, hacuaha cachja me cjua xi casua Nina me. ⁷ Hane má sacuaha tejó xihin me xi yëjë me.

⁸ Hya xi camá ne, quiji Pablo yungun rë xuta tjë rë Israel, cachja me cojo xuta. Hane cahntsua jyan sá ne, cuatjin fi me yungun, hane hacuiin cojo chircun rë me chja me cojo xuta tsëhë gubieru xi sahmi Nina. ⁹ Peru ngujo xuta jan ne, casahmitaja rcu me, hane camacjaain rë me, hane choho cachja me tsëhë ndiya rë Jesús xcun yëjë ni xuta. Vëhë xi Pablo ne, cavetjuxin me tsëhë xuta jan, hacuaha quijicojo me xuta ladu rë Jesús. Cavetsihin me nchunchujun ni cachja me cojo xuta ngajan scuola rë ngu me xi hmi rë Tirano. ¹⁰ Cuatjin casahmi me cahntsua jo nu, vëhë xi yëjë xuta xi siu ngajan Asia ne, camachaya rë me tsëhë cjua rë Nai naja, sa xuta tjë rë Israel ne, o sa xutaxin.

Yatu quihndi rë Sceva

¹¹ Jemu jyë cjuarcun casahmi Nina ngajni rë xa xi casahmi Pablo. ¹² Hisca tsjian xi sahmixa cojo Pablo ne, quijicojo xuta casua rë me xuta hmu rë, hane

chíhin rë me ne, cavetjuxin, hisca xitsehen xi hinchaxahasen rë yahnga me ne, hacuaha cavetjuxin.

¹³ Peru ngujo cha tjë rë Israel xi tsujihya vaxëxin cha xitsehen xi hinchaxahasen rë xuta ne, hacuaha camameje cueyanangui cha ñihi rë Nai naja Jesús hora xi tivaxëxin cha xitsehen, hane cuitjin cachja cha:

—Tsëhë xi Jesús casuaxa ná me, me xi chja Pablo tsëhë ne, tivitëxa nuju xi cuetjunxun. —Cuatjin cachja cha.

¹⁴ Cha xi cuatjin sahmi vë ne, hacui yatu cha quihndi rë ngu nahmi xi hmí rë Sceva, ngu nahmi xi matitjun tsëhë xuta tjë rë Israel.

¹⁵ Hane ngu ndiya xi cuatjin cachja cha ne, cuitjin cafayangui xitsehen jan:

—Jesús ne, hvë me vëhë. Hacuaha hvë Pablo. Peru ngayun ne, ¿yo ngayun? —Cuatjin cafayangui xitsehen jan.

¹⁶ Hya xi camá ne, me xi hinchaxitsehen xahasen rë jan ne, cacaataha me cha, hane caca rë me catsinguijne me yëjë yatu cha, tsëhë xi jemu hñu ngahñu rë me. Cuatjin camá xi jemu casacuhmu rë cha xi cuacun jan, hane cavanga cha tu quixti ni tsëhë ndihya hiscan siu cha jan. ¹⁷ Xcusun xi camá vë ne, camachaya rë yëjë xuta nandya Efeso, sa xuta tjë rë Israel ne, o sa xutaxín. Hane ngayëjë ni me ne, jemu catsacjun me camá, hane camá jyë camá hnga Nai naja Jesús.

¹⁸ Hane jemu cjín xuta xi ha cavisehen me ladu rë Jesús ne, fitjengui me Pablo vijacun me tsëhë cjuasurqui xi sahmi me. ¹⁹ Hya xi camá ne, jemu cjín xuta xi sahmi cjuasurqui ne, quijicojo me xujun rë me jan, cavaca me ngajan xcun yëjë ni xuta. Hane xi casahmi me cuenta chji rë yëjë xujun rë me jan ne, jemu jyë camahani tujún cavetju chji rë. ²⁰ Cuatjin camá xi cja rë Nai naja ne, jercu cavitsojo sa hacuaha casacuhñu sa rë.

Suë jyë xi camá ngajan Efeso

²¹ Hane xi cavatju camá yëjë xcusun vëhë ne, caveñnacacun Pablo xi cjue me Jerusalén, cuatju me yëjë nandya tsëhë distritu Macedonia cojo yëjë nandya tsëhë distritu Acaya. Hacuaha cachja me cuitjin:

—Xi cuatju cjuë Jerusalén ne, hacuaha tjin ná xi cjuë hisca nandya Roma. —Cuatjin cachja me.

²² Ngajan xi catsingatju me jo xuta xi visecoo rë me jan, Timoteo cojo Erasto, ngajan distritu Macedonia. Peru me vëhë ne, casetaha sa me ngajan distritu Asia.

²³ Ngu nixtin xi quitahá me jan ne, cavechú ngu cjuandya jyë tsëhë ndiya rë Jesús. ²⁴ Ngu xihin xi hmí rë Demetrio ne, sahmi me yungun langa cojo suvá quicha tyava, xcusun rë yungun rë nina Diana. Hane xuta xi sahmi xa rë Demetrio ne, jemu casacu rë me tujún tsëhë xa vëhë. ²⁵ Ngajan xi Demetrio ne, casahmi tangun me yëjë xuta xi sahmi xa rë me cojo jingu sa xuta xi sahmi me xa vëhë ni ne, sehe cachja me cuitjin:

—Ngayujun ni ne, ha hyun ta tsëhë xa vihi ne, sacu naja yëjë tujún xi tjin naja. ²⁶ Ngayun ne, chutsujun hacuaha machaya nuju cja xi hacuiin suvá ni nguehe ta cojo jingujyë ni distritu Asia ne, tsujihya cha Pablo vë, sahmi cha xi vijnecacun xuta cjín hacuaha tsismicacun me nina naja ta, tsëhë xi chja cha xi nina xi nindajan cojo ntsan ne, hacuiin nina jain me. ²⁷ Jemu tsavi ta hacuiin suvá ni xa naja chajá ta cojo yungun rë nina naja Diana ne, cuechú hora xi cuenguiin chji rë, hacuaha hisca suvá nina naja ne, chajá me xi jyë hnga me cojo cjuatacun rë me ta me vëhë ne, yëjë ni xuta tsëhë jingujyë ni distritu Asia cojo xuta tsëhë jingujyë ni ngasunhndë ne, jemu faharcun rë me. —Cuatjin cachja me.

²⁸ Xi cahndë xuta cjua jan ne, jemu camacjan camahani rë me, sehe cajindaya me cachja me cuitjin:

—Jemu jyë hnga nina Diana naja. —Cuatjin cajindaya me cachja me.

²⁹ Jingujiyë ni ngajni nandya ne, jemu jyë suë cavejña. Ngajan xi xuta jan ne, vanga me cjuu cuma tangun me ngajan ndatsen ndihyavasen, taha tijuvëhya me Gayo cojo Aristarco, jo me tsëhë distritu Macedonia, me xi visecoo rë Pablo.

³⁰ Ngajan xi Pablo ne, meje cuisehenjñi me ngajni rë xuta cjin jan, peru xuta ladu rë Jesús ne, casuaain me cahndé. ³¹ Hacuaha ngujo xutaxa rë xi vinga rë Pablo ne, catsingatju me cjua tsëhë Pablo xi cjuuin me ngajan ndatsen ndihyavasen. ³² Ngujo xutacjin jan ne, jindaya me chja me cuitjin, ngujo nga me ne, jindaya me chja me cuatjin ta, tsëhë xi yëjë ni xuta ne, jemu camasuë rë cjuat-acun rë me. Jercu cjin me xi hisca hviiin me mé má cuatjin quiji camatangun me jan. ³³ Peru ngujo xutacjin jan ne, casuacuenda me Alejandru mé tsëhë xi cuatjin tijima, hya xi catsivaha xuta tjë rë Israel me xi secun me xcun. Ngajan xi Alejandru ne, casahmi tsja me cojo xutacjin jan xi sejyu me cojo sa xi cuma cuichja Alejandru ngatsë rë xuta tjë rë Israel. ³⁴ Peru xi cavëë xutacjin jan xi Alejandru ne, xuta tjë rë Israel má me ne, ngu tangun ni cajindaya me, vatju sa jo hora cachja me cuitjin:

—¡Jemu jyë hnga nina Diana naja! —Cuatjin cajindaya me cachja me.

³⁵ Hya xi camá ne, xi camá catsinguejyu secretariu xutacjin jan ne, sehe cachja me cuitjin:

—Ngayujun ngarcun ni ngayun xuta nandya matsejen ne, ha hyun ta tsajin hisca ngu xuta xi hviiin me xi nguehe Efeso tacun yungun rë nina Diana hacuaha nguehe tacun suvá nina xi cjanengui nguehe xi canduva ngahnga. ³⁶ Tsëhë xi tsajin yo xi cuma cuichja

xi hacuiin cuatjin ne, vëhë xi meje rë xi catisejyu ni ngayun, tsajin mé xi nihñu sa xi cjëë ningatuhuntacúnndujun.

³⁷ Cha xi cuicun canduvuncujun nguehe ne, tsajin mé xi choho casahmi cha cojo yungun naja, hacuaha tsajin mé xi choho chja cha tsëhë nina naja. ³⁸ Peru sa xi Demetrio cojo xuta xi sahmi xa rë me tjin yo xi sahmi si me cojo ne, tacun ndihyavasen, hacuaha tjin xutaxa rë. Ngajan catinchajyë xicjin me, jima ngu me. ³⁹ Hane sa xi tjin sa mé xi meje nuju ne, nixtin xi satë rë junta xi sehe cuma ne, hya cuma chihin. ⁴⁰ Sacuaha xcusun xi tijima vi ne, cuma tsingatahacacun me xi matitjun xi ngayaan ne, tinihña ngu si jyë condra tsëhë gobiernu. Ta sa xi cjuinenguise naja me mé má cuatjin canihña ne, sacuiin naja chuva rë hacutjin cuinújan mé má cuitjin tinihña ngu suë jyë vi.

⁴¹ Cuatjin cachja secretariu, sehe catsinguijnetaha me cjua cojo xutacjin ne, sehe cafe xingu xingu me.

Quiji Pablo distritu Macedonia cojo distritu Acaya

20 Hya xi camá ne, xi cavatju suë jyë jan ne, cajindaya Pablo xuta ladu rë Jesús, casua rë me cjuetacun. Sehe catsinguijnetaha me cjua, sehe cavetju quiji me distritu Macedonia. ² Hane jima ngu nandya xi cavatju me xi cafehe me Macedonia ne, hacuaha jercu cachja me cojo xuta ladu rë Jesús hacuaha casua rë me cjuetacun. Hane xi cavatju me yëjë nandya vëhë ne, cafehe me distritu Acaya. ³ Hane ngajan casetaha me jyan sá. Hane hya xi ha cjuaha me barcu xi cjue me distritu Siria ne, casacu camachaya rë me xi xuta tjë rë Israel ne, caviyuju me xi tsiquehen rë me. Vëhë xi catsingatahacacun me xi hitsë sa ndatjin cuya cjue ntsacu me xi táha ladu tsëhë Macedonia. ⁴ Hane cojo me xi cuicun vihi quiji me cojo rë me: Sopa-

ter, ngu xuta Berea xi quihndi rë Pirro; cojo Aristarco cojo Segundo, jo xuta Tesalónica; cojo Gayo, ngu xuta Derbe; cojo Timoteo; cojo Tíquico cojo Trófimo, jo xuta tsëhë distritu Asia. ⁵ Me xi cuacun vë ne, camatitjun me quiji me, hane ngajan caviyujuya niji me nandya Troas. ⁶ Peru ngayin ne, xi cavatju suhi tsëhë pan xi tsajin san rë ne, sehe cachjihin barcu xi cavetjin tsëhë Filipos, hane xi cafë hñú nixtin ne, sehe cavechintihin me ngajan Troas. Hane ngajan cavinechintihin yatu nixtin.

Quitahá Pablo ngajan nandya Troas

⁷ Ngajan xi nixtin ngu tsëhë totje ne, camatangun ngayin xi xinitanguin niñu ngayijin ni. Hane Pablo ne, cachja me cojo xuta. Hane tsëhë xi cuetju me cjue me xi cuma nchujun jan ne, quijinduju cachja me hisca cavechú vassen nixten. ⁸ Jemu cjín ndihi seti ngajan ndihya ngahnga hiscan camatangun ngayin. ⁹ Hane ngu cha xi hmí rë Eútico ne, tacun cha xcun ventana. Hane xi quijinduju sa cachja Pablo ne, jemu camanijñá rë cha. Hane tsëhë xi cacaain rë cha nijñá ne, cafañafë tjain camahani cha, hane cjanengui cha hisca xi má jyan pisu ndihya jan. Hane xi quiji catjunihnga rë cha ne, ha cahme cha. ¹⁰ Hane xi quijijne Pablo hiscan jiña nima ne, catsiquindi me yojo rë me sehe catsuvacja me nima. Hacuaha cachja me cuitjin:

—Xicamacjiin tacún ta, quicun cha vi.
—Cuatjin cachja Pablo.

¹¹ Ngajan xi Pablo ne, cavuya quijini me, sehe cajinë me niñu. Sehe cavisiajmi camaha sa me hisca xi casahasen, sehe cavetju me quiji me. ¹² Hacuaha quicun cha xi cjanengui jan, cafecojo xuta cha. Hane jercu casacu rë me cjuetacun xi quicun cha.

Quiji Pablo nandya Mileto

¹³ Ngayin ne, camatitjun ngayin catsanguin cavisihin barcu, hane sehe catsanguin nandya Aso, cojo sa xi chjihin-ntsin Pablo cahntsua barcu ngajan ta, tsëhë xi ha cuatjin camachihin cjua ta, tsëhë xi me vëhë ne, meje cjue ntsacu me. ¹⁴ Hane xi casacu xinguin cojo rë me ngajan Aso ne, cavisehen me barcu, sehe catsanguin tangun Mitilene. ¹⁵ Hane xi cavetjin ngajan ne, xi camá nchujun ne, cavatjin quixi rë Quío. Hane xi camá nchujun nga ne, cafihin Samos. Hane camá nchujun nga ne, cafihin nandya Mileto, ¹⁶ tsëhë xi Pablo ne, cavejñacacun me xi cuátjincjin tsëhë nandya Efeso, cojo sa xi hacuiin cuma tafi me ngajan distritu Asia, tsëhë xi me vëhë ne, jemu meje xati rë me cojo sa xi xati cuechú me ngajan Jerusalén, hane ngajan tsingatju me suhi Pentecostés.

Catsinguijnetaha Pablo cjua cojo xuta changá rë yungun Efeso

¹⁷ Hane jinguyëjë rë xi quitahá Pablo ngajan Mileto ne, catsingatju me quiji chjahá rë xuta changá rë yungun ngajan Efeso. ¹⁸ Hane xi cafehe xuta changá jan xcun Pablo ne, cuitjin cachja Pablo cojo rë me:

—Ngayun ne, ha hyunndujun hacutjin cavitejñataha cojo nuju yëjë ni nixtin hisca hya xi sehe tu cafëhë nguehe distritu Asia. ¹⁹ Ha hyun hacutjin casahme xa rë Nai naja: catsinguijne yojo naha, hisca cajfhnda, hacuaha jemu cjín cjuañihi cavátju camá ta, tsëhë xi xuta tjë rë Israel ne, jemu choho meje sahmi me cojo ná. ²⁰ Ngayun ne, ha hyun hacutjin xi cachjá yëjë cojo nuju yëjë cjua xi ndaja xi cuma nuju. Hacuaha ha hyun hacutjin casuá camachaya nuju cjuachacun hya xi camatangun ngayun ngayujun ni, hacuaha cëjë ndya nuju jima ngu ngayun, cachjá cojo nuju.

²¹ Cachjá cojo xuta tjë rë Israel hacuaha cachjá cojo xutaxín xi meje rë xi tsindeya me cjuatacun rë me hacuaha cuisehen me ladu rë Nina hacuaha meje rë xi cumangucacun me cojo Nai naja Jesús.

²² Quihndë ne, ngahan ne, tifé Jerusalén sacuatjin cavitexa ná Hasen rë Nina. Hveen mé xi cuátju cuma jan. ²³ Peru Hasen rë Nina ne, yějë ni nandya xi vátju ne, chja cojo ná xi hatuxa cjué ndavaya hacuaha jemu cuátju cjuañihi. ²⁴ Xi má ná ne, tangun ni xi tejña cjuahñu o sa xi cueya. Xi meje ná ne, xi tsingufnetaha xa xi casua ná Nai naja Jesús, xa xi suá cumachaya rë xuta cjuandajyihi xi chja tséhë cjuandaja rë Nina.

²⁵ Quihndë ne, ha hvë ta ha quihndë cuyuun chun ná, ngayujun ni xi casuá camachaya nuju tséhë gubiernu xi sahmi Nina. ²⁶ Véhë xi nguehe cuichjá cojo nuju ta, sa xi tjin ngu ngayun xi cuechuun xcun Nina ne, hacuiin ngahan quitjen jyé ta, ²⁷ tséhë xi ngahan ne, casuácuenda chichihin nuju yějë hacutjin xi cavejña Nina cjuatacun rë me. ²⁸ Nechun cuidado, hacuaha nihñu-cuidadun yějë xuta ladu rë Jesús, xi suvá Hasen rë Nina casuaxa nuju xi cuma titjun ngayun tséhë sacuaha obispos, cojo sa xi ngayun nihñu cuidado xuta rë yungun rë Nina. Me xi cuacun vë ne, casacu rë Nina me cojo jni rë Quihndi rë suvá me hya xi cahme me. ²⁹ Hya xi ha cavatju cavétjuxen tsujun ne, ngahan hvë ta cuinduva xuta, xi meje tsinguet-sun me cjuatacun rë yějë xuta ladu rë Jesús, sacuatjin tsiquehen chu lobo cjan rë chu tsánga. ³⁰ Hacuaha ngajñi nuju suvun ne, cuetjuiñi xuta xi cuichja me cjuandacha, cojo sa xi cuaxëxin me xuta ladu rë Jesús xi cuma ladu rë me. ³¹ Nechun cuidado. Hacuaha ninguitsjun ta, cahntsua jyan nu ne, nguixun nguitajñu cavicuyá nuju jima ngu ngayun. Jiya hora ne, hisca cajihnda.

³² Quihndë ne, nguehe cuiyujú nuju tsja Nai naja, cojo sa xi sahmi nuju me cuidado cojo cjuandaja rë me. Me véhë xi ma sahmi me xi cuma yehe sa cjuatacun nuju, hacuaha sua tangun nuju me cjuahñu xatsë cojo yějë sa xuta xi cavaxijin me. ³³ Ngahan ne, hacuiin catsihmucacun tujún o sa tsjian rë jingu sa xuta. ³⁴ Ngayun ne, hyun ta ngahan ne, casahmexa cojo ntsa vi xi casacu cjuachaja naha cojo me xi cavisecoo ná. ³⁵ Ngajñi rë yějë ni xcusun xi casahme ne, ngahan ne, catsingácun nuju xi, xi cuatjin hñu nihña xa ne, meje rë xi cuisecoon rë xuta xi jemu tjin rë cjuachaja. Hacuaha meje rë xi ninguitsjen cjua rë Nai naja Jesús, hya xi cachja me cuitjin: “Hitsë sa sua má naja xi tahan, xi cuma rë xi chjahan-ntsan.” Cuatjin cachja Nai naja.

³⁶ Hane xi cafë cachja Pablo cuatjin ne, sehe cavixcuhnchi me, casahmi me oración cojo yějë xuta jan. ³⁷ Yějë ni me jemu cajihnda me, quiji me catsu-vacja me Pablo, hisca cavitatsuha me. ³⁸ Cjua xi hitsë sa casua rë me cjuachoho ne, cjua xi cachja Pablo xi ha quihndë cuyaaín scuëë xuta jan me. Sehe quiji me cojo Pablo hiscan cavisehen Pablo barcu.

Quiji Pablo ngajan Jerusalén

21 Hya xi camá ne, xi cavejñi xuta jan ne, sehe ngu quixi ni quiji barcu cojo niji ne, cafihin Cos. Hane xi camá nchujun jan ne, cafihin Rodas. Hane xi cavetjin ngajan ne, cafihin Pátara. ² Hane xi casacu niji ngu barcu xi cjue distritu Fenicia ne, cavisihin sehe catsanguin. ³ Hane xi cachutsijin Chipre ne, cavatjin taha ladu quixi tséhë jan, catsanguin nduju xi cafihin quixi rë distritu Siria, sehe cafihin nandya Tiro ta, tséhë xi ngajan cuitujne chaha xi hinchacahntsua barcu. ⁴ Hane xi casacu xinguin cojo xuta ladu rë Jesús jan ne, cavinechintihin ngajan yatu nixtin. Hane ngujo profeta xi siu ngajan Tiro ne, tjin mé

cachja Hasen rë Nina cojo rë me, sehe cachja profeta jan cojo Pablo xi cjuin me Jerusalén. ⁵Xi cavechú nixtin xi cuetjin jan ne, sehe cavetjin catsanguin. Hane yějě xuta jan, cojo chjuun rë me cojo quihndi rë me ne, quiji cani niji me hisca tjeheh ndachacun, hiscan fë nandya. Sehe ngajan cavixcuhnchin, sehe canihni oración. ⁶Hane xi caninguijnitihiñ cja cojo rë me ne, sehe cavisihin barcu, hane me vëhë ne, cavuya cafe me ndava me xingu xingu me.

⁷Hane ngayin ne, catsanguin cojo barcu xi cavetjin tsëhë Tiro, hane cafihiñ Tolemaida. Hane xi catsanguin catihin rë xuta ladu rë Jesús nina ne, ngajan cavinechin cojo rë me ngu nixtin. ⁸Hane xi camá nchujun jan ne, cavetjin catsanguin, hane cafihiñ Cesarea. Sehe catsanguin ndava Felipe, me xi sua machaya rë xuta cjuandajyihi xi chja tsëhë Jesús. Me vëhë ne, ngu me tsëhë me xi ma yatu xi cavaxiji me xi visecoo rë apóstol. Hane ngajan cavinechin cojo rë me. ⁹Me vëhë ne, tjin rë me ñuju na nixti quihndi rë me, xi má na profeta. ¹⁰Hane jinguyějě rë xi nechintihin ngajan ngu nixtin ne, cafehe ngu profeta xi canduva tsëhë Judea, ngu me xi hmí rë Agabo. ¹¹Hane xi cafehetjengui niji me ne, quiji me cafaha me cinturón rë Pablo, sehe catsihñu me tsja me cojo ntsacu me cinturón jan, sehe cachja me cuitjin:

—Cuitjin chja Hasen rë Nina: “Xihin xi tsëhë cinturón vi ne, cuitjin tsihñu xuta tjë rë Israel me ngajan Jerusalén, hacuaha sahmi me entregadu xihin vëhë tsja xutaxín.” —Cuatjin cachja profeta jan cja rë Nina.

¹²Xi canuhyin cja vëhë ne, ngayin cojo xuta xi siu jan ne, canújin cojo Pablo xi cjuin me Jerusalén. ¹³Ngajan xi Pablo ne, cuitjin cafayangui me:

—¿Mé má cuatjin chjihndun? ¿Mé má cuatjin nihñuchuvun cjuatacun naha? Ngahan ne, ha tjin chjine ngahan,

hacuiin suvá ni xi cjué ndavaya ta hacuaha hisca cueya ngajan Jerusalén ngatsë rë xi ladu rë Nai naja Jesús ngahan. —Cuatjin cafayangui Pablo tsijin.

¹⁴Hane xi catsingatiin me cja xi canújin ne, ha quihndë canujiin sa cja vëhë ta cuitjin canújin:

—Catama sacuatjin Nai naja meje rë me. —Cuatjin canújin.

¹⁵Xi cavatju nixtin xi cuacun vë ne, sehe cavihinchjini tsijin, sehe catsanguin Jerusalén. ¹⁶Hacuaha cojo ngujo xuta ladu rë Jesús ngajan Cesarea quiji me cojo niji. Me xi cuacun vë quijicojo niji me hiscan xi cuinechin, ndava ngu xuta Chipre xi siutaha me Jerusalén, xi hmí rë Mnasón. Me vëhë ne, ha jemu hatsëë camahani xi xuta ladu rë Jesús má me.

Quiji Pablo xi cuisiajmi me cojo Jacobo

¹⁷Xi cafihiñ ngajan Jerusalén ne, xuta ladu rë Jesús jan ne, cafahatsja niji me cojo yějě ni cjuasua. ¹⁸Hane xi camá nchujun jan ne, Pablo ne, quiji me cojo niji xi cuisiajmi me cojo Jacobo. Hacuaha ha tjin tangun yějě xuta changá rë yungun jan. ¹⁹Hane xi cavatju cachja Pablo nina cojo rë me ne, sehe casuacuenda chichihin me yějě ni xcusun xi casahmi Nina ngajñi rë xa rë Nina xi casahmi Pablo ngajñi rë xutaxín. ²⁰Hane xi cavatju cahndë xuta jan cja xi cachja Pablo ne, casahmi jyë casahmi hnga me Nina, sehe cachja me cojo Pablo cuitjin:

—Ngayun ne, ha hyun xi ngajñi rë xuta tjë rë Israel ne, chuva mil xuta tjin me xi cavisehen me ndiya rë Jesús. Hacuaha yějě ni me ne, jemu ndaja faharcun me ley rë Moisés. ²¹Hacuaha xuta xi cuacun vë ne, casacu camachaya rë me xi ngayun ne, nújun cojo yějě xuta tjë rë Israel xi siu ngajan nangui rë xutaxín xi meje rë xi tsismicacun me ley rë Moisés, hacuaha mijí rë xi cuatë me chuxin rë quihndinda xi xihin, ha quih-

ndë mijí rë xi cjuetjengui sa me xcusun changá naja. ²² ¿Mé xi cuma ni? Hatuxa jyihí ni ne, sacú cumachaya rë me xi cafuhun. ²³ Vêhë xi quihndë ne, nihñu tutjin xi cuinújin cojo nuju. Nguehe ngajni ni ne, siu ñuju xihin xi casahmichihin me ngu cjua cojo Nina. ²⁴ Chjuhun cha vihi ne, tangun cojo cha yungun xi matitjun, cojo sa xi ngajan cuma tyjahi cha tangun cojo ngayun tsêhë xcusun xi tsavi xi cojo Nina sacuatjin xi ha xcusun naja. Hacuaha techjun tsêhë cha, cojo sa xi cuma sejnu rë rcu cha. Hane xi cuatjin nihñu ne, yêjê ni xuta ne, cumachaya rë me xi yêjê cjua xi camachaya rë me tsujun ne, quixiin ta ngayun ne, hacuaha ha tuxa nihñuchuhun sacuatjin chja ley rë Moisés. ²⁵ Hane sacuaha xutaxín xi cojo cavisehen ladu rë Jesús ne, ha caningatjin ngu xujun tsêhë me, hane xujun vêhë ne, chja xi meje rë xi sinii me xichinë xi caviyuju xcun ninandy-ojo, sinii me jni, sinii me yojo rë chu xi caxinchahndu rë xi cahme, sahmi me cjuatsehen xi sahmi xuta cojo ngu xi hacuiin chjuun rë hacuiin xihin rë. —Cuatjin cachja xuta changá jan cojo Pablo.

²⁶ Hane xi camá nchujun jan ne, sehe quijicojo Pablo cha xi cuacun jan, sehe catsityjahi tangun me yojo rë me cojo cha, sacuatjin xi ha xcusun rë xuta tjê rë Israel. Sehe ngajan xi Pablo cojo cha xi cuacun jan ne, cavisehen me yungun xi matitjun, xi cuichja me há cjín sa nixtin xi cuijnetaha xi cuma tyjahi camahani me, hane hacuaha cjue cjuatjo xcun Nina ngatsë rë jima ngu me.

Cafaha sindadu Pablo ngajan yungun xi matitjun

²⁷ Hya xi camá ne, xi ha meje cuechú xi cuma yatu nixtin jan ne, xuta tjê rë Israel xi canduva tsêhë distritu Asia jan ne, cavêë me Pablo ngajan cahntsua yungun xi matitjun tsêhë xi nchunchujun ni quiji me yungun tsêhë nixtin jan. Cat-

sisuë me cjuatacun rë xutacjín jan, sehe quiji cafaha me Pablo, ²⁸ hisca cajindaya me cachja me cuitjin:

—¡Ngayujun ni ngayun xuta tjê rë Israel, nduvun tiseccun niji! ¡Cha vihi xi tsujyihya chja cha condra naja ngayaan xuta rë Nina, cojo condra rë ley xi vitexa naja, cojo condra tsêhë cahndë vihi! Cuatjin tsujyihya chja cha cojo yêjê xuta jinguyê ni. Hacuaha catsinguetsun cha cahndë rë Nina vi, tsêhë xi canduvacojo cha xutaxín nguehe cahntsua yungun xi matitjun vi.

Cuatjin cajindaya me cachja me ta, ²⁹ tsêhë xi titjun ne, ha cavêë me Pablo cojo ngu xutaxín xi hmí rë Trófimo ngajan ngajni nandya, hane xi má rë me ne, quijicojo Pablo me cahntsua yungun.

³⁰ Hane yêjê xuta nandya ne, camasuë rë cjuatacun rë me. Hane vanga me quiji camatangun me yungun xi matitjun hiscan secun Pablo, sehe cafaha me cjavêjne me, cavaxë me tsêhë yungun jan. Sehe ngutjen ni casechja yêjê tingotjo jan. ³¹ Hane jinguyêjê rë xi tisahmi xutacjín jan cjuandya xi tsiquehen me Pablo ne, quiji cjua rë capitán tsêhë sindadu xi yêjê xuta Jerusalén ne, tjemu jyê suë tisahmi me. ³² Ngajan xi capitán jan ne, ngutjen ni quijijne me cojo sindadu rë me hiscan xi hinchataha xutacjín jan. Hane xi cavêë xutacjín jan sindadu cojo capitán rë cha ne, sehe casejyu me xi tivaja rë me Pablo. ³³ Hane xi quiji tiña capitán jan ne, sehe cafaha me Pablo. Sehe cavitexa me xi cumahñu Pablo cojo jo cadena. Hya xi camá ne, sehe cavinenguisse capitán jan cojo xuta jan yo xuta Pablo jan, hacuaha mé casahmi me. ³⁴ Hane ngujo xuta jan ne, hisca jindaya me chja me cuitjin, ngujo nga me ne, hisca jindaya me chja me cuatjin. Peru tsêhë xi casacuiin rë capitán jan cjuaquixi ngatsë rë suë jyê xi tijima jan ne, cavitexa me xi cjuecojo sindadu Pablo ngajan hiscan hinchá sin-

dadu. ³⁵Hane xi cafehe sindadu cojo Pablo hiscan ndë rë ne, hisca cavahahnga cha Pablo ngatsë rë cjuahngatacun xi sahmi xutacjín jan ta, ³⁶tsëhë xi tjengui me cjuí me jindaya me chja me cuitjin:

—¡Nicuhun cha! —Cuatjin chja me.

Sua Pablo cjuaquixi rë me xcun xutacjín

³⁷Hya xi ha tsinguissehen sindadu jan Pablo cahntsua ndihya ne, cachja Pablo cuitjin cojo capitán:

—¿Há tuun cahndé cuichjá cojo nuju ngujo cjuá? —Cuatjin cachja Pablo.

Ngajan xi capitán jan ne, cuitjin cachja me:

—¡Han, peru ma noje griego! ³⁸Hane ngajan xi hacuiin ngaye cha Egipto xi sehe tiña nixtin cavunihnga ngu si jyë hacuaha quijicojo rë ñuju mil cha tsiquehen ngajan ngu xín tsëhë nandya jan ni. —Cuatjin cachja capitán jan.

³⁹Ngajan xi Pablo ne, cuitjin cachja me:

—Ngahan ne, ngu cha tjë rë xuta Israel ngahan. Nangui naha ne, ngu nandya xi hacuaha jemu vengui chji rë xi hmí rë Tarso, tsëhë distritu Cilicia. Nihñu favor ne, tuhun cahndé cuichjá cojo xuta xi cuicun vi. —Cuatjin cachja Pablo.

⁴⁰Hane xi casua capitán jan cahndé xi cuichja Pablo ne, hora xi secun Pablo hiscan ndë jan ne, casahmitsja me cojo xuta xi sejyu me hitsë. Hane hora xi cafë xuta caviyujuyuu me ne, ngajan xi Pablo ne, cachja me cojo xuta jan hne hebreo, cuitjin cachja me:

22—Ngayujun ngarcun ni xi hacuaha xingueen nuju ne, nihñu favor ne, tisiñuju hacutjin suá cjuaquixi naha quihndë xcun ngayujun ni. —Cuatjin cavetsihin cachja me.

²Hane xi cahndë xutacjín jan xi hne hebreo cachja Pablo cojo rë me ne, hitsë

sa jercu caviyujuyuu me. Sehe cachja sa Pablo cuitjin:

³—Ngahan ne, ngu cha tjë rë Israel ngahan. Hacuaha catsin ngahan ngajan nandya Tarso tsëhë distritu Cilicia. Peru xi camacha ne, nguehe Jerusalén. Hane maestru Gamaliel cavicuya ná me sacuatjin camahani chja ley rë xutachanga naja. Hatuxa jemu ndaja fahárcun Nina, sacuatjin tiniñu ngayujun ni quihndë.

⁴Ngahan ne, cojo cjuahngatacun ne, catsujyëhëya tjënguë xuta xi tjengui ndiya xatsë vihi. Hisca cavitëxa xi cueya me. Cafahá me cëjëcojo me ndavaya, sa chjuun sa xihin me. ⁵Hisca nahmi xi matitjun cojo yëjë xuta changá rë yungun ne, cuma sua me cjuaquixi rë me tsëhë cjuá vihi ta, tsëhë xi hacuaha me xi cuacun vëhë casua ná me xujun xi suá rë xuta naja ngajan Damasco. Vëhë xi cëjë ngajan xi cjuahá xuta xi tjengui ndiya xatsë vihi, hane tsíhñu me cuinduva cojo me nguehe Jerusalén, cojo sa xi cuma me castigu.

Cachja Pablo hacutjin camá xi cavisehen me ladu rë Jesús

⁶Hya xi camá ne, hora xi ha tijima tiña ngayin xi tivanguin Damasco, sacuaha chuva rë nchisen ne, ha tu ñahñu canduva ngu ndihi jyë tsëhë ngahnga casahmi hasen rë hiscan tifé. ⁷Ña catícja, hane cahndë ngu cjuá xi cachja cojo ná cuitjin: “Saulo, Saulo, ¿mé má cuatjin nujihiye tjengui ná cojo cjuahngatacun?” Cuatjin cachja cjuá jan. ⁸Ngajan xi ngahan ne, cuitjin cafayanguë: “¿Yo ngayun, Tatá?” Cuatjin cafayanguë. Sehe cachja nga cjuá jan cojo ná cuitjin: “Ngahan xi Jesús tsëhë nandya Nasaret ngahan, xi tinujihiye tjengui ná cojo cjuahngatacun.” Cuatjin cachja nga cjuá jan cojo ná. ⁹Yëjë xuta xi cavisecoo ná xi tivanguin ne, cavëë me ndihi jyë jan, peru cahndiin me cjuá xi cachja cojo ná jan. ¹⁰Sehe nga-

jan xi ngahan ne, cachjá cuitjin: “¿Mé xi meje rë xi sahme, Tatá?” Cuatjin cachjá. Hane Nai naja ne, cuitjin cachja me cojo ná: “Tisatjinhngue ne, tisihiñ Damasco. Hane ngajan cumachaya ri yějë xcusun xi meje rë Nina xi nihñi.” Cuatjin cachja Nai naja cojo ná. ¹¹ Peru tséhë hasen jyë xi cavisehen túxcun jan ne, camat-sijin ná. Ngajan xi xuta xi tivisecoo ná xi tivanguin ne, cavaha me ntsa, sehe camá cafëhë Damasco.

¹² Hya xi camá ne, ngu xihin xi hmí rë Ananías, xi jemu faharcun rë Nina hacuaha sahmi yějë sacuatjin chja ley xi vitexa naja ne, ndaja chja yějë xuta tjë rë Israel xi siu jan tséhë. ¹³ Hane cafehet-jengui ná me hiscan tejña, hane cachja me cojo ná cuitjin: “Ngayun Saulo, cata-matsejen nga nuju ngundiya.” Cuatjin cachja me. Hane ha hora vëhë ni ne, camatsejen nga ná hane cahvë me. ¹⁴ Hya xi camá ne, sehe cachja me cojo ná cuitjin: “Nina rë xutachanga naja ne, cojo tjun sa ne, casuaxa nuju me xi cumachaya nuju mé xi meje rë me, hacuaha chun me xi hatuxa tyjahi cojo cjuatacun rë, hacuaha cuinuhyun cjua xi chja me cojo nuju. ¹⁵ Cuatjin camá ta, tséhë xi Nina meje rë me xi ngayun tuhun cumachaya rë yějë xuta tséhë me, cojo tséhë xcusun xi cahyun cojo tséhë cjua xi canuhyun. ¹⁶ Quihndë ne, ¿mé nechunyun rë ni? Tángun ni catixtenda ngayun, chjindayun rë Jesús cahntsua xahasen nuju, cojo sa xi cjuë jyë nuju.” Cuatjin cachja Ananías cojo ná.

Cachja Pablo hacutjin camá xi quiji cachja me cjua rë Nina cojo xutaxín

¹⁷ Hane xi cavatju vëhë ne, cavúya nga Jerusalén. Hane ngu ndiya hya xi tejñaya yungun xi matitjun tisahme oración naha ne, sacuaha xi camá ná xi cachja ngu chini cojo ná. ¹⁸ Cahvë Nina, hane cachja me cojo ná cuitjin: “Xati nihñi tacuin ne, tetjixin tséhë Jerusalén ta,

tséhë xi xuta nguehe ne, cumacjaain rë me cjua xi noje tsahan.” Cuatjin cachja Nina. ¹⁹ Hane ngahan ne, cuitjin cachjá: “Ngayun Nina naha, xuta nguehe ne, vëë me xi ngahan ne, catsujyëhëya yungun jinguyë ni, cafahá xuta xi tjengui me ndiya nuju, cavajá rë me, hacuaha cavinchá me ndavaya. ²⁰ Hane hora xi titsiquehen xuta Esteban, me xi cachja cjua nuju ne, hacuaha cojo ngahan sé-cun jan, tichuya ná, hacuaha hisca ngahan tisahme cuidadu tsjian rë cha xi titsiquehen rë Esteban jan.” Cuatjin cachjá. ²¹ Sehe ngajan xi Nina ne, cuitjin cachja me cojo ná: “Tihin ta, ngahan tsingátju ri hisca nangui cjin, cuihin cuinoje cojo xutaxín cjua naha.” Chja Nina cojo ná. —Cuatjin cachja Pablo.

Cavitexa capitán xi sehen rë Pablo

²² Hisca ngajan ni caca rë xutacjin cavisiñuju me cjua xi cachja Pablo, sehe cavetsihin me cajindayataha me cachja me cuitjin:

—¡Nicuhun cha xi cuajyihi vë ta ha quihndë vechiin chuva rë xi cuejña sa cha cjuahñu! —Cuatjin cajindaya me cachja me.

²³ Jinguyëjë rë xi cuatjin jercu tijin-dayataha xuta, titsiniya me tsjian rë me, hacuaha titsicjin me nihndë scuan ne, ²⁴ capitán jan ne, cavitexa me xi cjue chani rë Pablo cahntsua hiscan hinchá sindadu. Hacuaha cavitexa me xi chjahátaha rë Pablo táha sehen rë me, cojo sa xi sacú cjuaquixi mé má cuatjin jindayataha xuta Pablo. ²⁵ Hane hya xi ha camahñu me xi sehen rë me ne, sehe cachja me cuitjin cojo sindadu xi secun jan:

—¿Há chja ley xi cuma sehen rë ngu xuta Roma jinguyëjë rë xi cjëë cuma cuenda jyë rë me? —Cuatjin cachja me.

²⁶ Hane xi cahndë sindadu cjua vëhë ne, quiji cachja me cojo capitán cuitjin:

—¿Há hyun mé xi nihñu ni? Cha vëhë ne, cha Roma cha. —Cuatjin cachja sindadu jan.

²⁷ Ngajan xi capitán jan ne, quijitjen-gui me Pablo, sehe cachja me cuitjin:

—Tinoje cojo ná ne, ¿há xuta Roma jain ngaye? —Cuatjin cachja me.

Ngajan xi Pablo ne, cuitjin cafayangui me:

—Juun. —Cuatjin cafayangui me.

²⁸ Ngajan xi capitán jan ne, cuitjin cachja me:

—Ngahan ne, jemu jyë tujún cavechjë xi camá ngahan xuta Roma. —Cuatjin cachja me.

Ngajan xi Pablo ne, cuitjin cachja me:

—Peru ngahan ne, xuta Roma ngahan hisca xi catsin ngahan. —Cuatjin cachja me.

²⁹ Hya xi camá ne, sindadu xi cjua-hataha rë Pablo jan ne, ngutjen quijixin cha tsëhë Pablo. Hacuaha capitán jan ne, jemu catsacjun me camá xi cuatjin catsihñu me Pablo tsëhë xi camachaya rë me xi Pablo ne, xuta Roma me.

**Cavisehen Pablo xi cuma
cuenda jyë rë me xcun me xi
matitjun tsëhë xuta tjë rë Israel**

³⁰ Hane xi camá nchujun jan ne, tsëhë xi meje cumachaya rë capitán jan cjuaquixi mé má cuatjin cavinchajyë xuta tjë rë Israel Pablo ne, cavitexa me quiji casehenndaya Pablo, hacuaha cavitexa me xi cumatangun yëjë nahmi xi matitjun cojo yëjë sa xuta xi matitjun. Hane xi cafehecojo sindadu Pablo jan ne, sehe quijicani capitán me xcun yëjë xuta xi matitjun jan.

23 Ngajan xi Pablo ne, xi cavut-sejenya me xcun yëjë xuta xi matitjun jan ne, sehe cachja me cuitjin:

—Ngayujun ni ne, nguehe cuichjá cojo nuju ta ngahan ne, hisca ntsacu cavetsihin hisca quihndë ne, hatuxa tyjahi cju-

atacun naha xcun Nina. —Cuatjin cachja me.

² Hane Ananías, nahmi xi matitjun jan ne, cavitexa me xi xuta xi hinchacun hiscan secun Pablo xi cuajaya me hntsua Pablo. ³ Ngajan xi Pablo ne, cachja me cuitjin:

—¡Nina cuaja nuju me, ngayun xuta ndacha! ¡Nechun ndyá xi chjuhunchuvun ná cojo ley rë Moisés, sehe vitexun xi cuajaya xuta ntsuva, handasa chja ley xi ndajintjin xi cuatjin nihñu! —Cuatjin cachja me.

⁴ Hane xuta xi hinchacun hiscan secun Pablo jan ne, cuitjin cachja me:

—Haján, ¿há cuatjin choho noje cojo nahmi xi matitjun xi Nina casuaxa rë? —Cuatjin cachja me.

⁵ Sehe ngajan xi Pablo ne, cuitjin cafayangui me:

—Haan, peru ngahan ne, hveen xi me vëhë xi nahmi xi matitjun me ta, ngahan ne, ha hvë xi xcun xujun rë Nina ne, cuitjin camahindu: “Mijí rë xi choho cuinújun cojo me xi matitjun tsujun.” —Cuatjin cachja Pablo cjua xi camahindu xcun xujun rë Nina.

⁶ Hane ha vëë Pablo xi ngujo xuta xi matitjun jan ne, xuta saduceo me, hane ngujo nga me ne, xuta fariseo me. Vëhë xi cachjahñu me xcun junta cuitjin:

—Ngayujun ni ne, nguehe cuichjá cojo nuju ta ngahan ne, xuta fariseo ngahan, hacuaha quihndi rë xuta fariseo. Ngatsë rë xi vetahácacun xi nima ne, cuya cjuahñu ne, vëhë xi tichjahachuva ná. —Cuatjin cachjahñu Pablo.

⁷ Hane xi cachja Pablo cuatjin ne, cavetsihin cacjan xuta fariseo cojo xuta saduceo, hane hacuiin tangun camá me cojo cjuatacun rë me. ⁸ Xuta fariseo ne, chja me ta nima ne, cuya cjuahñu, hacuaha chja sa me xi tjin ángel hacuaha tjin hasen naja. Peru xuta saduceo ne, chja me ta quixiin. ⁹ Hya xi camá ne, cavisatjenhnga ngu suë jyë. Ngajan xi

cavetjuiñi ngujo cha xi vicuya cjuachacun xi hacuaha fariseo cha ne, cachja cha cuitjin:

—Sacuiin niji hisca ngu jyé rë cha xi cuijyihí vi. ¿Há ngayaan hyan sa xi ngu ángel o sa xi ngu hasen cachja cojo rë cha? —Cuatjin cachja cha.

¹⁰ Hane hya xi sué xi tacun jan camajyé sa ne, jemu catsacjun capitán jan tséhë xi tsiquehen xuta Pablo. Hane vëhé xi cavitexa me sindadu xi cjuejne, cuaxëxín cha Pablo tséhë ngajñi rë xuta jan, cjuecojo cha me cahntsua hiscan híncha sindadu.

¹¹ Hane xi camá nguixun nchujun jan ne, quijitjengui Nai naja Pablo, cuitjin cachja me cojo rë me:

—Tejñi hñu xahasen riji ta, tséhë xi sacuatjin canoje ngatsë naha nguehe Jerusalén ne, hacuaha cuatjin tjin ri xi cuinoje ngajan Roma. —Cuatjin cachja Nai naja.

Casahmichihin xuta cjua xi tsiquehen me Pablo

¹² Hane xi camá nchujun nga jan ne, ngujo xuta tjë rë Israel jan ne, casahmitangun me cjua xi hacuiin sinë hacuiin cuihi me jinguyëjë rë xi cjëë tsiquehen me Pablo. ¹³ Quisun sa xi yachan xuta xi cuatjin caviyujucacun me. ¹⁴ Hya xi camá ne, quiji me xcun yëjë nahmi xi matitjun cojo xuta changá jan, hane cachja me cojo me cuitjin:

—Ngayin ne, canihñitanguín cjua xi xinii siín jinguyëjë rë xi cjëë niquihin cha Pablo. ¹⁵ Quihndë ne, ngayun cojo sa me xi yahnga xi matitjun ne, tuhun cumachaya rë capitán ne, cataxë me cha Pablo, catinduvacojo me cha xcun junta xi cuma, sacuaha xi meje sa nuju cjuaquixi tséhë jyé rë cha. Hane ngayin ne, ha tjin chjine ngayin xi niquihin cha chaja sa xi cjuehe cha xcun junta. —Cuatjin cachja xuta jan.

¹⁶ Peru cha quihndi rë na tichja Pablo ne, xi camachaya rë cha tséhë cjuandacha jan ne, quiji cha hiscan híncha sindadu hane casuacuenda cha Pablo tséhë cjua xi camachaya rë cha. ¹⁷ Sehe ngajan xi Pablo ne, cajindaya me ngu cha xi matitjun tséhë sindadu, sehe cachja me cojo cha cuitjin:

—Tángun cojo cha vihi xingueen xcun capitán tséhë xi tjin cjua xi cuichja cha cojo rë me. —Cuatjin cachja Pablo.

¹⁸ Ngajan xi sindadu jan ne, quijicojo cha cha xicjin Pablo jan xcun capitán, sehe cachja cha cuitjin:

—Cha Pablo xi jiya ndavaya jan ne, cajindaya cha ngahan, sehe cachja cha cojo ná xi cuinduva cojo cha vihi nguehe ta, tséhë xi tjin xu cjua xi cuichja cha cojo nuju. —Cuatjin cachja cha sindadu jan.

¹⁹ Ngajan xi capitán jan ne, cafaha me tsja cha xicjin Pablo ne, sehe quijixin me cojo cha ngu ladu sehe ngajan cafinenguise me cha cuitjin:

—¿Mé cjua xi cuinoje cojo ná? —Cuatjin cafinenguise me.

²⁰ Hane cha xicjin Pablo jan ne, cuitjin cachja cha:

—Ngujo xuta tjë rë Israel ne, casahmitangun me cjua xi cuichja me cojo nuju xi cuanguncujun tsini naha xcun me xi matitjun tséhë me, sacuaha xi tjin sa cjua xi meje cjuinenguise rë me. ²¹ Peru xicamacjaain nuju cjua rë me ta, vatju sa yachan xuta xi hinchaya rë me ngajan ndiya, xi casahmichihin me cjua xi sinii cuiin me jinguyëjë rë xi cjëë tsiquehen me tsini naha. Ndicumaha ni ne, siuya me xi cuinújun xi ndatjin. —Cuatjin cachja cha xicjin Pablo.

²² Ngajan xi capitán jan ne, cuitjin cachja me cojo rë cha:

—Tjihin ne, tsajin yo xi cuinoje cojo xi catehe camachaya ná cjua vihi. —Cuatjin cachja me.

Quiji chani rē Pablo xcun Félix, me xi matitjun

²³ Hya xi camá ne, capitán jan ne, caindaya me jo sindadu rē me, sehe cachja me cojo cha cuitjin:

—Tuhunchjinu jo cientu sindadu cojo jyanchan tē cha xi miji naxin cojo jo cientu sa cha xi vaha lanza ne, cojo sa xi fane ñaja tsēhē nguixun ne, cuetju cha, cjue cha hisca nandya Cesarea. ²⁴ Hacuaha tuhunchjinu ngujo naxin xi cuijin Pablo, xi cuangun chanu me xcun Félix, me xi matitjun. —Cuatjin cachja capitán.

²⁵ Sehe catsihindu me ngu xujun xi chja cuitjin:

²⁶ “Ngahan, Claudio Lisias ne, tsingátju ngu nina naha tsujun, ngayun Félix, ngayun xi matitjun ngayun tsahan. ²⁷ Cha xi cuijyihí vi ne, cafaha xuta Israel cha. Hitsē sa ne, catsiquehen me cha. Hane xi camachaya ná xi cha Roma cha ne, cējē cojo sindadu naha, cavaxētjē cha. ²⁸ Hane tsēhē xi meje cumachaya ná mé má cuatjin vinchajyē xuta cha ne, cējēcojo cha xcun xutaxa rē yungun cojo xcun xuta changá rē xuta Israel. ²⁹ Hane ngahan ne, camachaya ná ta vinchajyē me cha, tsēhē xi faharcuaain cha ley rē suvá me. Peru jyē xi vincha me tsēhē cha ne, vechiin chuva rē xi cueya cha o sa cjue cha ndavaya. ³⁰ Hane xi camachaya ná xi casahmichihin xuta cjua xi tsiquehen me cha ne, ngutjen ni catsingátju cha xcun ngayun, hacuaha cavitēxa rē xuta xi vinchajyē rē cha cuinduva me ndyá cuichja me cojo nuju mé má cuatjin vinchajyē me cha.” Cuatjin chja xujun jan.

³¹ Hya xi camá ne, cafaha sindadu jan Pablo, quijicojo cha me nguixun hya nandya Antípatris, sacuatjin cjua xi cachja capitán cojo cha. ³² Hane xi camá nchujun jan ne, cavuya sindadu xi fi ntsacu jan ngajan Jerusalén, hane cha

xi hinchasun naxin jan ne, quiji sa cha cojo Pablo. ³³ Hane xi cafehe cha cojo rē me Cesarea ne, casahmi entregadu cha xujun xi yaha cha, hacuaha casahmi entregadu cha Pablo tsja me xi matitjun.

³⁴ Hya xi camá ne, xi cafē cavutaya me xujun jan ne, sehe cavinenguise me jani distritu rē Pablo. Hane xi camachaya rē me xi Pablo ne, distritu Cilicia distritu rē me ne, ³⁵ cuitjin cachja me:

—Hya xi cjuehe xuta xi vincha me jyē riji ne, hya cuíhndē cjua riji. —Cuatjin cachja me.

Sehe cavitexa me xi setjo Pablo ngajan ngu cahndē tsēhē ndihya jyē xi casahmi Herodes, hiscan xi má ndava me xi matitjun.

Cavinchajyē xuta tjē rē Israel Pablo

24 Hane xi cavatju hñú nixtin jan ne, cafehe nahmi xi matitjun xi hmí rē Ananías ngajan Cesarea, cojo ngujo xuta changá cojo ngu me xi cuichjatje ngatsē rē xuta xi cuacun vē, ngu me xi hmí rē Tértulo. Me xi cuacun vē ne, quiji cavinchajyē me Pablo xcun me xi matitjun. ² Hane xi cachjindaya rē Pablo ne, cavetsihin cavinchajyē Tértulo me, cuitjin cachja me:

—Ngatsē nuju ngayun ne, jemu tjin cjuandaja cjuajeya ngajñi niji. Hacuaha tsēhē xi jemu ndaja chjuhuncuendun yējē ni nandya niji ne, vēhē xi cjuí xcun nandya. ³ Jemu tihín camahani nacuechji nuju, ngayun Félix, tsēhē yējē cjuandaja xi tinihñu vē. ⁴ Cojo sa xi ha quihndē suaan sa nuju cjuandya ne, nihñu favor ne, nihñuuyun tacún cojo niji ne, tisiñuju hitsē ngujo cjua xi cuinújin. ⁵ Cha xi cuijyihí vi ne, jemu cjuaxti camahani cha. Jingujyē ni ngasunhndē ne, titsujyihya tivunihnga cha si ngajñi niji ngayijin ni xuta tjē rē Israel. Hacuaha cha vihi ngu cha xi matitjun ngajñi rē xuta ladu rē cha Nasaret. ⁶ Hisca cahntsua yungun xi matitjun

meje sahmi cha ngu xcusun xi ndajin tjin xi nihña, vëhë xi cachjihin cha. Ngayin ne, meje chjihinchuvin cha sacuatjin vitexa ley niji, ⁷peru cafehe capitán Lisias ne, cafahatahá me cha, hacuaha cavitexa niji me xi ngayin xi vinchin jyé rë cha ne, cuinduvín hisca nguehe xcun ngayun. ⁸Hora xi chjuhuntuhun rë cha ne, ngayun suvun ni sacú nuju cjuaquixi tsëhë yëjë ni jyé xi vinchin tsëhë cha. —Cuatjin cavinchajyë Tértulo.

⁹Yëjë xuta tjë rë Israel xi cojo siu jan ne, hacuaha cachja me xi cuatjin jain.

Casua Pablo cjuaquixi rë me xcun Félix

¹⁰Hane hora xi casahmitsja me xi matitjun cojo Pablo xi cuichja me ne, Pablo ne, cuitjin cachja me:

—Ngayun ne, ha hvë xi jemu tsëë chjuhunchuvun xuta nación naha tsëhë jyé rë me. Vëhë xi ngahan ne, cojo yëjë ni cjuasua ne, suá cjuaquixi naha cojo nuju. ¹¹Sa xi chjinengunsun suvun ne, cuma sacú nuju cjuaquixi ta ngahan ne, sehe tjin rë tejó nixtin xi cëjë Jerusalén xi cjuahárcun Nina. ¹²Peru casacuintsjaain ná me xi tivisiajmeccen o sa tisuá suë rë cjuatacun rë xuta, sa cahntsua yungun xi matitjun, sa cahntsua tu jarë ni yungun langa, o sa jingu jyë ni ngajñi nandya. ¹³Hacuaha hisca cumaji tsinguixi me xi cjuaquixi jain tsëhë jyé xi víncha me tsahan quihndë. ¹⁴Peru ngu nga ne, nguehe cuichjá cojo nuju cjuaquixi ta ngahan ne, hatuxa fahárcun jain Nina rë xutachanga naha, sacuatjin faharcun xuta xi híncha ndyá xi chja me xi cuicun vihi xi ngu ndiya ndacha. Hacuaha macjain ná yëjë ni cjuat tsëhë ley rë Moisés cojo yëjë cjuat xi catsihindu profeta. ¹⁵Hacuaha véta-hacárcun Nina sacuatjin vetahacacun me xi cuicun vi xi nima ne, cuya cjuahñu, sa tyjahi o sa xi hacuiin tyjahi cjuatacun rë. ¹⁶Vëhë xi ngahan ne, yëjë ni hora ne,

sahme ngu jyë xi tyjahi cjuatacun naha xi cuma rë Nina cojo xi cuma rë xuta.

¹⁷Hane xi ha jemu cavatju nixtin ne, cavúya canduvatjënguë xuta naha, yahá tujún xi cuisécoo rë me hacuaha suá cjuatjo xi cjue xcun Nina. ¹⁸Hane xi cuatjin canduva ne, me xi cuicun vi ne, cavëë ná me ngajan yungun xi matitjun, tyjahi ngahan sacuatjin xi ha xcusun niji. Hacuaha hacuiin jemu cjín xuta siu me cojo ná hacuaha tsajin ngu suë jyë xi tijima. ¹⁹Peru siu ngujo xuta tjë rë Israel xi canduva me tsëhë distritu Asia. Me xi cuacun vë xi sa tjin mé jyë meje cuíncha me tsahan ne, catinduva catíncha me jyë naha nguehe xcun ngayun. ²⁰O sa tsajin ne, suvá me xi cuicun vi catichja me mé cjuatsehen naha casacu rë me, hya xi cavisécun xcun xutaxa rë yungun niji. ²¹Ngu tu tu ni cjuat xi cajuindáya cachjá hya xi sécun ngajñi rë me ne, cuitjin cachjá: “Ngatsë rë xi macjain ná xi nima ne, cuya cjuahñu ne, vëhë xi tichjahachuva ná quihndë xcun ngayun.” Cuatjin cachjá. —Cjua vëhë xi cachja Pablo xcun Félix, me xi matitjun.

²²Hya xi camá ne, tsëhë xi ha vëë ndaja Félix cjuat tsëhë Ndiya Xatsë ne, xi cuejñavasen me cjuacjintacun vëhë ne, cuitjin cachja me:

—Hya xi cjuehe Capitán Lisias ne, sehe sahmechehen cjuacjintacun nuju vi. —Cuatjin cachja me. ²³Hane sehe cavitexa me sindadu rë me xi cuetjo cha Pablo, peru sahmi cha cjuandaja ne, hacuiin cuitijaya rë cha xuta rë Pablo xi cjue cjuahacuenda rë me.

Cavisiajmi Pablo cojo Félix cojo Drusila

²⁴Hane xi cavatju ngujo nixtin ne, cavuya cafehe Félix, xi quiji me ngu nangui. Cafehe me cojo Drusila, chjuun rë me, ngu chjuun xuta tjë rë Israel. Hya xi camá ne, catsingatju me quiji chjahá rë Pablo, sehe cavisiañuju me cjuat xi cachja

Pablo tséhë hacutjin xi cumangutacuun cojo Jesucristu. ²⁵ Jinguyëjë rë xi tichja Pablo tséhë ngu cjuatacun tyjahi, tséhë ngu xahasen tyjahi, cojo tséhë nixtin xi tsichuva Nina xuta tséhë jyë rë me ne, Félix ne, catsacjun me camá, sehe cachja me cojo Pablo cuitjin:

—Quihndë ne, cuma cjuihin. Hane hya xi cumahya ná ne, sehe squindáya nga ri. —Cuatjin cachja me.

²⁶ Peru hacuaha tsingatahacacun me sa xi sua Pablo me tujún. Véhë xi jemu cjín ndiya cajindaya me Pablo, cavisiajmi me cojo.

²⁷ Xi cavatju jo nu ne, cavetju Félix tséhë xcun xa rë me, hane cavisehen nga ngu cahndé rë me, ngu me xi hmí rë Porcio Festo. Peru tséhë xi Félix ne, meje sahmi me cjuandaja cojo xuta tjë rë Israel ne, caseya cuaha Pablo ndavaya.

Cafehya Pablo xi cuma me consina tsja César

25 Hya xi camá ne, cafehe Festo xi cjuahaxa me ngajan Cesarea. Hane xi cafë jyan nixtin ne, cavetju me quiji me Jerusalén. ² Hane xi cafehe Festo ngajan Jerusalén ne, nahmi xi matitjun cojo me xi matitjun tséhë ngajni rë xuta tjë rë Israel ne, casua me camachaya rë Festo tséhë jyë xi vincha me tséhë Pablo. ³ Hane cafehya me favor xi tsingatju Festo cjue chjahá rë Pablo xi cjue me ngajan Jerusalén. Cuatjin meje rë me xi cuma ta, tséhë xi ha cavisiajmichihin me xi tsiquehen me Pablo ngajan ndiya. ⁴ Ngajan xi Festo ne, cachja me ta Pablo ne, tacunñihi me ngajan Cesarea, hacuaha suvá Festo ne, ha cjue xati me ngajan. ⁵ Hacuaha cachja sa me cuitjin:

—Catji xutaxa rë yungun nuju cojo ná, hane sa xi tjin mé jyë rë cha ne, ngajan catincha me jyë rë cha cojo ná. —Cuatjin cachja me.

⁶ Hya xi camá ne, cavejna sa Festo ngajan Jerusalén sacuahe jyin o sa të nixtin, sehe cafe me Cesarea. Hane camá nchujun tséhë nixtin xi cafehe me jan ne, quiji me cavéjna me xcun xa rë me, sehe cavitexa me cjue chjahá rë Pablo.

⁷ Hane xi cafehe Pablo ne, quiji caxinchacunndee xuta tjë rë Israel xi canduva tséhë Jerusalén jan tjeheh rë me, hane jemu cjín xcusun jyë rë Pablo xi cavincha me, peru hisca camaji catsinguixi me xi cjuaquixi jain. ⁸ Hane Pablo ne, xi casua me cjuaquixi rë me ne, cuitjin cachja me:

—Tsajin camahani mé jyë xi casahme, hacuiin condra rë ley niji ngayin xuta tjë rë Israel ne, hacuiin condra rë yungun xi matitjun tsijin ne, hacuiin condra rë César, me xi matitjun tsajan. —Cuatjin cachja Pablo.

⁹ Hane xi meje sahmi Festo cjuandaja cojo xuta tjë rë Israel ne, cuitjin cafinenguise me Pablo:

—¿Há meje cuihin Jerusalén, cojo sa xi ngajan tsichúva ri cojo jyë riji vi? —Cuatjin cafinenguise me.

¹⁰ Ngajan xi Pablo ne, cuitjin cafayangui me:

—Ha ndihyavasen rë César, me xi matitjun camahani, sécun, hane ha nguehe xi meje rë xi chjahachuva ná cojo jyë naha. Xuta tjë rë Israel ne, tsajin camahani mé xi choho sahme cojo rë me. Ngayun ne, ha ndaja hyun. ¹¹ Sa xi tsejen ta casahme ngu xcusun xi vechú chuva rë xi cueya ne, tsingatehen xi cueya. Peru sa xi tsajin cjuaquixi tséhë hisca ngu jyë xi vincha me tsahan ne, tsajin yo xi cuma sahmi ná entregadu tsja xuta xi cuacun vë. Ngahan ne, féhya nuju xi nihñu ná consina tsja César, me xi matitjun camahani. —Cuatjin cafayangui me.

¹² Ngajan xi Festo ne, xi cavisiajmicjín me cojo yëjë me xi visecoo rë me ne, sehe cachja me cuitjin cojo Pablo:

—Cachjahye xi sahme ri consina tsja César ne, tsja César tsingátju ri. —Cuatjin cachja Festo.

Cavisehen Pablo xcun Agripa

¹³Hane xi cavatju ngujo nixtin jan ne, ngu me xi matitjun tsêhê jingu sa distritu, me xi hmí Agripa ne, cafehe me Cesarea cojo Berenice na xicjin me, xi sua me ngu nina Festo. ¹⁴Hane tsêhê xi caviyuju me ngujo nixtin jan ne, cachja Festo cojo rê me tsêhê cjuacjintacun xi tacun tsja me tsêhê Pablo. Cuitjin cachja me:

—Nguehe ne, tacunñihi ngu cha xi cavejñavasen Félix cjuacjintacun rê.

¹⁵Hya xi cêjê Jerusalén ne, nahmi xi matitjun cojo xuta changá tsêhê xuta tjê rê Israel ne, casua me camachaya ná tsêhê cha vêhê, hacuaha cafehya me xi cuichjá xi cuma cha castigu. ¹⁶Peru ngahan ne, cachjá cojo rê me ta ngayin xuta Roma ne, tsajin niji xcusun xi nihñi castigu ngu xuta xi hinchá jyé rê me jinguyêjê rê xi cjêê cuisehen me xcun cojo xcun cojo me xi vinchá jyé rê me, hacuaha sacú rê me cahndé xi sua me cjuaquixi rê me tsêhê jyé xi hinchá tsêhê me. ¹⁷Hane hya xi cafehe yêjê xuta xi cuacun vê nuehe ne, catsichajan hora ta xi tu camá nchujun jan ne, cêjê ndihyavasen ne, catsingatju quiji chjahá rê cha. ¹⁸Hane xi caxinchacun xuta xi cuacun jan cachja me ne, hisca ngu jyé jyê sacuatjin tsingátaha cáacun ne, cavinchaain me tsêhê cha ta, ¹⁹suvá ni cjua tsêhê xcusun rê yungun rê me xi casahmichiin xu cha, cojo cjua tsêhê ngu nima xi hmí rê Jesús, xi chja cha ta tacun quicun. ²⁰Peru ngahan ne, casacuinyiin ná hacutjin sacú ná cjuaquixi tsêhê cjuacjintacun vêhê ne, cafinenguêsê rê cha sa xi meje cjue cha Jerusalén hane ngajan chjahachuva rê

cha tsêhê cjuacjintacun xi yaha rê cha. ²¹Peru tsêhê xi cafehya cha xi seyañihi sa cha hisca xi suvá me xi matitjun camahani tsichuva me cjuacjintacun rê cha ne, cavitêxa xi quiji caseyañihi sa cha hisca hya xi cuma tsingátju cha tsja me. —Cuatjin cachja Festo.

²²Ngajan xi Agripa ne, cuitjin cachja me cojo Festo:

—Ngahan ne, hacuaha catsingátahacácun xi cuisñijú cjua rê cha xi cuajyihî vê. —Cuatjin cachja me.

Hane Festo ne, cuitjin cafayangui me:

—Sa cuatjin ne, nchujun ni cuisñiju cjua rê cha. —Cuatjin cafayangui me.

²³Hane xi camá nchujun jan ne, ngu cjuandya jyê tjin xi cafehe Agripa cojo Berenice. Hane quiji cavisehentangun me ndihyavasen cojo yêjê capitán cojo yêjê xuta xi matitjun tsêhê nandya jan. Sehe cavitexa Festo quiji chjahá rê Pablo. ²⁴Hane xi cafehe Pablo ne, sehe cachja Festo cuitjin:

—Ngayun Agripa, cojo ngayujun ni xi tjin tangun ngayaan nuehe ne, nuehe tacun cha vihi xi yêjê xuta tjê rê Israel ne, cavinchajyê me cha cojo ná ngajan Jerusalén, hacuaha cavinchajyê me cha hisca nuehe. Jindaya me chja me ta ha quihndé mijí rê xi cuejña sa cha cjuahñu. ²⁵Peru ngahan ne, casacuiin ná hisca ngu xcusun xi casahmi cha xi vechú chuva rê xi cueya cha. Hane xi cafehya suvá cha xi cuma cha consina tsja me xi matitjun camahani ne, cavejñá cáacun xi tsingátju cha. ²⁶Peru tsajin ngu cjua xi cuma tsihindu rê nai naha, ¿há vihi ne, há vêhê casahmi cha? Vêhê xi cavitêxa xi cuisehen cha xcun ngayun, Agripa, cojo sa xi cjuê chjahantahan rê cha ne, sacú ná cjua xi tsihindu. ²⁷Xi má ná ne, tsajin ná cjuatacun sa xi tsingátju ngu presu hacuaha cuichjaan mé jyé xi caxincha tsêhê. —Cuatjin cachja Festo.

Casua Pablo cjuaquixi rë me xcun Agripa

26 Hya xi camá ne, cuitjin cachja Agripa cojo Pablo:

—Quihndë ne, tjin cahndë xi cuinoje ngatsë riji. —Cuatjin cachja me.

Ngajan xi Pablo ne, catsiquijin me tsja me, sehe casua me cjuaquixi rë me cuitjin:

²—Agripa, ngayun xi matitjun ngayun ne, jemu ndaja tsahan xi xcun ngayun suá cjuaquixi naha quihndë tsëhë yëjë jyë xi vincha xuta tjë rë Israel tsahan. ³Jemu ndaja tsahan ta, tsëhë xi ngayun ne, ha hyun yëjë xcusun naja cojo cjuacjintacun naja ngayaan xuta tjë rë Israel. Vëhë xi nihñu cjuandaja ne, nihñu jyë tacún xi cuisinuju ngujo cjua naha.

Xcusun changá rë Pablo

⁴Quihndë ne, yëjë xuta tjë rë Israel ne, vëë me hacutjin xcusun naha hisca cjua lihndi naha, hya xi cavitejña nangui naha cojo hya xi cavitejña Jerusalén. ⁵Hacuaha, sa xi meje cuichja me cojo nuju ne, cuma cuichja me ta ha vëë me xi ngahan ne, hatuxa xuta fariseo ngahan, xuta xi chinchihin tjengui me ndiya rë Nina naja. ⁶Quihndë ne, nguehe sécun tichjaháchuva ná cojo cjuatacun naha ngatsë rë xi vétahacácun cjua xi cachja Nina cojo xutachanga naja. ⁷Ngayejen ni xi tjë rë tejó xutachanga naja ne, vetahantacun xi cuechuntahan cjua vëhë. Vëhë xi cojo yëjë ni xahasen naja ne, chjahanrcun Nina nixtin nixten. Hane tsëhë xi vetahacácun cjua vëhë ne, vëhë xi vinchajyë ná xuta tjë rë Israel. ⁸Ngayujun ni ne, ¿mé má macjaain nuju xi Nina ne, tsicuya me nima cjuahñu?

Pablo ne, catsujyihya tjengui me cojo cjuahngatacun xuta ladu rë Nina

⁹Titjun ne, ngahan ne, catsingáta-hacácun xi jemu cjín xcusun meje rë xi sahme condra tsëhë Jesús, xuta Nasaret. ¹⁰Hane cuatjin casahme ngajan Jerusalén. Ngahan ne, jemu cjín xuta ladu rë Nina cavinchá me ndavaya ta, tsëhë xi nahmi xi matitjun casuaxa ná me xi cuatjin casahme. Hane hya xi cavitexa xutaxa rë xi cueya xuta ladu rë Nina xi cuacun jan ne, cojo ngahan cachjá xi ndatjin. ¹¹Jemu cjín ndiya cëjë yëjë yungun naja, cavitéxa xi cuma xuta castigu, hacuaha jemu casahme ngahñu xi choho cuichja me tsëhë Jesús. Tjemu camacjan ná cojo rë me, hacuaha catsujyëhëya tjënguë me cojo cjuahngatacun hisca cojo jingu sa nandya rë xutaxín.

Cachja nga Pablo hacutjin camá xi cavisehen me ladu rë Jesús

¹²Ngayun Agripa, ngu nixtin jan ne, tifé Damasco xi sahme cjuahngatacun jan, yahá xa xi ha casua ná nahmi xi matitjun. ¹³Hane ndiya jan ne, sacuaha chuva rë nchisen ne, cahvë ngu ndihi xi canduva ngahnga, xi hitsë sa hñu ndavá rë xi cuma rë ndavá rë tsuhi, xi cavaja rë hasen rë jingundee ni hiscan tifé cojo me xi tifé cojo. ¹⁴Hane xi ha caticjin ngayijin ni ne, ngahan ne, cahndë ngu cjua xi cachja cojo ná hne hebreo, cuitjin cachja: “Saulo, Saulo, ¿mé má cuatjin nujyihye tjengui ná cojo cjuahngatacun? Sacuahatjin tjin rë chu ndyaja tjin ri, ta chu vë ne, tsun chu nahñu quicha nahya ne, vanguihmu suva chu yojo ru hya xi vëhë hñu chu yojo ru xi vihndiin chu. Hane cuanitjin ni tjin ri, ye.” Cuatjin cachja cjua jan. ¹⁵Ngajan xi ngahan ne, cuitjin cavinenguësë: “¿Yo ngayun, Tatá?” Cuatjin cavinenguësë. Hane Nai naja ne, cuitjin cafayangui me: “Ngahan ne, Jesús ngahan, xi

nujyihye tjengui ná cojo cjuahngatacun. ¹⁶Tisatjinhgue, tisechin ta, tsêhê xi canduvá tjênguê ri cojo sa xi suáxa ri xi cuisecuee ná hacuaha cuinoje cojo xuta xi cuitjin cahye ná, hacuaha cuinoje cojo xuta hacutjin camá hya xi ha canduvá tjênguê nga ri ngujo ndiya. ¹⁷Ngahan cuáxêjtjê ri tsêhê xuta tjê rê Israel. Hacuaha cuáxêjtjê ri tsêhê xutaxín. Tsingátju ri ngajñi rê xuta xi cuacun vê, ¹⁸cojo sa xi choxehe cjuatacun rê me, sehe cuetjuxin me tsêhê cjuatsehen, hane cuisehen me ndiya rê cjuandaja, cuetjuxin me tsêhê ladu rê Satanás hane cuisehen me ladu rê Nina. Choxehe cjuatacun rê me, sehe sacú rê me cjuaninchataha tsêhê jyê rê me, hacuaha cuisehen me ladu rê xuta xi ha camá tsêhê Nina me ngatsê rê xi camangucacun me cojo ná." Cuatjin cafayangui Nai naja.

Cachja Pablo tsêhê xa xi sahmi me

¹⁹Ngayun Agripa, ngahan ne, hatuxa cahndê tsêhê cjua xi cachja Jesús hya xi canduvatjengui ná me xi canduva me tsêhê ngahnga. ²⁰Tjun tjun ne, cachjá cojo xuta ngajan Damasco, sehe cachjá cojo xuta ngajan Jerusalén cojo jingujyê ni naciôn Israel, hisca cojo xutaxín. Cachjá cojo rê me xi tsindeya me cjuatacun rê me hacuaha cuisehen me ladu rê Nina. Hacuaha cachjá cojo rê me xi catisahmi me cjuandaja xi tsingacun xi catsindeya jain me cjuatacun rê me. ²¹Ngatsê rê vêhê xi cafaha ná xuta tjê rê Israel ngajan yungun xi matitjun hisca casahmi me cjuandya xi tsiquehen ná me. ²²Peru Nina ne, visecoo ná me, vêhê xi tiféxcun hisca quihndê, tichjá cojo xuta sa quihndi sa changá me. Tichjá suvá cjua xi cachja profeta cojo cjua xi cachja Moisés tsêhê yêjê xcusun xi sehe cuetjucaa. ²³Cachja me xi cuacun vê xi Cristu ne, Me xi Tsingátju Nina ne, tjin rê me xi cueya me, hacuaha tjin rê me xi tjun tjun me cuya me cjuahñu, sehe

sua me cumachaya rê xuta tjê rê Israel cojo xutaxín tsêhê xi cuaxêtje Nina xuta xi cuacun vê. —Cuatjin cachja Pablo.

Pablo ne, meje rê me xi cjuijnecacun Agripa ne, cumacjain rê me xi cavuya cjuahñu rê Jesús

²⁴Hane xi cuatjin cachja Pablo xi vaxêtje me yojo rê me ne, cavisehenjñi Festo cojo cjua rê me, cachjahñu me cuitjin:

—¡Sca ri, Pablo! ¡Tsêhê xi jercu chutaye ne, vêhê sahmi sca rê cjuatacun riji! —Cuatjin cachja Festo.

²⁵Ngajan xi Pablo ne, cuitjin cafayangui me:

—Hacuiin sca ná, ngayun Festo. Ngahan ne, tichjá cjua xi cjuaquixi.

²⁶Agripa, me xi matitjun vê ne, hacuaha ndaja vê me cjua vihi. Vêhê xi tsacjuun xi chjá cojo rê me. Xi má ná ne, tsajin ngu cjua xi cuicun vi xi hvíin me ta, tsêhê xi xcusun vihi ne, hacuiin ngu cahnnchun camá. ²⁷Ngayun Agripa, ¿há macjain nuju cjua xi catsihindu profeta? Ha hvê ta macjain nuju. —Cuatjin cafayangui Pablo.

²⁸Ngajan xi Agripa ne, cuitjin cachja me cojo Pablo:

—Cojo hitsê cjua xi canoje vê ne, meje ri xi cuísehen ladu rê Cristu. —Cuatjin cachja me.

²⁹Hane Pablo ne, cuitjin cafayangui me:

—Nina meje rê me xi há hitsê o há cjín cjua xi cuichjá ne, hacuiin suvun ni ta cojo yêjê me xi tivisiñuju cjua xi tichjá quihndê ne, cuma me sacuaha ngahan, peru hacuiin cojo cadena vihi. —Cuatjin cafayangui me.

³⁰Hya xi camá ne, cavisatjenhnga Agripa, me xi matitjun, cojo Festo, hacuaha cojo sa Berenice cojo yêjê me xi caviyutangun me cojo, cavisatjenhnga me. ³¹Sehe quijixin me, cachja me cojo xingu xingu me cuitjin:

—Cha xi cuajyihi vē ne, tsajin mé sahmi cha xi vechú chuva rē xi cueya cha o sa xi cjue cha ndavaya. —Cuatjin cachja me.

³² Sehe ngajan xi Agripa ne, cachja me cojo Festo cuitjin:

—Cha xi cuajyihi vē ne, sá tsajin xi cafehya cha xi cuma cha consina xcun me xi matitjun camahani ne, cuma nismi rē cha. —Cuatjin cachja me.

Cavetju Pablo xi cjue me Roma

27 Hane hya xi cavechú nixtin xi cavejñacacun me xi matitjun jan xi cuanguin ngajan Italia ne, Pablo cojo yahnga sa presu jan ne, camá me entregadu tsja ngu capitán xi hmí rē Julio, capitán tsēhē sindadu rē me xi matitjun camahani. ² Hane xi cavisihin ngu barcu xi cavetju tsēhē nandya Andramitio xi cjue jingunduju ni ndaya tsēhē distritu Asia ne, sehe quiji barcu cojo niji. Hacuaha quiji cha Aristarco cojo niji, ngu cha Tesalónica tsēhē distritu Macedonia. ³ Hane xi camá nchujun jan ne, cafehe barcu cojo niji nandya Sidón. Hane Julio ne, casahmi me cjuandaja cojo Pablo, casua me cahndé xi cjue Pablo ndava amigu rē me xi cjua-hacuenda amigu jan xcusun xi ma chaja rē Pablo. ⁴ Hane xi quiji barcu cojo niji tsēhē ngajan ne, cavatjin jingunduju ni taha ngaxtun Chipre, ngu rquí nangui xi vetjucaa xcun ndachacun, tsēhē xi tjo ne, casuaain cahndé xi ngu quixi ni cjue barcu cojo niji. ⁵ Hane xi cavatjin xcun ndachacun quixi rē distritu Cilicia cojo distritu Panfilia ne, cafihin nandya Mira, ngajan distritu Licia. ⁶ Hane ngajan casacu rē capitán ngu barcu tsēhē Alejandría xi cjue Italia. Sehe catsinguisehen niji me barcu vēhē.

⁷ Hane xi catsanguin tafi tafi ngujo nixtin sa ne, cojo jemu jyē cjuandya ne, cafihin quixi rē nandya Gnido. Hane tsēhē xi casuaain tjo cahndé xi ngu quixi

ni quiji barcu cojo niji ne, cavatjin taha ngaxtun Creta, quixi rē Salmón. ⁸ Hاندasa jemu chja cavatjin camá, peru quiji barcu cojo niji tafi tafi hisca xi cafihin ngu cahndé xi hmí rē Cahndé Ndajyihi, tiña nandya Lasea.

⁹ Jemu tivatju nixtin, hacuaha jemu tsavi xi cjue barcu xcun nandá, tsēhē xi camatiña chan hnchan. Vēhē xi Pablo ne, cachja me cojo xuta jan cuitjin:

¹⁰ —Ngayujun ni ne, nguēhe cuichjá cojo nuju ta vutsején ne, xi tivanguen vi ne, jemu tsavi, jemu jyē nichajan tsēhē chaha cojo tsēhē barcu, hacuaha hisca tjin yahnga gayaan xi chajá yaan. —Cuatjin cachja me.

¹¹ Peru capitán jan ne, hitsē sa casahmicuenda me cjua xi cachja cha xi cjuicojo barcu jan xi cuma rē cjua xi cachja Pablo. ¹² Hane tsēhē xi cahndé xi tacun barcu jan ne, machjiriin xi ngajan cuejña barcu nixtin rē chan hnchan, vēhē xi hitsē sa cjín xuta xi cachja me xi cuetjuxin ni barcu cojo rē me tsēhē ngajan tuxa ma sa xi cuma cuechú me hisca Fenice, ngu nandya ngajan Creta, xi ndatjin cahndé tacun, hane ngajan cuma cuiyuju me yējē nixtin rē chan hnchan.

Tjo hñu xi cavanga ngajan xcun ndachacun

¹³ Hya xi camá ne, cavetsihin cavanga ngu tjo jeya jeya ni xi canduva táha ladu xi ndatjin. Sehe ngajan xi xi má rē me ne, cuma sahmi me sacuatjin xi ha catsingatahacacun me. Vēhē xi cavetju me quiji me, ndaya ndaya rē Creta. ¹⁴ Peru sehe tu hitsē cjui barcu jan ne, canduva ngu tjo hñu ladu xi choho tjin, ¹⁵ catsivaha rē barcu. Hane tsēhē xi maji fi barcu taha hiscan nduva tjo ne, catihin cahndé quiji barcu hacutjin xi cjui tjo. ¹⁶ Hane xi cavatjin taha ngaxtun ngu rquí lihndi nangui quixí xi hmí rē Claudia hiscan xi yiin cjuachan vanga tjo ne, cojo

chja ne, peru camá cachjihin barcu lihndi xi tjengui jan, ¹⁷sehe cachjuvinniji caveyín cahntsua barcu jyë. Sehe ngajan xi cha xi cjuicojo barcu jan ne, camá catsihñuhñu cha barcu jyë. Hane tsëhë xi tsacjun me xi cjuecojo tjo jan barcu ngu cahndë chojyihis hiscan xi jemu tsavi xi cjue barcu ne, catsitujne me tsjian xi faha rë tjo, casua me cahndë quiji barcu hacutjin cjui tjo. ¹⁸Peru tsëhë xi quijindu ju sa cavanga tjo hñu jan ne, xi camá nchujun jan ne, cavetsihin cacandiya me chaha xi hinchu barcu jan ngajñi ndachacun. ¹⁹Hane xi camá nguini, cojo tsja ni me, cafaha me yëjë ni xcusun xi tsëhë barcu jan, cavetsihin cacandiya me ngajñi ndachacun. ²⁰Hane xi ha jemu cjín nixtin xi cahyiin tsuhi cahyiin niñu hacuaha tjo jan ne, cjuinduju sa tivanga jercu tu hñu camahani ne, ngajan café cjuetacun xi cuetjintjin.

²¹Hane tsëhë xi ha jemu cjín nixtin xi cjëë sinë xuta jan niñu ne, cavetjujñi Pablo ngajñi rë me, cachja me cuitjin:

—Ngayujun ni ne, nguehe cuichjá cojo nuju ta hitsë sa ndatjin sa xi cave-tuhun rcun cjua xi cachjá cojo nuju hane cavetjuun ni tsëhë Creta. Tsajin mé cjuañihi xi cuitjin cuatjun cuma hacuaha tsajin mé xi cuitjin nichajan. ²²Quihndë ne, tuhun cjuetacun xahasen nuju ta hisca xi ngu ngayun ne, chajin ngayun. Xi chajá ne, barcu. ²³Hvë xi cuatjin cuma ta, nguchjin ne, cafehe ngu ángel rë Nina xi Nai naha hacuaha xi fahárcun. ²⁴Hane cachja cojo ná cuitjin: “Xi carcuin Pablo. Hatuxa tjin ri xi cuechi xcun César, me xi matitjun camahani. Hacuaha Nina ne, sahmi me cjuandaja cojo ri xi cuetjutje yëjë xuta xi cjui cojo ri.” Cuatjin cachja ángel cojo ná. ²⁵Vëhë xi tuhun cjuetacun xahasen nuju ngayujun ni ta, tsëhë xi ngahan ne, mangucácun cojo Nina, hane hatuxa cuatjin cuma sacuatjin cachja ángel cojo ná. ²⁶Peru tjin rë xi scandi naja tjo jan xcun

ngu rquí nangui quixí. —Cuatjin cachja Pablo.

²⁷Xi cavatju teñuju nguixun xi cuatjin cjui nguehe cjui ngajan tjo cojo barcu xi nechinyin xcun ndachacun xi hmí rë Adriático ne, sacuaha chuva rë vasen nixten ne, catsingatahacacun cha xi cjuicojo barcu jan xi ha jima tiña barcu tsëhë nangui quixí. ²⁸Hane catsichuva cha hacutjin nungun nandá hiscan quisun barcu, hane casacuse rë cha xi can tyjuhun ngu metru nungun nandá jan. Hane xi quiji sa barcu hitsë ni nguvan ne, catsichuva nga cha nandá, hane can yatu metru nungun nandá jan. ²⁹Hane tsëhë xi tsacjun cha xi satëcoo barcu jan cojo ngu naxi ne, cacandiya cha ñuju quicha hai xi machjirëhë xi cuiyujuhñu barcu ngajñi nandá xi tsuvahñu rë, hacuaha jercu cafehya rë cha Nina xi sahasen sanii.

³⁰Hya xi camá ne, yahnga cha xi cjuicojo barcu jan ne, meje cuetjuxin cha tsëhë barcu xi cuetjutje cha. Vëhë xi catsitujne cha barcu lihndi jan xcun ndachacun, sacuaha xi meje scandiya sa cha quicha ngajñi nandá taha xcun barcu.

³¹Sehe ngajan xi Pablo ne, cachja me cojo capitán cojo sindadu xi yahnga jan cuitjin:

—Sa xi cuiyijin cha xi cuacun vë cahntsua barcu jyë ne, ngayun ne, cumaji cuetjuntjun. —Cuatjin cachja me.

³²Ngajan xi sindadu jan ne, cavatë cha nahñu xi yaha rë barcu lihndi jan, sehe catsismi cha.

³³Hya xi ha tiña sahasen ne, cachja Pablo cojo yëjë xuta jan xi sinë me niñu, cuitjin cachja me:

—Ha quihndë teñuju nixtin xi nechunyun rë mé xi cuatjuun cuma hacuaha hisca hitsë niñu cjëë xinu. ³⁴Vëhë xi tichjá cojo nuju ta, xinu niñu. Xi cuatjin ne, scaa nuju cuetjuntjun ta hisca ngu ngayun ne, chajin hisca ngu tsjar-cun. —Cuatjin cachja Pablo.

³⁵Hane xi cafë cachja me cuatjin ne, cafaha me niñu ne, sehe casua me nacuechji rë Nina xcun yëjë ni xuta jan. Hane xi cavatëcja me niñu jan ne, sehe cavetsihin cajinë me. ³⁶Hya xi camá ne, yëjë ni xuta jan ne, casacu rë me cjue-tacun, hane hacuaha cojo me cajinë me niñu. ³⁷Ngayijin ni xi nechinyin barcu jan ne, jo cientu cojo jyanchan tyjuhun ngu má ngayin. ³⁸Hane hya xi ha ndaja camá rë xahasen rë me xi cajinë me niñu jan ne, cacandiya me trigu jan ngajni ndachacun xi cuma nguijna sa barcu.

Cavetsun barcu casahmi tjo

³⁹Hane xi casahasen ne, cavëë me ngu cahndé hiscan xi hvín me jani jan. Peru hacuaha cavëë me ngu cahnhun xi jemu jyë tsumi jiña tjehe rë. Hane caviyujucacun me xi sahmi me cjuandya xi barcu ne, ngajan cuechú. ⁴⁰Hya xi camá ne, cavatë me nahnu xi yaha rë quicha hai jan, sehe caxincha ni ngajan ngajni nandá. Hacuaha cavëhëndaya me ya xi veyaxixi rë barcu hacutjin cjue. Hane xi catsiquijin me tsjian xi faha rë tjo jan ne, sehe cavetsihin quiji barcu jan quixi rë tsumi jan. ⁴¹Peru xi cafehe barcu ngu cahndé hiscan tacun ngu naxi ngahma nandá ne, ngajan casatë. Hane taha xcun barcu jan ne, ngajan casetahahnu, ha quihndë camaji quiji. Peru taha ngaxtun barcu jan ne, jercu tivetsun tsëhë tsindyu rë nandá xi vaja rë.

⁴²Hane sindadu jan ne, catsingatahacacun cha xi tsiquehen cha presu, sá tu cuaté presu jan nandá ne, cuanga. ⁴³Peru capitán jan ne, tsëhë xi meje cuaxëtje me Pablo ne, casuaain me cahndé xi sahmi sindadu jan hacutjin xi meje rë cha. Hya xi camá ne, cavitexa me yëjë ni xuta xi ma vatë nandá ne, tjun tjun me caticandiya me yojo rë me ngajni nandá, catji me quixi rë tsumi jan. ⁴⁴Hane me xi yahnga xi maji vatë nandá jan ne, catjaha me ngu rquí yatë o sa ngu

ya tsëhë barcu jan. Cuatjin camá xi ngayijin ni ne, caphin nangui quixí, hacuaha cavetjintjin.

Cafehe Pablo ngajan Malta

28 Hane xi ha cavatju cavetjintjin ne, sehe casacu camachaya niji xi ngu rquí nangui xi vetjucaa xcun ndachacun jan ne, Malta hmí rë. ²Hane xuta xi nangui rë jan ne, hacuiin hitsë cjuandaja casahmi me cojo niji. Cavejña me ngu ndava ndihi jyë ne, sehe cajindaya niji me ngayijin ni, tsëhë xi hacuaha cavetsihin cavaha tsi hane jemu hnchan. ³Hane xi cafaha Pablo ngu tyjá chaquin quiji caviyujusun me xcun ndihi jan ne, tsëhë suë rë ndihi jan ne, vanga ngu yë cavetju chu ngajni rë chaquin xi caviyujusun me jan, hane cafaha chu tsja me, hane catsismii chu ngutjen. ⁴Hane xi cavëë xuta xi nangui rë jan xi tyjanguitaha cuaha yë jan tsja Pablo ne, sehe cachja me cojo xicjin me cuitjin:

—Ngu cha tsiquehen jain rë cha vi, vëhë xi handasa cavetjutje cha tsëhë ndachacun ne, peru nina ne, suaain me cahndé xi cuejña sa cha cjuahnu. —Cuatjin cachja xuta jan.

⁵Hane xi cavitsune Pablo tsja me ne, cjanenguiya chu ngajni ndihi jan. Peru me vëhë ne, tsajin mé camá rë me xi cafaha chu me. ⁶Xuta jan ne, xi má rë me ne, cuijin squee Pablo o sa xi tu ñahnu ne, cueya me. Peru xi ha jemu jyë hora vutsejen xuta jan xi tsajin mé má rë Pablo ne, catsindeya me cjua rë me, hane sehe cavetsihin cachja me xi Pablo ne, ngu nina me.

⁷Hane tiña tsëhë cahndé jan ne, siutahá nangui rë me xi matitjun tsëhë nangui xi vetjucaa xcun ndachacun jan, me xi hmí rë Publio. Me vëhë cafahatsja niji me, hacuaha casahmi me cjuandaja xi casua niji me cahndé ndava me xi cavinechin jan jyan nixtin. ⁸Hya xi camá ne, nahmi rë Publio jan ne, jiña me xi

hmu rë me tsëhë chîhin suë cojo chîhin jni. Hane Pablo ne, quiji vutsejen me me, hane cafehya rë me Nina ngatsë rë xuta hmu rë jan. Hane xi cavisanetsja Pablo me ne, camandaja me. ⁹ Xi cavatju vëhë ne, hacuaha canduva tjengui yëjë sa xuta hmu rë tsëhë nangui vëhë Pablo ne, camandaja me. ¹⁰ Xuta jan ne, jemu casahmi me cjuandaja cojo niji, hane xi cavetjin catsanguin nga cojo barcu ne, casua me hacutjin xcusun xi machaja niji.

Cafehe Pablo ngajan Roma

¹¹ Xi cavatju jyan sá ne, cavetjin catsanguin cojo ngu barcu xi cavéjña jan yëjë nixtin tsëhë chan hñchan. Barcu jan ne, nandya Alejandría canduva, hacuaha Nina Lihma hmí rë. ¹² Hane xi catsanguin sa hitsë ne, cafihin nandya Siracusa, hane ngajan cuinechin jyan nixtin. ¹³ Hane xi cavetjin ngajan ne, quiji nduju sa barcu cojo niji ne, cafihin nandya Reggio. Hane xi cafë ngu nixtin xi nechintihin jan ne, cavetsihin cavanga ngu tjo xi ndatjin cjuí, sehe quiji nga barcu cojo niji, hane xi camá nchujun ne, cafihin nandya Puteoli. ¹⁴ Hane xi cafihin jan ne, cavechintihin ngujo xuta ladu rë Jesús, hane cachja me xi cuinechintihin ngu totje cojo rë me jan. Hane ha cuatjin chuva vëhë ne, cavetjin Cesarea hane cafihin hisca Roma. ¹⁵ Hane xuta ladu rë Jesús xi siu ngajan Roma ne, xi camachaya rë me xi ha jima tiña ngayin ne, canduvatjengui niji me ndiya. Ngujo me ne, cafehe me hisca hiscan hmí rë Ndetsin Apio. Hane ngujo nga me ne, cafehe me hiscan hmí rë Jyan Cantina. Hane xi cavëë Pablo xuta jan ne, casua me nacuechji rë Nina, hacuaha casacu rë me cjuetacun. ¹⁶ Hane xi cafihin Roma ne, xutaxa rë jan ne, casua me cahndé xi cjuíin Pablo ndavaya hane cjue me ndava ngu xuta cuejña me, peru cojo

ngu sindadu xi sahmi cuidadu xi hacuiin cuanga me.

Catsinguijnetaha Pablo cjua cojo xuta changá rë yungun

¹⁷ Hya xi camá ne, xi cafë jyan nixtin quitahá Pablo jan ne, casahmi tangun me xuta xi matitjun tsëhë ngajñi rë xuta tjë rë Israel. Hane xi camatangun xuta jan ne, sehe cachja Pablo cojo rë me cuitjin:

—Ngayujun ni ngayun xuta tjë rë Israel matsejen ne, nguehe cuichjá cojo nuju ta handasa tsajin mé casahme condra yëjë xuta naja o condra rë xcusun rë xutachanga naja ne, peru cafaha ná me, casahmi ná me entregadu tsja xutaxa rë Roma ngajan Jerusalén. ¹⁸ Hane xi cafachataha ná xutaxa rë jan ne, meje tsismi ná me, tsëhë xi tsajin jyé naha xi vechú chuva rë xi cueya. ¹⁹ Peru xi cachja xutaxa rë yungun naja xi ndajintjin xi cuma ndaya ngahan ne, casahmi ná ngujoyë xi caféhya xi cuma ngahan consina tsja César, me xi matitjun camahani. Cuatjin casahme, handasa tsajin mé jyé meje cuíncha tsëhë xuta naja. ²⁰ Ngatsë rë cjuacjintacun vëhë ne, vëhë xi cachjá xi cuinduvun tjengun ná, cojo sa xi cuichjá cojo ngu ngujo cjua ta, tsëhë xi ngatsë rë me xi vetahantacun ngayejen ni ngayaan xuta tjë rë Israel ne, vëhë xi cuitjin tjinñu ngahan vi. —Cuatjin cachja Pablo.

²¹ Ngajan xi xuta xi cuacun jan ne, cuitjin cafayangui me:

—Peru ngayin ne, hisca ngu xujun xi chja condra nuju xi nduva tsëhë Jerusalén ne, cjëë chjihinntsin. Hacuaha tsajin hisca ngu xuta naja xi nduva me tsëhë ngajan xi choho chja me tsujun cojo niji. ²² Quihndë ne, meje cuisñiji hacutjin fi cjuatacun nuju ta, tsëhë xi sacuaha cjuatacun vihi ne, hyin ta jinguyë ni ne, choho chja xuta tsëhë. —Cuatjin cafayangui xuta xi cuacun jan.

²³ Hya xi camá ne, cavejña xuta xi cuacun jan ngu nixtin xi cuya nga me. Hane xi cavuya me ne, hitsë sa jercu cjín me xi cafehe me hiscan tacun Pablo. Ngajan xi Pablo ne, cuaha nixtin cachja me cojo xuta jan tsëhë gubiernu xi sahmi Nina. Hacuaha casahmi Pablo ngahñu xi cumacjain rë yëjë xuta jan xi Jesús ne, me vëhë xi catsingatju Nina me, sacuatjin chja xujun rë Nina xi catsihindu Moisés cojo xi catsihindu profeta hatsëë nixtin. ²⁴ Ngujo me ne, camacjain rë me cjua xi cachja Pablo, peru ngujo nga me ne, camacjaain rë me. ²⁵ Hane tsëhë xi hacuiin tangun camá cjuatacun rë me ne, cavetju me cafe me. Peru chaja sa xi cjue me ne, Pablo ne, cachja me cuitjin:

—Jemu quixi cjua rë Hasen rë Nina xi cachja profeta Isaías cojo xutachanga naja, cjua xi cachja cuitjin:

²⁶ Tihin tjengui xuta naha hane tinoje cojo rë me xi hatuxa cuihndë me, peru cuijnii rcu me hisca hitsë.

Hatuxa scuëë me, peru hvíin me mé jan.

²⁷ Cuatjin cuma ta, tsëhë xi cjuatacun rë me ne, tichjá,

tyjavañuju me cojo tuxcun me ne, cavechja me,

sá tu scuëë me cojo tuxcun me hane cuihndë me cojo tyjavañuju me hacuaha cuijne rcu me cojo cjuatacun rë me,

sehe cuya me ladu naha xi cuaxëtjë me. Cuatjin cachja cjua jan. ²⁸ Sa xi miji cuisiñuju ngayun sacuatjin camamiji cuisiñuju xutachanga naja xi cuacun jan ne, nguehe suá cumachaya nuju ta Nina ne, cjua xi cuaxëtje me xuta ne, quihndë catsingatju me cjua vëhë tsëhë xutaxín. Me xi cuacun vë ne, cuisiñuju me. —Cuatjin cachja Pablo.

²⁹ Hya xi camá ne, xuta tjë rë Israel xi cahndë me cjua rë Pablo ne, quiji cavetju me, tichja cjín me cojo xicjin.

³⁰ Ngajan xi Pablo ne, jo nu jingu cavéjña me ndihya xi cafehya me cojo renta jan. Hane ngajan cafahtsja me xuta xi quiji tjengui rë me, ³¹ casua me camachaya rë xuta tsëhë gubiernu xi sahmi Nina, hacuaha cavicuya rë me xuta cjua xi chja tsëhë Nai naja Jesucristu. Hisca ngu quijiin cavatëcja tsëhë me xi cuatjin casahmi me.

Xujun xi catsingatju San Pablo xi cafahatsja xuta Roma

1 Ngahan, Pablo ne, visécoo rë Jesu-cristu sacuaha ngu mosu hndixahan rë me, hacuaha Nina cavaxijin ná me xi cuma ngahan apóstol, casuaxa ná me xi suá cumachaya rë xuta cjuandajyihi rë me. ²Hane ha jemu hatsëë casahmi Nina xi profeta rë me ne, tsihindu me cjuandajyihi vë xcun xujun rë Nina. ³⁻⁴Cjuandajyihi vë ne, hacui cjua xi sua machaya naja tsëhë Quihndi rë Nina, Nai naja Jesucristu. Hya xi catsin Jesu-cristu, sacuaha ngu xuta tjë rë David, catsin me. Peru Hasen rë Nina ne, jemu ndaja casua camachaya naja xi hatuxa Quihndi rë Nina me ta catsingacun naja hya xi cavuya me cjuahñu hya xi cavatju cahme me. ⁵Hane ngatsë rë Jesucristu ne, casacu niji cjuandaja rë Nina xi camá ngayin apóstol, cojo sa xi cuisecuin rë xuta yëjë ni nangui, sehe cumanguacun me cojo Nina hacuaha cuinhndë me tsëhë Nina. Hane xi cuatjin ne, cuma jyë cuma hnga Jesucristu. ⁶Hacuaha cojo ngayujun ni xi xuta nanguixin ngayun ne, cavaxijin nuju Nina xi camá tsëhë Jesucristu ngayun.

⁷Ngahan ne, titsihíndu nuju ngayujun ni xi nechun ngajan nandya Roma, ngayujun ni xi hmucacun nuju Nina, ngayujun ni xi cavaxijin nuju me xi camá ngayun xuta rë me. Nina Nahmi naja cojo Nai naja Jesucristu ne, catisua nuju me cjuandaja cjuajeya.

Pablo ne, meje cjue me nandya Roma

⁸Quihndë ne, hora xi sahme oración naha cojo Jesucristu ne, suá nacuechji rë Nina naha ngatsë nuju ngayujun ni ta jingu ni ladu ne, jimachaya rë xuta hacutjin xi mangutacún cojo Jesucristu. ⁹Ngahan ne, nguñaja xahasen naha sahme xa rë Nina xi suá cumachaya

rë xuta cjuandajyihi xi chja tsëhë Quihndi rë Nina. Hane vëë Nina jain xi hatuxa veyanangë nuju, ¹⁰yëjë ni hora xi sahme oración naha. Féhya rë Nina xi sua me cahndë xi cuechú hora cuechú nixtin xi cuma cjuëtjängë nuju, sa xi cuatjin meje rë me. ¹¹Hatuxa meje cjuëtjängë nuju, cojo sa xi suá nuju ngu cjuandaja rë Nina. Sehe ngayun ne, hitsë sa ndaja cumangutacun cojo Jesucristu. ¹²Cuma cuinújan ne, meje cjuëtjängë nuju, cojo sa xi tahan cjuasua xahasen naja xingu xingu ngayaan, ngatsë rë xi ndaja mangutacun xingu xingu ngayaan cojo Jesucristu.

¹³Ngayujun ni ne, meje ná xi cumachaya nuju ta jemu cjín ndiya cavejñá cjuatacun naha xi cjuëtjängë nuju, peru hisca quihndë ne, camaji. Meje ná xi ngujo xuta nangui nuju ne, cuisehen me ndiya rë Jesucristu ngatsë rë xi ngahan suá cumachaya rë me cjua xi yahá, sacuatjin xi ha camá jingu sa nangui. ¹⁴Xi má na ne, hatuxa sahmi ná nguivyë xi cuichjá cjua jan cojo yëjë ni xuta; sa xuta rcun, sa xuta yuma; o sa xuta vechu cjuatacun rë, sa xuta yuma hasen. ¹⁵Vëhë xi hacuaha jemu meje cjuëtjängë nuju ngajan Roma, suá cumachaya rë xuta nangui nuju cjuandajyihi xi chja tsëhë Jesucristu.

Cjuandajyihi xi sua Pablo cachaya rë xuta

¹⁶Ngahan ne, ma savaain ná tsëhë cjuandajyihi xi chja tsëhë Jesucristu ta, tsëhë xi cjua vëhë ne, sua machaya rë xuta ta vaxëtje Nina yëjë ni xuta xi mangucacun cojo Jesucristu. Tjun tjun xuta Israel cuaxëtje me, peru hacuaha cuaxëtje me xutaxín. ¹⁷Cjuandajyihi vëhë ne, sua machaya naja ta Nina ne, tsicjë me jyë xi quitjen, peru suvá ni hya xi mangutacun cojo Jesucristu. Hacuaha cuatjin chja ngu cjua xi camahindu xcun xujun rë Nina: “Xuta xi tsajin jyë rë me

ngatsë rë xi mangucacun me cojo Nina ne, sacú rë me cjuahñu xatsë.” Cuatjin camahindu.

Jyé xi tjin rë xuta ngasunhndë

¹⁸ Nina xi tacun me ngahnga ne, sua me machaya naja hacutjin jemu cjan rë me ngatsë rë xi faharcuain xuta me, cojo ngatsë rë yëjë ni cjuatsehen xi sahmi xuta. Hacuaha cojo cjuatsehen xi sahmi xuta jan ne, vetsa me cja xi cjuaquixi. ¹⁹ Cjuatacun xi cuma cumachaya naja tsëhë Nina ne, hatuxa vëë xuta xi cuacun tsehen jan ta, tsëhë xi Nina ne, ha casua me camachaya rë xuta cjuatacun vëhë. ²⁰ Nina ne, matsijin me; peru hisca nixtin xi catsindaja me ngasunhndë cojo hisca nixtin quihndë ne, matsejen ta hacui jain me xi Nina me hacuaha tjin rë me ngahñu xi tsajin nuju tsajin nixtin cjuë. Cuatjin ma vijne rcu tu yo ni xuta hya xi vutsejen me yëjë ni xcusun xi catsindaja Nina. Vëhë xi xuta xi cuacun tsehen jan ne, sacuiyiin rë me mé xi cuichja me hya xi sua me cjuaquixi rë me xcun Nina. ²¹ Handasa vëë xuta xi tacun jain Nina ne, peru casahmijyiin casahmihngaain me Nina, hacuaha hisca casuaain me nacuechji rë Nina. Vëhë xi camachjiriin cjuatacun rë me. Hacuaha cjuatacun yuma hasen rë me ne, camajñu tsëhë. ²² Chja suvá me xi jemu vechu cjuatacun rë me, peru ngajñi rë xi chja me cuatjin ne, hitsë sa ngarca cavuya me cojo cjuatacun rë me. ²³ Hacuaha catsitjungui me Nina xi hatuxa jyë hnga me cojo cja rë me, Nina xi hatuxa hmii me. Sehe cavetsihin cafaharcun xuta xi cuacun jan tu mé ni nina ndyojo xi catsindaja suvá me. Cafaharcun me xcusun rë xuta xi hatuxa hme me, cojo xcusun rë chu nisë, cojo xcusun rë chu yë, cojo jingu sa xcusun rë chu xi yahnga.

²⁴ Vëhë xi Nina ne, catsismicacun me xuta xi cuacun tsehen jan, cojo sa xi sahmi xuta cjuatsehen xi fehya rë xa-

hasen tsehen xi tjin rë me. Hane casahmi xuta jan cjuatsehen cojo yojo rë me ngajñi rë me cojo xicjin me. ²⁵ Catsitjungui me Nina xi cjuaquixi. Cafaharcun me nina ndyojo xi nina ndacha ni. Hacuaha cahndë rë xi cjuaharcun me Nina, cafaharcun me hacuaha casahmi cuidadu rë xcusun xi Nina casahmi me. Peru mameje jain xi chjaharcun rë Nina yëjë ni nu yëjë ni nixtin. Cuatjin jain.

²⁶ Vëhë xi Nina ne, catsismicacun me xuta xi cuacun tsehen jan, cojo sa xi cuma tsehen sa xahasen rë me. Hisca yachjin ne, catsitjungui ne xcusun xi ndatjin xi sacú xihin rë ne, hane casahmi na xcusun xi cuaaintjin. ²⁷ Hacuaintjin ni casahmi cha xi xihin; catsitjungui cha xcusun xi ndatjin xi sacu chjuun rë cha, hane jercu cavetju suë cha xi cuatjin meje sahmi cha cjuatsehen ngajñi rë cha cojo xicjin cha. Xihin cojo xihin cha casahmi cha cjuasava jan, hacuaha casacu rë cha jima ngu cha castigu xi cavangui xcusun tsehen xi casahmi cha jan.

²⁸ Xi má rë xuta xi cuacun tsehen jan ne, machjiriin xi tsinguitsjen me nina. Vëhë xi Nina ne, catsismicacun me xuta jan, cojo sa xi hatuxa cumachjiriin cjuatacun rë me, hacuaha sahmi me xcusun xi ndajintjin xi nihña. ²⁹ Quitsë rë xahasen rë me cojo yëjë ni cjuatsehen xi fehya xahasen rë me sacuaha xcusun vi: jemu choho tsingatahacacun me; ña quitsë rë xahasen rë me cojo cjuaxin; meje tsiquehen xicjin me; jemu meje scaanya me tu mé ni xcusun; jemu ndacha me; jemu tsehen me; jemu ndesu me; ³⁰ choho chja me tsëhë xicjin me; choho vëë me Nina; jemu hnga cacun me; jemu xta me; vaxëndaja suvá me yojo rë me; tsindajaya me cjuatsehen; vihndiin me tsëhë xutacha rë me; ³¹ machjiriin cjuatacun rë me; sahmiichiin me ngu cja xi chja me; tsajin rë me cjuahmutacun; tsajin rë me cjuayumatacun. ³² Nina ne, cavitexa me

xi yějě ni xuta xi cuatjin sahmi xcusun tsehen vē ne, hatuxa vechú chuva rě xi cueya me. Hane xuta xi cuacun tsehen jan ne, handasa ha vēē me xi cuatjin cavitexa Nina, peru sahmicuendaain me ta finduju me cojo cjuatsehen jan, hisca ndama rě me tsěhě xuta xi yahnga xi cuatjin sahmi.

Nina ne, tsichuva me xuta cojo cjuatacun rě me hacutjin xi cjuaquixi

2 Tu yo ni ngayun xi nichuvun jingu sa xuta cojo cjuatacun rě me ne, sacuiiin nuju mé xi cuinújun hya xi tuhun cjuaquixi nuju xcun Nina ta, tsěhě xi hora xi nichuvun xuta ne, cjuachojy-ihí xi sahmi ni me ne, ha xcusun vēhě ni nihñu. ²Ha hyan ta xuta xi cuatjin sahmi xcusun tsehen vēhě ne, hya xi tsichuva Nina me cojo cjuatacun rě me ne, tsichuva me hacutjin xi cjuaquixi. ³Peru ngayun xi nichuvun xuta xi cuatjin sahmi xcusun tsehen vēhě ne, ¿há má nuju xi cuatjuhnga ngayun xi tsichuvaain nuju Nina xi cojo ngayun nihñu xcusun tsehen vēhě? ⁴O há tsajin ne, ¿há cuendaain nuju tsěhě cjuandaja xi sua nuju Nina? ¿Há cuendaain nuju xi Nina ne, jemu jyě cacun me cojo nuju? ¿Há hyuun xi cuatjin sahmi Nina cjuandaja cojo nuju, cojo sa xi nindeyun cjuatacun nuju? ⁵Peru ngayun ne, jemu taja rcun, hatuxa mijí nindeyun cjuatacun nuju. Xi cuatjin nihñu ne, tinihñu xi jima cjan sa rě Nina cojo nuju, hisca xi cuechú nixtin xi Nina ne, jemu cuma cjan rě me hacuaha sua me cumachaya nuju hacutjin tsichuva nuju me cojo cjuaquixi. ⁶Nina ne cuechji me xingu xingu xuta tu cutjin xcusun xi casahmi xuta jan. ⁷Xuta xi scaa rě me sahmi me cjuandaja ngatsě rě xi meje rě me xi cuma yehe cuma hnga me, hacuaha meje rě me xi chuya rě Nina tsěhě me. Meje rě me xi cuechiin nixtin xi cueya me ne, me vēhě xi sua Nina me cjuahñu xatsě. ⁸Peru xuta xi meje

rě me xi suvá ni me xi ndaja tsěhě me, hacuaha vihndiin me tsěhě cjuaquixi ta suvá cjuatsehen yějě ni xi sahmi me ne, me vēhě xi jemu cuma cjan camahani rě Nina cojo rě me. ⁹Yějě ni xuta xi sahmi cjuatsehen ne, sacú rě me cjuañihi, hisca sacuiin rě me chuva rě hacutjin cuaxětje me yojo rě me. Tjun tjun xuta Israel cuatju me cuma cuatjin, peru hacuaha cojo xutaxín cuatjin cuatju me cuma. ¹⁰Peru yějě ni xuta xi sahmi cjuandaja ne, me vēhě xi jemu cuma yehe cuma hnga me, hacuaha jemu chuya rě Nina tsěhě me, hacuaha jemu sacú rě me cjuajeya. Me vēhě xi má xuta tjě rě Israel ne, tjun tjun cuatju me cuma cuatjin, peru hacuaha cojo xutaxín cuatju me cuma.

¹¹Ta Nina ne, hatuxa quixi jain me cojo cjuatacun rě me xi tsichuva me yějě ni xuta cojo cjuatacun rě. ¹²Yějě xuta xi tsajin rě me ley rě Moisés hacuaha sahmi me cjuatsehen ne, hacuiin ley vēhě vitexa mé castigu xi cuma me; peru hatuxa cuetjintjiin me. Hane yějě xuta xi tjin rě me ley jan hacuaha sahmi me cjuatsehen ne, tsichuva Nina me tu cutjin xi vitexa ley vēhě. ¹³Xuta xi tu visiñuju ni sacuatjin chja ley ne, hacuiin me vēhě xi tsajin jyě quitjen me xcun Nina ta xuta xi sahmi sacuatjin chja ley jan ne, me vēhě xi cuichja Nina ta tsajin jyě quitjen me. ¹⁴Xutaxín xi tsajin rě me ley rě Moisés jan ne, hya xi sahmi me sacuatjin chja ley vēhě cojo cjuatacun rě suvá ni me ne, ngajan ma tsejen xi sacuaha xi me vēhě má me ley rě suvá ni me. ¹⁵Xcusun xi sahmi me tsingacun naja xi cjuaxi vitexa ley ne, ha hinchahantsua cjuatacun rě me. Ha vēē suvá me cojo cjuatacun rě me mé xi ndaja, mé xi ndajin. Věhě xi vinchajyě cjuatacun rě me me, o sa tsajin ne, chjatje cjuatacun rě me ngatsě rě me. ¹⁶Ngajan xi hatuxa cuechji Nina xuta nixtin hya xi Nina tsingatju nga me Jesucristu xi tsichuva me cjuaxi hinchahma rě xuta. Hacuaha cuatjin

chjá hya xi suá machaya rë xuta cjuan-
dajyihi xi chja tsëhë Jesucristu.

**Xuta tjë rë Israel xi faharcun me
ley ne, vëhë sua machaya
rë me xi xuta jyé me**

¹⁷ Quihndë ne, ngayun xi nújun xi xuta tjë rë Israel ngayun ne, jemu vetuhuntacun ley rë Moisés. Jemu naxundujun yojo nuju ngatsë rë xi Nina xi cjuaquixi ne, me vëhë xi nina nuju me. ¹⁸ Ha hyun hacutjin xi meje rë Nina xi nihñu; hacuaha ngatsë rë xi cachtutayun ley ne, chuya nuju tsëhë cjuandaja. ¹⁹ Xi má nuju ne, jemu ndaja ninguiacun cjuatacun rë xutaxín xi hvín me Nina; jemu ndaja chuxuhun cjuatacun rë xutaxín xi tsajin hinchá me ndiya rë Nina. ²⁰ Xi má nuju ngayun ne, sacuaha maestru rë xutaxín xi hvín camahani me má ngayun. Cuatjin ningatuhuntacun ta, tsëhë xi tjin nuju ley rë Moisés jan xi yaha cjuatacun xi cjuaquixi. ²¹ Ngayun xi vicuyun rë jingu sa ne, ¿há vicuyuun suvun rë yojo nuju ni? Ngayun xi chuyiin nuju tsëhë nina ndyojo ne, ¿há nichujun cjuanchina rë yungun rë ni? ²² Ngayun xi nújun xi ndajintjin xi nindesun cojo rë ngu chjuun, o cojo ngu xihin xi hacuiin tsajan ne, ¿há cuatjin nihñu suvun ni? Ngayun xi chuyiin nuju tsëhë nina ndyojo ne, ¿há nichujun cjuanchina rë yungun rë ni? ²³ Ngayun xi jemu naxundujun yojo nuju xi tjin nuju ley rë Moisés ne, ¿há choho chja xuta tsëhë Nina ngatsë rë xi nihñuchuun cjuá xi vitexa ley vë ni? ²⁴ Hacuaha cuatjin camahindu xcun xujun rë Nina: “Xutaxín ne, choho chja me tsëhë Nina, ngatsë rë xcusun nuju ngayun xuta tjë rë Israel.” Cuatjin chja xujun.

²⁵ Sa xi nihñuchuhun jain sacuatjin vitexa ley ne, cumachji rëhë nuju xi cati chuxin nuju ngatsë rë xi ngu xuta rë Nina ngayun; peru sa xi nihñuchuun sacuatjin vitexa ley ne, ngayun ne, tangun

ngayun sacuaha xi cjëë xtí chuxin nuju. ²⁶ Vëhë xi xutaxín xi vatiin me chuxin rë me ne, sa xi sahmi me cjuandaja sacuatjin vitexa ley ne, tangun chuya rë Nina tsëhë me sacuaha xi ngu xuta xi cati chuxin rë me. ²⁷ Hane xutaxín xi sahmi me sacuatjin vitexa ley ne, handasa hatuxa vatiin me chuxin rë me, peru cuatjutaha nuju me, ngayun xi nihñuchuun sacuatjin chja ley handasa tjin nuju ley jan hacuaha cati chuxin nuju. ²⁸ ¿Yo xi má ngu xuta tjë rë Israel xi cjuaquixi? Hacuiin ngu xuta xi suvá ni xi sahmi me sacuaha xcusun rë xuta jan, hacuiin ngu xuta xi suvá ni xi cati rë chuxin rë ta, ²⁹ ngu xuta xi yaha cjuatacun rë xuta tjë rë Israel, ngu xuta xi cjuë me cojo ngasunhndë rë me sacuaha xi cati chuxin rë me, me vëhë xi ngu xuta tjë rë Israel xi cjuaquixi. Hane tsajin rë ley ngahñu xi cuma sahmi cuatjin cahntsua xahasen naja ta suvá Hasen rë Nina xi cuma sahmi cuatjin. Xi cuatjin nihña ne, hacuiin xuta xi cuaxëndaja me tsajan ta Nina ne, me vëhë xi chuya rë me tsajan.

3 Sa quixi cuatjin ne, cuma cuinen-
guisen ta, ¿mé vengui chjí rë xi xuta
tjë rë Israel má ngayaan? ¿Mé vengui
chjí rë xi cuatjin cati chuxin naja? ² Peru
jemu vengui camahani chjí rë. Titjun ne,
vengui chjí rë ta, tsëhë xi Nina ne, ca-
suatsja naja me cjuá rë me. ³ Peru sa
xi ngujo xuta tjë rë Israel catsismicacun
me Nina ne, ¿mé xi cuma? ¿Há vëhë ni
sahmi xi tsismicacun Nina ngayaan xuta
rë me? ⁴ ¡Jéya! Meje rë xi cuinújan xi
Nina ne, hatuxa sahmichihin me yëjë ni
cjuá xi chja me. Sahmi me handasa yëjë
ni xuta ne, jemu ndacha me. Xcun xujun
rë Nina ne, cuitjin camahindu:

Ngayun, Nina naha ne, tsëhë yëjë ni cjuá
xi nújun ne,
tsajin camahani mé jyé quitjin, hacuaha
hatuxa scaa rë cjuá nuju cjue xcun

tsëhë cjuar rë xuta xi tsichuva nuju
me cojo cjuatacun nuju.

Cuatjin camahindu.

⁵ Sa xi ngatsë rë cjuatsehen xi nihña ne, vëhë tsingacun jain xi Nina ne, tsajin camahani jyë quitjen me ne, ¿mé cumá cuinújan? ¿Há cuinújan xi Nina ne, hacuaha jyë quitjen me ta sahmi naja me castigu? (Tichjá cojo nuju sacuaha cjuatacun rë ngu xutajyë.) ⁶ ¡Jéya! quixiin vë ta, sa xi jyë quitjen Nina ne, sehe cumaji tsichuva me xuta ngasunhndë cojo cjuatacun rë me.

⁷ Cuejña xi cuichja sa ngu xuta cuitjin: Sa xi hitsë sa cuaxëndaja Nina cojo cjuaquixi rë me hya xi sahmi jain me sacuatjin chja me hacuaha hitsë sa ndaja tsejen xi jyë hnga Nina cojo Hasen rë me ngatsë rë cjuandacha naha ne, ¿mé má sehe cuatjin tsichuva ná me sacuaha ngu xuta tsehen? ⁸ O sa tsajin ne, cuejña xi cuichja sa ngu xuta cuitjin: Cuanguen nihña cjuatsehen, cojo sa xi cuma cuetjucaa sa cjuandaja. Hisca tjin yahnga xuta xi choho chja me tsijin ta chja me xi cjuatacun vëhë vicuyin, peru quixiin vë. Xuta xi cuacun vë ne, hatuxa satë rë me castigu xi vitexa jyë rë me.

⁹ Sa cuatjin ne, ¿há hitsë sa vengui chjí naja ngayaan xuta tjë rë Israel xi cuma rë xutaxín? ¡Jéya! Ha sehe cachjá ta ngayejen ni, sa xuta tjë rë Israel o sa xutaxín ne, ha nechan ngayejen ni ngajñi rë cjuatsehen. ¹⁰ Cuatjin camahindu xcun xujun rë Nina hiscan xi chja cuitjin: Tsajin xuta xi tsajin jyë quitjen, hisca ngu me tsajin me;

¹¹ tsajin yo xi vijne rcu, tsajin yo xi van-guise ndiya rë Nina.

¹² Yëjë ni xuta ne, cavetjuxin me tsëhë ndiya rë Nina, yëjë ni me ne, camachjiriin me.

Tsajin yo xi ndaja sahmi me. Ndastu ngu ni me tsajin me.

¹³ Cahntsua hntsua me ne, chojyihí sacuaha ngu tsjun xi catuxaha;

neje me ne, suvá cjuandacha visiajmi, chuxin hntsua me ne, xan rë chu yë hinchanghama rë;

¹⁴ hntsua me ne, suvá cjuahngatacun quitsë rë.

¹⁵ Cojo ntsacu me ne, ngu hñu sasa cjue tsiquehen xicjin me;

¹⁶ Ndiya xi hinchame me ne, suvá xi tsinguetsun ni me cjuatacun rë xuta, hacuaha sua me xuta cjuachoho.

¹⁷ Hvín camahani me ndiya tsëhë cjuajeya.

¹⁸ Tsajin ngu hora xi tsingatahacacun me xi tsacjun me Nina.

Cuatjin chja xujun rë Nina.

¹⁹ Ha hyan ta yëjë ni cjuar xi chja ley rë Nina ne, chja cojo xuta xi siu ngahma rë ley vëhë. Cuatjin xi tsajin yo cuma cuichja xi tsajin mé jyë quitjen. Hacuaha cuatjin xi yëjë ni xuta ngasunhndë vi ne, tsichuva Nina me cojo cjuatacun rë me.

²⁰ Nina ne, cuichjaain me tsëhë ngu xuta xi tsajin jyë rë me ngatsë rë xi casamichihin me sacuatjin chja ley ta, ley ne, sua machaya naja xi ngayejen ne ne, xuta tsehen ngayaan.

Nina ne, tsicjë me jyë naja sa xi mangutacun cojo rë me

²¹ Peru Nina ne, casua me camachaya naja hacutjin tsicjë me jyë naja. Hane hacuiin ngatsë rë ley xi cuatjin sahmi me. Cjuatacun rë Nina vë ne, hisca hatsë camahindu xcun xujun rë me. ²² Cjuatacun vëhë ne, cuitjin fi: Nina ne, tsicjë me jyë rë xuta xi mangucacun cojo Jesucristu. Cuatjin sahmi Nina cojo yëjë ni xuta xi cuatjin mangucacun me cojo Jesucristu ta Nina ne, tangun ni vutsejen me xutaxín cojo xuta tjë rë Israel.

²³ Yëjë ni xuta ne, sahmi me cjuatsehen, hacuaha chaja camaha sa xi cuechutaha me sacuatjin jyë hnga Nina cojo Hasen rë me. ²⁴ Peru cojo cjuandaja rë Nina ne, tu cjuatjo ni tsicjë me jyë rë xuta, ngatsë rë xi Jesucristu ne, cavechjitje me jyë

xi quitjen xuta. ²⁵ Nina ne, catsingatju me Jesucristu xi cueya me xi cuechjitje me jyé rë yějë ni xuta xi cumanguacacun cojo rë me. Cuatjin casahmi Nina, cojo sa xi sua me cumachaya naja xi me vëhë ne, jemu tyjahi me cojo cjuatacun rë me hya xi jemu catsijyëcacun me cojo xuta xi caviyuju titjun hacuaha catsingatjuhnga me jyé rë xuta xi cuacun vë. ²⁶ Hacuanitjin ni sua me machaya naja xi jemu tyjahi me cojo cjuatacun rë me quihndë xi titsicjë me jyé xi quitjen xuta xi mangucacun cojo Jesús.

²⁷ Xi cuatjin ne, ¿há cuma naxenndajan yojo naja? ¡Jéya, cumaji! Nina ne, hacuiin tsicjë me jyé naja ngatsë rë xcusun xi nihña ta suvá ngatsë rë xi mangutacun cojo Jesucristu. Vëhë xi choho nuhya rë sa xi naxenndajan yojo naja. ²⁸ Vëhë xi tsejen xi meje rë xi ningatahantacun cuitjin: Nina tsicjë me jyé rë ngu xuta ngatsë rë xi mangucacun xuta jan cojo Jesucristu, hacuiin ngatsë rë ngu ley xi vihndë me.

²⁹ Nina ne, ¿há cuma xi suvá ni xuta tjë rë Israel xi Nina rë me má me? ¿O há cojo xutaxín má me Nina tséhë? Juun, cojo me. ³⁰ Ngu ni Nina xi tacun me. Hane me vëhë tsicjë me jyé rë xuta tjë rë Israel ngatsë rë xi mangucacun xuta jan cojo Jesucristu, hacuaha tsicjë me jyé rë xutaxín xi vatiin me chuxin rë me ngatsë rë xi mangucacun xutaxín cojo Jesucristu. ³¹ Quihndë xi tinújan xi jemu vengui chjí rë xi mangutacun cojo Jesucristu ne, ¿há tinguetsun ngahñu rë ley xi cavitexa Nina? ¡Jéya! Ha hyan ta ley rë Nina ne, hatuxa vengui chjí rë.

Hacutjin camá xi cafë jyé rë Abraham

4 Sa cuatjin ne, ¿mé cuinújan tséhë xutachanga naja Abraham? ¿Mé xi casacu rë me xi caviyuju me nguehe ngasunhndë? ² Sa xi cachja Nina ta tsajin jyé rë Abraham ngatsë rë cjuandaja xi casahmi Abraham ne, tjin rë Abraham

chuva rë xi cuaxëndaja suvá me yojo rë me. Peru cumaji sahmi me cuatjin xcun Nina ta, ³ xujun rë Nina ne, chja cuitjin: “Abraham ne, camangucacun me cojo cjua xi cachja Nina cojo rë me, hane ngatsë rë vëhë xi catsicjë Nina jyé rë me.” Cuatjin chja xujun rë Nina. ⁴ Ngu xuta xi casahmi me ngu xa naja ne, chjí rë me ne, hacuiin catahan rë me sacuaha ngu cjuandaja xi nihña cojo rë me ta catahan rë me tséhë xi quitjen tséhë xa xi casahmi me tsajan. ⁵ Peru sacuaha ngu xuta xi hacuiin vihi hacuiin vëhë sahmi me xi meje rë me xi chuya rë Nina tséhë me ta tu mangucacun ni me cojo Nina, Nina tsicjë jyé rë xuta tsehen jan. Ngatsë rë xi cuatjin mangucacun xuta jan ne, hatuxa tsicjë Nina jyé rë me. ⁶ Xutachanga naja David ne, hacuaha cachja me hatsëë nixtin tséhë cjuasua xi tjin rë ngu xuta xi Nina tsicjë jyé rë me, hane tsimii sahmi rë há ndaja há ndajin casahmi xuta jan. ⁷ Cuitjin cachja David: Jemu ndaja tséhë ngu xuta xi catsinchataha Nina jyé rë me, hacuaha xi cafachacuendaain Nina cjuatsehen xi casahmi me.

⁸ Jemu ndaja tséhë ngu xuta xi hatuxa tsicjë Nai naja jyé rë me.

Cuatjin cachja David.

⁹ Cjuandaja vëhë ne, ¿há suvá cuma tséhë xuta xi cati chuxin rë? ¡Jéya! ta, hacuaha cojo xuta xi vatiin me chuxin rë cuma ta, tséhë xi ha cachjá ta Nina catsicjë me jyé rë Abraham ngatsë rë xi camangucacun Abraham cojo Nina. ¹⁰ ¿Janihya catsicjë Nina jyé rë Abraham? ¿Há cachja me cjua jan hya xi catatju cati chuxin rë me ne?, o há tsajin ne, ¿há hya xi cjëë xti chuxin rë me? Hacuiin hya xi ha cati chuxin rë me ta cachja me hya xi chaja sa xti. ¹¹ Hisca xi camá ngascan ne, sehe cati chuxin rë Abraham sacuaha ngu sellu xi case-taha rë me xi tsejen xi Nina ne, catsicjë me jyé rë Abraham ngatsë rë xi

ha camangucacun me cojo Nina. Cuatjin xi Abraham ne, camatitjun me sacuaha nahmi tsëhë yějë xuta xi cjuë jyé rë me ngatsë rë xi cumangucacun me cojo Nina handasa hacuiin xti chuxin rë me. ¹² Hacuaha Abraham ne, camatitjun me sacuaha nahmi tsëhë yějë ni xuta xi xti chuxin rë me hane hacuaha cumangucacun me cojo Nina, ta xuta jan ne, vetjun-gui cjuatacun rë xutachanga naja Abraham hya xi chaja sa xti chuxin rë me.

¹³ Nina ne, cachja me cojo Abraham ta yějë ngasunhndë ne, cuma tsëhë me cojo xuta xi nduva tjë rë me. Peru hacuiin ngatsë rë xi casahmi Abraham sacuatjin vitexa ley xi cuatjin cachja Nina cojo rë me ta cachja me cuatjin ngatsë rë xi camangucacun me cojo Nina. Vëhë xi Nina ne, catsicjë me jyé rë Abraham. ¹⁴ Cuatjin chjá ta, sa xi suvá xuta xi sahmi sacuatjin chja ley cuma satë rë me cjuandaja xi cachja Nina jan ne, venguiin chjí rë xi mangutacun cojo Nina, hacuaha machjiriin cjua xi cachja Nina jan. ¹⁵ Cachjá xi hacuiin ngatsë rë ley xi cuatjin cachja Nina cojo Abraham ta, tsëhë xi hiscan xi sahmi mixa ley rë Nina ne, ngajan xi cuma xuta castigu. Peru hiscan xi tsajin ley ne, hacuaha tsajin yo xi vinchajyé rë xuta ta casahmichiin me cjua xi vitexa ley.

¹⁶ Vëhë xi cavejña ngu cacun Nina xi sahmicihihin me cjua rë me cojo xuta xi cumangucacun cojo rë me, cojo sa xi tsejen ta suvá ngatsë rë cjuandaja rë Nina xi cuatjin sahmicihihin me cjua rë me cojo xuta. Ngajan xi tjin cjuaquixi xi sahmicihihin jain Nina cjua rë me cojo yějë xuta xi nduva tjë rë Abraham, hacuiin tu suvá cojo xuta xi tjin rë me ley ta hacuaha cojo xuta xi mangucacun me cojo Nina, sacuatjin casahmi Abraham. Cuatjin xi Abraham ne, camatitjun me tsajan sacuaha nahmi naja ngayejen ni ngayaan ngajan xcun Nina. ¹⁷ Nina ne, me vëhë xi camangucacun Abraham cojo

me, me vëhë xi sua cjuahñu rë nima, me vëhë xi handasa chaja sa tsindaja me ngu xcusun ne, chja me tsëhë xcusun vëhë sacuaha xi ha catsindaja me. Camahindu xcun xujun rë Nina hiscan xi cachja me cojo Abraham cuitjin: “Cavejña ri ne, xi cuma titjun ngaye sacuaha nahmi tsëhë jemu cjin xuta.” Cuatjin camahindu.

¹⁸ Peru Abraham ne, handasa matsijin hacutjin cuma sahmicihihin Nina cjua xi cachja me cojo rë me ne, camangucacun me cojo cjua jan, cavetaha cacun me Nina. Cuatjin xi camatitjun me tsëhë jemu cjin xuta, sacuatjin xi ha cachja Nina cojo rë me hya xi cachja me ta: “Cuitjin cjin cuma xuta xi tjë riji.” Cuatjin cachja Nina. ¹⁹ Hane hacuiin quiji ngaxtun Abraham xi mangucacun me cojo Nina handasa xi ha ngu cientu nu tjin rë me, hacuaha ha vëë me xi jemu changá camahani camá me cojo chjuun rë me xi sacú rë me quihndi. ²⁰ Peru hacuiin quiji ngaxtun me xi mangucacun me cojo cjua xi cachja Nina cojo rë me ta hitsë sa ndaja camangucacun me. Hacuaha casahmi jyë casahmi hnga me Nina ²¹ ta, xi tsingatahacacun me ne, hatuxa tjin rë Nina chuva rë xi sahmi chihin me yějë ni cjua xi cachja me xi sahmi me. ²² Vëhë xi Nina ne, catsicjë me jyé rë Abraham.

²³ Quihndë ne, hacuiin suvá tsëhë Abraham xi cuatjin camahindu xi catsicjë Nina jyé rë me ta ²⁴ hacuaha cojo tsajan ngayaan, xi sehe tsicjë Nina jyé naja, ngayaan xi mangutacun cojo Nina, me xi catsicuya Nai naja Jesucristu cjuahñu. ²⁵ Cahme me ngatsë rë cjuatsehen xi nihña, hacuaha cavuya me cjuahñu cojo sa xi cuma cjuë jyé naja.

Cavetjuntjen tsëhë jyé naja

5 Quihndë ne, tsëhë xi catsicjë Nina jyé naja ngatsë rë xi camangutacun cojo rë me ne, vëhë xi ngayaan ne, ha hindë tsajin sa cjuachan cojo Nina ngatsë

rë xi cavaxëtje naja Nai naja Jesucristu. ²Hacuaha ngatsë rê xi camangutacun cojo rê me ne, vëhë xi casacu naja cjuandaja rê me. Hacuaha jemu sua rê xahasen naja cojo ngu cjuetacun xi cuechú nixtin xi cuechuntahan hitsë sacuatjin jyë hnga Nina cojo Hasen rê me. ³Hane hacuiin suvã ngatsë rê cjuetacun vëhë ni ta hacuaha ma sua rê xahasen naja ngatsë rê cjuañihi xi vatjun ta, tsëhë xi ha hyan ta cjuañihi ne, vëhë vicuya naja hacutjin scaa naja tu mé ni cjuacjintacun. ⁴Hane xi scaa naja ne, vëhë sahmi xi chuya rê Nina tsajan, hane xi chuya rê Nina tsajan ne, vëhë sahmi xi cuetahan tacun Nina. ⁵Hane xi cuatjin cuetahan tacun Nina ne, tsajin nixtin cuetju sava ngayaan ta, tsëhë xi Hasen rê Nina xi casua naja me ne, jemu caveya cjuahmutacun rê Nina cahntsua xahasen naja.

⁶Hya xi tsajin mé camá canihña suvaan xi naxentjen yojo naja ne, hya cahme Jesucristu xi cuaxëtje me ngayaan xuta tsehen. Cahme me nixtin xi cachja Nina xi cueya me. ⁷Tsajin cjuaquixi xi ngu xuta sua me yojo rê me xi cueya me ngatsë rê ngu me xi tsajin jyë rê. Hisca ngu xuta ndaja jain ne, hyan sa xi sacu yo xi cuetjucacun xi sua yojo rê xi cueya ngatsë rê me. ⁸Peru Nina ne, casua me camachaya naja cjuahmutacun xi tjin rê me cojo naja hya xi Jesucristu casua me yojo rê me xi cahme me ngatsë naja, handasa xuta tsehen ngayaan. ⁹Hane quihndë xi cafë jyë naja ngatsë rê cjuaveya rê Jesucristu ne, ngajan xi hacuaha tjin cjuaquixi xi ngatsë rê me ne, cuetjuntjen tsëhë castigu. ¹⁰Hya xi condra rê Nina má ngayaan ne, hya camá xutandaja rê me ngayaan ngatsë rê cjuaveya rê Quihndi rê me. Hane quihndë xi camá xutandaja rê me ngayaan ne, tjin cjuaquixi xi ngayaan ne, cuetjuntjen ngatsë rê xi tacun quicun nga me quihndë. ¹¹Hacuaha jemu sua ma rê xahasen naja ngatsë rê cjuahmutacun rê

Nina, cojo ngatsë rê Nai naja Jesucristu, me xi quihndë casahmi xi camá xutandaja rê Nina ngayaan.

Hacutjin casahmi Adán cojo hacutjin casahmi Jesucristu

¹²Ntsacu cavetsihin ne, cavisehen xi hmí cjuatsehen cahntsua cjuatacun rê xuta nguehe ngasunhndë vihi ngatsë rê ngu xuta xi hmí rê Adán. Hane ngatsë rê cjuatsehen ne, cavisehen xi hmí cjuaveya nguehe ngasunhndë. Cuatjin xi yëjë ni xuta ngasunhndë ne, hatuxa hme me ta, tsëhë xi yëjë ni me ne, sahmi me cjuatsehen. ¹³Chaja sa xi sua Nina Moisés ley rê me ne, ha hinchajñi cjuatsehen ngajñi rê cjuatacun rê xuta ngasunhndë. Peru sahmicuendaain me cjuatsehen xi má hiscan xi tsajin ngu ley. ¹⁴Peru yëjë ni xuta xi caviyuju me ngasunhndë hisca nixtin rê Adán hisca nixtin rê Moisés ne, cahme me. Hisca xuta xi hacuiin tangun cjuatsehen xi casahmi me cojo cjuatsehen xi casahmi Adán ne, hacuaha cojo me cahme me. Hane Adán ne, tjin ngu xcusun hacutjin matangun me cojo Cristu, me xi sehe cuinduva me ta, ngatsë rê Adán ne, cavisehen ngu xcusun nguehe ngasunhndë, hacuaha ngatsë rê Jesucristu, me xi camangascan canduva ne, cavisehen ngu nga xcusun ngasunhndë.

¹⁵Peru cjuandaja xi sua Nina ne, hacuiin tangun cojo cjuatsehen xi casahmi Adán. Ngatsë rê cjuatsehen xi casahmi ngu ni xuta vëhë ne, jemu cjin xuta cahme me. Peru cjuandaja rê Nina cojo cjuandaja xi tisua naja ngu ni xuta xi hmí Jesucristu ne, hitsë sa vengui chji rê hacuaha jemu ndaja cama rê tsëhë jemu cjin xuta. ¹⁶Cuichjá nga ngu ndiya ta hacuiin tangun cavetju tsëhë cjuandaja vëhë cojo tsëhë cjuatsehen xi casahmi ngu ni Adán. Hya xi Adán casahmi me cjuatsehen vëhë ne, sehe cachja Nina xi sacuaha

castigu ne, cuechú nixtin xi cueya Adán. Peru quihndë ne handasa xi jemu cjín cjuatsehen sahmi xuta ne, Nina ne, hacuaha sahmi me cjuandaja xi tsicjë me jyë rë xuta. ¹⁷Ngatsë rë cjuatsehen xi casahmi ngu ni xuta ne, hatuxa cuma rë xuta cjuaveya. Cuanitjin hitsë sa ndaja ta, ngatsë rë ngu ni Jesucristu ne, xuta xi jemu tisacu rë me cjuandaja rë Nina xi tsicjë Nina jyë rë me tu cjuatjo ni ne, hatuxa sacú rë me cjuahñu xatsë.

¹⁸Vëhë xi sacuatjin xi cavetjucaa castigu xi cuma rë yëjë ni xuta ngatsë rë ngu cjuatsehen jan ne, hacuanitjin ni cuetjucaa xi cjuë jyë rë yëjë ni xuta, hacuaha sacú rë me cjuahñu xatsë, ngatsë rë ngu ni cjuandaja jan. ¹⁹Hacuaha sacuatjin xi jemu cjín xuta camatsehen cjuatacun rë me ngatsë rë xi ngu ni xuta cahndiin me tsëhë Nina ne, hacuanitjin ni jemu cjín xuta cuma me xuta xi tsajin jyë rë ngatsë rë xi ngu ni me xi cahndë me tsëhë Nina.

²⁰Cavejña Nina ley hane ngajan xi cama cjín sa cjuatsehen xi sahmi xuta. Peru hiscan xi camacjín sa cjuatsehen ne, ngajan xi cjín sa camatsejen cjuandaja rë Nina. ²¹Sacuatjin xi hatuxa casahmi xuta cjuatsehen hane cahme me ne, hacuanitjin ni hatuxa sacú rë xuta cjuandaja rë Nina, hane cjuë jyë rë me, sehe sacú rë me cjuahñu xatsë, ngatsë rë Nai naja Jesucristu.

**Sacuaha xi caveyan xi cuma
rë cjuatsehen hane quicun
ngayaan xi cuma rë Nina**

6 Xi cuatjin ne, ¿há quixi sa xi cuinú-jan xi ndatjin xi nihña sa cjuatsehen cojo sa xi vetjutsejen sa cjuandaja rë Nina? ²Jéya, ndajintjin! Ngayaan ne, sacuaha xi caveyan xi cuma rë cjuatsehen. Hane xi ha cavetjuxen tsëhë cjuatsehen ne, ha quihndë cumaji camahani cuinechan sa ngajñi rë cjuatsehen. ³¿Há hyuun ta ngayejen ni ne, hya xi caxtenda ngayaan xi cumatangun ngayaan cojo

Jesucristu ne, hacuiin tu xi cuma tangun ni ngayaan cojo rë me ta hacuaha cojo xi cuma tangun ngayaan cojo cjuaveya rë me? ⁴Ngajan xi sacuaha xi caxinchaniji tangun ngayaan cojo Jesucristu hya xi caxtenda ngayaan, cojo sa xi cuma tsejen xi camatangun ngayaan cojo cjuaveya rë me. Cuatjin caxinchaniji ngayaan cojo sa xi sacuatjin xi cavuya Jesucristu cjuahñu ngatsë rë Nahmi naja xi jemu jyë hnga me cojo Hasen rë me ne, hacuanitjin ni ngayaan ta sacú naja cjuahñu xatsë xi tivanguen cojo ngasunhndë naja.

⁵Sa xi camatangun ngayaan cojo ngu cjuaveya sacuaha cjuaveya rë Jesucristu ne, hacuaha cama tangun ngayaan cojo ngu cjuahñu sacuaha cjuahñu xatsë rë me. ⁶Hacuaha hyan ta ngayaan ne, sacuaha xi casetaha tangun ngayaan cojo Jesucristu xcun cru, cojo sa xi cjuë cuetsun yojo tsehen naja, hane cuatjin xi ha quihndë hacuiin cuanguen nduju sa ndiya rë cjuatsehen. ⁷Ta yo xi ha cahme ne, ha camandaya tsëhë cjuatsehen. ⁸Sa xi cuatjin caveyan cojo Jesucristu ne, vetahantacun xi hacuaha cuatjin cuinechan cjuahñu cojo rë me. ⁹Hacuaha hyan ta Jesucristu ne, quihndë xi ha cavuya me cjuahñu ne, ha quihndë cuyaa in cueya nga me ngu ndiya. Cjuaveya ne, ha quihndë vitexaa in rë me. ¹⁰Xi cahme me ne, ngu ndiya ni cahme me xi cuma rë cjuatsehen; peru quihndë xi tacun nga me cjuahñu ne, tacun me xi cuma rë Nina. ¹¹Cuatjin nuju ngayun ne, nihñucuendun ni xi caveyun camahani xi cuma rë cjuatsehen, nihñucuendun xi nechun cjuahñu xi cuma rë Nina xi tjin tangun cjuatacun nuju cojo Jesucristu.

¹²Vëhë xi ngayun ne, xicatuun sa cahndë xi cjuatsehen cuitexa nuju; xicanihñuu sa yëjë ni hacutjin meje rë yojo jyë nuju. ¹³Xicatuun sa yojo nuju cojo cjuatsehen ta tuhun yojo nuju cojo Nina, sacuaha nima xi cavuya cjuahñu

ngayun. Yojo nuju ne, mijí rë xi sahmi xa rë cjuatsehen ta meje rë xi sahmi xa rë cjuandaja. ¹⁴ Sacuaha cjuatsehen ne, ha quihndë vitexaain nuju ta, tsëhë xi hacuiin ley tivitexa nuju ta cjuandaja rë Nina ne, vëhë tivitexa nuju.

Yo meje rë xi tahan yojo naja cojo

¹⁵ Sa cuatjin ne, ¿mé xi ndatjin nihña? ¿Há nihña sa cjuatsehen tsëhë xi hacuiin ley tivitexa naja ta cjuandaja rë Nina tivitexa naja? ¡Jéya, hacuiin cuatjin! ¹⁶ Ngayun ne, ha ndaja hyun ta sa xi tuhun yojo nuju cojo cjuatsehen xi cuinuhyun tsëhë yëjë ni hacutjin vitexa nuju cjuatsehen ne, hatuxa tjihñu ngayun cojo cjuatsehen jan, hacuaha sacú nuju cjuaveya. Peru sa xi tuhun yojo nuju cojo Nina xi cuinuhyun tsëhë me ne, hatuxa tjihñu ngayun cojo Nina, hacuaha nu-jyuhunyun ndiya rë cjuandaja. ¹⁷ Titjun ne, hatuxa tjihñu ngayun cojo cjuatsehen. Peru nacuechji rë Nina ta quihndë ne, ha canuhyun cojo ngu ñaja xahasen nuju tsëhë cjuachacun xi casahmi Nina xi camachaya nuju. ¹⁸ Hane xi ha camandaya ngayun tsëhë cjuatsehen ne, catuhun yojo nuju cojo ndiya rë cjuandaja. ¹⁹ Tichjá cojo nuju cojo cjua xi chjaain cuijne rcun, ngatsë rë xi hvë xi jemu chja cuijne rcun cjuatacun xi tichjá cojo nuju. Titjun ne, catuhun yojo nuju cojo cjuatsehen, cojo sa xi suvá cjuatsehen yëjë ni xi nihñu. Peru quihndë ne, cuatjin meje rë xi tuhun yojo nuju cojo ndiya rë cjuandaja cojo sa xi cuma cjuë jyë nuju xcun Nina.

²⁰ Hya xi tjihñu ngayun cojo cjuatsehen ne, ndaya tjin ngayun xi cuma rë ndiya rë cjuandaja. ²¹ Peru ¿mé ndajyihi casacu nuju hya? Tsajin, ta quihndë ne, tu ma sava nuju xi ninguitsjun xcusun xi canihñu ta, tsëhë xi hya xi cuatjin nihña ne, suvá cjuaveya sacú naja. ²² Peru quihndë ne, camandaya ngayun tsëhë cjuatsehen hacuaha catuhun yojo nuju cojo

Nina. Vëhë xi tisacu nuju ngu cjuatacun tyjahi xi tsajin cun rë, tisacu nuju ngu xahasen tyjahi, hacuaha hya xi cuijne-taha ne, sacú nuju ngu cjuahñu xatsë. ²³ Sacuaha chjí xi sacú naja tsëhë cjuatsehen ne, hacui cjuaveya. Peru cjuandaja xi Nina sua naja me, tu cjuatjo ni sacú naja hya xi tjin tangun cjuatacun naja cojo Nai naja Jesucristu. Hane sacú naja cjuahñu xatsë.

Xcusun xi vicuya naja ley rë cjuavixan

7 Ngayujun ni matsejen ne, ha hyun xi hmí rë ley. Vëhë xi ha hyun xi ley ne, vitexa naja jinguyëjë rë xi nechan cjuahñu. ² Sacuaha ngu chjuun xi cavixan na cojo xihin rë na ne, chja ley rë Moisés ta sacuaha xi tjihñu na cojo cha jinguyëjë rë xi tacun cha cjuahñu. Peru sa xi xihin rë na cueya cha ne, na vëhë ne, ha ndaya tjin na tsëhë cjuavixan xi camá na cojo xihin rë na jan. ³ Vëhë xi sa xi tacun cuaha xihin rë na, hane na vëhë ne, cjuaha na jingu sa xihin ne, jemu jyë jyë rë na. Peru sa xi cueya xihin rë na jan ne, ndaya tjin na tsëhë cjuavixan xi camá na, hacuaha tsajin mé jyë rë na sa xi cuixan nga na ngu ndiya cojo jingu sa xihin.

⁴ Cuanitjin nuju ngayun, sacuaha xi caveyun xi cuma rë ley ngatsë rë Jesucristu cojo sa xi cuma ndaya ngayun tsëhë ley, hane cuma tsëhë jingu sa me ngayun. Me vëhë ne, hacui Jesucristu, me xi cavuya cjuahñu. Cuatjin cavuya me cjuahñu cojo sa xi cuma nihña cjuandaja xi meje rë Nina. ⁵ Titjun hya xi cavinechan cojo yojo jyë naja ne, ley ne, catsingasca rë cjuatsehen ngajni rë cjuatacun naja cojo sa xi nihña cjuatsehen. Hane ngatsë rë cjuatsehen xi canihña ne, vëhë xi cuechuntahan cjuaveya. ⁶ Peru quihndë ne, sacuaha xi caveyan xi cuma rë xcusun xi catsihñu naja, sehe ndaya tjin ngayaan tsëhë ley. Cuatjin xi

ha quihndë hacuiin tjihñu ngayaan cojo ley changá vëhë ta, tjihñu ngayaan cojo cjua xatsë tsëhë Hasen rë Nina.

Cjuatsehen xi hinja ngajñi yojo naja

⁷ Tsëhë xi quixi cuatjin ne, ¿há cuinú-jan xi jemu tsehen ley rë Moisés jan? ¡Jéya, hacuiin cuatjin! Peru hveen mé xi hmí rë cjuatsehen hisca xi camachaya ná cjua rë ley jan. Hya ne hveen xi nda-jin tjin xi tsimeje xcusun xi tjin rë jingu sa xuta, hveen hisca xi camachaya ná cjua rë ley xi chja cuitjin: “Xicanimiji xcusun xi tjin rë jingu sa xuta.” ⁸ Ngajan xi ngatsë rë xi camachaya ná cjua rë ley jan ne, cjuatsehen ne, catsingasca rë cjuatacun naha, hane casahmi xi ngahan ne, jemu catsimeje xcusun xi tjin rë jingu sa xuta. Suva hya xi cjëë cumachaya ná cjua rë ley ne, hya xi tsajin mé casahmi cjuatsehen cojo ná. ⁹ Titjun xi hveen xi hmí ley ne, sacuaaha xi jemu ndajyihi tejña. Peru hya xi camachaya ná tsëhë cjua rë ley jan ne, cavascaya rë cjuatsehen ngajñi rë cjuatacun naha, ¹⁰ hane sacuaaha xi cavéya ngahan. Hane cjua rë ley vëhë ne, cahndë rë xi cavisecoo ná xi sacú ná ngu cjuahñu xatsë ne, sacuaaha xi catsiquehen ná. ¹¹ Cuatjin camá ta, tsëhë xi ngatsë rë xi camachaya ná cjua rë ley jan ne, cjuatsehen ne, cavindacha ná. Hane cojo cjua rë ley jan ne, casacu ná cjuaquixi xi xín cavitejña tsëhë Nina.

¹² Ngajan xi yëjë ni cjua xi vitexa ley jan ne, hatuxa cjua rë Nina, hatuxa cjuaquixi, hatuxa cjuandaja. ¹³ Xi cuatjin ne, ley xi ndaja jan ne, ¿há cuma xi vëhë catsiquehen ná? ¿Há cuma xi vëhë cavaxëxin ná tsëhë Nina? ¡Jéya, hacuiin cuatjin cama! Cjuatsehen ne, cojo sa xi cumatsejen xi tsehen jain ne, casahmi xa cojo ngu xcusun ndaja cojo sa xi tsiquehen ná. Cuma cuinújan ne, hya xi machaya naja cjua rë ley jan ne, ngajan ma tsejen xi jemu tsehen camahani cjuatsehen.

¹⁴ Ha hyan ta ley rë Moisés jan ne, tsëhë Nina vë. Peru ngahan xi tsëhë ngasunhndë ngahan ne, sacuaaha xi cax-teña ngahan xi cuñhndë tsëhë cjuatsehen. ¹⁵ Hisca vijniircú xcusun xi sahme. Sahmee xcusun xi meje sahme ta sahme xcusun xi chuyiin camahani ná. ¹⁶ Quihndë xi sahme xcusun xi mijí sahme ne, ha ngajan ma tsejen ta ha hvë ta ley ne, jemu ndaja. ¹⁷ Peru xi cuatjin ne, hacuiin ngahan xi sahme cuatjin ta cjuatsehen xi hinja ngajñi yojo naha ne, vëhë xi sahmi cuatjin. ¹⁸ Ha hvë ta sacuaaha ngajñi yojo jyé naha vi ne, tsajin camahani hinja rë cjuandaja. Jemu meje sahme cjuandaja, peru maji. ¹⁹ Sahmee cjuandaja xi meje sahme ta tu cjuatsehen xi mijí sahme ne, vëhë sahme. ²⁰ Peru quihndë xi sahme xcusun xi mijí sahme ne, ha ngajan ma tsejen ta hacuiin ngahan xi sahme cuatjin ta, cjuatsehen xi hinja ngajñi yojo naha ne, vëhë xi sahmi cuatjin.

²¹ Ngajan xi ngahan ne, hatuxa cuitjin vátju má: hya xi meje sahme ngu cjuandaja ne, hya vutsején ta tjin mé xi sahmi xi ma sahme cjuatsehen. ²² Ngahan cojo cjuatacun naha ne, jemu chuya ná ley rë Nina. ²³ Peru vutsején ta ngajñi yojo jyé naha ne, jiya sa ngu ley xi hacjahi. Hane ley xi hacjahi jan ne, sacuaaha xi ticjan cojo ley xi jiya ngajñi cjuatacun naha. Hacuaha ley xi hacjahi jan ne, hacui ley rë cjuatsehen xi hinja ngajñi yojo naha. Hane vutsején ta ley jan ne, sacuaaha xi titsihñu ná. ²⁴ ¡Jemu choho camahani má ná ngahan! ¿Yo xi cuaxëtje ná tsëhë yojo jyé naha vi ni? ta, ngatsë rë yojo naha vi ne, sacú ná cjuaveya. ²⁵ Suá nacuechji rë Nina ngatsë rë Nai naja Jesucristu ta me vëhë cuaxëtje ná me. Ngajan xi ngahan ne, ngu ladu ne, tjihñu cjuatacun naha cojo ley rë Nina, peru ngu ladu nga ne, tjihñu yojo naha cojo ley rë cjuatsehen.

Hacutjin meje rë xi tjenguen ndiya rë Nina

8 Quihndë ne, tsajin camahani castigu xi cuma naja ngayaan xi tjin tangun cjuatacun naja cojo Jesucristu ta, ²tsëhë xi quihndë xi tjenguen ndiya rë Nina xi sua naja cjuahñu xatsë ngatsë rë xa xi casahmi Jesucristu ne, vëhë xi ha tjin ndaya ngayaan tsëhë ndiya rë cjuatsehen xi sua naja cjuaveya. ³Xcusun xi camaji casahmi ley rë Moisés ngatsë rë xi caain rë xutajyë sahmi chihin me sacuatjin chja ley ne, Nina ne, camá casahmi me. Nina catsingatju me Quihndi rë me xi cuma me ngu xuta sacuatjin ngayaan xutajyë. Catsingatju Nina Quihndi rë me jan xi tsicjë me cjuatsehen. Vëhë xi quihndi jan xi hmí rë Jesucristu ne, cahme me sacuahha castigu ngatsë rë yëjë ni cjuatsehen xi sahmi xuta jyë. ⁴Cuatjin casahmi Nina cojo sa xi cuma nihña sacuatjin vitexa ley ta ngayaan ne, hacuiin tjenguen ndiya hacutjin xi meje rë yojo jyë naja ta tjenguen ndiya hacutjin xi meje rë Hasen rë Nina.

⁵Xuta xi tjengui me ndiya hacutjin xi meje rë yojo jyë rë me ne, sahmi tangun me cjuatacun rë me cojo xcusun xi meje rë yojo jyë rë me. Peru xuta xi tjengui me ndiya rë Hasen rë Nina ne, sahmi tangun me cjuatacun rë me cojo Hasen rë Nina. ⁶Xuta xi tsiniya cacun me hacutjin xi meje rë yojo jyë rë me ne, hatuxa sacú rë me ngu cjuaveya ta tsajin jiya Hasen rë Nina cahntsua xahasen rë me, cuechiin me xcun Nina. Peru xuta xi tsiniya cacun me hacutjin meje rë Hasen rë Nina ne, hatuxa sacú rë me ngu cjuahñu xatsë cojo ngu cjuajeya ta ha jiya Hasen jan xahasen rë me hacuahha cuechú me xcun Nina. ⁷Ngajan xi xuta xi tsiniya cacun me hacutjin xi meje rë yojo jyë rë me ne, hatuxa choho vëë me Nina ta, tsëhë xi mijí cuihndë me tsëhë cjuaxi vitexa Nina. Hisca maji vihndë me tsëhë cjuaxi

vitexa Nina. ⁸Xuta xi tjengui me ndiya hacutjin xi meje rë yojo jyë rë me ne, maji sahmi me sacuatjin chuya rë Nina.

⁹Peru ngayun ne, hacuiin tjengun ndiya hacutjin xi meje rë yojo jyë nuju ta tjengun ndiya rë Hasen rë Nina, sa xi jiya Hasen rë Nina cahntsua cjuatacun nuju. Peru sa xi ngu xuta tsajin rë me Hasen rë Jesucristu ne, xuta vëhë ne, hacuiin tsëhë Jesucristu me. ¹⁰Peru sa xi jiya Hasen xi sua Jesucristu ngajñi rë cjuatacun nuju ne, yojo nuju ne, sacuahha xi cahme ngatsë rë cjuatsehen, peru hasen nuju ne, sacú rë ngu cjuahñu xatsë ngatsë rë xi Nina ne, tsicjë me jyë nuju. ¹¹Ha hyan ta Nina ne, catsicuya me Jesús cjuahñu. Hane sa xi jiya Hasen rë Nina ngajñi rë cjuatacun nuju ne, vëhë sahmi xi sua sa Nina cjuahñu rë yojo jyë nuju xi hatuxa hme.

¹²Vëhë xi ngayaan ne, tjin xcusun xi hatuxa meje rë xi nihña, peru mijí rë xi nihña sacuatjin vitexa yojo jyë naja ta ¹³ngu xuta xi tisahmi me sacuatjin vitexa yojo jyë rë me ne, hatuxa cueya me. Peru ngu xuta xi cojo ngahñu xi sua Hasen rë Nina me ne, titsitjungui me xcusun xi meje rë yojo rë me ne, hatuxa sacú rë me ngu cjuahñu xatsë.

¹⁴Yëjë ni xuta xi vihndë me tsëhë Hasen rë Nina ne, me vëhë xi cjuaquixi xi quihndi rë Nina me. ¹⁵Hasen xi casacu nuju ne, hacuiin ngu hasen xi tsihñu nuju cojo sa xi rcun nga cuma ngu ndiya ta, hasen vëhë ne, hacui ngu xi sahmi xi cjuaquixi xi cuma ngayun quihndi rë Nina. Hya xi nujan “¡Papá!” Nina Nahmi naja ne, ¹⁶hya tichja Hasen rë Nina cojo hasen naja xi ngayaan ne, ha quihndi rë Nina ngayaan. ¹⁷Hane tsëhë xi quihndi rë Nina ngayaan ne, vëhë xi hatuxa cuechú nixtin xi satë naja cjuandaja rë me. Hacuaha cojo ngayaan satë naja tsëhë cjuandaja xi satë rë Jesucristu ta, tsëhë xi quihndë ne, ti-vatjun cjuañihi sacuatjin cavatju Jesu-

cristu. Vêhë xi hya xi cuma ngascan ne, hacuaha cojo ngayaan cuma yehe cuma hnga ngayaan cojo cjuatacun naja sacuatjin cama jyë cama hnga Jesucristu cojo Hasen rë me.

¹⁸ Xi má ná ngahan ne, tsimii sahmi rë xi tivatjun ngayaan cjuañihi quihndë ta, tsêhë xi cjuandaja rë Nina xi sacú naja xi cuma ngascan ne, jercu tu ndaja camahani. ¹⁹ Yëjë ni xcusun xi casahmi Nina nguehe ngasunhndë ne, jemu siuya xi meje xati scuëë hacutjin cún hacutjin má cuma ngayaan quihndi rë Nina. ²⁰ Ta ngasunhndë ne, tu mahya xi siu yëjë ni xi siu. Peru hacuiin hatuxa xcusun xi cacún vë camameje rë xi cuatjin camá ta Nina ne, cuatjin meje rë me xi cuma. Peru tjin ngu cjuetacun. ²¹ Cuechú nixtin xi yëjë ni xi casahmi Nina nguehe ngasunhndë ne, hisca cojo vëhë cuma ndaya ne, ha quihndë hacuiin hatuxa cjuehndu sa ta cuma ndaya sacuatjin cuma ndaya yëjë ni quihndi rë Nina. Hacuaha sacú rë cjuandaja sacuatjin sacú rë quihndi rë Nina cjuandaja. ²² Ha hyan ta hisca quihndë nixtin vihi ne, yëjë ni xi casahmi Nina ngasunhndë vi ne, sacuaha xi tivitsine sacuaha xi vitsine ngu chjuun xi meje tsin rë na quihndi. ²³ Hane hacuiin suvá ni ngasunhndë xi cuatjin tivitsine ta hacuaha cojo ngayaan ne, tivitsine. Ha tjin naja Hasen rë Nina sacuaha hitsë tsêhë yëjë ni xi sacú naja xi cuma ngascan. Peru vitsine ta, tsêhë xi jemu meje naja xi Nina sahmi naja me quihndi rë me xi cjuaquixi hya xi cuaxëtje me yoyo jyë naja. ²⁴ Ngayaan ne, cavetjuntjen cojo sa xi cuetahan tacun Nina. Peru sa xi ha tjin naja ngu xcusun ne, ha quihndë hacuiin cuetahan tacun xi sehe sacú naja xcusun xi ha tjin naja jan. ²⁵ Peru hya xi vetahan tacun xi sacú naja ngu xcusun xi cjëë sacú naja ne, jemu jyë tacun xi nechayan rë.

²⁶ Hacuaha ha chuva vëhë ni ne, Hasen rë Nina ne, visecoo naja, ngayaan

xi caain naja nihña cjuandaja. Hisca hyaan jarë cjuandaja rë Nina xi ndatjin xi chjahyan. Peru suvá Hasen rë Nina ne, chjatje ngatsë naja cojo cjuatacun xi hisca cumaji cuinújan cojo cjua naja. Vëhë xi sacuaha xi tu fëtacun ni. ²⁷ Hane Nina, me xi vëë yëjë ni xi hinchu cjuatacun naja ne, hacuaha vëë me cjuatacun rë Hasen rë me jan ta, tsêhë xi Hasen rë me jan ne, hatuxa chjatje ngatsë rë xuta ladu rë Nina sacuatjin meje rë Nina xi cuma.

Nina sahmi me xi cuetjunndajan ngayaan

²⁸ Ha hyan ta yëjë ni xcusun xi má nguehe ngasunhndë vi ne, sahmi Nina xi ndaja tsêhë xuta xi hmucacun me Nina, xuta xi cavaxijin Nina sacuatjin xi meje rë me. ²⁹ Hisca ntsacu cavetsihin ne, ha tjin chjinë rë Nina cjuatacun rë yo xi meje rë me xi cuma xuta ladu rë me, hacuaha hisca hya cavejña ngu cacun me xi cuma xuta xi cuacun jan sacuaha Jesucristu Quihndi rë me. Cuatjin meje rë Nina cojo sa xi cuma titjun Jesucristu ngajñi rë jemu cjín xuta xi cuma sacuaha xicjin me. ³⁰ Hacuaha xuta xi cuacun cavejña ngu cacun Nina jan ne, me vëhë xi cavaxijin Nina me; hacuaha xuta xi cuacun catsicjë Nina jyë rë jan ne, me vëhë xi casahmi yehe casahmi hnga Nina me cojo cjuatacun rë me.

³¹ Quihndë ne, nguehe cuichjá sa ngu cjua cojo nuju. Tsêhë xi Nina tacun me ngatsë naja ne, tsajin camahani yo xi cuma sahmi naja condra. ³² Nina ne, catsichuvaain naja me Quihndi rë suvá me ta casua me Quihndi rë me xi cahme ngatsë naja ngayejen ni. Hane vëhë xi hacuaha hatuxa sua naja me yëjë sa xcusun xi ndaja. ³³ Tsajin yo xi cuinchajyë naja, ngayaan xi Nina cavaxijin naja me ta, Nina ne, me vëhë xi tsicjë me jyë naja. ³⁴ Vëhë xi tsajin camahani yo xi ma cjan rë xi ngayaan cún naja. Tsajin

ta, Jesucristu ne, me vëhë xi ha cahme me hacuaha ha cavuya me cjuahñu, hane me vëhë xi jemu casahmi jyë casahmi hnga Nina me cojo Hasen rë me ngajan hiscan tacun me cojo rë Nina. Hacuaha me vëhë xi tichjatje me ngatsë naja.

³⁵ Ngajan xi tsajin camahani mé xcusun xi cuaxëxin naja tsëhë cjuahmutacun rë Jesucristu, handasa cuatjun cjuañihi, handasa sacuiyin hacutjin naxentjen yojo naja, handasa yo tsujyihya tjengui naja cojo cjuahngatacun, handasa cuma jindya nangui naja, handasa cumachaja naja tsjian naja, handasa cuinechantahan tsavi xi mé xi cuma naja, handasa tsiquehen naja xuta. Hatuxa tsajin mé xcusun xi cuacun vë xi cuma cuaxëxin naja tsëhë cjuahmutacun rë Jesucristu.

³⁶ Hacuaha camahindu ngujo cjua xcun xujun rë Nina xi chja cuitjin:

Yëjë ni hora ne, titsiquehen niji xuta ngu jo ngayin ngatsë rë xi ladu nuju ngayin;

xi má rë xuta ne, ngayin ne, sacuaha chu tsánga xi cjue cueya chu ngayin.

Cuatjin camahindu. Sacuatjin camahindu tsëhë xuma xuta xi cuacun jan ne, hacuaha cuatjin tivatjun tijima.

³⁷ Peru caa naja yëjë ni cjuacjintacun vëhë, hisca vetjun ndaja sa ta, tsëhë xi Jesucristu ne, visecoo naja me, tsëhë xi hmucacun naja me. ³⁸ Hane ngahan ne, camangucácun ta tsajin mé xcusun xi cuma cuaxëxin naja tsëhë cjuahmutacun rë Nina: sa cjuaveya sa cjuahñu, sa ángel sa xuta xi ma titjun, sa cjuacjintacun xi tivatjun tijima, sa cjuacjintacun xi sehe nduva, sa xutacjín xi choho vëë naja sa chircun, ³⁹ sa ngajan ngahnga nduva, sa nguehe nangui nduva, o sa tu mé ni xcusun xi yahnga xi casahmi Nina ne, cumaji cuaxëxin naja tsëhë cjuahmutacun xi tjin rë Nina cojo naja ngatsë rë xi tjin tangun cjuatacun naja cojo Nai naja Jesucristu.

Nina cavaxijin me xuta Israel

9 Quihndë ne, sacuaha ngahan xi tsëhë Jesucristu ngahan ne, nguehe cuichjá cjuaquixi, hacuiin vindácha nuju. Hane tsëhë xi jiya Hasen rë Nina ngajñi rë cjuatacun naha ne, vëhë xi hvë cojo cjuatacun naha ta cjua xi chjá ne, cjuaquixi hya xi chjá xi ²jercu tu choho camahani má ná, jemu jyë cjuava xi jiya cahntsua xahasen naha.

³ Hisca má cáacun ne, cjuéhya rë Nina xi cuaxëxin ná me tsëhë Jesucristu sa xi cojo cjuatacun vëhë ne, yëjë ni xuta xi tangun xutachanga naha cojo ne, cuma sacú rë me cjuandaja rë Nina. ⁴ Xuta xi cuacun vë ne, xuta Israel me. Me vëhë xi camá me quihndi rë Nina, camachaya rë me hacutjin jemu jyë hnga Nina cojo Hasen rë me, camachihin ngu jo compromisu rë Nina cojo rë me, casacu rë me ley rë Nina, camachaya rë me hacutjin meje rë xi chjaharcun rë Nina, casacu rë me cjua rë Nina hacutjin sua Nina me cjuandaja. ⁵ Me vëhë xi canduva me tjë rë xutachanga niji, hacuaha tjë rë me vëhë ne, canduva Jesucristu sacuaha ngu xuta. Hane Jesucristu jan ne, me vëhë xi Nina me tsëhë jingujyë ni ngasunhndë, hacuaha chjaharcun rë me yëjë nu yëjë nixtin. Cuatjin jain.

⁶ Hacuiin chjá xi cavetjincaain cjua xi cachja Nina cojo xuta Israel. Ha hyun ta xuta xi canduva tjë rë xutachanga xi hmí rë Israel ne, hacuiin yëjë me xi xuta ladu rë Israel xi cjuaquixi me.

⁷ Hacuaha xuta xi canduva tjë rë Abraham ne, hacuiin yëjë me xi ladu rë Abraham me xi cjuaquixi, ta cuitjin cachja Nina cojo Abraham: “Suvá tjë rë quihndi riji Isaac ne, vëhë ni xuta xi cuma tjë riji xi cjuaquixi.” Cuatjin cachja Nina.

⁸ Cuma cuinújan ne, hacuiin yëjë ni xuta xi canduva tjë rë Abraham xi jni xi yojo rë me xi cuma quihndi rë Nina ta, suvá

xuta xi tsin me sacuatjin cachja Nina cojo Abraham ne, me vëhë xi cuichja Nina xi tjë rë Abraham xi cjuaquixi. ⁹Cuitjin cachja Nina cojo Abraham hat-sëë: “Nixtin xi cuejñá xi cúa nga ne, hya tsin rë na Sara ngu quihndi xihin.” Cu-atjin cachja Nina.

¹⁰Hacuaha hacuiin vëhë ni má yëjë cjuva vë ta sacuaaha catsijo quihndi rë Re-beca ne, ngu ni nahmi rë, me xi xutachanga niji xi hmí Isaac. ¹¹⁻¹²Hane hisca hya xi cjëë tsin quihndi xi cuacun jan, hacuaha cjëë sahmi xi ndaja xi ndajin ne, hya cachja Nina cojo Re-beca cuitjin: “Quihndi riji xi ngascan ne, cuma titjun tsëhë quihndi tjun.” Cuatjin cachja Nina. Cuatjin camá cojo sa xi cuma tsejen xi Nina ne, tjin rë me chuva rë xi cuaxijin suvá me tu yo ni xi meje rë me, hacuaha tsimii sahmi rë tu mé ni xcusun xi casahmi xuta jan. ¹³Hacuaha camahindu xcun xujun rë Nina cuitjin: “Cha Jacob ne, catsihmucacun cha, peru cha Esaú ne, choho cahvë cha.” Cuatjin camahindu.

¹⁴Xi cuatjin ne, ¿há cuinújan xi Nina ne, cuaaintjin xi sahmi me? ¡Jéya, hacuiin! ta ¹⁵Nina ne cuitjin cachja me cojo Moisés: “Ngahan ne, sahme cjuandaja cojo yo xi meje sahme cjuandaja cojo, hacuaha cumayuma ná yo xi meje cuma yuma ná.” ¹⁶Vëhë xi xuta xi sacurë cjuandaja rë Nina ne, hacuiin xuta xi jemu meje rë, hacuiin xuta xi jemu sahmi vihi sahmi vëhë ta suvá Nina vaxijin me yo xi sua me cjuandaja rë me. ¹⁷Xcun xujun rë Nina ne, chja Nina cojo me xi ma titjun tsëhë xuta Egipto cuitjin: “Ngahan ne, casahme xi camatitjun ngaye cojo sa xi cuatjin tsingácun rë xuta ngahñu naha, hacuaha cojo sa xi xuta tsëhë yëjë ni ladu ne, cumachaya rë me yo ngahan.” Cuatjin cachja Nina. ¹⁸Ngajan xi Nina ne, sahmi me cjuandaja cojo yo xi meje sahmi me cjuandaja cojo, hacuaha

sahmi me xi mijí cuijne rcu yo xi meje rë me xi cuijnii rcu.

¹⁹Peru ngu ngayun ne, cuinújun cojo ná cuitjin: “Sa cuatjin ne, ¿mé má chaha rë xuta sahmi Nina? ta, tsëhë xi tsajin yo xi catsingatiin rë xcusun xi meje rë Nina xi cuma.” Cuatjin cuinújun. ²⁰Peru ngayun xi ngu xutajyë ni ngayun ne, ¿yo ngayun xi cuatjin meje cuinújun cojo Nina? Sacuaha ngu xcusun xi casahmi xuta ne, ¿há cuichja cojo xuta xi casahmi jan cuitjin: “¿Mé má cuitjin jyih canihñu ná?” Cuatjin cuichja. ²¹Sacuaha ngu cha chjinetiji ne, hatuxa tjin rë cha xa xi cjuaha cha ngu xtín ndasi ne, tsindaja cha jo tiji. Ngu tiji jan ne, jemu ndajiyihi ngu xa xi satë rë, hane tiji xingu jan ne, ngu xa xi chojyih satë rë.

²²Nina ne, tsëhë xi meje sua me cumachaya rë xuta hacutjin xi jemu cuma cjan rë me hacuaha jemu hñu ngahñu rë me ne, vëhë xi cojo yëjë cjuajeya xi tjin rë me ne, caca rë me cojo xuta xi hatuxa cuma cjan rë me cojo, xuta xi cavaxijin me xi hatuxa tsicjë me.

²³Cuatjin casahmi jyë cacun Nina, cojo sa xi sua me cumachaya rë xuta hacutjin xi jemu tjin rë me cjuandaja cojo xuta xi hatuxa sua me cjuandaja rë me, xuta xi caviyuju chjine Nina cojo tjun sa, cojo sa xi sacú rë xuta jan cjuandaja rë me.

²⁴Hane xuta xi cuacun vëhë ne, hacui ngayaan xi cavaxijin naja Nina. Hacuiin suvá ngajñi rë xuta Israel cavaxijin me ta hacuaha cojo ngajñi rë xutaxín cavaxijin me. ²⁵Sacuaha cjuva rë Nina xi catsihindu profeta Oseas ne, cuitjin chja:

Xuta xi hacuiin xuta ladu naha me ne, cuechú nixtin xi sahme xuta ladu naha me;

hacuaha cojo na xi hacuiin tsihmucacun ne, cuechú nixtin xi jemu tsihmucacun na.

Cuatjin chja cjuva rë Nina.

²⁶Hacuaha cachja nga Oseas cuitjin:

Ngu cahndé jan ne, cuitjin cachja Nina cojo xuta: “Ngayujun ni ne, hacuiin xuta ladu naha ngayun.” Cuatjin cachja Nina.

Hane handasa cuatjin cachja Nina, peru cuechú nixtin xi ngajan ne, cuma xuta xi cuacun jan quihndi rê Nina quicun.

Cuatjin cachja profeta Oseas.

²⁷ Hacuaha cachja profeta Isaías tsêhê xuta tjê rê Israel cuitjin: “Handasa sacuatjin cjin tsumi tsêhê ndachacun cuatjin cjin cuma xuta tjê rê Israel ne, peru jemu chuva me xi cuetjutje me ta, ²⁸ Nina ne, hatuxa sahmi me castigu nguehe ngasunhndê, hane xi cuechú nixtin vêhê ne, ngutjen ni sahmi me yêjê ni hacutjin xi cavejña me xi sahmi me.” Cuatjin cachja profeta Isaías. ²⁹ Hacuaha hatsêê ne, cachja nga Isaías cuitjin:

Nina, me xi hatuxa matitjun tsêhê yêjê ni xi tjin, sa ngahnga sa ngasunhndê ne, sa xi casuaain naja me xuta xi cuma tjê naja ne, tangun ni cafê ngayaan sacuatjin cafê camahani xuta nandya Sodoma cojo xuta nandya Gomorra.

Cuatjin cachja Isaías.

Catsitjungui xuta tjê rê Israel ndiya rê Nina

³⁰ Xi cuatjin ne, cuma cuinújan xi Nina ne, catsicjê me jyê rê xutaxín ngatsê rê xi camangucacun xutaxín jan cojo Jesucristu, handasa hatsêê ne, hisca cuendaain rê xutaxín jan hacutjin sahmi Nina cojo jyê rê me. ³¹ Peru xuta tjê rê Israel ne, handasa jemu casahmi me ngahñu xi meje rê me xi tsicjê Nina jyê rê me ne, peru catsicjiin Nina jyê rê me. ³² ¿Mé má cuatjin catsicjiin Nina jyê rê me? Catsicjiin Nina jyê rê me ta, tsêhê xi xuta tjê rê Israel xi cuacun jan ne, meje rê me xi tsicjê Nina jyê rê me ngatsê rê xcusun xi casahmi me xcun ngasunhndê rê me. Peru tsêhê xi mijí cumangucacun

me cojo Jesucristu ne, vêhê xi sacuaha xi caxtenguiya rê me “ndyojo xi xtenguiya rê xuta”. ³³ Cjua vêhê ne, sacuaha cjua xi cachja Nina xcun xujun rê me xi chja cuitjin:

“Ngahan vejñávasen ngu xihin ngajan ndetjún Sión, hane xihin jan ne, sacuaha ngu ndyojo xi xtenguiya rê xuta;

peru xuta xi cumangucacun cojo xihin jan ne, tsajin nu tsajin nixtin xi cuetju sava me.”

10 Ngayujun ni matsejen ne, cuichjá cojo nuju ta xahasen naha ne, jemu meje rê xi xuta tjê rê Israel ne, cuetjutje me tsêhê jyê rê me. Hacuaha cuatjin féhya rê Nina. ² Cuma cuichjá cojo nuju ta xuta tjê rê Israel ne, hacuaha jercu tsiniya cacun me xi meje rê me Nina. Peru hacuiin ndaja vijnercu me hacutjin chuya rê Nina. ³ Hvíin me hacutjin tsicjê Nina jyê rê xuta. Peru jemu meje tsicjê suvá me jyê rê me. Vêhê xi casuaain me yojo rê me cojo ndiya rê Nina, cojo sa xi Nina tsicjê me jyê rê me. ⁴ Jesucristu ne, me vêhê xi casahmichihin me yêjê ni cjua xi vitexa ley rê Moisés, cojo sa xi yêjê ni xuta xi cumangucacun me cojo Jesucristu ne, cjuê jyê rê me.

⁵ Moisés jan ne, hatsêê catsihindu me cjua vihi tsêhê xuta xi meje rê me xi cjuê jyê rê me ngatsê rê xi sahmi me hacutjin vitexa ley rê Moisés. Cuitjin catsihindu me: “Xuta xi sahmi me sacuatjin vitexa ley ne, sacú rê me cjuahñu xatsê ngatsê rê xi cuatjin sahmi me.” Cuatjin catsihindu Moisés. ⁶ Peru hacuaha cuitjin cachja nga Moisés tsêhê xuta xi cjuê jyê rê me ngatsê rê xi mangucacun me cojo Nina: “Mijí rê xi ningatehetacuín cuitjin: ¿Yo xi cjueniji hisca ngahnga?” —sacuaha xi cuinduvajne cojo Jesucristu—; ⁷ o ¿Yo xi cjuejne cahntsua nduchin? —sacuaha xi cuinduvaniji cojo Jesucristu xi jiya me ngajñi rê nima. ⁸ ¿Hacutjin chja Moisés xcun cjua

rë Nina ni? Cuitjin chja: “Cjua rë Nina ne, ha jemu tiña tacun xi cuma nuju; ha hinchu ntsuvun xi cuinújun, hacuaha ha hinchu cahntsua xahasen nuju.” Cuatjin cachja Moisés. Cjua rë Nina jan ne, hacui cjua tsêhë hacutjin meje rë xi cumangutacun cojo Jesucristu, vëhë cjua xi titihín jimachaya rë xuta. ⁹ Sa xi ninguíxun cojo ntsuvun xi Jesucristu ne, Nina me, Nai nuju me, hacuaha sa xi cojo xahasen nuju macjain nuju xi catsicuya Nina Jesucristu cjuahñu ne, cuétjuntjun tsêhë jyé nuju. ¹⁰ Cuatjin cuma ta, tsêhë xi macjain naja cojo xahasen naja, sehe tsicjë Nina jyé naja, hacuaha ninguíxun cojo ntsuvan hacutjin macjain naja, sehe cuaxëtje naja Nina.

¹¹ Cuatjin ta, cjua rë Nina ne, cuitjin chja: “Yëjë xuta xi mangucacun cojo Nina ne, hatuxa cuetjin savaain me.” Cuatjin chja xujun rë Nina. ¹² Nina ne, tangun ni vutsejen me xuta tjë rë Israel cojo xutaxín ta me xi Nai naja ne, hacui ni me xi Nai rë yëjë ni xuta. Me vëhë xi jemu sua me cjuandaja rë me xi cuma rë yëjë xuta xi fehya rë me. ¹³ Hisca xujun rë Nina ne, cuitjin chja: “Yëjë xuta xi fehya me Nai naja cjuandaja ne, cuetjutje me.” Cuatjin chja xujun rë Nina. ¹⁴ Tjin rë yo xi cuichja cojo ná cuitjin: “Peru çhacutjin cuma cjuehya xuta cjuandaja rë ngu xi hisca cjëë cumangucacun me cojo ni? Hane çhacutjin cumangucacun me cojo ngu xi hisca cjëë cumachaya rë me yo ni? Hane çhacutjin cumachaya rë me yo jan, sa xi tsajin yo sua cumachaya rë me ni? ¹⁵ Hane çhacutjin cuma cjue sua me cumachaya rë xuta yo jan, sa xi cjëë tsingatju Nina me ni?” Cuatjin cuichja. Xujun rë Nina ne, cuitjin chja: “Jemu ndatjin camahani hya xi fehe ngu me xi nduvacojo ngu cjuandajiyi.”

¹⁶ Peru chjá ngahan ta hacuiin yëjë xuta cavihndë me tsêhë cjuandajiyi jan. Hacuaha cuatjin chja profeta Isaías xcun xujun rë Nina: “Ngayun, Nai niji,

jemu chúva me xi camangucacun cojo cjua niji.” Cuatjin chja Isaías. ¹⁷ Ngajan xi cumangutacun hya xi ha camachaya naja ngu cjua, hane cumachaya naja hya xi yo cuinduva sua cumachaya naja ngu cjua xi chja hacutjin casahmi Cristu.

¹⁸ Peru çhá cjëë cumachaya rë xuta? chjá han. ¡Jéya, hatuxa camachaya rë me! Chja nga xujun rë Nina cuitjin:

Jingujyë ni ngasunhndë ne, quiji cjua rë me, hisca hiscan vijnetaha ngasunhndë cavechu cjua rë me.

Cuatjin chja. ¹⁹ Cúya cuichjá nga ngu ndiya: Xuta tjë rë Israel ne, çhá hvíin me ni? ¡Jéya! hatuxa vëë me ta, tsêhë xi catsihindu Moisés cjua xi cachja Nina cuitjin:

Ngahan ne, sahme xi jemu nihñu cjuaxín ngatsë rë xi sahme cjuandaja cojo xutaxín;

tsicján nuju ngatsë rë xi sahme cjuandaja cojo xuta xi hvíin me yo ngahan.

Cuatjin catsihindu Moisés cjua rë Nina.

²⁰ Hacuaha catsacjuiin Isaías hya xi catsihindu me cuitjin:

Xuta xi hacuiin cavanguise ná me ne, me vëhë casacu rë me ngahan;

hacuaha xuta xi cuendaain rë me tsahan ne, me vëhë xi casuá camachaya rë me yo ngahan.

Cuatjin cachja Isaías. ²¹ Peru catsihindu Isaías cjua xi cachja Nina tsêhë xuta Israel cuitjin: “Yëjë nixtin tsahan, xuta xi catsitjungui ná me.” Cuatjin catsihindu Isaías cjua rë Nina.

Nina ne, cavaxijin me ngu jo xuta Israel

11 Quihndë ne, tsêhë xi cuatjin catsitjungui xuta Israel ndiya rë Nina ne, cuinengësë nuju ngu cjua: çhá catsitjungui Nina xuta rë me ni? ¡Jéya, hacuiin cuatjin! Ta ngahan ne, hacuaha ngu xuta Israel ngahan, tjë rë Abraham ngahan, hacuaha tjë rë Benjamín ngahan. ² Hisca ntsacu cavetsihin ne, ha vëë

Nina yo xi meje rë me xi cuma xuta ladu rë me, hacuaha tsitjunguiin me xuta xi cuacun vë quihndë. ¿Há vitsijiin nuju hatcutjin chja xcun xujun rë Nina hiscan xi catsihindu profeta Elías cjua xi cachjajyë me cojo Nina tsëhë xuta Israel? Cuitjin cachja Elías: ³“Ngayun, Nai naha, ha catsiquehen xuta profeta nuju hacuaha ha catsinguetsun me cahndë hiscan xi cjue cjuatjo xi cuma nuju. Ha tu suva sa tejña, peru hacuaha hisca cojo ngahan tivanguise ná me xi tsiquehen ná me.” Cuatjin cachja Elías. ⁴Peru ¿hatcutjin catsicuya Nina cjua cojo Elías? Cachja Nina: “Ngahan ne, ha cavaxëxen yatu mil xuta, hane xuta xi cuacun jan ne, cjëë cjue cuixcuhnchi me xcun nina ndyojo xi hmí Baal.” Cuatjin cachja Nina cojo Elías. ⁵Hacuanitjin ni quihndë ta handasa jemu camachuva me peru tjin sa me xi hinchá ndiya rë Nina ta, tsëhë xi cavaxijin Nina xuta jan ngatsë rë cjuandaja rë Nina cojo rë me. ⁶Peru camá ngatsë rë cjuandaja ni rë Nina cojo rë xuta xi cuacun vë, hacuiin ngatsë rë xcusun xi casahmi xuta jan. Ta sa xi cavaxijin Nina me ngatsë rë xcusun xi casahmi me ne, cjuandaja rë Nina ne, sacuaha xi venguin chjí rë.

⁷Ngajan xi cuma cuinújan xi hacuiin yëjë xuta Israel xi casacu rë me xi vanguise me ta ngujo ni xuta Israel xi cavaxijin Nina ne, me vëhë ni casacu rë me. Hane me xi yahnga jan ne, Nina casahmi me xi mijí cuijnercu me. ⁸Camá sacuatjin camahindu xcun xujun rë Nina hiscan xi chja cuitjin: “Nina ne, casua me xuta xi cuacun vë ngu cjuatacun sacuaha cjuatacun rë ngu cha chihi. Vetaain rcu me hacuaha vijnii rcu me. Hisca quihndë ne, cuatjin cún me.” Cuatjin camahindu. ⁹Hacuaha hatsëë cachja David cuitjin cojo Nina:

Meje ná xi yëjë ni cjuandaja xi tuhun rë xuta ne, catuya sacuaha ngu chen, sacuaha ngu changa,

sacuaha ngu xcusun xi xtenguiya rë me, sacuaha ngu castigu xi vangui suvá me.

¹⁰Meje ná xi catama rcá me, cojo sa xi cumatsijin rë me;

hacuaha catindi ngaxtun me, cojo sa xi tsajin nu tsajin nixtin xi cuma quixi ngaxtun me.

Cuatjin cachja David.

Tivetjutje xutaxín

¹¹Quihndë ne, cuinengësë nuju ngu cjua vi: Hya xi cavetjuxin xuta tjë rë Israel tsëhë ndiya rë Nina ne, ¿há ngu ndiya xa ni cachaja camahani me? ¡Jéya, hacuiin cuatjin! ta ngatsë rë cjuatsehen rë xuta tjë rë Israel xi cuacun jan ne, casua Nina cahndë xi cuetjutje xutaxín, cojo sa xi xuta tjë rë Israel ne, sahmi me cjuachini. ¹²Ngajan xi ngatsë rë cjuatsehen rë xuta tjë rë Israel jan ne, jemu casacu rë xuta ngasunhndë cjuandaja rë Nina. Ngatsë rë xi cachaja xuta tjë rë Israel ndiya rë Nina ne, jemu casacu rë xutaxín cjuandaja rë Nina. Peru sa xi cuatjin camá ne, hya xi sacú nga rë xuta tjë rë Israel ndiya rë Nina ne, jercu sacú sa rë xuta ngasunhndë cjuandaja rë Nina.

¹³Quihndë ne, ngayun xi xutaxín ngayun ne, nguehe cuichjá sa cojo nuju ngu jo cjua matsejen. Ngahan ne, casuaxa ná Nina xi cjuë suá cumachaya rë xutaxín cjua rë Nina. Vëhë xi jemu sahme nguñajacacun xa naha, ¹⁴cojo sa xi cuma chini xuta xi tjë rë xutachanga naha cojo nuju. Hane xi cuatjin ne, cuisé-coo rë xi cuetjutje ngu jo me. ¹⁵Ngatsë rë xi catsitjungui Nina xuta tjë rë Israel ne, vëhë cavuxaha ndiya xi cuma xticja si xi tacun ngajñi rë Nina cojo xutaxín. Ngajan xi hya xi cjuahatsja nga Nina xuta tjë rë Israel jan ne, jercu ndajyihi camahani ngu cjuandaja xi cuetjucaa ta, sacuaha xi ngu nima cuya cjuahñu.

¹⁶Sa xi chjahan ngu rquí nahyu hane cuinújan ta nahyu vëhë ne, cuma tsëhë

Nina, hacuaha cojo yějě ni nahyu xi vaqui jan ne, hacuaha tséhě Nina. Hacuaha sa xi cuinújan xi tyjama rě ngu ya ne, cuma tséhě Nina, hacuaha hisca cojo tsja rě ya jan ne, hacuaha tséhě Nina.

¹⁷ Hacuaha sa xi xtisun ngujo tsja rě ngu ya olivu ndaja hane cuinduva tsja rě ngu ya olivu nguijña setahacoo cojo ya olivu ndaja jan ne, sehe xi cuatjin cuma ne, tsja rě ya olivu nguijña jan ne, hacuaha sacú rě cjuahñu rě tyjama rě ya olivu ndaja jan. Ngayun xi xutaxín ngayun ne, sacuaha tsja rě ya olivu nguijña má ngayun, xi casacu nuju cjuandaja rě Nina cahndé rě xuta tjě rě Israel xi sacuaha tsja rě ya olivu ndaja má me.

¹⁸ Peru mijí rě xi nihñu yehe yojo nuju hane choho cuinújun tséhě xuta Israel ta, sa xi meje nihñu cuatjin ne, ninguitsjun ta hacuiin tsja rě ya xi tsuvangui rě tyjama rě ta tyjama ne, vėhě tsuvangui rě tsja rě ya.

¹⁹ Cuma cuinújun cojo ná cuitjin: “Peru catsitjungui Nina ngu jo xuta tjě rě Israel cojo sa xi ngahan ne, cuma tséhě Nina ngahan.” ²⁰ Cuatjin cuma cuinújun hane cjuaquixi cja vėhě. Ngatsě rě xi camanguaaincacun me cojo Jesucristu ne, vėhě xi catsitjungui Nina me. Hane ngayun ne, ngatsě ni rě xi camangutacun cojo Jesucristu ne, vėhě xi casacu nuju cahndé vė. Peru mijí rě xi nihñu jyě yojo nuju ta xi meje rě ne, rcun cuma hitsě.

²¹ Cuatjin meje rě ta, tséhě xi Nina ne, sa xi catsinchataain me xuta tjě rě Israel xi hatuxa xuta ladu rě me ne, hacuaha tsinchataain nuju me. ²² Cahyun ni ne, Nina ne, jemu ndaja me peru hacuaha jemu cjan rě me. Ngu ladu ne, jemu cjan rě me cojo xuta xi cavetjuxin me tséhě ndiya rě Nina. Hane ngu ladu nga ne, jemu ndaja Nina cojo nuju, sa xi cuangunxcun cojo cjuandaja rě me. Peru sa tsajin ne, cojo ngayun tsitjungui nuju me. ²³ Hane xuta tjě rě Israel xi cuacun jan ne, sa xi cuiyu-

juxín me xi manguaaincacun me cojo Nina ne, sacú nga rě me cahndé rě me ta Nina ne, hatuxa cuma sua nga me cahndé vėhě. ²⁴ Ngayun xi xutaxín ngayun, hacuiin xuta ladu rě Nina ngayun titjun ne, peru Nina casahmi me ngayun xuta ladu rě me. Hane xi cuatjin sahmi me ne, hitsě sa chjaain sahmi me xi xuta tjě rě Israel ne, cuma nga me xuta ladu rě Nina ta, tséhě xi xuta tjě rě Israel ne, hatuxa xuta ladu rě Nina me titjun.

Cuetjutje xuta tjě rě Israel

²⁵ Ngayujun ni ne, meje ná xi cumachaya nuju ngu cja xi sehe casua Nina, cjuatahahma xi cjěě cumachaya naja. Meje ná xi cumachaya nuju cojo sa xi hacuiin nihñu yehe yojo nuju. Cja xi cuichjá cojo nuju ne, cuitjin fi: jemu cjín xuta tjě rě Israel ne, vijnii rcu me cja rě Nina. Cuatjin cuijnii rcu me hisca hya xi yějě xutaxín xi cavaxijin Nina ne, cuisehen me ndiya rě Nina. ²⁶ Sehe yějě xuta tjě rě Israel ne, cuetjutje me tséhě jyě rě me sacuatjin camahindu xcun xujun rě Nina:

Ngajñi rě xuta tjě rě Israel ne, cuetjujñi ngu me xi cuaxětje rě xuta, hane cuaxěxín me xcusun rě xuta xi tjě rě Jacob xi faharcuaain rě Nina.

²⁷ Hatuxa sahmechehen compromisu naha cojo xuta, hya xi cjuaháxen cjuatsehen rě me.

Cuatjin cachja Nina.

²⁸ Ngu ladu ne, tséhě xi catsitjungui xuta tjě rě Israel cjuandajyihi xi chja tséhě Jesucristu ne, vėhě xi choho vėě Nina me, cojo sa xi ngayun xi xutaxín ngayun ne, satě nuju cjuandajyihi vėhě. Peru ngu ladu nga ne, tséhě xi ha cavaxijin Nina me ne, vėhě xi Nina ne, hmu-cacun me xuta Israel jan, ngatsě rě xutachanga rě me. ²⁹ Cuatjin ta tséhě xi hya xi vaxijin Nina ngu xuta cojo hya xi sua rě me cjuandaja ne, hatuxa sehe tsindeyaain Nina cjuatacun rě me.

³⁰Ngayun xi má yun xutaxín, titjun ne, canuhyun tséhë Nina. Peru quihndë ne, camayuma rë Nina ngayun ngatsë rë xi xuta tjë rë Israel ne, hacuaha vihndiin me tséhë Nina. ³¹Hacuanitjin rë xuta tjë rë Israel jan ta quihndë ne, hacuaha vihndiin me tséhë Nina, cojo sa xi sacú rë me cjuayumatacun rë Nina ngatsë rë xi ngayun ne, casacu nuju cjuayumatacun rë Nina. ³²Nina ne, catsismicacun me yëjë ni xuta, cojo sa xi cuihndiin xuta tséhë me, hane cojo sa xi hacuaha cumayuma rë me ngayëjë ni xuta.

³³Nina ne, jercu jyihi cjuanchina xi tjin rë me, jercu jyihi cjuatacun xi vechutaha me, jercu vëë me. Maji vijnercun hacutjin tsingatahacacun me. Maji vijnercun hacutjin sahmi Nina. ³⁴Sacuatjin chja xujun rë Nina ne: “Tsajin yo vëë cjuatacun rë Nina. Tsajin yo camá catsinguixi rë Nina cojo cjuarë me. ³⁵Tsajin yo xi cojo tjun sa ne, casua rë Nina ngu cjuatjo, cojo sa xi Nina ne, hatuxa sahmi ngojo me cjuatjo rë xuta jan.” Cuatjin chja xujun rë Nina. ³⁶Yëjë ni xcusun xi tjin ne, Nina catsingatahacacun me sehe catsindaja me ta, tséhë xi meje rë me xcusun xi cuacun vë. Meje rë xi nihña jyë nihña hnga Nina yëjë ni nu yëjë ni nixtin. Cuatjin jain.

Hacutjin meje rë xi cuiyuju xuta ladu rë Jesucristu

12 Ngayujun ni ne, ngatsë rë yëjë ni xi sehe cachjá cojo nuju ne, vëhë xi meje ná xi ngundiyaxa ni tuhun yojo nuju cojo Nina sacuaha ngu cjuatjo, peru ngu cjuatjo xi quicun, ngu cjuatjo xi hatuxa tséhë Nina, ngu cjuatjo xi chuya rë me. Cuatjin nihñu ta, tséhë xi Nina ne, jemu tjin rë me cjuayumatacun, hacuaha hatuxa ndatjin xi cuatjin chjahanrcun Nina. ²Mijí rë xi cuangun tjugun ndiya rë xuta ngasunhndë vi ta cahndé rë vëhë ne, yëjë ni hora ne, tuhun cahndé xi Nina ne, tsindeya me ngayun

xi sua nuju me ngu cjuatacun xatsë. Xi cuatjin ne, sacú nuju cjuaquixi mé xi meje rë Nina xi nihñu, mé xi ndaja, mé xi chuya rë Nina, mé xi cjuaquixi.

³Nina ne, casuaxa ná me xi cuichjá cojo xuta. Hane vëhë xi chjá cojo nuju ngayujun ni ta, mijí rë xi jemu nihñu yehe yojo nuju ta meje rë xi ningatuhuntacun hacutjin xi cjuaquixi, tu cutjin cjuandaja xi casua nuju Nina xi camá camangutacun jima ngu ngayun cojo Jesucristu. ⁴Ha hyun ta yojo rë ngu xuta ne, tjin tsja, tjin ntsacu, tjin nguixin, tjin jingu sa xcusun tséhë, peru hacuiin tangun xa xi sahmi yëjë xcusun xi cuacun vë. ⁵Hacuanitjin naja ngayaan, handasa cjín má ngayaan ne, peru sacuaha ngu ni yojo má ngayaan hya xi tjin tangun cjuatacun naja cojo Jesucristu. Ngu ngu ngayaan ne, sacuaha ntsan má ngayaan ne, ngu ngu ngayaan ne, sacuaha ntsacu má ngayaan, ngu ngu ngayaan ne, sacuaha nguixin má ngayaan, peru ngu ni yojo má ngayaan.

⁶Vëhë xi xa xi casacu naja jima ngu ngayaan ne, hacuiin tangun ta tu tjin cjuandaja xi casua naja Nina ne, hacuanitjin ni xa xi satë naja. Sa xi casua nuju Nina xa xi cuinújun cjuatacun rë me cojo xuta ne, tinújun, peru sacuatjin cojo ngahñu xi tjin nuju xi mangutacún cojo Jesucristu ne, cuatjin tinújun. ⁷Sa xi casua nuju Nina xa xi cuisecun rë jingusa xingueen ne, tisekun rë me. O sa xi casua nuju Nina xa xi cuicuyun cjuarë me ne, ticuyun. ⁸Sa xi casua nuju Nina xa xi tuhun rë jingu sa xingueen ngu ndiya ndajyihni ne, cuatjin nihñu. Sa xi casua nuju Nina xa xi cuisecun rë jingu sa xingueen cojo tujún xi ma chaja rë me ne, tisekun rë me cojo ngu xahasen tyjahi, cojo ngu cjuatacun tyjahi. Sa xi casua nuju Nina xa xi chjuhunntsun ngu xa xi satë nuju ne, nihñu xa jan nguñajatacun. Sa xi casua nuju Nina xa xi chjuhuncuendun xuma xingueen xi mé má rë

me o mé cjuacjintacun xi tivatju me tijma ne, sehe chjuhuncuendun me cojo cjuasua.

⁹Mijí rë xi jo xcun jo ntsuvun xi nihmutacún xingu xingu xingueen. Cata-machohotacun cojo ndiya rë cjuatsehen, hane tuhun yojo nuju cojo ndiya rë cjuandaja. ¹⁰Nihmutacun xingun sacuatjin nihñu hmu tacún tsuhun jain. Hacuaha chjuhuncun xingun sacuaha xi me vëhë xi hitsë sa ma titjun me tsujun. ¹¹Chjuhuncuendun nguñajata-cun cuidadu nuju, hacuiin nihñu tsëhë. Meje rë xi sacuaha xi quisechun ngayun xi tisecun nihñu xa rë Nai naja.

¹²Tuhun cjuasua xahasen nuju ngatsë rë xi Nina vetuhun tacun me. Caticaa nuju yëjë ni cjuañihi xi vatjun má. Hacuaha yëjë ni hora ne, nihñu oración nuju cojo Nina.

¹³Tisecun rë xuta ladu rë Nina hya xi tjin rë me cjuachaja. Hacuaha cojo cjuandaja chjuhunntsun xuta ngu nangu hya xi fehe me ndya nuju.

¹⁴Chjahyun cjuandaja rë Nina xi cuma rë xuta xi tsuyihiyatjengui nuju me cojo cjuahngatacun. Hacuiin chjahyun ngu cjuaxti xi cuma rë me ta ngu cjuandaja chjahyun.

¹⁵Tuhun cjuasua xahasen nuju cojo xuta xi sua rë me, hane xuta xi jihnda me ne, hacuaha chjihndun cojo rë me. Xi cuatjin nihñu ne, tsejen xi hmutacún jain me.

¹⁶Nihñu tangun cjuatacun nuju cojo xingun xingu xingu ngayun. Hacuiin nihñu yehe yojo nuju ta xi meje rë ne, nihñu tangun cojo, handasa xuta xi yuma cjuatacun rë. Hacuaha hacuiin nihñu sacuaha xi jercu vechutaha cjuatacun nuju.

¹⁷Mijí rë xi nicuyun ngu cjuachan xi casahmi xuta cojo nuju ta xi meje rë ne, nihñu ngujoyë xi nihñu cjuandaja xcun yëjë ni xuta. ¹⁸Sa xi cuma ne, nihñu ngujoyë hisca hiscan vechu cjuata-

cun nuju, cojo sa xi cuma cuinechun ngu cjuandaja ngu cjuajeya cojo yëjë ni xuta. ¹⁹Cuichjá cojo nuju sacuaha xi quihndi naha ngayun: xicanihñundujun suvun ngu cjuahngatacun xi sahmi xuta cojo nuju ta tuhun cahndé xi Nina ne, cuma cjan rë me cojo xuta xi casahmi jan. Ta Nina ne, cachja me xcun xujun rë me cuitjin: “Ngahan satë ná xi sahme ngojo cojo xuta tsehen; hatuxa ngahan sahme ngojo.” Cuatjin chja Nai naja. ²⁰Nihñu sacuatjin chja xujun rë Nina xi chja cuitjin: “Xuta xi choho vëë ri me ne, sa xi vojo rë me ne, tehe xi sinë me; hacuaha sa xi xinda rë me ne, tehe xi cuihi me; sa xi cuatjin nihñi cjuandaja vëhë ne, nihñi xi cuma sava rë me.” Cuatjin chja xcun xujun rë Nina. ²¹Xicatuun cahndé xi cjuatsehen ne, tsinguetsun rë cjuatacun nuju. Cahndé rë vëhë ne, cojo cjuandaja xi nihñu ne, ningquetsun cjuatsehen.

Hacutjin cuinuhyan tsëhë xutaxa rë

13 Meje rë xi ngayejen ni ne, cuinuhyan tsëhë xutaxa rë ta, tsëhë xi tsajin xutaxa rë xi viyuju me sa xi suaain Nina cahndé cuiyuju me. Hane xutaxa rë xi siu ne, cuatjin siu me ta, tsëhë xi casuaxa Nina me. ²Vëhë xi xuta xi sahmi condra me xutaxa rë ne, sahmi me condra cjuaxi Nina cavitexa me. Hacuaha xuta xi cuatjin sahmi condra ne, sacú rë me ngu castigu. ³Xuta xi sahmi cjuandaja ne, hacuiin tsacjun me xutaxa rë ta xuta xi sahmi cjuatsehen ne, me vëhë xi tsacjun me. ¿Há meje nuju xi tsajin mércun xutaxa rë? Nihñu cjuandaja, sehe xutaxa rë ne, cuaxëndaja me ngayun. ⁴Cuatjin sahmi xutaxa rë ta, tsëhë xi casuaxa Nina me xi cuisecoo nuju me. Peru sa xi nihñu cjuatsehen ne, meje rë xi rcun xutaxa rë ta, tsëhë xi hacuiin tu mahya xi yaha me xa xi sahmi me castigu ta, tsëhë xi casuaxa Nina me xi sahmi me castigu xuta xi hatuxa sahmi cjuatsehen.

⁵ Vêhê xi meje rê xi cuinuhyan tsêhê xutaxa rê, hacuiin suvâ ni ngatsê rê castigu xi cuatjun cuma ta hacuaha cojo ngatsê rê xi cojo cjuatacun naja ne, ha hyan ta ndatjin xi cuatjin nuhyan tsêhê me.

⁶ Hacuaha vêhê xi vechjun tujûnsa nuju ta, tsêhê xi hatuxa Nina caviyuju rê me xi fahacuenda me cjuacjintacun vê.

⁷ Tuhun rê jima ngu xutaxa rê xi satê rê me. Me xi faha tujûnsa ne, techjun cojo rê me; me xi faha tujûn tsêhê xi xteña ne, hacuaha techjun cojo rê me. Cuatjin tinuhyan tsêhê me xi satê rê xi cuinuhyan tsêhê, hacuanitjin chjuhunrcun me xi satê rê xi chjahanrcun.

Cjuahmutacun ne, vêhê sahmichihin sacuatjin vitexa ley rê Nina

⁸ Mijî rê xi yêjê ni nixtin quitjun tsêhê xuta, ta ngu ni xcusun xi hatuxa quitjen ne, xi nihña hmu tacun xingueen. Cuatjin ta, yo xi sahmi hmu cacun rê xuta ne, ha cojo vêhê ni ne, sahmichihin sacuatjin chja ley rê Moisés. ⁹ Ley vêhê ne, cuitjin chja: “Xicanindesuun cojo rê ngu chjuun o cojo rê ngu xihin xi hacuiin tsujun, xicanicuun xuta, xicanihñuu cjuachêjê, xicanimuju ngu xcusun xi hacuiin tsujun.” Cjua vêhê cojo yêjê sa cjua xi chja ley jan ne, cuitjin vijne: “Meje rê xi nihñu hmu tacûn xuta sacuatjin nihñu hmu tacûn suvun yojo nuju.”

¹⁰ Cuatjin chja ley ta, ngu xuta xi tjin rê me cjuahmutacun ne, hacuiin choho sahmi me cojo xuta. Vêhê xi hya xi nihña hmu tacun xuta ne, ha nihñachehen sacuatjin chja ley xi cavitexa Nina.

¹¹ Cuatjin meje rê xi nihñu ta, tsêhê xi ha hyun ta ha cavechû nixtin xi ningascun rê cjuatacun nuju ta, tsêhê xi nixtin xi cuetjutjen tsêhê jyê naja ne, hacuiin cjin sa tacun, sacuatjin hya xi sehe tu camangutacun cojo cjua xi chja tsêhê Jesucristu. ¹² Sacuaha xi nixten ne, ha tivatju, hane meje sahasen. Vêhê xi meje rê xi cuejñaxen xcusun xi má nix-

ten, hane cuetseen nihña xcusun xi má nguinxtin. ¹³ Meje rê xi cuetseen nihña cjuandaja, sacuatjin meje rê xi nihña hya xi tujyehenyan nguinxtin. Mijî rê xi nihña cjuachihi, mijî rê xi va má ngayaan nechan sacuaha xi cheen hya xi tinihña ngu suhi, mijî rê xi nihña cjuachini, mijî rê xi nihña cjuatsehen cojo jingu sa yachjin, o sa xi hisca cojo jingu sa xihin, mijî rê xi chicjanyan tu mé ni xcusun, mijî rê xi nihña cjuaxintacun. ¹⁴ Peru nihñu tangun cjuatacun nuju cojo Nai naja Jesucristu, hane ha quihndê mijî rê xi ningatuhuntacun xi nihñu yêjê ni hacutjin fehya yojo jyê nuju.

Mijî rê xi cuinújantahan xingueen

14 Sacuaha ngu xuta ladu rê Jesucristu xi cjêê ndaja cuijnercu me yêjê ni cjuachacun xi macjain naja ne, tuhun cahndê xi cuisehen me ladu nuju, peru hacuiin xi chicjun cojo me ngajñi rê cjuavisajmi nuju cojo rê me. ² Cuichjá cojo nuju ngu cjua. Yahnga xuta xi ndaja vijne rcu me cjuachacun naja ne, jinê me tu mé ni xcusun comida. Peru yahnga me xi cjêê ndaja cuijne rcu me ne, ndeya ni jinê me. ³ Peru xuta xi jinê me yêjê ni xcusun ne, mijî rê xi sahmi xta me cojo xuta xi jinii yêjê ni xcusun. Hacuaha xuta xi jinii me yêjê ni xcusun ne, mijî rê xi cuichjataha me xuta xi jinê yêjê ni xcusun ta, tsêhê xi ha cafahatsja Nina xuta jan. ⁴ Cuma cuinújin: ¿mé cuenda nuju ngayun xi nújuntuhun rê mosu rê jingu sa xuta ni? Nai rê mosu jan ne, me vêhê cuichja me há ndaja há ndajin xa casahmi mosu rê me. Hane xuta ladu rê Nai naja jan ne, hatuxa cuetju ndaja me ta, tsêhê xi Nai naja ne, ma sahmi me xi cuetju ndaja xuta ladu rê me.

⁵ Cuichjá nga cojo nuju ngu cjua. Yahnga xuta ne, tjin ni nixtin xi jemu faharcun me. Hane yahnga me ne, tangun yêjê ni nixtin xi cuma rê me. Meje rê xi jima ngu xuta ne, catamangucacun me

cojo cjuatacun rë suvá me hacutjin meje sahmi me. ⁶ Me xi faharcun nixtin jan ne, hacuaha faharcun me Nai naja xi faharcun me nixtin hya. Hane me xi jinë yějë ni xcusun comida ne, faharcun me Nai naja xi cuatjin jinë me ta, tséhë xi sua me nacuechji rë Nina. Hane me xi jinii yějë xcusun comida ne, hacuaha faharcun me Nai naja xi cuatjin jinii me ta hacuaha sua me nacuechji rë Nina.

⁷ Hisca ngu ngayaan ne, hacuiin nechan cjuahñu ngatsë rë cjuatacun naja suvaan, hacuaha hacuiin cueyan ngatsë rë cjuatacun naja suvaan ta, ⁸ sa xi nechan cjuahñu ne, nechan ngatsë rë Nai naja, o sa xi cueyan ne, cueyan ngatsë rë Nai naja. Véhë xi hatuxa tséhë Nai naja ngayaan ne, sa xi cuinechan cjuahñu o sa xi cueyan. ⁹ Jesucristu ne, cahme me sehe cavuya nga me cjuahñu cojo sa xi cuma me Nai rë nima cojo Nai rë xuta xi siu quicun me.

¹⁰ Véhë xi tsajin mé tséhë xi cuatjin nújantahan rë xingueen, tsajin mé tséhë xi cuatjin nihña xta cojo xingueen ta, tséhë xi ngayejen ni ne, hatuxa tjin xi cuechun xcun Nina ne, xi tsichuva me ngayaan cojo cjuatacun naja. ¹¹ Cuitjin camahindu xcun xujun rë Nina cjuaxi cachja me:

Tu tjin xi cjuaquixi xi tejña ngahan ne, hacuanitjin ni tjin cjuaquixi cuechú nixtin xi yějë ni xuta ne, cuinduva cuixcuhnchi me xcun,

hacuaha yějë ni xuta ne, cuichja me ta ngahan xi Nina ngahan.

Cuatjin cachja Nina.

¹² Ngajan xi jima ngu jima ngu ngayaan ne, taancuendan rë Nina xcusun xi canihña.

**Mijí rë xi tahan cahndé xi
cjuinenguia xingueen
ngajñi rë cjuatsehen**

¹³ Véhë xi ha quihndë mijí rë xi nichuvan xingueen cojo cjuatacun rë. Xi meje

rë ne, xi cueñangutacun xi tsajin nixtin xi nihña ngu xcusun xi sahmi xi cjuinenguia xingueen ngajñi rë cjuatsehen. ¹⁴ Ngahan ne, tjin tangun cjuatacun naha cojo Nai naja Jesús. Hane ha hvë, hacuaha camangucacun ta tsajin hisca ngu xcusun comida xi hatuxa tsavi xi xinëë. Peru sa xi ngu xuta tsingatahacacun me xi tsavi vihi o tsavi véhë xi xinëë ne, xi cuma rë suvá me véhë xi tsavi. ¹⁵ Sa xi cuetsun cjuatacun rë xingun ngatsë rë ngu xcusun xi scuëë me xi xinu ne, ha quihndë tsajin nechunyun ndiya rë cjuahmutacun. Mijí rë xi ninguetsun cjuatacun rë xingun ngatsë rë ngu xcusun xi chinu ta, Jesucristu ne, cahme me ngatsë rë me véhë. ¹⁶ Véhë xi xicatuun cahndë xi choho cuichja xuta tséhë xcusun xi ndaja xi nihña ta, ¹⁷ tséhë xi hya xi nechan ngahma gubiernu rë Nina ne, cuendaain rë tséhë tu mé ni xcusun xi chinë o sa xi hyun. Xi sahmi ngujoyë ne, xi tjin naja ngu xahasen tyjahi, ngu cjuajeya, ngu cjuasua xi sua naja Hasen rë Nina. ¹⁸ Xuta xi cuatjin sahmi me xa rë Jesucristu chuva véhë ne, hatuxa chuya rë Nina tséhë me, hacuaha ndaja cuichja xuta tséhë me.

¹⁹ Véhë xi cuanguen tjenguen ndiya rë cjuajeya, hacuaha cuisecoon xingueen cojo sa xi cuma jyë sa cjuandaja rë Nina cahntsua xahasen naja xingu xingu ngayaan. ²⁰ Cjuandaja xi casahmi Nina cojo xingueen ne, mijí rë xi ninguetsun ngayaan ngatsë rë xcusun xi chinë. Xi cjuaquixi ne, yějë ni xcusun comida ne, ndatjin xi xinë. Peru ndajintjin xi xinëë ngu xcusun sa xi véhë sahmi xi cuixuya ngu xingueen ngajñi rë cjuatsehen. ²¹ Xi ndatjin ne, hacuiin xinë yojo, hacuiin siuhun xan, hacuiin nihña tu mé ni xcusun xi sahmi xi cuixuya ngu xingueen ngajñi rë cjuatsehen. ²² Cjua xi ha macjain nuju ne, catamacjain sa nuju, peru tetjún cjua jan cahntsua cjuatacun nuju suvun cojo sa xi suvá ni Nina vëë

me. Jemu ndaja tsëhë xuta xi cjuatacun rë me ne, vinchaainjyë rë me tsëhë cjua xi macjain rë me. ²³Peru sacuaha ngu xuta xi mangu majo cacun me tsëhë ngu xcusun xi cajiñë me ne, quitjen me jyë xi cuatjin cajiñë me ta, tsëhë xi hacuiin ngatsë rë xi mangucacun me cojo Jesucristu ne, vëhë xi cajiñë me ta mangu majo cacun me xi cajiñë me. Hya xi hacuiin ngatsë rë xi mangutacun cojo Jesucristu xi nihña ngu xcusun xi nihña ne, hatuxa quitjen jyë.

**Meje rë xi nihña xcusun
xi chuya rë xingueen**

15 Sacuaha ngayaan xi ndaja vijne rcun cjuatacun xi macjain naja ne, meje rë xi nijyentacun, meje rë xi cuisecoon rë xingueen xi cjëë ndaja cuijne rcu me yëjë ni cjuachacun vëhë. Mijí rë xi nihña sa xcusun xi chuya naja suvaan ni. ²Jima ngu ngayaan ne, meje rë xi nihña xcusun xi chuya rë xingueen, cojo sa xi hacuaha cojo me ndaja tsëhë me, cojo sa xi cuma jyë sa cjuandaja rë Nina cahntsua xahasen rë me. ³Hisca Jesucristu ne, hacuiin casahmi me tu cutjin xi cachuya rë suvá me, sacuatjin cjua xi camahindu xcun xujun rë Nina hiscan xi cachja ngu xuta cojo Nina cuitjin: “Cjua xi cachja xuta xi choho cachja tsujun ne, ngahan choho cachja me tsahan.” Cuatjin camahindu. ⁴Yëjë ni cjua xi camahindu xcun xujun rë Nina hatsëë nixtin ne, cuatjin camahindu cojo sa xi sacú naja cjuatacun. Hacuaha camahindu cojo sa xi scaa naja hacuaha sacú naja cjuetacun, sehe hitsë sa ndaja cuetahan tacun Nina. ⁵Nina xi sahmi xi caa naja, Nina xi sua naja cjuetacun ne, catisua nuju me ngu cjuatacun xi cumatangun cjuatacun nuju cojo xingun xi tjengun ndiya rë Jesucristu. ⁶Catisua nuju Nina cjuatacun vëhë, cojo sa xi ngayujun ni ne, ngu tangun cuma cjuatacun nuju xi nihña

jyë nihña hnga Nina Nahmi rë Nai naja Jesucristu.

⁷Vëhë xi meje rë xi hatuxa chjuhun-ntsun xingun xingu xingu ngayun sacuatjin cafahatsja naja Jesucristu, cojo sa xi cuma jyë cuma hnga Nina cojo Hasen rë me. ⁸Chjá cojo nuju ta Jesucristu ne, canduva me xi cuisecoo me ngayun xuta tjë rë Israel. Hane cuatjin sahmicihin Jesucristu cjua xi cachja Nina cojo xutachanga niji. Canduva me xi tsingacun niji me xi Nina ne, hatuxa quixi me cojo cjua xi chja me. ⁹Hacuaha canduva me cojo sa xi xutaxín ne, sahmi jyë sahmi hnga me Nina ngatsë rë cjuandaja rë Nina. Camahindu xcun xujun rë Nina cuitjin:

Ngahan ne, sahme jyë sahme hnga nuju ngajñi rë xutaxín, hacuaha hisca sé tsujun.

Cuatjin camahindu.

¹⁰Hacuaha chja nga ngu cahndé cuitjin:

Ngayun xi xutaxín ngayun ne, hacuaha tuhun cjuasua xahasen nuju cojo xuta rë Nina.

Cuatjin chja.

¹¹Hacuaha chja nga cuitjin:

Ngayun xi xutaxín ngayun, nihña jyë nihña hnga Nina.

Ngayejen ni xuta ngasunhndë ne, meje rë xi nihña jyë nihña hnga Nina.

Cuatjin chja.

¹²Hacuaha catsihindu Isaías xcun xujun rë Nina cuitjin:

Cuetjucun ngu xuta, tjë rë Isaí, hane cuma titjun me tsëhë yëjë ni xutaxín.

Hane xutaxín jan ne, cuetahacacun me xuta jan.

Cuatjin catsihindu Isaías.

¹³Nina, me xi sahmi xi ma vetahan-tacun Nina ne, catisua nuju me cjuasua cojo cjuajeya, ngayujun xi tjin ngu tacún cojo rë Jesucristu, cojo sa xi Hasen rë

Nina ne, sua nuju ngahñu xi ndaja cue-tuhun tacún Nina.

**Sua Pablo machaya rê xuta
hacutjin sahmi me xa**

¹⁴Ngayujun ni matsejen ne, ha hvê cojo cjuatacun naha ta ngayun ne, quitsê rê xahasen nuju cojo cjuandaja, ha jemu vechú cjuatacun rê xingun xingu xingu ngayun. ¹⁵Ngahan ne, cavetjucá-cun catsihindu nuju ngu jo cjuá vêhê ta, tsêhê xi mijí ná xi chaya nuju cjuá jan. Cuatjin catsihindu nuju ngatsê rê cjuandaja xi casua ná Nina, ¹⁶xi sahme xa rê Jesucristu ngajñi rê xutaxín. Tisahme xa sacua ha ngu nahmi, xi tisuá jimachaya rê xutaxín cjuandajiyi xi catsingatju Nina. Cuatjin sahme cojo sa xi cuma suá rê Nina ngu cjuatjo xi chuya rê me. Cjuatjo vêhê ne, hacui xutaxín, xi ha Hasen rê Nina cavaxêxin rê me xi cuma tyjahi cjuatacun rê me xcun Nina.

¹⁷Vêhê xi ngahan, xi tjin tangun cjuatacun naha cojo Jesucristu ne, ma vaxêndaja hitsê yojo naha tsêhê xa rê Nina xi tisahme. ¹⁸Vetjiincá-cun xi cuichjá cojo nuju tu mé ni cjuá ta, suvá ni cjuá tsêhê hacutjin cjuatacun xi casua ná Jesucristu xi cachjá cojo xi casahme, cojo sa xi xutaxín ne, cavihndê me tsêhê Nina. ¹⁹Cuatjin camá ta, tsêhê xi cojo Hasen rê Nina ne, jemu camá cjuarcun. Cuatjin xi ngahan ne, ha chichihin casuá camachaya rê xuta cjuandajiyi xi chja tsêhê Jesucristu, cavêtsehen hisca Jerusalén ne, cavêchu hisca hiscan ladu xi hmí Iliria. ²⁰Hatuxa casahme ngahñu xi casuá camachaya rê xuta cjuandajiyi jan hiscan xi cjêê camahani cumachaya rê xuta yo xi Jesucristu, cojo sa xi hacuiin hiscan xi tacunvasen xa xi jingu sa casahmi ne, ngajan cjué sahmejyê. ²¹Casahme sacuatjin camahindu xcun xujun rê Nina hiscan xi chja cuitjin:

Xuta xi cjêê cumachaya rê me tsêhê me ne, cumachaya rê me;
hacuaha xuta xi cjêê cuihndê me ne, cui-jnercu me.
Cuatjin camahindu.

Vejña Pablo xi cjue me Roma

²²Ngatsê rê vêhê xi casacuiin camahani ná cahndê xi cjué tjêngê nuju. ²³Peru quihndê xi cajnetaha xa xi sahme ladu vihi, hacua ha jemu hatsêê xi meje cjué tjêngê nuju ne, ²⁴meje scusehenya nuju xi cuátju nangui nuju hya xi cjué ngajan nación xi hmí España. Hane nixtin xi cuitejñataha hitsê cojo nuju ne, meje ná xi cuisecun ná hitsê xi cjué hisca España. ²⁵Peru ndicumaha ni ne, cjué nandya Jerusalén, xi cuisécoo rê xuta ladu rê Nina jan ta, ²⁶tsêhê xi xuta ladu rê Nina ngajan estadu Macedonia cojo xuta ladu rê Nina nguehe estadu Acaya ne, ndaja catsingatahacacun me xi tsingatju me ngu cjuandaja xi cuma rê xuta yuma xi siu ngajñi rê xuta ladu rê Nina ngajan Jerusalén. ²⁷Ndatjin xi cuatjin catsingatahacacun xuta xi cuacun vê ta, tsêhê xi sacua ha xi quitjen me tsêhê xuta nangui Israel. Tsêhê xi xutaxín ne, casatê rê me cjuandajiyi xi casua Nina camachaya rê xuta tjê rê Israel, vêhê xi hacua ha satê rê me xi cuisecoo me xuta nangui Israel tsê tsê tujún xi tjin rê me. ²⁸Ngajan xi hya xi ha casahmechehen cjuacjintacun vêhê hacua ha ha casahme entregadu tujún jan ne, ²⁹sehe cuétju cjué España. Hane xi cuátju nangui nuju ne, cjué scusehenya nuju. Hacua ha hvê ta jemu sua naja Jesucristu cjuandaja rê me hya xi cjué tjêngê nuju.

³⁰Ngayujun ni matsejen ne, ngatsê rê xi tjin tangun cjuatacun nuju cojo Nai naja Jesucristu hacua ha ngatsê rê cjuahmutacun xi sua nuju Hasen rê Nina ne, vêhê xi féhya nuju xi nihñu tangun cjuatacun nuju cojo ná, hane chjahyun rê Nina cjuandaja rê me xi cuma ná.

³¹ Cuatjin nihñu ngatsë naha, cojo sa xi cuaxëtje ná Nina tsëhë xuta xi vihndiin me tsëhë Nina ngajan Judea. Hacuaha chjahyun rë Nina cjuandaja xi cuma ná cojo sa xi hya xi cjuécane tujún ngajan Jerusalén ne, chuya rë xuta ladu rë Nina xi cuatjin sahme. ³² Cuatjin chjahyun rë Nina cojo sa xi, sa meje rë me ne, cuma cjuétjengë nuju cojo cjuasua hacuaha cuitejñajenda hitsë cojo nuju xi cuéchutaha nuju. ³³ Nina, me xi sua naja cjuandaja cjuajeya ne, catsicoo nuju me ngayujun ni. Cuatjin jain.

Tsingatju Pablo nina rë me

16 Nguehe cuichjá cojo nuju ta na Febe xingueen ne, jemu xuta ndaja na. Casatë rë na xa xi visecoo na xuta ladu rë Jesucristu xi ma tangun me nguehe nandya Cencrea. ² Vëhë xi chjá cojo nuju ta, chjuhunnstun na sacuatjin xi meje rë xi nihña ngayaan xi ladu rë Nina ngayaan. Chjuhunnstun na ta, tsëhë xi na vëhë ne, hacuaha tjin tangun cjuatacun rë na cojo Nai naja. Hacuaha tisekun rë na tu mé ni xcusun xi cuma meje rë na ta, tsëhë xi na vëhë ne, jemu cjín xingueen xi cavisecoo na. Hacuaha hisca ngahan ne, jemu cavisecoo na ngahan.

³ Tuhun nina naha na Priscila cojo cha Aquila xihin rë na. Xuta xi cuacun vë ne, jemu sahmi me xa rë Jesucristu sacuatjin sahme ngahan, ⁴ hacuaha hisca caviyujutaha tsavi me yojo rë me xi cavaxëtje ná me. Vëhë xi jemu suá nacuechji rë Nina. Hacuaha hacuiin ngahan suva ni ta cojo yëjë xutaxín xi matangun me tsëhë xi camá me ladu rë Jesucristu ne, hacuaha sua me nacuechji rë Nina. ⁵ Hacuaha tuhun nina naha yëjë xuta ladu rë Jesucristu xi matangun me ndava na Priscila cojo cha Aquila. Hacuaha ngu cha xi jemu vinga ná ne, cha Epeneto ne, tuhun rë cha nina naha. Cha vëhë xi tjun tjun camangucacun

cha cojo Jesucristu ngajan estadu Asia. ⁶ Hacuaha tuhun nina naha na María, na xi jemu cavisecoo nuju jan. ⁷ Hacuaha tuhun nina naha Andrónico cojo Junias xingueen, me xi cavitejñaya tangun cojo ndavaya jan. Me vëhë ne, jemu jyë hnga me cojo cjuatacun rë me ngajñi rë yëjë ni apóstol, hacuaha hitsë sa tjun me cavisehen me ladu rë Jesucristu xi cuma ná ngahan. ⁸ Tuhun nina naha cha Amplias, cha xi jemu vinga ná, tsëhë xi tjin tangun cjuatacun niji cojo Nai naja. ⁹ Tuhun nina naha cha Urbano, cha xi jemu sahmi xa rë Jesucristu sacuatjin tinihña ngayaan. Hacuaha tuhun nina naha cha Estaquis, cha xi jemu vinga ná jan. ¹⁰ Tuhun nina naha cha Apeles, cha xi suvá tsejen xi jemu ndaja tjin tangun cjuatacun rë cojo Jesucristu. Hacuaha tuhun nina naha yëjë ni xuta rë cha Aristóbulo.

¹¹ Tuhun nina naha cha Herodián xingueen. Tuhun nina naha yëjë xuta rë Narciso, me xi hacuaha tjin tangun cjuatacun rë cojo Nai naja. ¹² Tuhun nina naha na Trifena cojo na Trifosa, na xi jemu sahmi xa rë Nai naja. Tuhun nina naha na Pérsida, na xi jemu vinga naja jan. Na vëhë ne, hacuaha jemu casahmi na xa rë Nai naja. ¹³ Tuhun nina naha cha Rufo, cha xi cavaxijin Nina xi tjin tangun cjuatacun rë cojo Nai naja. Hacuaha tuhun ngu nina naha cojo naa rë cha ta, me vëhë ne, sacuaha naa naha me. ¹⁴ Tuhun nina naha cha Asíncrito, cha Flegonte, cha Hermas, cha Patrobas, cha Hermes, hacuaha cojo sa yëjë xingueen xi siu me cojo cha xi cuacun vë. ¹⁵ Tuhun nina naha cha Filólogo, na Julia, cha Nereo cojo na tichja cha, cha Olimpás, hacuaha cojo sa yëjë xuta ladu rë Nina xi siu me cojo me xi cuacun vë.

¹⁶ Tuhun rë xingun nina, cojo cjuandaja cojo cjuahmutacun cuitatsuhun xingun, sacuatjin xcusun naja. Yëjë xuta

ladu rë Jesucristu ne, hacuaha tsingatju me nina nuju.

Ngu nga conseju xi sua Pablo

¹⁷ Ngayujun ni ne, cuichjá cojo nuju ta meje rë xi chuhuncuendun yo xuta xi sahmi xi chicjun cojo xingun, yo xuta xi sahmi xi cjuinenguia ngu xingueen ngajni rë cjuatsehen ta, tsêhê xi xcusun xi sahmi me ne, sahmi condra rë cjuachacun xi ha cachutayun. Naxunxun yojo nuju tsêhê xuta xi cuacun vë ta, ¹⁸ tsêhê xi vihndiin me tsêhê Nai naja Jesucristu ta xi meje ni rë xahasen rë suvá me ne, vëhê ni xi vihndê me tsêhê. Hane cojo cjuahaxi xi visiajmi me ne, vindacha me xuta xi hvíin ndiya rë cjuatsehen. ¹⁹ Yêjê ni xuta ne, ha machaya rë me cjuatsehen tsêhê hacutjin xi ngayujun ni ne, jemu ndaja nuhyun tsêhê Nai naja. Vêhê xi jemu ndama ná. Jemu meje ná xi cuechutaha sa cjuatacun nuju, peru xi nihñu cjuandaja. Hane cjuatsehen ne, meje ná xi sacuaha xi hyuun ndiya rë. ²⁰ Hane cuechú nixtin xi Nina, me xi sua naja cjuandaja cjuajeya ne, ngutjen cuatêcja me cjuatsehen xi sahmi Satanás ngajni nuju. Cjuandaja rë Nai naja Jesús ne, catisehen cahntsua xahasen nuju.

Jingusa me tsingatju me nina rë me

²¹ Cha Timoteo, cha xi sahmi tangun cojo ná xa rë Jesucristu ne, tsingatju cha nina nuju. Cojo cha Lucio, cha Jasón, cojo cha Sosípater xingueen ne, hacuaha tsingatju cha nina nuju.

²² Ngahan, Tercio, xi titsihindu cjuat rë Pablo xcun xujun vihi ne, hacuaha tsingatju nina nuju ngayujun ni xi tjin tangun cjuatacun nuju cojo Nai naja.

²³ Cha Gayo, cha xi casua ndava xi tejña ngahan ne, hacuaha sua cha ndava cha xi ma tangun yêjê ni xuta ladu rë Jesucristu ne, tsingatju cha nina nuju. Cha Erasto, cha xi má tesorero tsêhê nandya vihi ne, tsingatju cha nina nuju. Cha Cuarto xingueen ne, hacuaha tsingatju cha nina nuju.

Pablo ne, vaxëndaja me Nina

²⁴ Cjuandaja rë Nai naja Jesucristu ne, catama tsujun ngayujun ni. Cuatjin jain.

²⁵ Tahan nacuechji rë Nina ta, Nina ne, ma sahmi me xi viyuju cahndê cjuatacun nuju cojo cjuandajyihi xi chja tsêhê Jesucristu, cjuandajyihi xi ngahan cojo jingu sa apóstol ne, tihín machaya rë xuta. Cjuandajyihi vëhê ne, hacui ngu cjuatxi jiyahma hisca hya xi cjêê cuman-daja ngasunhndê. ²⁶ Peru hisca quihndê casua Nina camachaya naja cjuandajyihi jan, quihndê xi casahmi me xi profeta ne, camá catsihindu cjuat rë me. Hane Nina xi tsajin nu tsajin nixtin cjuê me ne, ngatsê rë xi cuatjin cavitexa me ne, vëhê xi camachaya rë xuta tsêhê yêjê ni nación yêjê ni ladu cjuandajyihi vëhê, cojo sa xi yêjê ni xuta ne, cumanguacun me hacuaha cuihndê me tsêhê Nina.

²⁷ Ngu ni Nina xi vë yêjê ni cjuatacun ne, nihña jyê nihña lnga me yêjê nu yêjê nixtin ngatsê rë Jesucristu. Cuatjin jain.

Carta xi tjuntjun catsihindu San Pablo xi cafahatsja xuta nandya Corinto

1 Ngahan Pablo ne, casuaxa ná Jesucristu xi má ngahan apóstol tsêhê me, tsêhê xi cuatjin xi meje rê Nina. Hane ngahan cojo cha Sóstenes xingueen ne, ²ningatjin ngu xujun vi tsujun, ngayujun ni xuta Corinto xi hacuaha xuta ladu rê Nina ngayun, ngayun xi cavaxijin Nina ngayun, tsêhê xi tjin tyjahi cjuatacun nuju cojo Jesucristu. Hacuaha ningatjin xujun vihi tsêhê yêjê xuta xi faharcun me Nai naja Jesucristu jinguyjê ni cahndê. Jesucristu jan ne, Nai rê xuta xi cuacun vêhê me, hacuaha Nai naja ngayaan me. ³Nina Nahmi naja cojo Nai naja Jesucristu ne, catisua nuju me cjuandaja cjuajeya.

Ximinchacun xi casua Jesucristu

⁴Yasen ni suá nacuechji rê Nina ngatsê nuju ngayujun ni cojo ngatsê rê cjuandaja rê Nina xi casua nuju me quihndê xi tjin tangun cjuatacun nuju cojo Jesucristu. ⁵Suá nacuechji rê Nina ta, quihndê xi tjin tangun cjuatacun nuju cojo Jesucristu ne, casua nuju Nina yêjê ni. Casua nuju me chuva rê hacutjin ndaja cuinújun hacuaha ndaja cuijnercun cjuarê me. ⁶Cjuandajyihi xi chja tsêhê Jesucristu ne, jemu ndaja cavisehen cahntsua xahasen nuju. ⁷Vêhê xi ngayun ne, tsajin ngu cjuandaja rê Nina xi machaja nuju, jinguyêjê rê xi cuinechyunun rê nixtin xi cumatsejen nga Nai naja Jesucristu. ⁸Cuisecoo nuju Nina xi cuejñu hñu cjuatacun nuju jinguyêjê rê xi nechun cjuahñu, cojo sa xi ngayun ne, tsajin mé jyê tjin nuju nixtin hya xi cuya nga Nai naja Jesucristu. ⁹Nina ne, hatuxa sahmichihin me yêjê cjuarê xi chja me, hacuaha me vêhê xi cavaxijin nuju

me xi nihñu tangun cjuatacun nuju cojo Quihndi rê me, Nai naja Jesucristu.

Hacuiin ngu tangun ni siu cjuatacun rê xuta rê yungun

¹⁰Ngatsê rê xi casuaxa ná Nai naja Jesucristu ne, cuichjá cojo nuju ta meje ná xi ngu tangun ni cjuarê cuinújun ngayujun ni, hacuiin xi cuiseccun cjuarê nuju. Nihñu tangun cjuatacun nuju cojo xingun. ¹¹Cuatjin chjá cojo nuju ta, tsêhê xi xuta rê Cloé ne, casua me camachaya ná xi tjin si ngajñi nuju cojo xingun. ¹²Cuma cuinújun ne, ngujo ngayun ne, nújun cuitjin: “Ladu rê Pablo ngayin”; hane ngujo nga ngayun ne: “Ladu rê Apolos ngayin”; hane ngujo nga ngayun ne: “Ladu rê Pedru ngayin”; hane ngujo nga ngayun ne: “Ladu rê Cristu ngayin.” Cuatjin nújun. ¹³Peru ¿há tjin jo jyan Cristu? ¿Há Pablo casetaha me xcun cru ngatsê nuju? ¿Há tsajin ne, há caxtenda ngayun xi ladu rê Pablo cuma ngayun? ¡Hacuiin cuatjin! ¹⁴Hisca suá nacuechji rê Nina ta hisca ngu ngayun ne, cavitendaan nuju, suvá ni cha Crispo cojo cha Gayo xi cavitenda cha. ¹⁵Xi cuatjin camá ne, tsajin yo xi cuichja xi caxtenda ngayun xi cuma ngayun xuta ladu naha. ¹⁶Haan, hacuaha cavitenda sa xuta rê Estéfanos. Peru hveen há tjin sa xi cavitenda. ¹⁷Cuatjin casahme ta, tsêhê xi hacuiin catsingatju ná Jesucristu xi cuitenda xuta ta catsingatju ná me xi suá cumachaya rê xuta cjuandajyihi xi chja tsêhê me. Hacuaha hacuiin catsingatju ná me xi cuichjá sacuaha chja ngu xuta xi jemu ndaja nuhya rê, hane cuahacuenda xuta cjuarê naha cahndê rê xi cuahacuenda me ngahñu rê cjuaveya rê Jesucristu ngajan xcun cru.

Tjin rê Jesucristu ngahñu rê Nina hacuaha tjin rê me cjuatacun rê Nina

¹⁸Cuatjin mijí rê xi chjahátahá rê ngahñu rê cjuarê cjuaveya rê Jesu-

cristu xcun cru ta, tsêhê xi cjuua vêhê ne, handasa ngu cjuaveya cjuangarca xi má rê xuta xi tivetjintjiin me, peru xi cuma naja ngayaan xi tivetjuntjeen ne, cjuua vêhê ne, tjin rê ngahñu rê Nina.

¹⁹ Cuitjin camahindu xcun xujun rê Nina cjuua xi cachja Nina:

Tsinguétsun cjuatacun rê xuta xi jemu vechú cjuatacun rê,
hacuaha cjuatacun rê xuta xi jemu ndaja vijnercu me ne, tsinguejñu rê.

Cuatjin camahindu.

²⁰ ¿Jarê cha xi jemu vechú cjuatacun rê? ¿Jarê cha xi vicuya cjuachacun? Hacuaha ¿jarê cha xi jemu ndaja ma visiajmi nixtin vihi? ¡Nina ne, catsicuya me suvá cjuangarca cjuatacun xi jemu vêê xuta ngasunhndê vi! ²¹ Nina ta vechutaha jain cjuatacun rê me ne, cavejña ngu cacun me xi xuta ngasunhndê ne, cumaji sacúse rê me cojo suva ni cjuatacun rê me yo xi Nina. Cahndé rê vêhê ne, Nina ne, camameje cuaxêtje me xuta xi mangu cacun cojo rê me ngatsê rê cjuandajyihi xi nújin, handasa xi má rê xuta ne, ngu cjuangarca cjuandajyihi vêhê.

²² Xuta tjê rê Israel ne, meje rê me xi sahmi Nina cjuarcun, hane xutaxín ne, vanguise me xi jemu cuechú cjuatacun rê me. ²³ Peru ngayin ne, tihin machaya rê xuta cjuua tsêhê me xi catsingatju Nina, me xi cahme xi casetaha xcun cru. Ngu ladu ne, cjuua vêhê sahmi xi xuta tjê rê Israel ne, sahmi condra me Nina. Hane ngu ladu nga ne, cjuua vêhê ne, ngu cjuangarca xi má rê xutaxín. ²⁴ Peru xi cuma rê xuta xi Nina cavaxijin rê me, sa xuta tjê rê Israel o sa xutaxín ne, me xi Nina catsingatju rê jan ne, tjin rê me ngahñu rê Nina hacuaha tjin rê me cjuatacun rê Nina. ²⁵ Hya xi machaya rê yahnga xuta yêjê xcusun xi choho cavatju Jesucristu camá ne, tsingataha cacun me xi Nina ne, jemu ngarca me hacuaha jemu ndaya cacun me. Peru hacuiin cuatjin ta, xcusun xi cuacun vê ne, tsin-

gacun naja xi Nina ne, hitsê sa jercu vechú cjuatacun rê me xi cuma rê xuta xi jercu vechú cjuatacun rê, hacuaha hitsê sa jercu tjin rê me ngahñu xi cuma rê xuta xi jercu tjin rê ngahñu.

²⁶ Ngayujun ni ngayun ne, ha hyun ta Nina cavaxijin nuju me handasa hacuiin cjin ngayun xi vechú cjuatacun nuju, hacuiin cjin ngayun xi jercu tjin nuju ngahñu, hacuaha hacuiin cjin ngayun xi nchina ngayun. ²⁷ Peru Nina ne, cavaxijin me xuta ngasunhndê xi ngarca, cojo sa xi tsisava me xuta xi jercu vechú cjuatacun rê. Hane cavaxijin me xuta ngasunhndê xi ndaya cacun, cojo sa xi tsisava me xuta xi jercu hñu ngahñu rê. ²⁸ Hacuaha Nina ne, cavaxijin me xuta ngasunhndê xi yuma, xuta xi maxta tsêhê, xuta xi venguiin chji rê, cojo sa xi tsinguetsun Nina cjuatacun rê xuta xi jemu vengui chji rê xi má rê xuta ngasunhndê. ²⁹ Xi cuatjin ne, yêjê xuta ne, cumaji cuaxêndaja me yojo rê me xcun Nina. ³⁰ Hane ha suvá Nina casahmi tangun me cjuatacun nuju cojo Jesucristu. Hacuaha Nina vuxaha me cjuatacun naja, xi mangutacun cojo Jesucristu. Hacuaha ngatsê rê Jesucristu ne, fê jyê naja xcun Nina, tsêhê Nina má ngayaan, hacuaha vetjuntjeen. ³¹ Cuatjin jain má cojo sa xi nihña sacuatjin quitaha xcun xujun rê Nina hiscan xi chja cuitjin: “Sa xi yo xi meje cuaxêndaja yojo rê ne, cataxêndaja yojo rê, peru xi tsêhê Nai naja.”

Chuva rê xi cachja Pablo cjuua rê Nina

2 Peru ngayujun ni ne, hya xi cêjê nangui nuju ne, cachjaan cojo nuju cjuua rê Nina sacuaha xi jemu ma chjá o sa sacuaha xi jemu vechú cjuatacun naha. ² Cuatjin casahme ta, tsêhê xi cavejñá cjuatacun naha xi ngu ni Jesucristu xi cahme me xcun cru tsingátaha cacún tsêhê me, jinguyêjê rê xi cuitejñataha cojo nuju. ³ Hacuaha hya xi

cavitejñataha cojo nuju ne, jemu ndaya cacún, hisca fatsë ngahan xi tsácjun. ⁴Hacuaha hya xi cachjá cojo nuju cjuarë Nina ne, hacuiin jemu cjuarë yehe casah-mexa cojo xi meje sahme xi cuijne tacún ta cajne tacún ngatsë rë ngahñu xi tjin rë Hasen rë Nina. ⁵Cuatjin camá cojo sa xi cumangu tacún cojo Nina, peru hacuiin ngatsë rë cjuatacun rë xuta ta ngatsë rë ngahñu xi tjin rë Nina.

Cjuatacun rë Nina xi jercu vechú

⁶Peru cojo xuta xi vechútaha cjuatacun rë me xi mangucacun me cojo Jesucristu ne, nújan cjuatacun xi jemu vengui chjí rë. Peru cjuatacun vëhë ne, hacuiin cjuatacun tsëhë xuta ngasunhndë vihi hacuaha hacuiin cjuatacun tsëhë xuta xi vitexa nguehe ngasunhndë vihi, me xi titsinguetsun Nina cjuatacun rë. ⁷Cjuatacun vëhë ne, vëhë cjuatacun rë Nina xi jiyahma titjun. Peru Nina ne, hisca chaja sa xi cuejña ngasunhndë ne, ha tjin chjine rë me cjuatacun vëhë xi ndaja tsajan. ⁸Hisca xi ngu xuta xi vitexa quihndë nixtin vihi ne, vijniircu me cjuatacun vëhë. Sa xi cajnercu me ne, hacuaha catsiquiin me Nai naja, me xi jemu jyë hnga camahani me cojo Hasen rë me. ⁹Peru tivetjucaa sacuatjin camahindu xcun xujun rë Nina hiscan xi chja cuitjin:

Xcusun xi cjëë camahani scuëë xuta, hisca cjëë camahani cuihndë me cjuarë tsëhë, hacuaha hisca cjëë camahani tsingatahacacun me tsëhë ne, vëhë xcusun xi cavëhëchjine Nina xi cuma rë xuta xi hmu cacun rë me. Cuatjin camahindu. ¹⁰Xcusun vëhë ne, ngayin casua Hasen rë Nina camachaya niji. Hasen rë Nina jan ne, vëë yëjë ngarca ni, hisca cjuatacun rë Nina xi hitsë sa hma jiya.

¹¹Ngajñi rë yëjë xuta ne, tsajin yo xi vëë cjuatacun rë ngu xuta ta suvá ni hasen rë me xi jiya ngajñi yojo rë me ne, vëhë xi vëë. Ha chuva vëhë ni

ne, tsajin yo xi vëë cjuatacun rë Nina ta suvá ni Hasen rë Nina ne, vëhë xi vëë. ¹²Ngayaan ne, hacuiin cachjahanntsangu hasen tsëhë ngasunhndë ta cachjahanntsangu Hasen xi catsingatju Nina, cojo sa xi cumachaya naja yëjë ni cjuandaja xi Nina casua naja me.

¹³Nújan tsëhë cjuandaja vëhë, peru hacuiin cojo cjuarë yehe xi nduva tsëhë cjuatacun rë xuta ngasunhndë ta cojo cjuarë xi nduva tsëhë Hasen rë Nina. Hane cuatjin xi tahan cjuatacun rë Nina machaya rë xuta xi tjin rë me Hasen rë Nina.

¹⁴Xuta xi tsajin rë me Hasen rë Nina ne, maji fahatsja me cjuandaja xi sua Hasen rë Nina ta xi má rë me xi cuacun vë ne, suvá cjuangarca cjuandaja xi cuacun vë, hacuaha maji vijnercu me cjuandaja xi cuacun vë, tsëhë xi suvá Hasen rë Nina sahmi xi vijnercuun. ¹⁵Xuta xi tjin rë me Hasen rë Nina ne, ma tsichuva me yëjë ngarca ni, peru me xi cuacun vëhë ne, tsajin yo xi ma tsichuva rë me. ¹⁶Cuitjin camahindu xcun xujun rë Nina: “¿Yo xi vëë cjuatacun rë Nina? ¿Yo xi cuicuya rë?” Cuatjin camahindu. Peru ngayaan ne, tjin naja cjuatacun rë Jesucristu.

Xuta sahmixa rë Nina

3 Ngayujun ni ne, camaji cachjá cojo nuju sacua ha chjá cojo xuta xi ha tjin rë me Hasen rë Nina ta, tjin ná xi cachjá cojo nuju sacua ha chjá cojo xuta ngasunhndë, sacua ha xuta xi sehe cavisehen ladu rë Jesucristu. ²Sacua ha xi casuá nuju lechi xi siuhun. Hacuiin niñu casuá xi xinu ta, tsëhë xi nixtin hya ne, tangun ngayun cojo quihndi chihndë xi cjëë cuma sinë niñu. Hacuanitjin ni cjëë cuma chjuhunnstun yëjë cjuarë Nina hisca quihndë, ³tsëhë xi xuta ngasunhndë sa má ngayun. Cuatjin chjá cojo nuju ta jinguyëjë rë xi tjin sa cjuachini hacuaha tjin sa si ngajñi nuju ne,

xuta ngasunhndë cuaha sa má ngayun, hacuaha tivanguntjengun sa ndiya rê xuta ngasunhndë. ⁴Hya xi ngu ngayun nújun: “Ngahan ne, ladu rê Pablo ngahan”, hane ngu nga ngayun ne, nújun: “Ngahan ne, ladu rê Apolos ngahan” ne, ngajan matsejen xi xuta ngasunhndë cuaha má ngayun.

⁵Xi matsejen ne, ¿mé má Apolos ne, mé má Pablo ni? Ngayin ne, xuta sahmi rê Nina ni ngayin, xi canújin cojo nuju cja rê Nina xi camacjain nuju. Jima ngu ngayin ne, canihñi xa xi casua niji Nai naja. ⁶Sacuaha xi ngahan catsítjê, hane Apolos cavitejnu me nandá, peru Nina casahmi me xi camayehe xitjê. ⁷Ngajan xi, xi matsejen ne, cha xi tsitjê cojo cha xi vitejnu nandá ne, hacuiin jemu vengui chji rê cha ta me xi vengui jain chji rê ne, Nina, me xi sahmi xi ma yehe xitjê. ⁸Cha xi tsitjê cojo cha xi vitejnu nandá ne, tangun ni vengui chji rê cha. Jimangu cha ne, cjuahatsja cha chji rê cha, sacuatjin xa xi casahmi jimangu cha. ⁹Ngayin ne, tangun tinihñi xa rê Nina, hane ngayun ne, sacuaha nangui rê Nina xi tijimaxa cojo má ngayun.

Hacuaha ngayun ne, sacuaha ngu ndihya xi Nina tsindaja me má ngayun. ¹⁰Ngahan ne, tsêhê cjuandaja xi casua ná Nina ne, casahme sacuaha ngu chjine vexo ne, cavejña ngu xihndënaña, peru xcun xihndënaña xi casahme jan ne, jingu sa xuta canduva casahmi me ngu ndihya. Peru jima ngu xuta xi sahmi me ndihya xcun xihndënaña vêhê ne, meje rê xi tjín rê me cuidadu hacutjin xi sahmi me ta, ¹¹tsêhê xi tsajin sa cjín xihndënaña xi tjín ta ngu tu tu ni má. Hane xihndënaña xi ha tacun vê ne, hacui Jesucristu. ¹²Quihndê ne, xi nihña xa rê Nina ne, cuejña xi yahnga xuta sahmi me cojo oro, o sa quicha tyava, o sa ndyojo xi jercu vengui chji rê. Hane yahnga nga me ne, sacuaha sahmi me cojo ya, o sa cojo ndiji, o sa cojo xca ni. ¹³Peru nixtin

hya xi tsichuva naja Nina ne, hya cuma cumatsejen xcusun rê xa xi casahmi jima ngu xuta xi cuacun vê. Nixtin hya ne, cuejña Nina ngu ndihi xi tsichuva xa xi casahmi jima ngu me, cojo sa xi cumatsejen mé xcusun xa vêhê. ¹⁴Sa xi xa xi casahmi ngu xuta scaa rê cojo suê rê ndihi vêhê ne, sacú rê me ngu cjuandaja rê xi sua Nina. ¹⁵Peru sa xi xa xi casahmi ngu xuta jan cjuêya cojo suê rê ndihi vêhê ne, tsichajá me yêjê, peru me vêhê ne, cuetjutje me sacuaha ngu xi vetjutje tsêhê ngu ndihi.

¹⁶Ngayujun ni ne, ha ndaja hyun xi sacuaha yungun rê Nina má ngayun, ta Hasen rê Nina ne, hacuaha tacuncandê cahntsua xahasen nuju. ¹⁷Sa xi yo xi tsinguetsun yungun rê Nina, Nina ne, hacuaha jercu sahmi me castigu xuta jan, tsêhê xi yungun rê Nina ne, hatuxa tsêhê Nina. Hane ngayun ne, hacuaha yungun rê Nina má ngayun.

¹⁸Xicavindachuun suvun rê yojo nuju. Sa xi tjín ngu ngayun xi ningatuhun tacún xi jemu vechú cjuatacun nuju sacuaha cjuatacun rê xuta ngasunhndê vihi ne, nihñucuendun chjuhunxun cjuatacun vêhê sacuaha xi vechiín cjuatacun nuju. Hane xi cuatjin nihñu ne, sehe cuechú tuhun cojo cjuaquixi ngu cjuatacun nuju. ¹⁹Cuatjin meje rê ta, tsêhê xi cjuatacun rê xuta ngasunhndê vihi ne, xi cuma rê Nina ne, suvá cjuangarca. Hisca camahindu xcun xujun rê Nina cuitjin: “Nina ne, sahmi me xi xuta xi jemu vechú cjuatacun rê me vetju sava me xcun cjuandacha xi sahmi me.” ²⁰Hacuaha camahindu nga cuitjin: “Nina ne, vêê me xi cjuatacun rê xuta xi jemu vechú cjuatacun rê ne, tu mahya.” ²¹Vêhê xi hisca ngu गयाan ne, mijí rê xi naxenndajan cjuatacun rê xuta ngasunhndê ta, tsêhê xi yêjê ngarca ni ne, tsujun: ²²há xi Pablo, há xi Apolos, há xi Pedru, há ngasunhndê, há cjuahñu, há cjuaveya, há xi nixtin quihndê, há xi nix-

tin nduva ne, ta yějě ngarca ni ne, tsujun vë. ²³ Hane ngayun ne, tsěhě Jesucristu ngayun, hane Jesucristu ne, tsěhě Nina me.

Xa rě apóstol

4 Meje rě xi nihñucundun xi ngayin ne, xuta sahmi xa rě Jesucristu má ngayin, hacuaha cachjihinntsín xa xi tihín cumachaya rě xuta tsěhě cjuatahahma xi sehe tisua Nina jimachaya naja. ² Hacuaha jemu sahmi nguýě xi ngu xuta xi tjin tsjá me xa ne, tsejen tsěhě me xi cuma cumangu tacuun cojo rě me. ³ Xi cuma ná ngahan ne, tsajin mé sahmi rě sa xi chjuhunchuvun ná cojo cjuatacun naha, o sa xi cjuahachuva ná xuta ngasunhndě. Hisca ngahan suva ne, fahachuvaan cjuatacun naha. ⁴ Xi má ná ne, tsajin jyě naha. Peru hacuiin ngatsě rě vėhě xi hatuxa tsajin jyě naha. Nai naja ne, me vėhě xi tsichuva ná me. ⁵ Vėhě xi mijí rě xi yo chjuhunchuvun, xi chaja sa cuechú nixtin xi cuinduva Nai naja ta, tsěhě xi me vėhě cuaxěcaatsejen me yějě ni cjua xi tsajin yo vėě. Hacuaha cuaxěcaatsejen me yějě cjuatacun rě xuta. Nixtin hya ne, cuaxěndaja Nina jima ngu xuta sacuatjin vechú chuva rě tsěhě jima ngu me.

⁶ Ngayujun ni ne, cachjá cojo nuju yějě cjua vėhě tsahan suva cojo tsěhě Apolos, cojo sa xi ndaja tsujun, cojo sa xi cuijnercun mé meje cuichja cjua xi chja cuitjin: “Nihñuchuhun sacuatjin chja cjua xi camahindu.” Cuatjin chja cjua. Cuatjin meje rě cojo sa xi hacuiin nihñu yehe yojo nuju ngatsě rě ngu xi tjengun cjua rě, hane me xi yahnga ne, nitjungun me. ⁷ ¿Yo casahmi xi hitsě sa vengui chjí nuju ngayun xi cuma rě me xi yahnga? Hacuaha ¿mé tjin nuju xi hacuiin Nina casua nuju me? Sa xi Nina casua nuju me ne, ¿mé má naxunndujun yojo nuju sacuaaha xi tsajin yo xi casua nuju ni?

⁸ ¡Sacuaaha xi ngayun ne, má nuju xi ha tjin nuju yějě xi meje rě xahasen nuju, ha jemu nchina camá ngayun! Ha xuta xi matitjun camá ngayun xi má nuju. Hacuaha quihndě tsajin mé xi machaja nuju xi cumatihin nuju. Jemu ndatjin sa xi matitjun jain ngayun, cojo sa xi ngayin ne, hacuaha cojo ngayin cumatitjun tangun ngayin cojo nuju. ⁹ Xi má ná ngahan ne, casahmi Nina xi venguiin chji niji ngayin xi má ngayin apóstol, sacuaaha xuta xi cjue cueya me ngatsě rě jyě rě me. Tivutsejen yějě ni xuta cojo yějě ni ángel hacutjin tivatjin tijima. ¹⁰ Ngatsě rě xi tjenguin rě Jesucristu ne, má rě xuta sacuaaha xi jemu ngarca ngayin. Peru ngayun ne, xi má nuju ne, jemu quicun tacún ngatsě rě xi tjengun rě Jesucristu. Ngayin ne, jemu ndaya tacuín, peru ngayun ne, jemu hñu ngahñu nuju. Ngayun ne, chjahárcun nuju, hane ngayin ne, chjaharcuaain niji. ¹¹ Hisca quihndě sa ne, jindya niji tsěhě xi xini xi sihin, hacuiin ndaja tsjian chjín, choho sahmi xuta cojo niji, hacuaha tu nuyihinsin ni. ¹² Nihñi xa xi hai. Hora xi choho chja xuta cojo niji ne, ndaja nújin cojo rě me. Hora xi tsuyihiya tjugui niji me cojo cjuahngatacun ne, caa niji cojo xcusun xi sahmi me. Tsajin mé nihñi cojo rě me. ¹³ Hora xi choho chja xuta tsijin ne, nindijin cjua cojo rě me. Camá ngayin sacuaaha xtě xi tjin ngasunhndě. Hitsě sa chuva vengui chjí niji xi cuma rě yějě ni xcusun xi tjin. Hisca quihndě ne, cuanitjin vatjin má.

¹⁴ Xi titsihindu nuju cuitjin ne, hacuiin xi tsisava nuju ta xi suá nuju conseju sacuaaha quihndi naha suva xi jemu hmú cacún. ¹⁵ Handasa tjin nuju tē mil xuta xi vicuya nuju cjua xi chja tsěhě Jesucristu ne, peru nahmi nuju ne, ngu ni ngahan, tsěhě xi hya xi casuá camachaya nuju cjuandajyihí xi chja tsěhě Jesucristu hacuaha cavisuhun ladu rě me ne, hya camá ngahan sacuaaha nahmi nuju.

¹⁶ Vêhê xi ngayujun ni ne, meje ná xi ni-hñu sacuatjin sahme ngahan.

¹⁷ Ngatsê rê vêhê ne, titsingátju nuju cha Timoteo, cha vêhê xi sacuaha quihndi naha xi jemu hmú cacún hacuaha jemu ndaja sahmi chihin me xa tsêhê Nai naja. Me vêhê sahmi me xi cuitsjen nuju hacutjin tifê cojo ndiya rê Jesucristu, sacuatjin vicuyá rê xuta rê yêjê ni yungun jingujyê ni.

¹⁸ Quihndê ne, yahnga ngayun ne, canihñu yehe yojo nuju xi cuatjin caningatuhun tacún xi cjuen cjué scútsejen nuju. ¹⁹ Peru ngahan ne, cuinduva xati scútsejen nuju, sa Nai naja meje rê me. Hane hya cumachaya ná hacuiin sacuatjin xi visiajmi xuta xi cuacun casahmi yehe yojo rê jan ta sacuatjin ngahñu xi tjin rê me. ²⁰ Cuatjin sahme ta sacuaha gobiernu xi sahmi Nina ne, hacuiin cojo suvá cjua ni rê me xi sahmi me ta cojo ngahñu xi tjin rê me. ²¹ ¿Hacutjin meje nuju xi nduva scútsejen nuju, há xi cojo ngu castigu ne, o há tsajin ne, há cojo ngu cjuahmutacun, cojo cjuandaja cjuajeya?

Cjuatsehen xi casahmi ngu cha xuta rê yungun

5 Tjin cjua xi ngajñi nuju ngayujun ni ne, jiyajñi ngu cjuatsehen xi hisca xutaxín sa ne, sahmi me. Chja cjua ta ngu ngayun ne, cachjuhun chjuun rê nahmi nuju, camá chjuun nuju. ² ¿Hane ngayujun ni ne, jercu naxunndujun yojo nuju! Cahndê rê vêhê ne, meje rê xi choho cuma nuju. Cha xi cuatjin sahmi xcusun vêhê ne, catetjuxin cha tsujun. ³ Handasa tsajin ngahan tejña cojo nuju ndyá ne, peru cjuatacun naha ne, sacuaha xi ndyá tacun cojo nuju. Hane sacuaha xi tejña cojo nuju ne, ngahan ne, ngatsê rê xi sahme xa rê Nai naja Jesús ne, chjá cojo nuju ta meje rê xi cuma castigu cha xi cuatjin sahmi xcusun vêhê. ⁴ Hya xi cuma tangun ngayun, hacuaha

cjuatacun naha ne, sacuaha xi tacun cojo nuju ne, cojo ngahñu xi sua naja Nai naja Jesús ne, ⁵ nihñu entregadu cha xi cuajy-ihí vê cojo Satanás, cojo sa xi cueya cha. Cuatjin nihñu, cojo sa xi cuetjutje hasen rê cha nixtin hya xi cuya nga Nai naja.

⁶ Ndajin tjin xi cuatjin nihñu yehe yojo nuju. Ha hyun cjua xi chja cuitjin: “Hitsê lihndi ni san rê pan ne, caa rê tsisatjen rê yêjê nahyu.” Cuatjin chja cjua. ⁷ Meje rê xi chjuhunxun cjuatsehen vêhê, xi sahmi sacuaha san rê pan, cojo sa xi cuma tyjahi cjuatacun nuju, sacuaha nahyu xi tsajin san rê. Hacuaha hvê ta hatuxa tyjahi cjuatacun nuju ta, tsêhê xi Jesucristu ne, me xi sacuaha chu tsángá tsêhê suhi rê Pascua naja ne, ha cahme me. ⁸ Vêhê xi meje rê xi nihña suhi, peru hacuiin cojo san rê pan xi changá, cuma cuinújan ne, hacuiin cojo cjuatsehen ta, cojo nahyu xi tsajin san rê, cuma cuinújan ne, cojo cjuandaja cojo cjuaquixi.

⁹ Catsihindu nuju xcun xujun xi ha catsingátju nuju ta mijí rê xi nihñu tangun cojo xuta xi sahmi cjuatsehen cojo ngu chjuun o sa cojo ngu xihin. ¹⁰ Xi cachjá cojo nuju cuatjin ne, hacuiin meje cuichja xi meje rê xi cuetjunxun camahani tsêhê xuta ngasunhndê xi hinchá ndiya rê cjuatsehen vêhê, o sa tjenguitaha me xi hacuiin tsêhê, o sa ndacha, o sa faharcun me nina ndyojo. Sa xi cuatjin nihñu ne, meje rê xi cuetjun camahani tsêhê ngasunhndê. ¹¹ Xi vijne cjua xi catsihindu nuju vê ne, xi hacuiin nihñu tangun cojo ngu xuta xi chja me xi ladu rê Jesús má me hane sahmi me cjuatsehen cojo ngu chjuun o sa cojo ngu xihin, o sa tjenguitaha me xi hacuiin tsêhê me, o sa faharcun me nina ndyojo, o sa ndesu me, o sa cha chihi me, o sa xi ndacha me. Ngu xuta rê yungun xi cuatjin xcusun rê ne, hisca mijí rê xi xinuniñu cojo rê me. ¹²⁻¹³ Satiin ná ngahan xi tsichúva xuta xi hacuiin xuta rê yungun má me. Nina ne, me vêhê xi tsichuva

rë me. Peru ngayun ne, meje rë xi nichuvun xuta xi xuta rë yungun me. Vêhë xi hacuaha meje rë xi naxunxun cha tsehen vë tsêhë ngajñi nuju.

**Vinchajyé yahnga xuta ladu rë
Jesús xicjin me ngajñi rë me**

6 Hya xi tjin ngu ngayun xi tjin ngu jyé xi meje cuinchun tsêhë xingun ne, ¿mé má cuatjin vetju tacún xi xcun xuta xi hisca sahmicuendaain me Nina vangun chjahyun xi cumacuenda tsujun, cahndé xi cuangun xcun xuta xi ladu rë Nina me? ² ¿Há hyuun xi cuechú nixtin xi ngayaan xuta ladu rë Nina nichuvan xuta ngasunhndë cojo cjuatacun rë me? Hane sa xi ngayun cuatjin nichuvun xuta ngasunhndë ne, ¿há maji nichuvun ngu jyé lihndi quihndé ni? ³ ¿Há hyuun xi ngayaan nichuvan ángel cojo cjuatacun rë ni? ¡Hitsë guan cjuacjintacun rë ngasunhndë vihi! ⁴ Vêhë xi sa tjin ngu jyé xicjin vêhë xi meje cuinchun ne, ¿há cuangun cuejñu jyé vêhë xcun ngu xutaxín xi faharcuaain me xcusun rë yungun? ⁵ Nguehe cuichjá cojo nuju ngujo cjua cuitjin, cojo sa xi cuma sava nuju: ¿há tsajin ndastu ngu xuta xi vechú hitsë cjuatacun rë me xi cuma sahmi cuenda me tu mé ni si xi nihñu cojo xingun? ⁶ Peru ngu ngayun xuta ladu rë Jesús ne, vinchun jyé rë jingu sa xuta ladu rë Jesús, ¡hane hisca vanguncujun jyé vêhë xcun xuta xi sahmicuendaain me Nina!

⁷ Xi cuatjin vinchun jyé rë xingun xingu xingu ngayun ne, ngajan matsejen xi ngayun canichujún. Hitsë sa ndaja xi ningatuhun xi cumandacha ngayun. Hitsë sa ndaja xi ningatuhun xi cjue chëjë tsujun. ⁸ Cahndé rë xi cuatjin ningatuhun ne, tu ngayun vindachun hacuaha nichujun tsêhë xingun ngajñi nuju ngayun xuta rë yungun.

⁹ ¿Há hyuun ta xuta tsehen ne, cumaji cuisehen me hiscan sahmi Nina gubiernu? Ha quihndé xicatuun cahndé xi

cuma ndacha sa ngayun ta, yêjê xcusun xuta xi cuicun vi ne, cumaji cuisehen me hiscan sahmi Nina gubiernu: xuta xi sahmi me cjuatsehen cojo chjuun o sa cojo xihin xi hacuiin tsêhë me, xuta xi faharcun me nina ndoyojo, cha xi chuya rë ngu xihin, ¹⁰ xuta xi chëjë me, xuta xi tjenguitaha me xi hacuiin tsêhë me, xuta xi hatuxa xuta chihi me, xuta xi ndesu me, xuta xi ndacha me, yêjê xcusun xuta xi cuacun vë ne, cumaji cuisehen me hiscan sahmi Nina gubiernu. ¹¹ Yahnga ngayun ne, cuatjin cún ngayun titjun. Peru fahaxin me jyé nuju, camá tyjahi cjuatacun nuju, café jyé nuju. Cuatjin camá cojo nuju ngatsë rë Nai naja Jesucristu cojo ngatsë rë Hasen rë Nina naja.

**Meje rë xi cojo yojo naja
nihña jyé nihña hnga Nina**

¹² Yahnga ngayun ne, nújun cuitjin: “Cuma nihña yêjê ni xcusun.” Cuatjin nújun. Cuma, peru hacuiin yêjê xcusun xi ndaja tsajan. “Cuma nihña yêjê ni xcusun”, peru ngahan ne, suaan cahndé xi scaa rë suhi rë tu mé ni xcusun cojo ná. ¹³ Yahnga nga ngayun ne, nújun cuitjin: “Casahmi Nina xi hatuxa matangun xi chinë cojo cahntsuan, hacuaha cahntsuan ne, hatuxa ma tangun cojo xi chinë.” Cuatjin nújun. Quixi jain, peru cuechú nixtin xi tsicjê Nina catsijo xcusun vêhë. Peru hacuiin casahmi Nina xi hatuxa matangun yojo naja cojo cjuatsehen ta casahmi me xi hatuxa matangun cojo Nai naja, hacuaha hatuxa matangun Nai naja cojo yojo naja. ¹⁴ Nina ne, catsicuya me Nai naja cjuahñu, hacuaha cojo ngahñu rë suvá me ne, hacuanitjin ni tsicuya naja me ngayaan cjuahñu.

¹⁵ ¿Há hyuun ta yojo nuju ne, tjin tangun cojo Jesucristu? Quihndé ne, yojo naja xi tjin tangun cojo Jesucristu ne, ¿há nihña tangun cojo ngu na viteña yojo rë ni? ¡Jéya! ¡Catamamiji rë Nina!

¹⁶Hacuaha ¿há hyuun ta ngu xuta xi sahmi cjuatsehen cojo ngu na xi viteña yojo rë ne, sacuahá xi ngu yojo ni rë me cojo rë na? Cuatjin ma ta chja xujun rë Nina cuitjin: “Catsijo me ne, cuma ngu yojo ni rë me cojo xicjin me.” Cuatjin chja xujun rë Nina. ¹⁷Peru ngu xuta xi sahmi tangun me cjuatacun rë me cojo Nai naja ne, cuma ngu cjuatacun ni rë cojo rë me.

¹⁸Naxunxun yojo nuju tsëhë cjuatsehen xi sahmi ngu xuta cojo ngu chjuun o sa cojo ngu xihin xi hacuiin tsëhë me. Yëjë sa cjuatsehen xi sahmi ngu xuta ne, hacuiin cojo yojo rë me sahmi me. Peru xuta xi sahmi cjuatsehen cojo ngu chjuun o sa ngu xihin xi hacuiin tsëhë ne, cojo yojo rë me sahmi me cjuatsehen vëhë. ¹⁹¿Há hyuun ta yojo nuju ne, sacuahá ngu yungun rë Hasen rë Nina xi caveya Nina cahntsua xahasen nuju? Ngayun ne, hacuiin tsujun suvun yojo nuju ta, ²⁰tsëhë xi ngayun ne, cojo chji cachaha nuju. Vëhë xi meje rë xi cojo yojo nuju nihñu jyë nihñu hnga Nina.

Cjuacjintacun tsëhë cjuavixan

7 Quihndë ne, nguehe tsicúya cjua tsujun tsëhë cjua xi canihindun á.

Ndatjin xi cuixáin xuta. ²Peru ngatsë rë cjuatsehen ne, catisacu chjuun rë jima ngu xihin, hacuahá jima ngu chjuun ne, catisacu xihin rë na. ³Sa chjuun sa xihin me ne, catisahmi chihin me sacuatjin mameje rë cjuavixan xi casahmi me. ⁴Sacuahá chjuun ne, hacuiin na vëhë vitexa na yojo rë na ta xihin rë na vitexa cha. Hacuanitjin ni xihin ta hacuiin cha vëhë vitexa cha yojo rë cha ta chjuun rë cha vitexa na. ⁵Mijí rë xi nichuhun rë xingun yojo nuju sa chjuun sa xihin ngayun. Cuma nihñu cuatjin, peru sa xi catsijo ni ngayun canihñu tangun cjua xi cuejñuxun ngujo nixtin, tsëhë xi meje nuju xi ngujo nixtin vëhë ne, nihñu oración nuju cojo Nina. Hane xi cuatju

vëhë ne, sehe tuyun nihñuchuhun sacuatjin mameje rë cjuavixan xi canihñu, sá tu ngatsë rë xi scaain nuju ne, sahmi Satanás ngahñu xi nihñu cjuatsehen.

⁶Cuatjin cachjá cojo nuju cojo sa xi hacuiin chja cuatjun, cachjaan sacuahá xi hatuxa vitéxa nuju. ⁷Xi má ná ngahan ne, ndatjin sa xi yëjë ni xuta ne, scaa rë me sacuahá ngahan. Peru jima ngu xuta ne, casacu rë me jima ngu xcusun cjuandaja xi casua Nina me: ngu me ne, casacu rë me xcusun vihi, ngu nga me ne, casacu rë me xcusun vëhë.

⁸Quihndë ne, ngu ngu ngayun xi cjëë sacú chjuun nuju, cjëë sacú xihin nuju, hacuahá cojo ngayun xi cahan ngayun ne, cuichjá cojo nuju ta ndatjin xi cuinechun suvun sacuahá ngahan. ⁹Peru sa xi scaain nuju ne, tixun. Hitsë sa ndaja xi cuixun xi cuma rë xi nicjun suvun yojo nuju cjuandya rë xihin.

¹⁰Hane ngu ngu ngayun xi cavixun ne, cuichjá cojo nuju ta ngu chjuun ne, mijí rë xi tsismi na xihin rë na. ¹¹Hane sa xi tacun xín na ne, catejña suvá na, o sa tsajin ne, catisehen nga na cjuandaja cojo xihin rë na. Hacuahá ngu xihin ne, mijí rë xi tsismi cha chjuun rë cha. Hacuiin ngahan xi chjá cuatjin ta Nai naja chja me.

¹²Quihndë ne, hacuiin Nai naja cuichja me ta ngahan cuichjá cojo nuju ngayujun ni xi cjëë cuichjá cojo nuju. Sa xi cachjuhun ngu chjuun xi manguaain cacun na cojo Nai naja, hane tsingatihin na cuejña sa na cojo nuju ne, xicanismuu na. ¹³O sa xi cachjuhun ngu xihin xi manguaain cacun cha cojo Nai naja, hane tsingatihin cha cuejña sa cha cojo nuju ne, xi canismuu xihin nuju vë. ¹⁴Cuatjin nihñu ta, xihin nuju xi manguaain cacun cojo Nai naja jan ne, ngatsë nuju ngayun ne, hacuahá cojo cha cumá cha ladu rë Nina. Hacuanitjin ni chjuun nuju xi manguaain cacun cojo Nai naja jan ne, ngatsë nuju ngayun xi

ladu rë Jesús ne, hacuaha cojo na cumá na ladu rë Nina. Sa xi hacuiin cuatjin ne, quihndi nuju ne, hacuiin ladu rë Nina má. Peru xi cjuaquixi ne, quihndi nuju ne, ladu rë Nina má. ¹⁵ Peru sa chjuun sa xihin xi manguaain cacun cojo Nai naja ne, sa xi meje tsismi nuju ne, catitsismi nuju. Sa xi cuatjin cuatjun cuma ne, ngayun xi ladu rë Jesús ngayun ne, ha ndaya tjin ngayun tsëhë cjuavixan. Cuatjin meje rë xi nihñu ta, tsëhë xi Nina cajindaya nuju me xi cuangun ndiya rë cjuandaja cjuajeya. ¹⁶ Tsajin yo vëë rë há cuma naxuntjun chjuun nuju o sa xihin nuju.

Chja Pablo hacutjin meje rë xi cjue xuta cojo ngasunhndë rë me

¹⁷ Meje rë xi ngayujun ni ne, nihñu xa xi casua Nina xi nihñu jima ngu ngayun, hacuaha ha sacuanitjin ni cún ngayun hya xi cavaxijin nuju Nina ne, hacuanitjin ni tángun nduju cojo. Cuatjin chjá cojo xuta tsëhë yëjë ni yungun. ¹⁸ Sa xi ha cati rë chuxin nuju hya xi cavaxijin nuju Nina ne, xicavinchuun chuva rë xi nindeyun xcusun vëhë. O sa xi cjëë xti rë chuxin nuju hya xi cavaxijin nuju Nina ne, xicanihñuu. ¹⁹ Xi xti rë chuxin naja o sa xtiin rë ne, tsajin mé vengui chjí rë ta xi vengui chjí rë ne, xi cuinuhyan cjua xi vitexa Nina. ²⁰ Ha sacuanitjin ni cún jima ngu ngayun hya xi cavaxijin nuju Nina ne, hacuanitjin ni tángun nduju cojo. ²¹ Sa xi ngu mosu hndixahan ngayun nixtin hya ne, xicamacjiin tacún. Peru sa xi cuma cuetjuntjun tsëhë xi má ngayun mosu hndixahan ne, naxuntjun yojo nuju ta, ²² tsëhë xi ngu mosu hndixahan xi Nai naja vaxijin me ne, ndaya tjin xi cuma rë Nai naja. Hacuanitjin ni ngu xuta xi hacuiin mosu hndixahan me peru Nai naja cavaxijin rë me ne, mosu hndixahan rë Jesucristu má me. ²³ Cojo chjí cavatsë nuju Nina. Vëhë xi mijí rë xi mosu hndixahan rë

xuta cuma ngayun. ²⁴ Ngayujun ni ne, ha sacuanitjin ni cún jima ngu ngayun hya xi cavaxijin nuju Nina ne, hacuanitjin ni tángun nduju cojo, xi tjin tangun cjuatacun nuju cojo Nina.

Chja Pablo tsëhë xuta xi tsajin chjuun tsajin xihin rë me

²⁵ Quihndë ne, sacuaha tsëhë xuta xi cjëë cjuaha me chjuun cjëë cjuaha me xihin ne, tsajin ngu cjua xi cavitexa ná Nai naja xi cuichjá cojo nuju. Peru cuichjá cojo nuju sacuatjin tsingátaha cacún, tsëhë xi ngatsë rë cjuandaja xi casua ná Nai naja ne, cuma cumangu tacún cojo ná. ²⁶ Xi má ná ne, ngatsë rë cjuandya xi tjin naja quihndë ne, ngu xihin ne, ndatjin xi cuejña ni cha chuva xi ha tacun cha. ²⁷ Sa xi ha tjin chjuun nuju ne, xicanismuu ná. Hane sa xi tsajin chjuun nuju ne, xicachjuun chjuun. ²⁸ Peru sa xi cuixun ne, tsajin mé jyé nuju tjin, hacuaha sa xi ngu na nixti cuixan na ne, tsajin mé jyé rë na tjin. Peru sa xi ngayun cuixun ne, hatuxa tjin nuju cjuacjintacun nchunchujun ni cahntsua ndya nuju, hane vëhë ngu cjuacjintacun xi mijí ná xi cuatjun cuma.

²⁹ Peru meje cuichjá cojo nuju ngayujun ni ta ha jemu camachúva nixtin. Vëhë xi hacuiin jercu nicjun yojo nuju tsëhë cjuandya rë nguehe ngasunhndë ta xuta xi tjin chjuun rë me ne, catisahmi cuenda me sacuaha xi tsajin chjuun rë me; ³⁰ xuta xi jihnda me ne, catisahmi cuenda me sacuaha xi hacuiin jihnda me; xuta xi jemu tjin rë me cjuasua ne, catisahmi cuenda me sacuaha xi hacuiin jemu tjin rë me cjuasua; xuta xi vatsë me ne, catisahmi cuenda me sacuaha xi hacuiin tsëhë me xi cavatsë me; ³¹ hane xuta xi jemu sahmixa cojo yëjë ni xcusun xi tjin ngasunhndë ne, hacuiin cuatjutaha sahmixa me cojo. Cuatjin meje rë xi tsingataha cacun xuta ta, tsëhë xi ngasunhndë xi chutsejen vi ne, hatuxa cjuë.

³²Ngahan ne, meje ná xi ngayun ne, tsajin nuju mé cjuandya. Xuta xi tsajin chjuun rë me ne, marcun rë me tsëhë xa rë Nai naja ta, tsëhë xi meje sahmi me hacutjin xi chuya rë Nai naja. ³³Peru xuta xi tjin chjuun rë me ne, marcun rë me tsëhë cjuandya rë ngasunhndë ta, tsëhë xi meje sahmi me hacutjin xi chuya rë chjuun rë me. ³⁴Hane xi cuatjin sahmi me ne, ma jo cjuatacun rë me. Hane ngu chjuun xi tsajin xihin rë o sa xi ngu chjuun xungun ne, marcun rë na tsëhë xa rë Nai naja, cojo sa xi cuma tsëhë Nina na cojo yojo rë na cojo hasen rë na. Peru na xi cavixan ne, marcun rë na tsëhë xa rë ngasunhndë ta, tsëhë xi meje sahmi na hacutjin xi chuya rë xihin rë na.

³⁵Cachjá cuatjin cojo nuju, peru hacuiin xi cuátécja cjuatacun nuju ta xi ndaja tsujun. Meje ná xi cuanguncujun ngu ndiya rë cjuandaja. Hacuaha meje ná xi tuhun yojo nuju ngundiyaxa ni xi nihñu xa rë Nai naja.

³⁶Peru sa xi ngu xuta tsingataha cacun me xi cuaaintjin xi sahmi me xi cjëë cuixan me cojo rë na xi tacunvasen cjuavixan rë me cojo, hane na vëhë ne, ha cavechú nixtin rë na xi cuma cuixan na, hacuaha sa xi ha tuxa meje rë xi cuixan na ne, catisahmi me mé xi meje sahmi me. Catixan me cojo rë na ta, tsajin mé jyé rë me xi cuatjin sahmi me. ³⁷Peru ngu sa xuta xi hacuiin sahmi ngujyë xi cuixan me hacuaha ma vëhëhñu me yojo rë me ne, sa xi ha cavejña cacun me xi cuixaain me ne, ndaja sahmi me xi cuixaain me. ³⁸Vëhë xi me xi vixan cojo rë na xi tacunvasen cjuavixan rë me cojo ne, ndaja sahmi me. Hane me xi vixaain me, hitsë sa ndaja sahmi me.

³⁹Ngu chjuun ne, tsajin ndaya tjin na tsëhë xihin rë na jinguyëjë rë xi tacun cha cjuahñu. Peru sa xi cueya xihin rë na ne, ha ndaya tjin na xi cuixan na cojo tu yo ni xi meje rë na, ndastu xi ladu rë Nai naja má cha. ⁴⁰Peru xi má ná ne, hitsë sa

ndaja cuma rë xahasen rë na sa xi cuejña cuanitjin ni na. Hane tsingátaha cacún xi ngahan ne, hacuaha cojo ngahan jiya Hasen rë Nina cahntsua xahasen naha.

Xichinë xi viyuju xcun nina ndyojo

8 Quihndë ne, nguehe cuichjá cojo nuju tsëhë xichinë xi viyuju xcun nina ndyojo. Ha hyan ta ngayejen ni ne, tjin cjuatacun xi hyan. Hya xi jemu cjín cjuatacun xi hyan ne, nihña yehe yojo naja suvaan, peru hya xi tjin naja cjuahmutacun ne, nihña yehe xingueen. ²Sa xi ngu xuta tsingataha cacun me xi ndaja vëë me ngu cjuatacun ne, cjëë sa cuijn-ercu me sacuatjin xi meje rë. ³Peru sa xi ngu xuta hmu cacun me Nina ne, me vëhë ne, vëë Nina me.

⁴Quihndë ne, sacuaha cjuatacun tsëhë xichinë xi viyuju xcun nina ndyojo ne, ha hyan ta tsajin camahani mé vengui chjí rë nina ndyojo jinguyëjë ni ngasunhndë, hacuaha ha hyan ta ngu tutu ni Nina xi tacun me. ⁵Handasa xi jemu tjin xi hmí rë nina, sa ngahnga sa nangui ne, hacuaha handasa jemu cjín nina xi cuacun vë hacuaha jemu cjín nai vihi nai vëhë tjin ne, ⁶peru xi cuma naja ngayaan ne, ngu tutu ni Nina xi tacun me, me xi Nahmi naja. Me vëhë xi casahmi me ngayëjë ni, hacuaha ngayaan ne, nechan nguehe ngasunhndë xi nihña tutjin xi meje rë me. Hacuaha ngu tutu ni Nai naja Jesucristu xi tacun me, me xi hacuaha cojo casahmi Nina jinguyëjë ni. Hacuaha ngayaan ne, nechan nguehe ngasunhndë ngatsë rë xi cuatjin meje rë Jesucristu.

⁷Peru hacuiin yëjë xuta vëë me cjuatacun vëhë. Yahnga xuta ne, ngatsë rë xi cuatjin xcusun rë me hatsëë ne, vutsejen me xichinë vëhë sacuaha ngu cjuatjo xi tsëhë cuaha nina ndyojo. Hane hya xi jinë me ne, jemu choho má cacun me, tsëhë xi, xi má rë me ne, jemu tsavi. ⁸Peru xcusun xi chinë ne, vise-

cuaain naja xi chuya rë Nina tsajan. Sa xi xinë ngu xcusun ne, tsajin mé nichajan, hacuaha sa xi xinë ne, tsajin mé ndaja sacú naja. ⁹Nechun cuidadu, ngayun xi vijne rcun xi tsajin mé sahmi rë xi xinë ngu xcusun xi caviyuju xcun nina ndy-
ojo. Nechun cuidadu, sá tu cuechú nix-
tin xi ngu xuta ladu rë Jesús xi cjëe
ndaja cuijnercu cjuachacun rë Nina ne,
tsismi cacun me ndiya rë Nina ngatsë
rë xcusun xi nihñu. ¹⁰Cuatjin nechun
cuidadu ta, tsëhë xi ngayun xi vijner-
cun ne, sa xi yo scuëe nuju xi tichinu
niñu yungun rë nina ndyoyo ne, me vëhë
ne, ngatsë rë xi cjëe ndaja cuijnercu cju-
atacun rë me ne, cojo me cuetju ca-
cun me sinë me xi chinu xi caviyuju
xcun nina ndyoyo. ¹¹Xi cuatjin cuma
ne, xuta ladu rë Jesús xi cjëe cuijnercu
ndaja jan ne, chajá me ngatsë rë cjuat-
acun nuju xi cuatjin nihñu, handasa Je-
sucristu cahme me ngatsë rë xuta vëhë.
¹²Vëhë xi, xi cuatjin ninguetun cjuat-
acun rë xuta xi cuacun cjëe cuijnercu
ndaja me ne, hacuiin suvá ni me xi cua-
cun vëhë xi choho nihñu cojo rë me ta
hacuaha cojo Jesucristu. ¹³Vëhë xi sa xi
xichinë sahmi xi tsismi cacun ngu xuta
ladu rë Jesús ndiya rë Nina ne, tsajin nu
tsajin nixtin xi cúa sínë sa vëhë, cojo sa
xi sahmeë xi tsismi cacun ngu xuta ladu
rë Jesús jan ndiya rë Nina.

Xcusun xi vechú chuva rë xi sahmi ngu apóstol

9 Ngahan ne, ngu apóstol ngahan,
hane vechú chuva rë xi sahme yëjë
ni xcusun xi sahmi ngu apóstol, tsëhë
xi ngahan ne, cahvë Nai naja Jesús.
Ngayun ne, camá ngayun ladu rë Nai
naja, ngatsë rë xi cjëe casahme xa rë me
ngajñi nuju. ²Handasa mijí cumacjain rë
yahnga xuta xi apóstol má ngahan ne,
peru ngayun ne, macjain nuju ta, tsëhë
xi tsejen xi apóstol ngahan ngatsë rë xi

ngayun ne, cavisuhun ladu rë Nai naja
ngatsë rë cjua xi cachjá cojo nuju.

³Cuitjin tsicúya cjua vihi tsëhë xuta
xi sahmi chuva ná me ndyá ngajñi nuju:
⁴Tjin ná chuva rë xi tuhun xi xini xi si-
hin. ⁵Tjin ná chuva rë xi chjihín chjuun
xi cuma chjuun niji, sacuatjin rë após-
tol xi yahnga cojo xicjin Nai naja cojo
Pedru. ⁶¿Há Bernabé cojo ngahan tutu
ni xi meje rë xi nihñi xa sehe sacú xi
xini xi sihin? ⁷Ngu xuta xi má me sin-
dadu ne, ¿há tujún rë suvá me tsicojo
me xi sahmi me xa vëhë? Ngu xuta xi
sahmi me xitjë ne, ¿há jinii me xitjë xi
vunihnga me jan? Ngu xuta xi sahmi
cuidadu chu tsánga ne, ¿há hviin me
lechi rë chu? ⁸Ngahan ne, hacuiin suvá
cjuatacun rë xuta xi tichjá ta ley rë
Moisés ne, hacuaha cuatjin chja. ⁹Xcun
ley rë Moisés ne, cuitjin camahindu:
“Ngu ndyaja xi visecoo nuju ne, hacuiin
nichaan xi sinë chu ta, hacuaha tjin ru
chuva rë xi sinë chu tsëhë xa xi sahmi
chu.” Cjua vëhë ne, hacuiin meje cuichja
xi vityangui cacun Nina tsëhë chu ndyaja
ta ¹⁰xi vityangui cacun me ne, tsijin
ngayin. Cjua vëhë ne, camahindu ngatsë
niji ngayin. Xuta xi vacjan me nangui
cojo xuta xi vechjunne me tutjë ne, hya
xi sahmi me xa vëhë ne, meje rë xi
cuetaha cacun me xi sacú rë me hitsë
tutjë vëhë. ¹¹Ngayin canitjin cjua rë
Nina cahntsua xahasen nuju xingu xingu
ngayun. Vëhë xi hacuiin choho tjin sa
xi tuhun niji hitsë cjuachaja niji. ¹²Sa
xi vechú chuva rë xi tuhun cjuachaja
rë jingu sa apóstol ne, ¡hitsë sa guan
ngayin!

Peru ngayin ne, cjëe camahani mé xi
chjahyin nuju. Cahndë rë vëhë ne, cacaa
niji cojo jemu cjín cjuacjintacun, cojo
sa xi hacuiin nihñi xi tjin yo xi tsitjun-
gui cjuandajyihi xi chja tsëhë Jesucristu.
¹³Ngayun ne, ha hyun ta nahmi xi sahmi
me xa cahntsua yungun xi matitjun ne,
hacuaha ngajan vaxë me cjuachaja rë

me. Cuma cuinújan ne, nahmi xi sah-mixa me cojo chu xi sua xuta cjuatjo ngajan ngasunscun ne, hacuaha ngajan faha me xi jiné me. ¹⁴ Ha chuva vèhë ni ne, cavitexa Nai naja xi me xi sua machaya rë xuta tséhë cjuandajyihi xi chja tséhë Jesús ne, ha xcun xa vèhë ne, ngajan cuaxë me cjuachaja rë me.

¹⁵ Peru ngahan ne, cjëë camahani mé xi cjuéhya rë xuta rë yungun. Hane cjua xi titsihindu nuju vi ne, hacuiin tséhë xi féhya nuju cjuachaja naha. Xi má ná ne, hitsë sa ndaja tsahan xi cueya, xi cuma rë xi chjahátahá rë cjuasua naha xi sahme xa rë Nina tu cjuatjo. ¹⁶ Xi suá machaya rë xuta cjuandajyihi xi chja tséhë Jesucristu ne, tsajin mé má vaxëndaja suva yojo naha ta, hatuxa tjin ná xi sahme cuatjin. Jemu chojyihi tsahan sa xi suaan cumachaya rë xuta cjuandajyihi vèhë. ¹⁷ Vèhë xi, sa xi ngatsë rë xi meje ná suva xi cuatjin suá machaya rë xuta cjuandajyihi vèhë ne, ha tjin chjí naha. O sa xi sahme handasa mijí ná ne, peru Nina casua ná me xa vèhë. ¹⁸ Peru ¿jarë xi chjí naha ni? Chjí naha ne, xi tu cjuatjo ni suá machaya rë xuta cjuandajyihi xi chja tséhë Jesucristu. Vèhë xi chjí naha, vèhë xi sua rë xahasen naha cjuasua. Cuma cuinújan xi handasa xi tjin ná chuva rë ne, cjëë camahani cjuéhya rë xuta rë yungun xi sua me cjuachaja naha xi sahme xa rë Nai naja.

¹⁹ Ngahan ne, ha ndaya tjin ngahan. Hacuiin mosu hndixahan rë xuta má ngahan. Peru sahme sacuaha xi mosu hndixahan rë yëjë ni xuta má ngahan, cojo sa xi cjín sa xuta cuisécoo rë me xi cuisehen me ladu rë Jesucristu. ²⁰ Hya xi tejñayajñe ngajñi rë xuta tjë rë Israel ne, sahme sacuaha sahmi xuta xi cuacun vë, cojo sa xi cjín sa xuta tjë rë Israel cuisécoo rë me xi cuisehen me ladu rë Jesucristu. Hya xi tejñayajñe ngajñi rë xuta xi tjengui me ley rë Moisés ne, sahme sacuaha sahmi xuta xi cuacun vë,

handasa hacuiin ngahma gobiernu rë ley vèhë tejña. Cuatjin sahme, cojo sa xi cjín sa xuta xi tjengui ley vë cuisécoo rë me xi cuisehen me ladu rë Jesucristu. ²¹ Hya xi tejñayajñe ngajñi rë xuta xi faharcuaain ley rë Moisés ne, sahme sacuaha sahmi xuta xi cuacun vë, handasa faharcun ngahan ley rë Nina, tséhë xi tejña ngahma gobiernu rë ley rë Jesucristu. Cuatjin sahme, cojo sa xi cjín sa xuta xi faharcuaain ley rë Moisés vë cuisécoo rë me xi cuisehen me ladu rë Jesucristu. ²² Hya xi tejñayajñe ngajñi rë xuta xi cjëë ndaja cuijnercu me cjuachacun rë Nina ne, sahme sacuaha sahmi xuta xi cuacun vë, cojo sa xi cjín sa xuta xi cjëë ndaja cuijnercu me cjuachacun rë Nina cuisécoo rë me xi ndaja cuisehen me ladu rë Jesucristu. Cuma cuinújan ne, sahme sacuaha sahmi yëjë ni xuta, cojo sa xi sacú ná chuva rë xi cuma cuáxëtjë ngujo me. ²³ Cuatjin sahme yëjë xcusun vèhë ngatsë rë cjuandajyihi xi chja tséhë Jesucristu, cojo sa xi hacuaha cojo ngahan satë ná.

²⁴ Ngayaan ne, ha hyan ta cha xi vincha carrera ne, yëjë ni cha sahmi cha ngahñu, peru ngu ni cha caa rë cha xi fehe titjun cha, hane cha vèhë xi fahatsja cha cjuatjo rë. Ha chuva vèhë ni meje rë xi ngayujun ni ne, nihñu ngahñu, cojo sa xi hacuaha sua nuju Nina ngu premiu xi cuma ngascan. ²⁵ Quihndë ne, cha xi cuatjin vincha carrera ne, hya xi vèhëchjine cha yojo rë cha ne, hatuxa jemu viyuju cha cuidadu tséhë yëjë ni xcusun xi choho sahmi cojo cha. Cuatjin sahmi cha, cojo sa xi sacú rë cha ngu premiu xi ficanii rë. Peru ngayaan xi ladu rë Jesucristu ngayaan ne, cuatjin nihña, cojo sa xi Nina ne, sua naja me ngu premiu xi tsajin nixtin vetsun. ²⁶ Vèhë xi ngahan ne, hacuiin tujyë vänga, hacuiin tujyë sahme ta ²⁷ jemu tsijénda rë yojo naha, hacuaha sahme rë ngujoyë xi sahmi hacutjin xi meje ná. Cuatjin sahme, sá tu

ha xcun xi ha casuá camachaya rë xuta cjuandajyihi xi chja tsëhë Jesucristu ne, ngahan suva tsichajá.

Mijí rë xi chjahanrcun nina ndyojo

10 Ngayujun ni ne, meje ná xi hacuiin nichayun xcusun xi cavatju xutachanga naja xi caviyuju nixtin rë Moisés. Ngayëjë ni me xi cuacun vë ne, quiji me sacuatjin quiji yuffi, hacuaha yëjë ni me cavatjucja me ndachacun Hani. ²Hane xi casahmi me cuatjin ne, cuatjin camá xi yëjë ni me cavisehen me ladu rë Moisés. ³Hacuaha yëjë ni me cajiñë me niñu xi casua Nina. ⁴Hacuaha yëjë ni me cahvi me nandá xi casua Nina. Cahvi me nandá xi cavetju rë naxi xi casua Nina xi cjue cojo rë me. Hane naxi vëhë ne, hacui Jesucristu. ⁵Peru jemu cjín xuta xi cuacun vë xi cachuyiin rë Nina tsëhë me. Vëhë xi ngajan ngu cahndë xín camahani cahme nguehe cahme ngajan me.

⁶Cuatjin camá yëjë xcusun vëhë sacuaha ngu ejemplu xi cuma naja, cojo sa xi hacuiin cumameje naja cjuatsehen, sacuatjin camameje rë me xi cuacun vëhë. ⁷Hacuaha mijí rë xi chjuhuncun nina ndyojo sacuatjin casahmi ngujo me xi cuacun vëhë. Cuitjin camahindu xcun xujun rë Nina: “Caviyuju xuta cajiñë cahvi me, sehe cavisatjenhnga me quiji casua me cjuasua xahasen rë me.” Cuatjin camahindu. ⁸Mijí rë xi nihña cjuatsehen cojo ngu chjuun o sa cojo ngu xihin sacuatjin casahmi ngujo me xi cuacun vëhë. Hane ha nixtin vëhë ni ne, cahme can jyan mil me. ⁹Hacuaha mijí rë xi chjahanchuvan Nai naja sacuatjin casahmi ngujo me xi cuacun vëhë, hane cahme me xi cafaha chu yë me. ¹⁰Hacuaha mijí rë xi choho cuisiaj-muhmu tsëhë Nina sacuatjin casahmi ngujo me xi cuacun vëhë, hane catsiquehen rë me ángel xi hatuxa tsiquehen naja.

¹¹Yëjë xcusun vëhë ne, cavatju me xi cuacun vëhë camá sacuaha ejemplu xi cuma naja. Hacuaha camahindu cjuva vëhë cojo sa xi sua naja conseju, ngayaan xi nechan quihndë xi ha meje cuijnetaha ngasunhndë. ¹²Vëhë xi xuta xi má rë me xi jemu hñu siu cjuatacun rë me xi man-gucacun me cojo Nina ne, catiyuju me cuidadu, sá tu chajá me tsëhë ndiya rë Nina. ¹³Ngayun ne, hya xi chjaháchuva nuju ne, chjaháchuva nuju sacuaha chjaháchuva rë yëjë xuta. Peru Nina ne, hatuxa cuma cumangu tacuun cojo rë me ta, tsëhë xi me vëhë ne, suaain me cahndë xi chjaháchuva nuju cojo ngu chuva rë xi scaain nuju cojo. Hya xi chjaháchuva nuju ne, me vëhë sua me chuva rë hacutjin cuetjuntjun, cojo sa xi scaa nuju hisca xi cuetjuntjun.

¹⁴Vëhë xi ngayujun ni ne, xicavisuhunjnñuu cojo xuta xi faharcun me nina ndyojo. ¹⁵Cuitjin tichjá cojo nuju, tsëhë xi jemu xuta quicun cacun ngayun. Nichuvun suvun cjua xi chjá cojo nuju. ¹⁶Ngayaan ne, hya xi hyuun xi hinchacopa rë Nai naja ne, jemu ndaja tsajan. Nihña tangun cjuatacun naja cojo Jesucristu xi ninguitsjen hacutjin cavanga jni rë me hya xi cahme me. Hane hya xi chinë pan xi chotooncjan ne, nihña tangun cjuatacun naja cojo Jesucristu xi ninguitsjen hacutjin cavatju me camá xcun cru. ¹⁷Sacuatjin rë pan xi ngu ni má handasa jemu cjín rquí xtotoho ne, hacuanitjin naja ngayaan ta tjin tangun cjuatacun naja cojo xingueen, handasa jemu cjín má ngayaan. Cuatjin ta, tsëhë ngu ni pan ne, chinë ngayejen ni hacuaha ngu ni má ngayaan.

¹⁸Ningatuhun tacún hitsë tsëhë xuta tjë rë Israel. Xuta xi vejña me chu xi cahme sacuaha cjuatjo xcun Nina ne, sahmi tangun me cjuatacun rë me cojo Nina. ¹⁹Xi chjá cuatjin ne, ¿há chjá xi nina ndyojo ne, jemu vengui chjí rë? ¿Há chjá xi yojo xi cavejña xcun nina ndyojo

ne, jemu vengui chjí rē? ²⁰ Hacuini ta, yojo xi vejña me ne, xcun xitsehen vejña me, hacuini xcun Nina. Quihndē ne, mijí ná xi ngayun ne, nihñu tangun cjuatacun nuju cojo xitsehen. ²¹ Ngayujun ni ne, cumaji siuhun xi xinha copa rē Nai naja hane hacuaha siuhun xi xinha copa rē xitsehen. Hacuaha cumaji xinu xi viyuju xcun Nina hane hacuaha xinu xi viyuju xcun xitsehen. ²² ¿Há ndatjin xi nihña xi cuma chini Nai naja? ¿Há hitsē sa hñu ngayaan xi cuma rē me? ¡Hacuini!

Hacuini yějē xcusun xi ndaja tsajan xi nihña

²³ Yahnga ngayun ne, nújun cuitjin: “Cuma nihña yějē ni xcusun.” Cuatjin nújun. Cuma, peru hacuini yějē xcusun xi ndaja tsajan. “Cuma nihña yějē ni xcusun”, peru hacuini yějē xcusun xi cuisecoo naja xi cuanguen nduju cojo cjua rē Nina. ²⁴ Mijí rē xi jima ngu ngayaan nihña ngahñu xi ndaja tsajan suvaan ta xi meje rē ne, nihña ngahñu xi ndaja tséhē xingueen.

²⁵ Xinu tu mé ni hiscan xi xteña yojo. Xicachjinengunsuun vihi véhē tséhē yojo jan ngatsē rē xi chuyiin rē cjuatacun nuju tséhē yojo xi cavejña xcun nina ndoyojo. ²⁶ Cuatjin nihñu ta, xcun xujun rē Nina ne, cuitjin camahindu: “Ngasunhndē cojo yějē ni xi tjin ngasunhndē ne, tséhē Nina.” Cuatjin camahindu.

²⁷ Sa xi ngu xuta xi manguaain cacun cojo Jesucristu cuichja me xi cuangun xinu niñu ndava me ne, tángun. Hacuaha xinu tu mé ni xcusun xi cuiyuju me xi xinu. Xicachjinengunsuun vihi véhē tséhē xi caviyuju me jan ngatsē rē xi chuyiin rē cjuatacun nuju tséhē yojo xi caviyuju xcun nina ndoyojo. ²⁸⁻²⁹ Peru sa xi yo sua cumachaya nuju xi yojo jan ne, cavejña xcun ngasuncun ne, xicachinuu yojo jan ngatsē rē me xi casua camachaya nuju hacuaha ngatsē rē xi chuyiin rē cjuatacun rē me tséhē yojo xi

viyuju xcun nina ndoyojo. Hacuini ngatsē rē xi chuyiin nuju suvun.

Peru tjin yahnga xuta xi cuma cjuinenguise me cuitjin: “¿Mé má chjaháchuva rē xcusun xi ngahan cuma sahme ngatsē rē xi chuyiin rē cjuatacun rē jingu sa xuta tséhē? ³⁰ Sa xi suá nacuechji rē Nina tséhē xcusun xi jínē ne, ¿mé má choho chja me tsahan ngatsē rē xi cuatjin jínē ni?” Cuatjin cjuinenguise me.

³¹ Véhē xi, sa xi xinu o sa xi siuhun o sa xi tu mé ni xcusun xi nihñu ne, meje rē xi nihñu yějē cojo sa xi nihñu jyē nihñu hnga Nina. ³² Mijí rē xi nicjun rē xuta, há xi xuta tjē rē Israel ne, o há xi xutaxín ne, o há xi xuta rē yungun rē Nina. ³³ Hya xi sahme tu mé ni xcusun ne, sahme ngahñu xi chuya rē yějē xuta tsahan. Sahmee ngahñu xi ndaja tsahan suva ta sahme ngahñu xi ndaja tséhē jemu cjín xuta, cojo sa xi cuetjutje me.

11 Véhē xi ngayujun ni ne, meje rē xi nihñu sacuatjin sahme ngahan, sacuaha ngahan xi sahme sacuatjin casahmi Jesucristu.

¿Há meje rē xi cuetsan rcuun hya xi chjahanrcun Nina?

² Ngayujun ni ne, ngahan ne, vaxén-daja nuju ta, tséhē xi yějē ni hora ne, vitsjen nuju ngahan, hacuaha tivan-gun nduju cojo yějē xcusun xi casuá camachaya nuju. ³ Peru meje ná xi cumachaya nuju ta me xi matitjun tséhē jima ngu xihin ne, hacui Jesucristu, hane xi matitjun tséhē ngu chjuun ne, hacui xihin rē na, hane xi matitjun tséhē Jesucristu ne, hacui Nina. ⁴ Sa xi ngu xihin titsa rcu cha hora xi sahmi cha oración rē cha o sa hora xi chja cha cjua rē Nina cojo xuta ne, jemu choho sahmi cha cojo Jesucristu, me xi matitjun tséhē cha. ⁵ Hane sa xi ngu chjuun tsajin titsa rcu na hora xi sahmi na oración rē na o sa hora xi chja na cjua rē Nina cojo xuta ne, jemu choho sahmi na cojo xi-

hin rē na, cha xi matitjun tsēhē na. Ha tangun ni sacua ha xi casejnu rē rcu na. ⁶Sa xi ngu chjuun vetsaain na rcu na ne, hacua ha catisejnu rē. Peru sa xi sava tsejen xi xtisun rē tsjarcu na o sejnu rē ne, catetsa na rcu na. ⁷Xuta xi xihin ne, mijí rē xi titsa rcu me ta, me vēhē ne, matitjun me sacuatjin matitjun Nina hacua ha tsingacun me hacutjin jyē hnga Nina cojo Hasen rē me. Peru yachjin ne, tsingacun na hacutjin yehe hnga xuta xi xihin cojo cjuatacun rē me. ⁸Cuatjin ta hya xi casahmi Nina xuta ne, titjun casahmi me ngu xihin, sehe cafaha me ngu rquí ninda rē xihin jan casahmi me ngu chjuun. ⁹Hacuaha xuta xi xihin ne, hacuiin catsindaja Nina me ngatsē rē yachjin ta yachjin ne, catsindaja Nina ngatsē rē xuta xi xihin. ¹⁰Vēhē xi ngatsē rē xi tivutsejen ángel ne, yachjin ne, meje rē xi cuetsa na rcu na, cojo sa xi tsingacun na xi ngahma gobiernu rē xihin ran siu na. ¹¹Ngayejen ni ngayaan xuta ladu rē Jesucristu ne, hacuiin suvá ni chjuun o sa xi suvá ni xihin xi vengui chjí rē me ta catsijo xcusun ni ngayaan vengui chjí naja. ¹²Quixi xi cafaha Nina ngu rquí ninda rē xihin xi casahmi me chjuun xi tjun tjun casahmi me. Peru quihndē ne, ngayaan xihin ne, hacua ha tsin ngayaan tsēhē yachjin. Peru Nina casahmi me ngayējē ngarca.

¹³Ngayujun ni ne, ha hyun ta ngu chjuun ne, ndajin tjin xi cuetsaain na rcu na hya xi sahmi na oración rē na cojo Nina. ¹⁴Suvá tsejen xi jemu cjuasava xi cuma rē ngu xihin sa xi nduju tsjarcu cha. ¹⁵Peru yachjin ne, ndaja tsejen na xi nduju tsjarcu na ta, tsēhē xi Nina casua me xi cuetsa rē rcu na. ¹⁶Peru sa xi yo meje cuichja xi ndajin tjin xcusun vēhē ne, catamachaya rē ta ngayin cojo ngayujun ni xuta rē yungun ne, ha vēhē ni xcusun naja.

Cuaain tjin xi má hya xi má suhi rē Comida tsēhē Nai naja ngajan Corinto

¹⁷Nguehe tsihindu nuju ngujo cjua. Vaxeenndajan nuju ta, tsēhē xi hya xi matangun ngayun xi chjuhuncun Nina ne, cahndē rē xi ndaja cuetjucaa tsujun ne, tu chohotjin vetju. ¹⁸Xi tjutjun ne, fehe cjua tsahan xi hya xi cuatjin matangun ngayun ne, hacuiin ngu tangun ni má cjuatacun nuju. Hane ngahan ne, macjain ná hitsē. ¹⁹Xi má nuju ne, jhatuxa meje rē xi cuatjin cuma, cojo sa xi cuma tsejen yo xi tsēhē jain Nina! ²⁰Hya xi matangun ngayun ne, hacuiin comida rē Nai naja xi chinu ta, ²¹hora xi chinu niñu ne, jima ngu ngayun vangun titjun chjuhun comida nuju suvun xinu. Hane ngujo ngayun ne, hisca vojo sa nuju. Hane ngujo nga ngayun ne, hisca camachuhun. ²²¡Sacua ha tsajin ndya nuju xinu siuhun! O sa tsajin ne, sacua ha xi nihñuchuvun xuta ladu rē Nina hacua ha chandunsavun xuma me xi tsajin rē. ¿Mé cuichjá cojo nuju ni? ¿Há cuáxēndaja nuju? ¡Xi cuatjin nihñu ne, cumaji!

Comida tsēhē Nai naja

²³Cjua xi casuá camachaya nuju ne, hacui cjua xi cafahántsa tsēhē Nai naja xi chja cuitjin: Nguixun xi camá entregadu Nai naja Jesús ne, tacun me cojo tejó xuta ladu rē me xi sinē nguixun me tsēhē suhi Pascua. Hane hora vēhē ne, cafaha me ngu pan. ²⁴Hane xi cafē casua me nacuechji rē Nina ne, cavotohocja me pan jan, sehe cachja me cuitjin: “Vihi ne, yojo naha xi cueya ngatsē nuju. Cuitjin nihñu xcusun vihi yasen ni, cojo sa xi ninguitsjun ná.” Cuatjin cachja Jesús. ²⁵Hane xi cajnetaha cajinē nguixun me ne, hacuanitjin ni cafaha me copa, sehe cachja me cuitjin: “Xan vihi ne, vihi jni naha xi sahmicihin rē compromisu xatsē xi tisahmi Nina cojo xuta. Cuitjin

nihñu xcusun vihi jima ngu ndiya xi siuhun cuitjin, cojo sa xi ninguitsjun ná.” Cuatjin cachja me. ²⁶Vêhê xi jima ngu ndiya xi tichinu pan vêhê hacuaha tji-hyún xi hinchu copa vêhê ne, tininguitsjun tsêhê cjuaveya rê Nai naja. Hane cuanitjin cjin ni cumá hisca hya xi cuin-duva nga me.

Hacutjin meje rê xi xinêe xi hmi rê Comida tsêhê Nai naja

²⁷Ngajan xi tu yo ni xi tujyê jinê pan vêhê o sa xi hvi xan vêhê xcun Comida tsêhê Nai naja ne, quitjen jyê xi tsix-cuehyu yojo rê Nai naja, quitjen jyê xi tsixcuehyu jni rê me. ²⁸Vêhê xi meje rê xi jima ngu ngayaan ne, nichuvan suvaan cjuatacun naja, sehe xinê pan jan hacuaha siuhun xan jan ta, ²⁹tsêhê xi yo xi tsinguitsjin yojo rê Nai naja hora xi sinê cuihi xcusun vêhê ne, sacú rê ngu castigu xi cuatjin tujyê jinê hvi. ³⁰Vêhê xi jemu cjin xuta tsêhê ngajni nuju ne, ndaya tjin cacun me hacuaha hmu rê me; yahnga nga me ne, hisca cahme me. ³¹Peru sa xi ngayaan ndaja nichuvan suvaan cjuatacun naja ne, Nai naja ne, hacuaha sahmi naja me castigu. ³²Peru sa xi Nai naja sahmi naja me castigu ne, cuatjin sahmi me cojo sa xi cueyaquixi naja me ndiya hane hacuiin tangun cuma ngayaan castigu cojo xuta tsehen.

³³Vêhê xi ngayujun ni ne, hya xi cumatangun ngayun xi xinu niñu ne, tinechunyun xingun xingu xingu ngayun. ³⁴Sa xi tjin yahnga ngayun xi jemu vojo nuju ne, cojo tjun ni xinu ngajan ndya nuju, cojo sa xi hacuiin sahmi nuju Nina castigu xi cuatjin vinechunyuun xingun. Quihndê ne, sacuahac cjuacjintacun xi yahnga ne, hya xi cuinduvatjêngê nuju ne, hya sahmechehen.

Cjuatjo xi sua Nina ngayaan

12 Ngayujun ni ne, meje ná xi cui-jnercun sacuahac tsêhê cjuatjo xi cuacun sua naja Nina.

²Ngayun ne, ndaja hyun xi hya xi cjêê cuisuhun ladu rê Nina ne, tujyê caningatuhun cachjuhunrcun nina ndyojo xi hatuxa tsajin cjuahñu rê. ³Vêhê xi meje ná xi cuijnercun xi ngu xuta xi tichja me ngu cjua xi casua Hasen rê Nina me ne, hatuxa cuichjaain me cjua vihi: “¡Jesús ne, catji me cojo xitsehen!” Hacuahac suvá ni xuta xi jiya Hasen rê Nina cahntsua cjuatacun rê me xi cuma cuichja me cjua vihi: “¡Jesús ne, Nai naha me!”

⁴Quihndê ne, jemu cjin xcusun cjuatjo xi tjin, peru suvá ni Hasen rê Nina xi sua naja yêê cjuatjo vêhê. ⁵Hacuahac jemu cjin xcusun xa rê Nina xi tjin, peru suvá ni Nai naja xi suaxa naja me. ⁶Hacuahac hacuiin ngu chihin xcusun xa xi Nina sahmi me xcun cjuahñu naja, peru ngu ni Nina sahmi me vêhê ngajni jima ngu jima ngu ngayaan. ⁷Nina sahmi me xi ma tsejen xi jiya Hasen rê me cahntsua xahasen naja xingu xingu ngayaan, cojo sa xi ndaja tsajan ngajni naja ngayejen ni. ⁸Ngu xuta ne, jemu vechú cjuatacun rê me hya xi chja me ngu cjua xi sua Hasen rê Nina me. Hane ngu nga xuta ne, jemu ndaja vijnercu me hya xi chja me ngu cjua xi sua Hasen rê Nina me. ⁹Hane ngu nga xuta ne, ha Hasen vêhê ni ne, sahmi xi ndaja mangucacun me cojo Nina. Hane ngu nga xuta ne, ha Hasen vêhê ni sahmi xi ma sahmi me xi mandaja xuta hmu rê. ¹⁰Hane ngu nga xuta ne, fahatsja me cjuatacun xi sahmi me cjuarcun, hane ngu nga xuta ne, fahatsja me cjuatacun xi cuichja me ngu cjua xi sua Nina me. Ngu nga me ne, fahatsja me cjuatacun xi cuijnercu me mé xcusun hasen catsingatju ngu cjuatacun xi cafahatsja ngu xuta, ¿há hasen

ndaja?, o ¿há hasen tsehen? Ngu nga xuta ne, fahatsja me cjuatacun xi cuichja me ngujo xcusun hne xi hvíin me. Hane ngu nga me ne, fahatsja me cjuatacun xi sua me machaya naja mé vijne xi cuacun vèhë. ¹¹ Ngu tu tu ni Hasen rë Nina xi sahmi yëjë cjuandaja vèhë, hacuaha hacui ni Hasen rë Nina xi sua naja jima ngu ngayaan hacutjin xi chuya rë.

Sacuaha ngu ni yojo má ngayejen ni

¹² Ha hyan ta yojo rë ngu xuta ne, tjin tsja, tjin ntsacu, tjin nguisin, tjin jingusa cahndé tsèhë. Peru yëjë ni cahndé vèhë ne, má ngu ni yojo rë xuta. Hacuaha cuanitjin rë Jesucristu.

¹³ Hacuaha cuanitjin naja ngayaan ta ngayejen ni ne, hya xi caxtenda ngayaan, handasa xuta ladu rë Nina o sa xutaxín, handasa mosu hndixahan o sa xuta xi ndaya tjin má ngayaan ne, peru camá ngayaan sacuaha ngu ni yojo ngatsë rë ngu tu tu ni Hasen rë Nina. Hacuaha ngayejen ni ne, ngu tu tu ni Hasen rë Nina xi cavisehen cahntsua xahasen naja.

¹⁴ Cuatjin ta yojo rë ngu xuta ne, hacuiin ngu cahndé ni tjin rë ta jemu cjín cahndé tjin rë. ¹⁵ Ntsacun ne, cuma cuichja cuitjin: “Ngatsë rë xi hacuiin ntsun má ngahan ne, vèhë xi hacuiin tsèhë yojo nuju má ngahan.” Cuatjin cuichja. Peru handasa cuatjin cuichja ne, hacuiin vèhë sahmi xi hacuiin tsèhë yojo naja má. ¹⁶ Hacuaha tyjavañujú nga ne, cuma cuichja cuitjin: “Ngatsë rë xi hacuiin túxcun má ngahan ne, vèhë xi hacuiin tsèhë yojo nuju má ngahan.” Cuatjin cuichja. Peru handasa cuatjin cuichja ne, hacuiin vèhë sahmi xi hacuiin tsèhë yojo naja má. ¹⁷ Sa xi suvá tuxcun má yëjë yojo naja ne, ¿hacutjin cuinuhyan? O sa xi suvá tyjavañujú má yëjë yojo naja ne, ¿hacutjin cuijnë naja?

¹⁸ Peru Nina ne, caviyujutahá me jima ngu cahndé tsèhë yojo naja tucutjin ni xi

cachuya rë me. ¹⁹ Sa xi yëjë ni yojo naja má ngu ni ntsan o sa xi ngu ni tuxcun ne, vèhë ne, hisca hacuiin yojo naja hmí rë. ²⁰ Cuatjin xi jemu cjín cahndé xi cuacun vèhë xi má ngu ni yojo naja.

²¹ Quihndé ne, tuxcun ne, cumaji cuichja xi mamijí rë ntsan, o sa rcuun ne, cumaji cuichja xi mamijí rë ntsacun ta, ²² xi cjuaquixi ne, cahndé tsèhë yojo naja xi má naja xi hitsë sa tsavi ne, vèhë cahndé xi hitsë sa mameje. ²³ Hane cahndé tsèhë yojo naja xi hitsë sa chjaharcuaain rë ne, vèhë cahndé xi hitsë sa ndaja nicaja rë. Hane cahndé tsèhë yojo naja xi má naja xi mijí rë xi ningacun rë ne, vèhë cahndé xi hitsë sa ndaja cuidadu má. ²⁴ Peru hacuiin sahmi ngu-jyë nihña cuatjin cojo cahndé tsèhë yojo naja xi ma ningacun rë. Nina ne, hya xi catsindaja me yojo naja ne, casahmi me xi hitsë sa chjahárcun rë cahndé xi hitsë sa tsavi. ²⁵ Cuatjin casahmi Nina yojo naja, cojo sa xi ngu chihin ni sahmi yëjë yojo naja, hacuaha yëjë ni cahndé tsèhë yojo naja ne, ngu tangun ni marcun rë tsèhë xicjin. ²⁶ Hane sa xi ngu cahndé tsèhë yojo naja choho vatju má ne, hacuaha cojo sa yëjë cahndé tsèhë yojo naja choho má rë. O sa xi ngu cahndé tsèhë yojo naja vaxëndaja xuta ne, hacuaha cojo yëjë sa cahndé tsèhë yojo naja ndamá rë.

²⁷ Quihndé ne, ngayejen ni xuta ladu rë Nina ne, sacuaha yojo rë Jesucristu má ngayaan, hane jima ngu ngayaan ne, má ngayaan sacuaha ngu cahndé tsèhë yojo rë me. ²⁸ Hane ngajñi naja ngayaan xuta ladu rë Nina ne, tjuntjun ne, caviyuju me apóstol; xi ma jo ne, caviyuju me profeta; xi ma jyan ne, caviyuju me xuta xi vicuya cjuar rë me; hane xi cjuí sa ne, caviyuju me xuta xi ma sahmi cjuarcun, cojo xuta xi ma sahmi xi mandaja xuta hmu rë, xuta xi visecoo me jingu sa xuta, xuta xi vitexa naja, xuta xi ma chja me ngu hne xi hvíin

me mé vijne. ²⁹Tséhë cjuatjo vihi ne, hacuiin yějë vihi satë naja jimangu yaan ta, ¿há ngayejen ni má ngayaan apóstol ni? ¿Há ngayejen ni má ngayaan profeta ni? ¿Há ngayejen ni vicuyan cjuarë Nina ni? ¿Há ngayejen ni ma nihña cjuarcun ni? ³⁰¿Há ngayejen ni ma nihña xi mandaja xuta hmu rë ni? ¿Há ngayejen ni ma nújan hne xi hisca núhyaan mé vijne ni? ¿Há ngayejen ni ma tahan machaya rë xuta mé vijne hne vëhë ni? ³¹Vëhë xi meje rë xi ngayun ne, catamameje nuju cjuatjo rë Nina xi hitsë sa vengui chji rë.

Quihndë ne, tsingácun nuju ngu ndiya xi hitsë sa jercu ndaja.

Mé vijne xi tjin naja cjuahmutacun

13 Ngahan ne, sa xi cuichjá yějë hne rë xuta hacuaha cuichjá hne rë ángel, peru tsajin ná cjuahmutacun ne, tangun ngahan cojo ngu quicha xi choho fane o sa ngu quicha xi hmí platillu xi jercu fane camahani. ²Sa xi cuichjá ngu cjuarë Nina, sa xi vijnercú yějë cjuarë Nina xi tjihma, sa xi hvë yějë cjuatacun, hacuaha sa xi ma tsiniya ngu naxi ngatsë rë xi jercu ndaja mangu-cacún cojo Nina, peru tsajin ná cjuahmutacun ne, tsajin mé vengui chjí naha. ³Sa xi suá rë xuta yuma yějë xi tjin ná, hacuaha hisca suá yojo naha xi cueti, peru tsajin ná cjuahmutacun ne, tsajin mé machjirëhë ná xi cuatjin sahme.

⁴Hya xi tjin naja cjuahmutacun ne, hacuaha jyë tacun, ndaja ngayaan, hacuiin chini ngayaan, hacuiin xta ngayaan, hacuiin nihña yehe suvaan yojo naja, ⁵hacuiin xcuahya ngayaan, hacuiin meje naja xi suvaan ni ndaja tsajan, hacuiin ma cjan naja, hacuiin veyantacun cjuatsehen xi sahmi xuta cojo naja. ⁶Xi tjin naja cjuahmutacun ne, tsajin mé ndama naja tséhë cjuatsehen ta xi ndama naja ne, tséhë cjuaquixi. ⁷Xi tjin naja cjuahmutacun ne, ngajñi rë tu mé ni cjuacjintacun ne, hatuxa jyë tacuun,

hatuxa mangu tacuun, hatuxa vetahan tacun, hatuxa caa naja.

⁸Cjuahmutacun ne, tsajin nixtin xi cjuë. Peru cuechú nixtin xi ha quihndë suaain sa Nina cjuarë xi cuichja profeta, ha quihndë cuichjaain sa xuta hne xi vijñi rcu me, hacuaha ha quihndë suaain sa Nina cjuatacun xi ndaja cuijnercu ngu xuta cjuarë me. ⁹Cuatjin cuma ta cjuarë Nina ne, sehe hitsë xi vijnercuun, hacuaha sehe hitsë cjuarë Nina xi chja profeta. ¹⁰Peru hya xi cjuehe me xi vëë chichihin yějë cjuarë Nina ne, hya cjuë xi tsë tsë ni hyan.

¹¹Hya xi lihndi ngahan ne, cavisiajme sacuaha visiajmi langa, catsingátaha cacún sacuaha tsingataha cacun langa, hacuaha cjuatacun naha ne, sacuaha cjuatacun rë langa. Peru xi camachangá ngahan ne, cavejñáxen xcusun rë langa. ¹²Quihndë ne, sehe hitsë vijnercuun cjuarë Nina sacuaha tsejen naja hya xi chutsejenyan ni ngu speju xi hacuiin ndaja tsejen. Peru cuechú nixtin xi chutsejen xcun cojo xcun. Quihndë ne, sehe hitsë xi vijnercú. Peru cuechú nixtin xi chichihin ni cuijnercú, sacuatjin vëë ndaja ná Nina. ¹³Quihndë ne, tjin jyan xcusun xi nihña xi tsajin nixtin xi cjuë. Tjun ne, xi mangu tacuun cojo Nina. Xi má jo ne, xi vetahan tacun Nina. Xi má jyan ne, xi tjin naja cjuahmutacun. Peru xi hitsë sa matitjun ngajñi rë xi catsijyan vëhë ne, xi tjin naja cjuahmutacun.

Hne xi hyaan mé vijne

14 Quihndë ne, nihñu ngahñu xi tjin nuju cjuahmutacun. Hacuaha catamameje nuju xi sua nuju Nina cjuatjo rë me. Peru hitsë sa chjahyun rë me cjuatacun xi cuinújun cojo xuta ngu cjuarë xi sua nuju me ta, ²xuta xi chja me ngu hne xi hvíin me mé vijne ne, hacuiin chja me cojo xuta ta suvá ni Nina chja me cojo ta, tséhë xi tsajin yo vijnercu. Hasen rë me sahmi xi chja me cjuarë xi tsajin yo vëë.

³Peru me xi chja cjua xi casua Nina me ne, chja me cojo xuta, cojo sa xi cuisecoo me xuta hacuaha sua rë me cjuetacun. ⁴Xuta xi chja me ngu hne xi hvíin me mé vijne ne, visecoo súvá rë me yojo rë me. Peru xuta xi chja me ngu cjua xi casua Nina me ne, visecoo rë yëjë xuta rë yungun.

⁵Ngayujun ni ne, meje ná xi cuma cuinújun hne xi vijniircun, peru hitsë sa meje ná xi chjuhunnstun cjuatacun xi cuinújun cojo xuta ngu cjua xi sua nuju Nina ta xuta xi chja me cojo xuta ngu cjua xi sua Nina me ne, hitsë sa matitjun me xi cuma rë me xi chja hne xi vijniircuun. Peru sa xi cuma cuichja me cojo naja mé vijne hne vëhë ne, ndatjin ta cuisecoo naja ngayejen ni xuta rë yungun xi cuatjin sahmi me. ⁶Vëhë xi hya xi cjuétjengë nuju ne, venguiin chjí rë xi cuichjá cojo nuju ngu hne xi vijniircun. Xi vengui chjí rë ne, hacui xi suá cumachaya nuju ngu cjua xi casua ná Nina, o sa xi cuichjá cojo nuju ngu cjuatacun xi sua Nina, o sa xi cuicuyá nuju ngu cjua rë Nina o ngu cjuachacun.

⁷Cuma cuinújan ne, sa xi ngu tyjo o sa ngu arpa hacuiin ndaja fane ne, hisca hyaan mé pieza fane. ⁸Hacuaha sa xi ngu tyjo rë sindadu hacuiin ndaja sua xta rë ne, tsajin yo cuëhëchjine rë xi cjue xcun si. ⁹Hacuanitjin nuju ngayun ta sa xi cojo ntsuvun nújun ngu cjua xi nuhyaain rë ne, tsajin yo xi cuijnercu cjua vëhë ta sacuaha xi ngajñi tjo ni nújun. ¹⁰Nguehe ngasunhndë ne, hisca hyaan há cjin xcusun hne tjin, hane yëjë ni ne, tjin mé vijne. ¹¹Peru sa xi vi-hndeen ngu hne ne, sacuaha ngu xuta ngu nangui ngahan xi cuma rë xuta xi tichja cojo ná jan, hacuaha me vëhë ne, sacuaha xuta ngu nangui me xi cuma ná ngahan. ¹²Vëhë xi quihndë ta ngayujun ni jemu meje nuju cjuatjo rë Nina ne, ni-hñu ngahñu xi sacú nuju ngu cjuatjo xi visecoo rë yëjë sa xuta rë yungun.

¹³Vëhë xi xuta xi chja me ngu hne xi hvíin me mé vijne ne, catjehya rë me Nina cojo sa xi cuma suacuenda me mé vijne. ¹⁴Sa xi sahme oración naha cojo ngu hne xi vijniircú ne, hasen naha ne, sahmixa, peru cjuatacun naha ne, sahmixaain. ¹⁵¿Hacutjin sahme ni? Sahme oración naha cojo hasen naha, hacuaha sahme oración naha cojo cjuatacun naha. Sé cojo hasen naha, hacuaha sé cojo cjuatacun naha. ¹⁶Sa xi ngayun nihñuu cuatjin ne, hya xi tuhun nacuechji rë Nina cojo hasen nuju ne, cumaji cuichja xuta xi yahnga sa: “Cuatjin jain” ta, tsëhë xi cjua xi nújun ne, vijniircu me. ¹⁷Handasa jemu ndaja tuhun nacuechji rë Nina, peru xuta xi yahnga ne, visecuaain camahani rë me. ¹⁸Súa nacuechji rë Nina ta hitsë sa chjá ngahan hne xi vijniircú xi cuma nuju ngayujun ni. ¹⁹Peru hya xi ma tangun ngahan cojo xuta ngajan yungun ne, hitsë sa chuya ná xi cuichjá ndastu hñú cjua cojo cjuatacun naha cojo sa xi cuicuyá rë xuta, xi cuma rë xi cuichjá të mil cjua cojo ngu hne xi vijniircu me.

²⁰Ngayujun ni ne, ha quihndë xicaningatuun tacún sa sacuatjin tsingataha cacun quihndi. Sacuatjin rë ngu quihndi xi hisca hvíin mé xi hmí rë cjuatsehen ne, cuatjin meje rë xi hacuaha hyuun. Peru xi cojo cjuatacun nuju ne, meje rë xi ningatuhun tacún sacuaha tsingataha cacun ngu xuta changá. ²¹Xcun xujun rë Nina ne, camahindu cjua xi cachja me cuitjin: “Ngahan ne, tsingátju xuta ngu nangui xi chja jingu sa hne, hane hne rë me cuichja me cjua naha cojo yëjë xuta ladu naha. Peru handasa cuatjin sahme ne, cuetaharcuaain me cjua naha, chja Nina.” Cuatjin camahindu. ²²Vëhë xi cjuatjo xi casua naja Nina xi ma nújan hne xi hisca hyaan mé vijne ne, hacuiin ngatsë rë xuta xi ha mangu cacun cojo Nina xi casua me ta ngatsë rë xuta xi tsitjungui cjua

rë me. Hane cjuatjo xi ma nújan ngu cjuaxi sua naja Nina ne, hacuiin ngatsë rë xuta xi tsitjungui cjuaxi rë me xi casua me ta ngatsë rë xuta xi ha mangu cacun me cojo rë me. ²³ Vëhë xi hya xi matangun ngayujun ni ngayun xuta rë yungun, sa xi ngayujun ni nújun ngu hne xi hisca hyuun mé vijne hane cjujehe ngujo cha xi hvíin cjuaxi rë Nina hacuaha hisca manguaain cacun cha cojo me ne, ¿hácuiin tsingataha cacun cha xi sca nuju ni? ²⁴ Peru sa xi ngayujun ni ngayun nújun ngu cjuaxi sua nuju Nina hane cjujehe ngu cha xi manguaain cacun cojo Nina hacuaha hisca hvíin cha cjuaxi rë me ne, xi vihndë cha yëjë cjuaxi vëhë ne, cuijn-ercu cha xi jemu tjín jyë rë cha, suvá ni cha tsichuva cha cjuatacun rë cha, ²⁵ hacuaha cjuaxi hinchahma ngajñi rë cjuatacun rë cha ne, cuitsjen rë cha. Ngajan xi cjue cuiticjxcun cha, cjuaharcun cha Nina. Hacuaha tsinguixi cha xi tacun jain Nina nguehe ngajñi nuju.

Meje rë xi ndandaja nihña yëjë ni

²⁶ Ngayujun ni ne, cuitjin vijne cjuaxi titsihíndu nuju. Hya xi matangun ngayujun ni ne, ngu ngayun ne, sun tsëhë Nina, ngu nga ngayun ne, vicuyun ngu cjuaxi rë Nina, ngu nga ngayun ne, nújun ngu cjuaxi casua nuju Nina, ngu nga ngayun ne, nújun ngu hne xi hisca hyuun mé vijne, hane ngu nga ngayun ne, nújun mé vijne cjuaxi rë hne jan. Xi meje rë ne, yëjë ni xcusun xi nihñu vë ne, cuatjin nihñu cojo sa xi cuisecun xingun ngajñi nuju. ²⁷ Sa xi tjín xuta xi cuichja me hne xi vijniircun ne, catichja jo o sa xi jyan ni me, hacuaha chuva ngu me catichja me. Hane meje rë xi cuinújun ngu ngayun mé vijne cjuaxi cachja xuta xi cuacun jan. ²⁸ Peru sa xi tsajin ngu ngayun xi cuma nihñu cuatjin ngajan yungun ne, catiyujujuu ni xuta xi cuacun vë. Catichja suvá ni me cahntsua xahasen rë me, o

sa suvá ni Nina catichja me cojo me. ²⁹ Hacuanitjin ni sa xi tjín xuta xi cjuahahtsja me ngu cjuaxi tsëhë Nina ne, jo jyan ni me catichja me, hane yëjë sa ngayun ne, nichuvun cjuaxi vëhë. ³⁰ Sa xi ngu ngayun xi nechun ndyá chjuhun-ntsun ngu cjuaxi tsëhë Nina ne, catisejyu me xi titjun tichja jan. ³¹ Xi cuatjin ne, ngayujun ni cuma cuinújun chuva ngu chuva ngu ngayun ngu cjuaxi chjuhun-ntsun tsëhë Nina, cojo sa xi hacuaha cojo yëjë sa ngayun ne, cumachaya nuju hacuaha sacú nuju cjuetacun. ³² Xuta xi chja me ngu cjuaxi fahatsja me tsëhë Nina ne, cjuaxi vëhë cuitexa me cjuatacun rë suvá me ta, ³³ tsëhë xi Nina ne, chuyiin rë me xi tujyë nihña ta xi chuya rë me ne, ngu cjuandaja cjuajeya.

Sacuatjin xcusun xi nihña ngayejen ni xuta ladu rë Nina ne, ³⁴ yachjin ne, mijí rë xi cojo na cuichja na hya xi tjín tangun ngayaan yungun ta, tsëhë xi tsajin cahndé xi cuichja na. Xi meje rë ne, catiyuju na ngahma gobiernu rë xihin rë na, sacuatjin vitexa ley rë Nina. ³⁵ Sa xi tjín ngu cjuaxi meje cumachaya rë na ne, ndava na catinenguise na xihin rë suvá na ta, tsëhë xi jemu cjuasava xi ngu chjuun cuichja na hya xi tjín tangun ngayaan ngajan yungun.

³⁶ ¿Há tjutjun ngayun canújun cjuaxi rë Nina cojo xuta? ¿Há suvun ni catsingatju nuju Nina cjuaxi vëhë ni? ³⁷ Sa xi tjín ngu xuta xi má rë me xi profeta me o sa quitsë rë xahasen rë me cojo Hasen rë Nina ne, catijnercu me ta cjuaxi titsihíndu nuju vi ne, Nai naja vitexa me. ³⁸ Peru sa xi mijí sahmicuenda me cjuaxi naha ne, hacuaha xicanihñucuenduun cjuaxi rë me.

³⁹ Vëhë xi ngayujun ni ne, catamameje nuju xi cuma ngayun profeta, hacuaha xicanichuun rë xuta cahndé xi cuichja me hne xi vijniircu me. ⁴⁰ Xi meje rë ne, yëjë ni xcusun xi nihñu ne, ndandaja nihñu hacuaha chichihin ni nihñu yëjë.

Cjuandajyihi xi chja tsêhê xi cavuya Jesucristu cjuahñu

15 Ngayujun ni ne, meje tsinguit-sjen nuju tsêhê cjuandajyihi xi casuá camachaya nuju, cjuandajyihi xi chja tsêhê Jesucristu. Cachjuhunntsun cjuandajyihi vêhê, hacuaha ndaja sa tijimangu tacún cojo. ²Hane ngatsê rê cjuandajyihi vêhê ne, tivetjuntjun tsêhê jyê nuju, sa xi nismutacuun cjuandajyihi vêhê. Cuatjin tivetjuntjun sa xi hacuiin tu mahya camangu tacún cojo.

³Ngahan ne, casuá camachaya nuju cjua xi matitjun xi cafahántsa. Cachjá ta Jesucristu ne, cahme me cojo sa xi tsicjê me jyê naja, sacuatjin camahindu xcun xujun rê Nina. ⁴Hacuaha cachjá cojo nuju ta caseyaniji me hane xi ma jyan nixtin ne, cavuya nga me cjuahñu, sacuatjin camahindu xcun xujun rê Nina. ⁵Hacuaha cachjá cojo nuju ta cavêê Pedru Jesucristu, sehe cavêê yêjê tejó apóstol jan me. ⁶Sehe ngu tangun ni cavêê nga vatju sa hñú cientu xuta ladu rê me me. Hane handasa cahme yahnga me ne, peru jemu cjín me xi siu quicun sa hisca quihndê. ⁷Sehe cavêê Jacobo me, sehe cavêê nga yêjê apóstol me.

⁸Hane xi camá ngascan xi cavuya cjuahñu rê me ne, ngahan cahvê me. Ngahan xi sacuaha ngu quihndi xi cavatjutaha tsêhê nixtin rê, sehe catsin. ⁹Cuatjin chjá ta, tsêhê xi ngahan ne, hitsê sa chúva vengui chji naha xi cuma rê apóstol xi yahnga. Ngahan ne, hisca vechiin chuva rê xi apóstol cuichja xuta tsahan ta, tsêhê xi jemu jyê cjuañihi casuá rê xuta ladu rê Nina titjun. ¹⁰Peru ngatsê rê cjuandaja rê Nina ne, ngahan ne, apóstol má ngahan. Hane cjuandaja xi casahmi me cojo ná ne, hacuiin tu mahya ta hitsê sa hñu casahme xa xi cuma rê yêjê sa apóstol. Peru hacuiin suva casahme ta cjuandaja rê Nina cavisecoo ná. ¹¹Quihndê ne, cuen-

daain rê ¿há ngahan? o ¿há me vêhê ne?, peru cjuandajyihi vêhê xi catihin camachaya nuju, hacuaha cjua vêhê xi camangu tacún cojo.

Cjuandajyihi xi chja tsêhê xi cuya nima cjuahñu

¹²Quihndê ne, quihndê ta tihin machaya rê xuta xi Jesucristu ne, cahme me sehe cavuya nga me cjuahñu ne, ¿hacutjin má xi nújun yahnga ngayun xi nima ne, vuyaaín nga cjuahñu ni? ¹³Sa xi vuyaaín nima cjuahñu ne, ngajan xi Jesucristu ne, hacuaha cavuyaaín nga me cjuahñu. ¹⁴Hane sa xi cavuyaaín Jesucristu cjuahñu ne, ngajan xi tu mahya xi cuatjin tihin machaya rê xuta, hacuaha ngayun ne, tu mahya xi cuatjin mangu tacún. ¹⁵Sa xi cuatjin ne, ngajan xi hacuiin cuatjin cjua xi nújin tsêhê Nina ta, tsêhê xi nújin xi Nina ne, catsicuya me Jesucristu cjuahñu. Peru quixiin xi catsicuya Nina Jesucristu cjuahñu sa xi hatuxa vuyaaín nima cjuahñu. ¹⁶Sa xi hatuxa tsicuyaaín Nina nima cjuahñu ne, ngajan xi hacuaha catsicuyaaín me Jesucristu cjuahñu. ¹⁷Hane sa xi catsicuyaaín me Jesucristu cjuahñu ne, ngajan xi tsajin mé vengui chji rê xi cuatjin mangu tacún cojo rê me, hacuaha cjêê camahani cjuê jyê nuju. ¹⁸Hacuaha nima xi camangu cacun cojo Jesucristu ne, hacuaha cachjá me. ¹⁹Sa xi suvá ni quihndê xi nechan cjuahñu machjirêhê xi cuitjin vetahan tacun Jesucristu ne, hitsê sa jemu chojyihi tsajan xi cuma rê yêjê sa xuta.

²⁰Peru xi cjuaquixi ne, Jesucristu ne, Nina catsicuya rê me cjuahñu. Tsêhê yêjê nima xi cahme ne, me vêhê tjutjun me cavuya me cjuahñu. ²¹Sacuatjin xi ngatsê rê ngu xihin cavisehen cjuaveya ngasunhndê ne, hacuanitjin ni ngatsê rê ngu xihin ne, cavisehen cjuatacun xi nima ne, cuya cjuahñu. ²²Ngatsê rê xi

tjê rê Adán má xuta ne, vêhê xi yêjê ni me ne, hme me. Hacuanitjin ni ngatsê rê xi sahmitangun xuta cjuatacun rê me cojo Jesucristu ne, vêhê xi yêjê ni me xi cuacun vê sacú rê me cjuahñu xatsê. ²³ Peru cuatjin sacú rê jima ngu me hacutjin xi satê rê me: tjutjun ne, Jesucristu; ngaxtun vêhê ne, hya xi cuya nga Jesucristu ne, xuta xi ladu rê me ne, tsicuya me cjuahñu, sacú rê me cjuahñu xatsê. ²⁴ Ngaxtun vêhê nga ne, tsicjê Jesucristu yêjê xutaxa rê xi jemu tsehen, hacuaha tsicjê me yêjê xitsehen. Hane xi matjenguicjin ne, sahmi me entre-gadu cojo Nina Nahmi naja gobiernu xi sahmi me. Hane hya cuijnetaha ngasunhndê. ²⁵ Cuatjin cuma ta meje rê xi Jesucristu ne, sahmi me gobiernu hisca hya xi cuiyuju Nina ngahma gobiernu rê Jesucristu yêjê ni xi sahmi rê me condra. ²⁶ Hane xi cuatju tsicjê Nina yêjê sa xi sahmi rê Jesucristu condra ne, sehe tsicjê me cjuaveya ta, tsêhê xi hatuxa yêjê ngarca ni caviyuju Nina ngahma gobiernu rê Jesucristu. ²⁷ Chja xujun rê Nina xi caviyuju me yêjê ngarca ni ngahma gobiernu rê Jesucristu. Peru ha suvá tsejen xi hacuiin cojo Nina, me xi caviyuju yêjê ngarca ni jan, cavêjña me. ²⁸ Peru hya xi ha yêjê ngarca ni cuiyuju ngahma gobiernu rê Jesucristu, me xi Quihndi rê Nina ne, hya cuejñá suvá Jesucristu yojo rê me ngahma gobiernu rê Nina, me xi caviyuju yêjê ngarca ni ngahma gobiernu rê Jesucristu. Cuatjin cuma, cojo sa xi Nina ne, cuma titjun camahani me tsêhê yêjê ngarca ni.

²⁹ Quihndê ne, sacuaha xuta xi cuatjin xtenda me ngatsê rê nima ne, ¿mé machjirêhê? Sa xi hatuxa vuyaain nima cjuahñu sacuatjin chja yahnga xuta ne, ¿mé má cuatjin xtenda xuta ngatsê rê nima? ³⁰ Hane sacuaha ngayin ne, ¿mé má yêjê ni hora nechintihin tsavi? ³¹ Nina vêe me xi hacuaha ngahan ne, ngu nixtin ngu nixtin ne, tejñataha tsavi

tsêhê cjuaveya. Ngayujun ni ne, jemu vaxêndaja nuju ngatsê rê xi tjin tangun cjuatacun naja cojo Nai naja Jesucristu. ³² Sa xi ngahan cavitejñataha tsavi nguehe Efeso sacuaha ngu xuta xi hacuiin ladu rê Nina má me ne, ¿mé ndaja tsahan ni? Sa xi hatuxa vuyaain nima cjuahñu ne, sacuatjin chja cju ne: “¡Jemu sa ndaja xi xinêê siuun ta, nchujun ni nguini ne, cueyan!” ³³ Ha quihndê xicatuun cahndê xi cumandacha sa ngayun ta, tjin ngu cju a xi chja cuitjin: “Xi nihña tangun cojo xuta tsehen ne, vêhê tsinguetsun rê xcusun ndaja xi nihña.” ³⁴ Catuya nga catejña chihin cjuatacun nuju, hacuaha ha quihndê xicanihñuu sa cjuatsehen. Tjin yahnga ngayun ne, hisca hyuun Nina. Cuatjin chjá cojo nuju cojo sa xi cuma sava nuju.

Xcusun yojo xi sacú rê nima hya xi cuya cjuahñu

³⁵ Peru tjin rê yahnga ngayun xi chjinengunsun cuitjin: “¿Hacutjin nga cuya nima cjuahñu? ¿Mé xcusun yojo rê me xi cuya?” Cuatjin chjinengunsun. ³⁶ ¡Ngarca, xan! Hya xi nitjen ngu tutjê ne, titjun cueya sehe cuetju. ³⁷ Xcusun xi nitjen ne, hacuiin xcusun xi sehe cuma jyê jan, ta ngu tutjê ni xi nitjen, sacuaha ngu trigu o sa tu mé sa xcusun tutjê. ³⁸ Peru Nina sua me xcusun rê hacutjin jyihî xi cachuya rê me. Jima ngu tutjê ne, sua rê me xcusun rê xi tsêhê suvá. ³⁹ Yojo ne, hacuiin ngu xcusun ni tjin ta hacjahi xcusun yojo rê xuta, hacjahi xcusun yojo rê chu, hacjahi xcusun yojo rê chu nisê, hacuaha hacjahi xcusun yojo rê chu ti. ⁴⁰ Tjin hasen xi tjin ngajan ngahnga hacuaha tjin hasen rê yêjê xi tjin nguehe nangui. Peru hacjahi tsejen xcusun xi tjin ngajan ngahnga hacuaha hacjahi tsejen yêjê xi tjin nguehe nangui. ⁴¹ Hacjahi hasen ndajyihî rê tsuhi, hacjahi hasen ndajyihî rê sá, hacuaha hacjahi hasen ndajyihî rê niñú. Hisca ngajñi

rë niñú ne, hacjahi hacjahi hasen rê jima ngu.

⁴² Hacuaha cuatjin cuma hya xi nima cuya cjuahñu. Hya xi seyaniji nima jan ne, hatuxa fê fehndu yojo rê. Peru hya xi nima cuya nga cjuahñu ne, tsajin nu tsajin nixtin xi cjuehndu yojo rê. ⁴³ Hya xi seyaniji ne, tsajin camahani mé ndajyihi, peru hya xi cuya nga cjuahñu ne, jercu ndajyihi camahani. Hya xi seyaniji ne, tsajin camahani ngahñu rê, peru hya xi cuya nga cjuahñu ne, jemu hñu camahani ngahñu rê. ⁴⁴ Hya xi seyaniji ne, seyaniji ngu yojo naja xi hatuxa tsêhê cjuahñu xi tjin nguehe ngasunhndê vihi, peru hya xi cuya nga cjuahñu ne, cuya ngu yojo naja xi hatuxa tsêhê cjuahñu xi tjin ngajan ngahnga. Quihndê ta tjin yojo naja xi tsêhê cjuahñu xi tjin nguehe ngasunhndê ne, ngajan xi hatuxa tjin yojo naja xi tsêhê cjuahñu xi tjin ngajan ngahnga.

⁴⁵ Hacuaha cuatjin camahindu xcun xujun rê Nina hiscan chja cuitjin: “Adán, xihin xi tjutjun camá ne, casua Nina me cjuahñu.” Peru Jesucristu, me xi canduva camá ngascan ne, me vêhê Hasen xi sua cjuahñu. ⁴⁶ Hacuian titjun sacu naja cjuahñu xi tsêhê ngahnga ta tsêhê ngasunhndê titjun sacu naja, sehe sacu naja cjuahñu xatsê xi tsêhê ngahnga. ⁴⁷ Xihin xi tjutjun camá jan ne, cojo nihndê camá. Vêhê xi tsêhê ngasunhndê má. Peru Jesucristu, xihin xi majo jan ne, canduva me tsêhê ngahnga. ⁴⁸ Yêjê xuta xi tsêhê ngasunhndê me ne, hatuxa tangun me cojo xihin xi nihndê camá jan. Hane yêjê xuta xi tsêhê ngahnga me ne, hatuxa tangun me cojo xihin xi canduva tsêhê ngahnga. ⁴⁹ Sacuatjin xi camá ngayaan sacuahã xihin xi nihndê camá jan ne, hacuanitjin cuma ngayaan sacuahã xihin xi canduva tsêhê ngahnga jan.

⁵⁰ Ngayujun ni ne, nguehe cuichjá cojo nuju ta yojo naja xi yojo cojo jni camá ne, cumaji cuisehen hiscan sahmi Nina

gubiernu. Hacuaha ngu xcusun xi hatuxa fehndu ne, cumaji cuisehen hiscan tsajin camahani mé xi fehndu. ⁵¹ Chutsujun ni. Nguehe cuichjá cojo nuju ngu cjuatacun xi jiyahma titjun: Hacuian ngayejen ngayaan cueyan. Peru ngayejen ni sacú yojo xatsê naja ⁵² ngu marcu macjain ni, sacuahã xi ngu cuechjan ngu chuxahan ni tuxcun, hya xi cjuane sacuahã ngu tyjo xi meje cuijnetahe fane ta, cjuane sacuahã ngu tyjo, sehe cuya nima cjuahñu cojo yojo xatsê rê xi tsajin nu tsajin nixtin cjuehndu. Hane ngayaan ne, hacuahã sacú naja yojo xatsê naja. ⁵³ Cuatjin cuma ta, yojo naja vi xi hatuxa fehndu ne, meje rê xi cuya ngu yojo xi hatuxa fehndiin. Yojo naja vi xi hatuxa hme ne, meje rê xi cuya ngu yojo xi hatuxa hmii. ⁵⁴ Hane hya xi cuatjin cuma ne, hya cuetjucaa cjuã xi camahindu xcun xujun rê Nina xi chja cuitjin: “Cjuaveya ne, cjuê camahani. Cjuahñu xatsê xi fehndiin ne, vêhê scaa rê cuetjundaja. ⁵⁵ ¡Cjuaveya ne, ha quihndê tsajin camahani rê ngahñu! ¡Cjuaveya ne, ha quihndê tsajin camahani mé cjuahngatacun xi cuma sahmi cojo naja!” ⁵⁶ Cjuaveya ne, sahmi cjuahngatacun cojo xuta ngatsê rê cjuatsehen, hacuahã cjuatsehen ne, tjin rê ngahñu ngatsê rê ley rê Moisés. ⁵⁷ Peru nacuechji rê Nina, me xi sahmi xi vetjunndajan ngatsê rê yêjê ni xi casahmi Nai naja Jesucristu.

⁵⁸ Vêhê xi ngayujun ni ne, ngayun xi jemu hmú cacún nuju ne, tejñuhñu xahasen nuju, xicavetjunxuun tsêhê ndiya rê Nina. Yêjê ni nixtin ne, tángun nduju camahã sa nihñu xa xi casua nuju Nai naja. Ha hyun ta yêjê xa xi nihñu ne, hacuian tu mahya, xi cuatjin tjin tangun cjuatacun nuju cojo Nai naja.

Cuma tangun tujún xi cjue Jerusalén

16 Quihndê ne, sacuahã tujún xi jima tangun xi cjue cuisecoo rê

xuta ladu rë Jesucristu, me xi jemu choho tivatju tijima ngajan Jerusalén ne, sacuatjin cachjá cojo xuta rë yungun ngajan distritu Galacia ne, cuatjin nihñu. ² Jima ngu domingu ne, meje rë xi ngayujun ni ne, tejñuxun tsë tsë tujún xi nihñu ganar tsëhë xa xi nihñu. Tetjún ne, cojo sa xi hya xi cjuëhë ndyá ne, mijí rë xi chjahya nga rë tujún. ³ Hane hya xi cjuëhë ndyá ne, yo xuta xi cuinújun xi cjue ne, tsihindu ngahan xujun xi cuaha me, sehe tsingátju me cjuecani me cjuatjo nuju ngajan Jerusalén. ⁴ Hane sa xi tsejen ta ndatjin xi ngahan cjué ne, cuma cjue me cojo ná.

Sua Pablo machaya rë xuta Corinto xi cjuetjengui me me

⁵ Cuechú nixtin xi cjuétjengë nuju, peru hya xi ha cavátju distritu Macedonia, tsëhë xi hatuxa tjin ná xi cuátju ngajan. ⁶ Cuma rë cuitejñataha cojo nuju ngujo nixtin, o sa xi yëjë nixtin rë chan hnchan. Hane xi cuatjin ha cavitejñataha cojo nuju hitsë ne, cuma cuisecuun ná hitsë xi cjué sa hiscan xi cjué. ⁷ Cuatjin tsingátaha cacún ta, tsëhë xi mijí ná xi nduva scútsejen nuju xi tu ñaja cuátju ni ta xi vetahá cákun ne, xi cuitejñataha cojo nuju jyë nixtin, sa xi sua Nai naja cahndé.

⁸ Peru cuitejñataha nguehe Efeso hisca xi cuechú suhi tsëhë Pentecostés ta, ⁹ tsëhë xi jemu casacu ná cahndé xi sahme xa xi ndatjin cuetjucaa, handasa hacuaha jemu tjin xuta xi sahmi ná me condra.

¹⁰ Quihndë ne, sa xi cjue scusehenya nuju Timoteo ne, nihñu xi hacuñin cumacjín cacun me xi cuejña me ngajñi nuju ta, tsëhë xi sahmi me xa rë Nai naja sacuatjin sahme ngahan. ¹¹ Vëhë xi hisca ngu yun ne, mijí rë xi nihñuchuvun me. Tisecuun rë me xi cjue sa me cojo cjuandaja cjuajeya, cojo sa xi cuma cuinduvatjengui ná me ta, tsëhë xi nguehe tejñaya

rë me cojo sa ngujo xuta ladu rë Nai naja xi nduva cojo me.

¹² Quihndë ne, sacuaha Apolos ne, jemu cachjá cojo rë me xi cjue me cojo ngujo sa xuta ladu rë Nai naja jan, cjuetjengui nuju me, peru mijí cjue me xi ngutjen. Peru cjue me nixtin hya xi sua rë me chuva rë.

Cjua xi vijnetaha

¹³ Nechun cuidado. Ndaja sa cata-mangu tacún cojo cjuachacun xi macjain naja. Tiyujunhñu cjuatacun nuju hacuaha tuhun ngahñu xahasen nuju. ¹⁴ Yëjë ni xi nihñu ne, nihñu cojo cjuahmutacun.

¹⁵ Ngayujun ni ne, ha hyun ta yëjë me xi siu ndava Estéfanos ne, me xi cuacun vë tjutjun cavisehen me ladu rë Jesucristu ndyá Acaya, hacuaha casua suvá me yojo rë me xi cuisecoo me xuta ladu rë Jesucristu. ¹⁶ Meje ná xi ngayujun ni ne, tinuhyun tsëhë xuta xi cuatjin sahmi, hacuaha tinuhyun tsëhë xuta xi visecoo me xcun xa rë me xi cuacun vëhë.

¹⁷ Jemu ndama ná xi cafehe Estéfanos nguehe, cojo Fortunato cojo Acaico. Handasa tsajin ngayujun ni nguehe, ¹⁸ peru ndastu me xi jyan vi ne, casua ná me cjuetacun, sacuatjin casua nuju me ngayun cjuetacun. Xuta xi cuatjin sahmi ne, meje rë xi chjuhuncun me.

¹⁹ Xuta tsëhë yëjë ni yungun nguehe distritu Asia ne, tsingátju me ngu nina rë me tsujun ngayujun ni. Aquila cojo Priscila, cojo yëjë sa xuta ladu rë Jesucristu xi ma tangun me ndava me vëhë ne, hacuaha tsingátju me ngu nina rë me tsujun ngayujun ni xi hacuaha tjin tangun cjuatacun nuju cojo Jesucristu. ²⁰ Yëjë ni xuta ladu rë Jesucristu nguehe ne, tsingátju me ngu nina rë me tsujun. Tuhun rë xingun nina, cojo cjuandaja cojo cjuahmutacun chutatsuhun xingun, sacuatjin xcusun naja.

²¹ Suva ngahan, Pablo, tsihindu nuju ngu cjua vihi, xi tisuá nuju ngu nina.

²² Sa xi ngajñi nuju tjin ngu me xi hmaai cacun me Nai naja ne, catisatiin rë me cjuandaja rë Nai naja. ¡Ngayun Nai naja, nduvun!

²³ Nai naja Jesucristu catisua nuju me cjuandaja rë me. ²⁴ Ngahan ne, hacuaha tsingátju cjuahmutacun naha xi cuma nuju ngayujun ni, ngatsë rë xi tjin tangun cjuatacun naja cojo Jesucristu.

Carta xi majo catsingatju San Pablo xi cafahatsja xuta nandya Corinto

1 Ngahan Pablo ne, casuaxa ná Jesu-cristu xi má ngahan apóstol tsêhê me, tsêhê xi cuatjin xi meje rê Nina. Hane ngahan cojo cha Timoteo xingueen ne, ningatjin ngu xujun vi tsujun, ngayujun ni xuta Corinto xi xuta ladu rê Nina ngayun. Hacuaha ningatjin xujun vi xi scutaya yêjê sa xuta ladu rê Nina jingujyê ni estadu Acaya vê. ²Nina Nahmi naja cojo Nai naja Jesucristu ne, catisua nuju me cjuandaja cjuajeya.

Vaxëndaja Pablo Nina ngajni rê cjuanihi

³Nina Nahmi rê Nai naja Jesucristu ne, jemu tjin rê me cjuandaja. Me vêhê ne, hatuxa tjin rê me cjuayumatacun cojo niji hacuaha hatuxa sua niji me cjuetacun. ⁴Sua niji me cjuetacun ngajni rê yêjê ni cjuanihi xi vatjin má, cojo sa xi ngayin ne, hacuaha cuatjin cuma tihín rê xuta xi yahnga cjuetacun vêhê ngajni rê yêjê cjuanihi xi vatju me má. ⁵Chuva rê xi vatjin cjuanihi sacuatjin xi cavatju Jesucristu camá ne, hacuaha cuatjin sua niji me cjuetacun. ⁶Hya xi cuatjin vatjin cjuanihi ne, hatuxa cuatjin má cojo sa xi ngayun ne, sacú nuju cjuetacun hacuaha cuetjuntjun tsêhê jyê nuju. Hacuaha hya xi cuatjin sacú niji cjuetacun ne, cuatjin má cojo sa xi hacuaha cojo ngayun ne, sacú nuju cjuetacun. Hane sacú nuju cjuetacun vêhê ngatsê rê xi hacuaha caa nuju cojo cjuanihi sacuaha cjuanihi xi vatjin má. ⁷Ngayin ne, jemu vetihin tacuin nuju ta, tsêhê xi hyin ta sacuatjin xi tivatjun cjuanihi ne, hacuaha tisacu nuju cjuetacun.

⁸Ngayujun ni ne, meje niji xi cumachaya nuju cjuacjintacun xi cavatjin camá ngajan estadu Asia.

Jemu jyê camahani cjuanihi xi cavatjin camá, hisca ngahnu sa tsajin niji xi scaa niji cojo cjuanihi vêhê; quihndê tsajin niji cjuetacun xi cojo cjuahnu cuijnitihin. ⁹Peru ngayin ne, hisca hatsêê camangu tacuin cojo cjuaveya niji. Cuatjin camá cojo sa xi hacuiin cuetihin tacuin cjuatacun niji suvin ta cuetihin tacuin Nina, me xi tsicuya cjuahnu rê nima. ¹⁰Nina ne, cavaxêtje niji me tsêhê cjuacjintacun jyê xi meje tsiquehen niji jan, hacuaha cuaxêtje sa niji me. Cavetihin tacuin Nina xi cuatjin cuaxêtje sa niji me, ¹¹tsêhê xi ngayun ne, hacuaha tiviseuun niji xi tichjahyun rê Nina ngatsê niji. Hane xi cjin xuta sahmi me cuatjin ne, hacuaha jemu cjin cuma ngayun xi tuhun nacuechji rê Nina tsêhê cjuandaja xi sua niji me.

Chja Pablo mé má cjêê cjue me Corinto

¹²Ngayin ne, nihni yehe yojo niji ngatsê rê xi ha hyin cojo cjuatacun niji ta tyjahi xahasen niji hacuaha nechin nguñaja tacuin xi tivanguin cojo ngasunhndê niji. Peru hacuiin cojo cjuatacun niji suvin xi cuatjin cun ngayin ta cojo cjuandaja rê Nina. Hacuaha hatuxa cuatjin cun ngayin hya xi nechin ngajni nuju. ¹³⁻¹⁴Sacuaha cjuaxi ni hindin nuju ne, suvá cjuaxi ma chutayun hacuaha vijnercun. Ha vijnercun hitsê, peru meje niji xi ndaja sa cuijnercun cjuetacun vihi: Cuma nihnu yehe yojo nuju ngatsê niji sacuatjin xi cuma nihni yehe yojo niji ngatsê nuju, hya xi cuxa nga Nai naja Jesucristu.

¹⁵Xi cuatjin catsingátaha cáacun ne, cavejñá xi cjué scusehenya nuju titjun, cojo sa xi jo ndiya sacú nuju cjuandaja. ¹⁶Meje cuátju nangui nuju hya xi canduvá nguehe estadu Macedonia. Hane xi cuijnetaha cjuacjintacun naha nguehe Macedonia ne, hacuaha meje cuxa scuse-

henya nga nuju ngu ndiya. Sehe ngajan xi ngayun ne, cuma cuisecun ná cojo sa xi cuma cjué ngajan distritu Judea. ¹⁷ Xi cuatjin cavejñá cjuatacun naha sehe casahmee ne, ¿há tsajin rë cjuaquixi cjuata naha, má nuju? ¿Há má nuju ngayun ne, hya xi vejñá xi sahme ngu xcusun xi sahme ne, tangun han cojo ngu xuta ngasunhndë xi xcun cojo xcun ne, chja me ta cuma, hane xi taha ngaxtun ne, chja me ta cumaji? ¡Jéya, hacuiin cuatjin! ¹⁸ Nina, me xi hatuxa cjuaquixi ne, vëë me ta hacuiin jo ma tacuin xi nújin cojo nuju. ¹⁹ Sacuaha Jesucristu, Quihndi rë Nina, me xi catihin camachaya nuju cjuata rë, cojo cha Silvanu cojo cha Timoteo ne, hacuiin jo tjin cacun me ta, yëjë ni cjuata xi cachja me ne, hatuxa cjuaquixi. ²⁰ Hane Jesucristu vë ne, me vëhë xi sahmi chihin me yëjë ni cjuata xi ha cachja Nina xi cuma. Vëhë xi hora xi chjahanrcun Nina xi nújanyuman cojo Jesucristu ne, nújan “Amén” (O sa tsajin ne, nújan “Cuatjin jain.”) ²¹ Nina ne, hacui me xi sahmi xi viyujucahndë cjuatacun naja xi macjain naja Jesucristu. Hacui ni me xi cavaxijin me ngayaan. ²² Sacuaha xi cavisane me sellu rë me ngayaan; caveya me Hasen rë me cahntsua xahasen naja cojo sa xi ngutjen tsejen ta quixi jain xi, hya xi cuma ngascan ne, sua jain naja me yëjë ni xi ha cachja me.

²³ Quihndë ne, quejen cavusehenya nuju sacuatjin xi ha cachjá cojo nuju ngatsë rë xi mijí tsisava nuju xi cuichjá-taha nuju. Sa xi quixiin xi chjá ne, catitsingatju Nina cjuaveya xi cuma ná. ²⁴ Hacuiin xi meje cuitexin nuju jarë ngu cjuata xi hatuxa meje rë xi cumacjain nuju ta, tsëhë xi ngayun ne, ha siucahndë cjuatacun nuju cojo cjuachacun xi macjain naja. Ta ngayin ne, tiviseuiin nuju cojo sa xi cuma sua sa rë xahasen nuju.

2 Hya xi camá ne, cavejñá cjuatacun naha xi hacuiin ngutjen cjué scuse-

henya nuju sá tu choho cuma rë xahasen nuju ngatsë rë cjuata xi cuichjá cojo nuju. ² Cuatjin cavejñá cjuatacun naha ta, ngayun tinihñu xi ma sua rë xahasen naha. Vëhë xi sa xi sahme xi cuma va rë xahasen nuju ne, ndajin tjin ta, xi cuatjin sahme ne, sahme xi cuma va rë xahasen rë xuta xi tisahmi xi ma sua rë xahasen naha. ³ Vëhë xi cuatjin catsihindu nuju nixtin hya, cojo sa xi hya xi cuinduva ndyá ne, hacuiin cuma va rë xahasen naha ngatsë nuju ta, xi meje rë ne, tuhun rë xahasen naha cjuasua. Hacuaha mangu cáacun cojo nuju ngayujun ni. Mangu cáacun xi tu mé ni xi sahmi xi jemu sua ma rë xahasen naha ne, hacuaha vëhë ni ne, sahmi xi jemu sua ma rë xahasen nuju. ⁴ Hya xi catsihindu nuju cjuata vëhë ne, jemu choho ma ná, jercu cjin catsingátaha cáacun ngatsë nuju, hisca jercu cajíhnda; mijí ná xi cuma va tacún ta xi meje ná ne, xi cumachaya nuju ta cjuahmutacun xi tjin ná cojo nuju ne, jemu jyë camahani.

Ma manchataha me xi cavinchachoho

⁵ Quihndë ne, sacuaha ngu xuta xi cavinchachoho vë ne, hacuiin ngahan ni choho camá ná ta, ngayujun ni ne, hacuaha choho camá nuju hitsë. “Hitsë ni” chjá ta, mijí cuátjutaha xi tichjátaha nuju. ⁶ Quihndë xi cjin ngayun canújun-tuhun rë xuta jan ne, cojo vëhë ni ne, ha cuma. ⁷ Cahndë rë xi cuinújuntuhun sa rë me ne, ninchatuhun rë me, tuhun rë me cjuetacun, sá tu scaain rë me cojo cjuachoho jyë vëhë. ⁸ Vëhë xi chjá cojo nuju ta tuhun nga catamachaya rë me tsëhë cjuahmutacun xi tjin nuju cojo me. ⁹ Vëhë jain xi cuatjin catsihindu nuju ta, tsëhë xi meje cjuaháchuva nuju ne, há tjin ngu tacún xi nihñu yëjë ni hacutjin chjá cojo nuju. ¹⁰ Quihndë ne, yo xi ninchatuhun rë tsëhë ngu jyë xi sahmi ne, ngahan ne, hacuaha tsinchátaha rë ta, tu mé ni xi catsinchátaha ne, vëë Jesu-

cristu ta ngatsë nuju ngayun ne, vëhë xi cuatjin catsinchátaha, ¹¹ cojo sa xi cumaji sahmi Satanás xi meje sahmi cojo naja. Ngayaan ne, ha ndaja hyan hacutjin meje sahmi xitsehen vë cojo naja.

Cjuacjintacun rë Pablo ngajan nandya Troas

¹² Hya xi camá ne, cëjë ngajan Troas xi cuichjá cojo xuta cjuandajyihi xi chja tsëhë Nai naja Jesucristu. Hane xi cafëhë ngajan ne, vutsején ne, jemu casacu ná cahndé xi cuichjá cojo xuta cjuandajyihi jan. ¹³ Peru hacuiin ndaja má cá-cun xi casacuiin ná cha Titu xingueen sacuatjin xi catsingátaha cá-cun. Vëhë xi catsinguíjnetaha cjua cojo xuta jan sehe cavétju canduvá nguehe estadu Macedonia.

Tsinguitsojo Pablo cjua rë Nina

¹⁴ Peru nacuechji rë Nina ta hatuxa sahmi me xi caa nihi vetjintjin ngatsë rë xi tjin tangun cjuatacun nihi cojo Jesucristu. Chuva vëhë xi Nina ne, sahmi me xi cumachaya rë xuta cjuatacun rë me jingujyë ni. ¹⁵ Ta ngayin ne, sacuahaxta rë tyjungunsa ngayin xi tisua Jesucristu xi cuma rë Nina. Xta ndajyihi vëhë ne, vitsojo vechutaha rë yëjë ni xuta, sa xuta xi tivetjutje me tsëhë jyé rë me o sa xuta xi tivetjintjiin me. ¹⁶ Xi vutsejen nihi xuta xi cuacun tivetjintjiin jan ne, sacu rë me cjuaquixi ta quixi jain xi cuechiin me xcun Nina. Peru xi vutsejen nihi xuta xi cuacun tivetjutje jan ne, sacu rë me cjuaquixi xi quixi jain xi cuechu me xcun Nina. Ngayin ne, cumaji nihni cojo cjuatacun nihi suvin xa vë xi sacu rë xuta cjuaquixi jan. ¹⁷ Ngayin ne, hacuiin tiviteñi cjua rë Nina sacuatjin jemu cjin xuta tisahmi me ta ngayin ne, nechín nguñaja tacuin xi nújin cojo xuta cjua vëhë. Nina casua nihi me xa hacuaha vutsejen me xa xi nihni. Hacuaha tinihni xa

vëhë ta tsëhë xi tjin tangun cjuatacun nihi cojo Jesucristu.

Compromisu xatsë xi casahmi Nina

3 ¿Há má nuju xi tinaxinndijin suvin nga yojo nihi xi cuatjin nújin? O há tsajin ne, ¿há mameje rë xi tihín nuju o sa xi chjahyin nuju ngu carta xi chja ngatsë nihi, sacuatjin sahmi yahnga xuta? ² ¡Jéya! mamijí rë ta, ngayun xi má ngayun sacuahaxta nihi, sacuahangu carta xi camahindu cahntsua xahasen nihi, ngu carta xi cuma scutusejen yëjë ni xuta ne, hacuaha cuma scutaya me. ³ Hane suvá tsejen xi Jesucristu catsihindu me carta jan, hane ngayin ne, tu canihni entregadu ni. Hacuiin cojo tinta camahindu ta cojo Hasen rë Nina xi quicun me. Hacuaha hacuiin xcun ndyojo të camahindu ta cahntsua xahasen rë xuta.

⁴ Cuatjin nújin cojo nuju ta, tsëhë xi mangu tacuin cojo Nina ngatsë rë Jesucristu. ⁵ Hacuiin cjuatacun nihi suvin, hacuiin ngahñu nihi suvin xi ma nihni mé xi nihni ta Nina casua nihi me cjuatacun, Nina casua nihi me ngahñu. ⁶ Me vëhë casahmi me xi machjirëhë rë me ngayin xi tihín cumachaya rë xuta compromisu xatsë xi sehe tivetsihin tisahmi Nina cojo xuta, hane compromisu xatsë vëhë ne, hacuiin ngu ley xi cuinuhyan tsëhë ta ngu ndiya ndajyihi xi tsingacun naja Hasen rë Nina xi cuanguenjojon. Cuatjin casahmi Nina ta tsëhë xi xuta xi cumaji sahmicihini me yëjë ni cjua xi vitexa ley ne, sacú rë me ngu castigu xi cuetsun cjuatacun rë me hacuaha tsajin nu tsajin nixtin xi cuechu me xcun Nina. Peru xuta xi tjengui me Hasen rë Nina ne, sacú rë me ngu cjuahñu ndajyihi, hacuaha cuechu me xcun Nina.

⁷ Ngayujun ni ne, ha hyun ta sacuahale y rë Nina xi catsihindu Moisés ne, catiya xcun ndyojo të hya xi camahindu, hacuaha xuta xi maji sahmi me yëjë hacutjin vitexa ley jan ne, cumaji cuechu

me xcun Nina. Hane sacuaaha xa xi casahmi Moisés hya xi casua me camachaya rë xuta cjuarë ley jan ne, hacuaaha ha hyun xi jercu vengui chji rë ta, tsëhë xi camatsejen ngu hasen ndajyihi xi hisca camaji cavutsejenndaja xuta Israel xcun Moisés ta jercu tu seti camahani jyihi xcun me. Peru hasen ndajyihi vëhë ne, tafi tafi ne, cafëya suvá. ⁸Hacuaha ha hyun ta ngayin ne, titihín tijimachaya rë xuta cjuarë tsëhë hacutjin sua naja Nina Hasen rë me. Quihndë ne, sa xi cuatjin jemu cavengui chji rë xa xi casahmi Moisés jan ne, hitsë sa jercu vengui chji rë xa xi tinihni ngayin. ⁹Cuma cuinújan ne, sa xi jemu cavengui chji rë xa xi casahmi Moisés, hya xi casua me ley xi chja xi sacú naja ngu castigu sa xi hacuiin nihña chehen cjuarë ne, hitsë sa jemu vengui chji rë xa xi tinihni ngayin, quihndë xi tinújin cojo xuta xi cuma sacú naja ngu xahasen tyjahi, ngu cjuatacun tyjahi. ¹⁰Cuma cuinújan ne, sacuaaha xa rë Nina xi casahmi Moisés xi jemu ndajyihi titjun ne, quihndë ne, sacuaaha xi ha quihndë tsajin mé ndajyihi tsëhë ta, xa rë Nina xi tinihni ne, jercu tu ndajyihi camahani. ¹¹Sa xi jercu ndajyihi ngu xcusun xi hacuiin cuejña tsëë ne, hitsë sa ndajyihi ngu xi cuejña tsëë.

¹²Ngatsë rë xi cuatjin vetihin tacuin Nina ne, vëhë xi ngayin ne, rcuiin camahani xi nújin cojo xuta. ¹³Hacuiin nihni sacuatjin casahmi Moisés, hya xi cavetsa me xcun me cojo ngu tsjian cojo sa xi xuta tjë rë Israel ne, scuiin me hacutjin tifëya suvá hasen ndajyihi xi jyihi xcun Moisés jan. ¹⁴Peru xuta jan ne, camajñu tsëhë cjuatacun rë me. Hisca quihndë nixtin vihi ne, hya xi visiñuju me cjuarë ley changa vëhë ne, maji vijnercu me cjuarë, sacuaaha xi titsa rë cjuatacun rë me cojo tsjian jan. Hisca hya xi cumacjain rë me Jesucristu ne, hya sacuaaha xi cuetjuxin tsjian jan, hya cuma cuijnercu me. ¹⁵Peru hisca quihndë ne,

hya xi visiñuju me cjuarë xi catsihindu Moisés ne, sacuaaha xi tsjian jan vechja rë cjuatacun rë me, hane maji vijnercu me. ¹⁶Peru hya xi ngu xuta cuisehen me ndiya rë Nai naja ne, sacuaaha tsjian jan ne, cjuexin tsëhë me, hane cuma cuijnercu me. ¹⁷Nai naja ne, hacui me xi Hasen rë Nina, hane hiscan xi tacun Hasen rë Nai naja ne, tsajin mé xi vechja rë cjuatacun naja. ¹⁸Vëhë xi ngayejen ngarcen ni ne, tsajin titsa rë cjuatacun naja cojo tsjian vëhë, hacuaaha xi vutsejen xuta ngayaan ne, ma vutsejen me cjuandaja rë Nai naja sacuaaha tsejen mé xi tsejen xcun ngu speju. Hane ngayaan ne, jima tiña jima tiña sa cjuatacun naja cojo cjuatacun rë Nai naja ta, tsëhë xi jima ngu ndiya ne, tisacu sa naja cjuandaja rë me. Nai naja ne, suvá hasen me, hane hacui me xi cuatjin tisahmi.

4 Nina casahmi me cjuandaja cojo niji, hane casua me xa vëhë xi nihni. Vëhë xi hatuxa hacuiin machuva tacuin. ²Ngayin ne, cavejñi tacuin xi nihni yëjë ni xi ticojo rë cjuasava xi tahahma má; hacuiin vindachin, hacuiin nindeyin cjuarë Nina ta, suvá cjuaquixi yëjë ni xi nújin cojo xuta. Cuatjin nihni cojo sa xi scuëë yëjë ni xuta ta cuatjin jain xi nújin. Hacuaha vëë Nina xi cuatjin nújin. ³Hane sa xi vijniircu xuta cjuandajyihi xi chja tsëhë Jesucristu xi titihín cumachaya rë me ne, peru suvá xuta xi tivetjintjiin me ne, me vëhë xi cuatjin vijniircu me. ⁴Xitsehen xi matitjun xi tacun nixtin vihi ne, cavetsa cjuatacun rë xuta xi cuacun macjaain rë Nina xi cjuaquixi, cojo sa xi cuiiin rë me cjuahasen rë cjuandajyihi xi chja hacutjin xi jyë hnga Jesucristu cojo cjuatacun rë me. Hya xi machaya naja tsëhë Jesucristu ne, hacuaaha hyan hacutjin jemu ndaja camahani Nina. ⁵Ngayin ne, hacuiin nújin cojo xuta xi nai nuju ngayin ta xi nújin ne, Jesucristu xi Nai naja me; hane ngayin ne, tivisecuin nuju sacuaaha

ngu mosu hndixahan nuju ta, tsêhê xi cuatjin cavitexa niji Jesucristu. ⁶Hane ntsacu cavetsihin ne, cachja Nina ta ngajni rê jnu ne, cuma hasen. Hane hacui ni me xi caveya me cjuahasen ngajni rê cjuatacun niji, cojo sa xi ngayin ne, ti-hin cumachaya rê xuta, cuijnercu me hacutjin jemu ndaja camahani Nina. Hane hya xi machaya naja tsêhê Jesucristu ne, hacuaha hyan hacutjin jemu ndaja camahani Nina.

Cjuahnu xatsê xi sua Nina

⁷Cjuahasen xi casua niji Nina jan ne, quichihin ngajni rê cjuatacun niji, sacuatjin xi jiya cjuanchina cahntsua ngu tiji xi nihndê ni camá. Cuatjin casahmi Nina cojo sa xi matsejen xi jemu hnu camahani ngahnu xi sua niji Nina. Hacuini cojo ngahnu niji suvin xi caa niji nihni yêjê ni xi tinihi ta Nina ne, me vêhê xi casua niji me ngahnu; hacuaha jemu ndaja camahani ngahnu xi sua niji me. ⁸Ha tu yani ni xi vanguin ne, jemu yehe cjuacjintacun vatjin má, peru sacuya niji chuva rê hacutjin xi naxintjin yojo niji; hisca hyiin mé xi ndatjin nihni. Peru nihnichuviin cjuatacun niji; ⁹jemu suaxti niji xuta hacuaha choho sahmi me cojo niji, peru Nina ne, tsismicacuaain niji me; vaja niji xuta, hisca vitičin, peru hacuiin tsiquehen niji me. ¹⁰Xi nuji-hinyin cojo cjuar rê Nina ne, hatuxa meje tsiquehen niji xuta, sacuatjin catsiquehen me Jesucristu. Cuatjin tijima ne, cojo sa xi xuta ne, xi scutsejen me hacutjin ticaa niji ne, cumachaya rê me ta quixi jain xi tisacu niji cjuahnu sacuaha cjuahnu rê Jesucristu. ¹¹Ngayin xi quicun ngayin ne, tjin xuta xi jemu meje tsiquehen niji me ngatsê rê xi quichihin cjuandajyihi xi chja tsêhê Jesús. Cuatjin tijima ne, cojo sa xi cuma tsejen xi yojo jyê niji vi xi hatuxa cueya ne, hacuaha tisacu rê cjuahnu sacuaha cjuahnu rê Jesús. ¹²Ngajan xi ngayin ne, tisacu niji

cjuaveya; peru ngayun ne, tisacu nuju cjuahnu xatsê.

¹³Tjin hiscan xi chja xcun xujun rê Nina cuitjin: “Camacjain ná, vêhê xi cachjá”; hane ngayin ne, tangun macjain niji cojo me xi cuatjin catsihindu cjuar jan. Vêhê xi hacuanitjin ni nújin ngayin: “Macjain niji, vêhê xi nújin.”

¹⁴Hacuaha hyin ta Nina, me xi catsicuya cjuahnu rê Nai naja Jesús hya xi cahme me ne, hacuaha cuechu nixtin xi cuatjin tsicuya me cjuahnu niji, hane sahmi tangun me ngayin ngajan hiscan tacun Jesús. Hacuaha cuatjin sahmi me cojo nuju. ¹⁵Yêjê ni xcusun xi tivatjin tijima ne, ngayun ndaja tsujun ta, xi cuma cjin sa ngayun xi sacu nuju cjuandaja rê Nina ne, ha cuatjin cjin sa cuma ngayun xi tuhun nacuechji rê me. Hane cuatjin cuma tsejen xi Nina ne, jemu ndaja camahani me.

¹⁶Vêhê xi hatuxa nihnichuviin cjuatacun niji. Handasa tivetsun hitsê tivet-sun hitsê yojo niji xi jima changa ngayin ne, peru cjuatacun niji ne, jima xatsê ngu nixtin ngu nixtin. ¹⁷Hane cjuacjintacun xi tivatjin tijima nguehe ngasunhdê ne, sacuaha xi hacuiin yehe camahani ta, tsêhê xi hya xi ha caca niji ne, hya sacú niji cjuandaja, sacú rê xahasen niji ngu cjuasua xi jemu ndajyihi camahani, hacuaha tsajin nixtin xi cjuê. ¹⁸Ngayin ne, hacuiin tivetihin rcuin yêjê ni xi tsejen ta xi vetihin rcuin ne, xi cjêê cuma tsejen. Cuatjin nihni ta, tsêhê xi yêjê ni xi tsejen ne, cuechu nixtin xi cjuê, peru xi cjêê cuma tsejen ne, tsajin nu tsajin nixtin cjuê.

5 Hacuaha nihnichuviin cjuatacun niji ta, tsêhê xi ha hyin ta sa xi cueya yojo niji sacuatjin vetsun ngu ndihya yuma ne, sacú niji ngu xcusun yojo xatsê ngajan ngahnga xi tsajin nu tsajin nixtin cueya, sacuaha ngu ndihya ndajyihi xi suvá Nina casahmi me xi cuma niji. ²Vêhê xi ngayin ne, hisca fê tacuin ta,

tsêhê xi jercu meje chjihinntsin sacuaha yojo xatsê niji xi sua Nina jan, ³cojo sa xi chijin yojo xatsê vêhê sacuatjin chajá rê ngu tsjian. Xi cuatjin ne, cuechiin ngu nixtin xi siu suvá hasen niji xi tsajin yojo niji. ⁴Ngayin xi nechin cojo yojo jyê niji vi ne, hisca fê tacuin ngatsê rê xi jercu meje niji yojo xatsê xi sehe sacú niji. Hacuuiin meje niji xi cueyin ta xi meje niji ne, yojo xatsê niji. Cuatjin meje niji cojo sa xi yojo jyê xi hatuxa cueya ne, cjuêya; hane suvá cjuahñu xatsê vêhê cueña. ⁵Quihndê ne, me xi cuatjin caveña cjuatacun rê xi cuitjin cun cuma ngayin ne, hacui Nina. Hacuaha me vêhê xi caveya me Hasen rê me cahntsua xahasen niji, cojo sa xi ngutjen tsejen ta quixi jain xi, hya xi cuma ngascan ne, sua jain niji me yojo xatsê vêhê.

⁶Vêhê xi hatuxa tihín ngahñu xahasen niji. Hyin ta jinguyêjê rê xi nechincanhndin cojo yojo jyê niji vi ne, sacuaha xi nechintihin ngu nangui ta, tsêhê xi cjêê cuechin hiscan xi cuinechincanhndin cojo Nai naja. ⁷Ngayin ne, mangu tacuin cojo Nai naja xi tivanquin cojo ngasunhndê niji, handasa matsijin me. ⁸Cuyin cuinújin cojo nuju ta ngayin ne, titihín ngahñu xahasen niji. Hacuaha xi má niji ne, hitsê sa ndatjin xi cuetjinxin tsêhê yojo jyê niji, hane cjuanguin cuinechincanhndin cojo Nai naja. ⁹Vêhê xi sa xi cuinechintihin sa nguehe ngasunhndê, o sa xi cuinechincanhndin cojo Nai naja ne, jemu meje nihñi yêjê ni hacutjin chuya rê me ta, ¹⁰tsêhê xi ngayejen ni ne, cuechu nixtin xi cuma tsejen xi cun xi má ngayaan hya xi cuechuun xcun Jesucristu, xi cjuahacuenda me xcusun xi canihña, cojo sa xi jima ngu ngayaan ne, sacú naja xi satê naja ha tucutjin xcusun xi canihña xi cavinechan ngasunhndê, há ndaja ne, há ndajin.

Cjuandajyihî xi sahmi tangun cjuatacun naja cojo Nina

¹¹Ngayin ne, ha hyin mé vijne xi rcuin Nina. Vêhê xi meje nihñi xi cuijne cacun xuta. Nina ne, ha vêê me xi cun xi má ngayin. Hacuaha cojo ngayun ne, vetihin tacuin xi cumachaya nuju xi cun xi má ngayin. ¹²Hacuuiin tivétsihin tinihñi yehe suvin nga yojo niji ta tu titihín cumachaya nuju hacutjin cuma naxunndujun niji, cojo sa xi cuma nicuyun cjuatsêhê xuta xi chuya rê me tsêhê xcusun xi jyihî ngu cha, hane sahmicuendaan me cjuatacun rê cha. ¹³Chja yahnga xuta ta sca niji, hane yahnga me ne, jemu xta ngayin; peru há sca niji o há xta ngayin ne, peru nihñi yêjê ni ngatsê rê xi tsêhê Nina ngayin, hacuaha ngatsê rê xi meje cuisecuin nuju. ¹⁴Cuatjin nihñi ta tsêhê xi cjuahmutacun xi tjin rê Jesucristu cojo niji ne, vêhê xi vitexa niji. Cuitjin ningatihin tacuin: ngu ni Jesucristu xi cahme me ngatsê rê jyê naja ngayejen ni, vêhê xi ngayejen ni ne, sacuaha xi ha caveyan xi cuma rê jyê xi cuacun vê. ¹⁵Jesucristu ne, cahme me ngatsê naja ngayejen ni ne, cojo sa xi ngayaan xi casacu naja cjuahñu xatsê ne, hacuiin nihñacuendan suvá ni yojo naja ta hacuaha nihñacuendan tsêhê me vêhê, me xi cahme hacuaha cavuya me cjuahñu ngatsê naja.

¹⁶Vêhê xi ha quihndê hacuiin nutsijin xuta sacuatjin vutsejen ngu xuta xicjin me cojo cjuatacun rê ngasunhndê. Hatsêê ne, cuatjin canutsijin Jesucristu, peru quihndê ne, hacuiin cuatjin nutsijin me. ¹⁷Yêjê xuta xi tjin tangun cjuatacun rê me cojo cjuatacun rê Jesucristu ne, ngu xuta xatsê camá me. Xcusun changá xi tjin rê me ne, cafê, ha cama xatsê. ¹⁸Nina ne, me vêhê xi tisahmi me yêjê cjuatacun xatsê vêhê. Ngayin xi condra rê Nina camá ngayin hatsêê ne, casahmi me xi camatangun cjuatacun niji cojo

cjuatacun rë me ngatsë rë cjuacjintacun xi cavatju Jesucristu. Hacuaha casua niji me xa xi tihín cumachaya rë xuta hacutjin tisahmi tangun me cjuatacun rë xuta cojo cjuatacun rë me. ¹⁹ Cojo cjuacjintacun xi cavatju Jesucristu camá ne, cavetsihin casahmi Nina xi cuma tangun cjuatacun rë xuta cojo rë me, cavetsihin cafahacuendaain me tsëhë cjuatsehen xi casahmi xuta, hacuaha cavetsihin casua niji me cjuandajyihi xi tinújin cojo xuta xi Nina ne, meje rë me xi cuma tangun cjuatacun naja cojo rë me. ²⁰ Vëhë xi ngayín ne, cuatjin nújin cojo xuta cjuarë Jesucristu ta, Jesucristu casua niji me xa xi cuatjin nújin, sacuaha xi tichja suvá Nina cojo xuta ngajñi rë cjuarë xi nújin. Vëhë xi sacuatjin xi vitexa niji Jesucristu ne, chjahyin rë xuta xi catisahmi tangun me cjuatacun rë me cojo Nina. ²¹ Jesucristu ne, tsajin mé jyë rë me xi tjin, peru ngatsë naja ngayaan ne, Nina casahmi me xi Jesucristu ne, sacuaha xi jercu tjin camahani jyë rë me. Cuatjin casahmi Nina cojo sa xi ngayaan xi tjin tangun cjuatacun naja cojo Jesucristu ne, hacuaha jemu tyjahi camahani cuma cjuatacun naja sacuatjin tyjahi cjuatacun rë Nina.

6 Hane xi tinihñi tangun xa cojo Nina ne, hacuaha nújin cojo nuju ta, mijí rë xi tu mahya xi casacu nuju cjuandaja rë Nina. ² Cachja Nina cuitjin xcun xujun rë me:

Ngu hora ndajyihi ne, cahndë cjuarë canoje cojo ná;

ngu nixtin xi vetjutje xuta ne, cavisécori.

Quihndë ne, ha cavechu ngu hora ndajyihi vëhë, sacuatjin cachja Nina; ha cavechu ngu nixtin xi tivetjutje xuta.

³ Ngayin ne, nihñi camahani xcusun xi sahmi xi secjan cjuatacun rë xuta, sá tu choho cuichja xuta tsëhë xa xi tinihñi. ⁴ Yëjë xcusun xi tivatjin tijima xcun xa xi tinihñi ne, tsingacun rë xuta ta

ngayin ne, tiviseuiin jain rë Nina cojo xa xi meje rë me xi nihñi. Jemu cjin cjuacjintacun xi caca niji: tjin hora ne, jemu cavatjin cjuañihi, tjin hora ne, cavatjin ngu cjuandya jyë, tjin hora ne, casacuinyiin niji hacutjin naxintjin yojo niji. ⁵ Tjin hora ne, cavaja niji xuta, tjin hora ne, cavincha niji me ndavaya, tjin hora ne, choho casahmi xutacjin cojo niji, tjin hora ne, jemu chja xa canihñi, tjin hora ne, camaji catsjuñifin, tjin hora ne, hisca casacuiin mé xi xiní. ⁶ Hacuaha tsejen xi tiviseuiin jain rë Nina ngatsë rë xi tyjahi xahasen niji, vechu cjuatacun niji, jemu jyë tacuin, jemu nihñi cjuandaja, jiya Hasen rë Nina cahntsua xahasen niji, nguñaja tacuin xi hmu tacuin xinguin, ⁷ hacuaha suvá cjuaquixi tjin rë cjuatacun niji, Nina ne, sua niji me ngahñu. Hatuxa cjuaquixi cjuarë xi nújin, há xi titihín jimachaya rë xuta cjuarë Nina, o há xi tinaxintjin yojo niji tsëhë xuta xi choho chja tsijin. ⁸ Yahnga xuta ne, faharcun me ngayin, yahnga me ne, faharcuaain me ngayin. Yahnga xuta ne, ndaja chja me tsijin, yahnga me ne, choho chja me tsijin. Xi má rë ngujo xuta ne, jemu ndacha ngayin, handasa quixi ngayin cojo ngasunhndë niji xi tivanguin cuijin. ⁹ Yahnga xuta ne, hisca hvín me yo ngayin, peru yahnga me ne, vëë me ngayin. Ngayin ne, sacuaha xi ha tiveyin, peru cjëë cueyin ta nechincuihin cjuahñu. Sahmi xuta ngayin castigu, peru hacuiin tsiquehen niji me. ¹⁰ Sacuaha xi jemu choho má rë xahasen niji, peru xahasen niji ne, hatuxa jemu sua rë. Sacuaha xi jemu yumi ngayin, peru jemu nihñi nchina xuta cojo cjuarë Nina. Sacuaha xi tsajin camahani mé xi tjin niji, peru ha tsijin yëjë ni xi tjin ngasunhndë.

¹¹ Ngayun xuta Corinto ne, ha canújin cojo nuju yëjë ni hacutjin ningatihin tacuin, hacuaha jemu hmu tacuin nuju. ¹² Ngayin ne, hacuiin camachuva cjuah-

mutacun xi tjin niji cojo nuju ta ngayun xi camachuva cjuahmutacun xi jiya cahntsua xahasen nuju. ¹³ Vêhê xi chjá cojo nuju sacuahã xi quihndi naha ngayun, catamajyê sa cjuahmutacun xi tjin nuju sacuahã cjuahmutacun xi tjin niji cojo nuju.

Yungun rê Nina xi quicun me ngayaan

¹⁴ Peru mijí rê xi nihñu tangun cojo xuta xi macjaain rê me cjuã rê Jesucristu sacuatjin ma hñu jo chu ndyaja xi tangun cjue chu. Sacuahã cjuandaja ne, matanguaain camahani cojo cjuatsehen. Hacuaha cumaji cuma jñu hiscan xi jemu hasen. ¹⁵ Cumaji camahani cumatangun cjuatacun rê Jesucristu cojo cjuatacun rê Satanás. Hacuaha cumaji camahani cumatangun cjuatacun rê ngu xuta xi macjaain rê me cjuã rê Jesucristu cojo cjuatacun rê ngu xuta xi macjaain rê me cjuã rê Jesucristu. ¹⁶ Sacuahã yungun rê Nina xi cjuaquixi ne, cumaji cuiyuju nina xi tsindaja xuta. Hane ngayaan ne, sacuahã yungun rê Nina xi quicun me ngayaan ta, tsêhê xi suvá Nina cachja me cuitjin:

Ngahan ne, cuitejñacahndê cahntsua xahasen rê me,
hacuaha tsujyêhêya ngajñi rê me;
hane ngahan cuma nina rê me ngahan,
hacuaha me xi cuacun vêhê ne, cuma me xuta naha.

¹⁷ Hacuaha cachja sa Nina cuitjin:
Vêhê xi tetjunxun tsêhê xuta xi cuacun faharcun me nina xi mandaja, hacuahã nechunxun tsêhê me;
mijí rê xi nicujun sa xcusun xi chjá cojo nuju xi tsavi.

Xi cuatjin nihñu ne, cuitejña ngatsê nuju ¹⁸ hacuahã ngahan ne, cuma ngahan nahmi nuju,

hane ngayujun ni ne, hacuahã cuma ngayun quihndi naha,

chja Nai naja, me xi ma sahmi yêjê ni xcusun.

7 Quihndê ngayujun ni tsan ne, tsêhê xi cuatjin cachja Nina xi sahmi me cojo naja ne, meje rê xi cuiyujunxen yêjê ni cjuatsehen xi meje rê yojo naja o sa xi ningatahan tacun. Hane xi rcun ngayaan Nina ne, meje rê xi nihña ngahñu xi cuma tyjahi xahasen naja, cuma tyjahi cjuatacun naja.

Cavindeya cjuatacun rê xuta Corinto

² Nuxuhun xahasen nuju xi cuma niji. Hisca ngu ngayun ne, hacuiin choho canihñi cojo nuju; hisca ngu ngayun ne, hacuiin caninguetsin cjuatacun nuju; hisca ngu ngayun ne, hacuiin cavin-dachin nuju. ³ Hacuuiin titsicaneje jyê nuju xi cuatjin chjá cojo nuju. Ha cachjá cojo nuju ta hatuxa jemu vinga niji ngayun, hisca tihín yojo niji ngatsê nuju sa xi cuatjin meje rê. ⁴ Jemu camangu cá-cun cojo nuju, hacuahã hya xi visiajme cojo xuta ne, jemu vaxéndaja nuju.

Jemu casacu ná cjuetacun. Jemu sua ma rê xahasen naha ngajñi rê yêjê cjuañihi xi cavatjin camá.

⁵ Hisca nixtin xi caphin nguêhe estadu Macedonia hisca quihndê ne, cjêê cjuahajenda xahasen niji, ta yêjê ni nixtin vihi ne, jercu cjín cjuañihi tivatjin tijima. Ticjan xuta cojo niji, hacuahã jemu macjín tacuin. ⁶ Peru Nina xi sua cjuetacun xuta yuma ne, hacuahã cuatjin casua niji me cjuetacun hya xi cafehe cha Tito. ⁷ Hacuuiin tsêhê xi cafehe ni cha xi casacu niji cjuetacun ta, hacuahã ngatsê rê cjuã xi cachja cha hacutjin xi casacu rê cha cjuetacun ngajñi nuju. Cachja cha cojo niji ta jemu meje nuju xi sacú xingueen. Hacuaha casuacuenda niji cha tsêhê cjuachoho xi tjin nuju. Hacuaha cachja cha ta jemu meje nihñu xcusun xi chuya ná. Vêhê xi hitsê sa camasua rê xahasen naha quihndê.

⁸ Hacuini choho ma ná xi cuatjin catsihindu nuju xujun vëhë, handasa choho camá nuju ngatsë rë cjuá xi cachjá cojo nuju. Choho camá ná hitsë ta, tsëhë xi cahvë ta cjuá naha jan ne, casua nuju cjuachoho ndastu ngu hora. ⁹ Peru quihndë ne, jemu ndama ná, hacuini ngatsë rë xi choho camá nuju ta ngatsë rë xi sacuaa cjuachoho xi camá nuju ne, vëhë casahmi xi canindeyun cjuatacun nuju. Hacuaha hya xi choho camá nuju ne, canihñu hacutjin chuya rë Nina, vëhë xi tsajin mé xi choho cavatjun camá ngatsë rë cjuá xi canihindin nuju. ¹⁰ Hya xi nihñachehen hacutjin chuya rë Nina hora xi choho ma naja ne, vëhë sahmi xi nindeyan cjuatacun naja cojo sa xi cuetjuntjen tsëhë jyë naja. Hane xi cuatjin sahmi ngu xuta ne, tsajin yo xi chuyiin rë. Peru hya xi tu choho má naja hora xi vatjun ngu cjuachoho sacuatjin sahmi xuta ngasunhndë ne, vëhë sahmi xi cueyan. ¹¹ Chutsujun hacutjin canihñu hya xi canihñu hacutjin chuya rë Nina ngajñi rë cjuachoho xi cavatjun camá: jemu nguñaja tacún; jemu ndaja catuhun cjuaquixi nuju; hisca camacjan nuju; hisca carcun camá; canújun ta jemu meje chun ná ngu ndiya nga; jemu meje nihñu xcusun xi chuya ná; ngutjen canihñu castigu xuta xi choho casahmi me. Cuatjin camatsejen xi tyahi jain cjuatacun nuju hacuaha tyahi jain xahasen nuju. ¹² Vëhë xi hya xi cuatjin catsihindu nuju xujun vëhë ne, hacuini ngatsë rë xuta xi cavangui jyë, hacuini ngatsë rë xuta xi choho cavatju me camá ta xi cuatjin catsihindu nuju ne, ngatsë rë xi meje ná xi cuma tsejen hacutjin xi meje nihñu xcusun xi chuya niji ta, tsëhë xi hyun ta cuatjin xi meje rë Nina. ¹³ Hane hacuaha ngatsë rë vëhë xi ngayin ne, casacu niji cjuetacun.

Peru hacuini súv cjuetacun vëhë ni xi casacu niji ta hacuaha jemu ndaja camá rë xahasen niji ngatsë rë cjuasua xi tjin

rë cha Tito. Cuatjin tjin rë cha cjuasua ta, tsëhë xi ngayujun ni ne, catuhun rë cha cjuandaja cjuajeya. ¹⁴ Jemu cavaxëndaja nuju hya xi cachjá cojo cha Tito, hane hacuini cavétju sava ngahan xi camá ngascan. Hatuxa cjuaquixi yëjë ni cjuá xi canújin cojo nuju. Hacuaniitjin ni cjuá xi canújin tsujun cojo cha Tito ta hacuaha cavetjucaa cjuaquixi. ¹⁵ Hacuaha jemu hmu cacun nuju cha, xi tsinguitsjen cha hacutjin canihñu yëjë hacutjin xi cachja cha cojo nuju, cojo hacutjin jemu ndaja cachjuhuncun cha hya xi cachjuhuncun cha. ¹⁶ Jemu ndama ná ta tsëhë xi hvë ta ngayun ne, mangu tacún cojo ná.

Cjuatjo xi cjeu Jerusalén

8 Ngayujun ni ne, nguehe tihín cumachaya nuju hacutjin casua Nina cjuandaja rë me cojo xuta xi matangun me yëjë ni yungun xi siu taha ladu tsëhë estadu Macedonia vi. ² Xuta xi cuicun vi ne, handasa jercu cavatju me cjuañihi, peru jemu sua ma rë xahasen rë me. Handasa jemu yuma camahani me ne, peru jemu jyë cjuatjo xi cavisecoo me. ³ Cahvë xi casua me tucutjin xi camá casua me, hisca quisun sa casua me. Hacuaha cjuatacun rë súv me ⁴ xi cafehya me xi tihín cahndë xi cojo me sahmi me cjuandaja xi cuisecoo me xuta ladu rë Jesucristu ngajan Jerusalén. ⁵ Hitsë sa ndaja casahmi me xi cuma rë sacuatjin caningatihin tacuin ngayin. Titjun ne, casua me yojo rë me cojo Nai naja ne, sehe casua me yojo rë me cojo niji ngayin, sacuatjin meje rë Nina. ⁶ Vëhë xi canújin cojo cha Tito xi, sacuatjin xi ha cavetsihin casahmi tangun cha ngu cjuatjo vëhë ngajñi nuju hatsëë ne, quihndë ne, hacuaniitjin ni catitsinguijnetaha cha hiscan xi cavejñavasen. ⁷ Ngayujun ni ne, jemu tjin ngu tacún cojo Jesucristu; jemu ndaja nújun cjuá rë Nina; jemu vechu cjuatacun nuju; jemu nguñaja

tacún xi meje cuisecun; jemu tjin nuju cjuahmutacun cojo niji. Sacuatjin tivangun xcun cojo yějě ni cjuatacun vėhě ne, hacuaha meje niji xi cuanitjin ni cuangun xcun cojo ngu cjuandaja vi xi cuisecun rě xuta yuma.

⁸Hacuiin tivitěxa nuju xi cuitjin tichjá cojo nuju ta, tu titsingácun ni nuju hacutjin sahmi nguñaja cacun xuta Macedonia, cojo sa xi cuma tsejen há nechun nguñaja tacún jain cojo cjuahmutacun xi tjin nuju. ⁹Ha ndaja hyun hacutjin casahmi Nai naja Jesucristu cjuandaja. Handasa jemu tjin rě me cjuanchina peru catsiyuma me yojo rě me ngatsě rě xi hmu cacun nuju me, cojo sa xi ngatsě rě xi camayuma me ne, ngayun xi cuisuhun ladu rě me ne, sacú nuju cjuanchina xi sua Nina.

¹⁰Nguehe cuichjá cojo nuju hacutjin xi tsingátaha cákun. Ngayun xi hatuxa meje cuisecun hacuaha hisca cuyanu cavetsuhun cavisecun ne, ¹¹quihndě ne, meje rě xi ninguijnutuhun cjuandaja vėhě. Tuhun hitsě xi tjin nuju sacuatjin canihñu titjún xi cojo cjuasua catuhun. ¹²Sa xi ngu ngayaan meje jain tahan ngu cjuatjo ngu cjuandaja ne, cuma tahan tucutjin xi tjin naja xi tahan ta, vėhě xi chuya rě Nina. Nina ne, fehyaain me hisca cojo xi tsajin naja.

¹³Hacuiin meje rě xi ngayun ne, hisca cuma chaja nuju ngatsě rě xi cuisecun rě jingu sa xuta. Xi meje rě ne, tangun ni cuatjun ngayejen ni. ¹⁴Ngayun xi cjín tjin nuju quihndě ne, cuma cuisecun rě me xi tsajin rě, cojo sa xi hya xi ngayun tsajin nuju ne, me xi cuacun vė ne, cuma cuisecoo nuju me. Cuatjin xi tangun cuatjun ngayun cuma cojo rě me. ¹⁵Cuitjin chja ngu cjua xcun xujun rě Nina: “Xuta xi cjín cafaya me ne, cavanguiin rě me; hane xuta xi chuva cafaya me ne, camachajin rě me.”

Cha Tito cojo xicjin cha

¹⁶Suá nacuechji rě Nina xi cavuxaha me cjuatacun rě cha Tito cojo sa xi cuma meje cuisecoo nuju cha sacuatjin xi meje ná ngahan. ¹⁷Hya xi cachjá cojo rě cha xi cjuetjengui nuju cha ne, jemu cachuya rě cha cjua jan. Hane tsěhě xi jemu tjin rě cha cjuasua xi sahmi cha tu mé ni xi satěxa rě cha ne, vėhě xi cojo cjuatacun rě suvá ni cha ne, cjuetjengui nuju cha. ¹⁸Hacuaha ningatjin sa ngu cha ladu naja cojo cha Tito. Xuta xi matangun me yějě ni yungun ne, jemu vaxěndaja me cha xi cuajyihi vė, xi jemu ndaja xa sahmi cha xi tsinguitsojo cha cjuandajyihi xi chja tsěhě Jesucristu. ¹⁹Hacuaha xuta xi cuacun jan ne, casua me cha xa xi cuisecoo niji cha xi cuanguin chani ngu cjuandaja vihi ngajan Jerusalén. Cuitjin tinihñi cjuandaja vihi cojo sa xi cuma tsejen ta Nai naja ne, jemu jyě hnga me cojo cjuatacun rě me hacuaha cojo sa xi cuma tsejen ta nguñaja tacuin xi vise-cuin xinguin. ²⁰Jemu nechin cuidado, sá tu yo choho cuichja tsijin tsěhě cjuatjo rě xuta vi xi tacun ntsin. ²¹Meje nihñi cjuandaja, hacuiin suvá xcun Nina ni ta hacuaha cojo xcun xuta.

²²Hacuaha cojo cha xi cuacun jan ne, ningatjin sa ngu cha ladu naja. Jemu cjín xcusun casahmi cha xi camatsejen xi jemu nguñaja cacun cha. Quihndě ne, hitsě sa nguñaja cacun cha xi meje cjue cha ta, tsěhě xi jemu camangu cacun cha cojo nuju. ²³Sacuaha cha Tito ne, jemu visecoo ná cha xi cuatjin visecuin nuju. Sacuaha cha ladu naja xi cuacun vė ne, xuta rě yungun catsingatju me cha hacuaha sahmi jyě sahmi hnga cha Jesucristu. ²⁴Vėhě xi meje ná ngahan xi tuhun cumachaya rě cha xi cuacun vė cjuahmutacun xi tjin nuju, cojo sa xi yějě ni xuta rě yungun cumachaya rě me ta quixi jain cjua xi nújin xi cuatjin naxin-ndijin nuju.

Cjuatjo xi cjue Jerusalén

9 Quihndê ne, hacuiin hatuxa meje rê xi tsihindu nuju hacutjin tijima tsêhê cjuatjo xi cjue cuisecoo rê xuta ladu rê Jesucristu ngajan Jerusalén ta, ² tsêhê xi ha hvê ta jemu meje cuisecun rê xuta xi cuacun vê. Vêhê xi ha cachjá cojo xuta nguehe Macedonia xi ngayun xuta Acaya ne, hisca cuyanu cavetsuhun canihñu tangun tujún. Hane tsêhê xi jemu nguñaja tacún xi cuatjin canihñu ne, vêhê casahmi xi jemu cjín xuta Macedonia xi hacuaha caviyujungu cacun me xi cuisecoo me. ³ Vêhê xi tsingátju nuju ngujo cha ladu naja xi ha cachjá cojo nuju jan, sá tu cuetjicaain yêjê ni cjua xi cachjá tsujun tsêhê cjuacjintacun vêhê. Meje ná xi tjin chjine ngayun sacuatjin xi ha cachjá tsujun, ⁴ tuxa má sa xi cojo ngujo xuta Macedonia cuinduva me cojo ná ndyá, hane tsajin tjin chjine ngayun ne, jemu cuixu sava ngayin, hisca cojo ngayun cuixu sava ngayun ta, tsêhê xi cuatjin camangu tacuin cojo nuju. ⁵ Vêhê xi catsingátaha cáacun xi casahmi ná ngujoyê xi caféhya cha xi cuacun vê xi cjuetjengui cha ngayun cojo chaja sa, cuisecoo nuju cha xi ninguxunñuju tujún xi canújun jan. Xi cuatjin tjin chjine cjuandaja nuju vê ne, ngajan cuma tsejen xi hacuiin ngujoyê canihñi nuju ta cojo cjuasua nuju xi canihñu.

⁶ Ha hyun ta yo xi chuva tjê cuincha ne, hacuaha chuva tutjê sacú rê; hane yo xi cjín tjê cuincha ne, hacuaha cjín tutjê sacú rê. Hacuanitjin ni ngayun cojo cjuatjo nuju. ⁷ Jima ngu ngayun ne, meje rê xi tuhun hacutjin xi cavejñu tacún xi tuhun, peru hacuiin taha choho ma tacún, hacuiin cojo ngujoyê. Cuatjin nihñu ta ngu xuta xi cojo cjuasua sua me ne, xuta vêhê xi jemu chuya rê Nina tsêhê me. ⁸ Nina ne, cuma sua nuju me yêjê ni cjuandaja rê me, cojo sa xi tsajin nixtin xi cuma chaja nuju; hisca cuan-

gui sa nuju, cojo sa xi cjín xcusun cjuandaja cuma nihñu. ⁹ Xcun xujun rê Nina ne, cuitjin chja:

Xuta ndaja jan ne, chuva cjín sua me xuta yuma.

Hane cjuandaja xi sahmi me vêhê ne, tsajin nu tsajin nixtin xi chaya rê Nina.

¹⁰ Nina, me xi sua tjê xi nitjen cojo niñu xi chinê ne, hacuaha sua nuju me yêjê ni tjê xi mameje nuju, hacuaha me vêhê sahmi me xi cuma cjín sa tutjê xi sacu nuju. Hacuaha sahmi me xi cuma yehe sa yêjê ni cjuandaja xi nihñu. ¹¹ Cuatjin sahmi Nina xi jemu ndaja cuatjun cuma, cojo sa xi yehe cjuandaja cuma nihñu. Hane xi nihñi entregadu cjuandaja nuju jan cojo xuta yuma ne, sua me nacuechji rê Nina. ¹² Xi cuitjin cuanguinchani ngu cjuandaja nuju vê ne, hacuiin suvá xi nicjen cjuachaja xi tjin rê xuta ladu rê Jesucristu ta, hacuaha nihña xi jemu cjín xuta ne, sua me nacuechji rê Nina. ¹³ Xi cuitjin nihñi ngu cjuandaja vê ne, ngajan cuma tsejen xi ngayun ne, tiniñu jain sacuatjin xi nújun xi macjain nuju cjuandajiyi xi chja tsêhê Jesucristu. Hacuaha cuma tsejen ta jemu ndaja tivisecun rê xuta Jerusalén, hacuaha jemu ndaja visecun rê yêjê ni xuta yuma xi ladu rê Jesucristu. Vêhê xi ngahan cojo yêjê ni me xi visecoo ná ne, jemu nihñi jyê Nina. ¹⁴ Hacuaha xuta ladu rê Jesucristu ngajan Jerusalén ne, sahmi me oración rê me cojo Nina ngatsê nuju, hacuaha jemu cuinga rê me ngayun xi cumachaya rê me tsêhê cjuandaja xi jemu casua nuju Nina. ¹⁵ Nacuechji rê Nina xi casua naja me ngu cjuandaja ngu cjuatjo xi hisca hyaan hacutjin cuinújan xi venguichji rê.

Vaxêtje Pablo xa xi casua Nina me

10 Ngahan Pablo ne, nguehe cuichjá cojo nuju cojo cjuandaja cjuajeya rê Jesucristu. Chja yahnga xuta ta ngahan ne, hya xi tejñataha tangun cojo

nuju ne, jemu jeya ngahan; peru hya xi cjin tejñataha tsujun ne, jemu hñu cju naha cojo nuju. ²Ndatjin, peru nguehe cjuéhya nuju ngu cjuandaja: xicanihñuu xcusun xi sahmi xi sahme hñu cju naha hya xi cjuétjengë nuju. Ha hvë ta cuma sahme hñu cju naha cojo xuta xi chja cojo nuju xi ngayin ne, suvá cjuatacun rë xuta ngasunhndë xi quichihin. ³Quixi jain xi xuta ngasunhndë ngayin, peru hacuiin sí rcuin sacuatjin sí rcu xuta ngasunhndë. ⁴Hacuiin chicjin cojo quicha ta Nina ne, sua niji me ngahñu xi caa niji ninguetsinyin cjuatacun rë xuta xi tsitjungui me Nina; xi visiajmí ngayin cojo xuta xi cuacun jan ne, ngutjen tsejen ta machjiriin cjuatacun rë me. ⁵Ninguetsinyin cjuaxin xi sahmi xi maji vijnercu me yo xi Nina, hacuaha ninguíxin cjuatacun rë xuta cojo sa xi tsingataha cacun me sacuatjin meje rë Jesucristu. ⁶Hane hya xi cuechu nixtin xi ngayun ne, jemu ndaja camahani cuinuhyun tsëhë Nina ne, ha tjin ngu tacuin xi nihñi castigu yëjë ni me xi vihndiin tsëhë Nina.

⁷Ngayun ne, tiningatuhun tacún sacuaha tsingataha cacun xuta ngasunhndë. Sa xi tjin yahnga xuta xi tsingataha cacun me xi ladu rë Jesucristu me ne, ndatjin; peru hacuaha catitsingataha cacun me xi, sacuatjin xi ladu rë Jesucristu me ne, ngayin ne, hacuaha cojo ngayin ladu rë Jesucristu ngayin. ⁸Handasa cuátjutaha hitsë xi cuichjá cojo nuju sacuaha tsëhë xa xi casua niji Nai naja ne, peru hacuiin cuma sava ná. Nai naja casua niji me xa vëhë, cojo sa xi cuisecuin nuju xi cuangunndujun xi mangu tacún cojo cju rë Nina, hacuiin xi ninguetsin cjuatacun nuju. ⁹Hacuaha mijí ná xi ningatuhun tacún xi meje cuinchárcun nuju cojo yëjë cju xi tsihindu nuju. ¹⁰Cuinújun ngu ngayun ta jemu hñu cju naha xi tsihindu nuju, peru hya

xi tejñataha cojo nuju ne, jemu yuma hasen ngahan, hacuaha hisca chuyiin nuju chuva rë xi visiajme. ¹¹Peru cuidadu xi cuatjin nújun ta, chuva rë xi nújin cojo nuju xcun xujun xi nihindin nuju quihndë xi xín nechintihin tsujun ne, ha chuva vëhë ni nihñi hya xi cuéchintihin nuju.

¹²Ngayin ne, vetjiin tacuin xi cuinújin xi tangun ngayin cojo ngujo me xi vaxëndaja suvá me yojo rë me. Xi cuatjin tsichuva me cjuatacun rë me ngajñi rë suvá me ne, jemu ngarca me. ¹³Ngayin ne, cuinujiin xi jemu ndaja canihñi ngu xa xi hisca canihñi. Ha tucutjin xa xi canihñi ne, ha vëhë ni xi cuinújin. Nina ne, me vëhë xi vitexa niji me jani hiscan cuechin xi nihñi xa, hacuaha me vëhë cavitexa niji me xi catsanguin hisca ngajan nangui nuju. ¹⁴Vëhë xi hya xi ndaja nújin tsujun ne, hacuiin sacuaha xi vatjintihin rë xa xi casua niji Nina ta, tjun tjun ngayin cafihin nangui nuju cojo cjuandajyihi xi chja tsëhë Jesucristu. ¹⁵Hacuaha hacuiin naxinndijin yojo niji tsëhë ngu xa xi casahmi jingu sa xuta. Peru vetihin tacuin xi sacuatjin xi cuangun xcun xi hitsë sa ndaja cumacjain nuju Jesucristu ne, hacuaha hitsë sa jyë xa cuma nihñi ngajñi nuju. ¹⁶Ngajan xi cuma cuanguin tihín cumachaya rë xuta cjuandajyihi tsëhë Jesucristu hisca ngajan sa tsëhë nangui nuju. Xi cuatjin ne, tsajin yo cuichja xi ngayin ne, naxinndijin yojo niji tsëhë ngu xa xi jingu sa xuta casahmi me.

¹⁷Yo xi meje cuaxëndaja rë tu yo ni ne, cataxëndaja me Nai naja, sacuatjin chja xujun rë Nina. ¹⁸Cuatjin ta, xi naxenndajan suvaan yojo naja ne, machjiriin camahani. Xi machjirëhë ne, xi Nai naja cuaxëndaja naja me.

Chja Pablo tsëhë apóstol ndacha

11 Nijyun tacún. Caticaa nuju ndastu ngujo cjuasca xi cuichjá

cojo nuju. Handasa hacuiin sca ná peru cuichjá cjuasca ta, ²tsëhë xi jemu chini ngahan tsujun. Nina ne, casua ná me cjuatacun xi cuatjin chini ngahan ta, tsëhë xi ngayujun ni ne, sacua ha ngu quihndi naha xi chjuun xi casuá xi cuixan cojo ngu ni xihin. Cuatjin nuju ngayun. Hane xihin jan ne, hacui Jesucristu. ³Hatsëë ne, chu yë cavindacha chu na Eva cojo cjuatacun tsehen rë chu. Hane hacua ha jemu macjín cákun tsujun ta sá tu cuatjin ningatuhun cumandacha ngayun, hane ha quihndë hacuiin nguñaja tacún cuangunndujun cojo ndiya rë Jesucristu xi tivanguncujun. ⁴Hya xi fehe ngu cha xi sua cumachaya nuju ngu cjua xi chja tsëhë Jesús xi hacuiin tangun cojo cjua xi cachjá cojo nuju ntsacu cavetsihin ne, ¿mé má cha vëhë xi jemu ndaja caa nuju cojo cjua rë cha? O sa xi chjuhunntsun ngu cjuatacun xi hacjahi, xi hacuiin tangun cojo cjuatacun xi cachjuhunntsun ntsacu cavetsihin ne, ¿mé má cjuatacun vëhë xi jemu ndaja caa nuju cojo? O sa xi fehe ngu cjuandajyihi xi hacjahi, xi hacuiin tangun cojo cjuandajyihi xi cachjuhunntsun ntsacu cavetsihin ne, ¿mé má cjua vëhë xi jemu caa nuju cojo?

⁵Quihndë ne, nguehe cuetsehen cuichjá cojo nuju cjuasca. Caticaa nuju hitsë ta, tsëhë xi xi má ná ngahan ne, hacuiin tjëngë ngahan xi cuma rë cha xi cuacun nújun xi apóstol yehe cha. ⁶Handasa cjëë scutaya hacutjin xi jemu ndaja cuma cuichjá cojo xuta, peru jemu cavutaya cjuatacun rë Nina. Hane ngajñi rë yëjë ni xcusun xi canihñi, ngajñi rë yëjë ni cjua xi canújin ne, cahyun suvun hacutjin vechu cjuatacun niji.

⁷Catsingujne suva yojo naha cojo sa xi ngayun ne, cuma yehe cuma hnga ngayun cojo cjuatacun nuju. Hane xi ca-

suá camachaya nuju cjuandajyihi xi chja tsëhë Nina ne, cafaan camahani chjí tsujun. ¿Mé jyé quítjen xi cuatjin casahme? ⁸Ngahan ne, cafahá tujún tsëhë xuta xi matangun yungun xi yahnga. Me vëhë cavechji ná me cojo sa xi cuma cuisécoo nuju ngayun. ⁹Hora xi camachaja ná hya xi cavitejñataha cojo nuju ne, hisca ngu ngayun ne, casuandyaan nuju xi cuiscun ná ta, ngujo cha xingueen xi canduva cha tsëhë Macedonia ne, cha vëhë casua ná cha mé xi casahmi chaja ná. Hatuxa cavitejña cuidadu xi tsajin camahani mé cjuandya xi suá nuju, hacua ha cuanitjin ni sahme nchujunni nguini. ¹⁰Jiya cjuaquixi rë Jesucristu cahntsua xahasen naha. Hatuxa cuichjá sa cojo xuta ngajan yëjë ladu tsëhë estadu Acaya hacutjin casuandyaan camahani nuju. ¹¹¿Mé má cuatjin cuichjá sa? ¿Há tsëhë xi mijí ná ngayun? Vëë Nina ta jercu meje ná ngayun.

¹²Peru sacuatjin xcusun xi ha sahme ne, ha cuatjin cjuënduju sa sahme, cojo sa xi tsinguétsun cjua rë cha xi cuacun vanguise chuva rë xi cuichja cha xi xa xi sahmi cha ne, tangun cojo xa xi nihñi. ¹³Cha vëhë ne, hacuiin apóstol xi cjuaquixi cha. Tu vindacha ni cha xi chja cha xi apóstol tsëhë Jesucristu má cha. ¹⁴Peru hacuiin fircun ná xi cuatjin ma vindacha cha ta, hisca Satanás ne, ma vindacha naja xi sahmi yojo rë sacua ha ngu xi catsingatju Nina. ¹⁵Vëhë xi cojo cha xi cuacun sahmi xa rë xitsehen vë ne, hacuiin chja ma sahmi cha xi cuma cha sacua ha cha xi sahmi cjuaquixi jain. Peru cha xi cuacun vë ne, ha cuatjin cjuë cha sacuatjin meje rë xcusun xi sahmi cha.

Cjuañihi xi vatju apóstol Pablo

¹⁶Cuichjá nga cojo nuju ngu ndiya ta, xicaningatun tacún xi sca ná. O sa tsajin ne, handasa sacua ha xi sca ná má nuju ne, peru tuhun cahndë xi hacua ha cojo

ngahan ne, cuaxëndaja hitsë yojo naha sacuatjin sahmi cha xi vaxëndaja yojo rë vë. ¹⁷ Xi cuitjin vaxëndaja yojo naha ne, hacuiin tichjá sacuatjin chja Nai naja ta tichjá sacuaaha xi sca ná. ¹⁸ Jemu cjín xuta xi vaxëndaja me yojo rë me ngatsë rë xcusun xi cun xi má suvá me hacuaaha xi vatju suvá me má, vëhë xi hacuaaha cojo ngahan ne, cuatjin cuaxëndaja hitsë yojo naha. ¹⁹ Xi má nuju ngayun ne, jemu quicuntacun. Peru jemu ndaja caa nuju cojo cjuarë xuta sca rë. ²⁰ Jemu caa nuju tu yo ni xi vitexa nuju hacuaaha xi mosu rë ngayun, sacuaaha xi matitjun me tsujun; tu yo ni xi sahmi jyë sahmi hnga suvá yojo rë, tu yo ni xi sahmi chuva nuju. ²¹ Peru savaain camahani ná xi cuichjá cojo nuju xi ngayin ne, sacuaaha xi jemu yuma hasen ngayin xi cuatjin nihni cojo nuju.

Peru sacuatjin vetju cacun cha xi cuacun jan xi vaxëndaja cha yojo rë cha ne, hacuaaha ngahan ne, cuatjin vetju cáacun xi cuaxëndaja yojo naha. Peru sacuaaha xi sca ná xi cuitjin tichjá cojo nuju. ²² ¿Há ma chja cha hne hebreo? Ngahan ne, hacuaaha ma chjá. ¿Há xuta tjë rë Israel cha? Ngahan ne, hacuaaha xuta tjë rë Israel ngahan. ¿Há tjë rë Abraham cha? Ngahan ne, hacuaaha tjë rë Abraham ngahan. ²³ ¿Há sahmi cha xa rë Jesucristu? Sacuaaha xi jercu sca ná xi cuitjin chjá, peru ngahan ne, hitsë sa ndaja sahme xa rë Jesucristu. Hitsë sa jercu casahme xa xi cuma rë cha xi cuacun vë. Hitsë sa cjín ndiya cëjë ndavaya. Hitsë sa cjín ndiya casehen ná. Jemu cjín ndiya xi hitsë sa ne, caveya ngahan. ²⁴ Xutaxa rë xuta Judea ne, hñú ndiya casahmi ná me castigu xi cavaja ná me can tyjuhun ñuju can tyjuhun ñuju cuarta xi ngu ngundiya. ²⁵ Jyan ndiya ne, ya cavaja ná xuta; ngundiya ne, cavetaha ná me ndyojo; jyan ndiya nga ne, quijingahma barcu xi cjuicojo ná; ngundiya tsëhë jyan ndiya vëhë ne, cavitejñaya ngu nix-

tin cojo ngu nixten ngajni ndachacun. ²⁶ Jercu fé camahani ngu nangui; hane xi cuatjin tsujyëhëya ne, hacuaaha jemu tsavi xi vátju ndajyë, jemu tsavi tsëhë cha chëjë, jemu tsavi cojo cjuahngatacun xi sahmi xuta nangui naha, hacuaaha tsavi cojo cjuahngatacun xi sahmi xutaxín; jemu cojo tsavi xi tejñataha ngu nandya; jemu cojo tsavi xi tejñataha ngu nguijña; jemu tsavi xi vátju ndachacun; jemu tsavi xi tsujyëhëya cojo cha ndacha xi chja cha xi cha ladu naja cha. ²⁷ Jemu chja camahani xa xi casahme hacuaaha jemu chja cavátju camá; jemu cjín ndiya xi hisca camaji cafáñafë; tjín hora ne, jemu yojo ná, jemu xinda ná; jemu cjín ndiya xi cajiñë niñu; tjín hora xi jemu hnchan ná, hacuaaha camachaja tsjian naha.

²⁸ Hane tsëhë yëjë ni cjuacjintacun xi cuacun vëhë ne, nchu nchujunni ne, sesuntaha sa ngu: jemu vityanguë cáacun tsëhë xuta xi ma tangun me yëjë ni yungun, hacutjin tivatju me tijima. ²⁹ Sa xi choho vatju ngu xingueen má ne, ngahan ne, hacuaaha choho ma ná. Sa xi yo sahmi xi cjuinenguia ngu xingueen ngajni rë cjuatsehen ne, hacuaaha ngahan ne, jemu cuma cjan camahani ná. ³⁰ Sa xi meje rë xi cuaxëndaja yojo naha ne, cuichjá cojo nuju hacutjin yuma hasen ngahan. ³¹ Nina Nahmi rë Nai naja Jesús ne, me vëhë xi hatuxa jyë hnga me yëjë nu yëjë nixtin ne, me vëhë xi vëë jain me ta hacuiin tivindácha xi cuitjin tichjá cojo nuju. ³² Ngundiya hya xi cavitejñataha ngajan nandya Damasco hiscan vitexa Aretas ne, ngu xutaxa rë xi catsingatju Aretas ne, caviyujutaha me sindadu tingotjo rë nandya jan xi cjuaha cha ngahan cjucojo ná cha. ³³ Peru ngujo xingueen ne, quijicojo ná me xcun ngu ventana tsëhë taha xihndë tsëhë hnchua rë nandya jan, caveya ná me cahntsua ngu changa jyë, sehe

catsitujne ná me taha candatsen. Cuatjin camá xi cavétjutjê tsêhê gobernador jan.

Chja nijña cojo Pablo

12 Tjin ná xi cuaxëndaja sa yojo naha. Hacuaha handasa tsajin mé machjirêhê xi cuitjin sahme ne, peru ngheue cuichjá cojo nuju hacutjin casahmi Nai naja xi cuichja nijña cojo ná ngu jo ndiya. ²⁻³ Ngahan ne, hvê ngu xihin xi ma ladu rê Jesucristu, hane camateñuju nu jan ne, quijicojo rê cha hisca hiscan majyan ngahnga hisca hiscan tacun Nina. (Xihin xi quijicojo rê ne, hacui Pablo.) Hveen ne, ¿há xi cojo yojo rê cha quiji cha? ne, o ¿há xi hasen ni rê cha xi quiji? ta, suvá Nina ni vëe me hacutjin camá. Mé ta cha xi cuajyihî vë ne, ⁴ quijicojo rê cha ngajan ngahnga ngu cahndê ndajyihî xi hmî paraíso, hane ngajan cahndê cha cjua xi hisca sacuiin chuva rê hacutjin cuichja nga cha cojo xuta, hacuaha hisca sacuiin cahndê xi cuya cuichja nga cha cjua jan cojo xuta. ⁵ Cuaxëndaja xcusun xi casahmi Nina cojo rê cha vëhê, peru hacuiin cuaxëndaja yojo naha suva; sa xi cuichjá tsahan ne, cuichjá hacutjin xi yuma hasen ngahan. ⁶ Sa xi meje cuaxëndaja sa yojo naha ne, hacuiin sca ná ta, tsêhê xi suvá cjuaquixi xi cuichjá. Peru ha quihndê sahme sa cuatjin ta, tsêhê xi mijí ná xi ngatsê rê cjua vëhê ne, tsingataha cacun ngu xuta xi jemu ngu cha machjirêhê ngahan. Xi meje ná ne, xi catutsejen xuta jan xcusun xi sahme hacuaha catisiñuju me cjua xi chjá, sehe tsingataha cacun me ne, há machjirêhê ne, o há machjiriin ngahan.

⁷ Hacuaha cojo sa xi hacuiin cuátjutaha xi ndaja tsingátaha cákun tsahan suva ngatsê rê cjuandaja xi casahmi Nina cojo ná xi cuatjin cachja nijña cojo ná ne, vëhê xi casua me cahndê xi Satanás ne, suandya ná sacuatjin suandya naja

ngu nahyá xi maji naxenxen, cojo sa xi hacuiin cuátjutaha xi ndaja tsingátaha cákun tsahan suva. ⁸ Jyan ndiya caféhya rê Nai naja xi cuetjuxin cjuandya jan; ⁹ peru cachja me cojo ná cuitjin: “Cjuandaja xi suá ri ne, vëhê yêjê ni xi mameje ri ta, tsêhê xi hiscan xi yuma hasen xuta ne, ngajan xi ma visehen ngahñu naha.” Cuatjin cachja me. Vëhê xi hisca nguñaja cákun xi vaxëndaja yojo naha ngatsê rê xi yuma hasen ngahan, cojo sa xi ngahñu rê Jesucristu ne, cuma cuisehen ngajñi rê cjuatacun naha. ¹⁰ Vëhê xi hisca ndama ná xi jeya ngahan, ndama ná hya xi choho chja xuta tsahan, ndama ná xi vátju ngu cjuandya jyê, ndama ná hya xi vátju cjuañihî, ndama ná hya xi sacuiyiin ná hacutjin cuaxétjê yojo naha. Jemu ndama ná xi cuatjin vátju má cjuacjintacun vëhê ngatsê rê Jesucristu ta, tsêhê xi hya xi jemu yuma hasen ngahan ne, hya jemu sacu ná ngahñu rê Nina.

Cjín tsingataha cacun Pablo tsêhê xuta rê yungun Corinto

¹¹ Ngahan ne, sacua ha xi sca ná, peru ngayun quitjun jyê xi cuitjin tichjá cojo nuju. Xi meje rê ne, ngayun ndaja cuinújun tsahan ta, tsêhê xi handasa chja yahnga xuta ta tsajin mé venguichji ná, peru cumaji cuatjutaha ná cha xi nújun xi apóstol yehe vë. ¹² Xcusun xi casahme ngajñi nuju ne, casua machaya nuju ta ngu apóstol xi cjuaquixi ngahan. Jemu caca ná cojo nuju xi cuatjin cavisé-coo nuju hya. Ngayun ne, jemu quijircun nuju hisca carcun xi cahyun cjuarcun xi casahme. ¹³ Tangun casahme ngajñi nuju cojo xi casahme ngajñi rê yêjê xuta rê yungun xi yahnga, cuenda xi casuandyaan nuju xi cuisekun ná tsêhê gastu naha. Sa xi cuaintjin xi casahme cojo nuju xi má nuju ne, nijyun tacún cojo ná.

Chja Pablo xi cjue me má jyan ndiya nandya Corinto

¹⁴ Quihndë ne, cuma jyan ndiya xi cjuétjängë nuju ne, hacuaha suandyaan camahani nuju ta, hacuiin xcusun xi tjin nuju xi meje ná ta suvun xi meje ná ngayun. Mijí rë xi nixti cuetjo tujún xi cuisecoo rë xutacha rë ta xutacha rë cuetjo me tujún xi cuisecoo rë nixti rë me. ¹⁵ Ngahan ne, cojo yëjë ni cjua-sua tsicjé ngahñu naha ngatsë nuju, hisca tsicjé ngahñu naha ngatsë nuju. Xi má ná ne, tucutjin xi hitsë sa vinga ná ngayun ne, ngayun ne, hitsë sa chuva vinga nuju ngahan.

¹⁶ Cuichja yahnga xuta tsahan ne: “Jéya. Hacuiin casuandya naja cha tsëhë gastu rë cha, peru tsëhë xi jemu quicun cacun cha ne, jemu cavindacha naja cha.” Cuatjin cuichja yahnga xuta tsahan. ¹⁷ ¿Há cavindácha nuju xi catsingátju nuju ngujo cha xi quijitjengui nuju cojo cjua naha? ¹⁸ Cachjá cojo cha Tito xi cjuetjengui nuju cha, hacuaha catsingátju sa ngu cha xingueen cojo cha Tito. ¿Há cavindacha nuju cha Tito vë? Jéya. Ha ndaja hyun ta cha vëhë ne, hya xi quitaha cha cojo nuju ne, tangun cjuatacun rë cha cojo cjuatacun naha, hacuaha tangun xcusun xi casahmi cha cojo xcusun xi ha casahme ngahan.

¹⁹ Ngu ngu ngayun ne, ningatuhun tacún xi cojo nuju ngayun titihín cjuaquixi niji. Peru hacuiin cuatjin ta, xcun Nina ne, cuitjin tinújin ngatsë rë xi tjin tangun cjuatacun niji cojo Jesucristu. Peru yëjë ni cjua xi tinújin ne, tinújin ngatsë nuju ngayujun ni, tsan, cojo sa xi cuma yehe sa cjuatacun rë Nina xi tjin nuju. ²⁰ Jemu macjín cáacun, sá nihñuu tutjin xi meje ná, hacuaha sá sahme tutjin xi meje nuju, hya xi cjuëhë nangui nuju. Jemu macjín cáacun, sá tacun si ngajñi nuju, sá tjin cjuachini ngajñi nuju, sá cjan nuju cojo xin-

gun, sá hnga tacún, sá tjin cjuandesu ngajñi nuju, sá tjin cjuachjataha ngajñi nuju, sá tjin cjuaxta ngajñi nuju, sá tujyë tinihñu. ²¹ Jemu macjín cáacun sá sahmi chuva Nina ngahan ngajñi nuju hya xi cjuëhë nga ngundiya nangui nuju; hacuaha jemu macjín cáacun, sa choho cuma rë xahasen naha ngatsë rë ngu ngu ngayun xi mijí nindeyun cjuatacun nuju hacuaha hacuiin caviyujunxun cjuatsehen xi nihñu, hacuaha cjuatsehen xi sahmi xuta cojo ngu xi hacuiin chjuun rë me, hacuiin xihin rë me.

Conseju xi sua Pablo

13 Quihndë ne, cuma jyan ndiya xi cjuétjängë nuju. Sacuatjin camahindu xcun xujun rë Nina xi jo o sa xi jyan xuta sua me cjuaquixi rë me tsëhë ngu cha xi caxincha jyë rë ne, sehe cuma chihin cjua jan, há cuma cha castigu o há xi cumaji cha castigu. ² Hya xi cavitejñataha cojo nuju xi ma jo ndiya ne, cachjátaha rë xuta xi casahmi cjuatsehen; hane quihndë xi xín tejñataha ne, cúa cuichjá nga cuatjin cojo nuju ngayujun ni xi cjëë cuichjá cojo nuju ta, hya xi cuinduva nga ngundiya ne, ha quihndë tsajin yo cuetjutje tsëhë castigu xi fehya jyë rë. ³ Cuatjin sahme ta, tsëhë xi ngayun ne, tivinchunsun chuva rë xi meje cumachaya nuju há cjuaquixi xi Jesucristu ne, sua ná me cjua xi chjá cojo nuju. Me vëhë ne, hya xi tsichuva nuju me ne, hacuiin jemu yuma hasen me ta jemu hñu ngahñu rë me, jemu hñu cjuatacun rë me ngajñi nuju. ⁴ Cjuaquixi xi jemu yuma hasen me hya xi catsiquehen xuta me xcun cru; peru tjin rë me ngahñu rë Nina quihndë xi tacun nga me cjuahñu. Hacuaha ngayin ne, xi tjin tangun cjuatacun niji cojo rë me ne, jemu yuma hasen ngayin. Peru cuinechin cjuahñu cojo rë me

cojo ngahñu rë Nina cojo sa xi cuma cuissecuin nuju.

⁵ Chjuhunchuvun suvun ni yojo nuju, ¿há nechunyun jain ndiya rë Jesucristu? Nichuvun suvun ni yojo nuju. Ngayun ne, hatuxa machaya nuju suvun xi Jesucristu ne, jiya me cahntsua xahasen nuju, jiya me ngajñi rë cjuatacun nuju. Sa xi tsajin ne, cuetjun ndesu ngayun.

⁶ Hacuaha vetahá cáacun ta ngayun ne, cumachaya nuju ta ngayin ne, hacuiin ndacha ngayin. ⁷ Tichjahyin rë Nina cojo sa xi ngayun ne, hacuiin nihñu cjuatsehen. Cuatjin chjahyin, peru hacuiin ngatsë rë xi meje niji xi cuichja xuta ta jemu ndaja xa canihñi ta, xi meje niji ne, xi nihñu cjuandaja, handasa cuichja xuta xi ngayin ne, sacuaha xuta ndacha ngayin. ⁸ Ngayin ne, tsajin mé venguichji rë xi nihñi xcusun xi hacuiin cjuaquixi ta xi venguichji rë xi nihñi ne, xcusun xi cjuaquixi. ⁹ Jemu ndama niji hya xi jemu yuma hasen ngayin hane ngayun ne, jemu hñu cjuatacun nuju. Hacuaha chjahyin rë Nina xi xcun ngasunhndë nuju ne, cuiyujuchihin cjuatacun nuju,

cuma tyjahi xahasen nuju. ¹⁰ Vëhë xi cuatjin titsihindu nuju cjua vëhë xcun xujun vihi quihndë xi chaja sa cjuétjengë nuju, cojo sa xi hya xi cjuëhë ngajan ne, hacuiin jemu hñu cjua naha cojo nuju ta Nai naja ne, casua ná me xa xi cuisé-coo nuju, hacuiin xi tsinguétsun cjuatacun nuju.

Tsinguijnetaha Pablo cjua

¹¹ Quihndë ne, ngayujun ni ne, catama sua rë xahasen nuju; tiyujunchuhun cjuatacun nuju; tuhun cjuetacun xahasen nuju; nihñu tangun cjuatacun nuju cojo xingun; tinechun cojo cjuandaja cojo cjuajeya; hacuaha xicamacjiin tacún ta Nina xi sua cjuahmutacun sua cjuajeya ne, cuisecoo nuju me. ¹² Tuhun rë xingun nina, cojo cjuandaja cojo cjuahmutacun chutatsuhun xingun, sacuatjin xcusun naja. ¹³ Yëjë xuta ladu rë Jesucristu ne, tsingatju me ngu nina tsujun. ¹⁴ Jesucristu, Nai naja ne, catisua nuju me cjuandaja rë me; Nina ne, catisua nuju me cjuahmutacun rë me; hane Hasen rë Nina ne, catisecoo nuju ngayujun ni.

**Carta xi catsingatju San
Pablo xi cafahatsja xuta
ladu rë Jesucristu
ngajan distritu Galacia**

1 Ngahan Pablo ne, má ngahan apóstol, hacuiin ngatsë rë xi xuta catsingatju ná me o sa xi cavetahaxa ná me ta ngatsë rë xi cavetahaxa ná Jesucristu cojo Nina Nahmi naja, me xi catsicuya nga rë Jesucristu cjuahñu tsëhë ngajñi rë nima. ²Ngahan cojo yëjë sa xuta ladu naja xi siu cojo ná nguehe ne, ningatjin nuju carta vihi, ngayujun ni xuta ladu rë Nina xi tsëhë yëjë ni nandya ngajan distritu Galacia. ³Nina Nahmi naja cojo Nai naja Jesucristu ne, catisua nuju me cjuandaja cjuajeya. ⁴Jesucristu ne, casua me yojo rë me xi cueya me ngatsë rë yëjë ni jyë naja, cojo sa xi cuëhëndaya naja me tsëhë nixtin tsehen vihi, sacuatjin meje rë Nina Nahmi naja. ⁵Catamajyë catamahnga Nina cojo Hasen rë me yëjë ni nu yëjë ni nixtin. Cuatjin jain.

**Ngu ni má cjuandajyihi xi
chja tsëhë Jesucristu**

⁶Jercu fircun ná xi ngayujun ni ne, jercu xati tinihñu cjin tsëhë Nina, me xi cajindaya nuju cojo cjuandaja rë Cristu, hane tinihñu tiña tsëhë ngu nga cjuachacun. ⁷Xi cjuaquixi ne, tsajin sa ngu cjuachacun ndajyihi xi hacjahi xi cuaxëtje naja. Peru tjin yahnga me xi tisuandya nuju hacuaha meje tsindeya me cjuandajyihi xi chja tsëhë Jesucristu. ⁸Peru sa xi tjin ngu me xi sua cumachaya nuju ngu cjuandajyihi xi tanguaain cojo xi ha catihín camachaya nuju ne, ¡catji me cojo nai rë me! Cuatjin catama, handasa ngahan suva o sa xi ngu ángel tsëhë ngahnga cuichja cjua jan. ⁹Sacuatjin canújin cojo nuju titjun ne, hacuanitjin ni cúya cuichjá cojo nuju quihndë cjua vihi: Sa xi tjin ngu me xi tisua tiji-

machaya nuju ngu cjuandajyihi xi tanguaain cojo xi ha camacjain nuju ne, ¡catji me cojo nai rë me!

¹⁰Ngahan ne, tsajin jercu meje ná xi chuya rë xuta tsahan ta xi meje ná ne, xi Nina chuya rë me tsahan. Sa xi meje sa ná xi xuta chuya rë me tsahan sacuatjin camameje ná hatsëë ne, hacuaha hacuiin mosu hndixahan rë Cristu ngahan.

Hacutjin camá xi camá Pablo apóstol

¹¹Nguehe cuichjá cojo nuju ngayujun ni xi cjuandajyihi xi suá machaya rë xuta ne, hacuiin cjuatacun rë xuta.

¹²Hacuiin xuta casua ná me cjuandajyihi vë, hacuaha hacuiin xuta cavicuya ná me ta Jesucristu ne, me vëhë xi casua me camachaya ná.

¹³Ngayujun ni ne, ha camachaya nuju hacutjin xi casahme hatsëë, hya xi jemu cavétaha yojo naha cjuachacun rë xuta tjë rë Israel. Camachaya nuju tsëhë hacutjin jercu tisuá rë xuta ladu rë Nina cjuañihi nixtin hya hacuaha jercu tisahme ngahñu xi tsicjéya me. ¹⁴Hane ngahan ne, tsëhë yëjë xuta xi hacuaha tjë rë Israel xi tangun nu naha cojo ne, cavátjutaha rë xi casahmechehen yëjë ni xcusun rë xuta naha ta, tsëhë xi jercu tu cavétaha camahani yojo naha cojo xcusun rë xutachanga naha. ¹⁵Peru Nina ne, cavaxijin ná me chaja sa xi tsin ngahan, hane cojo cjuandaja rë me ne, casuaxa ná me. Hya xi Nina cavejña ngu cacun me ¹⁶xi tsingacun me ngahan Quihndi rë me, cojo sa xi suá cumachaya rë xutaxín tsëhë cjuandajyihi tsëhë me ne, hya tsajin yo xuta xi cëjë cavinengësë rë, ¹⁷hacuaha cejen ngajan Jerusalén xi cjuétjengë me xi ha má apóstol chaja sa xi cuma ngahan apóstol. Cahndë rë vëhë ne, ngutjen cëjëxen ngajan distritu Arabia, sehe cavúya nga nandya Damasco.

¹⁸Hya xi camá ne, xi cavatju jyan nu ne, cëjë ngajan Jerusalén, cëjëjtengë Pedru, hane cavitejñataha cojo rë me

tyjuhun nixtin. ¹⁹Peru cahveen apóstol xi yahnga ta ngu ni Jacobo, xicjin Nai naja, xi cahvë. ²⁰Cjua xi tichjá cojo nuju ne, vëë Nina ta hacuiin vindácha.

²¹Hya xi camá ne, cëjë distritu Siria cojo distritu Cilicia. ²²Hane xuta ladu rë Cristu ngajan distritu Judea ne, hisca cjëë sa scuëë me ngahan. ²³Sehe tu vi-hndë me cjua vihi: “Cha xi jercu casua naja cjuañihi hatsëë ne, quihndë ne, tisua cha tijimachaya rë xuta tsëhë cjuachacun xi jercu casahmi cha ngahñu xi tsicjëya cha.” Cuatjin vihindë me. ²⁴Hane casahmi jyë casahmi hnga me Nina cojo Hasen rë me ngatsë naha.

Quiji tjengui Pablo apóstol xi yahnga

2 Hya xi camá ne, xi cavatju teñuju nu ne, cavúya ngahan nga ngu ndiya ngajan Jerusalén. Hacuaha Bernabé ne, quijitangun me cojo ná. Hacuaha cëjë-cojo cha Tito. ²Cëjë ta cuatjin cachja Nina. Hane xcun ngu junta xi camá cojo suvá xuta matitjun ne, cachjá cojo rë me hacutjin fi cjuandajyihi xi suá machaya rë xutaxín. Cuatjin casahme, tsëhë xi mijí ná xi xa xi tisahme o xi ha casahme ne, tu mahya ni. ³Peru hisca cha Tito xi quitahátangun cha cojo ná ne, handasa xutaxín má cha ne, camaji cha ngu jyë xi xti chuxin rë cha. ⁴Ngujo cha ndacha xi chja cha xi ladu rë Jesucristu má cha ne, cavisehen tahahma cha ngajñi niji xi scutsejen cha hacutjin xcusun niji xi tjin ndaya ngayin ngatsë rë xi tjin tangun cjuatacun niji cojo Jesucristu. Meje rë cha xi cuetihin nga yoyo niji cojo ley rë Moisés. ⁵Peru ngayin ne, caningatiin rë cha hisca hitsë, cojo sa xi cjuandajyihi xi hatuxa cjuaquixi ne, chajin xi cuma nuju.

⁶Peru me xi chjahárcun rë sacuaha xuta xi matitjun jan ne, (cuatjin chjá ta xa xi quitahá me jan ne, hisca cuendaain ná ta, Nina ne, texta ni vutsejen naja me ngayejen ni), me xi cuacun matitjun jan

ne, cavesintaain me hisca ngu cjua tsëhë cjuandajyihi xi chjá cojo xuta, tsëhë xi ha tjin chihin. ⁷Hacuaha cajnercu me xi Nina casua ná me xa xi cuichjá cjuandajyihi cojo xutaxín, sacuahatjin rë Pedru xi casatë rë me xi cuichja me cojo xuta tjë rë Israel. ⁸Nina ne, me xi catsingatju rë Pedru xi cuma me apóstol ngajñi rë xuta tjë rë Israel ne, hacuaha hacui ni me xi catsingatju ná xi cuma ngahan apóstol ngajñi rë xutaxín.

⁹Hane Jacobo cojo Pedru cojo Juan, me xi chjahárcun rë sacuaha xuta xi matitjun ne, hya xi cuatjin cajnercu me xi Nina casua ná me cjuandaja jan ne, cafaha me ntsin, ngahan cojo Bernabé, hane cuatjin catsingacun me xi ngayin ne, tinihñitangun cojo rë me xa rë Nina. Hane camangu tacuín xi ngayin ne, nihñi xa ngajñi rë xutaxín, hane me xi cuacun jan ne, sahmi me xa ngajñi rë xuta tjë rë Israel. ¹⁰Ngu tu tu ni xi cafehya niji me ne, xi cuisecuin ngajñi rë cjuachaja rë xuta yuma xi hinchajñi ngajñi me. Sacuatjin xcusun vëhë ne, hatuxa jercu vejñá xi sahme.

Cachjataha Pablo Pedru ngajan Antioquía

¹¹Peru hya xi quiji Pedru ngajan nandya Antioquía ne, cachjátáha rë me xcun cojo xcun ta, tsëhë xi suvá tsejen xi cuaaín tjin xi tisahmi me. ¹²Chaja sa xi cjuehe ngujo cha xi catsingatju Jacobo ne, tjinë tangun Pedru niñu cojo xutaxín xi ladu naja. Peru tu ngu cafehe cha xi cuacun jan ne, cavetsihin cavejñaxin me xi jinë tangun me cojo xutaxín xi cuacun jan ta, tsëhë xi tsacjun me yahnga xuta tjë rë Israel xi ladu naja xi meje rë xi xti chuxin rë yëjë ni xuta xi visehen ladu rë Nina. ¹³Hacuaha yëjë sa xuta tjë rë Israel xi siu ngajan ne, cavetsihin casahmi jo xcun jo hntsua me sacuatjin rë Pedru, hane hisca cojo Bernabé camatangun me cojo me xi cuacun jan cojo xcusun xi

casahmi me. ¹⁴Peru hya xi cahvë xi xcusun xi tisahmi me ne, matanguaain cojo cjuaquixi xi vicuya naja cjuandajyihi ne, xcun yëjë ni xuta jan ne, cuitjin cachjá cojo rë Pedru: “Ngayun xi ngu xuta tjë rë Israel má ngayun ne, sa xi nihñu sacuahah sahmi xutaxín, hacuiin sacuahah sahmi xuta tjë rë Israel ne, ¿hacutjin meje nihñu ngu jyë xi xutaxín jan ne, sahmi me sacuahah nihña ngayaan xuta tjë rë Israel?”

Xi mangu tacuun cojo Jesucristu ne, vetjuntje xuta, sa xuta tjë rë Israel o sa xutaxín

¹⁵Ngayaan ne, hatuxa xuta tjë rë Israel má ngayaan, hacuiin xuta tsehen má ngayaan. ¹⁶Handasa cuatjin ne, ha hyan xi ngu xuta ne, tsicjiin Nina jyë rë me ngatsë rë xi vihindë me tsëhë ley rë Moisés ta suvá ni ngatsë rë xi mangu cacun me cojo Jesucristu. Hane cojo ngayaan ne, hacuahah camangu tacun cojo Jesucristu, cojo sa xi tsicjë Nina jyë naja ngatsë rë xi mangu tacun cojo rë Cristu, hacuiin ngatsë rë xi canuhyaan tsëhë ley jan ta, tsëhë xi tsajin camahani yo xi cjuë jyë rë ngatsë rë xi vihindë tsëhë ley rë Moisés jan.

¹⁷Hya xi canihña tangun cjuatacun naja cojo Cristu cojo sa xi cjuë jyë naja ne, sa xi hya camatsejen xi hacuahah ngayaan xuta tsehen yaan ne, ¿há vëhë vijne xi Cristu ne, casahmi me xi caxincha ngayaan ndiya rë cjuatsehen? ¡Jéya, hacuiin cuatjin vijne! ¹⁸Sa xi cúa tsindaja nga xcusun xi ha catsinguëtsun ne, ngajan matsejen xi xuta tsehen má ngahan. ¹⁹Ngahan ne, xi cuma rë ley rë Moisés ne, sacuahah xi cavéya, sacuahah xi suvá ley jan catsiquehen ná. Cuatjin camá cojo sa xi cuma ngahan tsëhë Nina. Sacuahah xi casetaha tangun ngahan xcun cru cojo Cristu. ²⁰Ngajan xi sacuahah xi ha quihndë hacuiin cjuahñu naha xi tjin ná ta sacuahah cjuahñu rë Cristu. Peru

quihndë xi tjin ná cjuahñu cojo yojo naha ne, mangu cacún cojo Quihndi rë Nina, me xi catsihmu cacun ná hacuahah casua me yojo rë me xi cueya ngatsë naha. ²¹Hacuiin tsitjungë cjuandaja rë Nina. Sa xi cuma cjuë jyë rë xuta ngatsë rë xi vihindë me tsëhë ley rë Moisés ne, ha tu mahya ni cahme Cristu.

¿Há cojo ley o há cojo Jesucristu mangutacuun?

3Ngayujun ni xuta Galacia ne, ¡jercu yuma hasen yun! ¿Há tjin yo cafehya cacun tsujun xi cuatjin ningatuhuntacún? Jercu tu ndaja camachaya nuju hacutjin xi cahme Jesucristu xcun cru. ²Ngu tu tu ni cjua xi meje cuinengësë nuju ne: ¿Há cachjuhunntsun Hasen rë Nina ngatsë rë xi canihñu sacuatjin vitexa ley jan, o sa tsajin ne, há ngatsë rë xi camacjain nuju cjuandajyihi xi cavisiñuju? ³¿Há tuxa yuma hasen ngayun? Quihndë xi cavetsuhun cojo Hasen rë Nina ne, ¿há meje nihñuchuhun cojo ngahñu nuju suvun ni? ⁴¿Há tu mahya ni xi cuatjin cjin xcusun cavatjun ni? ¡Hatuxa hacuiin tu mahya! ⁵Hya xi Nina sua nuju me Hasen rë me hacuahah sahmi me cjuarcun ngajñi nuju ne, ¿mé má cuatjin casahmi me? Hacuiin ngatsë rë xi nihñu sacuatjin vitexa ley ta, ngatsë rë xi macjain nuju cjuandajyihi xi visiñuju.

Compromisu rë Nina cojo Abraham

⁶Xcun xujun rë Nina ne, cuitjin camahindu: “Abraham ne, camangu cacun me cojo cjua xi cachja Nina cojo rë me, hane ngatsë rë vëhë xi catsicjë Nina jyë rë me.” Cuatjin camahindu. ⁷Ngajan xi meje rë xi cuijnercun xi xuta xi mangu cacun me cojo Nina ne, me vëhë jain xi quihndi rë Abraham me. ⁸Xujun rë Nina jan ne, ha tjun sa vëë xi tsicjë Nina jyë rë xutaxín ngatsë rë xi cumangu

cacun xutaxín jan cojo rë me. Vëhë xi xcun xujun rë Nina ne, camahindu cja xi cuitjin cachja Nina cojo Abraham: “Ngatsë riji ngaye ne, cumanchacuntihin yëjë ni xuta ngasunhndë.” ⁹Ngajan xi yëjë ni xuta xi mangu cacun me cojo Nina ne, cumanchacun tangun me cojo Abraham, me xi hacuaha camangu cacun.

¹⁰Yëjë ni xuta xi mangu cacun me cojo ley rë Moisés ne, hatuxa cuatju me castigu, tsëhë xi xcun xujun rë Nina ne, cuitjin camahindu: “Nina ne, sahmi rë me castigu yëjë ni xuta xi vihndiin me tsëhë yëjë ni cja xi camahindu xcun xujun rë ley rë Moisés.” Cuatjin camahindu. ¹¹Ngajan xi suvá tsejen xi xcun Nina ne, cjuin jyë rë hisca xi ngu xuta ngatsë rë xi cahndë me tsëhë ley jan, tsëhë xi xcun xujun rë Nina ne, cuitjin camahindu: “Xuta xi tsajin jyë rë me ngatsë rë xi mangu cacun me cojo Nina ne, sacú rë me cjuahñu xatsë.” Cuatjin camahindu. ¹²Peru ley rë Moisés jan ne, cuendaain camahani rë xi mangu tacuun cojo Nina ta, xcun xujun rë Nina ne, cuitjin camahindu: “Xuta xi sahmi me sacuatjin vitexa ley ne, sacú rë me cjuahñu xatsë sa xi sahmi chihin me ley jan.” Cuatjin camahindu.

¹³Cristu ne, cavëhëndaya naja me tsëhë castigu xi vitexa ley jan, hya xi cavatju me castigu jan ngatsë naja. Camahindu nga cuitjin xcun xujun rë Nina: “Yëjë nima xi xtyangui tsëhë ngu ya ne, hatuxa cuatju me castigu rë Nina cuma.” Cuatjin camahindu. ¹⁴Cristu ne, cuatjin cavëhëndaya naja me, cojo sa xi cjuaninchacuntihin xi cachja Nina xi sua me Abraham ne, hacuaha satë rë xutaxín ngatsë rë Jesucristu, hacuaha cojo sa xi ngatsë rë xi mangu tacuun cojo Jesucristu ne, sacú naja Hasen rë Nina xi cachja Nina xi sua me.

¿Há ley o cja xi cachja Nina mangutacun?

¹⁵Ngayujun ni ne, cuichjá cojo nuju ngu ejemplu xi ha ndaja hyan. Hya xi ha camachihin xujun tsëhë ngu compromisu ne, tsajin yo xi tsicjëya rë o sa cуетaha sa rë ngu cja. ¹⁶Nina ne, cachja me cojo Abraham xi sua me cjuandaja rë me xi cuma rë Abraham cojo tjë rë me. Chjaain xujun rë Nina xi “yëjë tjë rë”, sacuaha xi jercu cjín xuta tichja tsëhë ta xi chja ne, “cojo tjë riji”, sacuaha xi ngu ni xuta tichja tsëhë. Hane tjë vëhë ne, hacui Cristu. ¹⁷Xi meje cuichjá ne, Nina ne, casahmi me ngu compromisu cojo Abraham titjun. Vëhë xi ley rë Moisés, xi cavejña Nina xi cavatju ñuju cientu cojo cantë nu ne, maji tsicjëya rë compromisu jan, maji tsinguetsun rë cja xi cachja Nina jan. ¹⁸Sa xi sacú naja cjuandaja xi sua Nina ngatsë rë xi vinuhyan tsëhë ley rë Moisés ne, ngajan xi hacuiin ngatsë ni rë xi cuatjin cachja Nina xi sacú naja. Peru Nina ne, casua me cjuandaja jan Abraham ngatsë ni rë xi cuatjin cachja me titjun.

Mé ngatsë rë xi tjin ley rë Moisés

¹⁹Sa xi cuatjin ne, ¿mé machjirëhë ley rë Moisés? Xi camá ngascan ni, Nina casua me ley jan, cojo sa xi cumatsejen xi xuta ne, hatuxa vihndiin me cja xi vitexa Nina. Ley jan ne, cavitexa hisca xi cafehe tjë rë Abraham jan, me xi cachja Nina xi sacú rë cjuandaja. Hacuaha ley jan ne, casahmi entregadu ángel tsja Moisés, me xi cavéjña vasentjin ngajñi rë Nina cojo xuta. ²⁰Peru hindë ne, tsëhë cja rë Nina ne, mamijí sa ngu me xi véjña vasentjin, ta ngu tu tu ni me ne, tifahacuenda me.

²¹¿Há vëhë vijne xi ley rë Moisés ne, sahmi rë condra cja xi cachja Nina jan ni? ¡Jéya, hacuiin cuatjin! ta, sa xi ley jan camá casua naja cjuahñu xatsë ne,

ha cafë jyë naja ngatsë rë xi canuhyan tsëhë ley jan. ²²Peru xujun rë Nina ne, chja xi cjuatsehen vitexa rë yëjë ngarca ni, cojo sa xi xuta xi mangu cacun me cojo Jesucristu ne, cuma cjuahatsja me cjuandaja xi cachja Nina xi sua me.

²³Peru chaja sa xi nduva nixtin xi camá camangu tacun cojo Jesucristu ne, ley jan ne, cavinchahñu naja sacua ha xi ndavaya cavinechanya, hisca nixtin xi casacu camachaya naja xi fë jyë naja ngatsë rë xi mangu tacuun cojo Jesucristu. ²⁴Cuatjin xi ley ne, cavitexa naja hisca xi canduva Cristu cojo sa xi cjuë jyë naja ngatsë rë xi mangu tacuun cojo Jesucristu. ²⁵Peru quihndë xi ha cafehe nixtin xi mangu tacuun cojo Jesucristu ne, ha quihndë vitexaain sa naja ley rë Moisés jan. ²⁶Cuatjin ta, tsëhë xi quihndë xi tjin tangun cjuatacun nuju cojo Jesucristu ne, ngayujun ni ne, quihndi rë Nina má ngayun ngatsë rë xi mangu tacún cojo rë me. ²⁷Ngayujun ni xi caxtenda ngayun xi nihñutangun cjuatacun nuju cojo Cristu ne, hacuaha cavisehen nuju cjuatacun rë me jan sacua ha xi cachujun ngu tsjian xatsë. ²⁸Ngajan xi cuendaain rë sa xi xuta tjë rë Israel o sa xi xutaxín ngayun, cuendaain rë sa xi xuta caxteña o sa xi xuta tjin ndaya ngayun, cuendaain rë sa xi chjuun o sa xi xihin ngayun ta, tsëhë xi ngayujun ni ne, xi tjin tangun cjuatacun nuju cojo Jesucristu ne, ngu tangun ni cún yun xi cuma rë Nina. ²⁹Hane sa xi tsëhë Cristu má yun ne, ngajan xi hacuaha tjë rë Abraham má yun, hane satë nuju cjuandaja xi cachja Nina xi sua me.

4 Cuma cuinújan ne, sacua ha cha xi cjuahatsja cjuanchina rë xutacha rë ne, nguyëjë rë xi chúva nu rë cha ne, tangun cha cojo ngu mosu xi cachahá rë, handasa cjuaquixindaja xi cha vëhë má cha nai rë yëjë ni cjuanchina jan. ²Tjin xuta xi sahmi rë cha cuidadu hacuaha fahacuenda me cjuacjintacun rë

cha, hisca nixtin xi cachja nahmi rë cha xi cuatjin cuma cojo cha. ³Cuanitjin ni naja ngayaan ta, hya xi cjualanga naja ne, hatuxa cavinuhyan tsëhë xitsehen xi vitexa rë ngasunhndë, sacua ha xi má ngayaan hndixahan xi cachahá rë. ⁴Peru hya xi cavechútáha rë nixtin rë ne, Nina ne, catsingatju me Quihndi rë me, xi catsin sacua ha tsin ngayaan xuta ngasunhndë, hacua ha ley rë Moisés cavitexa rë jan. ⁵Cuatjin catsingatju me, cojo sa xi Quihndi rë me jan ne, cuëhëndaya naja ngayejen ni xi cavitexa naja ley jan, hacua ha cojo sa xi cuma ngayaan quihndi rë Nina. ⁶Cojo sa xi cumatsejen xi quihndi rë Nina má ngayun ne, Nina ne, caveya me Hasen rë Quihndi rë me cahntsua cjuatacun naja. Hane Hasen jan ne, cuitjin chja cojo Nina: “¡Papá, Nahmi naha!” ⁷Vëhë xi ngayun ne, hindë hacuiin má ngayun mosu hndixahan xi caxteña ta quihndi rë Nina. Hane xi cuatjin quihndi rë me ngayun ne, Nina ne, sua nuju me yëjë ni xi satë rë quihndi rë me.

Macjincacun Pablo tsëhë xuta Galacia

⁸Hatsëë nixtin ne, hya xi chaja sa cumachaya nuju yo xi Nina ne, jemu cavetuhun yojo nuju cojo jemu cjín xcusun nina xi hatuxa hacuiin nina. ⁹Peru quihndë xi ha camachaya nuju yo xi Nina ne, o cuma cuinújan ne, quihndë xi Nina ne, vutsejen nuju me cojo cjuandaja ne, çhacutjin nga meje cuyun cuisuhun cojo cjuahasen xi chúva ngahñu rë hacuaha yuma cojo cjuatacun rë ni? ¿Hacutjin nga meje cuetuhun yojo nuju cojo cjuahasen xi cuacun jan ni? ¹⁰Jercu nihñu suhi. Tjin nixtin xi jercu chjuhuncun, tjin suhi xi nihñu chuva sá o sa xi chuva nu. ¹¹Macjín cacún, sá tu xa xi casahme ngajñi nuju ne, tu mahya ni camá.

¹²Ngayujun ni ne, cjuéhya nuju favor ne, catama ngayun sacua ha ngahan

ta, tséhë xi ngahan ne, ha camá ngahan sacua ha ngayun. Tsajin mé xi choho canihñu cojo ná. ¹³ Hacuaha hyun xi titjun ne, casuá camachaya nuju tséhë cjuandajyihi xi chja tséhë Jesucristu ngatsë rë ngu chíhin xi yaha ná. ¹⁴ Peru handasa casuándya nuju cojo chíhin naha jan ne, ngayun ne, tsajin canitjun-gun ná hacuaha tsajin canihñuchuvun ná. Cahndé rë vëhë ne, cachjuhunntsun ná sacua ha xi ngu ángel xi catsingatju Nina má ngahan, o sacua ha xi suvá Jesucristu má ngahan. ¹⁵ ¿Mé camá cojo cjuandaja xi tjin nuju hatsëë ni? Ngahan ne, tsinguixë xi ngayun ne, hisca canaxun túxcun tuhun ná nixtin hya, sa xi camá canaxun. ¹⁶ ¿Há camá ngahan condra nuju ngatsë rë xi cachjá cojo nuju cjuaquixi?

¹⁷ Tjin xuta xi jercu meje cuisecoo nuju me, peru hacuiin cojo cjuandaja ta xi meje rë me ne, xi cuaxëxin nuju mé tsahan, cojo sa xi ngayun ne, ninguisuhunjnuncun cojo rë me. ¹⁸ Jercu ndatjin xi meje cuisecoon rë xingueen, hya xi cojo cjuandaja. Peru meje rë xi yëjë ni nixtin cuatjin nihña, hacuiin suvá ni hya xi tejñataha cojo nuju. ¹⁹ Ngayujun ni tsan, jercu jyë cjuahmu xi tivátju nga tijima ngatsë nuju, sacua ha vatju ngu chjuun xi tsin quihndi rë me. Hacuaha cuatjin cjuëndujú cojo cjuahmu vihi hisca xi cumatsejen xi jiya të Cristu ngajñi cjuatacun nuju hacuaha cuitexa me cjuatacun nuju tséhë yëjë ni xcusun xi nihñu. ²⁰ Jercu meje cuitejña cojo nuju ndicumaha ni, cojo sa xi cuma tsindéya cjuavisiajmi naha cojo nuju ta, tséhë xi jercu vityangë cacún tsujun.

Ejemplu tséhë Agar cojo Sara

²¹ Ngayujun ni xi meje nuju xi ley rë Moisés cuitexa nuju ne, tinújun cojo ná, ¿há cjëë cuinuhyun cja rë ley jan? ²² Camahindu xi Abraham ne, jo xu camá quihndi rë me: ngu ne, tséhë na mosu

hndixahan xi sahmi xa rë chjuun rë me, hane xingu jan ne, tséhë chjuun rë suvá me, na xi hacuiin hndixahan ta hatuxa xuta ndaya tjin. ²³ Quihndi rë na mosu hndixahan jan ne, catsin sacua ha tsin yëjë ni langa; peru quihndi rë na ndaya jan ne, camá tséhë cjuar-cun rë Nina. ²⁴ Cjua xi cuicun vi ne, sacua ha ngu ejemplu: jo chjuun jan ne, sacua ha jo compromisu má na. Ngu na ne, Agar hmí rë na, hane yëjë ni quihndi rë na ne, hatuxa hndixahan cachahá rë. Hane chjuun jan ne, sacua ha compromisu xi casahmi Nina cojo Moisés ngajan Naxi Sinaí. ²⁵ Na Agar, na xi sacua ha Naxi Sinaí ngajan Arabia ne, sacua ha ngu ejemplu tséhë nandya Jerusalén xi tacun quihndë. Hane yëjë ni xuta tséhë Jerusalén vëhë ne, sacua ha hndixahan cachahá rë má me. ²⁶ Peru yëjë ni xuta tséhë Jerusalén xi tacun ngahnga ne, hatuxa ndaya tjin me. Hane ngayaan ne, quihndi rë nandya Jerusalén vëhë má ngayaan. ²⁷ Cuitjin chja xujun rë Nina: Catamasua ri ngaye chjuun xi maji sacuri quihndi;

chjindaye cjuasua, ngaye xi cjëë cuatji cjuahmu xi tsin ri quihndi.

Tséhë xi ngaye xi cavixin cojo ra, hitsë sa cjin cuma ye cojo quihndi riji xi cuma ran xi fi vejña na cojo cha.

²⁸ Ngayujun ni ne, hacua ha quihndi rë Nina má ngayun, sacuatjin rë Isaac, ngatsë rë xi cuatjin cachja Nina. ²⁹ Nixtin hya ne, cha xi catsin sacua ha tsin yëjë ni langa ne, catsujyihya tjengui cha cojo cjuahngatacun cha xi catsin ngatsë rë Hasen rë Nina. Quihndë ne, ha cuanitjin ni tijima. ³⁰ Peru ¿mé chja xujun rë Nina? Cuitjin chja: “Naxendihye na mosu hndixahan jan cojo quihndi rë na ta, tséhë xi quihndi rë na hndixahan jan ne, hatuxa cumaji sacu tangun rë cjuanchina rë nahmi rë cojo quihndi rë na xi ndaya tjin.” Cuatjin chja xujun rë Nina. ³¹ Vëhë xi ngayejen ni ne,

hacuiin quihndi rë na mosu hndixahan má ngayaan ta quihndi rë na xi ndaya tjin.

Meje rë xi cuanguenndujun xi tjin ndaya ngayaan

5 Cristu ne, cavëhëndaya naja me, cojo sa xi ndaya tjin ngayaan. Vëhë xi tiyujunhñu cjuatacun nuju, xicaninguisunjñuu rcun nga cojo ngu xcusun xi sahmi xi cuyun nga ngayun sacua ha hndixahan.

²Nutsujun ni. Ngahan Pablo ne, cuichjá cojo nuju ta, sa xi xtí chuxin nuju sacuatjin xcusun rë xuta tjë rë Israel ne, Cristu ne, cumachjiriin nuju me. ³Cúya cuichjá cojo nuju ta yëjë ni xihin xi cuatjin xtí chuxin rë ne, hatuxa tjin rë xi sahmi yëjë ni hacutjin chja ley rë Moisés. ⁴Ngayun xi meje nuju xi cjuë jyë nuju ngatsë rë xi vinuhyun tsëhë ley rë Moisés ne, hindë tsajin tjin tangun cjuatacun nuju cojo Cristu, hacua ha jemu cjin nechun tsëhë cjuandaja rë Nina. ⁵Peru ngayin ne, jercu vetihin tacuín xi tsicjë Nina jyë niji. Hacua ha jercu nechinyin xi cuatjin sahmi Nina ta, tsëhë xi Hasen rë Nina ne, visecoo niji xi mangu tacuín cojo Jesucristu. ⁶Hya xi tjin tangun cjuatacun naja cojo Jesucristu ne, venguiin chji rë sa cati rë o sa xi catiin rë chuxin naja. Xi vengui chji rë ne, xi mangu tacuun cojo Jesucristu, hane ngatsë rë vëhë ne, xi hacua ha tjin naja cjuahmutacun.

⁷Ngayun ne, ha jercu ndaja titsangun titjun. ¿Yo xi casuandya nuju xi mijí cuangunndujun xi cuinuhyun tsëhë cjuaquixi rë Nina? ⁸Nina xi tsingatju me cjua nuju ne, hacuiin me vëhë xi cuatjin casuandya nuju. ⁹Ha hyan cjua xi chja cuitjin: “Hitsë lihndi ni san rë pan ne, caa rë tsisatjen rë yëjë nahyu.” Cuatjin chja cjua. ¹⁰Macjiin cacún tsujun ta, ngatsë rë xi tjin tangun cjuatacun naja cojo Nai naja ne, xi má ná ne, ningatuhun tacún

sacuatjin tsingátaha cacún ngahan. Hane tu yo ni xi tisuandya nuju ne, cuatju castigu cuma.

¹¹Sacuaha ngahan ne, sa xi quixi xi tichjá sa cojo xuta xi sahmi ngu jyë xi xtí chuxin naja ne, ¿mé tsëhë xi yahnga me ne, tsujihiyatjengui sa ná me cojo cjuahngatacun? Sa xi quixi xi cuatjin sahme sa ne, ngajan xi hya xi chjá cojo xuta tsëhë hacutjin cahme Jesucristu xcun cru ne, tsajin cjuandya xi cuma rë yahnga xuta xi cuacun jan. ¹²Jercu ndatjin sa xi xuta jan xi cuatjin tisuandya nuju me ne, catatëxin suvá me yojo rë me ngu ndiya xa ni!

¹³Sacuaha ngayujun ni ne, catsingatju Nina cjua nuju, cojo sa xi cumandaya ngayun. Peru hacuiin tu cuaain rë xi cavëhëndaya nuju Nina xi ningatuhun rë cjuatacun nuju yëjë ni xcusun tsehen xi vitexa nuju. Cahndé rë vëhë ne, tisecon xingun ngatsë rë cjuahmutacun xi tjin ngajñi nuju. ¹⁴Cuatjin nihñu ta, yëjë ni cjua xi vitexa ley rë Moisés ne, cumachihin hya xi nihña ngu ni cjua vihi: “Meje rë xi nihmu tacún xingun sacuatjin nihmu tacún suvun yojo nuju.” ¹⁵Peru sa xi choho nihñu cojo xingun sacuatjin sahmi chu xi cjan rë xi jinëxcuen xicjin chu ne, nechun cuidadu, sá tu nicjuyun cjuandaja xi tjin ngajñi nuju.

Hacutjin sahmi Hasen rë Nina, hacua ha hacutjin sahmi cjuatacun tsehen naja

¹⁶Nutsujun ni. Tuhun cahndé xi Hasen rë Nina ne, cuitexa rë cjuatacun nuju. Hane xi cuatjin ne, hatuxa nihñuu yëjë ni xi fehya cjuatacun tsehen nuju. ¹⁷Cjuatacun tsehen naja ne, sahmi condra cojo Hasen rë Nina, hacua ha Hasen rë Nina ne, sahmi condra cojo cjuatacun tsehen naja. Catsijo ni vihi ne, sahmi condra cojo xicjin. Ngajan xi ngayujun ni ne, maji nihñu tu mé ni xcusun xi meje nihñu. ¹⁸Sa xi Hasen rë Nina vitexa rë

cjuatacun nuju ne, ngajan xi cuitexaain nuju ley rë Moisés.

¹⁹ Quihndë ne, ha ndaja ni hyan xcusun tsehen xi nihña hya xi vitexa naja cjuatacun tsehen naja. Nihña cjuatsehen xi sahmi ngu xuta cojo ngu xi hacuiin chjuun rë me, hacuiin xihin rë me, o sa xi ngajñi ni xihin me, o ngajñi ni chjuun me, o tu mé sa xcusun cjuatsehen jan. ²⁰ Chjahanrcun nina ndyojo, hacuaha nihña cjuasurqui. Choho hyaan xingueen, nihña si ngajñi naja cojo xingueen, hacuaha tjin naja cjuachini. Jercu ma cjan naja, jercu lnga tacun, jercu chicjan cojo xingueen, ngujo yaan ne, naxenx- een yojo naja tsëhë xingueen. ²¹ Jercu tjin naja cjuaxin, jercu xuta chihi má ngayaan, jercu maxti nuju ngayaan hya xi nihñu ngu suhi, cojo jercu cjin sa xcusun vëhë xi nihña. Cojo tjun sa ne, cuichjá cojo nuju sacuatjin xi ha cachjá cojo nuju ta xuta xi sahmi me sacua- hatjin rë xcusun vëhë ne, satiin rë me xi cuisehen me hiscan xi sahmi Nina gubiernu.

²² Peru hya xi Hasen rë Nina vincha cjuandaja ngajñi rë cjuatacun naja ne, jercu tjin naja cjuahmutacun, tjin naja cjuasua, tjin naja cjuajeya, yehe tacun, tjin naja cjuandaja, cuma cumangu ca- cun xuta cojo naja, ²³ jeya ngayaan, caa naja xi hacuiin ningatehen rë cjuatacun tsehen naja cojo xcusun xi fehya xi ni- hña. Sacuaha yëjë ni cjuandaja vëhë ne, tsajin camahani ley xi vitexa xi cumaji nihña. ²⁴ Hane yëjë ni xuta ladu rë Je- sucristu ne, ha caviyujuxin me cjuata- cun tsehen rë me cojo yëjë ni xcusun tse- hen xi fehya rë me xi sahmi me. ²⁵ Sa xi Hasen rë Nina casua naja cjuahñu xatsë ne, meje rë xi hacuaha ningatehen xi Hasen jan cuitexa rë cjuatacun naja.

²⁶ Mijí rë xi xta ngayaan, mijí rë xi si rcun, mijí rë xi tjin naja cjuaxin cojo xingueen.

Meje rë xi cuisecoon xingueen

6 Ngayujun ni ne, sa xi yo sacutsja rë ngu xuta xi tisahmi me cjuatse- hen ne, ngayun xi ningatuhun xi vitexa Hasen rë Nina cjuatacun nuju ne, meje rë xi cuisecun rë me xi cuya ndaja me, peru tisekun rë me cojo yëjë ni cjuandaja cjuajeya. Hacuaha meje rë xi tjin nuju cuidado, sá tu cojo ngayun cuinengun- yun ngajñi rë cjuatsehen. ² Tisekun xin- gun cojo sa xi scaa nuju cojo cjuacjinta- cun xi quichuhun xingu xingu ngayun. Hane xi cuatjin nihñu ne, ngajan xi machihin ley xi cavicuya naja Cristu. ³ Sa xi yo sahmi jyë yojo rë handasa tsajin mé vechú ne, vindacha suvá yojo rë. ⁴ Xingu xingu ngayaan ne, meje rë xi nichuvan suvaan yojo naja cojo xcusun naja. Xi cuatjin nihña ne, cuma- sua naja cojo xcusun ndaja xi canihña suvaan, hisca sahmi ngu yëjë ni nutsejen xcusun xi sahmi xingueen. ⁵ Xingu xingu ngayaan ne, tjin naja xi chaan cjuacjin- tacun naja suvaan.

⁶ Xuta xi vutaya cjuandajyihi xi chja tsëhë Jesucristu ne, hacuaha meje rë xi cuisecoo me xuta xi tivicuya rë me jan cojo yëjë ni xcusun ndaja xi tjin rë me.

⁷ Xicavindachuun suvun rë yojo nuju ta Nina ne, cumaji cumandacha me. Xcusun xi nitjen ne, ha vëhë ni sacú naja.

⁸ Xuta xi fi tjengui me ndiya rë cjuatacun tsehen xi fehya yojo rë me ne, cuechú nixtin xi sacú chjí rë me xi yojo rë me jan ne, cjuehndu. Peru xuta xi fi tjengui me ndiya rë Hasen rë Nina ne, cuechú nix- tin xi sacú chjí rë me xi Hasen rë Nina ne, sua rë me cjuahñu xatsë. ⁹ Sacuaha ngayaan ne, mijí rë xi nihñachuvan nga- jñi rë yëjë ni cjuandaja xi tinihña ta, tsëhë xi hya xi cuechú jain nixtin rë ne, sacú chjí naja, sa xi scaa naja. ¹⁰ Vëhë xi nguyëjë rë xi tjin sa nixtin ne, ha tuxa meje rë xi nihña cjuandaja cojo yëjë ni me xi sacuaha xingueen tsëhë

xi hacuaha mangucacun me cojo Jesucristu. Hacuaha meje rë xi nihña cjuandaja cojo ngayëjë ni xuta.

**Sua Pablo conseju, hacuaha sua me
Nina rë me cojo xuta Galacia**

¹¹Ngayujun ni ne, ñnutsujun letra yehe vihi xi titsihindu nuju cojo hntsa suva! ¹²Xuta xi meje rë me xi ndaja cuichja xuta tsëhë me ne, me vëhë xi meje sahmi nuju me nguýë xi xtí chuxin nuju. Cuatjin sahmi me, cojo sa xi tsajin cuatju me cjuañihi ngatsë rë xi chja me tsëhë cru rë Cristu. ¹³Hisca me xi ti chuxin rë ne, vihndiin me tsëhë ley rë Moisés. Peru meje rë me xi xtí chuxin nuju, cojo sa xi cuaxëndaja me yojo rë me xi cuatjin camá cojo nuju. ¹⁴Peru sacuahá ngahan ne, ngatsë ni rë cru rë Nai naja Jesucristu xi cuáxën-

daja yojo naha. Cuatjin sahme, tsëhë xi ngatsë rë cru rë Cristu jan ne, sacuahá xi cahme ngasunhndë xi cuma ná ngahan, hacuaha ngahan ne, sacuahá xi cavéya xi cuma rë ngasunhndë. ¹⁵Tsajin mé vengui chjí rë xi cati o xi catiin rë chuxin naja ta xi vengui chji rë ne, xi cuma ngayaan xuta xatsë. ¹⁶Ngayujun ni xi tsangunndujun cojo cjuatacun xi sehe cachjá cojo nuju jan ne, Nina catisua nuju me cjuajeya cojo cjuayumatacun. Hacuaha cojo yëjë sa me xi má xuta ladu rë Nina ne, cuatjin catisua Nina me.

¹⁷Nchujun ni nguini ne, mijí ná xi yo sua sa ná cjuandya ta, tsëhë xi yëjë yanda xi yaha yojo naha ne, vëhë tsingacun xi sahme xa rë Jesús sacuahá mosu hndixahan rë me.

¹⁸Nai naja Jesucristu ne, catisua nuju me cjuandaja ngayujun ni. Cuatjin jain.

Carta xi catsingatju San Pablo tsëhë xuta nandya Efeso

Pablo tsihindu me xuta rë yungun

1 Ngahan Pablo ne, apóstol tsëhë Jesucristu ngahan ta, tsëhë xi cuatjin camameje rë Nina. Tsingátju nuju carta vihi ngayun xuta nandya Efeso, ngayun ni xuta ladu rë Nina xi jercu ndaja tisingunndujun cojo ndiya rë me. ²Nina Nahmi naja cojo Nai naja Jesucristu ne, catisua nuju me cjuandaja cjuajeya rë me xi cuma nuju.

Ximinchacun xi cachjahantsan tsëhë Cristu

³ Nina ne, me vëhë xi Nina rë hacuaha nahmi rë Jesucristu me xi matitjun tsajan, jemu jyë hnga camahani me cojo hasen rë me! Me vëhë ne, ngatsë rë xi tsëhë Cristu ngayaan ne, catsinchacun naja me cojo yëjë ni xcusun cjuandaja xi siu tsja me. ⁴ Nihña jyë hnga Nina cojo hasen rë me ta hisca hya xi chajasa casahasen ngasunhdë ne, hya cavaxijin naja Nina ngatsë rë xi tsëhë Cristu ngayaan, hane ngatsë rë xi casahmi tsëhë me ngayaan ne, camatyjahi cjuatacun naja hacuaha tsajin xi cún naja. Hacuaha Nina cojo cjuahmutacun xi tjin rë me cojo naja ne, ⁵ vëhë xi ha tjin chjine rë me cjuatacun xi ngatsë rë mé xi casahmi Jesucristu ne, ngayaan ne, quihndi ndaja jain rë me má ngayaan. Cuatjin tjin cacun me xi cumá, cuatjin cavejñacacun me. ⁶ Cuatjin nihña jyë hnga me cojo hasen rë me tsëhë cjuandaja rë me. Jemu cavincha naja me cjuandaja ngatsë rë xi ngayaan ne, tsëhë Cristu yaan; hane Nina ne, hmuacacun me Cristu. ⁷ Cojo jni rë Cristu xi cavanga hya xi cahme me, vëhë machji rë xi camandaya yaan tsëhë castigu xi satë naja, cavaxëtje rë cjuatsehen xi canihña, tucu cjuahmuacacun rë

me xi jercu jyë camahani. ⁸ Tjercu tu ndaja casahmi me cjuandaja cojo naja xi cavuxaha ndaja me cjuatacun naja xi vjercun cjuarë me ta, ⁹ casua camachaya naja tsëhë cjuatahahma xi tjin cacun me xi cumá, tsëhë cjuatacun xi cavejñangucacun suva me xi cumachihin. ¹⁰ Cjuatahahma vë ne, cumachihin hya xi cuetjucaa xi cuechu nixtin rë. Hya ne, Nina sahmitangun me ngu nguyëjë ni ngahma Cristu, me xi matitjun rë. Sahmitangun me yëjë xi siu ngahnga hacuaha yëjë xi siu nangui, hane sacuaha ngu ni cjuatacun cuma.

¹¹ Hacuaha ngatsë rë xi tsëhë Cristu ngayaan ne, Nina cavaxijin niji xi satë niji hitsë tsëhë mé xi satë rë Cristu ta, Nina sahmicihin me yëjë ni mé xi sua má rë me sacuahatjin ha cavejñacacun me xi cumá. ¹² Cuatjin casahmi me cojo sa xi ngayin xuta tjë rë Israel xi tjun tjun cavinechinyin rë xi nduva Cristu ne, nihñi jyë hnga Nina cojo hasen rë me ngajñi rë yëjë ni mé xi nihñi. ¹³ Hacuaha ngayun ni, hya xi canuhyun rë cjuaquixi cjuandajyihxi xi chja hacutjin cuma cuetjuntjun tsëhë jyë nuju ne, camatangun cjuatacun nuju cojo Cristu. Hane sacuaha xi setaha sellu ngu xujun rë nangui xi tsejen xi quixi xi tsëhë me, cuatjin caveya Nina Hasen rë me sacuaha cavejña me cjuarë xi sua nuju me, cojo sa xi tsejen xi tsëhë me yun. ¹⁴ Hane tsëhë xi hincharë naja Hasen rë Nina ne, vëhë tsinguixi rë xi chjahanntsant yëjë xi cavejñacacun Nina xi cumá tsajan, tsinguixi rë xi sahmi ndaya me yaan tsëhë jyë naja, hane ngatsë rë vëhë ne, me vëhë cuma jyë hnga sa me cojo hasen rë me.

Pablo ne, fehya me Nina xi scuxaha me cjuatacun rë xuta xi ndaja macjain rë me Jesucristu

¹⁵ Hindë ta cuatjin catsinchacun Nina yaan ne, vëhë xi ngahan, hisca xi ca-

machaya ná xi naxunndujun Jesucristu hane xi tjin nuju cjuahmutacun cojo yějē ni xuta xi tsěhē Nina me, ¹⁶suá cuaha nacuechji rē Nina ngatsē nuju. Hane yějē ni hora xi tisahme oración naha, veyanangē nuju, chjayuma ngatsē nuju. ¹⁷Féhya rē Nina rē Nai naja Jesucristu, Nina Nahmi naja xi jemu hnga me cojo hasen rē me. Féhya rē me xi sua me yun cjuatacun rē Hasen rē me cojo sa xi cuijnercun mé xi tsěhē me hane xi hitsē sa ndaja chun yo me. ¹⁸Féhya rē Nina xi scuxaha me cjuatacun nuju cojo sa xi cumachaya nuju tsěhē xcusun vėhē xi vetahan tacun ngatsē rē xi cavaxijin naja Nina. Xi machaya nuju xi jercu vatjutaha ndajyihi cjuatjo rē me xi cuatēcja me ngajñi xuta ladu rē me. ¹⁹Hacuaha xi machaya nuju ta ngahñu rē me ne, tsajin chuva rē ne, hane tacunntsaan. Hacuaha ngahñu jan catsingacun me ta jemu hñu cju. ²⁰Catsingacun me chuva rē ngahñu jan hya xi catsicuya me cjuahñu rē Cristu tsěhē cjuaveya hane hacuaha hya xi casahmi jyē hnga me Cristu xi cavejña me cahndé ladu quixi rē me ngajan ngahnga. ²¹Jercu hñu camahani cju rē Jesucristu xi cumá rē yějē ni hasen, yějē ni ángel, yějē ni rey hasen xi hacuaha vitexa ngajan sa xi nixtin quihndē o sa xi nixtin xi nduva ngascan. Hacuaha hitsē sa jyē hnga ñihi rē xa xi tacuntsja me. ²²Hacuaha yějē xcusun xi siu, Nina ne, caviyuju me ngahma gobiernu rē Cristu. Hacuaha ha Cristu nga ni, casua me xi cumá titjun me tsěhē yějē ni xuta rē yungun hane vitexa me xuta ladu rē Nina sacuatjin rē rcuun xi vitexa rē yojo naja. ²³Hane sacuaha vitsojo cjuatacun rē rcuun ngajñi yějē yojo naja ne, cuatjin vitsojo Cristu ngajñi rē jingujyē ni xuta yungun, hane cojo Cristu ne, magingu jinguyějē ni xcusun.

Ngatsē rē xi hmucacun naja Nina ne, cavaxětje naja me

2 Hacuaha ngayun ne, catsingasca Nina cjuatacun nuju ta, titjun ne, camá ngayun sacuaha xi caveyun xi cumá rē Nina ngatsē rē xi canuhyuun tsěhē Nina hane canihñu cjuatsehen. ²Cavanguntengun cjuatsehen sacuaha xcusun rē xuta tsehen rē ngasunhndē. Canuhyun tsěhē rey xi hacui hasen tsehen xi vitexa rē yahnga hasen tsehen ngajan ngahnga, rey jan xi vitexa rē xuta xi vihndiin me tsěhē Nina. ³Hacuaha ngayějē ni ngayaan ni, cuatjin xcusun naja hatsē. Canihña yějē cjuatsehen xi cafehya rē yojo jyē naja, xi masua rē xahasen naja. Tsěhē xi hatuxa xuta tsehen yaan, ngatsē rē vėhē ne, tacunya castigu xi cuma naja sacuaha yějē sa yahnga xuta. ⁴Peru Nina ne, tjercu tu tjin rē me cjuayumatacun ngatsē rē xi jemu tu jyihi camahani cjuahmutacun xi tjin rē me cojo naja. ⁵Hane handasa xi camá sacuaha xi caveyan ngayaan xi cuma rē Nina ta canuhyaan tsěhē me, peru hindē ne, sacuaha xi casacu naja cjuahñu xatsē tangun cojo Cristu. (Cjuaniyutacun rē Nina ne, vėhē casahmi xi cavaxětje nuju me tsěhē cjuatsehen xi canihñu.) ⁶Hacuaha sacuaha catsicuya nga naja Nina cjuahñu tangun cojo Cristu hane casahmi jyē hnga me yaan xi cavejña me yaan cojo Cristu ngajan ngahnga ngatsē rē xi tsěhē Jesucristu yaan. ⁷Cuatjin casahmi me cojo sa xi hisca nixtin xi sehe nduva ne, cumatsejen xi jercu vatjutaha cjuaniyětacun xi tjin rē me cojo naja, cjuaniyětacun vė xi matsejen ngajñi rē cjuahmutacun xi tsingacun me yaan ngatsē rē Jesucristu. ⁸Cuatjin jan ne, cjuaniyětacun rē Nina ne, vėhē casahmi xi cavaxětje nuju me tsěhē jyē nuju hya xi camacjain nuju ta, hacuiin suvun cavinchunsun chuva rē xi cavetjuntjun ta tsěhē

xi Nina ne, tu cuatjo ni casua nuju me cahndé. ⁹Hacuiin tséhë xi canihñu suvun xi jemu ndaja xi cavéchuntuhun xcusun vë ne, ngatsë rë vëhë ne, hisca ngu xuta cumaji sahmi jyë me yojo rë me. ¹⁰Ta sacuajyihi ngayaan ne, Nina casahmi naja me. Hane ngatsë rë xi tséhë Jesucristu yaan, vëhë xi catsindaja me ngayaan cojo sa xi ndaja nihña, sacuatjin xi ha cojo tjun sa cavejñacacun me xi má xcusun naja.

Ngatsë rë jni rë Cristu ne, ma vetjutje xutaxín

¹¹Ngajan xi ninguitsjun ta, ngayun ne, xutaxín yun ta hacuiin tséhë xuta tjë rë Israel catsin ngayun. Hacuaha xuta tjë rë Israel jan ta casahmi suva me sacuaha vitexa ley rë Moisés, me vëhë chja me tsujun ta, xuta xi catiin rë chuxin rë; hane chja me suva me ta, xuta xi cati rë chuxin rë. ¹²Hacuaha hya ne, hisca tsajin quitahatacun xi sacuse nuju Cristu. Casatiin nuju cahndé cojo xuta tjë rë Israel hacuaha casatiin nuju compromisu xi vetaha cacun me. Jemu va cavinechun cojo ngasunhndë nuju ta hacuiin vinga nuju Nina xi cjuaquixi. ¹³Peru quihndë xi camá tséhë Cristu yun, handasa xi hya jemu xin nechun xi cuma rë Nina, peru hindë casacu cahndé camatiña yun ngatsë rë jni rë Cristu xi cavanga hya xi cahme me. ¹⁴Ta Cristu ne, me vëhë casahmi me xi cavisehen naja ngayëjë ni cjuandaja cjuajeya. Hane xi cuatjin casahmi me ne, sa xuta tjë rë Israel yaan o sa xutaxín yaan, sacuaha ngu ni xuta má ngayaan. Ta hya xi cahme me, cafahaxin me cjuachan xi vetsuntaha naja. ¹⁵Catsicjë me ngahñu rë ley rë Moisés cojo yëjë ni cjuaxi vitexa jan. Hane cuatjin ne, tséhë catsijo tjë rë xuta jan ne, tsajin sa cjuachan ta casahmitangun Cristu me xi sacuaha ngu ni xuta má me xi tséhë me suva me. Cuatjin cavisehen me cjuandaja tséhë xcusun xi

cavetsutaha rë me titjun. ¹⁶Hacuaha cuatjin casahmitangun me catsijo tjë jan xi cumá ngu ni hane tangun catsindajacacun me me jan cojo Nina ngatsë rë xi cahme me xcun cru. Hane cuatjin cavatëcja me cjuachan xi tjin ngajñi rë me jan.

¹⁷Cuatjin camá xi canduva Jesucristu cachja me cjuandajyihi tséhë cjuajeya cojo nuju ngayun xutaxín xi xín nechun xi cuma rë Nina, hacuaha cojo xuta nangui Israel xi tiña siu me xi cuma rë Nina. ¹⁸Vëhë xi ngatsë rë mé xi casahmi Cristu hane cojo ngu ni Hasen rë Nina ne, xingu xingu ngayaan ne tjin naja cahndé cojo Nina Nahmi naja. ¹⁹Vëhë xi ngayun ne, hindë hacuiin xutaxín yun hacuiin xín tujyuhunyun ni xi cumá rë xuta rë Nina ta hindë ne, sacuaha camá ngu nangui nuju ngayujun ni hacuaha cojo rë me ne xuta rë Nina má ngayun. ²⁰Cojo rë me ne, ngayun ne tangun ngayun sacuaha xihndë rë ngu yungun xi sehe tjunihi nga rë. Xihndënaña rë ne, vëhë casahmi apóstol cojo profeta hya xi cachja me cjuaxi rë Nina. Hane Jesucristu ne, me vëhë má me ndoyojo xi matitjun xi vejña yuju rë, ²¹ta sacuaha ndoyojo jan vaniji hai rë ndihya xi ndaja hñu cuejña xihndë rë xi cuijin, hacuaha ngatsë rë Jesucristu sacuaha ndaja setahacoo ngu xihndë ne, cuatjin vetahacoo Jesucristu xuta rë yungun hya xi scunihnga me xi cuma me sacuaha ngu yungun quicun xi camanchacun tséhë me. ²²Hacuaha cuanitjin ngayun ne, cavinchajñi me yun sehe cojo yun cumá ngayun sacuaha yungun quicun jan rë Nina hiscan cuejña me.

Cjuaxi tséhë xi sahmi Pablo ngajñi rë xutaxín

3 Cuatjin camá xi ngahan Pablo ne, tejñaya ndavaya ngatsë rë xa rë Jesucristu, xa jan xi sahme ngajñi nuju xutaxín. ²Cuejña ni xi há machaya nuju

tsêhê cjuaniyêtacun xi Nina cavincha ná me xi satê ná sahme xa ngatsê nuju ta, ³Nina casua me camachaya ná tsêhê cjuatacun hma jan sacua ha xatsîhindu nuju hitsê tsêhê. ⁴Hane xi chutahayun tsêhê ne, mangutacun xi ngahan ne vijnercu cjuatahahma jan xi sahmicîhin Jesucristu. ⁵Cjuatacun jan ne, hatsêê nixtin tsajin yo camachaya rê tsêhê. Peru hindê ne, cojo Hasen rê me catsingacun me tsêhê xi cumachaya rê apóstol cojo profeta xi cavaxijin me. ⁶Cjuatacun hma jan ne, cuatjin fi: Camá xi cojo cjuandajyîhi rê Nina ne, xutaxín ne, fahatsja tangun me cuatjo rê Nina cojo xuta tjê rê Israel, hacua ha cojo me ngu xuta má me. Hacua ha ngatsê rê xi tsêhê Jesucristu me ne, hacua ha satê rê me compromisu xi vetahacacun xuta tjê rê Israel.

⁷Sacua ha cjuatahahma vêhê ne, casatê ná ngahan xi sahme xa xi cuichja tsêhê. Cuatjin casatê ná ngatsê rê cjuaniyêtacun xi casua Nina ngahan xi cojo ngahñu rê me cuma. ⁸Ngahan ne, handasa tsajin chuva rê xi ngahan sahme xi cuma rê xi sahmi tu yo sa yahnga xuta tsêhê Nina, peru casua ná Nina cjuaniyêtacun xi satê ná xa xi cuichjá cojo xutaxín xi cumachaya rê me tsêhê cjuanchina ndajyîhi rê Cristu xi tsajin cojo chuva rê. ⁹Hacua ha cavetahaxa ná Nina xi scuxáha cjuatacun rê xuta cojo sa xi cumachaya rê me cjuatacun hma jan. Nina, xi casahmi me yêjê ni ne, hisca ntsacu cavetsîhin cavejñacacun hma me xi cuatjin cumá. ¹⁰Cuatjin camá cojo sa xi nixtin quihndê ne, ngajñi xuta yungun rê Nina ne, tsingacun rê cjuahasen rê Nina, cojo sa xi yêjê ni hasen, yêjê ni ángel xi hacua ha vitexa ngajan ngahnga, machaya rê xi jemu cjín xcusun rê cjuahasen jan ta, ¹¹cjuatacun jan ne, hisca ntsacu cavetsîhin cuatjin cavejñacacun me, hane casahmicîhin me cojo Cristu

Jesús, me xi matitjun tsajan. ¹²Hacua ha ngatsê rê xi tsêhê Cristu yaan hane ngatsê rê xi mangutacun cojo me ne, rcuun nihña tiña tsêhê Nina cuinújan cojo me ta, tjin ngutacun xi sacua naja cahndê. ¹³Vêhê xi cojo cjuatacun vêhê ne, cuichjá cojo nuju ta hacuiin nihñuchuvuntacun ngatsê naha ngahan xi choho tivatju tijima tsêhê xa xi sahme ngatsê nuju, ta ngajñi rê xi cuatjin tivatju ngahan ne, hitsê sa tivaxêndaja nuju.

Cjuahmutacun xi tjin rê Nina

¹⁴Cuatjin camá xi ngatsê rê vêhê ne, vixcuhnchêta ha xcun Nina nahmi rê Jesucristu me xi matitjun tsajan. ¹⁵Yêjê ni tjê rê xuta o sa ángel, sa ngahnga o sa ngasunhndê viyuju me ne, faha ñihi me tsêhê Nina sacua ha tsêhê Nahmi rê me. ¹⁶Nina Nahmi naja ne, tjemu tjin rê me ngahñu xi casahmi hnga hasen me ngajan ngahnga. Chjáhya rê me xi tucu chuva rê yêjê cjuandaja rê me jan ne, sua nuju me xi cuiyujuhñu xahasen nuju cojo ngahñu rê Hasen rê me. ¹⁷Hane ngatsê rê xi cuatjin macjain nuju Cristu ne, hacua ha cuejña cahndê me cahntsua xahasen nuju. Hane cjuahmutacun xi hinchu nuju ne, cuma sacua ha ngu tyjama xi sua nuju ngahñu hane tsuvangui nuju, ¹⁸cojo sa xi hacua ha cuijnercundujun ngayun cojo yêjê yahnga xuta xi macjain rê me, ta tsajin hisca cjuê ta jemu tu jyê hnga cjuahmutacun xi tjin rê Cristu cojo naja. ¹⁹Hacua ha cjuêhyá xi sacuse nuju cjuahmutacun xi tjin rê Cristu cojo nuju, ngu cjuahmutacun xi jercu vatjutaha rê hisca tsajin chuva rê xi hatuxa hyan, cojo sa xi ma tsê rê cjuatacun nuju suva cojo yêjê ni xi tsêhê Nina.

²⁰Quihndê ne, catama jyê catama hnga Nina. Me vêhê cojo ngahñu rê me xi sahmixa ngajñi naja ne, hitsê sa cjín cuma sahmi me tsêhê xi cuma chjahyan o sa xi matacun xi ma sahmi me.

²¹ Catama jyë catama hnga me ngajñi xuta yungun rë me hacuaha ngajñi Jesu-cristu; catama jyë catama hnga me yějë ni nu yějë ni nixtin. Cuatjin jain.

Tjin tangun yaan ngatsë rë Hasen rë Nina

4 Ngatsë rë vëhë ne, ngahan xi tejñaya ndavaya ngatsë rë xa xi sahme tsëhë Nina, ngahan fehya nuju xi tangun nduju cojo ngasunhndë nuju sacuaha meje rë xi sahmi me xi cavaxijin Nina, sacuahatjin ngayun xi catuxijin nuju. ²Tjin nuju cjuajeya hacuaha ninguijnu yojo nuju cojo xingun. Hacuaha jyëtacun xingu xingu yun cojo xingun ngatsë rë cjuahmutacun xi tjin nuju. ³Nihñu ngu-jyë xi yějë nixtin tjin tangun yun, cojo ngahñu rë cjuajeya xi sua Hasen rë Nina xi sahmi tangun nuju ngayun ngayujun ni. ⁴Ngayaan ne, ngu ni yojo má yaan, hacuaha ngu ni má Hasen rë Nina. Hacuaha cuanitjin ne, ngu ni cjua xi cuetaha tacun xi sacu naja cjuahñu xatsë, ngayaan xi cajindaya naja me. ⁵Hacuaha ngu ni Jesucristu xi Nai naja, ngu ni cjuachacun xi macjain naja, hacuaha ngu cjuatacun ni xi xtenda yaan. ⁶Ngu ni Nina Nahmi naja ngayejen ni. Hane Nina ne, matitjun me tsëhë ngayëjë ngarca ni ne, tsinguitsojo me jingujyë ni ngajñi yojo naja, hacuaha tacun me ngajñi naja.

⁷Peru jimangu yaan ne, ha casua naja me cjuatjo cjuatacun xi satë naja xa xi nihña jimangu yaan, sacuaha chuva rë xi casua Cristu. ⁸Vëhë xi xujun rë Nina chja cuitjin:

Hya xi camiji me ngahnga, hacuaha quiji cojo me xuta presu xi cafaha me. Hane casua me cjuatjo xi cafhatsja xuta rë me.

⁹Hane mé vijne cjua xi camiji me? Cjua vëhë ne, vijne xi titjun ne cajne me hiscan xi hitsë sa nangui tsëhë ngasunhndë. ¹⁰Hane xi cajne jan ne, hacui ni me xi hacuaha camiji hiscan

xi hitsë sa hnga tsëhë ngahnga, cojo sa xi jingujyë ni cuejña cahndë me. ¹¹Ha me vëhë ni casua me cjuatjo cjuatacun xingu xingu. Casua me xi yahnga me ne, cumá me apóstol, yahnga me ne xi sua me xi cumachaya rë xuta cjua xi cafhatsja me tsëhë Nina, hane yahnga nga me ne, cuichja me cojo xuta tsëhë cjua xi cuaxëtje naja, hane yahnga nga me ne, pastor xi vicuya. ¹²Cuatjin cavëhëchjine me xuta rë me jan cojo sa xi xa xi sahmi me jan ne, cuisecoo rë xuta yungun xi sacu hñu rë me. ¹³Hisca xi ngayejen ni ne, cuma tangun yaan cojo ngu ni cjuachacun xi macjain naja hacuaha cojo yějë cjua xi machaya naja tsëhë me xi Quihndi rë Nina. Hane xi cuatjin cuma tangun yaan, cumacha yaan hane cuiyuju cahndë cjuatacun naja sacuaha tjin chihin yějë cjuatacun rë Cristu. ¹⁴Hane sehe hacuiin tangun yaan cojo langa xi tsindeya cjuatacun rë hane fi tjengui ndiya rë tu mé ni cjuachacun xatsë sehe vixuya ngajñi cjuandacha rë xuta xi vincha haxi me. ¹⁵Hitsë sa ndaja xi cuinújan cjuaquixi ngatsë rë cjuahmutacun xi tjin naja cojo rë me cojo sa xi cumacha yaan cojo sa xi yějë ni xcusun naja cuma yaan sacuaha Cristu, me xi matitjun tsajan. ¹⁶Hane ngatsë rë ngahñu rë me vëhë ne, yějë xuta xi macjain rë me Nina ne, ndaja yahangui xicjin me, sacuaha naxahñu naja ne, tsuvangui rë yojo naja, ngatsë rë xi hincha xicjin. Hacuaha ngatsë rë xi jima ngu xuta jan ndaja sahmi me xa ne, ngu tangun ni cuma yehe me, hacuaha sacu hñu rë me ngajñi rë cjuahmutacun jan.

Xcusun xatsë xi casacu naja ngatsë rë xi macjain naja Cristu

¹⁷Ha cuanitjin ne, sacuaha tichjá cojo nuju cojo cjua rë Nai naja Jesucristu xi quihndë hacuiin cuinechun sa sacuaha siu xuta xi hvíin me yo xi Nina, ta me vëhë ne, siu me cojo cjuatacun jñu rë me

xi tsajin me vetjuncaa. ¹⁸ Vijnircu me ta tsêhê xi tsajin rê me cjuahñu xi sua Nina ta, tsêhê xi taja rcu me ngatsê rê xi taja xahasen rê me. ¹⁹ Hacuaha cachaja cjuatacun rê me, hane casuatê me yojo rê me, vêhê xi jercu macacun me xi sahmi me yêjê xcusun cjuatsehen xi tjin ngasunhndê. ²⁰ Peru ngayun ne, hacuiin cuatjin camá nuju tsêhê Cristu ²¹ ta ngayun ne, hatuxa cachutayun jain tsêhê me, hacuaha camá nuju tsêhê me, cojo cjuaquixi xi tjin rê Cristu. ²² Sacuaha cjuatacun changá xi canduvuncujun ne, tejñuxun ta tsêhê xi vêhê xi tsitsehen cojo cjuandacha xi jercu matacun cojo. ²³ Meje rê cuma xatsê yun cojo cjuatacun nuju hacuaha cojo hasen nuju. ²⁴ Hane nihñu tsujun cjuatacun xatsê xi ha tjin ndaja xi fayangui xcusun xi tsêhê Nina ta xcusun vêhê ne, tsingacun ngu cjuahñu xi hatuxa cjuaquixi hacuaha tyjahi.

²⁵ Quihndê ta cuatjin ne, canújuun cjuandacha cojo cjuandesu ta, jima ngu yun ne, tinújun cjuaquixi cojo xingun tsêhê xi ngayêjê ni ngayaan ne, camatan-gun yaan ta ngu ni yojo má ngayaan.

²⁶ Handasa cjan nuju ne, cavinchun ngu jyê, hane cjuacjan jan ne, hacuiin xi cjuecani rê cuaha nixtin, ²⁷ hane hisca xi hitsê ne, caningatjuun rê xitsehen xi sahmi xi nihñu ngu jyê.

²⁸ Xuta xi catsichêjê me ne, catejñaxin me xcusun vêhê, hane catisahmi me xa nguñajacacun me cojo sa xi cuechutaha me yêjê xcusun xi machaja rê me. Hane hacuaha cuma cuisecoo me xuta xi machaja rê.

²⁹ Canújuun cjuatsehen. Nújun ngu cjuaxi ndajyihî xi cuincha ndiya rê xuta xi cuiseñuju me cojo sa xi tsêhê me ndaja. ³⁰ Xi canihñuu xi cuma va rê Hasen rê Nina ta, cojo Hasen rê me jan ne, ngayun ne, casetaha nuju chuva xi tsingacun xi sacu nuju cjuahñu xatsê nixtin xi cuaxêtje nuju me tsêhê jyê nuju.

³¹ Hacuaha tiyujunxun yêjê ni cjuachan, yêjê ni cjuasuê, yêjê ni cjuahnga, yêjê ni cjuachjataha cojo yêjê sa xcusun cjuatsehen ³² ta cahndê rê vêhê ne, nihñu cjuandaja cjuajeya xingu xingu yun cojo xingun. Tjin nuju cjuayumatacun cojo xingun. Hacuaha ninchatuhun xingun sacuaha catsinchataha Nina yun ngatsê rê Cristu.

Hacutjin meje rê xi cuiyuju xuta ladu rê Nina

5 Ngatsê rê xi jemu hmucacun nuju Nina ta, tsêhê xi quihndi rê me yun, vêhê xi chjayunnun tsêhê me. ² Hane nechun cojo cjuahmutacun xi catsihmucacun naja Cristu hane hisca casua me yojo rê me ngatsê naja sacuaha ngu tsánga ndajyihî xi cueya chu hane cuma tsêhê Nina sacuaha ngu cuatjo xi chuya rê me.

³ Quihndê ta ngayun ne, tsêhê Nina yun ne, hisca xi caveyunnanguun cjuatsehen xi matacun cojo yojo jyê nuju ngajñi nuju. Caveyunnanguun hisca ngu sa cjuatacun chocun cojo cjuachan ta, ngayun ne, tsajin chuva rê xi nihñu xcusun vêhê. ⁴ Cavisiajmuun xcusun xi cjuasava, cojo cjuangarca cojo cjuaxcuehyu hya xi hacuiin mameje rê ta cahndê rê vêhê ne, tuhun nacuechji rê Nina. ⁵ Ha hyun ta xuta xi sahmi me cjuatsehen xi sahmi ngu xuta cojo ngu xi hacuiin tsêhê me, o sa ngajñi ni xihin me o ngajñi ni chjuun me o tu mé sa xcusun cjuatsehen jan o sa xi choho me, tangun cún me sacuaha me xi faharcu me nina ndyojo hane sacuiin rê me cahndê hiscan sahmi gobiernu Cristu cojo Nina. ⁶ Cuidadu cojo sa xi tsajin yo xi cuindacha nuju cojo cjuangarca ta, hatuxa ngatsê rê cjuachocun xi cuicun vihi ne, vinduva castigu jyê xi sua Nina xi cuma rê xuta xi vihndiin tsêhê me. ⁷ Vêhê xi ngayun ne, caninguisuunñuu cojo rê me.

⁸Ta handasa xi hatsëë ne, ngayun cavinechun ngajñi jñu vë, peru quihndë xi tjin tangun yaan cojo Nai naja ne, camá hasen tsujun, hane nihñu sacuaha sahmi xuta xi cama hasen cjuatacun rë me. ⁹Ta tsëhë hasen jan ne, vetjucun xi jemu ndaja xuta jan hacuaha tyjahi cjuatacun rë me, hacuaha quixi me cojo xcusun rë me. ¹⁰Nihñu xatitacun xi cuma nuju mé xi chuya rë Nina. ¹¹Caninguisuunjñuu cojo xcusun xi venguichjiin rëhë xcun Nina xi sahmi xuta xi jñu cjuatacun rë me. Hitsë sa ndaja ne, ningacun tsejen cjuatsehen vëhë ta, ¹²tsëhë xi cjuatsehen vëhë xi sahmihma me ne, hisca mijí rë xi cuyenanguen ta sava tsejen. ¹³Ta hya xi vetjucaa tsejen xcusun xi sahmihma me jan ne, matsejen ndaja xi hatuxa cjuatsehen. ¹⁴Cuatjin ta hya xi vetjucaatsejen ne, ma quixi yëjë xcusun, sa xi cjuatsehen o sa xi cjuandaja. Vëhë xi chja cjuatsejen: Ningascun rë cjuatacun nuju, ngayun xi catuhun rë cahndë xi cjuahajenda hane nduvunxun tsëhë xuta xi cachaja cjuatacun rë me, hane sehe Cristu ne, sua hasen nuju me.

¹⁵Vëhë xi ngatsë rë yëjë ni cjuatsejen ne, chjuhun chuvun hacutjin cuangun cojo ngasunhndë nuju, hacuiin nechun sacuaha xuta xi jñu cjuatacun rë me, ta nechun sacuaha siu xuta xi jemu chutaha cjuatacun rë me. ¹⁶Chjavunvuhun hora nuju ne, tetjún cjuandaja ta nixtin vihi ne, jemu tjin cjuatsehen. ¹⁷Vëhë xi hacuiin ngarca yun ta, nihñu xati tacun xi cuma nuju mé xi chuya rë Nina. ¹⁸Hacuiin nihñu cjuachihi ta, vëhë ne, tsinguetsun rë cjuatacun nuju ne, hane cahndë rë xi ningatjuntuhun xi siuhun nandá xi cuitexa rë cjuatacun nuju jan ne, tuhun cahndë xi Hasen rë Nina ne, cuitexa rë cjuatacun nuju. ¹⁹Vëhë xi ngajñi cjuavisiajmi nuju ne, teyunnangun cjuatsejen rë salmo, cojo himno cojo yëjë sa xcusun xi sen xi tsëhë Nina,

quitaha tisun ne, cojo vëhë ne, hacuaha nihñu jyë nihñu hnga Nina cojo nguñajatacun. ²⁰Hacuaha tuhun nacuechji rë Nina Nahmi naja yasen ni tsëhë yëjë ni xcusun xi vatjun má, hane nihñu cojo ñihi rë Nai naja Jesucristu.

Hacutjin cuinechan cahntsua ndya naja

²¹Ninguijnu yojo nuju cojo sa xi cuma chjuhuncun xingu xingu ngayun, cuatjin nihñu ngatsë rë xi chjuhun rcun Nina.

²²Ngayun yachjin ne, ninguijnu yojo nuju tinuhyun tsëhë xihin nuju ta, cuatjin vitexa Nai naja. ²³Ta xihin nuju ne, vitexa nuju me sacuaha rcun, cuanitjin sacuaha Cristu vitexa rë yëjë xuta xi macjain rë me sacuaha rcu me. Hane Cristu cavaxëtje me xuta yungun jan sacuaha xi hacui yojo rë suva me. ²⁴Cuanitjin ne, sacuaha xuta yungun ne, vihndë me tsëhë Cristu ne, cuanitjin ni ngayun yachjin ne, yëjë xi nihñu xcun cjuahñu nuju ne, tinuhyun tsëhë xihin nuju.

²⁵Hacuaha ngayun xihin ne, nihmutacun chjuun nuju, sacuatjin Cristu ne, catsihmucacun me xuta rë yungun hane casua me yojo rë me ngatsë rë xuta jan. ²⁶Cuatjin casahmi me cojo sa xi sahmi tyjahi me cjuatacun rë xuta yungun jan cojo sa xi cuma xatsë me, hane catsityjahi me cojo cjuatsejen rë me sacuaha má xi matyjahi cojo nandá. ²⁷Cojo sa xi cuma tsingacun suva me xi xuta yungun jan ne, cun tyjahi tyjahi me, ta hisca hitsë tsajin mé camá chojyih cjuatacun rë me. ²⁸Vëhë xi ngayun xihin ne, meje rë xi nihmutacun chjuun nuju sacuaha yojo nuju suvun ta, yo xi tsihmucacun chjuun rë ne, tsihmucacun suva yojo rë. ²⁹Tsajin yo xi tsitjunngui suva yojo rë ta, hatuxa vangui me xi xinë me sehe sacuhñu rë yojo rë me, hacuaha sahmi me cuidadu tsëhë. Hacuaha Cristu ne,

cuanitjin ni sahmi me cojo xuta rë yungun ta, ³⁰ tsëhë xi sacuaha yojo rë me má xuta jan. Cuatjin ngayaan ta camá yaan tsëhë yojo tsëhë ninda rë me casahmi me yaan sacuaha xcusun rë suva me. ³¹ Ngatsë rë vihi ne, xihin ne, cuiyuju cha nahmi ra cojo naa rë cha, sehe cumatangun cha cojo chjuun ra, hane catsijo ni jan ne, cumatangun sacuaha xi ngu ni yojo. ³² Vihi ngu cjuatacun xi jemu chja vinuhya rë peru hacuaha jemu ndajiyi ta, chjá cojo nuju ta cjua vëhë ne, tichja tsëhë Cristu cojo xuta yungun. ³³ Peru handasa cuatjin vjne cjua vëhë ne, hacuaha sahmi nguýjë xi jimangu yun ne, nihmutacun chjuun nuju, sacuaha yojo nuju suvun. Hane ngayun chjuun ne, mameje rë xi chjuhuncun xihin nuju.

6 Ngayun quihndi ne, xi vitexa tsujun sacuaha xuta xi macjain rë me Nina ne, tinuhyun tsëhë xutacha nuju ta, tsëhë xi cuatjin mameje rë ta, ² cuitjin chja cjua tsëhë ley: “Chjuhuncun chjuhunjeyun nahmi nuju cojo naa nuju.” Hane cjua rë ley jan, vihi xi tjun cachja Nina xi hacuaha ticojo rë ngu cjuandaja xi hacui vi: ³ “Cuatjin nihñu cojo sa xi ndatjin cuinechun hacuaha jyë nixtin cjuecani nuju guehe xcun cjuahñu nuju.”

⁴ Hacuaha ngayun nahmi ne, hacuiin xi tuhun xti rë quihndi nuju ta, xi hitsë sa ndaja ne, nichun hacuaha tinújtuhun rë cojo cjuandaja cojo cjuajeya hacuaha ningacun rë xi cumacjain rë Nina.

⁵ Hacuaha ngayun xi nihñu xa handasa mosu xi cavatsë me yun ne, tinuhyun tsëhë patrón nuju guehe xcun cjuahñu vihi, tjín ngutacun xi nihñu xa, hacuaha nihñu nguñajatacun, sacuaha xi tinihñu ngatsë rë Cristu. ⁶ Nihñu nguñajatacun, hacuiin suva hya xi tivutsejen nuju me cojo sa xi cuichja ndaja me tsujun ta, nihñu sacuaha meje rë xi sahmi mosu xi cachaha rë xi sahmi xa rë Cristu. ⁷ Nihñu nguñaja ni cjuasua, sacuaha xi tini-

hñu tsëhë Nina, hane hacuiin tsëhë ngu xuta. ⁸ Cuatjin nihñu ta, ha hyun ta yëjë xcusun ndaja xi nihñu ne, Nina ne, sua me chjí nuju.

⁹ Hacuaha ngayun patrón ne, ha chuva vëhë ni nihñu cojo mosu xi siu ntsun hane hacuiin cojo cjuachan ta, ninguit-sun ta sa ngayun sa me vëhë ne, Nina siu tsja nuju me. Hane Nina ne, texta ni vutsejen naja me ngayëjë ni.

**Xcusun ndaja xi sua Nina
yaan xi cuisecoo naja
xi nihña si cojo xitsehen**

¹⁰ Sacuaha ngu sa cjua xi cuichjá cojo nuju ngayun xingueen, cojo ngahñu xi sua me xi tjercu hñu camahani ne, tiyujuhñu cjuatacun nuju xi tjín tangun yun cojo Nai naja. ¹¹ Chjuhun yëjë ni xcusun xi siu ntsun xi casua Nina yun cojo sa xi cuiyujunhñu cjuatacun nuju tsëhë cjuandacha xi sahmi xitsehen xi matitjun ta, ¹² si xi nihña ne, hacuiin cojo ngu xuta ngasunhndë má ta, cojo jingu sa hasen tsehe xi matitjun hacuaha cojo yëjë xi vitexa rë ngasunhndë jñu vi cojo yëjë sa xi siu ngahnga. ¹³ Vëhë xi quihndë ne, chjuhun yëjë ni xcusun xi siu ntsun xi casua Nina yun cojo sa xi scaa nuju cuangun xcun hya xi nduva cjuacjintacun vë, hane handasa cuatjun vëhë ne, cuiyujunhñu cuaha cjuatacun nuju. ¹⁴ Cuiyujuhñu cjuatacun nuju sacuaha ngu sindadu xi tjín chjine cha. Nechun cojo cjuaquixi rë Nina ta, vëhë cumachji rëhë nuju sacuaha ngu cinturón xi cuetuhun cahntsua nuju. Hacuaha quixi yun cojo cjuatacun nuju ta, vëhë sahmi chjí rëhë nuju sacuaha chingá quicha rë sindadu xi cuetjo rë ndanisin rë cha. ¹⁵ Hacuaha tjín chjine yun cojo cjua rë Nina xi chja tsëhë cjuajeya sacuaha tjín chjine cha sindadu xi vincha ntsacu cha zapatu. ¹⁶ Hacuaha cojo yëjë sa vihi ne, ndaja catamacjain nuju cojo sa xi cuma tsi-cangui rë yojo nuju hane tsicjë ngahñu

rë cjuañihi xi sahmi si xitsehen cojo nuju, sacuahha sahmi ngu quichatë xi yahatsja sindadu xi tsicangui rë yojo rë cha. ¹⁷ Chjuhunntsun cjuaninchataha rë Nina xi vetahatacun xi cumachji rëhë sacuahha ngu cascu xi vaxëtje rë rcuun, hacuahha chjuhunntsun cjua rë Nina sacuahha ngu espada xi sua nuju Hasen rë Nina. ¹⁸ Hacuaha quitaha tinihñu oración nuju yëjë ni hora. Tinújun hacuahha chjahyun rë Nina ngatsë rë Hasen rë Nina. Cojo sa xi cuma nihñu vihi, quitaha nechun cuidadu, hacuahha tinihñu oración nuju ngatsë rë yëjë xuta ladu rë Nina. ¹⁹ Hacuaha tinihñu oración ngatsë naha. Chjahyun xi Nina ne, sua sa ná me cjua hya xi cuichjá, hane cuma cuichjá nguñajacacun cojo sa xi suá cumachaya rë xuta tsëhë cjua ndajyihi rë Nina xi cuaxëtje rë xuta ta, ²⁰ ngatsë rë cjua vëhë ne, Nina catsingatju me ngahan, hacuahha ngatsë rë cjua vëhë ne, tejñaya ndavaya quihndë. Vëhë

xi nihñu oración cojo sa xi cuma cuichjá cjua vihi cojo xuta cojo yëjë ngahñu xi mameje rë.

**Nina rë Pablo xi
titsinguijnetaha me cjua**

²¹ Tíquico, xingueen, xi vinga ná hacuahha ndaja cjuinduju me cojo xa rë Nai naja ne, sua me vëhë xi cumachaya nuju tsëhë yëjë ni xcusun xi tivatju tijima, cojo tsëhë yëjë ni xcusun xi tisahme. ²² Vëhë xi tsingátju nuju me cojo sa xi cuichja me cojo nuju hacutjin nechin hane cojo vëhë ne, cuma suatacun.

²³ Hane Nina nahmi naja ne cojo Nai naja Jesucristu ne, catisua nuju me ngayun xingueen cjuandaja cjuajeya cojo cjuahmutacun ngajñi xi cumangutacun. ²⁴ Hane Nina ne, catsinchacuntihin me yëjë xuta xi hmucacun me Nai naja Jesucristu cojo ngu cjuahmutacun xi tsajin nixtin fëya. Cuatjin jain.

Carta xi catsingatju San Pablo xi cafahatsja xuta nandya Filipos

Cristu má me cjuahñu rë xuta xi macjain rë me

1 Ngahan Pablo cojo Timoteo ne, sacuahha mosu hndixahan rë Jesucristu ngayin. Ningatjin nuju ngu nina niji, ngayujun ni xi tsëhë Nina ngayun, hacuaha macjain nuju Jesucristu ndyá nandya Filipos. Hacuaha cojo me xi matitjun tsujun sacuahha obispos hacuaha cojo me xi visecoo rë me ne, ningatjin nina niji tsëhë me. ²Nina Nahmi naja cojo Jesucristu, me xi matitjun tsajan ne, catisua nuju me cjuandaja cjuajeya rë me.

Oración xi sahmi Pablo tsëhë xuta xi macjain rë me Nina

³Hya xi tsingátahacacun ngatsë nuju ne, suá nacuechji rë Nina. ⁴Hya xi féhya rë Nina ngatsë nuju ngayujun ni ne, hatuxa tjin ná cjuasua ta, ⁵tsëhë xi ngayun ne, cuatjin visecun ná xi cumachaya rë xuta cjua ndajyihi tsëhë Jesucristu. Cuatjin visecun ná hisca hya xi cafëhë tjëngë nuju ne, hisca quihndë. ⁶Cavetsihin casahmi ndajyihi Nina cjuatacun nuju. Vëhë xi ngahan ne, tjin ngucacun xi cuatjincjin ni sahmi me hisca nixtin xi cuya Jesucristu. ⁷Hacuaha ndatjin xi cuatjin tsingátahacacun ngatsë nuju ngayujun ni ta, tsëhë xi jemu vinga ná ngayun. Vinga ná ngayun ta, tsëhë xi ngayujun ngarcun ni ne, cojo ngayun tinihñu tsë tsë xa xi casua ná Nina cojo cjuandaja rë me, quihndë xi tejñaya ndavaya nguehe, hora xi tisuá cjuaquixi naha cojo xutaxa rë, xi cjua ndajyihi tsëhë Jesucristu ne, jemu ndaja camahani hacuaha hatuxa cjuaquixi. ⁸Hisca vëë jain me ta jemu meje cuinduva tjëngë nga nuju ta, tsëhë

xi ngahan ne, hmú cacún nuju ngayujun ni sacuatjin hmucacun nuju Jesucristu.

⁹Féhya rë Nina xi cuma jyë sa cjuahmutacun xi tjin nuju, hacuaha féhya rë me xi cuechutaha sa cjuatacun nuju, ¹⁰cojo sa xi cuijnercun jarë xcusun xi ndatjin xi nihñu. Sehe ngajan xi cuma tyjahi xahasen nuju, hacuaha ha café jyë nuju nixtin xi cuya nga Jesucristu ta, ¹¹tsëhë xi Jesucristu ne, ha casua nuju me cjuandaja xi cuma nihñu hacutjin xi cjuaquixi. Xi cuatjin ne, xuta ne, cjuaharcun me Nina hacuaha jemu ndaja cuichja me tsëhë me.

Cjuasua ne, caa rë fi xcun handasa vatju me cjuañihi

¹²Meje ná xi cumachaya nuju tsan, ta handasa cuitjin tejñaya ndavaya ne, hacuiin ndajintjin ta xuta ne, hitsë sa tijima chaya rë me cjua ndajyihi tsëhë Jesucristu. ¹³Hisca yëjë sindadu xi jiyahñu rë ngahan cojo yëjë ni xuta xi yahnga ne, vëë me xi tsëhë xi jemu xuta rë Jesucristu ngahan ne, vëhë xi caveya ná me ndavaya. ¹⁴Hacuaha jemu jín xingueen ne, tsëhë xi camachaya rë me hacutjin vátju quihndë xi tejñaya ndavaya ne, hitsë sa mangucacun me cojo Nina. Hane vëhë xi macjiin cacun me xi chja me cjua rë Nina.

¹⁵Quixi ta hacuaha tjin xuta xi sua me machaya rë xuta cjua tsëhë Jesucristu. Peru tsëhë xi sahmi xín cacun me cojo ná, hacuaha mijí rë me xi cjua naha cjuexcun, vëhë xi cojo me chja me. Peru yahnga nga me ne, cuatjin chja me ta, tsëhë xi jemu tjin rë me cjuandaja. ¹⁶Cuma cuinújan ne, me xi cuacun tjin rë cjuandaja jan ne, sua me machaya rë xuta cjua tsëhë Jesucristu ngatsë rë cjuahmutacun xi tjin rë me cojo ná, tsëhë xi ha vëë me ta Nina ne, casua ná me xa xi cuichjátë ngatsë rë cjua ndajyihi tsëhë Jesucristu. ¹⁷Peru me xi cuacun tjin rë cjuaxintacun jan ne, sua me machaya rë

xuta cjuua vëhë ngatsë rë xi meje sahmi yehe suvá me yojo rë me. Tsajin rë me ngu cjuatacun xi ndajyihi xi cuatjin chja me. Xi má rë me ne, ngahan ne, xi tejñaya ndavaya nguehe ne, cumacjín-cacun ngatsë rë xcusun xi tisahmi me. ¹⁸ Tsimii sahmi rë xi cuatjin cjuatacun rë me xi chja me cjuua rë Nina, ¿há xi nguñajacacun me ne?, o ¿há xi hacuiin nguñajacacun me ne?, ndastu cuenda xi cjuua tsëhë Jesucristu ne, tijimachaya rë xuta. Vëhë xi jemu ndama ná.

¹⁹ Hya xi ha cuatju cjuacjintacun naha ne, hacuaha ndaja cuma ná ta tsëhë xi ha hvë ta hya cuma tsejen xi tsajin jyé naha. Cuatjin cuma ta tsëhë xi tichjahyun rë Nina ngatsë naha, hacuaha tsëhë xi Hasen xi casua naja Jesucristu ne, cuisecoo ná. ²⁰ Jemu meje ná xi ngajñi rë yëjë ni xcusun xi sahme ne, tsajin mé xi sua sava ná. Hacuaha meje ná xi cumacjiin cacún ngajñi rë tu mé ni cjuacjintacun, cojo sa xi xuta ne, hatuxa sahmi jyë hnga me Jesucristu ngatsë naha, sa xi tsismi ná xutaxa rë ne, o sa tsajin ne, sa xi tsiquehen ná me. ²¹ Peru jinguyëjë rë xi tejña cjuahñu ne, hatuxa meje sahme nguñajacacun yëjë ni hacutjin xi Jesucristu meje rë me. Hacuaha sa xi cueya ne, jemu ndaja tsahan. ²² O sa xi cuitejña sa cjuahñu ne, xa xi sahme ngatsë rë Jesucristu ne, ndatjin cuetju. Vëhë xi hisca hveen ne, jarë xi hitsë sa chuya ná, ¿há xi cueya ne?, ¿há xi cuitejña cjuahñu? ²³ Cuma cuinújan ne, jemu chja sacuse ná jarë xcusun xi ndatjin. Jercu meje cjué tjëngë Jesucristu ngajan hiscan tacun me ta, jemu sa ndaja tsahan xi cuatjin. ²⁴ Peru hitsë sa mameje rë xi cuitejña cjuahñu ngatsë nuju. ²⁵ Tsëhë xi cajneacún tsëhë cjuatacun vëhë ne, vëhë xi hvë ta cuitejña sa cjuahñu. Cuitejña sa cojo nuju ngayujun ni ne, cojo sa xi cuisécoo nuju xi tuxaha sa cjuatacun nuju xi chutayun cjuachacun xi macjain naja, hacuaha hitsë sa ndaja cuma rë xa-

hasen nuju tsëhë cjuua vëhë. ²⁶ Hacuaha hya xi cuinduvá cuitejña nga cojo nuju ne, cuinújun ta jemu ndaja Jesucristu, ngatsë rë xi cavétju ndavaya.

²⁷ Nihñu yëjë ni hacutjin xi meje rë xi sahmi xuta xi ha macjain jain rë me cjuua ndajyihi tsëhë Jesucristu. Cuatjin nihñu, cojo sa xi ndaja cjuua sacú ná tsujun, ¿há xi cuinduvá tjëngë nuju?, o sa tsajin ne, ¿há xi tejñataha jingu sa ladu? Peru meje cumachaya ná xi ngayun ne, tjin tangun cjuatacun nuju, hacuaha vise-cuun xingun xi nújun tjin ngatsë rë cjuua ndajyihi xi macjain naja. ²⁸ Hacuaha meje cumachaya ná xi ngayun ne, rcuun camahani tsëhë xuta xi sahmi nuju me condra. Xi cuatjin rcuun ne, cuma tsejen xi Nina ne, tacun jain me cojo nuju. Hacuaha cuma tsejen xi cuechu nixtin xi Nina ne, tsingatju me xuta xi cuacun jan xcun ndihi, peru ngayun ne, cuaxëtje nuju me. ²⁹ Nina ne, ndaja casahmi me cojo nuju xi hacuiin suvá xi cumacjain ni nuju Jesucristu ta hacuaha cuatjun cjuañihi ngatsë rë xi macjain nuju me. ³⁰ Titjun ne, cahyun cjuañihi xi cavátju camá. Quihndë ne, camachaya nga nuju xi ha cuanitjin ni tivátju tijima. Hacuaha ngayun ne, hacuanitjin ni tivatjun tijima quihndë.

Meje rë xi chjayanguen tsëhë Cristu sacuaha catsinguijne me yojo rë me

2 Tjin rë xahasen nuju cjuasua ta, tsëhë xi tjin tangun cjuatacun nuju cojo Jesucristu. Tjin nuju cjuetacun ta, tsëhë xi me vëhë ne, hmucacun nuju me. Tjin tangun cjuatacun nuju cojo Hasen rë Nina. Hacuaha tjin nuju cjuahmutacun cjuayumatacun cojo xingun, xingu xingu ngayun. ² Quihndë ne, cojo sa xi cuma chihin cjuasua xi tjin rë xahasen naha ne, cuitjin nihñu. Nihñu tangun cjuatacun nuju cojo xingun. Hacuaha ngajñi nuju ne, nihmutacun xingun cojo ngu ni cjuatacun nuju. ³ Sa xi meje nuju

xi suvun ni xi ndajyihi cuatjun cuma ne, ndajin tjin. Hacuaha mijí rē xi nihñu yehe yojo nuju ta, xi meje rē ne, jeya ngayun. Hacuaha meje rē xi chutsujun xingun sacuaha xi hitsē sa vengui chjí rē me xi cumá nuju ngayun. ⁴ Mijí rē xi tsujun suvun ni cuinchunsun xi ndaja ta, hacuaha meje rē xi tinchunsun xi ndaja xi cumá rē jingu sa xuta.

⁵ Meje rē xi ningatuhuntacun sacuaha catsingatahacacun Jesucristu. ⁶ Me vëhë ne, handasa ha Nina me ne, peru hacuiin casahmi jyë hnga me yojo rē me xi meje cuejña me sacuaha Nina ta, ⁷ cahndé rē vëhë ne, cavejñaxin me cahndé rē me xcun Nina, hane casahmicuenda me xuta camá me ngu xuta sacuaha yaan, cojo sa xi sahmi me yëjë ni hacutjin cuitexa Nina me. Hya xi ha camá me xuta ne, ⁸ cahndé me yëjë ni hacutjin cachja Nina, hacuaha catsingatihin me xi cat-sisava xuta me, hisca catsingatihin me xi catsiquehen xuta me xcun cru, sacuaha xi jemu jyë jyë rē me. ⁹ Vëhë xi Nina ne, hya xi catsicuya me Jesucristu cjuahñu ne, hya casahmi jyë hnga me Jesucristu, hacuaha ngu ni me vëhë xi jemu vengui chjí rē ñihí rē me. ¹⁰ Cuatjin casahmi Nina, cojo sa xi yëjë ni ángel, yëjë ni xuta, cojo yëjë ni xitsehen ne, cuechú nixtin xi cuixcuhnchi xcun Jesucristu xi cjuaharcun rē me. ¹¹ Hacuaha cuichja ta Jesucristu ne, hatuxa matitjun jain me. Xi cuatjin ne, cumatsejen xi Nina Nahmi naja ne, hatuxa jemu jyë hnga me cojo cjuatacun rē me.

Xuta xi macjain rē me Nina ne, tsejen xcusun rē me xcun yahnga xuta

¹² Sacuatjin ndaja canuhyun tsahan hya xi cavinechan cojo nuju, tsan ne, cuatjin hitsē sa nguñajatacun tinuhyun tsahan quihndé xi xín tejñataha. Hacuaha meje rē xi nihñu yëjë ni hacutjin xi chuya rē Nina ta, tsëhë xi me vëhë xi vaxëtje nuju me. Ndaja cuidadu cojo sa xi

cumachihin cjuatacun vëhë. ¹³ Hacuaha scaa nuju nihñu cuatjin ta, tsëhë xi Nina sahmi me xi meje nihñu yëjë ni hacutjin xi chuya rē me, hacuaha sua nuju me ngahñu xi scaa nuju nihñu cuatjin.

¹⁴ Ngajñi rē yëjë ni cjuacjintacun xi tjin nuju ne, xi canújunjuun cojo xingun xi chuyiin nuju, xi canujuun cuitjin cuatjin. ¹⁵ Xi cuatjin ne, tsajin jyë nuju hacuaha tyjahi xahasen nuju. Cuma cuinújan ne, ngayun xi ha quihndi rē Nina ngayun ne, tsajin jyë nuju, xi nechun ngajñi rē xuta tsehen xuta ndajin xi siu ngasunhndé. Meje rē xi cumatsejen xi jemu ndaja ngayun ngajñi rē xuta tsehen, ¹⁶ xi tuhun machaya rē xuta cjuanda jyihi xi sua naja cjuahñu xatsë. Cuatjin nihñu ne, cojo sa xi ndaja cuma ná ngatsë nuju nixtin xi cuya nga Jesucristu ta, tsëhë xi xi cuatjin ne, hya cumatsejen xi hacuiin tu mahya casahme ngahñu xi sahme hacutjin xi chuya rē Jesucristu, hacuaha hacuiin tu mahya casahme xá. ¹⁷ Ha ndasa tsiquehen ná xutaxa rē tsëhë xi ngahan cavisécoo nuju xi cumacjain nuju Jesucristu hacuaha cavisécoo nuju xi nihñu xa rē me, peru ndaja cuma ná. Hacuaha ndama ná xi ngayujun ni ne, casua nuju Nina cjuandaja rē me. ¹⁸ Ha chuva vëhë ni ne, ndaja catama nuju ngatsë rē cjuandaja vë, hacuaha ndaja catama nuju ngatsë naha.

Ejemplu xi sua apóstol

¹⁹ Sa xi meje rē Jesucristu, me xi matitjun tsajan, sacuatjin xi meje ná ne, tsingátju nuju Timoteo. Meje tsingátju nuju me cojo xati, cojo sa xi ngahan ne, hacuaha ndaja cuma rē xahasen naha, hya xi cuya nga me cojo cjuanda hacutjin tivatjun tijima. ²⁰ Me vëhë tsingátju me ta, tsëhë xi tsajin sa ná ngu xuta xi vinga nuju sacuaha me vëhë. Me vëhë ne, jemu meje rē me xi ndaja cuatjun cuma. ²¹ Peru yëjë me xi yahnga ne, sahmi cuenda me cjuandya rē suvá ni

me, sahmi cuendaain me xa xi meje rë Jesucristu xi cumá. ²² Peru ha hyun xcusun rë Timoteo. Ha hyun ta hya xi cavisecoo ná me xi catihin cumachaya rë xuta cja rë Nina ne, cavisecoo ná me sacua ha visecoo ngu quihndi nahmi rë. ²³ Vëhë xi, xi tu sacú cumachaya ná mé xi cuátju cuma ne, me vëhë xi meje tsingátju nuju me. ²⁴ Hacuaha xi má ná ne, me xi matitjun tsajan ne, sua me cahndé xi cojo xati ne, cuinduvá tjëngë nuju.

²⁵ Peru xi má ná ne, hacuaha sahmi ngu jyë xi tsingátju nuju Epafrodito xinguen. Me vëhë ne, casahmi me coná xa, hane cojo me vëhë caca niji cojo cjuahngatacun rë xuta xi chohovëë naja. Hacuaha cavisecoo ná me sacuatjin xi meje nuju ngayun xi caningatjun me. ²⁶ Hane me vëhë ne, jemu tjin cacun me xi meje scuëë nuju me ngayujun ni ta, tsëhë xi choho camá rë me xi camachaya nuju cja xi hmu rë me. ²⁷ Hacuaha quixi xi jemu cama hmu rë Epafrodito. Ña meje cueya me. Peru cahmii me ta, tsëhë xi camayuma rë Nina me. Hacuaha camayuma rë Nina ngahan ta, tsëhë xi mijí rë me xi cuma jyë sa cjuachoho xi tivátju tijima. ²⁸ Vëhë xi cojo xati ne, tsingátju nuju Epafrodito, sehe cuma sua rë xahasen nuju xi chun nga me ngu ndiya. Hacuaha ngahan ne, cuma chuva hitsë cjuachoho xi tivátju tijima. ²⁹ Vëhë xi chjuhunnstun me cojo cjuasua, tsëhë xi me vëhë ne, hacuaha macjain rë me me xi matitjun tsajan. Hacuaha chjuhuncun yëjë ni xuta xi tangun cjuatacun rë cojo rë me. ³⁰ Me vëhë ne, tsëhë xi jercu casahmi me xa tsëhë cja rë Jesucristu ne, vëhë xi hitsë sa ne, cahme me. Handasa cavetaha tsavi me yojo rë me xi cavisecoo ná me ne, peru camacjiincacun me xi cavisecoo ná me cahndé nuju ngayun.

Xcusun xi jemu vengui chjí camahani rë

3 Quihndë tsan ne, catamasua rë xahasen nuju ngatsë rë me xi matitjun tsajan.

Ngahan ne, hacuiin ndya ma ná xi cúya tsihindu nga nuju cja xi ha cachjá cojo nuju ta, tsëhë xi cja vëhë ne, cuisecoo nuju xi tsajin yo tsinguet-sun cjuatacun nuju xi macjain nuju Jesucristu. ² Nechun cuidadu cojo xuta machjiriin xi vindacha xi chja xi hachu meje rë xi xtf yojo naja, sehe tsejen xi tsëhë Nina ngayaan. ³ Quixiin cja rë me ta ngayaan xi tsejen xi tsëhë Nina ngayaan. Hane Hasen rë Nina ne, visecoo naja xi ma chjahanrcun Nina, hacuaha nechan cjuasua ngatsë rë Jesucristu. Ha hyan ta hatuxa cumaji cuetjuntjen ngatsë rë xcusun xi cun ngayaan cojo xcusun xi nihña. ⁴ Peru sa xi cuatjin cuma cuetjuntjen suvaan ne, ngahan ne, hitsë sa tjin ná chuva rë xi cuétjutjé xi cumá rë xuta xi yahnga. ⁵ Ngahan ne, hacuaha cati ná xi cavéchu xi jyin nixtin, sacua ha xcusun rë xutachanga naha. Ngahan ne, tjë rë xuta nangui Israel ngahan. Hacuaha quihndindai cjin rë Benjamín ngahan. Ha tuxa xuta tjë rë Israel ngahan ta xutacha naha ne, hacuaha xuta tjë rë Israel me. Ngahan ne, tsëhë partidu fariseo ngahan hacuaha casahme yëjë ni hacutjin chja ley rë yungun naha. ⁶ Ngahan ne, jercu cavétaharcu xcusun rë xutachanga naha, hane vëhë xi hisca casuá cjuañihi xi cuma rë xuta xi macjain rë Jesucristu. Ngahan ne, tsëhë xi casahme sacuatjin chja ley rë yungun naha ne, vëhë xi camaji catsicaniji ná xuta hisca ngu jyë. ⁷ Xi catsingátahacacun hatsëë ne, jemu vengui chjí rë yëjë xcusun vëhë. Peru ngatsë rë Jesucristu ne, xi má ná quihndë ne, venguiin camahani chjí rë xcusun vëhë ta, cumaji cuaxëtje ná. ⁸ Hisca ven-

guiin chjǵ rē yějē sa xcusun, má ná ta, tsēhē xi jercu vengui chjǵ rē xi tjin tangun cjuatacun naha cojo Jesucristu, me xi matitjun tsajan. Ngatsē rē me vēhē ne, ngahan ne, cacandēxen yějē ni xcusun, sacua ha xi chanden xtē, cojo sa xi ngahan ne, cuma tsēhē Jesucristu ngahan. ⁹Hacuaha cuma tangun cjuatacun naha cojo rē me. Xi cuatjin ne, cjuē jyé naha, hacuiin ngatsē rē xi sahme hacutjin chja ley rē yungun ta ngatsē rē xi macjain ná Jesucristu. Nina ne, tsicjē me jyé naja ngatsē rē xi macjain naja Jesucristu.

¹⁰Jemu meje ná xi ndaja cuma tangun cjuatacun naha cojo Jesucristu. Hacuaha meje ná xi cojo ngahan sacu ná ngahñu xi catsingacun Nina, hya xi camá catsicuya me Jesucristu cjuahñu. Sa xi meje rē Nina ne, ngahan ne, tsingatehen xi cuátju cjuañihi hacua ha hisca tsingatehen xi tsiquehen ná xuta ta, tsēhē xi cuatjin cavatju Jesucristu camá. ¹¹Hane hya xi cueya ne, meje rē Nina xi hacua ha tsicuya ná me cjuahñu xi tejña ngajñi rē nima.

¹²Cjēē cuma chihin yějē ni cjuatacun xi meje ná vē, hacua ha chaja sa cuma tyjahi cjuatacun naha. Peru tisahme sa ngahñu, cojo sa xi cuma sahme chehen cjuatacun vēhē. Cuatjin sahme ta, tsēhē xi Jesucristu ne, ha casahmi tsēhē me ngahan. ¹³Cúya cuichjá cojo nuju tsan ta, cjēē sahme chehen cjuatacun vēhē. Peru cuitjin meje sahme: tsicháya xcusun xi ha cavátju camá, hacua ha sahme ngahñu xi cuma sahme xcusun xi vengui chjǵ rē xi sehe nduva. ¹⁴Tisahme ngahñu xi cuma sahme chehen xcusun vēhē, cojo sa xi sacú ná cuatjo xi sua ná Nina ngatsē rē xi macjain ná Jesucristu. Nina ne, cuaxijin ná me xi cuitejña ngan ngahnga hiscan tacun me.

Meje rē xi tjin tangun yaan xi macjain naja Nina

¹⁵Vēhē xi ngayaan xi ha ndaja macjain naja Jesucristu ne, meje rē xi cuatjin cuiyujun cjuatacun naja. Hane sa xi tjin yahnga ngayun xi hacuiin cuatjin cuiyujun cjuatacun nuju ne, Nina tsingacun nuju me hacutjin xi cjuaquixi.

¹⁶Ndastu sahmi ngu jyé xi nihña cuenda tsēhē cjuaquixi xi ha hyan ne, cuatjin meje rē xi nihña.

¹⁷Vēhē xi meje rē xi nihña hacutjin xi sahme, tsan. Hacuaha tetuhuncun xcusun rē xuta xi sahmi hacutjin xi sahme. ¹⁸Ha jemu cachjá cojo nuju ta jemu cjín xuta xi condra me tsēhē cjua ndajyihi xi sua machaya naja hacutjin cahme Jesucristu xcun cru. Na tijñhnda xi tichjá nga ngu ndiya cojo nuju cjua vēhē. ¹⁹Peru xuta xi sahmi me condra cjua ndajyihi vē ne, cjue me xcun ndihi. Cahndé rē xi cjuaharcun me Nina xi cjuaquixi ne, hitsē sa faharcun me tu mé ni xcusun xi chuya rē me. Cahndé rē xi cuma sava rē me tsēhē xcusun xi sahmi me ne, tu hitsē sa sahmi yehe me yojo rē me. Cuma cuinújan ne, tjin tangun cjuatacun rē me cojo cjuatacun rē ngasunhndē. ²⁰Peru ngayaan ne, xuta tsēhē ngahnga ngayaan. Hacuaha ha nechayan rē Jesucristu, me xi matitjun tsajan, ta cuinduva me tsēhē ngajan xi cuaxētje naja me. ²¹Me vēhē tsindeya me yojo jyé naja xi tsajin mé machji rēhē, hane sahmi me sacua ha yojo rē suvá me xi jercu vengui chjǵ rē. Cojo ngahñu rē suvá me ne, sahmi me ta, tsēhē xi me vēhē matitjun me tsēhē yějē ni xcusun.

Tahan cjuasua yějē ni nixtin ngatsē rē Nai naja

4 Vēhē xi sacuatjin xi ha macjain nuju me xi matitjun tsajan tsan ne, cuatjin tangun cojo ngasunhndē nuju. Jercu meje cuinduvá tjēngē nuju tsan. Jemu

ma sua rë xahasen naha ta, tsëhë xi ngayun ne, tivangun nduju cojo cjuatacun nuju xi macjain nuju Jesucristu.

² Quihndë ne, féhya nuju ngayun Evodia cojo ngayun Síntique nihñu favor ne, ngu tangun ni catama cjuatacun nuju cojo xingun, sacuatjin meje rë xi nihña ngayejen ni xi tsëhë me xi matitjun tsajan ngayaan. ³ Hacuaha ngaye xi ndaja compañeru naha ngaye ne, nihñi favor ne, tiseceue rë na xi cuacun vë, xi cuijnetaha si xi tsahmi na cojo xicjin na. Ta na xi cuacun vë ne, jercu casahmi na cojo ná xa, hya xi catihin camachaya rë xuta cjua ndajyihi tsëhë Jesucristu. Hacuaha cojo cha Clemente cojo sa yahnga compañeru naha ne, cavisecoo ná me. Xuta xi cuacun vë ne, hatuxa sacú rë me cjuahñu xatsë ta, tsëhë xi ha tsëhë Nina me.

⁴ Ndaja catama rë xahasen nuju ngatsë rë xi tjin tangun cjuatacun nuju cojo me xi matitjun tsajan. Cúya cuichjá nga cojo nuju, ndaja catama rë xahasen nuju. ⁵ Meje rë xi cuma tsejen xi tjin nuju cjuandaja cojo yëjë ni xuta ta, tsëhë xi me xi matitjun tsajan ne, ha tacun xati xi cuinduva nga me. ⁶ Ngajñi rë yëjë ni cjuacjintacun nuju ne, xi camacjiintacun. Tinújun cojo Nina hacuaha chjahyun rë me cjuandaja rë me. Hacuaha tuhun nacuechji rë me. Cuatjin meje rë xi tuhun cumachaya rë Nina tu mé ni xi meje nuju. ⁷ Ngajan xi cjuajeya xi sua nuju Nina ne, vëhë cuetjo nuju, cojo sa xi cumacjiintacun, xi tjin tangun cjuatacun nuju cojo Jesucristu. Sacuaha cjuajeya xi sua nuju Nina jan ne, hisca vijni-ircun ndandaja ta, tsëhë xi jemu tu ndaja camahani cjuajeya vëhë.

Xcusun ndaja xi meje rë xi cuinchan cjuatacun naja

⁸ Quihndë tsan ne, nihñu tangun cjuatacun nuju cojo cjuatacun xi cuicun vihi: cjuatacun xi cjuaquixi, cjuatacun xi chjaharcun rë, cjuatacun xi ndatjin, cju-

atacun xi tyjahi, cjuatacun xi ndacun, cjuatacun xi chuya rë xuta ndaja. Cuma cuinújan ne, tu jarë ni cjuatacun xi jemu ndaja o sa xi hatuxa tjin chuva rë xi chjaharcun rë ne, vëhë nihñu tangun cjuatacun nuju cojo. ⁹ Hacuaha nihñu yëjë ni hacutjin xi camá nuju hya xi cavicuyá nuju hacutjin meje rë xi nihñu. Peru hacuiin suvá cjua xi cachjá cojo nuju ta hacuaha cojo xcusun xi casahme ngajñi nuju ne, cojo vëhë meje rë xi nihñu. Hane cuatjin ne, Nina xi sua naja cjuajeya ne, tacun me cojo nuju.

Cjuatjo tsëhë xuta nandya Filipino xi cuma rë Pablo

¹⁰ Ngatsë rë me xi matitjun tsajan ne, jercu ndama ná ta, handasa jemu cavatju nixtin ne, hindë cavuyun caningatuhuntacun nga ngatsë naha. Hacuuiin hatuxa canichayun ná ta, cuenda xi casacuinyiin nuju hacutjin cuma xi cuisecun ná hisca quihndë. ¹¹ Hacuuiin tichjá cojo nuju cuatjin ngatsë rë xi tjin mé xi ma chaja ná ta, ngahan ne, ha casacu ná chuva rë hacutjin cumangucacún cojo tu mé ni cjuacjintacun xi nduva. ¹² Sa yuma sa nchina ngahan ne, hatuxa mangucacún. ¿Há tjin xi sínë?, o ¿há tsajin xi sínë?; ¿há xi jercu tjin ná?, o ¿xi ma chaja ná?, tsimii sahmi rë ta ngahan ne, ha catuxaha cjuatacun naha xi cumangucacún cojo tu mé ni cjuacjintacun xi nduva. ¹³ Scaa ná cojo tu mé ni cjuacjintacun ta, tsëhë xi Jesucristu ne, tisua ná me ngahñu. ¹⁴ Peru, jemu ndaja canihñu xi cavisecun ná ngajñi rë cjuañihi xi tivátju tijima.

¹⁵ Ngayun xuta nandya Filipino ne, ha hyun ta hya xi tjutjun casuá camachaya nuju cjua ndajyihi tsëhë Jesucristu hacuaha sehe cavétju tsëhë dis-tritu Macedonia ne, hisca ngu yungun cavisecuaain ná cojo tujún hya. Suvun

tutu xi cavisecun ná. ¹⁶ Hacuaha hya xi tejñataha ngajan nandya Tesalónica ne, ngu jo ndiya ne, caningatjun tujún tséhë cjuachaja xi tjin ná. ¹⁷ Hacuian jercu meje ná cjuandaja xi ningatjun ná ta xi hitsë sa meje ná ne, xi sacu nuju cjuandaja rë Nina ngatsë rë cjuandaja xi nihñu. ¹⁸ Ha cafahántsa yějë ni xi caningatjun ná cojo Epafrodito. Véhë xi ha tjin ná yějë ni xi mameje ná. Hisca vangui sa xi tjin ná. Cuatjo nuju vë ne, tangun cojo ngu cuatjo xi ndaja jne, xi vejña xacun ngasuncun. Hane Nina ne, fahatsja me cuatjo jan ta jemu chuya rë me tséhë. ¹⁹ Hacuaha Nina naja ne, tséhë cjuanchina ndajyihi xi tjin rë me ne, hatuxa sua nuju me tu mé ni xi machaja

nuju, ngayujun ni xi tjin tangun cjuatacun nuju cojo Jesucristu. ²⁰ Quihndë ne, catichja xuta ta Nina Nahmi naja ne, jercu ndaja camahani me yějë ni nu yějë ni nixtin. Cuatjin jain.

Cjua xi vijnetaha

²¹ Yějë ni xuta xi tjin tangun cjuatacun rë cojo Jesucristu ndyá ne, tuhun rë me nina naha. Hacuaha xingueen xi siu cojo ná nguehe ne, tsingatju me ngu nina nuju. ²² Hacuaha cojo sa yějë me xi tséhë Nina, hisca cojo me xi siu ngajan ndava me xi matitjun camahani tséhë xuta Roma ne, tsingatju me nina nuju.

²³ Cjuandaja rë Jesucristu, me xi matitjun tsajan ne, catejña cojo nuju.

**Carta xi catsingatju San
Pablo xi cafahtsja xuta
ladu rë Jesucristu
ngajan nandya Colosas**

1 Ngahan Pablo ne, apóstol tsêhë Jesucristu ngahan ta, tsêhë xi cuatjin camameje rë Nina. Ngahan cojo Timoteo xingueen ne, ²ningátjin nuju carta vihi ngayun xuta nandya Colosas, ngayujun ni xuta ladu rë Nina xi jercu ndaja tisan-gunndujun cojo ndiya rë me hacuaha tjin tangun cjuatacun nuju cojo Jesucristu. Nina Nahmi naja ne, catisua nuju me cjuandaja cjuajeya.

**Sua Pablo nacuechji rë Nina
ngatsë rë xuta nandya Colosas**

³Jercu tihín nacuechji rë Nina Nahmi rë Nai naja Jesucristu yasen yasen ni, hya xi nihñi oración ngatsë nuju. ⁴Tihín nacuechji rë Nina ta camachaya niji hacutjin xi ngayun ne, mangutacún cojo Jesucristu hacuaha nihmutacún yêjê ni xuta ladu rë Nina. ⁵Cuatjin tihinhü ta, jercu vetuhun tacún cjuandaja xi Nina tacunxin rë me ngajan ngahnga xi cuma nuju ngayujun ni. Cavetsuhun cavetuhun tacún cuatjin, hatsëë hya xi canuhyun cjuandajyihi xi cjuaquixi, xi chja tsêhë Jesucristu. ⁶Cjuandajyihi jan ne, casacu camachaya nuju sacuatjin sa rë yahnga xuta tsêhë jercu cjín sa cahndé. Hane xi macjain rë xuta cjuandajyihi jan ne, jercu tisahmi me cjuandaja, hacuaha jercu cjín sa xuta tijimacjain rë me. Cuanitjin tivatju ngajñi nuju ngayujun ni, hisca hya xi camachaya nuju cjuaja jan hacuaha ndaja cavijnercun xi Nina ne, jercu sahmi me cjuandaja. ⁷Cuatjin cachja cojo nuju Epafra, me xi jercu vinga niji hacuaha tangun fahacuenda me cojo niji xa xi vitexa Jesucristu. Me vêhë ne, jercu ndaja cjuin-duju me tifahacuenda me tsêhë xa jan

cojo sa xi tsujun ndaja. ⁸Hacuaha casua me camachaya niji xi ngayujun ni ne, tjin nuju cjuahmutacun cojo yêjê ni xuta ladu rë Nina, cojo cjuahmutacun xi sua nuju Hasen rë Nina.

⁹Ngatsë rë xi cuatjin camachaya niji tsêhë cjuaja xi chja tsujun ngayujun ni ne, vêhë xi tihinhü oración tsujun ngayujun ni yasen yasen ni hisca hya xi camachaya niji. Tichjahyin rë Nina xi cuijnercun yêjê hacutjin xi meje rë Nina xi nihñu. Tichjahyin rë me xi ndaja tuxaha cjuatacun nuju hacuaha cuijnercun cojo cjuatacun xi sua nuju Hasen rë Nina. ¹⁰Cuatjin tichjahyin rë me, cojo sa xi ngayujun ni ne, cuangunndujun cojo ngasunhndë nuju sacuatjin meje rë xi sahmi xuta ladu rë Nai naja, cojo sa xi chuya rë me tsêhë yêjê ni xi nihñu. Cuatjin tichjahyin rë me, cojo sa xi ngayujun ni ne, nihñu yêjê ni xcusun cjuandaja, hacuaha ndaja sa chun Nina ngu nixtin ngu nixtin. ¹¹Nina catisua nuju me ndaja cjín ngahñu, tucu ngahñu xi tjin rë me, cojo sa xi yêjê ni nixtin scaa nuju cojo yêjê ni xcusun xi vatjun má hacuaha nijyun tacún cojo xuta, táha tijimasua nuju. ¹²Cuatjin tichjahyin rë Nina, cojo sa xi ngayujun ni ne, tuhun nacuechji rë Nahmi naja ngatsë rë xi me vêhë ne, cavêhëchjine nuju me cojo sa xi cojo ngayun satë nuju cjuandaja xi sua me xuta ladu rë me ngajan ngahnga. ¹³Nina Nahmi naja ne, cavaxëtje naja me tsêhë xitsehen xi matitjun tsêhë yêjê ni cjuatsehen, hane cavejña naja me tsja Quihndi rë me xi jercu hmucacun me. ¹⁴Cojo xcusun xi casahmi Quihndi rë me jan ne, Nina ne, cavechjitje me yêjê ni jyé xi quitjen xuta, hane catsinchataha me ngayaan.

**Sahmi Nina xi cuya cumandaja
ngayaan cojo rë me**

¹⁵Quihndi rë me jan ne, tsingacun naja hacutjin xcusun rë Nina cojo Hasen

rë me, handasa maji matsejen Nina. Quihndi rë me jan ne, hatuxa matitjun me tsëhë yëjë ni xi casahmi Nina ta, ¹⁶ tsëhë xi cojo me ne, Nina ne, casahmi me yëjë ni xi tjin ngasunhdë xi tsejen, cojo yëjë ni xi tjin ngahnga xi matsijin, sacuaha yëjë ni xcusun hasen xi matitjun sa hasen ndaja sa hasen tsehen. Cojo me vëhë ne, casahmi Nina yëjë ni, cojo sa xi yëjë ni xi cuacun jan ne, sahmi jyë sahmi hnga rë me. ¹⁷ Quihndi rë me jan ne, hatuxa matitjun me tsëhë yëjë ni xi casahmi Nina ta, tsëhë xi me vëhë xi tjun sa tacun me xi cuma rë yëjë ni hacuaha ngatsë rë me vëhë ne, siuchihin yëjë ni. ¹⁸ Me vëhë ne, vitexa me xuta ladu rë Nina sacuatjin rë rcuun xi vitexa rë yojo naja. Hacuaha sua me cjuahñu xatsë xuta ladu rë Nina ta, tsëhë xi me vëhë tjun tjun me cavuya me cjuahñu tsëhë ngajni rë yëjë nima, cojo sa xi cumatitjun camahani me. ¹⁹ Quihndi rë Nina jan ne, tsingacun naja hacutjin xcusun rë Nina cojo Hasen rë me ta, tsëhë xi cachuya rë Nina xi cuisehentë me cuejñacahndë suvá me cahntsua xahasen rë Quihndi rë me. ²⁰ Nina Nahmi naja ne, cavejña naja me tsja Quihndi rë me, tsëhë xi cavejñangucacun me xi cojo Quihndi rë me ne, tsicuya me ladu rë me ngayëjë ngarca ni, sa ngahnga sa ngasunhdë, cojo sa xi cumajyë cumahnga Quihndi rë me jan. Hane ngatsë rë jni rë Quihndi rë me xi cavanga xcun cru ne, hindë tsajin mé cjuachan.

²¹ Ngayujun ni ne, handasa hatsëë ne, jemu cjin nechun tsëhë Nina hacuaha condra nuju me ngatsë rë xi jemu tsehen cjuatacun nuju hacuaha jemu tsehen xcusun xi canihñu, ²² peru quihndë ne, casahmi Nina xi cavuya nga camandaja yun cojo rë me. Cuatjin casahmi me cojo cjuaveya tsëhë yojo rë Quihndi rë me, cojo sa xi ngayujun ni ne, tsëhë me yun hacuaha tsajin camahani jyë nuju, hya xi squindaya nuju me xi

cuangun xcun me. ²³ Cuatjin cuma sa xi cjuenduju xi siu cahndë cjuatacun nuju xi macjain nuju cjuandajyihi xi chja tsëhë Cristu, hacuaha cjuenduju xi vetuhun tacún cjuandajyihi xi canuhyun jan. Hane cjuandajyihi jan ne, casacu camachaya rë xuta tsëhë jercu cjín cahndë. Hane ngahan Pablo ne, casatëxa ná xi suá machaya rë xuta cjuandajyihi jan.

Casuaxa Nina Pablo xi cuichjatë me cjuatahahma ndajyihi xi chja tsëhë Jesucristu

²⁴ Quihndë ne, ma sua ná xi tivátju cjuañihi cojo sa xi tsujun ndaja. Tisahmechehen tsëhë yëjë ni cjuañihi xi cachja Cristu xi cuátju cuma cojo yojo naha, cojo sa xi tsëhë xuta ladu rë me ndaja, hane ngayejen ni xi ladu rë me ne, sacuaha yojo rë me ngayaan. ²⁵ Ngahan ne, camá ngahan ngu xuta xi visécoo rë xuta ladu rë Cristu, tsëhë xi Nina casuaxa ná me xi cuisécoo nuju ngayun xutaxín, cojo sa xi suá cumachaya nuju tsëhë yëjë ni cjuandajyihi xi cachja me. ²⁶ Cjuandajyihi jan xi cachja me ne, hacui cjuatahahma. Cjua vëhë ne, cavetjo Nina tsëhë yëjë ni xuta xi caviyuju me yëjë ni nixtin xi cavatju, peru quihndë ne, casua me camachaya rë yëjë ni xuta ladu rë me. ²⁷ Nina ne, cavejñangucacun me xi sua me cumachaya rë xuta xi cuacun jan xi cjuatahahma vihi ne, chja xi jercu tsinchacuntihin Nina xutaxín jan. Cuma cuinújan ne, Cristu ne, cuejñacahndë me cahntsua xahasen nuju ngayun xutaxín. Hane cuetuhun tacún xi sehe cuaxëndaja me yun. ²⁸ Ngayin ne, tihín cumachaya rë xuta tsëhë cjua xi chja tsëhë Cristu. Yëjë ni xcusun xuta ne, viyijin me cuidadu hacuaha vicuyin rë me cojo yëjë ni cjuahasen xi tjin niji. Cuatjin nihni, cojo sa xi yëjë ni xuta xi cuacun jan ne, tyjahi camahani me xi tjin tangun cjuatacun rë me cojo Cristu, hya xi ningacuin me xcun Nina. ²⁹ Ngatsë

rë vëhë ne, ngahan ne, hacuaha hñu ti-sahme xa, hacuaha tisahme ngahñu cojo yëjë ni ngahñu xi tisua ná Cristu.

2 Hacuaha meje ná xi cumachaya nuju xi jercu tisahme ngahñu ngatsë nuju cojo ngatsë rë me xi siu ngajan nandya Laodicea cojo tsëhë yëjë sa me xi cjëë scuëë ná. ² Cuatjin sahme, cojo sa xi ngayujun ni ne, sacú hñu rë xahasen nuju ngatsë rë xi tjin tangun cjuatacun nuju cojo xingun cojo yëjë ni cjuahmutacun. Hacuaha cuatjin sahme, cojo sa xi sacúndaja cumachaya nuju hacuaha jercu ndaja camahani cuijnercun cjuatahahma ndajyihi rë Nina, xi chja tsëhë Cristu. ³ Cristu ne, suvá ni me vëhë cuma sua naja me cjuatacun xi jercu ndaja cuijnercun yëjë ni cjuatahahma ndajyihi jan. ⁴ Cuitjin tichjá cojo nuju, cojo sa xi tsajin yo cuma cuindacha nuju cojo cjuaxi matanguaain cojo cjuaxi cjuaquixi, handasa jercu ndaja nuhya rë, xi má nuju. ⁵ Handasa tsajin tejñataha cojo nuju ne, peru jercu vityangé cacún tsujun ngayujun ni. Hacuaha ma sua ná, tsëhë xi hvë xi ngayujun ni ne, tjin tangun cjuatacun nuju cojo xingun hacuaha jercu ndaja mangu tacún cojo Cristu.

Vitexa Pablo xi nihña sacuatjin meje rë xi sahmi xuta ladu rë Jesucristu

⁶ Vëhë xi, sacuatjin xi camacjain nuju cjuandajyihi xi chja tsëhë Jesucristu, me xi Nai naja ne, cuatjin tágunndujun cojo ngasunhndë nuju xi tjin tangun cjuatacun nuju cojo rë me. ⁷ Catjinduju xi ndaja macjain nuju cjuaxi jan, hacuaha ndaja sa catamacjain nuju ngu nixtin ngu nixtin. Catjinduju xi siu cahndé cjuatacun nuju cojo cjuachacun xi macjain naja, sacuatjin cavicuya nuju Epafra. Hacuaha catjinduju xi jercu tuhun nacuechji rë Nina Nahmi naja.

Tsavi cojo ngu cjuachacun xatsë xi vicuya xuta ndacha

⁸ Nechun cuidadu, sá tu yo sahmi xi cuisuhun ladu rë ngatsë rë xi cuindacha nuju cojo ngu cjuachacun xi venguin chjí rë, tsëhë xi cjuachacun jan ne, nduva tsëhë xcusun rë xuta ngasunhndë ni, hacuaha tsëhë suvá ngasunhndë vihi yëjë ni cjuaxi rë jan, hacuiin tsëhë Cristu. ⁹ Nihñu cuidadu ta, yëjë xcusun rë Nina ne, tjin Cristu, ta Nina ne, vejñacahndë me yojo rë Cristu, ¹⁰ hacuaha ngayun ne, tsajin mé xi chaja rë hasen nuju, tsëhë xi tjin tangun cjuatacun nuju cojo Cristu, me xi matitjun camahani tsëhë yëjë ni hasen xi hacuaha vitexa, sa hasen ndaja sa hasen tsehen. ¹¹ Ngatsë rë xi tjin tangun cjuatacun nuju ngayujun ni cojo rë me ne, ha sacuaha xi me vëhë cavatë me chuxin nuju. Hane vëhë ne, hacuiin vijne xi cati jain chuxin nuju sacuaha sahmi xuta cojo quihndi langa ta xi vijne jan ne, yëjë ni cjuatsehen xi tjin naja cojo yojo naja ne, cavaxëxin camahani Cristu. ¹² Hya xi caxtenda ngayun ne, ha sacuaha xi caveyun ne, hacuaha Nina caveyaniji nuju me tangun cojo Cristu, sehe catsicuya nuju me cjuahñu nga cojo rë me, ngatsë rë xi camangu tacún cojo ngahñu rë Nina, me xi catsicuya rë Cristu cjuahñu tsëhë ngajñi rë yëjë nima. ¹³ Hatsëë ne, ha sacuaha xi nima má ngayun ngatsë rë jyé nuju hacuaha ngatsë rë yëjë cjuatsehen xi tjin nuju cojo yojo nuju. Peru quihndë ne, ngayujun ni xi catsicuya nga nuju Nina cjuahñu tangun cojo Cristu, Nina ne, catsinchataha naja me cojo yëjë jyé naja. ¹⁴ Cuma cuinújan ne, sacuaha xi cavujnu Nina cjuaxi híncha xcun xujun xi tsi-caniji jyé naja. Sacuaha xi catsicjëya me xujun jan, hya xi cahme Cristu xcun cru. ¹⁵ Nina ne, cafahaxin me xa xi siutahá yëjë ni hasen ndaja cojo hasen tsehen xi cavitexa, hane catsingacuntë me xi cu-

atjin casahmi me. Cacao rē me cavin-changahma me hasen xi cuacun jan, cojo yējē ni xi casahmi Cristu.

¹⁶ Xicachjasuun tsēhē xuta xi tsicanijijyē me ngayun ngatsē rē xcusun xi chinu o xi hyun, o ngatsē rē suhi xi nihñu, há chuva nu, há chuva sá, o há chuva totje. ¹⁷ Xicachasuun ta yējē ni xcusun xi cuacun jan ne, sacuaa tjahnguen ni rē yējē ni cjuandaja xi casua nuju Cristu. ¹⁸ Xicachasuun tsēhē xuta xi cuatjin tsicanijijyē nuju me xi chja me xi hatuxa meje rē xi ninguijnu yojo nuju hacuaha chjuunrcun ángel. Xuta xi cuacun jan ne, chja me xi chja xu niñá cojo rē me hacuaha sahmi yehe me yojo rē me suvá me ngatsē rē cjuatacun tsehen xi vitexa rē me. ¹⁹ Cuatjin sahmi me ta, vicuyaain me cjuachacun cjuaquixi tsēhē Cristu, me xi sahmi xi cumatangun cjuatacun rē yējē ni xuta ladu rē Nina cojo xicjin hacuaha sahmi xi cuijin xcun xi cjuendu me cojo ndiya rē Nina sacuatjin xi meje rē Nina.

²⁰⁻²¹ Ngayujun ni ne, ngatsē rē xi tjin tangun cjuatacun nuju cojo Cristu, me xi cahme ne, vēhē xi camandaya ngayun tsēhē xcusun rē xuta ngasunhndē, sacuaa mandaya ngu xuta tsēhē yējē ni cjuandya rē me hya xi hme me. Vēhē xi mijí rē xi cuanguntjengun xcusun rē xuta xi chja xi cumaji chjahan vihi, cumaji xinēē vēhē, cumaji nicojon xingu vē, sacuaa xi tuxa sahmi ngu yējē xi cuinuhyun jan. ²² Mijí rē xi cuanguntjengun xcusun xi cuacun jan ta, tsēhē xi xichinē cojo xi hyun ne, hatuxa fē hya xi nicojo rē. Hacuaha xcusun xi cuacun jan ne, nduva tsēhē cjuu xi vitexa xuta ngasunhndē ni, nduva tsēhē cjuu xi vicuya xuta ngasunhndē ni. ²³ Hacuaha xcusun xi cuacun jan ne, sahmi xi xuta ne, sahmi me yējē ni xi meje rē cjuatacun tsehen xi vitexa rē me, handasa tsejen sacuaa xcusun ndaja, ngatsē rē xi vitexa naja xi chjahanrcun nina sacuatjin

meje rē xuta ngasunhndē ni hacuaha xi ninguijne yojo naja hacuaha xi chjahanñehe cojo yojo naja. Peru xcusun xi cuacun jan ne, vitexaain camahani xi nihña cjuandaja.

Catamameje naja yējē ni xi tsēhē ngahnga

3 Ngayujun ni ne, casua nuju Nina cjuahñu xatsē, ha sacuaa xi cat-sicuya nuju me cjuahñu tangun cojo Cristu. Vēhē xi yējē ni hora ne, catamameje nuju yējē ni xi tsēhē ngahnga, hiscan tacun Cristu, me xi Nina casahmi jyē casahmi hnga rē xi cuitexa me ngayējē ni. ² Catamameje nuju yējē ni xi tsēhē ngahnga, hacuiin cjuatsehen xi tsēhē ngasunhndē ta, ³ tsēhē xi ngayun ne, ha caviyujunxun xcusun xi canihñu hatsēē, sacuatjin rē nima xi ha quihndē tsajin mé cuma sahmi sacuaa hya xi tacun sa xcun cjuahñu. Hacuaha quihndē ne, tjin nuju cjuahñu xatsē tangun cojo Cristu, me xi tacun xcun Nina. Hane xcusun vēhē ne, hatuxa matsijin. ⁴ Hya xi Nina tsingacuntē me Cristu, me xi sua nuju cjuahñu xatsē ne, hya tsingacuntē nuju me hacuaha sahmi jyē sahmi hnga nuju me tangun cojo rē Cristu jan.

Xcusun changá cojo xcusun xatsē

⁵ Vēhē xi xicanihñuu cjuatsehen, sacuatjin rē nima xi maji sahmi cjuatsehen. Xicanihñuu cjuatsehen sacuaa cjuatsehen xi sahmi xuta cojo ngu xi hacuiin chjuun rē me, hacuiin xihin rē me, o sa xi ngajñi ni xihin me, o ngajñi ni chjuun me. Hisca ndajin tjin xi meje nihñu xcusun xi cuacun vē, cojo yējē sa xcusun cjuatsehen. Mijí rē xi jercu nihmu tacún cjuanchina ta, sa xi cuatjin nihñu ne, hitsē sa nihmu tacún cjuanchina jan xi cuma rē Nina. ⁶ Nina ne, sahmi me castigu yējē ni xuta xi vihndiin tsēhē me, xi cuatjin sahmi. ⁷ Hacuaha ngayujun ni ne, cuatjin canihñu hatsēē, hya xi

tivinuhyuun tsêhê Nina. ⁸ Peru quihndê ne, mijî rê xi nihñu yêjê ni xcusun xi cuichjá cojo nuju vihi: hacuiin cumacjan nuju, hacuiin nihñu cjuatsehen, hacuiin choho cuinújun tsêhê xingun, ⁹ hacuiin cuinújun cjuandacha cojo xingun. Xicanihñuu cuatjin ta, tsêhê xi ha caviyujunxun cjuatacun changá cojo yêjê ni xcusun xi canihñu xi cavitexa nuju cjuatacun jan, ¹⁰ hane ha cavisehen nuju cjuatacun xatsê xi Nina tisahmi me xi cuijin xcun xi cuma sacua ha cjuatacun rê suvá me xi catsindaja cjuatacun jan, cojo sa xi ngayujun ni ne, cumachaya ndaja sa nuju nguñaja cjuaquixi yo me. ¹¹ Ngajan xi cuendaain rê ¿há xutaxín o há xuta tjê rê Israel má ngayaan?, ¿há cati chuxin naja o há catiin rê?, ¿há xuta ngu nangui ngayaan?, ¿há tichjá cjuatacun naja?, ¿há xuta caxteña ngayaan, o há xuta ndaya tjin ngayaan? ta Cristu ni ne, me vêhê xi jercu tu vengui chjî camahani rê me.

¹² Ngayujun ni ne, tsêhê xi cavaxijin nuju Nina, hacuaha caviyujuxin nuju me, hacuaha hmu cacun nuju me ne, vêhê xi meje rê xi tjin nuju cjuayumat-acun cojo xingun, meje rê xi tjin nuju cjuandaja cojo xingun, meje rê xi tjin nuju cjuajeya cojo xingun, meje rê xi yehe tacún cojo xingun. ¹³ Hacuaha meje rê xi scaa nuju cojo xingun hacuaha ninchatuhun xingun, sa xi tjin mé tsêhê xi cuinchunjun xingun. Sacuatjin rê Nai naja xi catsinchataha nuju me ne, cuanitjin ni nuju ngayujun ni cojo xingun. ¹⁴ Peru xi jercu vengui chjî sa rê xi cuma rê yêjê ni cjuaxi cachjá cojo nuju jan ne, meje rê xi tjin nuju cjuahmutacun cojo xingun ta, xi cuatjin nihñu ne, hatuxa jercu ndaja cuma tangun cjuatacun nuju cojo xingun xingu xingu ngayun.

¹⁵ Cjuajeya xi casua nuju Cristu ne, catitexa rê cjuatacun nuju ta, tsêhê xi Nina ne, cavaxijin nuju me cojo sa xi

cuinechun cojo cjuajeya ngajñi nuju cojo xingun. Hane meje rê xi yasen yasen ni ne, tuhun nacuechji rê Nina. ¹⁶ Cjuandajyihi xi chja tsêhê Cristu ne, catiyujuc-ahndê cahntsua xahasen nuju. Ticuyun xingun hacuaha tiyujun xingun cuidadu xingu xingu ngayun cojo yêjê cjuahasen xi sua nuju Nina. Sún nguñaja tacún tsêhê Nina, sacua ha salmo cojo himno cojo yêjê sa xcusun xi sen xi tsêhê Nina, sacua ha ngu nacuechji rê me xi tuhun.

¹⁷ Tu mé ni xi cuinújun o xi nihñu ne, catama sacuatjin meje rê xi sahmi xuta xi tjin tangun cjuatacun rê me cojo Nai naja Jesús. Hacuaha tuhun nacuechji rê Nina Nahmi naja, xi nihñu oración cojo Jesús.

Chja Pablo hacutjin meje rê xi nihña cojo xingueen cahntsua ndya naja

¹⁸ Ngayujun ni yachjin ne, tinuhyun tsêhê xihin nuju ta, tsêhê xi cuatjin ndatjin xi cuma ta, tjin tangun cjuatacun nuju cojo Nai naja. ¹⁹ Ngayujun ni xihin ne, hacuaha meje rê xi nihmu tacún chjuun nuju, hacuiin choho xcusun nuju cojo rê me.

²⁰ Ngayujun ni xi siucuaha xutacha nuju ne, tinuhyun tsêhê me tsêhê yêjê ni xi cuichja me cojo nuju ta, hya xi cuatjin nihñu ngayujun ni xi tjin tangun cjuatacun nuju cojo Nai naja Jesús ne, jercu chuya rê Nina. ²¹ Ngayujun ni xi má yun nahmi ne, xicaningatjuntuun xi cuinújuntuhun rê quihndi nuju, ta sá tu sahmi chúvacacun.

²² Ngayujun ni xi má yun mosu hndixahan ne, tinuhyun tsêhê xuta xi má me nai nuju tsêhê yêjê ni xi cuichja me cojo nuju, hacuiin suvá hya xi tivutsejen me ngayun, sacuatjin sahmi yahnga xuta xi meje cuaxëndaja suvá me yojo rê me xcun xuta, ta tinuhyun tsêhê me cojo ngu xahasen tyjahi ngatsê rê xi chjuhunrcun Nai naja. ²³ Tu mé ni xcusun xi nihñu ne, nihñu nguñaja tacún, sacua ha xi tini-

hñu tsêhê Nai naja, hacuiin tsêhê xuta ni. ²⁴ Cuatjin nihñu, tsêhê xi ha hyun ta Cristu Nai naja ne, me vêhê cuechji nuju me ta hacui me xi tivisecun rê. ²⁵ Peru sa xi tjin ngajñi nuju xi hatuxa choho tishahmi ne, Nina sahmi rê me castigu tucu xcusun tsehen xi casahmi me, hacuaha Nina ne, hatuxa quixi jain me cojo cjuatacun rê me xi tsichuva me yêjê ni xuta cojo cjuatacun rê me.

4 Ngayujun ni xi má yun nai tsêhê mosu hndixahan ne, ndaja nihñu cojo mosu hndixahan xi siu ntsun, sacuatjin mameje rê ta, tsêhê xi ha hyun xi hacuaha cojo ngayun ne, tjin nai nuju xi tacun ngajan ngahnga.

Vitexa Pablo xi nihña oración hacuaha cuisiajme cjuandaja

² Ngayujun ni ne, nihñu oración yasen yasen ni. Mijí rê xi cuma tsêhê tacún. Tuhun nacuechji rê Nina. ³ Hacuaha nihñu oración ngatsê niji. Chjahyun rê Nina xi tuxaha ndiya xi cuisiajmi cojo xuta, cojo sa xi cuma tihín cumachaya rê me tsêhê cjuatahahma ndajiyi xi chja tsêhê Cristu. Hane ngatsê rê cjuandajiyi jan ne, tejñaya ndavaya. ⁴ Nihñu oración ngatsê naha, cojo sa xi ngahan ne, cuichjátê cjuatahahma jan, sacuatjin meje rê xi cuichjá.

⁵ Hacuaha yêjê ni xuta xi hacuiin ladu rê Nai naja me ne, meje rê xi ndaja nihñu cojo rê me cojo yêjê ni cjuahasen xi tjin nuju, yêjê ni hora xi cuma. ⁶ Hacuaha yêjê ni cjuavisiajmi nuju ne, meje rê xi cojo cjuandaja cuinújun yêjê ni hora. Xi cuatjin nihñu ne, sacú cumachaya nuju hacutjin chjayunngun cjuat tsêhê xingu xingu xuta xi cuacun jan.

Tsinguijnetaha Pablo cjuat rê me

⁷ Yêjê ni xi tivátju tijima ne, Tíquico ne, sua me cumachaya nuju. Me vêhê ne, ngu xuta ladu rê Jesús xi jercu vinga ná, hacuaha jercu ndaja cjuinduju

me tivisecoo me ngahan xi tangun fahacuenda me cojo ná xa xi vitexa Cristu. ⁸ Titsingátju nuju me, cojo sa xi ngayujun ni ne, cumachaya nuju tsijin hacuaha cojo sa xi sua nuju me cjuajyêtacun. ⁹ Hane cojo me vêhê ne, titsingátju nuju cha Onésimo, cha nangui nuju. Cha vêhê ne, cha ladu rê Nina xi jercu ndaja cjuinduju cha cojo ndiya rê me, hacuaha jercu vinga ná cha. Catsijo me xi cuacun vê ne, sua me cumachaya nuju tsêhê yêjê ni xi cavatju nguehe camá.

¹⁰ Aristarco ne, me xi jiyatangun cojo ná nguehe ndavaya ne, tsingatju me nina nuju. Hacuaniitjin ni Marcos, xicjin Bernabé. Ha cachjá cojo nuju tsêhê Marcos jan. Vêhê xi sa xi cjuehe me nangui nuju ne, chjuhunntsun me cojo cjuandaja. ¹¹ Jesús, me xi hacuaha hmí rê Justo ne, hacuaha tsingatju me nina nuju. Ngajñi rê yêjê ni xuta tjê rê Israel ne, jyan tu tu ni me vêhê xi tishahmitangun cojo ná xa, cojo sa xi xuta ne, tsingatihin me xi Nina cuitexa rê me. Jyan me xi cuacun jan ne, casua ná me cjuajyêtacun. ¹² Hacuaha Epafra, me xi tangun nangui nuju cojo hacuaha fahacuenda tsêhê xa xi vitexa Cristu ne, tsingatju me nina nuju. Me vêhê ne, jercu sahmi me oración ngatsê nuju yasen yasen ni, cojo sa xi ngayujun ni ne, cuma tyjahi camahani ngayun xcun Nina, hacuaha cojo sa xi ndaja cuijnercun yêjê ni hacutjin xi meje rê Nina. ¹³ Ngahan ne, cuichjá cojo nuju ta Epafra jan ne, jercu vityanguicacun me tsujun cojo xuta Laodicea cojo xuta Hierápolis. ¹⁴ Hacuaha tsingatju nina nuju Demas cojo Lucas, me xi doctor xi jercu vinga ná.

¹⁵ Tuhun rê ngu nina yêjê ni xuta ladu rê Nina ngajan nandya Laodicea. Hacuaha tuhun rê Ninfa ngu nina cojo yêjê sa me xi matangun me ndava na. ¹⁶ Hane xi cjuê chutahaya tê rê xujun vi ngajñi nuju ne, nihñu xi hacuaha catichutahaya tê rê ngajñi rê xuta ladu rê

Nina ngajan nandya Laodicea. Hacuaha xujun xi catsingátju tsëhë xuta Laodicea ne, hacuaha chutahayun të ngajñi nuju.
¹⁷ Hane tinújun cojo Arquipo cjuá vihi: “Catjiniya tacún xi nihñuchuhun xa xi casatëxa nuju, xi tjin tangun cjuatacun nuju cojo Nai naja.” nina vi.

¹⁸Ngahan, Pablo ne, titsihindu nuju cojo hntsa ngahan ngu nina vi. Ninguitsjun ná nguehe ndavaya. Nina ne, catisua nuju me cjuandaja.

Cjua xi titjun catsihindu San Pablo xi camá rê xuta nandya Tesalónica

1 Ngayin, Pablo cojo Silvanu cojo Timoteo ne, ningatjin ngu xujun vi tsujun, ngayujun ni xi matangun ngayun tsêhê xi macjain nuju Nina Nahmi naja cojo Nai naja Jesucristu, ngajan nandya Tesalónica. Catisua nuju Nina cjuandaja cjuajeya.

Macjain ndaja rê xuta nandya Tesalónica

² Jercu tihin nacuechji rê Nina Nahmi naja ngatsê nuju ngayujun ni, hacuaha hatuxa veyinnanguin nuju tu ya ni hya xi nihni oración. ³ Hya ninguitsjin hacutjin jercu nihni xa tsêhê xi ndaja macjain nuju, hacutjin jercu nihni cjuandaja tsêhê xi hmu tacún Nina cojo xuta yu-macujun, hacuaha hacutjin jercu ndaja ticaa nuju xi tinechunyun rê Nai naja Jesucristu. ⁴ Ngayun ne, jemu hmuca-cun nuju Nina, hacuaha hyin xi cavax-ijin nuju me. ⁵ Cuatjin ta xi catihin camachaya nuju cjua rê Nina ne, hacuiin suvá cjua ta hacuaha Hasen rê Nina ne, casua niji ngahni xi cuatjin canújin cojo nuju cjua jan xi hatuxa cjuaquixi. Ngayun ne, ha hyun hacutjin xcusun niji ngajni nuju, xi ndajyihî xi cuma nuju.

⁶ Ngayun ne, sacuaha canihni hacuaha sacuaha casahmi Nai naja ne, ha cuanitjin ni canihni xi cachjuhunntsun cjua jan cojo cjuasua xi casua nuju Hasen rê Nina, handasa jemu choho cavatjun camá. ⁷ Cuatjin camá xi ngayêjê ni me xi macjain rê Nina ngajan ladu tsêhê Macedonia cojo Acaya ne, hisca casahmi me sacuatjin canihni ngayun. ⁸ Hisca hya xi titjun ngayun cachjuhunntsun cjua rê Nai naja ne, sehe jercu cjin quiji cjua jan, peru hacuiin tu ngajan ni Macedonia cojo

Acaya ta hisca jingujyê ni. Hacuaha camachaya rê xuta xi jemu ndaja camacjain nuju tsêhê Nina. Cuatjin ne, ha quihndê tsajin sa mé xi cuinújin ta ⁹ suvá xuta ne, chja me hacutjin cojo cjuandaja cachjuhunntsun niji hacuaha hacutjin caviyujunxun nina xi macjain nuju titjun, hane camacjain nuju ngu Nina xi cjuaquixi xi quicun. ¹⁰ Hacuaha chja me hacutjin tinechunyun rê Jesús, Quihndi rê Nina, xi cuya me tsêhê ngahnga. Jesús jan ne, me vêhê xi catsicuya Nina cjuahni rê me xi cavaxê Nina me ngajni rê nima, hacuaha me vêhê ni xi cuaxêtje naja me tsêhê castigu xi nduva.

Xa xi casahmi Pablo ngajan nandya Tesalónica

2 Ngayun ne, ha hyun ta xi catsanguin tjenguin nuju ne, hacuiin tu mahya ta ² handasa jemu choho cavatjin camá ngajan nandya Filipos sacuatjin xi ha hyun, peru camacjin tacin xi canújin cojo nuju cjua rê Nina ta, tsêhê xi Nina jan ne, cavisecoo niji me, handasa jemu camacjan rê yahnga xuta. ³ Hacuaha xi nújin cojo nuju ne, hatuxa cojo cjuaquixi cojo cjuandaja. Hacuiin vindachin. ⁴ Nina ne, me vêhê xi caphachuva niji me, hane cachuya rê me tsijin, hacuaha casua me ngayin xa xi cuinújin cjua rê me cojo xuta. Vêhê xi cuatjin nújin. Hacuiin xi xuta chuya rê me ta xi Nina chuya rê me, tsêhê xi Nina ne, me vêhê xi vê me cjuatacun niji cojo xahasen niji. ⁵ Ngayun ne, ha hyun ta hacuiin cjuahaxi xi canújin cojo nuju, hacuaha vê Nina jain ta hacuiin xi tujún meje niji. ⁶ Hacuiin jemu meje niji xi cjuaharcun niji xuta, sa ngayun sa xuta xi yahnga, handasa tjin niji chuva rê xi chjaharcun niji tsêhê xi apóstol rê Cristu ngayin. ⁷ Peru jemu cojo cjuajeya cavinechin ngajni nuju, sacuaha xi sahmi ngu naa xi sahmi cuidadu me qui-

hndi rë me. ⁸ Jemu cavinga niji ngayun. Hacuaha meje niji xi hacuiin tu suvá cjua rë Nina xi canújin cojo nuju ta hisca mé sa cjuacjintacun ne, cavejñitacuin xi cuiseacuin nuju ta, tsêhë xi jemu cachuya niji tsujun. ⁹ Ngayun ne, vitsjen rë nuju tsêhë xi jemu jyë xa canihñi. Canihñi nixtin nixten, tsêhë xi hisca ngu ngayun mijí tihin nuju ngu cjuandya hya xi canújin cojo nuju cjua rë Nina.

¹⁰ Ngayun xi macjain nuju Nina ne, cahyun, hacuaha hisca Nina ne, vëë jain me ta jemu ndaja cavinechin cojo nuju. Hisca ngu jyë cumaji nicanuju niji.

¹¹ Hacuaha ngayun ne, ha hyun hacutjin canújin cjuandaja cojo nuju jima ngu ngayun, sacuaha chja ngu nahmi cojo quihndi rë me. ¹² Hacuaha catihin nuju cjua xi nchunchujun ni ne, nihñu cjuandaja sacuatjin meje rë ndiya rë Nina ta, Nina ne, me vëhë xi vaxijin me ngayun xi sacú nuju cahndé hiscan xi me vëhë tacun tsja me. Ngajan ne, jemu cahndé ndajyihi camahani.

¹³ Vëhë xi jercu tihin nacuechji rë Nina, tsêhë xi hya xi canuhyun cjua rë Nina xi canújin cojo nuju ne, camacjain nuju cjua jan. Hane ndatjin sacuatjin caningatuhuntacun ta cjua rë Nina jain, hacuiin cjua rë ngu xuta. Hacuaha jemu ndajyihi tsujun xi cuatjin macjain nuju cjua jan. ¹⁴ Hacuaha ngayun ne, cavatjun camá sacuaha cavatju me camá titjun, me xi camacjain rë Jesucristu ngajan nangui Judea. Sacuaha xuta nangui rë me ne, jercu casuandya rë me, hacuanitjin ni xuta nangui nuju ne, jercu casuandya nuju me.

¹⁵ Nai naja Jesús ne, catsiquehen xuta nangui Judea me, hacuanitjin catsiquehen xuta jan xutachanga xi cachja cjua rë Nina hatsëë. Hisca cojo ngayin ne, hacuaha casuandya niji me. Chuyiin rë Nina tsêhë xuta jan xi cuatjin sahmi me. Hacuaha choho vëë me me xi yahnga sa ta, ¹⁶ tsêhë xi mijí sua me cahndé xi

cuinújin cjua rë Nina cojo xuta xi hacuiin tsêhë nangui Judea ne, catamacjain rë me hacuaha cuetjutje me. Jercu tu jyë camahani jyë rë me xi cuatjin sahmi me. Peru quihndë ne, cavechu nixtin xi cuma me castigu xi cuichja Nina.

Pablo ne, meje cjue scutsejen nga me xuta Tesalónica

¹⁷ Hya xi ha catsanguinxin ngu jo nixtin tsujun ne, handasa cahyiin nuju, peru hatuxa ninguitsjin nuju cojo xahasen niji. Hacuaha jercu meje cuanguin tjenguin nga nuju. ¹⁸ Cavejñi xi cuanguin. Ngahan Pablo ne, ngu jo ndiya ne, cavejñá xi cjué, peru Satanás ne, casuaain cahndé. ¹⁹⁻²⁰ ¿Mé ngatsë rë xi tivinechinyin rë Jesús? ¿Mé ngatsë rë xi tjin niji cjuasua? ¿Mé ngatsë rë xi ndaja cuichja xuta tsijin? Ngatsë nuju ngayun xi camacjain nuju cjua rë Nina xi canújin cojo nuju. Ngatsë rë vëhë xi hya xi cuinduva Jesús Nai naja ne, jemu ndaja cuichja xuta tsijin hacuaha jercu ndaja cuma niji.

3 Xi camá ne, tsêhë xi ha quihndë cacain niji xi meje niji cumachaya niji hacutjin tivatjun tijima ne, vëhë xi camangutacuin xi cuinechin suvin ngajan nandya xi hmí Atenas. ² Hane caningatjin cha Timoteo xingueen xi quiji tjengui cha ngayun. Cuatjin caningatjin cha ta, tsêhë xi mosu rë Nina cha, xi chja cha cjua ndajyihi tsêhë Cristu. Cuatjin caningatjin cha, cojo sa xi tsinguixi nuju cha hacuaha cuichja sa cha cjua cojo nuju, cojo sa xi hitsë sa ndaja cumacjain nuju ³ hacuaha hacuiin cuma chuva tacún ngajñi rë cjuacjintacun xi tivatjun tijima. Hane ngayun ne, ha hyun xi hatuxa cuatjin cuatjuun cjuacjintacun xi choho scuëë naja xuta, ⁴ tsêhë xi hisca hya xi cavinechin cojo nuju ne, hya catihin camachaya nuju xi hatuxa cuatjun cjuañihi. Xi camá ne, cuatjin camá,

sacuatjin xi ha hyun. ⁵Hane ngahan ne, xi meje xati ná cumachaya ná hacutjin tivatjun tijima, vëhë xi catsingátju cha Timoteo, quiji cjaha cha cjua sa xi ngayun ne, macjain cuaha nuju. Cuatjin casahme, tsëhë xi camacjíncácun ngatsë nuju tsëhë xi sa cavindacha nuju naain xi cuinengun ngajñi cjuatsehen ne, xa xi canihñi ne, tu mahya.

⁶Peru quihndë ne, cavuya cha Timoteo xi quiji tjengui cha ngayun. Hane ndajyihi cjua yaha cha tsujun, tsëhë xi macjain cuaha nuju cjua rë Nina hacuaha hmutacun cuaha yëjë ni xuta. Hacuaha cachja cha cojo niji ta ninguit-sjun cuaha niji cojo cjuandaja, hacuaha xi jercu meje chun niji sacuahatjin jercu meje chin nuju. ⁷Cuatjin xi handasa jemu ndya tivatjin tijima cojo cjuañihi cojo cjuaxti, peru jemu casacu niji cjue-tacun, tsëhë xi ngayun ne, macjain cuaha nuju. ⁸Quihndë ne, jercu tu ndaja camahani cuma niji ngayin, sa xi ngayun ne, ha ndatjin siu nuju cjuatacun nuju cojo Nai naja. ⁹Hacuaha jemu meje tihin nacuechji rë Nina naja tsëhë yëjë ni cjua-sua xi casua niji me ngatsë nuju. ¹⁰Nix-tin nixten ne, jemu tichjahyin rë Nina xi sua me cahndë xi tjin ngu hora tjin ngu nixtin sacú xingueen ne, cuicuyin sa nuju cjua rë Nina xi cjëë cumachaya nuju.

¹¹Meje niji xi Nina Nahmi naja cojo Nai naja Jesús ne, catisecoo niji me xi cuechintihin nuju. ¹²Hacuaha Nai naja meje rë me xi catamajyë sa cjuahmutacun ngajñi nuju cojo xingun hacuaha cojo xuta xi yahnga sa, sacuatjin ngajñi naja cojo nuju. ¹³Nina Nahmi naja cati-sahmi me cuatjin, cojo sa xi tsajin jyë nuju xcun me hya xi cuya Nai naja Jesús cojo yëjë ni ángel rë me.

Xcusun xi Nina chuya rë me hacutjin xi nihña

4 Quihndë ne, ha tinihñú hacutjin xi cavicuyin nuju xi meje rë xi cumá, cojo sa xi chuya rë Nina tsujun. Vëhë xi jemu nújin cojo nuju tsan ta hitsë sa nihñu cuatjin ta, tsëhë xi hatuxa cuatjin meje rë Nai naja Jesús.

²Hane ngayun ne, ha hyun cjua rë Nai naja Jesús xi ha cavicuyin nuju. ³Cjuatacun xi meje rë Nina ne; xi cuma ty-jahi cjuatacun nuju, xi canindesuun cojo chjuun xi xín, xi canindesuun cojo xihin xi xín. ⁴Meje rë me xi jima ngu ngayun ne, catisacu chjuun nuju, peru cojo cjuandaja, xi tyjahi cjuatacun nuju. ⁵Mijí rë xi cojo cjuatsehen, sacuatjin sahmi xuta xi hvíin me Nina. ⁶Sacuaha cjuacjintacun vëhë ne, xi canihñuu xi cuindachun rë xingun ta, tsëhë xi Nai naja ne, sahmi me castigu ngayëjë ni cjuatsehen vëhë, sacuatjin xi ha canújin cojo nuju. ⁷Hacuaha hacuiin cajindaya naja Nina xi cjuatsehen nihña ta cajindaya naja me xi fë jyë naja. ⁸Vëhë xi me xi tsitjungui cjuatacun vëhë ne, hacuiin xuta tsitjungui me ta Nina xi tisua nuju Hasen rë ne, vëhë tsitjungui me.

⁹Quihndë ne, tsajin sahmi ngu jyë xi nihindin nuju xi nihñu hmutacun xingun ta, tsëhë xi suvá Nina ne, ha cavicuya nuju me hacutjin meje rë me xi nihñu hmutacun xingun. ¹⁰Hacuaha tinihñú jain hmutacun yëjë ni xuta xi macjain rë Nina ngajan yëjë ni nandya tsëhë distritu Macedonia. Peru nújin cojo nuju ta cuatjin ndaja sa nihñu. ¹¹Hacuaha tejñu tacún xi jyuu nechun, nihñucuen-dun xi tsujun. Peru nihñu xa, sacuatjin xi ha cavicuyin nuju. ¹²Sa xi cuatjin nihñu ne, hisca cojo xuta xi macjaain rë Nina ne, cjuaharcun nuju me, hacuaha sacú nuju yëjë ni xi cuma meje nuju.

Cuinduva nga Nai naja

¹³ Quihndë ne, meje niji xi cuma chaya nuju hacutjin cuatju nima xi ha cahme, cojo sa xi hacuiin jemu choho cuma nuju sacuatjin rë xuta xi sacuiin rë me ngu cjuetacun, tsëhë xi macjain rë me Nina.

¹⁴ Tsëhë xi macjain naja xi cahme jain Jesús hacuaha cavascaya nga rë me ne, vëhë xi hacuaha macjain naja xi Nina ne, tsingascaya rë me nima xi xcun cjuahñu rë camacjain rë me Jesús.

¹⁵ Vëhë xi nguehe tihin cumachaya nuju ngu cjuat tsëhë Nai naja ta jarë ngayaan xi nechan quicun hisca xi cuya Nai naja ne, hacuiin cuma titjun ngayaan tsëhë me xi ha cahme. ¹⁶ Tsëhë xi suvá Nai naja ne, cuinduvajne me tsëhë ngahnga. Cuinuhya rë sacuaha cjuat rë ngu me xi vitexa jain. Cuinuhya rë sacuaha cjuat rë ngu ángel xi ma titjun. Cuinuhya rë sacuaha xta rë tyjo xi tsëhë Nina. Xi camá ne, nima xi camacjain rë me Cristu ne, tjun tjun me cuascaya rë me, ¹⁷ sehe ngayaan xi nechan quicun ne, cjuaha Nina ngayaan ngajñi rë yufí, hacuaha cojo nima xi cuacun jan, cumatangun ngayejen ni cojo Nai naja ngajan ngajñi tjo. Sehe yëjë ni hora yëjë ni nixtin cuinechan cojo rë Nai naja. ¹⁸ Vëhë xi meje rë xi tinújun cojo xingun cjuat vihi ne, sacú nuju cjuetacun.

5 Peru sacuaha nixtin xi cuma cjuacjintacun vëhë ne, sáhmii nguýjyë nihindin nuju ta, ² tsëhë xi ngayun ne, ha hyun ta, hya xi cuya Nai naja ne, jemu cjuercun camahani rë ngayëjë ni xuta, tsëhë xi tu ñahñu ni cuinduva me. ³ Hya xi cuichja xuta xi macjain rë Nina ta: “Jemu ndatjin ta jemu jyu tjin”, peru hya ne, tu ñahñu ni ne cuatju me ngu cjuañihi, sacuatjin vatju ma ngu chjuun xi tu ñahñu meje tsin quihndi rë me. Hane cuatjin cuatju me ta hisca ngu me cuatjinhngaain me. ⁴ Xi nguixun cjuhehe ngu chëjë ne, jemu

cjuercun naja. Peru ngayun ne, hacuiin jñu camaha tsujun xi nihñu cjuatsehen, xi cjuercun nuju hya xi cuechutaha nixtin xi cuya Nai naja ta, ⁵ ngayujun ni ne, nechan sacuaha hasen rë nguixtin. Ngayaan ne, hacuiin jñu camaha tsajan xi nihña cjuatsehen. ⁶ Cuatjin xi mijj rë xi nechan sacuaha xi titsjuñafen, sacuaha viyuju yahnga xuta xi macjain rë me Jesús ta, meje rë xi nechan quicun, nguñajatacun. ⁷ Hatuxa xcusun naja xi nguixun xi tsjuñafen. Hacuaha xcusun rë xuta chihi ne, nguixun ma chihi me. ⁸ Peru ngayaan ne, tsëhë xi nechan sacuaha ndavá rë nguixtin ne, vëhë xi meje rë xi nechan nguñajatacun. Meje rë xi ndaja cumacjain naja hacuaha nihña hmu tacun xingueen. Xi cuatjin nihña ne, hacuaha vëhë ne, cuisecoo naja ta cuetjo naja Nina. Hacuanitjin ni meje rë xi cuetahan tacun ta cjuaquixi xi cuaxëtje naja Nina. ⁹ Cuatjin meje rë ta, tsëhë xi Nina ne, hacuiin cavaxijin me ngayaan xi cuatjun castigu rë me ta, cavaxijin naja me xi cuaxëtje naja me, ngayaan xi macjain naja Nai naja Jesucristu ta, ¹⁰ Jesucristu ne, cahme me ngatsë naja, cojo sa xi tangun cuinechan cojo rë me, sa xi nechancuaan cjuahñu o sa xi nima camá ngayaan. ¹¹ Vëhë xi meje rë xi tinújun cojo xingun cjuat vëhë, hane sacu nuju cjuetacun, sacuatjin xi ha tinihñú.

Pablo ne, tisua me cjuat xuta xi macjain rë Nina

¹² Ngayun ne, nihñu favor ne, chjuhuncun rë xuta xi cavaxijin Nai naja xi cuma titjun tsujun, xi sahmi xa ngajñi nuju, xi tsinguixi nuju. ¹³ Jemu meje rë xi chjuhuncun me hacuaha nihñu hmu tacun me tsëhë xi tisahmi me xa vëhë. Ndaja tinechun cojo xingun.

¹⁴ Hacuaha nújin cojo nuju ta xuta xi mijí sahmi xa ne, tinújun cojo rë me cati-sahmi me xa. Hane xuta xi jima chuvaca-cun ne, tinújun cojo rë me, hane sacú rë me cjuetacun. Hacuaha tisecuun rë me xi cjëë ndaja cumacjain rë. Hane tjin nuju cjuajeya cojo ngayëjë ni me.

¹⁵ Hacuaha nechun cuidadu xi hacuiin choho nihñu cojo rë me xi choho sahmi cojo nuju ta, xi meje rë ne, yëjë ni hora yëjë ni nixtin ne, suvá cjuandaja nihñu cojo xingun hacuaha cojo yëjë ni xuta.

¹⁶ Ndaja catama nuju yëjë ni nixtin. ¹⁷ Meje rë xi jemu nihñu oración.

¹⁸ Hacuaha hatuxa tuhun nacuechji rë Nina, handasa choho cuatjun cuma. Cuatjin meje rë Nina xi nihñu, ngayujun ni xi macjain nuju Jesucristu.

¹⁹ Hacuiin nitjunngun xcusun xi sahmi Hasen rë Nina ngajñi nuju. ²⁰ Hacuiin nitjunngun cjuarë me xi chja cjuarë casua Nina. ²¹ Peru chjuhunchuvun ngayëjë ni cjuarë. Hane jarë cjuarë xi

ndaja ne, vëhë tiseñuju hacuaha tinuhyun. ²² Peru tétjunxun tsëhë ngayëjë ni cjuatsehen.

²³ Nina xi tsicjë me cjuachan ne, cati-sahmi tyjahi tyjahi me hasen nuju cojo cjuatacun nuju cojo yojo nuju, cojo sa xi nixtin hya xi cuya Nai naja Jesucristu ne, tsajin camahani jyë nuju. ²⁴ Me xi tivaxijin nuju ne, cjuaquixi xi chja me. Hatuxa sahmichihin me hacutjin xi chja me.

Cjua xi cuijnetaha

²⁵ Ngayun ne, nihñu oración ngatsë niji.

²⁶ Nuvuncjun yëjë ni me xi macjain rë Jesús xi tuhun rë me ngu nina niji, sacuaha xcusun naja.

²⁷ Tsëhë xi cavaxijin ná Nai naja ne, vëhë xi vitéxa nuju xi nújun cojo xujun vi xi cuihndë yëjë ni me xi macjain rë Jesús.

²⁸ Cjuandaja rë Nai naja Jesucristu ne, catisehen xahasen nuju.

Cjua xi ma jo catsihindu San Pablo xi cumá rë xuta nandya Tesalónica

1 Ngayin, Pablo cojo Silvanu cojo Timoteo ne, ningatjin ngu xujun vi tsujun, ngayujun ni xi ma tangun ngayun tsëhë xi macjain nuju Nina Nahmi naja cojo Nai naja Jesucristu, ngajan nandya Tesalónica. ²Nina Nahmi naja cojo Nai naja Jesucristu ne, catisua nuju me cjuandaja cjuajeya.

Hya xi cuinduva Cristu ne, Nina ne, sahmi me castigu xuta xi tjin jyë rë

³Hachu tjin niji xi tihin nacuechji rë Nina ngatsë nuju ngayun. Hacuaha ndatjin xi cuatjin nihni ta, tsëhë xi jemu xcun tivangun xi macjain nuju, hacuaha hitsë sa jima tsejen cjuahmutacun xi tjin nuju jima ngu ngayun cojo xingun. ⁴Vëhë xi ngayin ne, hya xi ma tangun me xi macjain rë Nina ne, nújin cojo rë me ta jemu sua má niji tsëhë xi ngayun ne, jemu yehe tacún hacuaha jemu macjain nuju, handasa jemu yehe cjuañihi xi tivatjun tijima. ⁵Cuatjin ma tsejen xi Nina ne, fahachuva naja me cojo cjuaquixi. Hane xi cuijnetaha ne, cuichja Nina ta sacú nuju ngu cahndé hiscan xi me vëhë má titjun me, ta ngatsë rë vëhë xi jercu choho tivatjun tijima.

⁶Xi tsingatahacacun Nina ne, yëjë ni xuta xi choho tisahmi cojo nuju ne, ndatjin xi hacuaha cuma ngojo cojo rë me, ⁷hacuaha ndatjin xi ngayaan xi choho tivatjuun tijima ne, sacú naja ngu cahndé xcun Nina xi chjahanjendan, hya xi Nai naja Jesús cuya me tsëhë ngahnga ngajni rë ngu ndihi jyë cojo ángel rë me xi jercu hñu ngahñu rë. ⁸Hya sahmingojo me cojo xuta xi macjaain rë Nina, xi hacuaha hndiin me tsëhë cjua ndajyihi tsëhë Nai naja Jesús. ⁹Hane castigu xi cuma xuta xi cuacun vë ne, cuaxëxin

Nina me ngu ladu hiscan xín, xi tsajin nu tsajin nixtin xi cuechu me xcun Nai naja. Cuatjin ne, xi scuiin me hasen ndajyihi cojo ngahñu rë Nai naja. ¹⁰Cuatjin cumá nixtin xi cuinduva Nai naja xi cuma jyë cuma hnga me. Hya ne, cuinduva me, cojo sa xi ngayëjë ni xuta xi camacjain rë me ne, cjuaharcun rë me hacuaha cjuercun rë me, hisca cojo ngayujun ni ta tsëhë xi camacjain nuju cjua ndajyihi xi canújin cojo nuju.

¹¹Vëhë xi ngayin ne, jercu chjahyin rë Nina naja xi ngayun xi má yun ladu rë me ne, catamachji rëhë rë me ngayun. Hacuaha chjahyin rë Nina xi cojo ngahñu rë me ne, cuetjucaa jain yëjë ni cjuandaja xi ningatuhuntacun hacuaha yëjë ni xa xi nihñu tsëhë xi macjain nuju me. ¹²Hacuaha xi cuatjin cumá ne, xuta xi vutsejen me ne, sahmi jyë sahmi hnga me Nai naja Jesús, hacuaha ngayun ne, cuma yehe cuma hnga ngayun ngatsë rë cjuandaja rë Nina naja cojo cjuandaja rë Nai naja Jesucristu.

Cuinduva ngu cha tsehen

2 Quihndë ne, ha hyun xi Nai naja Jesucristu ne, cuinduva nga me xi sahmi tangun naja me. Vëhë xi nújin cojo nuju ta ²hacuiin ngutjen cumacjintacun, hacuiin rcun cuma, sa xi sacú nuju cjua xi ha cavechu nixtin xi cafehe Nai naja. Handasa cuatjin cuichja xuta cojo nuju, o sa xi cuichja me xi cuatjin casua Nina me cjuatacun, o sa xi chjuhunnuntsun ngu xujun xi cuichja cuatjin sacuaha xi ngayin caningatjin, peru hacuiin cumacjain nuju ta, quixiin. ³Catuun camahani cahndé xi cumandacha ngayun, tsëhë xi chaja sa xi cuechu nixtin vëhë ne, titjun ne, jemu sahmi xuta condra Nina, hacuaha cuinduva ngu cha tsehen xi hatuxa cuechiin cha xcun Nina. ⁴Cha tsehen jan ne, choho scuëë cha yëjë ni xi hmí nina, hacuaha choho scuëë cha

yějē ni xi vechu chuva rē xi chjaharcun rē. Hane hisca cjue cha cuejña cha cahntsua yungun xi matitjun xi tsēhē Nina, hane cuichja cha ta cha vēhē nina cha.

⁵ ¿Há vitsjiin nuju ta ha cachjá cojo nuju cjua vihi, hya xi cavitejña nandya nuju? ⁶ Hacuaha ha hyun ta xi ngutjen ne, tsajin cahndé cuinduva cha tsehen jan ta, cuinduva cha hisca xi cuechu nixtin xi Nina sua me cahndé. ⁷ Hacuaha cjuatsehen ne, hisca hyan, ta jemu tijima yehe. Hane hisca xi cjuexin me xi tivechja cahndé ne, ⁸ sehe hya cuinduva cha tsehen jan. Peru Nai naja Jesús ne, tsiquehen me cha cojo tjo hntsua ni me, hacuaha tsicjē me cha, hya xi cuinduva me. ⁹ Hya xi cuinduva cha tsehen jan ne, tsēhē xi Satanás tsingatju rē cha ne, jemu hñu ngahñu rē cha hacuaha jemu cjin xcusun cjuarcun ndacha xi sahmi cha. ¹⁰ Hacuaha sahmi cha yějē ni xcusun cjuatsehen xi cuindacha cha xuta. Cuindacha cha xuta xi cuechiin xcun Nina ta, tsēhē xi mijí rē me chuyiin rē me cjuaquixi xi vaxētje naja. ¹¹ Ngatsē rē vēhē ne, sua Nina cahndé xi cumandacha xuta jan, cojo sa xi cumacjain rē me cjuandesu jan. ¹² Ngajan xi cuma me castigu, ngayējē ni me xi camacjaain rē cjuaquixi jan ta, tu cjuatsehen jan cachuya rē me.

Nina cavaxijin nuju me xi cuetjuntjun

¹³ Peru ngayin ne, meje rē xi jercu tihin nacuechji rē Nina ngatsē nuju ngayun xi hmucacun nuju Nai naja ta, tsēhē xi Nina ne, cavaxijin nuju me xi tjun tjun ngayun cuetjuntjun. Ngatsē rē xi Hasen rē Nina ne, titsityjahi rē xahasen nuju xi tsajin xi cún nuju xcun Nina, hacuaha ngatsē rē xi macjain nuju cjuaquixi ne, vēhē xi cuetjuntjun. ¹⁴ Hya xi canújin cojo nuju cjuandajyihi rē Nina ne, hya cavaxijin nuju me xi cuetjuntjun. Cavaxijin nuju me xi sacú nuju cjuahñu ndajyihi sacuaha xi tjin rē Nai

naja Jesucristu. ¹⁵ Vēhē xi nújin cojo nuju ta xi camacjiintacun, hacuaha xi canichayuun cjua xi cavicuyin nuju, cjua xi canújin jan cojo cjua xi canihindín jan. ¹⁶ Nai naja Jesucristu cojo Nina Nahmi naja ne, casahmi hmucacun me ngayaan, hacuaha cojo cjuandaja rē me casua naja me cjuetacun xi tsajin hora tsajin nixtin xi cjuē, hacuaha casua naja me ngu cjua ndajyihi xi nechayan ni rē nixtin xi cuetjucaa. ¹⁷ Me vēhē ne, catisua me cjuetacun xahasen nuju, hacuaha catisua nuju me ngahñu xi cuinújun hacuaha xi nihñu yějē ni cjuandaja.

Nihñu oración ngatsē niji

3 Quihndē ne, nihñu oración ngatsē niji, cojo sa xi cjua rē Nai naja ne, xati cuechu jingujyē ni, hacuaha cojo cjuasua cjuahatsja xuta cjua rē me, sacuatjin camá ngajñi nuju. ² Hacuaha nihñu oración, cojo sa xi cuetjintjin tsēhē xuta tsehen ta, hacuiin ngayējē xuta xi macjain rē me Nina. ³ Peru Nai naja ne, hatuxa quixi me cojo cjua rē me. Sua me yun ngahñu xi scaa nuju, hacuaha cuetjo nuju me, cojo sa xi tsajin mé cuma sahmi Satanás cojo nuju. ⁴ Ngatsē rē Nai naja ne, fē mangutacuin ta ngayun ne tinihñú jain, hacuaha nihñu sa cjua xi vitexin nuju. ⁵ Nai naja ne, catincha me cjuahmutacun rē Nina xahasen nuju, hacuaha catisua nuju me ngahñu rē Cristu xi scaa nuju tsēhē yějē ni cjuacjintacun.

Meje rē xi nihña xa

⁶ Quihndē ne, sacuahatjin meje rē Nai naja Jesucristu ne, vitexin nuju xi naxunxun yojo nuju tsēhē yějē ni me xi jemu tsēhē me sahmi me xa, hacuaha xi sáhmii hacutjin xi cavicuyin nuju xi nihñu. ⁷ Ngayun ne, ha hyun ta meje rē xi nihñu ngu xa sehe sacú xi xinu, sacuatjin xi cahyun xi canihñí. Hacuuiin tu jyuu ni cavinechinyinjñi ngajñi nuju ne, ⁸ hacuiin tu cjuatjo ni casacu niji niñu xi

cachini ta, nixtin nixten ne, jercu canihñí xa, cojo sa xi hacuiin ngayun nihñu gastu ngatsë niji. ⁹Handasa satë niji cahndé xi chjahyín nuju xi cuisecun niji, peru cachjahyiin ta canihñíxin xa, xi cuejñí ngu xcusun xi cuatjin nihñu. ¹⁰Hacuaha hya xi cavinechintihin cojo nuju ne, hya canújin cojo nuju ta: Me xi mijí sahmi xa ne, xi catuun sinë me. ¹¹Cuitjin tinújin cojo nuju ta, tsëhë xi casacu niji cjua xi ngajñi nuju ne, hinchajñi me xi sáhmii xa. Tu tsinguissehenjñi me xcun cjuacjintacun xi ña cuendaain rë me. ¹²Ngajan xi vitexin rë me xi cuacun vë, sacuatjin meje rë Nai naja Jesucristu, xi catiyujuyuu cjuatacun rë me, hane catisahmi me xa xi sacú sinë me.

¹³Hacuaha ngayun ne, xi camacjiintacun tsëhë cjuandaja xi tinihñú. ¹⁴Sa

xi tjin jarë me xi mijí cuihndë cjua xi tinújin xcun xujun vihi ne, chjuhuncuendun jarë me jan, hacuaha xi caninguisu-unjñuu cojo rë me, sehe me vëhë ne, cuma sava rë me. ¹⁵Peru hacuiin chocho chun me ta, tuhun rë me cjua cojo cjuandaja ta, tsëhë xi xingun me.

Cjua xi cuijnetaha

¹⁶Hane Nai naja, me xi tsëhë cjuajeya ne, catisua nuju me cjuajeya yëjë ni nixtin hacuaha xcun yëjë ni cjuacjintacun. Hacuaha Nai naja yaha nuju me ngayujun ni. ¹⁷Suva ngahan, Pablo, tsihindu nuju ngu cjua vi, xi tisuá nuju ngu nina. Hatuxa xcusun naha xi cuitjin tsihindu xcun yëjë ni xujun xi tsingátju. ¹⁸Cjuandaja rë Nai naja Jesucristu ne, catisehen xahasen nuju ngayujun ni.

Xujun xi titjun catsihindu San Pablo cha Timoteo

1 Ngahan Pablo ne, apóstol tsêhë Cristu Jesús má ngahan ta, tsêhë xi cuatjin cavitexa Nina, me xi vaxêtje naja, hacuaha cuatjin cavitexa Cristu Jesús, me xi vetahan tacun. ²Tsihindu ri xujun vihi, ngaye Timoteo. Ngaye ne, sacuaha quihndi ndaja naha ngaye ta, tsêhë xi camacjain ri cjua rê Nina, hora xi cachjá cojo ri cjua jan. Nina Nahmi naja cojo Nai naja Cristu Jesús ne, catamayuma rê me ngaye, catisua ri me cjuandaja cjuajeya.

Tjin xuta xi vicuya ngu cjuachacun xi machjiriin

³Sacuahatjin xi ha cachjá cojo ri, hora xi cavétju cêjë hiscan ladu tsêhë Macedonia ne, tinechintehe sa ngajan nandya Efeso. Tjin ngu jo cha ngajan xi tivicuya cha cjuachacun xi hacjahi. Hane ngaye ne, titexe rê cha xi cuacun vë ta ha quihndë cuicuyaaïn sa cha cuatjin. ⁴Hacuaha titexe rê cha ne, hacuiin cuetaharcu cha yêjë cuentu rê xutachanga naja ta, tsêhë xi hacuiin yêjë xi cjuaquixi. Ngu jo cuentu xi cuacun vëhë ne, jemu nduju fi, hane tsajin mé machjirêhë ta suvá ni xi si vangui, hacuaha tsajin mé visecoo naja xi nihña hacutjin xi meje rê Nina. Tsêhë xi macjain naja cjua rê Nina ne, vëhë xi hyan hacutjin xi Nina meje rê me xi nihña.

⁵Tichjá cojo ri xi cuatjin titexe rê cha xi cuacun vë, sehe cuma tyjahi xahasen rê cha, cuma ndajyihi cjuatacun rê cha, hacuaha cumacjain nguñajacacun rê cha. Xi cuatjin ne, hacuaha sacú rê cha cjuandaja xi cuma tsihmucacun xicjin cha. ⁶Peru ngu jo cha xi cuacun vë ne, cachaja cha ndiya rê cjuaquixi, cavetjuxin cha tsêhë cjuandaja jan, hane tu cjua xi machjiriin, vëhë tivisiajmi

cha. ⁷Meje sahmi cha maestru tsêhë cjua xi cavitexa Nina xutachanga naja. Peru hvíin cha mé vijne cjua xi visiajmi cha, hisca suvá cha vijniircu cha cjua xi vicuya nguñaja nguñajacacun cha.

⁸Quihndë ne, ha hyan ta cjua xi cavitexa Nina jan ne, jemu ndaja. Peru meje rê xi cuijnercun, mé ngatsë rê xi Nina ne, cavitexa me cjua jan. ⁹Nina ne cavitexa me cjua jan, peru hacuiin ngatsë rê xuta xi ndaja sahmi ta, ngatsë rê xuta xi choho sahmi, xuta xi hndiin tsêhë ngu xuta xi matitjun tsêhë, xuta xi cuendaain rê tsêhë Nina, xuta xi sahmi cjuatsehen, cojo xuta xi faharcuaain rê Nina, xuta xi macjaain rê cjua rê Nina, xuta xi tsiquehen nahmi rê, tsiquehen naa rê, cojo sa tsiquehen xicjin. ¹⁰Hacuaha cavitexa Nina cjua jan ngatsë rê xuta xihin xuta chjuun xi tjin chjuunnahñu rê, xuta xi xanda, xuta xi vinchahma ngu xuta sehe fehya tujún xuta rê, xuta xi chja cjuandacha cojo xicjin, xuta xi chja cjuandacha hisca xcun xutaxa rê, hacuaha xuta xi sahmi vihi sahmi vëhë xi matanguaaïn cojo cjuaquixi. ¹¹Peru cjuaquixi jan ne, matangun cojo cjua ndajyihi tsêhë Nina. Hacuaha Nina xi jercu ndaja me ne, me vëhë casua ná me cjua xi cuatjin cuichjá.

Nacuechji rê Nina tsêhë cjuandaja rê me

¹²Suá nacuechji rê Nai naja Cristu Jesús ta, tsêhë xi camangucacun me cojo ná xi casua ná me xa rê me, hacuaha tisua ná me ngahñu cjua xi scaa ná sahme xa jan. ¹³Cuatjin casahmi me cjuandaja cojo ná quihndë, handasa hatsëë ne, jemu choho cachjá tsêhë me hacuaha jemu choho casahme, xi jemu yehe cjuañihí casuá rê xuta ladu rê me. Peru Nai naja ne, cama yuma rê me ngahan ta, tsêhë xi cjêë xi cumacjain ná me, hane vëhë xi hveen mé xi casahme. ¹⁴Hane jemu casahmi cama-

hani me cjuandaja cojo ná, xi casua me cahndé xi camacjain ná me hacuaha xi caveya me cjuahmutacun cahntsua xahasen naha. Cuatjin sahmi me cojo naja xi nihña tangun cjuatacun naja cojo Cristu Jesús.

¹⁵ Cjua xi cuichjá nguehe ne, jemu cjuaquixi, hacuaha ndaja tjin xi cumacjain rë ngayëjë ni xuta ta, Cristu Jesús ne, canduva me nguehe ngasunhndë xi cuaxëtje me xuta xi sahmi cjuatsehen. Tsëhë yëjë xuta tsehen xi cuacun jan ne, ngahan hitsë sa tsehen ngahan. ¹⁶ Peru Jesucristu ne, camayuma rë me ngahan ta, tsëhë xi meje rë me xi cumachaya rë yëjë ni xuta ta jemu sahmi jyë cacun me cojo ngu xuta xi jercu sahmi cjuatsehen. Sacuatjin xi casahmi me cjuandaja cojo ná ne, hacuaha ni tjin sahmi me cjuandaja cojo yëjë ni xuta xi cumacjain rë cjua rë me. Sehe sacú rë xuta jan cjuahñu xatsë xcun Nina. ¹⁷ Vëhë xi meje rë xi hatuxa chjahanrcun rë Nina, ndaja cuinújan tsëhë Nina yëjë ni nixtin ta, me vëhë xi matitjun me, xi vitexa me yëjë ni nixtin ta, suvá ni me vëhë xi Nina me, hacuaha matsijin naja me. Hacuaha tsajin nixtin tsajin hora cueya me. Cuatjin jain.

¹⁸ Ngaye Timoteo ne, sacuatjin cjuatacun xi ha cachja me xi hmí profeta tsiji hatsëë nixtin tsan ne, ha chuva vëhë ni tivitéxa ri xi nihñi. Hane cjuatacun vëhë ne, cumachjirëhë riji xcun xa rë Nina xi tinihñi sacuaha tjin machjirëhë ngu quicha ngajñi rë ngu si. ¹⁹ Mijí rë xi cuihin ngaxtin xi macjain ri cjua rë Nina ta, meje rë xi nihñicuende cjuatacun ndajyihí xi quichehe. Ngu jo xuta ne, casahmi cuendaain me cjuatacun ndajyihí xi cavaha me, hane cuatjin catsichaja me cjuatacun rë me, hacuaha ha quihndë macjaain rë me Jesucristu. ²⁰ Cuatjin cavatju cha Himeneo cojo cha Alejandro camá. Vëhë xi ngahan ne, casuá cahndé xi suandya hitsë Satanás cha xi cuacun

vë, sehe cumachaya rë cha ta cuaaintjin camahani xi choho chja cha tsëhë Nina.

Meje rë xi nihña oración

2 Vëhë xi nguehe cuichjá cojo ri ta jemu meje rë xi chjahyan rë Nina cjuandaja, meje rë xi tahan nacuechji rë me, hacuaha meje rë xi nihña oración ngatsë rë yëjë ni xuta. ² Meje rë xi nihña oración ngatsë rë xutaxa rë, hacuaha ngatsë rë ngayëjë ni xuta xi vitexa naja, sehe ngayaan ne, tsajin yo suandya naja suaxti naja, xi tsejen xi chjahanrcun rë Nina, hacuaha xi nihña cjuandaja. ³ Jercu ndaja tjin xi cuatjin nihña oración ta, Nina, me xi vaxëtje naja ne, cuatjin chuya rë me. ⁴ Meje rë me xi ngayejen ni xuta ne, cuetjuntjen hacuaha ndaja cuijnercun cjua xi cjuaquixi. ⁵ Ngu ni Nina xi tacun me, hacuaha ngu ni me xi sahmi xi matangun cjuatacun naja ngayaan xuta cojo Nina. Me xi cuatjin sahmi jan ne, hacui ngu xuta xi hmí Cristu Jesús. ⁶ Me vëhë xi casua me yojo rë me xi cuechjitje me jyë naja ngayejen ni ngayaan. Hane hya xi cavetjucaa nixtin ne, cuatjin cama tsejen xi Nina ne, meje rë me xi cuetjuntjen. ⁷ Vëhë xi casatë ná xi má ngahan apóstol, xi cuicuyá rë xuta xi xín nanguí rë me, cuichjá cojo rë me cjua xi cjuaquixi xi macjain naja. Hatuxa cjuaquixi cjua xi chjá cojo ri. Hacuuiin vindácha.

⁸ Hacuaha meje ná xi xuta xihin ne, sahmi me oración ha tu jani ni hiscan xi matangun me. Hya xi scunitjen me tsja me xi sahmi me oración ne, meje rë cojo ngu xahasen tyjahi. Mijí rë xi quitaha cjan rë me, hacuaha mijí rë xi cojo si. ⁹ Hacuaha yachjin ne, cataja me tsjian rë me hacutjin xi ndaja tjin, hacuiin ngu xcusun xi jemu nchina tsejen. Mijí rë xi cuircu cun sahmi me tsjarcu me. Mijí rë xi tsindaja me yojo rë me cojo oro, cojo tuseti xi jemu hnga chjí rë, cojo tsjian hnga chjí rë. ¹⁰ Meje rë xi

sahmi me cjuandaja ta, cuatjin ndaja tsejen tsëhë yachjin xi macjain rë me Nina. ¹¹ Hacuaha hya xi viseñuju me ngu cjua rë Nina ne, catitsinguijne me yojo rë me, jyu ni catiyuju me. ¹² Hacuaha suaan cahndë xi yachjin ne, cuicuya me ngajni rë xuta cjin, hacuaha suaan cahndë xi me vëhë cuitexa me xuta xihin. Xi meje rë ne, tu catiseñuju ni me. ¹³ Cuatjin meje rë ta, tsëhë xi hya xi casahmi Nina xuta ne, titjun casahmi me xutachanga naja Adán, sehe má jo ne, casahmi me Eva. ¹⁴ Hane Adán ne, hacuiin camandacha me ta, chjuun jan ne, me vëhë xi camandacha me, hane cuatjin camá xi casahmichiin chjuun jan cjua xi cavitexa Nina. ¹⁵ Peru yachjin ne, meje rë xi catisacu rë me quihndi. Cuatjin xi cuetjutje me, sa xi macjain rë me Nina, sa xi tsihmu cacun xicjin me, sa xi tyjahi xahasen rë me, hacuaha sa xi vetjo me cjuatacun rë me.

Xuta xi vitexa ngajni rë xuta ladu rë Nina

3 Nguehe cuichjá cojo ri ngu cjua xi cuatjin jain: yo xi meje cuitexa sacuahe obispo ngajni rë xuta ladu rë Nina ne, jemu ndaja xa xi meje rë xuta jan. ² Ngajan xi me xi cuitexa ngajni rë xuta ladu rë Nina ne, meje rë xi ngu xuta ndaja xi tsajin mé choho sahmi. Meje rë xi ngu xuta xi ngu ni chjuun rë, hacuaha xi vetjo yojo rë, xi tacun cahndë cjuatacun rë. Mijí rë xi tujyë sahmi me. Meje rë xi ngu xuta xi cojo cjuandaja cjuahatsja me xuta xi nduva tjengui rë me ndava me. Hacuaha meje rë xi chutaha cjuatacun rë me xi cuicuya me xuta. ³ Mijí rë xi ngu xuta chihi. Mijí rë xi choyo xuta me ta, meje rë xi tjin rë me cjuandaja cjuajeya. Mijí rë xi jercu tsimeje me tujún. ⁴ Hacuaha me xi vitexa ngajni rë xuta ladu rë Nina jan ne, meje rë xi ngu xuta xi ndaja sahmi gobiernu ndava, hacuaha quihndi rë ne, vihndë tsëhë hacuaha fa-

harcun rë. ⁵ Ta sa xi hacuiin ndaja ma sahmi me gobiernu ndava me ne, ¿hacutjin cuma cjuahacuenda me xuta ladu rë Nina? ⁶ Hacuaha mijí rë xi ngu xuta xi sehe tiña nixtin cavisehen me ndiya rë Nina, sá tu jemu sahmi jyë xuta jan yojo rë me, cjuë ne, cuatju me castigu rë Nina, sacuahe tjin cavatju xitsehen matitjun camá. ⁷ Hane meje rë xi ngu xuta xi ha chjaharcun rë me, xi hisca cojo xuta xi hacuiin ladu rë Nina ne, ha tifaharcun rë me. Cuatjin xi xuta xi vitexa jan ne, hacuiin cuetju sava me, hacuaha hacuiin tsinguetsun xitsehen xi matitjun cjuatacun rë me.

Xuta xi visecoo ngu me xi vitexa

⁸ Hacuaha ni tjin ni xuta xi visecoo rë ngu me xi vitexa jan ne, meje rë xi ngu xuta xi ha chjaharcun rë, ngu xuta xi hacuiin jo xcun jo hntsua. Mijí rë xi ngu xuta xi jercu hvi xan. Mijí rë xi ngu xuta xi jercu tsimeje tujún. ⁹ Meje rë xi ngu xuta xi cojo ngu cjuatacun tyjahi macjain rë cjua xi cama ngascan casuacuenda naja Nina, cjua xi tsajin yo vëë rë hatsëë nixtin. ¹⁰ Tjun tjun ne, meje rë xi chjahachuva rë xuta jan. Hane sa xi tsejen ta tsajin mé jyë rë xuta jan ne, cuma cjue me xa xi cuisecoo me xuta xi vitexa. ¹¹ Hacuaha chjuun rë me ne, meje rë xi ngu chjuun xi ha chjaharcun rë, ngu chjuun xi visiajmii cjuandesu. Meje rë xi ngu chjuun xi vetjo me cjuatacun rë me, ngu chjuun xi ha sahmi chihin xa rë. ¹² Hane xuta xi visecoo rë ngu me xi vitexa jan ne, meje rë xi ngu ni chjuun rë me. Hacuaha meje rë xi ngu xuta xi ndaja sahmi me gobiernu ndava me cojo quihndi rë me. ¹³ Hane me xi jemu ndaja jain xa sahmi ne, jercu cjuaharcun xuta me, hacuaha hitsë sa tsacjuiin me xi cuichja me cjua ndajiyihi tsëhë Cristu Jesús xi macjain naja.

Ngu cjuua rë Nina xi tsajin yo vëë

¹⁴ Quihndë xi titsihindu ri cjuua vihi ne, vetahá cáacun ta xati cuma cjué tjëngë ri. ¹⁵ Peru sa xi cuindeya ná ne, cjuua xi titsingátju ri vi ne, sua cumachaya ri hacutjin xi mameje rë xi sahmi xuta rë Nina. Hane xuta rë Nina jan ne, hacui ngayaan xi macjain naja Nina xi quicun, hacui ngayaan xi nújantjen ngatsë rë cjuaquixi. ¹⁶ Cjuatacun rë Nina xi tsajin yo vëë, xi macjain naja vi ne, súv tsejen ta jemu vengui chjí rë:

Cristu Jesús ne, hya xi canduva me
nguehe ngasunhndë vihi ne, camá
me ngu xuta sacuahatjin ngayaan
xuta.

Peru tsajin camahani jyé rë me, chja
Hasen xi tsëhë Nina.

Hacuaha cavëë ángel me.

Hane camachaya rë xuta tsëhë me yëjë
ni nangui.

Hacuaha camacjain rë xuta me jingujyë
ni ngasunhndë.

Hacuaha cafachatsja Nina me ngajan
ngahnga.

Xuta xi vicuya cjuandacha

4 Quihndë ne, Hasen rë Nina ne, chja quixi ta cuechu nixtin xi yahnga xuta ne, cuiyujuxin me cjuua tsëhë Cristu Jesús, cjuua xi macjain naja, hane tu cjuua tsëhë xitsehe xi vindacha ne, vëhë scutaya me hacuaha vëhë cuetaharcu me. ² Hacuaha cuetaharcu me cjuua xi cuicuya xuta xi jo xcun jo hntsua xi vindacha. Sacuahatjin má taja chuxin rë ndyaja hiscan xi faha chu quicha ne, cuatjin cuetsun cjuatacun rë xuta ndacha xi cuacun vë. ³ Cjuavixan ne, suaain me cahndé cuma, hacuaha cuichja me ta tjin yahnga xcusun xi ndajin xi xinë. Peru Nina ne, casahmi me yëjë ni xcusun ne, cuma xinë ngayejen ni xi macjain naja me, ngayejen ni xi cavijnercun cjuatacun xi cjuaquixi. Peru meje rë xi tahan

nacuechji rë me ta, ⁴ yëjë ni xcusun xi Nina casahmi me ne, jemu ndaja. Vëhë xi mijí rë xi nitjunnguen tu mé ni xcusun, ta meje rë xi chjahanntsán, peru tahan nacuechji rë Nina. ⁵ Hane ngatsë rë cjuua rë Nina cojo cjuua xi nújan hya xi tahan nacuechji rë me ne, vëhë sahmi xi tsajin tsavi tsëhë tu mé ni xcusun.

Ngu me xi ndaja sahmi xa rë Cristu Jesús

⁶ Sa xi tehe rë xuta ladu rë Nina yëjë ni cjuua xi sehe catsihindu ri vë ne, jemu ndaja nihñi, xi tinihñi xa rë Cristu Jesús. Hacuaha hitsë sa cuma jyë cjuatacun riji ngatsë rë cjuua xi macjain naja, hacuaha ngatsë rë cjuandaja xi cachutaye xi nihñi. ⁷ Peru xi canihñicuendiin yëjë ni cuentu rë xutachanga naja ta, hacuiin yëjë xi machjirëhë ta, ngu jo ne, súv ni xutachanga naja, me vëhë xi cavaxëcun me. Cahndé rë vëhë ne, ngaye ne, nihñi ngahñu yëjë ni nixtin xi tsejen xi chjehercuin rë Nina nguñajatacuin. ⁸ Xi niniyan yojo naja ne, jemu ndaja tjin. Peru hitsë sa ndaja tjin xi tsejen xi chjahanrcun rë Nina ta, tsëhë xi hya xi cuatjin nihña ne, sacu naja cjuandaja rë Nina quihndë guehe xcun cjuahñu naja, hacuaha ni tjin ngajan xcun Nina. ⁹ Cjuua xi titsihindu vi ne, hatuxa vechu chuva rë xi cumacjain naja ta, tsëhë xi jemu cjuaquixi. ¹⁰ Vëhë xi jercu tinihña xa, tsëhë xi ha vetahan tacun Nina xi quicun, Nina xi vaxëtje naja ngayejen ni ngayaan xuta, hacutjin ngayejen ni ngayaan xi macjain naja me.

¹¹ Ticoye rë xuta cjuatacun xi catsihindu vë, hane hisca titexe rë me. ¹² Nihñi cjuandaja ne, sehe tsajin yo xi chuyiin rë tsiji ngatsë rë xi chuva nu riji. Nihñi cjuandaja ne, sehe xuta xi macjain rë Nina ne, xi scuëë me hacutjin nihñi ne, hacuaha ni tjin sahmi me; sacuaha tjin xi ha noje, sacuaha tjin xi nihñi, sacuaha tjin xi hmu tacuin xinguin, sacuaha tjin

xi macjain ri Nina, sacuaha tjin xi ndajyihi xahasen riji. ¹³Nguyëjë rë xi cjëë cjuëhë ne, hñu tinoje cojo xujun rë Nina, hya xi ma tangun xuta ngajan yungun. Ndaja tinoje cojo rë me ne, catisahmi me cjuandaja, hacuaha ticoye rë me. ¹⁴Nihñixe cojo cjuatjo xi Nina casua ri me, nixtin hya xi me xi vitexa xuta ladu rë Nina ne, cavetahatsja ri me. Cuatjin camá ta, tsëhë xi cuatjin cachja Nina cojo ngu xuta xi hmí profeta xi cuatjin meje rë me xi cuma.

¹⁵Nihñi nguñajatacuin ngayëjë ni hacutjin xi vitexa xujun vi. Xi cuatjin ne, ngayëjë ni xuta scuëë me hacutjin tihmi xcun cojo cjuandaja rë Nina. ¹⁶Cuidadu ni tjin ri tsiji sove, hacuaha cojo cjuatacun xi vicoye. Tu chihin ni tihincueje cjuatacun vë. Sa xi cuatjin nihñi ne, cuma naxetje yojo riji, hacuaha cuma naxetje me xi cuiseñuju cja xi vicoye.

Hacutjin xi cuitexe rë xuta ladu rë Cristu

5 Sa xi ngu me xi ha nchava ne, choho sahmi me ne, hacuiin cuinojetehe rë me ta, cojo jeya tinoje cojo rë me, hacutjin xi sahmi me cjuandaja, sacuaha tjin xi nújan cojo nahmi naja. Hacuaha cojo xuta xihin, me xi vasen xuta ni ne, tinoje cojo rë me sacuaha tjin xi nújan cojo tseen. ²Hane yachjin xi ha chicuhun me ne, cojo cjuandaja tinoje cojo rë me sacuaha tjin xi nújan cojo naa naja. Hacuaha cojo yachjin xi vasen xuta ni me ne, tinoje cojo rë me sacuaha tjin xi nújan cojo na xi tichjan, cojo ngu xahasen ndajyihi.

³Yachjin cahan xi cjaquixi xi tsajin yo ngatsë rë me ne, meje rë xi chjahanrcun rë me, cuisecoon rë me. ⁴Peru ngu chjuun cahan ne, sa xi tjin rë na quihndi o quihndindai ne, catisahmi nixti jan cjuandaja, catisecoo rë na, cojo sa xi cuatjin sahmingojo nixti jan cojo xutacha rë. Xi cuatjin cuma ne, hatuxa chuya rë

Nina. ⁵Tjin chjuun xi cjaquixi xi cahan me, me xi ha siu suvá. Me vëhë xi vetaha cacun me Nina, hane sahmi me oración, fehya me cjuandaja rë Nina nixtin nixten. ⁶Peru hacuaha tjin chjuun cahan xi sahmi ni me hacutjin xi ma sua rë xahasen rë me. Hane chjuun cahan xi cuatjin sahmi jan ne, handasa ndaja cun cjuahñu rë me ne, peru cjuatacun xi sahmi me ne, tsajin mé machjirëhë. ⁷Cuatjin tinoje cojo xuta ladu rë Cristu, sehe tsajin mé jyë rë me cojo xutacha rë me. ⁸Peru sa xi ngu xuta marcuaain rë me tsëhë xuta rë me, o sa xi marcuaain rë me tsëhë cahntsua ndava me ne, vëhë tsingacun naja xi catsitjungui me cja rë Nina xi macjain naja. Hacuaha hitsë sa choho sahmi me xi cuma rë ngu xuta xi hatuxa macjaain rë Nina.

⁹Xcun xujun xi yaja ñihi rë yëjë ni yachjin cahan ne, cumahindu ñihi rë na xi ha cafahá rë xi jyanchan nu, na xi cavejña cojo ngu ni xihin, ¹⁰na xi ha vëë xuta xi ndaja xcusun rë, xi ha casahmi yëjë ni cjuandaja vihi: ha catsicha na quihndi, ha cafahatsja na cojo cjuandaja xuta xi quiji tjengui me na ndava na, ha cavisecoo na yahnga me xi ladu rë Cristu, ha casua na cjuetacun me xi tjin rë ngu cjuacjintacun, hacuaha ha casahmi na jingu sa xcusun xi ndatjin.

¹¹Peru xcun xujun jan ne, mijí rë xi cuaquí ñihi rë na cahan xi chuva nu rë, sá cuechu ngu nixtin xi ha quihndë sahmii na xa rë Cristu nguñajacacun na, hane meje nga cuixan na ngu ndiya. ¹²Xi cuatjin sahmi na ne, cuetjucaa jyë rë na, tsëhë xi tsichaja na cja xi ha catsinguissehenjñi na. ¹³Hacuaha cuma tsëhë na xi tu tsujihya ni na ndava xuta. Hane hacuiin tu suvá ni cuma tsëhë na ta, hisca cuetsihin cuichja na cjuandesu, cuetsihin tsinguissehenjñi na jingu sa cjuatacun xi cuendaain rë na, hacuaha cuetsihin cuisiajmi na cja xi mamijí rë xi cuichja na. ¹⁴Vëhë xi meje ná xi

catixan nga na cahan xi chuva nixtin rë. Catisacu rë na quihndi, hacuaha catja-hacuenda na cahntsua ndava na. Sehe xuta xi chuyiin rë me tsajan ne, sacuiin rë me hacutjin choho cuichja me tsëhë xcusun xi ndaja sahmi na yachjin cahan jan.¹⁵ Cuatjin chjá ta, tsëhë xi tjin ngu jo na cahan xi ha cavetjuxin na tsëhë ndiya rë Nina, cavisehen na ndiya rë Satanás.

¹⁶ Ngu chjuun xi ladu rë Cristu me ne, sa xi tjin ngu chjuun xi xicjin me xi cahan ne, mijí rë xi xuta ladu rë Cristu sahmi me gastu ngatsë rë chjuun cahan jan ta, me xi xicjin ni na ne, catisecoo me na. Xi cuatjin ne, xuta ladu rë Cristu ne, cuma cuisecoo me yachjin cahan xi tsajin yo ngatsë rë.

¹⁷ Yëjë ni xuta changá xi ndaja vitexa me ngajñi rë xuta ladu rë Cristu ne, vechu chuva rë xi chjaharcun rë me hacuaha ndaja chjí sacú rë me. Peru me xi sahmi ngu jyë xi chjaharcun rë hacuaha ndaja chjí sacú rë me ne, me xi sua machaya rë xuta cjua tsëhë Jesús cojo me xi vicuya naja cjuachacun.¹⁸ Cuatjin chjá ta, tsëhë xi xcun xujun rë Nina ne, cuitjin camahindu cjua vihi: “Mijí rë xi cueyún changa hntsua ngu ndyaja hya xi sahmi chu xa nuju xi sunesun chu naxu rë trigu xi cuetju trigu rë.” Hacuaha: “Ngu mosu ne, tjin rë cha chuva rë xi cjuaha cha chjí rë cha.”

¹⁹ Hya xi xinchajyë rë ngu xuta changá xi vitexa me xuta ladu rë Cristu ne, xi canihñicuendiin jyë jan sa xi ngu ni cha tichja cha. Hisca xi cjuehe jo jyan cha xi cavëë cha xcusun xi casahmi xuta changá jan ne, sehe nihñicuende jyë xi vincha cha.²⁰ Peru me xi tisahmi jain cjuatsehen ne, tinoje cojo rë me xcun ni ngayëjë xuta ne, hacuaha yëjë ni xuta jan ne, tsacjun me cuma, hane sahmi me cjuatsehen.²¹ Nihñi ngayëjë ni cjua hacutjin xi titsihindu ri. Hacuaha meje rë xi chuva xi nihñi cojo ngu ne, nihñi cojo ngayëjë ni xuta, sa xi vinga ri me

o sa xi vingaaïn ri me. Hisca Nina cojo Cristu Jesús cojo ángel xi cavaxijin me ne, vëë me hacutjin xi titsihindu ri vi.²² Cuechu nixtin xi cuma meje sa xuta xi cjuahatsja me xa ngajñi rë xuta ladu rë Cristu, sacuaha ngu me xi cuitexa, o ngu me xi sahmi tu mé ni ngu xa xi cuma meje. Peru hacuiin marcu macjain cuinoje yo xuta xi satë rë xa jan. Ndaja ningatehetacuïn titjun yo xuta xi ndaja me ta, tsëhë xi mijí rë xi ninguisihinñi cojo xuta tsehen. Hisca sove ne, mijí rë xi nihñi cjuatsehen.

²³ Ha quihndë xi cahyiin suvá ni nandá ta, sihi hitsë xan rë uva ngatsë rë cahntsue, hacuaha ngatsë rë chñhin xi tu quitaha tu quitaha sacu ri.

²⁴ Tjin xuta xi suvá tsejen tsëhë me xi sahmi me cjuatsehen. Hane cjuatsehen ni rë me jan ne, vëhë sahmi xi cuma me castigu. Hacuaha tjin yahnga xuta xi matsijin tsëhë me xi sahmi me cjuatsehen. Peru xi cuma ngascan ne, cuma tsejen xi cun xi má me cojo jyë rë me.²⁵ Hacuaha ni tjin xcusun xi ndaja ta suvá tsejen. Hane ha ndaja sa hacuiin ngutjen cuma tsejen, peru hatuxa cumaji cuiyujuhma ta, tjin xi cuma tsejen.

6 Xuta ladu rë Cristu xi má mosu hndixahan rë ngu xuta ne, jemu meje rë xi cjuaharcun me xuta xi má nai rë me. Sa tsajin ne, choho cuma cuichja xuta tsëhë Nina hacuaha cojo tsëhë cjuachacun xi vicuyan.² Hane me xi nai rë mosu hndixahan jan ne, sa xi macjain rë me Cristu ne, mijí rë xi choho scuëë hndixahan jan me, tsëhë xi tangun ni macjain rë me Cristu. Cahndé rë xi choho scuëë rë me ne, meje rë xi cuisecoo hndixahan jan me yëjë ni xa xi cuitexa me ta, tsëhë xi me xi cuma tsëhë yëjë ni cjuandaja xi sahmi hndixahan jan ne, xuta ladu rë Cristu me. Hane vëhë xi jemu hmucacun hndixahan jan me. Tinoje cojo xuta yëjë ni cjua vëhë, hya xi cuicoye rë me.

Cjuandacha cojo cjuanchina

³Sa xi ngu xuta vicuya me ngu cjuachacun xi hacjahi fi ne, sa xi manguaaincacun me cojo cjua xi cjuaquixi xi cachja Nai naja Jesucristu ne, hacuaha manguaaincacun me cojo cjuachacun xi tsëhë Nina ne, ⁴me vëhë ne, ngu xuta xi jemu sahmi jyë me yojo rë me. Peru hvín camaha ni me, hacuaha machjiriin cjuatacun rë me ta, tsëhë xi jemu meje cuisiajmi me tsëhë tu mé ni cjua: “Cuitjin vijne cjua vëhë; jéya, cuatjin vijne”, chja me. Hatuxa jemu meje scaan me cojo cjua ngajñi rë cjuavisiajmi rë me. Hane xi cuatjin visiajmi me ne, vetjucaa cjuaxintacun, vetjucaa cjuahngatacun, hacuaha choho chja me tsëhë xicjin me, choho tsingatahacacun me tsëhë xicjin me, ⁵hacuaha ngajan fë ngajan vet-sihin ticjan me cojo cjua, xi tsajin hiscan cuijnetaha. Cuatjin sahmi me ta, tsëhë xi ha cavetsun cjuatacun rë me ne, cjua xi cjuaquixi ne, hvín camahani me. Xi tsingatahacacun me ne, xuta xi faharcun rë Nina ne, jemu ndaja cuatju me cuma ta, jercu sacú rë me cjuanchina. ⁶Bueno, quixi ta ndaja cuátjun cuma xi tsejen xi chjahanrcun rë Nina, sa xi cumangutacun cojo xi tjin naja. ⁷Ta tsajin camahani mé quichahan xi catsin yaan xi cafehen ngasunhndë vi, hacuaha tsajin camahani mé xi cuma cuanguencojon, hya xi cueyan. ⁸Peru sa xi ha tjin naja xi xinë cojo xi chajan ne, meje rë xi cojo vëhë ne, cumangutacun. ⁹Peru xuta xi jemu meje rë me cuma nchina me ne, ndaya ndaya ni tsingatihin me xi cumandacha me xi sahmi me cjuatsehen. Xitu tsinguissehenjñi me ngajñi rë cjuatsehen jan ne, ha quihndë cumaji cuetjuxin me, sacuatjin rë ngu chu xi jiyahñu cahntsua ngu chen. Hacuaha jemu cjín xcusun yumahasen xi meje rë me. Peru machjiriin xcusun jan ta, tu tsichaja tu tsinguetsun ni rë cjuatacun rë

me. ¹⁰Sacuaha xuta xi jercu meje rë me tujún ne, jemu cjín xcusun cjuatsehen sahmi me xi sacú rë me tujún. Yahnga me xi cuacun jan ne, hisca caviyujuxin me cjuachacun xi macjain naja. Hane ngatsë rë xi cavetjuxin me ne, vëhë xi jemu choho tivatju me jima.

Pablo ne, tsinguixi me Timoteo

¹¹Peru ngaye xi ladu rë Nina ngaye ne, tihinxin tsëhë xcusun xi cuacun vëhë. Tihin tjengui ndiya xi tsëhë cjuaquixi, hacuaha nihñi hacutjin xi Nina chuya rë me. Ndaja catamacjain ri me, hacuaha ndaja nihmutacuin me. Caticaa ri xcun ngayëjë ni cjuacjintacun xi cuátji cuma, hacuaha nihñi jeya cjuatacun riji. ¹²Nihñi ngahñu xi yëjë ni xcusun xi nihñi ne, cumatangun cojo cjuatacun xi macjain ri, sehe sacú ri cjuahñu xatsë ngajan xcun Nina xi tsajin nixtin cjuë. Tsëhë vëhë xi Nina cavaxijin ri me. Hacuaha ha catehe cjuaquixi riji xcun jemu cjín xuta hacutjin xi macjain jain ri Nina. ¹³Nina xi tisua me cjuahñu rë ngayëjë ni xi tjin ne, vëë me hacutjin tivitéxa ri. Hacuaha Cristu Jesús, me xi casua cjuaquixi rë xcun Poncio Pilatu ne, vëë me hacutjin tivitéxa ri. ¹⁴Cjua xi tivitéxa ri ne, tinohye. Hacuini nindeye cjua vë ta nihñichihin, hisca xi cuechu nixtin xi cuinduva nga Nai naja Jesucristu. ¹⁵Hane hya xi cuechutaha nixtin vëhë ne, Nina tsingatju nga me Jesucristu. Nina ne, me vëhë xi ndaja me, me vëhë xi tyjahi me. Ngu ni me vëhë xi matitjun me. Matitjun me tsëhë ngayëjë ni xi matitjun. Matitjun me tsëhë ngayëjë ni xi vitexa. ¹⁶Ngu ni me vëhë xi tsajin nixtin cueya me. Tacun me xcun ngu ndavá seti ndajyihi, xi tsajin yo cuma cuechu. Hacuaha tsajin yo cavëë rë me, hacuaha hisca ngu cumaji scutsejen rë me. Me vëhë xi catjaharcun xuta me. Me vëhë xi catitexa me yëjë ni nixtin yëjë ni hora. Cuatjin jain.

¹⁷ Xuta xi jemu tjin rë me cjuanchina rë ngasunhdë vihi ne, titexe rë me xi hacuiin sahmi yehe me yojo rë me. Hacuiin cuetaha cacun me cjuanchina xi tjin rë me ta, vëhë ne, tsajin cjuaquixi xi cjuecani rë. Peru catetaha cacun me Nina ta, Nina ne, hacuiin choho me ta, me vëhë xi sua naja me yëjë ni xcusun xi ndajyihi tsajan. ¹⁸ Hacuaha tinoje cojo rë xuta nchina xi cuacun jan ne, yehe cjuandaja catisahmi me cojo ngayëjë ni xuta. Mijí rë xi choho me. ¹⁹ Xi cuatjin sahmi me ne, tivetjo me cjuandaja xi sehe cumachjirëhë rë me, hacuaha sacú rë me cjuahñu xi cjuaquixi.

Cjua xi vijnetaha

²⁰ Ngaye Timoteo ne, chjehecuende cjua xi ha ntse siu. Xi cavetinrcuiin cjuavisiajmi yumahasen xi chuyiin rë Nina tsëhë. Hacuaha xi cavetinrcuiin yëjë ni cjua rë xuta xi hisca ngajñi rë me matanguaain cjua rë me, handasa chja me xi jemu vechu cjuatacun rë me xi vjnercu me cjua. ²¹ Peru me xi cuatjin chja ne, ha cavetjuxin me tsëhë cjuachacun xi macjain naja.

Nina catisua nuju me ngayujun ni cjuandaja rë me.

Xujun xi majo xi catsihindu San Pablo cojo Timoteo

1 Ngahan Pablo ne, apóstol tséhë Cristu Jesús má ngahan ta, tséhë xi cuatjin meje rë Nina. Véhë xi catsingatju ná me, xi cuichjá cojo xuta ta sua naja me ngu cjuahñu ndajyihi, sa xi nihña tangun cjuatacun naja cojo Cristu Jesús. ²Ngaye Timoteo ne, tsihindu ri xujun vihi ta, tséhë xi sacuaha quihndi ndaja naha ngaye. Nina Nahmi naja cojo Cristu Jesús Nai naja ne, catamayuma rë me ngaye, catisua ri me cjuandaja, cjuajeya.

Tisua me cjuaquixi tséhë Nina

³Nixtin nixten, hora xi sahme oración naha ne, jercu veyanangë ri, hacuaha suá nacuechji rë Nina. Hacuaha sahme xa rë Nina cojo ngu cjuatacun tyjahi, sacuahatjin casahmi xutachanga naha. ⁴Vitsjen ná hacutjin cachjihnde, ngatsë rë xi cavétju cëjë tsiji. Hacuaha jemu meje ná xi ndove tjengui ná, sehe ngahan ne, jemu ndaja cuma ná. ⁵Hacuaha vitsjen ná hacutjin xi jemu ndaja macjain ri cjuarë Nina, sacuaha tjin xi titjun camacjain rë chicuhun riji, chicuhun Loida, cojo na Eunice naa riji. Hane fëmangúcacun xi cojo ngaye ne, ha cuatjin ndaja macjain ri.

⁶Véhë xi chjá cojo ri ta xi catiin cahndé xi cjuë cjuatacun xi casua ri Nina, hya xi cavétahantsa ri. ⁷Ta Nina ne, hacuiin casua naja me ngu cjuatacun xi ngayaan ne, cumacjintacun ta, casua naja me ngu cjuatacun xi sacú naja ngahñu, xi nihña hmu tacuun xingueen, hacuaha xi scaa naja cuetjoon yojo naja. ⁸Véhë xi hacuiin nihñi savá, hya xi cuinoje cjuandajyihi tséhë Nai naja. Hacuaha hacuiin nihñi savá ngatsë naha ngahan xi tejñaya ndavaya, ngatsë rë xi chjá cjuarë me. Hacuuiin nihñi savá ta, nihñi ngahñu cojo yëjë ni cjuañihi

xi cuátji cuma, ngatsë rë cjuandajyihi xi tinoje. Cuatjin nihñi hacutjin chutaha ngahñu xi tisua ri Nina. ⁹Nina ne, cavaxëtje naja me hacuaha cavaxijin naja me, xi cuma tséhë me ngayaan. Hacuuiin ngatsë rë xi jemu ndaja canihña xi cuatjin casahmi me ta ngatsë rë xi cuatjin meje rë me, tséhë xi jemu ndaja me. Hisca xi chaja sa cuejña ngasunhndë ne, ha catsingatahacacun Nina xi sua naja me cjuandaja rë me, ngayejen ni xi tséhë Cristu Jesús ngayaan. ¹⁰Hane hya xi cafehe Cristu Jesús, me xi vaxëtje naja ne, hya camachaya jain naja cjuandaja rë Nina jan. Hane Cristu jan ne, caticjë me ngahñu rë cjuaveya, hacuaha casuacuenda naja me ta sua naja Nina ngu cjuahñu ndajyihi, xi tsajin nu tsajin nixtin cueyan nga. Véhë cjuatacun xi vicuya naja cjuandajyihi rë me.

¹¹Nina ne, casua ná me xa xi suá cumachaya rë xuta hacuaha cuicuyá rë xuta cjuandajyihi rë me. ¹²Ngatsë rë xa véhë ne, jemu cjín cjuañihi tivátju jima. Peru ma savaain ná, tséhë xi ha hvë Cristu, hacuaha camangucácun cojo rë me. Hacuaha tjin ná cjuaquixi xi me véhë ne, jyë me cojo cjuatacun rë me xi cuetjo ná me, hisca nixtin xi cuinduva nga me nguehe ngasunhndë.

¹³Nihñi sacuaha tjin cjuaquixi xi ha cachjá cojo ri. Hacuaha nguñajatacun catamacjain ri Nina, hacuaha nihñi hmutacuin xinguin, tséhë xi ngaye ne, ladu rë Cristu ngaye. ¹⁴Nihñicuende cjuaquixi xi casua ri Nina. Hane Hasen rë Nina xi tacun cahntsua xahasen naja ngayejen ni xi macjain naja me ne, Hasen véhë xi sua ri ngahñu xi cuatjin nihñi.

¹⁵Ngaye ne ha hye xi ngayëjë ni xuta xi tséhë ladu xi hmí rë Asia ne, casmicacun ná me. Ngajñi rë xuta xi cuacun jan ne, hinchajñi cha Figelo cojo cha Hermógenes. ¹⁶Peru cha Onesíforo ne, catamayuma rë Nina yëjë ni ndava cha ta, tséhë xi jemu cjín ndiya xi casahmi

cha cjuandaja xi cavisecoo ná cha. Hane cama savaain rë cha xi tejñaya ndavaya. ¹⁷ Xi tu cafehe cha nguehe nandya Roma ne, cavetsihin cavanguise cha ngahan, hisca xi casacu rë cha ngahan. ¹⁸ Nai naja ne, catamayuma rë me cha, nixtin hya xi cuinduva nga me nguehe ngasunhndë. Ta ngaye ne, ha ndaja hye hacutjin xi jemu cavisecoo ná cha ngajan nandya Efeso.

Xuta xi ndaja sahmi me xa rë Cristu

2 Peru ngaye tsan ne, catisua ri Cristu Jesús cjuandaja rë me, xi cuma cuinechin nguñajatacuin. ² Jemu cjín xuta xi hacuaha caviseñuju me yëjë ni cjua xi cachjá cojo ri. Peru quihndë ne, meje rë xi ticoye rë ngujo cha cjua jan, cha xi tsejen xi mangutacuin cojo rë hacuaha chutaha cjuatacun rë, sehe cha xi cuacun jan ne, hacuaha cuicuya cha xuta xi yahnga.

³ Ngaye ne, nihñi ngahñu xi scaa ri cojo yëjë ni cjuanñihi xi cuátji cuma ngatsë rë Cristu Jesús, sacuaha tjin caa rë ngu sindadu xcun ngu si. ⁴ Hane sindadu xi hinchajñi cha tsëhë xa xi yaha cha ne, cumaji tsinguisehenjñi cha tu mé ni xa ta, tjin rë cha xi sahmi cha hacutjin xi chuya rë me xi matitjun tsëhë cha. ⁵ Hacuaha ngu cha xi cuisehen xcun ngu juegu xi ntsavë cha ne, sa xi chohotjin ntsavë cha ne, sacuiin rë cha cjuatjo, handasa tjun cha cuetju cha. ⁶ Hacuaha cha xi sahmi xa nguñña ne, meje rë xi cha vëhë xi titjun satë rë cha tsëhë xitjë xi casahmi cha. ⁷ Ndaja ningatehetacuín hacutjin cjua xi tichjá cojo ri. Sehe Nai naja ne, me vëhë sahmi me xi cuijnercui cjua vë.

⁸ Ninguitsjin xi Jesucristu ne, cavascaya rë me ngajñi rë nima, hacuaha canduva tjë rë me xutachanga naja David. Vëhë cjuandajyihi xi ngahan visiajme cojo xuta. ⁹ Hane ngatsë rë xi cuatjin visiajme cjuandajyihi jan ne, vëhë xi

choho tivátju jima. Hisca quitahahñu rë xuta ngahan nguehe ndavaya, sacuaha tjin rë ngu xuta tsehen xi yehe jyë rë. Peru cjua rë Nina ne, hacuiin quitahahñu. ¹⁰ Vëhë xi ticaa ná ngayëjë ni cjuanñihi xi tivátju jima, cojo sa xi yëjë ni xuta xi cavaxijin Nina ne, cuetjutje me ngatsë rë xi macjain rë me Cristu Jesús, hacuaha cuechu me xcun Nina ngajan cuiyuju me nu cjui nu nduva.

¹¹ Cjua vihi ne jemu cjuaquixi:

Sa xi ha macjain naja Cristu hya xi cueyan ne, hacuaha cuinechan quicun nga cojo rë me;

¹² sa xi ha caca naja ne, hacuaha cuisecoon rë me cuitecan.

Sa xi ha canújan xi hyaan yo me ne, hacuaha ni tjin cuichja me ta hvín me yo ngayaan.

¹³ Handasa ngayaan ne, nihñacheen cjua naja, peru me vëhë ne, hatuxa sahmi chihin me cjua rë me ta, tsëhë xi hatuxa vindachaa in me.

Hacutjin xi Nina chuya rë me

¹⁴ Ninguitsjin rë xuta jan cjua xi chjá cojo ri. Hacuaha tinojetehe rë me xi ha quihndë scaain me cojo cjuavisiajmi rë me ta, tsëhë xi cuatjin meje rë Nina. Venguin camahani chjí rë xi cuatjin ticjan me cojo cjua ta, xi cuatjin sahmi me ne, tu titsinguetsun me cjuatacun rë xuta xi viseñuju. ¹⁵ Nihñi ngu-jyë xi Nina ne, chuya rë me tsëhë xa xi tinihñi. Xi cuatjin ne, tsajin mé nihñi sava ta, tsëhë xi ha chihin tivicoye rë xuta cjua xi cjuaquixi. ¹⁶ Xi caninguisinjñi ngajñi rë cjuavisiajmi ngarca xi tsajin mé machjirëhë xi visiajmi xuta ta, me xi cuatjin visiajmi ne, quihndë nga nchujun ne, tijima yehe sa cjuatsehen xi tjin rë me. ¹⁷ Hacuaha cjuavisiajmi rë me xi cuacun jan ne, tangun cojo hiscan xi hmu, xi quihndë nga nchujun ne, tijima tojo sa. Cuatjin tivatju cha Hime-neo cojo cha Fileto ta, ¹⁸ tsëhë xi ha

cavetjuxin cha tsêhê ndiya rê cjuaquixi. Chja cha ta quixiin xi cuascaya naja hya xi ha caveyan. Hane cojo cjuva vêhê ne, titsinguetsun cha cjuatacun rê ngujo xuta xi macjain rê me Nina. ¹⁹ Peru Nina ne, cavejña me ngu cjuatacun xi hatuxa cjuaquixi, xi tsajin yo cuma tsinguetsun rê. Hacuaha jo cjuva rê Nina xi hatuxa cjuaquixi. Ngu ne, chja cuitjin: “Nai naja ne, vêhê me jarê xuta xi tsêhê me”; ngu nga ne, chja cuitjin: “Yêjê ni xuta xi chja me xi ladu rê Nai naja me ne, meje rê xi catiyujuxin me tsêhê cjuatsehen.”

²⁰ Ndava ngu xuta xi ndaja vatju me ne, jemu cjín xcusun trasti xi tjin. Tjin trasti xi tsêhê oro cojo xi tsêhê quicha. Hacuaha tjin xi tsêhê ya cojo xi tsêhê nihndê. Ngujo trasti jan ne, jemu machjirêhê. Hane ngujo nga ne, chuva machjirêhê. ²¹ Cuatjin naja ngayaan xuta ladu rê Cristu ta, jemu tecjanjñi ngayaan. Peru xi cuma yaan xuta xi vengui chjî rê ne, meje rê xi cuiyujuxen yêjê ni cjuatsehen. Xi cuatjin ne, cuma tyjahi cjuatacun naja, cumachjirêhê rê Nai naja ngayaan, hacuaha tjin ndaja ngayaan xi nihña yêjê ni cjuandaja.

²² Yêjê ni cjuatacun tsehen xi meje rê xuta xi chihndê me ne, ngaye ne, tiyijixin. Tihin tjengui ndiya rê cjuaquixi. Catjê catamacjain ri. Tihin tjengui cjuahmutacun. Tihin tjengui cjuajeya, sacuaha tjin sahmi yêjê ni xuta xi cojo ngu cjuatacun tyjahi fehya rê me Nai naja xi cuisecoo rê me. ²³ Hya xi tivenenguise xicjin xuta tsêhê cjuva ngarca xi venguiin chjî rê ne, xi canihñicuendiin cjuva xi chja me. Tsêhê xi ha hye ta tsêhê cjuva vêhê ne, hatuxa cuetjucaa ngu si. ²⁴ Hane xuta xi sahmi xa rê Nai naja ne, mijî rê xi sircu me ta meje rê xi ndaja me cojo ngayêjê ni xuta. Meje rê xi quicun cacun me xi cuicuya me xuta. Meje rê xi yehe cacun me. ²⁵ Hacuaha xuta xi chuyiin rê me tsêhê cjuaquixi ne, meje

rê xi cuma quixi me, peru cojo cjuandaja cojo cjuajeya. Xi cuatjin ne, cuma xi sua Nina cahndê xi cuindeya cjuatacun rê xuta xi cuacun jan, hacuaha xi cuijnercu jain me cjuva xi cjuaquixi. ²⁶ Sehe hacuaha sacú nga rê me cjuatacun ndajyihi, hacuaha cuetjutje me tsêhê xitsehen matitjun xi cavindacha rê me. Cavindacha xitsehen xuta jan, xi casahmi me yêjê ni hacutjin xi meje rê xitsehen jan.

Nixtin xi cuijnetaha

3 Catijnercui cjuva vihi: hya xi cuma tiña nixtin xi cjuê ngasunhndê ne, jemu choho cuatju xuta cuma ta, ² tsêhê xi xuta ne, cuitjin sahmi me: meje rê me xi suvá ni me ndajyihi cuatju me cuma; jercu sahmi me cojo tujún; jemu haxi me ta jercu cuichja me xi ndaja vatju me. Hacuaha jercu sahmi hngacacun me; choho cuichja me tsêhê xicjin me hacuaha choho cuichja me tsêhê Nina. Cuihndiin me tsêhê xutacha rê me. Hisca ngu nacuechji naja suaain me, hisca ngu nacuechji rê Nina suaain me. Cuendaain rê me tsêhê Nina; ³ tsajin rê me cjuahmutacun; tsajin rê me cjuayumatacun; cuichja me cjuandesu. Hacuian cuetjo me yojo rê me; jemu sahmi xcuahya me; chuyiin rê me tsêhê yêjê ni cjuandaja. ⁴ Jo xcun jo hntsua me ta, cuitêña xicjin me; jemu tujyê sahmi me; jemu sahmi yehe me yojo rê me. Chuyiin rê me tsêhê Nina ta cjuasua xi tsêhê ngasunhndê ne, vêhê jemu chuya rê me tsêhê. ⁵ Hacuaha sahmi me xcusun rê xuta xi macjain jain rê Nina, peru tsitjungui me hacutjin xi cjuaquixi.

Xi caninguisinjñii cojo xuta xi cuacun vê ta, ⁶ tsêhê xi ngajñi rê me ne, hinchajñi cha xi vanguise chuva rê xi cuma cuisehen ndava xuta, hane cuindacha cha yachjin xi ha tsingatihin mandacha. Tsingatihin na mandacha na ta, tsêhê xi jemu va tjin cacun na tsêhê jyê rê na, xi tisahmi na yêjê ni hacutjin xi xa-

hasen rë na meje rë. ⁷Hacuaha yachjin jan ne, jemu vutaya na yëjë ni cjuatacun xatsë, peru hatuxa vijniircu na cjua xi cjuaquixi. ⁸Ha hye ta hatsëë nixtin ne, jo cha surqui xi hmí Janes cojo Jambres ne, casahmi cha condra xutachanga naja Moisés. Hacuaha ni tjin rë cha ndacha xi cuacun jan ne, sahmi cha condra cjua xi cjuaquixi ta, cavetsun cjuatacun rë cha, hacuaha machjiriin cha xi cumacjain rë cha Nina. ⁹Hane hacuiin jemu xcun cuma cjue cha cojo cjua ndacha rë cha ta, tsëhë xi ngayëjë ni xuta ne, cjuahacuenda me xcusun yumahasen xi cun cha, sacuatjin cama tsejen xcusun yumahasen xi cun cha surqui xi cuacun jan hatsëë nixtin.

Pablo ne, tsinguixi me Timoteo

¹⁰Peru ngaye ne, jemu ndaja tichutaye cjua xi vicuyá cojo xcusun xi sahme cojo cjuatacun xi tjëngë. Hacuaha jemu ndaja hye hacutjin xi fë macjain ná, hacutjin xi jyë cákun, hacutjin xi hmu cákun, cojo hacutjin xi ndaja ticaa ná. ¹¹Hacuaha ndaja camachaya ri tsëhë yëjë ni cjuañihi xi cavátju camá. Jercu choho cavátju camá ngajan nandya Antioquía cojo Iconio cojo Listra. Peru Nai naja ne, cavaxëtje ná me tsëhë yëjë ni cjuañihi xi cavátju camá jan. ¹²Hacuaha yëjë ni xuta xi meje cjuaharcun me Nina ta tsëhë xi macjain rë me Cristu Jesús ne, hatuxa tjin xi cuatju me cjuañihi. ¹³Peru xuta tsehen cojo xuta ndacha ne, quihndë nga nchujun ne, tichaja sa cjuatacun rë me, xi vindacha me yahnga xuta ne, hacuaha jima ndacha suvá me.

¹⁴Ngaye ne, hacuiin cuejñixin cjua xi cachutaye, cjua xi cafë ma ngu tacuin cojo. Ha hye yo xi cavicuya ri ta, ¹⁵tsëhë xi hisca cjuaquihndi riji ne, cachutaye xujun rë Nina. Hane xujun jan ne, vëhë sua machaya ri xi Nina ne, cuaxëtje naja me, ngayaan xi macjain naja Cristu Jesús. ¹⁶Nina ne, casua me cjuatacun rë

me ngujo xuta, sehe xuta jan ne, cat-sihindu me xujun rë Nina. Vëhë xi xujun jan ne, jemu machjirëhë xi cuicuya naja, xi cuichjataha naja, xi tsinguixi naja, xi cuincha naja ndiya rë cjuaquixi, ¹⁷cojo sa xi ngayaan xuta ladu rë Nina ne, cuechutaha cjuatacun naja xi cuma nihña yëjë ni cjuandaja.

4 Tivutsejen naja Nina. Hacuaha tivutsejen naja Cristu Jesús, me xi tsichuva naja ngayëjë ni ngayaan xuta, sa xi quicun cuaha ngayaan, o sa xi caveyan. Tsëhë xi cuinduva nga me, hacuaha tsëhë xi cuitexa naja me ne, vëhë xi chjá cojo ri ta ²tinoje cjua rë Nina cojo xuta. ¿Há chuya rë me? ¿há chuyiin rë me? peru tsimii sahmi rë, tinoje cojo rë me. Hacuaha tinojetehe rë me. Ninguixi me. Ticoye rë me. Peru nijyëtacuin cojo rë me. ³Cuatjin nihñi ta, tsëhë xi cuetjucaa nixtin xi xuta ne, ha quihndë chuyiin rë me tsëhë cjua xi cjuaquixi. Sahmi me hacutjin xi meje rë me, hane cuihndë me tu mé ni cjua xi cuicuya maestru xi yahnga ta, maestru xi cuacun jan ne, suvá cjua xi chuya rë xuta ne, vëhë cuicuya me. ⁴Cuatjin xi xuta ne, sahmi ngaxtun me cjua xi cjuaquixi ne, tu cuentu xi machjiriin ne, vëhë cuetaharcu me. ⁵Peru ngaye ne, meje rë xi tacun cahndë cjuatacun riji ngajñi rë tu mé ni ngu cjuacjintacun. Hacuaha tehe tacuin tsëhë yëjë ni cjuañihi. Tinoje cojo xuta cjua rë Nina, nihñichihin xá xi casua ri me.

⁶Ngahan ne, chuva sa nixtin xi cjuë ngahan. Ha cama tiña nixtin xi cueya. ⁷Ndaja casahme xa, casahmechehen xa xi casua ná Nina. Hacuaha ndaja macjain cuaha ná Nina. ⁸Vëhë xi ha tjin ndaja cjuatjo xi sacú ná, tsëhë xi tyjahi cjuatacun naha. Nai naja, me xi tsichuva naja cojo cjuaquixi ne, me vëhë xi sua ná me cjuatjo jan hya xi cuechutaha nixtin. Hacuaha hacuiin tu suva ni ngahan

xi sua ná me ta cojo ngayëjë ni xuta xi jemu meje rë me xi cuya nga Nai naja.

Pablo ne, fehya me ngu cjuandaja

⁹Nihñi xati tacuin ndove tjengui ná ta, ¹⁰tsëhë xi cha Demas ne, cavetjuxin cha tsahan, quiji cha ngajan nandya Tesalónica. Cuatjin casahmi cha ta, tsëhë xi hitsë sa chuya rë cha tsëhë xcusun rë ngasunhndë. Cha Crescente ne, quiji cha ladu tsëhë Galacia. Hane cha Tito ne, quiji cha ladu tsëhë Dalmacia. ¹¹Hane suvá ni cha Lucas quitaha cha cojo ná. Noje cojo cha Marcos ne, sehe ndove cojo cha ta, tsëhë xi jemu machjirëhë cha xi cuisecoo ná cha tsëhë xa xi sahme.

¹²Cha Tíquico ne, catsingátju cha ngajan nandya Efeso. ¹³Hya xi cuindove ne, ndovecueje tsjian tsangá naha xi cavejñá ndava cha Carpo, ngajan nandya Troas. Hacuaha cojo xujun naha, hacuaha cojo yëjë ni sa xujun naha ne, ndovecueje.

¹⁴Cha Alejandro chjine quicha ne, jemu choho casahmi cha cojo ná. Peru Nai naja ne, sehe sahmingojo me cojo rë cha, chuva rë jyë xi tjin rë cha. ¹⁵Hane ngaye ne, tjin ri cuidadu tsëhë cha ta, tsëhë xi jemu casahmi cha condra cjua rë Nina xi canújin.

¹⁶Hya xi tjun tjun casuá cjuaquixi naha xcun xutaxa rë ne, tsajin yo

cavisecoo ná. Yëjë ni amigu naha ne, cavetjuxin me tsahan. Hane catitsijyëcun Nina cojo me xi cuacun cavetjuxin tsahan jan. ¹⁷Peru Nina ne, cavisecoo ná me, casua ná me ngahñu, xi cama cachjá cjua rë me cojo yëjë ni xuta xi hacuiin tsëhë nación tsëhë Israel. Hacuaha Nina ne, cavaxëtje ná me tsëhë xuta xi meje tsiquehen ná. ¹⁸Hacuaha cuaxëtje ná Nai naja tsëhë ngayëjë ni cjuatsehen, sehe cjuahatsja ná me ngajan ngahnga hiscan xi vitexa me. Me vëhë xi hatuxa jyë me, hatuxa hñu me yëjë ni nixtin. Cuatjin jain.

Tsinguijnetaha me cjua

¹⁹Cha Aquila cojo chjuun rë cha, na Prisca ne, tehe rë me ngu nina naha. Hacuaha cojo xuta rë cha Onesíforo ne, tehe rë me ngu nina naha. ²⁰Cha Erasto ne, casetaha cha nandya Corinto. Hane cha Trófimo ne, tsëhë xi hmu rë cha ne, cafaña cha ngajan nandya Mileto. ²¹Nihñi xati tacuin, ndove tjengui ná quihndë xi chaja sa chan hnchan. Cha Eubulo ne, cha Pudente ne, cha Lino ne, na Claudia ne, cojo ngayëjë ni xuta xi macjain rë cjua rë Cristu Jesús ne, tsingatju me nina riji.

²²Nai naja yaha ri me. Nina catisua nuju me cjuandaja rë me ngayujun ni.

Carta xi catsingatju San Pablo xi cafahtsja Tito

1 Ngahan Pablo, sacua ha ngu mosu hndixahan tsëhë Nina ngahan, hacua ha apóstol tsëhë Jesucristu ngahan.

Jesucristu casuaxa me ngahan xi cuisécoo rë xuta xi cavaxijinjñi Nina, cojo sa xi cumacjain rë me tsëhë Jesucristu, hacua ha cojo tsëhë xi cumachaya rë me cjuaquixi rë Nina hane ndaja tsejen xi má me tsëhë Nina. ²Jercu vetahan tacun xi sacú naja cjuahñu xatsë, tsëhë xi cuatjin cachja Nina hisca hya xi chaja sa cuma ngasunhndë. Hacua ha Nina ne, vindachaa in me cojo cjuarë me. ³Quihndë ne, jercu nixtin rë xi casua me camachaya naja tsëhë cjuarë me. Ngahan ne, casatëxa ná xi suá cumachaya rë xuta tsëhë cjuarë vëhë, tsëhë xi Nina xi vaxëtje naja ne, cuatjin cavitëxa me.

⁴Tito, tsihindu ri carta vihi, ngaye xi sacua ha quihndi naha ngaye, tsëhë xi tangun mangutacun cojo Jesucristu. Nina Nahmi naja cojo Jesucristu xi vaxëtje naja ne, catisua ri me cjuandaja cjuajeya.

Xa xi sahmi Tito ngajan distritu Creta

⁵Cavejñá ri hiscan distritu Creta, cojo sa xi ngaye nihñichihin yëjë xi caviyuju vasen, hacua ha cojo sa xi tehe xa ngu jo xuta xi cumatitjun me tsëhë yungun tsëhë jima ngu nandya sacuahatjin cavitéxa ri. ⁶Xuta xi cuatjin tehe xa rë me ne, meje rë xi jercu tyjahi xahasen rë me, hacua ha ngu ni chjuun rë xingu xingu me. Hacua ha meje rë xi quihndi rë me ne, ladu rë Jesucristu me, hacua ha xi tsajin cjuarë me xi choho sahmi me o sa xi vihndiin me. ⁷Cuatjin meje rë, tsëhë xi xuta xi matitjun me sacua ha obispo ngajñi rë xuta rë yungun ne, me vëhë fahacuenda me tsëhë ngu tsé ngu xti tsëhë

Nina. Vëhë xi meje rë xi jercu tyjahi xahasen rë me. Mijí rë xi xta me, mijí rë xi ngutjen ma xti rë me, mijí rë xi cha chihi me, mijí rë xi hngacacun me, mijí rë xi jercu vetahacacun me tujún xi sacurë me ngajñi rë ngu cjuandacha cojo xicjin me. ⁸Xi meje rë ne, xuta xi cumatitjun me jan ne, tjin rë me cjuandaja cojo xuta hincha ndiya, hatuxa sahmi me cjuandaja, yehe cacun me, tsajin jyé rë me, hacua ha jiya me ndiya rë Nina, hacua ha jercu yehe xahasen rë me. ⁹Hacuaha meje rë xi cuetaha me yojo rë me tsëhë cjuarë xi cjuaquixi xi ha camá rë me, cojo sa xi cuma cueya me xahasen rë xingu xingu sa xuta cjuachacun xi cjuaquixi, hacua ha cojo sa xi cuma sahmi me xi cuijnecacun xuta xi chjataha me tsëhë cjuachacun vëhë.

¹⁰Meje rë xi xuta xi cuacun vë ne, tsëhë xi jercu tjin xuta xi vihndiin me tsëhë xutaxa rë yungun ne, jercu tjin xuta xi tujyë visiajmi me, jercu tjin xuta xi vindacha. Hatuxa ngajñi rë xuta tjë rë Israel xi cavisehen ladu tsëhë Jesucristu ne, jercu tjin xuta xi cuacun vë. ¹¹Sahmi ngu jyë xi nihña xi hindë cuichjaain me, tsëhë xi tsinguetsun me cjuatacun rë xuta tsëhë yëjë ngu ndihya. Cuatjin sahmi me hya xi vicuya me ngu cjuarë xi hisca mijí rë xi cuatjin cuicuya me. Hane cuatjin sahmi me, cojo sa xi sacurë me tujún ngajñi rë ngu cjuandacha.

¹²Ngu profeta tsëhë distritu Creta ne, ha suvá me vëhë xi cachja me tsëhë xuta rë nangui rë me cuitjin: Yëjë ni xuta Creta ne, hatuxa ndacha me, jercu chu me, jercu vatjutaha jinë me, hacua ha jercu tsëhé me. Cuatjin cachja me. ¹³Hane jercu quixi xi cachja me. Vëhë xi hñu nojetehe rë me, cojo sa xi ndaja cumacjain rë me cjuachacun, ¹⁴hacuaha cojo sa xi cuetaharcuaain me tsëhë cuentu tsëhë xuta tjë rë Israel o sa xi cjuarë xi vitëxa xuta xi tsindeya me cojo cjuandacha cjuarë xi cjuaquixi.

¹⁵ Me xi tyjahi cjuatacun rë ne, tsajin mé xi tsavi xi cuma rë me. Peru me xi macjaain rë cjuachacun ne, tsajin mé xi tsaviin xi cuma rë me ta hisca cjuatacun cojo xahasen rë me ne, ha camachocun. ¹⁶ Chja me xi vëë me Nina, peru yëjë ni xi sahmi me ne, tsingacun me xi quixiin. Xuta xi cuatjin cun ne, sahmi xi choho vëë Nina me. Hatuxa vihndiin me, hane machjiriin me xi sahmi me cjuandaja.

Cjuachacun xi cjuaquixi

2 Cjua xi noje ne, meje rë xi matan-gun cojo cjuachacun xi cjuaquixi. ² Tinoje cojo yëjë ni xihin changá, hacuiin tsingatjutaha me xi cuihi me o sa xi sinë me, hacuaha meje rë xi cuma chjahárcun rë me, meje rë xi yehe cacun me. Meje rë xi ndaja cumangucacun me cojo Nina, hacuaha ndaja tjin rë me cjuahmutacun, hacuaha ndaja scaa rë me tu mé ni cjuacjintacun. ³ Hacuaniitjin ni tinoje cojo yëjë ni yachjin changá ne, meje rë xi jeya me, hacuaha mijí rë xi ndesu me, hacuaha mijí rë xi cuetaha me yojo rë me vinu. Meje rë xi cuicuya me yëjë ni xi ndaja. ⁴ Meje rë xi cuicuya me yëjë yachjin xi hitsë ni chuva nu rë ta meje rë xi tsihmucacun me xihin rë me cojo quihndi rë me, ⁵ hacuaha xi yehe cacun me, tyjahi xahasen rë me, hacuaha xi ndaja cjuahacuenda me cahntsua ndava me, hacuaha xi ndaja me, hacuaha xi cuihndë me tsëhë xihin rë me. Cuatjin meje rë xi cuicuya na me, cojo sa xi tsajin yo choho cuichja tsëhë cjua rë Nina.

⁶ Hacuaha ni tjin ni tinoje cojo yëjë ni xuta xi xihin xi hitsë ni chúva nu rë ta hacuaha meje rë xi yehe cacun me. ⁷ Hacuaha ngaye sove tejñi ntsacu tsëhë cjuandaja. Hane hya xi cuicoye ne, meje rë xi jercu tyjahi cjuatacun riji, hacuiin xcuehyu cuinoje ta ⁸ súváj cjua xi ndaja, xi tsajin yo cuma cuichjataha tsëhë. Cuatjin meje rë, cojo sa xi xuta condra riji

ne, cuma sava rë me, tsëhë xi tsajin mé xi choho cuichja me tsajan.

⁹ Tinoje cojo mosu hndixahan ne, meje rë xi cuihndë me tsëhë yëjë cjua xi cuichja nai rë me. Meje rë xi ndaja me, hacuiin choho cjuayangui me tsëhë nai rë me. ¹⁰ Mijí rë xi tsichëjë me ta meje rë xi tsingacun me xi cuma cumangutacun cojo rë me. Cuatjin meje rë xi sahmi me, cojo sa xi yëjë xuta ne, cumachaya rë me xi jercu ndajyihi cjuachacun rë Nina, me xi vaxëtje naja.

¹¹ Nina ne, catsingacun me cjuandaja rë me, hane cjuandaja vë ne, hacui xi cuaxëtje naja ngayejen ni xuta. ¹² Hacuaha cjuandaja vëhë ne, vicuya naja xi meje rë xi cuejñaxen yëjë ni cjuatsehen cojo yëjë ni xcusun tsëhë ngasunhndë xi meje naja, hacuaha vicuya naja xi meje rë xi tyjahi cjuatacun naja, meje rë xi tsajin jyé naja, meje rë xi nechanyan ndiya rë Nina xi tivanguen cojo ngasunhndë naja. ¹³ Meje rë xi cuatjin nihña nguyëjë rë xi nechanyan rë nixtin ndajyihi xi jercu vetahantacun, nixtin xi cuetjuaatsejen cjuahasen ndajyihi rë Nina naja Jesucristu, me xi cuaxëtje naja, me xi jercu jyé hnga me cojo hasen rë me. ¹⁴ Me vëhë ne, casua me yojo rë me xi cueya me ngatsë naja, cojo sa xi cuaxëtje naja me tsëhë yëjë ni cjuatsehen, hacuaha tsityjahi me ngayaan ne, sehe sahmi tsëhë me ngayaan, hane ngayaan ne, jercu meje nihña cjuandaja.

¹⁵ Tinoje yëjë cjua vëhë. Tinche ndiya xuta hacuaha tinojetehe rë me nguñajatacuín. Catiin cahndé xi yo sahmi chúva ri cojo cjuatacun riji.

Yëjë ni xcusun xi meje rë xi sahmi xuta ladu rë Jesucristu

3 Ninguitsjin rë yëjë xuta ladu rë Jesucristu xi meje rë xi cuihndë me tsëhë xutaxa rë xi vitexa, hacuaha meje rë xi yëjë ni nixtin ne, tjin ngu cacun

me xi sahmi me cjuandaja. ²Tinoje cojo rë me ta mijí rë xi choho cuichja me tsêhë hisca ngu xuta. Meje rë xi hacuiin hngacacun me ta xi meje rë ne, jeya me, hacuaha ndaja me cojo xcusun rë me cojo yêjê ni xuta. ³Cuatjin noje cojo rë me, tsêhë xi ngayaan ne, hacuaha jemu chúva ningatahantacun hatsêë, hacuaha cavinuhyaan tsêhë Nina, hacuaha cavinechanyaan ngu ndiya xi hacuiin hacui. Caninguisehen rcun cojo yêjê ni xcusun cjuasua. Cavinechanyan ngu ndiya rë cjuatsehen, ngu ndiya rë cjuaxin. Xuta ne, choho cavêë me ngayaan, hacuaha choho cahyan xingueen xingu xingu ngayaan. ⁴Peru Nina, me xi vaxêtje naja ne, hya xi catsingacun me cjuandaja rë me cojo cjuahmutacun xi tjin rë me xi cuma rë yêjê ni xuta ngasunhndê ne, ⁵cavaxêtje me ngayaan. Hacuiin tsêhë xi jercu ndaja canihña ta tsêhë xi yuma camá rë me ngayaan xi cavaxêtje me ngayaan. Cuatjin cavaxêtje me ngayaan hya xi casahmi me xi cavuya catsin ngayaan hya xi catsityjahi me ngayaan. Hacuaha cuatjin cavaxêtje me ngayaan hya xi casua naja me cjuahñu xatsê hya xi casua me ngayaan Hasen rë me. ⁶Hane ngatsê rë cjuandaja xi casahmi Jesucristu, me xi vaxêtje naja ne, vêhë xi cuatjin jemu casua Nina ngayaan Hasen rë me, ⁷cojo sa xi cjuê jyê naja ngatsê rë cjuandaja rë Jesucristu, hacuaha chjahanntsán cjuahñu xatsê xi jercu vetahan tacun.

⁸Yêjê ni cjuaxi cachjá cojo ri vêhë ne, jemu cjuaquixi. Hacuaha meje ná xi cuinoje yasen yasen ni yêjê cjuaxi vêhë cojo xuta xi camangucacun me cojo Nina, cojo sa xi me xi cuacun jan ne, sahmi me ngahñu xi sahmi me suvá cjuandaja. Yêjê ni cjuaxi vêhë ne, jercu ndaja hacuaha jercu machjirêhë rë

xuta. ⁹Xín tejñi yêjê ni cjuavisiajmi xi hacuiin machjirêhë; xín tejñi cjuavisiajmi tsêhë ñihí rë yêjê xutachanga rë xingu xingu me; xín tejñi yêjê ni cjuavisiajmi tsêhë xuta xi cjan cojo xicjin; xín tejñi yêjê ni cjuavixcan tsêhë ley rë Moisés. Yêjê ni cjuavisiajmi vêhë ne, machjiriin hacuaha tu mahya cuisiajme. ¹⁰Ngu xuta xi vaxê me ngu ngu xuta tsêhë ngajñi rë xuta yungun xi cjue ladu rë me ne, tinojetehe rë me ngu ndiya o hisca jo ndiya. Xi cjuê vêhë ne, hindê xicachasiin tsêhë me, ¹¹tsêhë xi ngaye ne, ha hye xi ngu xuta xi cuatjin sahmi ne, jiya me ngu ndiya xi xín cjuí, hacuaha sahmi me cjuatsehen. Hane cjuatsehen rë me jan ne, vêhë tsingacun xi cuaaintjin xi sahmi me.

Cjuacjintacun tsêhë suvá Pablo cojo Tito

¹²Hya xi tsingátju Artemas o sa Tíquico xi cjuetjengui ri ne, nihñi ngujoyê xi cuindove tjengui ná ngajan Nicópolis, tsêhë xi tuxa ngajan cavejñángucá-cun xi tsingátju chan hñchan. ¹³Tisecuee rë Zenas, me xi abogado me, cojo Apolos ne, catjindujú me cojo ndiya rë me, hane chjehecuende xi tsajin mé tsichaja rë me ndiya. ¹⁴Hacuaha meje rë xi xuta naja ne, cuma rë me hacutjin sahmi me cjuandaja, cojo sa xi cuisecoo me ngajñi rë ngu cjuachaja xi jercu sahmi ngujoyê. Meje rë xi cuengui chjí rë me cojo ngasunhndê rë me.

Pablo ne, tisua me ngu nina

¹⁵Yêjê ni me xi siutahá cojo ná ne, tsingátju me ngu nina riji. Hacuaha tehe rë xuta xi hmucacun me ngayaan ngatsê rë xi tjin tangun cjuatacun naja cojo Jesucristu ngu nina.

Nina ne, catisua nuju me cjuandaja ngayujun ni. Cuatjin jain.

Carta xi Catsingatju San Pablo tsëhë Filemón

1 Ngahan Pablo, xi tejñaya ndavaya ngatsë rë xi sahme xa rë Jesucristu ne, tsihindu cojo Timoteo xingueen xujun vihi xi ningatjin nuju ngayun Filemón, ngayun xi jemu hmutacuín nuju, ngayun xi visecun niji xcun xa xi nechantahan. ²Hacuaha ningatjin nuju xujun vihi ngayun Apia, ngayun xi hacuaha xinguín nuju, cojo ngayun Arquipo, ngayun xi tangun canihña cojo nuju ngahñu ngatsë rë cjua rë Nina, cojo ngayujun sa xuta ladu rë Nina xi ma tangun ngayun ngajan ndava me vëhë. ³Nina Nahmi naja cojo Nai naja Jesucristu ne, catisua nuju me cjuandaja cjuajeya.

Vaxëndaja Pablo Filemón

⁴Ngayun Filemón, hya xi veyanangë nuju ngajñi rë oración naha xi tisahme ne, nchunchujun ni ne, suá nacuechji rë Nina naha ta, ⁵tsëhë xi tivechutaha ná cjua xi jemu tjin nuju cjuahmutacun cojo yëjë xuta ladu rë Nina hacuaha jemu tjin ngu tacún cojo Nai naja Jesús. ⁶Hacuaha féhya rë Nina xi ngayun xi mangutacun cojo Nai naja sacuatjin niji ngayin ne, catuxaha sa me cjuatacun nuju xi cuijnercun yëjë ni cjuandaja xi tjin naja ngatsë rë xi tjin tangun cjuatacun naja cojo Jesucristu. ⁷Jemu ndama ná, tai, hacuaha jemu sacu ná cjuetacun ngatsë rë cjuahmutacun xi tjin nuju ta, tsëhë xi ngatsë nuju ne, casacu rë xahasen rë xuta ladu rë Nina cjuetacun.

Pablo fehya rë Filemón cjuandaja xi cuma rë Onésimo

⁸Vëhë xi handasa tsacjun xi cuitéxa nuju mé xi ndatjin nihñu tsëhë xi tjin tangun cjuatacun naha cojo Jesucristu ne, ⁹peru hitsë sa chuya ná xi cjuéhya

nuju tsëhë xi ngajñi naja ne, jiya vasen xi hmí cjuahmutacun. Ngahan, Pablo ne, jemu changá ngahan hacuaha tejñaya ndavaya quihndë ngatsë rë xi sahme xa rë Jesucristu ne, ¹⁰tiféhya nuju ngu cjuandaja xi cuma rë cha Onésimo, cha xi sacuaha quihndi naha tsëhë xi camá cafaha cha cjuandajyihi xi chja tsëhë Jesucristu xi casuá rë cha nguehe ndavaya.

¹¹Handasa camachjiriin nuju cha mosu hndixahan nuju cha Onésimo hatsëë nixtin jan ne, peru quihndë ne, hisca ngayun hisca ngahan ne, jemu machjirëhë naja cha. ¹²Quihndë ne, titsingátju nga nuju cha, hane meje ná xi chjuhunnstun cha sacuaha xi ngahan suva xi chjuhunnstun ná. ¹³Hacuaha meje ná xi cuejña cha cojo ná, cojo sa xi cjuahacuenda ná cha ngojo nuju jinguyëjë rë xi tejñaya ndavaya ngatsë rë cjuandajyihi xi chja tsëhë Jesucristu.

¹⁴Peru mijí sahme tu mé ni hya xi chaja sa cuinújun mé xi ndatjin xi sahme. Cuatjin ta, tsëhë xi meje ná xi cjuandaja xi nihñu ne, hacuiin cojo cjuachan ta suvá cojo cjuasua nuju. ¹⁵Cavetjuxin rë xuma quihndi tsujun ngujo nixtin cojo sa xi quihndë xi cuya cha ne, cuejñacahndë nga cha cojo nuju yëjë ni nu yëjë ni nixtin. ¹⁶Peru ha quihndë hacuiin sacuaha ngu mosu hndixahan nuju cha xi cuejña cha cojo nuju ta sacuaha ngu xuta xi jemu vengui sa chjí rë me, sacuaha ngu xingun xi jercu hmutacún. Ngahan ne, jercu hmú cacún cha, hacuaha ngayun ne, hitsë sa ndaja hmutacún cha, hacuiin suvá sacuaha ngu xuta ni ta sacuaha ngu xuta ladu rë Nai naja.

¹⁷Quihndë ne, ngayun Filemón ne, ngatsë rë xi ha hyun ta ngayaan ne, tangun ni mangutacun cojo Jesucristu ne, vëhë xi quihndë ne, chjuhunnstun cha sacuaha xi chjuhunnstun ná ngahan. ¹⁸Hane sa xi mé choho casahmi cha cojo nuju, o sa xi quitjen cha tsu-

jun ne, vëhë ne, tejñu ladu naha. ¹⁹Ngahan Pablo ne, cojo letra naha suva tit-sihindu cjua vihi; ngahan cuejñángojo vëhë. Mijí tsinguitsjén nuju xi ngayun ne, jemu quitjun camahani tsahan, tsëhë xi casuá camachaya nuju cjuandajyihi xi chja tsëhë Jesucristu. ²⁰Quihndë tai ne, tisecon ná hitsë ta ngayaan ne, tjin tangun cjuatacun naja cojo Nai naja; tuhun hitsë cjuetacun xahasen naha ta ngayaan ne, tjin tangun cjuatacun naja cojo Jesucristu.

²¹Cuitjin tsihindu nuju ta, tsëhë xi tjin ngu cáacun cojo nuju ta cuinuhyun tsahan, hacuaha hvë ta hisca quisun sa nihñu tsëhë cjua xi chjá cojo nuju.

²²Hacuaha tuhunndujun ngu cahndë

hiscan xi cuitejña ta, ngahan ne, vetahácacun xi Nina ne, sua me cahndë cjuétjängë nga nuju ngatsë rë xi cuatjin chjahyun rë me.

Tsinguijnetaha Pablo cjua

²³Epafras, me xi hacuaha jiya ndavaya cojo ná ngatsë rë xi sahmi me xa rë Jesucristu ne, hacuaha tsingatju me ngu nina tsujun ngayun Filemón. ²⁴Hacuanitjin ni Marcos, Aristarco, Demas, cojo Lucas, me xi cuacun tangun sahmi xa cojo ná ne, hacuaha tsingatju me ngu nina tsujun.

²⁵Catisehen cjuandaja rë Nai naja Jesucristu cahntsua xahasen nuju ngayujun ni. Cuatjin jain.

Xujun xi camahindu xi cjuahatsja xuta xi visiajmi Hebreo

1 Nixtin titjun ne, jemu cjín ndiya hacuaha jemu cjín chuva rë xi casua Nina camachaya rë xutachanga naja ngu cjua hya xi catsingatju me cjua cojo profeta rë me. ² Peru quihndë nixtin vihi ne, casua me camachaya naja hya xi catsingatju me cjua cojo Quihndi rë me. Hane me vëhë xi cachja Nina xi cuma Nai rë yëjë ni xcusun xi tjin ngasunhndë, hacuaha casuaxa Nina Quihndi rë me jan xi me vëhë casahmi me ngasunhndë. ³ Hacuaha sacuatjin jemu jyë hnga Nina cojo hasen ndajyihi rë me ne, cuatjin jyë hnga Quihndi rë me cojo hasen rë. Hacuaha sacujyihi suvá Nina ne, cuajyihi camahani Quihndi rë me. Hacuaha Quihndi rë Nina jan ne, yahangui me yëjë ni xcusun xi tjin ngasunhndë cojo cjua rë me xi jemu hñu ngahñu rë. Hane xi cafë catsityjahi me xuta tsëhë jyë rë ne, sehe quiji me ngahnga, cavejña me taha ladu quixi tsëhë Nina.

Hitsë sa matitjun Quihndi rë Nina xi cumá rë yëjë ni ángel

⁴ Hacuaha tu tjin xi hitsë sa jemu ndajyihi xa xi casacu rë Quihndi rë Nina xi cumá rë xa xi casacu rë ángel ne, hacuanitjin ni cavechutaha me xi hitsë sa jemu camatitjun me tsëhë ángel xi cuacun jan, hya xi quiji cavejña me cojo Nina. ⁵ Hisca xi ngu ángel ne, cachjaain Nina cojo cjua vihi, sacuatjin cachja me cojo Quihndi rë me: Ngaye xi quihndi naha ngaye; hacuaha quihndë casuáxa ri. Cuatjin cachja me. Hacuaha cachjaain me tsëhë ngu ángel cuitjin: Ngahan cumá ngahan nahmi rë cha, hane cha vëhë ne, cumá cha quihndi naha.

Cachjaain me cuatjin cojo ángel. ⁶ Hane ngu ndiya nga, hya xi tsingatju me Quihndi ngu rë me ngasunhndë ne, cuitjin chja me tsëhë Quihndi rë me:

Yëjë ni ángel naha ne, catjaharcun rë me. Cuatjin cachja me. ⁷ Hane xi tsëhë ángel rë me ne, cuitjin chja me:

Ngahan sahme xi ángel naha ne, tangun xcusun rë cojo tjo,

hane ángel xi fahacuenda xa naha ne, sahme xi tangun xcusun rë cojo ndihi.

Cuatjin cachja me. ⁸ Peru xi tsëhë Quihndi rë me ne, cuitjin chja me:

Ngayun Nina, tsajin nu tsajin nixtin cuijnetaha gobiernu nuju, hacuaha gobiernu xi nihñu ne, hatuxa cjuaquixi.

⁹ Canihmutacun cjuaquixi hane choho cahyun cjuatsehen;

hane vëhë xi ngahan Nina nuju ne, cavaxejen nuju,

hacuaha hitsë sa jyë cjuasua casuá nuju ngayun

xi cuma rë xingun.

Cuatjin cachja me. ¹⁰ Hacuaha chja nga me cuitjin:

Ngayun, Nai naha, ntsacu cavetsihin ne, ngayun canindujun nangui;

hacuanitjin ni ngahnga, hacuaha ngayun canindujun.

¹¹ Yëjë xcusun vëhë ne, cuechu nixtin xi cjuë,

peru ngayun ne, tsajin nu tsajin nixtin xi cjuë ngayun.

Hacuaha yëjë xcusun vëhë ne, cuma changá sacuatjin rë ngu tsjian xi chajá rë;

¹² hacuaha cuechu nixtin xi nijeyun xcusun xi cuacun vë sacuaha ngu tsjian tsjanga,

hacuaha nindeyun sacuaha vindeya ngu tsjian xi chajá rë.

Peru ngayun ne, hatuxa vindeyaain ngayun;

hacuaha nixtin nuju ne, hatuxa cuijnitaain.

Cuatjin cachja me. ¹³ Hacuaha hisca ngu ángel ne, cachjaain Nina cojo rê cjuá vihi, sacuatjin cachja me cojo Quihndi rê me:

Tinechin nguehe ladu quixi naha, hisca hya xi yějě ni xi sahmi ri condra ne, cuiyujú ngahan ngahma gubiernu riji.

¹⁴ Sacuaha ángel ne hacui hasen xi tsujy-ihiya tixa tséhě Nina. Nina tsingatju me ángel xi cuacun vė xi fehe visecoo naja ngayaan xi cuetjuntjen tséhě jyě naja.

Mijí rê xi chasen cjuandajyihi xi chja hacutjin cuetjuntjen

2 Véhě xi meje rê xi hitsě sa ndaja cuetahanrcun cjuandajyihi xi cavišnuju, cojo sa xi hacuiin tu hitsě tu hitsě ne, cuetjunxen tséhě ndiya ndajyihi xi tivanguen. ² Ta sacuaha ley rê Nina xi cachja ángel hatsě nixtin ne, tjin jain rê ngahñu. Hane yějě xuta xi casahmi cjuat-sehen hacuaha cahndiin me tséhě ley jan ne, camá me castigu sacuatjin xi mameje rê jyě rê me. ³ Hacuaha ngayaan ne, cumaji cuatjuhnga ngayaan tséhě castigu xi satě naja, sa xi chasen cjuandajyihi xi jercu tu ndajyihi camahani xi chja hacutjin cuetjuntjen. Cjuandajyihi véhě ne, titjun Nai naja cachja me, hane xuta xi cahndě me cjuá rê Nai naja ne, hacuanitjin ni cachja me cojo naja xi camá ngascan. ⁴ Hacuaha Nina ne, cojo jemu cjín cjuarcun xi ña quijircun naja hisca carcun cachutsejen ne, casua me camachaya naja xi cjuandajyihi véhě ne, cjuaquixi jain. Hacuaha hya xi casua naja Nina Hasen rê me sacuatjin cave-jñangucacun me ne, cuatjin xi casua me camachaya naja xi cjuandajyihi véhě ne, cjuaquixi jain.

Hacutjin vaxětje naja cjuaveya rê Jesús

⁵ Nina ne, cachjaain me xi ngahma gubiernu rê ángel cuejña ngasunhndě, hya xi cuinduva me sahmi me gobiernu ngasunhndě xi tinújan tséhě vi. ⁶ Tjin ngu cahndě tséhě xujun rê Nina xi cachja ngu xuta cojo Nina cuitjin:

¿Mé vengui chjí niji ngayin xuta, xi cuatjin ninguitsjun niji?

¿Mé vengui chji niji xi cuatjin chjuhuncuendun niji?

⁷ Ngayin ne, ngujo nixtin ne, hitsě sa caninguijnu niji xi cuma rê ángel, peru canihñu yehe canihñu hnga niji cojo cjuatacun niji hacuaha canihñu xi chjihinjendin;

⁸ yějě ni xcusun xi tjin ngasunhndě ne, caviyujun ngahma gobiernu niji ngayin xuta.

Cuatjin cachja ngu xuta cojo Nina. Hya xi cuatjin caviyuju Nina yějě xcusun xi cuacun vė ngahma gobiernu rê xuta ne, yějě ni caviyuju me, hisca ngu xcusun catsicanguin me. Peru hisca quihndě ne, cjěě chan xi yějě xcusun xi cuacun vė ne, cuiyuju ngahma gobiernu rê xuta. ⁹ Peru xi hyan ne, Jesús, xi ngu jo nixtin ne, hitsě sa catsinguijne Nina me xi cumá rê ángel, peru quihndě ne, casahmi jyě casahmi hnga Nina me cojo hasen rê me hacuaha casahmi me xi Jesús ne, cjuahájenda me. Cuatjin casahmi Nina cojo rê me tséhě xi jemu jyě cjuañihi cavatju me hya xi cahme me. Cuatjin camá cojo sa xi cojo cjuandaja rê Nina ne, Jesús cueya me ngatsě rê yějě ni xuta.

¹⁰ Nina ne, casahmi me yějě ni xcusun xi tjin, tséhě xi cuatjin chuya rê me. Hacuaha meje rê me xi jemu cjín quihndi rê me xi cuma yehe cuma hnga cojo cjuatacun rê. Véhě xi ndatjin xi sahmi Nina xi ngajñi rê cjuañihi xi cavatju Jesús, me xi vaxětje naja ne, cuechutaha me yějě ni hacutjin xi meje rê Nina xi cuechutaha

me. ¹¹ Me xi tiviyujuxin rë xuta xi cumá tsëhë Nina me cojo yëjë ni xuta xi tiviyujuxin ne, ngu ni nahmi rë me. Hane vëhë xi me xi Quihndi rë Nina ne, ma savaain rë me xi chja me xi xicjin me xuta xi cuacun jan, ¹² sacuatjin chja me xcun xujun rë Nina xi chja me cuitjin:

Suá cumachaya rë yëjë xingueen yo ngayun,

hacuaha cuaxëndaja nuju sé tsujun ngajni rë me hiscan xi matangun me.

Cuatjin cachja Quihndi rë Nina.

¹³ Hacuaha chja nga me cuitjin:

Hacuaha ngayun xi cumangu cákun cojo nuju.

Cuatjin cachja nga me. Chja nga me cuitjin:

Nguehe cuajyihi ngahan cojo yëjë quihndi nuju xi catuhun ná.

Cuatjin cachja me.

¹⁴ Tsëhë xi ngayaan quihndi rë Nina ne, tjin jni tjin yojo naja ne, vëhë xi Jesús ne, hacuaha casacu rë me jni casacu rë me yojo rë me, cojo sa xi ngatsë rë cjuaveya rë me ne, cjuahataha me ngahnu rë xitsehen xi matitjun xi vitexa rë cjuaveya. ¹⁵ Hacuaha ngatsë rë cjuaveya rë me ne, ma sahmi ndaya naja me ngayejen ni xuta xi rcun cjuaveya. Hane tsëhë xi cuatjin rcun cjuaveya ne, vëhë xi sacuaha xi cjuaveya ne, cavitexa naja xcun cjuahnu naja. ¹⁶ Ha cjuaquixi ta hacuiin canduva me xi cuisecoo me ángel ta xi canduva me ne, tsëhë xi cuisecoo naja me ngayaan xuta tjë rë Abraham. ¹⁷ Hane ngatsë rë vëhë xi casahmi ngu jyë xi camá me sacuaha ngayaan cojo ngayëjë ni chuva rë sacuatjin cun ngayaan xicjin me, cojo sa xi hacuaha cuma me ngu nahmi xi matitjun xi tjin rë me cjuayumatacun, hacuaha jemu ndaja sahmichihin me xa rë Nina, hacuaha cojo sa xi cuehjitje me jyë naja. ¹⁸ Hane tsëhë xi cuatjin suvá Jesús cavatju me cjuañihi hya xi cafa-

hachuva xitsehen me ne, vëhë xi quihndë ne, hacuaha cuma cuisecoo naja me ngayaan hya xi tifahachuva naja xitsehen.

Hitsë sa jyë hnga Jesús cojo hasen rë me xi cumá rë Moisés

3 Ngayujun ni xuta ladu rë Nina xi cavaxijin nuju me xi cuma tsëhë me ngayun ne, cuisiajme hitsë tsëhë Jesús, me xi catsingatju Nina xi sua cumachaya naja tsëhë cjuachacun xi nújan xi macjain naja, me xi hacuaha má nahmi xi matitjun tsëhë cjuachacun xi nújan xi macjain naja. ² Jesús ne, jemu ndaja casahmichihin me yëjë hacutjin xi meje rë Nina xi casuaxa rë me, sacuatjin casahmi xutachanga naja Moisés hatsëë xi hacuaha jemu ndaja casahmichihin me xa xi cavisecoo me xuta rë Nina. ³ Jesús ne, vechú chuva rë xi hitsë sa cuma jyë cuma hnga me cojo hasen rë me xi cuma rë Moisés. Má sacuatjin rë ngu cha xi sahmi ngu ndihya, xi vechú chuva rë xi hitsë sa chjaharcun rë cha xi cuma rë ndihya xi casahmi cha jan ta, ⁴ tsëhë xi yëjë ni ndihya ne, tjin ngu xuta xi casahmi me, vëhë xi camá, peru me xi casahmi yëjë ni xcusun xi tjin ngasunhdë ne, hacui Nina. ⁵ Moisés ne, ngu xuta xi sahmi xa rë Nina ni má me, hane jemu ndaja chihin casahmi me xa xi casatëxa rë me ngajni rë yëjë ni xuta rë Nina. Hane xa xi casahmi me jan ne, xi catsingasca rë me cjuatacun rë xuta tsëhë cjuaxi cuichja Nina cuma ngascan. ⁶ Peru Cristu ne, Quihndi rë Nina camahani má me, hane jemu ndaja chihin casahmi me cuidadu yëjë ni xuta rë Nina. Xuta xi cuacun vë ne, hacui ngayaan, sa xi hacuiin nismetacun cjuatacun xi rcun camahani hacuaha sa xi hacuiin nismetacun cjuasua xi tjin rë xahasen naja xi vetahan tacun Nina.

Cjuahajenda tangun xuta rë Nina cojo rë me

⁷ Vêhë xi meje rë xi cuetuhunrcun cjuaxi chja Hasen rë Nina xi chja cuitjin:

Sa xi cuisiniuju cjuaxi chjâ quihndë ne,

⁸ hacuiin nihñu taja tacún sacuatjin casahmi xuta hya xi cachjataha me Moisés

hacuaha cafahachuva ná me ngajan hiscan jemu xín tsêhë nandya.

⁹ Hane ngajan cafahachuva ná xutachanga nuju,

handasa ha cavêë me yêjë cjuandaja xi casahme cahntsua yachan nu xi cat-suyihiya me jan.

¹⁰ Vêhë xi camacjan ná cojo yêjë xuta xi caviyuju nixtin hya,

cuitjin cachjâ tsêhë me: “Cjuatacun rë me ne, hatuxa hacjahi ndiya fi,

hvíin me ndiya naha.” Cuatjin cachjâ.

¹¹ Vêhë xi camacjan ná cojo rë me hane cachjâ quixi xi

tsajin nu tsajin nixtin xi cuisehen cjuahajenda tangun me cojo ná.

Cuatjin cachja Hasen rë Nina.

¹² Nechun cuidadu, ngayujun ni, cojo sa xi tsajin hisca ngu ngayun xi cumatsehen cjuatacun nuju hacuaha cumacjaain nuju tsêhë me, sa tu cjuatacun tsehen jan ne, cuaxëxin nuju tsêhë Nina xi quicun me. ¹³ Cahndé rë vêhë ne, nchunchujun ni ne, tuhun cjuetacun xingun xingu xingu ngayun jinguyêjë rë xi tjin sa hora quihndë, cojo sa xi tsajin ngu ngayun xi cuma taja cjuatacun nuju ngatsë rë cjuandacha xi sahmi cjuatsehen. ¹⁴ Ta cojo ngayaan satë naja cjuandaja xi tjin rë Cristu, sa xi scaa jain naja cumangutacun hisca xi cuijnetaha nixtin naja, sacuatjin camangutacun ntsacu cavetsihin.

¹⁵ Tetuhunrcun nga sacuatjin chja xujun rë Nina xi chja cuitjin:

Sa xi cuisiniuju cjuaxi chjâ quihndë ne,

hacuiin nihñu taja tacún sacuatjin casahmi xuta hya xi cachjataha me Moisés.

Cuatjin chja xujun rë Nina. ¹⁶ ¿Yo me xi cuatjin cachjataha rë Moisés hya xi cavatju cavisiniuju me cjuaxi rë Nina ni? Yêjë ni xutachanga naja xi cavaxëxin Moisés tsêhë nangui Egipto. ¹⁷ Hane ¿yo me xi camacjan rë Nina cojo rë cahntsua yachan nu ni? Ha hacui ni me changá xi cuacun vë xi casahmi cjuatsehen hane cahme me ngajan hiscan jemu xín tsêhë nandya. ¹⁸ Hane ¿yo me xi cachja quixi Nina cojo xi tsajin nu tsajin nixtin xi cuisehen cjuahajenda tangun cojo me ni? Ha hacui ni me changá xi cuacun vë xi cahndiin tsêhë Nina. ¹⁹ Hane cuatjin camá xi camaji cavisehen cafahajenda me ngajan, tsêhë xi camacjaain rë me.

4 Vêhë xi jinguyêjë rë xi tacun quicun cjuaxi cachja Nina xi cuisen chjahanjenda tangun cojo rë me ne, meje rë xi cumacjintacun sá tu tjin ngu ngayun xi cuechuntuun xcusun ndajiyihi vêhë. ² Ngayaan ne, hacuaha cojo ngayaan camachaya naja cjuandajiyihi vêhë sacuatjin camachaya rë xutachanga naja xi cuacun jan; peru me xi cuacun jan ne, tsajin mé camachjirêhë rë me cjuaxi cavisiniuju me jan ta, tsêhë xi hya xi cavisiniuju me cjuaxi jan ne, camacjaain rë me. ³ Peru ngayaan xi camacjain naja ne, cuma cuiseen chjahanjenda tangun cojo rë Nina. Sacuatjin xi ha cachja me tsêhë cjuandajiyihi vêhë, xi cachja me cuitjin:

Vêhë xi camacjan ná cojo rë me hane cachjâ xi

tsajin nu tsajin nixtin xi cuisehen cjuahajenda tangun me cojo ná.

Cuatjin cachja me. Nina ne, catsinguijnetaha me xa xi sahmi me hisca hya xi casahmi me ngasunhndë; ⁴ hacuaha tjin ngu cahndé tsêhë xcun xujun rë me ne,

cachja me tsêhê nixtin xi má yatu jan cuitjin:

Ngahan ne, nixtin xi má yatu ne, cafahá-jenda tsêhê yêjê ni xa xi casahme.

Cuatjin cachja me. ⁵Hacuaha ha xujun vêhê ni ne, cachja nga me cuitjin:

Tsajin nu tsajin nixtin xi cuisehen cjuahajenda tangun me cojo ná.

Cuatjin cachja me. ⁶Hane tsêhê xi chaja sa cuisehen yahnga xuta xi cjuahajenda tangun me cojo Nina ne, hacuaha tsêhê xi xutachanga naja xi cojo tjun camachaya rê cjuandajiyi jan ne, caviisiin me cafaahajenda tangun me, ngatsê rê xi cahndiin me tsêhê cjuaxi tjun camachaya rê me jan ne, ⁷vêhê xi Nina ne, cavejña nga me ngu nixtin, xi hacui quihndê. Jemu tsêê cavatju nixtin xi cavitexa Moisés, hya xi catsihindu xutachanga naja David cjuaxi rê Nina xi ha canújan titjun xi chja cuitjin:

Sa xi cuisinuju cjuaxi chjá quihndê ne, hacuiin nihñu taja tacún.

Cuatjin cachja Nina. ⁸Sa xi xutachanga naja Josué quijicojo me xuta xi cjuahajenda tangun cojo Nina ne, Nina ne, hacuaha cachjaan me xi camangaskan xi tjín sa ngu nixtin xi cuisehen chjahanjendan tangun cojo rê me. ⁹Ngajan xi tjín sa ngu nixtin xi cuisehen xuta rê Nina cjuahajenda tangun me cojo Nina. ¹⁰Ta xuta xi visehen fahajenda tangun cojo Nina ne, hacuaha fahajenda me tsêhê xa xi casahmi me sacuatjin cafaahajenda Nina tsêhê xa xi casahmi me. ¹¹Ngajan xi meje rê xi nihña ngahñu xi cuma cuisehen chjahanjendan cojo rê Nina, cojo sa xi hisca ngu ngayaan ne, hacuiin nihña sacuatjin casahmi xuta xi cahndiin me tsêhê Nina.

¹²Cjua xi chja Nina ne, quicun jain, hacuaha jemu tjín rê ngahñu, hatuxa vetjucaa. Sacuaha xi hitsê sa yuju xi cumá rê quicha xi jo yuju rê, xi vatjuca rê hisca hasen naja, hacuaha handasa hiscan hinchacoo ninda naja ne, cuatju,

cuechu hisca ngajñi rê xineninda naja. Cjua xi chja Nina jan ne, vêê hacutjin ningatahantacun, hacuaha vêê hacutjin má rê xahasen naja.

¹³Hisca ngu xcusun xi Nina catsindaja me ne, cumaji chahma xi cumá rê me; yêjê ni xcusun vêhê ne, tjín tsejen xi cuma rê Nina, me xi tahancuendan rê yêjê ni xcusun xi canihña.

Jesús ne, hacui me xi má nahmi xi matitjun

¹⁴Jesús, Quihndi rê Nina ne, hacui me xi nahmi xi matitjun xi tjín naja. Jemu ndaja camahani me, hacuaha cavatjutaha me ngahnga, sehe cavechu me xcun Nina. Vêhê xi meje rê xi hacuiin nismetacun cjuachacun xi nújan xi macjain naja. Cuatjin meje rê ta, ¹⁵tsêhê xi nahmi xi matitjun xi tjín naja ne, ma mayuma rê me ngayaan xi jemu chuva tacun ta, tsêhê xi me vêhê ne, hacuaha cavatju me camá yêjê ni cjuacjintacun sacuatjin vatjun ngayaan má. Peru handasa cuatjin cavatju me camá ne, hisca ngu cjuatsehen ne, casahmii me. ¹⁶Vêhê xi meje rê xi rcun camahani xi nihña tiña tsêhê Nina, me xi sahmi naja gobiernu cojo cjuandaja. Nihña tiña cojo sa xi chjahanntsan cjuayumatacun rê me, hane hacuaha sacú naja cjuandaja rê me xi cuisecoo naja hora xi mameje rê.

5 Yêjê ni nahmi xi matitjun xi tuxijin rê ngajñi rê xuta ne, satê xa rê me xi visecoo me xuta, cojo sa xi sahmi tiña xuta tsêhê Nina. Hacuaha nahmi xi cuacun vê ne, satêxa rê me xi sua me yêjê ni xcusun cjuatjo cojo Nina ngatsê rê cjuatsehen xi sahmi xuta. ²Nahmi xi cuacun vê ne, ma tsijyêcacun me cojo xuta xi hvín camahani hacuaha cachaja tsêhê ndiya rê Nina ta, tsêhê xi nahmi vê ne, hacuaha chuva cacun me. ³Vêhê xi tjín rê me xi sua me cjuatjo cojo Nina ngatsê rê cjuatsehen xi casahmi suvá me, cojo

ngatsë rë cjuatsehen xi casahmi jingu sa xuta.

⁴Tsajin ngu xuta xi cojo cjuatacun rë suvá ni me ne, cjuaha me ngu xa ndajyihi vëhë ta me xi cjuaha ne, me xi suvá Nina cuichja me xi satë rë, sacuatjin cavatju xutachanga naja Aarón camá.

⁵Hacuanitjin ni rë Cristu ta, hacuiin casahmi jyë casahmi hnga suvá me yojo rë me xi cuma me ngu nahmi xi matitjun ta me xi cachja xi cuma me nahmi ne, hacui Nina, xi cachja me cuitjin:

Ngaye xi quihndi naha ngaye;

hacuaha quihndë casuá xa ri.

Cuatjin cachja Nina. ⁶Hacuaha chja me jingu sa cahndë tsëhë xujun rë me cuitjin:

Ngaye xi nahmi ngaye yëjë nu yëjë nixtin sacuaha camá Melquisedec hatsëë nixtin.

Cuatjin cachja Nina. ⁷Hane jinguyëjë rë xi Cristu tacun sa me cjuahñu cojo yojo rë me ne, hora xi cafehya rë me Nina, Nina xi tjin rë chuva rë xi cuaxëtje rë me tsëhë cjuaveya ne, jercu cajindaya me hacuaha jercu cajihnda me. Hane cafahacuenda Nina cjuarë me ta, tsëhë xi jemu cafaharcun me Nina.

⁸Cristu ne, handasa Quihndi rë Nina me xi cjuaquixi, peru cjuañihi xi cavatju me camá nguehe ngasunhndë ne, vëhë hitsë sa cavicuya rë me mé vjne xi nuhyan tsëhë Nina. ⁹Hane xi cuatjin casahmi Nina xi cavechutaha Jesús yëjë ni hacutjin xi meje rë Nina xi cuechutaha me ne, vëhë xi Jesús ne, ma vaxëtje me yëjë ni xuta xi vihndë tsëhë me, hacuaha tsajin nu tsajin nixtin xi cuatju xuta xi cuacun vë castigu.

¹⁰Hane hacuaha Nina casuaxa me Jesús xi má me nahmi xi matitjun sacuaha camá Melquisedec hatsëë nixtin.

Mijí rë xi nismetacun ndiya rë Nina

¹¹Sacuaha tsëhë cjuatacun vëhë ne, jemu tjin cjuarë xi cuinújin cojo nuju, peru jemu chja cuátjin xi tihincuendin nuju ta, tsëhë xi hacuiin ndaja meje cuisñuju. ¹²Ngayun xi ha jemu tsëë nduvun chutayun cjuarë Nina ne, ha tivicyun rë xuta cjuarë Nina. Peru cahndë rë xi ha tivicyun ne, tu ngayun meje rë ngu xi cuicuya nga nuju cjuarë xi tjun tjun chutaya rë tsëhë cjuarë Nina. Sacuaha xi mameje rë xi cuyun siuhun nga lechi, cahndë rë xi xinu niñu.

¹³Sacuaha quihndi langa ne, vëhë xi suvá lechi hvi, hacuaha hvñin camahani mé xi ndaja o mé xi ndajin. ¹⁴Peru sacuaha niñu xi chinë ne, xuta changá xi jinë me, xuta xi ha vëë me mé xi ndaja mé xi ndajin ta, tsëhë xi cjuatacun rë me ne, ha jemu nduva sahmixa.

6 Quihndë ne, meje rë xi cueññaxen hitsë cjuachacun xi cachutayan hya xi tjun tjun camangutacun cojo Cristu, hane chutayan jingu sa cjuarë xi hitsë sa chja, cojo sa xi cueññachihin ndaja cjuatacun naja. Mijí rë xi cuyan chutayan nga cjuarë xi ha cama naja titjun, sacuaha cjuarë xi chja xi meje rë xi cueññaxen rë yëjë xcusun xi machjiriin xi nihña; sacuaha cjuarë xi chja xi meje rë xi cumangutacun cojo Nina; ²sacuaha cjuarë xi chja xi meje rë xi cuma tyjahi vihi cuma tyjahi vëhë xi cuma rë Nina; sacuaha cjuarë xi chja xi meje rë xi cuisanentsan ngu xuta; sacuaha cjuarë xi chja xi cuya nima cjuahñu; sacuaha cjuarë xi chja xi cuechu nixtin xi Nina ne, tsichuva naja me ngayejen ni cojo cjuatacun naja. ³Vëhë xi quihndë ne, cueññaxen hitsë cjuarë xi cuacun vë, hane chutayan jingu sa cjuarë xi hitsë sa chja cuijnercuun, sa xi sua Nina cahndë.

⁴Xuta xi ha cavisehen cjuahasen rë Nina ngajñi rë cjuatacun rë me ne, hacuaha casacu rë me hitsë cjuandaja

xi Nina sua me, hacuaha cavisehen Hasen rë Nina cahntsua xahasen rë me, ⁵hacuaha cavejña rë me hitsë cjuandajyihi rë Nina, hacuaha camachaya rë me hitsë cjuarcun xi hitsë sa rcu cjin cuma nixtin xi sehe nduva. ⁶Sa xi xuta xi cuacun vë tsismicacun me ndiya rë Nina ne, cumaji cuisecoon rë me xi tsindeya me cjuatacun rë me ngu ndiya nga ta, xcusun xi tisahmi me ne, titsixcuehyu me Quihndi rë Nina, sacuaha xi tivuya tivetaha suvá me me xcun cru. ⁷Xuta xi cuacun vë ne, tangun me cojo nangui xi hvi rë tsi xi vaha xcun: sa xi nangui vëhë ma ngu xcusun xitjë xi cumachjirëhë rë xuta xi nai rë ne, tsinchacun Nina nangui vëhë; ⁸peru sa xi suvá nahyá cuetju xcun nangui vëhë ne, venguiin camahani chji rë. Hacuaha choho cuichja Nina cojo, hane hiscan xi cuijnetaha ne, cueti.

Cuanguen nduju cuetahantacun Nina

⁹Peru handasa cuatjin nújin cojo nuju, ngayujun ni xi jemu hmutacuin nuju ne, peru ha hyin cojo cjuatacun niji xi ngayun ne, ndaja tivatjun tijima, cuma cuinújan ne, ha tivanguncujun ndiya xi cuaxëtje nuju. ¹⁰Nina ne, quixi me cojo cjuar rë me. Vëhë xi tsichayaain me yëjë xcusun xi canihñu, hacuaha tsichayaain me cjuahmutacun xi camatsejen xi tjin nuju cojo rë me, hya xi cavisecun rë xuta ladu rë me, sacuatjin xi tinihñu hisca quihndë. ¹¹Xi meje niji ngayin ne, jima ngu ngayun ne, hacuanitjin ni tinechun ngunajatacun jinguyëjë rë xi nechun cjuahñu, cojo sa xi sacú nuju yëjë cjuandaja rë Nina xi vetuhun tacun. ¹²Hacuaha meje niji xi hacuiin cuma tsëhë ngayun ta xi meje niji ne, nihñu sacuatjin sahmi xuta xi ngatsë rë xi jemu ndaja ticaa rë me xi mangucacun me cojo Nina ne, vëhë xi tifahatsja me cjuandaja xi ha cachja Nina xi sacú rë me.

¹³⁻¹⁴Hya xi cachja quixi Nina cojo Abraham xi sua rë me ngu cjuandaja

ne, tsëhë xi ha quihndë tsajin sa yo xi matitjun xi cuma rë Nina ne, vëhë xi cachja me cuitjin: “Ngahan suva hvë xi cjuaquixi xi tsinchacun ri, hacuaha jemu cjin sahme ri cojo xuta riji.” Cuatjin cachja me. ¹⁵Hane xi cuatjin cacaa rë Abraham cavejñaya me cojo cjuajeya cjuar xi cachja Nina ne, cavechu nixtin xi casacu jain rë me cjuandaja xi ha cachja Nina xi sua rë me. ¹⁶Hya xi ngu xuta sua me ngu cjuar rë me xi cjuaquixindaja ne, hisca veyanangui me ngu xi hitsë sa matitjun xi cumá rë me, xi hacui Nina; hane hya xi jo xuta tisua cjuar rë me ne, sa xi cuetjuiñi ngu me xi cuacun vë xi cuichja me: “Vëë Nina jain xi quixi” ne, ngajan ma chihin cjuavisiajmi rë me. ¹⁷Vëhë xi hya xi cachja Nina xi sua rë me Abraham ngu cjuandaja ne, cuitjin cachja me: “Ngahan suva hvë.” Cuatjin cachja me cojo sa xi ngayaan xi chjahan-ntsan cjuandaja vëhë ne, cumachayan-daja naja ta Nina ne, hya xi cuichja me ngu cjuar ne, tsindeyaain me cjuatacun rë me. ¹⁸Cuatjin cachja Nina cojo sa xi jercu ndaja sacú naja cjuetacun ngatsë rë jo xcusun xi hatuxa cumaji cuindeya. Ngu xcusun jan ne, hacui suvá Nina, hane xi ma jo jan ne, hacui cjuar xi cachja me cojo Abraham. Hacuaha Nina ne, hatuxa maji vindacha me. Hane ngayaan xi vetahan tacun Nina ne, sacú naja cjuetacun vëhë, cojo sa xi cumangutacun cojo cjuar xi Nina cachja me xi cuechu nixtin xi cuiseen chjahanjendan tangun cojo rë me. ¹⁹Hane xi cuatjin vetahan tacun Nina ne, tsajin camahani mé cuma rë hasen naja, hacuaha cuma cuechun hisca hiscan tacun Nina, ²⁰hiscan xi quiji Jesús cavuxaha me ndiya tsajan. Hane Nina casua xa me Jesús xi camá Jesús nahmi xi matitjun xi tsajin nu tsajin nixtin xi cjuë xa rë me, sacuaha camá Melquisedec hatsëë nixtin.

**Jesús ne, má me nahmi
sacua ha camá Melquisedec**

7 Melquisedec vë ne, matitjun me tsêhë nandya Salem, hacuaha má me nahmi xi sahmi me xa tsêhë Nina xi hatuxa jyë hnga cojo Hasen rë. Hane hya xi cavuya Abraham xi quiji cavaxëtje me quihndi rë hntse me tsêhë condra rë ne, cavetju Melquisedec tsêhë nandya Salem quijitjengui me Abraham hiscan nduva, hane xi casacu xicjin me ndiya ne, catsinchacun Melquisedec Abraham. ²Hya xi camá ne, të cahndé cavatëcja Abraham yëjë ni xcusun xi camá sa cafaha me tsêhë xuta xi cuacun condra jan ne, casua rë me Melquisedec ngu cahndé tsêhë të cahndé jan, tsêhë xi Abraham ne, faharcun me Nina. Ñihi xi Melquisedec ne, meje cuichja “ngu me xi matitjun xi vitexa cojo yëjë ni cjuaquixi”; hacuaha ñihi xi chja Me xi Matitjun tsêhë Salem ne, meje cuichja “ngu me xi matitjun xi vitexa cojo yëjë ni cjuajeya.” ³Xcun xujun rë Nina ne, tsajin camahani hiscan xi chja tsêhë naa tsêhë nahmi rë Melquisedec. Hisca tsêhë xutachanga rë me ne, tsajin hiscan xi chja. Hacuaha chjaain hacutjin catsin me ne, chjaain hacutjin cahme me. Cuatjin xi Melquisedec ne, meje tangun me cojo Quihndi rë Nina, tsêhë xi hacuaha ngu nahmi má me xi tsajin nu tsajin nixtin fë xa rë me.

⁴Chutsujun hacutjin jercu vengui chji rë Melquisedec, xi hisca xutachanga naja Abraham ne, casua me me ngu cahndé tsêhë yëjë xcusun xi cavatëcja me të cahndé jan. ⁵Ley xi casua Nina rë Moisés xi camá ngascan ne, chja ta nahmi xi nduva tjë rë Leví ne, tjin rë me chuva rë xi cjuehya me cojo naja ngayaan xuta tjë rë xuta Israel xi cuichancjan të cahndé yëjë ni xcusun xi tjin naja, cjuaha nahmi vëhë ngu cahndé tsêhë të cahndé jan. Cuatjin chja ley rë Moisés xi cuech-

jen diezmu naja, handasa xicjin nahmi jan má ngayaan, hacuaha tjë rë Abraham ngayejen ni. ⁶Melquisedec ne, handasa hacuiin tjë rë Leví má me, peru caphatsja me ngu cahndé tsêhë xi camá të cahndé jan, xi casua Abraham. Hacuaha catsinchacun Melquisedec Abraham, me xi ha cachja Nina xi sacú rë cjuandaja. ⁷Ngayejen ni ne, ha hyan ta me xi tsinchacun ne, me vëhë xi matitjun me tsêhë me xi manchacun. ⁸Nguehe xcun cjuahñu naja vi ne, nahmi xi fahatsja me diezmu tsêhë yëjë xcusun xi ticja të cahndé ne, hacuaha xuta ngayaan ni me xi hacuaha hme me; peru xcun xujun rë Nina ne, chja tsêhë Melquisedec sacua ha xi tacun cuaha me. ⁹Nahmi xi nduva tjë rë Leví xi hacuaha cojo me tifahatsja me diezmu ne, cuma cuinújan ne, sacua ha xi cojo me cavechji me diezmu rë me hya xi casua Abraham cojo Melquisedec jan diezmu rë me. ¹⁰Cuatjin sacua ha xi cavechji nahmi xi cuacun jan ta, tsêhë xi Abraham ne, ha cojo tjë xi cuacun vë yaha me hya xi casua me diezmu rë me cojo Melquisedec.

¹¹Xuta Israel ne, caphatsja me cju a chja hacutjin meje rë Nina xi sahmi yëjë xuta xi tjë rë Leví xi sahmi me xa sacua ha nahmi. Quihndë ne, sa xi nahmi xi cuacun vë camá casahmi me xi cavechutaha xuta yëjë ni hacutjin xi meje rë Nina xi sahmi me ne, ha quihndë hacuiin sahmi nguyjë xi cuetjújñi sa ngu nahmi xi hacjahi xcusun rë, ngu nahmi xi hacuiin tangun xcusun rë cojo Aarón ta ngu nahmi xi tangun xcusun rë cojo Melquisedec. ¹²Hane hya xi vindeya xcusun rë xa xi sahmi nahmi ne, hacuaha hatuxa vindeya ley xi vitexa rë me. ¹³Hane Nai naja, me xi cuatjin chja xujun rë Nina tsêhë ne, hacjahi tjë me, hane sacua ha tjë vëhë ne, hisca ngu nahmi cjëë cuetjújñi me. ¹⁴Hacuaha ha hyan ta Nai naja ne, tsêhë tjë rë Judá canduva me, hane

Moisés ne, cachjaain camahani me xi tjë vëhë ne, ngajan cuetjujñi ngu nahmi.

¹⁵ Yëjë cja xi tinújan vi ne, tsejen xi jemu cjaquixi, hya xi vetjujñi sa ngu nahmi sacuah Melquisedec.

¹⁶ Hane nahmi xingu jan ne, hacui Nai naja, me xi cavechutaha xi camá nahmi, hacuiin ngatsë rë ngu ley xi chja yo tjë rë xi cuma nahmi ta ngatsë rë ngahñu rë ngu cjuahñu xi tjin rë me xi tsajin nu tsajin nixtin vetsun. Ngatsë rë vëhë xi cavechutaha me xi camá me nahmi.

¹⁷ Hacuaha Nina ne, cuitjin chja me tsëhë Nai naja:

Ngaye xi nahmi ngaye yëjë nu yëjë nixtin sacuah camá Melquisedec hatsëë nixtin.

Cuatjin cachja Nina. ¹⁸ Sacuah cja rë ley xi cavitexa titjun ne, cavetsunya, tsëhë xi hatuxa tsajin rë ngahñu hacuah machjiriin ta, ¹⁹ tsëhë xi camaji casahmi xi cavechutaha xuta yëjë ni hacutjin xi meje rë Nina xi cuechutaha me. Hane cahndé rë ley vëhë ne, vetahan tacun ngu cja xi hitsë sa ndajyihi, hane ngatsë rë xi cuatjin vetahan tacun ne, vëhë xi nihña tiña tsëhë Nina.

²⁰ Hya xi casua xa Nina Jesús xi cuma me nahmi xi matitjun ne, cachja me cja vihi: “Ngahan suva hvë.” Cuatjin cachja me. Peru hya xi cafaha xa nahmi xi yahnga jan ne, cachjaain Nina: “Ngahan suva hvë.” ²¹ Peru sacuah tsëhë Nai naja ne, xujun rë Nina ne, cuitjin chja: Nai naja ne, cachja me cja vihi: “Ngahan suva hvë.” Cuatjin cachja me, hacuah tsajin hora tsindeya me cjuatacun rë me xi cachja me cja vihi:

“Ngaye xi nahmi ngaye yëjë nu yëjë nixtin

sacuaha camá Melquisedec.”

Cuatjin cachja me. ²² Hane xi cuatjin casua xa Nina Jesús xi camá me nahmi xi matitjun tsajan ne, vëhë xi sacua naja cjaquixindaja xi Nina ne, sahmicihlin jain me compromisu xi sehe tisahmi me.

Hane compromisu vëhë ne, hitsë sa ndajyihi xi cuma rë xi casahmi me titjun.

²³ Sacuatjin rë nahmi xi yahnga jan ne, sacuiin rë me cahndé xi cjuenduju me sahmi me xa yëjë nu yëjë nixtin ta, tsëhë xi hatuxa hme me. Vëhë xi hisca ntsacu cavetsihin hisca quihndë ne jemu cjín camá me cojo yëjë sa tjë rë me xi yahnga xi hacuah camá nahmi. ²⁴ Peru Jesús ne, tsëhë xi tsajin nu tsajin nixtin xi cueya me ne, vëhë xi hacuah tsajin nu tsajin nixtin xi jingu sa cjuahatsja xa rë me xi má me nahmi. ²⁵ Vëhë xi maxëtje me xuta xi sahmi tiña tsëhë Nina ngatsë rë xi camangucacun xuta jan cojo Jesús. Hane hya xi vaxëtje me xuta xi cuacun vë ne, ha quihndë tsajin nu tsajin nixtin xi cumameje nga cuetjutje me ta, tsëhë xi Jesús ne, tacun me yëjë nixtin xi cjuehya rë me Nina ngatsë rë xuta xi cuacun vë.

²⁶ Jemu ndatjin xi tjin naja ngu nahmi xi matitjun xi cuatjin xcusun rë me. Jesús, nahmi xi matitjun jan ne, jemu tyjahi me, tsajin rë me cjuatsehen, tsajin mé jyih mé má me, cavetjuxin me tsëhë xuta tsehen, quiji me hisca ngajan sa tsëhë ngahnga. ²⁷ Me vëhë ne, hacuiin tangun me cojo nahmi xi matitjun xi yahnga jan ta, me vëhë ne, tsajin mé má xi cojo me nchunchujun ni sua rë me Nina ngu chu xi cahme ngatsë rë jyë rë suvá me, hane xi cuma ngascan ne, sua nga me ngu chu xi cahme ngatsë rë jyë rë xuta. Jesús ne, ngu ndiya ni casua me ngu cjuatjo cojo Nina ngatsë rë jyë rë xuta, hya xi casua me yojo rë me xi cahme me. ²⁸ Sacuah ley rë Moisés ne, sua xa rë xuta xi cuma me nahmi xi matitjun tsëhë yëjë ni nahmi. Hane xuta ne, hatuxa caain rë cjuatacun rë me xi suvá cjuandaja sahmi me. Peru sacuah cja xi cachja Nina hya xi cachja me xi “Ngahan suva hvë” ne, cja vëhë casua xa rë Quihndi rë Nina xi cuma me ngu nahmi xi matitjun. Hane cja xi cachja

Nina jan ne, camá ngascan canduva xi cuma rë ley. Hacuaha Quihndi rë Nina ne, tsajin nu tsajin nixtin xi caain rë cjuatacun rë me xi suvá cjuandaja sahmi me.

Jesús ne, sahmi tangun me xuta cojo Nina ngatsë rë ngu compromisu xatsë

8 Quihndë ne, cjuaxi hitsë sa matitjun tsëhë yëjë ni cjuaxi tinújan vi ne, hacui cjuaxi vihi: tjin naja ngu nahmi xi matitjun xi cuatjin xcusun rë me. Quiji me ngahnga, cavejña me taha ladu quixi tsëhë Nina xi jemu jyë hnga cojo hasen rë. ²Ngajan sahmi me xa xi má me nahmi ngajan ndava Nina. Peru ndava Nina jan ne, hacuiin ngu ndihya xi catsindaja ngu xuta ta cahndë vëhë ne, suvá Nai naja catsindaja me.

³Yëjë ni nahmi xi matitjun ne, hatuxa xa rë me xi sua me cjuatjo cojo Nina sua me ngu chu xi tsiquehen xuta. Vëhë xi cojo Jesús camameje rë xi tjin mé xi sua me cjuatjo cojo Nina. ⁴Sa xi nguehe ngasunhndë tacun cuaha me quihndë ne, hacuiin cojo me má me nahmi ta nguehe ne ha tjin nahmi xi sua cjuatjo cojo Nina sacuatjin vitexa ley rë Moisés. ⁵Sacuaha xa xi sahmi nahmi nguehe ngasunhndë vi ne, hacuiin tangun cojo xa xi má ngajan ngahnga ta, sacuaha ejemplu o tjahnguen ni rë xa xi má jan ne, vëhë xi má nguehe. Hya xi ha cuetsihin sahmi Moisés ndava Nina jan ne, cuitjin cachja Nina cojo rë me: “Nechin cuidadu ne ndandaja nihñi yëjë ni xcusun vë sacuaha xcusun xi ha catsingácun ri ngajan hiscan naxi jan.” Cuatjin cachja Nina. ⁶Quihndë ne, Jesús casacu rë me ngu xa xi hitsë sa ndaja, tsëhë xi hacuaha me vëhë sahmi tangun me xuta cojo Nina ngatsë rë ngu compromisu vëhë hane hitsë sa ndaja cjuaxi cachja me.

⁷Sa xi ndatjin tjin chihin compromisu xi casahmi Nina titjun ne, sehe camamiji

rë ngu nga compromisu xi ma jo xi hitsë sa ndaja. ⁸Peru Nina ne, cavëë me xi xutachanga naja ne, quitjen me jyë, vëhë xi cachja me cuitjin:

Ngahan Nai nuju ne, cuichjá cojo nuju ta cuechu nixtin

xi sahme nga ngu compromisu xatsë cojo nuju ngayun xuta tjë rë Israel cojo xuta tjë rë Judá.

⁹Peru ha quihndë hacuiin sacuaha compromisu xi casahme titjun cojo xutachanga nuju,

hya xi cojo cjuahmutacun naha ne, cavaxëxen me tsëhë nangui Egipto; hane tsëhë xi hacuiin quiji nduju me sacuatjin compromisu xi casahme cojo rë me ne,

vëhë xi ngahan ne, casahmecuendaan me, cuatjin chjá ngahan, Nai nuju.

¹⁰Sacuaha compromisu xatsë xi sahme cojo nuju ngayun xuta tjë rë Israel hya xi cuma ngascan tsëhë nixtin vëhë ne, hacui vihi:

Cueyá ley naha cahntsua cjuatacun nuju, sacuaha xi cuma hindu cjuaxi rë ley vëhë cahntsua cjuatacun nuju.

Hacuaha ngahan cuma ngahan Nina nuju

hane ngayun cuma ngayun xuta naha.

¹¹Tsajin yo xi cuicuya xicjin, tsajin yo xi cuichja cojo xicjin cuitjin: “Meje rë xi cumachaya ri yo xi Nai naja.”

Tsajin yo xi cuichja cuatjin ta tsëhë xi yëjë ni sa quihndi sa changá ne, ha camachaya rë yo ngahan.

¹²Nixtin hya ne, jemu tjin ná cjuaninchataha cojo cjuatsehen xi cún me hacuaha ha quihndë tsajin nixtin tsinguítsjen jyë rë me.

Cuatjin cachja Nina. ¹³Hya xi chja Nina tsëhë ngu compromisu xi tjun jan ne, casahmi changá me. Hane xcusun xi ha jima changá jan ne, ha meje cjuëya.

Ndava Nina nguehe nangui

9 Quihndë ne, ngajñi rë cjuat tsëhë compromisu xi casahmi Nina titjun ne, cachja me hacutjin xi chjahanrcun rë me, cojo xi cuma ndava me nguehe ngasunhndë. ²Vëhë xi camá ngu ndihya tsjian xi camá ndava Nina. Ngu cahntsua xi tjun tjun tacun, xi hmí rë Cahndé Rcu ne, ngajan tacun candeleru, tacun maxë, siu pan xi viyuju xcun Nina. ³Ngu cahntsua xi tacun cahncun taha cahntsua tsjian xi tyjanguí má jo cahndé jan ne, ngajan tacun cahndé xi hmí Cahndé Xi Jercu Tu Rcu Camahani. ⁴Ngajan tacun ngasunscun xi suvá oro camá hiscan xi tí tyjungunsa. Hacuaha ngajan tacun caxa tsëhë compromisu xi suvá oro casaxtë rë yëjë ni ladu rë. Hane cahntsua caxa jan ne, ngajan jiya tilu xi suvá oro cama, hane cahntsua tilu jan hinchandaja scuan cjuarcun xi hmí rë maná. Hacuaha bastón tsëhë Aarón xi cavetjusehen jan ne, cahntsua caxa jan jiyandaja. Hacuaha ngajan hinchandaja ndyojo të xi camahindu cjuat rë ley. ⁵Xcun caxa jan ne, hinchacun jo quicha, xi sacuahá ángel rë Nina, xi fehma rë tyjunga rë xcun caxa jan. Hane xcun tyjavaxcun caxa jan ne, ngajan tsejen hasen rë ngahñu cjuat rë Nina hiscan tsicjë me jyë rë xuta. Peru quihndë ne, tsëhë cjuat xi ha cachjá cojo nuju vë ne, ha quihndë cuichjaan chichihin sa cojo nuju.

⁶Quihndë xi ha caviyuju chihin yëjë ni xcusun vëhë cuatjin ne, yëjë ni nahmi ne, visehen me nchunchujun ni cahntsua xi tjun tjun tacun tsëhë ndihya tsjian jan, xi sahmi me xa rë me sacuahá nahmi. ⁷Peru cahntsua xi má jo tacun tsëhë ndihya jan ne, suvá ni nahmi xi matitjun visehen me ngu ndiya xi ngu nu, hane hatuxa vaha me jni rë chu xi sua me cjuatjo cojo Nina ngatsë rë cjuatsehen xi casahmi suvá me, cojo ngatsë rë cjuat-

sehen xi casahmi xuta xi hisca hvín me xi tjin rë me jyë. ⁸Cojo cjuatacun vëhë ne, Hasen rë Nina ne, sua machaya naja xi ndiya xi cjuecani naja xcun Nina ne, cjëë tuxaha, jinguyëjë rë xi ndava Nina jan ne, tisahmi xa cuaha. ⁹Yëjë cjuatacun xi cuatjin má vë ne, machjirëhë naja ngayaan sacuahá ngu ejemplu ni, quihndë nixtin vihi. Ta sacuahá cjuatjo xi sua me cojo Nina ngajan ndihya vëhë cojo chu xi tsiquehen xuta ne, maji tsityjahi rë cjuatacun rë xuta xi cuatjin faharcun me Nina. ¹⁰Yëjë cjuatacun vëhë ne, vitexa suvá tsëhë xi chinë xi hyun ni cojo tsëhë xi ma tyjahi vihi ma tyjahi vëhë xi cumá rë Nina. Cjuatacun vëhë ne, vitexa suvá ni tsëhë taha xcun, hacuiin tsëhë cahntsua xahasen naja. Peru cjuatacun vëhë ne, cuitexa hisca nixtin xi Nina tsindeya me cjuatacun vëhë.

Ndava Nina ngajan ngahnga

¹¹Peru Cristu ne, ha cavetjucun me xi má me nahmi xi matitjun xi sua naja me yëjë ni cjuandaja xi titsingatju Nina. Sacuahá cahndé hiscan xi tisahmi me xa xi má me nahmi ne, hitsë sa vengui chjí rë hacuahá hitsë sa tjín rë cjuaquixi. Hacuaha hacuiin xuta casahmi me, cuma cuinújan ne, hacuiin nguehe ngasunhndë vihi tacun. ¹²Hacuaha hacuiin ngatsë rë jni rë chu tentsun cojo jni rë chu ndyaja chihndë xi cavisehen me xcun Nina ta ngatsë rë jni rë suvá me. Hane ngu ndiya cavisehen ni me, hya xi ha cavaxëtje naja me xi quihndë tsjin nu tsjin nixtin chajá ngayaan. ¹³Hane jni rë chu tentsun cojo jni rë chu ndyaja cojo ndesu rë chu ndyaja chihndë ne, hora xi xinchutaha rë xuta xi camachocun yojo rë ne, caa rë tsityjahi rë yojo rë xuta jan cojo sa xi cuma tyjahi me xcun Nina. ¹⁴Ha hitsë sa jni rë Cristu, me xi tsjin nu tsjin nixtin cjuë Hasen rë, hacuahá casua suvá me yojo rë me cojo Nina, ngu cjuatjo xi hatuxa jercu tu

tyjahi camahani. Jni rë me jan ne, tsityjahi rë cjuatacun naja tsëhë yëjë xcusun xi machjiriin xi nihña, cojo sa xi cuma nihña xa rë Nina, me xi quicun.

Ngatsë rë jni ne, ma tyjahi yëjë ni xcusun

¹⁵ Vëhë xi Cristu ne, me vëhë xi sahmi tangun me xuta cojo Nina ngatsë rë ngu compromisu xatsë. Cahme me xi cuaxëtje me xuta tsëhë cjuatsehen xi casahmi xuta jinguyëjë rë xi sahmi xa cuaha compromisu xi tjun casahmi Nina. Hane ngatsë rë xi cuatjin cahme Cristu ne, vëhë xi xuta xi cavaxijin Nina ne cuma cjuahatsja me cjuandaja xi ha cachja Nina xi sua rë me, cjuandaja xi tsajin nu tsajin nixtin chjahataha rë.

¹⁶ Hiscan xi tjïn rë xuta ngu testamentu ne, cuma sahmi xa, peru hisca hya xi ha tjïn cjuaquixi xi ha cahme me xi casahmi xujun jan. ¹⁷ Ta ngu testamentu ne, vet-sihin sahmi xa ngatsë rë ngu cjuaveya ta, tsëhë xi jinguyëjë rë xi tacun quicun me xi casahmi ne, hatuxa tsajin rë ngahñu. ¹⁸ Vëhë xi hisca compromisu xi tjun casahmi Nina cojo xutachanga naja ne, hacuaha cojo jni rë chu camachihin. ¹⁹ Xi cavatju casua Moisés camachaya rë yëjë ni xuta yëjë ni cjuatsëhë ley xi casua Nina ne, sehe cafaha me hitsë tsanga hani cojo ngu tsja rë ya xi hmí rë hisopo, sehe catsicahnchi me cojo jni rë chu hndindyaja cojo jni rë chu tentsun, cavisecjan rë me nandá ne, sehe cavinchutaha rë me libru tsëhë ley hacuaha cavinchutaha rë me yëjë ni xuta. ²⁰ Ngajan xi cachja Moisés cojo xuta cuitjin: “Vihi jni xi sahmichihin rë compromisu xi cavitexa Nina hacutjin xi meje rë me xi nihña.” Cuatjin cachja me. ²¹ Hacuanitjin ni cojo yëjë ni xcusun xi sahmi xa cahntsua ndihya jan. ²² Sacuatjin vitexa ley ne, ha ña meje yëjë ni xcusun ne, ma tyjahi ngatsë rë jni. Hane

sa xi cuangaain jni ne, hacuaha sacuiin cjuaninchataha.

Casua Cristu yojo rë me xi cjuahaxin me cjuatsehen

²³ Vëhë xi camameje rë xi cuatjin camatyjahi rë yëjë xcusun xi sacuaha tjahnguen rë xcusun xi tjïn ngajan hiscan tacun Nina. Peru xcusun xi tjïn ngajan hiscan tacun Nina ne, camameje rë xi camatyjahi ngatsë rë cjuaveya xi hitsë sa ndacun xi cuma rë cjuaveya xi cuacun vë. ²⁴ Cristu ne, hacuiin cavisehen me ndava Nina xi xuta catsindaja me, ndihya xi tu cavetjutaha ni tsëhë hiscan xi cjuaquixi xi tacun Nina ta hisca ngahnga hiscan xi tacun Nina ne, ngajan xi cavisehen me. Cuatjin cavisehen me cojo sa xi quihndë ne, cuejña me xcun Nina, cuichjatje me ngatsë naja. ²⁵ Peru hacuiin cavisehen me xi sua me yojo rë me cojo Nina jemu cjín ndiya, sacuatjin sahmi nahmi xi matitjun xi chuva nu chuva nu visehen me ndava Nina cojo jni xi hacuiin jni rë me. ²⁶ Sa xi cuatjin cjín ndiya cavisehen Cristu ne, hacuaha cuatjin cjín ndiya camameje rë xi cueya me hisca hya xi cavetsihin ngasunhndë ne hisca quihndë. Peru quihndë xi ha tivitjnetaha nixtin changá vëhë ne, Cristu ne, ngu ndiya canduva ni me xi sua me yojo rë me xi cueya me cojo sa xi cjuahaxin me cjuatsehen. ²⁷ Ngayejen ni ne, hatuxa ngu ndiya ni cueyan. Ngaxtun vëhë ne, sehe tsichuva naja Nina cojo cjuatacun naja. ²⁸ Hacuanitjin ni Cristu ta hacuaha ngu ndiya ni casua me yojo rë me xi cjuahaxin me jyë rë jemu cjín xuta. Ngaxtun vëhë ne, cuinduva nga me xi ma jo ndiya, peru ha quihndë hacuiin tsëhë jyë rë xuta ta tsëhë xi cuaxëtje me xuta xi siuya rë me.

10 Peru ley rë Moisés ne, sacuaha tjahnguen ni rë yëjë cjuandaja xi sehe sua naja Nina. Hacuiin ndandaja sua ley vëhë machaya naja hacutjin jain

cun cjuandaja vëhë. Vëhë xi ley ne, tsajin nixtin xi cuma tsityjahi rë cjuatacun rë xuta xi tu nu tu nu fi me ndava Nina cojo chu xi tsiquehen me jan xi sua me cjuatjo cojo Nina. ² Sa xi cjuaveya rë chu vëhë caca rë catsityjahi jain rë cjuatacun rë xuta xi cafaharcun rë me ne, hacuaha ha quihndë tsiquin sa me chu ta, tsëhë xi xi má rë me ne, ha quihndë tsajin jyë rë me. ³ Peru xi cuatjin tsiquehen xuta chu ne, tu nu tu nu tsinguitsjen rë me tsëhë jyë rë me ta, ⁴ tsëhë xi jni rë chu ndyaja cojo jni rë chu tentsun ne, hatuxa maji fahaxin rë jyë rë xuta.

⁵ Vëhë xi hya xi cavéjña Cristu ngasunhndë ne, cachja me cojo Nina cuitjin: Ngayun ne, hacuiin suvá cjuaveya rë chu xi meje nuju, hacuiin suvá cjuatjo xi meje nuju, vëhë xi canihñu yojo naha.

⁶ Hacuiin suvá cjuatjo xi tí xi chuya nuju tsëhë, hacuaha hacuiin suvá ni jingu sa cjuatjo xi sua nuju xuta ngatsë rë jyë rë me xi chuya nuju tsëhë.

⁷ Sehe ngajan xi cachja nga Cristu: “Cua-jyihi ngahan nguehe, xi sahme yëjë ni hacutjin xi meje nuju, ngayun Nina naha, sacuatjin camahindu tsahan xcun xujun nuju.”

Cuatjin cachja Cristu cojo Nina. ⁸ Xi tjun tjun ne, cachja Cristu xi Nina ne, mijí rë me hacuaha chuyiin rë me tsëhë cjuaveya rë chu cojo jingu sa cjuatjo, cojo cjuatjo xi tí, cojo cjuatjo xi sua xuta ngatsë rë jyë rë me, handasa cuatjin vitexa ley xi cuatjin sahmi xuta. ⁹ Ngaxtun vëhë ne, cachja nga me xi tacun me xi sahmi me yëjë ni hacutjin xi meje rë Nina. Cuma cuinújan ne, tsicjë me xcusun changá xi hme chu, cojo sa xi cuejña me ngu xcusun xatsë xi sahmi xuta yëjë hacutjin xi meje rë Nina. ¹⁰ Nina ne, catsityjahi me cjuatacun naja ngatsë rë xi Jesucristu ne, casahmi me yëjë ni hacutjin xi meje rë Nina, ngatsë

rë cjuatjo xi casua Jesucristu xi casua me yojo rë me ngu ndiya ni.

¹¹ Yëjë ni nahmi ne, nchunchujun ni hinchacun me fahacuenda me xa rë me xi má me nahmi, hacuaha cuatjin cjín ndiya vuya sua me cjuatjo xi tu vëhë tu vëhë ni, xi hatuxa tsajin nixtin xi ma fahaxin rë jyë rë xuta. ¹² Peru Cristu ne, xi cavatju casua me ngu ni cjuatjo cojo Nina ngatsë rë jyë rë xuta ne, sehe quiji me ngahnga cavejña me taha ladu quixi tsëhë Nina. Hane cjuatjo xi casua me jan ne, tsajin nu tsajin nixtin xi meje rë xi cuya cjue nga xcun Nina. ¹³ Hane quiji me ngajan, cojo sa xi nixtin xi cjui sa ne, ngajan cuejñaya me hisca hya xi yëjë ni xi sahmi rë me condra ne, cuiyuju ngahma gubiernu rë me. ¹⁴ Vëhë xi ngatsë rë ngu ni cjuatjo vëhë ne, catsityjahi Cristu cjuatacun rë xuta xi ha Nina tiviyujuxin rë me xi cuma tsëhë me me, hane tsajin nu tsajin nixtin xi cuya cuet-sun nga cjuatacun rë xuta xi cuacun vë. ¹⁵ Hasen rë Nina ne, ha cuanitjin ni sua machaya naja cuitjin:

¹⁶ Sacuaha compromisu xi sahme cojo xuta xi cuacun vë hya xi cuma ngascan tsëhë nixtin vëhë ne, hacui vihi: Cueyá ley naha cahntsua cjuatacun rë me, sacuaha xi cumahindu cjua rë ley vëhë cahntsua cjuatacun rë me.

¹⁷ Hacuaha jyë rë me cojo cjuatsehen xi sahmi me ne, ha quihndë tsajin nixtin xi tsinguitsjen. Cuatjin cachja Hasen rë Nina. ¹⁸ Hya xi ha camanchataha jyë ne, ha quihndë mamijí rë xi cjue sa cjue sa cjuatjo xcun Nina ngatsë rë jyë vëhë.

Meje rë xi nihña tiña tsëhë Nina

¹⁹ Vëhë xi ngayejen ni ne, rcuun camahani xi cuiseen xcun Nina quihndë ngatsë rë jni rë Jesús. ²⁰ Jesús ne, cavux-aha me ngu ndiya xatsë xi cuma naja, ngu ndiya xi cjuecojo naja xcun cjuahñu,

ngu ndiya xi cjuecojo naja xcun Nina ngatsë rë cjuaveya rë Jesús. ²¹ Jesús ne, me vëhë má me nahmi xi jercu tu vengui camahani chjí rë, hacuaha sahmi naja me cuidadu ngayejen ni xi má ngayaan ladu rë Nina. ²² Ngatsë rë yëjë cjuat-acun vëhë ne, meje rë xi nihña tiña tsëhë Nina cojo nguñajatacun, meje rë xi tjin ngu tacun xi macjain naja Jesús ta, tsëhë xi cjuatacun naja ne, cach-jahaxin rë cjuatsehen xi cún tsëhë xi sacuaha xi caxinchutaha rë jni, hane yojo naja ne, sacuaha xi cafengui cojo nandá tyjahi. ²³ Meje rë xi hacuiin nis-metacun cjuandaja xi nújan xi vetahan tacun ta, tsëhë xi me xi cachja cojo naja yëjë cjuandaja xi sahmi me ngascan ne, hatuxa sahmicihin me yëjë cjuandaja vëhë. ²⁴ Meje rë xi cuinchan chuva rë hacutjin cuisecoon xingueen xingu xingu ngayaan cojo sa xi tjin naja cjuahmu-tacun hacuaha nihña cjuandaja. ²⁵ Mijí rë xi cuejñaxen xi ma tangun ngayaan sacuaha xcusun rë jingu sa xingueen. Xi meje rë ne, cuma tangun ngayaan cojo sa xi tahan cjuetacun xingueen xingu xingu ngayaan, hitsë guan ta nixtin xi cuin-duva Jesús ne, chutsejen ta ha tijima tiña.

**Handajasa cjuatjo casacu naja
cjuahñu xatsë, peru suaain cahndë
xi tujyë nihña cjuatsehen**

²⁶ Cuatjin meje rë xi nihña ta sa xi ngu xingueen xi ha ndaja cafahatsja me cjua xi ha cjuaquixi cjuenduju me cojo ngu ndiya rë cjuatsehen ne, ha quih-ndë tsajin sa mé cjuatjo xi cuma cjue ngatsë rë jyë rë me. ²⁷ Cahndë rë vëhë ne, hatuxa sacú rë me castigu, cjue cuetí me xcun ndihi xi ha jima tiña nixtin xi tsicjé rë yëjë xi choho vëë rë Nina. ²⁸ Hya xi ngu xuta tsitjungui me ley rë Moisés ne, cojo jo cojo jyan ni xuta xi tsinguixi me xi cuaaintjin sahmi xuta vëhë ne, chja ley ta hatuxa cueya me,

hacuaha hisca ngu tsajin yo cumayuma rë tsëhë me. ²⁹ Ngayun ne, ha ndaja hyun ta hitsë sa jercu jyihi camahani castigu meje rë xi cuma xuta xi sune tsufë me Quihndi rë Nina, hacuaha tsin-gatahacacun me xi tsajin mé vengui chjí rë jni rë Quihndi rë Nina jan, hacuaha choho chja me tsëhë Hasen rë Nina xi jercu casua rë xuta jan cjuandaja. Jni xi tsitjungui xuta jan ne, jni vëhë xi casah-michihin rë compromisu xi cachja Nina, hacuaha ngatsë rë jni vëhë ne, camaty-jahi cjuatacun rë xuta jan. ³⁰ Ngayaan ne, ha hyan Nai naja, hane me vëhë xi cachja me cuitjin: “Ngahan satë ná xi sahmengojo cojo xuta tsehen; hatuxa ngahan sahmengojo.” Hacuaha chja nga me ngu ndiya cuitjin: “Ngahan Nai nuju ne, cjuahá chuva xuta naha.” Cuatjin cachja Nai naja. ³¹ Jemu jyë chircun sa xi ngayaan cjuinenguenyan ngajñi rë castigu xi sahmi Nina, me xi quicun!

³² Peru ninguitsjun nixtin titjun, hya xi ha cafë cachjuhunntsun cjuahasen rë Nina sehe caca nuju cojo ngu cjuacjin-tacun jyë xi casua nuju cjuañihi xi cavatjun camá. ³³ Jiya hora ne, xcun cojo xcun ni choho cachja xuta tsu-jun hacuaha casua nuju me cjuañihi, hacuaha jiya hora nga ne, cavise-cuun rë xuta xi cuatjin cavatju me camá. ³⁴ Chjá cuatjin ta hacuaha hvë xi hacuaha camayuma nuju me xi hinchanda vaya. Hacuaha hisca cojo cjuasua caningatuhun xi cachjahataha cjuachan rë yëjë ni xcusun xi ngayun tsujun, tsëhë xi ha hyun ta ngajan ngahnga ne, ha tjin nuju ngu xcusun xi hitsë sa ndaja, xi tsajin nu tsajin nixtin cjuë. ³⁵ Xicanismutacuun cjuatacun xi rcun camahani, ta xi cuatjin cuanguncujun cjuatacun vëhë ne, Nina ne, hatuxa jemu jyë cjuatjo xi sua nuju me. ³⁶ Ngayun ne, meje rë xi scaa nuju cojo cjuacjintacun xi vatjun má, cojo sa xi hya xi cuatjin cafë canihñu hacutjin xi meje rë Nina ne, sacú nuju

cjuandaja xi ha cachja Nina xi sua nuju me. ³⁷ Xujun rë Nina ne, cuitjin chja: Ha tu chúva sa nixtin ne, me xi cuinduva ne, hatuxa cuinduva me, ha quihndë cuindeyaain rë me.

³⁸ Xuta naha xi tsajin jyë rë me ne, sacú rë me cjuahñu xatsë ngatsë rë xi mangucacun me cojo ná; peru sa xi cuya me cjue ngaxtun me ne, chuyiin ná tséhë me.

Cuatjin chja xujun rë Nina. ³⁹ Peru ngayaan ne, hacuiin tangun ngayaan cojo xuta xi vuya fi ngaxtun me sehe tsicjë Nina me ta ngayaan ne, tangun ngayaan cojo xuta xi mangucacun me cojo Nina sehe cuaxëtje Nina me.

Ninguitsjen xutachanga naja xi jemu camangucacun me cojo Nina

11 Quihndë ne, hya xi ha camangutacun cojo ngu cjua ne, sacuahä xi ha tjin naja cjuaquixi xi hatuxa sacú naja ngu xcusun xi vetahan tacun, sacuahä xi ha hyan xi xcusun xi matsijin ne, hacuahä cjuaquixi. ² Tséhë xi xutachanga naja ne, camangucacun me cojo Nina, vëhë xi Nina cachja tséhë me xi tsajin xi cún rë me xcun Nina.

³ Tséhë xi mangutacun cojo Nina ne, vijnercun xi Nina cojo cjua ni rë me ne, catsindaja me ngasunhndë, hacuiin cafaha me ngu xcusun xi matsejen xi catsindaja me ngasunhndë vi xi tsejen naja.

⁴ Tséhë xi camangucacun xutachanga naja Abel cojo Nina ne, hitsë sa ndaja cjuatjo xi casua rë me Nina xi cuma rë cjuatjo xi casua xutachanga naja Caín. Vëhë xi Nina ne, cachja me xi Abel ne, tyjahi me cojo cjuatacun rë me. Hacuaha suvá Nina catsingacun me xi cjuatjo xi casua Abel ne, jemu ndaja. Hane tséhë xi cuatjin camangucacun Abel cojo Nina ne, vëhë xi handasa cahme me, peru hisca quihndë ne, cumachjirëhë sa naja cjuatacun rë me.

⁵ Tséhë xi camangucacun xutachanga naja Enoc cojo Nina ne, cachjahataha rë me tséhë ngasunhndë vi, cojo sa xi cueyaain me. Hane ha quihndë casacuiin me ta, tséhë xi Nina cafahataha rë me. Peru chaja sa xi cjuahataha Nina me ne, ha camatsejen xi Nina ne, jemu cachuya rë me tséhë Enoc. ⁶ Peru sa xi manguaaintacuun cojo Nina ne, cumaji niñña xi chuya rë me tsajan. Xuta xi sahmi tiña me tséhë Nina ne, meje rë xi macjain rë me xi tjin jain Nina, hacuahä Nina vëhë xi jemu jyë cjuatjo xi sua rë me xuta xi cuacun vangui rë me.

⁷ Tséhë xi camangucacun xutachanga naja Noé cojo Nina ne, hya xi casua Nina camachaya rë me tséhë xcusun xi cjëë cuma ne, casahmi me ngu barcu cojo sa xi cuetjutje me cojo xuta rë me. Cuatjin casahmi me ta, tséhë xi faharcun me Nina. Hane xi cuatjin camangucacun me cojo Nina hacuahä casahmi me cuatjin ne, ngajan camatsejen xi yëjë sa xuta tséhë ngasunhndë ne, chajá me. Hane Noé ne, cuatjin camatyjahi me cojo cjuatacun rë me sacuatjin matyjahi ngayaan cojo cjuatacun naja xi mangutacun cojo Nina.

⁸ Tséhë xi camangucacun xutachanga naja Abraham cojo Nina ne, hya xi cachja Nina xi cuetjuxin me tséhë nangui hiscan xi tacun me xi cjue me ngu cahndë hiscan xi sua Nina xi cuma tséhë me ne Abraham ne, cahndë me tséhë Nina hane cavetju me quiji me, handasa hvíin me jani cuechú me. ⁹ Tséhë xi camangucacun Abraham cojo Nina ne, caviyujutaha me ngu nangui xín xi cachja Nina xi sua rë me. Hane ndihya tsjian ni caviyuju me cojo quihndi rë me, Isaac cojo Jacob, quihndi xi hacuahä cojo cjuahatsja cjuandaja xi ha cachja Nina xi sua me jan. ¹⁰ Cuatjin caviyuju Abraham ta, tséhë xi jemu meje rë me xi cuechú me ngu nandya xi ndaja hñu cun ndihya rë cojo xihndëñaña rë, ngu

nandya xi Nina cavejña me cjuatacun rë me hacutjin cuma, hacuaha me vëhë casahmi me. ¹¹ Tsëhë xi camangucacun Abraham cojo Nina ne, Nina casua rë me ngahñu xi cuma sacú rë chjuun rë me quihndi, handasa Sara chjuun rë me ne, hatuxa maji sacú rë me quihndi hacuaha Abraham ne, jemu changá me xi sehe sacú rë chjuun rë me quihndi. Cuatjin camá ta, tsëhë xi camangucacun Abraham xi Nina ne, hatuxa sahmichihin me cjua xi cachja me. ¹² Vëhë xi ngatsë rë ngu ni Abraham ne, handasa hatuxa ha quihndë tsajin rë me ngahñu xi sacú rë chjuun rë me quihndi ne, peru tjë rë me ne, tangun cjin camá cojo niñú xi yaja ngahnga, tangun cojo tsumi rë tjehe ndachacun xi maji maxqui.

¹³ Yëjë ni xutachanga naja xi cuacun vë ne, mangucacun cuaha me cojo Nina hya xi cahme me. Casacuiin rë me cjuandaja xi cachja Nina xi sua rë me, peru sacuaha xi ha cavëë me cjuandaja vëhë hane jemu ndama rë me. Cachja quixi me xi sacuaha xuta ngu nangui me xi caviyujutaha me nguehe ngasunhndë. ¹⁴ Hane xuta xi chja cuatjin ne, jemu quixi sua me machaya naja xi tivangui sa me ngu nangui xi cuma tsëhë suvá me. ¹⁵ Sa xi catsinguitsjen sa me nangui hiscan cavetju me ne, tjin sa rë me chuva rë xi camá cavuya me jan. ¹⁶ Peru me xi cuacun vë ne, xi meje rë me ne, ngu nangui xi cuma tsëhë suvá me ngajan ngahnga hiscan tacun Nina. Vëhë xi Nina ne, ma savaain rë me xi hmí rë me Nina rë xutachanga naja xi cuacun vë, tsëhë xi ha tjin ndaja rë Nina ngu nandya xi cumá rë me.

¹⁷ Tsëhë xi camangucacun xutachanga naja Abraham cojo Nina ne, hya xi catsichuva Nina me cojo cjuatacun rë me ne, casua Abraham cojo Nina quihndi rë me Isaac. Hane Abraham, me xi cachja Nina xi sua rë cjuandaja ne, cavejñangucacun me xi sua me quihndi ngu rë

me, ¹⁸ handasa cuitjin cachja Nina cojo rë me: “Suvá tjë rë quihndi riji Isaac ne, vëhë ni xuta xi cumá tjë riji xi cjuaquixi.” Cuatjin cachja Nina. ¹⁹ Abraham ne, camacjain rë me xi Nina ne, tjin jain rë me chuva rë xi hisca nima ne, tsicuya me cjuahñu. Cuatjin camá xi sacuaha xi ngajñi rë nima jain cavuya cafahatsja Abraham quihndi rë me.

²⁰ Tsëhë xi camangucacun xutachanga naja Isaac cojo Nina ne, catsinchacun me quihndi rë me Jacob cojo Esaú. Cachja me yëjë mé xi nduva ngascan xi cuma rë quihndi rë me.

²¹ Tsëhë xi camangucacun xutachanga naja Jacob cojo Nina ne, hya xi ha meje cueya me ne, catsinchacun me jima ngu quihndindai rë me xi quihndi rë xutachanga naja José, hacuaha cafaharcun me Nina taha yahangui me bastón rë me.

²² Tsëhë xi camangucacun José cojo Nina ne, hya xi ha meje cueya me ne, caveyanangui me xi cuechú nixtin xi yëjë ni xutachanga naja ne, cuetjuxin me tsëhë nangui Egipto, hacuaha cavitexa me hacutjin cuma cojo rë ninda rë me hya xi ha cahme me.

²³ Tsëhë xi camangucacun xutacha rë xutachanga naja Moisés cojo Nina ne, hya xi catsin Moisés ne, jyan sá caveyahma me, tsëhë xi cavëë me xi quihndinda jan ne, jemu ndajyihi camahani, hane cavincharcuain rë me yojo rë me tsëhë cjua xi cavitexa me xi matitjun xi cueya yëjë ni quihndinda xi xihin tsëhë xutachanga naja.

²⁴ Tsëhë xi camangucacun Moisés cojo Nina ne, hya xi camachangá me ne, catsitjungui me cahndé rë me xi má me quihndi rë na quihndi rë me xi matitjun tsëhë nangui Egipto. ²⁵ Hitsë sa cachuya rë me xi cjue me choho cuatju me cuma cojo xuta rë Nina, xi cuma rë xi sua me cjuasua xahasen rë me nguhñu ngu hora ni ngajñi rë cjuatsehen. ²⁶ Catsingatahacacun me xi hitsë sa vengui chji rë xi scaa

rë me xi choho cuichja xuta tsëhë me ngatsë rë xi sahmi tangun me cojo xutachanga naja xi ha Nina cavaxijin me, xi cuma rë xi sacú rë me cjuanchina rë Egipto. Cuatjin catsingatahacacun me ta, tsëhë xi hatuxa quitahacacun me cjuatjo xi sua Nina me ngascan. ²⁷ Tsëhë xi mangucacun me cojo Nina ne, cavetjuxin me tsëhë nangui Egipto, hacuaha hisca cavincharcuain rë me yojo rë me tsëhë xi cjan rë me xi matitjun jan. Cacao rë me cojo yëjë ni cjuacjintacun vëhë sacuaha xi tivutsejen me Nina xi matsijin. ²⁸ Tsëhë xi mangucacun me cojo Nina ne, casahmi me suhi tsëhë Pascua, hane cavitexa me yëjë ni xutachanga naja xi cuinchataha me jni rë chu ngajan ya ngahñu rë tingotjo ndava me xingu xingu me, cojo sa xi hora xi cjeuehe hasen xi tsiquehen rë quihndi tjun rë yëjë ni xuta ne, tsiquin rë hisca xi ngu quihndi tjun rë xutachanga naja.

²⁹ Tsëhë xi mangucacun xutachanga naja cojo Nina ne, cavatjucja me Ndachacun Hani sacuaha vatju me nangui quixí. Hya xi camá ne, xi canduva xuta Egipto tivatju me ne, hora vëhë cavuya camatangun nga nandá hane ngajan cafë xuta xi cuacun vë.

³⁰ Tsëhë xi mangucacun xutachanga naja cojo Nina ne, cavitijñundee me hnhua xondyojo tsëhë nandya Jericó, hane xi cavatju yatu nixtin ne, cavixujne hnhua vëhë. ³¹ Hacuaha tsëhë xi mangucacun ngu na Jericó xi hmí rë Rahab cojo Nina ne, hacuiin hya xi cahme yëjë sa xuta Jericó xi cahndiin tsëhë Nina, hya cahme na xi viteña yojo rë vë ta, tsëhë xi cojo cjuandaja cafahtsja na ngu jo xutachanga naja xi quiji cavutsejen-sun me nandya Jericó jan.

³² ¿Mé sa xi meje nuju xi cuichjá cojo nuju? ta hisca chutaain sa hora xi cuichjá cojo nuju tsëhë xutachanga naja Gedeón, cojo Barac, cojo Sansón, cojo Jefté, cojo David, cojo Samuel, cojo yëjë sa profeta.

³³ Xuta xi cuacun vë ne, tsëhë xi camangucacun me cojo Nina ne, caca rë me hya xi casahmi me si cojo xuta tsëhë jingu sa nandya, casahmi me xi ndiya rë cjuaquixi, cavetjucaa ngu jo cjuaxi cachja Nina cojo rë me. Camaji cavuxaha chu xa hntsua chu hora xi meje sinë chu me. ³⁴ Catiin me hya xi cavincha xuta me ngajñi ndihi xi meje cuaca me me. Cavatjuhnga me tsëhë xuta xi meje tsiquehen rë me cojo quicha. Handasa jemu ndaya tjín cacun me ne, casacu rë me ngahñu. Jemu casacu rë me ngahñu hya xi casahmi me si cojo xuta tsëhë jingu sa nandya, caca rë me catsinguijne me xuta xi choho vëë rë me. ³⁵ Ngu jo yachjin ne, cavuya cafahtsja me xuta rë me xi cavuya cjuahñu hya xi cahme.

Peru ngu jo nga xutachanga naja ne, jercu cavaja xuta me. Peru catsingatiin me xi sehenndaya me ta, tsëhë xi mijí tsismicacun me Nina hacuaha meje rë me xi sacú rë me ngu cjuahñu xatsë xi hitsë sa ndajiyihi. Vëhë xi caca rë me hya xi cavaja xuta me hisca xi cahme me. ³⁶ Hane ngu jo nga me ne, catsixcuehyu xuta me, hacuaha cavaja xuta me cojo cuarta rë chu, hisca quiji me ndavaya hacuaha camahñu me cojo cadena. ³⁷ Catsiquehen xuta me cojo ndyojo, cavatëcja vasen xuta me cojo quicha nehñu, catsiquehen xuta me cojo quicha, catsujiyihiya nguehe catsujiyihiya ngajan me tixtë rë me chuxin rë chu tsánga cojo chuxin rë chu tentsun. Jemu camachaja rë me, jemu jyë cjuañihi cavatju me camá, choho casahmi xuta cojo rë me. ³⁸ Xutachanga naja xi cuacun vë ne, hisca vechiin chuva rë xi sacú rë ngasunhndë me. Catsujiyihiya me ngajan ngu xín camahani hiscan naxindya, hiscan ngujo, hisca ngu ngojo naxi caviyuju me.

³⁹ Peru xuta xi cuacun vë ne, handasa ha cavetjundaja me ngatsë rë xi mangucacun me cojo Nina ne, peru hisca

xi ngu me casacuiin rë me cjuandaja xi ha cachja Nina xi sua rë me, ⁴⁰ tsëhë xi Nina ne, hya xi catsingatahacacun me ngatsë naja ne, ha cavejñangucacun me xi sahmi me ngu xcusun xi hitsë sa ndaja, xi hisca nixtin quihndë ne, sahmi Nina xi cuechutaha xutachanga naja xi cuacun vë yëjë ni hacutjin xi meje rë Nina xi cuechutaha me, sacuatjin tisahmi Nina cojo naja ngayaan quihndë.

Meje rë xi cuejñahñu cjuatacun naja cojo Jesús

12 Vëhë xi ngayaan ta ha jemu cjin xutachanga naja xi machaya naja xi camangucacun me cojo Nina ne, meje rë xi cuejñaxen yëjë ni xcusun xi sah-mindya naja, hacuaha cuejñaxen cjuat-sehen xi mijí cjuexin tsajan, hacuaha nihña ngahñu xi scaa naja cuanguen nduju cojo ndiya xi Nina cavejña me xi cuma naja. ² Hacuaha meje rë xi cuejñahñu cjuatacun naja cojo Jesús, me xi cavejña ntsacu cjuachacun xi macjain naja hacuaha catsichihin me. Ngatsë rë cjuasua xi cavejña Nina xi cuma rë Jesús ne, caca rë me cojo cjuañihi xi casetaha me xcun cru, hisca casahmicuendaain me xi jemu cjuasava xi cuatjin cahme me. Hya xi camá ne, sehe quiji me ngahnga, hane ngajan tacun me taha ladu quixi tsëhë Nina.

Meje rë xi ningatehen xi cueyaquixi naja Nina ndiya

³ Vëhë xi ninguitsjun Jesús, me xi ca-caa rë cojo yëjë xcusun xi casahmi xuta tsehen hya xi catsitjungui me Jesús. Ninguitsjun me, cojo sa xi hacuiin cjuenda rë cjuatacun nuju, hacuiin cuma ndaya tacún. ⁴ Ta ngayun ne, hisca cjuaveya cjëë cuechuntuhun xi nihñu ngahñu xi ningatuun rë cjuatsehen. ⁵ Sacuaha xi ngayun ne, canichayun cjuaxi chja Nina cojo nuju sacuaha chja ngu nahmi cojo quihndi rë me xi chja cuitjin:

Hacuiin tu xcuehyu ni cumacjain ri hya xi Nai naja tiveyaquixi me ngaye ndiya, tsan,

hacuaha hacuiin cuma ndaya tacuin hya xi tichjataha me ngaye.

⁶ Ta Nai naja ne, quihndi xi hmucacun me ne, veyaquixi me ndiya,

hacuaha sahmi me castigu yëjë ni xuta xi fahatsja me sacuaha quihndi rë me.

Cuatjin chja cjuaxi jan. ⁷ Ngayun ne, caticaa nuju cojo yëjë ni cjuacjintacun, ta xi cuatjin vatjun má ne, Nina tiveyaquixi nuju me ndiya. Nina ne, vut-sejen me ngayun sacuaha quihndi rë me ta, cjuaquixi xi tsajin ngu quihndi xi nahmi rë ne, veyaquixiin rë ndiya.

⁸ Peru sa xi Nina cueyaquixiin nuju me ndiya sacuatjin veyaquixi me ndiya tsajan ngayejen ni ne, ngajan matsejen xi hacuiin quihndindaja rë me ngayun.

⁹ Ngayaan ne, hacuaha tjin xutacha naja nguehe ngasunhndë xi cavinchaquixi naja me ndiya, hacuaha cachjahanrcun me. Peru hitsë sa meje rë xi cuinuhyan tsëhë Nina Nahmi naja xi tacun me ngahnga. Xi cuatjin ne, cuechuntahan ngu cjuahñu xatsë. ¹⁰ Me xi cuacun vë ne, cavinchaquixi naja me ndiya ngu jo nixtin ni hacutjin xi má rë me xi ndatjin. Peru xi vinchaquixi naja Nina ndiya ne, ngayaan ndaja tsajan, cojo sa xi cuma tyjahi cjuatacun naja sacuatjin tyjahi cjuatacun rë suvá me. ¹¹ Hya xi tjin yo vinchaquixi naja ndiya ne, hacuiin ndama naja ta choho má naja, hora xi tichja me cojo naja. Peru sa xi cuinuhyan ne, xi cuma ngascan ne, sacú naja cjuandaja cjuajeya xi cuma tyjahi cjuatacun naja.

Mijí rë xi nitjunguen Nina

¹² Vëhë xi ngayun xi ndaya tjin tacún xi tivangun cojo ndiya rë Jesús ne, tuhun ngahñu xahasen nuju. ¹³ Ngu quixi tán-gun ni cojo ndiya rë Jesús, cojo sa xi yo xi ndaya tjin cacun ne, hacuiin chajá

tsêhê ndiya rê Jesús ta sacú rê ndiya xi cjuaquixi.

¹⁴ Nihñu ngahñu xi cuinechun ngu cjuandaja ngu cjuajeya cojo yêjê ni xuta, hacuaha nihñu ngahñu xi cuma tyjahi cjuatacun nuju, ta hisca xi ngu xuta ne, cuechiin me xcun Nai naja sa xi hacuiin tyjahi cjuatacun rê me.

¹⁵ Nechun cuidadu cojo sa xi tsajin ngu xuta xi cuechintaain me cjuandaja rê Nina, ta ngaxtun vêhê ne, choho cuma rê me hane tu hitsê tu hitsê ne, tsinguet-sun me cjuatacun rê jemu cjin xuta.

¹⁶ Nechun cuidadu cojo sa xi tsajin ngu xuta xi sahmi me cjuatsehen cojo ngu xi hacuiin chjuun rê me. Hacuaha nechun cuidadu cojo sa xi tsajin ngu xuta xi hisca sahmicuendaain me Nina, sacuatjin rê xutachanga naja Esaú, xi casua me yêjê cjuanchina xi satê rê me xi má me quihndi tjún, ngatsê rê ngu comida xi cajinê me. ¹⁷ Ngayun ne, ha hyun ta xi camá ngascan hya xi meje cjuahatsja me ximinchacun rê nahmi rê me ne, cavitjungui me, tsêhê xi ha quihndê tsajin chuva rê xi tsindeya me cjuatacun rê me, handasa hisca cajihnda me xi meje rê me xi cuatjin cuma.

¹⁸ Ha jemu hatsêê xi xutachanga naja ne, quiji casahmi tiña me tsêhê ngu naxi xi tacun nguehe ngasunhndê hiscan xi catí ngu ndihi jyê, hiscan xi jemu jñu camahani, hiscan xi jercu hñu camahani cavanga tjo, ¹⁹ hiscan xi canuhya rê xi fane ngu tyjo, hiscan xi canuhya rê cjua xi cachja Nina. Hane xuta xi cahndê me cjua vêhê ne, jercu cafehya rê me xutachanga naja Moisés xi ha quihndê cuichjaain sa Nina cojo xuta xi cuacun vê. ²⁰ Cuatjin cachja me ta, tsêhê xi cacaain rê me cojo cjua xi cachja Nina hya xi cachja me cuitjin: “Yo xi cjue cuisane ntsacu hiscan naxi vê ne, meje rê xi cueya cojo ndyojo, handasa ngu chu.” Cuatjin cachja Nina. ²¹ Xcusun vêhê ne, ngu chircun jyê, vêhê xi hisca Moisés

ne, cuitjin cachja me: “Jemu tsácjun, ña fatsê ngahan.” Cuatjin cachja me.

²² Peru ngayun ne, casatiin sa nuju cjuacjintacun vêhê ta ngayun ne, canihñutangun cjuatacun nuju cojo Nina xi quicun, me xi tacun ngajan ngahnga, sacuaha nandya xi hmí rê Jerusalén, ndetjún xi hmí Sión. Canihñutangun cjuatacun nuju cojo yêjê jercu tu cjin camahani ángel xi tjin tangun xi sahmi jyê sahmi hnga rê Nina. ²³ Ngayun ne, canihñutangun cjuatacun nuju cojo yêjê xuta xi cahme xi quihndi rê Nina xi tjin tangun ngajan ngahnga hiscan xi siutahaxujun ñihi rê. Yêjê nima vêhê ne, vêhê xi sacuaha quihndi tjun rê Nina. Canihñutangun cjuatacun nuju cojo Nina, Nina xi tsichuva rê yêjê ni xuta cojo cjuatacun rê me. Ngayun ne, canihñutangun cjuatacun nuju cojo hasen rê xuta xi tsajin jyê rê, xi casahmi Nina xi cavechutaha me yêjê ni hacutjin xi meje rê Nina xi cuechutaha me. ²⁴ Ngayun ne, canihñutangun cjuatacun nuju cojo Jesús, me xi sahmitangun rê xuta cojo Nina ngatsê rê ngu compromisu xatsê. Hacuaha canihñutangun cjuatacun nuju cojo jni rê Jesús jan ne, hitsê sa ndaja sua machaya naja tsêhê cjuandaja rê Nina xi cuma rê jni rê xutachanga naja Abel.

²⁵ Nechun cuidadu, hacuiin nitjungun Nina, me xi tichja cojo naja. Ta sa xi xutachanga naja cavatjinhngaain me tsêhê castigu hya xi catsitjungui me Moisés, me xi cachja cjua rê Nina cojo xuta nguehe ngasunhndê ne, hitsê guan ngayaan, sa xi nicuyan taha ngaxtuun tsêhê Jesús, me xi tichja cojo naja hisca ngajan ngahnga. ²⁶ Sacuaha nixtin rê xutachanga naja jan ne, ña nangui cafiniya cojo cjua xi cachja Nina, peru quihndê ne, chja me cuitjin: “Ngu ndiya sa tsiniya nangui, peru hacuiin suvá nangui ni tsiniya ta cojo ngahnga tsiniya.” Cuatjin chja Nina. ²⁷ Hya xi chja me cjua xi “ngu ndiya sa” ne, sua machaya naja

xi chjahaxin rë yějë ni xcusun xi finiya, cuma cuinújan ne, yějë ni xcusun xi Nina casahmi me, cojo sa xi cuiyuju xcusun xi maji finiya. ²⁸ Vêhë xi quihndë ne, tahan nacuechji rë Nina ngatsë rë xi tiviseen ngahma gobiernu rë me; gobiernu vêhë ne, vêhë xi maji finiya. Hane xi cuatjin nihña ne, chjahanrcun Nina sacuatjin xi chuya rë me, cojo yějë ni cjuandaja cjuajeya tsêhë xi ngayaan ne, rcun me. ²⁹ Cuatjin meje rë xi nihña ta Nina naja ne, tsicjê me yějë ni xi cjuatsehen sacuatjin rë ngu ndihi jyê xi tsicjê cuaca rë yějë ni xcusun xi ma tí.

Meje rë xi nihña hacutjin xi chuya rë Nina

13 Tángun nduju cojo xcusun naja xi nihñahmutacun xingueen sacuahha xi ngu jni ngu yojo naja. ² Hacuini nichayun xi cojo cjuandaja chjuhunnstun xuta ngu nangui xi cjuethe nangui nuju ta tjin ngu jo xutachanga naja ne, cuatjin cafahtsja me xuta ngu nangui xi cafehe nangui rë me ne, hisca hvíin me ne, ángel xi cafahtsja me jan. ³ Ninguitsjun xuta xi hinchha me ndavaya. Nihñucueundun sacuahha xi cojo ngayun nechunyun cojo rë me ndavaya. Hacuaha ninguitsjun xuta xi choho sahmi jingu sa xuta cojo ta, tsêhë xi ngayun ne, tjin ngu nixtin ne, hacuahha cuma cuatjun cuatjin. ⁴ Ngayujun ni ne, meje rë xi chjuhuncun xi hmí rë cjuavixan. Hisca ngu ngayun ne, mijí rë xi ninguetun ngu cjuavixan xi ha tjin ndaja ta cuechu nixtin xi Nina ne, sahmi me castigu xuta xi sahmi me cjuatsehen cojo ngu xi hacuiin chjuun hacuiin xihin rë me, há tjin chjuun tjin xihin rë me ne, o há tsajin chjuun tsajin xihin rë me.

⁵ Hacuini jercu meje nicujun tujún xi tivangun cojo nixtin nuju. Catamangutacun ni cojo xi ha tjin nuju. Cuatjin nihñu ta, tsêhë xi Nina ne, cuitjin cachja

me: “Hatuxa tsajin nixtin xi tsismecácun nuju.” Cuatjin cachja me. ⁶ Vêhë xi jemu ndama naja xi cuitjin nújan:

Nai naja ne, me vêhë xi visecoo ná me; vêhë xi tsacjuun.

¡Ndastu mé sahmi xuta cojo ná ngahan! Cuatjin nújan.

⁷ Ninguitsjun me xi matitjun ngajñi nuju, me xi cuacun cachja cojo nuju cjuar rë Nina. Ningatuhuntacún tsêhë cjuandaja xi cavetjucua tsêhë xcusun xi casahmi me, hacuahha catamangutacún cojo Nina sacuatjin camangucacun me xi cuacun vê.

⁸ Yějë ni cjuatacun xi tjin rë Jesucristu hisca ntsacu cavetsihin ne, cjuatacun vêhë tjin rë me hisca quihndë, hacuahha cjuatacun vêhë tjin rë me yějë nixtin xi cjui sa. ⁹ Xicatsanguun ndiya rë jingu sa cjuachacun xi hacuiin tangun cojo cjuachacun xi cjuaquixi. Hitsë sa ndaja xi ngayaan ne, cumangutacun cojo Nina ngatsë rë cjuandaja rë me, xi cuma rë ngatsë rë cjuachacun xi vicuya yahnga xuta hacutjin xi meje rë xi xinë xi siuhun ta, tsêhë xi cjuachacun xi vicuya xuta xi cuacun vê ne, tsajin mé machjirêhë rë xuta xi tjengui me cjuachacun vêhë.

¹⁰ Cjuaveya rë Jesucristu ne, tangun hitsë cojo cjuatjo xi tu nu tu nu ni cjue xcun Nina ngatsë rë jyê rë yějë ni xuta. Tangun hitsë ta, tsêhë xi sacuahha nahmi xi sahmi me xcusun rë xutachanga naja ne, hatuxa cumaji sinë me yojo rë chu xi hme xi sua me sacuahha ngu cjuatjo vêhë. ¹¹ Ngayujun ni ne, ha ndaja hyun ta nahmi xi matitjun ne, vaha me jni rë chu xi cahme, ficojo me ngajan Cahndé Rcu, xi sua rë me Nina sacuahha ngu cjuatjo ngatsë rë jyê rë xuta, peru yojo rë chu ne, cahndé rë xi sinë me ne, cjue ngajan ngu xín tsêhë nandya, hane ngajan cjuê cueti. ¹² Cuanitjin rë Jesús ta ngajan ngu xín tsêhë nandya cahme me. Cahme me cojo sa xi tsityajahi me cjuatacun rë xuta ngatsë rë jni

rë suvá me. ¹³Ngajan xi ngayaan ne, cuetjunxen tsêhë nandya, cuma cuinújan ne, cuetjunxen tsêhë xcusun rê xutachanga naja, cuanguentjenguen Jesús, hacuaha meje rê xi scaa naja xi choho chja xuta tsajan sacuatjin choho cachja me tsêhë Jesús. ¹⁴Cuma cuetjunxen tsêhë nandya vë ta, tsêhë xi nguehe ngasunhndë vi ne, tsajin naja ngu nandya xi cuejña yějë nu yějë nixtin ta ngayaan ne, tivinchasen sa nandya xi tsindaja Nina xi cuma ngascan, cuma cuinújan ne, ngajan ngahnga. ¹⁵Vêhë xi ngayaan ne, xi tivanguen ndiya rê Jesús ne, meje rê xi yějë ni hora naxenndajan Nina, sacuaha xi titahan ngu cjuatjo xi cuma rê me, cuma cuinújan ne, meje rê xi ndaja cuinújan tsêhë me, meje rê xi cuinújanquixen xi tsêhë me ngayaan. ¹⁶Hacuiin nichayun xi nihñu cjuandaja hacuaha cuisekun xingun xingu xingu ngayun ta xi cuatjin nihñu ne, sacuaha xi tituhun rê Nina ngu cjuatjo xi jemu chuya camahani rê me tsêhë.

¹⁷Tinuhyun tsêhë me xi matitjun ngajni nuju, hacuaha nihñu yějë hacutjin xi meje rê me xi cuacun vë ta me vêhë xi sahmi cuidadu nuju me hacuaha vëe me xi cuechu nixtin xi sua me cuenta cojo Nina. Nihñu ngahñu xi me xi cuacun vë ne, cuma sua rê xahasen rê me, hacuiin choho cuma rê me xi tisahmi me xa cuatjin ta sa xi choho cuma rê me ne, tsajin më machjirêhë xi cuma nuju.

¹⁸Nihñu oración ngatsë niji ta, tsêhë xi ngayin ne, hyin cojo cjuatacun niji xi cjuatacun niji ne, tyjahi, hacuaha hatuxa meje nihñi cjuandaja ngajni rê tu mé ni cjuacjintacun. ¹⁹Hacuaha ngahan ne, jercu cjuéhya sa nuju xi cuatjin nihñu

oración ngatsë niji, cojo sa xi sua Nina cahndë xi hitsë sa xati cuinduvatjengë nuju.

Nguehe cuijnetaha cjua

²⁰Quihndë ne, ngayaan ne, ha hyan ta Nina ne, sua naja me cjuandaja cjua-jeya, hacuaha catsicuya me Nai naja cjuahñu, me xi cavejña ngajni rê nima. Nai naja ne, hacuaha jemu ndaja sahmi naja me cuidadu sacuaha sahmi cuidadu ngu xuta chu tsánga rê me. Cuatjin ma sahmi Nai naja ngatsë rê jni rê me xi cavetju hya xi cahme me, jni xi casamichihin rê compromisu xi yějë nu yějë nixtin sahmi xa. ²¹Nina catisua nuju me yějë cjuandaja rê me, cojo sa xi ngayun ne, cuma nihñu yějë hacutjin xi meje rê me. Hacuaha catisahmi me cojo naja hacutjin xi chuya rê me, ngatsë rê xi ngayaan ne, tjin tangun cjuatacun naja cojo Jesucristu. Hane ngayaan ne, meje rê xi nihña jyë nihña hnga Jesucristu yějë nu yějë nixtin. Cuatjin jain.

²²Ngayujun ni ne, nihñu favor ne, tisiñuju cojo cjuasua cjua xi catsihindu nuju vë ta hacuaha hacuiin cjín cjua vë xi catsihindu nuju. ²³Nguehe tisuá tiji-machaya nuju ta cha Timoteo xingueen ne, ha camandaya cha tsêhë cjuañihi. Sa xi cjuehe xati cha ne, cuinduvintjenguin nuju ndyá, hane ndyá sacú xingueen. ²⁴Tuhun ngu nina naha cojo yějë me xi matitjun ngajni nuju cojo yějë sa me xi má ladu rê Nina. Xuta Italia xi xuta rê Nina ne, hacuaha tsingatju me ngu nina nuju.

²⁵Nina catisua nuju me cjuandaja rê me. Cuatjin jain.

Carta xi catsihindu Santiago

Cjua xi catsihindu Santiago me xi hacuaha yahañihi rë Jacobo

1 Ngahan Santiago, xi mosu hndixa-han tsëhë Nina cojo tsëhë Nai naja Jesucristu ne, tsingátju ngu nina tsujun, ngayujun ni xi xuta ladu rë Nina ngayun, ngayujun ni xi cavitsojo yun ngasunhndë.

Cjuatacun ndaja xi nduva tsëhë Nina

² Ngayujun ni tsan ne, ngajñi rë yëjë ni xcusun cjuacjintacun xi cuátjun cuma ne, meje rë xi ndaja catama rë xahasen nuju ta, ³ tsëhë xi ha hyun ta, hya xi cavatju xi cacaa nuju cojo ngu cjuacjintacun jan ne, sa xi hacuiin canismutacún cjuachacun xi macjain nuju ne, vëhë cuisecoo nuju xi hitsë sa scaa nuju tu mé ni cjuacjintacun xi cuátjun sa cuma. ⁴ Peru nihñu ngu yëjë xi scaa nuju cojo yëjë ni cjuacjintacun jan hisca xi cuijnetaha. Sehe ngajan xi cuma yun xuta tyjahi xi chutaha cjuatacun rë xi cuma sahmi yëjë ni cjuandaja.

⁵ Peru sa xi yo yun xi sahmi chaja nuju cjuatacun ne, chjahyun rë Nina, hane sacú nuju ta, tsëhë xi Nina ne, hisca sesuntaha sa hya xi sua naja me, hacuaha hacuiin chjahnga me cojo naja, hya xi chjahyan rë me. ⁶ Peru meje rë xi catamangutacún hora xi chjahyun rë me, hacuiin jo cuma tacún ta, tsëhë xi xuta xi jo má cacun me ne, tangun me cojo tsindyu rë ndachacun xi ficojo rë tjo, xi fi nguehe fi ngajan. ⁷ Xuta xi cuatjin cun me ne, catijnercu me ta tsajin mé xi sua Nina me ta, ⁸ tsëhë xi jo má cacun me, jo xcun jo hntsua me tsëhë yëjë ni xcusun xi sahmi me.

⁹ Peru xuta yuma xi ladu rë Nina me ne, ndaja catama rë xahasen rë me ta, xcun Nina ne, jercu vengui chjí rë me.

¹⁰ Hane xuta nchina xi ladu rë Nina me ne, hacuaha ndaja catama rë xahasen rë me, hya xi cuijnercu me xi yëjë ni cjuanchina rë me ne, hisca venguiin chjí rë xi cuma rë Nina. Xuta nchina ne, cjuë me sacuatjin fë naxu ndexin. ¹¹ Hya xi tjercu ma suë chan ndavá ne, xca jan ne, fë yëjë xi. Hacuaha naxu rë ne, fë vixu. Xcusun rë ne, handasa tjercu ndajyihi camahani ne, fë vetsun. Hacuanitjin ni cjuë xuta nchina ngajñi rë cjuayuma xi sahmi me.

Cjuatacun tsehen

¹² Jemu ndaja tsajan ngayaan, sa xi scaa naja cojo yëjë ni cjuacjintacun xi cuátjun cuma ta, hya xi cavatju xi cacaa naja ne, hya sacú naja ngu cjuahñu ndajyihi ngajan xcun Nina. Ta cachja Nina xi, sa xi hmutacun me ne, sua naja me ngu cjuahñu ndajyihi jan. ¹³ Hya xi xahasen naja meje rë xi nihña ngu cjuatacun tsehen ne, mijí rë xi cuinújan xi Nina casua naja me cjuatacun tsehen jan, ta Nina ne, hatuxa tsajin rë me cjuatacun tsehen, hacuaha hatuxa suaain naja me cjuatacun tsehen xi nihña. ¹⁴ Peru cjuatacun tsehen xi meje nihña ne, hatuxa vetju tsëhë xahasen naja suvaan. ¹⁵ Hya xi ningatahantacun xi meje nihña cjuatsehen ne, cjuatacun jan sahmi xi nihña cjuatsehen. Hane sa xi hatuxa ningatehen rë yëjë ni cjuatsehen xi nihña ne, sacuiin cahndé cuechun xcun Nina.

¹⁶ Ngayujun ni tsan ne, mijí ná xi cuma ndacha ngayun. ¹⁷ Yëjë ni cjuandaja ndajyihi xi sacu naja ne, nduva tsëhë ngahnga ta, Nina xi casahmi me yëjë ni ndihi xi siutaha ngahnga ne, me vëhë sua naja me yëjë ni cjuandaja jan. Ndihi xi siutaha ngahnga jan ne, vindeya xcusun rë ta, tjin hora sua ndavá rë ne, tjin hora suaain ndavá rë. Peru Nina ne, chuva xi tacun ni me, tsajin vindeya cjuatacun rë me. ¹⁸ Hane hora xi camacjain naja cjua xi cjuaquixi ne, hora hya ca-

sua naja me ngu cjuahñu xatsë. Cuatjin casua naja me ta, tsëhë xi meje rë me xi ngayaan ne, tjun tjun cuma yaan xuta ladu rë me. Sehe ngaxtun vëhë ne, cjin sa xuta xi hacuaha cuma me ladu rë Nina.

Cuitjin xi chjahanrcun jain Nina

¹⁹Ngayujun ni tsan ne, hya xi yo cuichja cojo nuju ngu cjua ne, titjun tinuhyunndujun mé cjua xi cuichja me. Hacuini ngutjen chjayunngun, hacuiin ngutjen cuma cjan nuju. ²⁰Ta sa xi cjan nuju ne, nihñuu cjuandaja sacuahatjin xi meje rë Nina. ²¹Peru yëjë ni cjuatsehen ne, meje rë xi tiyujunxun. Hane cjua rë Nina xi camacjain nuju ne, tetjün cojo cjuandaja cojo cjuajeya cahntsua xahasen nuju ta, tsëhë xi cjua vëhë ne, cuma cuaxëtje nuju.

²²Hane sa xi tu cuisinuju ni cjua rë Nina jan, hane nihñuu hacutjin xi chja ne, tu cuindachun suvun ni rë yojo nuju. Vëhë xi hacuiin tu cuisinuju ni ta, meje rë xi nihñu yëjë ni hacutjin xi vitexa cjua rë Nina. ²³Sa xi tu cuisinuju ni hane nihñuu hacutjin xi vitexa cjua jan ne, tangun yun cojo ngu cha xi vutsejenya cha xcun cha cojo espeju. ²⁴Cavutsejenya cha xcun cha hacutjin jyih cha ne, peru xi cafe cha ne, ngutjen cachaya rë cha hacutjin jyih cha. ²⁵Peru hya xi cuisinuju cjua xi vitexa Nina jan ne, sa xi chutayun sa cjua, sa xi chayaain nuju cjua, sa xi nihñu jain hacutjin xi vitexa cjua jan ne, sacú nuju cjuandaja rë Nina xcun ngasunhndë nuju. Cjua rë Nina xi cuacun jan ne, hatuxa cjuaquixi, hacuaha cjua vëhë xi vëhëndaya naja tsëhë ngajni rë cjuatsehen.

²⁶Sa xi tiningatuhuntacún xi jemu ndaja tichjuhuncun jain rë Nina, ngajni rë xi tuyë choho vetju ntsuvun nújun ne, tu mahya xi chjuhuncun rë Nina ta, tu tivindachun suvun ni rë yojo nuju. ²⁷Jyan xcusun vihi xi chuya rë Nina Nahmi naja xi nihña: ngu ne, xi chja-

hanrcun jain me cojo ngu xahasen xi ty-jahi; má jo ne, xi cuisecoon rë hndixahan cojo chjuun cahan ngajni rë cjuacjintacun rë me; xi ma jyan ne, xi hacuiin nihña cjuatsehen.

Meje rë xi chjahanrcun yëjë ni xuta

2Ngayujun ni tsan ne, quihndë xi macjain nuju Nai naja Jesucristu, me xi tjemu tjin rë cjuandaja ne, mijí rë xi nihñu jyë ngu xuta ne, hane nihñu chuvun nga ngu me. ²Sa xi cuisehen ngu xuta nchina cahntsua yungun nuju, xi hisca oro xtungun rë me hacuaha tjercu ndajyih tsjian rë me ne, hacuaha cuisehen nga ngu xuta xi yuma cojo tsjian rë me xi jyih ntsun ntsun me ne, ¿mé cuinújun cojo rë me? ³Me xi ndajyih tsjian rë jan ne, ¿há jemu chjuhuncun me, xi cuitjin cuinújun cojo rë me?: “Tinechun nguehe cahndë ndajyih vihi.” Hane me xi yuma jan ne, ¿há cuitjin cuinújun cojo rë me?: “Ngaye ne, ngajan nechin jan”, o sa tsajin ne: “Nguehe nechin nguehe nangui.” ⁴Sa xi cuatjin cuinújun ne, ngajan matsejen xi hisca ngajni nuju ne, hacuiin tangun xcusun nuju xi nihñu cojo ngayëjë ni xuta. Tinichuvun xingun ni ne, peru cojo ngu cjuatacun tsehen.

⁵Ngayujun ni tsan ne, tinuhyun cjua vihi. Nina ne, cavaxijin me xuta xi yuma xcun ngasunhndë, cojo sa xi tjemu ndaja cumacjain rë xuta jan me, hacuaha sacú rë xuta jan cahndë ndajyih nixtin xi cuetsihin cuitexa jain me ngajni rë yëjë ni xuta ngasunhndë, sacuatjin xi ha cachja me xi sacú rë yëjë ni xuta xi tsihmucacun me Nina. ⁶Peru ngayun ne, nisavun rë xuta yuma. Peru ¿yo xi choho sahmi cojo nuju ni? ¿Yo xi faha nuju, fi vinchajyé nuju xcun xutaxa rë? Xuta nchina xi cuatjin sahmi cojo nuju. ⁷Hacui jain me. Hacuaha xuta xi nchina ne, me vëhë xi choho chja me tsëhë Jesu-

cristu. Hane Jesucristu jan ne, hacui me xi casua naja ñihi xi tsëhë suvá me.

⁸Xcun xujun rë Nina ne, camahindu ngu cjua xi cavitexa Nina, xi chja cuitjin: “Meje rë xi nihmitacuín xinguín sacuahatjin nihmitacuín yojo riji.” Sa xi cuatjin jain nihñu ne, jemu ndaja tjin. ⁹Peru sa xi nihñu jyë ngu xuta hane nihñu chuvun nga ngu me ne, ha canichujún cjua xi cavitexa Nina. Hacuaha suvá cjua jan ne, vëhë cuinchajyë nuju ta canihñuu hacutjin chja cjua jan. ¹⁰Ta sa xi nichujún ngu cjua xi cavitexa Nina ne, handasa nihñu jyë ni cjua xi yahnga ne, peru tangun jyë nuju cojo jyë rë ngu xuta xi hndiin camahani tsëhë jyë ni cjua xi cavitexa Nina jan. ¹¹Cuatjin ta, tsëhë xi ngu ni Nina xi cavitexa me catsijo cjua vihi. Ngu ne: “Xi canindesiin cojo rë ngu chjuun, o cojo rë ngu xihin xi xín.” Ngu nga ne: “Xi caniquiin xuta.” Vëhë xi handasa hacuiin nindesun cojo rë ngu chjuun, peru sa xi nicuhun ngu xuta ne, ha canichujún cjua xi cavitexa Nina jan, hane tjin jyë nuju xcun cjua vëhë. ¹²Ngajan xi meje rë xi tinújun hacuaha nihñu cjuandaja, sacuaha xi ha ndiya tsichuva nuju Nina, scutsejen me hacutjin canihñu xi vitexa cjua xi vëhëndaya naja. ¹³Hane sa xi tsajin nuju cjuayumatacun cojo jingu sa ne, hacuaha tsajin rë Nina cjuayumatacun cojo nuju nixtin hya xi tsichuva nuju me. Peru sa xi tjin nuju cjuayumatacun ne, hacuaha tjin rë Nina cjuayumatacun cojo nuju nixtin hya.

Sa xi macjain jain naja ne, nihña cjuandaja

¹⁴Ngayujun ni tsan ne, sa xi cuinújun xi macjain nuju Jesucristu, peru nihñuu cjuandaja ne, hisca vengui chjiin rë ta, tsëhë xi Nina ne, cuaxintjiin nuju me xi cuatjin nihñu. ¹⁵Hya xi sacú xingun cojo ngu xuta ladu rë Jesucristu xi jemu yuma camahani, xi jercu ntsun tsjian rë me, hacuaha hisca tsajin niñu xi sinë

me ne, ¹⁶¿há cuitjin cuinújun cojo rë me? “Tangún ni tsan. Xicamacjiintacún. Ndaja tetsun yojo nuju ta jemu hnchan, hacuaha ndaja xinu niñu ta quiji hora.” Peru sa xi tsajin mé catuhun rë me xi cuaja xi sinë me ne, vengui chjiin camahani rë xi cuatjin cuinújun cojo rë me. ¹⁷Vëhë xi vengui chjiin rë xi tu suvá cuinújan ni xi macjain naja Jesucristu nguyëjë rë xi mijí nihña cjuandaja.

¹⁸Peru tjin ngu cha xi cuichja cuitjin: “Hacjahi xuta xi macjain rë me Jesucristu, handasa sahmii me cjuandaja. Hacjahi xuta xi sahmi me cjuandaja, handasa macjaain rë me Jesucristu.” Peru ngahan cuichjá cojo rë cha jan ta hacuiin hacjahi xuta ta ¿hacutjin cuma xi macjain jain naja, sa xi hacuiin nihña cjuandaja? Ngatsë rë cjuandaja xi nihña ne, vëhë tsejen xi macjain jain naja Jesucristu. ¹⁹Cha vëhë ne, ¿há macjain jain rë cha xi tjin ngu ni Nina? Tjemu ndaja tjin xi cuatjin macjain rë cha. Peru hacuaha xitsehen ne, cuatjin macjain rë, hane ña fatsë xitsehen má xi tsacjun. ²⁰Tjemu yumahasen cha xi cuatjin cuichja jan. Peru nguehe cuichjá cojo rë cha ngu jo cjua, cojo sa xi cuijnercu cha ta, vengui chjiin rë xi cuinújan xi jercu macjain naja Jesucristu, sa xi mijí nihña cjuandaja. ²¹Sacuaha xutachanga naja Abraham ne, ha hyan xi hatsëë nixtin ne, camangucacun me xi tsiquehen me quihndi rë me xi hmí Isaac ngajan xcun ngasunscun, sacuatjin xi ha cachja Nina cojo rë me. Hane ngatsë rë xi cuatjin cahndë me tsëhë Nina ne, vëhë xi cachja Nina xi ngu xuta ndaja me, ngu xuta tyjahi me. ²²Ngajan matsejen ta xcusun xi casahmi me ne, cama tangun cojo cjua xi macjain rë me. Hacuaha ngatsë rë xi cuatjin casahmi me ne, vëhë xi camatsejen ta macjain jain rë me. ²³Cuatjin camá sacuatjin chja ngu cjua xi camahindu xcun xujun rë Nina, xi chja cuitjin: “Abraham ne, camacjain rë me

Nina. Vêhë xi Nina cachja me xi ngu xuta ndaja me, ngu xuta tyjahi me.” Hacuaha cachja Nina tsêhë me ta amigu rê me.

²⁴ Cuatjin xi hyan xi chja Nina xi xuta tyjahi yaan sa xi nihña cjuandaja, hacuiin sa xi tu suvá ni macjain naja. ²⁵ Hacuaha ni tjin ni cavatju na xi hmí rê Rahab, na xi caviteña na yojo rê na. Cama tyjahi xahasen rê na ta, tsêhë xi casahmi na ngu cjuandaja, hya xi cojo cjuandaja casua na cahndé xi caviyuju xuta ndava na, xuta xi catsingatju xutachanga naja ngajan nangui rê na. Hacuaha hacjahi ndiya xi catsingacun na me, xi cuetju me cjue me hiscan xi tsajin condra rê me. ²⁶ Sacuatjin xi machjiriin yojo rê ngu nima ta tsajin hasen rê ne, ha cuatjin machjiriin xi macjain naja Jesucristu, sa xi tsajin cjuandaja xi nihña.

Hacutjin sahmi neje

3 Mijí rê xi cjín ngayun cuma yun maestru tsêhë cjuachacun tsan ta, ha hyun ta ngayin xi vicuyin cjuachacun ne, hitsë sa tsichuva niji Nina xi cuma rê xuta xi yahnga. ² Ngayejen ni ne, hatuxa cjín cjuatsehen xi nihña. Peru sa xi suvá cjuandaja chja ngu xuta, hane hisca ngu cjua chojyihin chjaain me ne, me vêhë ne, ngu xuta ndaja me, ngu xuta tyjahi me. Hacuaha ma vetjo me yojo rê me. ³ Sacuaha ngu naxin ne, sa xi cueyan frenu hntsua chu cojo sa xi cuihndé chu tsajan ne, vêhë sahmi xi cuma cuanguen cojo chu tu cutjin hiscan xi meje naja. ⁴ Hacuaha sacuaha tjin barcu ne, handasa tjercu jyih, handasa jemu hñu ngahñu rê tjo xi tsivaha rê ne, peru cha xi cjuicojo barcu jan ne, ngu sasa ni tsiniya cha ngu ya lihndi xi hmí rê tímú, sehe ficojo cha tu cutjin hiscan xi meje cjue cha. ⁵ Hacuaha ni tjin ni neje ta, ngu rqú lihndi ni tsêhë yêjê ni yojo naja. Peru handasa lihndi ne, tjemu yehe cjua-haxi xi nújan cojo rê. Sacuaha ngayaan ne, xi cuetahan rê ngu ndihi ne, han-

dasa ngu ndihi lihndi ni ne, peru cuma cuaca rê yêjê ni ngu nguijñacha. ⁶ Hane neje ne, tangun cojo ndihi ta tjemu cjan rê. Tjercu ma chja cjuatsehen. Handasa tjin cahndé rê xi quitaha ngajñi yojo naja ne, peru caa rê tsinguetsun naja. Vêhë xi tjercu choho vatjun má xcun ngasunhndé naja ta, tsêhë xi xitsehen ne, vêhë sahmi xi choho nújan. ⁷ Ngayaan xuta ne, camá canimaxun yêjê ni xcusun chu, sacuaha chu nguijña, chu nisë, chu yê, cojo chu ti. ⁸ Peru neje ne, tsajin yo cuma tsimaxu rê ta, hatuxa tsehen yojo vêhë. Suaain cahndé xi cuma maxu. Hacuaha sacuaha nehñu chu yê cjan rê, xi quitsë rê xan rê chu xi tsiquehen naja hya xi faha chu ne, cuatjin neje ta, quitsë rê cjuatsehen xi choho nújan. ⁹ Ha cojo neje ni ne, ndaja nújan tsêhë Nina Nahmi naja, hane ha cojo vêhë ni ne, nchaten tsêhë xingueen, handasa casahmi naja Nina sacuaha jyih suvá ni me. ¹⁰ Tsêhë ntsuvan ni ne, tecjan cjuandaja cojo cjuatsehen xi vetju nújan. Cuaaintjin camahani xi nújan, tsan. ¹¹ Ngu nandan ne, hatuxa cumaji cuetju tangun nandá xi hyun cojo nandá xi sa. ¹² Hane ngu ya laxa ne, cumaji cuaqui rê tsë. Hacuaha ngu nahñu tutsëjê ne, cumaji sua laxa rê. Hacuaha ni tjin ni nandá xtya ne, suaain nandá yufa.

Cjuatacun xi vengui chjí rê

¹³ Sa xi tjin ngajñi nuju ngu ngayun xi tjemu vechutaha cjuatacun nuju ne, meje rê xi nihñu cjuandaja. Meje rê xi cuma tsejen xi xuta ndaja xuta jeya ngayun, ngatsë rê xi nihñu cjuandaja xi vitexa cjuatacun nuju. ¹⁴ Peru sa xi tjin nuju cjuaxin cahntsua xahasen nuju, hane sa xi meje nuju xi suvun ni ngayun xi ndajyih cuátjun cuma ne, meje rê xi hacuiin nihñu yehe yojo nuju, hacuiin nújun xi tjercu vechutaha cjuatacun nuju ta, quixiin vë. ¹⁵ Ta cjuatacun vêhë ne, hacuiin ngu cjuatacun xi ca-

sua Nina ta cjuatacun ni rë xutajyë ngasunhndë vihi, sacua ha cjuatacun rë xitsehen. ¹⁶Hiscan xi tjin cjuaxin, hiscan xi tjemu choho me, ngajan ne, tjemu tujyë sahmi xuta, tjemu sahmi me yëjë ni cjuatsehen. ¹⁷Peru sa xi tjin naja cjuatacun xi nduva tsëhë Nina ne, tjemu tyjahi xahasen naja, tjemu tjin rë cjuajeya xahasen naja, nihña yëjë ni ngu cjuandaja, tjin naja cjuayumatacun cojo xuta, tacun cahndë cjuatacun naja, hacuiin jo má tacun. ¹⁸Hane sa xi ngatsë rë cjuandaja xi nihña cuma cuijnetaha si xi tjin ngajni rë xingueen ne, cjuandaja cuinechan cojo xingueen, hane yahnga sa xuta ne, hacuaha cuetsihin sahmi me cjuandaja.

Xuta xi tjercu macacun me cojo ngasunhndë

4 ¿Mé má cuatjin tjercu nihñu si ngajni nuju? ¿Mé má cuatjin chiejun cojo xingun? Nihñu ngatsë rë yëjë ni cjuatsehen xi tjercu meje rë xahasen nuju. ²Tu mé ni ne, meje nuju, peru ngatsë rë xi sacuiin nuju ne, vëhë xi nicuhun xingun. Tjin nuju ngu cjuaxin tsëhë tu mé ni, peru ngatsë rë xi sacuiin nuju ne, vëhë xi vetsuhun si cojo xingun, vetsuhun chiejun cojo xingun. Sacuiin nuju xi meje nuju ta, tsëhë xi chjahyuun rë Nina. ³Hacuaha handasa chjahyun ne, peru sacuiin nuju ta, tsëhë xi hacuiin tsëhë cjuandaja xi chjahyun ta, xi chjahyun ne, tu nicujun ngajni rë ngu cjuasua xi fehya xahasen nuju. ⁴Ngayun xi jo xcun jo ntsuvun ne, ¿há hyuun ta sa xi tjenguen xcusun rë xuta ngasunhndë ne, má yaan condra tsëhë Nina? Vëhë xi tu yo ni xi vejñangucacun xi tjengui xcusun rë xuta ngasunhndë ne, sahmi me condra Nina. ⁵Hacuiin tu cuenda camahindu xcun xujun rë Nina, hiscan xi chja cuitjin: “Nina ne, casua naja me ngu hasen xi tacun cahndë cahntsua xahasen naja. Vëhë xi mijí rë Nina xi cuetjunxen tsëhë ladu rë me.” ⁶Hacuaha Nina ne,

visecoo naja me cojo yëjë ni cjuandaja rë me, ta tjin sa ngu cahndë ngajan xujun rë me xi chja cjuarë me cuitjin: “Nina ne, chuyiin rë me tsëhë xuta xi sahmi yehe yojo rë, peru xuta xi jeya me ne, sua Nina me cjuandaja.” ⁷Vëhë xi meje rë xi tinuhyun tsëhë Nina. Sa xi nihñuu hacutjin xi meje rë xitsehen ne, cuetjuxin xitsehen tsujun. ⁸Tejñutsja Nina cjuatacun nuju, hane sehe Nina ne, cuaha nuju me. Tiuyujunxun cjuatsehen xi tinihñu, hane ngayun xi jo má tacun ne, nihñu tyjahi xahasen nuju. ⁹Catamavatacun, hacuaha chjihndun, tsëhë xi canihñu cjuatsehen. Cahndë rë xi cuéjnu ne, chjihndun, hane cahndë rë xi sua ma nuju ne, choho catama nuju. ¹⁰Ninguijnu cjuatacun nuju xi chjuhuncun Nai naja, sehe Nai naja ne, sahmi yehe nuju me.

Mijí rë xi nichuvan xingueen

¹¹Hacuiin choho nújun tsëhë xingun tsan ta, sa xi choho nújun tsëhë xingun ne, tangun vëhë cojo xi choho nújun tsëhë cjuarë vitexa Nina. O sa xi nichuvun xingun ne, tangun vëhë cojo xi nichuvun cjuarë vitexa Nina. Hane sa xi nichuvun cjuarë vitexa Nina jan ne, hacuiin tinihñu hacutjin xi vitexa ta, tinihñu yojo nuju sacua ha ngu xutaxa rë. ¹²Peru ngu ni me xi cavitexa hacutjin xi nihña, hane ngu ni me vëhë xi tsichuva me. Me vëhë ni xi cuma cuaxëtje naja me, me vëhë ni xi cuma tsinguetsunya naja me. Peru ngayun ne, ¿yo cavitexa nuju xi nichuvun xingun?

Tsajin yo vëë rë mé xi cuma nchujun ni

¹³Nguehe cuichjá ngu cjuarë. Tjin ngu jo yun xi cuitjin nújun cojo xingun: “Nchujun ni nguini ne, cuétjun cuanguen ngu nangui. Ngajan cuinechan ngu nu xi nihña cjuayuma naja. Cuatjin nihña, sehe sacú naja tujún.” ¹⁴Peru hisca hyúun ha-

cutjin cuátjun cuma nchujun ni nguini. Ngayaan xcun ngasunhndë naja ne, tangun yaan cojo yuffi nangui ta, yuffi jan ne, tsejen hora xi nduva. Peru xi tu ngu hora ne, ha cavatjucjin, cafëya. ¹⁵ Vëhë xi hitsë sa ndatjin xi cuitjin cuinújun: “Sa xi Nai naja meje rë me ne, sua sa me cjuahñu naja xi nihña cuitjin cuatjin xa.” ¹⁶ Peru ngayun ne, tjercu nihñu yehe yojo nuju xi nújun cojo xingun hacutjin xi meje nihñu. Hane xi cuatjin nihñu yehe yojo nuju ne, ngu cjuatsehen vëhë. ¹⁷ Hane sa xi ha hyan hacutjin fi yëjë ni cjuandaja, peru mijí nihña ne, tjin jyë naja xcun Nina.

Hacutjin cuatju xuta nchina cuma

5 Quihndë ne, ngayujun ni xi nchina yun ne, meje rë xi chjindayun chjihndun, ngatsë rë yëjë ni cjuachoho xi cuátjun cuma. ² Yëjë ni cjuanchina nuju ne, cuenguichjiin rë ta, tsëhë xi cjuë yëjë cjuéhndu. Sacuaha tsjian ndaja nuju ne, cjuë sinë chu quixún. ³ Sacuaha tujún ndaja nuju ne, cuma xutsë. Hane tsëhë xi cuatjin xutsë tujún nuju ne, vëhë tsejen xi canihñuu cjuandaja cojo tujún jan, hane ngatsë rë vëhë ne, cuátjun castigu cuma. Tjercu tivetjun camahani cjuanchina nuju quihndë, nixtin xi ha ndiya cuijnetaha cjuë ngasunhndë. ⁴ Cjëë cjuë cuechjun yëjë ni chjí rë mosu nuju xi casahmi xa nguijña nuju, hane Nai naja ne, me xi ma titjun tsëhë yëjë ni ne, vihndë me cjuia xi tivinchajyë yëjë ni mosu nuju xi quitjun tsëhë. ⁵ Nguehe ngasunhndë vihi ne, tjercu ndajyihí cavatjun camá, tjercu catuhun rë cjuasua yojo nuju. Peru sacuatjin xi hatuxa vechu nixtin xi cueya chu chinga xi jercu hñucacun chu ne, hacuaha ni tjin ni cuechu nixtin xi cuátjun castigu cuma. ⁶ Ngayun ne, canihñu castigu canicuhun xuta ndaja xuta tyjahi. Hane xuta ndaja xi cuacun jan ne, johó ni rë me xi canihñu cojo rë me.

Meje rë xi cuinechanyan rë Nina cojo jeya hacuaha chjahyan rë Nina

⁷ Vëhë xi tinechunyun cojo jeya tsan, hisca xi cuinduva nga Nai naja. Cha xi sahmi xa nguijña ne, xi cjuë cuincha cha tjë ne, cuejñaya cha cojo jeya hisca xi cuatju chan tsi ne, sehe cuma sacú rë cha ngu cosecha xi ndajyihí tsëhë xitjë rë cha. ⁸ Hacuaha ni tjin ni, meje rë xi tinechunyun cojo jeya, hacuaha tejñuhñu xahasen nuju ta, tsëhë xi jima tiña nixtin xi cuinduva nga Nai naja. ⁹ Sa xi cuinchunyun xingun tsan ne, hacuaha cojo ngayun cuma yun castigu. Vëhë xi mijí rë xi cuinchunyun xingun ta, tsëhë xi me xi tsichuva naja ne, chaja sa hitsë xi cuinduva nga me. ¹⁰ ¿Há vitsjiin nuju hacutjin cacaa rë yëjë ni xutachanga naja xi cachja me cjuia xi caveya Nina cjuatacun rë me hatsëë nixtin? Me xi cuacun vëhë ne, casahmi me cjuetacun ngajñi rë yëjë ni cjuañihí xi cavatju me camá. Hacuaha cuatjin meje rë xi nihñu tsan. ¹¹ Hatuxa nújan xi tjercu ndaja tsëhë me xi cacaa rë cojo cjuañihí. Ngayujun ni ne, ha machaya nuju cjuia xi chja hacutjin cacaa rë ngu xutachanga naja xi hmí rë Job, hya xi cavatju me cjuañihí camá. Hacuaha ha hyun ta, hya xi cajnetaha cjuañihí xi cavatju me camá ne, tjemu ndaja casahmi Nai naja cojo rë me ta, tsëhë xi Nai naja ne, hatuxa tjin rë me cjuandaja, tjin rë me cjuayumatacun.

¹² Nguehe cuichjá cojo nuju ngu cjuia xi tjemu venguí chjí rë tsan. Hora xi tivisiajmu cojo xingun ne, hacuiin cuinújun xi vëë Nina, vëë tsuhi, hacuiin cuinújun xi vëë tu mé sa ni xcusun. Meje rë xi yëjë ni xi cuinújun ne, cjuaquixi, hacuiin cuindachun. Sehe ngajan xi Nina ne, sahmi nuju me castigu.

¹³ Sa xi choho tivatjun jima ne, chjahyun cjuandaja rë Nina. Sa xi tjemu sua nuju ne, sun ngu xi nihñu jyë nihñu hnga Nina. ¹⁴ Sa xi hmu nuju ne,

chjindayun rë xuta changá xi vitexa ngajñi rë xuta ladu rë Nina, xi tsufë nuju me aceite hacuaha cjuehya me cjuandaja rë Nai naja ngatsë nuju. ¹⁵ Sa xi nguñajatacun hora xi chjahyan cjuandaja rë Nina ne, xuta hmu rë jan ne, cumandaja me ta, Nai naja ne, sua rë me cjuahñu. Hane sa xi casahmi xuta hmu rë jan ngu cjuatsehen ne, Nina tsinchataha jyë rë me. ¹⁶ Vëhë xi tjacun jyë nuju cojo xingun, hacuaha chjahyun cjuandaja rë Nina ngatsë rë xingun, sehe cumandaja me. Ngu xuta xi tyjahi cjuatacun rë me xcun Nina ne, hya xi fehya me cjuandaja rë Nina ne, tjercu vengui chjì rë cjuarë me ta, Nina ne, visecoo rë me. ¹⁷ Ngu xutachanga naja xi hmí rë Elías ne, vëhë ngu xuta sacuaha

ngayaan. Peru cafehya nguñajacacun me cojo Nina xi cuaain tsi. Hane chuva rë jyan nu vasen ne, cavaain camahani tsi xcun nangui. ¹⁸ Hya xi camá ne, cafehya nga rë me Nina xi cataha tsi, hane cavuya cavaha nga tsi, hacuaha camá nga yëjë ni xitjë.

¹⁹ Ngayujun ni tsan ne, sa xi tjín ngu xuta ngajñi nuju xi cuetjuxin me tsëhë ndiya rë cjuaquixi, hane sa xi tjín ngu yun xi cuisecun rë me xi cuya cuisehen nga me ndiya rë cjuaquixi ne, ²⁰ ninguit-sjun cjua vihi: yo yun xi cuisecun rë ngu xuta tsehen xi cuetjuxin me tsëhë cjuatsehen xi sahmi me ne, ngatsë nuju ne, cuetjutje me tsëhë castigu xi cuatju me cuma. Hacuaha ngatsë nuju ne, tjercu cjín jyë xi cumanchataha.

Carta xi tjun tjun catsingatju San Pedru

1 Ngahan Pedru, apóstol tsêhê Jesucristu ne, tsingátju carta vihi xi cuma nuju ngayujun ni xi cavit-sojo ngayun ngajan distritu Ponto, distritu Galacia, distritu Capadocia, distritu Asia, cojo distritu Bitinia, cahndé xi nechuntuhun. ² Hisca hatsêê ne, Nina ne, cavejñangucacun me cavaxijin me ngayun, hacuaha Hasen rê me ne, caviyujuxin nuju, cojo sa xi cuinuhyun tsêhê Jesucristu hacuaha cuma tyjahi xahasen nuju ngatsê rê jni rê me. Nina ne, catitsixuva me cjuandaja cjuajeya xi cuma nuju ngayujun ni.

Cuetahantacun ngu cjuahñu xatsê

³ Nihña jyê nihña hnga me xi Nina Nahmi rê Nai naja Jesucristu cojo Hasen rê me. Jercu hmu camá rê Nina ngayaan, hane ngatsê rê xi Jesucristu cavuya me cjuahñu tsêhê ngajñi rê nima. Nina ne, casahmi me xi cavuya catsin ngayaan cojo sa xi cuetahan tacun ngu cjuahñu xatsê, ⁴ hacuaha cojo sa xi satê naja ngu cjuandaja rê Nina xi tsajin nixtin xi cuetsun, hatuxa tyjahi, hacuaha tsajin nixtin cjuêya. Hane yêjê ni cjuandaja vêhê ne, tetjo vêhê ngahnga xi cuma nuju ngayujun ni. ⁵ Hane tsêhê xi ngayujun ne, mangutacun cojo Nina ne, vêhê xi me vêhê tisahmi me cuidadu ngayujun ni cojo ngahñu rê me, cojo sa xi cuechuntuhun cjuandaja xi cuaxêtje me ngayun. Hane cjuandaja vêhê ne, ha tjín ndaja rê Nina cojo sa xi tsingacun me hya xi cjuê nixtin xi nechantahan ngasunhndê.

⁶ Tsêhê vêhê xi ngayujun ni ndama nuju, handasa hitsê sa nixtin ne, sahmi ngujyê xi jemu cuatjun cjuañihi cuma.

⁷ Cuatjin meje rê xi chutaha nuju, cojo sa

xi cumatsejenquixi xi ndaja mangutacun cojo Nina. Sacuaha oro xi ma vetsun ne, ma chutahachuva rê cojo ndihi. Hacuaha ni tjín ni nuju ngayun ne, meje rê xi chutaha chuva rê xi mangutacun cojo Nina. Hane xi cuatjin mangutacun cojo Nina ne, jercu sa vengui chjî rê xi cuma rê oro. Hane xi cuatjin ndaja mangutacun cojo Nina ne, Nina ne, sahmi jyê sahmi hnga me ngayun, jemu ndajyihî cjuandaja xi sua nuju me, hacuaha cjuaharcun nuju me nixtin hya xi cuya cumatsejen nga Jesucristu. ⁸ Ngayun ne, hmutacún Jesucristu handasa cahyuun me, hacuaha mangutacun cojo rê me handasa hacuiin tinutsujun me. Vêhê xi jercu ndama rê xahasen nuju ne, xi hisca maji nújun mé xi má nuju cojo xahasen nuju. ⁹ Ngajan xi Nina ne, cuaxêtje me ngayun, ngatsê rê xi jercu ndaja camangutacun cojo rê me.

¹⁰ Profeta ne, jercu cavutahahya camahani me hacutjin xi Nina cuaxêtje me xuta. Hacuî me vêhê xi ha tjún sa cachja me tsêhê cjuandaja xi ngascan sua Nina ngayujun ni. ¹¹ Jercu cavutaya profeta xi cuacun jan janihya hacuaha hacutjin cuechú nixtin xi cachja Hasen rê Cristu xi jiya cahntsua xahasen rê me, hya xi tjún sa casua me camachaya rê xuta tsêhê yêjê ni cjuañihi xi ngascan cuatju Cristu cuma cojo cjuandaja ndajyihî xi satê rê me ngascan. ¹² Nina ne, casua me camachaya rê profeta xi cuacun jan ta cjua xi cachja me ne, hacuiin tsêhê me ndaja ta tsujun ndaja. Hane cjua vêhê ne, hacui cjua xi cachja xuta xi casua me camachaya nuju cjuandajyihî xi chja tsêhê Jesucristu ngatsê rê xi Hasen rê Nina xi caningatjun rê tsêhê ngahnga ne, cuatjin casua rê me chuva rê xi cuichja me. Cjua vêhê ne, hisca ángel ne, jercu meje cuijnercu.

Meje rë xi naxenxen yojo naja tsêhê cjuatsehen

¹³Vêhê xi meje rë xi tjin chjine ngayujun ni, hacuaha catiyuju chihin cjuatacun nuju. Ndaja tetuhun tacún tsêhê cjuandaja xi sua nuju Nina nixtin hya xi cuya cumatsejen nga Jesucristu. ¹⁴Sacuaha quihndi xi ndaja vihdê ne, xicatuun cahndê xi cuitexa nuju cjuat-acun tsehn xi tjin nuju hatsêê, hya xi jñu cjuatacun nuju. ¹⁵Cahndê rë vêhê ne, ngajñi rë yêjê xi nihñu ne, naxunxun yojo nuju tsêhê cjuatsehen cojo sa xi tsêhê Nina cuma ngayun, sacuahatjin Nina, me xi cavaxijinjñi nuju ne, tuxa jercu xín me tsêhê yêjê ni cjuatsehen. ¹⁶Tsêhê xi xcun xujun rë Nina ne, cuitjin camahindu cjua xi cachja Nina: “Meje rë xi naxunxun yojo nuju tsêhê cjuatsehen cojo sa xi tsahan cuma ngayun ta, ngahan ne, tuxa jercu xín ngahan tsêhê yêjê ni cjuatsehen.”

¹⁷Ngayujun ni ne, tsêhê xi “Nahmi” nujun tsêhê me xi texta ni tsichuva cjuatacun rë xingu xingu tucu xcusun xi sahmi me ne, vêhê xi meje rë xi ndaja chjuhuncun Nina nguyêjê rë xi nechuntuhun nguehe ngasunhndê vi. ¹⁸Ha hyun xi Nina ne, cavaxêtje nuju me tsêhê ndiya xi hacuiin machjirêhê, ndiya xi caviyuju nuju xutachanga nuju. Hacuaha hyun xi hacuiin ngatsê rë ngu xcusun xi cuma cuetsun sacuaha plata cojo oro xi cuatjin casahmi Nina ta ¹⁹ngatsê rë jni rë Cristu xi cavanga xi jercu machjirêhê, sacuahatjin machjirêhê jni rë cjuaveya rë ngu chu hnditsánga xi tsajin camahani mé má rë chu. ²⁰Cristu jan ne, casuaxa Nina me hisca chaja sa xi cuejña ngasunhndê, peru quihndê xi tijima chuva nixtin xi nechantahan ngasunhndê vi ne, casua Nina xi catimachaya naja tsêhê me cojo sa xi ndaja cuatjun. ²¹Ngatsê rë me vêhê ne, ngayun ne, camangutacun cojo Nina,

me xi catsicuya Cristu cjuahñu tsêhê ngajñi rë yêjê nima hacuaha casahmi jyê casahmi hnga me Cristu. Vêhê xi mangutacun cojo Nina hacuaha vetuhun tacun me.

²²Ngayujun ni ne, xi tivinuhyun cjuaquixi rë Nina ne, cuatjin canitsiuhun xahasen nuju cojo cjuatacun nuju, cojo sa xi nihmutacún cojo nguñaja ni cjuandaja yêjê sa me xi ladu rë Jesucristu. Ngajan xi meje rë xi hñu nihmutacún xingun cojo nguñaja xahasen nuju. ²³Ngayujun ni ne, hacuaha cavuya catsin nga ngayun, peru hacuiin tsêhê xuta xi hatuxa hme ta tsêhê ngu tjê xi cueyaain ta cjua rë Nina, cjua xi sua naja cjuahñu hacuaha tsajin nixtin cjuëya. ²⁴Xujun rë Nina ne, cuitjin chja: Yêjê ni xuta ne, sacuaha xca nguijña me, yêjê ni xi ndaja tsêhê me ne, sacuaha naxu rë xca jan.

Xca nguijña jan ne, xí ne, naxu ne, vixu, ²⁵peru cjua rë Nai naja ne, tsajin nixtin xi cjuëya.

Hane cjua vêhê ne, hacui cjuandajyihi xi casacu camachaya nuju.

2 Vêhê xi ngayujun ni ne, meje rë xi tiyujunxun yêjê ni cjuatsehen, yêjê ni cjuandacha, yêjê xcusun xi sahmi xuta xi jo xcun jo hntsua tjin rë me, yêjê ni cjuaxin, yêjê ni cjuachjataha. ²Sacuatjin rë ngu quihndinda xi meje rë suvá lechi ne, cuatjin catamameje nuju cjua rë Nina, cojo sa xi nguyêjê rë xi tivisehen nuju cjua jan ne, tuxaha sa cjuatacun nuju hisca xi cuetjuntjun. ³Cuatjin nihñu, sa xi ha camachaya nuju xi Nai naja ne, jercu ndaja me.

Sacuaha ngu ndoyojo xi jercu vengui chjí rë ne, cuitjin rë Jesucristu

⁴Nihñutiñu tsêhê me ta me vêhê ne, quicun me. Me vêhê ne, sacuaha ngu ndoyojo xi handasa catsitjungui xuta ne, peru xi cuma rë Nina ne, hatuxa catuxijin rë hacuaha jercu vengui chjí

rë. ⁵Hacuaha ngayujun ni ne, sacuaha ndyojo xi quicun ne, tuhun cahndé xi cjuaha nuju Nina, cojo sa xi cuma ngayun sacuaha ngu yungun hiscan xi nechunxun, hane satëxa nuju nihñu xa rë Nina sacuaha nahmi, xi tuhun cjuandaja nuju xcun Nina. Hane yëjë ni cjuandaja vëhë ne, chuya rë Nina ngatsë rë Jesucristu. ⁶Xcun xujun rë Nina ne, cuitjin camahindu cjua xi cachja Nina:

Ngahan vejñávasen ngu xihin ngajan ndetjún Sión,

hane xihin jan ne, sacuaha ngu ndyojo xi jercu vengui chjí rë, xi hacuaha catuxijin rë xi cuma titjun tsëhë xihndënaña;

hane xuta xi cumangucacun cojo xihin jan ne, tsajin nu tsajin nixtin xi cuetju sava me.

⁷Hane xi cuma nuju ngayujun ni xi mangutacun cojo Jesucristu jan ne, jercu vengui chjí rë me. Peru xi cuma rë xuta xi manguaaincacun me ne, cuetjucaa cjua xi camahindu xcun xujun rë Nina xi cuitjin chja:

Me xi catsitjungui xuta sacuaha tsitjungui chjinevexo ngu ndyojo xi chuyiin rë me tsëhë ne,

me vëhë ne, camatitjun me tsajan ngayejen ni.

Cuatjin camahindu. ⁸Hacuaha cuetjucaa cjua vihi:

Xihin jan ne, sacuaha ngu ndyojo xi xtenguiya rë xuta, ngu ndyojo xi sahmi xi tsichaja me ndiya rë me.

Cuatjin chja cjua. Xuta xi manguaaincacun me ne, xtenguiya rë me, tsëhë xi vihndiin me cjuandajyihi xi chja tsëhë Jesucristu. Hatuxa cuatjin cavejña Nina xi cuatjin cuatju me cuma.

Xuta xi tsëhë Nina me

⁹Ngayujun ni ne, ngu tjë xi cavaxijin Nina ngayun, sacuaha nahmi xi facuenda yëjë ni xi tsëhë Nina ngayun, xuta xi hatuxa siuxin rë Nina ngayun,

hacuaha xuta xi hatuxa tsëhë Nina ngayun. Cuatjin cun ngayujun ni, cojo sa xi ninguitsujun cjuandajyihi xi chja tsëhë yëjë ni cjuandaja xi casahmi Nina, me xi cajindaya nuju xi cavetjunxun tsëhë ngajñi jñu, xi cuisuhun ngajñi hasen ndajyihi rë me. ¹⁰Hatsëë ne, hisca hacuiin xuta rë Nina ngayun, peru quihndë ne, xuta rë Nina camá ngayun. Hatsëë ne, hisca tsajin camayuma rë Nina ngayun, peru quihndë ne, camayuma rë me ngayun.

Meje rë xi cuinechan ndiya rë Nina

¹¹Ngayujun ni xi sacuaha xuta ngu nangui xi nechunyun ndiya nguehe ngasunhndë vihi ne, vinchangë nuju xi nechunxun tsëhë yëjë ni cjuatsehen xi fehya rë xahasen naja, tsëhë xi sacuaha ngayaan xi vixcaan cojo xingueen ne, cuatjin rë yëjë ni cjuatsehen vëhë cojo hasen naja. ¹²Ndaja nihñu ngajñi rë xuta xi hvín me Nina, cojo sa xi me xi cuacun vë ne, handasa choho cuichja me tsujun quihndë sacuaha xi ngayun xuta tsehen má yun ne, peru scuëë me yëjë ni cjuandaja xi tinihñu, sehe sahmi jyë sahmi lnga me Nina nixtin hya xi cjuahataha Nina jyë rë xingu xingu me.

¹³Ngatsë rë Nai naja ne, tinuhyun tsëhë yëjë ni xutaxa rë ngasunhndë vihi, há xi me xi matitjun camahani, ¹⁴há xi xuta xi tsingatju me xi sahmi castigu rë xuta xi choho sahmi hacuaha cuaxëndaja me xuta xi ndaja sahmi. ¹⁵Cuatjin nihñu ta, tsëhë xi Nina ne, meje rë me xi cjuandaja xi ngayun nihñu ne, sahmi xi xuta xi hvín ne, cumaji choho cuichja me tsujun. ¹⁶Tángun cojo ngasunhndë nuju sacuaha xuta xi tsajin camahani mé xi tjín tsavi xi cuma rë me, peru hacuiin ngatsë rë vëhë xi nihñu ngu xcusun cjuatsehen ta, xi meje rë ne, tángun cojo ngasunhndë nuju sacuaha xi mosu hndixahan rë Nina má ngayujun ni. ¹⁷Chjuhuncun ni yëjë xuta. Nihmu

tacún yějě ni xi hacuaha ladu rě Jesu-cristu me, meje rě xi rcún Nina, hacuaha chjuhuncun me xi matitjun camahani.

Cjuahmu xi cavatju Jesucristu camá

¹⁸Ngayujun ni mosu hndixahan ne, tinuhyun tsěhě nai nuju, hacuaha chjuhuncun me, hacuiin suvá me xi xuta ndaja cojo me xi jeya ta cojo me xi hngacacun. ¹⁹Cuatjin nihñu ta jercu chuya rě Nina sacuatjin rě ngu me xi caa rě cojo ngu cjuañihi ngatsě rě xi vihindě me tsěhě Nina, handasa tsajin jyě rě me xi cuatjin vatju me má. ²⁰Sa xi ngayun choho nihñu hane má yun castigu ne, ¿yo ndaja cuichja tsujun xi scaa nuju castigu jan? Peru sa xi ngayun ndaja nihñu hane má ngayun castigu ne, jercu chuya rě Nina sa xi ngayun scaa nuju. ²¹Nina ne, cajindaya me ngayun xi cuatjin cuatjun cuma. Cristu ne, cavatju me cjuañihi camá ngatsě nuju, hane cuatjin cavejña me ntsacu, cojo sa xi ngayun nihñu sacuatjin casahmi me. ²²Me vėhě ne, hisca ngu cjuatsehen casahmii me, hacuaha hisca ngu cjuandacha ne, cavetjiin cachja me. ²³Hya xi xuta choho cachja cojo rě me ne, me vėhě ne, hacuiin choho catsicuya me tsěhě xuta jan. Hya xi cavatju me cjuañihi ne, hacuiin cavincharcun me xuta jan ta cavetahacacun me Nina, me xi tsichuva rě xuta cojo cjuatacun rě me cojo cjuaquixi. ²⁴Suvá Cristu jan ne, cavaha me yějě cjuatsehen naja ngajñi yojo rě me, ngajan xcun cru, cojo sa xi cuma cuetjunxen tsěhě cjuatsehen, hane cuma cuangentjenguen ndiya rě cjuaquixi. Ngayun ne, cavetjuntjun ngatsě rě cjuahmu xi me vėhě cavatju me camá. ²⁵Titjun ne, sacuaha chu tsánga xi cachaja tjin nuju ngayun, peru quihndě ne, cavuyun nga ladu rě Cristu, me xi fahacuenda nuju sacuaha ngu xuta xi fahacuenda rě chu tsánga, cuatjin sahmi nuju me cuidadu.

Cuitjin xi meje rě xi cuiyuju xuta cojo chjuun cojo xihin me ndava me

3 Quihndě ne, ngayujun ni yachjin ne, tinuhyun tsěhě xihin nuju xingu xingu ngayun, cojo sa xi yahnga me xi vihndiin me tsěhě cjuar rě Nina ne, cui-jnecacun me, xi scuěě me xcusun nuju, handasa tsajin mé xi nújun, ²cuenda xi scuěě me xcusun ndaja xcusun jeya nuju. ³Mijí rě xi jercu nihñuxun cojo yějě ni ngu xcusun xi sahmi ndacun nuju cojo yojo nuju sacuatjin hya xi vatjutaha nihñu ndacun tsjarcun, hacuaha cojo hya xi nihñuxun cojo adorno tsěhě oro, hacuaha cojo hya xi chujun ngu tsjian hnga chjí rě. ⁴Cahndě rě vėhě ne, meje rě xi nihñuxun cojo yějě ni ngu xcusun xi hinchahntsua xahasen nuju sacuatjin hya xi ningacun cjuajeya xi cun yun ta yějě cjuandaja vėhě ne, jercu vengui chjí rě xcun Nina. ⁵Hatsěě ne, cuatjin casahmi yachjin xi siuxin me xi cuma rě Nina, yachjin xi cavetaha cacun me Nina. Me xi cuacun jan ne, cavihndě me tsěhě xihin rě me. ⁶Nima Sara ne, cuatjin cahndě me tsěhě xutachanga naja Abraham, xihin rě me, hane “nai naha” cachja me tsěhě me. Hane ngayujun ni ne, quihndi rě me ngayun, sa xi nihñu yějě ni cjuandaja hacuaha tsajin mé xi rcún.

⁷Cuanitjin ni nuju ngayujun ni xihin, xi nechun tangun cojo chjuun nuju xingu xingu yun ne, meje rě xi hyun xi hitsě ni chúva ngahñu rě yachjin. Chjuhuncun me ta, me xi cuacun vė ne, hacuaha chjuhunnstun tangun cojo rě me cjuahñu xatsě xi sua nuju Nina cojo cjuandaja rě me. Cuatjin nihñu ngayun ne, cojo sa xi tsajin mé sahmíndya rě oración xi nihñu.

Hya xi vatjun cjuañihi ngatsě rě nihña cjuandaja

⁸Quihndě xi tsinguíjnetaha cuichjá cojo nuju ne, ngayujun ni ne, meje rě

xi tjin tangun cjuatacun nuju cojo xingun, meje rë xi tjin tangun xahasen nuju cojo xingun, meje rë xi nihmutacún xingun xingu xingu ngayun sacuahä xi ngu naa ngu nahmi nuju ngayujun ni. Meje rë xi tjin nuju cjuayumatacun, hacuahä meje rë xi jeya ngayun cojo cjuatacun nuju. ⁹ Hacuahä cuéyanangë nuju xi mijí rë xi choho nihñu cojo yo xi choho sahmi cojo nuju, hacuahä sa xi yo choho cuichja cojo nuju ne, mijí rë xi choho chjayunnun tsëhë ta xi meje rë ne, ninchacuntuhun rë. Cuatjin meje rë xi nihñu ta, Nina ne, cajindaya me ngayujun ni xi chjuhunnstun ngu cjuaninchacuntihin. ¹⁰ Tjin ngu cahndé xcun xujun rë Nina xi chja cuitjin:

Me xi meje rë xi ndaja cjue cojo ngasunhndë rë hacuahä meje rë xi ndaja cuatju cuma ne,

mijí rë xi choho cuichja me hacuahä mijí rë xi cuichja me cjuandacha;

¹¹ catetjuxin me tsëhë ndiya rë cjuatsehen, hane catisahmi me cjuandaja, catanguise me ndiya rë cjuajeya, hane vëhë catjicojo me.

¹² Cuatjin meje rë ta Nai naja ne, facuenda me xuta xi tsajin jyé rë, hacuahä vihndë me oración xi sahmi xuta jan,

peru Nai naja ne, chuyiin camahani rë me tsëhë xuta xi sahmi cjuatsehen.

Cuatjin chja xujun rë Nina.

¹³ ¿Yo choho sahmi cojo nuju sa xi ngayun hatuxa nihñu cjuandaja? ¹⁴ Peru handasa cuatjun cjuañihi cuma ngatsë rë xi nihñu cjuandaja ne, tsimii sahmi rë ta ha tsujun ndaja. Hane xicarcuun hisca xi ngu, hacuahä hacuiin cumacjintacún.

¹⁵ Meje rë xi chjuhuncun Cristu cojo cjuatacun nuju ta me vëhë xi Nai nuju me. Hacuahä meje rë xi yëjë ni hora ne, tjin chjine ngayujun ni, cojo sa xi tuhun cjuaquixi nuju cojo tu yo ni xi cjuinenguise nuju mé má cuatjin vetuhun tacún Nina, ¹⁶ peru tinújun cojo nguñaja ni

cjuandaja cjuajeya. Tángun cojo ngasunhndë nuju cojo ngu xcusun xi ngascan ne, hisca hitsë tsajin cuma sava nuju, cojo sa xi xuta xi choho cuichja me tsëhë cjuandaja xi nihñu ngatsë rë xi tjin tangun cjuatacun nuju cojo Cristu ne, cuetju sava me tsëhë yëjë xi choho chja me tsujun. ¹⁷ Hitsë sa ndaja xi cuatjun cjuañihi ngatsë rë xi nihñu ngu cjuandaja, sa xi cuatjin meje rë Nina, xi cuma rë xi cuatjun cjuañihi ngatsë rë xi nihñu ngu cjuatsehen. ¹⁸ Cristu ne, ngundiya ni cahme me ngatsë rë jyé naja. Me vëhë ne, tsajin xi cún rë me xcun Nina, peru cahme me ngatsë naja xi tjercu tjin jyé naja, cojo sa xi cuma cuiseen ladu rë Nina. Cristu ne, sacuahä xihin xi má me ne, catsiquehen xuta me, peru sacuahä hasen xi hacuahä má me ne, catsicuya Nina me cjuahñu.

¹⁹ Hane sacuahä hasen me jan ne, quiji cachja me ngu cjuä cojo yëjë ni hasen xi hinchahñu. ²⁰ Hane hasen xi cuacun jan ne, hacui xi cahndiin tsëhë Nina, hya xi tacunya tacunya Nina cojo jeya nguyëjë rë xi Noé titsindaja me barcu rë me. Hane ngu jo me xi caxincha me cahntsua barcu jan ne, chuva rë jyin má me xi yëjë me, cavetjutje me hya xi cavatju me xcun nandá. ²¹ Hane nandá jan ne, sacuahä nandá xi xtenda yaan xi vaxëtje naja quihndë. Hya xi xtenda yaan ne, hacuiin xi tinityjahin yojo naja ta tichjahyan rë Nina ngu cjuatacun tyjahi, ngu cjuatacun ndaja, hane cuatjin vetjuntjen ngatsë rë xi Jesucristu ne, cavuya nga me cjuahñu. ²² Me vëhë ne, quiji me ngahnga, hane tacun me ladu quixi rë Nina. Quihndë ne, me vëhë vitexa me ángel cojo jingu sa xcusun hasen sa hasen ndaja sa hasen tsehen xi hacuahä matitjun ngajan ngahnga.

Meje rë xi ningatahantacun sacuahä catsingatahacacun Jesucristu

4 Vëhë xi, sacuatjin Cristu cavatju me cjuañihi nguehe ngasunhndë vihi ne,

cuanitjin ni ngayujun ni, meje rë xi taha catamangutacun cojo cjuañihi quihndë, tuxa má sa xi ngascan cuatjun cuma. Cuatjin meje rë ta, me xi ha cavatju cjuañihi camá ne, ha quihndë cuitexaain rë me cjuatsehen, ² hane cjuenduju me cojo ngasunhndë rë me sacuatjin meje rë Nina, hacuiin sacuahha meje rë cjuatacun naja ngayaan xuta ngasunhndë. ³ Ha jercu canichujun nixtin hatsëë, hya xi canihñu xcusun xi chuya rë xutaxín tsëhë. Jercu choho ndiya cavinechunyun, jercu camameje nuju cjuatsehen, jercu camachuhun, jercu catsangun suhi hisca xi jercu si rcu xuta hacuahha jercu vatjutaha hvi me, hacuahha jercu cachjuhunrcun nina ndyojo, xcusun xi hatuxa ndajintjin. ⁴ Quihndë ne, xutaxín jan ne, fircun rë me hisca choho chja me, hya xi ngayun ne, matanguaain yun cojo rë me hya xi me vëhë findujú me cojo ndiya rë cjuatsehen xi hinchha me. ⁵ Peru me vëhë ne, cuechú ngu nixtin xi sua me cuenta xcun me xi ha tjin chjine xi tsichuva me xuta xi quicun cojo xuta xi cahme cojo cjuatacun rë xingu xingu. ⁶ Vëhë xi hisca yëjë nima ne, casacu camachaya rë tsëhë cjuandajiyi xi chja tsëhë Jesucristu, cojo sa xi, sacuahha hasen xi má jan ne, sacú rë cjuahñu sacuahha cjuahñu rë Nina. Cuatjin camá handasa, sacuahha xuta ngasunhndë xi má nima xi cuacun jan ne, ha cachjaháchuva rë xingu xingu cojo cjuatacun rë, sacuahha chjaháchuva rë yëjë xuta ngasunhndë.

**Hacutjin meje rë xi
cuisecoon xingueen cojo
cjuandaja xi sua naja Nina**

⁷ Quihndë ne, ha camatiña nixtin xi cjuë ngasunhndë. Vëhë xi meje rë xi ngayujun ni ne, tiyujun chihin cjuatacun nuju hacuahha tjin chjine ngayun, xi nihñu oración. ⁸ Hitsë meje sa rë xi nihmutacún xingun xingu xingu ngayun

nguñajatacún ta, tsëhë xi cjuahmutacun ne, vujnu rë jercu cjin jyë naja. ⁹ Hacuahha chjuhunnstun xingun xingu xingu ngayun ndya nuju, xi hisca hitsë tsajin choho cuma tacún hya xi chjuhunnstun xingun. ¹⁰ Ngayun xi jercu cachjuhunnstun cjuandaja rë Nina hacuahha satëxa nuju xi ninguitsujun cjuandaja jan ne, meje rë xi xingu xingu ngayun ne, cuisecun rë xuta xi yahnga, ha chuva rë xi casua nuju Nina ngu cjuandaja. ¹¹ Yo ngayun xi cuinújun ne, tinújun sacuahha ngu xi chja cjuarë Nina. Hane yo ngayun xi cuisecun xingun ne, tisecun rë me cojo yëjë ni ngahñu xi sua nuju Nina. Cuatjin meje rë xi nihñu, cojo sa xi ngajñi rë tu mé ni cjuacjintacun ne, Nina ne, cuma jyë cuma hnga me cojo Hasen rë me ngatsë rë Jesucristu. Me vëhë ne, hatuxa jyë hnga me cojo Hasen rë me hacuahha jercu hñu me cojo cjuatacun rë me yëjë nu yëjë nixtin. Cuatjin jain.

**Cjuañihi xi cuatjun ngayaan
xuta ladu rë Jesucristu**

¹² Ngayujun ni ne, mijí rë xi cjuercun nuju tsëhë cjuañihi jyë xi vatjun má xi chutahachuva nuju ta, tsëhë xi hacuiin hacui ngu xcusun xi cjuercun naja. ¹³ Cahndë xi cjuercun nuju ne, meje rë xi catamasua nuju táha hacutjin tivatjun cjuañihi tijima sacuahha cjuañihi xi cavatju Jesucristu camá. Cuatjin catamasua nuju, cojo sa xi hacuahha jercu cumasua nuju nixtin hya xi cumatsejen hacutjin jyë hnga Jesucristu cojo Hasen rë me. ¹⁴ Sa xi xuta choho chja me tsujun ngatsë rë xi tjin tangun cjuatacun nuju cojo Cristu ne, tsujun ndaja ta, vëhë meje cuichja xi Hasen rë Nina xi jercu jyë hnga ne, tivëjña cojo nuju. (Xuta xi cuacun jan ne, hatuxa choho chja me tsëhë Jesucristu, peru ngayun ne, nihñu jyë nihñu hnga me.) ¹⁵ Sa xi yahnga ngayun cuatjun cjuañihi ne, mijí rë xi tsëhë xi

caniquhun ngu xuta o sa tsêhê xi canihñu cjuachêjê o sa tsêhê xi tu mé sa ngu cjuatsehen o sa tsêhê xi visuhunjñu ngajñi rê cjuacjintacun rê xuta xi yahnga. ¹⁶ Peru sa xi yahnga ngayun cuatjun cjuañihi ngatsê rê xi ladu rê Cristu ngayun ne, mijí rê xi cumasava nuju ta meje rê xi nihñu jyê nihñu hnga Nina ngatsê rê vêhê.

¹⁷ Ha cavechú nixtin xi cuetsihin tsichuva Nina xuta cojo cjuatacun rê xingu xingu me, hane cuetsihin me cojo naja ngayaan quihndi rê me. Hane sa xi tjun ngayaan tsichuva Nina ngayaan cojo cjuatacun naja ne, ¿hacutjin cuatju me xi vihndiin tsêhê cjuandajyihi xi cachja Nina? ¹⁸ Hacuaha tjín ngu cahndê xcun xujun rê Nina xi cuitjin chja:

Sa xi xuta xi cafê jyê rê sehe tu ma vetjutje me ne,

¿hacutjin cuatju me xi hisca cuendaain rê tsêhê Nina cojo me xi jercu sahmi cjuatsehen?

Cuatjin chja xujun rê Nina. ¹⁹ Vêhê xi yêjê me xi vatju cjuañihi tsêhê xi cuatjin meje rê Nina ne, meje rê xi catjindujú me cojo cjuandaja xi sahmi me hacuaha catejña me yojo rê me tsja Nina, me xi catsindaja rê me ta, Nina ne, hatuxa sahmi chihin me yêjê cjuarê me.

Cjua rê Pedru xi vinchangui me xuta ladu rê Jesucristu

5 Quihndê ne, meje cuichjá cojo nuju ngayujun ni xuta changá xi vitexun ngajñi rê yêjê xuta ladu rê Jesucristu. Ngahan ne, hacuaha xuta changá ngahan xi cavêê hacutjin cavatju Jesucristu cjuañihi camá. Hacuaha satê ná ngahan sacuatjin rê me xi cuacun jan cjuandaja xi cuetjucaa ngascan. ² Cuichjá cojo nuju xi hacuaha meje rê xi chjuhuncuendun xuta ladu rê Nina xi siuntsun, sacuaha ngu cha xi fahacuenda rê chu tsánga. Cuatjin nihñu nguñaja cjuasua sacuatjin meje rê Nina, hacuiin cjuachan hacuaha

hacuiin ngatsê rê xi jercu meje nuju tujún. Chjuhuncuendun me nguñajatacún, ³ hacuiin sacuaha xi ngayun má yun nai tsêhê me ta meje rê xi tejñu ntsacu, cojo sa xi xuta ne, tjengui me ngayun cojo xcusun nuju. ⁴ Ngajan xi hya xi cuin-duva nga me xi matitjun ne, ngayun ne, chjuhunnuntsun cjuandaja xi sua nuju Nina, cjuandaja xi tsajin nu tsajin nixtin cjuêya.

⁵ Cuatjin ngayujun ni xihin xi hitsê ni chúva nu nuju ne, tinuhyun tsêhê xuta changá. Hane ngayujun ni ne, meje rê xi jeya ngayun cojo cjuatacun nuju hacuiin xta yun ngajñi nuju cojo xingun ta tjín ngu cahndê xcun xujun rê Nina xi cuitjin chja:

Nina ne, tsitjungui me xuta xi jercu tjín rê cjuaxta cahntsua xahasen rê, peru xuta xi jercu tjín rê cjuajeya cahntsua xahasen rê me ne, Nina ne, jercu sua rê me cjuandaja.

Cuatjin chja xcun xujun rê Nina. ⁶ Vêhê xi ngayujun ni ne, meje rê xi ninguijnu yojo nuju xi cuinuhyun tsêhê Nina, me xi jercu hñu cojo cjuatacun rê. Cuatjin nihñu cojo sa xi me vêhê ne, sahmi jyê sahmi hnga me yun, hya xi cuechú nixtin rê. ⁷ Tiyujunxun yêjê ni cjuacjintacun nuju, tiyujun tsja Nina, tsêhê xi me vêhê ne, vutsejen me ngatsê nuju.

⁸ Ngayujun ni ne, meje rê xi tjín chjine yun hacuaha nechun quicun ta, tsêhê xi Satanás ne, xitsehen xi maji vêê nuju ne, tsujiyihi sacuaha ngu chu xa xi jercu titsichan chu, xi vangui chu yo xi sacú ru xi sinê chu. ⁹ Xicaníngatuun rê, hane tiyujunhñu cjuatacun nuju xi mangutacún cojo Nina. Cuatjin nihñu ta ha hyun xi yêjê sa me xi hacuaha cojo ladu rê Cristu hinchajinguyê ni ngasunhndê ne, hatuxa tjín rê me xi cuatju me yêjê ni cjuañihi vêhê cuma. ¹⁰ Peru xi ha cavatjun cjuañihi hitsê nixtin ne, Nina ne, tsityjahi me cjuatacun nuju, cuiyujuchihin me cjuatacun nuju, cuiyujuhñu me

xahasen nuju, hacuaha cuiyuju cahndé me cjuatacun nuju. Nina xi sahmi cuatjin jan ne, hacui me xi tjin rê yějě ni cjuandaja, hacui me xi cajindaya nuju me xi satě nuju cjuahasen ndajyihi rê me xi tsajin nu tsajin nixtin xi cjuěya, ngayujun ni xi tjin tangun cjuatacun nuju cojo Cristu. ¹¹ Nina ne, hatuxa jemu hñu me cojo cjuatacun rê me yějě nu yějě nixtin. Cuatjin jain.

Cjua xi vijnetaha

¹² Ngahan ne, catsihindu nuju ngu jo cjua vėhė, cojo sa xi cuinchangė nuju hacuaha tsinguixė nuju xi cjua vėhė ne,

hacui cjuandaja jain rê Nina. Tiyujun-hñu cjuatacun nuju xi cuangunndujun cojo cjuandaja vėhė. Silvanu ne, me xi ndaja fitjengui rê ndiya rê Cristu ne, cavisecoo ná me xi catsihindu nuju.

¹³ Xuta rê yungun nguehe Babilonia, xi hacuaha cavaxijin rê me Nina ne, tsingatju me nina nuju. Hacuaha Marcos xi sacuaha quihndi naha ne, tsingatju cha nina nuju. ¹⁴ Tuhun rê xingun ngu nina, cojo cjuandaja cojo cjuahmutacun tindatsuhun xingun, sacuahatjin xcusun naja. Catisua nuju Nina cjuandaja cjua-jeya ngayujun ni xi tjin tangun cjuatacun nuju cojo Cristu.

Carta xi majo xi catsingatju San Pedru

Pedru ne, tsingatju me cjuat tsêhë xuta xi macjain rë me Nina

1 Ngahan xi hmí ná Simón Pedru, mosu rë Jesucristu, hacuaha apóstol tsêhë me ne, tsingatju carta vihi tsujun ngayujun ngayun xi Nina naja Jesucristu cavaxëtje nuju me xi casua nuju ngu cjuatacun xi macjain nuju cuanitjin sacuahatjin ngayin. Cuatjin casahmi me ta Nina hatuxa jyihî tyjahi tyjahi cjuatacun rë me. ²Nina ne, catitsixuva me cjuandaja cjuajeya xi cuma nuju ngayujun ni ngatsë rë xi ndaja hyun Nina cojo Jesús, Nai naja.

Hacutjin cun xuta xi macjain rë me Nina

³Jesucristu xi cojo ngahñu ndajyihî rë me, jyë hnga me ne, cajindaya me yaan xi chan yo me. Hane cuatjin casua naja me yëjë ni xi mameje rë tsêhë cjuahñu xatsë hacuaha tsêhë ngu cjuatacun tyjahi. ⁴Cojo ngahñu vëhë casua naja Nina cjuat rë me xi tjercu tu ndaja vengui chjî rë. Cojo sa xi ngatsë rë cjuat vë ne, ngayun ne cuechuntuhun ngu cjuatacun sacuaha Nina, hacuaha cojo sa xi cuetjuntjun tsêhë xi cuetsun cjuatacun nuju cojo cjuatsehen xi fehya rë xuta. ⁵Hindë ngatsë rë vihi ne, ndaja nihñu ngahñu cojo sa xi ha macjain nuju Nina ne, má tyjahi cjuatacun nuju. ⁶Hane hacuiin cuanitjin ni, ta hacuaha ningascunyun cjuatacun nuju. Sehe tuhun hñu yojo nuju tsêhë cjuatsehen. Hacuaha cuanitjin ne cojo xi nihñu jyë tacún. ⁷Hacuaha cojo xi chjuhuncun Nina, hacuaha cojo xi chjuhuncun xingun, hane hacuiin tu cuanitjin chjuhuncun xingun ta cojo ngu cjuahmutacun.

⁸Sa xi cuatjin ndaja xcusun nuju, hane sa xi nihñu jain sacuatjin vitexa ne, xcun cjuahñu nuju ne, tjercu cuengui chjî nuju hacuaha hacuiin tu mahya ni camachaya nuju tsêhë Nai naja Jesucristu. ⁹Peru xuta xi cuaaintjin jyihî xcusun rë me ne, cumá jñu cjuatacun rë me sacuaha ngu rcá me o sacuaha ngu cha xi vutsejen hiscan xi cjin peru hvfin cha mé xi tivutsejen cha. Ngatsë rë xi cachaya rë me xi camanchataha jyë rë me xi ha casahmi me. ¹⁰Vëhë xi ngayujun ni xingueen ne, sa xi nihñu jain sacuatjin vitexa xcusun ndaja jan ne, ngajan machihin cjuat ta Nina ne, cajindaya nuju me hacuaha cavaxijin nuju me ne, hane cuatjin ha tuxa tsajin ngu nixtin xi cuetjuntjun tsêhë ndiya rë Nina. ¹¹Cuahatjin jemu ndaja sacu nuju cahndé xi cuisuhun hiscan xi sahmi gobiernu Nai naja Jesucristu, me xi vaxëtje naja, hane tsajin nu tsajin nixtin cuetjuntjun.

¹²Vëhë xi vejñacacun xi cúa tsinguitsjen nuju cjuandaja vihi ha ndasa ha hyun hane hacuaha quitahatacún cjuatacun nuju yëjë ni cjuaquixi xi camachaya nuju. ¹³Peru jinguyëjë rë xi tjin ná cjuahñu ne, xi má ná ne, sahmi ngu jyë xi cuascaya rë cjuatacun nuju xi tsinguitsjen nuju vi ta, ¹⁴tsêhë xi tacun xati nixtin xi cuejñá ngasunhndé vi, sacuaha ha casua Nai naja Jesucristu camachaya ndaja ná. ¹⁵Hisca hacuaha xati tisahmecácun ne sehe ngajan xi handasa cavéya ne tu mé ni hora cuma cuit-sjen nuju tsêhë yëjë ni cjuat vihi.

Cavindeya xcusun rë Jesucristu, hacuaha cavaxëndaja Nina me

¹⁶Catihin camachaya nuju cjuat sacuaha tsêhë ngahñu xi tjin rë Nai naja Jesucristu cojo tsêhë hya xi cuinduva me. Cjuat vëhë hacuiin ngu cuentu ndacha xi ndaja nuhya rë peru cjuaquixi jain. Quixi ta cahyin cojo tuxcuin ta Jesucristu ne, jemu rcun me ta

jemu jyë hnga hasen rë me. ¹⁷ Hya ne, Nina nahmi naja ne cafaharcun rë me hacuaha cavaxëndaja me Jesús ta cjuarë Nina ne canduva tsëhë ngahnga xi cachja cojo rë me cuitjin: “Vihi quihndi naha xi hmucácun ne, xi ngatsë rë me ne tjercu ndaja má ná.” ¹⁸ Hindë ngayin suvin canuhyin cjuarë vë ta canduva tsëhë ngahnga hya xi cavinechintihin ngajan cojo Nai naja rcu naxi hiscan cavatju camá.

¹⁹ Cojo xcusun xi cahyin ne, vëhë catsinguixi rë cjuarë changá xi catsihindu profeta. Ngayujun ni ne jemu ndaja nihñu xi tivetuhun rcun yëjë ni cjuarë changá jan. Cjuarë jan ne, tangun sahmi sacuaha ngu ndihi xi sua hasen rë hiscan xi jñu, hane cjuecani rë hisca xi sahasen ne. Hane sacuaha sua hasen rë tiña sahasen xi cuetju niñú seti ne hacuaha Jesucristu sua hasen rë xahasen nuju. ²⁰ Cjuarë xi hitsë sa sahmi ngu jyë xi meje rë xi machaya nuju ne, cjuarë vihi má: sacuaha yëjë cjuarë xi catsihindu profeta xcun xujun rë Nina ne, cumajin sesuntaha sa ngu cjuatacun rë xuta ta, ²¹ hisca ngu cjuarë jan tsajin xi catsihindu profeta cojo cjuatacun rë suva ni me, ta Hasen rë Nina casua rë me cjuatacun xi cuichja me cjuarë jan xi tsëhë Nina.

Guinduva maestru ndacha

2 Peru nixtin hatsëë ne ngajan nangui rë Israel ne, hacuaha cavetjujñi xuta xi tsejen sacuaha profeta peru tu vindacha me. Hacuaha cuanitjin hindë ne cuetjucun maestru xindacha xi xinchajñi me ngajñi nuju. Me xi cuacun vë ne, tsingusehenhma me cjuanchacun ndacha. Hisca tsitjungui me Nai naja xi cavaxëtje rë me. Vëhë xi nguhñusasa cuechutaha rë me castigu xi satë rë me. ² Ngajan xi tjemu cjin xuta cuisehen cojo me ndiya tseheh vëhë, hacuaha ngatsë rë me ne, choho cuichja yahnga xuta tsëhë ndiya rë cjuaquixi xi cjuecojo naja xcun Nina.

³ Maestru xi cuacun ne, jercu sahmi me cojo tujún. Vëhë xi cuaxë me tsujun cojo cjuandacha xi ndaja nuhya rë. Peru me xi cuacun ne, hisca hatsëë ne tacunvasen castigu xi cuechutaha rë me, tacun cuaha hatuxa maji cuetjutje me tsëhë.

⁴ Cahyun ni ta Nina ne catsinchataain me ángel hya xi casahmi ángel cjuatseheh, ta cacandiya me catsihñu me cojo cadena hiscan jñu cojo sa xi siucuaaha hisca cuechutaha nixtin xi sahmi cuenda me tsëhë. ⁵ Hacuanitjin ne, catsinchataain Nina xuta ngasunhndë hatsëë nixtin ta hisca catsingatju me ngu tsi cjuarcun xi catsicjë rë ngayëjë ni xuta tseheh jan. Cavetjutje me ngu tu tu xihin xi hmí rë Noé, ngu xihin xi casua camachaya rë xuta tsëhë ndiya rë cjuaquixi. Hacuaha yatu sa xuta cavetjutje me hya. ⁶ Hacuanitjin ne, casahmi Nina xi cavetsunya nandya Sodom cojo nandya Gomorra, cavaca me ne hisca xi camá suva ndesu sa rë. Vëhë camá sacuaha ngu ejemplu xi chja xi cuatjin cuatju yëjë ni xuta xi sahmi me cjuatseheh. ⁷ Peru hya ne, cavaxëtjējñi Nina ngu cha xi tyjahi cjuatacun rë xi hmí rë Lot, cha vëhë ne jemu choho má rë xahasen rë cha tsëhë yëjë ni cjuatseheh xi casahmi xuta nandya jan.

⁸ Jemu camá rë cha jan cjuaxti ta, tyjahi cjuatacun rë cha hane nchunchujun ni cavutsejen cha cavihndë cha xcusun tseheh xi casahmi xuta ta tsëhë xi cha vëhë jan ne, jiyajñi cha ngajñi rë me. ⁹ Cuatjin tsejen ta Nina ne, ma vaxëtjējñi me xuta tyjahi tsëhë cjuañihi hacuaha ma viyujuvasen me xuta tseheh nguighma castigu rë me xi cuejñaya me hisca xi cuechutaha nixtin xi cumacuenda tsëhë me. ¹⁰ Quixi jain ta xuta xi sahmi me cjuatseheh xi fehya yojo jyë rë me hacuaha xuta xi tsitjungui me xi tjin rë Nai naja derechu xi vitexa me ne, xuta vëhë ne, viyujuvasen me nguighma castigu. Me xi cuacun jan ne, jemu hñu jni rë me, sehñu

me cojo cjuatacun rë me hane tsacjuuin me xi choho cuichja me tsëhë ángel xi siu cojo Nina. ¹¹ Peru ha ndasa sa xi ángel ne hitsë sa hñu cjua me xi cumá rë me xi cuacun jan, hacjahi xcusun sahmi ángel ta vetjiincacun cuinchajyë xcun Nai naja.

¹² Xuta tsehen xi cuacun vë ne, jemu chu me, ta ngu chu ne, cjuatacun rë chu xi vitexa ru, hacuiin tsingatahatacun chu. Hacuaha siu chu cojo sa xi chjaha ru sehe cueya chu, hane cuatjin cumachjirëhë chu. Cuanitjin ne xuta jan choho chja me tsëhë yëjë ni xcusun xi vijniircu me ta, tsingataaincacun me hacuaha sacuatjin catsijehnduya me cjuatacun hacuaha cjuë cjuehndu me suva me tangun me cojo ngu chu. ¹³ Cuatjin cuatju me ngu cjuanñihi sacuaha casahmi me xi cavatju ñihi xuta. Xi má rë me ne, tjemu tjin rë me cjuasua xi tisahmi me ha tu cutjin ni xi masua rë xahasen rë me hora hya. Nguyëjë rë xi tichinu tangun tsëhë suhi xi tjin nuju ne, me xi cuacun vëhë ne, ngu cjuasava me, ngu xcuehyu hinchajñi me cojo nuju xi tisua me cjuasua yojo rë me cojo ngu cjuandacha.

¹⁴ Xi tu scutsejen ni me jan ngu chjuun ne, hachu cuehya ran xahasen rë me. Fendaain rë me xi sahmi me cjuatsehen. Tsitsejen me xuta xi ndaya cacun. Yëjë fehya rë xahasen rë me ta cuatjin camanga rë. Ha tjinchihin xujun jyë rë me xcun Nina. ¹⁵ Cachaja me ndiya ta, tsëhë xi cavetjuxin me tsëhë ndiya quixi rë Nina. Cafayangui me xcusun xi casahmi Balaam quihndi rë cha Beor. Cha vë ne, jercu casahmi cha cojo tujún, hisca meje rë cha chjí rë cjuatsehen. ¹⁶ Hacuaha Nina casahmi me xi ngu chu burra xi majin tsingatahacacun chu cojo cjuatacun ru, peru cojo xta rë xuta cachjataha chu cha jan hane casuaain chu cahndë xi cjue sa cha cojo cjuasca rë cha.

¹⁷ Maestru jan ne, machjiriin cjua rë me. Tangun me cojo ngu ndava nandá xi

quixíya, hacuaha tangun me cojo yufí xi ficojo rë tjojne. Nina tjin ndaja rë me ngu cahndë xi cuisehen me hiscan xi jñu cjin ni. ¹⁸ Maestru jan ne, jindayatë me cjua xi sahmi yehe me xi ndastu venguichji rë. Hacuaha tsingascaya rë me cjuatacun rë jingu sa xuta xi cuma meje rë me cjuatsehen xi fehya yojo rë me. Xuta jan ne, sehe tisahmi me ngahñu xi tivetjutje me tsëhë ngajñi rë xuta xi hinchá ndiya rë cjuandacha. ¹⁹ Chja ndacha maestru xi cuacun ta cuma ndaya xuta jan tsëhë cjua xi vitexa ley, cuatjin chja me. Peru suva ni me ne, cjëë cuma ndaya me tsëhë cjuatsehen. Hane jima ngu ngayaan ne, ha tu jarë ni xi scaa rë tsinguijne naja ne, vëhë scaa rë cuitexa naja tsihñu cjuatacun naja. ²⁰ Cuatjin ne, xuta xi ha vëë me yo xi Nai naja Jesucristu xi vaxëtje naja hane yo xi cavetjuxin me tsëhë yëjë ni ngu cjuatsehen tsëhë ngasunhndë ne, sa xi tsingatihin me xi cuixuya nga me ngajñi cjuatsehen jan ngu ndiya nga ne, hane cjuatsehen jan scaa rë cuitexa rë me ne, hitsë sa sahmi yehe me jyë rë me xi cuma rë titjun. ²¹ Hya hitsë sa ndatjin tsëhë me sa xi camachayiin rë me ndiya quixi jan tsëhë xi cuma rë xi titjun quiji ndaja me ne, peru sehe catsismicacun me tsëhë cjua ndajyihi rë Nina xi cafahatsja me. ²² Hya xi cuatjin sahmi xuta ne, ngajan tsejen xi quixi jain cjua xi chja cuitjin: “Naña xi cavesu rë chu ne, vuya jinë chu tsëhë chu hane chu chinga xi sehe tu caffè catsinduya me chu ne, vuya vinduyachajo chu ngajñi ndasi.”

Handajasa vindeya rë Nai naja, peru cuiduva me

3 Vihi má jo carta xi tsihindú nuju, ngayujun ni xingueen. Catsijo carta vi ne, yaha conseju xi ha hyun peru xi meje ná xi tsingascaya rë cjuatacun nuju cojo. ² Ninguitsjun tsëhë cjua xi hatsëë cachja profeta rë Nina, hacuaha ninguitsjun tsëhë cjua xi cachja Nai naja xi

vaxëtje naja, cjava jan xi apóstol cavicuya nuju.

³ Hacuaha hatuxa nihñucuendun tsêhê cjava vihi: nixtin ngascan rê ngasunhndê ne, hya cumatsejen xuta xi sahmi me cjuatsehen tu cutjin cuehya rê yojo rê me. Me vêhê ne, cuejnucêê me ⁴ cuinen-guise me cuitjin: “¿Jani tsejen Cristu? ta, tacunvasen cuaha cjava xi cuinduva nga me. Peru cafê cahme xuta changá naja ne, hane ha nduva ni chuva xi nduva, cuanitjin sacuahatjin camá hisca xi casa-hasen ngasunhndê.” Cuatjin chja me. ⁵ Peru quixiin cjava xi chja me ta, hatuxa mijí cjuahacuenda me tsêhê xcusun xi cama vi: cojo cjava xi cachja Nina ne, ngasunhndê ne, ha tacun cuaha hisca hatsêê nixtin. Nangui ne, camatangun ngajñi nandá, hacuaha nandá ni ne, casua ngahñu rê ngasunhndê. ⁶ Sehe hacuaha nandá vêhê ni ne, catsinguetsun rê hya xi casesuntê nandá ngasunhndê nixtin vê. ⁷ Hindê ne hacuaha cojo cjava rê Nina jan ne, ngahnga cojo nangui xi tsejen quihndê ne, ha tetjo cuaha rê Nina peru cojo cjava vêhê ni ne, sehe cueti cojo ndihi. Ndihi vêhê ne cuaca rê hya xi cjuaháchuva Nina yêjê ni xuta tsehen nixtin xi cjuêya me xi cuma rê Nina.

⁸ Peru ngayun xingueen, chjuhuncuendun tsêhê cjuaquixi vi: xi má rê Nai naja ne, ngu nixtin ne, tangun ni nduju sacuaha ngu mil nu, hane xi ngu mil nu ne, tangun chuva sacuaha ngu nixtin. ⁹ Handasa xi ma tsingatahacacun xuta xi jemu tivindeya rê Nina xi cuma chihin cjava xi cachja me ne, peru quixiin vê. Nina ne, ta tsijyêcacun me cojo nuju, tisua sa nuju cahndê cojo sa xi tsajin hisca ngu xuta xi chaja me ta, meje rê me xi yêjê ni xuta ne, tsindeya me cjuatacun rê me hane cuisehen me ndiya ndajyihi.

¹⁰ Peru xi cuechun nixtin xi cuinduva Nai naja ne, ha sacutsja rê cjuêhe me sacuaha xi cjuêhe ngu chêjê xi má nguixun. Sehe ngajan cumá xi ngah-

nga ne, cuetsunya cojo ngu chircun xi tjercu cjuaneya camahani, hane yêjê xcusun xi camá cojo ne, cjuêya tundejaya cojo ndihi. Hacuaha nangui ne, cjuê cueti cojo yêjê xcusun xi tjin rê. ¹¹ Tsêhê xi quixi jain xi hatuxa cuatjin cjuê cuetsunya yêjê xcusun vê ni, ngajan xi sahmi nguujê xi ngayun ne, ndandaja nihñu ngayun hacuaha tyjahi cjuatacun nuju. ¹² Nechunyun rê nixtin xi cuinduva Nina hane nihñu xati tacun xi xati cumá cjuêhe. Nixtin vêhê ne, ngahnga ne cuetsunya cojo ndihi, hane yêjê xcusun xi camá cojo ne, tundejaya rê ne, cjuêya. ¹³ Peru ngayaan ne, nechayan rê cahndê xi cachja Nina xi cuiseen, ngu ngahnga xatsê, ngu nangui xatsê hiscan cuinechanchanden cojo suva mé xi tsajin jyê rê.

¹⁴ Vêhê xi ngayujun ni xingueen ne, jinguyêjê rê xi nechunyun rê yêjê ni xcusun vihi ne, nihñu nguñajatacun xi ndandaja nihñu cojo sa xi hya xi cuechutaha me yun ne, tyjahi cjuatacun nuju, tsajin xi cún nuju, hane hacuiin mé cjuachan tjin. ¹⁵ Ningatuhuntacun ngayun ta hindê xi titsijyêcacun Nai naja cojo naja ne xi jemu tafi me ne, vaxêcun rê xi xuta ne, cuetjutje me. Tangun ni chja Pablo xingueen ne, hane hacuanitjin catsihindu nuju tsêhê, sacuahatjin cjuatacun ndajyihi xi casua Nina me. ¹⁶ Ngajan xi xcun yêjê ni carta xi catsihindu me ne, hacuaha chja me cojo nuju tsêhê yêjê ni xcusun vihi, handasa hinchajñi yahnga cjava xi tjemu chja vijnercu. Xuta ngarca ne, xuta xi hacuiin nguñajacacun me ne, titsindeya me cjuatacun rê cjava jan xi chja vijnercu hane hacuaha tsindeya me cjuatacun rê yahnga xujun rê Nina. Xi cuatjin sahmi me ne, tivangui me suva me jyê rê me.

¹⁷ Ngajan xi ngayun, xingueen, hangu ta hya xi chaja sa cumá ne ha camachaya nuju tsêhê cjuacjintacun vihi, nechun cuidadu tsêhê. Sehe ngajan hacuiin

mahinda tacun cojo cjuandacha tsëhë
xuta tsehen ta sehñu cuaha cojo cjuat-
acun quixi. ¹⁸Peru catamajyë sa tsujun
cjuandaja rë Nina hacuaha catuxaha sa

cjuatacun xi tjin nuju tsëhë Nai naja Je-
sucristu, me xi vaxëtje naja. Catama jyë
catama hnga me yëjë nu yëjë nixtin. Cu-
atjin jain.

Xujun titjun, xi catsihindu San Juan

Cumangutacun ta Jesús camá me Quihndi rë Xuta

1 Tihín cumachaya nuju ngujo cjuat tsêhë Jesucristu, me xi sua cjuahñu xatsë. Me vëhë xi ha tacun me hisca xi casahasen ngasunhndë. Canuhyin cjuat xi cachja me. Cahyin yëjë ni hacutjin xi casahmi me. Hisca casatë ntsin me. ²Me xi sua cjuahñu jan ne, camatsejen me. Hane ngayin ne, cahyin me. Vëhë xi titihín cjuaquixi niji, xi titihín tijimachaya nuju ta me vëhë ne, tsajin nu tsajin nixtin xi cavetsihin cjuahñu rë me, hacuaha tsajin nu tsajin nixtin xi cuijnetaha cjuahñu rë me. Ha tacun me ngajan cojo Nahmi rë me ne, peru canduva me nguehe, cama tsejen me ngajñi niji. ³Vëhë xi titihín tijimachaya nuju cjuat xi canuhyin cojo xcusun xi cahyin, sehe ngajan xi cuma tangun cjuatacun nuju cojo Nina sacuatjin tjin tangun cjuatacun niji cojo Nina Nahmi naja cojo Jesucristu, Quihndi rë me. ⁴Vëhë xi cuitjin tinihindin nuju, cojo sa xi jemu ndaja cuma rë xahasen niji.

Xi cuanguen nduju cojo Nina ne, má sacuaha casua hasen rë cjuatacun naja

⁵Cjuat xi cachja Jesucristu cojo niji ne, cuitjin fi: Nina ne, hatuxa tjemu ndaja me. Tsajin camahani cjuatsehen hiscan tacun me. Hane ha cjuat vëhë ni xi tinújan cojo nuju. ⁶Sa xi cuinújan xi tjin tangun cjuatacun naja cojo Nina hya xi tinihña cjuatsehen ne, tu vindachan ni ta, cjuatsehen xi tinihña ne, chuyiin rë Nina tsêhë. ⁷Peru sa xi nechan ngajñi rë cjuandaja, sacuatjin rë Nina xi hatuxa tacun me ngajñi rë cjuandaja ne, cuatjin xi cuma tangun cjuatacun naja. Hacuaha

cuatjin xi cjuengui xahasen naja tsêhë yëjë ni jyë naja, ngatsë rë xi cahme Jesús, Quihndi rë Nina.

Sa xi cuijacun cojo Nina ne, cumanchataha jyë naja

⁸Sa xi cuinújan xi tsajin jyë naja ne, tu cuindachan suvaan ni rë yojo naja ta, quixiin xi nújan. ⁹Peru sa xi cuijacun jyë naja cojo Nina ne, tsinchataha naja me, hacuaha cuaxëxin me yëjë ni cjuatsehen xi hinchaxahasen naja. Cuatjin sahmi me ta tjercu ndaja me. Yëjë ni cjuat xi chja me ne, hatuxa sahmi chihin me. ¹⁰Sa xi cuinújan xi hisca ngu cjuatsehen cjëë camahani nihña ne, tangun vëhë cojo xi cuinújan xi Nina ne, jemu ndacha me xi chja me xi tjin jyë naja, hacuaha cuatjin cumatsejen xi cjuat rë Nina ne, cavisiin camahani ngajñi rë cjuatacun naja.

Cristu, me xi chjatje ngatsë naja

2 Titsihindu nuju yëjë ni cjuat vihi tsan ta, tsêhë xi cjuat vihi ne, cuicuya nuju xi hacuiin nihña cjuatsehen. Peru sa xi tjin yo yaan xi nihña ngu cjuatsehen ne, hacuaha tjin naja ngu me xi cuichjatje ngatsë naja xcun Nahmi naja. Me vëhë ne, hacui Jesucristu, me xi hatuxa tyjahi. ²Hacuaha me vëhë ne, cavechjitje me tsêhë yëjë ni jyë naja. Peru hacuiin tu suvá ni jyë naja ta hacuaha cojo jyë rë yëjë sa xuta.

³Sa xi nihña jain hacutjin xi vitexa Nina ne, ngajan matsejen xi cjuaquixi xi xuta rë me ngayaan. ⁴Peru sa xi cuinújan xi hatuxa xuta rë Nina ngayaan hya xi mijí nihña hacutjin vitexa me ne, tjercu ndacha yaan ta quixiin xi nújan. ⁵Peru hya xi nihña jain hacutjin xi vitexa me ne, hya matsejen xi nihmutacun jain me. Sa cuatjin ne, hyan ta tjin tangun cjuatacun naja cojo me. ⁶Sa xi cuinújan xi tjin tangun cjuatacun naja cojo me ne, meje

rë xi nechan ngajñi rê cjuandaja sacu-
atjin cavejña Jesucristu.

Cjuatacun xatsë

⁷ Cjua xi titsihindu nuju vihi tsan ne, hacuiin ngu cjuatacun xatsë xi sehe tiv-
itëxa nuju xi nihmutacun xingueen ta,
ha hacui ni cjuatacun xi cavitëxa nuju
hya xi tjun tjun camacjain nuju. ⁸ Peru
cjuatacun xi titsihindu nuju vihi ne,
cuma cuinújan xi sacuaaha ngu cjuata-
cun xatsë ta, hiscan xi ha cavechu cju-
atacun jan ne, tivetsihin tisahmi xuta
cjuandaja. Hane vëhë sahmi xi tivetsi-
hin tifë cjuatsehen xi tjercu tjín nga-
sunhndë. Jesucristu ne, casahmi jain me
yëjë ni hacutjin xi vitexa cjuatacun xatsë
vihi, hacuaaha ngayujun ni ne, tinihñu
hacutjin vitexa cjuatacun xatsë jan. ⁹ Sa
xi cuinújan xi nechan ngajñi rê cjuan-
daja, hya xi choho hyan xingueen ne,
quixiin xi nújan ta nechancuaan ngajñi
rë cjuatsehen. ¹⁰ Peru sa xi hmutacun
xingueen ne, cuatjin matsejen xi nechan
ngajñi rê cjuandaja. Hane tsajin mé ni-
hña xi sahmi xi cuixuya xingueen nga-
jñi rê cjuatsehen jan. ¹¹ Peru sa xi choho
hyan xingueen ne, nechan ngajñi rê cju-
atsehen, hacuaaha sacuiyiin naja hacutjin
ndatjin nihña ta tsëhë xi cjuatsehen xi
tinihña ne, sahmi jñu tsajan.

¹² Ngayujun ni tsan ne, tsihindu nuju
ta, jyë nuju ne, ha camanchataha ngatsë
rë Jesucristu. ¹³ Ngayujun ni xi xuta
changá yun ne, tsihindu nuju ta, tsëhë
xi ha hyun me xi ha tacun hisca xi casa-
hasen ngasunhndë. Hane ngayujun ni xi
cjëë cuma changá yun ne, hacuaaha tsi-
hindu nuju ta ha cacaa nuju cojo xitse-
hen má titjun.

¹⁴ Ngayujun ni tsan ne, tsihindu nuju
ta ha hyun Nina Nahmi naja. Ngayu-
jun ni xi xuta changá yun ne, tsihindu
nuju ta ha hyun me xi ha tacun hisca
xi casahasen ngasunhndë. Hane ngayu-
jun ni xi hacuiin changá yun ne, hacuaaha

tsihindu nuju ta nechun nguñajatacún
xi macjain nuju cjua rê Nina, cjua
xi quichuhun cahntsua xahasen nuju,
hacuaaha cacaa nuju cojo xitsehen ma
titjun.

¹⁵ Mijí rê xi chuya naja cjuatacun xi
tjin ngasunhndë ta, sa xi chuya naja ne,
cumaji nihmutacun Nina Nahmi naja.
¹⁶ Cuatjin ta, tsëhë xi yëjë ni cjuatacun xi
tjin ngasunhndë vihi, sacuaaha cjuatacun
tsehen xi ningatahantacun, sacuaaha cju-
atacun xi tjercu meje naja yëjë ni xcusun
xi chutsejen, sacuaaha cjuatacun xi tjercu
nihña yehe yojo naja ne, yëjë ni cjuat-
acun xi cuacun vëhë ne, hacuiin nduva
tsëhë Nina Nahmi naja ta nduva tsëhë
suvá ngasunhndë vihi. ¹⁷ Hane xcusun rê
ngasunhndë vihi ne, cojo yëjë ni cjuat-
acun xi tjercu chuya rê xuta ne, cjuëya.
Peru xuta xi sahmi jain me hacutjin meje
rë Nina ne, me vëhë ne, tsajin nu tsajin
nixtin cjuëya me.

Cjuaquixi cojo cjuandesu

¹⁸ Ngayujun ni tsan ne, ha tijima tiña
nixtin xi cjuë ngasunhndë. Ha canuhyun
ta cuinduva xu ngu cha xi sahmi condra
tsëhë Cristu. Peru quihndë ne, tjemu cjín
xuta xi ha tijimatsejen xi condra tsëhë
Cristu me. Hane vëhë xi ha hyin ta cama
tiña nixtin xi cjuë ngasunhndë. ¹⁹ Xuta
xi cuacun jan ne, cavetjuxin me tsajan.
Peru hatuxa hacuiin ladu naja me ta, sa
xi quixi xi ladu naja me ne, caviyuju me
ngajñi naja. Peru cavetjuxin me tsajan,
cojo sa xi cuma tsejen ta hacuiin ladu
naja me.

²⁰ Ngayujun ni ne, casua nuju
Jesucristu Hasen xi tsëhë Nina. Vëhë xi
vijnercun cjua xi cjuaquixi. ²¹ Hacuiin
tsingátahacacun xi vijniircun cjua
xi cjuaquixi ta ha hvë xi vijnercun.
Hacuaaha hyun ta cjuandacha ne, hatuxa
sacuiin naja ngajñi rê cjua xi cjuaquixi.
Vëhë xi cuitjin tsihindu nuju cjua vihi.

²² Tjin xuta xi chja xi Jesús ne, hacuiin Cristu me, hacuiin me xi cavaxijin Nina xi cuaxëtje naja. Hane xuta xi cuatjin chja me ne, hatuxa tjemu ndacha me. Hacuaha xuta xi tsitjungui me Nahmi naja xi tacun ngahnga cojo Quihndi rë ne, me vëhë xi sahmi condra tsëhë Cristu. ²³ Yëjë ni xuta xi tsitjungui Quihndi rë Nina jan ne, tsajin tjin tangun cjuatacun rë me cojo Nahmi rë Quihndi jan. Peru xuta xi macjain rë Quihndi jan ne, hacuaha tjin tangun cjuatacun rë me cojo Nahmi jan.

²⁴ Ninguitsjun yëjë ni cjua xi canuhyun hisca nixtin hya xi tjun tjun camacjain nuju. Sa xi quichuhun cjua jan cahntsua xahasen nuju ne, hacuatjin tjin tangun cjuatacun nuju cojo Quihndi cojo Nahmi rë. ²⁵ Hacuaha cachja Cristu xi sua naja me ngu cjuahñu xatsë.

²⁶ Cuitjin tsihindu nuju ta, tsëhë xi tjin xuta xi meje cuindacha nuju me. ²⁷ Peru ngayun ne, Hasen xi tsëhë Nina xi casua Cristu ngayun ne, quichuhun cahntsua xahasen nuju. Vëhë xi hacuiin sahmi ngujoyë xi cuinduva xuta cuicuya nuju me ta, tsëhë xi Hasen xi casua me jan ne, tivicuya nuju yëjë ni cjua. Hane cjua xi tivicuya nuju ne, hatuxa cjuaquixi, hacuiin cjuandacha. Quihndë ne, cuatjin tangunndujun cojo xi ha macjain nuju Jesucristu, sacuatjin xi ha cavicuya nuju Hasen xi tsëhë Nina jan.

²⁸ Quihndë tsan ne, cúa cuichjá cojo nuju ta tangun nduju cojo xi ha macjain nuju Jesucristu, sehe ngajan xi nixtin xi cuinduva nga me ne, ngayaan ne, hacuiin rcun cuma, hacuaha hacuiin tsisava naja me. ²⁹ Ha hyan ta Cristu ne, hatuxa tyjahi me. Vëhë xi cumangutacun ta yëjë ni xuta ndaja xuta tyjahi ne, me vëhë xi ha camá me quihndi rë Nina.

Me xi tsin ngatsë rë Hasen rë Nina ne, sacu rë me cjuahñu xatsë

3 Tjercu tsihmucacun naja Nina Nahmi naja. Hisca chja me xi quihndi rë me ngayaan. Peru hacuiin tu suvá chja ni me ta cjuaquixi jain xi quihndi rë me ngayaan. Peru xuta tsehen ne, hvín me xi quihndi rë Nina ngayaan ta, tsëhë xi hacuiin xuta rë Nina me. ² Ngayaan tsan ne, quihndë ne, quihndi rë Nina ngayaan. Peru cjëë cumachaya naja mé xcusun xuta cuma ngayaan xi cuma ngascan. Peru ha hyan ta, hya xi cuinduva Cristu ne, cuma ngayaan sacuaha me vëhë ta, tsëhë xi hya ne, chan jain me hacutjin xi jyihi me. ³ Yëjë ni xuta xi tivetahacacun me Cristu ne, sahmi tyjahi suvá me xahasen rë me, sacuatjin tyjahi xahasen rë Cristu.

⁴ Peru yëjë ni xuta xi hinchajñi ngajñi rë cjuatsehen ne, hatuxa hndiin me tsëhë cjua xi cavitexa Nina. Ta xi hacuiin nuhyaan tsëhë cjua xi cavitexa Nina ne, vëhë xi hmí cjuatsehen. ⁵ Peru ha hyun ta Cristu ne, canduva me nguehe ngasunhndë, xi cjuahaxin me yëjë ni jyë naja. Hane me vëhë ne, hatuxa tsajin camahani jyë rë me. ⁶ Vëhë xi yëjë ni xuta xi cjuí nduju me cojo xi macjain rë me Jesucristu ne, ha quihndë tsajin hinchajñi me ngajñi rë cjuatsehen. Peru yëjë ni xuta xi hinchajñi cuaha me ngajñi rë cjuatsehen ne, me vëhë xi hatuxa cavijniircu me hacutjin cjuatacun rë Jesucristu, hacuaha hacuiin xuta rë Jesucristu me.

⁷ Ngayujun ni tsan ne, nechun cuidadu xi tsajin yo cuindacha nuju. Xuta xi hatuxa hinchajñi me ngajñi rë cjuandaja ne, me vëhë xi tyjahi xahasen rë me, sacuatjin tyjahi xahasen rë Cristu. ⁸ Peru xuta xi hatuxa hinchajñi me ngajñi rë cjuatsehen ne, tsëhë xitsehen matitjun me ta, tsëhë xi xitsehen matitjun jan ne,

hatuxa hisca ntsacu cavetsihin ne, sahmi cjuatsehen. Vêhê xi canduva Quihndi rê Nina ta, tsêhê xi meje tsicjêya me yêjê ni cjuatsehen xi sahmi xitsehen matitjun jan.

⁹Xuta xi camá me quihndi rê Nina ne, tsajin hinchajni me ngajni rê cjuatsehen ta, tsêhê xi yaha me cjuatacun rê Nina. Hatuxa cumaji xinchajni me ngajni rê cjuatsehen ta, tsêhê xi quihndi rê Nina me. ¹⁰Suvá tsejen yo xi quihndi rê Nina, hacuaha suvá tsejen yo xi quihndi rê xitsehen. Ta tu yo ni xi tsajin hinchajni ngajni rê cjuandaja, tu yo ni xi tsihmaaicacun xicjin ne, hacuiin quihndi rê Nina.

Nihmu tacun xinguen xingu xingu yaan

¹¹Cjua rê Nina xi canuhyun hisca ntsacu cavetsihin ne, cuitjin chja: meje rê xi nihmutacun xingueen. ¹²Mijí rê xi nihña sacuatjin casahmi cha Caín ta cha vêhê ne, quihndi rê xitsehen cha, hacuaha catsiquehen cha hntsê cha. Peru ¿há hyun mé ngatsê rê xi cuatjin catsiquehen cha hntsê cha ni? Catsiquehen cha hntsê cha ngatsê rê cjuaxin ta, tsêhê xi yêjê ni xi casahmi cha ne, hatuxa suvá cjuatsehen, hane xi casahmi hntsê cha ne, hatuxa suvá cjuandaja.

¹³Vêhê xi hacuiin cjuercun nuju tsan, hya xi choho scuêê nuju xuta tsehen. ¹⁴Ngayaan ne, nihmutacun xingueen. Hane cuatjin matsejen xi ha cavetjuxen tsêhê ngajni rê cjuatsehen, caviseen ndiya rê cjuandaja. Peru yo xi tsihmaaicacun xicjin ne, hinchu cuaha ngajni rê cjuatsehen. ¹⁵Yêjê ni xuta xi choho vêê xicjin ne, tangun me cojo xuta xi tsiquehen xicjin. Hane ha hyun ta, yêjê ni xuta xi tsiquehen xicjin ne, tsajin rê me cjuahnu xatsê. ¹⁶Cristu ne, ngatsê rê xi tsihmucacun naja me ne, johu ni rê me xi catsiquehen xuta me. Cuatjin camatsejen xi hmí cjuahmutacun. Hane hacuatjin ngayaan ne, meje rê xi ningate-

hen xi tsiquehen naja xuta, sa xi cuatjin mameje rê, ngatsê rê xi nihmutacun xingueen. ¹⁷Ngayaan xi tjin chinê tjin hyun ne, sa xi tsajin naja cjuayumatacun hya xi ma chaya naja xi tjin ngu xingueen xi tsajin mé sinê me tsajin mé cuihi me ne, cuatjin matsejen ta tsajin camahani cjuahmutacun rê Nina cahntsua xahasen naja. ¹⁸Mijí rê xi tu cuinújan ni xi nihmutacun xingueen tsan ta meje rê xi nihña cjuandaja, cojo sa xi cumatsejen xi tjin jain naja cjuahmutacun cojo xingueen.

¹⁹Sa xi cuatjin nihña ne, vêhê matsejen xi tsêhê Nina xi cjuaquixi jain ngayaan, hacuaha vêhê xi cumangutacun tu ya ni ni hya xi chjahyan rê me cjuandaja rê me. ²⁰Hane ha ndasa xahasen naja cuinchajyê naja xcun Nina xi choho nihña ne, peru mijí rê xi cumacjintacun ta, tsêhê xi Nina ne, hitsê sa jyê me cojo cjuatacun rê me xi cumá rê xahasen naja ta, tsêhê xi me vêhê ne, vêê me yêjê ni cjuatacun. ²¹Ngajan xi sa xi tsajin mé cuinchajyê naja xahasen naja ne, hacuiin cumacjintacun hya xi chjahyan rê me cjuandaja rê me. ²²Hane me vehe ne, sua naja me yêjê ni xi chjahyan rê me ta, tsêhê xi tinihña yêjê ni hacutjin xi cavitexa me, hacuaha tsêhê xi yêjê ni xi chuya rê me ne, cuatjin tinihña. ²³Cjua xi cavitexa naja Nina ne, cuitjin chja: meje rê me xi catamacjain naja Jesucristu, Quihndi rê me, hacuaha meje rê me xi nihmutacun xingueen. Cuatjin cavitexa me. ²⁴Hane yêjê ni xuta xi vihndê cjua xi cavitexa Nina ne, tjin tangun cjuatacun rê me cojo Nina, hacuaha Nina ne, jiya cahntsua xahasen rê me. Ngayaan ne, hyan xi jiya Nina cahntsua xahasen naja ta, tsêhê xi casua naja me Hasen rê me.

Chuva rê profeta ndacha

4 Ngayujun ni tsan ne, mijí rê xi ngutjen cumacjain nuju tsêhê yêjê ni

cjuatacun xi cuichja xuta cojo nuju ta titjun chjuhunchuvun cjuatacun jan, ¿há ma tangun cojo cjuatacun rë Nina? Cuatjin meje rë ta, tsëhë xi ngasunhndë ne, tjemu cjin xuta xi tivindacha me. Chja suvá me ta cjuatacun xi vicuya me ne, cjuatacun rë Nina, peru quixiin vë. ²Peru sa xi ngu xuta cuichja quixi me ta Jesucristu ne, camá me ngu xuta ngasunhndë vihi ne, cumangutacün ta, ngajan matsejen xi me vëhë ne, chja jain me cjuatacun rë Nina. ³Peru xuta xi hacuiin cuatjin chja quixi tsëhë Jesús ne, hatuxa tsajin camahani rë me cjuatacun rë Nina ta tjin rë me cjuatacun tsëhë xuta xi sahmi condra tsëhë Cristu. Ha canuhyun ta hatuxa cuechu nixtin xi cjuehe ngu cjuatacun xi sahmi condra tsëhë Cristu, peru cuichjá cojo nuju ta cjuatacun vëhë ne, ha hisca hinchajni ngajni naja nguehe ngasunhndë. ⁴Ngayujun ni tsan ne, tjin tangun cjuatacun nuju cojo Nina. Vëhë xi caca nuju xi camacjaain nuju tsëhë xuta ndacha xi cuacun jan. Camá caca nuju cuatjin ta, tsëhë xi Nina xi jiya xahasen nuju ne, hitsë sa jyë me xi cuma rë xitsehen matitjun xi jiya xahasen rë xuta xi macjaain rë Jesucristu. ⁵Xuta ndacha xi cuacun jan ne, hatuxa tjin rë me cjuatacun rë xuta xi macjaain rë Jesucristu. Vëhë xi cjuatacun xi vicuya me ne, cjuatacun rë xuta xi macjaain rë Jesucristu, hacuaha yëjë ni xuta xi macjaain rë Jesucristu ne, vetaharcu me cjua jan. ⁶Peru ngayaan ne, tjin tangun cjuatacun naja cojo Nina. Yëjë ni xuta xi hacuaha tjin tangun cjuatacun rë me cojo Nina ne, vetaharcu me cjua xi vicuyan. Peru yëjë ni xuta xi tsajin tjin tangun cjuatacun rë me cojo Nina ne, vetaharcuaain me cjua xi vicuyan. Cuatjin xi ma sacuse naja yo xi chja cjuaquixi ne, o yo xi vindacha.

**Xuta xi tsëhë Nina ne, hacuaha
tjin rë me cjuahmutacun
xi nduva tsëhë Nina**

⁷Meje rë xi nihmutacun xingueen tsan ta, yëjë ni cjuahmutacun ne, hatuxa nduva tsëhë Nina. Yëjë ni xuta xi tjin rë me cjuahmutacun ne, quihndi rë Nina me, hacuaha amigu rë Nina me. ⁸Peru me xi hacuiin tsihmucacun xiejn ne, hacuiin amigu rë Nina me ta, Nina ne, hatuxa tjin rë me cjuahmutacun. ⁹Nina ne, ngu tutu ni Quihndi xi tjin rë me. Hane ngayaan ne, hyan ta Nina ne, tjin rë me cjuahmutacun cojo naja, tsëhë xi catsingatju me Quihndi rë me nguehe ngasunhndë. Cuatjin catsingatju me Quihndi rë me, cojo sa xi sacú naja cjuahñu xatsë ngatsë rë Quihndi jan. ¹⁰Ngayaan ne, nihmutacun Nina. Peru Nina ne, hitsë sa tsihmucacun naja me. Vëhë xi hisca catsingatju me Quihndi rë me xi cuechjitje ngatsë rë yëjë ni jyë naja.

¹¹Hane tsëhë xi cuatjin catsihmucacun naja Nina tsan ne, vëhë xi hacuaha meje rë xi nihmutacun xingueen. ¹²Nina ne, hatuxa tsajin yo xi cavëë rë me. Peru sa xi nihmutacun xingueen ne, Nina ne, jiya me cahntsua xahasen naja, hane cuatjin matsejen xi tjin jain naja sacuaha cjuahmutacun xi tjin rë Nina.

¹³Ngayaan ne, hyan ta tjin tangun cjuatacun naja cojo Nina hacuaha hyan ta jiya me cahntsua xahasen naja, tsëhë xi casua naja me Hasen rë me. ¹⁴Hane ngayin ne, cahyin jain cojo tuxcuin Quihndi rë Nina. Vëhë xi tinújin cojo cjuaquixi ta Nina Nahmi naja ne, catsingatju me Quihndi rë me, xi cuaxëtje rë xuta ngasunhndë. ¹⁵Tu yo ni xi chja cjuaquixi xi Jesús ne, Quihndi rë Nina jain me ne, me vëhë ne, jiya Nina cahntsua xahasen rë, hacuaha tjin tangun cjuatacun rë cojo Nina. ¹⁶Ngayaan ne, macjain naja hacuaha ha hyan ta Nina ne, hmucacun jain me ngayaan. Nina ne,

hatuxa tjin rë me cjuahmutacun. Hane xuta xi tjin rë cjuahmutacun ne, tjin tan-gun cjuatacun rë me cojo Nina, hacuaha Nina ne, jiya cahntsua xahasen rë me. ¹⁷ Hane hya xi cumachihin cjuahmutacun xi tjin naja ne, ngajan xi hacuiin rcun cuma, hya xi cuechutaha nixtin xi tsichuva naja Nina. Cuatjin ta, tsëhë xi nguehe ngasunhndë ne, hacuaha quihndi rë Nina ngayaan sacuatjin rë Jesucristu, xi Quihndi rë Nina me. ¹⁸ Hiscan xi tjin cjuahmutacun ne, tsajin mé chir-cun hinchajni ta hya xi ha tjin chihin cjuahmutacun xi tjin naja ne, hisca hitsë ne, tsajin rcun cuma. Sa xi ningatahantacun xi Nina sahmi naja me castigu ne, vëhë xi rcun cuma. Peru sa xi cuatjin rcun cuma ne, ngajan matsejen xi tsajin tjin chihin cjuahmutacun xi tjin naja.

¹⁹ Ngayaan ne, tjin naja cjuahmutacun ta, tsëhë xi Nina ne, tjun me catsihmucacun naja me. ²⁰ Peru sa xi nújan xi nihmutacun Nina, hane choho hyan xingueen ne, tu vindachan ni xi nújan. Cuatjin ta, tsëhë xi sa xi hacuiin nihmutacun xingueen xi tsejen naja cojo tuxcun ne, hacuaha cumaji nihmutacun Nina xi cjëë camahani chaan me. ²¹ Nina ne, cavitexa naja me cjua vihi: yo xi tjin rë cjuahmutacun cojo Nina ne, hacuaha meje rë xi tjin rë cjuahmutacun cojo xicjin.

Me xi má hya xi macjain naja Jesucristu

5 Jesús ne, hacui me xi Cristu, me xi cavaxijin Nina xi cuaxëtje naja. Hane ngayejen ni xi cuatjin macjain naja tsëhë cjua vëhë ne, quihndi rë Nina ngayaan. Yëjë ni xuta xi tsihmucacun me xi má xutacha rë ngu quihndi ne, hacuaha cojo quihndi jan tsihmucacun me. ² Sa xi nihmutacun jain Nina hacuaha nihña sacuatjin xi cavitexa me ne, ngajan matsejen xi tjin naja cjuahmutacun cojo yëjë ni xuta xi quihndi rë Nina me. ³ Hacuaha sa

xi chjahanrcun jain yëjë ni cjua xi cavitexa Nina ne, ngajan matsejen xi nihmutacun jain me. Hane yëjë ni cjua xi cavitexa me ne, hacuiin jercu chja xi nihña ta, ⁴ tsëhë xi yëjë ni xuta xi quihndi rë Nina ne, scaa rë me cojo yëjë ni cjuatsehen xi tjin nguehe ngasunhndë. Cuatjin caa naja cojo cjuatsehen jan ta, tsëhë xi macjain naja Jesucristu. ⁵ Hane suvá ni xuta xi macjain rë tsëhë Jesús xi Quihndi rë Nina jain me ne, me vëhë xi caa rë me cojo yëjë ni cjuatsehen xi tjin ngasunhndë.

Hasen rë Nina ne, tsinguixi xi Jesús ne, hacui Quihndi rë Nina me

⁶ Hyä xi canduva Jesucristu ne, camatsejen xi Quihndi rë Nina me nixtin xi cojo nandá caxtenda me cojo nixtin xi cavixu jni rë me hya xi cahme me. Peru hacuiin suvá ni nixtin xi caxtenda ni me ta cojo nixtin xi cahme me ne, hya camatsejen xi Quihndi rë Nina me. Hasen xi tsëhë Nina ne, cuatjin tisua naja cjuaquixi ta, tsëhë xi Hasen jan ne, hatuxa cjuaquixi xi chja. ⁷ Siu jyan xcusun xi tisua machaya naja ta Jesús ne, Quihndi rë Nina jain me. ⁸ Ngu ne, cuatjin chja quixi Hasen xi tsëhë Nina. Ma jo ne, cuatjin camatsejen hya xi caxtenda Jesús. Ma jyan ne, hacuaha cuatjin cama tsejen hya xi cahme me. Hane catsijyan xcusun xi cuacun jan ne, tjin rë ngu ni cjuatacun. ⁹ Ngayaan ne, macjain naja tsëhë cjua xi chja xuta cojo naja. Peru hitsë sa vengui chji rë cjua xi chja Nina. Hane Nina ne, casua me camachaya naja yo xi Quihndi rë me. ¹⁰ Xuta xi macjain rë me tsëhë Quihndi rë Nina ne, hatuxa vëë me cojo cjuatacun rë me ta quixi jain cjua xi cachja Nina. Xuta xi macjaain rë me tsëhë cjua xi cachja Nina ne, sacuaha xi cuichja me xi Nina ne, jemu ndacha me. Cuatjin chja me tsëhë Nina ta, tsëhë xi macjaain rë me tsëhë cjua xi cachja quixi Nina,

yo xi Quihndi rë me. ¹¹Hane Nina ne, cachja cjuahñu xatsë jan ngatsë rë Quihndi rë me. ¹²Xuta xi tjin tangun cjuatacun rë me cojo Quihndi jan ne, tjin rë me cjuahñu xatsë vëhë. Peru xuta xi tsajin tjin tangun cjuatacun rë me cojo Quihndi rë Nina jan ne, hacuaha tsajin rë me cjuahñu xatsë jan.

Conseju xi sua Juan xi cajnetaha

¹³Vëhë xi cuitjin titsihindu nuju ngayujun ni xi macjain nuju tsëhë Quihndi rë Nina. Titsihindu nuju yëjë ni cjua vihi, cojo sa xi cumangutacun ta quixi xi tjin jain nuju ngu cjuahñu xatsë xi tsajin nu tsajin nixtin xi cjuë. ¹⁴Ngayaan ne, mangutacun jain cojo Nina ta, tsëhë xi ha hyan ta sa xi tjin tangun cjuatacun naja cojo rë me hora xi tichjahyan rë me ne, cuihndë me xi cuinújan. ¹⁵Hane tsëhë xi hyan ta vihndë me yëjë ni cjua xi nújan cojo rë me ne, vëhë xi hacuaha hyan ta sacú naja xi cachjahyan rë me.

¹⁶Yo ngayaan xi chutsejen xi tivixuya ngu xingueen ngajñi rë ngu cjuatsehen xi cuma cumanchataha ne, meje rë xi cuinújanyumatahan tsëhë me, hane cuatjin sacú rë me cjuahñu xatsë. Peru tjin cjuatsehen xi cumaji cumanchataha. Hane hacuiin tichjá cojo nuju

xi cuinújunyumuntuhun tsëhë xuta xi tjin rë me jyë vëhë. ¹⁷Yëjë ni cjuatsehen ne, Nina ne, chja me ta hatuxa jyë hmí rë. Peru tjin cjuatsehen xi cuma cumanchataha.

¹⁸Ngayaan ne, hyan ta yëjë ni xuta xi cjuaquixi xi quihndi rë Nina me ne, hatuxa tsajin hinchajñi me ngajñi rë cjuatsehen. Cuatjin ta, tsëhë xi Quihndi rë Nina ne, sahmi rë me cuidadu, hane xitsehen matitjun ne, cumaji mé sahmi cojo rë me.

¹⁹Ngayaan ne, ha hyan ta tsëhë Nina ngayaan. Hane yëjë sa xuta xi yahnga ne, tsëhë xitsehen má titjun me.

²⁰Ngayaan ne, hacuaha hyan ta ha canduva Quihndi rë Nina. Hacuaha casua naja me cjuatacun, cojo sa xi cuinjercun yo xi Nina xi hatuxa cjuaquixi. Tjin tangun cjuatacun naja cojo me xi hatuxa cjuaquixi ta, tsëhë xi tjin tangun cjuatacun naja cojo Jesucristu, Quihndi rë me. Me vëhë xi Nina xi hatuxa cjuaquixi, hacuaha me vëhë xi sua naja cjuahñu xatsë xi tsajin nu tsajin nixtin xi cjuë.

²¹Ngayujun ni tsan ne, mijí camahani rë xi chjuhuncun nina xi hacuiin cjuaquixi.

Xujun má jo, xi catsihindu San Juan

Cjuaquixi cojo cjuahmutacun

1 Ngahan, ngu xuta changá matitjun tséhë yungun ne, tsihindu nuju ngayun, ngu chjuun xi cavaxijin Nina. Hacuaha cojo yējë ni quihndi nuju ne, tsingátju nuju ngayujun ni ngu nina naha ta, tséhë xi tjemu hmú cáacun nuju cojo nguñaja cjuaquixi. Peru hacuiin tu suva ni ngahan ta yējë ni me xi vëë jain me cjua xi hatuxa cjuaquixi ne, hacuaha tsihmutacun nuju me. ²Cuatjin nihmitacu in nuju, ngatsë rë cjuaquixi xi ha siu cahndé ngajñi rë cjuatacun naja. Hane cjuaquixi xi cuacun jan ne, tsajin nu tsajin nixtin xi cuetjuxin tsajan. ³Nina nahmi naja cojo Jesucristu Quihndi rë me ne, hatuxa sua naja me cjuandaja cjuajeya cojo cjuayumatacun, cuatjin xi ma vanguen tjenguen cjua xi cjuaquixi, hacuaha ma nihmutacun jain xingueen.

Cuanguennduju cojo cjuachacun rë Cristu

⁴Tjemu ndaja camá rë xahasen naha ta, tséhë xi cavécutaha ngu jo quihndi nuju xi hatuxa hinchajñi me ngajñi rë cjuaquixi, sacuahatjin Nina Nahmi naja cavitexa naja me. ⁵Quihndë ne, nguehe cuichjá cojo nuju tsan ta meje rë xi ngayejen ni ne, nihmutacun xingueen. Hane cjua vihi xi tichjá cojo nuju ne, hacuiin ngu cjua xatsë xi sehe cavitexa naja Nina ta cjua vihi ne, hacui xi tacun hisca hya xi sehe cavetseen camacjain naja cjua rë Nina. ⁶Hane sa xi nihña jain yējë ni cjua xi cavitexa naja Nina ne, ngajan matsejen xi tjin jain naja cjuahmutacun. Hane cjua xi cavitexa Nina ne, hacui vihi: meje rë xi nihmutacun

xingueen. Hacuaha hacui cjua vëhë xi camachaya nuju hisca hya xi sehe cavet-suhun camacjain nuju cjua rë Nina.

Cjua xi tanguiin cojo cjua rë Nina ne, má cjua ndacha

⁷Cuatjin chjá cojo nuju ta, tséhë xi ngasunhndë vihi ne, tjemu tjin xuta ndacha xi macjaain rë me xi Jesucristu ne, camá jain me ngu xuta ngasunhndë vihi. Xuta ndacha jan ne, hacui me xi vindacha, hacuaha hacui me xi má condra rë Cristu. ⁸Tjin nuju cuidadu, sehe ngajan xi hacuiin nichayun cjuandaja xi canihñi ngajñi nuju. Cahndé rë vëhë ne, sacú nuju yējë ni cjuatjo xi sua nuju Nina.

⁹Yējë ni xuta xi vatjutaha me tséhë cjua xi cavicuya Cristu ne, tsajin tjin tangun cjuatacun rë me cojo Nina. Peru yējë ni xuta xi vetaharcu me suvá ni cjua xi cavicuya Cristu jan ne, me vëhë ne, tjin tangun cjuatacun rë me cojo Nina Nahmi naja cojo Quihndi rë me. ¹⁰Hya xi cjehe ngu me xi cuichja xi vicuya me cjua rë Nina, peru sa xi cuicuyaain me cjua xi cavicuya Cristu ne, xi catuun cahndé cuisehen me cuejña me ndya nuju. Hisca ngu nina cachjayunnguun tséhë me ta, ¹¹sa xi cuatjin tuhun rë me nina ne, sacuah xi ma tangun yun cojo cjuatsehen xi sahmi me.

Cjua xi vijnetaha

¹²Tjemu cjín sa cjuavisiajmi xi meje cuichjá cojo nuju ngayujun ni. Peru tsihinduun sa nuju sacuahatjin xcun ngu xujun vihi ta, tséhë xi hatuxa vejñá xi cjuë tjëngë nuju, sehe cuinújan xcun cojo xcun, sehe ngajan xi tjemu ndaja cuma rë xahasen naja.

¹³Na tichjun, xi hacuaha cavaxijin Nina na ne, tsingatju quihndi rë na ngu nina tsujun.

Xujun ma jyan, xi catsihindu San Juan

Juan sua suva me nina rë me

1 Ngahan, ngu xuta changá matitjun tsëhë yungun ne, tsihindu ri ngaye Gayo, ta ngaye ne, tjemu vinga ná ngaye, tjemu hmú cákun ri cojo nguñaja cjuaquixi.

² Catisecoo ri Nina, tsan, xi cuma cuihin xcun cojo yëjë ni cjuandaja, hacuaha xi ndajyihi cjuahñu riji, sacuahatjin xi ha ndajyihi xahasen riji. ³ Tjemu ndaja camá rë xahasen naha ta, tsëhë xi jima ngu ndiya xi cafehe ngu ngu xingueen ne, tjemu ndaja cachja me tsiji. Ha tuxa chja me ta ngaye ne, nguñajatacuin hmi tjengui ndiya rë cjuaquixi. ⁴ Tjemu ndaja má camahani rë xahasen naha, hya xi machaya ná xi yëjë ni xingueen xi sacuaha quihndi naha ne, cjuí tjengui me ndiya rë cjuaquixi.

Conseju xi cuma rë xinguen xi chja me cjuar rë Nina

⁵ Tjemu ndaja tinihñi, tsan, xi cuatjin tiviseue rë jingu sa xingueen, hisca cojo sa xingueen xi hyiin yo jan ta, tsëhë xi cjin nandya nduva me. ⁶ Hane ngujo me xi cuacun vëhë ne, sehe cavuya cafehe nga me nguehe. Hane hya xi cama tangun ngayin yungun ne, cachja me cojo niji ngayijin ni xi tjemu tjin ri cjuahmutacun. Quihndë ne, tu jani hya ni xi cuatju nga me nandya riji ne, tjemu ndatjin xi cuiseue rë me, cojo sa xi tsajin mé xi sahmi chaja rë me xi cuetju me cjue me ndiya ta, tsëhë xi cuatjin chuya rë Nina xi nihña. ⁷ Cuatjin meje rë xi nihña ta, tsëhë xi xuta xi cuacun jan ne, cavetju quiji me ngu nangui xi cuichja me cjuar rë Jesucristu. Hane hisca ngu hñú ngu tē ne, faain me tsëhë xuta xi macjaain rë Nina. ⁸ Vëhë xi ngayaan ne, meje rë xi

cuatjin cuisecoon rë me xi cuacun jan ta, tsëhë xi cuatjin ne, hacuaha cuisecoon rë cjuar xi cjuaquixi.

Diótrefes ne, choho chja cha tsëhë Juan

⁹ Ha catsihindu ngu xujun xi tsingátju rë xuta xi ma tangun ngajan yungun. Peru cha Diótrefes, xi tjemu meje sahmi tjin cha ngajñi rë me ne, handasa hacuaha xingueen cha, peru faharcuaain cha cjuar xi nújin. ¹⁰ Vëhë xi hya xi cjuëhë ndyá ne, cuichjáyyë cojo nuju ngayujun ni yëjë ni xcusun xi sahmi cha jan. Cuichjá quixë hacutjin choho chja cha tsijin. Hane manguaaincacun cha cojo xi choho chja ni cha ta hacuaha tsitjungui cha ngu ngu xingueen xi nduva jingu sa nandya. Hane hya xi yahnga me xi meje sahmi me cjuandaja cojo xingueen xi cuacun nduva jan ne, mijí sua cha cahndé, hacuaha hisca mijí rë cha xi cuisehen nga me yungun.

¹¹ Xi canihñi cjuatsehen xi tisahmi yahnga xuta, tsan, ta tu tjin tisahmi xuta xi tisahmi cjuandaja ne, cuatjin meje rë xi nihñi. Xuta xi sahmi cjuandaja ne, tsëhë Nina me. Peru xuta xi sahmi cjuatsehen ne, hacuiin amigu rë Nina me.

¹² Yëjë ni xuta ne, ndaja chja me tsëhë cha Demetrio. Hacuaha suvá tsejen xi sahmi jain cha sacuaha tjin vitexa Nina. Hisca ngayin ne, ndaja nújin tsëhë cha. Hane ngaye ne, ha hye ta xi nújin ne, ha tuxa cjuaquixi.

Cjuar xi vijnetaha

¹³ Tjemu tjin vasen sa xi meje cuichjá cojo ri, peru mijí cuichjá cojo ri sacuaha tjin xcun ngu xujun vihi. ¹⁴ Cahndé rë vëhë ne, tu tjenhñu ni ne, vejñá xi cjuë tjëngë ri, sehe cuisiajme xcun cojo xcun.

¹⁵ Quihndë ne, tsingátju ngu nina tsiji, hacuaha yëjë ni amigu riji ne, tsingatju me ngu nina tsiji. Nihñi favor ne, yëjë ni

amigu niji xi siutaha ndyá ne, tehe rě me
ngu nina niji jima ngu jima ngu me.

Carta tsëhë San Judas

Judas ne, tichja me nina cojo yëjë ni xuta xi cavaxijin Nina

1 Ngahan Judas, xi mosu hndixahan rë Jesucristu, hacuaha xi hntsë cha Jacobo ne, tsihindu xujun vihi xi chutayun ngayujun ni xi cavaxijin nuju Nina Nahmi naja, tsëhë xi tjercu hmucacun me ngayun. Hane ngayujun ni xi camacjain nuju Jesucristu ne, Nina tisahmi cuidadu nuju me. ²Yëjë ni cjuandaja cojo cjuajeya cojo cjuahmutacun tsëhë Nina ne, catamacjín sa ngajñi nuju.

Xuta xi vicuya cjuandacha

³Ngayujun ni tsan ne, casahme xati cacun xi tsihindu nuju tsëhë cjuandaja rë Nina xi cuaxëtje naja. Peru quihndë ne, hacuaha sahmi ngujyë xi tsihindu nuju, cojo sa xi cuichjá cojo nuju xi cuinújuntjun ngatsë rë cjuachacun xi ha casua Nina ngayaan xi macjain naja me. ⁴Tsëhë xi tjin xuta xi cavindacha xi caxinchajñi me ngajñi nuju. Peru hatsëë nixtin ne, camahindu xcun xujun rë Nina tsëhë castigu xi cuatju me cuma. Hatuxa xuta tsehen me, xi handasa tsejen sacuaha xi tjin rë me cjuandaja rë Nina naja ne, peru vatjutaha me yëjë ni cjuatsehen xi sahmi me, hacuaha tsitjungi me ngu ni Nai naja Jesucristu.

⁵Quihndë ne, handasa ha hyun cjua vihi ne, cúya cuichjá cojo nuju hacutjin casahmi Nai naja. Ngu ne, xuta nangui Israel ne, handasa cavaxëtje Nai naja me tsëhë nangui Egipto ne, peru cama ngascan ne, ngajñi rë xuta nangui Israel jan ne, hacuaha casahmi me castigu xuta xi camacjaain rë tsëhë me. ⁶Ma jo ne, ángel xi caviyijin hiscan xi cachja Nai naja xi cuiyuju ta tu cavetjuxin tsëhë cahndé rë ne, cavinchahñu me hiscan jñu, hisca xi cuechutaha nixtin xi cuichja Nai

naja mé castigu cuatju ángel jan cuma nu cjui nu nduva. ⁷Hane xi ma jyan ne, xuta nandya xi hmí rë Sodoma cojo xuta nandya Gomorra cojo sa xuta xi siu tahndee rë jan ne, hacuanitjin ni cahndiin me tsëhë Nina. Tjercu casahmi me cjuatsehen xi tjin chjuunnahñu rë me. Hisca cavatjutaha sa me cjuatsehen ta ngajñi xihin ni me ne, casahmi me cjuatsehen sacuaha xi chjuunnahñu rë me xicjin me. Vëhë xi suvá sa cahndé rë nandya xi cuacun vëhë ne, siu cuaha xi ninguitsjen tsëhë castigu xi cavatju camá, xi cafë catí cojo ndihi rë Nina.

⁸Hacuanitjin ni tisahmi xuta tsehen xi hinchajñi ngajñi nuju jan ta, ngajñi rë cjuatacun rë me ne, tichja cojo rë me xi catisahmi me cjuatsehen jan, xi sahmi me cjua xi vitexa Nai naja, hacuaha xi choho catichja me tsëhë ángel xi siu cojo Nina. ⁹Peru suvá ángel matitjun xi hmí Miguel ne, hya xi ticjanya cojo xitsehen matitjun yojo rë Moisés ne, cavetjiincacun xi choho cuichja cojo xitsehen jan ta tu cuinitjin cachja: “Nina catichjataha me ngaye.” ¹⁰Peru xuta tsehen xi cuacun vë ne, choho chja me tsëhë yëjë ni xcusun xi vijniircu me. Hane hitsë sa chu me xi cuma rë chu ta, handasa vëë me xi hmí rë cjuatsehen ne, hatuxa sahmi me. Hane cjuatsehen xi sahmi me jan ne, vëhë xi tsinguetsun rë cjuatacun rë me.

¹¹Jemu choho cuatju me cuma, tsëhë xi fi me ndiya tsehen sacuatjin quiji xutachanga naja Caín, sahmi me cjuatsehen ngatsë rë tujún xi jercu meje rë me sacuatjin casahmi cha Balaam, hacuaha cueya me sacuatjin cahme cha Coré, ngatsë rë xi meje cjuahaxin cha xutaxa rë. ¹²Xuta tsehen xi cuacun jan ne, ngu cjuasava me hora xi tichinutangun tsëhë cjuahmutacun xi tjin nuju cojo xingun ta, tsëhë xi hisca jinë hisca hvi me cojo nguñaja ni cjuasua, peru fahacuendaain me yo xi cajinë yo xi cajinii ta tu tsëhë suvá ni me fahacuenda me. Sacuaha yuffi

xi cavaain ta cavatjucjin xi cavaha rë tjo quiji ne, hacuaha cuatjin machjiriin me. Sacuaha ya xi machjiriin xi vaquuin tú rë nixtin rë ne, tjune ni rë hisca tyjama rë sehe xi ne, hacuaha cuatjin machjiriin me. ¹³ Machjiriin me sacuaha tsindyu rë ndachacun xi hisca xu jima xcun xi cjan rë ne, hacuaha cuanitjin ni hisca xu jima cjuasava ngajni rë me. Machjiriin me sacuaha machjiriin niñú xi siutaha ngahnga xi vejñaai cahndé rë ne, hacuaha cuatjin machjiriin me. Hane castigu xi cuatju me cumá ne, xi tsajin nu tsajin nixtin xi cuma ndaya me tséhë hiscan xi tjercu tu jñu camahani.

¹⁴ Hane ngu xutachanga niji xi hmí rë Enoc, xi quihndindaicjin rë Adán ne, hya xi cachja me ngu cjuaxi caveya Nina cjuatacun rë me xi cuma ne, hacuaha cachja me tséhë xuta tsehen xi cuacun vë, cuitjin cachja me: “Cahvë Nai naja xi nduva me ngajni rë ángel rë me xi tjercu tu cjin camahani. ¹⁵ Nduva me xi cjuahachuva me ngayejen ni, sehe cuichja me mé castigu xi cuatju yëjë ni xuta tsehen tséhë yëjë ni cjuatsehen xi casahmi me, hacuaha tséhë yëjë ni cjuaxi choho cachja xuta tsehen xi cuacun jan tséhë Nina.” ¹⁶ Xuta tsehen jan ne, hatuxa choho chja me tséhë yëjë ni, hacuaha sahmi me tu cutjin xi macacun me. Sahmi yehe suvá me yojo rë me, hacuaha chja me cjuahaxi cojo xuta, tséhë xi meje rë me xi sahmi yehe xuta me.

Conseju xi sua Judas xuta xi macjain rë Nina

¹⁷ Peru ngayujun ni tsan ne, ninguit-sjun cjuaxi ha cachja apóstol tséhë Nai naja Jesucristu, ¹⁸ xi cachja me cuitjin: “Hya xi ha jima tiña cuya Nai naja ne,

hya tjin xuta xi cuejnucëë me tséhë yëjë ni cjuandaja rë Nina, hacuaha sahmi me yëjë ni cjuatsehen xi cuetju tséhë xahasen rë me.” ¹⁹ Xuta tsehen xi hinchajni ngajni nuju jan ne, vatëcja me ngajni rë yëjë ni ngu cjuandaja xi cuma. Tsingatahacacun ni me xi siné xi cuihi me, hane Hasen rë Nina ne, tsajin camahani rë me.

²⁰ Peru ngayujun ni tsan ne, sacuaha cjuaxi rë Nina xi ha camacjain nuju ne, nihñu ngujoyë xi catamacjain sa nuju. Tinújunyumu ha tu cutjin xi visecoo nuju Hasen rë Nina. ²¹ Nihñu cuidadu xi hacuiin nichayun cjuahmutacun rë Nina. Hacuaha tinechunyun rë nixtin xi Nai naja Jesucristu ne, cojo cjuandaja rë me ne, sua naja me cjuahñu naja xi tsajin nu tsajin nixtin xi cueyan.

²² Xuta xi jo má cacun me tséhë cjuandaja rë Nina ne, nújun cojo rë me ne, cojo sa xi hacuiin jo cuma cacun me. ²³ Naxuntjun me sacuaha ngu xuta xi naxentjen me xi ha ndiya cueti me. Hane yahnga me ne, tjin nuju cjuayumatacun cojo rë me, peru cojo cuidadu, xi satiin nuju jyé rë me.

Tsinguijnetaha Judas cjuaxi

²⁴⁻²⁵ Ngu ni Nina xi vaxëtje naja ngatsë rë Nai naja Jesucristu ne, me vëhë xi cuma sahmi cuidadu me ngayun xi tsajin xtundiya yun ngajni rë cjuatsehen, hacuaha cuiyuju me ngayun xcun me xi cun tyjahi tyjahi xahasen nuju ne, cojo yëjë ni cjuasua. Me vëhë xi tjin rë me yëjë ni ngu cjuandaja, hacuaha jyë me, hacuaha ma vitexa me, hacuaha ma sahmi me, hisca xi chaja sa xi cumandaja ngasunhndë, hisca quihndë, hacuaha hisca xi cuatju xi cjuë ngasunhndë. Cuatjin jain.

Apocalipsis, cjuua xi sua cumachaya naja

Cjuua tsëhë Jesucristu xi cafehecani chini rë Juan

1 Cjuua vihi ne, cjuua tsëhë Jesucristu xi casua Nina cojo sa xi tsingacun Jesucristu xuta ladu rë me xcusun xi hatuxa sahmi nguyjë xi cuatjü. Cjuua jan ne, ngu ángel cafehecani ná, ngahan xi hmí ná Juan, ngu mosu hndixahan rë me. ²Hane ngahan ne, tsingúxë ta cjuaquixi yëjë xcusun xi cahvë hya, xcusun tsëhë cjuua rë Nina cojo tsëhë cjuaquixi xi chja Jesucristu. ³Jemu ndaja tsëhë me xi cuichjasun me cjuua rë xujun vihi, hacuaha jemu ndaja tsëhë me xi cuihndë me cuincha me xahasen rë me cjuua xi camahindu xcun xujun vihi, tsëhë xi ha camá tiña nixtin xi cuma chihin cjuua rë.

Cjuua xi catsihindu Juan xi cafahatsja yatu yungun xi tjin ngajan Asia

⁴Ngahan Juan ne, tsihindú cjuua vihi xi cjuahatsja yatu yungun xi tjin ngajan nangui Asia. Chjuhunnunsun cjuandaja cjuajeya tsëhë Nina, me xi hacui, hacui ni me xi cavejña me hatsëë, hacuaha hacui ni me xi cuejña cuaha, hane cojo tsëhë Hasen rë me xi siu xcun me xi hacui sacuaha yatu hasen. ⁵Hacuaha cojo tsëhë Jesucristu, me xi má tistigu cjuaquixi, me xi tjun tjun cavuya cjuahñu tsëhë ngajñi rë nima, me xi hacuaha matitjun tsëhë yëjë ni xuta xi matitjun tsëhë ngasunhndë, hane me xi hmucacun naja hacuaha cavaxëtje naja tsëhë jyë naja hya xi cavanga jni rë me xi cahme me. ⁶Hacuaha Jesucristu ne, casahmi me xi ngayaan ne, satë naja xi cuitexan ne, hacuaha cuma yaan sacuaha nahmi xi chjahancuendan Nina, Nina xi hacuaha má me nahmi rë me. Me vëhë ne, catimá jyë hnga me hacuaha

catimá titjun me yëjë ni nu, yëjë ni nixtin. Cuatjin jain.

⁷¡Nutsujun, ta cuinduva me cojo yuff! Hacuaha yëjë ni tuxcun ne, scuëë rë me. Hisca cojo me xi cahndiin tsëhë me ne, scuëë rë me. Hane yëjë xuta tsëhë jimangu tjë rë xuta ngasunhndë ne, cuatju me cjuandusin ngatsë rë me. ¡Cuatjin cumá! ¡Cuatjin jain!

⁸Cuitjin chja Nina: “Ngahan sacuaha letra xi vetsihin cojo A ne, vijnetaha cojo zeta. Hacui ni ngahan xi ntsacu vetsihin. Ngahan xi tejña, hane ngahan xi vijnetaha. Cavëjña hatsëë, hacuaha cuëjña cuaha. Yëjë ni má sahme.”

Juan ne, cavutsejen me xi jyë hnga Jesucristu

⁹Ngahan Juan ne, xingun má ngahan, tangun satë naja cjuañihi, tangun nechan ngahma gobiernu hacuaha tangun caa naja ngatsë rë xi mangutacun cojo Jesús. Ngahan cavitejñataha ngu nandya xi hmí rë Patmos xi vetjucaa tsëhë ndachacun. Ngajan tejñataha ngatsë rë xi cachjá cjuua rë Nina cojo tsëhë cjuaquixi xi chja Jesús. ¹⁰Hya xi camá ne, nixtin xi chjaharcun Nina ne, Hasen rë Nina ne, cavisehentë cjuatacun naha. Hora vëhë ni ne, tsëhë taha ngaxtun ne, cahndë ngu xta xi jemu hñu camahani nuhya rë, nuhya rë sacuaha xta rë tyjo ¹¹hane cuitjin cachja:

—Ngahan sacuaha letra xi vetsihin cojo A ne, vijnetaha cojo zeta. Hacui ni ngahan xi ntsacu vetsihin ne, hacui ni ngahan xi vijnetaha. Chjehe ngu xtë xujun ne, nihndi xcusun xi tichutsijin hane sehe ningatjin catahatsja xuta yungun xi siu yatu nandya Asia xi cuicun vi: Efeso, cojo Esmirna, cojo Pérgamo, cojo Tiatira, cojo Sardis, cojo Filadelfia cojo Laodicea. —Cuitjin cachja xta jan.

¹²Hya xi camá ne, cavuya xi scutséjen yo xi tichja cojo ná, peru xi tu cavuya ne, xi cahvë ni ne, yatu candeleru xi

camá tsêhê oro. ¹³ Hane vasencja rê candeleru jan ne, jiyajni ngu xihin xi tsejen sacuaha Quihndi rê Xuta Jain. Yaja me ngu tsjian tjin tē ni xi vechu hisca ntsacu me, hane tjiñucja hiscan ndanisin rê me cojo ngu pañu nduju camá cojo nachjun tsêhê oro. ¹⁴ Hane rcu cojo tsjarcu me ne, tyava tsejen sacuaha tsejen tyava tsja rê chu tsánga o sacuaha tsejen hnchan xi vixu. Hane tuxcun me ne, tsejen sacuaha ndihi xi ña vitjen. ¹⁵ Ntsacu me ne, seti sacuaha quicha sine xi caticjê ndihi xutsê rê; hane xta rê ne, nuhya rê sacuaha xta rê nandan xi tjemu hñu vanga. ¹⁶ Tsja xi ladu quixi ne, vahangui me yatu niñú. Hane tsêhê hntsua me ne, vetju ngu espada yuju xi vatê taha xcun cojo taha ngaxtun. Hane xcun ne, tsejen sacuaha tsuhi hya xi sua hasen cojo yêjê ni ngahñu rê.

¹⁷ Ngajan xi ngahan ne, xi cahvê xcusun rê me ne, catícja taha ntsacu me sacuaha xi cahme ngahan. Ngajan xi cavisane me tsja me ladu quixi xcun yojo naha, sehe cachja me cojo ná cuitjin:

—Xi carcuin. Ngahan xi ntsacu vet-sihin ne, hacui ni ngahan xi vijnetaha. ¹⁸ Ngahan, quicun ngahan. Cavéya, peru quihndê tacunntsa llavi tsêhê cjuaveya cojo tsêhê Hades, cahndê hiscan siu nima. ¹⁹ Hindê ngaye ne, nihindi xcusun xi cahye vi cojo xcusun xi tijima quihndê cojo xcusun xi sehe cumá. ²⁰ Sacuaha yatu niñú xi cahye hntsa ladu quixi naha cojo yatu candeleru xi camá tsêhê oro jan ne, cuitjin vijne cjuatacun hma jan: yatu niñú jan ne, hacui ángel xi sua cumachaya rê xuta rê yatu yungun jan cjuarê Nina, hane yatu candeleru jan ne, hacui yatu yungun jan.

Cjua xi cjuahatsja yungun ngajan nandya Efeso

2 ¹ Hindê nihindi cjuarê vi xi cjuahatsja ángel rê yungun ngajan nandya Efeso. Cuitjin nihindi: “Cjuarê vihi ne, cjuarê

chá xi vahangui yatu niñú jan tsja ladu quixi chá hacuaha tsujyihya chá vasencja rê yatu candeleru jan xi camá tsêhê oro: ² Ha ndaja hvê tsêhê xa nuju sacuaha cjuandaja xi nihñu, jemu chja tivatjun peru ticaa nuju titsangun nduju cojo. Hvê xi tuun rê xuta tsehen cahndê ta, nichuvun cjuatacun rê xuta xi vindacha me sacuaha xi má me apóstol. Hane camachaya nuju xi tu vindacha ni me. ³ Hacuaha titsangun nduju hacuaha ticaa nuju cojo cjuacjintacun xi tivatjun ngatsê rê xi veyunnangun ñihi naha, hacuaha machuvaain cjuatacun nuju ngajni rê cjuacjintacun jan. ⁴ Peru cojo yêjê sa ne, tjin ná vihi condra nuju ta, hacuiin jemu nihmutacún ná sacuaha xi canihmutacún ná hya xi titjun camangutacún cojo ná. ⁵ Vêhê xi ninguitsjun hacutjin cavatjun hya xi tjin nuju cjuahmutacun vêhê, hane nindeyun cjuatacun nuju ne, cuyun nihñu nga xcusun sacuaha xi canihñu titjun. Cuatjin nihñu ta, sa tsajin ne, cuinduvá tjêngê nuju ne, cuaxêxen candeleru xi satê nuju tsêhê cahndê rê. ⁶ Peru hacuaha tjin sa nuju ngu xcusun xi ndaja tsujun ta, ndaja tsujun tsêhê xi choho hyun xcusun xi sahmi xuta xi tjengui me cjuachacun tsêhê Nicolás, ta cjuachacun jan ne, hacuaha cojo ngahan ne, choho hvê. ⁷ Yo ngayun xi tjin nuju cjuasua xi cuinuhyun cjuarê chja Hasen rê Nina cojo yungun jan ne, ndaja tetuhuncun. Cuitjin chja: Yo xi scaa rê cjue xcun tsêhê cjuatsehen ne, suá rê cahndê xi sinê tuhaxi xi sua cjuahñu xi vaquí rê ya xi secun cahndê ndajyihí xi tsêhê Nina.”

Cjua xi cjuahatsja yungun ngajan nandya Esmirna

⁸ Hindê nihindi cjuarê vi xi cjuahatsja ángel rê yungun ngajan nandya Esmirna. Cuitjin nihindi: “Cjuarê vihi ne, cjuarê chá xi matitjun hacuaha matjengui. Cjuarê chá xi cahme jan hane hacuaha cavuya

nga cjuahñu. Hacuï cjuã vihi: ⁹Ha hvë cjuacjintacun xi tivatjun cojo cjuayuma nuju. Peru ngajñi rë vëhë ne, ñchina ngayun! Hacuaha hvë cjuã chjataha rë xuta vë xi chja me xi xuta tjë rë Israel, o sa xuta rë Nina, má me, peru quixiin ta, xuta ladu rë Satanás má me. ¹⁰Xi carcuun tsëhë xcusun xi cúatjun cuatjin. Naain ne, tsitsehen cha xuta cojo sa xi scandiya me yahnga ngayun ndavaya sehe chjahachuva nuju. Hacuaha tsujihi-hya tjengui nuju xuta jan cojo cjuañihi xcun të nixtin ni. Peru tangunnduju cojo cjuatacun nuju handasa xi cueyun, hane ngahan ne, suá nuju corona rë cjuahñu. ¹¹Yo ngayun xi tjin nuju cjuasua xi cuinuhyun cjuã xi chja Hasen rë Nina cojo yungun jan ne, ndaja tetuhunrcun. Cuitjin chja: Yo me xi scaa rë cjue xcun ne, tsajin mé choho cuatju me tsëhë cjuaveya xi majo.”

Cjuã xi cjuahatsja yungun ngajan nandya Pérgamo

¹²Quihndë nihindi cjuã vi xi cuahatsja ángel rë yungun ngajan nandya Pérgamo. Cuitjin nihindi: “Cjuã vihi ne, cjuã rë cha xi tjin rë quicha yuju, xi vatë taha xcun cojo taha ngaxtun. Cuitjin chja cha: ¹³Ha hvë cahndë jani hisca nechuntuhun, ta cahndë vëhë ne, cahndë hñu xi vitexa Satanás. Peru cojo yëjë sa ne, ndaja mangutacún cojo ná. Handasa hya xi catsiquehen me Antipas, me xi catsinguixi cjuaquixi naha ngajan cahndë hñu xi vitexa Satanás ne, hisca hya ne, hacuiin cavitjayun ndiya rë xuta xi macjain rë me ngahan. ¹⁴Peru hacuiin yëjë tsujun ndaja ta, tjin ná ngu jo xcusun condra nuju ta nijyuntacún tsëhë ngu jo me ngajñi nuju xi tjen-gui me cjuachacun rë cha Balaam. Cha vëhë catsingacun cha Balac chuva rë hacutjin tsitsehen cha xuta nangui Israel nixtin hatsëë. Hane casahmi me jyë xi cajinë me yojo tsëhë cjuatjo rë nina

ndyojo, hacuaha xi casahmi me cjuatsehen xi satë rë cjuachacun jan. ¹⁵Hane hacuanitjin ngayun, ta ngajñi nuju siu me xi hacuaha tjengui rë cjuachacun jan, cjuachacun rë cha Nicolás. ¹⁶¡Nindeyun cjuatacun nuju! ta, sa tsajin ne, ha nduvá tjëngë nuju, hane sahme si cojo rë me xi cuacun vë cojo quicha rë cjuã xi vetju ntsuva. ¹⁷Yo ngayun xi tjin nuju cjuasua xi cuinuhyun cjuã xi chja Hasen rë Nina cojo yungun jan ne, ndaja tetuhunrcun. Cuitjin chja: Yo xi scaa rë cjue xcun ne, suá rë comida cjuarcun xi hmí rë maná xi jiyahma, hacuaha suá rë ngu ndyojo lihndi tyava hiscan camahindu ngu ñihi xatsë, ngu ñihi xi tsajin yo vëë rë, ta suva me xi cjuahatsja rë ne, suva ni me vëë me.”

Cjuã xi cjuahatsja yungun ngajan nandya Tiatira

¹⁸Hacuaha nihndi cjuã vihi xi cjuahatsja ángel rë yungun ngajan nandya Tiatira. Cuitjin fi cjuã: “Vihi cjuã rë Quihndi rë Nina Jain, me vëhë ne, tuxcun me, sacuaha ndihi tsejen, hane ntsacu me sacuaha quicha sine xi catsicjë ndihi xutsë rë: ¹⁹Ha machaya ná tsëhë xa sacuaha cjuandaja xi nihñu, sacuaha cjuahmutacun nuju, cojo xi mangutacún, hvë xa xi tinihñu cojo sa xi ndaja cjuecani nuju. Cjuandaja xi nihñu quihndë ne, quisun sa xi cuma rë xi cani-hñu ntsacu cavetsihin. ²⁰Peru cojo yëjë sa ne, tjin ná vihi condra nuju ta, nijyuntacún tsëhë na chjuun Jezabel vë, na xi chja suva na xi profeta má na. Na vëhë ne, cojo cjuachacun rë na ne, tsinguet-sun na hacuaha tsitsehen na xuta ladu naha cojo sa xi sahmi me cjuatsehen ngajñi xicjin ni me, hacuaha sinë me yojo rë chu xi cahme sacuaha ngu cjuatjo rë nina ndyojo. ²¹Na vëhë ne, casuá ran cahndë xi tsindeya na cjuatacun ran, peru mijí choho cuma ran tsëhë xcusun tsehen rë xi sahmi na cojo xi-

cjin na. ²²Vêhë xi tsijaña rê na xcun ngu cahndé tsêhë cjuahmu, hane me xi sahmi cjuatsehen cojo na ne, suá rê me ngu cjuañihi jyë, sa tsajin choho cuma rê me hane cuindeyaain cjuatacun rê me tsêhë xcusun chocun rê na xi cat-sitsehen rê me xi casahmi me cjuatsehen jan. ²³Hane me xi má sacuaha quihndi tjê rê na ne, cjué tsiquéhen me, cojo sa xi cuatjin ne, cumachaya rê yêjê sa xuta yungun naha xi ngahan ne, ndaja tsichúva cjuatacun cojo xahasen nuju, hane suá nuju jima ngu yun tucu saté nuju tsêhë xcusun xi canihñu. ²⁴Peru yahnga ngayun xuta Tiatira xi hacuiin cojo ngayun cachjahunntsun cjuachacun jan ne, ngayun hyuun mé xi vijne cjuaxi cahntsua nungun tsêhë Satanás. Ngayun ne, ndastu mé sa cuichjá xi nihñu ta, ²⁵xi sahmi ngu jyë ne, xi cuangunndujun tuhunhñu mé xi tjin nuju tsêhë Nina hisca hya xi nduvá ngahan. ²⁶Yo xi scaa rê xi cjue xcun, hacuaha sahmi chihin me cjuandaja naha hisca xi cuijnetahane, suá rê me ngahñu xi sahmi me gobiernu rê nanguicjín. ²⁷Hane me vêhë ne, cuitexa rê me xuta nanguicjín jan cojo ngahñu xi tjin rê me, sacuaha cojo ngu cuarta xi camá tsêhë quicha, hane sacuaha cuma xuva rê ngu tiji xi nihndé camá ne, cuatjin cumá cojo xuta cjin jan. Sacuaha ngahan ne, cafahántsa xajan tsêhë nahmi naha, cuanitjin suáxa rê me xi sahmi me gobiernu. ²⁸Hane suá rê me hasen rê niñú seti xi vetjucaa ngu-tajñu. ²⁹Yo ngayun xi tjin nuju cjuasua xi cuinuhyun cjuaxi chja Hasen rê Nina cojo yungun jan ne, ndaja tetuhuncun.”

Cjua xi cjuahatsja yungun ngajan Sardis

3 'Cjua vihi nihindi cojo sa xi cjuahatsja ángel tsêhë yungun ngajan nandya Sardis. Cuitjin fi cjuaxi: “Cjua vihi xi cachja me xi tsuvanguí rê yatu hasen rê Nina cojo yatu niñú: Hvê xa nuju. Tjin

cjua nuju xi quicun yun, peru quixiin ta hvê ta cahme yun. ²¡Catasca nuju! Mé tsujun xi siu quicun handasa ndiya cueya ne, tuhun rê ngahñu ta, xi má rê Nina naha ne, xa xi nihñu ne, hacuiin tsejen sacuaha xi ha camá chihin xajan. ³Tetuhuncun nguyêjê ni cjuaxi ha cachjahunntsun tsêhë Nina, tangunndujun cojo, hane nindeyun xcusun nuju. Cuatjin nihñu ta, sa xi cuascaain rê cjuatacun nuju ne, sehe cjué tjêngê nuju sacuaha cjue tjengui rê xuta ngu chahjê, ta hyuun hora xi cuinduva tjêngê nuju. ⁴Peru cojo yêjê sa ne, tjin ngajñi nuju ngu jo xuta ngajan Sardis xi cjêê tsinguetsun me tsjian rê me cojo cjuatsehen. Me xi cuacun vê ne, cojo ná tsujyihya me; hane cojo ngahan ne, cuaja me tsjian tyava tyahi, tsêhë xi cuatjin ndatjin vechu chuva rê xi casahmi me. ⁵Me xi scaa rê cjue xcun ne, cojo me nicaja rê me tsjian tyava, sacuaha me xi cuacun vê. Hacuaha tsajin nixtin xi scujñu ñihi rê me tsêhë libru xi yaha ñihi rê xuta xi sacu rê cjuahñu ta, hisca cueyanangê ñihi rê me xcun Nahmi naha cojo xcun ángel rê me. ⁶Yo ngayun xi tjin nuju cjuasua xi cuinuhyun cjuaxi chja Hasen rê Nina cojo yungun jan ne, ndaja tetuhuncun.”

Cjua xi cjuahatsja xuta rê yungun ngajan nandya Filadelfia

⁷'Cjua vihi nihindi cojo sa xi cjuahatsja ángel tsêhë yungun ngajan nandya Filadelfia. Cuitjin fi cjuaxi: “Cjua vihi ne, cjua rê me xi ndastu mé cjuatsehen tjin rê, hacuaha quixi me. Me vêhë ne, tacuntsja me llavi xi casatê rê nima David, me xi cavitexa. Hane cahndé xi vuxaha me jan ne, tsajin yo xi cuma cuechja. Hane sa xi vechja me ne, tsajin yo cuma scuxaha.” ⁸Cuatjin fi cjuaxi: “Hvê xa nuju. Casuá nuju cahndé xi tixaha tingotjo xi cumá nuju, hane tsajin yo cuma cuechja xi cumá nuju. Hacuaha hvê ta,

chuva má ngahñu nuju, peru handasa cuatjin ne, cavetjun cja naha hacuaha cjëë cjuahmu ñihi naha. ⁹ Tuhun cjuasua ta, chutsujun mé cumá rë xuta jan xi vi-hndë me tsëhë Satanás. Xuta jan ne, chja me xi tjë rë Israel má me, peru hacuiin xuta naha me ta, xuta ndacha me. Sahme xi xuta jan ne, cuinduva me cuiticjacun me ntsacun, hane scuëë me ta ngahan ne, meje ná ngayun. ¹⁰ Cavetjun cjuajeya xahasen nuju sacuaha xi ngahan catsingácun nuju. Ngatsë rë vëhë ne, ngahan ne, hacuaha cuetjo nuju cojo sa xi satiin nuju cjuacjintacun tsëhë hora xi chjahachuva rë xuta. Hora vëhë ne, ha tacun xati xi nduva xcun jingujyë ni ngasunhndë, hane hya chjahachuva rë jinguyëjë ni me. ¹¹ Ngutjen ni cjuëhë. Tangunndujun cojo cja xi ha camachaya nuju tsëhë, cojo sa xi tsajin yo cjue cojo corona xi satë nuju. ¹² Yo xi scaa rë cjue xcun tsëhë cjuatsehen, ngahan ne, sahme xi cumá me sacuaha xihndë xi secun vasencia rë yungun xi vaniji hai rë yungun rë Nina. Hane quihndë cuetjuxiin me. Setaha rë me ñihi rë Nina naha cojo ñihi rë nandya rë Nina, Jerusalén xatsë. Nandya jan ne, sahmi Nina xi nduvajne tsëhë ngahnga. Hacuaha hisca setaha rë me ñihi xatsë naha. ¹³ Yo ngayun xi tjin nuju cjuasua xi cuinuhyun cja xi chja Hasen rë Nina cojo yungun jan ne, ndaja tetuhunrcun.”

Cjua xi cjuahatsja yungun ngajan Laodicea

¹⁴ Cjua vihi nihndi cojo sa xi cjuahatsja ángel tsëhë yungun ngajan nandya Laodicea: “Cjua vihi ne, cja rë me xi cjuaquixindaja, cja xi chja me ne, quixi hacuaha cuatjin jain. Ngatsë rë me vë jan ne, cavetjucaa yëjë xi casahmi Nina. Cuitjin fi cja jan: ¹⁵ Ndaja machaya ná hacutjin nihñu xa nuju. Hacuiin jemu ndaja peru hacuaha hacuiin jemu chojyih, tu vasentjin siu. Xi má ná ne,

hitsë sa ndaja sa xi hatuxa ndaja o sa xi hatuxa chojyih. ¹⁶ Ngayun ne, ha maji sa tu ngu tsë vë ngayun, peru ngayun ne, jemu va xcusun nuju, vëhë xi cuaxëxin nuju sacuaha xi cuëhë natya cojo ntsuva. ¹⁷ Vihi cja xi nújun: Ngayin ne, nchina ngayin. Jercu cavetjin tujún hane tsajin mé machaja niji. Cuatjin nújun. Peru machayiin nuju tsëhë cjuaquixi ta, xi quixi ne, jemu chojyih tsujun, cojo cjuatsehen nuju, yuma yun, rcá yun, hane hacuaha quixti ngayun. ¹⁸ Vinchajyë nuju xi chuhun tsahan. Tjin ná oro ndaja xi catsicjë ndihi xutsë rë, hane cojo vëhë cuma nchina jain yun. Tjin ná tsjian tyava xi cuma chujun cojo sa xi hacuiin tu yo ni scuëë cjuasava nuju xi quixti ngayun. Hacuaha tjin ná rqui xi cuincha tuxcun, hane cumatsejen jain nuju. ¹⁹ Tichjátaha nuju ta, hya xi tjin yo me xi ngahan meje ná me ne, chjátaha rë me hacuaha vicuya rë me. Tsëhë vëhë ne, catamachinitacun hane choho catama nuju, nindeyun xcusun nuju. ²⁰ Nguehe tejña xi tichjá cojo nuju. Tu yo ni xi cuihndë xta naha ne, sehe sua cahndë ne, ngahan ne, cuisehen ngajan, hacuaha sinë niñu cojo me, hane me vëhë ne, sinë me cojo ná ngahan. ²¹ Yo ngayun xi scaa nuju cuangun xcun tsëhë cjuatsehen, suá nuju cahndë xi cuinechun cojo ná cahndë hñu naha. Cuatjin cumá cojo nuju tangun ni sacuaha xi ngahan ta, hacuaha caca ná cëjë xcun, hane tejña cojo Nahmi naha cahndë hñu rë me. ²² Yo ngayun xi tjin nuju cjuasua xi cuinuhyun cja xi chja Hasen rë Nina cojo yungun jan ne, ndaja tetuhunrcun.”

Cavëë Juan cahndë rcun ngajan ngahnga

4 Hya xi cavatju vihi ne, cahvë xi ngajan ngahnga ne, tsejen ngu tingotjo xi tixaha. Hane xta rë me xi cahndë xi cachja cojo ná titjun jan xi nuhya

rë sacuaha nuhya rê ngu tyjo, xta vëhë cachja cojo ná cuitjin:

—Ndoveniji nguehe sehe tsingácun ri xcusun xi sehe cumá.

² Hora vëhë ne, catsuva ná ngahñu rê Hasen rê Nina, ngajan cahvë xi ngajan ngahnga ne, tacun ngu cahndé rcun cojo ngu me xi tacun xcun. ³ Hane me xi tacun xcun jan ne, xcusun rê me ne, seti tsejen sacuaha ndyojo seti xi hmí rê jaspe o cornalina. Hane ngu yejña sacuaha ndyojo seti xi hmí rê esmeralda, vëhë vindee rê cahndé rcun jan. ⁴ Tahndee rê cahndé rcun jan ne, siu sa can ñuju cahndé rcun, hane xcun jan ne, siu can ñuju xuta changá. Me vëhë ne, yaja me tsjian tyava hacuaha hinchasun rcu me corona tsëhë oro. ⁵ Tsëhë cahndé rcun jan ne, vatë ndihichuhún hacuaha tsingá chuhun. Hacuaha xcun cahndé rcun jan ne, ti ndihi rê yatu lámpara xi hacui yatu Hasen rê Nina. ⁶ Hacuaha nangui xcun cahndé rcun jan ne, tsejen sacuaha ngu ndachacun tsëhë vidriu xi hasen sacuaha hasen ndyojo tsin. Hane tsëhë tahndee rê cahndé rcun jan ne, chuva ngu yuju rê, siu ñuju xcusun xi quicun. Hane xcusun jan ne, yaja tuxcun jingujyë yojo rê, sa taha xcun, sa taha ngaxtun. ⁷ Ngu xi quicun jan ne, xcusun rê ne, sacuaha chu xa tsejen. Xi majo ne, sacuaha ndyaja, hane xi má jyan ne, sacuaha xcun xuta jyihi xcun. Xi má ñuju ne, sacuaha ngu chu jya xi tivitjen chu, cuatjin tsejen. ⁸ Jima ngu xi quicun jan ne, tjin jyun tyjunga rê. Hane jingujyë ni tsëhë yaja tuxcun, taha xcun cojo taha ngaxtun. Hane xi quicun jan ne, sa nixtin, sa nixten, sejiin ta, chja cuitjin:

Tyjahi, tyjahi, tyjahi

camahani Nina xi jemu hñu cjua.

Nina tacun me, cavejña me hatsëë, hacuaha cuejña cuaha me.

Cuitjin chja.

⁹ Hane sahmi jyë hnga ñihi rê Nina hacuaha sua nacuechji rëhë hacuaha

vaxëndaja rê Nina xi tacun xcun cahndé rcun jan, Nina xi tacun cuaha me yëjë nu, yëjë nixtin. Hane jimangu ndiya xi vaxëndaja rê Nina ne, hora hya ne, ¹⁰ can ñuju xuta changá xi siu jan, viticjexcun me xcun me xi tacun cahndé rcun jan, hane faharcun me me xi tacun nu cjui nu nduva. Hacuaha xuta changá jan ne, candisun me corona rê me xcun cahndé rcun jan, sehe chja me cuitjin:

¹¹ Ngayun Nai niji, ngayun Nina niji, vechu chuva rê xi cuma jyë cuma hnga yun hacuaha sacu nuju ngahñu cjua. Ngayun canihñu yëjë ni xcusun, hane ngatsë rê cjuandaja nuju siu yëjë ni hacuaha camá yëjë ni.

Xtë xujun cojo yatu sellu

5 Sehe cahvë xi tsja ladu quixi me xi tacun xcun cahndé rcun jan, yaha me ngu xtë xujun xi camahindu xcun cojo ngaxtun, hacuaha xujun jan ne, tine rê yatu sellu. ² Hane hya ne, cahvë ngu ángel xi jemu hñu cjua, hane titsiquindé cojo yëjë ni ngahñu rê cjua vihi:

—¿Yo ngayun xi vechu chuva rê xi cuicheyun sellu rê sehe nixingun xtë xujun vihi?

³ Hya xi camá ne, ndastu yo, sa xi siu ngahnga, sa xi siu nangui, o sa xi siu ngahma nangui, ndastu yo cavetjucacun xi tsixinga xtë rê xujun jan, o sa xi scutsejen mé xi chja. ⁴ Hane ngahan ne, cajíhnda nguñajacácun, tsëhë xi casacuiin yo xi cuechu chuva rê xi tsixinga xtë rê xujun jan, sehe scutsejen mé xi chja. ⁵ Ngajan xi ngu xuta changá jan ne, cachja me cojo ná cuitjin:

—¿Xi cachjihndiin sa! Chutsijin ta, me xi hmí rê Chu Xa tsëhë tjë rê cha Judá ne, me xi cavetjusehen tsëhë David xi cavitexa hatsëë ne, me vëhë cacaá rê me quiji me xcun. Hane me vëhë cuma tsixinga me xtë rê xujun cojo yatu sellu rê.

**Cristu, ta xuta matitjun má
me, cafaha me xtë xujun**

⁶ Xi cavutsejen, ngajan secun vasencja rë cahndé rcun jan cojo tahndee rë, ngajñi rë ñuju xi quicun jan cojo xuta changá jan, ngajan secunhñu ngu xihin sacuahá Chu Tsánga, xi tsejen sacuahá ngu chu xi cahme. Me xi sacuahá tsánga jan ne, tjin yatu ndyaja rë cojo yatu tux-cun xi hacui yatu hasen rë Nina xi visehen jinguyë ni ngasunhndé. ⁷ Hane me xi sacuahá tsánga jan ne, canduva me cafaha me xtë rë xujun tsëhë tsja quixi me xi tacun xcun cahndé rcun jan.

**Xuta changá ne,
faharcun me Jesucristu**

⁸ Hane hora xi cafahatsja me xtë rë xujun jan ne, catsiñuju xcusun xi quicun jan cojo can ñuju xuta changá jan ne, caticjaxcun me xcun Tsánga jan. Jimangu me ne, yaha me ngu arpa hacuahá jimangu me hinchangui tsja me tyucu ndixuhi tsëhë oro xi quitsë rë cojo tyjungunsa. Hane tyjungunsa jan ne, hacui oración rë me xi nguñajacacun macjain rë me. ⁹ Hane me vëhë ne, tisë me ngu sun xatsë xi cuitjin fi cja rë: Vechu chuva rë xi chjuhun xtë rë xujun vë, hane nuxuhun sellu rë; tsëhë xi catsiquehen me yun, hane cojo jni nuju xi cavanga ne, cachuhun xi cumá rë Nina xuta tsëhë yëjë ni tjë, yëjë ni hne, yëjë ni nandya, cojo yëjë nación.

¹⁰ Hacuaha ngayun ne, canihñu xi xuta jan ne, cumá me xuta xi vitexa me, hacuahá cumá me sacuahá nahmi xi cjuahancuenda rë Nina xi faharcun me, hane cuitexa me nguehe xcun nangui.

Cjín ángel ne, faharcun rë Jesucristu

¹¹ Sehe cavutsejen jemu cjín camahani ángel xi cavindee rë cahndé hñu his-

can siu xcusun xi quicun jan cojo xuta changá jan. Hane tjin xqui sacuahá tsëhë të mil ndiya xi të mil. Hacuaha cahndé xta rë ángel cjín jan ¹² cachja hñu cuitjin: Me xi má Tsánga xi catsiquehen xuta me ne, vechu chuva rë xi cjuahatsja me ngahñu xi cuitexa me, cojo cjuanchina, cojo cjuahasen, hacuahá hñu cumá cja rë me, tjin rë me cjuandaja rë xuta, cuma jyë hnga me hane yëjë ni me ne, tsinchacuntihin rë me.

**Yëjë ngarca ni ne,
faharcun rë Jesucristu**

¹³ Sehe cahndé xi nguyëjë ni xi siu ngahnga cojo nguyëjë ni xi siu ngasunhndé cojo nguyëjë ni xi siu nguilhma nangui cojo ngajñi ndachacun, yëjë ngarca xi cuacun vë ne, tichja cuitjin: Cuitjin cumá tsëhë me xi tacun cahndé

rcun hacuahá cumá tsëhë Tsánga jan:

¡Catama tsëhë me xi tsinchacuntihin rë me, xi chjaharcun rë me, xi cuma jyë hnga me, xi tjin rë me ngahñu!

¡Cuatjin catama me tsëhë me nu cjuí nu nduva!

¹⁴ Hane catsiñuju xcusun xi quicun jan ne, cachja cuitjin:

—¡Cuatjin jain!

Hane xuta changá jan ne, caticjaxcun me sehe cafaharcun rë me.

Sellu tjun

6 Cavutsejen ngahan hya xi Tsánga jan ne, cavuxaha me ngu sellu tsëhë yatu sellu jan. Hane tsëhë catsiñuju xcusun xi quicun jan ne, cahndé ngu xta xi nuhya rë sacuahá xi faneya. Cuitjin cachja:

—¡Ndove!

² Hane cavutsejen xi cavetjutsejen ngu naxin tyava. Hane me xi quisun rë chu jan ne, yaha me ngu yanchijnu, sehe casacu rë me ngu corona hane cavetju

me sacuahá ngu cha xi cjue sahmi si xi tjin ngucacun cha xi scaa rë cha xi cjue cha xcun.

Sellu xi majo

³Hane hya xi cavuxaha Tsánga jan sellu xi majo ne, cahndé ta, xcusun xi majo xi quicun jan ne, cajindaya cuitjin: —¡Ndove!

⁴Ngajan cavetjutsejen ngu nga naxin xi hani hñu xcusun ru. Hane me xi quisun rë chu vë ne, ngu me xi casatë xa rë xi cjuahaxin me cjuajeya xi tjin nangui, cojo sa xi xuta ne, tsiquehen xicjin me ngajñi rë me. Hane suva me vëhë ne, cafahatsja me ngu quicha jyë.

Sellu xi majyan

⁵Hya xi cavuxaha me sellu xi majyan ne, cahndé xcusun xi quicun xi majyan jan, hane cuitjin cachja:

—¡Ndove!

Hane cavutsejen xi cavetjutsejen ngu naxin jma. Hane me xi quisun rë chu vë ne, yahatsja me ngu nisu chuva. ⁶Sehe cahndé sacuahá ngu xta xi vetju tsëhë ngajñi rë catsiñuju xcusun xi quicun jan xi cachja cuitjin:

—Ngu ni kilu trigu sacu chjé rë mosu, o sa jyan kilu ni cebada sacu rë me; peru aceite cojo xan rë uva ne, cumachajiin.

Sellu xi má ñuju

⁷Hane xi cavuxaha me sellu xi má nuju ne, cahndé xcusun xi quicun xi má nuju jan, hane cuitjin cachja:

—¡Ndove!

⁸Hane cavutsejen xi cavetjutsejen ngu naxin xi jemu va jyihi. Hane me xi quisun rë chu jan ne, Cjuaveya hmí rë me, hane tjengui tiña rë me, me xi hmí rë Hades, cahndé hiscan xi má hasen rë nima castigu. Hane me vëhë jan ne, tjin rë me cahndé xi tsëhë ngu tsëhë ñuju rquí xuta ngasunhndé xi cuma tsiquehen me ngu rquí vë cojo espada o cojo jindya

o cojo chíhin o sa xi cojo chu cjan rë xi tjin xcun nangui.

Sellu xi má hñu

⁹Hya xi catuxaha sellu xi má hñu ne, ngajan ngahma rë ngasunscun ne, cahvë hasen rë nima xi catsiquehen xuta ngatsë rë xi camacjain rë me cjuá rë Nina cojo ngatsë rë cjuaquixi rë me xi casua me.

¹⁰Me vëhë ne, cajindaya me cachja me cuitjin:

—Ngayun Nai rë yëjë ni, jemu tyjahi yun, quixi cjuá nuju. ¿Janihya nihñu cuendun jyé rë xuta xi siu me xcun nangui, hane nihñu ngojo jni niji? —Cuatjin cachja me.

¹¹Ngajan xi cafahatsja me jimangu me ngu tsjian tyava, hane cafaha me cjuá xi cuejñajyuu me ngu jo nixtin sa. Vindeya sa rë hisca hya xi cumachihin xqui rë xuta ladu rë me cojo me xi hacuahá tangun cueya sahmi xuta sacuahá cavatju me suva me.

Sellu xi má jyun

¹²Hacuahá cavutsejen hya xi cavuxaha me sellu xi má jyun. Hya ne, jercu cjuachan cafani nangui. Tsuhi ne, camá jma. Jemu va jyihi camá, sacuahá ngu tsjian jma. Hane sá xatsë ne, camá hani sacuahá jni. ¹³Hane niñú tsëhë ngahnga ne, cavixu xcun nangui sacuahá vixu tu rë ya higo hya xi vanga tjo hñu. ¹⁴Ngahnga ne, cafëya sacuahá ngu xujun të xi catsijeyu, hane hisca tjin ngu naxi o ngu nangui xi hinchá vasencja rë ndachacun ne, catjune rë cahndé rë. ¹⁵Ngajan xi xuta xi vitexa me ngu nangui, cojo yahnga me xi cojo me vitexa me, cojo xuta nchina, cojo sindadu capitán, cojo xuta xi hñu cjuá, cojo yëjë sa xuta, sa xuta xi caxteña o sa xuta xi ndaya tjin, nguyëjë ni me quiji cavangahma me cahntsua nguio cojo ngajñi naxindya rë nguñña cha. ¹⁶Sehe cafehyataha rë me nguñña cojo naxindya jan cuitjin:

—¡Catixusun niji cojo sa xi tinchunhmu niji! Cuatjin cuma cuinechinhmi tsëhë xcun me xi tacun cahndë rcun hane satiin niji cjuaxti rë Tsánga jan.

¹⁷ Cuatjin cumá ta cavechu nixtin xi jercu choho cumá ngatsë rë cjuaxti rë me, hane çhá tjin yo scaa rë cojo?

Xuta xi macjain rë Nina

7 Xi cavutsejen vihi ne, cahvë ñuju ángel xi hinchacun quixi catsiñuju yuju rë ngasunhndë. Hane ángel jan ne, casuaain cahndë xi cuanga catsiñuju tjo xi vanga ngasunhndë ta, hisca xi ngu tjo ne, cuangaain xcun nangui, o xcun ndachacun, o hisca rcu ngu ya. ² Sehe cahvë ngu ángel xi hacjahi. Hane camiji ángel jan hiscan xi vetjucaa tsuhi, hacuaha yaha ángel sellu rë Nina quicun. Hane cajin-dayahñu ángel jan cojo catsiñuju vë ta tacuntsja ángel vë xi choho sahmi cojo nangui cojo ndachacun. ³ Cuitjin cachja me cojo:

—Ndastu mé dañu nihñu cojo nangui, cojo ndachacun, cojo ya. Ndastu mé nihñu hisca xi cajnetaha cavetaha sellu xten xuta xi cavatsë Nina naja.

⁴ Ngajan xi cahndë xi cachja me xqui rë me xi casetaha rë chuva cojo sellu jan: ngu cientu cojo yachan ñuju mil má me tsëhë yëjë xuta tjë rë Israel. ⁵ Tsëhë xuta tjë rë Judá ne, tejó mil má me xi yaha sellu; hacuaha tejó mil má me tsëhë xuta tjë rë Rubén, tejó mil tsëhë xuta tjë rë Gad. ⁶ Tejó mil má me tsëhë xuta tjë rë Aser, tejó mil tsëhë xuta tjë rë Neftalí, hacuaha tejó mil tsëhë xuta tjë rë Manasés. ⁷ Tsëhë xuta tjë rë Simeón ne, tejó mil má me xi yaha sellu; hacuaha tejó mil má me tsëhë xuta tjë rë Leví, tejó mil tsëhë xuta tjë rë Isacar. ⁸ Tsëhë xuta tjë rë Zebulón ne, tejó mil má me xi yaha sellu; hacuaha tejó mil má me tsëhë xuta tjë rë José, tejó mil tsëhë xuta tjë rë Benjamín.

Xutaxín xi hacuaha camacjain rë me

⁹ Xi cavatju xcusun vihi ne, cavutsejen, hane cahvë xutacjín. Hisca tsajin yo cuma cuexqui rë me. Canduva me tsëhë ngajñi rë jimangu nación, jimangu tjë rë xuta, jimangu nandya cojo jimangu hne. Hane cafehe me hinchacun me xcun cahndë rcun cojo xcun Tsánga jan. Yaja me tsjian tyava hacuaha yahatsja me jne. ¹⁰ Hane jindaya me cojo ngu xta hñu, tichja me cuitjin:

Xi cavetjuntjen ne, camá ngatsë rë Nina naja

xi tacun me cahndë rcun cojo ngatsë rë Tsánga jan.

Cuatjin cachja me. ¹¹ Ngajan xi yëjë ni ángel ne, hinchacun quixi tahndee rë cahndë rcun jan hacuaha cavindee rë xuta changá jan cojo catsiñuju xcusun xi quicun jan. Hane caticjaxcun ángel xcun cahndë rcun hane cafarharcun rë Nina, ¹² tichja cuitjin:

¡Cuitjin jain!

Nina ne, yëjë ni tsinchacuntihin me. Jyë hnga me.

Tjin rë me cjuahasen. Taan nacuechji rë me.

Xuta ne, vaxëndaja me. Vechu chuva rë xi cjuahatsja me ngahñu xi cuitexa me. Hacuaha hñu cjua rë me.

Cuanitjin cjue me yëjë nu yëjë nixtin.

¡Cuatjin jain!

¹³ Hya xi camá ne, ngu xuta changá jan, caphnenguise me ngahan cuitjin:

—Me xi cuicun xi yaja tsjian tyava ne, çyo má me? hane çhisca jani canduva me?

¹⁴ Ngajan xi cafayanguë cuitjin:

—Tatá, xcusun vëhë ne, ngayun hyun, hacuiin ngahan.

Sehe cachja me cojo ná cuitjin:

—Me vihi caca rë me cjuañihi cjuacjintacun jyë. Cavane me tsjian rë me, camá tyava cojo jni rë Tsánga. ¹⁵ Vëhë xi tjin rë me cahndë xcun cahndë

rcun rē Nina, hane fahacuenda me nixtin nixten cahntsua yungun rē me. Hane Nina xi tacun xcun cahndé rcun ne, ngu tangun ni cuejnándaja me cojo xuta jan. ¹⁶Hindē tsajin nu tsajin nixtin cuma vojo rē me. Cuma xindaain rē me, cuacaain rē me tsuhi; hacuaha tsijendaain rē me cojo hnde rē, ¹⁷ta cahndé rē vèhē ne, Tsánga xi tacun cavasencja rē cahndé rcun ne, cuahacuenda rē me, hane cuincha ndiya rē me xcun nandá xi sua cjuahñu. Hane Nina ne, tsixiya me yējē ndatuxcun xuta jan.

Sellu xi má yatu

8 Hane xi cavuxaha me xi sacuahá Tsánga jan sellu xi má yatu ne, ngahnga ne, cavejña jyu camahani sacuahá chuva rē vasen hora. ²Cuatjin camá. Sehe cahvè xi yatu ángel vè xi siucahndé xcun Nina ne, cafhatsja yatu tyjo. ³Sehe canduva sa ngu ángel xi yaha ngu tyucu ndixuhi tsèhè oro, hane casecunquixi cojo tiña ngasuncun. Ngajan cafhatsja me cjín tyjungunsa cojo sa xi cuaca me xcun ngasuncun tsèhè oro jan xi tacun xcun Nina. Hane hnde rē ne, camatangun cojo oración rē yējē me xi tyjahi cjuatacun rē me cojo sa xi cuma chihin cjuá. ⁴Hane nihndi rē tyjungunsa xi yahatsja ángel jan ne, casecjan cojo oración rē me xi tyjahi cjuatacun rē me, hane camiji tangun hiscan tacun Nina. ⁵Ngajan xi ángel jan ne, cafahtyucu ndixuhi jan, catsinguitsè rē cojo ndihi tsèhè ngasuncun jan hane catsingatjen rē xcun ngasunhndé. Hane hora vèhè cafaneya cjuachan cavatè hacuaha cafani nangui.

Yatu tyjo xi tsijane ángel

⁶Hya xi camá ne, yatu ángel xi yaha yatu tyjo jan ne, caviyujucacun xi tsijane tyjo rē. ⁷Ángel xi tjun jan ne, catsijane tyjo rē. Hane jercu cavaha tsi ndy-ojo xcun nangui. Hacuaha cavixu ndihi

xi tecjan cojo jni. Cojo vèhè ne, tsèhè yējē ni ya xi tjín ne, tsèhè chuva jyan ne, ngu cati. Hisca cojo jingujyè nguijña xi xcuen ne, cafè cati.

⁸Sehe catsijane ángel xi majo jan tyjo rē. Hane hora vèhè ne, camatsejen sacuahá ngu nguijñacha jyè xi yaha rē ndihi xi cjanenguiya ngajñi ndachacun. Hane tsèhè yējē ndachacun ne, tsèhè chuva jyan cahndé, ngu ni cavuya jni. ⁹Ngajan xi tsèhè yējē chu xi hinchá nandá jan, tsèhè chuva jyan chu ne, ngu chu cahme chu; hacuaha tsèhè chuva jyan barcu xi hinchasun ne, ngu cafè cati.

¹⁰Sehe catsijane ángel xi majyan jan tyjo rē. Hane hora vèhè ne, canenguiya tsèhè ngahnga ngu niñú jyè xi jercu ndaja seti sacuahá seti ngu ndihi jyè. Hane niñú jan ne, casatè rē ndajyè cojo hiscan vetju nandá. Hane tsèhè yējē nandan jan ne, ngu tsèhè chuva jyan cahndé casatè rē. ¹¹Niñú jan ne, yaha ñihi rē xca sa xi hmí rē Ajenjo, ta cavuya sa nandá hiscan cjanenguiya niñú. Hane jemu cjín xuta cahme me xi cahvi me nandá sa jan.

¹²Sehe catsijane ángel xi ma ñuju tyjo rē, hane choho casahmi cojo tsuhi cojo sá ta jemu camachuva hasen rē. Hacuaha chuva rē jyan niñú ne, ngu ni cafè ngahñu rē cahvo. Ngajan xi tsèhè ngu cuaha nixtin o tsèhè ngu cuaha nixten ne, ngu tsèhè chuva jyan cahndé ne, camajñu hane casacuiin hasen rē.

¹³Hya xi camá ne, ngajan vasencja rē ngahnga tivitjen ngu chu jya. Hane cuitjin sahmi sen chu cajindaya chu cojo ngu xta hñu:

—Cojo cjuatsehen nuju, ngayun xuta xi nechun ngasunhndé ta, tsèhè xi vangui sa jyan sa ángel xi chaja sa tsijane tyjo rē.

9 Hya xi camá ne, catsijane ángel xi má hñu jan tyjo xi yaha, hane cahvè ngu niñú xi cjanengui tsèhè ngahnga xcun nangui. Hane cafhatsja niñú

jan llavi tsëhë ngojo rë nduchin. ²Sehe cavuxaha nduchin ne, hane jemu camiji nihndi rë sacuahha nihndi rë ngu hornu jyë. Hisca tsuhi cojo jingujyë ni tjo ne, tsejen jñu ngatsë rë nihndi xi vetju tsëhë nduchin jan. ³Hane tsëhë ngajñi rë nihndi jan ne, cavixu chu nchahva xcun nangui. Hane chu jan ne, tsavi cojo chu sacuahha tsavi cojo chu naya xi siu ngasunhndë. ⁴Hane cafaha chu cjuha xi tsajin mé sahmi chu cojo nguijña o cojo xca o sa cojo ya ta, suva xi satë chu xuta xi siutaain xten me sellu rë Nina. ⁵Casacuiin rë chu cahndë xi tsiquehen chu xuta jan ta, cuenda jemu cuiyujuhmu me cahntsua hñu sa. Hane cjuahmu xi cuiyuju me cojo ne, jineya sacuahha jineya hiscan cjuaha chu naya.

⁶Nixtin hya ne, xuta jan ne, tsimeje me cjuaveya, peru sacuiin cjuaveya xi cuma rë me. Xuta jan ne, cjuhyacacun me cjuaveya, peru sacuiin.

⁷Chu nchahva jan ne, tjin chjine chu sacuahha naxin xi tjin chjine chu xi cjue chu si. Hinchasun rcu chu ngu xcusun sacuahha ngu corona tsëhë oro, hane xcun chu ne, tsejen sacuahha xcusun rë xcun xuta. ⁸Tsa rë chu ne, sacuahha tsarcu yachjin, hane nehñu chu ne, sacuahha nehñu xa cjan rë. ⁹Tixtë cun ru cojo ngu xcusun sacuahha chinga quicha, hane xi nuhya rë xi fane tyjunga ru ne, hñu nuhya rë sacuahha cjin camahani carreta xi tijuvë naxin xi cuetsihin si. ¹⁰Ndetsihin chu yaha quicha rë chu naya. Hane cojo quicha jan ne, tjin ru cahndë xi sua chu cjuañihi xuta xcun xi hñu sa jan. ¹¹Hane sacuahha rey rë chu ne, má ángel rë nduchin jan. Ángel jan ne, Abedón hmí rë sa xi hne hebreo o Apollyon sa xi hne griego. Catsijo cjuha vë ne, vijne Ngu xi Tsiqueya rë.

¹²Vëhë má cjuañihi xi tjun cuma. Jo sa má xi ha meje cuatju.

¹³Hya xi camá ne, catsijane ángel xi má jyun tyjo rë. Ngajan xi canuhya rë

ngu xta xi cavetju tsëhë tjehehen rë ngasunsun xi tacun xcun Nina, hiscan xi jyihi sacuahha ndyaja ru. ¹⁴Xta jan ne, cachja cojo ángel xi má jyun xi catsijane tyjo jan. Cuitjin cachja:

—Nismi catsiñuju ángel xi tjiñu tjehehen rë ndajyë jyë xi hmí rë Eufates.

¹⁵Hane camandaya catsiñuju ángel jan. Ángel jan ne, caviyujuya hisca xi cuechu nu, cuechu sa, hane cuechu nixtin xi cuma meje rë xi tsiquehen rë xuta. Chuva jyan chuva jyan xuta ne, ngu ngu me cueya me. ¹⁶Hane xqui rë sindadu xi vitexa ángel jan ne, jo cientu millón má xi hinchasun naxin. Hane ngahan suva cahndë xqui rë.

¹⁷Naxin cojo cha xi hinchasun rë chu xi cahvë ngajñi nijña naha ne, cuitjin cun. Cha xi hinchasun rë chu ne, yaja cha chinga quicha xcusun hani rë ndihi, xcusun rë susë hñu hacuahha xcusun sine. Hane rcu chu naxin jan ne, sacuahha rcu chu xa cjan rë cun. Hane tsëhë hntsua chu ne, tivetju ndihi tivetju nihndi cojo azufre. ¹⁸Hane ngatsë rë jyan cjuañihi jan xi vetju tsëhë hntsua chu matsejen ne, ngatsë rë ndihi, cojo nihndi cojo azufre ne, ngu cahndë tsëhë chuva jyan cahndë xuta cahme me. ¹⁹Jemu tsavi cojo hntsua chu, peru hacuahha tsavi cojo ndetsihin chu. Ndetsihin chu ne, sacuahha chu yë cun ta, tjin rcu. Hane rcu vëhë ne, má sahmi chu dañu cojo.

²⁰Peru handasa cuatjin camá, xuta xi caca rë me ta cahmii me cojo cjuacjintacun vëhë ne, tsajin camacjincacun me tsëhë cjuatsehen xi casahmi me ta, capharcun cuaha me xitsehen cojo nina xi camá tsëhë oro, tsëhë plata, tsëhë quicha sine, tsëhë ndyojo, cojo tsëhë ya. Cafaharcun cuaha me nina jan xi maji vutsejen, maji hndë, maji tsujyihya. ²¹Hacuaha tsajin camacjincacun me tsëhë xi catsiquehen xicjin me, o tsëhë xcusun xi sahmi me ngatsë rë xi ma rë me cjuha surqui, o tsëhë cjuatse-

hen xi sahmi ngajñi rë me sa chjuun cojo chjuun o sa xihin cojo xihin, o sa tsëhë cjuachëjë rë me. Catsindeyaain me xcusun rë me.

Ángel xi yaha xtë lihndi xujun

10 Hya xi camá ne, ngajan cahvë ngu ángel xi hñu cjua, nduvajne tsëhë ngahnga tixtëcun rë yuff. Hacuaha ngu yejña cavindee rë rcu ángel jan. Xcun ne, seti sacuaa tsuhi; hane tyuhmi rë ne, tsejen sacuaa ngu ndihi hndë xi vitjen. ²Hane yahatsja ngu xtë lihndi xujun xi cavixinga. Hacuaha cavisane ntsacu quixi xcun ndachacun hane xi scun ne, xcun nangui quixí. ³Ángel jan ne, cajindaya cojo ngu xta hñu, hane nuhya rë sacuaa xi tsichan ngu chu xa. Hacuaha hora xi cajindaya ne, cachja xta rë yatu chuhun vatë. ⁴Hora xi cachja yatu chuhun jan ne, cavéññacácun xi tsihindú cjua jan peru casahmee ta, cahndë ngu xta tsëhë ngahnga xi cachja cojo ná cuitjin:

—Caveni nihindi cjua rë yatu chuhun vë ta, cuiyujhma cjua vë.

⁵Hya xi camá ne, ángel xi cahvë xi secun xcun ndachacun cojo xcun nangui quixí jan ne, catsiquijin tsja quixi ngahnga. ⁶Hane casua cjuaquixi rë hisca caveyanangui rë Nina xi tacun yëjë nu yëjë nixtin, me xi hacuaa catsicha rë ngahnga cojo yëjë ni xi tjin rë, cojo nangui cojo yëjë xi tjin rë, cojo ndachacun cojo yëjë xi tjin rë. Cuitjin cachja xi casua cjuaquixi rë:

—Vindeyaain sa rë ta, ⁷ha ndiya jiya nixtin xi suacuenta ángel xi má yatu. Hya tsijane tyjo rë ne, hane cumachihin cjua xi jiyahma rë Nina, cjua xi casua me camachaya rë profeta xi sahmi xa rë me.

⁸Hya xi camá ne, ngajan cahndë nga xta xi cachja tsëhë ngahnga cojo ná cuitjin:

—Tihin chjehe xujun lihndi xi tjin të jan tsëhë tsja ángel xi secun xcun

ndachacun cojo xcun nangui quixí. —Cuatjin cachja xta cojo ná.

⁹Vëhë xi cëjëtjengë ángel hane cahvë rë xi catisua ná xujun lihndi jan. Hane cachja cojo ná cuitjin:

—Juhun, chjehe xini cjua rë cojo sa xi titehercui. Cjua jan ne, sahmi sa rë cahntsue, peru ntsove ne, sahmi haxi rë.

¹⁰Sehe cafaha xujun lihndi jan tsëhë tsja ángel, hane cajñë. Hane ntsuva ne, camá haxi rë sacuaa xi cajñë tsjen, peru xi cafë cajñë ne, cahntsua canangui naha ne, camahmu. ¹¹Sehe cavuya cachja nga cojo ná cuitjin:

—Tjin xi cuinoje ngu ndiya nga ngatsë rë Nina. Cuinoje tsëhë xutacjín, xuta xi hacjahi hacjahi nación rë me, xuta xi hacjahi hne chja me, hacuaa cojo xuta xi hñu cjua me ngatsë rë xi vitexa me.

Jo testigu xi cahme ne, cavuya nga cjuahñu rë

11 Hya xi camá cajñë ne, casua ná ngu rquí ya naxu xi machjirëhë sacuaa ngu ya chuva. Sehe cachja ángel jan cojo ná cuitjin:

—Tihin chjehe chuva rë yungun xi matitjun rë Nina cojo tsëhë ngasuncun. Hacuaha texqui me xi faharcun ngajan. ²Xi nichove yungun xi matitjun ne, hacuiin cojo cahndë xi má ndatsen rë nichove. Xi canichuviin vë. Cahndë vëhë ne, satëtsja xutaxín xi macjaain rë me Nina. Me xi cuacun vë ne, tsinguetsun rë vë, hacuaa tsinguetsun rë nandya rë Nina xcun xi yachan jo sá cojo xcusun tsehen xi cún me. ³Xcun nixtin vëhë ne, tsingátju jo testigu naha, hane me xi cuacun vë ne, cuichja me xcusun xi sehe cumá. Ngu mil cojo jo cientu cojo jyanchan nixtin jan ne, cuichja me cjua naha, hacuaa cuaja me tsjian rë cjuachoho.

⁴Jo me vëhë ne, hacui jo ya olivu xi tjin cjua tsëhë, hacuaa hacui me xi jo candeleru xi siu xcun Nina, me xi vitexa ngasunhndë. ⁵Sa tjin ngu xuta xi meje

sahmi me dañu me ne, cuetju ndihi tséhë hntsua me hane tsicjéya rë xi chohovëë rë me. Chuva vëhë cueya tu yo ni xi meje xi choho sahmi cojo rë me. ⁶Jo me vëhë ne, siutsja me ngahñu xi cuechja me ngahnga sehe cuaain tsi nixtin xi cuehya me. Hacuaha satë rë me ngahñu xi sahmi me xi nandá ne cuya jni o xi cuanguihmu rë me nangui cojo yëjë xcusun cjuacjintacun. Cuatjin cumá tu cutjin cjin ndiya cuma meje sahmi me.

⁷Ndatjin, peru hya xi cafë casua me cjuaquixi rë me ne, ngu me sacuaha ngu chu chojyihí xi miji tséhë nduchin ne, sahmi chu si cojo rë me, hane scaa ru cjue chu xcun hane tsiquehen chu me. ⁸Hane nima jan ne, hacuiin xinchaniji ta cuiyuju ndiyatë rë ciudad jyë. Ciudad jyë jan ne, sa xi chjahanchuvan ne, cuma cuinújan xi hmí rë Sodoma cojo Egipto. Ngajan ni ne, cahme Nai naja xcun cru, hane ngajan cuiyuju nima. ⁹Xcun xi jyan nixtin vasen ne, jemu cjuehe xuta. Cjuehe me tséhë yëjë ni nandya, tséhë yëjë ni tjë, tséhë yëjë ni hne cojo tséhë yëjë ni nación. Cjuehe me scutsejen me nima, hane tsingatiin me xi xinchaniji nima. ¹⁰Hane xuta xi siu ngajan ne, jercu ndama rë me ngatsë rë cjuaveya jan. Hisca cuiyuju me suhi hane tsingatju me cuatjo ngajñi xicjin me. Cuatjin sahmi me ta tjin rë me cjuasua xi cafë jo profeta jan xi jercu casua me cjuanñihi.

¹¹Peru xi cafë jyan nixtin vasen jan ne, xta xi sua Nina xi tséhë cjuahñu ne, cavisehen nga rë nima. Hane caxinchacun quixi me. Ngajan xi ngu chircun jyë cavisehen rë xuta xi cavutsejen rë me. ¹²Hya xi camá ne, me xi cavuya xta rë ne, cahndë me ngu xta hñu xi cachja tséhë ngahnga cuitjin:

—Nduvun nuju nguehe.

Ngajan xi quijiniji me ngahnga ngajñi ngu yufí. Hane cavëë xuta xi chohovëë rë me ta quijiniji me. ¹³Ha hora vëhë ni ne, jercu cjuachan cafani nangui hane tséhë

chuva rë të rquí tséhë ciudad jan ne, cavixujne ngu. Hane ngatsë rë me vëhë ne, yatu mil xuta cahme. Ngajan xi xuta xi cavangui me ne, jercu catsacjun me camá. Sehe casahmi jyë casahmi hnga me Nina xi tacun ngahnga.

¹⁴Cojo vëhë cajnetaha cjuacjintacun xi majo. Peru ha cjuehe xi ma jyan.

Xcusun xi camá hya xi cafane tyjo xi má yatu

¹⁵Hya xi camá ne, catsijane ángel xi má yatu tyjo rë, sehe canuhya rë tséhë ngahnga xta hñu xi cachja cuitjin: Jingujyë rë nandya xi vitexa xuta ngasunhndë xi matitjun ne, cavisehen gobiernu rë Nina naja cojo Cristu, me xi catsingatju me. Hane me vëhë sahmi me gobiernu yëjë nu yëjë nixtin.

¹⁶Ngajan xi catsiyëjë can ñuju xuta changá xi siu me xcun cahndë rcun rë me ngajan xcun Nina ne, caticjan xcun me, hane cafarharcun me Nina. ¹⁷Hane cuitjin cachja me:

Tihin nacuechji nuju, Tatá Nina. Ngayun jercu hñu camahani ngayun.

Hacui ni yun hya, hacui ni yun quihndë, hane hacui ni yun yëjë nixtin.

Hindë ticujun ngahñu jyë nuju xi satë nuju

hane ha tivetsuhun nihñu gobiernu.

¹⁸Xuta ne, choho hvë me yun, peru cavechu nixtin xi macjan nuju cojo cjuahngatacun rë me.

Cafehe hora xi nihñu cuendun tséhë nima.

Tuhun chjí rë me xi casahmi xa nuju sacuaha profeta,

sacuaha xuta nuju, sacuaha xutaxín xi faharcun me ñihi nuju.

Tuhun rë yëjë ni me, sa yehe sa langa me.

Hane me xi tsicjéya rë cojo xcusun rë ne, tuhun rë me xi cjueya me.

¹⁹Ngajan xi cachjahaxin rë tsjian rë tingotjo rë yungun rë Nina ngajan ngahnga, hane cahntsua yungun jan ne, camatsejen caxa ximinchacun xi yaha contratu xi casahmi Nina cojo xuta rë me. Cavatë ndihichuhún, cafaneya, catsinga chuhun, cafani nangui hacuaha cavaha ngu tsi ndoyojo xi jercu hñu camahani. Cuatjin camá.

**Scaanya yë xitsehen cojo
quihndi xi catsingatju Nina**

12 Hya xi camá ne, camatsejen cjuarcun xi sahmi sen ngajan ngahnga. Camatsejen ngu chjuun xi tix-tëcun ran tsuhi. Hane sá ne, tacun ngahma rë ntsacu na. Hane ngu corona xi camá tsëhë tejó niñú ne, vëhë quitaha xten na. ²Hane chjuun jan ne, meje tsin quihndi ran. Jercu jindaya na ngatsë rë cjuahmu cojo cjuachoho tsëhë hacutjin tivatju ran. ³Hane camatsejen nga ngu sen ngajan ngahnga ta, camatsejen ngu yë xi jercu jyih chu; hani xcusun ru. Chu jan ne, yatu má rcu chu, të má ndyaja ru. Hane jima ngu rcu chu hinchá sun ngu corona. ⁴Cojo ndetsihin chu ne cajavëjne chu ngu cahndé tsëhë jyan cahndé rë niñú rë ngahnga, hane cacandi chu nangui. Hane yë jan ne, cafaña vasen chu xcun chjuun xi ha hindëya tsin quihndi ran cojo sa xi tsinguijne jingu chu quihndi rë na hora xi tsin. ⁵Hya xi camá ne, na vëhë ne, catsin rë na ngu quihndi xihin. Hane quihndi xihin jan ne, yaha bastón xi cuitexa me cojo yëjë ni nación cojo ngahñu cjua xi tjin rë me. Hane quihndi ran jan ne, cachjaha rë xcun Nina, ngajan xcun cahndé rcun rë me. ⁶Hane chjuun jan ne, cavanga na quiji na ngu xín. Ngu cahndé xi Nina tjin chjine rë me xi cumá ran. Hane ngajan sacu xi sinë na xcun ngu mil cojo jo cientu cojo jyanchan nixtin.

⁷Hya xi camá ne, cavetsihin ngu si ngajan ngahnga. Miguel cojo yahnga án-

gel ladu rë me ne, casahmi me si cojo yë xitsehen jan hacuaha cojo ángel ladu rë xitsehen. ⁸Hane cacaain rë yë jan cojo ángel ru, hacuaha catsichaja chu cahndé ru ngajan ngahnga. ⁹Vëhë xi caningatjen ru xcun ngasunhndë. Yë jan ne, jemu changá chu. Xitsehen xi matitjun o Satanás hmí ru. Chu ndacha chu, vindacha ru xuta ngasunhndë. Hane caningatjexin ru cojo ángel ru hiscan ngasunhndë.

¹⁰Hya xi camá ne, cahndé ngu xta xi jemu hñu cachja ngajan ngahnga cuitjin:

—Quihndë cavechu nixtin xi Nina cuaxëtje me xuta, cumatsejen ngahñu rë me cojo gobiernu rë me. Hacuaha tsejen xi hñu cjua rë Cristu, me xi catsingatju me ta, cama catsingatjexin me chu xi vinchajyë xingueen. Nixtin nixten cavinchajyë rë me xcun Nina naja, peru hindë tsajin. ¹¹Hane xingueen jan ne, caca rë quiji me xcun ngatsë rë jni rë Tsánga jan cojo ngatsë rë cjuaquixi rë me xi casua me tsëhë Nina ta, hacuiin machuvacacun me xi cjue xcun me cojo Nina handasa cjueya me. ¹²Hane ngatsë rë vëhë ne, ¡catama sua rë ngahnga cojo me xi siu xcun! Peru ¡ay tsëhë nangui cojo ndachacun! ta, tsëhë xi canduva tjengui rë xitsehen xi matitjun. Hacuaha jemu quitsë rë cjuaxti tsëhë xi vëhë xi nixtin rë ne, meje cuijnetaha. —Cuatjin cachja xta jan.

¹³Hya xi camachaya ru xi caningatjen ru nangui ne, cavetsihin cavanga cojo chu chjuun xi catsi ran quihndi xihin jan. ¹⁴Peru chjuun jan ne, cafahatsja na jo tyjunga rë chu jya xi jercu jyih cojo sa xi cuma cuitjen na tsëhë chu yë hiscan cahndé xi tjin chjine xi cuma ran ngajan ngu xín. Hane ngajan sacu xi sinë na xcun ngu chan cojo jo chan cojo vasen chan, hane cuechiintaain chu yë na. ¹⁵Ngajan xi chu yë jan ne, cavaxë chu tsëhë hntsua chu nandá sacuaha ngu ndajyë cojo sa xi cuechutaha rë chjuun jan ne, cjue tyjava na cojo ngahñu rë ndajyë. ¹⁶Peru nangui ne, cavisecoo rë chjuun jan, hane

caseya tsjuhun ne, cavingui rë ndajyë xi cavetju rë yë jan. ¹⁷Vëhë xi yë jan ne, jercu camaxti ru cojo chjuun jan hane sehe quiji casahmi chu si cojo tjë rë na xi cavingui. Casahmi chu si cojo xuta ran xi vetjo cjua xi cavitexa Nina hacuaha sua me cjuaquixi rë Jesús.

**Yë xitsehen ne, casua chu ngahñu
xi cjuahatsja chu chojyih**

13 Hya xi camá ne, cavejña chu yë jan tjehe ndachacun, hane cahvë xi ngu chu chojyih ne, tivetju chu tsëhë ndachacun. Të má ndyaja ru hacuaha yatu má rcu chu. Hane të corona seya xcun ndyaja ru. Hane jima ngu rcu chu ne, yaja ngu ñihi xi tsitjungui rë Nina. ²Chu chojyih xi cahvë vë ne, sacuaha ngu xa hindu jyë cuatjin jyih chu, peru ntsacu chu cojo tsja chu ne, sacuaha ntsacu cojo tsja chu oso; hane hntsua chu ne, sacuaha hntsua chu xa sine cjan rë. Hane yë jan ne, casua chu vë ngahñu ru cojo cahndé rcun rë chu, hacuaha casua xa rë chu. ³Hane ngu rcu chu jan ne, casacuhmu rë hane tsejen xi tsajin rqui rë, ta cueya. Peru cojo yëjë sa ne, camandaja. Hane jinguyjë ni xuta ngasunhndë ne, jercu quijircun rë me xi camandaja. Hane cojo cjuasua tjengui me chu. ⁴Hane xuta ne, caticjan xcun me cafararcu me chu yë jan ta, tsëhë xi casua yë cahndé xi vitexa chu. Hacuaha cafararcun me chu chojyih jan. Cuitjin cachja me tsëhë chu:

—Ndastu yo xi cuechu xi cumá sacuaha chu vi. Ndastu yo cuma scaanya cojo chu. —Cuatjin cachja xuta tsëhë chu.

⁵Chu jan ne, casetaha ngu hntsua chu xi jemu cojo cjuaxta chja chu hacuaha tsitjungui ru Nina. Hane casacu ru cahndé xi cuitexa chu xcun xi yachan jo sá. ⁶Hane cavetsihin xi choho cachja chu tsëhë Nina, canchati chu tsëhë ñihi rë cojo tsëhë cahndé hiscan viyuju Nina,

hane tsëhë yëjë sa me xi siu me ngahnga.

⁷Hane cafaraxa chu xi sahmi si chu cojo xuta xi tyjahi cjuatacun rë me cojo me xi ndaja cjuinduju me cojo Nina. Hane caa ru cjue chu xcun. Hacuaha cafaraxa chu xi cuitexa chu xuta rë yëjë ni tjë, yëjë nandya, yëjë hne cojo yëjë nangui.

⁸Hane jinguyjë me xi viyuju me ngasunhndë ne, cafararcun me chu. Yëjë ni me xi tsajin ñihi rë me xcun xujun rë Tsángarë Nina xi hisca ntsacu cavetsihin ngasunhndë ne, cavejña xi cueya. Tsajin ñihi rë me jan ta, tsajin rë me ngahñu xatsë. Hane me vëhë cafararcun me chu.

⁹Yo ngayun xi tjin nuju cjuasua xi cuinuhyun cjua vihi, ndaja tetuhuncun.

¹⁰Me xi satë rë xi cuma me presu, cuatjin cumá. Me xi satë rë me xi cueya me cojo quicha, cuetjucaa jain. Jinguyjë rë vëhë ne, mameje rë xi xuta xi macjain rë me Nina ne, cjuecani rë xi cumacjain sa rë me.

¹¹Ngaxtun vëhë ne, cahvë nga ngu chu chojyih, hane tivetju chu tsëhë nangui. Chu chojyih xi majo ne, tjin jo ndyaja ru sacuaha tjin chu tsángarë, peru chja chu sacuaha ngu yë jyë. ¹²Hane hacuaha cojo chu vëhë casatë rë chu ngahñu xi casatë rë chu xicjin cojo ñihi ru. Hane casahmi chu vë xi yëjë ni xuta xi siu ngasunhndë ne, cjuaharcun me chu chojyih xi tjun jan, chu xi handasa cueya chu xi casacuhmu rë ne, camandaja. ¹³Hane cama casahmi chu vë cjuarcun yehe cojo seña. Casahmi chu xi cuixu ndihi tsëhë ngahnga, hane xuta ngasunhndë ne, cavutsejen me cjuarcun. ¹⁴Cuatjin cavindacha chu vë xuta ngasunhndë cojo cjuarcun xi cama casahmi chu ngatsë rë chu xi tjun. Hane cavitexa chu xi xuta ne, cuaxëtaha me ngu xcusun rë chu tjun jan xi casacuhmu rë cojo quicha peru cojo yëjë sa ne, quicun chu. Hane cuatjin casahmi me. ¹⁵Hane chu xi majo jan ne, casacu ru cahndé xi sua chu xta rë xcusun jan cojo sa xi cuma cuichja

xcusun jan, hacuaha cuma sahmi xcusun jan xi cueya tu cutjin cjin me xi tsingatiin xi cjuarcun xcusun jan. ¹⁶ Hane xcusun jan ne, casahmi ngu jyë xi yëjë ni xuta ne, setaha ngu sellu tsja ladu quixi o sa xten me. Cuatjin casetaha rë xuta, sa quihndi, sa changá me, sa nchina, sa yuma me, sa xuta ndaya tjin o sa xi mosu hndixahan; yëjë ni me casetaha rë me. ¹⁷ Hane chuva vëhë ne, sacuiin cahndé xteña hacuaha sacuiin cahndé cuatsë sa xi casetaain rë me sellu jan cojo ñihi rë chu chojyihí jan o cojo xqui rë letra rë ñihi ru.

¹⁸ Cjuatacun vihi ne, tjin mé vijne, peru meje rë xi cuacjantaha me cjuatacun rë me ta cuitjin fi cju: Catitsichuva me xqui rë chu jan ta, hatuxa xqui rë ngu xuta xihin. Hane xqui rë jan ne, jyan cientu cojo jyanchan jyun má.

Ngu cientu cojo yachan ñuju mil me xi cavatsë Nina

14 Hya xi camá ne, cavutsejen nga, hane ngajan secun Tsánga jan, secun quixi xcun naxi xi hmí rë Sion. Hacuaha siu cojo me ngu cientu cojo yachan ñuju mil xuta xi casetaha xten me ñihi rë Tsánga jan cojo ñihi rë Nahmi rë me. ² Hacuaha canuhya rë ngu xta tsëhë ngahnga xi nuhya rë sacuaha fane jemu cjin nandan xi vanga o sacuaha xi jemu hñu faneya. Hacuaha nuhya rë sacuaha xi tsijane cha chjine arpa rë cha. ³ Hane xuta jan ne, tisë me ngu sun xatsë xcun cahndé rcun rë Nina hacuaha xcun ñuju xcusun xi quicun cojo can ñuju xuta changá xi viyuju me ngajan. Hacuuiin yëjë me xi tjin rë me cahndé xi cuma rë me sun jan ta, suvá ngu cientu cojo yachan ñuju mil me xi cuacun jan xi cachaha rë me tsëhë ngasunhndë, me vëhë cuma rë me. ⁴ Me xi cuacun vë ne, catsinguetsiin me cjuatacun rë me cojo yachjin, ta caviyuju suva me. Me xi cuacun vë ne, tjengui me Tsánga tu jani xi cjui. Me xi cuacun vë ne, hacuaha me

xi cachjahaxin rë tsëhë ngajñi rë yahnga xuta xi cuma me sacuaha ngu cuatjo xi cumá rë Nina cojo Tsánga. ⁵ Me xi cuacun vë ne, hisca xi ngu cjuandesu cavetjiin tsëhë hntsua me; ta tsajin xi cún rë me.

Jyan ángel xi cachja hacutjin cumá cojo xuta xi faharcun rë chu chojyihí

⁶ Sehe cahvë ngu ángel xi hacjahi xi vitjen vasencja rë ngahnga. Ángel vëhë ne, cjuecani rë cjuandajyihí rë Nina xi machuvaain ngahñu rë. Hane sua rë xuta ngasunhndë tsëhë yëjë ni nación, o tjë, o hne, o nandya xi cumachaya rë me cjuajan. ⁷ Hane cachja cojo xta hñu cuitjin:

—Chjuhuncun rë Nina hacuaha ni hñu jyë nihñu hnga me ta, tsëhë xi ha cavechu hora xi sahmicuenda me yëjë ni. Chjuhuncun me xi casahmi ngahnga cojo nangui cojo ndachacun cojo nanda yufa.

⁸ Sehe tjengui rë me ngu ángel xi majo, hane cachja cuitjin:

—Camá cafë ngahñu cjuar rë gobiernu xi vitexa rë nandya Babilonia. Xuta rë nandya jan ne, catsitsehen yahnga xuta tsëhë xi sacuaha catsichihí rë me cojo xan xi hacui cjuatsehen xi sahmi ngu xihin cojo chjuun xi hacuiin tsëhë.

⁹ Sehe tjengui rë me ngu ángel xi majyan, hane cachja hñu cuitjin:

—Yo xi cjuaharcun rë chu chojyihí o sa xi cjuaharcun rë xcusun ru, hane setaha sellu ru xten o sa tsja me ne, ¹⁰ xuta jan ne, tjin rë me xi cuihingui me xan xi hacui cjuacjan rë Nina, hane tsajin mé xi tsinguijne rë ngahñu rë cjuacjan jan. Xuta jan ne, cuatju me cjuahmu tsëhë ndihi tsëhë azufre xi seti, cuatjin cuatju me xcun ángel cojo Tsánga. ¹¹ Hane nihndi rë ndihi rë cjuahmu rë me ne, cuiji yëjë nu yëjë nixtin. Sa nixtin sa nixten ne, sacuiin rë me cahndé cjuahajenda me tsëhë. Cuatjin cumá cojo me xi faharcun

ru cojo xcusun ru. Cuatjin cumá cojo me xi siutaha rë sellu ru.

¹² Jinguyëjë rë xi vatju vëhë ne, mameje rë xi xuta xi macjain rë me Nina ne, cjuecani rë xi cuetjo me cjuja xi cavitexa Nina hacuaha cumacjain sa rë me.

¹³ Hya xi camá ne, cahndë ngu xta tsëhë ngahnga xi cachja cojo ná cuitjin:

—Nihndi cjuja vihi: “Xuta xi ha cueya me quihndë cojo nixtin xi sehe nduva ne, jercu ndaja tsëhë me sa xi tjengui me ndiya rë Nina.”

Hasen rë Nina ne, chja tsëhë me cuitjin:

—Juun, cjuahajenda me tsëhë xi tsi-jenda rë me ta, tsëhë xi cumatsejen chji rë xa xi casahmi me. —Cuatjin chja Hasen rë Nina.

Ángel ne, fanga me xuta ngasunhndë xi satë rë me cjuacjan rë Nina

¹⁴ Hya xi camá ne, cavutsejen ngu yuffi tyava, hane xcun yuffi ne, tacun ngu xi tsejen sacuaha quihndi rë xuta. Quisun rcu me ngu corona tsëhë oro hane yahatsja me quicha yuju ta cuatë me xitjë.

¹⁵ Ngajan xi cavetju nga ngu ángel tsëhë ndava Nina hane hñu cajindaya cojo ángel xi tacun xcun yuffi jan. Cuitjin cachja:

—Chjuhun quicha nuju nangun ta, ha cavechu nixtin xi xtí ta, tsëhë xi camá quichji cosecha tsëhë ngasunhndë.

¹⁶ Hya xi camá ne, me xi tacun xcun yuffi jan ne, cavaja me nangui cojo quicha rë me, hane tjë rë ngasunhndë ne, camá cachaya rë.

¹⁷ Hya xi camá ne, hacuaha cavetju ngu ángel xi cavetju tsëhë ndava Nina xi tacun ngahnga ne, hacuaha yaha ngu quicha yuju. ¹⁸ Hane cavetju ngu ángel xi majo. Ángel vë ne, tacuntsja rë ndihi. Hane ángel vë ne, hñu cajindaya cojo ángel xi yaha quicha yuju. Hane cuitjin cachja cojo:

—Chehe quicha yuju riji ne, tiche yëjë hne rë uva tsëhë xcun ngasunhndë ta tsëhë xi uva rë ne, jemu quichji.

¹⁹ Hya xi camá ne, ángel jan ne, catsingatju quicha rë xcun nangui ne, cavatë rë uva xi hacui xuta tsehe. Hane cavincha rë cahndë hiscan xinune rë cojo sa xi cumatsyuhun ne cuetju nandá rë sacuaha satë rë matsyuhun cjuacjan rë Nina. ²⁰ Camatsyuhun hiscan xín hitsë tsëhë nandya, hane jemu cavetju jni hiscan camatsyuhun uva jan. Xi camiji jni ne, cavechutaha rë hiscan frenu rë chu naxin hacuaha cavanga ngu chuva rë jyan cientu cojo can kilómetro.

Yatu ángel xi siutsja cjuacjintacun

15 Hya xi camá ne, cahvë ngajan ngahnga ngu nga sen cjuarcun xi jemu fircun naja. Cahvë yatu ángel cojo yatu cjuacjintacun. Hane cojo cjuacjintacun jan ne, cuijnetaha cjuañihi xi cumá ta, sejyu cjuacjan rë Nina.

² Hacuaha cahvë sacuaha ngu ndachacun hasen sacuaha hasen ndyojo tsin, hane tsejen sacuaha tecjan cojo ndihi. Hane ngajan hinchacun xuta xi caca rë me quiji xcun tsëhë chu chojyih cojo xcusun ru cojo xqui rë ñihi ru. Secun me cojo arpa xi cafhatsja me tsëhë Nina.

³ Me vëhë ne, së me sun xi tsëhë Moisés, me xi casahmi xa rë Nina hane hacuaha tsëhë Tsánga. Cuitjin fi cjuja rë:

Jemu má nihñu xa, jemu fircun niji tsëhë.

Nai niji ngayun. Ngayun, tsajin mé xi maji nihñu.

Quixi nújun, hacuaha chichihin ndiya nuju.

Ngayun vitexun jinguyëjë ni nación.

⁴ ¿Yo xi tsacjuiin nuju, tatá? Tsajin yo.

Yëjë ni me sahmi jyë sahmi hnga me yun ta tsëhë xi ngu ni ngayun xi tyjahi cjuatacun nuju.

Vêhë xi yějë ni nación cuinduva cuiticja xcun nuju tsêhë xi cumatsejen ndaja xa cjuaquixi nuju.

⁵ Hya xi camá xi cavatju vihi ne, cavutsejen nga ngahnga ne, hane tixaha hiscan cahndé rcun rê ndihya tsjian rê Nina hiscan hinchu acuerdu xi camá cojo Nina. ⁶ Hane tsêhë ngajan ne, cavetju yatu ángel xi cuacun jan xi siutsja me xa rê yatu cjuacjintacun xi cumá. Ángel jan ne, yaja tsjian rê nachjun ndaja xi ndaja tyjahi. Hacuaha tjiññucja ndanisin rê cojo cinturón tsêhë oro. ⁷ Ngajan xi ngu xi quicun jan xi ñuju má ne, casua rê yatu ángel xi cuacun jan ngu ngu tyucu rê oro xi ndaja teya. Hane tyucu jan ne, quitsë rê cojo cjuacjan rê Nina, Nina xi tacun cuaha me yějë nu yějë nixtin. ⁸ Hane ndihya tsjian rê Nina jan ne, catsë rê cojo nihndi xi nduva tsêhë cjuahasen rê Nina xi seti cojo ngahñu rê me. Cuatjin camá xi tsajin yo ma visehen ngajan hisca xi cuijnetaha nixtin rê cjuañihi xi yahatsja yatu ángel jan.

Tyucu xi hinchu cjuacjan rê Nina

16 Hya xi camá ne, cahndë ngu xta hñu xi vetju tsêhë ndava Nina hane cachja xta jan cojo yatu ángel jan cuitjin:

—Tangun titejnu tyucu jan cojo sa xi cjuacjan rê Nina ne, satë rê ngasunhndë.

² Cojo vêhë ne, quiji ángel xi tjun jan ne, cavitsingaxten rê tyucu rê xcun nangui. Hane yějë xuta xi yaha me sellu rê chu hacuaha faharcun me xcusun ru ne, casetaha rê me ngu xcusun chñhin vetju xi jemu cjan rê.

³ Sehe ángel xi majo ne, cavitsingaxten tyucu rê xcun ndachacun. Hane ndachacun ne, cavuya jni sacuaha jni rê ngu nima. Ngajan cafë cahme xi hinchu rê ndachacun.

⁴ Sehe ángel xi majyan ne, cavitsingaxten tyucu rê cojo sa xi casatë rê nandan ndajyë cojo hiscan xi vetjun nandá.

Hane nandan jan ne, hacuaha cavuya jni. ⁵ Ngajan xi cahndë xi cachja ángel xi tacuntsja nandan jan cuitjin:

—Quixi yun chuva vihi. Ngayun nechun cuaha, hacuaha cavinechun.

⁶ Quixi yun chuva vihi ta catsinguitsojo me jni rê xuta nuju cojo profeta xi chja cjuva nuju. Hane canicuyun chuva rê ta hacuaha cavanga jni rê me.

⁷ Hacuaha canuhya rê xi ngasunscun rê yungun ne, cafayangui cuitjin:

—Juun, cuatjin camameje rê. Tatá, Nina yun, hane tu mé ni ne, ma nuju. Jemu quixi cjuva xi vitexun.

⁸ Hya xi camá ne, ángel xi má hñu ne, cavitsingaxten rê tyucu rê xcun tsuhi. Ngajan casacu rê ngahñu xi jemu cuaca rê xuta cojo ndavá rê. ⁹ Hane xuta ngasunhndë ne, cati me cojo ndavá hñu. Peru cahndë xi sahmi jyë sahmi hnga me Nina ne, canchati me tsêhë ñihi rê Nina, me xi vitexa me xcun yějë cjuacjintacun vihi.

¹⁰ Hya xi camá ne, ángel xi má hñu ne, cavitsingaxten rê tyucu rê xcun cahndë rcu rê chu jan. Hane ngajan camá xi nación xi sahmi chu gobiernu tsêhë ne, jemu jñu camahani camá jingujyë ni. Hane xuta ne, cajiñene me neje me tsêhë xi jercu má rê me. ¹¹ Hane nchati me tsêhë Nina rê ngahnga ngatsë rê cjuahmu rê me cojo tsêhë nindu xi vetju yojo rê me. Nchati me tsêhë Nina cahndë rê xi choho camá rê me tsêhë cjuatsehen rê me.

¹² Hya xi camá ne, ángel xi má jyun ne, cavitsingaxten rê tyucu rê xcun ndajyë jyë xi hmí rê Eufrates. Ngajan xi nandan jan ne, caxiya hane camandaja ndiya rê cojo sa xi ma vatjucja rey xi nduva ladu vetjucaa tsuhi.

¹³ Sehe cahvë jyan hasen tsehen xi cun sacuaha licuen, cavetju tsêhë hntsua chu yë jyë jan, tsêhë hntsua chu tjun cojo tsêhë hntsua chu ndacha. ¹⁴ Hane hasen jan ne, hacui hasen tsehen xi ma sahmi

seña cjuarcun hacuaha hacui xi sahmi tangun rey, xuta matitjun rë jinguyë ni ngasunhdë cojo sa xi xuta jan ne, sahmi si condra rë Nina xi ma sahmi me yëjë ni hya xi cuetjucaa nixtin rë Nina.

¹⁵Tetuhuncun cjua rë Nina xi chja cuitjin: “Tjin chjine yun ta, tu ñahñu ni nduvá sacuaha nduva ngu chëjë. Jercu ndaja tsëhë yo xi tacun quicun, sacuaha ngu me xi tacun chjine tsjian rë me xi cuaja me cojo sa xi tsajin yo sacutsejëntë cjuasava rë me.” Cuatjin chja cjua jan.

¹⁶Hane casahmi xi cama tangun rey jan ngajan ngu cahndé xi hne hebreo ne, hmí rë Armagedón.

¹⁷Hya xi camá ne, ángel xi má yatu ne, cavitejnu tsëhë tyucu rë ngajñi tjo. Ngajan xi hiscan ndava Nina, hiscan cahndé rcun rë me, canuhya rë ngu xta hñu xi chja cuitjin:

—¡Ha camá cajnetaha!

¹⁸Ngajan xi sehe cavetsihin cavatë ndihi chuhun, cafaneya, catsinga chuhun, cojo xi jemu hñu cafani nangui. Hisca cjëë cjuani nangui cuatjin jinguyëjë rë xi caviyuju xuta xcun ngasunhdë ta, jercu cjuachan camahani cafani nangui. ¹⁹Hane ciudad jyë ne, jyan rquí caseya tsuhun. Hacuaha yahnga nandya rë ngasunhdë ne, cavixujne. Hane Nina ne, catsinguitsen me cjuatsehen rë nandya Babilonia jyë hane casahmi me xi hacuaha cuma rë nandya jan castigu tsëhë cjuacjan rë Nina xi hinchu tyucu.

²⁰Hacuaha nangui xi vetju vasencia ndachacun cojo naxi ne, hya cafëya.

²¹Hane tsëhë ngahnga ne, tsi ndyojo yehe cavixusun rë xuta jan. Hane chuva ngu tsi ndyojo vë ne, sacuaha yachan kilu hai. Hane xuta ne, canchati me choho cachja me tsëhë Nina ngatsë rë cjuacjintacun tsëhë tsi ndyojo jan ta, cjuacjintacun jan ne, jemu chircun camahani.

Hacutjin cjuë na xi viteña yojo rë

17 Hya xi camá ne, ngu tsëhë yatu ángel jan xi yaha tyucu ne, canduva tjengui ná ne, cachja cuitjin:

—Ndove ne, tsingácun ri castigu rë na xi viteña yojo rë, na xi tacun na xcun jemu cjin nandá. ²Cojo na vëhë ne, rey tsëhë nangui ne, casahmi me cjuatsehen; hane xuta ngasunhdë ne, catsichihi rë me cojo xan xi hacui cjuatsehen ran. —Cuatjin cachja ángel cojo ná.

³Ngajan xi ángel ne, quijicojo ná ngajñi nguiña ngu cahndé xín. Hane ngajan cahvë ngu chjuun xi quisun na ngu chu chojyihí xi hani xi yatu rcu chu cojo të ndyaja ru. Hane chu jan ne, yaha ñihi xi tsitjungui rë Nina. ⁴Chjuun jan ne, yaja na tsjian chacun xi moradu cojo hani. Hacuaha tsjian vëhë hisca seti jyihí cojo oro cojo ndyojo ndacun hane cojo tu seti xi cavaqui rë. Hane yahatsja na ngu tyucu tsëhë oro xi quitsë rë cojo xcusun tsehen cojo xi chocun rë cjuatsehen rë na. ⁵Hane xten na ne, camahindu cjua vihi: “Ngu cjua xi meje rë cjuatacun: Babilonia, nangui xi matitjun. Nangui xi hacui na xi viteña yojo rë cojo yahnga xuta xi sahmi me cjuatsehen ne, fayanguí xuta xcusun rë na.” Cuatjin camahindu. ⁶Hane camachaya ná ta na vëhë ne, chihi na ta cahvi na jni rë nima xi cahme me ngatsë rë xi macjain rë me Nina cojo jni rë nima xi casua cjuaquixi rë Jesús.

Hane hya xi cahvë na ne, ngahan ne, jercu quijircu camahani ná. ⁷Ngajan xi cachja ángel cojo ná:

—¿Mé má fircun ri? Ngahan ne, suacuenda ri cjuatacunhma tsëhë chjuun jan cojo tsëhë chu chojyihí xi quisun na, chu xi tjin yatu rcu chu cojo të ndyaja ru. ⁸Chu chojyihí jan ne, quicun chu hatsëë, peru quihndë tsajin chu. Hane xi cuinduvaniji chu tsëhë nduchin ne, jiya ndiya chu xi cjuëya chu. Hane xuta xi viyuju

me ngasunhndë ne, me xi casetaain ñihi rë xcun xujun, xujun xi hisca ntsacu cavetsihin ngasunhndë, hinchá ñihi rë me xi satë rë me cjuahñu xatsë xi sua Nina ne, me vëhë cjuercun rë me. Cjuercun rë me hya xi scuëë me chu ta quicun chu hatsëë, tsajin chu quihndë, peru cuya cuejña nga chu.

⁹ Mameje rë cjuatacun ta chja nuhya rë, peru yatu rcu chu ne, nuhya rë xi má yatu ndetjun hiscan quisun na o sa nandya hiscan vitexa na jan. Hacuaha nuhya rë xi má yatu me xi vitexa ngajan. ¹⁰ Hñu me vëhë ne, ha cajnetaha nixtin xi cavitexa me. Ngu nga me ne, tivitexa me. Hane ngu sa me jan ne, hya xi cuitexa me, sahmi ngu jyë xi hacuiin cjin nixtin scaa rë me. ¹¹ Hane chu chojyihí xi quicun chu hatsëë, peru quihndë tsajin chu, cojo chu vëhë cuma jyin me xi cuitexa me ngajan. Chu jan ne, ma jyin, peru hacuiin xín cuinduva chu ta, tsëhë ngajñi rë me xi yatu jan ne, ngajan cuinduva chu hane cjuí hiscan cjuëya cha.

¹² Hane të ndyaja ru xi cahye ne, hacui të xuta xi cjëë cjuahatsja me xa xi cuitexa me. Hane me vëhë ne, sacú rë me cahndë xi cuitexa me tangun cojo chu, peru ngu hora ni cjuecani rë nixtin rë me. ¹³ Hane me vëhë ne, cama sacuaha ngu ni cjuatacun rë me. Hane sahmi tangun me ngahñu rë me cojo gobiernu rë me sehe sua me xi cjuahatsja chu chojyihí. ¹⁴ Hane hya xi sahmi me si cojo Tsánga jan, scaa rë xi cjue xcun Tsánga cojo xuta xicjin. Hane xuta xicjin Tsánga ne, hacui me xi cavuxijin Nina, me xi ndaja finduju xi tjengui rë ta, Tsánga jan ne, Nai rë yëjë ni nai má me. Hacuaha vitexa me xuta xi vitexa. —Cuatjin cachja ángel cojo ná tsëhë na vëhë.

¹⁵ Cachja sa ángel cojo ná cuitjin:

—Sacuaha nandá xi cahye hiscan xi tacun na xi viteña yojo rë na, nuhya rë xi má xuta tsëhë yëjë ni tjë, yëjë nandya, xuta cjin, xuta xi chja yëjë hne.

¹⁶ Hane me xi sacuaha të ndyaja ru ne, cuya xi choho scuëë me na xi viteña yojo rë, tsismi me na, hacuaha cuejña cuatjin na. Hane xi cavejña suva na ne, sehe sinë chu yojo ran sehe cuaca ran cojo ndihi. ¹⁷ Të me jan ne, cojo ngu ni cjuatacun meje sua me xa rë me cojo ngahñu cjuá rë me xi cjuahatsja chu chojyihí jan. Xi cuatjin casahmi me ne, camá hacuatjin cavincha Nina xahasen rë me xi cumá hisca nixtin xi cuma chihin hacutjin cavejñacacun Nina xi cumá. ¹⁸ Hane sacuaha chjuun xi cahye jan ne, nuhya rë xi má ciudad rcun xi satë rë xi cumatitjun tsëhë yëjë ni xuta xi vitexa xuta ngasunhndë.

Cjanengui nandya Babilonia

18 Hya xi cavatju vihi ne, cahvë nga ngu ángel xi nduvajne tsëhë ngahnga xi jemu tjin rë ngahñu cjuá rë. Hane nangui ne, casahasen rë cojo hasen rë ngahñu jan. ² Hane ángel jan ne, cojo ngu xta hñu cajindaya cuitjin:

—¡Cjanengui! ¡Cafë ngahñu rë Babilonia jyë! Quihndë suva machji rë tsëhë xitsehen. Ngajan tsujyihíya hasen tsehen, ngajan vangui yëjë chu nisë xi jinë chu ngu xcusun chocun, chu xi chohovëë xuta chu. ³ Cuatjin camá rë ta tsëhë xi xuta ngasunhndë ne, cavincha sca rë me cojo xan rë cjuatsehen ran. Cojo na vëhë ne, me xi vitexa me ne, casahmi me cjuatsehen. Hacuanitjin tsëhë xuta xi sahmi me negocio ta, camanchina me ngatsë rë cjuatsehen ran. —Cuatjin cachja ángel.

⁴ Sehe cahndë nga ngu xta tsëhë ngahnga xi cachja cuitjin:

—Ngayun xi xuta naha ne, tetjun tsëhë nandya vihi. Tangunxun cojo sa xi cuajjin yun cuatjunxcun jyë rë, hane satiin nuju cjuañihi xi satë rë xuta vëhë. ⁵ Jyë rë na xi hacui nandya vëhë ne, casexohnga rë hisca cavechu ngahnga. Hane Nina ne, cjuaha cuenda me tsëhë cjuatsehen ran. ⁶ Nicuyun tsëhë na chuva xi

casahmi na. Jo cuatjin vechutaha castigu xi cumá ran. Tiseqjun rē copa ran jo cuatjin sa sehe hitsē sa cumá cjan xi cuma rē copa xi cavincha na tsēhē xuta. ⁷Ngojo rē cjuaxta rē na xi jercu sahmi na mé xi fehya cjuatacun tsehen rē na ne, ndaja tuhun ran cjuañihi cjuachoho. Cuatjin cumá ran ta, cuitjin catsingatahacacun na cachja na: “Tejña cahndē rcun ta matitjun ngahan. Hacuuiñ cahan ngahan, satiñ ná cjuachoho.” Cuatjin tsingatahacacun na. ⁸Vēhē xi xcun ngu ni nixtin, cuechutaha ran yējē ni, ta cuechutaha ran cjuachoho, cuechutaha ran jindya. Hacuaha tsicjēya ran ndihi. Cuatjin cumá ta, tsēhē xi Nina, me xi sahmi cuenda rē jyé ran ne, ma sahmi me yējē ni.

⁹Ngajan xi xuta xi rcun xi casahmi cjuatsehen ngajan hacuaha casua cjuasua xahasen rē ngajan ne, scuēē me nihndi rē, hane squihnda me hacuaha cuiyuju va me. ¹⁰Hane cjuercun rē me ngatsē rē chircun xi tivatju ngajan, sehe squindaya me cuichja me cuitjin:

—¡Ay! Jercu choho cavatju ciudad ndajyihi, ciudad rcun. Tu ñahñu ni ne casatē rē yējē ni cjuacjintacun xi cuma castigu rē.

¹¹Hacuaha xuta xi sahmi me negocio ne, squihnda me hacuaha choho cumá rē me tsēhē xi quihndē ne, tsajin yo cuatsē chaha xi viteña me, ¹²chaha xi camá tsēhē oro, tsēhē quicha tyava, cojo ndyojo ndacun, cojo tu seti, cojo tsjian ndacun sa lino sa seda, sa xcusun hani sa moradu. Chaha rē ya xi ndaja jne, chaha xi camá tsēhē nehñu elefante, o tsēhē ya xi hnga chjí rē o tsēhē quicha sine, quicha hinda o tsēhē ndyojo seti. ¹³Tsajin yo cuatsē rē chaha rē canela cojo yahnga xcusun xi sahmi xi ndaja chinē comida o sa tyjungunsa, sa balsamo xi hmí rē muro, sa vinu, sa aceite, sa ndyaja, sa chu tsánga, sa naxin o sa carreta, sa mosu cachaha rē xi hacui

cjuahñu rē xuta. Tsajin yo cuatsē tsēhē me. ¹⁴Cuitjin chja tsēhē nandya jan:

—Xcusun ndacun xi jercu cafehya xahasen riji ne, quijixin tsijin. Yējē ni cjuanchina riji xi ndajyihi ne, cafēya, hane tsajin nu tsajin nixtin cuya sacu ri.

¹⁵Ngajan xi me xi caviteña ngajan hane cojo vēhē cama nchina me ne, cjuercun rē me ngatsē rē chircun xi tivatju ngajan, xinchacun me cjin tsēhē, hane squihnda me hacuaha choho cumá rē me. ¹⁶Cuitjin cuichja me tsēhē:

—¡Jemu va jyihi nandya! Camá ngu nandya jyē, jemu ndacun tsjian catsicaja rē xuta rē. Tsjian ndaja xcusun hani moradu. Tsjian xi cavaqui rē nachjun oro cojo ndyojo ndacun cojo tu seti. ¹⁷Peru xcun xi ngu hora ne, cafē cavetsunya cjuanchina vē.

Hane yējē me xi matitjun xi vitexa tsēhē barcu cojo xuta xi hinchu me cahntsua, cojo cha xi sahmi xa xcun barcu o sa xuta xi sahmi negocio cojo, cumamijí sahmi tiña me tsēhē. ¹⁸Squindayava me hya xi scuēē me nihndi rē xi seti hane cuichja me cuitjin:

—Hatuxa tsajin sa ngu ciudad xi cuanitjin ndajyihi sacuaha camá ciudad jyē vi.

¹⁹Hane cuitejnu me scuan rcu me ta jemu choho má rē me hacuaha squihndava me cuichja me cuitjin:

—¡Cojo cjuatsehen rē xuta nandya vi! Ngatsē rē cjuanchina rē me ne, tu yo ni me xi tjín rē ngu barcu rē chaha ne, cama nchina me. Peru ngu ñahñu ne, cavetsunya.

²⁰Catamasua nuju tsēhē na, ngahnga. Catamasua nuju ngayun xi tyjahi cjuatacun nuju, ngayun xi má apóstol cojo ngayun xi má profeta. Catamasua nuju ta hindē casahmi Nina castigu na, casahmi cuenda me tsēhē na chuva xi casahmi na cojo nuju.

²¹Ngajan xi ngu ángel xi jercu tjín rē ngahñu ne, cafaha me ngu ndyojo jyē

chuva rë natsi rë molinu, hane catsingat-jeya rë ngajni ndachacun. Sehe cachja cuitjin:

—Chuva ngahnu vihi, cuanitjin ngahnu xi cjuinengui cojo nandya jyë xi hmi rë Babilonia. Hane tsajin nixtin xi cuya cumá. ²² Tsajin nixtin xi cuinuhya rë xi tsijane cha chjine arpa ngajan, o sa ngu sun, o sa fane chiruvi o sa fane tyjo. Hiscu ngu cha chjine tsëhë tu mé ni xcusun ne, cuyaain sahmi xa ngajan. Hacuaha cuyaain nuhya rë ndoyojo rë molinu xi sahmi scuan rë pan. ²³ Ndihi rë ngu lámpara ne, cuyaain tsejen hasen rë ngajan. Tsajin nu tsajin nixtin xi ngajan cuma cjuavixan. Cuatjin cumá cojo ta, xuta xi casahmi me negocio ngajan ne, jemu hnu cjuarë me cojo yëjë ni xuta ngasunhdë. Hane cavincha sca me xuta ne, cavindacha me cojo xcusun rë me.

²⁴ Hacuaha ngajan cavanga jni rë profeta cojo tsëhë xuta xi tyjahi cjuatacun rë me xcun Nina cojo jni rë yëjë ni xicjin me xi camá catsiquehen me nguehe ngasunhdë.

Xutacjín xi cuaxëndaja me Nina

19 Hya xi camá cavatju vihi ne, cahndë sacua ha xta rë xutacjín ngajan ngahnga xi chja cuitjin:

¡Catama jyë, catama hnga Nina! Nina ne, vaxëtje me xuta, tjin rë me hasen ndajyihi xi seti, hacuaha ma sahmi me yëjë ni.

² Jemu quixi cjuarë xi vitexa me ta, casahmi me xujun jyë rë na xi caviteña yojo rë, na xi hnu cjuarë. Na vëhë ne, catsinguetsun na cjuatacun rë ngayëjë ni cojo cjuatsehen rë na. Hane Nina ne, casahmingojo me cojo rë na jni rë xuta xi sahmi xa rë me. Jni rë me xi casahmi na xi cavanga.

³ Sehe cavuya cachja me cuitjin:

—¡Catama jyë, catama hnga Nina! ta, nihndi ran ne, miji nchunchujun ni, nu nu ni.

⁴ Ngajan xi can nuju xuta changá cojo catsiñuju xcusun xi quicun ne, caviticja xcun Nina xi cjuaharcun rë me xi tacun me cahndë rcun. Cuitjin cachja me:

—¡Cuatjin jain! ¡Nihnu jyë nihnu hnga Nina!

⁵ Sehe cavetju tsëhë cahndë rcun ngu xta xi chja cuitjin:

Nihnu jyë nihnu hnga Nina, ngayun xi nihnu xa rë me.

Nihnu jyë hnga me sa quihndi sa changá yun.

⁶ Hya xi camá ne, cahndë sacua ha xi tisë xutacjín. Nuhyarë sacua ha fane nandan xi jemu hnu vanga o sacua ha faneyarë xi tsinga chuhun. Hane cjuarë ne cuitjin chja:

¡Catamajyë catamahnga Nina naja ta, ha cavetsihin sahmi me gobiernu hane ma sahmi me yëjë ni!

⁷ Catamasua naja. Tahan cjuasua xahasen naja. Nihña jyë hnga me tsëhë xi cavechu cjuavixan rë Tsángarë.

Chjuun rë ne, ha catsindajarë na yojo ran.

⁸ Casacu rë na cahndë. Hane cuajarë na tsjian ndajarë xi seti, xi tyjahi.

Tsjian jan ne, hacui xcusun ndajarë xi sahmi xuta xi tyjahi cjuatacun rë me xcun Nina.

Cuatjin cachja xutacjín jan.

Sinësuhi me tsëhë cjuavixan rë Tsángarë

⁹ Hya xi camá ne, cachja ángel cojo ná cuitjin:

—Nihndi cjuarë vi: “Jercu ndajarë tsëhë me xi camachayarë xi nduva me sinësuhi me tsëhë cjuavixan rë Tsángarë.”

Hane cachja sa ángel cuitjin:

—Cjuarë cachjarë ne, cjuaquixi jain rë Nina.

¹⁰Hane ngahan ne, caticjátaha ntsacu ángel xi cjuahárcun rë. Peru cachja cojo ná cuitjin:

—¡Xicanihñii! ta, tangun ni chjí naja, ta xa naha ne, tangun cojo xa xi nihñu cojo xingun xi sua cumachaya rë cjuaquixi rë Jesús ne, hacui xa xi vitexa Nina. Nina ne, me vëhë chjuhuncun me.

Hacuaha cjuaquixi rë Jesús ne, vëhë sacuaha cacun rë cjua xi cachja profeta.

Me xi quisun rë naxin tyava

¹¹Sehe cahvë xi tixaha ngahnga, hane ngajan ne, cahvë ngu chu naxi tyava. Hane me xi quisun rë chu ne, chja tsëhë me ta, sahmi chihin me cjua rë me hacuaha quixi me. Jemu quixi cjua me hya xi tsichuva me xuta cojo sa xi hya xi sahmi me si. ¹²Tuxcun me ne, sacuaha ndihi xi ña vitjen. Rcu me ne, jercu hinchasun corona. Hane camahindu ngu ñihi rë me xi tsajin yo vëë rë, peru suva me vëë me. ¹³Yaja me ngu tsjian xi tjintë ni ne, xi caseyaquinda cojo jni. Hane sacuaha ñihi rë me ne, Cjua rë Nina hmí rë me. ¹⁴Hane tjengui rë me sindadu cjín tsëhë ngahnga. Sindadu jan ne, cuaja me tsjian ndaja xi tyava, xi tyjahi. Hane hacuanitjin hinchasun me naxin tyava. ¹⁵Hane suva me ne, tsëhë hntsua me ne, vetju ngu quicha yuju xi cuanguihmu rë xutacjín. Hane hacuiin yuma cumá rë me xuta ta, cuitexa rë me cojo yaxti rë quicha. Hane sune me cahndé hisca nune rë uva cojo sa xi cuaxë me xan rë cjuacjan rë Nina, me xi ma sahmi yëjë ni. ¹⁶Hacuaha xcun tsjian rë me cojo tyuhmi rë me ne, camahindu ñihi vi: “Me xi matitjun tsëhë ngayëjë ni xi matitjun. Me xi matitjun tsëhë ngayëjë ni xi vitexa.”

¹⁷Hane cahvë xi ngu ángel ne, secun xcun tsuhi. Hane jindayahñu tsëhë nisë xi jemu hnga vitjen chu. Cuitjin cachja cojo chu:

—Nduvun. Catamatangun yun tsëhë suhi jyë rë Nina. ¹⁸Ngajan xinu yojo rë xuta xi camatitjun, cojo yojo rë capitán rë sindadu cojo yojo rë xuta xi hñu cjua, cojo yojo rë chu naxin cojo yojo rë xuta xi caxinchasun rë chu. Xinu yojo rë xuta, sa ndaya tjín me o sa xi caxteña me, sa langa me, sa changá me, xinu yojo rë me. —Cuatjin cachja me cojo chu nisë jan.

¹⁹Hane cahvë chu chojyihi jan cojo xuta xi vitexa me cojo sindadu cjín rë, hane camatangun cojo sa xi sahmi si cojo me xi hinchasun chu naxin tyava jan. ²⁰Hane ngajñi si vëhë ne, cachjaha rë chu chojyihi jan camá presu chu. Hacuanitjin ne camá presu chu xi casahmi cjuarcun ngatsë rë chu chojyihi cojo sa xi cavindacha chu xuta sehe setaha sellu rë chu xten me hacuaha faharcun me xcusun ru. Sehe cacandiya quicu me catsijo chu ngajñi ndachacun xi ti cojo azufre. ²¹Hane xicjin chu xi cavan-gui ne, catsiquehen me cojo quicha xi vetju tsëhë hntsua me xi miji rë naxin. Sehe yëjë ni nisë ne, cajnësua chu hisca xi cavechu rë xahasen ru cojo yojo rë xi cuicun vi.

Ngü mil nu xi seyahñu xitsehen

20 Sehe cahvë ngu ángel xi nduva-jne tsëhë ngahnga, hane yahatsja ángel vë llavi tsëhë nduchin hacuaha yahatsja ngu cadena jyë. ²Hane cafaha rë yë jyë jan. Chu vëhë ne, hisca hatsëë tacun chu. Chu vëhë ne, hacui naain o sa Satanás. Hane xi cafaha rë chu ne, catsihñu rë chu cojo cadena xcun xi ngu mil nu. ³Hacuaha catsingatjenya ru cahntsua nduchin. Sehe casechjahñu tingotjo rë cojo llavi hane casetaha xcun ngu sellu. Cuatjin camá cojo sa xi sacuiin sa cahndé cuindacha ru xutacjín hisca xi cuijnetaha ngu mil nu. Hane xi cu-atju vëhë ne, cumandaya nga chu ngu jo nixtin.

⁴ Hya xi camá ne, cahvë cahndé rcun hane xcun silla jan ne, siu me xi casatë rë xa xi cuitexa me. Hacuaha cahvë hasen rë me xi catisun rë rcu ngatsë rë cjuaquixi rë me xi casua me tsëhë Jesús hacuaha ngatsë rë cjua rë Nina. Me vëhë ne, cakaharcuaain rë me chu chojyih cojo xcusun ru, hacuaha casetaain rë me sellu rë chu sa xten me o sa tsja me. Hane cahvë xi cavuya nga cjuahñu rë me sehe cojo Cristu casahmi me gobiernu xcun ngu mil nu. ⁵ (Yahnga nima ne, cuyaain cjuahñu hisca xi cjuë mil nu jan.) Matsejen ta vëhë nixtin xi tjun cuya cjuahñu rë nima. ⁶ Jercu ndaja tsëhë me hacuaha tyjahi cjuatacun rë me xi cojo me satë rë me xi tjun cuya me cjuahñu. Cjuaveya xi majo ne, satiin rë me ta, tsajin mé ma sahmi cojo me. Cumá me sacuaaha nahmi xcun Nina cojo Cristu hane sahmi me gobiernu cojo me xcun ngu mil nu.

⁷ Hane xi cuijnetaha mil nu jan ne, cumandaya nga Satanás tsëhë ndavaya hiscan caveya me. ⁸ Sehe cuya cuindacha xutacjín rë jingujyë ni ngasunhndë, cuindacha me xuta rë Gog cojo xuta rë Magog, cojo sa xi sahmitangun rë tsëhë si. Hane xqui rë me xi cumatangun me ne, cuechu sacuaaha tsumi tjeheh rë ndajyë. ⁹ Hane xi camatangun me condra jan ne, cjue me jingujyë ni xcun nangui. Hane ngajñi si ne, cuiyujuhndee rë me cahndé xi siu sindadu cjín rë Nina cojo nandya xi tsihmuacacun me. Peru ndihi ne, cuijne tsëhë ngahnga hane cjue cueti xuta condra jan.

¹⁰ Hane Naain xi cavindacha rë ne, ningatjenya rë ngajñi laguna tsëhë azufre xi seti. Hane ha cuanitjin ne catundiya chu chojyih jan cojo chu xi cavindacha. Hane ngajan ne, cuatju chu cjuañihi nixtin nixten, nu cjuí, nu nduva.

Camacuenda tsëhë nima xcun cahndé rcun tyava

¹¹ Hya xi camá ne, cahvë nga cahndé rcun tyava xi matitjun cojo me xi tacun xcun. Hane ngatsë rë cavatjuxcun me, cafëya nangui cojo ngahnga, hane casacuiin cahndé xi cuma rë. ¹² Hacuaha cahvë nima. Sa changá, sa quihndi, hinchacun yëjë ni nima xcun cahndé rcun jan. Hya xi camá ne, ngu jo libru ne catuxaha. Hacuaha catuxaha ngu libru xi hacjahi. Hane libru vëhë ne, libru rë cjuahñu. Sehe camacuenda tsëhë, sacuaaha xcusun xi casahmi nima, hacutjin xi camahindu xcun libru tjun. ¹³ Ndachacun ne, casua nima xi tjintsja. Cjuaveya cojo tsjun ne, hacuaha casua nima xi tjintsja. Hane jima ngu nima ne, camacuenda tsëhë hacutjin xcusun xi casahmi me. ¹⁴ Hya xi camá ne, tsajin sa cjuaveya, tsajin Hades, cahndé xi viyuju nima ta, catundiya ngajñi laguna xi seti cojo ndihi. Hane ndihi vëhë ne, hacui cjuaveya majo. ¹⁵ Ngajan xi nima xi case-taain ñihi rë me xcun libru tsëhë cjuahñu ne, cavixuya ngajñi laguna tsëhë ndihi jan.

Ngahnga cojo ngasunhndë ne, camá xatsë

21 Xi cavatju vëhë ne, cahvë ngu ngahnga xatsë cojo ngu ngasunhndë xatsë ta, tsëhë xi ngahnga xi tjun cojo nangui xi tjun ne, cafëya. Hane sacuaaha ndachacun ne, tsajin. ² Hane ngahan, Juan, cahvë nandya xi catsinchacun Nina xi hmí rë Jerusalén xatsë. Canduvajne tsëhë Nina ngajan ngahnga. Jemu ndaja tsejen nandya vë ta, tsejen sacuaaha ngu na xi cuixan xi canicaja rë na tsjian ndajyih tsëhë xi nduva cha xi cuixan cojo rë na. ³ Sehe cahndé ngu xta hñu xi cachja tsëhë cahndé rcun. Cuitjin cachja:

—Ha quihndë cjue cuiyuju tangun Nina cojo xuta. Hane xuta jan ne, cumá xuta rë me, hane suva me ne, cumá me Nina rë me. ⁴Hane Nina ne, tsixiya me yějë ndatuxcun me. Quihndë tsajin sa cjuaveya. Tsajin sa cjuachoho. Tsajin mé má squihnda me. Tsajin cjuahmu. Cuatjin cumá ta, tséhë xi xcusun changá ne, ha cavatju.

⁵Hane me xi tacun xcun cahndë rcun ne, cachja me cuitjin:

—¡Tisahme xatsë yějë ni xcusun!

Hane cachja me cojo ná cuitjin:

—Nihindi cjua vihi ta, hacui cjuaquixindaja hane macjain naja tséhë.

⁶Hane cachja sa cojo ná cuitjin:

—Ha camachihin. Sacuaha letra xi vet-sihin cojo letra A ne, vijnetaha cojo zeta. Hacui ni ngahan xi ntsacu vetsihin ne, hacui ni ngahan xi vijnetaha. Me xi xinda rë xahasen rë me ne, tu cuatjo ni suá cuihi me tséhë nandá xi sua cjuahñu xatsë. ⁷Me xi scaa rë cjue xcun ne, sacu rë me cjuatjo rë Nina. Hane cumá ngahan Nina rë me, hacuaha cumá me quihndi naha. ⁸Peru yo xi tsacjun, yo xi macjaain rë, yo xi hngacacun, cha tsiquehen, me xi sahmi cjuatsehen ngajñi xihin o sa ngajñi chjuun, o xi sahmi surqui, o xi faharcun nina ndacha, o xi chjaain me cjuaquixi ne, yějë ni me vëhë ne, sacu rë me cahndë ngajñi laguna tséhë ndihi xi ti cojo azufre. Hane vëhë ne, hacui cjuaveya xi majo.

Hacutjin jyih ciudad xatsë xi hmí Jerusalén

⁹Hane ngu ángel tséhë yatu jan xi yahatsja tyucu të xi quitsë rë cojo yatu cjuacjintacun xi vijnetaha jan ne, candu-vatjengui ná ne, cachja cojo ná cuitjin:

—Ndove ta, tsingácun ri na xuta vixan, na xi camá chjuun rë Tsángá.

¹⁰Hane ángel jan ne, quijicojo ná ngajñi nijña naha hiscan ngu ndetjun naxi hnga. Sehe catsingacun ná nandya

xi catsinchacun Nina, nandya xi hmí rë Jerusalén ta tinduvajne tséhë Nina ngajan ngahnga. ¹¹Hane ña tsejen xi seti cojo hasen tséhë ngahñu rë Nina, hisca sua hasen rë sacuaha ngu ndyojo seti xi yufa sacuaha ndyojo tsin. ¹²Hane cavindee rë ngu xondyojo teya hacuaha hnga. Tejó má tingotjo rë, hane jimangu tingotjo jan ne, ngajan siu ngu ángel. Hacuaha ngajan camahindu ñihi rë tejó tjë rë xuta nangui Israel. ¹³Xondyojo jan ne, tjin jyan tingotjo jimangu ladu. Jyan má ladu vetjucaa tsuhi. Jyan má ladu ngatihin. Jyan má ladu canangui. Hacuaha jyan má ladu vetje tsuhi. ¹⁴Xondyojo rë ne, tacun xcun tejó xihndë naña. Hane xihndë naña ne, yaha ñihi rë tejó apóstol rë Tsángá xi camahindu xcun.

¹⁵Ángel xi chja cojo ná ne, yaha ngu ya naxu tséhë oro xi machjirëhë sacuaha ya chuva xi cjuahachuva rë nandya cojo xondyojo cojo tingotjo rë. ¹⁶Nandya jan ne, cuadradu jyih. Jimangu tjehe rë ne, jo mil jo cientu kilómetro má xi nduju. Hane hacuanitjin ne má xi hnga. ¹⁷Hane catsichuva xondyojo rë. Vëhë tjin rë ngu cientu cojo yachan ñuju nda sacuaha chuva rë xuta ta vëhë casahmixa ángel cojo.

¹⁸Sacuaha xondyojo rë ne, camá cojo ndyojo seti xi hmí rë jaspe, hane nandya ne, suva oro camá hane seti sacuaha ndyojo tsin. ¹⁹Xihndë naña rë xondyojo rë nandya ne, camá cojo ndyojo seti rë yějë ni xcusun xi sacuaha xcusun rë yejña. Xihndë naña rë xi tjun ne, camá tséhë jaspe. Xi majo ne, tséhë zafiro. Xi majyan ne, tséhë ágata, má ñuju ne, tséhë esmeralda, ²⁰má hñu ne, tséhë ónice, má jyun ne, tséhë cornalina, má yatu ne, tséhë crisólito, má jyin ne, tséhë berilo, má ñaja ne, tséhë topacio, má të ne tséhë cir-sopraso, má tengu ne, tséhë jacinto, hane má tejó ne, tséhë amatista. ²¹Sacuaha tejó tingotjo jan ne, camá tséhë tu seti xi

hmí perla. Hane jimangu tingotjo camá tsêhê ngu perla. Hane ndiyatê rê nandya jan, tsêhê suva oro camá peru sacuahana ndyojo seti xi ña hasen tsejen.

²²Ngajan ciudad vêhê ne, cahveen ngu yungun. Mamijí rê ta tsêhê xi ngajan cuiyuju Nina, Nai naja xi ma sahmi me yêjê ni, cojo Tsánga xi hacui me sacuahana yungun. ²³Cuanitjin ne, mamijí rê tsuhi cojo sá xi sua hasen rê ta, tsêhê xi hasen rê ngahñu rê Nina ne, sua hasen rê ngajan, hane Tsánga ne, má ndihi rê. ²⁴Yêjê xutacjín ne, tsujyihya me cojo ndihi vê xi cjue me cojo ngasunhndê rê me, hane xuta matitjun rê me ne, ngajan cjue cani me ngahñu rê xa xi vitexa me cojo xi cuaxëndaja me. ²⁵Ngajan hisca xi ngu nixtin ne, sechjaain tingotjo rê, tsêhê xi ngajan ne, tsajin nixtin cuma nguixun. ²⁶Hane xutacjín tsêhê ngasunhndê ne, cjue cani me ngahñu cjua rê me cojo cjuanchina rê me. ²⁷Hatuxa tsajin cahndê xi cuma rê tu mé ni xi hacuiin tyjahi xcun Nina. Tsajin yo xi sahmi cjuatsehen, tsajin yo xi cuichja ndesu. Suva ni me xi casetaha ñihi rê xcun libru rê Tsánga, libru xi yaha ñihi rê me xi sacui rê cjuahñu xatsê ne, me vêhê sacui rê me cahndê.

22 Sehe ángel ne, catsingacun ná ndajyê xi hacui nandá xi sua cjuahñu. Nandá vêhê ne, nandá yufa xi hasen sacuahana ndyojo tsin. Hane nandá vêhê ne, vetju tsêhê cahndê rcun rê Nina cojo Tsánga, ²hane vanga taha ndiyatê cavasen nandya. Xingu xingu ladu tsêhê ndajyê ne, secun ya tsêhê cjuahñu. Ya vêhê ne, tejó ndiya xi ngu nu tjin chan tsêhê tu rê ta, chuva sá sua tu rê. Hane xca rê ya ne, machjirêhê xi tsirqui rê xutacjín jan. ³Ngajan ne, tsajin mé xi chohovêê Nina tsêhê. Ngajan nandya vê tacun cahndê rcun xi tsêhê Nina cojo Tsánga. Hane ngajan ne, me xi tacun xi xa rê me ne, cjuahacuenda rê me. ⁴Scuêê me xcun Nina, hane ñihi rê Nina ne, se-

taha xten me. ⁵Mamijí rê ndihi, sa ndihi rê lámpara o sa tsêhê tsuhi ta, Nina Nai naja ne, sua rê me hasen rê me. Hacuaha gubiernu xi sahmi me ne, cjuecani rê yêjê nu, yêjê nixtin.

Camatiña nixtin xi cuya Jesucristu

⁶Hya xi camá ne, cachja ángel jan cojo ná cuitjin:

—Cjua vihi ne, cumacjain nuju tsêhê ta, quixi jain. Nina, Nai naja ne, catsingatju me ángel rê me xi sua cumachaya rê hasen rê xuta xi chja cjua rê me tsêhê xcusun xi xati cumá.

⁷Chja cjua ta:

—Tuhuncuendun xi ngutjen cuinduvá. Jercu ndaja tsêhê xuta xi vetjondaja me sahmichihin me cjua rê libru vihi xi chja tsêhê xcusun xi sehe cumá.

⁸Juan hmí ná. Cahndê, hacuahana cahvê xcusun vihi. Hane hya xi camá cahndê cahvê ne, caticjexcun taha ntsacu ángel jan xi catsingacun ná xcusun vihi ta, cjuaharcun ángel jan. ⁹Peru cachja ángel cuitjin:

—¡Xicanihñii! ta, tangun ni chjí naja, ta xa naha ne, tangun cojo xa xi nihñu cojo xingun xi má profeta cojo yahnga xingun xi vetjo me cjua rê libru vihi. Nina ne, me vêhê chjuhuncun me.

¹⁰Hacuaha cachja me cuitjin:

—Xicavisaniin sellu cjua xi sehe cumachihin xi hincha libru vihi, ta nixtin rê ne, ha meje cuechu.

¹¹Cuejña xi xuta xi choho sahmi me ne, catjinduju xi choho sahmi me, hane xuta tsehen ne, catjinduju me cojo cjuatsehen rê me, hacuanitjin ni xuta xi quixi me ne, catjinduju me cojo ndiya rê cjuaquixi, hane xuta xi tyjahi cjuatacun rê me, catjinduju me cojo ndiya rê cjuatacun tyjahi.

¹²Chja me cuitjin:

—Tuhuncuendun xi ngutjen cúa. Hane xi cúa ne, nduva cojo chjí nuju. Suá rê jimangu me chuva rê hacutjin xi

casahmi me. ¹³Ngahan ne, sacuaha letra xi vetsihin cojo letra A ne, vijnetaha cojo zeta. Hacui ni ngahan xi ntsacu vetsihin ne, hacui ni ngahan xi vijnetaha. Tejña hisca ntsacu cavetsihin yějě ni, hane tejña cuaha hya xi cjuě. Matitjun, matjengui ngahan.

¹⁴Jemu ndaja tsěhě xuta xi catsityjahi me tsjian rě me cojo sa xi sacu rě me cahndě xi sině me tsěhě ya rě cjuahñu xatsě. Xi cuatjin ne, cuma cuisehen me taha tingotjo rě nandya jan. ¹⁵Peru xuta tsehen cuiyuju me ndatsen cojo xuta xi sahmi cjuasurqui, o xi sahmi cjuatsehen ngajñi xihin o sa ngajñi chjuun, o xi tsiquehen, o xi faharcun nina ndyojo o me xi tsihmucacun cjuandacha. Yějě ni me vėhě cuiyuju me ndatsen nandya.

¹⁶—Ngahan, Jesús ne, catsingátju ángel naha xi tsinguixi xcun ngayun xuta yungun cjuaquixi vihi. Ngahan ne, tjě rě David má ngahan. Quihndindaicjin rě David má ngahan. Niñú seti tsěhě ngui-tajñu má ngahan. —Cuatjin chja Jesús.

¹⁷Ngajan xi Hasen rě Nina cojo na xi cuixan cojo Tsánga ne, cjuayangui me cuitjin:

—Nduvun.

Hacuaha me xi cuihndě cjuua vėhě ne, cuichja me cunitjin ni:

—Nduvun.

Sa xi xinda nuju ne, nduvun. Sa xi cjuayatacun ne, siuhun tu cuatjo ni nandá rě cjuahñu.

¹⁸Suá cumachaya nuju ngayun xi visiñuju cjuua rě xujun vihi xi sehe cumachihin ta, sa xi tjin yo xi cuesuntaha sa cjuua cojo cjuua xi camahindu nguehe, Nina ne, cuesúntaha me cjuañihi xi camahindu xcun xujun vi. ¹⁹Hacuanitjin ne, sa xi tjin yo xi cjuahataha rě cjuua vihi xi sehe cumachihin, Nina ne, cjuahaxin me cahndě xi cumá rě me xcun xujun rě cjuahñu cojo tsěhě nandya xi catsinchacun Nina cojo tsěhě xcusun ndaja xi camahindu xcun libru vihi.

²⁰Hane me xi sua cjuaquixi xi cuicun vi ne, chja me cuitjin:

—Hatuxa nduva xati.

Cuatjin chja me. Cuatjin ndatjin. Nduvun, Tatá Jesús.

²¹Quihndě ne, catisatě nuju cjuandaja rě Nai naja, Jesucristu. Cuatjin jain cumá.